


Eta Táurinaquene máechajiruvahi ema Viya eta
viyehe, ticajare puito Eta Nuevo Testamento



New Testament in Ignaciano (B:Lign:Ignaciano)

**Eta Táurinaquene máechajiruvahi ema Viya eta viyehe,
ticajare puito Eta Nuevo Testamento
New Testament in Ignaciano (BL:ign:Ignaciano)**

copyright © 2012 Wycliffe Bible Translators, Inc.

Language: Ignaciano

Translation by: Wycliffe Bible Translators, Inc.

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ignaciano

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source files dated 29 Jan 2022
332465cd-916c-5bfc-8721-b0114be92360

Contents

San Mateo	1
San Marcos	61
San Lucas	100
San Juan	164
Hechos	209
Romanos	265
1 Corintios	288
2 Corintios	312
Gálatas	327
Efesios	336
Filipenses	344
Colosenses	350
1 Tesalonicenses	356
2 Tesalonicenses	361
1 Timoteo	364
2 Timoteo	371
Tito	376
Filemón	379
Hebreos	381
Santiago	399
1 Pedro	405
2 Pedro	412
1 Juan	416
2 Juan	422
3 Juan	423
Judas	424
Apocalipsis	426

Ena Apóstole Mateo májuequenehahi eta máichararacavahi ena Jesucristo, ticajare puiti eta EANGELIO SEGÚN SAN MATEO

*Ena achaneana máchucáequeneanaini ena Jesús eta acane
(Lc 3.23-38)*

¹ Nuvaraha numetacaheya mayehe ena Jesucristo. Éma, vijaneanahi israelítahi, taicha eta mámariéquenerahi ena víachucaini Abraham. Énerichuvare, ena Jesús rey-yarehi taicha eta mámariéquenerahi ena víarahaini rey David. Eta juca eta nalista ena máchucáequeneanaini ena Jesús.

² Ena víarahaini Abraham, macachichapa ena Isaac. Ena Isaac macachichapa ena Jacob. Ena Jacob macachichapa ena Judá énapa ena apamuriana maparapeneana.

³ Ena Judá macachichapa ena Fares émapa ena Zara. (Esu naena ticaijaru Tamar.) Ena Fares macachichapa ena Esrom. Ena Esrom macachichapa ena Aram.

⁴ Ena Aram macachichapa ena Aminadab. Ena Aminadab macachichapa ena Naasón. Ena Naasón macachichapa ena Salmón.

⁵ Ena Salmón macachichapa ena Booz. (Esu maena ticaijaru Rahab.) Ena Booz macachichapa ena Obed. (Esu maena ticaijaru Rut.) Ena Obed macachichapa ena Isaí.

⁶ Ena Isaí macachichapa ena rey David. Ena rey David macachichapa ena Salomón. (Esu máenaini ticaijaru Betseba, esu mayenainihi ena Urías.)

⁷ Ena Salomón macachichapa ena Roboam. Ena Roboam macachichapa ena Abías. Ena Abías macachichapa ena Asa.

⁸ Ena Asa macachichapa ena Josafat. Ena Josafat macachichapa ena Joram. Ena Joram macachichapa ena Uzías.

⁹ Ena Uzías macachichapa ena Jotam. Ena Jotam macachichapa ena Acáz. Ena Acáz macachichapa ena Ezequías.

¹⁰ Ena Ezequías macachichapa ena Manasés. Ena Manasés macachichapa ena Amón. Ena Amón macachichapa ena Josías.

¹¹ Ena Josías macachichapa ena Jecónías énapa ena maparapeneana, ena nacarataruanahi námaqueneanahi ena apavasana ticavasana te Babilonia.

¹² Te táequenepa eta juca, ena Jecónías macachichapa ena Salatiel. Ena Salatiel macachichapa ena Zorobabel.

¹³ Ena Zorobabel macachichapa ena Abiud. Ena Abiud macachichapa ena Eliaquim. Ena Eliaquim macachichapa ena Azor.

¹⁴ Ena Azor macachichapa ena Sadoc. Ena Sadoc macachichapa ena Aquim. Ena Aquim macachichapa ena Eliud.

¹⁵ Ena Eliud macachichapa ena Eleazar. Ena Eleazar macachichapa ena Matán. Ena Matán macachichapa ena Jacob.

¹⁶ Ena Jacob macachichapa ena José, ena suímahi esu María, máenahi ena Jesús, ena ticajare Cristo, ena vicuchapaquenehi.

¹⁷ Tacahe, catorcemuriana ena mámariéqueneanainihi ena Abraham. Ena rey David, émapa náichecuinehi eta natupa. Tacahe, ena rey David, catorcemurianavare ena mámariéqueneanainihi. Ena nacarataruanahi námaqueneanahi ena apavasana te Babilonia, énapa náichecuinehi eta natupa. Ena Jecónías, catorcemuriana ena mámariéqueneanainihi. Ena Jesucristo, émapa náichecuinehi eta natupa.

*Ena máchusira ena Jesús
(Lc 2.1-7)*

¹⁸ Ani tacahehi eta máchusirahi ena Jesucristo. Esu maena María, tráturipahi eta suítauchirayarehi ena José. Vuíchahasera nacachaneahini. Ticajaripahisera ésu, mávajúechirahi ena Espíritu Santo.

¹⁹ Ena José, tétavacavahi eta máuriva. Eta tacahe, vahi tisemaimahi. Váhivare mavarahahini máimcatsiriachahini esu María. Mavarahahisera macaepaha eta matratune suyehé ésu. Váhiserá mávarahahini náechahini ena achaneana eta tacayemaquenehi.

²⁰ Ena Viya máimararacahi eta mapanereruhi. Eta tacahe, tiúcupaicapa ena ángele mametapanahi te mavapure ena José. Anipa máicha*:

* **1:20** Ena ángele, eta máechajisirahi ena José, manacahi eta nayeherepi náechajisira ena israelítana. Ani macahehi: "Piti José, machicha ena David".

—Tata José, tímitecanuhi numetapanavi eta juca: Vahi picueñamava eta pítauchirayare esu María. Tájina píchavaimahi. Taicha ticajari pahí ésu, mávajuetchirahi ema Espíritu Santo.

²¹ Tacahe, te máuchucapa ema suchichayare, enacayare eta májareyare JESÚS. Éma ticatiuchayare ena achaneana tayehe eta naviurevanayarehini taicha eta napecaturana —máichapa ema ángele.

²² (Títauchavapahi tamutu eta juca máechajiriruvanahi ema Viya mayehe ema víyarahaini profeta Isaías.

²³ Aní tacahehi: “Sutiarihiyare esu amaperu esena témunahircavaya ticajari. Ema suchichayare, yátupiqueneyare eta émaira Viya, tiúcupauchahaviyare ticatiuchahavipayanayare” tacahepa.)

²⁴ Tacahe, te téjamiuchavapa ema José eta macavapureirahi, ichaperinehi eta masuapirahi eta máechajiriruvanahi ema ángele mavaneruhi ema Viya, eta máitachirayarehi esu María.

²⁵ Váhisera nánecacahini te jena cájeanahi eta sucajarirahi. Tacahe, suínacapa ema suárachichahi. Nanacapa eta májarehi JESÚS.

2

Náejirapana ema amuya ena reye mágoana

¹ Eta máuchusinehi ema Jesús te avasare ticajare Belén tayehe eta departamento Judea. Te jena año, ema Aluresi ema tayehehi rey eta Judea. Tásiha, títécapanapa te Jerusalén ena reye mágoana tiásihanahi te tayerehiquene avasare tinapaica te táuchusine eta sache.

² Nacayasesererupaipahi, ánipa nacahe:

—Víti, tímitecahavi eta vitanusirahi ema amuya máuchurehi rey-yarehi eyehe eti israelítana. Taicha vímahahi eta arairu jarairiqui, vétetearuhi máicutiarahi ema Viya eta máuchusinehi ema amuya rey-yare. Titupihapa eta te juca eyehe. Puiti vivarahahi véjirapanayare éma. ¿Távihapuca mávihahi ema amuya? —nacahepa.

³ Te masamairicapa ema Aluresi, ichaperinehi eta mapaneréqueneháirahi. Vaipa máurisamurehíni. Ena achaneana te tajuhe eta avasare, énerichuvare napaneréquenehahi éna apanavare eta juca téchacarehi.

⁴ Tacahe, ema Aluresi máimichuhavacapa namutu ena tuparairucana énapa ena títuruequenehana eta Sagrada Escritura. Mayaserecavacapa:

—¿Távihapuca máuchusihayarehi ema vicuchapaquenehi ticajareyare Cristo? —macahepa.

⁵ Éna najicapapa:

—Te Belén te tachacaya eta juca viávava Jerusalén. Taicha tacahehi eta májarehi ema víyarahaini profetaíni Isaías. Máechajicahi éma eta avasare tímícutijiricavahi eta achanehanini. Ánipa macahe:

⁶ “Píti avasare Belén, tachichavihi eta Judea, picunachacarepánayare píti. Taicha eta máuchusihayarehi piyehe ema ichapequenyarehi eta maháquenucávayare. Éma, téchajirimirihayare namutu ena vijaneanana israelítana”.

⁷ Tacahe, te masamapa ema Aluresi, máichuhavacapa ena mágoana. Mañajichamuripa, taicha mavaraha máechaya tájamuhupuca te tépanavainapa náimahapa eta jarairiqui.

⁸ Te máechapa, mavanecavacapa éna te Belén. Máichapa:

—Eyana etanuca ema amuya te Belén. Te étupiacapuca, echava emetacanuyare, apaesa nuyana nútí apanavare néjirapanayare —máichavacapa.

⁹ Tacahe, ena mágoana, eta nasamirahi, tiyananavarepa. Tásiha, náimahavarepa eta jarairiqui náehirupahi. Tiyanapa te namirahu. Éta te Belén eta tatupihaiyahi, te táinahu eta mávihahi ema amuya.

¹⁰ Tétavicava eta náurisamurevahi ena mágoana eta náimairahi eta tatupihairaripa.

¹¹ Títécapanavanepa eta te peti mávihahi ema amuya. Náimahapa éma, ésupa esu maena María. Tásiha, tépuyucanapa natsucapa ema amuya. Navecuhapa eta námavahuanapahi. Nájaracasichapa eta oro, eta incienso éta pa eta tájijyequene perfume.

¹² Te táequenepa eta náejirairahi ema amuya, tichavanayarepa te návava. Apanapasera eta achene eta nayanihapahi, taicha ticametacasianapa te navapure vaipa nacuetavajica te mávihahi ema Aluresi.

Ema José ésupa esu María náimijunapa ema amuya te Egipto

¹³ Tacahe, te táequenepa eta nayanirahi ena mágoana, tiúcupaicapa ema émana ángele mavaneruhi ema Viya, mametapanayarehi ema José te mavapure. Ánipa máicha:

—Pécheputa, José. Piyana piáma ema amuya ésupa esu María tayehe eta Egipto. Pinasiyare ánaqui. Tiámainucava te numetacavivare eta pichavirainapa, taicha ema Aluresi titecayare matanucayare ema amuya, mavarairahi macapacayare —máichapa ema ángele.

¹⁴ Tacahepera ema José técheputa. Tétupiricavanavana te jena yati. Tiyananapa námapa ema amuya tayehe eta Egipto.

¹⁵ Nanasipa ánaqui. Tiámainucava te tépenapa ema Aluresi, ticavanahianavarepa mayehe ema ángele eta nachavirayare. Tamutu eta juca títauchavahi eta juca mametarapi ema Viya eta te Sagrada Escritura, ani macahehi: “Te Egipto nímiyunaiyahi ema nuchicha. Te táequenepa, níchuhayarepa éma”.

Éma Aluresi máimicapapajicapa ena amuyanaini te avasare Belén

¹⁶ Tacahe, ema Aluresi te masamairiricapa eta nánucuiraripa ena mágoana, tisemarinehi eta navayuasirahi. Máimivanerecapa nacapapajicapana namutu ena amuyana ajairana tiávihanahi te Belén énapa ena tiávihanahi te tachacayahana, ena ticayehearipa apina año énapa ena náuchusirávana. Máepanaequenehapa eta táuchusihahi eta jarairiqui náimahaquenehi ena mágoana.

¹⁷ Tacahe, te Belén eta táitachiravahi eta májuchaquenehi ema víyahaini profetaini Jeremías. Ani tacahehi:

¹⁸ “Tétavichavahi eta najapanuiravahi ena esenana. Ichape eta náiyairahi taicha ena sun-taruana nacapapajisirahi ena nachichanaveana. Nájina naratahahini nacamatinacahini taicha eta najapanuiravahi ichape” tacahepa.

¹⁹ Tacahe, te jácani año te táequenepa eta máepenirahi ema Aluresi, tíapechavavarepa ema ángele máechajicahi ema José te mavapure ánaqui te Egipto. Ánipa maicha:

²⁰ —Pécheputa, José. Piveha ema amuya ésupa esu maena. Piyana pichava te piávasa Israel taicha vaipa táefnamavacare. Tépenaipahi ema tipanereuchainihi ticapacayarehini ema amuya —máichapa ema ángele.

²¹ Jéhesare, ema José técheputa. Tétupiricavapa, ésupa esu maena ema amuya. Tiyananapa tichavanahi tayehe eta návasa.

²² Tacahe, eta napaisirapahi eta nachavirapa tayehe eta návasa, masamairiricapa ema José eta maviravaipahi aquenuca ema Arquelao, machicha ema Aluresini. Tipicapa ema José machavahini tayehe eta Belén. Tásiha, ema ángele máechavarepa máechajicahi te mavapure eta matupiruirayarepa te Nazaret te tinapaica Galilea.

²³ Te titecapanapa, ánaqui étapa náejasihahi. Tacahehi eta táitachiravahi eta táechajiriruvanahi eta Sagrada Escritura nájureanahi ena profetanaini eta macajarerayarehi Nazareno ema Jesús.

3

Éma Juan Tícachasiricarahi tépanavapa ticametairu eta máechajiriruva ema Viya nayehe ena vámahicuruhana

(Mr 1.1-8; Lc 3.1-9, 15-17; Jn 1.19-28)

¹ Tacahe, te jácani treinta áño, matirihivare ema achane ticajare Juan. Éma, máichuhaquenehi ema Viya eta macametairuirayare, máetupiricavacayare ena achaneana. Tacahe, masuapahi eta matuparahahi. Tiyana vámahicuruhapa. Váipa avasarecuruhainahini. Ticametairupaipa nayehe ena macutiqueneanahi vámahicuruhana, ticavasana te tachaui eta Jordán te tinapaicahi eta Judea.

² Ánipa macahehi eta máimituresirahi:

—Ítsivaha eta epanereruana. Éneuchava mayehe ema Viya, taicha márapiainapa ema aquenucayare mavaneruhi ema Viya —máichavacapa.

³ Ánaquiaparipahi eta áñoana acane, ema Viya mametacapa ema víyahaini profeta Isaías eta mapaneruhi, eta mavaneruyare ema Machicha te juca apaquehe, ticatirahiyarehi eta tímitecayarehi. Énerichuvare matirihiyareva ema apana achane máichuhaquene-yarehi ema Viya. Macametairuyarehi, máetupiricavacayare ena achaneana, náinajisirayarehi eta napanereruana tamauriqueneana, apaesa táuri eta najacapirayare ema Machicha ema Viya. Émaripa ema Juan, ema máechajisiquenehi ema Viya, máetupiricavacayare ena achaneana.

⁴ Éma Juan, vanairucahi me Viya, profetahi éma. Éta mamuirihahi eta náitsameru tajiyaha eta náitátiquene ticajare camello. Éta máitijube, vácapi jayumepi. Éta maniriji manicare eta tsacara. Éta matítivera eta mápama.

⁵ Tiyananavare nacapayaca ena achaneana ticavasana te Jerusalén, navairahi nasamararaca eta máechajisiquene; énapa ena ticavasana te Judea, énapa ena tiávihanahi tayehe eta cajacure Jordán.

⁶ Tacahe, eta nametauresiravaipa, navarairahivare nánajica eta napecaturana, ema Juan máicachasicavacaipa te cajacure Jordán.

⁷ Énaripa ena fariséoana énapa ena saducéoana nayanauchahivare ema Juan. Vahi náneuchavahini, navarahahisera ticaicachasiana. Tacahe, ema Juan máichavacapa:

—¿Tájaha tacayema eta epauchiranuhi, eti tachichanaveanatataji eta quichare? Esamairiricahipuca eta járajapairayarepa eta táíñehiqueneyare ecuñaraqui. Evarahahipuca iúchucuhayare.

⁸ Tiuri puiti, te evarahapuca eta iúchucuha, yátupina tátupiruva eta epanereruana. Ímrecava eta ínajisiraya eta epecaturana.

⁹ Váhivare eucacajamurava eta mámariequeneháirahehi ema viáchucaini Abraham. Taicha tayanapane mámarihapura éma, váhisera iúchucuhaimahi te vahi ecutisivacha eta epanereruana. Ema Viya, tájina máemaitucaimahi éma. Te mávarahapuca, vahi májecarachaímahi máepiyaca achaneanaina eta juca mari, mavarairainahi yátupina ena mámariequeneanaina ema Abraham.

¹⁰ Ecauneuchava, taicha tiánehipa eta táitecapauchirahaviyare eta ecuñaraqui nayehe ena achaneana máitucarahanahi téneuchavana, váhivare náitsivachahini eta napanereruana. Tímicutijirícavaipa te máechucayarepa ema achane eta yucuquí máhireana. Ticaechuyarehi tamutu eta tapareana. Tíjuyarehi.

¹¹ Yátupi nútí nícachasicahéhi te une, te éneuchava mayehe ema Viya. Ávanepaipahisera mácani ema yátupiquene Cristo. Te yátupina ecasiñava mayehe, ticachasicahayareva; tíjara-caheyareva ema Espíritu Santo. Téhesera vahi eucasiñavapura mayehe, tícuñacahayare tayehe eta tájirequene yucu. Éma, ichapequenehi nuyehe nútí. Váiparinehi nácutinasímahi eta máitupajijiasiravahi. Váiparinehivare nácaemuñavaimahi macamusuranuhini nútí páuresami.

¹² Puiti éma márjapainapa tinerejiricainapa nácani yátupiqueneana téhicana. Máunacainapa éna. Ticutinapa mácani achane te tiácatayajirica eta arusu. Máunacainapa. Tásiha, máquijicapa eta tapíraquiji. Máijuchayarepa te yucu. Eta nacaheyare ena máurirahanahi, tíjuanáinapa te yucu, máitavacayarehi eta namuruira —máichavacapa ema Juan.

*Eta macaícachasirahi ema Jesús
(Mr 1.9-11; Lc 3.21-22)*

¹³ Tacahe, títecapavarepa ema Jesús te cajacure Jordán te mávihahi ema Juan. Éma, másihaphi te tinapaica eta Galilea. Mavarahahi ticaícachasiyare mayehe ema Juan.

¹⁴ Émasera ema Juan, vahi mávarahahini máicachasicahini. Ánipa macahe:

—Tata Jesús, nútira táuricahi nútivaina pícachasicanu. Nusapihapa nútí picaijuhenuhi eta nícachasicaviya —máichapa.

¹⁵ Émasera ema Jesús majicapapa:

—Tájinachucha táichava. Ticamunucarehi nítauchayare eta mavarahaquenehi ema Nucaiyaquene —máichapa.

Tásiha, ema Juan tísapavapa.

¹⁶ Te tamutupa eta macaícachasirahi ema Jesús, tíucupaicapa tayehe eta une. Tásiha, tíjahúchavapa téjiaca eta anuma. Máimahapa ema Espíritu Santo tíucupaicapaipahi, mavasimahipaipa eta paloma. Tavenesicapa ema Jesús.

¹⁷ Tacahe, tíáramicarepa eta mahu ema Viya tásihaquenehi te anuma, ánipa macahe:

—Ema maca ema yátupiquenehi nuchicha némunaruquenehi. Tétavicavahi eta núsamurevahi máicha —macahepa.

4

*Ema Váinaraji Satanás mavaraha macaítsamaraji ema Jesús
(Mr 1.12-13; Lc 4.1-13)*

¹ Tacahe, ema Espíritu Santo enurujipa máimitucaipahi ema Jesús eta mayaniraya te mávaphi apaquehe. Ánaqui macuchapayarehi eta máítsamarajiyare ema Váinaraji.

² Tájjina manicahini ema Jesús te jena cuarentaquenehi sache, cuarentavare yati eta mayerevahi. Ichapepa eta máecuavahi.

³ Tásiha, ema Váinaraji témeñahavapa mayehe. Mavarahapa macaetemayarehi. Ánipa máicha:

—¿Pécuahapa píti? Tacahe, pivaneca eta juca mari táepiyacava pan, taicha píti machichavihi ema Viya, ¿masi? —máichapa.

⁴ Ema Jesús majicapapa:

—Váhipuca pecha eta táechajiriruvahi eta Sagrada Escritura, ani tacahehi: “Vahi tacarichuimahi eta tincacare ticaitarecayare ena achaneana. Tacachaneyarehi eta máechajiriruvana ema Viya. Jéhevare, éta ticaitarecarahiyare” macahepa.

⁵ Tásiha, ema Váinaraji mámavarepa tayehe eta tacapicahuquene avasare Jerusalén. Máimiapanapa te táinahu eta Templo.

⁶ Tásiha, máichapa:

—Te yátupina machichavina ema Viya, písapavayare pémirica te apaquehe. Tájina pichavaimahi eta pémirisirayare. Pécharichuhi eta táechajiriruva eta Sagrada Escritura, ani tacahe: “Ema Viya mavanecapa ena mayeheana ángeleana téchapajiricaviana. Tiámaviayanayare te navahuana, apaesa vahi picucayutetu eta máriana eta te pipaisirayare” tacahepa. Tásiha, németeaca tijaneacavianayare puiti, vahi náisapaimahi picajara te pémirica —máichapa ema Váinaraji.

⁷ Tacahe, ema Jesús majicapavarepa:

—Énerichuvare ani tacahe eta Sagrada Escritura: “Vahi picaitsamarajimahi ema Viya, taicha Piáquenuhi éma” —máichapa.

⁸ Tacahe, ema Váinaraji mámavarepa te táinahu eta anuquehe mari cerro. Máimechapa tamutu eta ichapequeneana avasareana te juca apaquehe ticutirinehi tacachacayajiricacahini taicha eta máitupajijiasiravahicaha ema Váinaraji. Máimechavarepa eta ichapequeneana náimahaqueneana ena achaneana.

⁹ Tacahe, máichapa:

—Núti níjaracaviyare tamutu eta juca avasareana. Pítina náquenuvina ena távacuanahi eta avasareana. Pépuyucanumasa te numirahu. Pitsiucanu apaesa níjaracavisarepa tamutu —máichapa ema Váinaraji.

¹⁰ Émasera ema Jesús majicapapa:

—Pévuisihatataji piti Satanás te juca numirahu. Váhipuca pecha eta táechajiriruvahi eta Sagrada Escritura. Ani tacahehi: “Macarichu ema Viya vépuyumirauchayare. Macarichuvare vicaemataneacayare” tacahepa. Váhiquene táurica nucaemataneacavihini —máichapa ema Jesús.

¹¹ Tacahe, ema Váinaraji térajicavapa. Majunijicapa ema Jesús. Tásiha, tiúcupaicanapa ena ángeleana, náechapajiricapa ema Jesús.

Ema Jesús tépanavapa ticametarairu

(Mr 1.14-15; Lc 4.14-15)

¹² Tacahe, te jena sácheana, nacaratapaca ema Juan. Námapa te jácani tayerehiquene. Tacahe, ema Jesús, eta masamairirisirapa eta macaeratairahi te cárcel ema macheji Juan, tianapa tichava te mávasa Nazaret te Galilea.

¹³⁻¹⁷ Váipasera mánasihini te májurusinehi. Tíanapa tayehe eta avasare Caperaum. Étapa máejasihahi. Eta juca avasare táviahahi te tachausi eta cáquiure Galilea. Eta macametarairuirahi, tamutuhi mapaica eta tinapaica eta provincia Galilea*

—Éneuchava mayehe ema Viya. Ísivacha eta epanereruana, taicha tiánehi eta sácheyare tímerecavaya eyehe ema ticatiuchaheyare. Aquenucayare mavaneruhi ema Viya, téchaheyare éma —máichavacapa.

Eta juca títauchavahi eta májureanahi ema víyahaini profeta Isaías, ani tacahehi: “Tiúricacareanainapa ena achaneana cávasanahi te tachausi eta cáquiure Galilea tayehe eta provincia Zabalón étapa eta Neftalí, namutu támairiaca ena ticavasana te apachara eta Jordán. Éna, tiyerehi eta nacatajivairanahi, tacuti eta tavayureva eta tamapicuva. Púitsera máitecapauchavacaripahi ema tímícauchamurihi. Ticatiuchavacayarehi tayehe eta nacatajivairahi. Éma, tétumechavacahivare eta mamícauchiravacahi” tacahepa.

Ema Jesús máichuha ena cuátroqueneana ténicarahiana, máimiteuanayare

(Mr 1.16-20; Lc 5.1-11)

¹⁸ Tacahe, eta mapaisirapahi ema Jesús te tachausi eta cáquiure Galilea, máimahavacapa ena apinana ajairana, ema ticajiarehi Simón Pedro émapa ema maparape Andrés. Eta náematanerepi ena nani, ténicarahianahi. Náquijiercahi ena tayehe tarrafa.

¹⁹ Tacahe, ema Jesús máichuhavacapa:

—Yare, éhicanu. Núti níjaracaheyare eta apana ématanerepiyare. Éti ítucavaparacahi eta jímana; tacaheyare eta ítusiravayareva ena achaneana, machaneranyare ema Viya —máichavacapa.

* **4:13-17** Ema profeta Isaías, ánvare macahehi eta máechajisihairahi: “...étaripa eta provincia táviha náitecapihahi ena apavasanana”. (Acane eta juca apaquehe, apina eta apana tájjareanaini: eta Zabalón étapa Neftalí.) Eta máimiteusiravacahi ena achaneana, ániapa maicha ema Jesús:

²⁰ Enevanepa náinajicapa éna eta náenisirahi. Tiyananapa náehicapa ema Jesús.

²¹ Ánaquipanavarepa máimahavarepa ema Jesús ena apinana ticaparepécánavare: ema Jacobo émapa ema Juan. Téjacanahi te napacure. Matiarihivare ema naiya Zebedeo. Náititijiricahi eta nayehe tarrafa. Ema Jesús máichuhavarepa.

²² Enurujipa náehicavare. Nanaquicavarepa eta napacure, émapa ema naiya. Najunijicavarepa.

Ema Jesús máimitucavacapa ena camuriqueneana achaneana
(Lc 6.17-19)

²³ Eta mapaisirahi ema Jesús tayehe eta avasareana te Galilea, máimitucavacapahi ena achaneana te sávarumuhuana tayehe eta náurujisirarevana. Mavanecapa eta náeneuchiravaina taicha tiánehipa eta sácheyare tímerecavayare ema ticatiuchayare, ema aquenucayare maneruhi ema Viya. Énerichuvare ema Jesús macanaracpahivare tamutu eta apapanequeneanahi jumareana eta najumanapahi ena achaneana.

²⁴ Tacahe, nasamairiricapa ena achaneana ticavasanahi eta tasimutuqueneana avasareana te tinapaica eta Siria. Tásiha, námavacapaipa ena nacajumaqueneana, apapananenejiquenehi eta najumana, nacatiruhavanahi. Énaripa ena návaháruanahi ena éreanana, ena tirapapasiana, énapa ena muracaquihana. Namutu ena nani, macanaracavacapahi ema Jesús.

²⁵ Tacahe, camuriana ena achaneana téhicanahi éma. Éna, tiásihana te Galilea, te Judea, te Jerusalén, te avasareana tinapaica eta Decápolis, étapa te apachara eta Jordán.

5

Ema Jesús máimitucahi nayehe ena ticunachacareanahi me Viya
(Lc 6.20-23)

¹ Tacahe, eta máimairavacahi ema Jesús ena camuriqueneana achaneana, tiápanapa tayehe eta anuquehepahi apaquehe taicha tiúripanahi eta nasamararasirayarehi ena achaneana. Téjacaripa éma, énapa ena máimitureana nachayacaipahi.

² Ani tacahehi eta máimiturapianahi:

³ —Ena náimatihí eta tacamunuqueneanahi eta náchanevana, tétavicavahi eta náuricacarevaya taicha máejerere eta najacapirayare eta máechajiriruva ema Viya, machaneranyarehi.

⁴ Ena nani tijapanujiricavanahi, tétavicavahi eta náuricacareva taicha émaripa ema Viya macurisamurechavacayare.

⁵ Ena nani tisuapajirahianahi me Viya, mánsuanahi mayehe, tétavicavahi eta náuricacareva taicha májararuanayare eta arairu apaquehe náicuchihí me Viya.

⁶ Ena nani, ichape eta najamurachirahi eta náitaresirahi eta matapiravacare te mami- rahu ema Viya, tétavicavahi eta náuricacarevaya taicha májjaracayare éma eta navarahaquenehi.

⁷ Ena nani tijapanurahianahi nayehe ena apamuriana achaneana, tétavicava eta náuricacarevaya; taicha ema Viya, éma apanava majapanuvacayare éna.

⁸ Ena nani vahi náisapajiricavahíni tahapapicahíni eta náehisirahi ema Viya, tétavicavahi eta náuricacarevaya; taicha éna, títécapanainapa te mami rahu ema Viya, náimmaracainapa éma.

⁹ Ena nani ticonsejarahianahi nayeheana ena achaneana, nacaepahirahi eta semanereana, tétavicava eta náuricacarevaya éna; taicha máimereuchainapa ema Viya eta machichairavacahí éma.

¹⁰ Ena nani ticatajivanahi eta nacatianacasivahi nayehe ena achaneana te juca apaquehe táichavenehi eta táurivahi eta náitaresirahi, tétavicavahi eta náuricacarevaya; taicha éna aquenucarahanaya majupahanayare ema Viya.

¹¹⁻¹² Éni nuchaneranahi, járajapainapa eta sache eta nacatianasiraheya ena achaneana táichavenehi eta éhisiranuhi. Tipanararachaheanainapa, tépiyaequenehaheanainavarepa. Váhisera ecuarami eta juca. Ene nacahehi eta nacatajivairahi ena profetanaini, ena náinapureanahi machaneranahi ema Viya. Eta tacahe, te nacatianacahepuca, ¡ecurisamurechavachucha, evapinavachucha! ¡Tétavicavahi eta iúricacareva taicha ejacapayare eta icuchiyare te anuma, taicha ichape eta macunachirahehi ema Viya!

Ema Jesús tímítucavahi eta vicamunucareravayarehi tacutihí eta tacamunucarevahi eta icheve, étapa eta tijarahí

(Mr 9.50; Lc 14.34-35)

¹³ Eti ímíyanavayare eta ecamunucareravahi nayehe ena achaneana, tacutihí eta tacamunucarevahi eta icheve. Vahi tacuepaha eta ecamunucareva. Vahi ecucuti eta

tajachira eta icheve, taicha tájina eta táichevevainahíni. Tásiha, nájina pa ticamunuimahi. Náepuruinapa namutu.

¹⁴ Tacutiquene éti ecutihi eta tijarahi. Éti, namicahuyarehi namutu ena achaneana eta ímitusiravacaya, apaesa náinajica eta náehisirahi eta tamauriqueneana. Ímereuchayarehivare eta iúri va, ecutiya eta avasare tiávi hahi te tajirumane eta anuquehe mari.

¹⁵ Tacutiquene, vahi ecucuti nácani súnsuana tiyustacanahi jácani lámpara, tásiha nanacapapucaini te tajuhe eta cajune, nayumurusihahini. Nanacayarehisera te anuquehe apaesa náimairircasarepa namutu ena tiávi hanahi te peti, tamicaureanayarehi.

¹⁶ Ene ecaheyare éti, ímerecayare eta ejaravayare nayehe ena achaneana apaesa eta náimairainahi eta táuriqueneana íchaqueneanayare; tásiha nacunachainapa ema Tata Vi-caiyaquene tiávi hahi te anuma.

Emá Jesús tímitucahavi tayehe eta tasuapacarevahi eta Sagrada Escritura

¹⁷ Vahi étaina tímitecanuhi núti nucaepahahini eta mavanairipiana ema víyahaini Moisés, étaripa eta náimiturapiainani ena profetanaini. Eta tímitecanuhi núti, níminecapaequenehaheyare eta nájureanahi.

¹⁸ Nutupiruva numetacahe: Títauchavaya tamutu eta máechajiriruvana ema Tata. Tímiyanava eta tasuapacareirahi nayehe ena achaneana tamutu eta Sagrada Escritura. Tájina ticaepahaimahi, tayanapane táitavapuca eta anuma étapuca eta apaquehe.

¹⁹ Eta tacahe, nácani tépuruanayare eta tavanairipianahi eta Sagrada Escritura, jácani ánichichaquenehi, vahi tisiapanaimahi te anuma. Tavetijipa te náimitucapuca ena apamuriana eta náepuruiraya. Nácanisera tisuapanayarehi, tímiturecanahivare eta juca nayehe ena apamuriana achaneana eta náehisiraina; éna, íchapeyare eta nacunachacarevayare eta nasiapiraipa te anuma.

²⁰ Táicha te evaraha ítujicava esiapa te anuma, tacamunuhi tiápajucavaya eta táurivahi eta eyeherepiana éti, ecachuricayare eta nayeherepianahi ena escribánoana, énapa ena fariséoana.

*Emá Jesús tímitucahavi vahi tacunasi te visamure eta visemaneva
(Lc 12.57-59)*

²¹ Eti écharichucha eta nayeherepiana ena íáchucanaveanaini ani tacahe: “Vahi ecucapaca mácani piparaepiya; taicha mácani ticaparecahi, ticaicuñayarehi”.

²² Nútisera numetacahe eta apana: Mácani tisemahi mayehe ema maparape, énerichuvare ticaicuñayare. Mácani tíumehahi ema maparape, ticayaserehiyare te namirahu nácani tuparairucanahi tayehe eta avasare. Tacutiquene mácani ticaecahihi ema maparape, mávacuhaipahi eta ecuñaraqui tayehe eta infierno.

²³ Eta tacahe, te piámaphi eta piámavahu te mamirahu ema Viya, tásiha, péchapanainapapuca eta pitapiravahi mayehe ema piparape.

²⁴ Vuíchaha picuiyaracuha eta piámavahu. Tativanumayare piyaseapanaya eta perdón ema piparape. Pétupiricanumayare tativa eta píchavaquenevahi mayehe éma. Táuricasarepa pichava píyaracuhapanainapa eta piámavahu te mamirahu ema Viya.

²⁵ Tacutiquene te matiarihiyarepuca mavaraha mametauchavi te namirahu ena tuparairucana, vahi picucuchapa mametauchavi. Tativayare pétupirica eta píchavaquenevahi mayehe, mapurare vuíchaha picaeratahini mayehe ema juez tayehe eta cárcel.

²⁶ Taicha te náimisipavipa tayehe eta cárcel, ticajeraequenénapa eta piúchusiraya.

Emá Jesús tímitucahavi vicuneuchavaya eta jácani táimiaquipaichavi tayehe eta pecatu

²⁷ Énerichuvare écharichuhi éti eta náimiturapihi ena íáchucanaveanaini: “Vahi ecuveha esu apana esena”.

²⁸ Puítisera núti numetacahe eta apana: Mácani majamurachahi esu apana esena, ticapeaturaipahi te masamure taicha eta majamurachirahi.

²⁹ Eta tacahe, eta iúquiha váure, te tavarahapuca tímiaquipaicahe tayehe eta pecatu, tavarairahi táimahayare eta tamauriqueneana tájiparacana, tíuripana evectuhaquichava íáquijicaya. Taicha tíuripianahi táejiacava ánichichaina te íáquehe, váhisera tacuimicuñacahe eta te yucu infierno, tamutupahi eta íáquehe.

³⁰ Étaripa eta evahu váure, te tavarahapuca tímiaquipaicaheyare tayehe eta pecatu, tapamisirahénapapuca íchayare eta tamauriqueneana, tíuripana eyuchatica íáquijica. Taicha tíuripianahi táejiacava eta evahu, váhisera tacuimicasiapahe támutu eta íáquehe tayehe eta yucu infierno.

*Emá Jesús manacahi eta máimiturapi nayehe ena tñajicacana
(Mt 19.9; Mr 10.11-12; Lc 16.18)*

³¹ Énerichuvare ena viáchucanaveanaini náisapahi eta máejerare eta máinajisira mácani achane esu mayena. Ani nacahehi: “Mácani tínajicahi esu mayena, máemepiyarecahi eta ajumeruca táechajisihayarehi eta máinajisiraya esu mayena”.

³² Nútisera numetacahe eta apana: Mácani achane, te máinajicapuca esu mayena, ticapecaturapahi me Viya. (Váhinénipuca sucaecahihini mayehe ema apana achane.) Énerichuvare te tíapechavahipuca ticaima ésu, tamuriacahi ésu eta maviurevahi ema suima. Tásiha, mácani arairuhi suima, émpa tamuriacahi eta máejecapiravahi taicha eta mavirahi esu esena sucaimaquenehi.

Ena Jesús títitucahavi eta vahi vijurachaimahi

³³ Énerichuvare esamairiricavare eta náimitucasivahi ena iáchucanaveanaini: “Machu vahi ecuitaucha jácani ejurachirahipuca. Yátupinasera eta ítauchiraina tamutu eta Íjarasiravahi me Viáquenu” nacahepa.

³⁴ Nútisera numetacahe éti: Vahi táurichahini íchahini eta juramento. Vaipa échajisihahini eta anuma taicha éta, mávacurehi ema Viya.

³⁵ Váipavare échajisihahini eta apaquehe taicha éta, macaematanéyahi éma. Váipavare échajisihahini eta Jerusalén, taicha éta, mávacureyarehi ema yátupiquenehi Rey, mavaneruyare ema Viya.

³⁶ Váipavare échajisihahini eta ejurachirahi te echuti, taicha vahi áratahaimahi ehapamachahini, ítsivachirahini eta táimahi, tijapupuca, tiquisapuca.

³⁷ Numetacahe: Te tatiarhipuca eta Íjarasiravayare, átipuruva ácahe: “Tiuri”. Te váhipuca evarahahi, átipuruva: “Vahi” ácahe. Te émunahacavapuca ejuracha, ema Váinaraji títurucaheripa.

Ena Jesús títitucahavi eta vahi vicusema ne nácani ticaetemajiricahaviana (Lc 6.29-30)

³⁸ Énerichuvare esamairiricahi eta acane: “Mácani achane téhararecahi mapuchuquichahi ema apana achane, énerichuvare éma napuchuquichayareva ena tuparairucana. Te macavetuquiahechahipuca, énerichuvare nacavetuquiahechayareva ena tuparairucana”.

³⁹ Nútisera numetacahe: Vahi ecujicapa te masema mácani achane váinarajihí. Tiúripana, te náehahepuca nácani te emira, Íjaracayare eta apachacaya eta emira.

⁴⁰ Tacutiquene, te natiarhipuca ena timetauchaheana, navaraha naverejicahe eta ecamisa, vahi ecusema. Váhivare ecujicapairihí. Íjaracavare eta apana eta epacuha.

⁴¹ Ísapayare te nácani navanecahepuca eta enaracureca eta tijitacare. Te navaraha iámina étanaina kilómetro, evapinava eta eservichiravacaina. Vahi ecobrachavacaimahi.

⁴² Mácaniripa tájahapuca mayaseacahe, Íjaracayare. Vahi ecueñamiha mácani ticapucahe eta ecayehequeneana.

Ena Jesús títitucahavi eta vémunasirayare nácani ticatianacahaviana (Lc 6.27-28, 32-36)

⁴³ Énerichuvare esamairiricahi eta acane eta náimitucasivahi ena iáchucanaveanaini: “Émunasirahí nácani témunacaheanahi. Tásiha, ecatichayarepa nácani ticatianacaheanahi”.

⁴⁴ Nútisera numetacahe: Émunacayareva nácani ticatianacaheanahi. Eyaseaca ema Viya eta nayujarahuina nácani téchajicanahi eyehe. Ímereco eta iúriya nayehe nácani ticaticahéanahi. Eyujarauca nácani tíumehaheanahi ticaetemajiricaheanahi.

⁴⁵ Te ítaucha eta juca, éta tímereuchaheyare eta machichahéirahi ema Vicaiyaquene te anuma. Taicha éma nájina manerejiruina, namutu máemunacavaca: ena achaneana váinarajiana, énapa ena tiúriana. Éma, tíjaracahavi vimutu eta sache vimícahuhi, étapa eta tiquiva.

⁴⁶ Éti, tájina ecunachacarevaina eta me Viya, te nacarichuhi émunaca nácani témunacaheanahi éti. Apanasica ena tisipecaturarahiana náichahi eta juca.

⁴⁷ Tacutiquene, tájinavare ecunachacarevaina eta me Viya, te iúriyare nacarichuhi ena eparapenaveanahi. Apanasica ena máimatirahanahi ema Viya tiúrianahi eta nayehe ena naparapenaveana. Étisera tatuparacahe eachuricayare eta iúriya.

⁴⁸ Tétavicavasareya eta iúriya nayehe namutu. Vahi enerejicaimahi ena achaneana. Váhivare eyavanimahi eta iúriya. Ecutiyaere ema Vicaiyaquene te anuma eta máurivahi.

6

¹ Eta ecajirayare ena páureana, échapavayare. Ema Tata Vicaiyaquene, tájina ticunachahemahi te evarahapuca náimaha ena achaneana eta ecajirahi, evarairahi ticunachahenayare. Tájinavare máitsirijicavahini éma eta eyehe.

² Eta tacahe, te ímicatayarepuca nácani ticamunuvanahi, vahi ecumetajirica. Vahi ecucuti ena apimirana timetajiricanapa te viúrujisirarevana, téhepa te anecapahiana. Eta juca náichahi, navarairahi ticunachacareanayarehi nayehe ena achaneana. Nútisera numetacahe: Ena nani ticaheanahi, tájina nacunachacarevaimahi me Viya.

³ Te jácani píjaraca nácani ticamunuvanahi piyehe, vahi picumetajirica. Váhivare picumetaca nácani pémunacasareana.

⁴ Piñajichayare eta píjarasirayare nácani píjaracasiruyare. Tacahe, ema Tata Vicaiyaquene te anuma máimararacahi tamutu. Jácani píchaqueneana tayumurevana, éma títsirijiequenehayare, tíjaracaviyare eta pícuhihi.

*Ema Jesús tímitucahavi eta viyujarasirayare
(Lc 11.2-4)*

⁵ Te eyujaracahi, vahi ecucuti ena apimirana tiyujaracana te viúrujisirarevana, téhepuca te anecapahiana. Titupihanahi éna eta nayujarasirahi, navarairahi náimararacayarehi ena achaneana. Nútisera numetacahe: Tájinachucha nacunachacarevaimahi me Viya.

⁶ Étisera ani tacaheyare te eyujaraca. Esiapayare te eyehe cuarto, ératacayare eta tapaja. Eñajichavayare eta échajisirayare ema Tata Vicaiyaquene. Éma, tímararacahavihi; masamayarehi eta piyujaracasa.

⁷ Tacutiquene, váhivare ecuapepirica eta ecayemaqueneanayare. Vaipa tácame-sahini eápepiricahini eta eyujarasirahi. Vahi ecucuti ena máimatirahanahi ema Viya. Tiúpiemanapa eta nayujarasirahi, náimijachaipa tisamacareanahi mayehe ema Viya.

⁸ Vahi ecucuti éna, taicha ema Viya máimatiripahi éma jácani vivarahaquenehi viyaseaca.

⁹ Éti, ani tacaheya eta eyujarauchiravaina: Tata Vicaiyaquene, piti piáviha te anuma, vipicauchahi yátupi eta píjare.

¹⁰ Vivaraha ichapeina eta tasuapacarevaina eta pivanairipiana nayehe namutu ena achaneana ani te apaquehe, tacuti eta nasuapiravihi ena ángeleana te anuma.

¹¹ Pájapanuhavi píjaracahavi puiti jena sache eta vicamunuirava eta vinicaqueneana.

¹² Pájapanuhavi píperdonachahavi eta viviurevana piyehe, tacuti eta viperdonachira víti ena ticaviurevana viyehe.

¹³ Vahi picuisapahavi eta vicha eta tamauriquene. Picatiuchahavivare mayehe ema Váinaraji. Taicha piti yátupiquenevivihi Viáquenuvivihi. Nájina pácuti eta pítpajijiasiravahi. Máichecuaraquire eta píjaravahi. Amén.

¹⁴ Taicha te yátupihí eta eperdonachirahi nácani ticaviurevanahi eyehe, ema Tata Vicaiyaquene te anuma típerdonachahayare éti apanava.

¹⁵ Téhesera te vahi eperdonachahi ena ticaviurevanahi eyehe, ema Tata Vicaiyaquene váhivare típerdonachahémahi eta éjecapiravanahi éti.

Ema Jesús tímitucahavi tayehe eta ayuna

¹⁶ Tacutiquene, te ayunahepuca, vahi ecajapanuramiraimahi te namirahu ena achaneana. Vahi ecucuti ena apimirana ena tímicaecherachavanahi eta ayunairanahi. Núti numetacahe: Tájinachucha nacunachacarevaimahi me Viya. Éma, váhivare títsirijicavaimahi eta nayehe.

¹⁷ Étisera, te ayunahepuca, ímianava eta esipauquichiravaya, etaticavavare, apaesa nacuija nacumatiacahe eta ayunairahahi.

¹⁸ Ema Tata Vicaiyaquene tímararacahahi tamutu eta esamureana. Tisamacareyarehi eta eyasearuihi.

*Ema Jesús tímitucahavi eta vahi vicuisapava vicasamure eta vímahaqueneanahi
(Lc 12.33-34; 11.34-36)*

¹⁹ Váhivare tacuavasamurerecahe eta ímahaqueneana te juca apaquehe. Eta juca ticamietiequenehacareana taicha eta tajararesira eta cachusiri, étpa eta táichasivayare. Natirihivare ena tíameyechaeanayare.

²⁰ Epanerechaserá eta ecaimahaqueneraya te anuma. Ánaqui jararihi eta táitsivayare eta íchirahi eta táuriqueneana te juca apaquehe. Ánaqui, tájina cachusirina, nájnavare tíámerahina tayehe. Tájina témitiacaimahi.

²¹ Éti, te ecasamurepuca eta ímahaqueneanahi te juca apaquehe, evarahahi enasiyare te juca. Vahi ávarahahini ejunijicahini eta ímahaqueneana. Téhesera te ecasamurehichapuca eta ícuchia te anuma, ánaqui evarahayare eyanavaneyare.

22-23 Tacutiquene, ecuneuchava, machu tacuetaviuchava eta ejamurachira eta ímahaqueneana. Ecaratacava, vahi ecuisapa tahapasamurechahe eta ecaimahaquenerahi. Taicha te tahapasamureruhepauca eta ímahaquene, tétavicavahi eta tamapicuvahi eta te íachanevana. Téhesera esuapa eta nímiturapiana, tétavicavahi eta tamicauchiraya eta íachanevana, tímijunijicayare eta emaurivahi, étapa eta ejamurachiravahi eta ímahaqueneana. Eta tacahe, machu ísapava tayanariana eta timapicu eta te íachanevanasami. ¡Páurehesami éti te ísapavapuca tanasipa!

24 Tacutiquene éti, eta ítaresirahi, vahi táuricahini apinanainahini ena íaquenuana. Taicha émunacapanayarehi ema émana, tisuapacarepanayarehivare; tásiha ema apana, apaesarineya eta émunasiraya, váipainapa tisuapacaremahi éma. Ene tacahehi eta juca ímahaqueneana, vahi ecuisapa tahapasamurechahe eta plata, machu tahapapirica eta émunasirahi ema Viya, étapa eta ecaemataneasirahi éma.

Ena Jesús tímítucahavi eta majaneasirahavihi ema Viya viti machichanaveana (Lc 12.22-31)

25-26 Étasera nuvaraha yátupina eta ecasiñavairaina mayehe ema Tata Vicaiyaquene. Vahi ecuañamaracavaicha tayehe eta enicaquenerepi étapa eta emuiriharapi puiti juca ítaresiraichaha. Eta enicaquenerepi, étapa eta emuiriharapi, tájina táeñamavacarevahini. Ímararacarichuhi eta cáyureana. Vahi táevacahini, váhivare táechatijiricahini, táunacahipucaini eta tanicaqueneyare. Émasera ema Tata Vicaiyaquene máechapajiricahi, májjarasirahi tamutu eta tanicaquenerepiana. Evetijipa éti, íapajupanavahi eta éñamacarévhahi me Viya tayehe eta cáyureana.

27 Tájina táuricahini eta éñamiravahi eta júcana. Éti, nájina tiratahaimahi étijivainahini ecajurucavahini, tayanapane tahapasamurechahehipuca.

28 Tacahe, ¿tájaha tacayema tihapasamurerecahehi eta emuiriharapi? Ímararacarichuhi eta tajurusirahi eta flúreana, vahi tacañamaracavahini tacaematanehini, tájijururecchipucaini.

29 Táitsivahisera, te tépnehapa, tétavicavahi táurinavahi eta taflurene. Nájina tácuti eta nacamuirihaira eta táurina, émaripa ema víyahaini rey Salomón eta tajanunusira eta macamuirihairahi.

30 Apanasichahi, ema Viya májjaracahi eta táurinavahi, ánipirichuhinéni eta táitaresirahi. Evetijipa éti eta máechapajirisirahehi, májjarasiraheyarehi eta emuiriharapi eti achaneana. ¿Tájaha tacayema vahi ácasíñavahini eta mayehe?

31 Eta tacahe, vahi ecuañamaracavaicha tayehe eta enicaquenerepiana étaripa te echuririacapuca eta une érayare, váhivare eta emuiriharapi.

32 Ena achaneana vahi náimatihini ema Viya, ichapemurahi eta tacañamarasiravacahi eta júcana. Vahi nácasíñavahini mayehe ema Viya, nacuchapahipucahini eta májjararayarehi éma. Étiserá, écharine eta mararirahahi ema Ecaiyaquene te anuma. Máimatihí éma tamutu eta ecamunuqueneana.

33 Tásihasera éti, tativayare íjaracava ecaemataneacaya ema Viya, ecasamureirahi eta ítauchirayare tamutu eta mavarahaqueneana. Tihapasamurechaheyarehivare eta tátupiruvairaya eta ítaresira, ecurisamurechirayare éma. Máimaharinepa éma. Tíjaracheyare tamutu eta juca ecamunuqueneana.

34 Eta tacahe, ácasíñava mayehe éma. Vahi tacuimipanerechahe eta íchararacavayare achichu. Puiti ecuchapaipa eta máimicatasiraheyare. Ímianava eta ecuchapirayare eta máimicatasiraheya.

7

Ena Jesús tímítucahavi eta vahi vicunemahi eta nájecapiravana ena apamuriana achaneana; vicuneuchavasera viti

(Lc 6.37-38, 41-42)

1 Vahi ecunemahi eta nájecapiravana ena apamuriana achaneana, váhivare ecuaecahivaca, machu étaina táimicufíacahe me Viya.

2 Te ecunerahipuca nayehe ena apamuriana achaneana, ecaheyare éti eta macunerahénapa ema Viya tayehe tamutu eta éjecapiravanahi éti.

3 Piti ajaira, pítipa piti esena, vahi táurica eta picunerahi eta ánichichaqueneana nájecapiravanahi éna. Tituparacavi pítijivaina picuneuchava eta táichapeva eta péjecapirava.

4-5 Vahi tatuparacavimahi pétipirica eta jácani nájecapiravahi ichipichuana ena piparaepiyana. Tájina piviyahini eta piconsejachihaimahi. Ichapesera eta tatuparasiravahi pétipirica eta péjecapiravanahi píti. Tapaenumava pétipirica eta píchavaquenévani, táuricapaini piconsejacha ema piparaepiya tayehe eta máichavaquenévahi.

Ena ticaecahirahiana, vahi vicuijaraca jácani téñamacareana

⁶ Vahi ecuimituca eta máechajiriruvana ema Viya nácani achaneana ticaecahirahiana, taicha váiparinehi náuricaimahi. Machu étaina táemehahe. Váhivare ecuijaraca jácani téñamacareana, machu nácatayayajica.

Vahi vicuyacuji eta viyaseasiraina ema Tata Vicaiyaquene
(Lc 11.9-13; 6.31)

⁷⁻⁸ Ánivare tacahe eta máechajiriruva ema Jesús:

—Numetacahe: Échajica ema Tata Vicaiyaquene. Eyaseacayare eta ecamunuqueneana. Éma, tíjapanurahi. Tisamaheyare, tíjaracaheyareva. Vahi ecuyacuji eta eyaseasiraina. Énerichuvare, te tatiarihnapapuca eta jácani íchiraya ichapehi eta tacajeravayarehi, eyaseacayare máijaracahehina eta ítupajijiasiravaya. Éma, tíjaracaheyare. Te jararihipuca eta táichejimiráuchahe, éma macaevuisinaheyarehi.

⁹ Eta juca tímcutijiricavahi te natiarihhipuca ena echichanaveanahi éti, te tiyaseacaheanapuca eta pan nanicayare, váiparinehi táuricaimahi íjaracahini éti eta márijahi. Tímcutijiricava evijaruinahini ena echichanaveana.

¹⁰ Étaripa te tiyaseacaheanapuca eta jima, váhivare táuricaimahi íjaracaimahi eta quichare.

¹¹ Etiaríhi éti vahi ecajirahihini nayehe ena achaneana. Iúrihisera nayehe ena echichanaveana. Mavetijicha ema Tata Ecaiyaquene tiávihahi te anuma. Éma, vahi ticavijaru-hemahi eta eyaseserepi. Tíjaracaheyarehi tamutu eta táuriqueneana eyasearuanayarehi.

¹² Evaraha eta náurivaina ena achaneana eta eyehe, ¿masi? Tásiha, táuricahi eta íchiraya eta iúriha nayehe. Taicha eta tacahehi eta táimiturapi eta Sagrada Escritura eta eyehe.

Jararihi eta apina achene
(Lc 13.24)

¹³⁻¹⁴ Esamanuchaha. Jararihi eta apina achene. Eta ichape achene, vahi tácajéa eta náehisira ena achaneana. Camurianapana eta téhicana eta ticaijuhe tayehe eta ecuñaraqui. Étasera eta achene ánicuchicharichu, ticaijuhe tayehe eta vítaresirayare, tájina ecuñaraquina. Váhisera camurianaina ena téhicana éta. Éti epamicava esiapa tayehe eta achene ánicuchicharichu.

Ema Jesús máimicutichahi ena achaneana tépiyahirahiana, nacuti eta yucuqui máurinisiráha eta tahi

(Lc 6.43-44)

¹⁵ Échapavayare tayehe eta náimiturapiana ena tépiyahirahiana tímjachavana machan-erana ema Viya. Tépiyacavánapahi tíuriana tacutihi eta tamansuva eta ivesa. Téhesera te nasamureana, tétaicavahi eta navainarajiva, nacutihi eta ichini.

¹⁶ Ímaticavacahisera éna táichavene eta náichaqueneana. Nacutihi eta yucuquiana. Eta yucuqui, tímaticarehi eta táhi. Étaripa eta sitavere, váiparinehi tíuchucaimahi eta tacahihini narasahinahipucaini. Tásiha, eta ijicaqui váiparinehivare tacahimahi eta táhi cachicheru-hinahipucaini.

¹⁷ Tacutiquene, tímaticarehi eta táhi eta yucuqui tíurínisi. Tímaticarevare eta táhi eta máurinisiráhana.

¹⁸ Eta yucuqui tíurínisihini eta táhi, vahi témunahiricavaimahi vahi tacurínisihini eta táhi. Étaripa eta máurinisiráhana, váhivare témunahiricavaimahi táurínisihini eta táhi.

¹⁹ Tamutu eta yucuquiana máurinisiráhana ticaechuyarehi, tíjuyarepa te yucu.

²⁰ Eta tacahe, ímaticavayare ena tépiyahirahiana táichavene eta náichaqueneana tauriqueneana.

Vahi námutuimahi tíujicavana tisiapanaimahi te anuma
(Lc 13.25-27)

²¹ Nararihinapa ena achaneana tépiyacavana nuchanerana. Váhisera tíujicavanaimahi tisiapana tayehe eta mávasa ema Viya. Tayanapane náchanuinapapuca “Tata Viáquenu”, vahi tisiapanaimahi. Taicha vahi yátupinahini eta nacaemataneasirahi ema Tata Nucaiyaquene te anuma.

²² Te táitecapapa eta juicio, camurianayare ena tíchanuanayare: “Tata Viáquenu, víti véchajisihaparacahi eta píjare. Vípiaracavihi te píjare eta viáquijisiráhi ena váinarajiana, téhevare te píjare vímerecohi eta tíaramicareana” náchanuinapapuca.

²³ Nútisera nujicapainapa: “Éti vahi nuchanerahéna. Nímatísera núti eta íchaqueneanahi tauriqueneana. Évuisiha te numirahu” níchainapa éna.

Ema Jesús máimicuticha ena tisuapajirahiana énapa ena masuapajirairahana
(Lc 6.47-49; Mr 1.22)

²⁴ Nácani tisuapanuanahi náitauchahivare eta juca nuvanairipianahi, téchemarahianahi táicha. Nacutiyahehi mácani títucahi tépiyareca peti, manacayarehi eta túmeana yucuqui emuruquiana.

²⁵ Jéhesare, te járajapapa eta muraca técatícava, tiámaquiha tiquiva, tisiama eta une, váipasera tacayayacahini eta peti, taicha tiúsiapiravacahi.

²⁶ Nararihivare ena tépiyacavanahi tisuapanuana, váhisera náitauchahini eta juca nuvanairipiana. Éna nacutihi ena máitucaraha tépiyareca peti. Vahi manacaimahi eta túmeana yucuqui, váhivare táusiapiravacahini máicha.

²⁷ Te járajapapa eta muraca técatícava, tiámaquiha tiquiva, tisiama eta une, tacajimuyapaícapa eta apaquehe. Tiáquiapaícava eta peti, tamutusamipa témitiequeneha — máichavacapa ema Jesús.

²⁸ Te títapiricapa ema Jesús eta máimitusiravacahi ena achaneana, ichaperinehi eta náramirahi eta máimiturapiana.

²⁹ Vahi nasamasarénahini. Tétavicavahi eta máitusirahi mayunapaicahi tamutu. Tétavicavahivare eta tasuapacarevahi eta máimiturapiana.

8

Éma Jesús macanaraca ema émana achane leproso (Mr 1.40-45; Lc 5.12-16)

¹ Te tiúcupaícapa ema Jesús tayehe eta cerro te mávinehi, camuriana éna achaneana téhicanapahi.

² Tacahe, macahepaipa ema émana achane leproso. Témeñahavapa mayehe ema Jesús. Tépuycapa te mamirahu. Tásiha, máichapa:

—Tata, nucasiniávahi eta piyehe, picanaracanupaini.

³ Tacahe, ema Jesús majicapapa:

—Nuvaraha nuncanaracavi. Tájinapa píchiravaina puiti —máichapa.

Máemamahacapa. Tásiha, enevanepa tinaracahi ema macajumaquenénihini eta máechajisirahi ema Jesús.

⁴ Tásiha, ema Jesús máichapa:

—Pímaha, nacuija picumetaca eta nútirahi nuncanaracavihi. Piyanavanesera pímerecava nayehe ena tuparairucana, apaesa náimamacavi. Énainapa timetajiricanainapa eta yátupirahi pinaracana, pipachihairapa. Piyanayare me Viya. Picamavahuyarepahi eta pihasalupayachirayare taicha eta macanarasiravihi —máichapa ema Jesús.

Éma Jesús macanaraca ema mamusura ema capitán romano (Lc 7.1-10)

⁵ Tacahe, ema Jesús títicapapa tayehe eta Capernaúm. Matiarihini ema achane apavasana. Comandantehi éma nayehe ena suntaruana romanoana. Capitán eta mávacure. Tiyanapa mapauchapa ema Jesús.

⁶ Mayaserecapa, ániya máicha:

—Tata, mararihi puiti te nupena ema amaperu numusura ticajumahi eta áire. Tétavicavahi tacativa masama. Pájapanupaini, picanarasinanupanaini éma —máichapa.

⁷ Éma Jesús, majicapapa:

—Tiuri, nuyanayare nuncanarapanayare —máichapa.

⁸ Tásiha, ema capitán majicapapa:

—Tata, vahi picucañamacava eta pítesiraina eta nuyehe, taicha vahi táuricahini pisiapahini te nupenasami. Németeaca taratarichu picavanairipi eta picanarasiraya ema numusura.

⁹ Taicha nútí nusuapahi te tivaneceanuana ena anuquehepananahi eta nuyehe. Nútiripa nusuapacarehivare nayehe ena nusuntaruranahi. Te nuvanecavaca, téhevare níchuhavacapuca, tisuapanuanahi. Te nuvanecapuca ema nuvaneru, enurujipa tisuapanuvane — máichapa.

¹⁰ Te masamapa ema Jesús eta juca, ichaperinehi márami eta yátupirahi macasiñavairahi eta mayehe. Máichavacapa ena téhicanapahi:

—Nutupiruva numetacahe: Nájina nímhaha émanaina vijaneana israelíta mácutihini ema maca achane apavasana eta macasiñavairahi eta nuyehe.

¹¹ Numetacahe puiti: Járajapainapa eta sache, náitecapiraya ena camuriqueneana achaneana apavasana tiásihanayare te tamutu avasareana te juca apaquehe. Tisiapanayare eta mávasa ema Tata, te mávihahi ema viáchucaini Abraham, ema Isaac, émapa ema Jacob. Tétavicavainapa eta náurisamurevaya.

¹² Tacahe, tamapuruji eta náimatiequenehairahi ena vijaneana israelítana eta máechajiriruva ema Tata, váhisera nácasiniávahini eta nuyehe. Eta tivíuchavacayarehi tayehe eta

nacaicuñaiyaya eta te tamapicuquene te távihahi eta tájjurequenehi yucu. Ticapitiquiahechavanainapa eta tacativayare nasama. Tíyahanainapa —máichapa.

¹³ Tásiha, ema Jesús máichapa ema capitán:

—Piyana pichava te pipena. Tinaracaripa ema pimusura, taicha eta picasiñavairahi eta nuyeha —máichapa.

Tacahe, ema amaperu ticajumahi tinaracaripahi te jena hora eta náechajirisiravahi éna.

Ena Jesús macanaraca esu máimase ema Pedro

(Mr 1.29-31; Lc 4.38-39)

¹⁴ Ema Jesús tiyanavarepa te mapena ema Pedro. Máimahapa esu máimase ema Pedro, ticajumahi eta muraca fiebre. Mapauchapa tayehe eta suívesihahi.

¹⁵ Máemamahacapa, enevanepa táetaviacahi eta fiebre. Tinaracapa. Enurujipa téchepuca. Tásiha, tépanavapa ésu eta suítátirahi ema Jesús.

Camuriana ena macanaruarunapahi ema Jesús

(Mr 1.32-34; Lc 4.40-41)

¹⁶ Te yátipa, titecaparácanaipaichucha ena achaneana. Námavacapaipa ena nacajumaqueneana, énapa ena návaháruana ena éreanana. Tacarichu te máechajiriruvachucha ema Jesús, macuchuchujicavacapaipa ena éreanana tiávahácanaahi ena nacajumaqueneanaahi. Macanaracavacapa ena apamuriana tisananaahi eta apana jumareana.

¹⁷ Eta juca títauchavapahi eta táechajisihairahi eta májurehi ema víyarahaini profeta Isaías, ani tacahehi: “Masaminahavivare eta vijumana eta macanarasirahavihi”.

Títuparacahavi vahi véñamavaimahi eta víjarasiravahi véhica ema Jesús

(Lc 9.57-62)

¹⁸ Te máimahapa ema Jesús ena camuriqueneana achaneana nachayacahi, macavanairipia ena máimitureana natsecava eta nánuesirayarehi te apachara cáquiure.

¹⁹ Tacahe, ema émana escribáno témeñahavapa mayeha ema Jesús. Máichapa:

—Tata máestro, nútí apana nuvaraha néhicavi te jácani pivarahaqueneyare piámianu —máichapa.

²⁰ Ema Jesús, ánipa tacahehi eta majicapirahi:

—Tamutu eta sárareana ticapenavaca. Énerichuvare eta cáyureana tamacajipachuvare. Nútisera nuti Manerejirunuhi ema Viya, tájina nuviya nusiapihahini —máichapa.

²¹ Te apanavarepa sache, ema émana máimiture máichavarepa:

—Tata, nuyaseacavi písapanuhini nuchava te nupena. Nucuchapanumayarehini eta máepeniraya ema ticachichanu, nécaranumaya. Tásiha, nucapayacavipa néhicaviya —machahepa.

²² Ema Jesús majicapapa:

—Péhicánuchucha. Pésamirica náecaracacaichaha ena máecharareana. Tájina tájaracavimahi eta juca tihapasamurerecavihi —máichapa.

Ena Jesús macaesamirica eta táepacusirahi eta une étapa eta técticava

(Mr 4.35-41; Lc 8.22-25)

²³ Te títapiricapa ema Jesús, tiávachupa te pacure. Énapa ena máimitureana, náehicapapa éma.

²⁴ Te itupierecanapa, járajapapa eta muraca técticava. Ichapevaca eta táepacuruhana. Tisiapapaipahi eta une tayehe eta pacure. Ema Jesús, tímacapaichucha éma.

²⁵ Tacahe, ena máimitureana tipiararecanapa eta napisirahi. Nacajamicapa éma. Ánipa náicha:

—Tata maestro, picatiuchahavi. Véricainapa —náichapa.

²⁶ Ema majicapavacapa:

—¿Tájaha tacayema epica? ¿Vahi ácasíñavapahini eta nutiarahirapahi eta eyehe? —machahepa.

Tásiha, téchepucapa. Macamatnacapa eta técticava étapa eta une. Enevanepa tésamiricavahi eta táepacusirahi. Tájinapa táchiravainahini.

²⁷ Ena máimitureana ichaperinehi nárami. Ánipa nacahe:

—¡Tétavacavahi eta máitupajijiasiravahi! ¡Jéhesare, yátupiquene eta émairahi machichahi ema Viya! ¡Taicha tamutu tasuapahi, macamatnacahi eta técticava étapa eta une eta táepacusirahi! —nacahepa.

Ena apinana ajairana návaháruana ena ichapemuriqueneana éreanana

(Mr 5.1-20; Lc 8.26-39)

²⁸ Te títecápapa ema Jesús te apachara eta cáquiure te apaquehe Gadara, tiúchujicanapa te ecari ena apinana ajairana, návaháruanahi ena éreanana. Tétavicava eta náñehivavacahi. Náehayarehi nácani tiánucuhanapahi. Tacahe, napauchapa ema Jesús.

²⁹ Típiararecanapa, ániapa nacahe:

—¿Tájaha picha píteca pipauchahavi piti Jesús, Machichaquenevihi ema Viya? ¿Pivarahapa picaetemajiricahaviyare víti? ¡Pájapanuhavi, vuíchaha picuvanecahavi tayehe eta vicaicuñaiyare! —nacahepa.

³⁰ Tásiha, tatiarihivare nacachacayahi eta camuriqueneana cúchiana tinihicanahi.

³¹ Ena éreanana nayaseacapa ema Jesús. Ániapa náicha:

—Te piáquiicahaviyarepuca, picatajicahavi. Písapahavi visiapahacavaca eta jena cúchiana —náichapa.

³² Tacahe, ema Jesús máisapapa:

—Tiuri, eyana esiapahacavaca —máichapa.

Tacahe, tiúchucanapa ena éreanana nayehe ena návaháruanainihi. Tiáramemurihanainehi eta cúchiana. Tijunaparacanapa témiririjicanapa te tachausi eta cáquiure. Téririjicanapa.

³³ Ena tijanearecanainihi eta cúchiana tiyananapa tijunana tayehe eta avasare. Timetajiricanapa eta náimairahi, étapa eta nanarasirahi ena návaháruanahi ena éreanana.

³⁴ Tacahe, tiyananapa ena achaneana te mávihahi ema Jesús, náimahapanahi. Te náimahapa éma, nayaseacapa vahi macuíticapahini te návasa, machavahini te másinehi.

9

Ena Jesús macanaraca ema émana achane macajumaquene eta muracaquiha

(Mr 2.1-12; Lc 5.17-26)

¹ Tacahe, ema Jesús tichavapa tiávacuhavarepa te pacure. Tichavapa tayehe te mávasahi Capernaum.

² Ánaqui náimipauchavarepa ema achane macajumaquene eta muracaquiha. Ema tívecahi te mayehe camilla. Te náimahapa ema Jesús eta nacasiñavairahi eta mayehe, máechajicapa ema macajumaquene. Ániapa máicha:

—¡Pétumechava, nuchicha! Nucaepahainavipa eta pipecaturanaini —máichapa.

³ Natiarihi ena escribánoana. Eta nasamirahi ema Jesús, ániapa nacahe te nasamure: “Ena maca tépiyacava tímijachavahi Viya eta macaepahairahiji eta pecatuana. ¡Tétavicava eta matapirava!”

⁴ Émasera ema Jesús máimatihí eta napaneruanahi. Máichavacapa:

—¿Tájaha tacayema eta éjecapirava nuyehe te epaneruanahi? Núti tájina nutapiravaina eta níchirahi eta juca.

⁵ Núti, eta nucaepahairahi eta mapecaturana ema maca, tacutihí eta máejerererahi eta nuncanarasirahi eta máquehe.

⁶ Tiúrisera puiti, nuti Manerejirunuhi ema Viya, nímereuchavainapa eta nuratahairahi nucaepaha eta pecatuana te juca apaquehe. Ímararacanu —tacahe, máichapa ema macajumaquene—. Puiti, nuchicha, nuvanecavi péchepuca. Piveha eta jara piyereruva. Piyana te pipena —máichapa.

⁷ Enevanerinehi téchepuca ema macajumaquenéni. Tiyanapa te mapena.

⁸ Ichaperinehi eta náramirahi namutu ena achaneana natiarihiqueneanahi. Tétavicavarinehi eta nacunachirahi ema Viya taicha eta máitupajijiasirava ema Jesús eta máijarasirahi ema Maiya.

Ena Jesús máichuha ema achane ticaijare Mateo, mayeheyare apóstole

(Mr 2.13-17; Lc 5.27-32)

⁹ Te apanapa sache, nuti Mateo néjacahi eta te nucobradesirare eta impuesto. Tacahe, tiánucuhapaipa ema Jesús. Te tímahanupa, tíchuanupa.

—Yare, péhicanu —máichanupa.

Enevanepa, néchepucahi. Néhicapa éma.

¹⁰ Tacahe, námapa éma te nupena, énapa ena máimitureana. Níchuhavacapa ena nuchamuriana ticobrarecarahianahi eta impuesto énapa ena apamuriana tisipecaturana. Nénicavacayarehi éna. Macachanemurihivare ema Jesús eta vinisirahi.

¹¹ Títecapanavarepa ena fariséoana. Eta náimairahi namutu ena némunaruqueneana, eta vicachanerahi ema Jesús, ticaeahirecanapa. Ániapa nacahe nayehe ena máimitureana ema Jesús:

—¿Tájaha tacayema tísapava ema eyehe maestro macachanevaca eta manisirahi ena nánitatijiana ticobrarecarahiana eta impuesto? ¡Ticapecaturarahiana éna! —nacahepa.

¹² Te masamairiricapa ema Jesús eta náechajiriruvana, máichavacapa:

—Ena majumareanahi vahi nácamunuimahi ema médico. Nacarichu ena ticajumanahi nacamunuyarehi ema médico.

¹³ Nútiripa vahi étaina tímitecanuhi nutanucayarehi nácani matapiravareanahi. Nutanucapahi núti ena tisipeaturana, apaesa náeneuchava, náinajica eta napecaturana. Tásiha éti, eyana ecaravahu eta máechajiririvanahi ema Viya. Ánipa macahe: “Núti nuvaraha yátupinaini eta eJapanuraivainahini. Taicha te vahi, tamapurujiyare eta ecamavahuirahi eta nuyehe” macahepa ema Viya.

Nayaserecapa ema Jesús tayehe eta ayuna

(Mr 2.18-22; Lc 5.33-39)

¹⁴ Títecapanapa ena máimitureana ema Juan Tícachasiricarahi, nayaserecapa ema Jesús tayehe eta ayuna. Ánipa naicha:

—¿Tájaha tacayema vahi nahayunacha ena pímitureana, vahi nácutihavihini viti máimitureana ema Juan, énapa ena fariséoana?

¹⁵ Ema Jesús majicapavacapa:

—Nímicutichinahe puiti. Vahi táuricaimahi ticatisamurevana nácani ticaichuhacasianahi tinicanahi nayehe ena araimana. Tiúrisamureanayarehi taicha matiarihíhi ema arayena. Téhesera te tépenapuca éma, jéhesare ticatisamurevanayarehi. Tacutiquene, vuíchaha táuricaimahi eta ayunanainahini ena nímitureana. Járापainapasea eta sáchezare, ticaverejicAsianayare taicha ticaratacanuanainapa ena ticapacananaya núti.

¹⁶⁻¹⁷ Esamanuchaha. Eta juca eta nímiturapiana, amairiha arairu. Mavaraha ema Viya arairuyare eta eyeherepianayare eti achaneana. Vahi ticiticacaimahi eta nayeherepiana ena achaneana. Eta ítusira éti eta nímiturapiana, tavaraha ínajica eta ichasi eyeherepiana tauriqueneanahi —máichavacapa ema Jesús.

Ema Jesús macanaraca esu machicha ema Jairo, ésupa esu apana esena sucajumaquene-hivare

(Mr 5.21-43; Lc 8.40-56)

¹⁸ Téchajiricavaichahahi ema Jesús nayehe ena achaneana, títecapanechavare ema émana achane ticajare Jairo. Tuparairucahi éma. Matupirupa tépuyucapa te mamirahu ema Jesús. Ánipa macahe:

—Tátachicha, surarihi esu nuchicha. Puítirichaha tépenahi. Téhesera te piyana, pinacaini eta pivahu, suchavahini suítarecahíni —máichapa.

¹⁹ Tásiha masuapapa ema Jesús. Tiyanapa te mapena ema Jairo, vimutupaichu viti máimitureana.

²⁰ Tásiha, sutiarihíhivare esu ésuna esena sucajumaquene. Doce áñoripahi eta sucatajivairahi, táichirahi eta suítine. Témeñahavapa te maquecu ema Jesús. Suémamacapa eta tacheyarapi tamatsianahi eta mamuiríha.

²¹ Taicha te supaneru ésu, sucahehi: “Tatararichu jácani te némamaca eta ñimuiríha, éta ticanaracanuyare” sucahepa.

²² Émasera ema Jesús masamarichucha eta suémamajiasirahi, macacutiarahi eta macanararesirahi. Téquerucavapa. Máimahapa eta supisirahí esu esena. Tásiha, máichapa:

—Vaipa picupica, nuchicha. Pinaracapa puiti táichavenehi eta picasiñairanuhi —máichapa. Tacahe, tinaracapa esu esena. Vaipa tápechahini eta sujumainíhi.

²³ Tiyanavarepa ema Jesús. Títecapapa tayehe eta mapena ema Jairo. Máimahainehi ena músicoana. Tiúrianaipahi eta námiryarehi te ecari esu suépenaquene. Énapa ena achaneana, tijamurianaripahi eta náiyairíha.

²⁴ Tásiha, ema Jesús máichavacapa:

—Íuchucachaha te aneca. Váhinéni suépenahini esu suca amaperu. Tímacarichucha ésu —máichavacapa.

Énasera nacaecahirichucha éma, técanapapa.

²⁵ Te tiúchucanapa ena achaneana, tisiapapa ema Jesús te suávihahi esu suépenaquene. Macaratavauchapa ésu. Macaechepucapa. Tichavapa títarecahi ésu.

²⁶ Te nasamairiricapa ena ticavasanahi eta te Capernaum, náraminehi namutu. Nacatsatsaicapa timetajiricanapa.

Ema Jesús macanaraca ena apinana púchuquiána

²⁷ Tiuri, tichavayarepa ema Jesús te mapena. Eta mapaisirahi te calle, náehicapaipe ena apinana púchuquiána. Tipiaracanapaipahi te máequene.

—¡Tátachicha Jesús, páJapanuhavi picanaracahavi. Vicasiñavi piti yátupiquenévihi Cristo! —náichapa.

²⁸ Váhisera masuapavanehini éma. Te tisiapapa ema Jesús te mapena, ena púchuquiána tisiapanavarepa. Témeñahavanapa eta mayehe. Tásiha, éma mayaserecavacapa. Ánipa máichavaca:

—¿Yátupipuca ecasiñanuhi eta nucanarasiraheyare? —macahepa.

Ena najicapapa:

—Yátupi, tata.

²⁹ Tacahe, ema Jesús máemamacapa eta náuquihana. Tásiha, máichavacapa:

—Tiúri, eta ecasiñairanuhi, enaracayare —máichavacapa.

³⁰ Jéhesare, enevanepa tinaracanahi. Tímairiricanapa. Tásiha, muracapa eta matuparasira vahi nacumetajirica eta macanarasiravacahi éma.

³¹ Váhisera nácahehini éna. Étarichuhi te tiúchucanapa, tímatajiricanapa eta macanarasiravacahi. Tásiha, náechapa namutu te tachacayarahanahi eta avasare eta juca máichaquenehi ema Jesús.

Ena Jesús macanaraca ema achane upa, macaechajicahi

³² Te viúchucavarepa, nacahepaipavare ena achaneana. Námapahi ema achane. Úpahi éma, taicha mávaháruhi ema éreana.

³³ Tacahe, ema Jesús máquijicapa ema éreana, ema tiávahácainihi. Tásiha, ema achane tinaracapa. Téchajicapa. Ichaperinehivare eta náramirahi ena achaneana eta náimairahi. Ánipa nacahe:

—¡Tétavicava eta máitupajijiasirava ema Jesús! Te viávasa Israel, nájina tiratahaina tíchaina tácutihini eta juca vímahaquenehi —nacahepa.

³⁴ Nararihivare ena fariséoana. Ánipa nacahehi:

—Ema maca Jesús, vémeteaca majupahahi ema Satanás, ema náquenumurihi ena éreanana. Máijjararuhi jácani eta máitupajijiasiravahi eta macuchusiravacahi éna —nacahepa.

Ena Jesús majapanuvaca ena achaneana

³⁵ Ema Jesús tamutuhi mapaica eta avasareana étapa eta ánichichaqueneana avasarechichana. Tímiturecapahi tayehe te jácani máitecapihapahi te náurujisirarevana. Ticametarairupahi eta máechajiriruva ema Viya eta náuchucuirayare ena ticasiñanahi éma, machaneranayarehi éna. Ticanararecapahivare ena ticatajivanahi ticatiruhanahi.

³⁶ Camuriana ena achaneana títanajirícavanahi. Taicha ticatajivanahi éna, nájina nácasíñahini. Nacutihí eta uvesa te nájina tijaneacaina. Eta máimairavacahi ema Jesús, íchape eta majapanuiravacahi.

³⁷ Tacahe, ema Jesús máichahavipa viti máimitureana:

—Tétavicavapa eta vicamunuirava ena tímicitacahavianaya tayehe eta juca vématanerepihi.

³⁸ Eyaseacayaresera ema Tata Vicaiyaquene, máijjaracahavi ena tímicitacahavianayare. Eta juca tímicitijiricavahi mácani achane eta macamunuiravahi ena tímicitacacanaya te máechatijicaya eta maharusura —máichahavipa.

10

Ena dócequeneana apóstoleana manerejiruanahi ema Jesús

(Mr 3.13-19; Lc 6.12-16)

¹ Tacahe, ema Jesús tíchuhavipá viti dócequeneana, mayeaneanayare apóstole. Tíjaracahavipa eta vítupajijiasiravayare víratahairayarehi vicuchucavaca ena éreanana, vicanarasirayareva ena nacajumaqueneana étapa eta nacatiruhavana.

²⁻⁴ Eta juca víjareana viti apóstoleana*: Ema títapuca ema Simón Pedro, émapa ema maparapeichu Andrés, ema Jacobo ema maparapeichu Juan, ema Felipe, ema Bartolomé, ema Tomás, nútípa Mateo, ema apana Jacobo, ema Lebeo, ema apana Simón, émapa ema Júlasí Iscariote (ema tíjararecáhi ema Jesús).

Ena Jesús mavanecavacapa ena dócequeneana apóstoleana napaicayare tamutu avasareana, ticametarairuanayarepahi

(Mr 6.7-13; Lc 9.1-6)

* **10:2-4** Ena nani apinana ajairana ema Jacobo émapa ema Juan, napaapecacahi, machichanaveanahi ema Zebedeo. Ema Mateo, eta máematanerepinihi, ticobrarea eta impuesto. Ema apana Jacobo, machíchahi ema Alfeo. Ema Lebeo, mapapíhi eta májare. Ticajarehivare Tadeo étapa eta Judas. (Te pívaraha pecha, pitanuca te Marcos 3.16-19 étapa te Lucas 6.14-16.) Ema apana Simón, tímíticarehi éma, nachamurinihi ena revolucionárióana ticajareanahi "cananístana". Navaraha náquijica ena extranjeróana romanoana.

⁵ Tacahe, ema Jesús tévatacavipá viti dócequeneana apóstoleana vicametarairuyarehi. Ánipa máichahavi:

—Vahi ecuyana tayehe eta návasana ena apavasajuecuana. Váhivare ecuyana nayehe ena samaritanoana.

⁶ Eyanayaresera tayehe eta avasareana návasanahi ena vijaneanana israelítana. Taicha éna nacutihi eta uvesana máquenureana.

⁷ Eyna ecametarairuyare nayehe. Emetacayare eta nútijapairainapa nuti Náquenuyare, nuti nucuchucuhavacayare éna, taicha mavanerunuhi nútí ema Viya.

⁸ Ecanaracavacayarepahi ena leprósoana énapa nácani ticatajivanahi taicha eta apana jumare. Ecaechepucayareva ena nápenaqueneana. Ecuchucayareva ena éreanana. Éti, vahi evachareruinahi eta juca ítupajijiasiravahi, váhivare ecobrachaimahi nácani ecanaranayanare.

⁹ Váhivare íámaimahi eta oro, eta plata, eta reale. Tacuija iama eta enirurucuha te alforja.

¹⁰ Étanarichuvare emuirihá, éta íámayare. Étapa eta éparupeva, étaripa eta eyupairiquiana. Ema ticaematanerahi, tatuparacahi náenicayarepahi te jácani macaemataneyapahi. Ene ecaheya éti, tíatítheanayare ena tijacapanaya eta ecametarairuyarepahi.

¹¹ Te ítécapaucha jácani avasare, etanucayare ema achane tiuri, témunarahi. Enasiyare mayehe. Tíámainucava te táitecapa eta iúchusirayareva tayehe eta avasare, epaenumavaya ejunijica eta ítécapihahi.

¹² Te esiapayarepa tayehe eta peti, eyaseacayare ema Viya eta náuricacarevaina ena achaneana ticapenana eta peti.

¹³ Te tíúrianahi ena achaneana ticapenanahi eta peti, ímiyanava eyaseuchayare eta náuricacarevaina. Téhesera te vahi nacuri, váhi eyaseuchaimahi.

¹⁴ Étaripa te váhipuca nacujacapahe te jácani avasare, étapa te jácani peti ítécapihayare, váhivare nacubaraha nacusamahe, iúchucavaneyareva. Étatapevachavanúmayareséra eta máteji te ívapeana. Táicutiarayare eta máicuñasirayare ema Viya taicha eta namavarairahi najacapahehíni.

¹⁵ Nutupiruva numetacahe, te táitecapa eta juicio, tíapajucavainapa eta náicuñayare. Tacachuricayare eta nacaicuñairayare ena achaneana váinarajiqueneana ticavasanaini te Sodoma étapa eta Gomorra.

*Nacatianacainapa ena téhicanapahi ema Jesús
(Lc 12.2-7)*

¹⁶ Esamanuchaha. Núti nuvanecahehi éti eyana epaica. Nararihisera ena achaneana váinarajiqueneanahi étupiaruanayare. Éna nacutihi eta sárare táíñehiqueneánahi. Étisera ecutiyaere eta uvesa eta tamansuvahi. Ítucayare eta ecaichepaysirayare eta navainarajivana. Váhisera ecujicapachava te návarahapuca náehahe.

¹⁷ Échapava, taicha nararihiyare ena achaneana ticatianacaheanayare táichavenehi eta éhisiranuhi. Ticaratacaheanainapa, écayaserehinapa nayehe ena juéseana. Téstaacaheanainavarepa eta te náurujisirarevana.

¹⁸ Tásiha, etiarhiyare éti tíámaheanaya te namirahu ena aquenucana, téhevare te namirahu ena Presidenteana gobiernonahi, ecaviurevayare táichavenehi eta éhisiranuhi. Esapihasera éti, ecamapuravainapa échajisianuyare te namirahu éna, apaesa náimatiyare namutu ena achaneana te avasareana eta nímiturapiana.

¹⁹ Tacahe, te jácani námahepauca te namirahu ena aquenucana, vahi ecueñamava tayehe eta jácani échajichiravayare, ecatiuchiravayare. Échajicayare eta échajiriruvana máijararuhayare ema Espíritu Santo te jena sache.

²⁰ Taicha máimahaheinepa, tímítucaheyare eta échajisiraya. Vahi étijivaimahi eta échajisiraya.

²¹ Natiarhiyareva nácani achaneana tíjararecanaya ena napanapequeneana, navarairahi náimicapaca táichavenénahi eta náehisiranuhi nútí. Natiarhiyareva éna nácani náiyana, navarahayareva nájarareca ena nachichanaveana táichavenehi eta náehisiranuhi nútí. Natiarhiyareva nácani nachichanaveana nacanarainapa ena náiyana, náimicapacainapa táichavenehi eta náehisiranuhi nútí.

²² Namutuyaréni ena achaneana ticatianacaheanayare táichavenénahi eta éhisiranuhi nútí. Téhesera ecamichahi tamutu, ímiyanavahi eta éhisiranuhi te táitavapa tamutu, nucuchucuhaheyare nútí.

²³ Te napanajicahepuca te jácani avasare íávihihi, táichavenehi eta ecametarairuirahi, ejunayare tayehe eta apana avasare. Jéhesare, nuti Manerejirunuhi ema Viya, nútijapavainénapa. Vuichaha ecuitahi epaica eta avasareana ne vijaneanana israelítana.

²⁴ Éti nímitureana, ticatianacaheanaya ena achaneana. Vahi epicauchacarémahi nayehe, táichavenehi éhisiranuhi níti. Ticatianacaheyaresera tacuti eta nacatianasiranuhi níti.

²⁵ Tíjarechaheanayare váinarajihe, máurishihepuca, tacuti eta náumehairanuhi níti. Étiserá, evapinavaya eta ecutiranuyare eta nacatianasiranuhi nuti iáquenu, níti eyehenuhi maestro.

²⁶ Váhisera ecupicavaca ena ticatianacaheana. Ema Viya tímarracaheya. Ticunachaheya eta ecamichirahi, evehainapa eta ícuchihi.

²⁷ Tásiha, étumechava eta ecametarairuraya tamutu eta nímiturapiana te tamutu avasareana. Jácani néchajiriruvanahi te tímápicu, éti ecuchujicayarehi te tíjarahí, emicauchiravacaya ena achaneana. Étaripa eta nujajairuhehi te vicarichuhi, epiaracainapa te calle.

²⁸ Vahi ecupica nácani nacapacapuca eta iáquehe, tacarichuchucha náituruequenehayare. Váhisera naratahaimahi nacamítiequeneha eta iáchaneva. Macarichu ema Viya epicayare, taicha éma máituruequenehahi tamutu. Maratahahi macamítiequeneha eta iáchanevana tayehe eta táifñehiquene infierno, te ecainajiruva táichavenehi eta episirapuca eta nacapásiraheyare.

²⁹ Nímicitichinahe eta cáyurechicha. Éti ímijachapapuca vahi tasivachahini éta. Téñamacareanahisera me Viya. Éma, téchavacahi eta táitaresirahi, étapa eta táepenirahi.

³⁰ Evetíjipa éti, éñamacarepanahi me Viya. Éma, tímátipa eta tatupa eta echutimacana. Téchahehivare éma tamutu eta itaresirana.

³¹ Eta tacahe, vahi ecueñamavahi éti tayehe eta itaresirana, taicha tétavicavahi eta emunavahi mayehe.

*Vímereuchavayare eta véhisira ema Jesús
(Lc 12.8-9)*

³² Tímijanava ema Jesús tímítucahavi. Ánivare macahe:

—Namutu ena tímereuchavanahi eta náehisiranuhi te namirahu ena achaneana, níti apanavare nímereuchavaya eta nuchanerairavacahi éna mayehe ema Tata Nucaiyaquene, ema tiáviyahahi te anuma.

³³ Nácanisera vahi návarahahini tímereuchavanahi eta náehisiranuhi, níti apanava nímereuchaya eta vahi nuchaneranainahini éna, te mamirahu ema Tata Nucaiyaquene.

*Ena achaneana náepuruvacainapa nácani téhicanayare ema Jesús
(Lc 12.51-53; 14.26-27)*

³⁴ Éti ímijachaipapuca eta nítesirahi te juca apaquehe, tájina tácyemacarémahí, tíuricacareyarehi nícha. Váhisera ene tacahe. Níchaveneya níti, ena achaneana tépuruheanaya téráji-cavanaya eyehe. Eta tacahe, nuvaraha échapirica yátupina eta juca éhisiranuhi.

³⁵ Taicha puiti juca vicaijuheyare, mácani achane, te natiaríhi ena machichanaveana, nacatichayarehi ema naiya táichaveneyarehi eta máehisiranuhi éma. Ésuripa esu naena, nacatianacayareva. Ésupa esu chinena, sucatianacayareva esu suímase taicha eta suéhisiranuhivare esu apana.

³⁶ Ene nacaheya, nararihiyare ena tachichanaveana eta peti ticatianacana ena náiyana te peti níchavenehi níti.

³⁷ Nácanisera tñajicavana eta náehisiranuhi táichavenehi eta nacatianasira ena nachichanaveana, váipa tatuparacahini nuchaneranainahini. Énaripa nácani tñajicavana eta náehisiranuhi táichavenehi eta nacatianasira ena náiyana, énerichuvare vaipa tatuparacahini nuchaneranainahini.

³⁸ Énerichuvare nácani apaesarichu eta navarairahi téhicanuanahi, váhivare nájaracavahini táimicacahini eta náehisiranuhi, vaipa tátuparacahini nuchaneranainahini.

³⁹ Taicha nácani téñamavanahi eta náitaresira, tiávamirahuana eta náehisiranuhi, énajivayare ticamítiequenehavanaya. Énasera nácani yátupi tíjaracavanahi téhicanuana, táimicaparuanayarepuca eta náehisiranuhi, éna tíuchuchuanayare eta náitaresiryare.

*Jararihi eta vícuchihi te anuma
(Mr 9.41)*

⁴⁰ Ema Viya máitsivachayare nácani tíuriana ena najacapiraheyare nasamahe éti. Taicha eta najacapirahehi, ticaecheranahi eta najacapiranuhivare níti; énerichuvare najacapahivare ema Tata Nucaiyaquene.

⁴¹ Énerichuvare nácani tíjacapanahi ema profeta nuvaneruhi, énapa ena achaneana tíuri eta náehisiranuhi, máitsivachayare ema Tata, májarasiravacayare eta náicuchi.

⁴² Énaripa ena témunarahanahi nayehe ena nani ánichichaqueneana téhicanuanahi, nacumpiracha eta une táichavene eta náehisiranuhi; énerichuvare jararihi eta náicuchi quene —máchahavipa ema Jesús.

11

*Éma Juan Tícachasiricarahi mavanecavacapa éna máimitureana
(Lc 7.18-35)*

¹ Te tamutupa éta máimitusirahavihi éma Jesús viti dócequeneana mayeheana apóstole, tiyanavarepa éta te avasareana tayehe éta Galilea. Taicha mavarahahi máimitucayare éna achaneana éta máechajiriruvana éma Viya.

² Tiuri puiti, éma Juan Tícachasiricarahi, mávinehi te cárcel. Ánaqui masamairiricapa éta máichaqueneanahi éma Jesús. Tacahe, máevatacapa éna apinana máimitureana, nayaserepanayarehi éma Jesús.

³ Te náitecapauchapa, náichapa:

—Éma viáquenu Juan tivanecahavihi viyaserepanaviyare te yátupihipuca pítiripahipuca Cristo éma vicuchapaquenehi, ¿téheserapuca vímiyanavayarepuca vicuchapa? —náichapa.

⁴⁻⁵ Éma Jesús majicapavacapa:

—Nuvaraha ímararacaya éta níchaqueneana puiti. Nucaimairiricavacaipa éna púchuquiána. Nímipaisiraipa éna masariana. Nucanaracavacaipa éna leprósoana, énapa éna túhuquiñiana. Nucaechepusiravacaipavare éna náepenaqueaneanaini. Énerichuvare níchuhahi éna páureana náeneuchavaya apaesa náuchucuha. Tásiha, eyana emetaca éma Juan tamutu.

⁶ Vaipa macueñamava éma Juan éta nuyehe. Tétavicavahi éta máuricacarevahi éma, te ticasíñavahi éta nuyehe —máichavacapa.

⁷ Tacahe, tichavanapa éna vanairucanahi me Juan. Tásiha, tépanavavarepa téchajica éma Jesús, máechajisihapa éma Juan. Ánipa macahe éta mametasiravacahi éna achaneana:

—Nuvaraha epanereuchayare éma Juan. Te jácani vuíchaha nacaratacaghini éma, te eyanapa te mávpahí apaquehe te mávíhahi, ¿tájaha éta epanereruana tayehe éta macametarairuirahi? Éti ímijachaipapuca mamapachichijiriruvaichucha éta máechajisirahi tacutihí te vímararaca ta tafurená éta acutena te tacayamuririjica éta téccaticava.

⁸ Ímijachaipavarepuca tavayuaruhi éma tiúrinanácavayarehi éta macamuirihairahi. Écharichuhi éti mácani tiúrinanacavahi, píncanillahi éta máitaresira, váiparinehi tiúchucaimahi te sache, váhivare tiyanaimahi te mávpahiana apaquehe. Manasiqueneyarehi te jácani tiúrina peti.

⁹ Nuyaserecahe: ¿Tájaha éta ímijachirahi éta mayehe? ¿Ímatihipuca éta profetairahi éma? Núti numetacahe: Matupiruvahi éta macametarairuirahi éma Juan. Mavaneruhi éma Viya éta yátupiquenehi profetahi éma. Nájina mácutihini éna apamuriana profetana.

¹⁰ Éma maca Juan émara máechajisihaquenehi éma Viya éta te Sagrada Escritura, ánipa macahehi: “Nuvanecayare éma tinapumirauchaviyarepahi éma ticametarairuyarepahi, apaesa natsecavapaipa éna achaneana éta najacapiraviyare” tacahepa éta Sagrada Escritura.

¹¹ Núti nutupiruva numetacahe: Éma maca Juan, nájina mácuti nayehe éna achaneana. Tétavicavahi éta macunachacarevahi. Tiápajupanavahísera éta nacunachacarevahi nácani nuchaneranaya, apaesachichapucaini éta nacaicutiarairahi éta mapanereruana éma Tata.

¹² Éma Juan tépanavapa éta máimitusirahi éna achaneana tacamunuirahi éta náeneuchirava me Viya. Nararihisera éna vahi náuricahini nasamararacaghini. Étapa tímítichahi témecatájivachahi éma. Puiticha tanasíhi ticatichanuana núti apanava, témecatájivachanuanyare.

¹³ Éma víyarahaini Moisés téchajisihanuhi éta te májurehi. Énaripa éna víyarahaini profetana náechajisihahi éta nítésirayarehi nuti Manerejirunuhi éma Viya.

¹⁴ Puiti numetacahe: Éma Juan émaripahi éma profeta máiteruyarehi mavasiyarehi éma víyarahaini Elías, éta máinapumirauchiranuyare.

¹⁵ Te evarahapuca ecaicutiara, tavaraha éta epanerechinavaya.

¹⁶⁻¹⁷ Etiaríhíhísera eti achaneana puiti juca sácheana, éta emasuapajiraivahi, nímicutichahesa éna amaperuana tiútseruanahi. Apapípijichucha éta nacayemaqueneanapahi. Éma apana macahepapuca: “Vépiyacaya éta piéstachicha”. Énasera éna apamuriana vahi náisapavahini. Tásiha, éma apana macahepuca: “Vépiyacaya éta ecari”. Váhivaresera náisapavahini.

¹⁸ Éma Juan, te tímerecavapa, muraca éta máimiturapiánahi. Éta manicasareana, vahi tácutihini éta nanicasareana éna achaneana. Nararihisera te emuri éna tépiyaequenehanahi éma. Náimijachahi mávaháruhi éma éreana.

¹⁹ Nuti Manerejirunuhi ema Viya, eta nitecapauchirahepa, nucachanehepaipa eti achaneana eta enisirahi. Etiarihivare eti épiyaequenehanuhi: “Ímaha ema maca, cánisiquitataji, cávahárasí. Macachanevacapaipa ena achaneana tisipecaturarahianahi” ecahehi. Eti épiyacavapa épururahi, ticutirinehi yátupinahini échemarahihini. Tétavicavahisera eta éjcapiravahi taicha eta emasuapajiravahi. Te yátupihihini échemarahi, ímatinuhini eta nucavanahirahi eta me Tata —máichapa ema Jesús.

Eta táicuñayare eta návasana ena achaneana masuapajirairhana
(Lc 10.13-15)

²⁰ Ema Jesús tépanavapa máechajisíha eta táicuñayarehi eta avasareana máichinehi eta tiáramicareana. Tícaicuñanayarehi ena tachichanaveanahi táichavenehi eta namasuapajiravahi. Váhivare náeneuchavahini, náinajicahipucaini eta napecaturana. Máechajicapa ena achaneana tímicitijiricavahi natirihinahini te mamirahu. Ánipa macahe:

²¹ —¡Páurehesami eti nujaneana ecavasanahi te avasare Corazín! ¡Páurehesamihivare eti apamuriana nujaneana ecavasanahivare te avasare Betsaida! Ichape eta ícuñayare taicha éti ímaharipa tamutu eta tiáramicareana níchaqueneanahi te emirahu, váhisera ávarahahini éneuchavahini. Ena nani achaneana ticavasanahi te Siria, apavasananahinéni, tétavicavahinéni eta namaurivahi, németecasera nútí nasapihahipucaini téneuchavana te náimahahini eta níchaqueneanapahi. Enévanenahini náimerecavahini yátupi eta náeneuchiravainahini.

²² Numetacahevanesera: Te jena sácheyare, muracapanayare eta ícuñayare éti, taicha eta emavarairahi éneuchavahini. Tacachuricayare eta nacaicuñairaya ena achaneana apavasanana ticavasanahi te Siria.

²³ Étiripa eti ecavasanahi te avasare Capernaum, tamapurujíhi eta nímitusirahehi étape eta ímairahi eta tiáramicareana níchaqueneana. Eti ecasiñavavaicaíhi, ímjíchaipapuca eta ticayapaheyare te anuma. Ichapesera eta etsirihacarevayare, taicha épujuquichavayare eta te yucu taicha vahí éneuchavaimahi éti. Taicha te nímerecaini eta tiáramicareana tayehe eta avasaréni váinarajiquenehi Sodoma, tácutihini eta ímairahi éti, ichapehipucaini eta náeneuchiravainahini, váipapuca macuicuñacahini ema Viya.

²⁴ Numetacahevanesera: Ichape eta ícuñayare te táitecapapa eta juícioyare. Tacachuricayare eta náicuñayare ena ticavasanaini te avasare Sodoma —macahepa ema Jesús.

Ema Jesús tíúrisamuréinehi mayehe ema Maiya
(Lc 10.21-22)

²⁵ Étarichuhi te jena hórahi, ema Jesús ánipa macahe:

—Tata Nucaiyaquene, tétavicava eta nucunachiraví. Jéhevare píti táquenuvihu eta anuma étape te juca apaquehe. Títauchavaipa eta pipanereruhí. Vahi písapahini náitucahini eta júcana ena tímijachavanahi téchemarahiana. Énapasera píjaracahi ena nani téhicanuanahi, tájinahinéni náechemaraivainahini. Puiti nasapiharipahi nacachuricahi ena títipajijiacavanahi.

²⁶ Tétavicavahi eta táurivahi eta pipanereruhí píti, Tata Nucaiyaquene.

Ema Jesús máichuhavaca ena navitajiruana, mavaraha macanaracavaca

²⁷ Tacahe, ema Jesús máichavacapa ena achaneana:

—Ema Tata Nucaiyaquene, ema tíjaracanuhi eta nútiraya néchaya tamutu. Nájina énajivainahini náimatihini ema Tata. Nucarichu nútí néchinavahi ena nímitatiruanayare éma. Taicha nútí yátupíhi eta nímatirahi ema Tata Nucaiyaquene; tacutiqenehi eta yátupirahivare eta máimatiranuhi éma.

²⁸ Yare, ecasiñanu emutu eti evitajiruanahi te íachanevana eti éyarecarahiana eta éjcapiravana. Nútí nuncanaracahayare.

²⁹ Ísapava nunacasícahe eta nuyehe yugo. Nucachanehe apaesa ecaravahu nuyehe, taicha nútí mánsunu, tétavicava eta núriva eta nusamure. Éti tétavicavaya eta íuricacarevaya te íachanevana te ejacapa eta nímiturapiana.

³⁰ Taicha eta nuyehe yugo vahí tácajera. Tipevejiyare esama —máichavacapa ema Jesús.

12

Ena fariséoana náimipicahahi eta nayeherepiana tayehe eta sávarumuhua. Émasera ema Jesús máimereuchahi émarichu téchahi eta nayeherepiana ena achaneana eta sache nanarasirayare.

(Mr 2.23-28; Lc 6.1-5)

¹ Eta jena sávaru, ema Jesús tiyanapa tipaica. Tiámahavipa viti máimitureana. Témehicavanapa ena fariséoana. Vétavivijicapapahi eta isanítiana. Tacahe, eta vipaisirapahi,

vécuhapaipa viti máimitureana. Tásiha, vivechuquihapaipahi étajavapahi eta trigo. Vivepiraquihapaipa, vépurajacachavapaipahi. Vinicapaipa, taicha tísapacareichucha.

² Énaserá ena fariséoana eta náimarasirapahi, tisémanajuheanapa. Ánipa naicha ema Jesús:

—Pímaha ena pímitureana. Ticaemataneanapaichucha eta navepiraquihapahi eta trigo puiti juca sache tétavicavahi eta tacapicahuirahi. Vahi tísapacaremahi eta juca nacaematánéráhi puiti —náichapa.

³ Tásiha, majicapavacapa ema Jesús:

—Németeaca éti vahi ecaicutiara eta tacayemaquene eta Sagrada Escritura, eta máichavanevahi ema víyarahaini David eta mapaisirapahi técuhaipa, énerichuva ena téhicanapahi.

⁴ Écharichuhi éti te masiapapa eta mapena ema Viya, tiyaseserecapa eta manicayarehi. Náijaracapa eta pan tacapicahuquenehi nanacasarehi te mamirahu ema Viya. Nanicasarehi ena tiyujaracarahiana, émasera ema David vahi tátuparacahini manicahini. Étasera eta máecuavahi, manicapa eta pan, énapa ena macachanequeneanapahi.

⁵ Váhipuca échajicuha éti eta te Sagrada Escritura eta mavanairipi ema víyarahaini Moisés eta nayehe ena tiyujaracarahiana téchapajiricanahi eta Templo. Éna, tájina natapiravainahini eta nacaematanerahi te sávarumuhuana.

⁶ Tavetijichapuca puiti nutiarhipahi núti. Ichápequenénupánahi tayehe eta Templo.

⁷ Éti váhivare ecaicutiara eta juca máechajiriruvana ema Viya: “Núti nuvaraha yátupinaini eta ejapanuraivainaini. Taicha te vahi, tamapurujiyare eta ecamavahuirahi eta nuyehé” macahepa. Te ecaicutiarahini, váhiyarehini ecaecahivaca ena nímitureana, taicha éna tájina natapiravainapahi.

⁸ Tiuri puiti, numetacaheyare: Núti Manerejirunuhi ema Viya, nútirichu néchahi eta sache nanarasiraya ena achaneana —náichapa.

*Ema Jesús macanaraca ema achane tépenavahu
(Mr 3.1-6; Lc 6.6-11)*

⁹ Te apanavarepa sávaru, tiyanavare ema Jesús tisiapahi tayehe eta náurujisirareva.

¹⁰ Ánaqui matiaríhi ema achane vaipa tayamuricahini eta mavahu, tépenavahuipa. Natiaríhíhivare ena fariséoana, natanujiricahi eta ticaviurevayarehi ema Jesús. Nayaserecapa éma:

—¿Táuricapuca vicanaracavaca ena nacajumaqueneana te sávarumuhuana tacapicahuquenehi? —náichapa.

¹¹ Ema Jesús majicapavacapa:

—Nímicutichinahe puiti. Németeaca májina émanaina achane vahi macujapanuhini eta máitatuquene uvesa, te téchipaicavapuca te pusu te jena sache tacapicahuquenehi. Eta máéñamirahi, tipatsicava mavecucha eta paure sárare.

¹² Núti numetacahe: Ema maca achane tiápajucavahi eta téñamacare tayehe eta uvesa. Tacahe, tísapacaréchucha víchayare eta táuriqueneana te sávarumuhuana —máichavacapa.

¹³ Tásiha, ema Jesús máichuhapa ema achane ticajumavahuhi:

—Nímaha. Picajaruvauchava, pímereca eta pivahu —náichapa.

Tacahe, ema achane eta macajaruvauchiravahi, enevanerinehi tinaraca eta mavahu. Tiúrivarepa tichava, tacutipa eta mavahu sapa.

¹⁴ Tisémanarinehi ena fariséoana eta náimairahi eta máichaquenehi ema Jesús. Tiyananapa. Tinacuchavanapa eta napanerechirahi eta nacapasirayarehi ema Jesús.

Ema Jesús tiyanavarepa tipaichahi

¹⁵ Tacahe, ema Jesús, te máechapa eta napanereruhi ena fariséoana, navarairahi nacapaca, tiyanavarepa tipaichahi. Náehicapa ena camuriqueneana achaneana. Énerichuvare, náitecapauchapaipa ena nacajumaqueneana. Macanaracavacapaipa namutu.

¹⁶ Mavanecapaipasera ena macanararuanapahi vahi nacumetajirica eta émairahi ticanaraca.

¹⁷ Eta juca títauchavapahi eta máechajiriruvahi ema Viya tayehe eta májurehi ema víyarahaini profetaíni Isaías.

¹⁸ Ánipa tacahehi: “Nuvaraha ímatiya ema vanairucahi nuyehé, nunerejiruhi núti. Tétavicavahi eta némunasirahi, núrisamurehivare máicha. Ímatiyare éma taicha mávaháruhi ema Espíritu Santo máijjaruhi éma. Ema nuvaraha, tímítucavacayare ena achaneana te tamutu avasareana eta nuvanairipianahi.

¹⁹ Éma, tájina máitucaimahi téhacaca. Váhivare tipiararecaimahi, macunachiravahi te cálleana tayehe eta máichaqueneanahi.

²⁰ Mánshuhi éma taicha ticayehehi paciencia. Macamichavacahi namutu. Váhivare macajachaimahi nácani vahi túmeanaina. Tiámainucava te máejacapa tayehe eta mávacureyare, muracainapa eta mávacureyare.

²¹ Tásihasera, namutu ena achaneana te avasareana ticunevanayare eta mayehe, navarairayare máurichayare éma” macahepa ema Viya.

Ena fariséoana téjecapavanahi eta náimijachirahi ema Jesús mávaháruhi ema Váinaraji Satanás (Mr 3.19-30; Lc 11.14-23; 12.10)

²² Tacahe, ena achaneana námapaipa ema achane púchuqui, úpavare, taicha mávaháruhi ema éreana. Navarahahi macanaraca ema Jesús. Jéhesarehisera ema Jesús macanaracahi. Tiúripa téchejica, tímairiricavarepa.

²³ Ichaperinehi nárami ena achaneana. Tásiha, ánipa nacahe:

—Ema maca Jesús, émapachupuca ema Cristo, ema vicuchapaquenehi mámariequene ema víyarahaini David —nacahepa.

²⁴ Énaserá ena fariséoana napanerechahi náepiyaequenehayarehi. Ánipa nacahe:

—Ema maca Jesús, eta macuchusiravacahi ena éreanana, vémeteaca máijjararuihí eta máitupajijiasiravahi mayehe ema Satanás, ema náquenumurihi ena éreanana —nacahepa.

²⁵ Ema Jesús máimatihí eta napanereruihí éna. Tacahe, máichavacapa:

—Nímicutichinahe puiti ena machanerana ema gobierno. Éna vahi típutsimurihacacanaimahi apinainahipucaini partido. Te típutsimuriacacanapa, énajicacaipapucaini tiáquipaicacana. Énaripa ena achaneana te avasare, vahi táurica náiputsimuriavahini. Émaripa mácani achane, te camurianahi ena machichanaveana, váiparinehivare típutsimuriavanaimahi náehajiricacahini, énajiricacahini náquipaicacahini.

²⁶ Ene macahehi ema Váinaraji Satanás, váiparinehi máisapahini típutsicacana ena machamuriana, taicha mavarahahi tisimutuanayarehi éna, tímiyanavanayarehi eta nacaetemajirisirahaviyarehi.

²⁷ Éti ímijachaipa nútirichu machamuri ema Satanás, táichavenehi eta nuratahairahi nucuchucavaca ena éreanana. Tájina vahi étupicavahini éti eta juca epanereruana. Te émahipuca tímicitacanuhi ema Satanás, énerichuhivare éti máimicataruanahivare jácani éma, eta ecuchusiravaca ena éreanana. Epanerechinávanuma.

²⁸ Émaquenehisera ema Espíritu Santo, tíjaracanuhi eta juca nuratahairahi nucuchucavaca ena éreanana. Eta juca étará ícutiaraya éti eta matuparasiranuhi ema Viya eta nútirayare nécha tamutu. Nútiripara nuti ecuchapaquenehi.

²⁹ Nájina tisiapaimahi eta námerecachini te jácani peti matiarihíhi ema túmequenehi. Tacamunuhí nacaratacanumayare, náitiacacumayarehi éma. Jéhesare, náituruyechasareyarepa eta máimahaqueneana. Ene nucahehi nútí, túmepananuhi mayehe ema maca Satanás.

³⁰ Te vahi éhicanu, ecaemataneasiranuya, machamurihehi éti ema ticatianacanuhi. Masapiha ímicatacachi éma eta macaetemajirisiranuhi.

³¹⁻³² Nutupiruva numetacahe: Eperdonachacareana eti achaneana eta epecaturana, tamutu jácani échajisihaira eta táíñemahiqueneana. Jácani te ecaecahinuhipuca nuti Manerejirunuhi ema Viya. Jararihiserá eta epecatura vahi tiperdonachacaremahi. Éti ímijachahi ema Satanás ema tiávahácanuhi. Ichape eta éjecapiravahi, taicha ema tiávahácanuhi nútí, émaquenehi ema Espíritu Santo. Éti epanararacaripa éma. Tásiha, tájina eperdonachacaremahi puiti juca itaresiraichaha, evetijipa te apana itaresira —máichavacapa.

Ema Jesús máimicuticha eta táhi eta yucuqui (Lc 6.43-45)

³³ Tímaticare eta yucuqui te tíurinisihí eta tacahira. Tímaticarehivare eta apana yucuqui, máuriraha eta tacahira. ¡Epanerecha! Nútí níchahi eta táuriqueneana nayehe ena achaneana ticatajivanahi. Éta tímereuchanuhi eta mávahásiranuhi ema Espíritu Santo. Téhesera nucaetemarecachini, níchahini eta máematanelepiana ema Váinaraji, jéhevareserapucaini eta tímereuchanuhini eta mávahásiranuinahini éma.

³⁴ ¡Étiserá machichanaveanatataji ema Váinaraji! Váiparinehi ítucaimahi échajisihá eta táurinaqueneana, taicha éti tamaverasiavahi eta evainarajivana. Eta échajiririvanahi ticaeherahi eta evainarajiva te esamureana.

³⁵ Nácani tíúriana achaneana, tatupiruvahi eta náechajirisirava taicha tíúrihi eta nasamure. Nácaniserá achaneana váinarajiana, vahi tíúrimahi eta náechajirisirava. Tíñemahípivacahi taicha tavayuchahi eta tavainarajiva eta nasamure.

³⁶ Nutupiruva numetacahe: Te táitecapapa eta sache táitecapirayare eta juicio, emutu ecayaserehiyare eta échajisihairana eta tamaeperajiqueneana.

³⁷ Étaripa eta tiviucaheyare. Téhesera tiúrihipuca eta échajisihairahi, vahi ecaicuñaimahi. Tájina tiviucahémahi —máichavacapa.

*Ena Jesús macajachavaca ena fariséoana taicha eta namasuapajiraivahi
(Mr 8.12; Lc 11.29-32)*

³⁸ Tacahe, nayaseacapa ema Jesús ena fariséoana énapa ena escribánoana. Ánipa náicha: —Tata maestro, vivaraha picuchucaini eta tiáramicare, te yátupipuca mavaneruvihí ema Viya —náichapa.

³⁹ Ema Jesús majicapavacapa: —¡Eti achaneana váinarajiqueneana! Núti nímátihe. Vahi esuapanuimahi, te nímere-capucaini eta tiáramicare. Tásiha, váhinéni étina tatuparaca ímahahini eta tiáramicareana. Ímahayaresera eta tiáramicare tacutiyaere eta máichavaquenevahi ema víyarahaini profetaíni Jonás.

⁴⁰ Taicha ema Jonás masiapajuechahi eta ichapequene jima, mapana sache eta mayerevahi, mapanavare yati. Ene nucaheyare, núti Manerejirunuhi ema Viya, mapanayare sache, mapanavare yati, eta nucaheyare eta nucaecarasirayare.

⁴¹ Eta jena sáchezare téhepucanayare namutu, tiúchuchuanayare ena achaneana ticavasanáinihi acane te Nínive. Tisipecaturahianahinéni éna. Natupiruvahisera nasuapa eta mametarairu ema Jonás. Téneuchavanavanehi. Tásiha, te jena sáchezare, nacahenapa eyehe éti: “Táuricapa nacaicuñaini ena nani maparajuruana ema Cristo, táichavenehi eta namasuapirahi éma. Taicha éma, máuriquenepanahi mayehe ema Jonás” nacahénapa.

⁴² Tacutiquene esu reina Seba eta acane, te susamairiricapa eta máitupajijiasiravahi yátupi ema Salomón. Ésu, tayérehiquenehinéni eta suávasa, tiyanahisera sucapayaca ema Salomón taicha suvarahíni susamayarehi éma. Tacahe te téhepucanapa namutu, ésu suyaseacainapa eta ecaicuña éti máetupicushianahi puiti. Suchahenapapuca: “Táuricapa nacaicuñahini ena nani máetupicushiana, tájina náetseraruina nasamaripa ema Cristo, ema tíupajijíapanavahi mayehe ema Salomón, tásiha víuchahacaruva nasuapa” suchahénapuca jácani.

*Ena Jesús máimicutichinahi ena masuapajirairahana mayehe
(Lc 11.24-26)*

⁴³ Tímiyanava eta máechajisiravahi ema Jesús, ánipa macahe: —Énerichuvare éti ecuti mácáni achane máinajiruhi ema émana éreana. Ema éreana tiyana matanucainapa eta jácani masiapihayarehi. Eta mamaichimavira eta mavarahaquene, mapanerechayarehi tichava.

⁴⁴ Macahénapapuca: “Nuyanayare nuchava, nusiapayareva mayehe ema návaháruinihi”. Te títecapapa ema éreana mayehe ema achane mávaháruinihi, máimahapa ema achane máinajicaripa eta mapecaturana, víuchahasera máehicahini ema Viya.

⁴⁵ Tásiha, tiúrisamurepa ema éreana. Tásiha, tíchuarecapa ena siétequeneana machamuriana. Váinarajipanana éna. Nasiapahacainavarepa namutu éna. Jéhesare, tiápajucavapa eta mavainarajiva ema paure achane. Ene ecaheyare éti, taicha eta emasuapiranuhi —máichavacapa ema Jesús.

*Suítecapauchapa esu maena ema Jesús énapa ena maparapenaveana
(Mr 3.31-35; Lc 8.19-21)*

⁴⁶ Tímiturecarichaha ema Jesús nayehe ena achaneana, títecapanecha esu maena énapa ena maparapenaveana. Nanasihisera te aneca. Navarahahi náechajicayarehi éma.

⁴⁷ Natiarihíhi ena timetapananahi ema Jesús. Ánipa nacahe: —Esu pémunaruquenehi pena énapa ena piparapenaveana, nararihi ani te aneca. Navarahahi téchajicaviana —náichapa.

⁴⁸ Émasera majicapapa: —Yátupi némunacavacahi esu meme, énapa ena nuparapenaveana. Nararihisera ani te juca nuchacaya ena némunaruanahivare, nuparapenaveanahi.

⁴⁹ Tásiha, tisuvechahavipa viti mayeheana apóstoleana. Tásiha, macahepa:

—Numetacahe, ena nani ena némunaruanahivare.

⁵⁰ Taicha namutu nácani ticaemataneacanahi me Tata tiávihahi te anuma, énahi ena némunaruanahivare —máichavacapa.

13

*Ena Jesús máimicutichinavaca ena achaneana eta evaraquí tacaevaquenehi te apapanenejiquene máteji
(Mr 4.1-9; Lc 8.4-8)*

¹ Te jena sache, tiyanavarepa ema Jesús, macaijuhe te tachausi eta cáquiere. Téjacavarepa eta ánaqui eta máimituresirayarehi.

² Tásiha, camurianapahivare ena achaneana títecapauchanahi éma. Eta navayuchiraripa ena achaneana, tiyanapa ema Jesús tiávacuhapa tayehe eta pacure. Ena achaneana nanasipa te tachaui tiájipahi.

³ Tásiha, camurihi eta máimicutichaqueneanahi eta máimitusiravacahi. Ánipa macahe:

—Matarihi ema émana achane. Tévpapanahi te máesane.

⁴ Eta mapaisirapahi, témiricapaipa eta evarauqui te achene. Táimahapa eta cáyure, tani-capa.

⁵ Eta mayeherepi éma eta máevasira, máevajajapaica eta apaquehe. Tásiha, eta apamuri evarauqui témiricapa te váhirichu tamitutihini eta máteji taicha máripahi eta apaquehe. Tímarucavanepaneni táicha.

⁶ Téhesera te tíjurepa eta sache, tacapajicapa; taicha váhirichu táuparevacahini.

⁷ Tacahe, eta apana evarauqui témiricapaipa te tataracu eta itapepaire. Tiúrinahinéni eta táimarusirahi, étasera eta itape tacachuricapa eta tajurusirahi. Táemuriachapa eta sucureca.

⁸ Tacahe, eta apamuri evarauqui témiricapaipa te tiúrina máteji. Tiúrinapanahi eta tajurusira. Eta étana, ticahipa tétupicavapanapa. Eta apanavare, ticahipa ánimurichu. Eta apanavare, ticahivare apaesajiruichu.

⁹ Esamararacanu emutu éti. Te evarahapuca ecaicutiara, tavaraha eta epanerechinavayare.

*Ena Jesús máitametacaquenevacapa ena apóstoleana eta juca máimiturapihi
(Mr 4.10-20; Lc 8.9-15)*

¹⁰ Tacahe, viti mayeheana apostóleana vémeñahavapa eta mayehe ema Jesús. Viyase-recapa tájahapuca tacayemahi eta máimicutiarachiravacaichucha eta máimitusiravacahi ena achaneana.

¹¹ Tásiha, ema Jesús tíjicapahavipa:

—Ena Tata tíuparacanuhi nítametacaheyare éti eta juca táequenereruana mapanereruana. Mavaraha ímatiequenehaya éti. Énasera ena apamuriana achaneana vahi nítametacavacaimahi, náimainavainepa éna.

¹² Éti, te esupa yátupihí eta nímiturapiana, ema Espíritu Santo tímitucaheya tamutu eta tacayemaqueneanahi. Énasera nácani vahi návarahahini nasuapa, énajivayare tíchavana ticaverejicasianaya eta nasamaqueneanahi.

¹³ Eta tacahehí eta nímitusiravacahi, nímicutiarachinavacaichucha. Te apaesarichu eta navarairahi náituca, vahi nacacutiarahini eta juca nímechaqueneanahi. Nasamahi eta néchajiriruvana, váhisera nacacutiarahini eta nímitusirahi.

¹⁴ Puiti ena nani achaneana nacuti ena achaneana acane, vahi nasuapahini ema víyarahaini profeta Isaías. Ánipa macahe: “Nímatihe éti. Esamayarenénipuca, váhisera ecaicutiaraimahi. Ímahayarehinénipuca, váhivaresera ímatiequenehaimahi.

¹⁵ Taicha eta esamureana eti achaneana, tétavicavahi eta tamuracava. Vahi evaraha esama. Épiyacavahivare púchuquihe, emavarairahi esuapahini te esamureana. Tájinapa táichahíni vícuchapahini eta éneuchiravainahíni, evarairapucaini ecasiñavahini me Viya, apaesa macanaracahéhini” macahepa ema víyarahaini Isaías.

¹⁶ Étisera eti nímitureana, tétavicavahi eta iúricacarevahi, taicha esuapahi eta juca ímahaqueneanahi étapa eta esamaqueneanahi.

¹⁷ Nutupiruva numetacahe: Acane ichapemuriana ena achaneana tiúriana énapa ena víyarahaini profetana, tétavicavahi eta navarairahi tímatinuana, náimahavare eta juca níchaqueneanahi ímahaqueneanahi. Navarahavarepa nasama eta nímituresirahi. Váipasera nacapayacahini.

¹⁸ Ácaicutiaraicha eta juca nímicutiarachaquenehi mayehe ema tévacarahi.

¹⁹ Núti níchuhavaca ena achaneana, machaneranayare ema Viya ena téhicanuanayare. Tásiha, niatarihi ena achaneana nasamaripahinéni eta nímiturapianahi, émasera ema Váinaraji vahi máisapahini tánasihini te nasamureana. Enevanehi macamitisicavaca eta náimitucasivanainihi. Éna nacutihí eta máteji muracapahiquenehi te achene.

²⁰ Natiarivare ena apamuriana achaneana, nacutihí eta máteji máripahi. Te nasamararaca eta nímiturapiana, natupiruvanehi nasuapa, tiúrisamureanainéhi.

²¹ Váhisera náratatahahini nacaravahuhini yátupinahíni. Vahi nácutihíni eta evarauqui tíuparehi. Ánipirichu eta náehisirahi, taicha vahi nacamichahini jácani nacatajivairanahi. Váhivare túmesamureanainahini te tatiarhipa eta jácani nacatichaira ena achaneana táichavenehi eta náehisiranuhí.

²² Natiarivare ena apamuriana achaneana nacuti eta máteji te távihahi eta itapequijiana. Énerichuvare nasamararacahinéni eta nímiturapiana. Napaneréquenehahinéni, tahapapiricavacahisera eta jácani táchararacavayarehi eta náitaresira. Tavayuacavacavare

eta tájiparacana, étapa eta navarairahi tirricochavana. Tamutu eta juca táemetavícahi eta navarairahi téhicanuana. Tamapurujiyarehi eta najacampirahi eta nímiturapiana.

²³ Natiarihiserá ena apamuriana achaneana nacutihi eta tíurina máteji. Éna, tisamanuanahi. Náunacahi yátupi eta nímiturapiana, náimatiequenehairahi. Tájinavare náichiravainahíni eta náehisiranuhi. Ichape eta nacaemataneasirahi ema Viya. Nararihi ena apaesarichu eta nacaemataneasirahi. Nararihivare ena apamuriana, nativarerehapanapa eta nacaemataneasirahi. Tásiha, ena apamuriana, ichapemuripanapa eta nacaemataneasirahi ema Viya —macahepa ema Jesús.

Ema Jesús máimicutiarachina eta sucureca trigo étapa eta ejare

²⁴ Ema Jesús máimicutiarachavare ena achaneana eta máimitusiravacahi:

—Puiti nuvaraha nímitucahe tatiarihiyare eta sácheyare te táitecapapa eta nacayeserehiraya me Viya ena achaneana. Tacutihi eta máichavaqueneva mácani achane tévacarahi eta tíurina evaraquí tayehe eta tíurina máteji.

²⁵ Étasera te tímacapa ema ticayehe eta sucureca, macahepaipa ema macatianaru. Máimisiriquichinapa eta táifemahiqueneana ejare. Tásiha, tiyanapa.

²⁶ Tacahe, te tímarucainipa eta evaraquí trigo, tíuchucavarepa eta ejare, tacachaneapaipa eta evaraquí.

²⁷ Náraminehi ena machaneranaahi ema achane tévacarahi. Tiyananapa nametapana ema náejaháruhi. Ánipa náicha: “Tata, eta jena pévaraquíhi, tájina tacasiriquihíni eta táifemahiqueneana ejare. Puítisera tíuchucapa tacachaneapaipahi eta pévaraquíhi” náichapa.

²⁸ Ema náejaháruhi májicapapa: “Matarihi mácani ticatianacanuhi. Éma tíchahi eta juca, tímisiriquichinanuhi”. Tásiha, ema machanerana náichapa: “¿Pivarahapuca, tata, viyana víti vivepuríha eta jena ejareana?”

²⁹ Éma májicapapa: “Vahi tíuririne, taicha machu táimivepurica eta névaraquí trigo.

³⁰ Tácuticacarichaha eta tajurusirayare. Tiámainucava te tacaechatijipa, nuvanecahénapa éti nuchanerana tativyare evepurica eta ejarejana, itijicainapa eta tacaijuirayare. Tásiha, evehinasarepa eta trigo, ticaunainapa te tacaunairare”.

Ema Jesús máimicuticha eta taquí eta mostaza

(Mr 4.30-32; Lc 13.18-19)

³¹⁻³² Ema Jesús máimicutiarachavare eta taquí eta mostaza eta máimituresirahi. Ánipa macahe:

—Puiti nuvaraha nímitucaheya eta apana tayehe eta evaraquí ánichichaquene, étasera te tijurucapa, tíñejiyarehi. Tacaheyare eta tajurusirayare eta nímiturapiana nayehe nácani tijacapanayare. Ímatichuhi éti eta taquí eta mostaza, eta ánichichapanahi tayehe eta apamuriana evaraquíana. Tásihasera te tímarucapa, tíúnayarehi eta táenaquí, tacutiyahehi eta yucuquí eta táichapeva. Tacachuricayarehi eta apamuriana evaraquíana. Járjapainapa eta cáyureana. Táepiyacainapa eta tamacajiana te tatavavajiana. Ene tacaheyare eta tajurusirayare eta nímiturapiana nútí Manerejirunuhi ema Viya.

Ema Jesús máimicuticha eta levadura

(Lc 13.20-21)

³³ Énerichuvare máimicutichina eta juca apana máimituresirahi. Ánipa macahe:

—Tacutiquene, eta juca nímiturapiana tímicutijiricavahi eta levadura. Esu súcani esena tíuríhi eta tasisijisira eta suyehe levadura te tamutu eta suépiyaruhi masa, tayanapane apinapucaini arroba eta suyehe jarina, tasihajicahiserá. Jéhesare, tíapucayarehi tíuri.

Camuri eta máimicutichaqueneana

(Mr 4.33-34)

³⁴ Ema Jesús tamutu máimicutiarachinapahi eta máimituresirahi. Tájina étahena te tímitureca, vahi macunacahini eta máimicutichinaqueneana.

³⁵ Títauchavahi eta juca máechajiriruvanahi ema émana profeta. Ani macahehi: “Tamutu eta nímiturapianayare nímicutichinayarepahi. Nímicaecherachainapa eta táeñaurevaquenehi te tépanavainapa máepiyacainapa ema Viya eta apaquehe” macahepa.

Ema Jesús máimicaecherachapa eta máimicutichaqueneana tayehe eta trigo étapa eta ejare

³⁶ Tacahe, ema Jesús mavanecavacapa ena achaneana nayanapa te napenana. Éma apanava tiyanavarepa tichava te mapena, vítipa víti mayeaneanahi apóstoleana. Tacahe, te véjacapa vimutu, viyaserecapa máimicaecherachahini eta máimiturapihi máimicutichaquenehi eta ejare tacachanequenehi eta trigo.

³⁷ Tacahe, ema Jesús máichahavipa:

—Nuti Manerejirunuhi ema Viya nucutihi ema achane tévacahi eta tíurina evaraquí.

³⁸ Eta apaquehe tacaevaiyahi eta trigo, énahi ena achaneana te juca apaquehe. Eta tiúrina evaraquí, étihi eti nuchaneranahi núti. Tásiha, eta ejare énahi ena machaneranahi ema Váinaraji.

³⁹ Taicha ema ticatianacanuhi, manacahi eta ejare, mavarairahi máepacuchayarehi eta névaruhi núti. Eta tacaehatijirapa eta trigo, étahi eta táitavirayare eta apaquehe. Nárajapayarepa ena ángeleana, ticurujiricanayarehi.

⁴⁰⁻⁴² Tásiha, te jena sáchezare, nuti Manerejirunuhi ema Viya nuvanecainapa ena nuyehéana ángeleana nacavehasi ena tichanahi eta máeperajiqueneana énapa ena tímaquipaicana ena apamuriana achaneana. Tásiha, náquijicavacainapa eta te táijurequenehi yucu. Ticapitiquiahechavanainapa eta tacativayare nasama. Tíyahanainapa.

⁴³ Tásiha, nácani títauchanahi eta mavanairipianahi ema Viya, tétavicavayare eta najaravayare tacutiyare eta tajaraiva eta sache. Téjacanainapa tayehe eta macatuparahaiyahi ema Vicaiyaquene. Te evarahapuca ecaicutiara, tavaraha eta epanerechinavaya.

Ena Jesús máimicuticha eta entierro

⁴⁴ Eta nímiturapiana nuti násihaquenehi te anuma tacuti eta tayumurrevaquenehi entierro. Te máichimavahi mácani achane eta entierro, tiúrisamureyarehi. Tásiha, máimichavayarehi mayumuruca tayehe eta apaquehe távihahi. Mavacharecayarepa eta apaquehe, mavarairayarehi eta entierro. Tayanapane táimijararecayarepa tamutu eta macayeheque-neanainihi.

Máimicutichavare eta perla tasivachaquenehi

⁴⁵ Énerichuvare eta najacapirahi ena achaneana eta nímiturapiana nuti násihaquenehi te anuma tacuti eta macaematanerahi mácani achane comerciantepahi. Matanucapahi eta tasivachaqueneanahi perla.

⁴⁶ Te máichimavapa eta perla matanurepahi, tétavicavahi eta tasivachavahi. Mavarahasera mavachareca eta perla, tayanapane táimijararecayarehi tamutu eta macayeheque-neanainihi.

Máimicutichavare eta ichape nayutahe

⁴⁷ Énerichuvare nuvaraha nímitucahe tayehe eta sáchezare eta táitecapirayarehi eta ecuñaraqui. Tacutihi eta ichape nayutahe. Te náechipaecapa te cáquiure, tamutu tavehayarehi eta tasimutuqueneana jímana.

⁴⁸ Te náimahapa tónica eta nayutahe, navehayarepa nachurupaicapa te tiájipahi tachaui. Nanerejicayarepa eta jímana tiúrinana. Nanacacuhayarepa te ichape maha. Tásiha, náquijicayarepa eta apamuri máurirahanahi.

⁴⁹ Ene tacahezare eta táitavirayare eta apaquehe. Nárajapayare ena ángeleana, nanerejicainapa ena achaneana tichanahi eta tamauriqueneanapa.

⁵⁰ Náijuchainapa te yucu, táetaviuchahi eta táijureva. Ticapitiquiahechavanainapa eta tacativayare nasama. Tíyahanainapa —macahepa ema Jesús.

Ena Jesús mayaserecavaca te nacaicutiarahipuca eta máimiturapianahi

⁵¹ Tacahe, ema Jesús tiyaserecavavipa. Ánipa macahe:

—¿Ecaicutiarapuca éti tamutu eta juca nímiturapianahi? —máichahavipa.

Tásiha, víti vijicapapa:

—Vicaicutiara, tata —vicahepa.

⁵² Tácahe, máichahavipa:

—Eta yátupirapa eta ímatiequenehairapa eta nímiturapiana, éti apanavare máestrohénapa. Puiti nutuparacahe ímitucavacaya ena achaneana. Tétavicavaya eta ítamuturusirayare eta ímituresirayare eta mapanereruana ema Viya —máichapa.

Tichavapa ema Jesús te mávasa Nazaret

(Mr 6.1-6; Lc 4.16-30)

⁵³ Te tamutupa eta máimicutichirahi ema Jesús eta juca máimiturapiana, viyanapa.

⁵⁴⁻⁵⁷ Vichavapa tayehe eta mávasa. Te sávarumuhuqueneapa, viyanavarepa tayehe eta náurujisirareva eta nayujarauchirahi ena achaneana. Tímiturecapa ema Jesús. Ichape eta tahapasamurechiravacahi ena achaneana. Váhisera návarahahini nasuapahini. Náepururichucha éma. Ánipa nacahe:

—Témunahiricava eta máitupajjiasiravapahi ema maca. ¿Távihasica macaravahuinehi eta máichirayare eta tiáramicareana? Vivaraha vímaha víti apanava eta jácani máichaqueneanahiji visamairiruranahi. Taicha vímatihí ema maca. Carpintérohí éma. Vímativare ema

máiyaini, ésupa esu maena María, énapa ena maparapenaveana ema Jacobo*, ema José, ema Simón, émapa ema Judas. Vímativare ena esenana maparapenaveanahivare, ticavasanahi eta ani. ¿Távihasica máitusiavahi eta juca máitucaqueneanahicacha? —nacahepa.

Émasera máichavacapa:

—Tatuparaca epicauchahaviya vimutu viti mavaneruana ema Viya. Étiserá éti nujaneanahani ecavasanahi eta te juca viávasa, étipa eti nuparapenaveana, vahi epicauchanuimahi —máichavacapa.

⁵⁸ Tásiha, tájina máimerecachichaini eta tiáramicareana táichavenehi eta namasuapajirairavanahi, váhivare nacasiñavahini eta mayehe.

14

Emá Herodes masamairicapa eta máichaqueneanahi ema Jesús

(Mr 6.14-29; Lc 9.7-9)

¹ Tacahe, ema Herodes ema aguenucahi tayehe eta Galilea masamairiricavarepa eta máichaqueneanahi ema Jesús.

² Tacahe, ema Herodes máimijachahi ema tichavahi téchepuca ema Juan. Tásiha, máichavacapa ena máevanachanahi:

—Emá mácara, émaripa ema Juan Tíchasiricarahi, ema nímicaparui. Tichavaripa téchepuca te máecari. Táitusiava máiturucahi macuchuca eta tiáramicareana —macahepa.

³⁻⁴ Taicha ema Herodes mavehahi esu Herodías, esu machinenahi, mayenahi ema maparape Felipe. Máiminajicapa ema suima. Tacahe, ema Juan macajachavacaripa éna eta naviracacairahi. Éta pa tímicatichahi ema Juan, sucatichapa esu Herodías. Tásiha, ema Herodes máeratacapa te cárcel ema Juan, macavanaripipa náitiaca te cadena.

⁵ Taicha supamicahi ésu eta máimicapasirayarehi. Tipicahisera éma nasemahini ena achaneana. Taicha ema Juan, tétavicavahi eta náemunasirahi ena achaneana. Náimatihí éma, eta vanairucairahi me Viya.

⁶ Tásihasera, títecapapa eta sache májaremuhu ema Herodes, sutiarihíhi esu amaperu, suchicha esu Herodías. Tiúchucapa tírimaica te mamirahu ema Herodes, énapa ena machimaranahi. Emá Herodes máuricainehi íchape.

⁷ Tacahe, máichapa ésu:

—Nujuracha te pimirahu, eta níjarasiraviya jácani piyasearunuyare —máichapa.

⁸ Tásiha, esu amaperu suyaserecapa esu suena tájahahipuca eta suyasearuyarehi. Esu suena suímitucapa: Piyaseacayare ani píchaya: “Píjaracanu eta ñichuti eñi Juan te curuja” píchayare.

⁹ Tásiha, eta masamirahi eta juca suyasearui, ema rey Herodes ichaperinehi eta mapanereresirahi. Tájinapasera máicharacavahini taicha máechajiriruvaipahi majurachaipahi te namirahu ena machimaranahi eta májjarasirayare eta suyasearuyarehi ésu.

¹⁰ Tacahe, macavanairipipa nayuchatiqenuhapaná ema Juan.

¹¹ Tacahe, námapaipa te curuja eta machutini, nájaracapa esu amaperu. Tásiha, ésu sujacapapa, suíjaracapa esu suena.

¹² Títecapananecha ena máimitureanahi ema Juan. Navehapa eta máquehe, náecarapanapa. Tásiha, tiyananapa nametapanahi ema Jesús.

Emá Jesús máitaparavaca máenicavaca ena camuriqueneana achaneana

(Mr 6.30-44; Lc 9.10-17; Jn 6.1-14)

¹³ Te masamairicapa ema Jesús eta nacapasirahi ema Juan, viyanapa viávacuhapa tayehe eta pacure. Vicaijuhepa tayehe eta apaquehe mávapahi. Énasera ena achaneana náecharichucha eta viyanirahi. Tiyananapa náehicahi tipaicapanahi.

¹⁴ Te tiúcupaicapa ema Jesús tayehe eta pacure, máimahapa ena camuriqueneana achaneana. Majapanuvarinehi eta máimairavacahi. Macanaracavacapa ena nacajumaqueneanahi námaqueneanapahi.

¹⁵ Tacahe, viti mayeheana apóstoleana vímahapa eta cáperehíchicharinehi. Vimetacapa éma máevatamuríhahini ena achaneana natiaríhiqueneanahi. Víchapa éma:

—Cáperehipa jena sache. Tiyerehivacahi eta pétiana. Táuricapa pivanecavaca ena achaneana nayanapa, navachareca eta nanica; taicha ani tájina naviyavaimahi eta te juca —víchapa.

¹⁶ Emá Jesús tijicapahavipa:

* **13:54-57** Emá maca achane, ticajarehi Jacobo te náechajiriruva ena israelítana. Te véchajiriruva, ticajarehi Santiago. Mapaenuvavahi máehica ema Jesús te táequenepa eta máechepusirahi te máecari ema Viáquenu.

—Vahi nuvaraha nuvaneca nayana. Tájina naviyava eta nácajuhehíni. Íjaraca étina eta nanica.

¹⁷ Tásiha, viti víchapa:

—Tájina vácayehe eta tinicacare. Jucarihísera cíncochichahi eta pan, apina eta jima.

¹⁸ Ema Jesús máichahavipa:

—Íama aní.

¹⁹ Tacahe, macavanairipipa náejahahapaica ena achaneana te táinahu eta muíjipahi. Mavehapa eta cíncoque ne pan étapa eta apina jima. Máesenicapa eta anuma. Mahasulupayachapa ema Viya. Mayuvetucavacapa eta pan, tásiha, tjaracahavipa viti. Viti vjaracavacapa ena achaneana.

²⁰ Vinicapa vimutu, visatuhevaca. Tásiha, vicaemacharichahavare doce saye ichapehiana táinicachaichahava eta vémacharajiana.

²¹ Ena tinicanahi eta juca, cinco mil ena ajairana eta náichapemurívahi, énerichuvare ena esenana énapa ena amaperuana.

*Ema Jesús mapaicaeca eta une
(Mr 6.45-52; Jn 6.16-21)*

²² Tiuri, ema Jesús tivanecahavipa viti mayeheana apóstoleana víávacuhayare eta te pacure. Vínapucayarehi víánueca te apachara eta cáquiure. Émasera manasiyarehi máevata-murihanumayarehi ena achaneana nachava te napenana.

²³ Te tamutupa eta macametavairahi ema Jesús nayehe ena achaneana, tiyanapa tiápanahi tayehe eta cerro. Tiyujaracayarehi tayehe. Étapa tavinehi eta yati, manasipa macarichulí eta te cerro.

²⁴ Tacahe, viti te túpierecaviripahi, tichimaracahavipa eta muraca técatícava, víácapa-quihapaipahi.

²⁵ Te tijararahichichapa, vímahapa ema Jesús mapaicaecapahi eta une eta macapayasirahavíya.

²⁶ Eta vímairahi éma, vipicarinehi. Vímijachapa cunare. Vipiararecapa eta vipisirahi.

²⁷ Émasera ema Jesús téchajicahavipa:

—Vahi ecupica. Nútichucha. Étumechava —máichahavipa.

²⁸ Tásiha, ema Pedro majicapapa:

—Te yátupipuca pítiqúenehi, píti Tata, pivanecanu núti apanavare nupaicaeca eta une. Nuvaraha nupauchaví —máichapa.

²⁹ Ema Jesús majicapapa:

—Yare, pipauchanu.

Enevanepa tíucupaicahi te pacure ema Pedro. Tiyanapa mapaicaecapa eta une, macapacayarehi ema Jesús.

³⁰ Étasera eta máramesirahi taicha eta muraca técatícava, tímutserahavapaipa téricapaipa. Tásiha, típiararecapa:

—¡Picatajicanu, Tata! ¡Néricainapa!

³¹ Enevanepasera macaratavauchapa ema Jesús eta macuchucuirayarehi. Tásiha, máichapa:

—¿Ticamitisicavipapuca eta pipisirahi eta picasiñanuirahi?

³² Te tiávacuhapa ema Jesús émapa ema Pedro tayehe eta pacure, enevanepa tésamiricavahi eta técatícava. Tíhecapa eta táepacucairahi.

³³ Tacahe, viti apamuriana vicunachainehi ema Jesús eta vímairahi. Vépuyumuríhapa te mamirahu. Tásiha, víchapa:

—¡Jéhevare píti Tata, Machichaquenévihi ema Viya! —víchapa.

*Ema Jesús macanaraca ena nacajumaqueneana te avasare Genesaret
(Mr 6.53-56)*

³⁴ Tacahe, te apanapa sache, víápechavavarepa víánueca eta cáquiure. Vítecapapa eta te apaquehe ticajare Genesaret.

³⁵ Tásiha, ena achaneana ticavasanahi tayehe náimativanehi eta émairahi ema Jesús. Timetajiricanapapa náechapa namutu ena achaneana ticavasanahi te avasareana. Tiyananapa mayehe ema Jesús, námavacapaipahi namutu ena nacajumaqueneana.

³⁶ Nayaseacapa éma eta máisapirainahíni náemamajíaca eta tacheyarapí eta mamuiríha. Tacahe, nácani témamajíacanapahi, enevanepaipa tinaracanapahi.

15

*Ema Jesús mametaca ena achaneana eta timaeperajicarahi
(Mr 7.1-23)*

¹ Tacahe, títecapanapa ena apamuriana fariséoana tísihanahi tayehe eta Jerusalén, énapa ena escribánoana. Témeñahavanapa eta mayehe ema Jesús. Ánipa naicha:

² —Pímaha, ena pimitureana vahi náitachahini eta viyeherepiana. Namaeperajicapa eta náchanevana eta nanisirahi taicha vahi nacasipavahunumahini. ¿Tájaha tacayema vahi napicauchahini eta viyeherepi nanaquiruhi ena viáchucanaveanaini? ¿Étaserapuca tacahehi eta pímitusiravacahi? —náichapa.

³ Tásiha, ema Jesús majicapavacapa:

—¿Tájaha tacayema éti apanavare, vahi ítauchahini eta mavanairipiana ema Viya, tasapihapa epicauchahi eta eyeherepiana nanaquiruhi ena iáchucanaveanaini?

⁴ Ema Viya ani macahehi eta macavanairipirahi eta viyehe: “Pípicauchaya pémunacayareva ema piya ésupa esu pena”. Jucarihi eta apana vanairipi: “Ecapacayarehi mácani tíñemahi eta nacayemaquene mayehe ema máiya, ésupa esu maena”.

⁵⁻⁶ Étiserá vahi epicauchahini eta júcana mavanairipiana ema Viya. Taicha te mararihi mácani achane ticamavahupuca me Viya eta máimahaqueneanahi, eta ímitucasivahi éti: “Vaipa tatuparaca ema achane eta máimicatasiraya ema maiya ésupa esu maena”. Tasapihapa, ichape ticapicahuhi eyehe eta eyeherepiana. Étaserá eta mavanairipi ema Viya, vaipa epicauchahini.

⁷ ¡Éti ecaijarehi apimirana! Tatupiruvahi eta máechajiriruvahi ema Viya, téchajisiahehi éti eta te Sagrada Escritura*.

⁸⁻⁹ Ánipa macahe: “Ena nani achaneana, tétserajicanuanahi te najaca; váhisera táetupicavahíni te nasamureana. Téneuchavanahi eta nuyehe, tamapurujíhisera eta náneuchiravahi. Nacaerajicahivare eta nuvanairipiana; tasapihapa náimicapicauchahi eta nayeheripiana táuchurechucha te napanereruana ena náchucanaveánaini” macahepa ema Viya.

¹⁰ Tásiha, máichuhavacapa ema Jesús ena achaneana. Ánipa máicha:

—Nuvaraha esamanu yátupina, apaesa ácaicutiara.

¹¹ Tájina máeperajina eta viáchanevana te vinicapuca eta vimacasipavahuiranumahini. Jácani tasiapaquenehi te vijaca, tájina tamaeperajicahivihini. Vahi étaparacaina. Étaserá eta evainarajivana táuchureanapuca te ejaca, étapa eta evainarajipanereruanahi, jéhevare éta timaeperajicahéhi —máichapa.

¹² Tacahe, viti mayeheana apóstoleana vémeñahavapa eta mayehe. Vimetacapa:

—Ena nani fariséoana tisemanahi taicha eta juca píchiravacahi —víchapa.

¹³ Émasera máichahavipa:

—Ena nani nacutihi eta ejare, vaipa émaimahi máechahini ema Tata Nucaiyaquene. TicavepuricAsianayaresera éna.

¹⁴ Ésamiricachucha. Vahi ecuimisiapava nayehe, taicha éna, púchuquianahi tayehe eta juca nímíturapiana. Ena púchuquiana, te tichurucacanapuca, tíáquipaicacanayarehi táicha vahi náimahahini eta nayanihayarehi —máichapa.

¹⁵ Tásiha, ema Pedro mayaserecapa:

—Pícatajicahavi pímitucavahi apaesa vímatiequeneha eta juca pímicutiachirahi eta táuchureanahi te vijaca —máichapa.

¹⁶ Ema Jesús máichahavivarepa:

—¿Énerichuvare éti mapanererurehehi?

¹⁷ ¿Váhipuca ácaicutiarahíni eta juca? Tamutu eta juca tasiapaqueneanahi te vijaca vinicasareanahi, tatupiru te viami. Tásiha, te tíuchucapa, apanapa eta táuchusihahi. Vahi timaeperajicahivimahi.

¹⁸ Étaserá jácani táuchurehi te vijaca tásihaquenehi te amahe eta visamure. Eta tamaurivahi eta náechajisirana ena achaneana, étara timaeperajicavacahi éna.

¹⁹ Táicha jácani tííñemahiqueneanahi panererucana, eta tásihaqueneanahi te nasamureana. Ema achane mapanererechi maveha esu apana esena mayena ema apana achane. Esu esena supanerechahi suveha ema apana achane suima esu apana esena. Ena amaperuana napanerechahi eta natuhusivaya. Nácanivare, tipanerechanahi eta ticaparecana, tíamerecana, tivayuairecana, téchajihiana.

²⁰ Tamutu eta juca panererucana tamauriqueneana, te náichahi ena achaneana, éta timaeperajicahi éna. Étaserá jácani nanicaqueneana, tayanapanepuca vahi náichahi eta nayeherépi eta nasipavauchirava, vahi tamaeperajicaimahi —máichahavipa.

*Esu ésuna esena apavasana sucasiña ema Jesús
(Mr 7.24-30)*

* 15:7 Májurehi ema víyahaini profeta Isaías eta juca máechajiriruvana ema Viya.

²¹ Tacahe, tiámahavivarepa ema Jesús te apana avasareana táunavahi eta departamento Siria, návasa ena apaechajiriruvana.

²² Ánaqui, ticapayacahavipa esu esena. Supiaracapaipa eta supauchirahi ema Jesús. Ánipa sucahe:

—Pájapanunu, tata. Píti yátupiquenevihi Cristo, ñivaneruvihí eñi Viya, vicuchapaquenevihi. Esu nuchicha ñávahácahi eñi éreana, tétávicavahi eta sucatajivairahi. Picatajicanu, tata, eta picanarasinanuini ésu nuchicha —suíchapa.

²³ Émasera ema Jesús vahi majicapahini. Tipaicapaichucha. Vipauchapa viti mayeheana apóstoleana, vimetacapa éma:

—Tata, pévataca suyana esu suna esena apavasana tipiararecapahi te véquene —vicahepa.

²⁴ Tásiha, ema Jesús máichahavipa:

—Jéhevare eta epaneruhi. Ema Tata tivanecanuhi nacarichu néchapajiricayare ena vijaneanana israelítana. Nacutihi éna eta uvesana máquenureana, taicha ticamununuanahi eta nujaneasiraya —máichahavipa.

²⁵ Ésusera esu esena tépuyucapa te mamirahu. Suíchapa:

—¡Tátachicha, picatajicanupaini, pímicataganu! ¡Picanarasinanuini esu nuchichasami! —suíchapa.

²⁶ Ema Jesús majicapapa:

—Nativa néchapajiricavacaya ena nujaneanana. Taicha vahi táuricahini ásapihahíni néchapajiricahehíni éti apavasanana émetavichahíni ena nujaneanana —máichapa.

²⁷ Esu esena sujicapapa:

—Énehinehi tacahehi, tátachicha. Yátupihí vahi pijaneananuinahini. Pájapanunusera, picatajicanuchahini. Viti apanava vácasiñavahi eta piyehe eta vítátijivairaina —suíchapa.

²⁸ Ema Jesús majicapavarepa:

—Páurevi píti nuchicha, ichape eta picasiñavairahi eta nuyehe. Puiti títauchavayare eta piyasearapihi nuyehe. Nucanarasinaviyare esu pichicha —máichapa.

Jéhesare enevanepa tinaracahi esu amaperu.

Camurianahi ena nacajumaqueneana macanararuanahi ema Jesús

²⁹ Tacahe, tiyanavarepa ema Jesús. Véhicavarepa viti apanava. Vichavavarepa te Galilea. Tásiha, vijuhechausichapaipahi eta cáquiure, vícaijuheya eta te mávapahi apaquehe anuquerehi, te táviahí eta céroana. Vinasipanapa eta jena sácheana eta ánaqui.

³⁰ Tacahe, nacahepaipavare ena camuriqueneana achaneana te víáviahí viti. Námaquenepanepahi ena nacajumaqueneana: ena masariana, énapa ena púchuquiána, énapa ena úpana, énapa ena túpupáiqueana.

³¹ Namutu ena nani nacajumaqueneana macanaracavacapaipahi éma. Ichaperinehi eta náramirahí ena achaneana eta náechajisiraipa ena úpana, énapa ena túpupáiqueana tinaracapanapaipa, tíuripaipa eta napaísira ena masariana. Tímairiranapaipa ena púchuquiána. Eta náurisamurevapahi, nacunachapaipa ema Viya.

Ema Jesús máenica ena cuatro mílqueneana achaneana

(Mr 8.1-10)

³² Tásiha, ema Jesús tíchuhavipa viti mayeheana apóstoleana. Máichahavipa:

—Nujanuvaca ena nani achaneana natiaríhiqueneanahi ani, taicha mapanaripahi saché puiti eta nacahehi eta viyehé. Tájinahivare naviyahíni nanica. Nujanuvacaicha névatacavacahini, machu náquipaicava te achene taicha eta náecuavana. Vájapanu eta náecuava, vénicavaca —máichahavipa.

³³ Tásiha, viti vijicapapa:

—¿Távihapucaini vítusivahini eta tinicacare eta te juca mávapahi vámahí? ¡Váhivare vítaparahaimahi vénicavaca ena nani camuriqueneana achaneana! —víchapa.

³⁴ Tacahe, ema Jesús tiyaserechavipa:

—¿Áyanachaha eta pan eta íamaqueneanapahi?

Víti vijicapapa:

—Jucaríhi síéterine. Ánimurichicharinehivare eta jímachicha —vicahepa.

³⁵ Tásiha, macavanairipipa eta náejahapaimuriahíni namutu te apaquehe.

³⁶ Mavehapa eta síetequene pan, étapa eta jímana. Mahasalupayachapa ema Viya. Tásiha, mayuvetucavacapa, tíjaracahavipa viti. Tásiha, viti víjaracavacapa ena camuriqueneana achaneana.

³⁷ Tacahe, vimutu vinicahi, visatuhevacapa. Vicaemacharichahavare. Síétehi eta sáyeana tánicaruihí eta vémacharajiana.

³⁸ Eta nasimutuvahi ena achaneana, cuatro mílqueneana ena ajairana. Natiaríhivare ena esenana énapa ena amaperuana.

³⁹ Te tamutupa eta juca, mavanecavacapa ema Jesús ena achaneana nayanapa nachava te napenana. Tásiha, éma tiávachavarepa te pacure. Viyanavarepa. Vicaijuhe eta te avasare Magdalena.

16

Éma Jesús mápechavare mayunacavaca eta namasuapajiraivahi ena fariséoana (Mr 8.11-13; Lc 12.54-56)

¹ Tacahe, ena apamuriana fariséoana énapa ena saducéoana napauchapa ema Jesús. Eta navarairahi náemejecapavacha éma, nayaseacapa máimerecahíni eta tiáramicareana, máimerecavahíni te yátupihípuca vanairucahi me Viya.

² Émasera májicapapa:

—Te cáperehíchicha, te ímahahi eta táitsirahi eta úcaji, éti ímijacha tímijanavayare eta tiúriyare eta sácheana.

³ Te yáticarahi, te ímaha eta tímapicurume, títsitimehi, ímijachahi tíquívayare. Éti, ímijachavahi ímatiequeneha eta tapáisira eta anuma. ¡Tétavacavahisera eta emasuapajiraivahi! Taicha éti ímijachavahi religiósóhe, ímijachavavare ímatiequeneha eta mavarahaqueneanahi ema Viya, váhisera ávarahahíni ímatiequeneha eta máimeruhehi ema Viya, te juca sácheana nucachanerahehi.

⁴ ¡Eti achaneana váinarajiqueneana! Núti nímatilhe. Vahi esuapanuimahi, te nímerecapucaini eta tiáramicare. Tásiha, váhira étina tatuparaca ímahahíni eta tiáramicareana. Ímahayaresera eta tiáramicare tacutiyare eta máichavaquenevahi ema víyahahíni profetaíni Jonás —máichavacapa.

Tásiha, majunijicavacapa, tiyanapa.

Éma Jesús máimicuticha eta levadura eta náimiturapiana ena fariséoana (Mr 8.14-21)

⁵ Tacahe, eta viánuesiravarepa eta cáquiure, vipanerechapaipahi eta vémitisisirapa eta pan.

⁶ Éma Jesús máichahavipa:

—Tímaticarehi eyehe eta levadura eta tapareasirahi eta masa. Tacutirichu eta tapareasirahi eta apimirairavacahi ena fariséoana énapa ena saducéoana. Échapavachicha tayehe, vahi ecuehica éna —macahepa.

⁷ Vítisera víti apóstoleana, eta véñamavairahi, víchacacapa:

—Tímijachavahíni eta vémitisisirahi eta pan. Eta tacahe, macahehi tayehe eta levadura —víchapa.

⁸ Éma tímaticahavíni. Tásiha, máichahavipa:

—¿Tájaha tacayema ecahechajiriruvahi eta vahi íamapahíni eta pan? ¿Váhípuca ácasíñavahi eta nuyehe?

⁹ ¿Vuíchahacaru ácaicutiaraini? ¿Vuíchahápuca ímatinu? ¿Váhivare échaini eta nucaejapasirahi eta cincoquene pan nanaicaquenehi ena cinco mílqueneana achaneana étapa eta náemacharajiana?

¹⁰ ¿Váhivarepuca écha eta sítequene pan naniruhi ena cuatro mílqueneana achaneana étapa eta náemacharajiana?

¹¹ Nímijachapa ecaicutiarayarehi eta níchirahehi eta échapiravainahíni eta nayehe levadura ena fariséoana énapa ena saducéoana. Váhira étainahíni néchajisihahíni eta levadura tayehe eta pan —máichahavipa.

¹² Vipaenumavahí véchahi eta máichirahavíni éma eta véchapiravainahíni vahi vicucuti ena fariséoana énapa ena saducéoana eta apimirairanahi.

Éma Pedro máimereucha ema Jesús eta émairahi ema Cristo (Mr 8.27-30; Lc 9.18-21)

¹³ Tacahe, te apanapa sache, viyanavarepa vipaica. Vicaijuhe eta te Cesarea máepiyaruhi ema rey Felipe. Te viánehipa, ema Jesús tiyaserecachavipa:

—¿Tájaha nacayema ena achaneana eta nuyehe nuti Manerejirunuhi ema Viya? ¿Nájahapuca náimijachanuhi éna? —máichahavipa.

¹⁴ Vjícapapa víti:

—Ena apamuriana náimijachavíni ema Juan, tichavahi téchepucahi. Ena apamuriana tímijachavianahí ema víyahahíni profeta Elías, téchepucahi éma. Ena apamuriana tímijachavianahivare ema víyahahíni profeta Jeremías; émapuca ema apana profetaíni antívuini, téchepucahi —vichepa.

¹⁵ Éma Jesús tíapechahavivare tiyaserecachavi:

—Étiyapa ¿nájaha ímijachanuhi núti?

¹⁶ Ema Pedro majicapapa:

—Pítira yátupiquenevihi Cristo, machichaquenevihi ema yátupiquenehi Viya.

¹⁷ Ema Jesús majicapapa:

—Píti Pedro*, tétavicavahi eta pétupisiravahi taicha manacasamureruvihi ema Tata Nucaiyaquene tiávihahi te anuma. Vahi étáinahini eta máimiturapinahíni piyehe mácani achane.

¹⁸ Núti apanavare nutupiruva numetacavi. Píti picajarehi Pedro. Píti picutiyare eta mari, tétavicavayare eta pitumevaya. Namutu ena picutiqueneana eta pisuapiranuhi nútirahi yátupiquenehi Cristo, éna nuchaneranyare. Éna apanavare nacutiyareva eta mari eta natumevayare eta náehisiranuhi. Tájina vahi máratahaimahi macaetemavaca ema Váinaraji.

¹⁹ Píti picatuparahayare eta llave tayehe eta anuma, apaesa nasiapa nácani pijacapaqueneanyare píti —máichapa.

²⁰ Tacahe, tituparacahavipa muraca ema Jesús nacuija vicumetaca eta émairahi ema Cristo.

Ema Jesús máimereucha eta máepenirayarehi
(Mr 8.31-9.1; Lc 9.22-27)

²¹ Tacahe, ema Jesús tépanavapa timetacahavihi eta táicharacavayare eta máepenirayare. Máichahavipa:

—Nuti nucatuparahahi eta nuyanirayarehi te Jerusalén. Ánaqui nucatajivayarehi ichape naicha ena tuparairucana, éna ena aquenucarahana, éna ena escribánoana. Éna, tímicapacuanayareva. Mapanayareichuhisera sache nucaheyare eta népenirayare. Tásiha, nuchavayarehi néchepuca —máichahavipa.

²² Tásiha, máiputsicapa mámahí ema Pedro ema Jesús. Ánaqui macajachapa, máijarasiravahi eta mapanereruhi:

—Núti vahi návarahahini táitauchavahini nacapacavihini.

²³ Tacahe, ema Jesús máichapa ema Pedro:

—Píti téjecapavahi eta pipanereruhi. Pínajica eta juca tamauriqueneanahi. Pivarahapuca pihapapicayare eta mapanereruhi ema Viya. Eta juca pipanereruhi tacuti eta mapanere-ruanahi ema Satanás, éna ena machanerana —máichapa.

²⁴ Tásiha, máichahavivarepa víti:

—Nácani navaraha náehicanu, tacamunu náinajicava tamutu eta tihapapiricavaca eta náehisiranuhi. Nacaravahuyareva eta nimiturapiana. Náijaracavavare eta táimicapasiraina eta náehisiranuhi.

²⁵ Nácansera téñamanahi eta náitaresira, tiávamirahuanaya eta náehisiranu, énajivayare ticamitiequenehavanaya eta náitaresira. Énaserá nácani yátupiquenehi tjaracavana téhicanuana, tayanapane táimicapacainepuca eta náehisiranuhi, éna títujicavanayare tiúchucuhanayare eta náitaresiranaya.

²⁶ Énerichuvare nácani tacañamararuanahi eta nacaimahaqueneíraya te juca apaquehe, tájina náimaequenehaimahi, taicha eta tacañamarasiravacahi tahapapiricavacahi tayehe eta náuchucuirayarehini. Taicha vahi máratahaimahi mácani achane mavachachahini eta máuricacarevaya te apana vítaresira.

²⁷ Taicha nuti Manerejirunuhi ema Viya nuchavayarehi. Námainapaipa eta majaraiva ema Tata, nucachanénapaipavare ena ángeleana. Te jena sácheyare, níjaracavacainapa eta náicuchianahi ena nuchanerana te tiúrihi eta nacaemataneasiranuhi, te jácani náemataneanapachuhi.

²⁸ Nutupiruva numetacáhe: Púitiripa éti, etiaríhi enerejicavayare vahi épenavanémahi, ímahanumaya eta nucatuparahairaya aquenucanuirayare nuti Manerejirunuhi ema Viya —macahepa.

17

Ema Jesús tihapamaichava eta máimahi
(Mr 9.2-13; Lc 9.28-36)

¹ Tiuri, sáisiipa sache eta vinasirahi ánaqui. Tacahe, tinaquicahavipa ema Jesús. Nacarinehi máma ema Pedro, ema Jacobo émapa ema Juan. Tiyananapa eta te étana cerro anuquehepana.

* 16:17 Ema Jesús téhijcachi te máechajiriruva hebreo, máimijarechahi ema Pedro: “Simón, machicha ema Jonás”.

² Eta ánaqui, náimahapa tihapamaichavahi eta máimahi ema Jesús te namirahu éna. Eta mamira, tétavicava eta tajarasira tacuti eta sache. Eta mamuiraha, tétavicava eta tajanutumisirahi, étapa eta tajapuvahi.

³ Tásiha, tiáramicareanavarepa tímerecavana ena apinana ajairana: ema víyarahaini Moisés émapa ema víyarahaini profetaini Elías. Téchajiricavanaripahi mayehe ema Jesús.

⁴ Tásiha, ema Pedro tímisiapavapa téchajicapa. Ánipa macahe:

—Tata Náquenu, tétavicavapa eta viúricacareva eta viávihairahi eta áni. Tiúrihipucaini vépiyarecaini eta epenahuinapachuhini. Pipenahuinarichuhini píti, mapenainarichuhivaréni ema Moisés, émapaini ema Elías —macahepa.

⁵ Tacahe, téchejicaichaha ema Pedro, tiáramicarepa eta úcaji táepacumurihahi éna. Tétavicavahisera eta tajanutusirahi eta úcaji. Nasamavarepa eta mahu ema Viya tayehe eta úcaji. Ánipa macahe:

—Ema maca, éma yátupiquenehi nuchicha némunarquenehi. Tétavicavahi eta núrissamurevahi máicha. Éma esuapayti, mapenainarichuhivarare —macahepa.

⁶ Eta nasamirahi ena vichamuriana, tipicanarinehi. Tépuycanapa titsiucapairicanapa.

⁷ Tásiha, ema Jesús témeñahavapa eta nayehe. Máemamasicavacapa. Máichavacapa:

—Éhepuca, nuchichanaveana. Vahi ecupica —máichapa.

⁸ Tacahe, te téhepuccanapa éna, nájinaripahi éna apinana náimahaqueneanahi. Macarinehi ema Jesús.

⁹ Te tichavanapa tayehe eta cerro, ema Jesús mametacavacapa vahi nacumetajiricahini eta juca náimahaquenehi. Tiámainucava te máechepucapaini te máecari éma.

¹⁰ Tacahe, nayaserecapa ema Jesús:

—Ena escribánoana eta náimiturapihi, náechajisihahi eta machavirayare títareca ema víyarahaini Elías, tinapucayarehi eta máimeresiravayare piyehe piti Cristo. ¿Énapuca téjcapavanahi ena escribánoana? —náichapa.

¹¹ Ema Jesús majicapavacapa:

—Yátupi ema víyarahaini Elías títecapayarehi, máetupiripanayarehi tamutu.

¹² Nútisera nutupiruva numetacahe: Títecaripahi ema Elías, váhisera náimatihini ena escribánoana. Váhivare najacapahini éma ena tuparairucana. Nacatianacahi nacapacahi éma. Ene nucaheyare nuti Manerejirunuhi ema Viya, ticatianacuanayarehiva, éneyaréichuvare ticapacuanayare —máichapa.

¹³ Tásiha, ena vichamuriana náechapa eta máechajisihairahi ema Jesús ema Juan Tícachasircarahihi.

Ema Jesús macanaraca ema amaperu mávaháruhi ema éreana

(Mr 9.14-29; Lc 9.37-43)

¹⁴ Tacahe, te tichavanapa éna tayehe eta viávihairahi víti énapa ena achaneana, témeñahavapa ema émana achane mayehe ema Jesús. Tépuycapa te mamirahu. Máichapa:

¹⁵ —Picatajicanu, tata, pímicataganu. Picanarasinanuini ema maca nuchicha. Tétavicavahi eta macatajivairahi. Tacaucharipairica te tanahaca eta majuma. Tatiaríhi te táquipaica te une, téhepuca yucu.

¹⁶ Námaripahinéni nayehe ena pímitureana, váhisera náratahahini nacanaracahini éna —máichapa.

¹⁷ Ema Jesús máichahavipa:

—¡Tétavicava emasuapajiravavaca eti achaneana! ¡Cúverarecachasicáini eta nucamichirahenahini! Jáma ani ema amaperu —máichapa.

¹⁸ Tacahe, ema Jesús, muraca eta máevatasirahi ema éreana, máinajicapa ema amaperu. Enevaneпа tinaracavanehi éma.

¹⁹ Tásiha, te táequenepa, víti víputsiacavapa ema Jesús, viyaserecapa:

—¿Tájahapuca tacayemahi eta vahi váratahahini vicuchuca ema éreana mayehe ema amaperu? —víchapa.

²⁰ Ema Jesús tíjicapahavipa:

—Eta tíchahi éti vuíchaha yátupinahini ácasíñavahini me Viya. Nutupiruva numetacahe: Te yátupiquenenahini ácasíñavahini mayehe éma, eratahayarehini. Váhinéni tácomesahini ichapenahini eta ecasiñavairahi. Tayanapanepuca ánichichainachu eta ecasiñairavahi, tacutihupucaini eta táquichicha eta mostaza, tamuturíhini erataha. Étaripa eta jácani cerro ávarahahini ecayejea, eratahayarehi. Te íchapuca: “Piyecava eta te juca. Piyana ánaquipana”. Tásiha, tiyecavahini éta. Jéhesare, tájina tacucajerarajihini eyehe.

²¹ Étasera eta juca, muracapanahi ema éreana ema tiávahácahi ema maca amaperu. Eta vicuchusira, tavaraha vichanumayare eta ayuna étapa eta viyujaraca —máichahavipa.

Tiápechavavare ema Jesús máimereucha eta máepenirayarehi
(Mr 9.30-32; Lc 9.43-45)

²² Tacahe, eta vipaisirapahi tayehe eta avasareana eta te táunavahi eta Galilea, tiápechahavivarepa timetacahavi ema Jesús eta máepenirayarehi. Ániya macahe:

—Nuti Manerejirunuhi ema Viya, járajapainapa eta sáchezare tíjararecanuyare mácani achane nayehe ena ticatianacananahi. Ticaratacanuanayare éna.

²³ Ticapacuanayareva. Nécheputayaresera te mapanaquenena sache — máichahavipa.

Tacahe, eta visamirahi, ichaperinehi eta véñamiravahi víti.

Ticavacha eta impuesto tayehe eta Templo

²⁴ Tacahe, te vítecapapa tayehe eta viávasa Capernaúm, natiarihihi ena ticobrarerachahiana eta impuesto tayehe eta Templo. Nárajapapa náechajipanahi ema Pedro. Nayaserecapa:

—¿Mavachachapuca ema eyehe máestro éti eta impuesto tayehe eta Templo? —náichapa.

²⁵ Ema Pedro majicapapa:

—Mavachacha —macahepa.

Te visiayarepa te peti, ema Jesús máechajicanumapa ema Pedro. Ániya macahe:

—¿Tájaha picayema, piti Pedro, nájahasica tatuparacahi navachachayare eta impuesto mavarahaquene ema mácani rey? ¿Énapuca ena machichaqueneana, énapuca ena machanerana? —máichapa.

²⁶ Ema Pedro majicapapa:

—Ena machanerana.

Tásiha, ema Jesús macahepa:

—Tiuri, víti machichahavihi ema Viya. Vahi tatuparacahini vivachachahini víti eta juca impuesto.

²⁷ Vinaquicasera eta impuesto apaesa tacuija tacucayemacare nayehe ena achaneana. Piyanayare pénica eta jima te cáquiure. Te piáquijiecapa eta péñirave, eta títapuca jima tacaratacaya eta péñirave, tatiarihiyare eta plata te tajaca. Pivehainapa eta reale, tásiha taratahayare tavachacha eta nuyehe parte núti, étapa eta piyehe píti —máichapa.

18

¿Nájahapuca ema apóstole ticapichupana?
(Mr 9.33-37; Lc 9.46-48)

¹ Tacahe, te jena sácheanahi, viyaserecapa ema Jesús:

—¿Nájahapuca ema ticapichupanaya viyehe víti te táitecapapa eta sache aquenucaviraya? —vicanauquicasera eta impuesto apaehepa.

² Tacahe, máichuhapa ema Jesús ema émana amaperuchicha, macatupihapa te vimirahu.

³ Máichahavipa:

—Nutupiruva numetacahe: Ínasicayare eta ecasiñavavaisira. Echávayare ecutiyare ema maca amaperu, apaesa ítujicava esiapa ecachanenu tayehe eta néjasihayare.

⁴ Nácani navarahahi ticapichupananayare te jena néjasihayare núti, tacamunu mánsuanayare. Vahi máitucaimahi tiácapauchava.

⁵ Tacutiquene nácani tijacapanayare ena amaperuana níhavenénahi núti, ena nani yátupihí náimereca eta náemunasiranuhi núti, taicha tímicutijiricavahi nútinahini najacapa.

Ichape eta máicuñayare mácani tímiaquipaica te pecatu ena amaperuana
(Mr 9.42-48; Lc 17.1-2)

⁶ Tacutiquene mácani tíaquipaicaya ema émana amaperu téhicanuhi, tíuripannahipucaini máepenahini mativainahini éna. Váhirichupucaini macucaicuñahini, taicha vahi macuaquipaichahini ema amaperu tayehe eta pecatu.

⁷ Taicha muracayare eta náicuñayare nácani tímiaquipaicanayare ena achaneana. Yátupi vahi téjiacavaimahi eta tímiaquipaicaya ena achaneana tayehe eta pecatu. Ichapesera eta náicuñayare nácani ticatapiravanahi eta náimiaquipaisirahi ena achaneana tayehe eta pecatu.

⁸ Eta tacahe, te táimipeaturachahepuca eta evahu, étapuca eta ívapeana, tíuripana eyuchatica, iáquijica; apaesa vahi tacuimiaquipaicahe tayehe eta pecatu. Tíuripana tájejiacava eta iáquehe eta esiapirayare te anuma, váhisera tacumutuhi tasiapa te yucu eta iáquehe.

⁹ Étaripavare eta iúquiha, te tímiaquipaicahepuca tayehe eta pecatu, tavarairahi táimahayare eta tauríqueneana tájiparacana, tíuripana evectuhaulquichava iáquijicaya. Taicha tíuripana eta ejacapacarehi éti eta esiapiraya te anuma tayanapane tájejiacavapuca eta iúquiha. Páurehesamisera éti, te náepujuquichahepuca te yucu infierno, tamutuyare eta iáquehe.

*Éma Jesús máimicutiarachinahi te témitiaca étana uvesa
(Lc 15.3-7)*

¹⁰ Vahi ecuepuru ena amaperuana. Numetacahevane: Nararihi ena ángeleana tijaneacacavahi éna. Títupajjiacavanahi eta nacatiuchiravacahi ena amaperuana, máicha éma Viya.

¹¹ Nuti Manerejirunuhi éma Viya, eta tímitecanuhi nucuchucuhayare nácani tiávacuhanahi táífehiquene eta náitaresira.

¹² Esamanuchaha. Nímicutichinaheyare puiti. Matiarahi éma émana achane. Ticayehe eta cien uvesana. Te témitiyechapuca eta étana, éma achane tiyanayarehi matanuca eta táemitiaruihi. Eta máeñamiravahi, manaquicayarepa eta apamuriana noventa y nueve te majanearesihahi.

¹³ Te máichimavapa, tichavapa. Tétavicava eta máurisamurevapaipahi eta mámirapaipahi eta táejaruvahi.

¹⁴ Ene macahe éma Tata Ecayaquene éti, éma tiávihahi te anuma. Vahi mávarahahini náemitiacahini ena nani amaperuana.

*Tatuparaca viperdonacha éna téjecapavana eta viyehe
(Lc 17.3)*

¹⁵ Te tatiarhipuca eta máejecapiravahi éma piparape eta piyehe, tituparacavi piperdonachayare. Tásiha, piconsejachayare éma, píputsiacayare éma eta pimetasira eta máejecapiravahi. Te tisuapavihi éma, tájinapa íchiraváimahi. Tiúrinapa eta ítaresirana.

¹⁶ Téhesera te vahi macusuapaví, pitanucayare apinanaina ena piyehéanayare testigo apaesa tasuapacarepa eta piconsejarapiyare.

¹⁷ Te vuíchaha macusuapaví, pimetcapá namutu ena pichamurianahi picatupihapa te namirahu. Téhesera te váhiquenechapuca macusuapahe, tímaticaréinapa éma eta mamasuapajiraivahi me Viya. Vaipa ecuímisiapava mayehe, taicha eta mamasuapajiraivahi.

¹⁸ Nutupiruva numetacahe: Te ecurujicacahi, te ímahahi eta mamasuapajiraivahi, emetacayare éma vahi táepahahini eta mapecatura. Tanasirichuhi. Émaripa éma Viya, máimara-racahi eta evarairahi etupirica éma. Téhesera te máneuchavapuca, emetacayare éma eta táepahairaripa eta mapecatura. Éma Viya, tiúriripa eta máimaira.

¹⁹⁻²⁰ Énerichuvare te etiarihipuca éti te juca apaquhe apinahehi, mapanahehipuca ecurujicacahi te níjare nútí, nutiarihiyarechuhivare nútí te emuri. Tásiha, te étanaichuhi eta epanereruhi, ticuticacahi eta eyaseserepi te mayehe éma Tata, éma tíjaracaheyare – máichahavipa.

²¹ Tásiha, éma Pedro mapauchapa, mayaserecayarehi éma Jesús. Ánipa macahe:

–Tata, ¿áyahepuca tatuparaca nuperdonachaya éma nuparape, te máejecapava eta nuyehé? ¿Táuricapuca siéteheyare eta nuperdonachirayare? –macahepa.

²² Éma Jesús majicapapa:

–Vahi tácarichuimahi siétehéinarichuyare eta piperdonachirayare. Tímiyanavaya-rechucha eta piperdonachiranayare. Vahi pitupachaimahi –máichapa.

Éma Jesús máimicutiarachina éma achane máuriraha vahi máitucaimahi maperdonacha éma maparape

²³ Nuti Manerejirunuhi éma Viya nucuti mácani rey rícoquenehi te mavarahahi máechayare eta nanteveana ena mamusurana.

²⁴ Tásiha, námapaipahi éma tétavicavahi eta manteve. Tisintevapanahi éma.

²⁵ Tásiha, éma achane musu, tájina maviyahini mavachachihahini éma máquenuhi. Tac-ahe, éma rey macavanairipipa macaijararecasí, namutu esu mayena énapa ena machichanaveana, étapa eta macayehequeneanaini te mapena, apaesa mavachachahini apaesachichainarinehini eta mantevehi.

²⁶ Tásiha, éma achane musu tépuyucapa te mamirahu éma máquenu. Ánipa máicha: “Tátachicha, picatajicanuhini. Picuchapanuini. Te níducavapaini, nuvachachapaini tamutu eta nunteve piyehe” macahepa.

²⁷ Jéhesare, éma máquenu majapanupa. Maperdonachapa tamutu eta mantevenihí. Macaiticapa.

²⁸ Vuíchahasera táyerehini eta máchusirahi, mácapajicapa éma apana achane ticantevehi eta mayehe. Macompañeroinihivare. Váhinéni camurinahini eta mantevehi. Macaratachisera, macobrachapa. Masemaracapa macapitinucapa. “Pivachachanu puítirichu” máichapa.

²⁹ Éma achane ticantevehi tépuyucapa te mamirahu. Mayaseacapa: “Picatajicanu, picuchapanuchaha. Te níducavapa, nuvachachavipa”.

³⁰ Váhiquenesera maperdonachahini. Máimicasiapapa te cárcel, mavarairahi mavachachavanyarehini eta mantevehi.

³¹ Tacahe, te náimahapa ena apamuriana machamurianahi, ticatirinehi te nasamure eta náimairahi ema nachamuri présuiraipahi. Tiyananapa nametacahi ema náquenu tamutu eta máichavaquené vahi ema nachamuri.

³²⁻³⁴ Tacahe, ema máquenuhi máimichuhapa ema tipresurecainihi. Ichape eta masemanevahi. Ánipa maicha: “¡Piti máeperajitataji musu! Váiparinehi péchavahini eta nuperdonachiravihi eta pinteve ichapequenehi. Taicha eta piyaseasiranuhi, nuperdonachiravihi. Piúriháinehi pájapanuhini piti apanavare ema pichamusuvahi, tácutihini eta nuperdonachiravihi núti” máichapa ema rey. Tásiha, macavanairipipa náicuñaca, etapa mavachacharehi tamutu eta mantevehi.

³⁵ Tacahe, ema Jesús te títapiricapa eta juca máimiturapiana, ánipa macahe:

—Ene máichaheyare ema Tata Nucaiyaquene éti apanavare, te vahi ecuituca eperdonacha nácani eparapenaveana nájecaparuvanahi eta eyehe —máichahavipa.

19

*Emá Jesús tímiturecáhi máechajisiháhi mácani achane tínajicáhi esu mayena
(Mr 10.1-12; Lc 16.18)*

¹ Te tamutupa eta juca máimiturapianahi ema Jesús, viúchucapa te Galilea. Viyanapa tayehe eta Judea. Viánuecapa eta cajacure Jordán te tinapaicahi te táuchusine eta sache.

² Camuriana ena achaneana tíurujicavanahi. Ánaqui macanaracapaipavare ema Jesús ena nacajumaqueneana.

³ Tásiha, títecapanapa ena apamuriana fariséoana. Napauchapa ema Jesús. Natanucahi eta tivíuchayarehi éma. Ánipa naicha:

—Vivaraha pímetacahaví ¿te táuricapuca máinajica ema achane esu mayena taicha jácani tájiparacana? —náichapa.

⁴ Ema Jesús majicapavacapa:

—Németeaca vahi ácaicutiarahi eta échajicuira eta Sagrada Escritura. Te tépanavainapa acane, ema Viya májaracahi ema achane ésunayareichuhi esu mayenayare. Esu esena émanayareichuvare ema suímayare.

⁵ Aní tacahe eta mavanairipi ema Viya: “Mácani amaperu achane ésupa esu mayenayare, te ticaimanapa, tatuparacavacahi típutsicavanayarehi eta napenana ena ticachichana. Énajivainapa títatícanayare. Eta navehacacairahi, tímicutijiricavaipa étanarinehi eta náqueheana” macahepa ema Viya.

⁶ Tacahe, tímicutijiricavainapa émanarichuhini te peti. Étanarichu eta napanereruana. Vaipa táisapacarehini náinajicacahini. Eta tacahe, mácani máinajicahi esu mayena, éma máépuruhi eta juca mavanairipi ema Viya —máichavacapa.

⁷ Tásiha, ánvare nacahe:

—¿Tájahasica tacayema eta mavanairipihí ema víyahaini Moisés ticaepiyayarehi eta ajureca suyehe esu esena eta máinajisirayarehi ema suíma? —náichapa.

⁸ Ema Jesús majicapavarepa:

—Ena iáchucanaveanaini, te jácani eta nasemirahi, náinajicapa ena nayenana. Ema víyahaini Moisés máisapahi tínajicacana táichavenehi eta tájinairahi eta náimitucacarevainahini, táetaviuchiráhi eta namuracasamureva. Váhisera máurichahini ema Viya eta náinajicacahini.

⁹ Puiti nuvaraha numetacáhe: Te máinajicapuca esu mayena mácani achane, te tájinapuca suíchiravainahini; tásiha, mavehapa esu apana esena, ticapecaturaipahi me Viya. Tacutiqene, mácani mavehahipuca súcani esena máinajiruhi ema suíma, ticapecaturaipavare éma, taicha ésu, matiarihichahahi ema suímaquenehi —máichavacapa.

¹⁰ Tacahe, te víputsiacavavarepa, viti mayeheana apóstole víyaserecapa ema Jesús:

—Te énehipuca tacahehi eta juca, eta vivira viti ajairana esu esena, tíuripanaichuhipuca vahi vicutanuca esu esena —víchapa.

¹¹ Ema Jesús máichahavivarepa:

—Vahí ámutu áratáha ímatiequeneha eta juca. Nararihísera tinerejicavanayarehi náimatiequenehayare máicha ema Viya.

¹² Nararíhi ena ajairana vahi natanucaimahi esu esena nayenainahini, taicha eta náquehe vahi táichuhahini esu esena. Nararíhivare ena ticavecuhianahi, navetijípa éna vaípa náesenicaímahi esu esena. Nararíhivare ena apamuriana tinerejicavanahi vahi natanucahíni esu nayenainahini, navarairahi tacuíja jácani tahapapicahíni eta nacaemataneasiraya ema Viya. Ticunachacarepanayare ena tíratahanayare eta juca nájarasirava yátupiquene nacaemataneacaya ema Viya —máichahavipa.

*Ema Jesús mayujaraucha ena amuyana
(Mr 10.13-16; Lc 18.15-17)*

¹³ Tacahe, ena achaneana námavacapaipa ena amuyana eta mayehe ema Jesús. Navarahahi máemamahacavacayarehi éna, mayujarauchahivaréni. Vítisera viti mayeheana apóstoleana vahi vísapahini. Vicaichepaicapa ena tíamanapahi ena amuyana.

¹⁴ Ema Jesús máichahavipa:

—Ésamiricachucha ena amuyana, náitecaichaha eta nuyehe. Vahi eucacichepaica éna. Taicha ena nuchanerana nuti Cristo nacutiyarehi ena nani amuyana eta nasuapajiraiva éna —máichahavipa.

¹⁵ Tásiha, máemamahacavacapa ena amuyana, mayujarauchavacapa. Te tamutupa, vyanavarepa te apana avasare.

*Ema achane rico téchajiricava mayehe ema Jesús
(Mr 10.17-31; Lc 18.18-30)*

¹⁶ Matiaríhi ema achane amaperu rico. Mapauchapa ema Jesús. Mayaserecapa:

—Tata maestro, piti piúriquene. ¿Tájahapucaini eta nícharacavahini eta nítujisiravaina me Viya máichecuaraquirénahini eta nítaresira? —máichapa.

¹⁷ Ema Jesús majicapapa:

—¿Tájaha tacayema pímiarechanu “Piti piúriquene”? Mararíhi ema Viya. Jéhevare éma, tétavacavahi eta máurivahi. Téhesera te pivarahapuca pécha te apana vítaresira, pisuapayare eta vanairiplana —máichapa.

¹⁸ Mayaserecavarepa ema achane:

—¿Tájahasica eta vanairipianahi eta nusuapaqueneya?

Majicapavare ema Jesús:

—Eta juca eta mavanairiplana ema Viya: Vahi picucapareca. Vahi picuveha esu esena apayena. Vahi picuamereca. Nacuija pépiyéqueneruina.

¹⁹ Pipicauchayare ena ticachichaviana. Pémunacayareva ema piparaepiyahi, tácuti eta pémunasiravahi píti —máichapa.

²⁰ Tacahe, ema achane majicapapa:

—Tamutu eta juca nusuapahi nítauchahi. ¿Tájahaserauca eta jácani néjequeruichahahi? —macahepa.

²¹ Ema Jesús majicapavare:

—Te pivaraha pítaucha tamutu, piyana píjararecaya tamutu eta pímahaqueneana. Tásiha, píjaracavacapa ena páureana. Jéhevare éta, píjacapayare eta pímahaquenyare te anuma táitsivayare. Te tamutupa eta juca, pítecavanepa péhicanu —máichapa.

²² Te masamapa ema achane eta juca macayemaquenehi ema Jesús, ichaperinehi eta mapanereresirahi, taicha mavayuchahi eta macaimahaquenerahi. Macatiequeneharinehi tamutu. Tiyanapa tipanererecapaipa.

²³ Tacahe, ema Jesús máichahavipa viti mayeheana apóstole:

—Nutupiruva numetacahe: Yátupiquenehi máitujíhi eta nájarasiravainahini eta náehisiranuinahini ena rícoana eta nasiapirainahini te anuma.

²⁴ Esamanuchaha. Eta juca tímicitijiricavahi eta vipera camello, máitujíhi tánucuhahini te támicuejehe eta parirapa. Ene nacahehi ena rícoana —macahepa.

²⁵ Eta visamirahi viti, viáraminehi. Víchacacapa:

—¡Tétavacavahi eta tamáitujicavahi! ¡Nájina títujicavaimahi náuchucuhahini!

²⁶ Ema Jesús tímaracahavipa. Tásiha, máichahavipa:

—Nájina émanaina achane émajivainahini ticuchucuhava. Émasera ema Viya, macarichu marataha ticuchucureca. Taicha tájina máemejerachaquenenahini ema Viya. Tamutu marataha —máichapa.

²⁷ Ema Pedro máichavarepa:

—Vítisera, Tata, vinaquicahi tamutu eta vicayehequeneanahi, vivarairahi véhicavi. ¿Tájahasica eta vímahaquenéya? —máichapa.

²⁸ Ema Jesús majicapavarepa:

—Nutupiruva numetacahe: Járjapayare eta sáchevayare, tacaitsivairayare tamutu arairuya. Tásiha, nuti Manerejirunuhi ema Tata néjacainapa te tajarahiquenehi trono. Tásiha, eti éhicanuanahi éjacainavarepa tayehe eta dócequene trono. Ecavanairipinapa nayehe ena dócemuriqueneana vijaneanana israelítana.

²⁹ Tásiha, emutu eti enaquicanahi eta epenana, ejunijicahivare ena ticachichaheana*, ena eparapenaveana, ena echichanaveana, eta eyehe apaquehe, táichavenehi eta éhisiranuhi puiti, tiápajucavainapa camuripanayare ena ejaneananayare étapa eta ímahaque-
neanaya. Énerichuvare táurivayare eta ítaresira máichecuaraquirenapa.

³⁰ Maverahesera eti etiarihiqueneanahi puiti, váhirichuhi ecapicahuhini. Te jena sáchezare, ichapepanainapa eta ecapicahuiraya. Ena puiti ticapicahuanahi, te táitauchavapa te jena sáchezare, énapavainapa téquenehanayare.

20

Ena Jesús máimicutichahi ema achane rico tiuri eta mavachachira ena ticaematanezechana

¹ Te jena sáchezare te níjaracahénapa eta ícuchiyare eti nuchanerana, tacuti eta mavachachirahi ema émana achane ticayehe eta ichape quinta úvaquiji nayehe ena ticaemataneerahiana. Ema maca mayatiruhi tipaica matanuca ena achaneana ticaemataneanayarehi mayehe. Tírerecanayarehi eta uva.

² Te títucavapa ena ajairana, mametacavacapa eta mavachachirayarehi étana reale te sache. Tíuríhi eta mavachachiravacahi. Mavanecavacapa tiyanana tayehe eta náireresihayarehi.

³ Tásiha, macamunuichahava ena apamuriana achane. Te las nuévepa sache, tiyanavarepa te plaza. Máimahainezare ena apamuriana ajairana máemataneanahi.

⁴ Máechajiacavarepa eta náireresirayarehi. Mametacavacavarepa eta táurivayarehi eta mavachachirayarehi. Tiyanavarepa éna, tírerecanahi.

⁵ Te las dócepa sache, tiyanavarepa matanuca ena apamuriana. Títucavavare, máevata-muríhavare tírerecanayare. Te las trespa sache, tiápechavavare tiyana títucavavare ena apamuriana, énerichuvare tírerecanayarehi.

⁶ Te las cócopa sache, tiyanavare tíuchucahi tayehe eta plaza. Títucavavare ena apamuriana ajairana máemataneanahi. Tásiha, máichavacapa: “¿Tájaha tacayema tájina ématanenahini puiti jena sache?”

⁷ Éna najicapapa: “Nájina náechajicahavíhíni”. Tásiha, ema máichavacapa: “Eyana éti apanava íreca ánaqui te nuyehe quinta úvaquiji”. Mametacavarepa eta táurivayarehi eta mavachachiraya.

⁸ Tacahe, te yátipa, mametacapa ema mayehe empleado máichuhavacapa namutu, mavachachavacayarepa. Mavarahahi náinapuca nacavacha ena náequeneruanahi ticaemataneana. Nasapihapa téquenehanahi ticavachana ena náinapureanahi.

⁹ Tásiha, ena nasiapaqueneanahi te las cócopa sache, mavachachavacapa ema achane eta étapevacahi eta reale, tacutirichuhi eta navachahi ena ticaemataneanahi tamutu sache. Énapa ena nasiapaqueneanahi te las trespa sache, énerichuvare eta étapevaca reale eta navachahi.

¹⁰ Tacahe, te ticavachanapa ena náinapureanahi tisiapana, náimahapa éna tacutirichuhi eta navachanahi ena náequeneruqueneanahi.

¹¹ Tásiha, tisemanapa mayehe ema náquenuhi.

¹² Ánipa nacahe: “Ena nani náequeneruanahi títicapana, vicutivachavacaichuhi eta navachahi, étanainehinéní hora eta nacaemataneerahi. Tacutirichuhísera eta vivachahi víti vínapureanahi. Váhiquene táuricaimahi eta juca, taicha ichapemuríhi eta vícamichirahi víti eta tájijureva muracaquene eta sache. Táurica vícachuricavacayarehíni éna eta navachahi” nacahepa.

¹³ Émasera ema náquenu majicapavacapa: “Váhira nucaetemahémahi éti. Énaripa ena náequeneruanahi, váhivare nucaetemavacaimahi. Tíunahi eta nuvachachirahehi étapevacahi eta reale níjaracahe. Vahi ecusema.

¹⁴ Ésamiricavachucha. Evehachucha eta juca evachahi.

¹⁵ Núti néchinava taicha nuyeherichuhi eta plata. Nuvaraha ácuticacahini eta evachana emutu. ¿Éti ecapinarunupapuca eta núrivahi nayehe ena nani?” máichavacapa.

¹⁶ Ena Jesús macahevarepa:

* **19:29** Te jácani apanana versiónéana, tatiaríhi te juca lista eta táechajírúva “ena nayanana”. Tájinasera nalistanahini te libro antivupanahi. Eta tacahehi, vímatiequeneha vahí manacahini ema Mateo. Mácani apana achane mavejuchahipuca te Lucas 18.29.

—Ene nacaheyare te jena sácheyare, nácani náequenereruanahi téhicanuana, éna nasapihayare títapucana. Tásiha, nácani náinapureanahi, nasapihayare téquenehanayare* —macahepa.

*Éma Jesús tíápechavavare máechajisiha eta máepenirayare
(Mr 10.32-34; Lc 18.31-34)*

¹⁷ Tacahe, eta vipaisirapahi te achene te vicaijuhepa eta Jerusalén, típutsicahavipa ema Jesús viti dócequeneana apóstoleana. Máichahavipa:

¹⁸ —Ímaha puiti, viyanainapaipa vicaijuheyare eta Jerusalén. Ánaqui nucaijararecasiyare nuti Manerejirunuhi ema Viya. Ticaratacanuanainapa eta tuparairucana.

¹⁹ Tímicapacuanayare taicha tíjararecanuanainapa nayehe ena suntaruana romanoana. Éna, nájina najapanuquenéna. Ticaecahinuanainapa. Téstacuanayareva. Tétatacanuanayareva te crusu. Tásihasera, te mapanaquenena sache, néchepucainapa te nécarí —máichahavipa.

*Ésu naena ema Jacobo émapa ema Juan suyaseaca ema Jesús eta macajupahavahini ena suchichanaveana
(Mr 10.35-45)*

²⁰ Tásiha, témeñahavapa esu naena ena vichamuriana ema Jacobo émapa ema Juan, suámavacapaipahi éna. Tépuycapa ésu te mamirahu ema Jesús, suyaseacayarehi éninahini majupahanainahini ena suchichanaveanahi.

²¹ Éma mayaserecapa:

—¿Tájahasica ecamunu, nuchicha?

Ésu suíchapa:

—Nuvaraha pácchanéni ena nuchichanaveana tayehe eta péjasihayare picavacureraya. Náejacahini te pichacaya, eñi éñina te pivaure, eñi apana te sapa —suíchapa.

²² Éma Jesús majicapavacapa éna:

—Éti, vahi ímati tájahapuca eta nátajivayare nácani nujupahanayare. ¿Eratahayarepuca ecamicha eta íchavaquenévayare ecatajivairayare, ecutinuyarepuca eta nucamichirayare nútí? —máichapa.

Éna najicapapa:

—Virataha vicamicha —nacahepa.

²³ Tásiha, máichapa:

—Yátupi ichape eta ecatajivairaya, viciticacaya eta nacapasirahaviyare. Étapasera eta éjasirayare eta te nuchacaya, vaipa nútina necha nucaejahehíni. Éma Tata Nucaiyacuene, émahí tinerejicayarehi ena nujupahanayare —máichapa.

²⁴ Tacahe, eta visamirahi viti diésqueneana mayeheana apóstole, visemapa nayehe ena apinana.

²⁵ Émasera ema Jesús máichahavipa. Ánipa macahe:

—Écharichuhi éti ena aquenucana tayehe eta avasare, muraca eta nacavanairipira. Énaripa ena tuparairucana, tétavacavahi tisuapacareanahi eta nacavacurerahi.

²⁶ Váhisera ecucahehi éti nayehe ena echamuriana. Mácani tímerecavahi ticapicahupana, tacamunuhi máitativacayare ena apamuriana.

²⁷ Te etiarhivarepuca eti evarahahi ínapuca, tacamunuhi ímerekavaya navanarahayarehi ena echamuriana.

²⁸ Ecutinuyare nuti Manerejirunuhi ema Viya. Vahi étaina tímitecanu nucaitaticasihini. Nútíyarehi nútítihe. Énerichuvare níjaracavayarehi nímicapacava íchavenequeneanainahi éti camuriqueneanaya nuchucureanaya —máichahavipa.

*Éma Jesús macaimairicavaca ena apinana púchuquiana
(Mr 10.46-52; Lc 18.35-43)*

²⁹ Tacahe, te vijunijicavarepa eta avasare Jericó, camurianahivare ena achaneana ticavasannahi tayehe, téhichahavianahi.

³⁰ Natíarihi ena apinana ajairana púchuquiana. Téjacanahi te achenechacaya. Te nasamapa ema Jesús eta mánuoirapahi, típiararecanapa. Ánipa nacahe:

—¡Tátachicha! ¡Pítiqueneripa yátupiquenévihi Cristo! ¡Picatajicahavipaini pájapanuhavi!

* **20:16** Te jácni apanana versiónéna, tatiarihi eta juca táechajiriruvana "porque muchos son llamados, pero pocos son escogidos". Tájinasera eta juca táechajiriruvanahi te libro antivupanahi. Eta tacahe, vímatiequeneha vahi manacahini ema Mateo. Mácani apana achane mavejuchahi eta juca te Mateo 22.14.

³¹ Natiarihisera ena achaneana vahi náuricahini eta napiarasirahi ena púchuquiana. Navarahapa nacamatinaca. Énaserá napiaracaichucha:

—¡Tátachichal ¡Pítiqueneripa yátupiquenévi Cristo! ¡Picatajicahavipaini pájapanuhavi! —nacahepa.

³² Tacahe, ema Jesús eta masamiravacahi, titupihapa. Máichuhavacapa ena púchuquiana. Mayaserecapa tájahápuca navarahahi.

³³ Éna najicapapa:

—Tátachicha, vivaraha pípuhauquichahavini apaesa vímairiricapaini —nacahepa.

³⁴ Tacahe, ema Jesús majapanuvacainehi. Máemamahuquichavacapa. Enevanerinehi tímairicana. Tásiha, téhichavianapa.

21

Títecapapa ema Jesús eta te Jerusalén

(Mr 11.1-11; Lc 19.28-40; Jn 12.12-19)

¹ Tacahe, te apanapa semana, viyanapa vicaijuhe te Jerusalén. Vétavajicapa tayehe eta avasarechicha Betfagé te tachacaya eta cerro ticaijarehi Olivoquiji. Ánaqui ema Jesús mavanecapa ena apinana vichamuriana.

² Ánipa maicha:

—Eyanayare tayehe eta te jena avasarechicha Betfagé. Ánaqui ímahayare ticaitihahi eta esena burrico, étapa eta tachicha te tachacaya. Evejapuacayare íáminanuyare eta áni.

³ Te natiarihinapuca náéñama, emetacayare eta nucamunuirahi núti. Vahi táyeréimahi vímichavavaneyare —máichavacapa.

⁴ Eta juca tamutuhi títauchavapahi eta májuchaquenehi ema mácani víyahahaini profeta.

⁵ Ani tacahehi: “Emétaca ena achaneana ticavasanahi te Jerusalén, apaesa natsecava eta najacaparayare ema nayeheyare Rey. Emétacayare vahi nacupica, taicha tétaavicavapahi eta mamansuvapahi, étapa eta máurivahi. Mámapahi eta íuritairesirayare. Tímaticareyarepahí ema, taicha ticaperayare eta burricuchicha” tacahehi eta Sagrada Escritura.

⁶ Tacahe, ena vanairucanahi náitauchahi eta navanahi mayehe ema Jesús.

⁷ Námapaipahi eta burricochicha étapa eta tachicha. Nanacamaequechapa eta náepacuhana. Tásiha, ticaperapa ema Jesús.

⁸ Camuriana ena achaneana tíacapanahi náepacapaicapaipa eta namuirihana. Ena apamuriana navehapa eta tapacaji eta cáchipaca. Nanacavare te mayanihayarehi éma.

⁹ Ena apamuriana tínapumírauchanapahi énapa ena téquenehanapahi típaracanapaipa: —Yare, Tata. Píti yátupiquenevihu Cristo réyvihu viyehe viti israelítana. Ichape eta vicunachiravihu píti. ¡Vanairucaquenevihu me Viya! ¡Asulupaya me Viya te anuma! ¡Viva ema Viáquenu! ¡Viva! —nacahepa.

¹⁰ Tíúchuchujicanapa ena achaneana te Jerusalén. Ichape eta náramirahi ema Jesús eta máitecapirahi. Tiyaserejiricanapaipa:

—¿Nájaha ema maca achane?

¹¹ Éna apamuriana najicapapa:

—Émara ema profeta ticaijare Jesús, ticavasa te Nazaret te tinapaica te Galilea —nacahepa.

Éma Jesús macuchuchujicavaca ena tíjararecanahi eta sárareana, cáyureana te tajuhe eta Templo

(Mr 11.15-19; Lc 19.45-48; Jn 2.13-22)

¹²⁻¹³ Tacahe, te apanapa sache, tiyanapa tisiapa ema Jesús tayehe eta te Templo. Máimaharinehi ena achaneana tíjararecanahi eta sárareana, cáyureana. Éna apamuriana ena tivacharecanahi. Natiarhivare ena tísiriperecarahiana eta naplataneana ena apavasanana. Máichavacapa:

—Éma Tata Nucaiyaquene, ani macahehi eta máechajiriruvahi te Sagrada Escritura: “Eta nupena tacarichu táicuchihu eta nayujarasirareya ena achaneana” macahepa. Étisera eti tíamerahiana, ecasiapavapa eta te juca. Emaeperajicapa eta tacapichuirahi. ¡Eyana íuchucatajái! —máichavacapa.

Tásiha, macuchuchujicavacapa namutu. Máequehepuichinavacapa eta namesarana étapa eta naslyana.

¹⁴ Éta mávihairahi te Templo ema Jesús, napauchapa ena púchuquiana énapa ena masariana. Tásiha, éma macanaracavacapaipahi.

¹⁵ Tacahe, ena amaperuana típiararecanahi eta nacunachirahi éma, ánipa nacahe: “Pítiquenehi yátupiquenevihu Cristo manerejiruvihu ema Viya” nacahepa. Énaserá ena tuparairucana énapa ena escribánoana vaipa náuricahini eta náimairahi tamutu eta juca. Tisemanapa.

¹⁶ Náurujiacapa. Navarahapa nacaichepaica eta máichaqueneanahi. Tásiha, náichapa éma: —¿Tájaha tacayema písapa tipiararecana ena nani amaperuana? ¿Váhiyapa picamatina-cavacapaini? —náichapa.

Éma Jesús majicapavacapa:

—¿Tájahasica táichavahi eta juca najirairahi? ¿Váhipuca échajicuha eta Sagrada Escritura eta táchajishairahi eta juca najirasahi ena nani amaperuana? Ani tacahehi: “Piti, Tata, pinacasamurechavacahi ena amaperuana eta máejererereyarehi naicha eta najirairayare eta táurinaquene alabanza” —máichavacapa.

¹⁷ Te títapiricapa eta majicapiravacahi, majunijicavacapa. Tiyanapa eta te avasarechicha Betania, étapa máimasinehi. Véhicapaichuhisera víti.

*Éma Jesús májiquiha eta higo taicha máhiriquirehi
(Mr 11.12-14, 20-26)*

¹⁸ Te apanapa sache, te yáticarahichicha, tiyanavarepa éma Jesús tayehe eta Jerusalén. Véhicapaichuhivare víti apanava. Eta vipaisirapahi, técuhasamurepa éma.

¹⁹ Máimahapa eta yucuqui ticaijare higo te achenechacaya. Tiyanapa mapauchahi. Tájinasera táhinahini. Tapacajianachucha. Tásiha, máichapa éma Jesús eta higo:

—¡Pépiyainapa píti eta máhiriquereviyare! —máichapa.

Eta macahehahi, enevanepa tijyujipa eta tapacajiana.

²⁰ Eta vímairahi víti, víáraminehi íchape. Viyaserecapa éma Jesús:

—¿Tájaha táicharacavahi eta tájahúchiravahi tíájiqui eta higo? —vicahepa.

²¹ Éma Jesús tijicapahavipa:

—Jéhesare nusamacarehi me Tata. Éti apana esamacareyareva, te yátupina eta ecasiñavairahi me Viya. Tájina émaitucaimahi. Eratahayare ícha, ecutinuya eta níchaquenehi. Eratahayareva ecayejea eta cerro te apachacaya.

²² Tamutu jácane eyaseserepiyare eta mayehe éma Viya te eyujarasirana, ecaijaracasiyare te yátupina eta ecasiñavairahi me Viya —máichahavipa.

*Nayaserecapa éma Jesús nájahhipuca tituparacahi éma
(Mr 11.27-33; Lc 20.1-8)*

²³ Tacahe, visiapavarepa tayehe eta te Templo. Éma Jesús, tímiturecavarepa nayehe ena achaneana. Tacahe, napauchapa ena tuparairucanahi. Natiarihihivare ena tinerejicavanahi ena aquenucarahana. Ánipa nacahe:

—Píti, vahi vitupararuvinahini víti eta píchira eta júcana. ¿Nájahasica tímitucavíhi? ¿Nájaha tituparacavíhi eta juca píchaqueneana? —náichapa.

²⁴ Éma Jesús majicapavacapa:

—Núti apanavare nuvaraha nuyaserecahe. Ejicapanuyaresera apaesa numetacahe eta nucatuparahairahi eta níchirahi eta júcana.

²⁵ ¿Nájahapuca tivanecahi éma Juan eta máitesirahi máicachasirisirahi? ¿Émapuca éma Viya tivanecahi, émajivapuca eta máitesirahí? —máichavacapa.

²⁶ Váhisera náituruequenehahini eta najicapirayarehi. Tiácapaemajiricacanapa. Ánipa nacahe:

—¿Tájahasica vicayemayare eta vijicapirayare éma maca? Te vémunahacava vícha: “Mavaneruhi éma Viya”, éma macahénapapuca: “Tásiha, ¿váhiyapa esuapahíni éma?” Téhesera vácahepuca: “Émajivaichucha eta máitesirahi”, ticauyayacerripa tipupisicahaviana eta te márijahiana ena achaneana, taicha namutuhi náimijachahi éma Juan profetaquenehi yátupiquene, mavaneruhi éma Viya —téchajiricacanapa.

²⁷ Tásiha, náichapa éma Jesús:

—Vahi vecha víti —nacahepa.

Tacahe, máichavacapa éma:

—Énerichuvare núti, vahi numetacahémahi nájahapuca éma tituparacanuhi.

²⁸ Nuvarahasera nímicutiarachinaheyare. Nararihi éna apinana ticaparapecacana. Ticavanahipa éma émana mayehe éma naiya. Ánipa máicha: “Nuchicha, piyana picae-matane puiti jena sache. Pírerecaya eta uva” máichapa.

²⁹ Éma machicha majicapapa: “Vahi nuvaraha nucaematane puiti juca sache”. Te tiyerepa, tiyanapanéni ticaematanehi.

³⁰ Tásiha, éma naiya mavanecavarepa éma émana machicha, mayanahini macaemata-nehini éma apanavare. Tásiha, éma amaperu majicapapa: “Tiuri, nuyanayare” macahepa. Váhinéni mayanahini.

³¹ Puiti nuyaserecaheyare: ¿Nájaha éma tisuapajirahíhi mayehe éma maiya? —máichavacapa éma Jesús.

Éna najicapapa:

—Ema tñnapuca, éma tisuapajirahihi.

Tásiha, éma Jesús máichavacapa:

—Nutupiruva numetacahe puiti. Nasapihayare ticachuricaheanayare tisiapana te anuma éna túhusianainihi énapa éna tisipecaturarahianainihi. Éti vahi esiapaimahi.

³² Taicha vahi esuapahini éta máimiturapiana éma Juan Ticachasiricarrahini, váhivare ávararahini étupiricavahini éta itaresirana. Nararihisera éna tisipecaturarahiana, ichape éta nasuapirahi. Étísera, tétavicava éta emasuapajiraiva, tayanapane ímahahi masuapacarevahi éma —máichavacapa.

*Ema Jesús máimicutichina éna pártirárioana máurirahana
(Mr 12.1-12; Lc 20.9-19)*

³³ Ema Jesús máichavarepa:

—Esamanu éta juca apana nímiturapiya. Nímicutichinaheyare. Matiaríhi éma achane. Ticaevaruhi camuri éta uva te máesane. Manaruchapa éta mascure. Máepiyacavarepa éta nacaticaresihayare éta tachi éta uva. Máepiyacavare éta torre, nápanihayare éta najaneasirayare éta máevaru.

Tásiha, májaracapa éna achaneana, pártirárioanayarehi. Tásiha, tiyanapa éma achane te apana avasare.

³⁴ Tacahe, te tútecapapa éta caje tayairahi éta uva, máimivanerecapa éna mamusurana nayaseapanavacayarehi éna pártirárioanahi éta tatucachaqueneyarehi éma.

³⁵ Énasera éna pártirárioanahi tiseauchavanarichucha. Nacaratacavacapa, náehapa éna vanairucana. Nacapacapa éma émana. Ema apana nayucaracapa te márijahiana.

³⁶ Tásihi, éma achane máimivanerecavarepa éna apamuriana. Camuripanapana. Váhiquenesera nájaracahini, náehavacavarepa. Nacapacavacapa éna apamuriana.

³⁷ Tacahe, émajacaruvapa máevataca éma machicha. Máimijachaipahi émapapucaini napicauchahini.

³⁸ Te náimahapa éma machicha éma ticayehe éta úvaquiji, ánipa nacahe: “Émainapapuca ticayeheyare éma maca. Yare, vicapaca apaesa tánasipa viyehe tamutu. Tájina máicharacahvimahi éma achanénavaji”.

³⁹ Tacahe, nacaratacapa éma machicha, nacuchucapa éta tayehe éta isaniti, nacapacapa.

⁴⁰ Puiti, nuyaserecaheyare: ¿Tájahapuca máicharacavayare éma ticayehe éta úvaquiji éna pártirárioanahi máurirahana? —macahepa éma Jesús.

⁴¹ Éna najicapapa:

—Éma tiseainapa. Vaipa májapanuvacaimahi. Macapapanavacavarepa éna pártirárioanainihi. Májaracainapa éna apamuriana pártirárioanayareva, nácani tipicaurahianahi, nájaracahini éta mayehe parte —náichapa.

⁴² Tásiha, éma Jesús máichavacapa:

—Jehe túiríhi éta ejicapiranuhi. Nuvarahasera epanerechinavapaini éta tacayemahi éta Sagrada Escritura, apaesa ácaicutiara éti. Ani tacahehi: “Éna tépiyarecarahiana éta Templo, tasapiha náepuruhi éta mari táicuchihi tatumearayare éta peti, taicha vahi náimatihini. Émasera éma Viya macaitecapahi éta te táicuchihi éta tatuparahahi. Tacapicahuquenehi puiti. Táitusiava, tétavicavahi éta vicunachirahi víti éma Viya” tacahehi éta Sagrada Escritura. Nuvaraha ecaicutiaraya.

⁴³ Puiti numetacahe: Táichavenihi éta emasuapajiraivahi, vaipa étiparacaimahi tayehe éta mavanairipi éma Viya. Éna tisuapajirahianahi, éna ticavacureanayare te jena sáchehare. Énainapa téchanayare éta vanairipiana.

⁴⁴ Puiti, núti nucutihí éta ichape mari náepuruquenehi. Eti épurunuanahi, íaquipaicavayare évetutujicayare. Tichimaracahenapa éta muraca ecuñaraqui taicha éta emavarahairahi éhicanu —máichavacapa.

⁴⁵ Étasera éta nasamirahi éna tuparairucana énapa éna fariséoana, tiseanmarinehi taicha tímaticavanapa éta énairahi tayunacavaca éta máimicutichiravacahi éma Jesús.

⁴⁶ Navarahapa nacaratacayarehini. Tipicacavanachuchasera nayehe éna achaneana taicha namutu nacunachahi éma Jesús éta émairahi vanairuca me Viya.

22

Ema Jesús tímicutichava mácani rey te máichuhavacapa éna machimaranaya, máichayarehi éta ichape piesta

¹ Ema Jesús máimicutavare éna achaneana éta apana máimicutichaquene. Ánipa macahe:

² —Ema Viya, macutihí mácani rey te máimiyenachayare éma machicha, máichayarehi éta ichape piesta.

³ Mavanecapa ena mavanarana náichuhapanavaca ena machimaranaya. Váhisera návarahahini nayanahini éna.

⁴ Tásiha, ema rey máevatacavare ena apamuriana mavanarana. Ánipa máichavaca: “Eyanavare étipava ímitatajiricavaca ena níchuhaqueneanahi, náitecavanepa. Nucaparecaripahi eta vaca nirureyare nésinaruanahi. Tiúrinapa tamutu eta juca tinicacare. Énanecha nucuchapahi náitecavanepa” macahepa.

⁵ Énasera ena máichuhaqueneanahi vahi nasuapahini. Nájina nayanahini. Ema émana tiyanapa te máesane. Ema apana máimahapana eta mayehe tienda.

⁶ Ena apamuriana nacaratacava ena vanairucanainihi, náehavacava, nacapacavacava.

⁷ Tacahe, te máechapa ema rey, tise mapa. Mavanecapa ena masuntaruana nacapapanavaca ena ticapahianahi. Náijuchavare eta tamutu eta napananaini.

⁸ Tásiha, máichavacavarepa ena apamuriana mavanaranahi: “Tiúripa tamutu eta juca tinicacareana. Váipasera nuvaraha náiteca ena náinapureanahi níchuhaqueneanainihi.

⁹ Eyana te tamutu cállena. Íchuhavacayare namutu nácani ecainunaqueneanayare” máichavacava.

¹⁰ Tacahe, ena mavanaranahi tiyananapa, náchepupanevacava. Nacurujicavacava namutu nácani nacainunaqueneanapahi: nácani achaneana tiúriana énapa ena súnsusurujiana. Camurianahi. Tínicanarinehi eta te távihayarehi eta piesta.

¹¹ Tacahe, ema rey tisiapapa, máimahayarehi ena machimaranahi. Máimahapa ema émana achane ema matiarhiquenehi vahi manachahini eta namuirihasa te ticaichuasiana.

¹² Tacahe, máichapa: “Ajaira, ¿tájaha tacayema vahi pinacahini eta múiriare níjararuehanahi tayeheyarehi puiti juca piéstayarehi?” Émasera ema achane vahi majicapahini.

¹³ Tacahe, ema rey mavanecavacava ena mavanarana: “Eveha ema maca. Ítjivaucha, ítiápechavare. Íyaracuhapana te timapicu tayehe eta máiyauchiavayare macapitiquiahechiavayare” macahepa ema rey.

¹⁴ Ema Jesús máichavarepa:

—Numetacahe puiti: Camurianahi ena níchuhaqueneanapaipahi. Ánimurianarichusera ena títaurahianayare —macahepa ema Jesús.

Navaraha náemejecapavacha ema Jesús tayehe eta impuesto
(Mr 12.13-17; Lc 20.20-26)

¹⁵ Tacahe, eta nasamirahi ena fariséoana, tise manarinehi. Tiyananapa ticurujicapanapa, navarahaípa náemejecapavachayarehi apaesa étainahipucaini taviuchahini ema Jesús.

¹⁶ Tacahe, navanecapa ena nachamuriana énapa ena políticoana. Nayaserepanahi ema Jesús. Te náitecapauchapa, ánipa nacahe:

—Tata maestro, vímatihi eta tatupiruvairahi táurivahi eta juca pímiturapianahi. Yátupihí eta pímitusiravacahi eta táurinaquene achene ticaijuhe me Viya. Váhivare pípicacarcavahini eta péchajisihairahi eta náichavaquenévanahi nácani achaneana, tayanapanehi aguenucahi.

¹⁷ Vivarahahisera viyaserecaviyare eta pipanereruhi: ¿Táuricahipuca vivachacha eta viyasehana impuesto mayehe ema Presidente Emperador romano? Taicha viti, machanerahavihi ema Viya, ¿masi? —náichapa.

¹⁸ Émasera ema Jesús máimatiacavacava eta taurivapahi eta napanereruana. Tacahe, máichavacava:

—¿Apimirahetataji! ¿Tájaha tacayema evaraha ímiaquipacanu?

¹⁹ Nímahaseji, íáminanu étapena eta reale —máichavacava.

²⁰ Eta náíjarasirapa, éma máichavacava:

—¿Nájaha ticaijare eta juca? ¿Nájahavare ticavasimahi eta juca mirare eta te juca reale? —máichavacava.

²¹ Éna najicapapa:

—Mayehe ema Presidente Emperador —náichapa.

Tacahe, éma máichavacava:

—Tiuri, táuricahi íjaraca ema Presidente Emperador eta juca mayeherichuhi éma. Tásiha, íjaracavare ema Viya eta mayeherichuhivare éma —máichavacava.

²² Te nasamapa ema Jesús eta majicapiravacahi, ichaperinehi titsirihacavanahi. Náramipa eta máitupajiasiravahi. Tiyananapa tichavanahi.

Nayasereca ema Jesús náicharacavayarepuca ena náepenaqueneana eta náechepusirayare
(Mr 12.18-27; Lc 20.27-40)

²³ Étarichu te jena sache, nacahepaipahi ena saducéoana. Ema nani saducéoana, apanahivare eta náimiturapiana. Éna, vahi nasuapa eta náechepusirayare ena náepenaqueneana.

Tiyananapa náimahapanahi ema Jesús. Natanucahi eta táetseraruvayarehi náicha. Ánipa nacahe:

²⁴ –Tata maestro, ema víyarahaini Moisés, manaquicahi eta máechajiriruvahi eta viyehe: “Te máepenaequenehahipuca ema achane esu mayena, tásiha nájinahipuca manaquiequeneruvainahini machichainahini; te matiarihihipuca mácani maparapehi, mavehayare esu machinenaquenéni, apaesa émainapuca macachicha eta suyehe, máitsivainahi ema maparapéni”.

²⁵ Tacutiquene te juca vitaracu, natiarihinihi ena siétequeneana ticaparapejiricacana. Tacahe, ema náechavimuri títauchavapa. Máepenaequenehapasera esu mayena. Nájinahi machichainahini.

²⁶ Tacahe, ema maparape mátauchavare esu machinenaini. Énerichuvaresera máepenaequenehavare, nájinavare máchichainahini. Ema émana maparape mátauchavare ésu. Énerichuvare máepenaequenehavare. Namutupa ena siétequeneana navehahi ésu, tásihasera náepenaequenehapaipa, nájina émanainahini macachichahini eta suyehe.

²⁷ Te táequenepa, tépenapa esu esenaini.

²⁸ Tacahe puiti, te apapanapuca eta náitaresirayare ena nani, ¿nájahapuca ena siétequeneana ema yátupiquenehi suímaquenehi esu esena, taicha ena siétequeneana namutuhi suímanarihi? –náichapa.

²⁹ Tásiha, ema Jesús majicapavacapa:

–Éjecapava éti. ¿Tájaha tacayema vahi ácaicutiarahini eta táimiturapi eta Sagrada Escritura? ¡Váhivare evarahahini esuapahini eta tamutuirahi marataha ema Viya!

³⁰ Ánaqui te apana náitaresiraya, vaipa nácamunuimahi esu esena. Énaripa ena esenana, váipavare nácamunuimahi ema ajaira. Nacutinapa ena ángeleana tiávihanahi te anuma eta namaepenaacairahi.

³¹ Éti váhivarepuca ácaicutiara eta yátupirahi eta vahi táepenahini eta náchanevana ena náepenaqueneana. Váhipuca ácaicutiara eta máechajiriruva ema Viya. Ani macahehi éma:

³² “Nútira yátupiquenenuhi Viya, macasiñaquenehi ema Abraham, ema Isaac émapa ema Jacobo” macahepa ema Viya. Nutupiruvahi numetacahe: Ema Viya, éma téchahi eta náitaresirana ena téhicanahi, tayanapane tépenanaripa. Eta náchanevana, tímiyanavarichucha títareca te mamirahu. Éti, ichape eta éjecapiravahi –máichavacapa ema Jesús.

³³ Tacahe, eta nasamirahi ema Jesús, ichaperinehi eta náramirahi ena achaneana eta máimiturapihi.

*Eta tisuapacarepanahi te mavanairipiana ema Viya
(Mr 12.28-34)*

³⁴ Tacahe, ena fariséoana eta náimairahi macamatinasiravacahi ema Jesús ena saducéoana, ticurujicacanapa éna.

³⁵ Tásiha, tiyananapa náemejecapavachayarehi ema Jesús. Ema émana ticainapucavapa, máestrohi éma tayehe eta nayeherepiana. Mayaserecapa éma:

³⁶ –Tata maestro, nuvaraha pimetacanuini ¿tájahapuca eta vanairipi tisuapacarepanahi tayehe eta mavanairipiana ema Viya? –macahepa.

³⁷⁻³⁸ Ema Jesús majicapapa:

–Eta máechajiriruva ema Viya te Sagrada Escritura, ani tacahehi: “Yátupina eta émunasiranuina nuti láquenu. Iúnaca te esamureana. Yátupina eta ecachanevairanuina nútí. Epanerecha eta nímiturapiana tamutu sácheana, yátiana”. Étara eta juca eta vanairipi tisuapacarepanahi. Éta tativyare itauchayare, tínapuca tayehe eta apamuri vanairipiana.

³⁹ Eta apana táehiruhi eta juca, ánvare tacahe: “Pémunacayare ema piparaepiyahi, tácuti eta pémunasiravahi píti”.

⁴⁰ Eta juca apinaquene vanairipi, éta máehicahi ema víyarahaini Moisés tayehe eta apamuriana mavanairipianahi éma. Énaripa ena apamuriana profetana, étarichuvare náehicahivare éna tayehe eta náimiturapianahi.

*Yátupi ema Cristo mámariequenénihi ema rey David, Víyahivare éma
(Mr 12.35-37; Lc 20.41-44)*

⁴¹ Tacahe, eta náurujiasiraichaha ena fariséoana te machacaya ema Jesús,

⁴² máichavacapa:

–Puiti, nuvaraha nuyaserecahe eti: ¿Tájaha tacayema eta epanereruana éti mayehe ema Cristo ema ecuchapaquenehi? ¿Tájaha eta ícutiarayare eta ímatirayarehi éma te máimercavapa? –máichavacapa.

Éna najicapapa:

—Vímatinapa éma taicha tiúchucayare mámariequeneyare ema víyaraháini rey David — nacahepa.

⁴³ Majicapavarepa:

—Yátupihí ema Cristo achanequenehi eta máimahi taicha mámariequeneyarehi ema víyaraháini David. Nuvarahasera epanerechaya eta juca máechajiriruvahi ema David te májurehi Salmo, ani macahehi:

⁴⁴ “Ema Viya máichapa ema Tata Náquenu Cristo: Yare, péjaca te nuvaure, eta picuchapihayare eta nucaepuyisiraya te pimirahu ena ticatianacavianahi” macahepa.

⁴⁵ Ema David, eta máimijarechirahi ema Cristo “Tata Náquenu”, ¿tájahapuca eta macayemaquenehi? Núti németeaca Víyahivare ema Cristo. ¿Tájaha íchahi éti? —máichavacapa.

⁴⁶ Eta nasamirahi eta juca, nájina nájaracavahini najicapahini. Eta tacahe, nájinapa napatsicavahini nápechahini nayaserechahini.

23

Ema Jesús máimereuchavaca eta nájecapiravana ena fariséoana énapa ena escribánoana (Mr 12.38-40; Lc 11.37-54; 20.45, 46)

¹ Tacahe, ema Jesús máichavacapa ena achaneana vítipa viti máimitureana. Ánipa máichahavi:

² —Ena escribánoana énapa ena fariséoana tímijachavana catuparahana eta navepaisirarehi eta mavanairipiana ema Moisés.

³ Tacahe, éna esuapayare. Ítauchayare eta navanairipiana. Váhisera ecuehica eta nayeheripiana taicha ena apapipijichucha eta napanereruana.

⁴ Tacutiquene tipamicaheana ítauchaya eta camuriqueneana nayeherepiana. Éti, tájina eta ejanuacarehíni nayehe. Nájinapa tíratahaimahi títaucha. Apanasica éna, vahi náratamahíni náítauchahíni tamutu.

⁵ Tímijachavanahi tamutu náítaucha, navarairahi ticunachacareanayarehi nayehe ena achaneana. Tisiñavavaicanahi eta nápajusiravahi religiósoana. Nanacahi te nanahuana eta ajureca navejurehi eta te Sagrada Escritura. Tacutiquene eta nacamuirihaira tísaapeacavanahi píncanillanahi. Ticamatsivacahi eta nacamuirihaira.

⁶ Ena nani, te ticaichuhasiana eta nanisiraya, éna tinerejisinavanahi eta tíúrinapanána eta náejasihaya. Navarahahivare ichape eta napicauchiraya ena achaneana te náurujisirarevanahi.

⁷ Tétavicavahi eta navarairahi ticapicahuana. Navarahahivare ticacajamicasianayarehi te jácani nácapajisiha ena náimitureana téhepahi calle.

⁸ Étiserá vahi ecujamuracha eta nacajamisirahenahíni ena achaneana, étainapapucaini nacunachirahenahíni. Taicha éti eparapejiricacahi, ecuticacahi te mamirahu ema Viya. Nucarichu núti yátupiquenénuhi eyehenuhí Maestro, nuti Cristo.

⁹ Váhivare “Tata Nucaiyaquene” ecuquicha nácani achaneana te juca apaquehe. Taicha mararihi ema yátupiquene Écaiyaquene, ema tiávihahi te anuma.

¹⁰ Váhivare tísapacarémahí eta náimijarechahe, “Tata nuyehe jefe”, taicha nucarichuhi núti yátupiquenénuhi jéfenuhi eyehe.

¹¹ Nuvarahasera ítátijiricacayare. Nácani títatirahiana, éna ticunachacarepananayarehi eta eyehe.

¹² Énerichuvare nácani mánsuanahi, éna ticunachacarepananayare me Viya. Nácanisera ticasíñavavaicanahi ticunachavanapuca, tímitsiríávanayare me Viya —macahepa.

Ema Jesús mayunacavaca eta nájecapiravanahi ena escribánoana énapa ena fariséoana

¹³ Tacahe, títecanapa ena escribánoana énapa ena fariséoana. Tásiha, ema Jesús máechajicavacapa éna, mayunacavacahi. Ánipa macahe:

—¡Éti escribánoana étipa eti fariséoanal! ¡Muracayare eta ícuñayare taicha eta apimirrahehi! ¿Tájaha tacayema ímijachavahi éti echa eta tapaja eta anuma? Vahi ísapa nasiapahíni ena achaneana, nácani tivarahana tisiapana. ¡Étiripa vahi ítujicavaimahi esiapa!

¹⁴ Jucarihi eta apana tivíuchahehi. Tatuparacahi eapanuyare ena tépenaimana te váhipuca narataha navachachahíni eta nantéve. Étiserá everejicavacahi tamutu eta nacayehéqueneana. ¡Apimirahehi! Épiyacavahi religiósohehi, íchahi íúpiemahi eta eyujarasira te namirahu ena achaneana, evarairahi vahi tacuimicaecherachava eta emaurivanahi. Ichapeyare eta ícuñayare táicha.

¹⁵ ¡Jucarihivare eta apana tivíuchahehi, éti escribánoana étipa eti fariséoanal! ¡Muracayare eta ícuñayare taicha eta apimirrahehi! Éti, tétavicavahi eta éñamavairahi eta íturuca ena téhicana eta ímiturapiana, eyanirahi te avasareana tiyerehiana. Tasapíhahi ímitucavacahi

eta nacutiheraya eta evainarajivahi. Tiápajucava eta namaurivahi ícha. Eta tacahe, ecachanevacayare éna te yucu infierno.

¹⁶ Jéhevare éti ecajare páurehe. Ichape eta ícuñayare taicha eta ímiaquipaisiravacahi ena ecutiqueneana púchuquiána. Éjecapavahi tayehe eta juca ímiturapíhi. Ímituca eta tájinahi eta taviuchaimahi nácani najurachahi eta Templo. Étasesa te najuracha tayehe eta oro eta tiávihahi eta te Templo, ticaviurevanainapa ícha éti.

¹⁷ ¡Tétavicavahi eta emaecharaireva eti púchuquiána! Eta Templo, étara tipicauchacarepanahi tayehe eta oro tiávihahi tayehe.

¹⁸ Íapechavavare eta éjecapiravahi tayehe eta apana ímiturapi. Éti íchavare: “Te náichapuca nácani eta promesa, najurachapuca tayehe eta náijuchirare eta sárareana, tájinapavare ticaviurémahi. Téhesera najurachahi tayehe eta nanaquiruvahi te táinahu eta náijuchirarehi, étasesa ticaviurevanaripa” íchahi éti.

¹⁹ ¡Tétavicavahi eta emaecharaireva eti púchuquiána! Eta náijuchirarehi eta sárareana, étara tipicauchacarepanahi tayehe eta enaquiruvanahi. Éta tímipicauchahi eta enaquiruvanahi.

²⁰ Taicha nácani tijurachanahi tayehe eta náijuchirarehi, vahi tácarichuhini napicauchayare éta, napicauchayahiva tamutu eta námavahuana tiávihanahi te náijuchirarehi.

²¹ Tacutiquene nácani tijurachanahi tayehe eta Templo, vahi tácarichuhini náichahini eta juramento tayehe eta Templo. Najurachahivare mayehe ema Viya tiávihahi tayehe.

²² Énaripa ena tijurachanahi tayehe eta anuma, najurachahivare mayehe ema Viya, taicha eta anuma étahi eta mávasa, étaiapa eta máejasihahi ema téchahi tamutu.

²³⁻²⁴ ¡Jucarihivare eta apana tivuchahehi eta tamuracavaya eta ícuñayare, éti apimirana! Éti ímijachavahi íminecapaequeneha ena ecutiqueneana púchuquiána tayehe eta títuca-careana. Ímijachavahi yátupiquenehi eta religiósohéirahi eta epamisiravahi eta itauchira eta vanairipi eta ecamavahuira me Viya eta diésmuri tayehe eta sucurecana. Ecnachacarehi taicha éta. Váhisera epamicavahini eta táuriqueneana tícnachacarepanahi me Viya. Tatuparacahe emutu ájapanurahi; ecatiuchavacayahéi ena macatiuchavarahanahi; yátupina eta itauchiraya tamutu eta íjarasiravahi; yátupina eta ecasiñavairaina me Viya. Tatuparacahivare ecamavahu eta me Viya eta diésmuri. Éti éñamavahi eta itauchirahi eta ánichichana, étasesa eta tisuapacarepanaqueneanahi táuriqueneana, tasapihahi vahi esuapahini*.

²⁵ ¡Tétavicavahi eta apimirairahehi! Éti ímijachavahi yátupiquenehi religiósöhehi, ecañamaracavahi eta ímiyaniravaya itaucha eta eyeherepiana. Étasesa eta esamureana, tétavicavahi eta tachipejivavacahi taicha eta ecaetemaraivana étapa eta íjarasiravahi icha tamutu eta ejamuraraivana.

²⁶ ¡Tétavicavahi eta epuchuquiva eti fariséoana! Tamapurujíhi eta religiósohéirahi. Tacamunúhi tatíva esipaca eta esamureana, apaesa yátupinasarepa eta iúrivayare, tipachinainapa eta itaresiraya.

²⁷ ¡Tétavicavahi eta ecatajivairaya, táichavenehi eta apimirairahehi, eti escribánoana étípa eti fariséoana! Éti ecuti eta covacha. Tiúrinahi te táinahu, téhesera te amahe távihahi eta máeperejiqueneana.

²⁸ Tacahehi eta itaresirahi éti. Ticitimahinehi iúrihi te namirahu ena achaneana. Étasesa te esamureana táurujisíavahi eta evainarajivana, tacutiquene eta apimirairahehi.

²⁹ ¡Páurehesamichapucaini eti escribánoana étípa eti fariséoana! ¡Ichapemuriquene eta eviurevanahi! Eti, ímijachavaiipahi puiti ecunachacarehi eta evarairahi échapajirica eyeheheacahi eta náecariana ena profetanaini matapiravarequeneanahi, nacaparuanahi ena iáchucanaveanaini éti. Épiyacavahi yátupiquenénahini eta iúrivahi.

³⁰ Tásiha, ánivare ecahe: “Te vitiaríhinaripahini víti eta acane te ticaparecanapa ena viáchucanaveanaini, vahi vicuimicasiapavahini tayehe éta” ecahepa.

³¹⁻³² Étijivapa ímereuchavahi eta apimirairahehi, taicha puiti éti epanerechahi ecapanuya, tacutihi eta napanereruanahi ena iáchucanaveanaini. Tásiha, ecuticacayare eta navivurevahi ena iáchucanaveanaini.

³³ ¡Éti tachichanaveanatataji eta quichare, tétavicavahi eta evainarajivahi! ¡Váhiquene ticaiticahémahi eta ícuñaya te infierno!

³⁴ Nímicaecherachayare eta evainarajivahi. Nuvanecayare napauchahe ena nuchanerana. Éna, timetacaheanayare eta mapanereruana ema Tata. Tímitucaheanayareva tamutu eta nímiturapiana. Nasapíhayare vahi esuapaimahi éna. Éna, yátupíhi náituca. Émepururecayaresera éti eta náitupajjiasiravahi éna. Esapíhainapa, éti ecapacavacainapa

* 23:23-24 Ani tacahe eta mayeherepi ema Jesús te máechajiriruva: “Eti ecatijica eta chupi; ejiricasera eta camello”.

éna; ena apamuriana éméatatacayare te crusu. Tásiha, ena apamuriana éstacavacainapa te iúrujisirarevana. Éhicarairicavacainapa te jácáni avasareana najunaiyayarepahi.

³⁵ Tásiha, eta ecapasiravacainapa ena nuvaneruanahi, étnapa tamuriacayare eta naviurevanahi namutu ena ticapacanahi ena achaneana matapiravarequeneanahi. Ema Abel máinapuiruhi nacaparuihi, máetaviuchainihi eta máuriva. Émapa ema máequeneruhi Zacarías (machichainihi ema Berequías), ema nacaparuihi te tamirahu eta Templo. Camurianahisera ena apamuriana námurivanainihi.

³⁶ Nutupiruva numetacahe puiti: Étnapa tamuriacayare tamutu eta náepeniranahi. Títecapainapa eta ícuñayare eti achaneana ítareruanahi puiti —macahepa ema Jesús.

Ema Jesús ticatisamurevahi táichavenehi eta namasuapajiraivahi ena achaneana ticavasanahi te Jerusalén

(Lc 13.34-35)

³⁷ Tacahe, ema Jesús tíapechavava máechajicavacapa ena achaneana. Ánipa macahe, taicha eta macatisamureravahi:

—¡Tétavacavahi nucatisamureravahi ícha étisami eti tachichanaveanahi te juca viávasa Jerusalén! Ema íachucanaveanaini, éna ticapapajicanahi ena profetana mavaneruanahi ema Tata. Puiti étipavapa evaraha ecutiya ena íachucanaveanaini. Ichapemurihinéhi eta níchuirahéhi éti, iúrujiacanhini, tácutihini eta varayu te tacurujimuriha eta tachichanaveana eta te tapava. Váhisera ávarahahíni.

³⁸ Ímahainapasera puiti eta íchararacavayare. Ticaquipaicasiyare tamutu eta epenana, étiripa ticuchucaheanainapa.

³⁹ Numetacahevane puiti vaipa íapechavaimahi ímahanu, tíamainucavainapa te ítsivachapa eta epanereruana, evarairayare ejacapanu. Ecahénapa: “Ichape eta vicunachiravíhi píti vanairucaquenévíhi me Viya” ecahénapa.

24

Ema Jesús máimereucharipa eta táquipaisiravaya eta Templo

(Mr 13.1-2; Lc 21.5-6)

¹ Tacahe, ema Jesús tíuchucapa tayehe eta Templo, tiyanayarepaini. Vítisera viti máimitureana vémeñahavapa eta mayehe. Eta viáramirahi, vímechapa eta táurinaqueneana mari tayehe eta anuquehe peti te Témposami.

² Émasera ema Jesús tíjicahavapa:

—Tamapurujiyare eta juca táurina eta pétisami ímahaquenehi puiti. Nutupiruva numetacahe: Járajapayare eta sácheyare ticaquipaicasiyare tamutu eta juca Templo. Téjane-repaicainapa tamutu eta juca táurinaqueneanahi ímahaqueneanahi puiti —máichahavipa.

Tatiarihiyare eta ecutiarareanaya te tánehipaicha eta táichecuraya

(Mr 13.3-23; Lc 21.7-24; 17.22-24)

³ Tásiha, viyanapa tayehe eta cerro Olivoquiji, víputsicavapa. Te vítecapapa, téjacapa ema Jesús. Tásiha, víti máimitureana viyaserecapa:

—Vivaraña pimetacahaví. ¿Tájamuhupuca eta náimiauquipsirayare eta Témposami? ¿Jararihiyarepuca eta ecutiarareyare eta piápechiravayare píteca, étapa eta táitauchirayare eta táequeneruhi mapanereru ema Viya? —víchapa.

⁴ Tásiha, ema Jesús máichahavipa:

—Ecuneuchavaicha yátupina, machu navayuacahe, taicha nárájapayare ena tépiyacavayarepahi tímivasichavanayare nuyehé.

⁵ Nacaheyarepahi éna: “Nútiripa Cristo”. Nasapiha navayuacayare ena camuriana achaneana.

⁶⁻⁷ Énerichuvare esamairiricayare eta táehacacairayare eta ichapequeneana avasareana. Ticanarajiricacanainapa eta te avasareana tayerehiqueneana, énerichuvare ticauyayacarenapa guerraina eyehe éti. Váhisera ecurameca eta esamairirisiraya, taicha ene tacaheyare eta táepaniravayare eta ecutiarareanayare. Vuíchahasera étaimahi eta táichecurayare. Énerichuvare tatiarihiyareva eta ichape ecuhamuhuyareva te avasareana. Tatiarihiyareva eta ichape tayamurisiránaya eta apaquehe te jácáni távilhanapahi táetupiaruyare.

⁸ Tamutu eta juca ecutiarareanayare eta táepaniravayare eta nátajivanayare ena achaneana.

⁹ Tásiha, eti nuchaneranahi, ticatianacaheanainapa ena achaneana, táichaveneyare eta éhisiranuhi. Tipanajiricaheanainapa te tamutu avasareana. Ticaratacaheanayareva. Ticapacaheanayareva.

¹⁰ Tásiha, nararihinapa camurianaya ena tñajicavanayare eta náehisiranuhi. Tásiha, ticatianacaheanainapa éti yátupiquene eta éhisiranuya. Tijararecaheanainapa éti.

¹¹ Natiarihinavarepa nácani tépiyacavanayare mavaneruana ema Tata. Tamutusera eta náimiturapiana náepiyahiraivayarechucha, camurianayare eta navayuaruanayare.

¹² Énaripa ena arajuruana, tétavicavainapa eta namasuapajiraivaya, vaipa napicauchaimahi ema Viya. Camurianayare éna vaipa témunarahianáimahi.

¹³ Étiserá nuchaneranahi, te ecamichahi tamutu, ímianavahivare eta éhisiranuhi te táitavapa tamutu, nucuchucuhaheyare núti.

¹⁴ Énerichuvare, eti nuchanerana ecametarairuyare te tamutu avasareana, taicha nuvaraha náecha namutu ena achaneana. Ímitucavacayarehi eta najacapacarevahi me Tata namutu ena téneuchavanahi, étapa eta apamuriana nímiturapiana. Te ítecapapa te tamutu eta avasareana, nápechavayare nuchava.

¹⁵ Numetacahevaneyare eta apana. Járápáyare eta sache táíñehiqueneyare. Tímerecavaya ema achane váinarajiquene, máechajisihaguenehi ema víyarahaini profeta Daniel. Mavanecayare ena machanerana náechipejisirayare eta tacapicahuquenehi Templo, nacuchucavayare ena téhicanahi ema Viya. (Nácani navaraha nacaicutiara eta juca, tacamunuhi ticaravahanayare eta májurehi ema víyarahaini Daniel.)

¹⁶ Tásiha, te ímahapa eta juca, esamairiricapapuca, táuricapa etatajipa ejunavane, éti etiarihiqueneanahi te Judea. Ecaijuheyare eta te céroana, étaina eyumurusiavaina.

¹⁷ Nácani tiávihanahi te nayehe canchón te nasamairiricapa eta juca téchacarehi, táuricapa najunavanepa. Vaipa táuricahini nasiapanumahini te napenana, navehahini jácani náéñamaqueneanainihi.

¹⁸ Nácani tachimararuanayare te vámahí eta téchacarehi, táuricapa vaipa nacuchava tayehe eta avasare, tayanapane náéñamahi eta nayereruvana.

¹⁹ ¡Páureanasami nácani esenana tachimararuanayare, nácani ticajarianahipuca, nácani esenana ticachichanahi eta amuya tiájicachaha!

²⁰ Eta tacahe, eyaseacayare ema Viya tacuija táichejicahe*; váhivare tacuchimaracahe eta ichape tíquiva te achene te eyanapapuca ejuna.

²¹ Te jena sácheanayare, tétavicavayare eta nacatajivairayarehi ena achaneana. Tájina tácutimahi eta táíñehivayare eta nacatajivairayare, te táepaniravahi eta náitaresirahi ena achaneana te juca apaquehe. Te táequenénapa eta tíñehi, tájinainapa tácutimahi.

²² Nájina tacatiruumahi eta nacatajivairayarehi ichape. Macaichecavaneyaresera ema Viya eta masemavahi ema maca achane váinarajiquene, mavarairahi ema Viya macuchucuhavaca ena machanerana manerejiruana, majapanuqueneanahivare. Taicha te vahi macucaicheca ema Viya, máitamuriahahipucaini macapapajicavaca namutu ena achaneana ema maca achane.

²³⁻²⁴ Énerichuvare te tánehipaicha eta juca, natiarihinapa ena tivayuarahiana tépiyacavanayare Cristo tímivasichavanainapa núti. Natiarihivare ena tímicutijiricavanayare profetana mavaneruainahini ema Viya. Áninapa nacaheyare: “Yare, éhicayare ema Cristo. Matiarhipahi te juca vitaracu”. Ena apamuriana ánivare nacaheya: “Náepiyahiraivahi éna. Ema Cristo mávihahi te viávasa víti”. Étiserá vahi ecusuapavaca. Eta navarairahi tivayucaheanaya eti machanerana ema Tata, náituruequenehayare naicha eta ichapequeneana tiáramicareana ecutiareanayare. Camurianasamiyare ena navayuaruanayare.

²⁵ Étiserá vahi tivayucaheanaimahi taicha numetacahevanehi puiti.

²⁶ Te náichahepuca: “Ímaha máenahi ema Cristo ánaqui te mávapahi apaquehe”, vahi ecuyana. Étaripa te náichahepuca: “Mararhipa jácani tayumurevaquenehi cuarto. Vicarichu víti vímatihí eta mávihahi”, váhiquenevare ecusuapavaca.

²⁷ Taicha te yátupinapa eta nítesirayare núti, nucutiayare eta tájauhúchirava títecapa eta térameca. Namutuyare ena achaneana te juca apaquehe tinecapuanayare. Tacaheyare eta nuchavirayare nuti Manerejirunuhi ema Viya.

²⁸ Vahi ecueñamava távihapuca nítecapihaya. Núti nítecapauchaheya te jácani iávihihi éti†.

Eta machavirayare ema Manerejiruhi ema Viya

(Mr 13.24-27; Lc 21.25-33; 17.26-30, 34-36)

²⁹ Tacahe, te táitavapa eta juca nacatajivairaya ena achaneana, enévanénapa témahainapa eta sache. Étaripa eta caje, témahainavarepa. Témiricanainapa eta jarairiquiana. Étaripa eta tiávihanahi te anuma vímáimahaqueneanahi énerichuvare tiyamuricanainapa, tiyejejecavanainapa.

* **24:20** Ema Jesús máechajisihahi eta ticasarahimuhu, tíquivamuhuvare te jena mávasa Judea. Máechajisihahivare eta nayeherepi ena israelítana eta váhiquene náisapavahini tíanana tipaicana te jácani sávarumuhuana. † **24:28** Te máechajiriruvahi ema Jesús, áni macahehi: “Te jácani mávihahi ema máepenaquene, eta távihayare eta sipuquiana”. Eta juca mayehéhi proverbio, tatiaríhi eta tacayemaquenehi tayumurevahi.

³⁰ Tásiha, náimahainapa te anuma eta nícutiara núti Manerejirunuhi ema Viya. Tíyahainainapa eta napisira namutu ena achaneana távacuanahi eta avasareana te apaquehe. Tásiha, tímahanuanainapa núti. Tiámanuinapaipa eta úcaji eta núcupaisirayare. Tétavica-vayare eta nujaraivayarepahi, níñehinapaipa.

³¹ Nuvanecaya ema Arcángele, muracayare eta macachujairayapahi, apaesa ena ángleana nacurujicainapa namutu ena nuchanerana nunerejiruanahi, tiáshianayare te tamutu eta juca apaquehe.

³² Tiuri puiti, nuvaraha nímicutichinahe eta jácani yucuquí. Eta táitsivachiravavacapa eta tapacajiana, te ímahapa eta tajímuyairapa eta tatavaquí, tiúchucayarepa eta tapacajianaya arairu, tímaticarehi tíñehiripa eta únemuhuirayarépa.

³³ Ene tacahehi, te ímahayarepa tacaecherapa eta júcana ecutiarareana, ímatiacainapa eta táñehirainapa eta nuchavira.

³⁴ Numetacahevanecha: Vuíchaha tívanaimahi ena achaneana náitareruanaichaha te táitecapapa eta júcana ecutiarareanayare.

³⁵ Titavainapa eta anuma étapa eta apaquehe. Tativayaresera títauchava tamutu eta numetaruheanahi.

³⁶ Eta juca tiáramicareyarechucha. Nájina téchaimahi tájamuhuyarepuca eta táitauchiravayare, énaripa ena ángleana vahi náechahini. Nútivanerécahipucáini néchahini. Macarichu ema Tata, ema téchahi.

³⁷⁻³⁸ Tacutiyare eta acane eta náijahúchiravahi tépenana ena achaneana machamurrianaini ema Noé. Ena nani tinicairihianarinecha, náematanerinecha térana, tímarerecanahi ena nachichanaveana. Vahi téñamavanaimahi eta náimairahi ema Noé eta masiapirahitayehe eta ichapequene pacure.

³⁹ Tájina vahi natsecavahini eta táitecapauchirayarehi eta ichape une. Tacahe, eta táemirisirapa eta ichapequene tíquiva, tacapapajicavacahi namutu éna. Ene nacaheyare ena achaneana te jena sáchezare. Vahi natsecavahini tayehe eta nuchaviraya.

⁴⁰ Te jena sácheanayare, natiarihiyare ena apinana ajairana ticaemataneanahi te isaniti, ema émana tiáramicareyare tíara. Ema apana manasinapa.

⁴¹ Tacutiquene, apinahanhipuca ena esenana cáemataneanahi tiyuvarecanahipuca. Énerichuware esu ésuana tiáramicareya tíara. Esu apana sunasinapa.

⁴² Eta tacahe, etsecavahi ecauneuchava éti machu vahi ecunecapachava eta nítesirayarehi nuti íaquenu.

⁴³ Nuvaraha ácaicutiaraquenéna. Machu ácutiriana mácani achane námeyeruhi ena tíamerahiana. Tájina máechapiavahini tájahapuca hóravayarehi eta náitecapauchiraya te mapena. Te máechapucaini, ticauneuchavaipahini éma, váipasare nacuaimeyechahini.

⁴⁴ Eta tacahe, éti ecuneuchavayare tamutu sácheana, taicha vahi échahini tájamuhuyarepuca eta nuchavirayare nuti Manerejirunuhi ema Viya, machu íaramecariana.

*Nararihi ena músuana tíuriana. Nararihivare ena músuana máurirahana.
(Lc 12.41-48)*

⁴⁵ Tiuri, nuvaraha nímicutichinaheyare eta apana. Macañárihipuca ema empleado máetaviuchahi eta máitupajijiasiravahi. Tisuapajirahivare éma. Ema máquenu tiyanayarehi te apana avasare. Táitusiava ema máquenu matuparacahi ema empleado eta máijarasiraya eta tinicacareana ena apamuriana machamusuvanahi.

⁴⁶ Tétavica va eta máuricacarevaya ema maca ticatuparahahi, te tamutuhi máitauchahi jácani machimapirana ema máquenu.

⁴⁷ Németeaca, eta tamutuiraíhi tíuri eta machimapirahi, matuparacainapa éma téchayarehi tamutu eta máimahaqueneana. Eta tacahe, nuvaraha ácutipaini ema maca empleado tíurihi eta máitauravahi.

⁴⁸ Téhesera váhipuca tíuri eta mapanereruana ema mácani empleado, máimijachaichucha tiyereyarehi eta máitecapirayarehi ema máquenu.

⁴⁹ Tásiha, macaetemajiricavacapapuca ena machamusuvanahi. Máichapapuca eta piesta, tinahacavapa téra macachanevacahi ena macutiqueneana térarahiana, téniricapa.

⁵⁰ Tásiha, vaipa manecapachavahini te títecapapa ema máquenu. Machimaracapa ema empleado eta mamapachichijisiraipa eta máimahaqueneana.

⁵¹ Eta tacahe, ema máquenu macavanairipinapa náestacayare muraca. Tájina najapanuhini, tayanapane máiyahainepuca, macapitiquiahechavainepuca éma. Tásiha, machu ácutihini ema maca empleado máurirahahi, machu ecaquipaicasisami eta te yucu infierno.

¹ Puiti nuvaraha nímicutichinahe yayehe ena tiúchucuhanaya ticachanenuanayare eta néjasihaya eta návacureya, énapa ena vahi ticachanenuanaimahi. Ena nani nacutihi ena diésqueneana esenachichana amaperuana. Ticuchapanahi ena araimanayare, nácapirayare te nasamapa eta náitecapiraya. Tiámauchavavacapaipa eta namicahuana lámparinana.

²⁻⁴ Ena cincoqueneana, téchemarahianahi. Tiámauchavavacapahi eta nabotellana eta aceite natseruvapahi. Ena apamuriana cincoqueneanahivare máechemarairahana mapanerureana. Vahi námauchavapahina eta nahaceiteyarehi. Tásiha, tájinapa naviyahini.

⁵ Tacahe, vahi náitecapavanehini ena araimana. Navarahaipahi tímacana éna. Tavehapa eta ichapu, tímacanapa.

⁶ Tacahe, te enumuhupa yati nasamapa ema tipiaracahi. Ánipa macahe: “¡Nárajapa ena araimanayare! ¡Yare iácapa!” nacahepa.

⁷ Técheputcanapa namutu ena esenachichana. Náetupiricapa eta namicahuana.

⁸ Tásiha, ena cincoanavare tájicuvacaipahi eta namicahuana. Tiyaseserecanapa eta aceite. Ánipa nacahe: “Ecatajicahavi ecajihavi eta eyehe aceite, taicha tájicuvacaipahi eta juca vimícahuana, vémahaequenehaipa” nacahepa.

⁹ Énasera ena cincoqueneana najicapapa: “Vahi víjaracahémahi machu véchuriaca víti apanava. Vahi várataimahi. Tiúripána eyana evachareca eta ehaceitena” nacahepa.

¹⁰ Tásiha, tiyananapa tivacharepananayarehi eta aceite. Eta nayerevapahi, títecapananecha ena araimanayare. Tisiapanapa te tajuhe te távihayarehi eta piesta. Náehicapa ena cincoana natseruvanahi te távihayarehi eta piesta. Tacahe, ticaeratapa eta tapaja.

¹¹ Te tiyerepa, títecapanapa ena apamuriana esenachichana. Náehahamecapa eta tapaja. Ánipa nacahe: “Tata, tata, pivejiequenehahavi. Vivaraha visiapa” nacahepa.

¹² Émasera ena arayanayare majicapapa: “Eti, ¿nájahahéhipuca? Vahi nímatihe. Németeaca vahi étina tavanaranaina eta peti” máichavacapa ema arayanayarehi.

¹³ Tacahe, ema Jesús máichahavipa:

—Éti, vahi ecucuti ena máechemarairahana. Ecutiyaesera ena téchemarahiana. Ecunechavaicha éti, machu vahi ecunecapachava eta jácáni sáche yare eta nuchavirayare nútí Manerejirunuhi ema Viya.

Ena Jesús máimicutichinavaca ena achaneana ticaijaracasianahi eta maplatane ema achane rico

¹⁴ Puiti nuvaraha nímicutichinahe yayehe eta níjarasiraheya eti nuchanerana eta evacurecana taicha eta táuirahi eta ecaemataneasiranuhi. Matiaríhi ema achane rico. Tiyanayarehi te apana avasare. Máichuhavacapa ena mapanana mamusurana. Máijaracapa eta maplatane.

¹⁵ Ena achane máimativacahi eta náechemaraivahi ena mamusurana. Ena émana máijaracapa cinco millone. Ena apana máijaracapa apina millone. Ena apana máijaracapa étana millone. Nacaejapacayare eta plata. Tásiha, ena rico tiyanapa te macaijuheyarehi te apana avasare.

¹⁶ Tacahe, ema tijacapahi eta cinco millone, macaemataneacapa eta plata. Macaejapacapa eta plata. Díez millonepa maicha eta maplatane eta macaejapasirahi.

¹⁷ Ena apana, ema tijacapahi eta apina millone, énerichuvarepa macaejapacapa eta plata. Titucavavare éma eta cuatro millone eta plata.

¹⁸ Émasera ena tijacapahi eta étanaichu millone, vaipa macaejapacahini eta plata. Máecarapa eta plata, mapisirahi eta macaetehahini.

¹⁹ Tiyerepa eta mapairirisirahi ena náejaharu. Téhesera te tichavapa, mayaserrecavacapa eta plata máijararuanahi éma.

²⁰ Tacahe, tínapucapa ema tijacapahi eta cinco millone. Máijaracapa ema máquenu eta máiturevahi. Ánipa macahe: “Tata, píti píjaracanuhi cinco millone eta plata. Júchahisera cinco millonevare eta táejapasirahi”.

²¹ Ena máejaharu majicapapa: “Tiuri, nuchicha. Tájina táichava. Tétavicava eta piúriava. Pítauchahi eta picaemataneasirahi eta nuplatane. Puiti vahi támapurujimahi eta piúrivahi yayehe eta juca ánimurichichahi níjararuvíhi. Nutuparacavinapa eta camuriquene. Puiti pisiapainapa eta nuyehé. Piúrisamurereacaváinapa”.

²² Tásiha, títecapavarepa ena apana ema tijacapahi eta apina millone eta plata. Máichavarepa: “Tata, júcachi eta apina millone eta plata píjararunuhi. Júchahivare eta apinavare millone eta táejapasirahi”.

²³ Ena máejaharu majicapavarepa: “Tiuri, nuchicha. Tétavicava eta piúriava píti apana. Puiti, váhivare támapurujimahi eta piúrivahi yayehe eta juca ánimurichichahi níjararuvíhi.

Nutuparacavinapa eta camuripanaquene. Puiti pisiapainapa eta nuyehe. Piúrisamurereacaváinapa”.

²⁴ Tásiha, títecapavarepa ema tijacapahi eta étana millone. Máichapa ema máejaharu: “Tata, núti nímativíhi eta pímapanuraivahi. Piverejicanuyarehi eta táejapasirayarehi eta piplatane. Pítahacanuyarehiva eta nématanevachahi.

²⁵ Eta nupisirahi nácaetehahini eta piplatane, nécarapa. Puiti, júcahi nímicahava tamutu eta piplatane”.

²⁶ Ema máejaharu majicapapa: “Tétavicava eta pisunsuva, piti plújutataji. Te pímati-nuhípuca eta numajapanuraivahi, nítarahahi eta apaematanevacha, téhevere pímiyahachi nuverejicaviyare eta táejapasirayarehi eta níjararuvíhi nuplatane;

²⁷ váhiyapa pínacapaini te banco eta nuplatane. Puiti váequeneipahini puiti eta táejahacari-pahini eta nuchaviraipahi”.

²⁸ Tásiha, máichavacapa ena apamuriana mamusurana natarihiqueneanahi: “Everejica ema mácatataji eta plata. Íjaraca ema ticayehehi eta diez millone.

²⁹ Taicha, mácani máituruequenehahi eta macaemataneasirava, tatuparacahi eta nímicatasiraya. Ticayeheyare camuripana. Énasera nácani váhi náiturequenehahini eta nacaemataneasirava, ticaverejicasianayarehi eta nájaracasianahi.

³⁰ Émechareca muraca ema maca musu máurirahatataji. Vahi ecujapanu, tayanapane máiyahainepuca, macapitiquiahechavainepuca. Tásiha, íaquijica eta te cuarto tamapicujuhequenepanahi” macahepa ema achane rico.

Ena achaneana, te jena sácheyare ticayaseserehianainapa, étapa tiámavacaya eta náitátirahi ena apamuriana, ticaevatanainapa tayehe eta náviyahare

³¹⁻³³ Te nuchava nuti Manerejirunuhi ema Viya, néjacainapa eta te nuyehe trono tacapicahuquene, Réynuínapa. Tásiha, névatacaya ena nuyeheana ángeleana nacurujicavacaya te numírahu namutu ena achaneana te avasareana. Tásiha, núti nunerejicavacainapa ena yátupiqueneanahi nuchanerana. Nunacainapa te nuvaure. Tásiha, ena váhi nuchanerinainahini nunacainapa te sapa.

³⁴ Tásiha, nuti Rey ániya níchayare ena nuchanerana tiávihanayarehi te nuvaure: “Yare, eti íuricacareanahi manerejiruanahi ema Tata. Níjaracahénapa eta etuparahayare, ícuchihi mayehe ema Tata acane te tépanavainapa eta apaquehe.

³⁵ Taicha te ímahanuhi eta nécuavahi, éti énicanuhi. Numaunepahi, éti íjaracanuhi néra eta une. Tájina nítecapihahini te nupaisihapahi, éti íjaracanuhi eta nítecapihayare.

³⁶ Tájina numuirihainapahini, éti emuriachanuhi. Nucajumahi, éti ípuchapananuhi. Nucaeratahi te cárcel, éti ejirapananuhivare”.

³⁷ Tásiha, ena níchuhaqueneanahi tijicapuanainapa: “Tata, ¿tájamuhu vímahavíhi pécuahapahi, tásiha vénicavipa? ¿Tájamuhuvare vímahavíhi pímaunepahi, tásiha víti vésicavipa eta une?”

³⁸ ¿Tájamuhuvare vímahavíhi te pípaisirana tájina pítecapihahini, tásiha, víti víjaracavipa eta pítecapihahi? Váhivare vímahavíhini mamuriarevinahini, tásiha víti vimuriachavipa.

³⁹ ¿Tájamuhuvarehipuca picajumahi, tásiha víti vípuchapanavipa? ¿Tájamuhuvarehipuca picaeratahi, tásiha víti véjirapanavipa?” náichanupa.

⁴⁰ Tásiha, nuti Rey nujicapainavarepa: “Nutupiruva numetacahe: Nútira íjaracanuhi tamutu eta ejapanuraivahi, ímicatasiravacahi ena echamuriana nuchaneranhivare, ena nani namaesachaqueneanahi najacapahini ena apamuriana ena achaneana” níchavacapa.

⁴¹ Tásiha, ena tiávihanahi te sapa, níchavacainapa: “Étisera évuísíha te numírahu, eti masupajirairahana ecaviurevanahi. Eyana tayehe eta yucu, acanevacahéna eta ecaicuñaira eta emuruiraya, máicuchihi ema íaquenuhi ema Váinaraji énapa ena majupahana ángeleanainíhi.

⁴² Taicha te nécuahapahi, éti váhi íjaracanuhini eta nunica. Numaunepahi, váhivare éschanuhini une.

⁴³ Étarípa te nupaisiranapahi, váhivare íjaracanuhini eta nítecapihahini. Néchuríhavare eta numuiríha, váhivare íjaracanuhini numuirihainahini. Nucajumahivare, nucaeratavare, váhivare éjirapananuhini” níchavacainapa éna.

⁴⁴ Tacahe, éna náichanupa: “Tátachíha, ¿tájamuhu vímahavíhi pécuahapahi, pímaunepahi, pípairiricapahi, mamuriarevíhi, picajumapahi, picaeratahi, eta jácani vímáimicatasirávihipuca?”

⁴⁵ Nuti Rey nujicapainavarepa: “Nutupiruva numetacahe: Éti, váhi ejapanunuhini, taicha váhi ájapanuvacahini apaesainahini ena nani nuchanerana emaesachaqueneanahi”.

⁴⁶ Emutu éti eyanayare tayehe eta ecaicuñaiyayare máitavacayare. Énasera ena nunere-jiruana, matapiravareanahi. Námavacainapa tayehe eta táurivayare eta náitaresira, máitavacacayareva.

26

Napanerechahapi ena tuparairucana eta nacaratasirayare ema Jesús

(Mr 14.1-2; Lc 22.1-2; Jn 11.45-53)

¹ Te titapiricapa eta juca máimiturapianahi, máichahavipa viti máimitureana:

² —Écharichuhi éti eta apinarine sache eta Pascuáiraya. Tásiha, núti Manerejirunuhi ema Viya, ticaratacanuanainapa tématarecanuanainapa —máichahavipa.

³ Tiuri, ena tuparairucana énapa ena aquenucarahana, énapa ena escribánoana ticuruji-cacananripahi te tajuhe eta mayehe palacio ema Caifás, ema corregidor.

⁴ Tacahe, náechajisihapahi eta nacaratasirayare ema Jesús. Navaraha éna navayuacayarehi eta nacaratasirayare, nacapasirayarehi.

⁵ Tipicacavanarichuchasera. Ánipa nacahehi eta náechajiriruvahi:

—Vuíchaha vicucarataca éma achichu juca piéstairaya. Taicha camurianayarehi ena achaneana, machu tájahapuca náicharachavi taicha navarahayarehi nacatiucha éma. Vicuchapasera nayana —nacahepa.

Esu esena tiámasichahi ema Jesús te tájiyequene perfume

(Mr 14.3-9; Jn 12.1-8)

⁶ Tacahe, ema Jesús, tiyanapa tichava eta te avasarechicha Betania. Náichuhasivahi eta manisiraya te mapena ema achane ticaijare Simón ema leprosoinihi.

⁷ Tacahe, eta manisirahi, sucahepahi esu ésuna esena. Suámaphi eta perfume te bótechicha. Táetaviuchahi eta tasivachavahi. Supauchapa éma. Sujucusicapa te machuti eta táetaviurehi eta tájiyeva.

⁸ Eta náimairahi ena nuchamuriana máimitureana ema Jesús, váiparinehi náuricahini eta suémepuresirahi eta tasivachaquene perfume sujucusisirahi ema Jesús. Ánipa nacahehi: —¿Tájaha tacayema suémepureca eta juca tasivachaquenehi perfume?

⁹ Tiuripanhapucani víjaracahini eta juca tájiyemaquenehi. Vivehahini eta camuriquene plata; tásiha, vímicatasihahini ena páureana —nacahepa.

¹⁰ Émasera ema Jesús máimatihí eta napanereruana. Tacahe, máichahavipa: Ésamirica esu suca esena. Tétavicavahi eta táuriva eta suíchiranuhi.

¹¹ Ena páureanasami, tamutuchucha sácheana eta ecachaneravacayare éna. Ímicatacayarehi te jácane ecaimahaquenérana. Nútisera vahi nánasiquenémahi eta eyehe.

¹² Eta juca sujucusisiranuhi eta perfume, sucaínapuchahi ésu eta sufjiyechirahi eta náquehe tayeheyarehi eta nucaecarasirayare.

¹³ Nutupiruva numetacahe: Nácane ticametarairuanayare eta tiúrina echajirirucava, náechajisihayarevare eta juca suíchaquenehi esu suca esena. Témechanayare suyehe te tamutu avasareana te juca apaquehe —macahepa.

Eta májararesirahi ema Júlasí ema Jesús

(Mr 14.10-11; Lc 22.3-6)

¹⁴ Ema Júlasí, émarichu vichamurinihi éma vidocenénihi apóstole mayehe ema Jesús. Tiyanapa téchajiripanavahi nayehe ena tuparairucana.

¹⁵ Ánipa máichavacahi:

—Te yátupihapuca evarahahi ecarataca ema Jesús, núti nímechaheyare. Nucamunuhisera néchayare ¿áyanayarepuca eta evachachanuyare eta nímechiraheyare eta mávirare? —máichavacapa.

Tacahe, éna náijaracapa eta treinta reale.

¹⁶ Jéhevarepasera ema Júlasí matanucaípa eta máicharachayarehi eta májararesirayarehi ema Jesús.

Ema Jesús mánimurihapa ena máimitureana

(Mr 14.12-25; Lc 22.7-23; Jn 13.21-30)

¹⁷ Tacahe, títecapapa eta piesta Pascua, étaripa eta tínapuca sache eta semana vinicahi eta pan mayehere levadura. Viti máimitureana viyaserecapa ema Jesús:

—¿Távihapuca pívarahahi vácaijuhe eta vétupirisiahini eta vinisirayare eta uvesachicha eta viyeherepi? —nacahepa.

¹⁸ Éma tivanecahavipa:

—Eyana tayehe eta Jerusalén, te mapena ema nímaticasare. Aní íchayare: “Ema maestro tivanecahavíhi eta piyehe. Aní macahehi: Tiánehipa eta nitavirayare eta nématanehi. Te

pipena eta nunisihayare eta uvesachicha eta viyeherepi, nénisihayare ena nímitureana” íchayare.

¹⁹ Tacahe, tiyananapa ena máimitureana. Étaipaichuhi náichahi eta máimiturapianahi. Tinahacavanapa náetupiricahi eta naniruyare tayehe eta Pascua.

²⁰ Tacahe, te jena yátiquenehi ema Jesús, ténicahavipa viti dócequeneana máimitureana.

²¹ Te vinicaripahi, máichahavipa éma:

—Jéhesareinehi, te etaracu éti, mararihi ema émana tíjararecanuyare —máichahavipa.

²² Tacahe, viti ichaperinehi eta máimipaneresirahavíhi eta juca máichirahavíhi. Vimutu viyaserecapa éma:

—¿Nútichupuca, Tata, jácani? —Víchavacapahi víti éma.

²³ Tásiha, éma máichahavipa:

—Mácani néniruyare eta pan néchipaejiruhi te juca nuplatura, émara ema tíjararecanuyare.

²⁴ Tacahe, nútí Manerejirunuhi ema Viya, étaipaichuhi eta nacapasiranuyarehi, táitauchi-ravayarehi eta nuyehe eta táechajiriruvahi eta Sagrada Escritura. ¡Páuresamisera ema tíjararecanuyare! Tiúripaichuhupucani vahi macuchuchini te sujuhe esu maena —máichahavipa.

²⁵ Tacahe, téchajicapa ema Júlasí:

—Maestro, ¿nútipuca jácani njararecaviyare?

Tásiha, ema Jesús majicapapa:

—Pítisami —máichapa.

Ema Jesús tímechahavi eta macaejasiraya eta matratune arairu mayehe ema Maiya (1 Co 11.23-26)

²⁶ Tásiha, eta vinisirahi, mavehapa eta pan ema Jesús. Mahasulupayachapa ema Viya. Mayuvetucapa, tíjaracahavivacapa viti máimitureana. Tásiha, máichahavipa:

—Eta juca neche. Enica —macahepa.

²⁷ Tacahe, mavehavarepa eta vasu vérirare, mahasulupayachavarepa ema Viya. Tásiha, tíjaracahavivare. Máichahavipa:

—Era eta juca ámutu éti.

²⁸ Taicha eta juca eta nítine, táepusiruvayare eta nucaepahairayare eta epecaturana emutu eti achaneana, esimutuqueneyarehi. Étarichuvare táicutiarayare eta nufirmachirayare eta arairu matratune ema Vicaiyaquene, nucaejasirayava eta matratune apaesa ámutu ejacapacare mayehe.

²⁹ Nutupiruva numetacaha: Vaipa nápechavaimahi nérahivaréni eta juca tachi eta uva. Tiámainucava te táitauchavapa eta nusiapíraya eta nucavacuréraya, nucajupahairaya ema Tata Nucaiyaquene. Te jena sache, níjaracaheya vérainapa eta aramaruama. Vicajupahainapa ema Tata.

Ema Jesús máimereucha ema Pedro tépiyacavayare vahi máimati ema Jesús (Mr 14.26-31; Lc 22.31-34; Jn 13.36-38)

³⁰ Tásiha, eta vítanisirapa, vijirapa eta jirasare eta vihasulupayachirahi ema Viya. Te vítapiricapa, viyanapa vicaijuhe eta te huerta Getsemaní távihahi eta táemiripaisinehi eta cerro ticaijare Olivoquiji.

³¹ Eta vipaisirapahi, ema Jesús máichahavipa:

—Puiti juca yati ejunijicanuyare emutu éti. Ejunaracayare. Tásiha, títauchavayarehi eta máechajiriruvahi ema Tata eta te Sagrada Escritura: “Nísapayare nacarataca ema Pastor, nacapasirasamiyare. Tásiha, tíjunaracanainapa eta uvesana macurujiruanainíhi” macahepa.

³² Téhesera te néchepucapa te nécari, nínapucainapa te Galilea. Ánaqui nucuchapiaheyare éti —máichahavipa ema Jesús.

³³ Tásiha, ema Pedro majicapapa:

—Tayanapanepuca, Tata, najunaracapuca ena apamuriana, nútisera vahi nujunaimahi —máichapa.

³⁴ Ema Jesús máichavarepa:

—Nutupiruva numetacavi piti Pedrosami: Puiti juca yati, te tamirahuinapaichaha eta táechajisírayare eta varayu, mapahe eta pépiyasiravayare vahi pímatinu —máichapa.

³⁵ Ema Pedro macahevarepa:

—Tayanapanepuca pímicapacanu, váhiquenesera népiyacavaimahi vahi nucuimativihini, váhivare nínajiacavimahi —máichapa.

Viti apamuriana étarichuvare tacahehi eta véchajiriruvahi.

Ema Jesús tíyujaraca te Getsemaní (Mr 14.32-42; Lc 22.39-46)

³⁶ Te vítecapapa víti tayehe eta huerta Getsemaní, máichahavipa ema Jesús:

—Éjacachaha eta ani te juca. Ecuchapanuchaha. Núti nuyanayare ánaquipana, nuyujaracayare —macahepa.

³⁷ Mapananaichu ena mámaqueneanahi: ema Pedro, ema Juan émapa ema Jacobo. Ema Jesús, ichape eta máeñamiravahi te masamure, ticatisamurevapa.

³⁸ Tásiha, máichavacapa:

—Tétavicava eta táeñamirava muraca eta nusamure. Tavaraha ticapacanu. Ácahéchaha ani te juca. Váhiserá ímicuimaca. Ecauneuchanuhi —máichavacapa.

³⁹ Tásiha, tipaipanapa ánaquipanachíchahi. Tiáquipaicavapa máetipaisinapa, macaitecapa eta mamira te apaquehe. Eta mayujarasirahi, ánipa macahe:

—Tátachicha Nucaiyaquene, picatajicanupaini. Váhini tacuitauchavaini eta níchavaquenevayare. Váhini picuísapaini eta nucatajivairaya. Níjaracavasera núti eta nítauchiraya eta pivarahaquenehi píti —macahepa.

⁴⁰ Tásiha, téchepucapa. Tichavapa eta te návihahi ena mapanaqueneana máimitureana. Máimaharinehi éna, tímacanaripa. Macajamicapa ema Pedro. Tásiha, máichapa:

—Váiparinehi ímicaticanuhini ejaneacavahini étanainahipucaini hora ácahehini.

⁴¹ Éjamiuchava. Eyujarauchava apaesaina. Eyaseaca ema Viya eta étumevaina apaesa vahi macuiturucahe ema Satanás. Yátupihinéni eta íachanevana taratahahi ticaratacava. Étasera eta éche máteji, vahi taratahaimahi ticaratacava —máichapa.

⁴² Tásiha, tiápechavavarepa tiyanavarepa ema Jesús. Apihepa eta mayujarasirahi. Ánipa macahe:

—Tátachicha Nucaiyaquene, váhini tacuitauchavaini eta níchavaquenevayare. Tásihasera, níjaracava núti eta nítauchiraya eta pivarahaquenehi puiti. Nísapava nacapacanu —macahepa.

⁴³ Tásiha, tichavavare eta viyehe viti máimitureana. Tímahahavipa víti vímamurihaipa taicha taveharipa eta ichapu eta víuquihana.

⁴⁴ Tacahe, mapahequenepa tichavapa tiyujarapana. Étarichuhi eta máechajiriruvanahi.

⁴⁵ Te tichavapa, téchajicahavipa:

—¿Íápechavapa ímaca? ¿Vuíchahapuca enaracahini? Jéhesare, puiti títecapapa eta nutuparahahi nacaratasiranuyare ena ticatianacuanahí.

⁴⁶ Ávane ema tíjararecanuyare. Échepuca. Viyana víacapavaca —máichahavipa.

Nacaratacapa ema Jesús

(Mr 14.43-50; Lc 22.47-53; Jn 18.2-11)

⁴⁷ Téchajiricavaichaha ema Jesús, macahepainecha ema Júlasí, ema vichamurinihi. Máimamurihapaipahi ena camuriqueneana achaneana suntaruana. Ticaepuchiriquiana-paipahi, étapa eta nayeheana espada. Éna, vanairucanahi nayehe ena aquenucarahana.

⁴⁸ Ema Júlasí, tatiarihíhi eta máicutiarayarehi eta náimatirayarehi ena suntaruana ema Jesús. Aní macahehi eta máechajiriruvahi ema Júlasí:

—Ecuenuyare. Ema nétserareruyare, éma ecaratacaya —macahepa.

⁴⁹ Tacahe, ema Júlasí témeñahavapa mayehe ema Jesús. Máichapa:

—Yátiheipa, tata Maestro —máichapa.

⁵⁰ Tásiha, máetserarecapa. Ema Jesús majicapapa:

—Píti nímiturevíhi, ¿tájaha tímitecavi? —máichapa.

Tásiha, ena suntaruana enevanepa nacaratacahi, napresuchapa.

⁵¹ Ema émana vichamuri mavehapa eta mayehe espada. Mayuchatipaisinapa eta machaca ema mamusura ema aquenuca Caifás.

⁵² Tásihasera ema Jesús macatiuchaichucha. Ánipa maicha:

—Pinaca te tatumaramuhi eta piyehe espada. Taicha namutu nácani ticaparecanahi tayehe eta espada, énerichuvare nacaheayare, espada eta ticapacayare.

⁵³ Háipuca pecha te návarahahini núti nuyaseacahini ema Tata, puítinaichuhini macucupaicahini ena 80,000queneana ángeleana.

⁵⁴ Váhiserá nuvaraha nuyaseaca. Tatuparacahi títauchavayarehi eta táechajiriruvanahi eta Sagrada Escritura eta níchavaquenevayarehi —tásiha, máichavacapa ena suntaruana—.

⁵⁵ ¿Tájaha tacayema easiña eta espada, ecaepuchiriquipaipahivare eta ecarataseranuyare, tímicutijiricavapa námerahihini? Étayapasica cape juca tamutuhi sácheana nucachanehehi nímitucahehi tayehe eta Templo. Váhivare epatsicavahini ecaratacanuhi.

⁵⁶ Títauchavahisera tamutu eta juca taicha tacahehi eta náechajiriruvahi ena profetanaini, tayehe eta Escritura táechajisihairanuhi —macahepa.

Tacahe, viti máimitureana vimutu vijunaracapa, vinaquicapa ema Jesús.

*Nacatupihapa ema Jesús te namirahu ena tuparairucana**(Mr 14.53-65; Lc 22.54-55, 63-71; Jn 18.12-14, 19-24)*

⁵⁷ Ena ticaratacanahi ema Jesús námapa te mamirahu ema Caifás, ema corregidorhi te jena áño. Natiarihivare ena escribánoana énapa ena aquenucarahana.

⁵⁸ Ema Pedro, máehiequenehapahi, mayerehipahisera. Te náimisipapa, tisiapavarepa éma te tajuhe eta canchón maye ema Caifás. Téjacaipahi macachanevacaipahi ena suntaruana, mavarairahi máimahayarehi tájahapuca eta náicharayarehi ema Jesús.

⁵⁹ Tacahe, ena tuparairucana énapa ena aquenucarahana natanucaipahi ena tépiyaequenehanayarehi ema Jesús, navarairahi tatiarihiyarehi eta tiviuchayarehi eta máepeni-rayare.

⁶⁰ Váhisera náichimavahini, camurianahinéni ena tépiyaequenehanahi. Tisiapanane-chasera ena apinana tépiyaequenehanayarehi.

⁶¹ Ánipa nacahe:

—Ema maca achane visamahi víti eta mavarairahi máquipaica eta Templo mayehe ema Viya tacapichuquenehi. Tásiha, máimichavayarehiji macaechepuca te mapanaquenenaji sache —nacahepa.

⁶² Tacahe, ema corregidor téchepurucinehi. Mayaserecapa ema Jesús. Ánipa maicha:

—¿Tájaha tacayema vahi pijicapavaca ena nani eta pépiyaequenehi? ¿Yátupipuca eta nacayemaquenehi? Taicha vímahavi vahi picatiuchavahini —máichapa.

⁶³ Émasera ema Jesús vahi majicapavachahini. Tásiha, mápechavare mayasereca ema corregidor:

—Pímaha puiti, nuyaserecaviyare. Vahi nuvaraha pépiyahirahi. Némechavi máimahavihi ema Viya. Pátupiruva pimetaçhavi te yátupihipuca pítiqenehi Cristo, Machichaquenevahi ema Viya —máichapa.

⁶⁴ Tacahe ema Jesús majicapapa:

—Yátupi núti Cristonuhi. Nuti Manerejirunuhi ema Viya. Tásiha, numetaçheyare eta apana. Járjapaya eta sáçheyare ímahanuyare eta néjasirayare te mavauere ema Viya máitupa-jjiáruvaquenehi. Ímahanuyareva núti eta núcupaisirayareva násihairayare te anuma, támiranuyarepahi eta úcaji —macahepa.

⁶⁵ Tacahe, ema corregidor eta masamirahi, tise marinehi ichape. Tivetsayujicavapa eta mamuiraha eta masemanevahi. Tásiha, macahepa:

—¡Tétavicavaipa eta maviurevahi ema maca taicha macacahihi ema Viya! ¡Puiti émaqueneva visama éma tépiyacavahi Machicha ema Viya! ¡Váipa tácomesa vitanucahini ena testigoanainahini! ¡Puiti esamaripa éti eta juca macayemaquenehi!

⁶⁶ ¿Tájaha víchararayare puiti ema maca? —macahepa.

Tásiha, najicapapa éna:

—¡Ticaviurevapa! ¡Étaina táimicapaca! —nacahepa.

⁶⁷ Tacahe, náehavacapa ema Jesús. Nátutuquichapa. Náehamirahavare.

⁶⁸ Tásiha, náichapa:

—Vímahasejicacha, te yátupihipuca pítihi Cristo. Te pijarauquipuca, pímatihaviyare nájahhipuca ema téhamirahavíhi —nacahepa.

*Ema Pedro tépiyacavapa vahi máimati ema Jesús**(Mr 14.66-72; Lc 22.56-62; Jn 18.15-18, 25-27)*

⁶⁹ Tiuri, ema Pedro, matiarhichahahi eta te canchón. Téjacaipahi tiásacavahi. Tacahe, sucahepaipahi esu mavanara ema corregidor. Suímahapa éma. Tásiha, suíçhapa:

—Németeaca pítirichu nímiture eñi Jesús eñi ticavasahi te Galilea —suíçhapa.

⁷⁰ Émasera majicapapa:

—Vahi nímati ema péçhajisihaquenehi. ¿Távihapuca pímatinenuhi píti? —máichapa.

⁷¹ Tásiha, mavarahapa tíuchucavaneyarehini. Suímahavare esu apana vanaraca. Suíçhavacapa ena natiarihiqueneanahi:

—Eñi ñica achane éñirichu ñichamuri eñi Jesús Nazareno. Nímahahi ñicachanepahi —suíçhavacapa.

⁷² Tiápechavavarepa ema Pedro téçhajica, ánipa macahe:

—Nujuracha te emirahu. Váhiquene nímati ema píçhaquenehi —macahepa.

⁷³ Te tiyererehachichavarepa, náimahavarepa ena apamuriana. Náichavarepa:

—Yátupiquene pítirichu machamuri ema maena Jesús, taicha eta péçhajisira éta tímeru-chavihi —náichapa.

⁷⁴ Tásiha, macahevarepa:

—Máicuñacanuine ema Viya te vahi nucucahe yátupina. Váhiquenesera nímati ema achane éçhajisihaquenehi —macahepa.

Tásiha, enurujipa téchajicanecha eta varayu.

⁷⁵ Te masamapa eta varayu, evenanepa máechahi ema Pedro eta máichirahi ema Jesús: “Te tamirahuinapaichaha eta táechajisirayare eta varayu, píti mapaheyare eta pépiyacavayare vahi pímatinu”. Tásiha, tíuchucavanepa ema Pedro. Tíyahavanepa taicha máimativanepa eta táichapevahi eta máejecapiravahi.

27

Námapa ema Jesús te mamirahu ema Pilato

(Mr 15.1; Lc 23.1-2; Jn 18.28-32)

¹ Te tijararahipa, tíurujicavanapa namutuyaréni ena tuparairucana énapa ena aquenuca-rahana. Tícaechacasipa eta náimicapasirayarehi ema Jesús.

² Nacuchucapa ticaitihapaipa eta námirapahi te mamirahu ema Poncio Pilato, ema aquenucahi prefectohiquene.

Eta macapasiravahi ema Júlassi

³ Tacahe, ema Júlassi eta máimairahi eta táichapevahi eta macatajivairahi ema Jesús étapa eta nacapasirayarehi, ichaperinehi ticatisamurevahi taicha eta máejecapiravarihi. Tíyanapa máimichavapanahi eta treinta reale eta plata mavachahi nayehe éna.

⁴ Tásiha, máichavacapa:

—Néjecapavahi ichape eta níjaresirahi ema maca achane matapiravarequene. Nuv-
varaha nímichavaya eta nuvachainihi —máichavacapa éna.

Énasera najicapapa:

—Jéhepuca, vahi vecha víti. Péchaquenevaichuhi píti —náichapa.

⁵ Émasera ema Júlassi máquijimirauchavacapa eta te tajuhe eta Templo návihahi éna. Tásiha, tíuchucapa. Tíyanapa. Táichavenehi eta macatisamurevairahi, tichumucavapa.

⁶ Ena tuparairucana navehapa eta plata. Tásiha, nacahepa:

—Vahi táuricahini víyaracuhahini eta juca plata tayehe eta caja vinaquisirareva taicha mavachaequeneya eta máepenirayarehi ema maca achane —nacahepa.

⁷ Tásiha, eta plata máimichavaquenehi ema Júlassi, napanerechaipa eta navacharesira-
yarehi eta apaquehe nacaecarasirareyare ena apavasanana. Eta juca apaquehe nasere-
sirarehi ena típuarecarahiana eta yupi.

⁸ Puiti éta ticajarehi “Apaquehe máitinevacha ema Jesús”.

⁹⁻¹⁰ Tacahehi eta táitauahiravahi eta májurehi ema víyaraha profetaíni Jeremías. Ani tacahehi: “Navehapa eta treinta reale eta plata. Ena tuparairucana navacharecapa eta apaquehe nayehe ena típuarecarahiana. Tacahe eta juca mametasiranuhi ema Víya eta náichirayarehi eta juca” macahepa ema víyarahaini Jeremías.

Ena Pilato mayaserecapa ema Jesús

(Mr 15.2-5; Lc 23.3-5; Jn 18.33-38)

¹¹ Ena Jesús ticayaserehipa te mamirahu ema aquenucahi Pilato. Ánipa macahe eta mayaseresirahi:

—¿Jéhesareji réyvihí píti nayehe ena pijaneanana israelítana? —máichapa.

Ena Jesús majicapapa:

—Pítupiruvahi eta juca piyaseresiranuhi. Yátupihí eta nurreyvahi —máichapa.

¹² Tásihasepa, te nametauchaipa ena tuparairucana, vahi majicapavacahini ema Jesús.

¹³ Tacahe, ema Pilato máichapa:

—¿Vahí péchajíuchava eta juca nametauchiravíhi? Camuríhi eta píviurevana eta nayehe —máichapa.

¹⁴ Émasera ema Jesús váhiquene majicapahini. Tásiha, ema Pilato máramipa eta mamajica-
pirahi. Váipa máitucacarehini.

Ena Pilato macavanairipipa eta náetatasiraya ema Jesús

(Mr 15.6-15; Lc 23.13-25; Jn 18.38-19.16)

¹⁵ Tíuri puiti, tatiaríhi eta mayeherepí ema Pilato, te Páscuamuhuana, macaiticayarehi ema émana preso, mácani nayasearuyarehi ena achaneana.

¹⁶ Tíuri, matiaríhi ema achane ticajare Barrabás, ichape eta maviurevahi.

¹⁷ Eta náurujisiravahi ena achaneana, mayaserecavacapa ema Pilato:

—¿Nájahapuca ema eyasesereruyare ema nucaítiruya? ¿Émapuca ema Barrabás, téhesera émapuca evaraha nucaítica ema Jesús, ema ticajare Cristo —máichavacapa.

¹⁸ (Taicha máimaticaripahi eta nametauchahi ema Jesús ena tuparairucana taicha nacapinaruhi éma.)

¹⁹ Eta máejasirahi ema Pilato tayehe eta mávacure, suímimetarecapa esu mayena: “Vahi picuimisiapava ñiyehé eñi ñira achane matapiravare taicha yati tametasiranuhi eta nuvapore eta ñíchararacavayare éñi” sucahepa.

²⁰ Énasea ena tugarairucana énapa ena aquenucarahana náimitumurihapa ena achaneana nayaseserecachi ema Barrabás, émainahini máuchucuha. Tásiha, nayaseserecapa máepenahini ema Jesús.

²¹ Máechajimurihavarepa ema Pilato, mayaserecavacapa:

—¿Nájahasica ema evarahaquenehi nucaitica? —macahepa.

Éna najicapapa:

—¡Émaina máuchucuha ema Barrabás! —nacahepa.

²² Ema Pilato mayaserecavarepa:

—¿Tájahasica nícharacaini ema Jesús ticaijare Cristo?

Éna najicapapa:

—¡Pémetatareca te crusu! —nacahepa.

²³ Ema Pilato máichavacavarepa:

—¿Tájaha tacayemahi eyaseacahi eta németatasiraya ema maca? ¿Tájahasica eta maviure-vahi? —máichavacapa.

Énasea tipiararemurihanavare muracapana:

—¡Pémetatareca te crusu! —nacahepa.

²⁴ Tacahe, máimahapa ema Pilato eta vahi máiturucachini macatiuchahini, taicha ena achaneana tivayuchavapaichucha eta nasemanevanihi. Tacahe, máemepanapa eta une, ticasipavahupa te namirahu ena achaneana. Tásiha, máichavacapa:

—Nuvaraha nímercava te emirahu vahi nútiparacaina eta máepeniraya ema maca achane matapiravarehi. Éti échinavayarehi —máichavacapa.

²⁵ Tásiha, najicapapa namutu ena achaneana:

—Vítinarine vicatapirava, énapa ena vichichanaveana. Vítinarine taeha eta máepeniraya ema maca achane —nacahepa.

²⁶ Tacahe, ema Pilato macavanairipipa nacaitica ema Barrabás. Tásiha, macavanairipipa náestaca ema Jesús; tásiha náetatacayarevare te crusu.

Nacavayuemarajipa ena suntaruana ema Jesús

(Mr 15.16-20; Jn 19.1-3)

²⁷ Tásiha, ena suntaruana námapa ema Jesús tayehe eta náestasihayarehi te távirarehi eta guardia. Nachayacapa ena camuriqueneana suntaruana náumurivana.

²⁸ Navejamuhiacapa eta mamuiríha. Namuriachapa eta muíriare títsime.

²⁹ Náitsamemacapa eta itapepi eta majarapiyarehi náicha. Nanacavarepa te machuti. Náimicaratacavarepa eta curina te mavahu vaure, matsucurúpayahijí. Eta nacavayuemarajirahi, náepuyumirauchapajicacha. Ánipa nacahe:

—Tata, ¡pítitataji nayehevihíji Rey ena israelítana! —náichapa.

³⁰ Tásiha, náutuquichapa. Náetetuvachapa eta matsucurupahi, náepuchisicapa tayehe.

³¹ Te tamutupa eta nacaecahijirisirahi, navejamuhiacavarepa eta mamuiríha títsime. Namuriachapa eta mamuiríhachu. Tásiha, námapa tayehe eta macaetataiyarehi.

Náetatacapa ema Jesús te crusu

(Mr 15.21-32; Lc 23.26-43; Jn 19.17-27)

³² Eta napaisirapahi te calle, nácapajicapa ema achane ticaijare Simón ticavasahi te Cirene. Napamicapa éma manaracuha eta macurusura ema Jesús.

³³ Tacahe, nacaitecapapa tayehe eta masihi nacaetatairare ticaijare Gólgota.

³⁴ Ánaquipa náesichinehi ema Jesús eta vino tisucareama ticasiriquiama eta ipuruji. Te masamaecapa ema Jesús, vaipa mávarahahini máerahini.

³⁵ Te náitauchapa eta náetatasirahi ema Jesús, ena suntaruana nasuertehachapa eta mamuiríha eta náijarajirisiracacahi. Tacahehi eta táitachiravahi eta májurehi ema víyahaini profetaíni David. Ánipa tacahe: “Tíjarajiricacanapa eta numuiríhaini. Nasuertehachapa eta náijarasiricacairahi”.

³⁶ Tásiha, najaneacapa ema Jesús ena suntaruana.

³⁷ Te tápusi eta macurusura, tatiarihihi eta ajureca táechajisihahi eta tiviuchahi. Ani tacahehi eta ajureca: “Ema Jesús, Rey nayehe ena israelítana”.

³⁸ Natarihihivare ena apinana tíamerahiana. Ticaetatanahivare te machacaya, ema émana te mavauare, ema apana te masapa.

³⁹ Tásiha, ena tíanucumirauchanapahi, tépiupiusicavanapaipa eta nacaecahirapaipahi éma.

⁴⁰ Ánipa nacahe:

—¡Pítitatajil! Pícahechajiriruvahi eta piáquipaisirayarehíji eta Templo, pirátahahivaréji pímicahava picatupuha eta arairu Templo te mapanayarericuhíji sache. Puiti vivaraha vímaha eta pítipajijiasiravahi, te yátupipuca Machichavi ema Viya. Piúcupaica te jara crusu. ¡Picatiuchava pítiživaina! —náichapa.

⁴¹ Énerichuvare ena tugarairucana nacaecahijiricavare, énapa ena escribánoana énapa ena fariséoana, énapa ena apamuriana aquenucarahana. Náichajiricacapa:

⁴² —Ema mácacacha, macahehi eta máechajiriruvahi eta marátahairahíji macatiuchavaca ena apamuriana achaneana. Tásiha, puiti váhivare marátahahini émajivainahíni macatiuchavahini eta te jara mávihahi. Te yátupinahíni Réyinaíni viyehe viti israelítana, macatiuchavaipahini, ¿masi? Máucupaicaripahini te jara crusu, ¿masi? Visuapasarepaini eta vímairainahini.

⁴³ Téhevare te yátupihipuca ticasínavahi me Viya, vivaraha vímaha macuchucuha éma puítinaríchu, te yátupihipuca máemunacahi éma. Taicha macahehi eta máechajiriruvahi eta machichairahi ema Viya —nacahepa.

⁴⁴ Ena tíamerahiana ticaetatanahivare te machacaya, énerichuvare nacaecahivare éna apanavare.

Eta máepenirahi ema Jesús

(Mr 15.33-41; Lc 23.44-49; Jn 19.28-30)

⁴⁵ Tacahe, te las dócequenepa, témahapa eta sache. Timapicupa tamutu eta apaquehe. Mapana hora eta tamapicuirahi.

⁴⁶ Tásiha, te las trespa sache, tipiaracapa muraca ema Jesús, ánipa macahe:

—Elí, Elí, ¡lama sabactani! —te véchajiriruva, ani tacahe: “¡Tata Nucaiyaquene! ¡Tata Nucaiyaquene! ¡Vahi picujunijicanu!”

⁴⁷ Tacahe, ena natiarihiqueneanahi ena tisamanahi, ánivarepa nacahe:

—Esama ema maca achane mapiaracahi ema víyahaini profeta Elías —nacahepa.

⁴⁸ Ema apana tiyanapa tijunapahi máepanapa eta machuchujiruyarehi eta tisisica vino. Máitiacapa te tiúqui curinaquí. Máimicapayacapa eta majaca ema Jesús, machuchujicayarehi.

⁴⁹ Énasera ena apamuriana, ánivarepa nacahe:

—Ésamiricachucha. Vímahayare te títecapayarepuca macatiuchapana ema Elías —nacahepa.

⁵⁰ Tásiha, tíapéchavavarepa tipiaraca muraca ema Jesús. Tásiha, tépenapa.

⁵¹ Tásiha, tíjahúchavapa tétsayumecapa eta cortina tayehe eta Templo. Tépanava te anuquehe, tíchecuha te apaquehe. Tiyayacarepa eta apaquehe. Étaripa eta ichapepuhiqueneana mari téjepuichavacavare.

⁵² Étaripa eta ecariana téjiacavacapa. Téhepucanavarepa ena náepenaqueneana ena tisuapajirahianahi mayehe ema Viya.

⁵³ Tásiha, te mapanaquenepa sache, téhevare te táequenepa eta máechepusirahi ema Jesús te máecari, éna apanavare tiúchucanapa tayehe eta náecariana. Tásiha, tisiapanapa tayehe eta avasare Jerusalén. Tichavanapa te napenana. Ichapemurianahi ena achaneana tímahanahi éna.

⁵⁴ Tacahe, ena tijanearecanahi, émapa ema nacapitara, te náimahapa eta tayayacarevahi eta apaquehe, émapa eta apamuriana tíaramicareanahi, ichaperinehi eta napisirahi. Tásiha, nacahepa:

—Yátupiquenerichuyapa Machicha ema Viya ema maca —nacahepa.

⁵⁵ Natiarihivare ena camuriana esenana. Tímararacanahi te tiyerehi. Ena nani esenana, éna téhicanahi ema Jesús. Téchapajiricanapahi ema Jesús eta mapaisirapahi te másihapa te Galilea.

⁵⁶ Nacarichusera ticajuanahi eta náijaruana esu María Magdalena, ésupa esu apana María, maena ema José émapa ema Jacobo. Sutiarihivare esu mayena ema Zebedeo, náena ena nuchamurianahi ema Juan émapa ema Jacobo, apóstoleanahi.

Nacucupaicapa te crusu ema Jesús, náecarayarepa

(Mr 15.42-47; Lc 23.50-56; Jn 19.38-42)

⁵⁷ Matarihivare ema achane rico ticaijare José. Ticavasahi te avasare Arimatea. Émarichuhi téhicahi ema Jesús.

⁵⁸ Te capererehipa, eta máimairahi máepenraipahi ema Jesús, tiyanapa mayehe ema Pilato. Mayaseapanahi eta máquehe ema Jesús, mavarairahi máecarayare. Tacahe, ema Pilato macavanairipia náisapahini eta náecarairaya.

⁵⁹ Nacucupaicasarepa eta máquehe ema Jesús tayehe eta crusu. Náyuruacapa tayehe eta tijapuquene sávana.

⁶⁰ Nanacapa tayehe eta máecari máemepiyareruhi máecariyahini ema José. Eta juca ecari, nasecajureruhi eta mari. Najihachapa tayehe eta tajitacarequene márime. Te náitauchapa, tiyananapa.

⁶¹ Esu María Magdalena, ésupa esu apana María, téjacanahi éna, náimararacaipahi eta ecari.

Ticavanahianapa ena suntaruana najaneaca eta ecari

⁶² Tásiha, te apanapa sache tiyananavarepa ena tuparairucana mayehe ema Pilato.

⁶³ Náechajicapa ema Pilato. Ánipa nacahe:

—Tímitcachavihi, tata, vimetapanavi eta máechajiriruvahi ema Jesús te achanerichaha eta máechepusirayarehiji te máecari te mapanaquenénapaji sache.

⁶⁴ Puiti, vivarahahi picavanairipihini náeratahini muraca eta tapaja eta máecari, mapanainavare sache eta najaneasirayare ena suntaruana. Machu nayana te yati námechapana eta máquehe ena máimitureana. Machu nácaheriana “Téchepecaripa te máecari”. Tásiha, ena achaneana nasuapainapapuca, náimijachainapa yátupi. Tisuapacarepanainapuca tayehe eta máichaqueneanahi te achanerichaha —náichapa.

⁶⁵ Ema Pilato máichavacapa:

—Tiuri, níjaracahe ena nusuntarurana. Eyana iama. Evaneca najaneacaquenéna. Nachujichaquenéna muraca eta máecari —máichavacapa.

⁶⁶ Tacahe, tiyananapa nachujichapa muraca eta ecari. Nanacapa eta táicutiaranayarehi. Tásiha, najaneacahi ena suntaruana.

28

Eta máechepusira ema Jesús te máecari

(Mr 16.1-8; Lc 24.1-12; Jn 20.1-10)

¹ Te apanapa sache te tijarahichichapa eta lumíncuquenehi, tiyanapa esu María Magdalena, sucachanehi esu apana María, náimahapanayarehi eta ecari.

² Tíjahúchavapa tiyayacarehi eta apaquehe. Émahi ema ángele eta máucaupaisirahi te anuma. Te máitecapauchapa eta ecari, máequehepuichapa eta mari tajihainihi eta máecari. Máejahamecapa eta mari.

³ Tétavicava eta majaraivahi, tivayuhauquirahi. Eta mamuiriha, tétavicavavare eta tajapuva.

⁴ Éta náimairahi ena suntaruana, tiáquipapaicavanapa, tiyayacareanapa eta napisirahi. Tiánehini tépenaracana.

⁵ Tásiha, ema ángele máechajicavacapa ena esenana. Ánipa macahe:

—Vahi ecupicanu. Núti néchahi eta etanusirapahi ema Jesús ema macaetataquenénihí.

⁶ Májinaipahi eta te tajuhe eta máecari. Téchepecaripahi taicha tacahehi eta máechajiriruvahi. Yare, ímaha eta juca mávinénihí.

⁷ Eyana púitinarichu, emetapanavaca ena echamurianahi máimitureana eta máechepusiraipahi tayehe eta máecari. Énerichuvare emetacavaca tiyanayare ema Jesús eta te Galilea. Ánaqui macuchapiaheyare emutu éti. Eta tímitecanuhi núti numetapanahayarehi —máichavacapa.

⁸ Tacahe, ena esenana tiyananapa tichavanahi tijunaparacanapaipa eta nametasirayarehi ena nachamuriana. Típicanapaipa, tásihasera tacachanepahi eta náurisamurevapai ichape.

⁹ Eta najunapirapahi, tíjahúchavapa tímerecava ema Jesús eta nayehe. Máechajicavacapa. Témeñahavanapa éna eta mayehe. Tépuycanapa natsiucapavachapa.

¹⁰ Éma máichavacapa:

—Vahi ecupicanu. Eyana emetapanavaca ena apamuriana echamuriana nímitureanahi. Eyanayare emutu te Galilea. Ánaqui nucuchapiaheyare —máichavacapa.

Eta nametarapianahi ena suntaruana

¹¹ Eta najunapirapahi ena esenana, ena suntaruana tijanearecanainihi tiyananapa éna, nametapanavacayarehi ena tuparairucana tamutu eta náimahaqueneanahi.

¹² Tacahe, ema corregidor tícurujiricapa namutu ena apamuriana aquenucarahana, mavarairahi téchajiricavana napanerechayare eta náicharacavayarehi. Jéhesare, navachachavacapa eta camuriquene plata ena suntaruana.

¹³ Tásiha, náimitucavacapa, ánipa náicha:

—Te natiarihinapuca nayaserecahe, ecaheyare: “Tiyananahi ena máimitureana ema Jesús te yátimuhu; námechapanahi eta máquehe. Ticamapuravanahi eta vímasirahi víti” ecaheyare.

¹⁴ Émaripa ema aquenuca te máechapuca, vímaharínepa víti. Vitanucayare eta vivayuarasirayare, apaesa tacuija eviurevaina éti —náichapa.

¹⁵ Tacahe, ena suntaruana najacapapa eta plata navachahi. Tiyananapa. Jéhesare, étapaichuhi náechajisihapahi eta náimitucasivahi. Puíticha, ena israelítana, tanasirichuhi tacahehi eta nametarapi, te natiarihi ena tiyaserecana.

Ena Jesús mavanemurihapa ena máimitureana eta náimituresihaya te tamutu avasareana (Mr 16.14-18; Lc 24.36-49; Jn 20.19-23)

¹⁶ Ene tacahehi eta viyanirahi víti óncequeneana apóstoleana tayehe eta Galilea te cerro taicha tacahehi eta mametarapihi éma Jesús.

¹⁷ Tacahe, te vímahapa ema Jesús, vépuyumurihavanepa. Vimutu vitsiucapa. Natiarihisera ena vuíchaha nasuapapajicahini.

¹⁸ Tásiha, ema Jesús témeñahavapa eta viyehe. Máichahavipa:

—Ena Tata te anuma tituparacanuhi núti néchayare tamutu te anuma étapa te juca apaquehe.

¹⁹ Eta tacahe, eyanayare puiti epaicayare tamutu eta avasareana. Ímitucayare ena achaneana, nuchaneranaina éna apanavare. Ícachasicavacayarepahi te máijare ema Tata, nútipa nuti Machicha émapa ema Espíritu Santo.

²⁰ Ímitucayareva eta nasuapiraina éna apanavare tamutu eta nímiturapiianahi eta eyehe. Núti, tayanapane nuyerehehi, nímicatacaheyaresera. Nijarahénapaipa eta nítipajijasirava. Tamutu sácheana nucachanehevacyarehi. Váhiquene nujunijiacahémahi — máichahavipa.

Tamutupa eta juca nájucaquenehi eta nímaquenehi nuti Mateo.

Emá San Marcos májuequenehahi eta máíchararacavahi emá Jesucristo, ticajare puiti eta EVANGELIO SEGÚN SAN MARCOS

¹⁻³ Nuparapenaveana, puiti nuvaraha numetacahe eta máitaresirahi emá Jesucristo, Machicha emá Viya, te títecapauchahavipa te vitaracu. Ichaperinehi eta viúricarevahi puiti taicha eta mametasirahavihi eta táurinaquenehi máechajiriruvana emá Viya.

Ánaquiaparipahi eta áñoana acane, emá Viya mametacapa emá víyahaini profeta Isaías eta mapanereruhi, eta mavanésirayare emá Machicha te juca apaquehe. Éma, tímitecahi ticatiurahiyarehi. Énerichuvare matiarihiyareva emá apana achane máichuhaquene-yarehi emá Viya. Macametarairuyarehi, máetupiricavacayare ena achaneana, náinajisirayarehi eta tamauriqueneana napanereruana apaesa táuri eta najacapirayare emá Machicha emá Viya.

Emá Juan Tícachasiricarahi tépanavapa ticametarairu eta máechajiriruva emá Viya nayehe ena vámahicuruhana

(Mt 3.1-12; Lc 3.1-9, 15-17; Jn 1.19-28)

⁴ Tiuri, te táequeneпа eta juca, camuriquenehi áñoana, tiúchucapa emá achane ticajare Juan. Éma, máichuhaquenehi emá Viya eta macametarairuirayare, máetupiricavacayare ena achaneana. Tacahe, masuapahi eta matuparahahi. Tiyanapa vámahicuruhapa. Vaipa avasarecuruhainaini. Ticametarairupaipa nayehe ena macutiqueneana vámahicuruhana. Ánipa macahehi eta máimituresirahi:

—Ítsivacha eta epanereruana. Éneuchava mayehe emá Viya, apaesa maperdonachahe eta epecaturana. Te éneuchavapa, núti nícachasicahénapa, apaesa etsecavaipa eta ejacapirayare emá Cristo —máichavacapa emá Juan.

⁵ Tacahe, nárajapapa napauca ena achaneana ticavasana eta te ichape avasare Jerusalén étapa eta apamuriana avasareana te táunavahi eta provincia Judea. Eta nametauresiravaipa ena achaneana, navarairapa náinajica eta napecaturana, emá Juan máicachasicavacapaipa tayehe eta cajacure Jordán.

⁶ Emá Juan, vanairucahi me Viya, profetahi éma. Eta macamuirihairahi eta náitsameru tajiyaha eta náitatiquene ticajare camello. Eta máitjuhe, vácapi jayumepi. Eta manicasareanahi eta tsacara. Eta máitiverahi eta mápama.

⁷ Ánivare macahe eta macametarairuirahi:

—Ávanepaipahisera mácani yátupiquene Cristo. Éma, tiápajupanavahi nuyehe núti eta mapicauchacarévahi. Váiparinehi nácutisamímahi eta máitupajíjiasiravahi. Váiparinehivare nácaemuñavaimahi macamusuranuhini núti páuresami.

⁸ Yátupi núti nícachasicahéhi te une, te éneuchavapa mayehe emá Viya. Émainapa, tícachasicahénavarepa eti ecasiñavanahi mayehe éma, tíjaracahénasarepa emá Espíritu Santo —macahepa emá Juan.

Eta macaicachasirahi emá Jesús

(Mt 3.13-17; Lc 3.21-22)

⁹ Te jena sácheana eta mávihairarichaha emá Juan te cajacure Jordán, tútecapapa emá Jesús. Másihapahi te avasare Nazaret te tinapaica eta Galilea. Tásiha, emá Juan máicachasicapa emá Jesús.

¹⁰ Te tamutupa, te tiúcupaicapa eta te une emá Jesús, tíjahúchavapa máimaha téjicahi eta anuma. Máimahavarepa emá Espíritu Santo ticutipahi eta paluma. Máucupauchapa emá Jesús, mávahácapa éma.

¹¹ Tacahe, nasamapa eta mahu emá Viya tásihaquenehi te anuma. Ani macahehi eta nasamirahi:

—Pítira nuchicha némunaruquene. Núrisamurecha piyehe —macahepa.

Emá Váinaraji Satanás mavarahapa macaítsamaraji emá Jesús

(Mt 4.1-11; Lc 4.1-13)

¹² Tacahe, emá Espíritu Santo eta mávahásamurechirahi, enurujipa máimitucaipahi emá Jesús eta mayaniraya te mávapahi apaquehe.

¹³ Eta mayerevahi emá Jesús cuarenta sácheana. Tásiha, emá Satanás macaítsamarajipa, mavaraha macaetema emá Jesús. Váhisera máratahahini. Tatiarhivare eta sárareana eta te mávihahi emá Jesús. Te tamutupa, ena ángeleana náechapajiricahi éma.

*Emá Jesús tépanavapa ticametarairu
(Mt 4.12-17; Lc 4.14-15)*

¹⁴ Tacahe, te jena sácheana, nacaratacapa emá Juan. Námápa te tiyerehi. Tacahe, tiyanapa tichavahi emá Jesús eta te provincia Galilea. Tépanavapa ticametarairu. Máichuhavacapa ena achaneana náheciyarhi emá Viya.

¹⁵ Ánipa tacahehi eta mametarapi:
—Éneuchava mayehe emá Viya. Ítsivacha eta epanereruana. Taicha puiti tichuha-hénapa emá Viya. Tiánehipa eta sácheyare títecapauchahénapa eyehe emá ticatiuchaheyare. Aquenucayare mavaneruhi emá Viya, éma téchaheyare. Ichape eta iúricacarevaya te esuapa eta nímiturapiana —macahepa.

*Emá Jesús máichuhavaca ena cuátroqueneana ténicarahiana, máimitureanayarehi
(Mt 4.18-22; Lc 5.1-11)*

¹⁶ Tacahe, eta mapaisirapahi emá Jesús te tachaui eta cáquiure Galilea, máimahavacapa ena apinana ajairana, emá émana ticaijarehi Simón Pedro émapa emá maparape Andrés. Eta náematanerepi ena nani, ténicarahanahi. Náquijierecáhi eta nayutahe.

¹⁷ Tacahe, emá Jesús máichavacapa éna:
—Yare, éhicanu. Núti níjaracaheya eta apana ématanerepiyare. Éti ítucavaparacáhi eta jímana; tacaheyare eta ítusiravayareva ena achaneana, machaneranyare emá Viya — máichavacapa.

¹⁸ Enevanepa náinajicáhi éna eta náenisirahi. Tiyananapa náhecapa emá Jesús.
¹⁹ Ánaquipanavarepa máimahavarepa ena apinana ticaparapeccanavare emá Jacobo émapa emá Juan. Téjacanahi te napacure. Matiarihihivare emá naiya Zebedeo. Náititijiricáhi eta nayutaheana.

²⁰ Emá Jesús máichuhavarepa ena apinana. Tásiha, náheciavarepa. Najunijicapa emá naiya Zebedeo. Manasipa éma te pacure, macachanehi ena mamusurana.

*Emá Jesús máimijunapa emá éreana tiávaháciníhi emá achane
(Lc 4.31-37)*

²¹ Tacahe, títecapanapa tayehe eta avasare ticaijare Capernaum. Eta juca sache sávarumuhú, tiyanapa emá Jesús eta te náurujisirareva ticaijarehi sinagoga. Máimitucavacapa ena tiúrujicavanahi.

²² Ichape náramíhi ena achaneana eta máimiturapianahi táicha vahí nasamasarénahini. Tétavicavahi eta máitusirahi mayunapaicáhi tamutu. Tétavicavahi eta tasuapacarevahi eta máimiturapiana.

²³ Te nataracu ena náurujiruvanahi, matiarihíhi emá émana achane mávaháruhi emá éreana. Tipiararecapa, ánipa macahe:

²⁴ —Núti nímativi. Pítira Sántoquenevihu. Machichaquenevihu emá Viya. Pésamiricahavipaini, piti Jesús Nazareno. Váhini picuesirujicahavini. Pivarahainapapuca pijararecavayare —macahepa emá achane.

²⁵ Tacahe, emá Jesús macajachapa emá éreana. Ánipa maicha:
—¡Pámatina! Piyana pijunijica emá maca achane —máichapa.

²⁶ Tacahe, emá achane tíjahúchavapa tiáquipaicava, tiyayacarepa. Tipiararecapa muraca maicha emá éreana eta majunijisirayarehi emá achane.

²⁷ Tásiha, náraminehi ichape ena natiarihiqueneanahi. Tiyaserejiricanapa, ánipa nache:

—¿Tájahasica tacayema eta juca? Emá maca Jesús, tétavicava eta máitupajijíásiravahi, maratahahi máquijica ena éreanana. Tásiha, ichape eta napisirahi emá. Vahí nácapaemachahini. Tamutupa arairu eta máimiturapianahi emá maca —macahepa.

²⁸ Tacahe, nasamairricapa namutu ena achaneana eta juca máichaqueneanahi emá Jesús. Énaripa ena ticavasanahi te avasareana eta te táunavahi eta Galilea.

*Emá Jesús macanaraca esu máimase emá Pedro
(Mt 8.14-15; Lc 4.38-39)*

²⁹ Tacahe, te tiúchucanapa tayehe eta náurujisirareva, tiyanapa emá Jesús te napena emá Pedro emá Andrés. Náheciavarepa ena apinana emá Jacobo émapa emá Juan.

³⁰ Sutiarihíhi esu máimase emá Pedro. Sunasiqueneipahi tívecáhi, ticajumahi ésu eta muraca fiebre. Nametacapa emá Jesús eta sucajumairahi esu esena.

³¹ Tásiha, mapauchapa. Macaratavauchapa, macaechepucapa ésu. Táetaviacavaneinehi eta fiebre. Tacahe, suéchapajiricapa emá Jesús, énapa ena máimitureana.

*Camuriana ena macanaruarunapahi emá Jesús
(Mt 8.16-17; Lc 4.40-41)*

³² Te jena cáperehiquénehi, te téricapa eta sache, ena achaneana námavacapaipa eta mayehe ema Jesús namutu ena nacajumaqueneana énapa ena návaháruanahi ena éreanana.

³³ Jéhesaréinehi, namutu ena achaneana ticavasanahi tayehe eta avasare tíurujicavanapa te tapaja eta peti.

³⁴ Camuriana ena macanararuana tayehe eta apanapane jumareana. Maveranavare ena váinarajiana máquijiruanapahi te náqueheana ena achaneana. Váhisera máisapahini náechajichahini ena éreanana, taicha náimatihí éna eta émairahi ema Cristo.

*Tamutu avasareana te Galilea mapaica ema Jesús
(Lc 4.42-44)*

³⁵ Tacahe, te tijarahipa, téchepucavanepa ena Jesús. Tiyana eta te mayujarasirare.

³⁶ Te téjamicapa ema Pedro, májinaripa ema Jesús. Tásiha, tiyanapana nacapayacapa éma eta te mayujarasirare eta te mávapai apaquehe.

³⁷ Te náitecapauchapa, náichapa:

—Namutu ena achaneana titanucavianahi —náichapa.

³⁸ Tásiha, máichavacapa ema Jesús:

—¡Páureanasami! Nuvarahapasea viyanayare tayehe eta apana avasareana apaesa nucametarairu taicha nutuparacasivaichuhi níchuhavacaya namutu ena achaneana náehica ema Viya —máichapa.

³⁹ Tacahe, ema Jesús tiyanapa tipaica tayehe eta avasareana te Galilea. Ticametarairupaipa eta te náurujsirarevana. Énerichuvare nayanauchapaipa ena achaneana návaháruanahi ena éreanana, máquijicavacapaipa ena éreanana.

*Ema Jesús macanaraca ema émana achane leproso
(Mt 8.1-4; Lc 5.12-16)*

⁴⁰ Tacahe, te apanapa sache, títecapapa ema émana achane macajumaquene eta lepra. Mapauchapa te mamirahu ema Jesús, máepuyumirauchapa. Tásiha, máichapa:

—Tata, nucasíñavahi eta piyehe, picanaracanupaini —máichapa.

⁴¹ Tacahe, ema Jesús tijimuyainehi majapanuinehi. Manacapa eta mavahu. Máichapa:

—Nuvaraha nuncanaracavi. Tájinapa píchiravaina puiti —máichapa.

⁴² Enevaneapa tinaraca. Vaipa leprósoinahíni.

⁴³ Tacahe, ema Jesús máevatacapa ema achane. Matuparacapa ichape vahi macumetajirica. Ánipa máicha:

⁴⁴ —Pímaha, piyanayaresera pímerecava nayehe ena tuparairucana, apaesa náimamacavi. Énainapa timetajiricanayare eta yátupirahi pinaraca, pipachihapa. Nacuijasea picumeta-cavaca eta nútirahi nuncanaracavi. Tásiha, piyanayareva me Viya. Picamavahuyarepahi eta pihasulupayachirayare taicha eta macanarasiravihi —máichapa ema Jesús.

⁴⁵ Tacahe, tiyanapa ema achane. Timetajiricapaipasera, mametacapa namutu ena achaneana eta máichavaquenevahi. Eta tacahe, ema Jesús vaipa máimerecavahini te avasareana taicha enevaneyarehi náurujiaca ena achaneana tímarahijiana. Tacarine tiyanahi tayehe eta nájinaricha achanenahichahini. Énasea ena achaneana tiyananaichucha napauchahi. Tiásihana tayehe tamutu avasareana.

2

*Ema Jesús macanaraca ema émana achane macajumaquene eta muracaquiha
(Mt 9.1-8; Lc 5.17-26)*

¹ Tacahe, te apanavarepa sache, tichavapa ema Jesús eta te Capernaum. Eta nasamairirirahi eta matíarihírahíri ema, títecapanapaipa ena achaneana, camuriqueneana.

² Tiyututucavanapa eta te peti mávihahi éma. Tájinapa táviravainahini eta te tapajachacaya. Ema Jesús máimitucavacaipa eta nacaijuheraya me Viya.

³ Tacahe, títecapanavarepa ena apamuriana, námapaihi te áchuji ema achane muracaha. Cuátroana ena tíamanapahi.

⁴ Váhisera náitecapauchahini eta te mávihahi ema Jesús, taicha eta nayututusiasiravahi ena achaneana. Tacahe, navetatamaequechapa eta peti eta te máinahu te manapaicahi ema Jesús. Te náitauchapa navetatata, nacajuchuchucapa ema macajumaquene eta te áchuji te mamirahu ema Jesús.

⁵ Te máimahapa ema Jesús eta nacasiñavairahi eta mayehe, máichapa ema macajumaquene:

—Tiuri, nuchicha. Eta pipecaturanahi nucaepahainavipa —máichapa.

⁶ Tacahe, énerichuvare natiarihíhivare téjacanahi ena escribánoana. Napanereque-nehapa eta macayemaquenehi ema Jesús. Tásiha, tisemanarinehi.

⁷ Ánipa nacahe te nasamureana: “Ema maca tímijachavaipapuca Viya eta macaepahairayaréji eta pecatuana. ¡Tétavicava eta matapirava! Taicha macarichu ema Viya marataha macaepaha eta pecatuana. Nájina apanaina tiratahaina ticaepahaina eta pecatuana” tacahehi eta napanereruana.

⁸ Enurujipa ema Jesús máimmaracavacahi eta nasamureana étapa eta napanereruanahi éna. Tacahe, máichavacapa:

—¿Tájaha tacayema téjecapava eta epanereruana?

⁹ Tájina táejeravaina eta níchirahi ema maca: “Nucaepahainavipa eta pipecaturanahi”. Máejerarepánapuca níchahini: “Nucanaracavipa. Péchepuca, piveha eta pimacaraji, piyana pipaica”.

¹⁰⁻¹¹ Tiuri puiti, nuti Manerejirunuhi ema Viya, nímereuchavainapa eta nuratahairahi nucaepaha eta pecatu te juca apaquehe. Ímararacanu —tacahe, máichapa ema macaju-maquene—. Puiti, nuchicha, nuvanecavi péchepuca. Piveha eta jara piyereruva. Piyana te pípena —máichapa ema Jesús.

¹² Enevanerinehi téchepuca ema macájumaquenéni. Mavehapa eta mayereruva. Tipacapa te namirahu ena achaneana. Tiyanapa tiúchucapa. Eta náimairahi, ichape eta náramirahi namutu ena natiarihiqueneanahi. Tétavicavainehi eta nacunachirahi ema Viya. Ánipa nacahe:

—¡Tétavicava táramicareva eta máichaqueneana ema Viya! ¡Asulupaya, Tata! ¡Vahi vímahasa-rénahini! —nacahepa.

*Ema Jesús máichuha eta achane ticajare Mateo, mayehyare apóstole
(Mt 9.9-13; Lc 5.27-32)*

¹³ Tiuri, te apanapa sache, tiyanavarepa ema Jesús te tachausi eta cáquiure. Náitecapauchavarepa namutu ena achaneana eta mayehe. Tásiha, máimitucavacapa.

¹⁴ Tacahe, te tiápechavapa tipaica ema Jesús, máimahapa ema Mateo, machicha ema Alfeo. (Ema Mateo ticajarehivare Leví.) Téjachi eta te macatuparahaiyahi eta macobresirahi eta impuesto.

—Yare, péhicanu —máichapa ema Jesús.

Tacahe, ema Mateo enevanepa tiyana máehica ema Jesús.

¹⁵ Te jena sácheana, ema Mateo téniricapa eta te mapena. Mámapa ema Jesús énapa ena máimitureana. Camuriqueneana ena téhicanahi ema Jesús. Natiarihivare maverana ena macutiqueneana ema Mateo ticobrarecarahiana tayehe eta impuesto. Mavranahivare ena apamuriana máemunacasareana ema Mateo. Tiúrisamureanahi eta nanisirahi.

¹⁶ Títecapanavarepa ena apanamuri achaneana: ena escribánoana énapa ena fariséoana. Eta náimairahi eta macachanérahí ema Jesús ena máichuhaqueneana ema Mateo, nacaehipa. Ánipa nacahe nayehe ena máimitureana:

—¿Tájaha tacayema tísapava ema eyehe maestro macachanevaca eta manisirahi ena nánitátajiana ticobrarecarahiana eta impuesto? ¡Tétávicavahi eta nacapecaturaravahi! —nacahepa.

¹⁷ Te masamapa ema Jesús eta náechajiriruvanahi, máichavacapa:

—Ena ticajumanahi, tétavicavahi eta nacamunuirahi ema médico. Énaserá ena majumareanahi vahi nácamunui mahi ema médico. Puítiserá, eta tímitecanuhi níti nutanucayare namutu ena tisipecaturana apaesa náeneuchavahini, náinajica eta napecaturana. Nácani matapiravareanahi vahi nasamavahini nácamununuhini —máichavacapa.

*Nayaserecapa ema Jesús tayehe eta ayuna
(Mt 9.14-17; Lc 5.33-39)*

¹⁸ Tacahe, te apahevarepa, ayunanahi ena máimitureana ema Juan. Ayunanahivare ena fariséoana. Náitecapauchapa ema Jesús ena apamuriana achaneana témejecapavarahiana. Nayaserecapa:

—¿Tájaha tacayema vahi naháyunachahini ena pímitureana? ¿Tájaha tacayema vahi nácutihini ena máimitureana ema Juan énapa ena fariséoana? —náichapa.

¹⁹ Majicapapa ema Jesús:

—Nímicutichinahe puiti. Vahi táuricaimahí ayúnáninahíni nácani ticaichuhacasianahi tinicanaya nayehe ena araimana. Tiúrisamureanayarehi taicha matiarihíhi ema arayena. Vahi táuricahini ayúnáninahíni. Téhesera te tépenapuca éma, jéhesare ticatisamurevanayare. Tacutiquene, vuíchaha táuricaimahí ayunanainahíni ena nímitureana.

²⁰ Járjapainapasera eta sáchehare, ticaverejicasianayare, taicha ticaratacanuanainapa ena ticapacuanayare níti. Jéhevarepa ayunanainapa.

²¹⁻²² Esamanuchaha. Eta juca eta nímiturapianahi, amairiha arairu. Mavaraha ema Viya arairuyare eta eyeherepianayare eti nuchanerana. Vaipa tácuticacaimahi eta nayeherrepiana ena apamuriana achaneana. Eta ítusirahi éti eta nímiturapiana, tavaraha ínjajica eta ichasi eyeherepiana tauriqueneanahi —máichavacapa ema Jesús.

Ena fariséona náimipicauchahi eta nayeherrepiana tayehe eta sávarumuhuana. Émasera ema Jesús máimereuchahi émarichu téchahi eta nayeherrepiana ena achaneana eta sache nanarasirayare

(Mt 12.1-8; Lc 6.1-5)

²³ Eta jena sávarumuhu, tiyanapa tipaica ema Jesús. Mámamurihapa ena máimitureana. Témehicavanapa ena fariséoana. Náetavivijicapaipahi eta isanitianana. Tacahe, eta napaisirapahi, ena máimitureana navechuquihapaipahi étajavapahi eta trigo. Navepiraquihapaipa, tépurajacachavanapaipahi. Tinicanapaipa. Tísapacareichucha éta, taicha técuhanapahi.

²⁴ Énaserá ena fariséoana eta náimarasirapahi, tisehanapaipa. Ánupa naicha ema Jesús: —Pímaha ena pímitureana. Ticaemataneanapaichucha eta navepiraquirapahi eta trigo puiti juca sache tétavicavahi eta tacapicahuquenehi. Vahi tísapacarémahí eta juca nacaematanerahi puiti —náichapa.

²⁵ Tacahe, majicapavacapa ema Jesús:

—Németeaca éti vahi ecaicutiara eta tacayemaquene eta Sagrada Escritura, eta máichavaguenevahi ema víyahaini David eta mapaisirapahi técuhanapa énerichuva ena téhicanapahi.

²⁶ Te émarichaha ema Abiatar náquenumurihi ena tiyujaracarahiana, ema David tisiapapa eta te mapena ema Viya. Tiyaseserecapa eta manicayarehi. Nájaracapa eta pan tacapicahuquenehi nanacasarehi te mamirahu ema Viya. Nanicasarehi ena tiyujaracarahiana, émasera ema David vahi tátuparacahini manicahini. Étasera eta máecuavahi, manicapa eta pan, énapa ena macachanequeneanapahi.

²⁷ Tímiyanava eta mametasirahi éna:

—Ema Viya máepiyacahi nativa ena achaneana. Te táequenepa, máimjarechinapa eta sache nanarasiraya ena achaneana, tíurichayarehi éna. Vahi étainahini témepiyaca eta tihapapiricavacayare éna.

²⁸ Tíuri puiti, numetacaheyare: Núti Manerejirunuhi ema Viya, nútirichu néchahi eta sache nanarasiraya ena achaneana —máichavacapa.

3

Ema Jesús macanaraca ema achane tépenavahu

(Mt 12.9-14; Lc 6.6-11)

¹ Tacahe, te apanavarepa sávarumuhu, tiyanavare ema Jesús, tisiapahi eta te náurujisirareva. Matiaríhíhivare ema émana achane vaipa tayamurichahini eta mavahu, tépenavahuipa.

² Natiaríhíhivare ena fariséoana, ena ticanarajiricanahi ema Jesús. Náimarasacapa éma te macanaracayarepuca ema achane eta te jena sache tacapicahuquenehi. Natanunuiricahi eta tivichayarehi ema Jesús.

³ Tacahe, máichapa ema Jesús ema achane:

—Yare, pitupihayare ani te namirahu ena achaneana —máichapa.

⁴ Tacahe, máichapa ena achaneana:

—Núti nuvaraha epanerechaya. Puiti juca sache sávarumuhuhi, ¿tájahapuca táurica eta víchayare? ¿Tísapacarepuca vicha eta táuriqueneana? ¿Étapuca víchayare eta tauriqueneana? ¿Táuricapuca vípuchavaca ena achaneana? ¿Vicaparecapuca? —máichavacapa.

Énaserá tímatinamurianarinehi.

⁵ Tacahe, ticatisamurevarine ema Jesús eta muracairahi eta nasamureana. Tacahe, tisehamajuhepa eta máesenimuríhairahi éna. Máichapa ema achane macajumaquene:

—Nímaha. Picajaruvauchava, pímechanu eta pivahu —máichapa.

Eta máimeresirahi eta mavahu ema achane, enevanepa tinaravauchavanepa.

⁶ Énaserá ena fariséoana, tisehanarinehi eta náimairahi eta juca máichaquenehi ema Jesús. Tiyananapa tismacacana nayehe ena políticoana, machanerana emá Herodes, taicha navaraha nacapacaya ema Jesús.

Títecapanapa ena camuriqueneana achaneana

⁷ Émasera ema Jesús tiyanapa térajicavapa eta te mávapai apaquehe eta te tachausi eta cáquiere. Mámapa ena máimitureana. Náehicavare ena ichapemuriqueneana achaneana ticavasanahi eta te provincia Galilea.

⁸ Jéhesare, te nasamairiricapa eta máichaqueneanahi ema Jesús, títecanapa ena ichapemuriqueneana achaneana. Tiásihanahi eta te avasare Jerusalén, eta te provincia Judea, eta provincia Idumea, eta provincia Siria, étapa eta avasareana te apachara eta cajacure Jordán.

⁹ Tásiha, ema Jesús mavanecapa ena máimitureana natsesinahini étasina pacure apaesa vahi nacutupiaraca ena ichapemuriqueneana achaneana.

¹⁰ Taicha camuriana ena macanararuanapahi. Namutu ena nacajumaqueneana témeñahavanapahi tiyumususujicavanapahi eta náemeñahairavaya, taicha navarahahi náemamacayare.

¹¹ Jéhesare, ena éreanana tiávahácanahi ena achaneana, te náimahapa ema Jesús, tíquipaicavanapa te mamirahu éma. Tipiirarecanapa:

—jPítira Machicha ema Vía! —náichapa.

¹² Mavanecapasera máecatihavacapa nacuija nacumetaruína taicha vuúchaha mávarahahini náimatihini ena achaneana eta émaquenérahí Machicha ema Vía.

Ena Jesús manerejica ena dócequeneana apóstoleana

(Mt 10.1-4; Lc 6.12-16)

¹³ Tacahe, tiyanapa ema Jesús eta te mávapai apaquehe máripahi. Mámamurihapa ena ánimuriana máimitureana.

¹⁴ Tacahe, ánaqui manerejicavacapa te nataracu ena dócequeneana mayeaneanarehi apóstoleana. Vaipa najunijiacaimahi éma, macachaneyarehi tamutu sácheana. Matuparacavacapa eta nacametarairuirayare.

¹⁵ Májaracavacapa ena dóceana eta naratahairayarehi ticanararecana ena nacajumaqueneana, náimijunairayareva ena éreanana tiávahácanahi ena achaneana.

¹⁶⁻¹⁹ Eta juca náijareana ena manerejiruanahi*: Ema Pedro (ema ticaijarevare Simón), ema Jacobo, ema maparape Juan, ema Andrés, ema Felipe, ema Bartolomé, ema Mateo, ema Tomás, ema apana Jacobo, ema Tadeo, ema apana Simón, émapa ema Júlasí Iscariote (ema tíjararecahi ema Jesús).

Ena escribánoana téjecipavanahi eta náimijachirahi ema Jesús mávaháruhi ema Váinaraji Santanás

(Mt 12.22-32; Lc 11.14-23; 12.10)

²⁰ Tacahe, tichavapa ema Jesús, énapa ena mayeheana apóstoleana te napena. Tiápechavavarehi tiúrjicavana ena achaneana. Tásiha, vaipa náitujicavahini tinicana taicha tétavacavahi eta nasímutuvahi ena achaneana.

²¹ Énaserá ena maparapeneana ema Jesús, te nasamairiricapa, tiyananapa náepanayarehini éma, taicha náimijachaipahi máurishi éma.

²² Énerichuvare natirihípa ena escribánoana, tiásihanahi te Jerusalén. Náepiyaequenehapa ema Jesús, ániapa nacahepa:

—Ema maca Jesús, vémeteaca majupaha ema náquenumuríhi ena éreanana, émaripa ema Satanás. Táitusiava májjaracahi eta máitupajjiasiravahi eta macuchusirahi ena éreanana —nacahepa.

²³ Tacahe, ema Jesús máichuhavacapa ena ticaecahirahianahi. Eta máimitusiravacahi, máimicutichinapa. Ániapa máichavaca:

—Éti, téjecipavahi eta epanereruana ímijachanuhi majupahanuhi ema Satanás. Ímijachapuca ticatianacacacani ena éreanana. Váhisera éneña tácahe.

²⁴ Tacutihi ena machanerana ema gobierno. Éna, vahi típutsimuriavanaimahi apinainhipucaini partido. Te típutsimuriavanapa, énjicacaini tiáquipaicacana.

²⁵ Émaripa mácani achane te camurianahi ena machichanaveana, váiparinehivare típutsimuriavanaimahi, náehajiricacahini, énjicacahini náquipaicacahini.

* **3:16-19** Ena nani apinana ajairana ema Jacobo émapa ema Juan, napapecacahi, machichanaveanahi ema Zebedeo. Émasera ema Viáquenu Jesucristo máimarracahi eta náchanevana, máimativacahi éna. Manacapa eta náchucarapianahi "Boanerges". (Eta táechajiruvahi eta juca, Tijuricati eta náechajisira, téyayarasianavare.) Matirihivare ema apana achane ticaijarehivare Jacobo. Ema maiya ticaijarehi Alfeo. Matirihivare ema apana ticaijarehivare Tadeo. Eta tápipine eta májare Lebeo, étapa Judas. Tacahe, mapana eta májare. (Pitanuca te Lucas 6.16 étapa te Mateo 10.2.) Ema apana Simón, tímaticarehi ema, náumurvainihi ena revolucionárioana ticaijareanahi "cananístana". Navaraha náquijica ena extranjeróana romanoana.

²⁶ Ene macahehi ema Váinaraji Satanás, váiparine máisapahini típutsicacana ena machan-erana, taicha mavarahahi tisimutuanayarehi éna, tímiyanavayarehi eta nacaetemajirisirahiviyarehi.

²⁷ Macutihi ema mácani achane tume. Te macaratacahi eta mataquiriqui eta majanea-sirahi jácani macayehequeneana, nájina tiámeyechaimahi. Tacamunuhi nacaratacanu-mayare, náitacianumayarehi ema túmequenehi achane. Jéhesare, náituruyechasareyarepa eta máimahaqueneana. Ene nucahehi núti, túmepananuhi mayehe ema maca Satanás.

²⁸ Puiti nutupiruva numetacahe: Tiperdonachacareanayare ena achaneana eta napecaturana, tamutu jácani náechajisihaira eta táifemahiqueneana.

²⁹ Jararihiserá eta epecatura vahi tiperdonachacaremahi. Eti ímijachahi ema Satanás ema tiávahácanuhi. Ichape eta éjecapiravahi, taicha ema tiávahácanuhi nuti, émaquenehi ema Espíritu Santo. Éti epanaracaripa éma. Tásiha, máitavacaca eta etapiravanaya — máichavacapa ema Jesús.

³⁰ Tacahehi eta máechajiriruvahi taicha eta nacahechajiriruvairahi: “Ema maca Jesús, majupaha ema Satanás”.

*Suítecapauchapa esu maena ema Jesús énapa ena maparapenaveana
(Mt 12.46-50; Lc 8.19-21)*

³¹⁻³² Tacahe, te apanapa sache, tíurujicavanavarepa ena camuriqueneana achaneana te tajuhe eta peti. Téjacanapa te machacaya ema Jesús. Títecapanecha esu maena énapa ena maparapenaveana. Nanasipasera te aneca taicha tiyututucavanahi ena achaneana. Navarahahi náechajicayarehi éma. Tásiha, nametacapa ena apamuriana ema Jesús, ániapa naicha:

—Esu pémunaruquenehi pena, énapa ena piparapenaveana nararihi ani te aneca. Navarahahi téchajicaviana —náichapa.

³³ Majicapapa éma:

—Yátupi némunacavacahi esu meme, énapa ena nuparapenaveana. Nararihiserá ani te juca nuchacaya ena némunaruhanahivare, nuparapenaveanahi.

³⁴ Tacahe, máesenimuríhapa ena máimitureana ena téjacanahi te machacaya. Tásiha, macahepa:

—Ena nani ena némunaruhanahivare.

³⁵ Taicha namutu nácani ticaemataneacanahi ema Tata, énahi ena némunaruqueneanahi —máichavacapa.

4

*Eta máimicutichinquenehi evaraqui tacaevaquenehi te apanapanenéji máteji te apaquehe
(Mt 13.1-9; Lc 8.4-8)*

¹ Tacahe, te apanapa sache, tiápechavavare túmitureca ema Jesús te tachausi eta cáquiure. Tásiha, camurianapahivare ena achaneana títecapauchanahi éma. Eta navayuchiravaripa ena achaneana, ema Jesús tiavacu hapa tayehe eta pacure, tiápajuecavapa apaesahi. Téjcapa eta máimituresirahi. Ena achaneana nanasipa tayehe eta te tachausi.

² Camuri eta máimicutichaqueneanahi eta máimitusiravacahi. Ániapa macahe:

³ —Esamararacanuchaha. Matiarihíhi ema émana achane. Tévacahi te máesane.

⁴ Eta mapaisirapahi, témiricapaipa eta evaraqui te achene. Táimahapa eta cáyure, tani-capá.

⁵ Eta mayeherepi éma eta máevasira, máevajajapaicapaica eta apaquehe. Tásiha, eta apamuri evaraqui témiricapa te váhíríchu tamitutihini eta máteji taicha máripahi eta apaquehe. Tímarucavanepanéni táicha.

⁶ Téhesera te tjurepa eta sache, tacapajicapa; taicha vaipa táuparevacahíni.

⁷ Tacahe, eta apana evaraqui témiricapaipa te tapare eta itapequiji. Tiúrinahinéni eta táimarusira, étasera eta itape tacachuricapa eta tajurusirahi. Táemuriachapa eta sucureca. Tanasipa, vaipa tacahihini.

⁸ Tacahe, eta apamuri evaraqui témiricapaipa te tiúrina máteji. Tijurucarahlíhi eta táimarusira. Ichapemuríhi eta tahi. Eta étana, tíchípa apaesajíruichucha. Eta apana, tíchípa tatívarerehapanapa. Eta apanavare, tíchíhivare tétupicavapanapa.

⁹ Esamararacanu emutu éti. Te evarahapuca ecaicutiara, tavaraha eta epanerechínavaya —macahepa ema Jesús.

*Ema Jesús máitametacavaca ena máimitureana eta juca máimiturapi
(Mt 13.10-23; Lc 8.9-15)*

¹⁰ Tacahe, te najunijicapa ena apamuriana achaneana, témeñahavanapa eta mayehe ema Jesús ena dócequeneana apóstoleana énapa ena apamuriana máimitureana. Nayase-recapa tájahapuca tacayemahi eta máimicutiarachiravacaichucha eta máimitusiravacahi ena achaneana.

¹¹ Tacahe, majicapapa éma:

—Ema Tata tituparacanuhi nítametacaheyare éti eta juca mapanereruana táequeneruana tayehe eta macuchucuirahayare eti achaneana. Mavarahahi ímatiequenehaya éti.

¹² Énasera ena apamuriana achaneana nímicutiarachinavacaichucha, apaesa vahi májerarémahi eta nacaicutiarairaya eta nasamaquenehi. Tavaraha napanerechinavaya. Eta nacaicutiarairaya, náitsivachahini eta náitaresira, apaesa naperdonachacarepaini — máichavacapa ema Jesús.

¹³ Énerichuvare máichavarepa:

—Éti, ¿vuíchaha íturuequeneha eta juca nímicutichaquenehi? Tavaraha eta epanerechinavaya éti apanava apaesa íturuequeneha eta apamuriana nímicutichaqueneanahi. Tiuri, numetacahe:

¹⁴ Eta evaraquí eta máevaruhi ema achane tacutihi eta nímiturapiana.

¹⁵ Natiarihi ena achaneana nacuti eta apaquehe muracapahi te achene, te táemirisihahi eta evaraquí. Ena nani nasamararacahi eta nímiturapiana. Émasera ema Satanás macamitiscavanepa eta nasamaquenehi.

¹⁶ Natiarihivare ena apamuriana achaneana, nacutihi eta máteji máripahi. Te nasamararaca eta nímiturapiana, natupiruvanehinéni nasuapa, tiúrisamureanainehi.

¹⁷ Váhiserá náratahahini nacaravahuhini yátupinahíni. Vahi nácutihíni eta evaraquí tiúparehi. Ánipirichu eta náehisirahi, taicha vahi nacamichahini jácani nacatájivairanahi. Váhivare túmesamureanainahini te tatiarihipa eta jácani nacatichaira ena achaneana táichavenehi eta náehisirvanuhi.

¹⁸ Natiarihivare ena apamuriana achaneana nacuti eta máteji te távivahi eta itapequíni. Énerichuvare nasamararacahinéni eta nímiturapiana.

¹⁹ Napaneréquenehahinéni, tahapapiricavacahisera eta jácani táicharacavayare eta náitaresira. Tavayucavacavare eta tájiparacana, najamurachahi tamutu. Tahapapiricavare eta navarairahi tirricuchavana. Tamutu eta juca táemetavichahi eta navarairahi téhicanuana. Tamapurujihí eta najacapirahí eta nímiturapiana.

²⁰ Natiarihiserá ena apamuriana achaneana nacuti eta tiúrina máteji. Éna, nasamararacahi náunacahi yátupi eta nímiturapiana. Tájinavare náichiravainahíni eta náehisiranuhi. Ichape eta nacaemataneasirahi ema Viya. Nararihi ena apesarichu eta nacaemataneasirahi. Nararihivare ena apamuriana, nativarerehapanapa eta nacaemataneasirahi. Tásiha, ena apamuriana, ichapemuripanapa eta nacaemataneasirahi ema Viya — máichapa ema Jesús.

*Éma Jesús tímitureca eta apamuriana yátupiqueneana
(Lc 8.16-18)*

²¹ Tímiyanava eta máimituresirahi, ánipa macahe:

—Te viyustaca eta vimícahu, váiparinehi táuricaímahi vijihapaichahini, vinacahivarepucaíni te tápecu eta vétsatsame vímasirarehi. Tacamunuhi vinacayarehi te anuquehe.

²² Jéhesare, tayanapanepuca nacayumuruquí, tamutuyarehisera ticaechera jácani tayumururevanahi. Tájina tépacuchaimahi jácani najajairuvanahi. Tamutuyarehi téchacareya.

²³ Te evarahapuca ecaicutiara, tavaraha eta epanerechinavaya.

²⁴⁻²⁵ Máichavarepa:

—Tacamunuvare epanerecha yátupina eta esamaqueneana. Te apaesarichuhi eta epanerechirahi, apaesarichuvare eta ecaicutiarairaya. Te esuapa yátupina eta nímiturapiana, ema Espíritu Santo tímitucaheya tamutu eta tacayemaquenehi. Jéhevale, tímitucaheyare éma eta apamuriana yátupiqueneanahi. Énasera nácani vahi návarahahini napanerecha, váhivare nasuapa, énajivayare tíchavana ticaverejicasianaya eta nasamaqueneanahi.

Éma Jesús máimicutiarachava eta táimarúsira eta evaraquiana

²⁶ Máichavacavarepa:

—Nuvaraha nímicutichinahe eta nímiturapiana nuti Manerejirunuhi ema Viya. Te yátupihí eta nasuapirahí eta nímiturapiana ena achaneana, náitsivachainapa arairuinapa eta napanereruana étapa eta nayeherepianaya eta náitaresira. Tacutihi eta máevaraquí mácani achane. Tévacahi te máesane. Tásiha, tinaracapa, macuchapayarepa eta tacahirayare eta máevaraquí.

²⁷ Tímarucapa eta evaraquiána. Tijurucavare. Ema achane, tájina macacutiarahini eta táimarusirahi. Váhivare macacutiarahini eta tajurusirahi.

²⁸ Taicha eta apaquehe, éta ticaimarucahi. Tacuchucahi tativa eta tapacaji, táehicapa eta tanaqui. Te ticahipa, tiúchucapa eta tapiraqui.

²⁹ Te tiyahapa eta tahi, ticaechatijipa te tumare, taicha étainapa eta tacavehasiraya — macahepa ema Jesús.

Ema Jesús máimicuticha eta taqui eta mostaza
(Mt 13.31-32; Lc 13.18-19)

³⁰ Ánivare macahe:

—Puiti nuti Manerejirunuhi ema Viya, nímicutichinahe eta ichapemurivaya eti íjaracavanahi éhicanu.

³¹ Ecutiya eta ánichichaquene taqui eta sucureca ticaijare mostaza. Éta juca, ániqutitavacapaná eta taqui te tamutu eta evaraquiána tatiarihiqueneanahi tayehe eta juca apaquehe.

³² Téhesera te ticaevapa, tijurucapa eta tiápajucavahi ichapepana tayehe eta apamuriana sucurecana. Tatiaríhi eta ichapetavavaca. Tásiha, tacapenajicapa eta cáyureana — macahepa ema Jesús.

Camuri eta máimicutichaqueneana
(Mt 13.34-35)

³³ Ani tacahe tamutu eta máimitusiravacahi ena achaneana. Camuriana eta máimicutichaqueneanahi. Tamutuhi ticaicutiaracarevaca nayehe ena tivarahanahi náituruequeneha.

³⁴ Tájina étahena te tímitureca, vahi macunacahini eta máimicutichira. Téhesera te macarichupa ema Jesús énapa ena máimitureana, máimicaecherachapa tamutu eta máimicutichinaqueneanahi.

Ema Jesús macaesamirica eta une eta táepacusirahi étapa eta técatícava
(Mt 8.23-27; Lc 8.22-25)

³⁵⁻³⁶ Tacahe, te jena sache, eta máejasirahi ema Jesús te pacure, tímiturecahi. Te cáperehichichapa, máichapa ema Jesús ena máimitureana:

—Viyanaya viánueca te apachara —máichavacapa.

Tacahe, ticametavanapa nayehe ena achaneana. Tásiha, námapa ema Jesús eta te pacure. Náehicapa ena apamuriana te pacure eta napaisirapahi.

³⁷ Te ítipierecanapa, tachimaracapa eta muraca técatícava. Tépacucapa ichape eta cáquiure. Tisiapapaipahi eta une tayehe eta pacure. Tiánehipaipahi tacaericavaca.

³⁸ Émasera ema Jesús, tímcapaichucha te tahivu eta pacure te machunusi. Tásiha, nacajamicapa éma. Ánipa náicha:

—¡Tata maestro! ¡Picatiuchahavi, véricainapa! ¿Váhípuca péñamava eta viyehé? —náichapa.

³⁹ Tásiha, enurujipa técheputa éma. Titupihapa. Mavanecapa eta técatícava étapa eta une. Ánipa macahe:

—¡Pámatina, pésamiricava! —máichapa.

Tacahe, tíchecapa eta técatícava. Tésamiricavapa eta une. Tésamiricavapa tamutu.

⁴⁰ Tacahe, máichavacapa ena máimitureana:

—¿Tájaha tacayema epica? ¿Váhípuca ecasiñavahini eta nutiarihírapahi eta eyehe? —máichavacapa.

⁴¹ Ema máimitureana, tétavicavainehi eta náramirahi. Tiyaserecanapa, ánipa nacahe:

—¡Tétavicavapa eta máitupajijiasiravahi ema maca vimaestro! ¡Jéhesare, yátupiquene eta émairahi machichahi ema Viya! ¡Taicha tamutu tasuapahi, macamatínacahi eta técatícava étapa eta une eta táepacusirahi! —nacahepa.

5

Ema achane návaháruhi ena ichapemuriqueneana éreanana
(Mt 8.28-34; Lc 8.26-39)

¹ Títecanapá te apachara eta cáquiure eta te apaquehe ticaijare Gadara.

² Ánaqui tatiaríhi eta ecariana. Tacahe, te tiúcupaica ema Jesús eta te pacure, tiúchujicavanepe ema émana achane návaháruhi ena éreanana.

³ Éma másihapahi eta te ecari, taicha macapenajuechavacahi eta covachana. Nájina náratahahini náitiacahini éma. Étaripa eta ichapepi cadena, vahi táratahahini.

⁴ Taicha máejeharipa nacaratáca. Náitjivauchahi te cadena. Nanacavare eta grillo te mapiquí. Émasera mavenarurujica eta cadena, mavenarucavare eta mayehé grillo. Jéhesare, nájina naratahahini namansuchahini ema maca achane.

⁵ Eta máitaresirahi, eta mávirarehi tayehe eta ecari étapa eta mávapahi te anuqueheana mari. Tamutu sácheana, yátiana, tipiararerecahi éma. Tijarachava te márijahiana.

⁶ Tacahe, tiyerehipaichaha máimahapa ema Jesús, tijunapapa mapauchapa. Máepuyumi-rauchapa.

⁷⁻⁸ Ema Jesús, eta máimairahi ema achane, máichapa:

—¡Pijunijica ema maca achane, piti éreana! —máichapa.

Tipiararecapa muraca eta majicapirahi ema achane. Ánipa macahe:

—¿Tájaha picha píteca pipauchanu, piti Jesús, Machichaquenevihi ema Viya? ¡Pájapanunu, vuíchaha picuvanecanu ánaqui te nucaicuñaiyayare! —macahepa.

⁹ Tacahe, ema Jesús mayaserecapa ema éreana. Ánipa maicha:

—¿Tájaha pijare pítí?

Majicapapa éma:

—Núti nucaijare “Nacapenaharu ena ichapemuriqueneana éreana”. Jéhesarehi, ichapemurihavihi víti.

¹⁰ ¡Pájapanuhavisera! Te piáquijicahaviyarepuca, ¡vahi picuevatacavahi viyanaya te tiyerehi! —nacahepa ena éreana tiávahácanahi ema achane.

¹¹ Tiuri puiti, tatiarihihivare eta camuriqueneanahi cúchiana. Tinihicanahi ánaqui te táemiripaisine eta masihi.

¹² Tacahe, ena éreana tiyaseuchavanapa mayehe ema Jesús. Ánipa nacahe:

—¡Picatajicahavi! Pévatacavahi eta te távihahi eta jena cúchiana. Písapahavi visiapahacavaca eta jénana —náichapa.

¹³ Tacahe, ema Jesús macuchuchujicavacapa eta te máquehe ema achane, máisapapa nasiapahacavaca eta cúchiana. Tatiarihi cútimahi apina mil eta cúchiana. Tacahe, te tasamapa eta cúchiana eta nasiapahasiravacahi ena éreana, tijunaparacanapa témiririjicanapa te tachausi eta cáquiure. Téririjicanapa tamutu.

¹⁴ Natiarihihiserá ena tijaneacanainihi eta cúchiana. Te náimahapa, tiáramecanarinehi. Tiyanapapa tijunapanapaipa, timetajiricanapaipa nácani nácapajiruvanapahi, étapa te avasare namutuvare nametaca. Tiáramicaréinehi nayehe ena achaneana. Tiyanapapa náimahapana tájahapuca eta táichavaquenevahi eta cúchiana.

¹⁵ Te títecapanapa, náimahapa ema achane návaháruinihi ena éreana. Téjacaripahi te máivapechacaya ema Jesús. Tájinariipahi máichiravainahini. Ticamuirihaipahivare. Tásihasera, tipicanarinehi ena achaneana.

¹⁶ Tavetijipa te náitametacapa ena tímahanahi eta táichavaquenevahi eta cúchiana te macuchuchujicavacapa ena éreana ema Jesús.

¹⁷ Tacahe, nayaseacapa ema Jesús váhini macuitecapauchavacaini tayehe eta návasahi éna, machavavanehini te másinehi.

¹⁸ Tacahe, te tiávacuhayarepa ema Jesús, ema achane manararuihi tiyaseserecapa eta mavarairapa máehica ema Jesús.

¹⁹ Émasera, vahi máisapahini. Ánipa maicha:

—Piyanchucha pichava nayehe ena pijaneanana te piávasa. Pimetacaya eta macanarasiravihi ema Viya taicha eta majapanuiravihi —máichapa ema Jesús.

²⁰ Tacahe, tiyanapa tichava ema achane. Timetajiricapapasesera mametacavacapaipa eta máichaquenehi ema Jesús mayehe. Náraminehi namutu ena ticavasanahi eta te provincia ticaijare Decápolis.

Ema Jesús macanaraca esu machicha ema Jairo, ésupa esu apana esena sucajumaquenehivare

(Mt 9.18-26; Lc 8.40-56)

²¹ Tiuri, tichavavarepa tiánueca ema Jesús te apachara. Te títecapapa, náurujiacavanepa ena ichapemuriqueneana achaneana te mávinehi te tachausi eta cáquiure.

²² Tacahe, títecapapa ema émana achane achane ticaijare Jairo. Ema maca achane, tétavicavahi eta mapicauchacarevahi. Tuparairucahi tayehe eta náurujisirareva. Te máitecapauchapa, tépuyucapa te mamirahu ema Jesús.

²³ Mayaseacapa, ánipa máichapa:

—Tátachicha, suraríhi esu nuchichasami, ticajumahi. Puiti téñamajiricavaipa ésu. Picatajicanupaini, tata. Pínasinanu eta pivahuana suyehe apaesa sunaraca —máichapa.

²⁴ Tacahe, masuapapa ema Jesús. Tiyanapa máehicahi ema achane. Náehicavarepa ena camuriqueneana achaneana. Náévatajiricanecha éma.

²⁵ Tásiha, te nataracu sutiarihipahivare esu esena sucajumaquenehi. Doce añoripahi eta sucajumairahi táichirahi eta suítine.

²⁶ Ichaperipa eta sucatajivairahi taicha camurianaripa ena típuchanahi médicoana. Títaharipa eta suímahaqueneanainihi. Tájinasera vahi suátivarehini. Suáviraparasiavaichuhi suvayuhapaichucha eta sujuma.

²⁷ Ésu, sutanucapaipahi ema Jesús, susamairiricahi eta tíamicareana máichaqueneanahi. Supauchapa suéhiqecuchapaipahi te maquecu.

²⁸ Taicha tacahehi eta supanereruhi: “Taratachuchaini némamajiacahini eta ñimuiriha, németeaca nunaracapurucaini”, sucahesamurepa.

²⁹ Tacahe, suémamajiacapa eta tacheyarapi eta mamuiriha. Jéhesaréinehi, enurujipa tíchea eta suitine. Tisamavapa ésu eta sunarasiraipahi tayehe eta sujumainihi.

³⁰ Émasera ema Jesús macaicutiaravanepa eta sutiarahirahi esu tacanararuchi eta máitupajijiasiravahi. Enurujipa téviurucavahi te namuri ena ichapemuriqueneana achaneana. Ánipa macahe:

—¿Nájaha témamajiacanuanahi?

³¹ Tacahe, ena máimitureana náichapa:

—Tata, téñatuhejiricacanahi namutu eta achaneana taicha ichape eta nasimutuvahi. Piyaserecavirichahava nájahapuca ena témamajiacavianahi —náichapa.

³² Émasera ema Jesús máesenimurihapa, matanucapa nájahapuca ena témamajiacanahi.

³³ Tásiha, supauchapa esu esena. Tiyayacarepaipa taicha típicaripahi. Taichasuéchahi eta suíchaquenehi ésu. Suépuyumirauchavanepa te mamirahu. Sumetacapa tamutu.

³⁴ Tásiha, máichapa ema Jesús:

—Tiuri, nuchicha. Pinaracapa puiti táichavenehi eta picasiñairanuhi. Vaipa picueñamava eta pichaviraya te pipena. Vaipa tichavaimahi eta pijumainihi —máichapa.

³⁵ Téchajiricavaichahahi ema Jesús eta suyehe esu esena, títecapananecha ena tíasihanahi te mapena ema Jairo. Nametacavanepa:

—Esu pichicha tépenasamipahi. Vaipa picucamesa ema Maestro —náichapa.

³⁶ Émasera ema Jesús vahi masuapahini eta nametasirahi. Mavarahaichucha tiyana. Tacahe, máichapa:

—Vahi picueñamava, piti Jairo. Pácasíñavachucha eta nuyehe —máichapa.

³⁷ Tacahe, ema Jesús vaipa máisapahini náehica ena apamuriana achaneana. Nacarinepa ema Pedro, ema Jacobo, émapa ema Juan.

³⁸ Te títecapanapa te mapena ema Jairo, máimahapa ema Jesús ena achaneana vaipa náitucarahahíni, tijamurianaripahi eta náiyairahi. Tipiararecanaripahi muraca.

³⁹ Émasera ema Jesús eta masiapirahi, máichavacapa:

—¿Tájaha tacayema eta iúrujiricavahi eta ani, íyharacavapa? Vahi ecuiyaha. Esu suca amaperu, váhinéni suépenahini. Tímacarichucha ésu —máichavacapa.

⁴⁰ Énasera ena achaneana nacaecahirichucha éma, técavanapa. Tacahe, ema Jesús macuchucavacapa te aneca namutu. Tacahe, tisiapapa te suávihahi esu amaperu, émapa ema suiya, ésupa esu suena, énapa ena mapanana máimitureana.

⁴¹ Tacahe, macaratavauchapa ésu. Máichapa:

—Nuchicha, néchajicavi. Péjamica, péchepuca —máichapa.

⁴²⁻⁴³ Enurujipa esu amaperu téjamicapa, téchepuca. Tipaicapa te namirahu. Ichaperinehi eta náramirahi ena tímahanahi. Tásiha, ema Jesús mavanecavacapa nájaraca eta sunica esu amaperu. Matuparacavarepa muraca eta vahi nacuechajisiha eta náimahaquenehi. Esu amaperu, dóceripahi eta suhañora.

Tacahe, tiyanapa ema Jesús. Tichavapa te mapena.

6

Tichavapa ema Jesús te mávasa Nazaret

(Mt 13.53-58; Lc 4.16-30)

¹ Tacahe, te apanapa sache, tiyanavarepa tipaica. Tichavapa tayehe eta mávasa Nazaret, mámamurihapaipa ena máimitureana.

²⁻³ Tacahe, te jena sache sávarumuhuquene, tiyanapa tayehe eta náurujisirareva nayujararirare ena achaneana. Tímiturecapa. Camuriana ena tisamararacanahi. Ichape eta tahapasamurechiravacahi ena achaneana. Váhisera návarahahini nasuapahini. Náepururichucha éma. Ánipa nacahe:

—¿Távihapuca mavínehi eta júcana máimiturapianahicacha ema máca? ¡Témunahiricavapa títapajijiacavaipahíjicacha! ¿Távihásica macaravahuínehi eta máichirayare eta tíamicareana? Vivaraha vímaha víti apanava eta máichaqueneanahíji visamaiririruanahi. Taicha vímatíhi ema maca. Carpintérochucha éma. Vímatíhivare esu maena María.

Vímatihivare ema maparape Jacobo*, émapa ema José, émapa ema Judas, émapa ema Simón. Vímatihivare ena esenana maparapenaveanahi, ticavasanahi ani —náichacacapa.

⁴ Ema Jesús máimatihí eta napanereruanahi. Tásiha, máichavacapa:

—Tatuparaca epicauchahaviya vimutu viti mavaneruana ema Viya. Étiserá eti nujaneananahi ecavasanahi eta te juca víávása, étipa eti nuparapenaveana, vahí epicauchanuhini —máichavacapa.

⁵⁻⁶ Éma, ichape eta máramirahi eta namasuapajiravahi éna. Eta tacahe, tájina máimerecachaini eta tiárami careana. Tacarichu eta macanarasirahi ena nacajumaqueneana eta máemamamahásiravacahi te mavahuana. Vahí camurianainahíni ena macanararuanahi.

Ema Jesús mavanecavacapa ena dócequeneana apóstoleana napaicayare tamutu avasareana, ticametarairuanayare

(Mt 10.5-15; Lc 9.1-6)

Tacahe, ema Jesús tiyanapa mapaicahi eta avasareana máimitucavacapaipa ena achaneana.

⁷ Étana sache, macurujimurihapa ena dócequeneana mayeheana apóstoleana. Tacahe, májaracavacapa eta náitupajijasiravayare naratahairayare náquijica ena éreanana. Tacahe, mavanecapa tiyanana eta te apanapaneeana avasareana, apinanayarepahi eta napaisirayarepahi.

⁸ Matuparacapa, ániapa máichavaca:

—Tájina iámaimahi eta eyereruvana eta epaisiraya. Váhivare ecuama eta enirurucuha te alforja, étapa eta plata.

⁹ Étanarichuvare iámayare eta emuiríha. Tacarichu iámaya eta eyupairíqui. Ecaeparupevayaresera.

¹⁰ Te ítecapapa tayehe eta jácáni peti ítecapihaya te jácáni avasare, ánasi tayehe. Te iúchucayarepa eta te jena avasare, epaenumava ejunijica eta ítecapuhahi.

¹¹ Te váhipuca nacujacapahe te jácáni avasare, váhivare nacuvarahi nacusamahe, iúchucavaneyare. Étatapevachavanumayaresera eta máteji te ívapeana. Táicutiarayare eta máicuñásiravacayare ema Viya taicha eta namavarairahi najacapahehíni. Nutupiruva numetacáhe, te táitecapa eta juicio, tíapajucavainapa eta náicuñayare. Tacachuricayare eta nacaicuñairayare ena achaneana váinarajiqueneana ticavasanáini te Sodoma étapa eta Gomorra —máichavacapa ema Jesús.

¹² Tacahe, tiyananapa ena dóceana. Ticametarairuana eta tacamunuirayarehi eta náeneuchiravaya ena achaneana, nánajica eta napecaturana.

¹³ Námijunavacapaipa ena éreanana tiávahácanahi ena achaneana. Camurianahivare ena nacanaruarana tayehe eta najumanáini, nacapajisirapahi te nachuti eta aceite.

Ema Herodes masamairiricapa eta máichaqueneanahi ema Jesús

(Mt 14.1-2; Lc 9.7-9)

¹⁴ Tacahe, ema Herodes ema aquenucáhi tayehe eta Galilea masamairircavarepa eta máichaqueneanahi ema Jesús, taicha náechajisihahi namutu ena achaneana. Nararíhi ena téjecapavanahi eta napanereruana, ániapa nacahe:

—Ema maca Jesús, ¿váhipuca émaina ema Juan Tícachasirícarahíni macaparuhí ema Herodes? Tichavahichupuca títareca. Étapuca tacahehi puiti maratahahi maicha eta tiáramicareana —nacahepa.

¹⁵ Nararíhisera ena apamuriana nacahepa:

—Émapuca ema víyaraháini profeta Elías, téchepucháhi.

Ena apamuriana nacahepa:

—Émarichuhi profeta, macutiquenehi ena náinapureanáini antivuanáini. Váhisera téchepucaimahi éma —nacahepa.

¹⁶ Émasera ema Herodes, eta masamairirisirahi, macahepa:

—Németeacáhi ema maca émarípa ema Juan, ema nímiyuchatipiquenurehi, téchepucahipuca te máecari —macahepa.

Eta táichararacavahi eta máepenirahi ema Juan

(Mt 14.3-12)

¹⁷⁻¹⁸ Eta macapasirahi ema Herodes ema Juan, ani tacahe eta táichararacavahi: Te jena año, ema Herodes mavehahi esu Herodías, esu machinenahi, mayenahi ema maparape

* 6:2-3 Ema maca achane, ticajarehi Jacobo te náechajiriruva ena israelítana. Te véchajiriruva, ticajarehi Santiago. Mapaenumavahí máehica ema Jesús te táequeneapa eta máechepusirahi te máecari ema Víaquenu.

Felipe. Máiminajicapa ema suima. Tacahe, ema Juan macajachavacapa éna eta naviracacairahi. Étapa tūmicaticahahi ema Juan, sucatichapa esu Herodías. Tásiha, ema Herodes máeratacapa te cárcel ema Juan, macavanairipipa náitiaca te carenapi.

¹⁹ Esu Herodías, tétavicava eta sucatichirahi ema Juan. Suvarahahi sucapaca éma.

²⁰ Váhiserá suratahahini, taicha matsirihacahi mapicauchahi ema Herodes ema Juan, taicha máechahi tétavicava eta máurivahi ema Juan. Máimatihivare eta mavaneruhi ema Viya. Eta tacahehi, macatiuchahi éma apaesa tacuija suícharaca ésu. Táitusiava, ema Herodes máuricapa masamararacahi eta máimiturapiana ema Juan; váhiserá máituruequenehahini tájahapuca máichararacavayarehi.

²¹ Tacahe, eta te jena yati ticajaremuhupa ema Herodes, sucamapurapa esu Herodías eta máepiyasirahi eta ichape piesta ema Herodes. Máichuhapa éna máevanachana énapa éna oficiáleana, énapa éna ticaimahaqueneana ticavasanahi tayehe eta Galilea.

²² Te tīnicanapa téranapa, esu suchicha esu Herodías tisiapapa eta te návihahi éna achaneana. Esenachicharipa ésu. Tírimaicapa te namirahu. Ema Herodes máuricainehi ichape, énapa éna machimarana.

²³ Tacahe, ema Herodes máichapa ésu:

—Nujuracha te pimirahu. Piyaseacanu tájahapuca eta pivarahaquenéna. Núti níjaracaviyare jácani piyasearunuyare, tayanapané vácuticaca eta nímaahaqueneana —máichapa ésu.

²⁴ Tacahe, tiyanapa tiúchucapa esu amaperu. Suyaserepanapa esu suena, ánipa suícha:

—¿Tájahapuca eta nuyaseacaini eñi ñina Herodes? —sucahepa.

Tásiha, suíchapa esu suena:

—Piyaseacaya eta ñichuti eñi Juan, puítinarichu ñíjaracavi —suíchapa.

²⁵ Enurujipa tichava tisiapa esu amaperu eta te mávihahi ema aquenuca Herodes. Suyaseacapa éma, ánipa suícha:

—Nuvaraha píjaracanu puítinarichu eta ñichuti eñi Juan eñi tícachasiricarahi. Píjaracanu te curuja —suíchapa.

²⁶ Tásiha, eta masamirahi eta juca suyasearuihí ema rey Herodes, ichaperinehi eta mapanereresirahi. Váhiserá mávarahahini mavayuacahini ésu táicha nasamaripahi éna machimarana eta máijarasirayarehi eta suyasearuyarehi ésu.

²⁷⁻²⁸ Tacahe, enurujipa mavaneca ema suntaru eta te cárcel. Mayuchatipiquenuhapana ema Juan. Tacahe, mámapaipahi eta machutini te curuja. Máijaracapa esu esena amaperu. Tásiha, suíjarapanapa esu suena.

²⁹ Te nasamairiricapa éna máimitureana ema Juan, tiyanapa náepanapa eta máquehéni, náecarapanapa.

Ema Jesús máitaparavacahi máenicavaca éna camuriqueneana achaneana (Mt 14.13-21; Lc 9.10-17; Jn 6.1-14)

³⁰ Tacahe, tichavanapa tiúrujicavana éna apóstoleana mayehe ema Jesús. Nametacapa tamutu eta náichaqueneanapahi étapa eta najacampirahi éna achaneana eta náimiturapianahi.

³¹ Tacahe, máichavacapa ema Jesús:

—Tiuri. Tájina táichava. Puiti viyana vácarichu eta te mávapahi apaesa vinaraca ánipina —máichavacapa.

Taicha vahi téjicavana éna achaneana. Tévacajiricacanahi tiyanana. Vahi náitujicavahini nanicanumahini éna apóstoleana émapa ema Jesús.

³² Tacahe, tiyananapa te pacure, tiávacuhanapa. Nacaijuhepa te mávapahi apaquehe.

³³ Énaserá éna achaneana nanecapaichucha eta nayanirahi. Camurianahi éna tímatianahi. Tacahe, tiyananapa tijunapanapaipa, nametapanayarehi éna apamuriana achaneana. Tásiha, tiúrujicavanapa éna tísihana te tamutu avasareana.

³⁴ Te tiúcupaicapa éma Jesús, máimahapa éna camuriqueneana achaneana natiarիրipahi. Tétavicavainehi eta majapanuiravacahi, taicha nacutihi eta uvesana nájina tijaneacaina. Tacahe, máimitumuriharipa. Camuri eta máimiturapiana. Tiuna eta máimitusiravacahi.

³⁵ Te cáperehipa, éna máimitureana napauchapa éma. Náichapa:

—Cáperehipa juca sache. Tiyerehivacahi eta pétiana.

³⁶ Tacahe, táuricapa pimetacavaca éna achaneana nayanapa, navachareca eta nana te jácani isanítiana, avasarechichanapuca te vichacayarahanahi. Taicha ani, tájina naviyaimahi eta nanicahini —náichapa.

³⁷ Majicapapasera éma:

—Íjaraca étina eta nanica.

Éna náichavare:

—¿Pivarahapuca viyana vivachareca eta pan? Tacamunuhi vácayehehini eta camuri plata apaesa námutupaini vítaparahahini vénicahini apaesainahini návaminahini. ¡Vahi taratahahini eta dies mil páneana! —nacahepa.

³⁸ Tacahe, mayaserecapa ema Jesús:

—¿Áyana eta pan ecayehe puiti? Eyana ímaha.

Te náechapa, nametacapa:

—Cíncochichaichu eta pan, apiquipa eta jima jitaruca —nacahepa.

³⁹ Tacahe, macavanairipipa náejahahacapaicahini namutu te muñjipahi, náijamuri-paichuhi.

⁴⁰ Tacahe, téjahapaicanapa ena achaneana. Náijamuripaichuhi eta náejasirahi. Cincuenta-napahi, ciéntoanapahi.

⁴¹ Tacahe, ema Jesús mavehapa eta cíncoquene pan étapa eta apiqui jima. Máesenicapa eta te anuma. Mahasulupayachapa ema Viya. Mayuvetutujicapa eta pan, tásiha máijaracapa ena apóstoleana. Éna, náijaracapa ena achaneana. Énerichuvare mayuvetutuhesinavare eta apiqui jima. Tisimurivacapaipa eta náijaraca.

⁴² Tacahe, námutu tinícana, tísatueanapa.

⁴³ Tásiha, nacaemacharichahavare eta doce saye ichapehiana táinicachavacaichahava eta náemacharajiana eta pan étapa eta jima.

⁴⁴ Camuriana ena máeniruanahi. Te nataracu, natiarihíhi ena cinco milqueneana ajairana.

Ena Jesús mapaicaeca eta une

(Mt 14.22-27; Jn 6.16-21)

⁴⁵ Te tamutupa, enevanepa mavanecahi ema Jesús tiávacuhana eta te pacure ena máimitureana. Tínapucanayarehi tiánuecana te apachara eta te avasare Betsaida. Émasera ema Jesús manasiyarehi máevatamurihanumayarehi ena achaneana.

Tásiha, tiyananapa ena máimitureana.

⁴⁶ Tacahe, te tamutupa eta macametavairahi ema Jesús nayehe ena achaneana, tiyanapa tiápanahi tayehe eta anuquehe mari. Tiyujaracayarehi tayehe.

⁴⁷ Tacahe, te tiúyatipa jena yati, ema Jesús manasirichaha macarichuhi eta te anuquehe mari. Ena máimitureana itupierecanaipa tayehe eta cáquiure.

⁴⁸ Tásiha, tachimaracavacapa eta muraca técatícava, nácapaquihaipahi. Te tijararahipa, ema Jesús máimahapa eta nanausirapahi muraca. Tacahe, tiyanapa macapayamuriha. Mapaicaecapaipa eta une. Máetavicavacapaipasera.

⁴⁹ Éna máimitureana tipicanarinehi eta náimairahi eta mapaicaesirapahi eta une, náimijachaiipahi cunare.

⁵⁰ Típiararecanapa namutu eta náimairahi. Máechajicavanepasera éma. Ánipa maicha:

—Vahi ecupica. Nútichucha. Étumechava —máichavacapa.

⁵¹ Tacahe, mapauchapa éna. Tiávacuhapa nayehe. Tacahe, tíjahúchavapa tíchecapa eta técatícava. Náramirinehi íchape ena máimitureana.

⁵² Taicha vuíchaha nacaicutiarahini eta tacayemaquenehi eta macaejapisirahi eta pan, eta táimereuchirahi éma eta vanairucairahi me Viya. Muracasamuremurianarichaha.

Ena Jesús macanaraca ena nacajumaqueneana ticavasana te Genesaret

(Mt 14.34-36)

⁵³ Tacahe, te apanapa sache, tiápechavanavarepa tiánuecana eta cáquiure. Títecananapa eta te avasare ticaijare Genesaret.

⁵⁴ Te tiúcupacanapa, náitiacapa eta napacure. Ena natiarihiqueneanahi náimativanepa ema Jesús.

⁵⁵ Tásiha, tiyananapa tijnapana timetajiricanayarehi tayehe tamutu eta avasarechichana tachacayarahanahi. Tacahe, tiúrujicavanapahi ena achaneana te jácani máitecapihapahi ema Jesús. Nánavacapaipahi eta te áchuji ena nacajumaqueneana.

⁵⁶ Énerichuvare, te jácani mayanipahi te acheneana téhepuca cálleana, nanaquípacapahi ena nacajumaqueneana. Tacahe, nayaseacapahi éma máisapirainahíni náemamajiaca eta tacheyarapi eta mamuiraha. Tacahe, nácani témamajiacanapahi, enevanepaipa tinaracanapahi.

7

Ena Jesús mametaca ena achaneana eta timaeperajicarahi

(Mt 15.1-20)

¹ Tiuri, te apanapa sache, náitecapauchapa ena apamuriana fariséoana énapa ena escribá-noana, tiásihanahi tayehe eta Jerusalén. Témeñahavanapa eta mayehe ema Jesús.

² Te nataracu ena máimitureana ema Jesús, nararihi éna vahi nacasipavahunumahini eta nanisirahi. Tacahe, ena fariséana, eta náimairahi eta namaitauchirahi eta nayeherepihi, ichaperinehi eta nasemanevahi, taicha náimijarechahi “máeperaji” eta juca.

³ Taicha namutu ena israelitana, napicauchahi eta nayeherepiana ena náchucanaveanaini, navetijipa ena fariséana. Te vahi ticasipavahunumanahi, váhivare náisapaimahi tinicana. Taicha éna vahi návaraha tánashíni eta tachipejihini ánichichainahini, taicha tipicanahi tamaeperajicahini eta náchanevana.

⁴ Étaripa násihahapipuca te mercado, te plázapuca, te títetapanapa te napena, ticasipavahuanayarehi. Maverá eta apamuri nayeherepianahi tipicauchacareanahi nayehé, étaripa eta nasipasaraparaca eta náeresiana, éta pa eta jarra, éta pa eta návacuruhiana éta pa eta catre náimasirare.

⁵ Tacahe, nacajachapa ema Jesús ena fariséana éna pa ena escribánoana. Ánipa náicha:

—Pímaha. Ena pímitureana vahi náitachahini eta viyeherepi. Namaeperajicapa eta náchanevana eta nanisirahi taicha vahi nacasipavahunumahini. ¿Tájaha tacayema vahi napicauchahini eta viyeherepi nanaquiruhi ena viáchucanaveanaini? ¿Étasera puca tachehi eta pímitusiravacahi? —náichapa.

⁶ Tacahe, majicapapa ema Jesús, ánipa maicha:

—¡Éti ecaijarehi apimirahe! Tatupiruvahi eta máechajiruvahi ema Viya, téchajisiahehi éti eta te Sagrada Escritura. Ánipa macahe: “Ena nani achaneana, tétserajicanuanahi te najaca; váhisera táetupicavahini te nasamureana.

⁷ Téneuchavanahi eta nuyehé, tamapurujihisera eta náneuchiravahi. Nacaerajicahivare eta nuvanairipiana; tasapihapa náimicapicauchahi eta nayeherepiana táuchurechucha te napanereruana ena náchucanaveánaini” macahepa ema Viya.

⁸⁻⁹ Ichape eta éjecipiravahi éti, taicha tasapihapa epicauchahi eta eyeherepiana. Étasera eta mavanairipi ema Viya, vaipa epicauchahini. Tasapihapa épuruhi eta mavanairipiana taicha tivayuaçahehi ichape eta ítauchirahi eta eyeherepiana.

¹⁰ Émarichuhi ema viyarahaini Moisés tiájuchahi eta mavanairipi ema Viya eta viyehé: “Pípicauchaya pémunacayareva ema piya ésupa esu pena”. Jucarihi eta apana vanairipi: “Mácani tiúnehahi ema maiya ésupa esu maena, vahi tijapanucarémahi nacapacayarehi”.

¹¹⁻¹² Étiserá vahi epicaucha eta júcana vanairipiana mayehé ema Viya. Taicha te mararihipuca mácani achane ticamavahupuca me Viya eta máimahaqueneanahi, eta ímiturapi éti “Vaipa tatuparacaimahi ema achane eta máimicatasiraya ema maiya ésupa esu maena”.

¹³ Ani tacahehi eta ecaepahaira eta tasuapacarevahi eta mavanairipiana ema Viya. Tasapihapa, ímicapícauchahi eta eyeherepianachucha. Jararihivare eta apamuriana eta éjecipiravanahi tavasiqueneanahi —máichavacapa ema Jesús.

¹⁴ Tacahe, máichuhapa ena achaneana, náurujicava eta máimitusiravacayare. Tásiha, máichavacapa:

—Nuvaraha esamanu yátupina, apaesa ácaicutiara.

¹⁵⁻¹⁶ Tájina timaeperajicaina eta viáchanevana te vahi vicasipavahunumahi te vinicayare. Vahi étaparacaina eta vinicaqueneana. Étasera eta jácani evainarajivana táuchureanapuca te ejaca, éta pa eta evainarajipanereruana; jéhevare éta timaeperajicahéhi —máichavacapa.

¹⁷ Tacahe, te tiyanaracanapa ena achaneana, macarinépa ema Jesús éna pa ena máimitureana, nayaserepaca máitametacavacahini eta máimiturapi.

¹⁸ Tacahe, máichavacapa:

—¿Énerichuvare éti mapanererurehe? ¿Váhipuca ácaicutiarahini eta juca? Tamutu eta juca tasiapaqueneanahi te vijaca vinicasareanahi, vahi timaeperajicahavimahi, taicha vahi tasiapa te visamure.

¹⁹ Tatupiruhi te vijuhe. Tásiha, te tiúchucapa eta, apanapa eta táuchusihahi —máichavacapa ema Jesús. (Eta máichiravacahi eta juca, máimicaecherachapa eta táurivahi tamutu eta tinicacareana.)

²⁰ Macahevarepa:

—Étasera jácani panererucana tamauriqueneana, te náisapavapuca ena achaneana, éta ra timaeperajicavacahi éna.

²¹⁻²² Taicha te amahe eta nasamureana napanerechahi eta tamauriqueneanahi. Ema achane mapanerechahi maveha esu apana esena mayena ema apana achane. Esu esena supanerechahivare suveha ema apana achane suima esu apana esena. Éna amaperuana napanerechahi eta natuhusivaya. Nácani tipanerechanahi eta ticaparecana, tiámerecana, tivayurecana, téchajihihana. Te nasamureana, najamuracha eta apayehéana, ticapinarurahiana, tétserajicavana eta nasiñavairahi. Mapicaurairahana, camuriqueneana eta napanereruana máecharaireana.

²³ Tamutu eta juca panererucana tamauriqueneana tiásihahi te nasamureana. Jéhesare, eta júcana eta timaeperajicahi eta náchanevana ena achaneana —máichavacapa ema Jesús.

*Esu ésuna esena apavasana sucasiña ema Jesús
(Mt 15.21-28)*

²⁴ Tacahe, tiyanavarepa tipaica ema Jesús, énapa ena máimitureana. Nacaijuheyarehi eta avasareana táunavanahi eta provincia Siria. Tásiha, títecapanapa te jácani peti. Váhiserá mávarahahini náechahini ena apamuriana achaneana eta matiarahirahi. Tásihasera náecharichucha éna.

²⁵ Tacahe, susamairicapa esu ésuna esena. Ésu, apavasanahi, sirofeníciana. Eta suéchejiriruva eta griego. Esu suchicha mávaháruhi ema émana éreana.

²⁶ Títecavanepa esu, suépuyumirauchapa te mamirahu ema Jesús. Tiyaseuchavapa mayehe ema Jesús eta máimijunijicahini ema éreana suyehe esu suchicha.

²⁷ Tacahe, máichapa esu:

—Nativaya néchapajiricavaca ena nujaneanana. Taicha vahi táuricahini ásapihahíni néchapajiricahéhi éti apavasanana, émétavichahini ena nujaneanana —máichapa.

²⁸ Esu esena sujicapapa:

—Énehineni tacahehi, tátachicha. Yátupihí vahi pijaneananuinahini. Pájapanunusera, picatajicanuchuchaini. Vítí apanava vácasifavahini eta piyehe eta vítátijvairaina —suíchapa.

²⁹ Tacahe, máichapa esu:

—Tiuri eta péchajiriruva. Piyanapa pichava te pipena. Táichavene eta picasiñairanuhi, nímijunijicaripa ema éreana suyehe esu pichicha —máichapa.

³⁰ Tacahe, tíchavapa esu te supena. Suchimapapa tívecahi esu suchicha te sucamane. Jéhesaréinehi, májinaripa ema éreana, majunijicaripa esu.

Emá Jesús macanaraca ema túhuquiña upa

³¹ Tacahe, tiyanavarepa tipaicana najunijicapa eta provincia Siria. Nánucuhapa eta provincia ticaijare Decápolis. Tacahe, títecapanapa eta te tachausi eta cáquiure Galílea, te tinapaica te táuchusine sache.

³² Tacahe, ena achaneana námapa ema émana achane mayehe ema Jesús. Túhuquiña, úpavare ema achane. Náechajiuchapa eta manaca eta mavahu mayehe ema achane, macanarasirayarehi.

³³ Tacahe, ema Jesús mañajichapa ema achane nayehe ena achaneana. Manacapa eta masuveraqui te maquiñana. Tacahe, tiátutuquívachavapa. Tásiha, máemamacapa eta manene ema achane.

³⁴ Tacahe, máesenicapa te anuma. Tiúmitipa. Tacahe, máichapa:

—¡Téchujihapa eta píquiñana!

³⁵ Enurujipa tisamarahipa ema achane. Tijimuyapa eta manene, tiúripa téchejica.

³⁶ Tacahe, máimichavapa ema achane nayehe ena majaneanana. Matuparacapa éna eta nacuija nametaca. Énasera tímatajiricanaichucha.

³⁷ Tétavacava eta nármirahi ena nametaruana. Ánipa nacahe:

—Tétavacava táuricacareva tamutu eta máichaqueneanahi ema Jesús. Téchajicanapahi ena úpana, tisamarahanavarepa máicha ena túhuquiñana —nacahepa.

8

*Emá Jesús tíapechava máenica ena achaneana
(Mt 15.32-39)*

¹ Tacahe, eta juca sácheanahi tiúrujicavanapa ena ichapemuriqueneana achaneana te mávihahi ema Jesús. Mapanaripa sache nacahehi ena achaneana, tájinaipa nanicahini. Tacahe, máichuhavacapa ema Jesús ena máimitureana. Máichapa:

² —Nujapanuvaca ena nani achaneana, taicha mapanaripahi sache puiti eta nacahehi eta víyehe. Tájinaipavare naviyahini nanica. Téchurihanaripa eta nanicaquene.

³ Te névatacavaca nayana te napenana, machu náquipaicava te achene taicha vaipa túmevacaimahi eta náecuavahi. Taicha natarihi ena tiásihanahi te tyerehiana. Vénicavacayare —máichapa.

⁴ Tacahe, najicapapa ena máimitureanahi. Ánipa naicha:

—¿Távihapucaini viviyahini eta vénisihayarehi ena nani camuriqueneana achaneana? Eta te juca mávapahi vámahí, tájina vítusiáváimahi eta tinicacareana —nacahepa.

⁵ Tacahe, mayaserecapa éna. Ánipa máicha:

—¿Áyanachaha eta pan eta iámaqueneanapahi?

—Jucarihi siéterine —náichapa.

⁶ Tacahe, macavanairipipa eta náejahapaimuriahini namutu ena achaneana. Tacahe, mavehapa eta siétequene pan, mahasulupayachapa ema Viya te anuma. Tásiha, mayuvetucavacapa, májaracapa ena máimitureana. Éna, nájaracavacapa ena achaneana.

⁷ Tatiarihivare eta ánimurichicha eta jímachichana. Mahasulupayachavare ema Viya tayehe eta jima. Tacahe, mavanecavarepa eta nájarasiravacayare ena achaneana.

⁸ Tacahe, tinicanapa namutu, tísatuheanapa. Tacahe, nacurujicapa eta náemacharájiana. Siete sáyerichahivare eta náemachana.

⁹ Eta nasimutuvahi ena tinicanahi táetavica eta cuatro mil achaneana. Tacahe, te tamutupa eta juca, máevatamuríhasarepa ema Jesús ena achaneana nayanaya nachava te napanana.

¹⁰ Enurujipa tiávacuhanapa te pacure ema Jesús énapa ena máimitureana. Tiyananavarepa. Tiánuecana nacaijuhepa eta te avasare ticaijare Dalmanuta.

*Éma Jesús macajachavaca eta namasuapajiraivahi ena fariséoana
(Mt 16.1-4; Lc 12.54-56)*

¹¹ Tacahe, títecapanapa ena apamuriana fariséoana. Tépanavanapa nacanarajirica ema Jesús. Eta navarairahi náimiaquipaicarehi, nayasecapa máimerecchini eta tiáramicareana, máimerecavahini te yátupihipuca vanairucahi me Viya.

¹² Tásiha éma, tichuruamichavarine muraca. Tacahe, máichavacapa:

—¿Tájaha tacayema eti achaneana eyasecanu nímereca eta tiáramicareana? Núti nímatihe. Vahi esupanuimahi te nímerecapucaini eta tiáramicare. Tásiha, váiparine étina tatuparaca ímahahini eta tiáramicareana —máichavacapa.

¹³ Tacahe, majunijicavacapa éna. Tiyanavarepa tiávacuha te pacure. Tiyananapa tiánuecana te apachara eta cáquiere.

*Éma Jesús máimicuticha eta levadura eta apimirairanahi ena fariséoana
(Mt 16.5-12)*

¹⁴ Tiuri puiti, náemitisichi ena máimitureana eta nanirurucuha. Tatiarihiseri ena étanahi pan eta te pacure.

¹⁵ Eta nayanirahi, máimitumurihapa ema Jesús éna. Máichavacapa:

—Tímaticarehi eyehe eta levadura eta tasisijisira tamutu eta masa. Tacutirichu eta tapareasirahi eta apimirairavacahi ena fariséoana étapa eta tacañamarasira eta ecaimahaquenerayare. Vahi ecucuti ena políticoana. Échapaváicha tayehe, machu éhica éna —máichavacapa.

¹⁶ Tacahe, náichacacapa ena máimitureana. Ánipa nacahe:

—Tímicajachavahi eta vémitisisirahi eta pan. Eta tacahe, macahehi tayehe eta levadura.

¹⁷ Éma máimatiacavacapa. Tásiha, máichavacapa:

—¿Tájaha tacayema ecahechajiriruvahi eta émitisisirahi eta pan? ¿Vuíchahacaru ácaicutairahini? ¿Tájinacaruichaha epanereruina éti? ¿Muracacuthierichaha?

¹⁸ Tamapurujichuchapuca eta ímairahi eta níchaqueneana. ¿Vuíchahacaru ácaicutiarahini? Tamapurujipuca eta esamirahi eta nímiturapiana.

¹⁹ ¿Váhivare échahini eta nucaejasirahi eta cincoquene pan, naniruhi ena cinco mílqueneana achaneana? ¿Áyanahi sáyeana eta náemacharájiana evehaqueneanahi? —máichavacapa.

Tacahe, najicapapa:

—Doce sáyeana.

²⁰ —Étapa eta siétequene pan naniruhi ena cuatro mílqueneana achaneana, ¿áyanahivare sáye eta náemacharájiana evehaqueneanahi? —máichavacapa.

Najicapavare:

—Siete sáye —náichapa.

²¹ Tacahe, máichavacapa:

—¿Vuíchahacaruva ácaicutiara? —náichapa.

Éma Jesús macanaraca ema émana achane púchuqui eta te avasare Betsaida

²² Tiuri, títecapanapa eta te avasare Betsaida. Ánaqui, námapa ema achane púchuqui. Náechajuichapa éma eta macanarasiraya ema Jesús.

²³ Tacahe, ema Jesús macaratavauchapa ema púchuqui, mámapa te tachachacu eta avasare. Tacahe, mayajihauquichapa eta máture eta te máuquihana. Tásiha, manacapa eta mavahuana eta te machuti. Tásiha, mayaserecapa:

—¿Pímairicapa? —náichapa.

²⁴ Tacahe, téseninicapa ema púchuqui. Macahepa:

—Nímairiricapa apaesa. Eta nímairahi ena achaneana, ticutumahichuchasera yucuquiána, tiyamuricanahisera —máichapa ema púchuqui.

²⁵ Tacahe, ema Jesús mápechavare manaca eta mavahuana eta te máuquihana ema púchuqui. Te mavehapa eta mavahuana, yátupipa tijarahipa eta máimairirisirahi. Tamutupa máimaha.

²⁶ Tacahe, ema Jesús máevatacapa ema púchuquinihi, mayanapa te mapena. Máichapa: —Piyánapa pitupiru te pipena. Váhisera picusiapa eta te jena avasare eta piyanihaya —máichapa.

*Ena Pedro máimereucha ema Jesús émairahi ema Cristo
(Mt 16.13-20; Lc 9.18-21)*

²⁷ Te táequenepa eta juca, tiyanavarepa tipaica ema Jesús, énapa ena máimitureana. Nacaijuhepa eta te avasarechichana tachacaya eta ichape avasare ticajire Cesarea, máepiyaruihí ema rey Felipe. Eta napaisirapahi, mayaserecapa ena máimitureana. Ánipa maicha:

—¿Tájaha nacayema ena achaneana eta nuyehé? ¿Nájahanuhipuca náimijachanuhi nútí? —máichavacapa.

²⁸ Tacahe, najicapapa:

—Ena apamuriana náimijachavihi téchepuca ema Juan Tícachasiricarahini. Ena apamuriana tímijachavianahi ema víyahaini profeta Elías, téchepucahi éma. Ena apamuriana tímijachavianahivare ema mácani apana profetaini antívuini, téchepucahi —náichapa ena máimitureana.

²⁹ Tacahe, tiápechavavare mayaserecavaca:

—Étiyapa, ¿nájaha ímijachanuhi nútí?

Majicapavanepa ema Pedro:

—Pítira yátupi quenévihi Cristo —macahepa.

³⁰ Tacahe, matuparacapa muraca éna, nacuija nacumetaca eta émairahi ema Cristo.

*Ena Jesús tímereuchava eta máepenirayare
(Mt 16.21-28; Lc 9.22-27)*

³¹ Tacahe, tépanavapa máimitucavacahi eta táichararacavayare eta máepenirayare. Ánipa maicha:

—Nuti Manerejirunuhi ema Viya, nutuparahaichuhi ichapemuri eta nucatajivairayare. Tépurunanayare ena tuparairucana énapa ena aquenucarahana. Éna, tímicapacuanayareva. Mapanayareichuhisera sache eta nucaheyare eta népenirayare. Tásiha, nuchavayarehi néchepuca —macahepa.

³² Máimicaecherachapa eta macayemaquenehi. Tacahe, ema Pedro máiputsiacapa ema Jesús. Ánaqui macajachapa, máijarasiravahi eta mapanereruhi.

³³ Tacahe, téviurucavapa ema Jesús. Máesenicapa ena apamuriana máimitureana. Tásiha, macajachavarepa émapava ema Pedro. Máichapa:

—Píti, téjecapavahi eta pipanereruhi. ¡Pínajica eta juca tamauriquenehi! Pivarahapa pihapica eta mapanereruhi ema Viya. Eta juca pipanereruhi tacutihi eta mapanereruanahi ema Satanás, énapa ena machanerana —máichapa.

³⁴ Tacahe, máichuhavacapa ena máimitureana énapa ena apamuriana achaneana. Máichavacapa éna:

—Nácani navaraha náehicanu, tacamunu náinajica tamutu eta tihapapirica eta náehisiranuhi. Nacaravahuyareva eta nímiturapiana.

³⁵ Nácanisera téñamanahi eta náitaresira, tiávamirahuanaya eta náehisiranu, énajivayare ticamitiequenehavanaya eta náitaresira. Énasera nácani yátupi tíjaracavana téhicana eta náehisiranuhi, étapa eta námirahi eta tíurina échajirirucava, tayanapane táimicapacavacapa, éna títujicavanayare tíuchucuhayare eta náitaresiranaya.

³⁶ Énerichuvare nácani tacañamararuanahi eta nacaimahaquenéiraya te juca apaquehe, tíñehiyare eta náitaresira taicha eta tacañamarasiravacahi tahapapiricavacahi tayehe eta náuchucuirayarehini. Tiyananainapa eta te yucu nacaicuñaiyayare.

³⁷ Taicha vahi máratahaimahi mácani achane mavachachahini eta máurivaya te apana vítaresira.

³⁸ Énaripa nácani titsirihanapuca téhicanuana, náimitsirihapuca eta nímiturapiana te namirahuana ena achaneana mapicauruirahana pecatumareana, nútí apanava nutsirihayareva nayehé ena nani. Nucaerajicainapa ena nani, nuti Manerejirunuhi ema Viya, te táitecapapa eta sácheyare nuchavirayare aquenucaninapaipa. Te jena sácheyare, námainapaipa nútí eta majaraiva ema Tata, nucachanénapaipa ena sántoqueanea ángeleana.

9

¹ Énerichuvare máichavacapa:

—Nutupiruva numetacahe: Puítiripa te etaracu éti etiaríhi éti vahi épenavanémahi, ímahannumaya eta táepaniraya eta nítupajjiasiravahi eta nucatuparahairahi aquenucanuya me Viya —máichavacapa.

Éma Jesús tihapamaichava eta máimahi

(Mt 17.1-13; Lc 9.28-36)

² Tiuri, sáisipa sache eta nanasirahi ánaqui. Tacahe, éma Jesús manaquicavacapa éna máimitureana. Nacarinehi máma éma Pedro, éma Jacobo, émapa éma Juan. Tiyananapa eta te étana mari anuquehepana. Nacarichu éna. Eta ánaqui, náimahapa tihapamaichavahi eta máimahi éma Jesús te namirahu éna. Tétavicavapa eta tajapuvahi tajararasirahi tamutu eta máquehe.

³ Éta mamuiríha, táetaviucha eta tajanunumesirahi. Nájina tiratahaina tépachinacha tajanunumecahini náicha eta múiriare.

⁴ Tacahe, tiáramicareanavarepa tímerecavana éna apina ajairana: éma víyahaini profeta Elías émapa éma víyahaini Moisés. Téchajiricavanarípahi mayehe éma Jesús.

⁵ Tásiha, éma Pedro tímisiapavapa, téchajicapa éma Jesús. Ánipa macahe:

—Tata Náquenu, tétavicavapa táuricacareva eta víávihairahi eta aní. Tiúripanahipucaini vépiyacahini eta epenahuinapachuhini. Pipenahuinarichuhini píti, mapenainarichuhivaréni éma Moisés, émapaini éma Elías —máichapa.

⁶ Váhinéni máimatiequenehaini éma Pedro tájahahipuca eta mavarahaquenehi macayema. Namutu tíñacavana ichape éna mapanana máimitureana.

⁷ Tacahe, tiáramicarevarepa eta úcaji táepacúmurihi éna. Nasamavarepa eta mahu éma Viya tayehe eta úcaji. Ánipa macahe:

—Éma maca, éma yátupiquenehi nuchicha némunaruquenehi. Éma esuapayare —macahepa.

⁸ Tijahúchavavarepa, te náesenicavarepa, macarinehi éma Jesús. Nájinaripa éna apinana náimahaqueneanahi.

⁹ Tacahe, te tichavanapa tiúcupaicanavarepa, éma Jesús matuparacavacapa éna. Ánipa maicha:

—Vuíchaha ecumetajirica eta juca ímahaquenehi puiti. Tiámainucava te néchepuca te nécari nútí —macahepa.

¹⁰ Tásiha, nasuapa eta matupararuhi. Napanerequenehahisera eta macayemaquenehi. Tiyaserejiricacanapa:

—¿Tájahapuca tacayemarihi eta máechepusirayare te máecari? —nacahepa.

¹¹ Te tichavanapa tayehe eta anuquehe mari, nayaserecapa éma, ánipa naicha:

—Éna escribánoana tímítucanahi eta machavirayare tíápechavaya títareca éma víyahaini Elías, tínapucayarehi eta pímeresiravayarehi píti Cristo. ¿Énapuca téjcapavanahi éna escribánoana? —náichapa.

¹²⁻¹³ Majicapapa éma Jesús:

—Yátupí, éma víyahaini Elías títecapayarehi, máetupiripanayarehi tamutu. Nútisera numetacahe: Títecarípahi éma Elías, váhisera náimatihini éna escribánoana. Váhivare najacapaníni éna tuparairucana éma. Nacatianacahisera nacapacahí éma, tacuti eta táechajisihaqueneanahi eta Sagrada Escritura eta máichavaquenevayarehi éma. Éne nucaheyare nútí Manerejirunuhi éma Viya. Ticitianacananayarehivare, tépurunuanayarehi. Ichape eta námecatajichiranuyare eta námicapasiranuya, tacutihí eta táechajisihaquenehi eta Sagrada Escritura eta nuyehe —máichapa éma Jesús.

Éma Jesús macanaraca éma amaperu mávaháruhi éma éreana

(Mt 17.14-21; Lc 9.37-43)

¹⁴ Tacahe, te tichavanapa éna te návihahi éna apamuriana máimitureana, natiaríhíhi éna camuriqueneana achaneana te nachacaya. Natiaríhíhivare éna apamuriana escribánoana, nacanarajiricavacahí éna máimitureana.

¹⁵ Éta náimairahí éma Jesús, náraminehi éna achaneana. Tijunaparacanápa namutu náechajipanaya.

¹⁶ Te títecapanapa te návihahi éna máimitureana, éma Jesús mayaseremurihapa éna. Ánipa maicha:

—¿Tájaha eta ecanarajiricavacahí éna nani escribánoana? —máichapa.

¹⁷ Tacahe, tíuchujicávanepa éma émana achane. Majicapapa, ánipa maicha:

—Tata maestro, picatajanu. Námapahí piyehe éma maca nuchichasami. Éma, vahi téchajica maicha éma éreana.

¹⁸ Mavarahapa jácani ema éreana, máijahúchava máquipaicahi ema nuchicha. Tásiha, ema amaperu ticarissasajacapa, tinirataquiahechavapa muraca. Tivirajipa máicha ema éreana, muracaquihavarepa. Nuyaseacahi ena pímitureana eta náimijunairayarehini ema éreana. Váhisera náratahahini —máichapa ema achane.

¹⁹ Tacahe, máichapa ema Jesús:

—¿Tétavica ema masuapajiraivavaca eti achaneana! ¡Cúverarecachasicaini eta nucamichirahénahini! Íama ani ema amaperu —máichapa.

²⁰ Tacahe, náepanapa ema amaperu. Te máimahapa ema éreana ema Jesús, enurujipa macaënamaca ema amaperu. Tacahe, tiáquipaicavapa te apaquehe. Téchariripáicavapa ticarissasajacapa.

²¹ Tacahe, mayaserecapa ema Jesús ema maiya ema amaperu. Macahepa:

—¿Tiyeriripahipuca eta juca máichavaquenevahi? —macahepa.

Majicapapa ema achane:

²² —Te amuyarichaha. Máejeharipa máquipaica ema mara éreana te yucu téhevere une, taicha mavaraha macapaca éma nuchicha. Pítisera, te piratahapucaini, pájapanuhavini picatajicahavisaminí —macahepa ema achane.

²³ Majicapapa ema Jesús:

—¿Tájahá picayemaquene eta píchanuhi eta te nuratahahipucaini nútí? ¡Pítinapucaini, te pirataha! ¡Pácasíñanu! ¡Tamutu títujicacare te ecasiña eti achaneana! —máichapa ema Jesús.

²⁴ Enurujipa majicapapa ema achane. Tijaranu eta majicapirahi, ánipa macahe:

—¡Nucasiñavi, tata! ¡Pímicataganu eta néchuriasirahi eta nucasiñairavaina piyehe! —macahepa.

²⁵ Tacahe, máimahapa ema Jesús ena achaneana tíurujicavanaripa mayehe. Tásiha, macajachapa ema éreana, ánipa maicha:

—¡Piti váinaraji, piti pétuhuquiñarahi, úpahi pícha éma! Núti nuvanecavi: ¡Pijunijicayare ema maca amaperu! ¡Vaipa picuchavaucha ema maca! —máichapa ema Jesús.

²⁶ Tacahe, tipiararecapa ema éreana. Mavayuyujicapa tiyayacare ema amaperu máicha. Tacahe, majunjiacapa ema amaperu. Ema amaperu ticutipa máepenaquene. Tacahe, nacahepa ena achaneana:

—Tépenasamipa —nacahepa.

²⁷ Tacahe, ema Jesús macaratavauchapa, macaechepucapa ema amaperu. Tacahe, titupihapa ema amaperu, tíuripa. Tájina máichava.

²⁸ Tacahe, te táequenepa, náiputsiacapa ema Jesús ena máimitureana. Nayaserecapa:

—¿Tájahá tacayemahi eta vahí váratahahini vicuchuchahini ema éreana mayehe ema amaperu? —náichapa.

²⁹ Tacahe, majicapapa éma:

—Ema maca éreana, muracapanahi éma. Eta ecuchusiraina ena nani macutiqueneanahi tavaraha ichanumayare eta eyujarasiraina étapa eta íchiraya eta ayuna —máichapa.

*Tiápechavavare ema Jesús tímereuchava eta máepenirayarehi
(Mt 17.22-23; Lc 9.43-45)*

³⁰ Tacahe, tiyananavarepa tipaicana. Nánucuhapa eta provincia Galilea. Vahi mávarahahini ema Jesús eta nasamairirichahini ena achaneana eta nánucuirahi éna, machu nahapapiricapucaini eta máimitusiravacahi ena máimitureana.

³¹ Eta máimitusiravacahi, ánipa macahe:

—Nuti Manerejirunuhi ema Viya, járajapainapa eta sácheyare eta máijarasiránuyá mácani achane nayehe eta ticatianacananahi. Ticaratacananayare, ticapacananayareva. Téhesera te mapanaquenénapa sache eta népeniraya, máechepucayare —macahepa.

³² Énasea ena máimitureana váhiquene nacaicutiarahini eta macayemaquenehi. Natsirihacapasera nayaserechahini.

*¿Nájahapuca ema apóstole ticapichupana?
(Mt 18.1-5; Lc 9.46-48)*

³³ Tacahe, títecapanapa eta te avasare Capernaúm. Te peti náitecapihahi, mayaserecavacapa ena máimitureana. Ánipa macahe:

—¿Tájahapuca eta ejicapamaracacahi eta epaisirapahi te achene? —macahepa.

³⁴ Tásiha, vahí najicapahini, taicha vahí návarahahini náimereuchavahini eta najicapae-majiricacairapahi eta nájahairayarepuca mácani ticapichupana.

³⁵ Tásiha, téjacapa ema Jesús. Máichuhamuripa ena dócequeneana eta napauchirayare náejaca eta te machacaya. Tacahe, máichavacapa:

—Nácani navarahahi ticapichupananayare te etaracu, tavaraha náechapajiricavaca namutu ena nachamuriana. Nacachuricayare eta námunaraivahi nayehe ena apamuriana —máichavacapa.

³⁶ Tacahe, máichuhapa ema émana amaperuchicha. Majupacapa te namirahu éna. Tacahe, máichavacapa:

³⁷ —Nácani tijacapanayare ena amaperuana níchavenénahi nútí, ena nani yátupi náimerecaya eta náemunasiranuhi nútí taicha tímicutijiricavahi nútínahini najacapa. Taicha nácani tijacapanuanahi nútí, énerichuyareva tacahehi eta najacapirahi ema Ticachichanu, ema tivanecanuhi —máichapa.

*Tímicatacahavianahi nácani vahi ticitianacahaviana
(Lc 9.49-50; Mt 10.42)*

³⁸ Tacahe, ema Juan mametacapa, ániapa máicha:

—Tata maestro, vímahahi ema émana achane máquijicavacahi ena éreanana te píjare ticutirinehi pítinahini píjaraca eta máitupajjiasiravahi. Tásihaseva vicavacahi éma, taicha vahi víumurivainahini —máichapa ema Juan.

³⁹ Émasera ema Jesús máichapa:

—Vahi ecucavaca éma. Taicha te máichahipuca ema mácani eta tíaramicare, mámapicahi eta níjare, vahi macaecahinuhini.

⁴⁰ Tímicatacahavianahi nácani vahi ticitianacahavianahi.

⁴¹ Jéheseva, nácani ticumpirachaheana eta une éti étaripa táichavenera eta étirahi nuchanerairahi nuti Cristo, vahi námapurujimahi. Yátupihí ticavachaequeneanayarehi éna —macahepa.

Ichape eta máicuñayare mácani tímiaquipaica te pecatu ena amaperuana

⁴² Tímianava eta máimituresirahi ema Jesús, ániapa macahe:

—Tacutiquene mácani tímiaquipaicaya nácani ena téhicanuanahi mánsuqueneanahi. Tiúripanahipucaini tájjahúchavahini máepenahini mativainahini éma. Váhirichupucaini macucaicuñahini, taicha vahi macuimíquipaichahini ena téhicanuanahi —macahepa.

*Ecunevaicha ichape, machu náepujuquichahe eta te yucu máemahacacaquene
(Mt 18.6-9; Lc 17.1-2)*

⁴³⁻⁴⁸ Énerichuvare máichavacapa:

—Jéhevare, te tavarahapuca táimipecurachaheya eta evahu, tapamisirahénapapuca íchayare eta tauriqueneana, tiúripana eyuchatica, apaesa vahi tacuimíquipaicahe tayehe eta pecatu. Étaripa eta ívape, te tavarahapuca támahe íchayare eta tauriqueneana, tiúripana eyuchaticavare, apaesa vahi tacuimíquipaicahe tayehe eta pecatu. Étaripavare eta iúquihí, te tímiaquipaicahepuca tayehe eta pecatu, tavarairahi táimahayare eta tauriqueneana tájiparacana, tiúripana evectuquichava. Taicha tiúripana eta ejacapacarehi éti eta esiapiraina eta te mávasa ema Víya, tayanapané táejicavapuca eta íáquehe. Páurehesamiserá éti, te náepujuquichahepuca eta te yucu infierno, tayanapanéni tamutuchahahini eta íáquehe. Taicha ánaquí máemahacacaquenehi eta yucu. Máitavacaca eta ecatajivairanayare.

⁴⁹ Tacuti eta vépurarajica eta icheve eta viniru, ene nacaheyare ena tiyana te yucu, ticaepuracasianayare tayehe eta yucu.

*Vahi ecuisapa táepaha eta ecamunucarevahi
(Mt 5.13; Lc 14.34-35)*

⁵⁰ Eta icheve, tétavacavahi eta táurivahi, taicha ticamunucarehi. Ene ecaheyare éti eta ecamunucarevahi eta nayehé ena achaneana. Váhi tacuepaha eta ecamunucareva. Vahi ecucuti eta tajachira eta icheve, taicha tájjina eta táichevevainahini. Tacuijavare tahapapicahe eta iúrivahi —máichapa ema Jesús.

10

*Ema Jesús tímíturacahí, máechajisihahí mácani achane tinajicahí esu mayena
(Mt 19.1-12; Lc 16.18)*

¹ Tacahe, tiyananavarepa tipaicana te tinapaica te vana. Nánucuhapa eta provincia Judea. Tásiha tíanuecanapa eta te apachara eta cajacure Jordán. Ánaquí tíápechavanavare tiúrujimiravana ena ichapemuriana achaneana te jácani máítecapihapahí ema Jesús. Tásiha, tímíturacavare éma, taicha tacahehi eta mayeherepíhi.

² Tacahe, náitecapauchapa ena apamuriana fariséoana. Natanucahi eta ticaviureyahehi ema Jesús. Ániapa náicha:

—Vivaraha pímetacahaví ¿te táuricapuca máinajica ema achane esu mayena?

³ Tásiha, ema Jesús mayaserecavarepa ema apana:

—¿Tájahasica eta tacayema eta mavanairipi ema víyarahaini Moisés? —máichapa.

⁴ Najicapapa éna:

—Ema víyarahaini Moisés máisapahi ema suima máejerare eta máinajisira esu mayena. Macavanairipiser májucha eta ajureca tayehe eta náinajicacaira. Tásiha, eta májarasirahi ésu eta juca ajureca, máinajica ésu. Tásiha, vaipa mayenainahini —nacahepa ena fariséoana.

⁵ Tacahe, ema Jesús máichavacapa éna:

—Ena iáchucanaveanaini, te jácani eta nasemairahi, náinajica ena nayenana. Ema víyarahaini Moisés máisapahi tínajicacana táichavenehi eta namuracasamurevanahi éna, vahi náimitucacarehini náicha.

⁶ Váhisera máuricahini ema Viya eta náinajicacahini. Taicha te tépanavainapa acane, ema Viya májaracahi ema achane ésunayareichuhi esu mayenayare. Esu esena émanayareichuvare ema suímayarehi.

⁷⁻⁸ Ani tacahe eta mavanairipi ema Viya: “Mácani amaperu achane ésupa esu mayenayare, te ticaimanapa, tatuparacavacahi típutsicavanayarehi eta napenana ena ticachichana. Énajivainapa titáticacanayare. Eta navehacacairahi, tímicutijiricavaipa étanarinehi eta náqueheana” tacahepa. Éna, tímicutijiricavainapa émanainarichuhini te peti. Étanarichu eta napanereruana. Vaipa táisapacarehini eta náinajicacairahini.

⁹ Eta tacahe, mácani máinajicahi esu mayena, éma máepuruhi eta juca mavanairipi ema Viya —máichavacapa.

¹⁰ Te táequenepa, nacarichuipahivare ena tayehe eta peti náitecapihahi, ena máimitureana nayaserecapa ema Jesús tayehe eta juca máechajiririvanahi.

¹¹ Tacahe, máichavacapa éna:

—Te máinajicapuca esu mayena mácani achane, eta maviraya esu apana esena, ticapecaturaipa éma me Viya. Ichapevare eta máejecapiravahi suyehe.

¹² Tacutiquene súcani esena, te suínajicapuca ema suima, eta suviraya ema apana achane, ticapecaturapavare ichape ésu —máichavacapa.

Ema Jesús mayujaraucha ena amuyana

(Mt 19.13-15; Lc 18.15-17)

¹³ Tacahe, ena achaneana námavacapaipahi ena amuyana eta mayehe ema Jesús. Navarahahi máemamahacavacayarehi éna, mayujarauchavacahivaréni. Énasera ena máimitureana vahi náisapahini. Nacaichepaicapa ena tiámanapahi ena amuyana.

¹⁴ Te máimahapa ema Jesús eta nacaichepaisirahi, tisemapa. Tásiha, máichavacapa ena máimitureana:

—Ésamiricachucha ena amuyana, náitecaichaha eta nuyehe. Vahi ecucaichepaica éna. Taicha ena nuchanerana nuti Cristo nacutiyarehi ena nani amuyana eta nasuapajiraiva éna.

¹⁵ Nutupiruva numetacahe: Nácani vahi nácutihini ena amuyana eta nasuapajiraiva, vahi nuchaneranimahi —macahepa.

¹⁶ Tacahe, majupacavacapa ena amuyana. Máemamasicavarepa, mayujarauchavacapa.

Ema achane rico téchajiricava mayehe ema Jesús

(Mt 19.16-30; Lc 18.18-30)

¹⁷ Tiuri, te apanapa sache, tiyananavarepa. Eta napaisirapahi, macahepaipa ema émana achane. Tijunapaipahi. Matupiru máepuyumiraucha te mamirahu ema Jesús. Mayaserecapa, ániipa maicha:

—Tata maestro, piti piúriquene ¿Tájahapucaini eta nícharacavahini eta nítujsiravaina me Viya máichecuaraquirénahini eta nítaresira? —máichapa.

¹⁸ Ema Jesús majicapapa:

—¿Tájaha tacayema pímiyarechanu “Piti piúriquene”? Mararihi ema Viya. Jéhevare éma, tétavacavahi eta máurivahi.

¹⁹ Téhesera te pivarahapuca pecha eta apana vítaresira, pisuapayarehi eta mavanairipiana ema Viya. Píti pímatipa eta júcana: “Vahi picucapareca. Váhivare picuveha esu esena apayena. Váhivare picuamereca. Nacuija pépiyáequeneruina. Váhivare picuvayuareca. Pípicachayareva ena ticachichaviana” —máichapa.

²⁰ Tacahe, majicapapa ema achane:

—Tata, tamutu eta juca vanairipiana nusuapahi nítauchahi eta námaperuvahi, puíticha juca ajairairanuipa —macahepa.

²¹ Tacahe, ema Jesús máimamaracapa ema achane, máemunacainehi. Tásiha, máichapa:

—Jucarihichaha eta pítauchaqueneyare. Piyana, píjararecaya tamutu eta pímahaqueneana. Tásiha, píjaracavacapa ena páureana. Jéhevare eta, píjacapayare eta pímahaqueneyare te anuma, táitsivayare. Te tamutupa eta juca, pítecavanepa péhicanu —máichapa ema Jesús.

²² Tásiha, témahasamurerinehi ema achane taicha eta macayemaquenehi ema Jesús. Ichaperinehi eta mapanereresirahi, taicha mavayuchahi eta macaimahaquenerahi. Macatiequeneharinehi tamutu. Tiyanchucha.

²³ Tacahe, máessenicapa ema Jesús ena máimitureana natiarihiqueneanahi te machacaya. Tacahe, máichavacapa:

—Yátupiquenehi máitujiana eta nájarasiravainahini eta náehisiranuinahini ena rícoana eta nasiapirainahini te anuma —máichapa.

²⁴ Ena máimitureana náramine eta nasamirahi eta máechajiriruvana. Tásiha, mápechavacapa máicha:

—Nuchichanaveana, esamanu. ¡Máitujiquenehi eta nájarasiravainahíni téhicanuana ena ticasíñanahi eta nacaimahaquenerahi!

²⁵ Eta juca tímicutijiricavahi eta vipera camello, máitujihí tánucuhahini te támicuejehe eta parirapa. Ene nacahehi ena rícoana —macahepa.

²⁶ Tásiha, náramine ena máimitureana, eta nasamirahi eta juca. Náichapa:

—¡Tétavicavahi eta tamaitujicacarevahi! ¡Nájina títujicavaimahi náuchucuhahini!

²⁷ Tacahe, máimararacavacapa ena máimitureana. Tásiha, máichavacapa:

—Nájina émanaina achane émajivainahíni ticuchucuhava. Émasera ema Viya, macarichu marataha ticuchucureca. Taicha tájina máemejerachaquenénahini ema Viya, tamutu marataha —máichapa.

²⁸ Tacahe, máichapa ema Pedro:

—Vítisera, Tata, vinaquicahi tamutu eta vicayehequeneana, vivarairahi véhicavi —máichapa.

²⁹ Ema Jesús majicapavarepa:

—Nutupiruva numetacahe: Namutu nácani nanaquicahi eta napena, najunijicahivare ena ticachichana*, ena naparapenaveana, ena nachichanaveana; étapa eta nayehe apaquehe, te nanaquicahi táichavenehi eta náehisiranuhi, étapa eta námirayare eta tíurina echajirirucava;

³⁰ tíapajucavainapa camuripanayare ena naparapenaveanayare ajairana, esenana, énapa ena náenanaveanayare, énapa ena nachichanaveanayare. Camuripanayareva eta náitsirijisravayare. Ticatichacareanayaresera nayehe ena apamuriana achaneana. Énerichuvare níjaracavacaya eta nápechiravayare títarecana. Máichecuaraquirenapa eta náuricacarevanayare.

³¹ Maverahesera eti etiarihiqueneanahi puítí, váhirichuhi ecapicahuhini. Te jena sácheyare, ichapepanainapa eta ecapicahuiraya. Éna puítí ticapicahuanahi, te tátauchavapa te jena sácheyare, énapavainapa téquenehanayare —máichavacapa ema Jesús.

Ema Jesús tíapechavavare máechajisíha eta máepenirayarehi

(Mt 20.17-19; Lc 18.31-34)

³² Te apanavarepa sache, tiyananavarepa tipaicana. Nacaijuhepa eta te Jerusalén. Tínapucapaipa ema Jesús te namirahu ena máimitureana. Náramipaipahi éna. Natiarihivare ena tipicanapaipahi. Tacahe, ema Jesús mañajichamuripa macaetavajimurihavarepa ena dóceana apóstoleana. Mametacavacapa eta jácani máichararacavayarehi éma.

³³ Máichapa:

—Ímaha puítí, viyanainapaipa vicaijuheyare eta Jerusalén. Ánaqui nucaijararecasiyare nuti Manerejirunuhi ema Viya. Ticaratacanuanayare ena tuparairucana. Tímicapacuanayanarehi, taicha tíjararecanuanayare nayehe ena suntaruana romanoana. Éna, nájina najapanuquenéna.

³⁴ Tícaecahinuanayare. Tíatutuquichanuanayareva. Téstacuanayanareva. Tásiha, ticapacuanainapa. Tásilhasera, te mapanaquenénapa sache néchepucainapa te nécari —máichavacapa.

Ema Jacobo émapa ema Juan nayaseacapa ema Jesús eta macájupahávachihini éna

(Mt 20.20-28)

³⁵ Tacahe, te apanapa sache, témeñahavanapa ema Jesús ena apinana ticaparapecacana ema Jacobo émapa ema Juan. Náichapa:

—Tata maestro, vivaraha picatajicahavihini eta viyasearuviyare —nacahepa.

³⁶ —¿Tájaha ecamunu? —máichapa ema Jesús.

³⁷ Najicapapa éna:

* **10:29** Te jácani apanana versiónéana, tatiaríhi te juca lista eta táechajiriruva: “ena nayenana”. Tájinasera nalistanahini te libro antivupanahi. Eta tacahehi, vímatiequeneha vahí manacahini ema Marcos. Mácani apana achane mavejuchahipuca te Lucas 18.29.

—Te jena sáchezare te péjacapa te piávacurezare aquenucavirayare, vivaraha picaejaca-havihivareni te pichacaya, pijupahahavinahini, véjacaini te pivaure, ema émana te sapa —náichapa.

³⁸ Tacahe, majicapapa ema Jesús:

—Éti, vahi ímati tájahapuca eta nátajivayare nácani nujupahanayare. ¿Eratahayarepuca ecamicha eta íchavaquenevayare ecatajivairayare, te ecutinuyarepuca eta nucamichirayare nútí? ¿Váhivarepuca epicayare ticapacaheana tacuti eta nacapasiránuyare nútí? —máichapa.

³⁹ Ena najicapapa:

—Viratahayare vicamicha. Váhivare vipicaimahi.

Tásiha, máichavacapa:

—Yátupi ichape eta ecatajivairaya, vicuticacaya eta nacapasirahaviyare.

⁴⁰ Étapasera eta nucaejasiraya ena nujupahanayare, vaipa nútímahí necha. Ema Tata Nucaiyaquene, émahí tinerejicayarehi éna nujupahanayare —máichapa.

⁴¹ Tacahe, te náechapa ena apamuriana apóstoleana, tisemamajuheanapa nayehe ena apinana.

⁴² Tásiha, máichuhmuripa namutu. Máichavacapa:

—Écharichuhi éti ena aquenucana tayehe eta avasare, muraca eta nacavanairipira. Énaripa ena tuparairucana, tétavacavahi tisuapacareanahi eta nacavacurerahi.

⁴³ Váhiserá ecucahe éti nayehe ena echamuriana. Mácani timerecavahi ticapichapuna, tacamunuhi máitátivacayare ena apamuriana.

⁴⁴ Te etiarhivarepuca éti evarahahi ínapuca, tacamunuhi ímerekavayare navanarahayare ena echamuriana.

⁴⁵ Ecutinuyare nuti Manerejirunuhi ema Viya. Vahi étaina tímitecanu nucaitaticasihini. Nútíyarehi nútítihe éti. Énerichuvare njaracavayarehi númicapacava íchaveneyarehi éti camuriqueneanaya nucuchucureanayare —máichavacapa.

Ena Jesús macaimairica ema púchuqui ticajare Bartimeo

(Mt 20.29-34; Lc 18.35-43)

⁴⁶ Tiuri, títecapanapa eta te avasare Jericó. Te apanapa sache tiyananayarepa. Náehicapaipa ena camuriqueneana achaneana. Te achenechacaya, matiarihíhi ema achane púchuqui. Ticajare Bartimeo, machicha ema Timoteo. Téjacahi tiyaseserecachi limosna.

⁴⁷ Te masamapa eta mánucuirapahi ema Jesús Nazareno, tipiaracapa. Ánipa macahe:

—¡Tátachicha Jesús! ¡Pítiqueneripa yátupiquenévi Cristo! ¡Picatajicanupaini pájapanunuíni!

⁴⁸ Tacahe, nacavacapa camuriana ena natiarhiqueneanahi. Náichapa:

—Pámatina. Vaipa picupiaraca —náichapa.

Émasera tipiaracaichucha:

—¡Tátachicha Jesús! ¡Pítiqueneripa yátupiquenévi Cristo! ¡Picatajicanupaini pájapanunuíni! —macahepa.

⁴⁹ Tacahe, tícheapaica titupihapa ema Jesús. Máichapa:

—Íchuha ema mara.

Tacahe, náichuhapa ema púchuqui. Náichapa:

—¡Pétumechava! Péchepuca, taicha tíchuhavipa ema Jesús —náichapa.

⁵⁰ Eta mananesirahi ema púchuqui, macamiricapa eta máepacuha. Téchepecapa, tiyanapa mapauchahi ema Jesús.

⁵¹ Tacahe, mayaserecapa ema Jesús ema púchuqui. Ánipa máicha:

—¿Tájaha picamunu nuyehe?

Majicapapa éma:

—Tátachicha, nuvaraha picaimairicanupaini —macahepa ema púchuqui.

⁵² Tacahe, máichapa ema Jesús:

—Tiuri, nuchicha. Táichavenehi eta picasiñairanuhi, pinaracapa puiti. Tiúrinapa eta piyaniraya pipaisiraya —máichapa.

Enurujirinehi tímairica. Tacahe, máehicapa macachanepaipa ema Jesús eta mapaisirapahi te achene.

11

Títecapapa ema Jesús eta te Jerusalén

(Mt 21.1-11; Lc 19.28-40; Jn 12.12-19)

¹ Tacahe, te apanapa semana tiyananavarepa. Tétavajicanaya tayehe eta avasarechichana ticaijare Betfagé étapa eta Betania, te tachacaya eta cerro ticaijarehi Olivoquiji. Tiánehanapa eta te Jerusalén. Ánaqui, ema Jesús mavanecapa ena apinana máimitureana.

² Ánipa máicha:

—Eyanayare eta te jena avasarechicha Betfagé. Te itecapapa ánaqui, ímahayare ticaitihahi eta burrico. Eta jena sárare mávaequehéchaha. Nájinachaha ticaperainahi. Evejapuacayare, íámanuayare eta ani.

³ Te natiarihinapuca náeñama, emetacayare eta nucamunuirahi núti. Vahi táyeréimahi vímichavavaneyare —máichavacapa.

⁴ Tacahe, tiyananapa ena vanairucanahi. Jéhesare, nachimapapa eta burrico. Ticaitihahi eta te calle te tapajachacaya eta peti. Tacahe, navejapuacapa.

⁵ Náichapasera ena ticayeheana:

—¿Tájaha tacayema íamayare eta viyehe burrico?

⁶ Tacahe, najicapapa éna, nametacapa eta máimiturapihi ema Jesús. Tásiha, náisapapa eta námirahi eta burrico.

⁷ Tacahe, te títécapanapa te mávihahi ema Jesús, náepacamaequechapa eta náepacuhana. Tásiha, ticaperapa ema Jesús.

⁸ Tacahe, tiúrjicavanapaipa ena achaneana. Camuriana éna tiácapanahi, náepacapai-capaipa eta namuirihana eta te mayanihayarepahi éma. Ena apamuriana navehapa eta cáchipaca. Nanacavare te achene.

⁹ Ena títapumirauchanapaipahi énapa ena téquenehanapahi, namutu tipiaracanapaipa. Ánipa nacahe:

¹⁰ —¡Yare, Tata! ¡Píti yátupiquenévihi Cristo, réyvihi viyehe! ¡Asulupaya! ¡Vanairucaquenévihi píti me Viya! ¡chape eta vicunachiravi píti! ¡Asulupaya me Viya te anuma! ¡Viva ema Viáquenul! ¡Viva! —nacahepa.

¹¹ Tacahehi eta máitecapirahi ema Jesús eta te Jerusalén. Matupirupa tiyanahi te Templo. Te tamutupa máimahahi, tiyanapa tichava te Betania, namutupaichu ena dóceana apóstoleana, taicha cáperehichicharipa.

*Ena Jesús májiquiha eta yucuqui ticaijare higo taicha máhiriquirehi
(Mt 21.18-19)*

¹² Te apanavarepa sache, te yáticarahi, tichavanavare te Jerusalén. Eta najunijisirahi eta Betania, técuhaipahi ema Jesús.

¹³ Eta máimairahi tiyerehi eta étana yucuqui ticaijare higo. Ticainapucavahi ticápácaji. Tacahe, ema Jesús tiyanapa máimahapana te ticahíhipuca. Téhesera te máitecapauchapa, máimahainehi tájina táhinahini. Tacarichuhi eta tapacajiana, taicha vúichaha tacahirainahini.

¹⁴ Tacahe, máichapa ema Jesús eta higo:

—¡Píti pépiyainapa eta máhiriquireviyare! —macahepa.

Nasamararacahi ena máimitureana.

Ena Jesús macuchuchujicavaca ena tíjararecanahi eta sárareana, cáyureana te tajuhe eta Templo

(Mt 21.12-17; Lc 19.45-48; Jn 2.13-22)

¹⁵ Tacahe, te títécapanapa te Jerusalén, tiyananavarepa eta te Templo. Máimaharinehi ema Jesús ena achaneana tíjararecanahi eta sárareana, cáyureana. Ena apamuriana tivacharecanahi. Natiaríhivare ena tísiriperecarahiana eta taplataneana eta apanapane avasareana. Tásiha, macuchuchujicapa namutu. Máequehepuichinavacapaipa eta namesarana étapa eta nasiyana.

¹⁶ Nájinavare máisapaquenénahini eta nánucuhahini eta canchón tayehe eta Templo, námaphahini jácani eta nájarareruanahi.

¹⁷ Tásiha, máimitucavacapa ena natiaríhiqueneanahi. Ánipa máicha:

—Ema Tata Nucaiyaquene, ani macahehi eta máechajiriruvahi te Sagrada Escritura: “Eta nupena tacarichu táicuchihí eta nayujarasirareya ena achaneana tíasihana te tamutu avasareana” macahepa. Étisera eti tíamerahiana ecasiapavapa eta te juca. Emaeperajicapa eta tacapicahuirahi. ¡Eyana iúchucatataji! —máichapa.

¹⁸ Ena ticatianacanahi ema Jesús, te nasamairicapa eta juca máechajiriruvanahi, tisemanapa. Tásiha, natanucapa eta jácani náicharasirayare eta námicapasirayarehi éma. Taicha napicarinehi éma, taicha náimahahi tétavicavahi eta masuapacarevahi eta nayehe ena achaneana.

¹⁹ Tacahe, te cáperehichicharinehi, tiyanavarepa ema Jesús, tiúchuca eta te Jerusalén.

*Tíajiriquipa eta yucuqui higo
(Mt 21.20-22)*

²⁰ Tacahe, te yáticarahipa, eta nachaviravarepa eta te Jerusalén, náetavicapaipahivare eta yucuqui higo. Náimahainehi tiájiriquipahi éta.

²¹ Tacahe, téchavapa ema Pedro eta máechajiriruvanahi ema Jesús cape sache. Tásiha, máichapa:

—¡Pímaha, tata! ¡Tiájiriquipa eta higo eta pévajiriaruhi!

²² Majicapapa ema Jesús:

—Ácasiñava yátupina eta me Viya.

²³ Jéhesare, éti apana esamacareyareva, te yátupina eta écasiñavairaina eta me Viya. Tájina ématucaimahi. Eratahayareva ecayejeca eta cerro te apachacaya, tájina iávamirahuimahi te esamureana.

²⁴ Tacahe, numetacahe eta juca: Te eyaseacapuca ema Viya eta jácani, ecasiñava mayehe. Vahi ecueñamava eta ejacpirayare. Tásiha, tíjaracahéna éma tamutu eta eyasearuanaya.

²⁵ Énerichuvare, eta eyujarasiraina, eperdonacha éti nácani náejecapavaquenehi eta eyehe. Eperdonachavaca apaesa maperdonachahevare eta éjcapiravana ema Tata Ecaiyaquene te anuma.

²⁶ Téhesera vahi eperdonachahi, váhivare tiperdonachahemahi eta éjcapiravana ema Tata Ecaiyaquene te anuma —macahepa ema Jesús.

*Nayasereca ema Jesús nájahhipuca tituparacahi éma
(Mt 21.23-27; Lc 20.1-8)*

²⁷ Tiuri, títecapanavarepa eta te Jerusalén. Natupiruvarepa tiyanana te Templo. Te mapairirijuecharipa ema Jesús eta Templo, napauchapa ena ticitianacanaahi éma.

²⁸ Nayaserecapa éma, ánipa naicha:

—Píti, vahi vitupararuvinahini víti eta píchirahi eta júcana. ¿Nájahasica túmitucavíhi? ¿Nájaha tituparacavianahi eta juca píchaqueneanahi? —náichapa.

²⁹ Tacahe, majicapapa éma:

—Núti apanava nuvaraha nuyaserecahe. Ejicapanuyaresera apaesa numetacahe eta nucatuparahairahi eta níchirahi eta júcana.

³⁰ ¿Nájahapuca tivanecahi ema Juan eta máitesirahi máicachasirisirayare? ¿Émapuca ema Viya tivanecahi, émajivahipuca eta máitesirahi? Ejicapanu —máichavacapa.

³¹ Váhiserá náituruequenehahini eta najicapirayarehi. Tiácapaemajiricacanapa, ánipa nacahe:

—¿Tájahasica vicayemayare eta vijicapirayare ema maca? Te vémunahacava vicha: “Mavaneruhi ema Viya”, ema macahénapapuca: “Tásiha, ¿váhíyapa esuapahini éma?”

³² Váhivare táurica víchahini: “Émajivaichucha eta máitesirahi”. ¿Tájahapuca vicayemayare eta vijicapirayare? —náechajiricacapa.

Nacahehi éma, taicha napicaracahi eta jácani náicharasirahipuca ena apamuriana achaneana, taicha namutuhi náimijachahi ema Juan profetaquenehi yátupiquene mavaneruhi ema Viya.

³³ Tacahe, najicapapa ema Jesús:

—Vahi vecha víti —nacahepa.

Ema Jesús máichavarepa:

—Énerichuvare núti, vahi numetacahemahi nájahapuca ema tituparacanuhi —máichavacapa.

12

*Ema Jesús máimicutichina ena pártirárioana máurirahana
(Mt 21.33-46; Lc 20.9-19)*

¹ Tacahe, tépanavavarepa tímíturca eta juca máimicutichaquenehi. Ánipa macahe:

—Matiríhi ema achane. Camuri eta máevaru uva te máesane, manaruacahivare eta masucure. Máepiyacavarepa eta naticaresihayare eta tachi eta uva. Máepiyacavare eta torre, nápanihayare eta najaneasirayare eta máevaru.

Tásiha, máijaracapa ena achaneana, pártirárioanayarehi. Taicha tiyanayarehi ema achane te apana avasare.

² Tacahe, te tiyahapa eta uva, máimivanerecapa ema mamusura mayaseapanavacayarehi ena pártirárioanahi eta tatucachaqueneayarehi éma.

³ Énaserá ena pártirárioana tiseauchavanarichucha. Nacaratacapa náehapa ema vanairucahi. Tichavapa éma, tájina nájjaracahini.

⁴ Tacahe, tiápechavavare mavaneca ema apana mamusura. Váhivare nasuapahini éma. Natupisicapa eta te márijahiana, najarasicapa. Náumehavarepa éma vanairucahi.

⁵ Tacahe, ema achane mavanecavarepa ema apana mamusura. Tásiha, ena pártirárioana nacapacapa éma. Vuíchasesa masemahini ema achane. Ticayehehi paciencia. Máimivane-recapa ena apamuriana, camurianapa. Énerichuvare, tiápechavanapa náehavacavarepa. Nacapacavacapa ena apamuriana.

⁶ Tacahe, matiarhihichahasera ema apana mavaneruyare. Émajacaru vapa máevataca ema machicha máemunaruquenehi. Máimijachaipahi émainahipucaini napicauchahini.

⁷ Énasera ena pártirárioana, te náimahapa ema machicha ema achane, áni pa nacahe: “Émainapapuca ticayeheyare ema maca. Yare, vicapaca éma apanavare, apaesa tánasipa viyehe tamutu. Tájina máicharachavimahi ema achanenavaji” nacahepa.

⁸ Tacahe, nacaratapaca ema machicha. Nacapacapa éma, náquijicapavarepa eta máquehe te aneca tayehe eta úvaquiji.

⁹ Puiti, nuyaserecaheyare: ¿Tájahapuca máicharachavacayare ema achane ticayehe eta úvaquiji? Jéhesare, vaipa macayehehini paciencia. Títecavanénapa macapapanavacayarepa ena pártirárioanahi máurirahanahi. Tásiha, máijaracainavarepa eta úvaquiji ena apamuriana pártirárioanayareva.

¹⁰⁻¹¹ Nuvaraha epanerechapaini eta tacayemahi eta Sagrada Escritura, apaesa ácaicutiara éti. Aní tacahehi: “Ena tépiyarecarahiana eta Templo, tasapiha náepuruhi eta mari táicuchihi tatumearayare eta peti, taicha vahi náimatihini. Émasera ema Viya macaitcapa eta te táicuchihi eta tatuparahahi. Tacapicahuquenehi puiti. Táitusiava tétavicavahi eta vicunachirahi víti ema Viya” tacahehi eta Sagrada Escritura. Nuvaraha ecaicutiaraya — máichavacapa ema Jesús.

¹² Tacahe, ena nasatianacanahi ema Jesús, eta nasamirahi, tiseமானরিনেহি taicha tímaticavanapa eta énaírahi tayunacavaca eta máimicutichiravacahi. Eta nasamirahi, tiseமானরিনেহি. Navarahapa nacaratacayarehíni. Tipicacavanachuchasera nayehe ena achaneana, nacatiuchahini ema Jesús. Tacahe, najunijiacapa éma, tiyananapa natanuca eta táicharacavaya eta nacaratasirayare éma.

*Navaraha náemejecapavacha ema Jesús tayehe eta impuesto
(Mt 22.15-22; Lc 20.20-26)*

¹³ Tacahe, ena ticitianacanahi ema Jesús navanecapa ena témejecapacachanayare apaesa étainahipucaini taviuchahini ema Jesús. Natiarihi ena tinerejicavanahi ena fariséoana. Natiarihivare ena políticoana.

¹⁴ Te náitecapauchapa, áni pa nacahe:

—Tata maestro, vímatihí eta tatupiruvairahi tiuri eta juca pímiturapianahi. Vahi pipicacacavahini eta péchajisihairahi eta náichavaquenevahi nácani achaneana, tayanapanepuca aguenucahi. Taicha pivaraha náehicahini namutu eta táurinaquene achene ticaijuhe me Viya. Vivarahahísera viyaserecaviyare eta pipanereruhi: ¿Táuricahipuca vivachacha eta viyahéhana impuesto maybehe ema Presidente Emperador romano? Taicha víti, machanerahávihi ema Viya, ¿masi? —nacahepa.

¹⁵ Máimativanehísera ema Jesús eta apimirairavacahi éna, navarairahi ticaviureyarehi éma. Tásiha, ema máichavacapa:

—¿Tájaha tacayema evaraha ímiaquipaicanu? Nímahaseji, íáminanu étapena eta reale — macahepa.

¹⁶ Éna náijaracapa eta reale. Tásiha, máichavacapa:

—¿Nájaha ticaijare eta juca? ¿Nájahavare ticavasimahi eta juca mirare eta te juca reale? —máichavacapa.

Éna najicapapa:

—Mayehe ema Presidente Emperador —nacahepa.

¹⁷ Tacahe, máichavarepa:

—Tiuri. Táuricahi íjaraca ema Presidente Emperador eta juca mayeherichuhi éma. Tásiha, íjaracavare ema Viya eta mayeherichuhivare éma —máichavacapa.

Te nasamapa ema Jesús eta majicapiravacahi, náramipa eta máitupajjiasiravahi.

*Nayasereca ema Jesús náicharachavayarepuca ena náepenaqueneana eta náechepusirayare
(Mt 22.23-33; Lc 20.27-40)*

¹⁸ Nacahepaipavare ena apamuriana achaneana. Saducéoanahi. Ena nani saducéoana, apanahi eta náimiturapiana. Éna, vahi nasuapa eta náechepusirayare ena náepenaqueneana. Tiyananapa náimahapanahi ema Jesús. Áni pa nacahe:

¹⁹ –Tata maestro, ema víyahaini Moisés manaquicahi eta ajureca máechajiriruvahi eta veyehe: “Te máepenaequenehahipuca ema achane esu mayena, tásiha, nájinahipuca manaquiequeneruvainahini machichainahini, te matiarihhipuca mácani maparapehi, mavehayare esu machinenaequenéni, apaesa émainapuca macachicha eta suyehe, máitsivainahini ema maparapeni”.

²⁰ Tacutiqene te natiarhipuca ena siétequeneana ticaparapejiricacana, te títauchavapa ema náechavimuri. Máepenaequenehapasera esu mayena. Nájinahi machichainahini.

²¹ Tacahe, ema maparape máitauchavare esu machinena. Énerichuwaresera máepenaequenehavare, nájinavare machichainahini. Ema émana maparape máitauchavare ésu. Énerichuware máepenaequenehavare.

²² Namutu ena siétequeneana navehahi ésu, tásihasera náepenaequenehapaichucha, nájinaquene émanainahini mácachichahini eta suyehe. Te táequeneqa, tépenapa esu esenaini.

²³ Tacahe puiti, te apanapapuca eta náitaresirayare ena nani, ¿nájahapuca ena siétequeneana éma yátupiquenehi suímaquenehi esu esena, taicha ena siétequeneana namutuhi suímanaríhi? –náichapa.

²⁴ Tásiha, ema Jesús majicapavacapa:

–Éjecapava éti. ¿Tájaha tacayema vahi evaraha ácaicutiarahini eta táimiturapi eta Sagrada Escritura? Váhivare evarahahini esuapahini eta tamutuirahi marataha ema Viya.

²⁵ Ánaqui te apana náitaresiraya, vaipa nácamunuimahi esu esena. Énaripa ena esenana váipavare nácamunuimahi ema ajaira. Nacutinapa ena ángeleana tiávihanahi te anuma eta vahi náitauchacacahini.

²⁶ Éti, váhivarepuca ácaicutiara eta yátupirahi eta vahi táepenahini eta náchanevana ena náepenaqueneana. Váhipuca ácaicutiara eta máechajiriruvana ema Viya májuchaqueneanahi ema víyahaini Moisés. Te juca Sagrada Escritura, eta te libro ticaijare Éxodo, téchajicapa ema Viya. Ánipa macahe: “Nútira yátupiquenenuhi Viya, macasiñaquenehi ema Abraham, ema Isaác émapa ema Jacobo” macahepa ema Viya.

²⁷ Nutupiruvahi numetacahe: Ema Viya, éma téchahi eta náitaresirana ena téhicanahi, tayanapane tépenanaripapuca. Eta náchanevana, túmivananarichucha títareca te mamirahu éma. Éti, ichape eta éjecapiravahi –máichavacapa ema Jesús.

*Etá tisuapacarepanahi te mavanairipiana ema Viya
(Mt 22.34-40)*

²⁸ Tacahe, matiarihivare ema émana escribáno. Masamaracahi eta nacanarajiriseracacahi. Máimativanepa eta táurivahi eta majicapirahi ema Jesús. Tásihasera, tíjaracavahi mayasereca ema Jesús, ánipa maicha:

–Tata, nuvaraha pimetacanuini ¿tájajahapuca eta vanairipi tisuapacarepanahi tayehe eta mavanairipiana ema Viya? –macahepa.

²⁹ Majicapapa ema Jesús:

–Eta máechajiriruva ema Viya te Sagrada Escritura, ani macahehi: “Esama, emutu eti achaneana israelítana. Nuti Viya, nucarichuhi nuti Iáquenu. Nacuija apanaina iáquenuina esíharajina.

³⁰ Tásiha, yátupina eta émunasiranuina nuti Iáquenu, táunasiraina te esamureana. Yátupina eta eacachanevairanuina núti. Epanerecha eta nímiturapiana tamutu sácheana, yátiana. Yátupina eta ecaemataneasiranu te tamutu eta ítupajijiasiravana”.

³¹ Jararihivare eta apana táehiruhi eta juca, ánvare tacahe: “Pémunacayare ema piparaepiyahi, tacuti eta pémunasiravahi píti”. Eta juca apinaquene vanairipi, tacachurica eta tasuapacareva tamutu eta apamuriana vanairipiana –macahepa ema Jesús.

³² Tacahe, máichapa ema escribáno:

–Yátupiquene, tata maestro, tétupicavahi eta péchajiriruva. Yátupihí eta macarichuirahi ema Viáquenu, eta nájinairahi apanainahini Viáquenuinahini.

³³ Yátupihivare tavaraha eta vémunasiraina ema Viáquenu, étapa eta víunasirayare te visamure, étapa eta vipanerechiraina eta máimiturapiana tamutu sácheana, étapa eta vicaemataneasiraina éma te tamutu eta vítupajijiasiravana, étapa eta vémunasiraina ema viparaepiyahi. Jéhesare, eta táuriva eta vémunasirahi táetavicahi eta táuriva eta víjaracasichira eta sárareana eta víjuchaqueneana eta me Viya. Táetavicahivare tayehe eta táuriva tamutu eta apamuriana víamavahuana eta me Viya –máichapa ema escribáno.

³⁴ Ema Jesús máimatiequenehapa eta táuriva eta majicapira ema achane. Tásiha, máichapa:

–Píti piánehi eta píjarasiravaina eta péhisirayare ema Viya –máichapa.

Tacahe, nájinapa nájaracavahini nayaserechahini ema Jesús eta náemejecapavachirayarehi éma.

Emá Cristo, yátupihí māmariéquenénihí emá rey David, Viyahivare éma
(Mt 22.41-46; Lc 20.41-44)

³⁵ Tacahe, emá Jesús tímiyanava tímiturecahi, eta máejasirahí eta te Templo. Ánipa macahe: —Ena escribánoana, ani tacahehí eta náimiturapiana: “Tiúchucayare emá Cristo, māmariéqueneyare emá víyarahainí rey David” nacahehí.

³⁶ Yátupihí emá Cristo achanequenehí eta máimahi taicha māmariéquenénihí emá víyarahainí David. Nuvarahasera epanerechaya eta juca máechajiriruvahí emá David te májurehí Salmo, ani macahehí: “Emá Viya máichapa emá Tata Náquenu Cristo: Yare péjaca te nuvaure, eta picuchapihayare eta nucaepuyusiraya te pimírahu ena ticatianacavianahí” macahepa.

³⁷ Emá David, eta máimijarechirahí emá Cristo, “Tata Náquenu”, ¿tájahapuca eta macayemaquenehí? Núti németeaca Viyahivare emá Cristo. ¿Tájaha íchahi éti? —máichavacapa.

Ena camuriqueneana achaneana náuricahí eta nasamararaca eta máimiturapiana emá Jesús.

Emá Jesús máimereuchavaca eta nájecapiravana ena escribánoana
(Mt 23.1-36; Lc 11.37-54; 20.45-47)

³⁸ Tímiyanavahí eta máimituresirahí emá Jesús, ánipa macahe:

—Échapavayare éti, machu éhica eta nayeherepiana ena escribánoana taicha tétavicavahí eta apimíranairahí éna. Tétavicavahí eta náurisirahí éna tíumajihána, navarairahí ticunachacareanayarehí nayehe ena achaneana eta nareligiósovanahí. Navarahavare ticapicahuayarehí eta náechajisiraya ena achaneana te jácani nácapajisihapahí éna.

³⁹ Tacutiqene tinerejiurucavana eta táurinaqueneana téjasihacareana, te tiyanana te viúrujisirarevana. Étaripa te nanisirana, ticaejacavanavare te jácani tiávihanahí eta tíurinisipana tinicacare.

⁴⁰ Tacutiqene naverejicavare eta nacayehequeneana ena tépenaimana, nájina najapanuquenéna. Tásiha, tépiyacavanapa religiósoanahí, tíupimána eta nayujarasira, namavarairahí tácaecherahini eta náichiraqueneanahí eta tamauriqueneana. Énasera tiápajucavanahí eta náicuñayayare muraca —macahepa emá Jesús.

Eta sunaquiruva esu máimaru tacachuricahí eta nanaquiruvana ena apamuriana achaneana

(Lc 21.1-4)

⁴¹ Eta máejasihahí emá Jesús, mávihahí te tamírahu eta chapamana eta nanacacuirarehí eta plata námavahuana ena achaneana. Máimararaca ena camuriqueneana eta nanacacuirá eta námavahuana. Natiarihíhí ena rícoana, tinaquicavanapahí eta ichapemuripanavaca.

⁴² Tacahe, títecapapa esu esena suépenaimaquene, páurehí ésu. Sunaquicahí eta apípechichahí eta suplatane, váhirichu tasivachahini.

⁴³ Tásiha, emá Jesús, eta máimairahí eta juca, máichumuripa ena máimitureana. Ánipa maicha:

—Ímaha esu suca esena páurechicha. Ácuneucha eta suémunasirahí emá Viya. Jéhesare ésu, típemanávahí eta sunaquiruva, sucachuricavacahí namutu ena apamuriana achaneana. Ichaperinehí eta sucunachacarevahí me Viya.

⁴⁴ Taicha namutu éna, tacarichu nanaquicahí eta náemacharajiana naplataneana. Ésusera esu suca páurehinéni, sunaquicahisera tamutu eta sucayehequenehí. Suítahi eta sunícavachayarehíni —máichapa.

13

Emá Jesús máimereucharipa eta táquipaisiravaya eta Templo
(Mt 24.1-2; Lc 21.5-6)

¹ Tacahe, tiyanayarehíni emá Jesús, énapa ena máimitureana. Eta náuchusiraya tayehe eta Templo, máichapa emá émana máimiture:

—¡Tata maestro! ¡Ímaha eta juca máriana! ¡Tétavicava eta táichapeva! ¡Tétavicava táurinava eta juca petí! —macahepa.

² Emá Jesús majicapapa:

—Tamapurujiyare eta juca táurinava eta pétisami ímahaquenehí puiti. Nutupiruva numetacahe: Járjapayare eta sácheyare ticaquipaicasiyare tamutu eta juca Témplosami. Téjanrepaicainapa tamutu eta juca táurinaqueneanahí ímahaqueneanahí puiti —máichapa.

Tatiarihíyare eta ecutiarareanaya te tánehipaicha eta táichecuraya
(Mt 24.3-28; Lc 21.7-24; 17.22-24)

³ Tacahe, tiyananapa eta te cerro ticaijare Olivoquiji, távihahi te apacharahi eta te tatavarapihi te tamirahuhi eta Templo. Te téjacanapa nacarichuhi eta te jena quinta, nayaserecapa eta macayemaquenehi. Matiarahi ema Pedro, émapa ema Jacobo, émapa ema Juan, émapa ema Andrés. Ánipa náicha:

⁴ –Vivaraha pimetacahavi. ¿Tájamuhupuca eta náimiaquipaisirayare eta Témplosami? ¿Jararihiyarepuca eta ecutiarareyare te tánehipaicha eta táitachiravayare eta apana péchajisihaqueaneana? –náichapa.

⁵ Tacahe, majicapapa ema Jesús:

–Ecuneuchavaicha yátupina, machu navayuacahe, taicha nárajapayare ena tépiyacavanayarepahi tímivasichavanayare nuyeh.

⁶ Nacaheyarepahi éna: “Nútiripa Cristo”. Nasapiha, navayuacayare ena camuriana achaneana.

⁷⁻⁸ Énerichuvare esamairicayare eta táehacacairayare eta ichapequeneana avasareana. Ticanarajiracananapa eta te avasareana tayerehiqueneana, énerichuvare ticauyayacarenapa guerraina eyehé éti. Váhiserá ecuarameca eta esamairirisiraya, taicha ene tacaheyare eta táepaniravayare eta ecutiarareanayare. Vuíchahasera étaimahi eta táichecui-rayare. Énerichuvare tatiarihiyareva eta ichape tayamurisiránaya eta apaquehe te jácáni távihanaya táitupiaruanayare. Tatiarihiyareva eta ichape ecuhamuhuyareva te jácáni avasareana. Ichape eta nacatajivairayare ena achaneana. Tamutu eta juca ecutiarareanayare eta táepaniravayare eta nátajivanayare ena achaneana.

⁹ Tásihasera eti nuchaneranahi, ecuneuchavayare, étumechavayare. Taicha natiarihiyare ena ticatianacaheanayare táichavenehi eta éhisiranuhi. Ticaratacaheanainapa, ecayaseserehinapa nayehe ena juéseana. Téstaheanainapava eta te náurujisirarevana. Tásiha, etiarihiyare éti tíamaheanaya te namirahu ena aquenucana, téhevere te namirahu ena Presidentean gobiernonahi, ecaviurevayare táichavenehi eta éhisiranuhi. Esapihasera éti, ecampuravainapa échajisianuyare.

¹⁰ Énerichuvare, éti nuchanerana ecametairuyareva eta tíurina echajirucava nayehe ena achaneana tayehe tamutu avasareana te juca apaquehe. Te ítecapapa te tamutu, tépanavayarehi eta táichecui-rayare.

¹¹ Tacahe, te jácáni nacaratacahepapuca, námahe te namirahu ena aquenucana, vahi ecueñamava tayehe eta jácáni échajiuchiravayare, ecatiuchiravaya. Échajisihaya eta échajirucavana májararuheyare ema Espíritu Santo te jena sache. Taicha máimahaheinepa. Tíjaracaheyare eta ítusirayare échajica. Vahi étijivaimahi eta échajisiraya.

¹² Natiarihiyareva nácani achaneana tíjararecanaya ena naparapequeneana, navarairahi náimicapaca táichavenénahi eta náehisiranuhi níti. Natiarihiyareva ena nácani náiyana, navarahayareva nájarareca ena nachichanaveana táichevenehi eta náehisiranuhi níti. Natiarihiyareva nácani nachichanaveana nacanarainapa ena náiyana, náimicapacainapa táichavenehi eta náehisiranuhi níti.

¹³ Namutuyaréni ena achaneana ticatianacaheanayare táichavenénahi eta éhisiranuhi. Téhesera ecamichahi tamutu, ímivanavahi eta éhisiranuhi te táitavapa tamutu, níti nucuchucuhahayare.

¹⁴ Numetacahevaneyare eta apana. Járajapayare eta sache táíñehiqueneyare. Tímerecavayare ena achane váinarajiquene. Mavanecayare ena machanerana náechipejisirayare eta tacapicahuquenehi Templo, nacuchucavacayare ena téhicanahi ema Viya. (Nácani navaraha nacaicutiara eta juca, tacamunuhi ticaravahuyare eta májurehi ema víyarahaini profetaini Daniel.) Tásiha te ímahapa eta juca, esamairicapuca, táuricapa etátájipa ejunavane, eti etiarihiqueneanahi te Judea. Ecájuheyare eta te céroana, étaina eyumursiavaina.

¹⁵ Nácani tiávihanahi te nayehe canchón te nasamairicapuca eta juca téchacarehi, táuricapa najunavane. Vaipa táuricahini nasiapanumahi te napenana, navehahini jácáni náeñamaqueneanainihi.

¹⁶ Nácani tachimararuanayare te vamáhi eta téchacarehi, táuricapa vaipa nacuchava tayehe eta avasare, tayanapané náeñamahi eta nayereruvana.

¹⁷ ¡Páureanasami nácani esenana tachimararuanayare nácani ticajarianhipuca, nácani esenana ticachichanahi eta amuya táíjacachaha!

¹⁸ Eta tacahe, eyaseacayare ema Viya tacuija táichejicahe; váhivare tacuchimaracahe eta ichape tíquiva te achene te eyanapapuca ejuna*.

¹⁹ Te jena sácheanayare, tétavicavayare eta nacatajivairayarehi ena achaneana. Tájiña tácutimahi eta táíñehivayare eta nacatajivairayare, te táepaniravahi eta máepiyasirahi ema Viya eta juca apaquehe. Te táequenenapa eta tíñehiyare, tájínainapa tácutimahi.

* 13:18 Ema Jesús máechajisihahi eta ticasarahimuhu, tíquivamuhuvare te jena mávasa Judea taicha ticajaraequenehi eta napaisirahi.

²⁰ Nájina tacaitiruimahi eta nacatajivairayarehi ichape. Macaichecavaneyare ema Viya eta masemavahi ema maca achane váinarajiquene, mavarairahi ema Viya macuchucuhavaca ena machanerana manerejiruana, majapanuqueneanahivare. Taicha te vahi macucaicheca ema Viya, máitamurihahipucaini macapapajicavaca namutu ena achaneana ema maca achane.

²¹⁻²² Énerichuvare te tánehipaicha eta juca, natiarihinapa ena tivayuarahiana tépiyacavanayare Cristo tímivasichavanainapa núti. Natiarihivare ena tímicutijiricavanayare profetana mavaneruinahini ema Viya. Áninapa nacaheyare: “Yare, éhicayare ema Cristo. Matiarhipahi te juca vitaracu”. Ena apamuriana ánivare nacaheya: “Náepiyahiravahi éna. Ema Cristo mávihahi te viávasa víti”. Étiserá vahi ecusuapavaca. Eta navarairahi tivayua-cheanaya eti machanerana ema Tata, náituruequenehayare naicha eta ichapequeneana tíaramicareana ecutiarareanayare. Camurianasamiyare ena navayuaruanayare.

²³ Tásiha, ecuneuchavaya nayehe. Numetacahevanehi puiti apaesa écharipa –máichapa.

*Eta machavirayare ema Manerejiruhi ema Viya
(Mt 24.29-35, 42-44; Lc 21.25-36)*

²⁴ Máichavarepa ema Jesús:

–Te jena sácheanayare te táequenénapa eta jena nacatajivairayare ichape ena achaneana, eta sache témahainapa, étaripa eta caje váipavare tijarahimahi.

²⁵ Témiricanainavarepa eta jarairiquiana. Étaripa eta tiávihanahi te anuma vimaimahaqueneanahi, énerichuvare tiyamuricanainapa, tiyejejecavanainapa.

²⁶ Nupaenumavainapa níteca nuchava núti Manerejirunuhi ema Viya. Namutu tímahanuanayare eta núcupaisirayare. Tiámanuinapaipa eta úcaji. Tétavicavayare eta nujaraivayarepahi, níñehinapaipa.

²⁷ Tacahe, nuvanecainapa ena ángeleana nacurujicayare namutu ena nuchanerana nunerejiruanahi, tiásihanayare te tamutu eta juca apaquehe te jácani návihahi.

²⁸ Tiuri puiti, nuvaraha nímicutichinahe eta jácani yucuquí. Eta táitsivachiravavacapa eta tapacajiana, te ímahapa eta tajimuyairapa eta tatavaquí, tíuchucayarepa eta tapacajianaya arairu, tímaticarehi tínehiripa eta únemuhuirayarepa.

²⁹ Ene tacahehi, te ímahayarepa tacaacherapa eta júcana ecutiarareana, ímahayarepa eta tánehirainapa eta nuchavira.

³⁰ Numetacahevanecha: Vuíchaha títavanaimahi ena achaneana náitarerunaichaha te táitecapapa eta júcana ecutiarareanayare.

³¹ Titavainapa eta anuma éropa eta apaquehe. Tativayaresera títauchava tamutu eta numetaruheanahi.

³² Eta juca tíaramicareyarechucha. Nájina téchaimahi tájamuhuyarepuca eta táitauchiravayare, énaripa ena ángeleana vahi náechahini. Nútivanerécahipucaini néchahini. Macarichu ema Tata, éma téchahi.

³³ Eta tacahe, etsecavahi ecaunehivare éti, eyujarauchavayareva. Taicha vahi echa eta tájamuhuyarepuca eta nítesirayarepa.

³⁴⁻³⁶ Tamutu eta juca nímicutichinahe eta máichaquenehi ema mácani achane eta te tiyanayare tipairirica. Te tiyanayarépa, májaracavaca namutu ena mamusurana eta náemataneana, matuparacavacapa eta najaneasirayarehi tamutu. Tacahe, matuparacavarepa ema tijanearecarahi eta tapaja, macuneyarehi eta jácani hora machavira ema máquenu, téhepuca timapicucuhipa, téhepuca enumuhu yati, téhepuca tijararahiyarepa, téhepuca yáticarahi. Ene ecaheyare éti. Ecauneya machu níjahúchava nítecapauchahe, machu nuchimaracahe ímacacaruhi. Taicha vahi échaimahi tájamuhupuca nítecapayare nuti Iáquenu.

³⁷ Eta juca numetaruheanahi puiti, nuvaraha emetacayarevare ena echamuriana, apaesa ecauneyare emutu –máichapa ema Jesús.

14

*Napanerechaipahi ena tuparairucana eta nacaratasirayare ema Jesús
(Mt 26.1-5; Lc 22.1-2; Jn 11.45-53)*

¹ Tacahe, apinarinecha sache eta piesta ticajare Pascua, eta náepanavaira eta semana eta nanisirahi étachucha pan mayehere levadura. Tacahe, ena tuparairucana énapa ena escribánoana navarahaipaicha náimicapaca ema Jesús. Tásiha natanucahi eta táicharacavaya eta nacaratasirayare. Váhisera navaraha eta nanecapahini ena achaneana.

² Ánipa nacahe:

—Vuíchaha vicucarataca éma achichu juca piéstairaya. Taicha camurianayarehi ena achaneana, machu tájahapuca náicharachavi taicha navarahayarehi nacatiucha éma. Vicuchapa nayanana —nacahepa.

Esu esena tíamasichahi ema Jesús te tájiyemaquene perfume
(Mt 26.6-13; Jn 12.1-8)

³ Tacahe, ema Jesús tiyanapa tichava eta te avasarechicha Betania. Máichuhaquenehi eta mananisiraya mayehe ema achane ticaizare Simón ema leprosoinihi. Tacahe, eta manisirahi, sucahepaipahi esu ésuna esena. Suámapahi eta perfume te bótechicha. Ticaizare nardo eta juca tíjiyema amairiama. Táetaviuchahi eta tasivachavahi. Supauchapa ema Jesús. Suvechujhapa eta bótechicha, tásiha, suépusasicapa eta tájiyemaquene perfume.

⁴ Natiarihiserá ena váhiquene náuricahini eta suémepuresirahi eta tasivachaquene perfume, suámasichirahi ema Jesús. Ánipa nacahe:

⁵ —¿Tájaha tacayema suémepureca eta juca tasivachaquenehi perfume? Tiúripanahini víjararechahini eta juca tájiyemaquenehi. Vivehahini eta camuriquene plata, tásiha, vímicatashihahini ena páureana. ¡Máechemarairahahi esu suca esena! —nacahepa.

⁶ Émasera ema Jesús máuricapa eta suíchaquenehi. Ánipa máicha:
—Ésamirica esu suca esena. ¿Tájaha tacayema ecaeahihi éti esu suca? Tétavicava eta táuriva eta suíchiranuhi.

⁷ Ena páureanasami, támutuchucha sácheana eta ecachaneravacayare éna. Te jácani ávarahapapuca ímicatayare, nararihi ena ticamunuana. Nútisera vahi nánasiquenémahi eta eyehe.

⁸ Esu suca suíchahi eta suímirataharuvahi. Eta juca suépusahasiranuhi eta juca perfume. Sucainapucahi ésu eta suíjyechirahi eta náquehe tayeheyarehi eta nucaecarasirayare.

⁹ Nutupiruva numetacahe: Nácani ticametarairuanayare eta tiúrina echajirirucava, náechajisihayarevare eta juca suíchaquenehi esu suca esena. Témechanayare suyehe te tamutu avasareana te juca apaquehe —macahepa.

Eta májjararesirahi ema Júlasí ema Jesús
(Mt 26.14-16; Lc 22.3-6)

¹⁰ Tacahe, tiyanapa ema Júlasí, émarichuhi nachamuri ena dócequeneana apóstoleana. Mapauchapa ena tuparairucana, téchajiripanava eta májjararesirayare ema Jesús eta nayehe.

¹¹ Tacahe, tiúrisamureanarine ichape eta nasamirahi eta mavarairahi májjararecayare ema Jesús. Tásiha, nametacapa eta nájjarasirayarehi eta plata. Tásiha, jéhevarepa ema Júlasí matanucaipa eta máicharachayarehi eta máimicaratasirayarehi ema Jesús.

Ema Jesús mánimurihapa ena máimitureana
(Mt 26.17-29; Lc 22.7-13; Jn 13.21-30)

¹² Tacahe, títecapapa eta piesta Pascua, te tépanavahi eta semanahi nanicahi eta pan mayehere levadura. Étarichuhi eta sáche nacapasihahi eta uvesachicha naniruyarehi te yátipa. Ena máimitureana nayaserecapa ema Jesús:

—¿Táviha pivarahahi vácaijuhe eta vétupirisiava eta vinisirayare eta uvesachicha eta viyeherepi? —nacahepa.

¹³ Tacahe, mavanecapa ena apinana máimitureana. Máichavacapa:
—Eyana tayehe eta Jerusalén. Te ítecapayarepa tayehe, iácapajicayare ema émana achane tíamapahi eta une te yupi. Éhicayare éma.

¹⁴ Eta te peti masiapihayare, éti apana esiapayareva. Tásiha, emetacayare ema ticayehe eta peti, ani íchayare: “Ema viyehe Maestro tiyanecahavihi viyaserepanavi pímechahavi eta cuarto vinisihayare eta uvesachicha eta viyeherepi, vicachaneyare éma” íchayare.

¹⁵ Tásiha, éma tímechahénapa eta ichape cuarto te anaquehe piso. Táuriquenépahi eta jácara téjasihacareana, tacaetupirihiqueneripa. Tásiha, étupiricapa eta viniruyare eta ánaqui —máichapa ema Jesús.

¹⁶ Tacahe, tiyananapa nacajuhe te Jerusalén ena apinana vanairucana. Jéhesareinehi náimahapa étapachuhi eta macayemaqueneanahi ema Jesús. Tacahe, náetupiricapa eta naniruyare tayehe eta Pascua.

¹⁷ Tacahe, te yátipa títecapapa ema Jesús macachanepaipa ena apamuriana apóstoleana.

¹⁸ Eta náejasiraripahi tinicanaripa, máichamuripa éna ema Jesús:
—Jéhesareinehi, te etaracu éti, mararihi ema émana tíjararecanuyare, émarichu tinicahi nucachanehi —máichapa.

¹⁹ Tacahe, ichaperinehi eta máimipaneresiravacahi éna eta juca máichiravacahi. Nayaserecapa ena émanapachu, ánipa náicha:

—¿Nútichupuca jácani? —macahepa ema émana.

—¿Nútichupuca? —macahevarepa ema apana.

²⁰ Tacahe, majicapapa ema Jesús:

—Ema émana te etaracu eti dócequeneana. Mácani néniruyare eta pan néchipaejiruhi te juca nucuuruja, émara ema tíjararecanuyare.

²¹ Nuti Manerejirunuhi ema Viya, étaipaichuhi eta nacapasiranuyarehi, títauchavayarehi eta nuyehé eta táechajiriruvahi eta Sagrada Escritura. ¡Páuresamisera ema tíjararecanuyare! ¡Muracayare eta mácuñayare! ¡Tiúripaichuhini te vahi macuchucahini te sujuhe esu máena! —macahepa.

Ema Jesús máimereuchahi eta macaejasiraya eta arairu matratune ema Maiyi
(Mt 26.26-29; Lc 22.14-20; 1 Co 11.23-26)

²² Tacahe, eta nanisirahi, mavehapa eta pan ema Jesús. Mahasulupayachapa ema Viya. Mayuvetucapa májaracavacapa ena máimitureana. Tacahe, máichavacapa:
—Eta juca néche. Enica —macahepa.

²³ Tacahe, mavehavarepa eta vasu náerirare, mahasulupayachavarepa ema Viya. Tásiha, májaracavarepa ena máimitureana.

²⁴ Te náerapaipahi, máichavacapa:

—Eta juca eta nítine. Éta táepusairuvayare étarichuvare táicutiarayare eta nufirmachirahyare eta arairu matratune ema Vicaiyaquene, nucaejasirayareva eta matratune apaesa ejacapacare mayehe, ichapemurivayarepahi éti.

²⁵ Jéhesaréinehisera, numetacahe: Vaípa nápechaváimahi nérahivaréni eta juca tachi eta uva, tíamainucava te táitauchavapa eta nusiapiraya eta nucavacureiraya, nucajupahairaya ema Tata Nucaiyaquene. Te jena sache, nújaracaheya vérainapa eta aramaruama —máichapa.

Ema Jesús máimereucha ema Pedro tépiyacavayare vahi máimati ema Jesús
(Mt 26.30-35; Lc 22.31-34; Jn 13.36-38)

²⁶ Eta náitanesirapa, tíjiranapa eta jirasare eta nahasulupayachirahi ema Viya. Te títipiricanapa, tíuchucanapa, nacajihépa eta te huerta Getsemani tíávihi eta táemiripaisinehi eta cerro ticajjare Olivoquiji.

²⁷ Eta napaisirapahi, máichavacapa ema Jesús:

—Puiti juca yati ejunijicanuyare emutu éti, taicha epicayare eta náicharasiranuyarehi. Tásiha, títauchavayarehi eta máechajiriruvahi ema Tata eta te Sagrada Escritura: “Nísapayare nacarataca ema Pastor, nacapasirayaresami. Tásiha, tíjunaracanainapa eta uvesana macurujiruanainihi” macahepa.

²⁸ Téhesera te néchepucapa te nécarí, nínapucainapa nuyanainapa te Galilea. Ánaqui nucuchapiaheyare éti —máichapa ema Jesús.

²⁹ Émasera ema Pedro máichapa:

—Tayanapane, Tata, najunijicavipuca ena apamuriana, nútisera vahi nujunijicavimahi —máichapa.

³⁰ Ema Jesús máichavarepa:

—Nutupiruva numetacavi pítisami Pedro: Puiti juca yati, te apíhénapa eta táechajisirayare eta varayu, mapahe eta pépiyasiravayare vahi pímatinu —máichapa.

³¹ Ema Pedro tíjaranurusi eta majicapirahi. Ánipa macahe:

—Tayanapanepuca pímicapacanu, váhiquenesera népiyacavaimahi vahi nímativi, váhivare nínajiacavimahi —máichapa.

Étarichuhivare tacahehi eta náechajiriruvahi ena apamuriana máimitureana.

Ema Jesús tíyujaraca te Getsemani
(Mt 26.36-46; Lc 22.39-46)

³² Tacahe, títecapanapa eta te quinta Getsemani. Tacahe, máichamuripa ena máimitureana:
—Éjacaichaha eta ani te juca. Ecuchapanuchaha. Núti nuyujarapanayare —máichapa.

³³ Tacahe, mámapa ánaquipana ema Pedro, émapa ema Jacobo, émapa ema Juan. Tépanavapa téñamava eta masamure, taicha muraca eta máichavaquenévayarehi.

³⁴ Tacahe, máichavacapa éna:

—Tétavicava eta táéñamirava muraca eta nusamure. Tavaraha ticapacanu. Ánasichaha ani te juca. Váhiserá ecuimaca. Ecuneuchanuhi —máichavacapa.

³⁵⁻³⁶ Tacahe, típaipanapa ánaquipanachichahi éma. Tiáquipaicavapa eta te apaquehe. Eta mayujarasirahi, ánipa macahe:

—Tátachicha Nucaiyaquene, píti pirataha tamutu. Picatajicanupaini. Váhini tacuitauchavaini eta níchavaquenévayare. Váhini picuisapaini eta nucatajivairaya. Níjaracavasera nútí eta nítauchiraya eta pivarahaquenehi píti —macahepa.

³⁷ Tásiha, téchepucapa. Tichavapa eta te návihahi ena máimitureana. Máimaharinehi éna, tímacanarichucha. Máichapa ema Pedro:

—Piti Simón, ¿pímacarichucha? ¿Tájaha tacayema pímacahi? Váiparinehi pímicatcanuhini pijaneacanhini étanainahipucaini hora pácahehini.

³⁸ Éjamiuchava. Eyujarauchava apaesaina. Eyaseaca ema Viya eta etumevaina apaesa vahi macuiturucahe ema Satanás. Yátupihinéni eta iáchanevana taratahahi ticaratacava. Étasera eta éche máteji, vahi taratahaimahi ticaratacava —máichapa.

³⁹ Tacahe, tíapechavavarepa tiyana tiyujaraca. Eta mayujarasirahi, étarichuva eta máechajiriruvanahi.

⁴⁰ Tásiha, tichavavanepa eta te návihahi ena máimitureana. Máimahavarepa tímacana-ripavare, taicha muracaripa eta náechapune. Tájinvare nacayemahini táichavenehi eta natsirirahi. Tacahe, tiyanavarepa tiyujarapana.

⁴¹ Te mapahequenepa eta mayujarasirahi, tichavapa. Máichavacapa:
—¿Iápechavaipava ímaca? ¿Vuíchahapuca enarahacaquenénahini? ¡Taratap! Jéhesare, puiti títecapapa eta nutuparahahi nacaratasiranuyare ena ticatianacanuani.

⁴² Ávane ema tíjararecanuyare. Échepuca. Viyana viácapavaca —máichavacapa.

Nacaratacapa ema Jesús

(Mt 26.47-56; Lc 22.47-53; Jn 18.2-11)

⁴³ Téchajiricavaichaha ema Jesús, macahepainecha ema Júlsi. Mámamurihapaipahi ena camuriqueneana suntaruana. Ticaepuchiriquianapaipahi, étapa eta nayeheana espada. Éna, vanairucanahi nayehe ena ticatianacanahi ema Jesús.

⁴⁴ Ema Júlsi, tatiarihíhi eta máicitariyarehi eta náimatirayarehi ena suntaruana ema Jesús. Ani tacahehi eta máechajiriruvahi ema Júlsi:

—Ecnenuyare. Ema nétserareruyare, éma ecaratacaya. Machu ecaitica, muraca eta ecaratasiraina —máichavacapa.

⁴⁵ Te títecapanapa, mapauchapa ema Júlsi ema Jesús. Máichapa:

—Yátiheipa, tata Maestro —máichapa.

⁴⁶ Tásiha, máetserarecapa. Tacahe, ena suntaruana enevanepa nacaratacahi.

⁴⁷ Tacahe, ema émana apóstole, eta máimaira nacaratasirahi ema Jesús, mavehapa eta mayehe espada. Máquijica eta machaca ema mamusura ema aquenuca Caifás.

⁴⁸ Émasera ema Jesús máichavacapa ena suntaruana:

—¿Tájaha tacayema ecasiña eta espada, ecaepuchiriquipaipahivare eta ecaratasiranuyare, tímicitijiricavapa námerahihini nútí?

⁴⁹ Étayapasica cape juca tamutuhi sácheana nucachanehehi nímitucahehi tayehe eta Templo. Váhivare epatsicavahini ecaratacanuhini. Tacahehisera éta, títauchavayarehi tamutu eta téchajiriruvana eta Sagrada Escritura —máichavacapa.

⁵⁰ Tacahe, tijunaracanapa namutu ena apóstoleana nanaquicapa ema Jesús.

⁵¹ Matarihivare ema émana amaperu achane. Téhicapahi. Ticaepacuhapahi eta te sávana. Tacahe, nacaratacavarepa éma apana.

⁵² Tíjunahisera manaquicapa eta máepacuhaini sávana. Tiyana mamuriarepaipa.

Nacatupihapa ema Jesús te namirahu ena aquenucarahana

(Mt 26.57-68; Lc 22.54-55, 63-71; Jn 18.12-14, 19-24)

⁵³⁻⁵⁵ Tacahe, nacaiticapapa ema Jesús te mapena ema corregidor. Ema Pedro, máehiequenehapahi éna, mayererehipahisera. Títujicavapa tisiapa eta te canchón tayehe eta mapena ema corregidor. Tásiha, téjacapa macachanemuripa ena suntaruana, tíasacavahi eta te yucu. Váhisera náimatihini éma. Tacahe, tíurujicavanapa namutuyaréni ena apamuriana tuparairucana énapa ena aquenucarahana énapa ena escribánoana. Napanerechaipa, natanunucaripa eta ticaviureyarehi ema Jesús. Náichuhapa ena tépiyaequenehanayarehi eta matapiravayarehi náicha, navarairahi náimicapacayarehi éma. Váhisera náichimavahini eta maviurevainahini.

⁵⁶ Camurianahinéni ena tépiyaequenehanahi éma, váhisera tácuticacahini eta nacayemaqueneanahi.

⁵⁷ Titupihanavarepa ena apamuriana tépiyahirahianayarehi. Ánipa macahe ema émana eta máepiyahiraivahi:

⁵⁸ —Nútí nusamahi ani macahehi ema maca: “Nútí nuvetataicayare eta juca Templo náepiyaruhi ena achaneana. Tásiha, te mapánaquenénapa sache, nímuchavayare nucatupíha eta apana Templo. Váipasera tácutimahi eta náepiyaruhi ena achaneana”. Eta juca nusamaquenehi eta máechajiriruvanahi ema Jesús —macahepa ema tépiyahirahi.

⁵⁹ Váhiquenesera tácuticacahini eta máechajiriruvanahi nayehe ena apamuriana.

⁶⁰ Tacahe, ema corregidor téchepucapa eta mayaseresirayarehi ema Jesús. Ánipa maicha:
—¿Tájaha tacayema vahi pijicapavaca ena nani eta pimetauchacasivahi? ¿Yátupipuca eta nacayemaquenehi? Taicha vímahavi eta vahi picatiuchiravainahini —máichapa.

61 Émasera ema Jesús vahi majicapavacahini. Timatinaichucha. Tásiha, mápechavare mayasereca ema corregidor:

—Nuvaraha pimetacanu. ¿Píti pímiijachavahíjicacha pítihi Cristo ema vicuchapaquenehi, Machicha ema Viya? —máichapa.

62 Tacahe, ema Jesús majicapapa:

—Yátupi nuti Cristonu. Nuti Manerejirunuhi ema Viya. Tásiha, numetacaheyare eta apana. Járápaya eta sáchezare ímahanuyare eta néjasirayare te mavaure ema Viya máitupajijihaguenehi. Ímahanuyareva núti eta núcupaisirayareva, násihayare te anuma, támiranuyarepahi eta úcaji —máichapa.

63-64 Tacahe, ema corregidor eta masamirahi, tise marinehi ichape. Tivetsayujicavapa eta mamuiraha eta masemanevahi. Tásiha, macahepa:

—¡Émaquenepa visama ema maca tépiyacavahi Machicha ema Viya! Tétavicavaipa eta maviureva taicha macaerahahi ema Viya. Vaipa tácomesa vitanucahina ena testigoanayare. Puiti esamaripa éti eta juca macayemaquenehi. ¿Tájaha víharacayare puiti ema maca? —macahepa.

Tacahe, namutupa najicapa:

—¡Ticaviurevaipa! ¡Étaina táimicapaca! —nacahepa.

65 Tacahe, nátutuáca éma. Náepacauquichavarepa, tásiha, náehamirahavarepa te mamira. Tásiha, náichapa:

—Te yátupihípica pítihi Cristo, pímatinuyare nájahanupuca nuti néhavahi. ¡Pimetacahavi! —náichapa.

Énapa ena suntaruana, te námapaipahi, náehavarepa. Ichape eta náichirahi.

*Éma Pedro tépiyacavapa vahi máimati ema Jesús
(Mt 26.69-75; Lc 22.56-62; Jn 18.15-18, 25-29)*

66 Tiuri, ema Pedro, matiarhichahahi eta te canchón. Tacahe, sucahepaipahi esu mavanara ema corregidor.

67 Suímahapa ema Pedro, tiásacavahi. Suímararacapa eta mamira. Tásiha, suíchapa:

—Németeaca pítrichu ñichamuri eñi ñica Jesús, eñi nazareno —suíchapa.

68 Émasera majicapapa:

—Vahi nímati ema péchajisihaguenehi. ¿Távihapuca pímatinenuhi píti? —máichapa.

Tacahe, tiyanapa éma eta te portón. Téchajicavanepa eta varayu.

69 Suímahavarepa tiápechava esu esena. Sumetacavacapa ena natiarihiqueneanahi, suíchapa:

—Éñi ñica eñi nachamuri ena téhicanahi eñi Jesús —suíchapa.

70 Tiápechavavarepa ema Pedro tépiyacava vahi máimatihini ema Jesús. Tacahe, te tiyere-rehachichavare, ena natiarihiquenehi náichapa ema Pedro:

—Yátupiquene pítrichu machamuri ema maena Jesús, taicha eta péchajisira, tímaticarehi eta piásihairahi te Galilea —náichapa.

71 Tacahe, majicapapa:

—Máicuñacanuine ema Viya, te vahi nucucahe yátupina. Váhiquenesera nímati ema achane échajisihaguenehi —macahepa.

72 Enurujipa tiápechava téchajica eta varayu. Tíjháchavapa téchava ema Pedro eta macayemaquenehi ema Jesús: “Te tamirahuinapaichaha eta apihequeneña téchajica eta varayu, píti mapahenaripa eta pépiyacavayare vahi pímatinu”. Eta máechavairahi ema Pedro, tépanavapa tíyaha.

15

*Námapa ema Jesús te mamirahu ema Pilato
(Mt 27.1-2, 11-14; Lc 23.1-5; Jn 18.28-38)*

1 Te tíjarahipa, tiápechavanavarepa tíurujicavana namutuyaréni ena aquenucarahana, taicha náichuhaqueneanahi ena tuparairucana, éna escribánoana. Tiyaserejiricapanapa tájahapuca eta náicharacayarehi ema Jesús. Tacahe, nacuchucapa ticaítihapaipa eta námirapahi te mamirahu ema Prefecto Poncio Pilato. Eta máimairahi ema Pilato ema Jesús, mavarahapa máimatiyarehi éma.

2 Tacahe, mayaserecapa:

—¿Yátupisareji réyvihi píti nayehe ena pijaneanana israelítana? —máichapa.

Éma Jesús majicapapa:

—Pétupicavahi eta juca piyaseresiranuhi. Yátupihí eta nurreyvahi —máichapa.

3 Tásiha, ena tuparairucana nametauchaipa ema Jesús, camuri eta maviurevahi náicha.

4 Tacahe, mápechavare mayasereca ema Pilato. Máichapa:

—¿Vahi péchajuchava eta juca nametauchiravihi? Camuri eta piviuerevahi náicha — máichapa.

⁵ Émasera ema Jesús váhiquene majicapahini. Tásiha, máramipa ema Pilato.

*Emá Pilato macavanairipipa eta náetatasiraya ema Jesús
(Mt 27.15-26; Lc 23.13-25; Jn 18.38-19.16)*

⁶ Tiuri puiti, tatiarihi eta mayeherepihi ema Pilato te Páscuamuhua. Macaiticayarehi ema émana preso mácani nayasearuyarehi ena achaneana.

⁷ Tacahe, natiarihihi eta te cárcel ena ajairana ticaeratanahi. Ichape eta naviurevahi ena téhajiricarahiana te revolución, nacapasirapahi ena achaneana. Te namuri, matiarhihihi ema achane ticaijare Barrabás.

⁸ Tásiha, ena achaneana nayaseacapa ema Pilato máichahini eta mayeherepi. Ánipa náicha: —Vivaraha picha eta piyeherepi te Páscuamuhua —náichapa.

⁹ Tacahe, mayaseremurihapa ema Pilato:

—¿Evarahapuca nucaitica ema eyehe Rey, iáquenumuri eti israelítana? —macahepa ema Pilato.

¹⁰ (Taicha ema Pilato máimatiacaripahi eta nametauchirahi ema Jesús ena tuparairucana taicha nacapinaruhi éma.)

¹¹ Énasera ena tuparairucana náimitumuriharipa ena achaneana, eta nayaseasirayarehi émaina máuchucuha ema Barrabás.

¹² Tacahe, ema Pilato mayaseremurihavare. Máichapa:

—¿Tájahasica nícharacayare ema Jesús ema íjarechaquenehi Rey iáquenumuri eti israelítana? —máichamuripa.

¹³ Éna, tipiaracanapa eta najicapirahi:

—¡Pémetatareca te crusu! —nacahepa.

¹⁴ Tásiha, mápechavarepa mayaseremuriha, ánipa máicha:

—¿Tájaha tacayemahi eyaseacahi eta németataresiraya ema maca? ¿Tájahasica eta maviurevahi? —máichapa.

Énasera tipiaracanavare muracapanapa:

—¡Pémetatareca te crusu! —nacahepa.

¹⁵ Ema Pilato mavarahahi tíuriyarehi nayehe ena achaneana. Tacahe, mavanecapa ena suntaruana, ánipa maicha:

—Ecaiticaya ema Barrabás. Émasera ema maca Jesús, iámayare, éstacayare. Étatacayareva te crusu —máichavacapa.

*Nacaecahijiricava ema Jesús ena suntaruana
(Mt 27.27-31; Jn 19.1-3)*

¹⁶ Tacahe, ena suntaruana námapa ema Jesús tayehe eta náestasihayarehi te távirarehi eta guardia. Náimichuhavarepa namutu ena apamuriana suntaruana námurivana.

¹⁷ Te náitauchapa eta náestahirahi éma, namuriachapa eta muíriare mularume. Náitsame-macapa eta itapepi eta majarapiyarehi. Nanacapa te machuti.

¹⁸⁻¹⁹ Nacavayumarajipa. Náepuyumirauchavarepa, ánipa náicha:

—Tata, ípítitajai nayehevihíji Rey ena israelítana! —nacahepa.

Náepuchisicapa eta te machuti tayehe eta curinaquí. Nátutuácavarepa.

²⁰ Tacahe, te titavanapa eta nacaetemajirisirahi, navejamuhiacapa eta mularume. Nanacavarepa eta mamuirihachu. Tásiha, námapa tayehe eta macaetataiyarehi te crusu.

Náetatacapa ema Jesús te crusu

(Mt 27.32-44; Lc 23.26-43; Jn 19.17-27)

²¹ Eta napaisirapahi te calle, nacapajicapa ema achane ticaijare Simón. Éma, másihapahi te máesane. Napamicapa éma manaracuha eta macurusura ema Jesús. (Ema maca Simón, máuchusinehi te jena avasare Cirene. Éma, máiyahi ema Alejandro émapa ema Rufo.)

²² Tacahe, nacaitecapapa tayehe eta masihi nacaetatairare ticaijare Gólgota.

²³ Ánaquípa náesichinehi ema Jesús eta vino ticasiriquiama eta ipuruji tisucareama ticaijare mirra. Váhisera máerahini.

²⁴ Tacahe, náetatacapa éma te crusu. Ena suntaruana, nasuertehachapa eta mamuirihaini eta nájarajirisiracayare.

²⁵ Te náetatacapa éma, las nuéveripa eta yáticarahi.

²⁶ Te tápusi eta macurusura, tatiarihihivare eta ajureca táechajisihahi eta tiviuachahi eta máepenirayarehi. Ani tacahehi eta ajureca: “Ema Rey nayehe ena israelítana”.

²⁷ Natiarihivare ena apinana tiámerahiana. Ticaetatanahivare te machacaya, ema émana te mavaure, ema apana te sapa.

²⁸ Tacahe, tamutu títauchavahi eta táechajiriruvana eta Sagrada Escritura, ani tacahe: “Náimijachahi ema nachamurihi ena namauriqueneana”.

²⁹ Tacahe, ena tíanucumirauchanapahi, tépiupiusicavanapaipa eta nacaecahirapaipahi ema Jesús. Ánipa nacahe:

—¡Pítitají! Pícahechajiriruvahi eta piáquipaisirayarehíji eta Templo, piratahahivaréji pímuchava picatupíhi eta arairu Templo te mapanayarericuhíji sache. Puiti vivaraha vímaha eta pítipajíjasiravahi.

³⁰ Piúcupaica te jara crusu. ¡Picatiuchava pítijivaina! —náichapa.

³¹ Énerichuvare ena tuparairucana nacaecahijiricavare, énapa ena escribánoana. Náichajiricácapa:

—Ema mácacacha, macahehi eta máechajiriruvahi eta maratahairahíji macatiuchavaca ena apamuriana achaneana. Tásiha, puiti váhivare máratahahini émajivainahini macatiuchavahini eta te jara mávihahi.

³² Te yátupinahini Cristo, Reynahini viyehe viti israelítana, macatiuchavaipahini, ¿masi? Máucupaicaripahini te jara crusu, ¿masi? Visuapasarepaini eta vímairainahini —nacahepa.

Ena tíamerahiana ticaetatanahivare te machacaya, énerichuvare nacaecahivare éna apanavare.

Eta máepenirahi ema Jesús

(Mt 27.45-56; Lc 23.44-49; Jn 19.28-30)

³³ Tacahe, te las dócequenepa, témahapa eta sache. Timapícupa tamutu eta apaquehe. Mapana hora eta tamapícuirahi.

³⁴ Tásiha, te las trespa sache, tipiaracapa muraca ema Jesús, ánipa macahe:

—Elí, Elí, ¡lama sabactani! —te véchajiriruva, ani tacahe: “¡Tata Nucaiyaquene! ¡Tata Nucaiyaquene! ¡Vahi picujunijcanu!”

³⁵ Tacahe, ena natiarihiqueneanahi ena tisamanahi, ánivarepa nacahe:

—Esama. Ema maca achane mapiaracahi ema víyarahaini profeta Elías —nacahepa.

³⁶ Ema apana tiyanapa tijunapahi máepanapa eta machuchujiruyarehi eta tisisica vino. Máitiacapa te tíuqui curinaquí. Máimicapayacapa eta majaca, machuchujicayarehi. Tacahe, máichapa:

—Ésamiricachucha. Vímahayare te títecapayarepuca macatiuchapana ema Elías — máichapa.

³⁷ Tacahe, tíapechavavarepa tipiaraca muraca ema Jesús. Tépenapa.

³⁸ Tásiha, tíjahúchavapa tétsayumecapa eta cortina tayehe eta Templo. Tépanava te anuquehe, tíchechuha te apaquehe.

³⁹ Tásiha, ema nacapítara ena santaruana romanoana, eta matupihairahi máimararairahi te mamirahu ema Jesús, masamirahi eta mapiarasirahi, ánipa macahehi:

—Yátupiquenerichuyapa Machicha ema Viya ema maca —nacahepa.

⁴⁰ Tacahe, natiarihihivare ena esenana. Náimararacahi, nayererehihisera. Te nataracu, sutiarihihi esu María Magdalena, esu Salomé, ésupa esu apana María. (Esu suca María, máenahi ema Jacobochicha émapa ema José.)

⁴¹ Ena nani esenana ena náumurivana ena téhicarairicanapahi téchapajiricanapahi ema Jesús eta mapaisirapahi te másihapa te Galilea. Natiarihivare ena camuriana apamuriana esenana náitecapaquenehi te Jerusalén, téhicanapahi éma.

Nacucupaicapa te crusu ema Jesús, náecarayarepa

(Mt 27.57-61; Lc 23.50-56; Jn 19.38-42)

⁴²⁻⁴³ Matarihihivare ema achane ticaijare José*. Ticavasahi te Arimatea te Judea. Éma, tétavicavahi eta mapicauchacarevahi. Masuapahi ema Jesús eta émairahi ema Cristo mavaneruhi ema Viya, étaripa eta émairahi ema téchayarehi namutu ena achaneana. Ema maca José, náumurivahi ena aqenucarahana. Tacahe, te cáperehipa eta jena sáchequenehi, tétumechavapa ema José tiyanapa eta me Pilato, mayaseapanahi eta máquehe ema Jesús, mavarairahi máecarayare. Tacahe, tiyayauchavapa taicha téricayarepahi eta sache. Vahi táisapacarehíni náecararecahíni te yátimuhu, váhivare táisapacarehíni máejamiacahíni te jena sávarumuhu.

⁴⁴ Máraminehi ema Pilato eta máijahúchiravahi tépenavane ema Jesús. Tásiha, máimichuhapa ema nacapítara. Te títecapapa ema nacapítara, mayaserecapa te yátupihípuca tépenaripa ema Jesús.

* **15:42-43** Ema maca José, vahi émaina ema maparape ema Jacobo ema táechajisíhaquenehi te versículo 40. Váhivare émaina ema José ema suíma esu María, máenahi ema Víaquenu Jesucristo. Ema maca José, tatiarihi eta mávacure tayehe eta Cabildo te Jerusalén. Émasera vahi máimicasiapavahini nayehe ena ticatianacanahi ema Jesús. (Pitanuca te libro Lucas 23.51.)

⁴⁵ Tásiha, eta mametasirahi ema nacapitara eta máepeniraipahi ema Jesús, máisapapa ema Pilato eta máquehe ema Jesús.

⁴⁶ Tacahe, tiyanapa ema José. Mámapa eta tiúrina sávana mavachareruhi. Tásiha, macucupaicapa eta máquehe ema Jesús. Náyuruácapa tayehe eta sávana. Náiyaracuhapa tayehe eta máecari eta te mari nasecajueruhi. Tásiha, najihachapa te tapaja eta máecari eta ticheyarama mari tajitacarequene.

⁴⁷ Sutiarihihivare esu María Magdalena ésupa esu apana María†. Náimararacahi, náimatipa eta nanasihahi eta máquehe ema Jesús.

16

Eta máechepusira ema Jesús eta te máecari
(Mt 28.1-10; Lc 24.1-12; Jn 20.1-10)

¹ Tacahe, te jena sache sávaruquenehi, téricaipa eta sache, tiyanapa esu María Magdalena, ésupa esu Salomé, ésupa esu apana María. Tivacharecanapa eta tijiyequene perfume nayariasihayare eta máquehe ema Jesús.

² Tásiha, te apanapa sache, lumíncuquenehi, nayatirupa tiyanana eta te máecari. Te tiúchucapa eta sache, titecapanapaipa éna eta te máecari.

³ Eta napaisirapahi, tiyaserejiricacanapaipa. Ánipa nacahe:
—¿Nájahapapucaini náequehepuichinahavini eta tajiha eta ñecari eñi Viáquenu eta mari tajitacarequene? —nacahepa.

⁴ Te titecapanapa, náimahapa eta márime tájinaripahi te tapajacura eta máecari.

⁵ Tásiha, tisiapanapa. Ánaqui náimahapa ema émana amaperu achane, mávihahi te vaure. Eta mamuiraha, tétavicava eta tajapuva. Tiáramecanarinehi ena esenana.

⁶ Ema amaperu achane máechajicavacapa:

—Vahi ecupica. Éti etanucapahi ema Jesús Nazareno, ema macaetataquenehi. Májinaripahi, taicha ticaechepucasiripa. Yare, ímaha. Júcahi eta mávinehi.

⁷ Tiuri puiti, eyana emetaca ema Pedro, tásiha, namutu ena apamuriana echamuriana. Emetacavaca tiyanayare ema Jesús eta te Galilea. Ánaqui macuchapiaheyare emutu éti. Échavarichuhipuca eta macayemaqueneanahi te achanerichaha —máichavacapa ema ángele.

⁸ Tacahe, tiúchucanapa eta te máecari. Tiyananapa tjunapanapaipa. Tiyayacareanapaipa taicha eta náramirahi. Eta nayanirahi, nájina nametaruinahini taicha eta napisirahi.

Tímerecavapa ema Jesús suyehe esu María Magdalena
(Jn 20.11-18)

⁹ Tiuri, eta máechepusirahi ema Jesús te máecari te jena lumíncuquenehi te yáticarahichicha, sutivapa máimeresiavahi suyehe esu María Magdalena. (Esu suca María, esu máepachiaruhi ena siétequeneana éreanana te suáquehe.)

¹⁰ Tacahe, tiyanapa ésu, sumetapana ena suchamurianahi. Éna, tétavicavahi eta napanereresirahi, tiyahanahi eta nacatisamurevairahi.

¹¹ Váhisera nasuapahini eta sumetarapihi esu María eta máechepusiraipa, machaviraipahi títareca, étaipa eta máimeresiravahi eta suyehe.

Tímerecavapa ema Jesús nayehe ena apinana máimitureana
(Lc 24.13-35)

¹² Te táequenepa eta juca, tímerecavavarepa ema Jesús nayehe ena apinana máimitureana eta napaisirapahi, nacaijuheirahi eta avasarechicha te tachacaya eta Jerusalén. Tiápamachavahisera eta mamira. Vahi náimativanehini éma.

¹³ Téhesera náimatipa éma, majunijiacavacapa. Tacahe, tichavavaneanapa nametapana ena apamuriana nachamuriana. Váhiquenevaresera nasuapahini ena apinana, eta nametasirahi.

Tímerecava ema Jesús nayehe ena mayeheana apóstoleana
(Lc 24.36; Jn 20.19-21)

¹⁴ Tiuri, te táequenepa, tiúrujicavanahi eta nanisirahi ena óncequeneana apóstoleana. Tacahe, tjájuhávapa tímerecava ema Jesús eta nayehe. Macajachamurivarepa eta namasupirahi eta nametarapianahi ena tímahanahi éma eta máechepusiraipahi.

Matuparaca ema Jesús ena apóstoleana
(Mt 28.16-20; Lc 24.37-49; Jn 20.22-23)

¹⁵ Tacahe, máichavarepa:

† 15:47 Esu suca María, esu táechajisihaquenehi te versículo 40. (Te pivaraha pecha pitanuca Juan 19.25.)

—Eyana epaica te tamutu eta avasareana eta te juca apaquehe. Ecametarairuyare eta tiúrina echajirucava nayehe namutu ena achaneana.

¹⁶ Nucuchucuhavacayare namutu ena tisuapajirahianaya, ena ticaicachasianaya. Énaserá éna vahi tisuapanaya, ticaicuñanayare taicha tanasirichuhi eta napecaturana.

¹⁷ Ena tisuapajirahiana náimerecayare eta juca tiáramicareana: Náimijunijicayare ena éreanana nayehe ena achaneana, taicha námapicayare eta níjare. Náitucayare téchajicana tayehe eta apanana échajirucavana namaitucaqueneanainihi.

¹⁸ Te nacaratacahipuca eta quichareana, tájina táicharacaimahi. Te téranahipuca eta venéno, tájinavare náichavaimahi. Nanacayare eta navahuana nayehe ena nácani nacajumaqueneana, tásiha, tinaracanayare éna —macahepa.

*Eta mayapirahi ema Jesús te anuma
(Lc 24.50-53)*

¹⁹ Tacahe, te títavapa tamutu eta mametarapianahi ema Viáquenu Jesús, tiyanapa tiyapa te anuma. Ema Viya macaejacapa ema Machicha te mavaure.

²⁰ Tacahe, tiyananapa eta te tamutu avasareana ena máimitureana. Ticametarairuanaipa eta tiúrina echajirucavana. Ichape eta máimicatasiravacapahi ema Viáquenu. Tétávicavahi tajacapacarevahi máicha, eta náimiturapianapahi. Taicha máijaracavacapahi eta náimeresirapahi eta tiáramicareana ticunachacareanahi.

Tamu tupa.

Ema San Lucas májuequenehahi eta máichararacavahi **ema** **Jesucristo, ticajare puiti eta** **EVANGELIO SEGÚN SAN LUCAS**

¹⁻³ Némunaruquene nuparape Teófilo, nucajurevi puiti apaesa pecha píti apanavare eta juca néchaqueneanahi níti. Ichapemurianahi ena víchamuriana tiájuequenehanahi tayehe eta máicharacavahi ema Viáquenu Jesucristo. Tásiha puiti, níti apanavare nájuequenehavare. Nucaejarusinahi tamutu eta nájuequenehairahi, taicha tamutuhi nucayasasereru nayehe ena tinecapaequenehanahi, tímahanahi eta apaicape eta táepaniravahi eta máitare-sirahi ema Viáquenu.

⁴ Níti nuvaraha nímimatchavi apaesa yátupina pecha tamutu eta juca piárvahuanahi.

Ema ángele macametarapi eta máuchusirayare ema Juan Tícachasiricaraiyare

⁵ Cape juca viásinequenehi te émarichaha ema Aluresi aquenucahi, réyhi tayehe eta jena provincia Judea, matiarihivare ema émana achane, ticajare Zacarías. Éma, náumurivanahi ena ticajareana Abías. Eta náematanerepi éna, náechapajirica eta námavahuasana ena achaneana tayehe eta Templo. Esu mayena ema Zacarías ticajaruhi Elisabet, mámariequenehi ésu ema víyarahaini Aarón.

⁶ Ema maca Zacarías ésupa esu mayena, tájina náichiravainahini te mamirahu ema Viya. Tamutuhi náitauha eta mavanairipiana ema Viáquenu. Tacahe, tájina náechajisiequene-nahini nayehe ena achaneana.

⁷ Nájinasera nachichainahini, macheruhi esu Elisabet eta suitaresira. Váipavare ticachichanaimahi taicha ichavicanaripahi.

⁸⁻¹⁰ Te jena sache, náichuhapa ema Zacarías eta masiapirayare tayehe eta Templo te Jerusalén, taicha áñopahi eta masiapirayare. Tacahe, ticátuparácasipa éma. Émapa táetupiacahi eta máematanerepiyarehi máijuchayarehi eta incienso te táinahu eta mesa náijuchirarehi, taicha tacahehi eta nayeherepini ena israelítana. Tacahe, ema Zacarías tisiapapa te tajuhe eta cuarto tacapicahuquenehi, máijuchapa eta incienso. Macarichusera tísapacarehi tisiapa. Ena apamuriana achaneana nanasipa te aneca, tiyujaracanaripa éna.

¹¹ Tiáramicarepa tímerecava ema émana ángele te mamirahu ema Zacarías. Mavaneruhi ema Viáquenu. Titupiharipa ema ángele te vaure tayehe eta mesa náijuchirarehi eta incienso.

¹² Tiáramecarine ema Zacarías eta máimairahi ema ángele.

¹³ Émasera ema ángele máechajicapa:

—Vahi picupica, Zacarías —máichapa—. Ema Viya masamahi eta piyaseserepihi píti eta mayehe. Puiti esu piyena Elisabet ticachichayare. Juan eta máijareyare ema echichayare.

¹⁴ Ichapeyare eta piúrisamurevayare te máuchucapa ema echichayare. Énaripa ena achaneana, ichapeyareva eta náurisamurévaya taicha eta máuchusirayare.

¹⁵ Numetacavi: Ema pichichayare, ichapeyare eta macunachacarevayare mayehe ema Viya. Píti, vahi písapaimahi tera eta vino, étaripa eta apamuriana téracareana muracagueneana. Taicha éma, eta máuchusirayare, mávaháruyarepahi ema Espíritu Santo.

¹⁶ Éma pichichayare, éma tétupiricayare eta táurivayare eta napanereruana ena pijaneanana israelítana, tachavirayare eta nasuapirayare ema Viya.

¹⁷ Ema maca pichichayare, éma tínapumirauchayarepahi ema Viáquenu. Macutiyare eta máitupajjiasiravaini ema víyarahaini profeta Elías. Ichapeyare eta máitusirayare eta macajimuyasirayare eta nasamureana ena achaneana apaesa tachava eta nasuapiraina ema Viya, tácuti eta nasuapajiraivainihi ena náchucanaveanainihi. Énaripa ena váinarajipanereruana, tisuapajirahianayareva máicha. Mametacavacayare ena achaneana natse-cavaipa eta najacapirayare ema Viáquenu —máichapa ema ángele.

¹⁸ Tásiha, ema Zacarías majicapapa. Ánipa macahehi:

—Páurenusami, vaipa numaitacavaimahi nucachichahini, ésuripa esu nuyena. Ichavichavipa víti. Váhicha nusuapapajica eta juca vicachichairayarepuca —máichapa.

¹⁹ Émasera ema ángele máichavarepa:

—Níti nucajare Gabriel. Níti mavanerunuhi ema Viya. Nutuparacasivaichuhi eta numetasiraviyare eta juca ecachichairayare. Piúriháine ichapenahini eta piúrisamurevainahini.

²⁰ Puítisera úpaviyare. Eta ecutiarareyare piyehe taicha eta pimasuapiranuhi. Tiámáinucava te táitauhavapa eta juca numetaruvíhi, péchajicainavarepa —máichapa ema ángele.

²¹ Tacahe, ena achaneana nanasiqueneanahi te aneca nacuchaparairicaipaicha emá Zacarías, náramipa eta mayerevaipahicha te tajuhe.

²² Jéhesareinehi, te tiúchucapa emá Zacarías, vaipa máechajicahini. Náimatiacapasera éna, eta máechajisirahi emá Viya te tajuhe. Tisuveverecapaipahi éma eta mavarairahi máimicutiarachavaca ena achaneana eta yátupirahi masamaquenehi. Úpapaipahi éma.

²³ Tacahe, te títauchavapa tamutu eta jena sácheanahi eta matuparacasivahi, tiyanapa emá Zacarías tayehe eta mapena. Nueve caje eta mayerevayarehi eta mamaechajisirayarehi.

²⁴ Tásiha, esu mayena Elisabet, ticajaripa ésu. Váipasera súchuchurecahini te supena. Váhivare sumetajiricahini. Tiámainucavapa te títauchavayarepa eta cincoquenehi caje eta sucajarirahi.

²⁵ Tétavicavahi eta súrisamurevahi eta susamiravahi ésu. Ánipa sucahe:

—Ichape eta ñijapanuiranuhi eñi Viya, tíjaracanuhi eñi nuchichayare. Váipasare nayunacaimahi ena achaneana eta numacheruvahi —sucahepa.

Éma ángele macametarapi eta máuchusirayare emá Jesús

²⁶ Tacahe, te sáisiquenepa caje, emá Viya máechavare mavaneca emá ángele Gabriel tiúcupaica tayehe eta avasare Nazaret, tayehehi provincia eta Galilea.

²⁷ Máucupauchapa esu amaperu esena ticajaru María. Ésu, tájina suímatyahini emá ajaira. Matarihipasera emá suímayarehi, emá ticajare José. Téjaricipahi eta natratune. Ésu, mámaríequenéinihi emá víyarahaini rey David.

²⁸ Tacahe, emá ángele máucupauchapa ésu tayehe eta suávihahi. Máichapa ésu:

—Pícharacava, María. Piti manerejiruvihí emá Viya. Tétavicavahi eta piúricacarevayare taicha ichape eta majapanuiravihí éma Viya. Picachuricahi namutu ena apamuriana esenana —máichapa.

²⁹ Ésusera tíaramecainehi eta máechajisirahi emá ángele. Supanerequenehainehi tájaha-hipuca tacayemahi eta máechajisirahi emá ángele.

³⁰ Émasera emá ángele máichavarepa:

—Vahi picupica, María. Piti manerejiruvihí emá Viya.

³¹ Numetapanavihí puiti eta picajarirayare. Ajairayare emá pichichayare. Jesús eta máijareyare.

³² Tétavicavaya eta napicauchirayare ena achaneana taicha Machichayarehi emá Viya. Ichapequenyare eta aquenucairayare éma taicha emá Viya manacayareva eta mávacu-reyare aquenucayare. Macutiyarehi eta aquenucairahi emá máchucaini David.

³³ Éma téchayarehi namutu ena pijaneanana israelítana. Máepenacacayare eta aquenucairayare —máichapa emá ángele.

³⁴ Tásiha, esu María, sujicapapa:

—¿Tájahasica tácharacavayare eta juca? Taicha núti nájinaichaha nímainahini —suíchapa.

³⁵ Émasera emá ángele máichavarepa:

—Picachichayare taicha eta máitupajjiasiravahi emá Viya. Timicauchaviyare eta marenaiva, tásiha, tisiapahacavinapa emá Espíritu Santo. Eta tacahe, emá amuya pínaruyare, sántoyare éma, taicha machichayarehi emá Viya. Náimatiyare namutu eta machichairahi emá Viya.

³⁶ Picutiyare esu pijaneana Elisabet, énerichuvare ticajaripahi ésu. Tayanapanehi ichavichicharipahinéni ésu, macheruinihinéni. Sáisiripasera caje eta sucajarirahi puiti.

³⁷ Taicha emá Viya, tájinaquene máemáituca éma —máichapa emá ángele.

³⁸ Tacahe, esu María sujicapapa:

—Núti ñivanaranuichuhi eñi Viya. Nutiaríhi puiti. Nímahanuinepa eñi, eta ñícharacauyare te ñivanairipiana —suíchapa emá ángele.

Tacahe, eta masamirahi emá ángele, tiyanapa tichavahi.

Ésu María suéjirapanapa esu sujaneana Elisabet

³⁹ Tacahe, te jena sácheana titátájipa esu María tiyana tayehe eta avasarechicha te tataracucujianahi eta márijuecu tayehe eta provincia Judea, suávasahi esu sujaneana Elisabet émapa emá Zacarías.

⁴⁰ Te títecapapa esu María tayehe eta napenahi, suéchajicapa esu Elisabet.

⁴¹ Te susamapa esu Elisabet eta suahu esu María suéchajisirahi, tiyamuricainehi eta amuya te sujuhe esu Elisabet, enevanepa mávahácahi ésu emá Espíritu Santo.

⁴² Tacahe, téchajicapa muraca esu Elisabet, suíchapa:

—Píti, tétavicavahi eta piúricacarevahi ñícha eñi Viya. Picachuricahavíhi vimutu viti esenana. Éñiripa eñi pichichayare, tétavicavahivare eta ñicunachacarevaya.

⁴³ Nusapihasamipa núti péjirapananuhi píti ñénaviyarehi eñi Náquenu.

⁴⁴ Te nusamapa eta pياهو eta péchajisiranuhi, tiyamuricainehi te nujuhe eñi nuchicha, taicha eta tiúrisamuréinehi éñi.

⁴⁵ Tétavicava eta piúricacarevaya píti taicha eta pisuapajiraivahi ñe Viya. Títauchavainapa tamutu eta ñimetarapihi eñi Viáquenu eta piyehe —sucahepa esu Elisabet.

⁴⁶ Tacahe, esu María sujicapapa:

—Ichapemurihi te náchaneva eta nuncunachirahi eñi Viáquenu.

⁴⁷ Taicha tétavicavapa eta táurisamureva eta nusamure ñicha eñi Viya Ticatiurahiquene eta nuyehé.

⁴⁸ Taicha éñi, vahi ñépurunuhini páurenuhinéni nútisami. Tétavicavahisera eta ñijapanuiranuhi nuti ñivanarahi. Nútipa ñinerejicanuhi, tásiha, ichapenapapuca eta nacapinarunuiraya namutu ena achaneana natiarihiquenehi puiti, énapa ena arajuruanayare. “Tétavicavapa eta súricacarevahi esu María” nacáhénapapuca.

⁴⁹ Tétavicavapa eta ñítupajijiasiravahi eñi Viya, tjaracanuhi eta núrivyarehi ñicha. Jéhevere éñi, Sátoquenehi eta ñijare.

⁵⁰ Eta tacaheyare eta ñijapanuirahaviyare puiti, énapa namutu ena arajuruanayare, nácani tipicauchanayare éñi.

⁵¹ Eñi Viya, ñjaracayare eñi nuchichaya eta ñítupajijiasiravaya ichape. Tásiha, ñicaerajicavacaya ena ticasiñavavairicana, énapa ena váinarajipanereruanahivare.

⁵² Nácani aguenucana nacatianacainapapuca, ñicapaquechavacayarehisera éñi. Nasapihapa ena páureanasamihi, ñinerejiruanaya éna, ñijupahanayare.

⁵³ Yátupiya eta ñjarasiravacayare eta táetaviuchiraya eta náuricacarevaya namutu ena ticasiñavanayare ñiyehe. Énasera ena tímijachavanahi tájinahini nácamunuhini, ñicaerajicavacaya namutu.

⁵⁴⁻⁵⁵ Eñi Viya acane tjaracavahi ñiyehe eñi viáchucaini Abraham énapa ena ñíamariéqueneana, eta ñjarasiravacainapa eta táetaviuchiraya eta náuricacarevanaya. Vahi ñémitisicaimahi eñi Viya eta ñéchajiriruvahi ñjararuvahi. Puiti, eñi nuchichaya tiámayarepahi tamutu eta viúricacarevanaya viti israelítana. Máitavacayarehi éta —sucahepa esu María.

⁵⁶ Tásiha, sunasipanapa esu María te supena esu Elisabet. Mapana caje eta suyerevahi. Te táequenepa, tichavavarepa te supena.

Eta máuchusira ema Juan

⁵⁷ Tacahe, títauchavapa eta sucajera esu Elisabet. Suínacapa ema suchicha.

⁵⁸ Tiyananapa ena sujaneanana énapa ena suchacayapenanahi, náejirapana ésu. Táicha eta nasamairirisirahi eta súrivahi maicha ema Viya eta majapanuirahi ésu. Tiúrisamureanarinehi namutu.

⁵⁹ Tacahe, te óchoquenepa sache eta máuchusirahi ema amuya, nayanauchapa ena najaneanana, namarcachapanayarehi ema amuya; taicha tacahehi eta nayherepihi. Tásiha, navarahapa nanacayarehi eta májareyarehi Zacarías, mámapicayarehi eta májare ema máiya.

⁶⁰ Ésusera esu maena ema amuya vahi suvarahahini. Suíchavacapa:

—Juan eta ñjareyare.

⁶¹ Tásiha, éna nacahepa:

—¿Tájaha tacayema? Namutu ena pijaneanana, nájina ticaijarena eta Juan —nacahepa.

⁶² Tásiha, éna náimicutiarachinapa eta nayaseresirahi ema Zacarías tájahapuca eta májareyarehi maicha éma.

⁶³ Tacahe, ema Zacarías tiyaseserecapa eta táblamechicha, májuchihayarehi eta májareyarehi ema machicha. Eta ajureca, ani tacahehi: “Juan eta májareyare”. Tésenijiricacaninehi éna taicha eta májareyarehi ema amuya.

⁶⁴ Tásiha, tjáhučhavapa tichavapa eta máéchajisira ema Zacarías. Macunachapa ema Viya eta máurisamurevahi.

⁶⁵ Ichape eta tiáramicarehi nayehe ena natiarihiqueneanahi. Nasamairiricavanepa namutu ena távacuanahi eta avasarechichana tayehe eta provincia Judea. Náéchajisihapa eta juca nasamaiririruanahi.

⁶⁶ Namutupa napanerequenehahi. Nácani tisamairiricanapahi, tiyaserejiricacanaripa. Ánipa nacahe:

—¿Cañarihi tacayemaquenehi eta juca máuchusirahi ema amuya? —nacahepa.

Tásiha, ema amuya, tétavicavahi eta majaneasirahi ema Viya eta majurusirapaipahi.

Eta majirarapi ema Zacarías

⁶⁷ Tacahe, eta jena sáchequenehi eta macamarcairahi ema amuya, étaripa eta nanasirahi eta májareyarehi, téchajicapa ema Zacarías. Macunachaipa ema Viya, taicha mávahácaripa ema Espíritu Santo. Ánipa macahehi:

⁶⁸—Tétavicavapa eta macunachacareva ema Tata Vicaiyaquene, ema véhiruhi vimutu viti israelitana. Taicha tijapanuhavihi vimutu viti machaneranahi, ticuchucuhahaviyarehi.

⁶⁹ Tijaracahaviyarehi puiti ema yátupiqueneyare eta macatiuraivaya, ema manerejiruhi te namuri ena mámariequeneanainihi ema David, ema mavanarainihivare ema Viya.

⁷⁰ Titauchavaipahi eta náechajiriruvanahi ena santo profetanaini acane, eta nametacasi-ananahi me Viya.

⁷¹⁻⁷³ Taicha tacahehi eta matratunehi ema Viya mayehe ema viáchucaini Abraham. Ema Viya tijaracahavi eta majapanuiravacayarehi ena viáchucanaveanaini, énapa ena ticachichahaviana, vítipa puiti. Énerichuvare tijaracavahi eta mamaemitisisiraya eta macatiuchi-rahaviyare nayehe ena ticatianacahavianahi.

⁷⁴ Ema Cristo manerejiruhi ema Viya, ticatiuchahaviyarehi taicha mamavarairahi vipicahini, nacuijahivaréni ena nahapapicahavihini eta vicaemataneasirayarehi éma.

⁷⁵ Eta mavarahaquenehi tíuriyare eta vítaresirayarehi tamutu sácheana, tájina víchiravaimahi te mamirahu éma.

⁷⁶ Pitiripa, piti nuchicha, píchuarecasivaichuhi mayeheviyare profeta ema Tata Vicaiyaquene taicha piti pínapumirauchayarepahi ema Viáquenu Cristo.

⁷⁷ Pétupiricayarehi eta nasamureana ena achaneana, yátupinapa machaneranayarehi éna. Pímitucayareva nácaicutiaraya eta mavarairahi ema Viya macatiuchavacayare, macaepahairayarehivare eta napecturana.

⁷⁸⁻⁷⁹ Puítiripa, eta máemunasirahavihi ema Viya, macucupaisinahavihi te anuma ema Machicha. Éma, tímimatichahavinapa eta majaraiva ema Tata Vicaiyaquene étapa eta táuriquene achene ticaijuhe mayehe. Máetucarácavacayare eta nasamureana ena ticatisamureanahi, nácani tépenanayarehíni —macahepa ema Zacarías.

⁸⁰ Tacahe, ema amuya eta majurusirahi, tiámavapahi eta masuapajiraivahi mayehe ema Viya. Váhivare étainahini te tajuhe eta avasare eta majurusinehi. Vámahicuruhahi eta majurusirahi. Tiámainucava te ajairapa, tímerecavapa nayehe ena majaneanana israelitana, tépanavapasera ticametarairu.

2

Eta máuchusira ema Jesús (Mt 1.18-25)

¹⁻³ Tacahe, te jena añoanahi cape juca viásinequenehi te émarichaha aquenucahi ema Emperador Augusto, matiarihihivare ema apana achane ticaijare Cirenio, majupahahi ema Augusto. Prefectohi éma, tayehe eta avasareana. Ticaijare Siria eta mávihahi*. Tacahe, te jena sácheana, ema Augusto macavanairipipa nacuchuca eta vantu eta nacatupairayare namutu ena achaneana te avasareana. Tacahe, tiyananapa ena achaneana te návasanapachu te náuchusineana eta nacatupairayarehi. Nasuapayarehi eta vanairipi. Tánapuiruhi censo maicha ema Emperador Augusto.

⁴⁻⁵ Tacahe, tiyanapa ema José. Mámapa esu mayena María. Ticajaripaipa ésu. Tacahe, tiúchucanapa éna tayehe eta avasare ticaijare Nazaret te Galilea. Nacaijuhepa eta avasare ticaijare Belén te Judea, eta mávasainihi ema aquenucaini rey David. Étarichuvare mávasahi ema José, taicha ema José mámariequenehi ema David. Tiyananapa ticatupanayarehi.

⁶⁻⁷ Tacahe, titecapanapa te Belén. TájinaiPASERA táviravainahini eta te pétiana eta náitecapihahini taicha camuriqueneanahi ena achaneana náitecapaqueneanahi. Tacahe, tisiananapa eta te peti tapena eta sárareana. Tacahe, esu María tiyuriticavaipa eta sucajera eta suínasirayarehi. Tacahe, tínacapa jena yati. Suínacapa ema amuya ema suárachichahi. Tacahe, suáyuruacapa eta te mámaratataji pañal. Sucaivecapa ema amuya alauchu.

Ena pástulérwana ticametacasiánapa nayehe ena ángeleana

⁸ Te vamáhi te tachacaya eta avasare Belén, natiarihihi ena pástulérwana. Éna, najaneacahi eta nayeheana uvésana te jena yátiquenehi.

⁹ Tiáramicarepa tímerecava ema ángele mavaneruhi ema Viya. Jéhesare, tamicauchamurinehi ena pástulérwana eta majaraivahi éma. Tiáramecanarine éna.

¹⁰ Tásihasera, ema ángele máichavacapa:

—Vahi ecupica. Yare, jucarihi eta tímitecanuhi núti numetapanahayare. Tétávicava táurisamurécarevaya nayehe namutu ena achaneana.

¹¹ Puiti te jena avasare Belén, mávasaini ema rey David, tiúchucaipa ema Ticatiurahiyare eyehe emutu éti. Éma, ticaijare Cristo Viáquenu.

* **2:1-3** Te jena año, matiarihivare ema ichapequenehi aquenuca ticaijarehi Aluresi. Éma, reyhi tayehe eta departamento Judea.

¹² Eta tacahe, nímicutiarachinaheyare eta ímairaya: Echimapayare ema amuya ticayuru-hahi te mámaratataji pañal. Tívecahi eta te tajuhe eta peti tapena eta sárareana — máichavacapa ema ángele.

¹³ Tásiha, tíjahúchavapa tímerecavana ena camuríqueneana ángeleana eta te mávihahi ema émana ángele. Najirahi eta alabanza eta nacunachirahi ema Viya te anuma. Ánipa nacahe:

¹⁴ ¡Tétávicavapa eta vicunachirahi ema Viya vimutu viti vívihanahi te anuma! ¡Jéhevare puiti, tíuricavanainapa ena achaneana te juca apaquehe, ena manerjiruanahi macatajiruanahi ema Viya! ¡Tájainainapa náichiravaimahi! —nacahepa.

¹⁵ Tacahe, tiyananapa ena ángeleana, tichavana te anuma. Tásiha, náichacacapa ena pástulérúana:

—Yare, viyana te Belén. Viyana vímahapana eta juca mametaruhavíhi ema ángele mavaneruhi ema Viya Viáquenu —náichacacapa.

¹⁶ Tacahe, titátájianapaipahi tiyanana. Jéhesareinahi, te títecapanapa, nachimapainehi esu María émapa ema José. Matiarihisaréipahi ema amuya. Tívecahi éma eta te tajuhe eta peti tapena eta sárareana.

¹⁷ Te náimahapa tamutu, tépanavanapa náemechapa. Amairipahipa naecha eta mametarpianahi ema ángele eta máuchusirapahi ema amuya.

¹⁸ Tacahe, náraminehi namutu ena achaneana eta nametarapianahi ena pástulérúana.

¹⁹ Tásihasera, esu María supaneréquenehainehi te susamure tamutu eta juca susamaqueneanahi.

²⁰ Tacahe, ena pástulérúana tichavanapa tayehe eta te najanearesihahi eta uvesana. Nacunachainehi ema Viya te anuma táichavene eta máechajiriruvahi ema ángele, táichavenevare eta náimairahivare ema amuya alauchu. Éta paichuhi tacahehi eta macayemaquenehi ema ángele.

Námapa ema amuya Jesús te Jerusalén, náimerepana tayehe eta Templo

²¹ Te óchoquenepa sache eta máuchusirahi ema amuya, namarcachapa éma taicha tacahehi eta nayeherepi ena israelítana. Tacahe, nanacapa eta máijareyare Jesús. Eta máijare máimijarechaquenehi ema ángele te sucajariyarepa esu maena María.

²²⁻²⁴ Tacahe, te cuarentaquenepa sache eta suínasirahi esu María, tiyananapa te Jerusalén. Eta tímiyanavacahi éna, náimerepanayarehi ema amuya mayehe ema Viya Viáquenu. Taicha ema Viya macavanairípihi te ta Sagrada Escritura eta májurehi ema víyarahaini Moiséini, ánipa tacahehi: “Te ajairapuca ema mácani suárachicha esu esena, ímerecayare nuyehe; íjaracanuyare taicha náicuchichuhi ema”. Énerichuvare náitauchayarehi eta juca apána vanairípi tayehe eta napachíhairaina ena esenana eta te táequenerapa eta náinasira. Ánipa macahe: “Esu súcani esena arainacahi, suíjaracasichanupana eta apihina paluma símarrune; te váhipuca, apina paluma suítatiqueneana, amairuhichichanasera”.

²⁵ Tiuri, matiaríhihi te Jerusalén ema émana achane ticaijare Simeón. Tétávicavahi eta máuriva. Tipacaurahi éma. Émarichu mávaháruhi ema Espíritu Santo. Ticuchapavaipahicha ticaimairuvaipaicha éma eta máimatiraya ema Cristo, éma ticaurisamurerahi nayehe ena achaneana majaneanana israelítana.

²⁶ Taicha ema Espíritu Santo mametacaripahi ema Simeón eta vuíchaha tépenavanemahi éma, táicha máimatinumayarehi ema Cristo mavaneruyarehi ema Viya.

²⁷ Tiuri, te jena sache, ema Espíritu mavanecapa ema achane Simeón mayana eta te Templo. Tacahe, títecapanapa ena ticachichana ema Jesús. Námapaipa ema amuya. Náitauchayarehi eta vanairipiana taicha eta máuchusirahi ema suárachichahi.

²⁸ Tacahe, te máimahapa ema Simeón ema amuya, mavehapa, majupacapa. Tásiha, macunacharinehi ema Viya te anuma. Macahepa ema Simeón:

²⁹⁻³⁰ —Tiuri puiti, Tata Náquenu te anuma, nuvarahapa nunaraca te juca apaquehe, nuti pivanarahi. Taicha núsismurepa eta nímairaipa ema Cristo. Éta paichuhi eta pimetarunuhi. Nímatipa ema Ticaturahiqueneyarehi, ema pivaneruhi pitupararuhi.

³¹ Éma, tímaticareya picha nayehe ena achaneana ticavasanaehi eta te tamutu avasareana.

³² Ticunachavanarinehi ena pinerejiruana israelítana. Tíjarahinevare te nasamure eta nacunachirahi. Éma, tímicauchavacaya ena apamuriana achaneana apavasanana apaesa náimatiyare ema Viya —macahepa ema Simeón.

³³ Náraminehi ena ticachichana eta máechajiriruvanahi ema Simeón mayehe ema amuya.

³⁴ Tacahe, ema Simeón mayaseacapa ema Viya eta náurivaina éna. Tacahe, máichapa esu María esu maena ema amuya Jesús:

—Pímaha. Ema maca amuya, matuparacasivaichuhi me Viya eta máimituresirayare eta máechajiriruvana ema Viya. Natiarihiyaresera camuriana ena vijaneanana israelítana énajívyare tíchavanayare, taicha náepuruyare ema pichicha, nacatianacayareva.

Tásiha, natiarihiyarevaresera ena apamuriana vijaneanana tinaracanayare tiúricavanayare taicha eta nacasiñairaya éma.

³⁵ Étainapa tacaecheraiyaya eta napaneruanapachu te nasamureana. Énerichuvare, numetacavi piti María: Ichape eta picatisamurevayare, taicha pímahayare eta táíñehiqueneyare máichararacavayare ema píchicha. Tímicutijiricavayare tayuvaracahini eta pisamure eta tumare —máichapa ema Simeón.

³⁶ Tiuri, sutiarihihivare esu ésuna esena ichavicachicha. Ticametarairurahi ésu. Ticaijaruhi Ana. Ema suíyaini ticaijaréni Fanuel. Ésu, mámariequenehi ema víyahaini Aser. Eta suámaperuvahi ésu, siete año eta sucachanerahi ema suímaini.

³⁷ Tásiha, ochenta y cuatro añoripahi eta suépenaimavahi. Sunasiquenehi sucapenahi ésu eta te Templo. Tamutuhi sácheana, yátiana, tiyujaracahi ésu. Suhayunachahivare.

³⁸ Tacahe, ema Simeón téchajiricavainirichaha, títécapanecha esu Ana. Eta suímairahi ema amuya Jesús, sucunacharinéhivare ésu apanahivare, suhasulupayachapa ema Viya máichavene ema amuya. Tásiha, sucametarairupa mayehe ema amuya. Suéchajisihahi éma nayehe ena tisuapajirairahana tichuchapanahi eta máitecapirayare te Jerusalén ema Cristo.

Tichavanapa eta te návasa Nazaret

³⁹ Tiuri, náitauchapa tamutu eta mavanairipiana ema Viya eta te Sagrada Escritura. Tacahe, tichavanapa eta te Nazaret te Galilea, te návasaichuhi éna.

⁴⁰ Tacahe, ema amuya Jesús tiúrijuruhi. Túmehi. Téchemarahihi, tamutu maecha, taicha mamunavahi me Viya.

Ema Jesús téchajiricava nayehe ena máestroana

⁴¹ Tiuri, tamutu añoana te Páscuamuhuana, eta nayaherepi ena ticachichana ema amaperu Jesús, tiyananayarehi tayehe eta avasare Jerusalén.

⁴² Tacahe, ema Jesús, te macayehépa doce año, tatuparacaripahi ena ticachichana náimerepanayarehi éma, námayarehi tayehe eta Jerusalén, náimimatichayarehi eta piesta ticaijare Pascua.

⁴³ Tiuri, te jena táequenerapa eta piesta, tichavanapa te napena. Tíminasichavapasera ema amaperu Jesús eta te Jerusalén. Eta napaisirapahi te achene, vahi náejiacavanehini ena ticachichana,

⁴⁴ taicha náimijachahi matiarhipahi éma te namuri ena achaneana nacachanequeneanapahi. Étanaripahi sache eta napaisirahi, napaenumavapa náejiacahi éma. Te jena cáperehiquenepa, natanucapa te namuri ena najaneanana nacachanequeneanapahi.

⁴⁵ Májinasera náichimavahini. Tacahe, tichavanavarepa te Jerusalén, natanupanayarehi éma.

⁴⁶ Tacahe, te jena mapanaquenepa sache eta natanusirahi, napaenumavapa náetupiacahi ema Jesús tayehe eta Templo. Macachanemurihi, téjacahi te namuri ena máestroana. Masamararacavacahi, mayaseremurihavacahivare éma apanavare.

⁴⁷ Ichaperinehi eta náraminehi namutu eta náimairahi eta máechemaraivahi, taicha táurivapahi eta majicapiravacapahi éna, taicha eta máechemaraivahi.

⁴⁸ Tacahe, tiáramivanarinehi ichape ena ticachichana te náetupiacapa. Tásiha, suíchapa esu maena:

—Nuchicha, ¿tájaha tacayema píchahavíhi? Ichapemuri eta vicañamarasiravahi pícha. Vitanujiriricavíhi, núti éñipa eñi piya —suíchapa esu maena.

⁴⁹ Tacahe, ema Jesús majicapapa:

—¿Tájaha tacayema, meme, eta etanujiricanuhi? ¿Váhipuca échahini éti eta návihairahi eta aní? Níchayare eta máemataneana ema Tata —macahepa ema Jesús.

⁵⁰ Énasera vahi nacaicutiarahini eta macayemaqueneanahi ema nachicha Jesús.

⁵¹ Tacahe, tiyananapasera tichavana te návasahi Nazaret. Ema Jesús, tisuapajirahíhi nayehe ena ticachichana. Esu maena María tamutuhi supanerequenehahi te susamure eta juca susamaqueneanahi.

⁵² Tacahe, ema Jesús tijurucapaipa, tijuruhacapaipavare eta máquehe, tacachanepahisera eta máitupajijiasiravahi. Máimicatcahi ema Viya. Tétavicavahivare eta námemunasirahi éma, ena achaneana.

3

Ema Juan Tícachasiricarahi tépanavapa ticametarairu eta máechajiriruva ema Viya nayehe ena vámahicuruhana

(Mt 3.1-12; Mr 1.1-8; Jn 1.19-28)

¹ Tacahe, eta máepeniraiipahi ema aquenucaini Augusto, tisiapapa ema Tiberio máitsivaquenehi. Émapa Emperadorhi. Quince añoripahi eta macatuparahairahi. Ema Poncio

Pilato, émaripa prefectohi tayehe eta departamento Judea. Tásiha, ema Herodes Antipas, machicha ema Aluresini, prefectohivare tayehe eta departamento Galilea. Ema maparape Felipe, prefectohivare éma, tayehe eta departamento Iturea étapa eta Traconite. Ema Lisaniás, prefectohivare tayehe eta departamento Abilina.

² Te Jerusalén, ema Caifás, corregidorhi. Énerichuvare tipicauchacarehi ema Anás, pasado corregidor, máimachuca ema Caifás.

Tacahe, te jena sácheanahi, ema Juan machicha ema víyarahaini Zacarías, ajairaripa. Manasirichahahisera tayehe eta mávapahi majurusinehi. Tásiha, ticametacasipa ema Juan eta mayehe ema Viya eta macametarairuirayarepa eta máechajiriruvana.

³ Tacahe, tiyanapa tipaicahe ema Juan tayehe eta avasarechichana tiávihanahi te tachausti eta cajacure Jordán. Mametacavapaipa ena achaneana. Ánipa maicha:

—Ítsivacha eta epanereruana. Éneuchava mayehe ema Viya apaesa maperdonachahe eta epecaturana. Te éneuchavapuca, núti nícachasicahénapa —máichapa.

⁴⁻⁶ Ema maca Juan, émaripa ema máechajisihaquehehi ema Viya eta te Sagrada Escritura, taicha ánaquiaparipahi eta áñoana acane, ema Viya mametacapa ema víyarahaini profeta Isaiás eta mapanereruhi, eta mavanésirayare ema Machicha te juca apaquehe. Eta tímitecahi ticatiurahiyarehi. Énerichuvare matiarihyareva ema apana achane máichuhaquenyarehi ema Viya. Macametarairuyarehi, máetupiricavacayare ena achaneana, náinajisirayarehi eta napanereruana tauriqueneana, apaesa táuri eta najacapirayare ema Machicha ema Viya. Tacamunuhivare yátupina eta nacasiñairavayarehi mayehe, náinajicayarehivare eta nacasiñavavaisirahi, étapa eta navayuaraivahi. Nasapihahi tijapanurahianainapa éna. Tásiha, te máitecapapa ema ticatiurahiyarehi, éma máimimatichainapa namutu eta najacapacarevaya me Viya namutu ena ticasañavana mayehe.

⁷ Tacahe, ena achaneana tiyananapaipa napauchapaipa ema Juan, navarahapa ticaicachasianayare eta mayehe. Tásiha, éma máichavacapa:

—¿Tájaha tacayema eta epauchiranuhi, eti tachichanaveanatajaji eta quichare? Esamairiricahipuca eta járajapairayarepa eta táifehiquenyare ecuñaraqui. Evarahahipuca iúchuhayare.

⁸ Tiuri puiti, te evarahapuca eta iúchucuha, yátupina tátupiruva eta epanereruana. Ímerecava eta ínajisiraya eta epecaturana. Váhivare ecucajamurava eta mámariequenerahehi ema viáchucaini Abraham. Taicha tayanapane mámarihepuca éma, váhisera iúchuchaimahi te vahi ecuitsivacha eta epanereruana. Ema Viya, tájina máemaitucaimahi éma. Te mavarahapuca, vahi májecarachaimahi máepiyaca achaneanaina eta juca mari, mavarairainahi yátupina ena mámariequeneanaina ema Abraham.

⁹ Ecauneuchava, taicha tiánehipa titecapauchaheyare eta ecuñaraqui nayehe ena achaneana máitucarahanahi téneuchavana, váhivare náitsivachahini eta napanereruana. Timicutijiricavaipa te máechucayarepa ema achane eta yucuqui máhireana; tásiha, máijuchainapa tamutu. Ene nacaheyare ena máeneuchavarahana —máichavacapa ema Juan.

¹⁰ Tásiha, ena achaneana nayaserecapa:

—¿Tájahasica eta vícharacavayare eta viúrivaina?

¹¹ Ema Juan majicapapa:

—Ecajirahiyare. Mácani tatiaríhi apina eta macamisa, máijaracasichayarehi eta étana mácani tájina macamisaina. Énaripa nácani ticaniruanahi, nacajiyareva nácani tájina naviyahini eta nanicaquene —máichavacapa.

¹² Te jena sácheana, náitecapachavare ema Juan ena ticobrarerahiana eta impuesto. Navarahapa ticaicachasianayarehi. Nayaserecapa ema Juan, náichapa:

—Maestro, ¿tájahapuca vícharacavaini eta viúrivainaini víti apanavare? —náichapa.

¹³ Majicapapa ema Juan:

—Vaipa ecuapechava ecuvayuyujica eta ecobradesira, tátupiruva jácani tavanairipíhi eta ley —máichapa.

¹⁴ Énerichuvare náitecapaucha ena suntaruana. Nayaserecavare ema Juan, náichapa:

—Víti apanavare, ¿tájahapucaini vícharacavayare eta viúrivaya? —nacahepa.

Máichavacapa éma:

—Vaipa ecuverejica eta náimahaqueneana ena achaneana. Váipavare ecuipicarareca. Nacuijapa ecuepiyequeneha. Tarataripa tacurisamurechahe eta evachasana —máichavacapa.

¹⁵ Ena achaneana ticunevanaripaicha eta mayehe ema Juan, náimijachaipahi émaripa ema Cristo nacuchapaquenehi, cátiurahiyarehi. Váhisera námutuimahi.

¹⁶ Tásihasera ema Juan máichavacapa:

—Yátupi núti nícachasicahehi te une. Ávanepaipahisera mácani yátupiquene Cristo. Éma, tiápajupanavahi nuyehé núti, eta mapicauchacarevahi. Váiparinehi nácutinasimahi eta máitupajijiasiravahi. Váiparinehivare nácaemuñavaimahi macamusuranuhini nuti páuresami. Te yátupina ecasiñava mayehe, tícachasicaheyareva; tjaracaheyareva ema Espíritu Santo. Téhesera vahi ecucasiñavapuca mayehe, tícuñacaheyare tayehe eta tájjurequene yucu.

¹⁷ Puíti éma márājapainapa tinerejiricainapaipa nácani yátupiqueneanahi téhicanayare. Máunacainapa éna. Ticutinapa mácani achane te tiácatayajiricahi eta arusu. Máunacainapa. Tásiha, máquijicapa eta tapiraquíji, máijuchayarepa te yucu. Eta nacaheyare ena máurirahanahi, tjuanáinapa te yucu, máitavacacayarehi eta tamuruira —máichavacapa ema Juan.

¹⁸ Tacahehi eta juca máechajisiravacahi ema Juan. Ichape eta maconsejachiravacahi ena achaneana, máimitusiravacahi eta máechajiriruva ema Viya.

¹⁹ Émaripa ema Herodes Antipas ema aguenucahi, maconsejachahivare vahi macuimianava macuveha esu Herodías, mayenahi ema maparape Felipe. Váhivare macuimianava macuquicha eta apamuriana táifemahiqueneana máichaqueeneana.

²⁰ Émasera ema Herodes vahi masupahini. Masapiharichucha tisemahi, máimicaratapaca ema Juan, macasiapayarehi te cárcel.

*Eta macaicachasirahi ema Jesús
(Mt 3.13-17; Mr 1.9-11)*

²¹ Tiuri, te tamirahupaichaha eta macaeratairava ema Juan, túmianavaichahahi máicachasicavacahi ena achaneana. Étana sache, máitecapauchapa ema Jesús, mavarairahi ticaicachasi éma apanavare. Tacahe, te tamutupa eta macaicachasirahi, mayujarasirahi. Tijahúchavapa téjiaca eta anuma.

²² Tiúcupaicapa ema Espíritu Santo, mavasimahipaipa eta paluma eta máimahi. Matupiruruchapa te mápusi ema Jesús. Tásiha, nasamapa eta mahu ema Viya te anuquehe. Ánipa macahehi:

—Pítira nuchicha némunaruquene. Núrisamurecha piyehe —macahepa.

*Ena achaneana máchucaqueanaini ema Jesús eta acane
(Mt 1.1-17)*

²³ Tiuri, ema Jesús, macayeherpahi treinta año te tinacuchavapa túmirecahi nayehe ena achaneana. Éma, náimijachaquenehi machicha ema José.

Ema máiyainihi ema José, ema Elí.

²⁴ Ema máiyainihivare ema Elí, ema Matat.

Ema máiyainihivare ema Matat, ema Leví.

Ema máiyainihivare ema Leví, ema Melqui.

Ema máiyainihivare ema Melqui, ema Jana.

Ema máiyainihivare ema Jana, ema José.

²⁵ Ema máiyainihivare ema José, ema Matatías.

Ema máiyainihivare ema Matatías, ema Amós.

Ema máiyainihivare ema Amós, ema Nahum.

Ema máiyainihivare ema Nahum, ema Esli.

Ema máiyainihivare ema Esli, ema Nagai.

²⁶ Ema máiyainihivare ema Nagai, ema Maat.

Ema máiyainihivare ema Maat, ema Matatías.

Ema máiyainihivare ema Matatías, ema Semei.

Ema máiyainihivare ema Semei, ema José.

Ema máiyainihivare ema José, ema Judá.

²⁷ Ema máiyainihivare ema Judá, ema Joana.

Ema máiyainihivare ema Joana, ema Resa.

Ema máiyainihivare ema Resa, ema Zorobabel.

Ema máiyainihivare ema Zorobabel, ema Salatiel.

Ema máiyainihivare ema Salatiel, ema Neri.

²⁸ Ema máiyainihivare ema Neri, ema Melqui.

Ema máiyainihivare ema Melqui, ema Adi.

Ema máiyainihivare ema Adi, ema Cosam.

Ema máiyainihivare ema Cosam, ema Elmodam.

Ema máiyainihivare ema Elmodam, ema Er.

²⁹ Ema máiyainihivare ema Er, ema Josué.

Ema máiyainihivare ema Josué, ema Eliezer.

Ema máiyainihivare ema Eliezer, ema Jorim.

Ema máiyainihivare ema Jorim, ema Matat.
³⁰ Ema máiyainihivare ema Matat, ema Leví.
 Ema máiyainihivare ema Leví, ema Simeón.
 Ema máiyainihivare ema Simeón, ema Judá.
 Ema máiyainihivare ema Judá, ema José.
 Ema máiyainihivare ema José, ema Jonán.
 Ema máiyainihivare ema Jonán, ema Eliaquim.
³¹ Ema máiyainihivare ema Eliaquim, ema Melea.
 Ema máiyainihivare ema Melea, ema Mainán.
 Ema máiyainihivare ema Mainán, ema Matata.
 Ema máiyainihivare ema Matata, ema Natán.
³² Ema máiyainihivare ema Natán, ema David.
 Ema máiyainihivare ema David, ema Isaí.
 Ema máiyainihivare ema Isaí, ema Obed.
 Ema máiyainihivare ema Obed, ema Booz.
 Ema máiyainihivare ema Booz, ema Salmón.
 Ema máiyainihivare ema Salmón, ema Naasón.
³³ Ema máiyainihivare ema Naasón, ema Aminadab.
 Ema máiyainihivare ema Aminadab, ema Aram.
 Ema máiyainihivare ema Aram, ema Esrom.
 Ema máiyainihivare ema Esrom, ema Fares.
 Ema máiyainihivare ema Fares, ema Judá.
³⁴ Ema máiyainihivare ema Judá, ema Jacob.
 Ema máiyainihivare ema Jacob, ema Isaac.
 Ema máiyainihivare ema Isaac, ema Abraham.
 Ema máiyainihivare ema Abraham, ema Taré.
 Ema máiyainihivare ema Taré, ema Nacor.
³⁵ Ema máiyainihivare ema Nacor, ema Serug.
 Ema máiyainihivare ema Serug, ema Ragau.
 Ema máiyainihivare ema Ragau, ema Peleg.
 Ema máiyainihivare ema Peleg, ema Heber.
 Ema máiyainihivare ema Heber, ema Sala.
³⁶ Ema máiyainihivare ema Sala, ema Cainán.
 Ema máiyainihivare ema Cainán, ema Arfaxad.
 Ema máiyainihivare ema Arfaxad, ema Sem.
 Ema máiyainihivare ema Sem, ema Noé.
 Ema máiyainihivare ema Noé, ema Lamec.
³⁷ Ema máiyainihivare ema Lamec, ema Matusalén.
 Ema máiyainihivare ema Matusalén, ema Enoc.
 Ema máiyainihivare ema Enoc, ema Jared.
 Ema máiyainihivare ema Jared, ema Mahalaleel.
 Ema máiyainihivare ema Mahalaleel, ema Cainán.
³⁸ Ema máiyainihivare ema Cainán, ema Enós.
 Ema máiyainihivare ema Enós, ema Set.
 Ema máiyainihivare ema Set, ema Adán.
 Ema Adán macaepiyaquenepa me Viya.

4

*Ema Váinaraji Satanás mavaraha macaitsamaraji ema Jesús
(Mt 4.1-11; Mr 1.12-13)*

¹ Tacahe, ema Jesús, mávahácaripa ema Espíritu Santo. Tásiha, ema Espíritu Santo eta mávasamurechirahi, máimitucaipahi eta mayanirayarehi te mávapahi apaquehe. Majunijicayarehi eta cajacure Jordán.

² Cuarenta sache macahehi tayehe. Tájnavare manicahini eta jena sácheanahi. Técuhasamurepa.

³ Tacahe, ema Váinaraji témeñahavapa mayehe. Mavarahapa macaetemayarehi. Ánipa maicha:

—¿Péculhapa píti? Tacahe, pivaneca eta juca mari táepiyacava pan, taicha píti machichavihi ema Viya, ¿masi? —máichapa.

⁴ Ema Jesús majicapapa:

—Váhipuca pecha eta táechajiriruvahi eta Sagrada Escritura, ani tacahehi: “Vahi tácarichuimahi eta tinicacare ticaitarecayare ena achaneana. Tacachaneyarehi eta máechajiriruva ema Viya. Jéhevere, éta ticaitarecarahiyare” —macahepa.

⁵ Tacahe, ema Váinaraji má mavarepa te táinahu eta anuquehe mari. Tjahúchavapa máimecha tamutu eta ichapequeneana avasareana te juca apaquehe ticutirinehi tachacayajiricacahini taicha eta máitupajjiasiravahicacha ema Váinaraji.

⁶ Tásiha, máichavarepa ema Váinaraji:

—Núti njaracaviyare tamutu eta juca avasareana. Ichape eta napicauchiraviyare, nacunachiraviyareva ena achaneana. Pítina náquenuvina ena távacuanahi eta avasareana. Taicha núti néchavacahi éna. Nútivare nécha mácani nuvarahaquenyare njaraca.

⁷ Pépuyucanumasea te numirahu pitsiucanu apaesa njaracavisarepa tamutu — máichapa.

⁸ Émasera ema Jesús majicapapa:

—Pévuisihatataji piti Satanás te juca numirahu. Váhipuca pecha eta táechajiriruvahi eta Sagrada Escritura. Ani tacahehi: “Macarichu ema Viya vépuyumirauchaya. Macarichuvare vicaemataneacayare” tacahepa. Váhiquene táurica nucaemataneacavihiní — máichapa ema Jesús.

⁹ Tacahe, vahi máévuisihahini ema Váinaraji. Má mavare te avasare Jerusalén. Máimiapanapa te táinahu eta Templo. Tásiha, máichavarepa:

—Te yátupina machichavina ema Viya, písapavayare pémirica te anuquehe. Tájina píchavaimahi eta pémirisirayare.

¹⁰ Pécharichuhi eta táechajiriruva eta Sagrada Escritura, ani tacahe: “Ema Viya manvecapa ena mayeheana ángeleana téchapajiricavianayare, énevaneyarehi tijaneacaviana.

¹¹ Tiámavianayare te navahuana, apaesa vahi picucayutetu eta máriana eta te pipaisirana” tacahepa. Tásiha, németeaca tijaneacavianayare puiti, vahi náispaimahi picajara te pémirica — máichapa ema Váinaraji.

¹² Tacahe ema Jesús majicapavarepa:

—Énerichuvare ani tacahe eta Sagrada Escritura: “Vahi picaitsamarajimahi ema Viya taicha éma Piáquenu” — máichapa.

¹³ Tacahe, tiyanapa ema Váinaraji. Majunijicapa ema Jesús taicha tímahavaipahi vahi máiturucahini macaetema. Mavarahahisera tichavayarehi tíapechavayarehi macaetemapana.

*Ema Jesús tépanavapa ticametarairu
(Mt 4.12-17; Mr 1.14-15)*

¹⁴⁻¹⁵ Tacahe, tépanavapa ema Jesús mapaica eta avasareana tayehe eta provincia Galilea. Ichape eta máitupajjiasiravahi taicha mávahácapahi ema Espiritu Santo. Tímiturecapaipa tayehe eta náurujisirarevana te avasareana. Ichapemuri eta nacunachirahi namutu ena tisamararacanapahi. Nasamairiricavarepa ena apamuriana achaneana ticavasanahi te tachacaya eta avasareana.

*Tichavapa ema Jesús te mávasa Nazaret
(Mt 13.53-58; Mr 6.1-6)*

¹⁶ Tásiha, tiyanavarepa te avasare Nazaret te majurusinehi. Te jena sache sávaru, tiyanapa tayehe eta náurujisirareva nayujarauchirare ena achaneana, taicha tacahehi eta mayeherepihi. Titupihapa ema Jesús, táicutiarahi eta mavarairahi téchajicureca eta Sagrada Escritura.

¹⁷ Náichuhasarepa eta máechajicuresiraya. Náijaracapa eta libro májúrehi ema profetaini Isaías. Te mavejiacapa eta libro, matanucapa eta máechajicureyarehi. Ani tacahehi eta táechajiriruvananahi:

¹⁸ “Tiávahácanuhi ema Espiritu Santo. Taicha manerejirunuichuhi núti ema Viya Viáquenu eta numetasiravacayare ena páureana eta juca máemunasiravacahi éma, máimicasirayareva. Eta tímitecanuhi nuncanaracayare ena ticatisamurevanahi. Nucaítitijicayareva ena máerataruanahi ema tivayuarahi Satanás. Nucaimairiricayareva ena píchuquiána. Nucuchucuhayareva ena ticatajivanahi, njaracaya eta náuricacarevaya.

¹⁹ Numetacayareva járajapainapa eta sáchezare tamutuiraya máetupirica ema Viya, tamutunapa tíurisamurécarepa máicha” tacahehi eta Sagrada Escritura eta máechajicurehi.

²⁰ Te tamutupa eta máechajicuresirahi ema Jesús, máeratacapa eta libro. Máimichavapa mayehe ema tíjanearecarahi eta líbroana. Téjacavarepa ema Jesús. Náimraracaripa ena achaneana natirihiqueneanahi.

²¹ Tacahe, tépanavapa téchajica ema Jesús:

—Nútiripa ema táechajisihaquenehi eta juca libro. Tímitecanuhi numetacahe eta máemunasirahehi ema Viya —macahepa.

²² Tacahe, náramipa namutu ena achaneana. Ánipa náichacaca:

—¡Tétavicavahi tapachinava eta máechajiririvanahi eta maca! Émachuchasera ema machicha ema Joséini ema carpintéroini. ¿Tájahasica eta juca? —nacahepa.

²³ Émasera ema Jesús máichavacapa:

—Németeaca éti váhirichuhi esuapapajicanuhini. Tásiha, evaraharinepuca íchanuyare: “Te yátupina píturequeneha, pípuhavaca ena ticajumanahi te juca. Vímahaséji piápechavavare picuchuca te juca piávasaichu tacuti eta pímereruhi te avasare Capernaum” íchanuyare.

²⁴ Nutupiruvasera numetacahe: Tatuparaca eta epicauchirahaviya vimutu viti manerua ena Viya. Étisera eti nujaneananahi ecavasanahi eta te juca viávasa, vahi epicauchanuhini, váhivare íjacapanuini. Ecuti ena achaneana acane eta náepuruirahi ena apamuriana profetana mavaneruanahi eta Viya.

²⁵ Eta tacahe, eta máimairahi ema Viya eta náepuruiravacahi, tivanecavaca ena profetana nayana napauchayare ena apavasanana. Acane, te matiarichichaha ema profetaini Elías, mapana año y medio vahi taquivahini, tásiha, ichapevare eta ecuha. Németeaca nútí camurianahi nácani ena tépenaimana israelítana.

²⁶ Váhiserá étainahini macavanahiyahini me Viya ema Elías eta nayehe ena majaneananahi. Ánaqui te avasare Sarepta tachacayahi eta avasare Sidón, étapa macavanahiyahi máitecapihayare suyehe esu ésunahi esena apavasana tépenaimahi. Ésupa máimicataruhi táichavenehi eta susupajiraivahi me Viya.

²⁷ Énaripa ena israelítana nacajumaqueneana eta lepra te jena sácheanahi te matiarichichaha ema profetaini Eliseo. Váhivare énaimahini macanaracahini ena majaneanana. Masapihapa macanaracahi ema apavasaquenehi ticajare Naamán, ticavasahi te Siria. Ema Naamán, tinaracaripa eta majuma, táichavenehi eta masupajiraivahi —máichavacapa ema Jesús.

²⁸ Tacahe, eta juca máichiravacahi ema Jesús, tisemanapa ena natiarihiqueneanahi.

²⁹ Tásiha téchepumurihanapa éna. Nacuchucapa ema Jesús te tachachacu eta avasare, te tachaui eta táupenaquene, navarahapa nacamiricayarehi éma.

³⁰ Émasera tichavapa mánumurihapaipa éna. Tiyanapa, majunijicavacapa.

Ema Jesús máimijuna ema éreana tiávahácainihi ema achane

(Mr 1.21-28)

³¹ Tacahe, titecapapa ema Jesús tayehe eta avasare Capernaúm te Galilea. Tamutu sávaruana tiyanapa tayehe eta náurujisirareva ena achaneana, tímiturepanaya.

³² Ichape náramihi ena achaneana eta máimiturapianahi taicha tétavicavahi eta máitusirahi mayunapaicahi tamutu. Tétavicavahivare eta tasuapacarevahi eta máimiturapiana.

³³ Étana sávaru, matiarihihini te namuri ema émana achane mávaháruhi ema éreana. Tipiara-recahi, ánipa macahe:

³⁴ —Núti nímativi. Pítira Sántoquenevihi. Machichaquenevihi ema Viya. Pésamiricahavipaini, piti Jesús Nazareno. Váhini picuesirujicahavini. Pivarahainapapuca picajanerepaichaviyare —macahepa ema achane.

³⁵ Tacahe ema Jesús macajachapa ema éreana. Ánipa maicha:

—¡Pámatinal! ¡Piyana pijunijica ema maca achane! —máichapa.

Tásiha, tjáhuçhava tiáquipaicavapa te apaquehe ema achane. Tásiha majunijicapa ema éreana. Tájinasera máichavahini ema achane.

³⁶ Náraminehi ichape namutu ena achaneana eta náimairahi. Tiyaserejiricacanapa:

—¿Tájahasica tacayema eta juca? Ema maca Jesús, tétavicava eta máitupajijíásiravahi, maratahahi máquijica nácani éreanana. Tásiha, ichape eta napisirahi éma. Vahi najicapae-machahini. Tamutupa arairu eta máimiturapianahi ema maca —nacahepa.

³⁷ Enevanevarepa naecha namutu ena achaneana eta juca máichaqueneanahi ema Jesús. Énaripa ena ticavasanahi te avasareana eta te provincia Galilea.

Ema Jesús macanaraca esu máimase ema Pedro

(Mt 8.14-15; Mr 1.29-31)

³⁸ Te tiúchucapa ema Jesús tayehe eta náurujisirareva, tiyanapa te mapena ema Simón Pedro. Te tisiapapa, náechajiacapa ema Jesús máimaharine esu máimase ema Pedro. Ticajumahi ésu eta muraca fiebre.

³⁹ Tásiha, mapauchapa ema Jesús. Máquijisinapa eta muraca fiebre. Tinaracavanepa ésu, téchepucavanepa. Suéchapajiricapa éma, énapa ena máimitureana.

Camuriana ena macanaruarunapahi ema Jesús

(Mt 8.16-17; Mr 1.32-34)

⁴⁰ Te jena cáperehiquenehi, te téricapa eta sache, ena achaneana námavacapaipa namutu ena nacajumaqueneana eta mayehe ema Jesús. Apanapaneneji eta najumanapahi éna. Manacapaipa eta mavahu te náinahuana, macanaracapaipahi.

⁴¹ Maveranavare ena éreanana máquijiruanapahi te náqueheana ena nacajumaqueneana. Tipiararecanapaipa eta náuchusirapahi. Ánipa nacahe:
—Pítira Machichaquenevi ema Viya.

Émasera ema Jesús vaipa máisapahini náimiyannahini napiaraca éma, taicha náimatihí éna eta émairahi ema Cristo.

*Tamutu avasareana te Galilea mapaica ema Jesús
(Mr 1.35-39)*

⁴² Te apanapa sache, te tijararahipa, tiyanapa ema Jesús te mávapahi. Natanucapasera ena achaneana. Náetupasirapa éma tayehe eta mávihahi. Navarahapa náiminasichayarehini. Vaipa náisapahini mayannahini.

⁴³ Émasera ema Jesús máichavacapa:
—Nutuparacasivaichuhi eta nuyanirayare tayehe eta apana avasareana taicha nuvanahirichuhi eta níchuiravacaya ena achaneana náehisiraina ema Viya apaesa macuchucuhavaca —máichavacapa.

⁴⁴ Tacahe, tiyanapa tipaica ticametarairupaipa te náurujisirarevana tayehe eta avasareana te Galilea.

5

*Tiáramicarepa eta náitusiravahi eta jima
(Mt 4.18-22; Mr 1.16-20)*

¹ Te jena sácheanahi, ema Jesús mávinehi te tachausi eta cáquiure ticaijare Galilea. Títecanapana ena camuriqueneana achaneana. Váipanecha náratavahini, tipamihejiricanapana eta navairahi nasama eta macametarairuirahi ema Jesús eta máechajiriruvana ema Viya.

² Máimahapa ema Jesús eta apisi pacure te tachausi. Ena ticayeheana eta pacureana, tisipajiricanahi eta ichapequeneana nayutaheana.

³ Tacahe, ema Jesús tiávachupaha tayehe eta mapacurehi ema Simón Pedro. Mavanecapa máevataeca apaesachicha eta pacure. Téjacapa ema Jesús eta te pacure, tépanavapa máimitucavacapa ena achaneana.

⁴ Te títipiricapa eta máimitusiravacahi, máichapa ema Pedro:
—Tata, iama eta juca epacure tayehe eta táupenamaiya. Iáquijieca eta jara eyutahe — máichapa.

⁵ Ema Pedro majicapapa:
—Maestro, tamutu yatí vinajuiricahi, tájinasera vítucavahini. Tavetijipa puiti eta tajarahiraripa. Nusuapavisera eta juca pivanesiranuhi, náquijiecaya eta nuyutahe —máichapa.

⁶ Jéhesarénehi, te nachurucapa eta yutahe, tiyututucavaipahi eta jímana. Vaipa táratavahini ténarujicapa eta ichape yutahe taicha eta tajitacareva eta jima.

⁷⁻¹⁰ Natiarihihisera te apana pacure ena nachamuriana: ema Jacobo émapa ema Juan. Tacahe, náevahauquichapa tímicatacanayarehi. Te títecanapana, náinicachapa eta apisiquene pacure. Tiánehirichahavare vahi táratavayarehini taicha eta tajitacarevahi, téricayarepaini eta pacure. Ichape eta náramesirahi namutu taicha eta náimairahi eta camuriquene jímana. Tásiha, ema Pedro máepuyumirauchapa ema Jesús. Máichapa:

—Tata, pítiyara yátupiquenevíhi Viáquenuvi. Váhicha nímiuricava nutupihamirauchavi nútí. Nucapacaturarahiquenehi —máichapa.

Matiarihihí ema Jacobo émapa ema Juan, machichanaveana ema Zebedeo. Machamurianaahi ema Pedro. Énerichuvare tíáramecanarinehi éna, énapa ena apamuriana natiarihiqueneanahi. Émasera ema Jesús máichapa:

—Vahi picupica, Simón. Pínajicainapa puiti eta juca pématanerepini. Nútí níjaracaviya eta apana pématanerepiyare. Pitanucainapa ena achaneana nuchaneranaya —máichapa.

¹¹ Tacahe, te nachurupaicapa eta napacureana te tíájipahi, étapa nanaquisinehi. Tiyananapa náehicapa ema Jesús.

*Ema Jesús macanaraca ema émana achane leproso
(Mt 8.1-4; Mr 1.40-45)*

¹² Tacahe, eta mánuucuirapaipahi ema Jesús eta avasarechicha, mácapajicapa ema émana achane macajumaquenehi eta lepra, tamutu eta máquehe. Eta máimairahi ema Jesús, máitecapauchapa. Tépuycapa te mamirahu. Máichapa:

—Tata, nucasiñavahi eta piyehe, picanaracanupaini.

¹³ Majicapapa ema Jesús:

—Nuvaraha nuncanaracavi. Tájina píchiravaina puiti —máichapa.

Manacapa eta mavahu. Énevanerinehi témitiacahi eta majumainihi.

¹⁴ Matuparacapasera ema Jesús. Ánipa máicha:

—Pímaha, nacuíja picumetaca eta nútirahi nuncanaracavihi. Piyanavasesera pímerecava nayehe ena tuparairucana, apaesa náimamacavi. Énainapa tímatajiricanainapa eta yátupirahi pinaraca, pipachihairapa. Piyanyareva me Viya. Picamavahuyarepahi eta pihusulupayachirayare taicha eta macanarasiravihi —máichapa ema Jesús.

¹⁵ Tásihasesera, náechapa namutu ena achaneana te avasareana eta máitupajijiasiravahi ema Jesús. Nayanauchapaipa ena camuriqueneana achaneana, navarairahi nasamararacayarehi, macanarasiravacayarehiva tayehe eta najumana.

¹⁶ Émasera ema Jesús, majunijimuriahachucha. Tiyanapa tayehe eta mávapahianahi apaquehe. Ánaqui mayujarasihayarehi.

Éma Jesús macanaraca ema émana achane macajumaquene eta muracaquiha
(Mt 9.1-8; Mr 2.1-12)

¹⁷ Étana sache ema Jesús tímiturecahi te tajuhe eta peti, camuriana ena achaneana. Natiarihihivare ena fariséoana tépiyacavana religiósana, énapa ena escribánoana, tímataiana eta nayeherepiana ena israelítana. Éna, tiásihanahi te Jerusalén, ena apamuriana tiásihanahivare te avasarechichana tayehe eta Galilea, étapa te Judea. Éma Viya máimicatacahi ema Jesús eta macanarasiravacayarepahi ena nacajumaqueneana.

¹⁸ Títecapanavarepa ena apamuriana, námapahi te áchuji ema achane muracaha. Navarahainipa nacasiapa te tajuhe te mávihahi ema Jesús.

¹⁹ Étasera eta nayututusravahi ena achaneana, vahi náitujicavahini nasiapahini. Tímipanechavanapasera náimiapanapa te tamaequehe eta peti. Navetatamaequechapa eta peti te manapaicahi ema Jesús, nacajuchuchucapa ema macajumaquene.

²⁰ Tacahe, te máimahapa ema Jesús eta nacasiñavairahi eta mayehe, máichapa ema macajumaquene:

—Tiuri, nuchicha. Eta pipecaturanahi, nucaepahainavipa.

²¹ Éna escribánoana énapa ena fariséoana, eta napanerequenehairahi eta macayemaquenehi ema Jesús, tisemanarinehi. Ánipa nacahe te nasamureana: “Éma maca tímijachavaipapuca Viya eta macaepahairayaréji eta pecatuana. ¡Tétavicava eta matapirava! ¡Taicha macarichu ema Viya maratatah macaepaha eta pecatuana!” tacahehi eta napanereruana.

²² Émasera ema Jesús máimatihí eta napanereruana. Máichavacapa:

—¿Tájaha tacayema téjecapavahi eta epanereruana?

²³ Tájina tájejavaina eta níchirahi ema maca: “Nucaepahainavipa eta pipecaturanaini”. Máejerapánapuca eta níchahini: “Pécheputa, piyana pipaica”.

²⁴ Tiuri puití, nuti Manerjirunuhi ema Viya, nímereuchavainapa eta nuratahairahi nucaepaha eta pecatu te juca apaquehe. Ímararacanu —tacahe, máichapa ema macajumaquene—. Puiti nuchicha, nuvanecavi pécheputa. Piveha eta jara piyereruva. Piyana te pipena —máichapa ema Jesús.

²⁵ Enevanerinehi téchepuruca ema macajumaquenéni. Mavehapa eta mayereruva. Tipacapa te namirahu ena achaneana. Tiyanapa te mapena. Ichaperinehi eta macunachirapahi ema Viya.

²⁶ Ichaperinehivare eta náramirahi namutu ena natiarihiqueneanahi. Tétavicavarinehi eta nacunachirahi ema Viya, picacaucharinehivare. Ánipa nacahe:

—Tétavicava táramicareva eta juca vímahaquenehi puiti —nacahepa.

Éma Jesús máichuha ema Mateo, mayehyare apóstole
(Mt 9.9-13; Mr 2.13-17)

²⁷ Te táequenepa eta júcana, ema Jesús tíuchucapa. Éta mapaisirapahi, máimahapa ema achane ticaijare Mateo. (Ticaijarehivare Leví.) Téjacahi éma eta te macatuparahaiyahi eta macobraresirahi eta impuesto.

—Yare, péhicanu —máichapa ema Jesús.

²⁸ Enurujipa téchepucahi ema Mateo. Manaquicapa tamutu eta matuparahainihi. Tiyanapa máehicahi ema Jesús.

²⁹ Tacahe, te jena sácheanahi, tépiyarecapa eta piesta ema Mateo te mapena. Máichuhapa ema Jesús eta máenirisirayarehi, énapa ena camuriqueneana macutiqueneanahi ticobraracarahiana impuesto, énapa ena apamuriana máemunacasareana ema Mateo.

³⁰ Natiarihihivare ena máimitureana ema Jesús. Tásiha títecapanavarepa ena fariséoana énapa ena escribánoana. Éta tímianavacahi, ticaechirecanayarehi. Ánipa náichavaca ena máimitureana:

—¿Tájaha tacayema ecachanemuri eta enisirahi ena námitatajiana ticobrerecarahiana eta impuesto? ¡Tétavicavahi eta nacapecaturaravahi! —nacahepa.

³¹ Émasera ema Jesús, te masamairiricapa eta náechajiriruvanahi, máichavacapa:

—Ena majumareanahi vahi nácamunuimahi ema médico.

³² Núti, vahi étaina tímitecanu nutanupanavacayare nácani matapiravareanahi. Eta tímitecanuhi núti nutanupanavacayare ena tisipecaturanapanahi apaesa náitsivacha eta napaneruana, náeneuchavapa me Viya —máichapa ema Jesús.

Nayaserecapa ema Jesús tayehe eta ayuna

(Mt 9.14-17; Mr 2.18-22)

³³ Tiuri, nayaserecavare ena achaneana ema Jesús:

—¿Tájahapuca tacayema vahi ayúnanainahíni ena pímitureana? Énayapasica ena máimitureana ema Juan náichahi eta muraca ayuna eta nayujarasirana. Énaripa ena fariséoana, énerichuvare. Tásiha, ena pímitureana píti tinicanahi, téranahivare —náichapa.

³⁴ Majicapapa ema Jesús:

—Nímicutichinahe puiti. Vahi táuricaimahi ayúnanainahíni icha ena íchuhaqueaneanahi tinicanayare nayehe ena araimana. Tiúrisamureanayarehi taicha matiaríhihi ema arayena. Tájina táuricahini ayúnanainahíni. Téhesera te tépenapuca éma, jéhesare ticatisamurevanayare. Tacutiquene, vuíchaha táuricaimahi ayúnanainahíni ena nímitureana.

³⁵ Járjapainapasea eta sáchevare, ticaverejicasianayare, taicha ticaratacuanainapa ena ticapacuanayare núti. Jéhevarepa ayunanainapa.

³⁶⁻³⁸ Esamanuchaha. Eta juca eta nímiturapianahi, amairiha arairu. Mavaraha ema Viya arairuyare eta eyeherepianayare eti nuchanerana. Vaipa tácuticacaimahi eta nayeherrepiana ena apamuriana achaneana. Eta ítusirahi éti eta nímiturapiana, tavaraha ínajica eta ichasi eyeherepiana tauriqueneanahi.

³⁹ Ticajerasera eta náinajisiráhi ena achaneana eta nayeherrepiana tauriqueneana. Apaesachicharichu eta navarairahi naicha eta juca arairu nayeherrepianayare. Namutuyaréni navaraha náimiyanava eta nayeherrepiana tásihaqueneanahi eta napanereruana ena náchucanaveanaini —máichavacapa ema Jesús.

6

Ena fariséoana náimipicauchahi eta nayeherrepiana tayehe eta sávarumuhua. Émasera ema Jesús máimereuchahi émarichu téchahi eta nayeherrepiana ena achaneana eta sache nanarasirayare

(Mt 12.1-8; Mr 2.23-28)

¹ Eta jena sache sávaruquenehi, tiyanapa tipaica ema Jesús. Mámamurihapa ena máimitureana. Témehicavanapa ena fariséoana. Náetavivijicapaipahi eta isanitiana. Tacahe, eta napaisirapahi, ena máimitureana navechuquihapaipahi étajavapahi eta trigo. Navepiraquihapaipa, tépurajacachavanapaipa. Tinicanapaipa. Tísapacareichucha eta nanisira, taicha téculanahi.

² Tacahe, eta náimarasirapahi ena fariséoana, tise manapaipa. Ánipa naicha:

—¿Tájaha tacayema vahi epicaucha éti eta juca sache tacapicahuquenehi? Écharichuhi éti vahi tísapacarémahíni eta vícaematanerahi puiti. Eta juca evepiraquihapahi eta trigo, ticaijare ecaematanehi —náichapa.

³ Tásiha, majicapavacapa ema Jesús:

—Németeaca éti vahi eacautiara eta tacayemaquene eta Sagrada Escritura, eta máichavaquenevahi ema víyarahaini David eta mapaisirapahi téculhapaipa, énerichuvare ena téhicanapahi.

⁴ Écharichuhi éti te masiapapa eta mapena ema Viya, tiyaseserecapa eta manicayarehi. Nájaracapa eta pan tacapicahuquenehi nanacasarehi te namirahu ema Viya. Nanicasarehi ena tiyujaracarahiana émasera ema David vahi tátuparacahini manicahini. Étasera eta máecuavahi, manicapa eta pan, énapa ena macachanequeneanapahi.

⁵ Tiuri puiti, numetacaheyare: Nuti Manerejirunuhi ema Viya, nútirichu néchahi eta sache nanarasirayare ena achaneana —máichapa.

Ena Jesús macanaraca ema achane tépenavahu

(Mt 12.9-14; Mr 3.1-6)

⁶ Tiuri, te apanapa sávaru, tiyanavarepa ema Jesús tayehe eta náurujisireva. Tímiturecavarepa. Tásiha, matiaríhihi ema émana achane, ticajumahi eta mavahu váure. Vaipa tayamuricahini, tépenavahuhi.

⁷ Natiarihivare ena escribánoana, énapa ena fariséoana. Náimaharipahi emá Jesús te macanaracayarehipuca emá macajumaquene eta jena sache tacapichahuquenehi. Natanu-nuiricahi eta tiviuchayarehi éma.

⁸ Émasera emá Jesús máimatihí eta napanereruana éna. Tacahe, máechajicapa emá achane ticajumavahuhi. Máichapa:

—Yare, pitupihayare ani te namirahu emá achaneana —máichapa.

Tásiha, titupihapa emá achane te namirahu.

⁹ Tásiha, máichavacapa emá Jesús:

—Nuvaraha epanerechaya. Puiti juca sache sávarumuhuhi, táuricahi víchaya eta táuriqueneana, ¿masí? Táuricahi vípuchayare emá nacajumaqueneanahi, ¿masí? ¿Ímijachapuca tíuriyare eta víchirayare eta tamauriqueneana, vicaparecapuca emá achaneana? ¿Tájahasica eta epanerechahi? —máichavacapa.

¹⁰ Tacahe, emá Jesús máesenimurihapa emá achaneana. Tásiha, máichapa emá achane macajumaquene:

—Nímaha, picajaruvauchava pímereca eta pivahu —máichapa.

Eta máimeresirahi eta mavahu emá achane, enevanepa tinaravauchavanepa.

¹¹ Tacahe, tiseanmarinehi emá fariséoana eta náimairahi. Tásiha, tiyaserejiricacanapa:

—¿Tájahapuca vícharacaini emá mácatataji eta táimicaviúchaini? —nacahepa.

Emá Jesús manerejica emá dócequeneana apóstoleanayarehi

(Mt 10.1-4; Mr 3.13-19)

¹² Te jena sácheanahi, tiyanapa emá Jesús tayehe eta tápusi eta márijuecu. Tamutu eta jena yati tiyujaracahi me Viya.

¹³ Te tjarahipa, máichuhavacapa namutu emá máimitureana. Manerejicapa emá dócequeneana mayeaneanayarehi apóstole.

¹⁴⁻¹⁶ Ena nani emá manerejiruanahi: emá Pedro (éma ticajarevare Simón), émapa emá maparapeichuhi ticajare Andrés; émapa emá Jacobo* émapa emá maparape Juan; émapa emá Felipe; émapa emá Bartolomé; émapa emá Mateo; émapa emá Tomás; émapa emá apana Jacobo; émapa emá apanavare Simón; émapa emá Judas; émapa emá Júlasí Iscariote (emá tjararecahi emá Jesús).

Emá Jesús máimitucavaca emá camuriqueneana achaneana

(Mt 4.23-25)

¹⁷ Tacahe, tichavapa emá Jesús, énapa emá máimitureana. Te tachachacu eta mari táinunapahinepa, étapa nacainunainehi emá camuriqueneana achaneana. Ena nani tiásihanahi eta te avasare Jerusalén, eta te provincia Judea, étapa eta provincia Siria. Eta tímitecanahi éna, navarahahi nasama emá Jesús eta máimiturapiana, navarahavare macanaracavacahini tayehe eta najumana.

¹⁸ Ena ticatajivanahi návaháruanahi emá éreanana, macanaracavacapasera emá Jesús.

¹⁹ Namutu emá achaneana navarahahi náemamahaca emá Jesús taicha náechahi tinaracayarehi eta najumana eta náemamahasirayare taicha titupajjiacavahi éma.

Emá Jesús máimitucahi nayehe emá ticunachacareanahi me Viya

(Mt 5.1-12)

²⁰ Tacahe, máesenimurihapa emá Jesús emá máimitureana. Máichavacapa:

—Éti ímatihí eta tacamunuqueneanahi eta iáchanevana, tétavicavahi eta iúricarevayarehi taicha máejerare eta ejaçapirayare eta máechajiriruva emá Viya, machanerahérayarehi.

²¹ Eti ejamurachahi puiti eta itaresirahi eta matapiravarecare te mamirahu emá Viya, tétavicavahi eta iúricarevayarehi taicha tjaracaheyare éma eta evarahaquenehi.

Éti iyauchavanahi puiti taicha eta epecaturana, tétavicavahi eta iúricarevayarehi. Títeçapainapa eta evapinavairaya, éçavainapa, taicha eperdonachareya me Viya.

²²⁻²³ Eti nuchaneranahi, járajapainapa eta sache ticatianacaheanainapa emá achaneana, navarahainapa tiáquijicaheana. Tipanararachaheanainapa. Nacatianapicainapa eta ijareana. Eta juca náichiraheyarehi, táichavenehi eta éhisiranuhi nuti Manerejirunuhi emá Viya. Váhisera ecuarami eta juca. Ene nacahehi eta nacatajivairahi emá profetanaini. Te ticatianacaheanahi, ¡çurisamurechavachucha, evapinavavare! ¡Tétavicava eta iúricarevaya taicha ejaçapainapa eta ícuchirichuhi te anuma!

* **6:14-16** Emá apana Jacobo machichahi emá Alfeo. Emá apana Simón, tímaticarehi éma, náumurvainihi emá revolucionárioana ticajareanahi “cananístana”. Navaraha náquijica emá extranjerioana romanoana, énaripa nacapaque-recavacahi emá israelítana. Eta májuchirahi emá Lucas, ani macahehi: “...emá Judas mayehe emá Jacobo...”. Váipasera vecha te machichahipuca emá Jacobo, téhevare maparapehipuca. Véçahisera eta mapapirahi eta májare emá Judas. Ticajarehi Lebeo étapa eta Tadeo. (Te pivaraha pécha, pitanuca te Mateo 10.3 étapa te Marcos 3.16-19.)

Éma Jesús máimitucahi nayehe ena tavayuaruanahi eta tájiparacana

²⁴ Tacahe, éma Jesús máechajicapa ena apamuriana achaneana, tímcutijiricavahi natiar-ihíhi te mamirahu, tiyerehianahisera éna. Ánípa máicha:

—Éti evapinavapa eta ecaimahaquenerahi, páurehesamiyare éti. Tíchechuhainapa eta evapinairavainíhi.

²⁵ Páurehesami eti esatuheherecanahi, taicha ichapenapa eta écuhairaya.

Páurehesami eti ecasamureana eta piesta, écarairicavahi, taicha ichapeyare iyairaya, ecatisamurevainapa.

²⁶ Páurehesami eti namunaneanahi ena achaneana. Eta tacahehi eta nacunachiravacahi ena profetana tépiyacavanahi tímijachavana mavanaranahi éma Viya, tivayuarahianahisera.

Vémunacayare ena ticitianacahaviana

(Mt 5.38-48; 7.12)

²⁷ Puítiripa eti esamanuanahi, numetacahe: Émunacayare ena ticitianacaheana. Ímereco eta iúriya nayehe ena ticatichaeanahi.

²⁸ Eyaseaca éma Viya eta nayujarahuína nácani téchajicanahi eyehe. Eyujaraucha ena tímehaheanahi.

²⁹ Te máehahepuca mácani achane te emira, vahi ecujicapa. Íjaracasera eta étachacaya eta emira. Te naverejicahepuca eta esacu, ísapayare. Te naverejicahevare eta ecámisa, énerichuware ísapayare.

³⁰ Énaripa nácani tiyaseacaheanahi eta ecajirayare, íjaracaya. Te naverejicahepuca eta ímahaqueneana, vahi ecucamesa eta náimichaviraina.

³¹ Numetacahe eta apana: Te evaraha eta náuriraya ena achaneana eta eyehe, tituparacahe iúriyare éti eta nayehe.

³² Éti, tájina ecunachacarevaimahi eta me Viya, te nacarichuhi émunaca nácani témunacahenahi éti. Apanasica témunarahiana ena máimatirahanahi éma Viya.

³³ Tacutiquene, tájinavare ecunachacarevaimahi me Viya, te tacarichuhi icha eta táuriqueneana nayehe ena tíurianahi eyehe. Apanasica títsirijicavanahi ena máimatirahanahi éma Viya. Tituparacahe ecachuricavacayare eta iúriya.

³⁴ Téhevare nacarichupuca íjaraca nácani títsirijicavanahi te ticapucaheana, tájinavare tacunachacarevaina eta me Viya. Apanasica ena máimatirahanahi éma Viya tíjaracana ena títsirijicavanahi te ticapurecana.

³⁵ Étisera émunacayare ena ticitianacaheana. Íchayareva eta táuriqueneana nayehe namutu. Íjaracavare nácani ticapucaheana. Vahi ecucuchapa eta náitsirijirápiyare. Máimaharine éma Viya. Éma tíjaracaheyare eta táitsivayarehi eta iúriyanahi. Eta tacahehi eta ímereuchirava eta machichaheira éma Tata Vicaiyaquene. Taicha éma, tétavicavahi eta máuriva nayehe namutu ena váinarajiqueneana énaripa ena máechavarahanahi eta máemunasiravacahi éna.

³⁶ EJapanurahiyareva, ecutiyaere eta majapanuirahavihi éma Tata Vicaiyaquene.

Éma Jesús tímítucavahi eta vahi vicuncine eta náejecapiravana ena apamuriana achaneana; vítinasera vicuneuchava

(Mt 7.1-5)

³⁷ Vahi ecunemahi eta náejecapiravana ena apamuriana achaneana, váhivare ecucacahivaca, machu étina táimicuñacahe me Viya. Te máejecapavapuca mácani achane, vahi ecucaraha macaicuñavane, apaesa vahi macuicuñacahe éti éma Viya. Eperdonacha ena téjecapavana eyehe apaesa maperdonachahe éma Viya.

³⁸ Ecajirahiya nayehe ena achaneana. Éma Viya títsirijicavayare eyehe. Tímepaná-vainapa eta májjararuheyare éma. Te iúrihi éti nayehe ena achaneana, éma Viya, tétavicavayarehi eta máurivaya eta eyehe éti.

³⁹ Tacahe éma Jesús, ánípa tacahe eta máimiturapi, máimicutichirahi:

—Váiparinehi tichurucacanaimahi ena apinana púchuquiána, taicha tíáquiapicavanayarehi te pusu.

⁴⁰ Émaripa mácani amaperu te escuelahipuca, váiparinehi macachuricaimahi mácani mayehe maestro. Tapaenumava te máitucapa, macutisarepa éma mayehe maestro.

⁴¹ Vahi táurica eta ecunerahi eta ánichichaqueneana náejecapiravana ena apamuriana achaneana. Tituparacahe ecuneuchava eta táichapeva eta éjecapirava étjiva.

⁴² Vahi tituparacahemahi étupirica eta jácani ánichichaquenehi máejecapiravahi éma eparaepiya. Tájina eviyahini eta econsejarapinahini. Ichapesera eta tatuparasirahéhi étupirica eta éjecapiravanahi éti. Tapaenumava eta étupirisirapa eta íchavaquenévanihi, táuricapaini econsejacha éma eparaepiya tayehe eta máichavaquenévahi.

*Emá Jesús máimicuticha nayehe ena achaneana eta tacahirahi eta yucuquiana
(Mt 7.17-20; 12.34-35)*

⁴³ Tacutiquene tímaticarehivare eta táhiana eta yucuquiana. Jararihi eta tinicacareana. Jararihivare eta vahi tánicacare.

⁴⁴ Énerichuvare eta yucuqui tímaticarehi eta táurinisiva eta táhi. Étaripa eta sitavere, váiparinehi tíuchucaimahi eta táhihini narasahinahipucaini. Tásiha, eta ijicaqui váiparinehivare tacahimahi eta tahi cachicheruhinahini.

⁴⁵ Ene nacahe nácani tíuriana achaneana tatupiruvahi eta náechajirisirava taicha tíuríhi eta nasamure. Nácanisera achaneana váinarajipanereruana, vahi tíurimahi eta náechajirisirava. Tíñemahipivacahi taicha eta tavayuchahi eta tavainarajiva eta nasamure.

*Emá Jesús máimicuticha ena tisuapajirahiana énapa ena masuapajirairahana
(Mt 7.24-27)*

⁴⁶ ¿Tájaha tacayema eta échajicanu éti, “Tata náquenu” ecahepa; tásiha vahi esuapahini eta nuvanairipiana?

⁴⁷ Nácani tisuapanuanahi náitachahivare eta nuvanairipianahi, téchemarahianahi táicha. Nuvaraha nímicutchinahe éna.

⁴⁸ Nacutiyarehi mácani títuca ticatupiareca peti, manacayarehi eta túmeana yucuqui emuruquiana. Tiúpenavacahi máicha eta masucuqueruana. Jéhesare te járajapapa eta muraca técatícava, tíamaquiha eta tíquiva, tísiamapa eta une, váipasera tacaeyacahini eta peti, taicha máetupiricahi eta máepiyasirahi.

⁴⁹ Nararihivare ena tépiyacavana tisuapanuana, váhisera náitachahini eta nuvanairipiana. Éna nacutíhi emá máítucaraha tépiyareca peti. Vahi manacaimahi eta túmeana yucuqui, váhivare táusiapirahini máicha. Te járajapapa eta muraca técatícava, tísiamavarepa eta une, tacajimuyapaicapa eta apaquehe. Tíjuhúchavapa tíáquipaicava eta peti, témitiequenepa tamutu —máichavacapa emá Jesús.

7

*Emá Jesús macanaraca emá mamusura emá capitán romano
(Mt 8.5-13)*

¹ Tiuri, te títapiricapa emá Jesús eta máimitusiravacahi ena achaneana, tichavapa eta te avasare Capernaúm.

² Matiaríhíhi emá achane apavasana. Comandante éma nayehe ena suntaruana romanoana. Capitán eta mávacure. Ticajumahi emá mamusura. Tíánehiripahi tépena. Ichaperinehi eta máéñamiravahi taicha máemunaruquenehi emá mamusurahi.

³ Tacahe, te masamairiricapa emá capitán eta matiaríhirahi emá Jesús, máevatacavacapa ena náiyamurianahi ena israelítana náichuhapanayarehi emá Jesús, macanarasinapanahini emá mamusura.

⁴⁻⁵ Tacahe, te náitecapauchapa emá Jesús ena vanairucanahi, nayaseacapa, ániipa naicha: —Mararihi emá capitán te víávasahi. Ichapemuri eta máimicatasirahavíhi. Máemepiyarecavare eta ichape peti eta víurujisirareva eta víuyujarisirarehi. Tásiha puiti, tivanecahavíhi víchuhapanávi picatajicahini picanarasinapanahini emá mamusura. Tatuparacahi pímicatacaini emá maena —náichapa.

⁶ Tacahe, emá Jesús tísapavapa tiyana, máehicavacapa éna. Étasera te tíánehianapa eta mapena, mavanecavacapa emá capitán ena máimaticasareana, nametapana emá Jesús. Ániipa naicha:

—Tata Jesús, eta juca máechajiriruvahi emá capitán: “Tata, vahi picucaéñamacava eta pítesiraina eta nuyehe, taicha vahi táuricahini písiapauchanusamíhini te nupena.

⁷⁻⁸ Eta tacahe, vahi nupatsicavahini nútijacarávainahini níchuhapanávi. Németeaca tarataharichu picavanairípi eta picanarasiraya emá numusura. Taicha nútí nusuapahi te tivanecanuana ena anuquehepananahi eta nuyehe. Nútiripa nusuapacarehivare nayehe ena nusuntaruranahi. Te nuvanecavaca, téhevare níchuhavacapuca, tisuapanuanahi. Te nuvanecapuca emá nuvaneru, enurujipa tisuapanuvane” macahepa.

⁹ Te masamapa emá Jesús eta juca, ichaperinehi márami eta yátupirahi macasiñavairahi eta mayehe. Máichavacapa ena téhicanapahi:

—Numetacahe: Nájna nímhaha émanaina israelíta mácutini emá maca achane apavasana eta macasiñavairahi eta nuyehe —máichavacapa.

¹⁰ Tacahe, nacarinepa tichavanahi ena vanairucana. Te títecapanapa, náimaharinehi emá macajumaquenehini, tinaracirapa.

Emá Jesús macaechepuca emá amaperu máepenaquenehi, suchicha esu esena suépenaimaquene

¹¹ Te táequenepa eta juca, tiyanavarepa ema Jesús tayehe eta avasare ticaijare Naín. Náehicapahivare ena máimitureana, énapa ena camuriqueneana achaneana.

¹² Te títecapanayarepa te avasare nácapajicavacapa ena achaneana tiámanapahi ema máepenaquene, náecarayarehi. Camurianapahivare ena achaneana téhicanapahi. Éma máepenaquenehi, macarichuhi suchichahi esu esena suépenaimaquenehi.

¹³ Eta máimairahi ema Viáquenu, majapanurinehi esu esena. Tásiha, máichapa:

—Vahi picuiyaha —macahepa.

¹⁴ Tásiha, mapauchapa ena tiámanapahi ema máepenaquene. Titupihanapa éna. Máemama-hicapa eta macajone. Tásiha, macahepa:

—Nuchicha, núti nuvanecavi, péchepuca —macahepa.

¹⁵ Enevanerinehi téchepucapa ema amaperu máepenaquenehi. Téchajicapa ema amaperu. Tásiha, ema Jesús máijaracapa esu maena.

¹⁶ Tacahe, ichaperinehi tiáramicarehi eta juca nayehe ena camuriqueneana achaneana. Ánipa nacahe:

—Tétávicava eta macunachacareva ema Viya. Jéhevare ema maca achane yátupiquene profeta, mavaneruhi ema Viya. Tétávicavapa táurismurecareva eta máuchusirahi te vimuri —nacahepa.

Ena apamuriana ánivare nacahe:

—Ema Viya tiúcupauchahavihi tímicitapanahávihi viti machanerana —nacahepa.

¹⁷ Eta juca máichaquenehi ema Jesús, téchacarevanepa tamutu avasareana te návasana ena israelítana. Títecavarepa te táyerehiqueneana avasareana.

*Ema Juan Tícachasiricarahi mavanecavacapa ena máimitureana
(Mt 11.2-19)*

¹⁸ Énerichuvare ema Juan, te mávihahi te cárcel, masamairiricapa eta juca taicha nametacapa ena máimitureana.

¹⁹ Tacahe, máevatacapa ena apinana, nayaserepanayarehi ema Jesús te yátupihpuca émaripahi ema Cristo ema macuchapaquenehi.

²⁰ Tacahe, ena vanairucanahi me Juan náitecapauchapa ema Jesús. Nayaserecapa, ánipa náichahi:

—Ema viáquenu Juan tivanecahavihi viyaserepanaviyare te yátupihpuca pítipahipuca Cristo ema vicuchapaquenehi. ¿Téheserapuca vímianavayarepuca vicuchapa? —náichapa.

²¹ Eta náitecapauchirahi ema Jesús, éma ticanararerecaichahahi ena nacajumaqueneana, énapa ena nacajaraqueneana. Máquijicavare ena éreanana tiávahácanahi nácani achaneana. Macaimairiricavare ena maveraqueneana púchuquiána.

²² Tacahe, ema Jesús májcapavacapa ena vanairucanahi me Juan. Máichavacapa:

—Nuvaraha ímararacaya eta níchaqueneana puiti. Nucaimairiricavacaipa ena púchuquiána. Nímipaisiraipa ena masariana. Nucanaracavacaipa ena leprósoana, énapa ena túhuquiána. Nucaechepusiravacaipavare ena náepenaqueneaini. Énerichuvare níchuhahi ena páureana náeneuchava apaesa náuchucuha. Tásiha, eyana emetaca ema Juan tamutu eta níchaqueneanahi.

²³ Vaipa macueñamava ema Juan eta nuyehe. Tétavicavapa eta máuricacarevahi éma, te ticasíñavahi eta nuyehe —máichavacapa ema Jesús.

²⁴ Tacahe, tichavanapa ena vanairucanahi me Juan. Tásiha, tépanavavarepa téchajica ema Jesús, máechajisihapa ema Juan. Ánipa macahe eta mametasiravacahi ena achaneana:

—Nuvaraha epanereuchayare ema Juan. Te jácani vuíchaha nacaratachahini éma, te eyanapa te mávapai apaquehe te mávihahi, ¿tájaha eta epanereruana tayehe eta macame-tarairuirahi? Éti ímijachavaipapuca mamapachichijiriruvaichucha eta máechajisirahi tacutíhi te vímararaca eta taflurena eta acutena te tacayamuririjicahi eta técativava.

²⁵ Ímijachaipavarepuca tavayuaruhi ema tíurinanácavayarehi eta macamuirihairahi. Écharichuhi éti mácani tíurinanacavahi, píncanillahi eta máitaresira, váiparinehi tíuchucaimahi te sache, váhivare tíyanaimahi te mávapahiana apaquehe. Manasiquenyarehi te jácani tíurina peti.

²⁶ Nuyaserecahe: ¿Nájahapuca ímijachahi éma? ¿Ímatihpuca eta profetairahi éma? Núti numetacahe: Matupiruvahi eta macametarairuirahi ema Juan. Mavaneruhi ema Viya eta yátupiquenehi profetahi éma. Nájina mácutihini ena apamuriana profetana.

²⁷ Ema maca Juan émara máechajisihaquenehi ema Viya eta te Sagrada Escritura, ánipa macahehi: “Nuvanecayare ema tínapumirauchaviyarepahi ema ticametarairuyarepahi, apaesa natsecavapaipa ena achaneana eta najacapiraviyare” tacahepa eta Sagrada Escritura.

²⁸ Núti nutupiruvu numetacahe: Ema maca Juan, nájina mácuti nayehe ena achaneana. Tétavicava eta macunachacarevahi. Íapajupanavahisera eta ecunachacarevahi eti nuchaneranahi, apaesachicharipa eta ecaicutiarairahi eta mapanereruanahi ema Tata.

²⁹ Ena achaneana, énaripa ena tisipecaturarahianaini, náimatiacahi ema Juan eta mavanecativahi me Viya. Nasuapahivare eta mametarairuana ema Juan. Eta tacahe, ticaicachasianapa mayehe.

³⁰ Énaserá ena fariséoana énapa ena máestroana, éna máisapavarahanahi nacaicachasihini mayehe ema Juan. Témpurecavanaripa eta náurivayarehini maicha ema Viya.

³¹⁻³² Etiarihíhi eti achaneana puiti juca sácheana, eta emasuapajiraivahi, nímicutichinaha ena amaperuana tiútseruanahi. Apapipijichucha eta nacayemaqueneanapahi. Ema apana macahepuca: “Vépiyacapa eta piéstachicha”. Énaserá ena apamuriana vahi náisapavahini. Tásiha, ema apana macahepuca: “Vépiyacapa eta ecarí”. Váhivaresera náisapavahini.

³³ Ema Juan Tícachasiricarahi, te tímeracavapa, muraca eta máimiturapianahi. Eta manicasareana, vahi tácutihini eta nanicasareana ena achaneana. Nararihísera te emuri ena tépiyaequenehanahi éma. Náimijachahi mávaháruhi ema éreana.

³⁴ Núti Manerejirunuhi ema Viya, eta nítecapauchirahepa, nucachaneheripa eti achaneana eta enísirahi. Etiarihíhivaresera eti épiyaequenehanuhi: “Ímaha ema maca, cánisiuquitataji, cávahárasí. Macachanevacapaipa ena cóbrarecarahianatataji énapa ena apamuriana nasipecaturarahiqueneanahi”.

³⁵ Éti épiyacavapa épururahi, ticutirinehi yátupinahini échemarahihini. Tétavicavahisera eta éjecipiravahi taicha eta emasuapajiraivahi. Te yátupihípucaini échemarahihini, ímatinuhini eta nucavanahirahi eta me Tata*.

Ema Jesús ticaichuhacasihi te mapena ema fariseo ticaijarehivare Simón

³⁶ Matiaríhíhi ema achane ticaijarehi Simón, fariséohi éma. Macumpirachapa ema Jesús, manipana te mapena. Masuapahisera ema Jesús. Tiyana. Te túripa eta tinicacare, téjacapa te mesa.

³⁷ Susamairiricapa esu ésuna esena tisipecaturarahiníhi eta matiaríhirahi ema Jesús te mapena ema fariseo. Tásiha, tiyana supauchahi ema Jesús. Suámapaipa eta bótechicha. Tínicapahi eta táijijequene perfume tasivachaquenehi.

³⁸ Tépuycapa te máivapeana ema Jesús. Tíyahacavapa, táetsipapapevachapa eta sutsera. Suájahapa te suchutimaca. Tásiha, suépusapevachavare eta suámaquenevahi perfume, sutsiucapevachavare.

³⁹ Tacahe, eta máimairahi ema fariseo eta juca, mapanerequenehapa. Téchajicapa te masamure: “Te yátupinahini profetaínahini ema maca, máimatiacarihini esu suca esena eta susipecaturaraivatatajihí. Vahi táuricahini suémamacahini” macahesamurepa.

⁴⁰ Émasera ema Jesús masamahi eta mapanereruhi ema fariseo. Máichapa:

—Simón, jucarihi nuvaraha numetacaviya.

Ema fariseo majicapapa:

—Nímahaseji, pimetacanu, maestro —máichapa.

⁴¹ Tacahe, ema Jesús máimicutiarachinapa, máichapa:

—Natiarihi ena apinana ajairana ticanteveanahi mayehe ema rico. Ema émana tican-tevehi quiniento; ema apana ticantevehi cincuenta.

⁴² Tacahe, vahi náratamahini navachachahini eta nanteveana. Tásiha, maperdonachavacapa ema rico ena apinana. Tiuri puiti, nuyaserecaviyare. Ena nani apinana, ¿nájahapuca ema témunacapanahi ema rico? —máichapa.

⁴³ Majicapapa ema Simón:

—Ticutimahi ema tisintevapanahi.

Tacahe, máichapa ema Jesús:

—Pímahaipajira.

⁴⁴ Tacahe, ema Jesús máimararacaripahi esu esena. Tásiha, máichapa:

—Pipanereaca esu suca esena. Puiti, te nusiapapa te pipena, vahi pímisipacahini eta nívape. Ésusera esu suca esena tisipapevachanuhi te sutsera, tiájapevachanupa te suchutimaca.

⁴⁵ Píti vahi pitsiucanuhini eta pijacpiranuhi. Ésusera, ichapemuríhi eta sutsiucapevachiranuhi.

* 7:35 Eta juca mayeherepi proverbio ema Jesús te máechajiriruvá, ani tacahe: “Eta téchemarahicare, éta nacunachihiyare namutu ena tachichanaveana”. Tatiarihi eta tacayemaquenehi tayumurevahi.

⁴⁶ Váhivare piámasichanuhini eta aceite eta pijacapanuhi. Ésusera esu suca esena tisipapevachanuhi eta te táijijequene perfume.

⁴⁷ Yátupi tisipecaturainihi esu suca. Numetacaviyaresera, nuperdonacharipahi ésu tamutu eta supecaturanaini. Eta tacahe, ichape eta suímeresirahi eta yátupirahi eta suémunasiranuhi. Nácanisera apaesarichuhi eta napecaturanaini, apaesarichuhivare eta námunaraiva, taicha apaesarichuhivare eta najacapirahi eta nayehe perdón.

⁴⁸ Tacahe, ema Jesús máichapa esu esena:

—Vahi picueñamava, nuperdonacharipa tamutu eta pipecaturanainihi.

⁴⁹ Tacahe, ena natiarihiqueneanahi chimaracanahi náejaruanahi te mesa nacahepa te nasamureana: “¿Nájahapuca ema maca ticaemuñavahi marataha maperdonacha eta pecat-uana?” —nacahepa.

⁵⁰ Émasera ema Jesús máichapa esu esena:

—Táuricapa piyana. Yátupi eta piúchuchuhairaya táichavenehi eta picasiñairanuhi.

8

Natiarihihivare ena esenana tíátianapahi ema Jesús te mapaisihapahi tayehe eta avasareana

¹ Te táequenepa eta juca, tiyanavarepa ema Jesús, tipaichahi tayehe eta tasimutuqueneana avasarechichana. Ticametarairupahi eta máechajiriruva ema Viya eta náuchucuirayare ena ticasíñavanahi mayehe, machaneranayarehi. Náehicapahivare ena dócequeneana apóstoleana.

² Énerichivare náehicapahi ena esenana máepachiaruanahi nayehe ena éreanana tiávahácanainihi. Sutiarihipahi esu María Magdalena, máepachiaruhi nayehe ena siétequeneana éreanana tiávahácanainihi ésu. Natiarihihivare ena apamuriana esenana macanararuanahi tayehe eta apanapanenejiqueneanahi najumanainihi.

³ Sutiarihipahi esu Susana, ésupa esu Juana, mayena ema Chuza. (Ema Chuza, mayehihi empleado ema Herodes, téchahi tamutu eta máimahaqueneana ema Herodes.) Maveranahivare ena apamuriana esenana, tiámauchavanapahi eta nirure, náitátirapahi ema Jesús, énapa ena apóstoleana.

Eta máimicutichaquenehi evaraqui tacaevaquenehi te apanapaneneji máteji te apaquehe (Mt 13.1-9; Mr 4.1-3)

⁴ Te jena sácheanahi, camuriana ena achaneana tiyananapaipa napaucha ema Jesús. -Tiásihanapahi te avasareana. Te máimahapa éma ena camuriqueneana, máechajicavacapa; máimicutiarachinapa eta máimitusiravacahi. Ánipa máicha:

⁵ —Matiarihi ema émana achane. Tévpapanahi te máesane. Tásihasera, eta mapaisirapahi témircapaipapuca eta evaraqui te achene. Eta nanucuiraparacahi ena achaneana, nácatayacapaipa eta evaraqui táemiriruanapahi. Táimahapa eta cáyure, tanicapa.

⁶ Tásiha, eta apana evaraqui témircapa te máripahi apaquehe. Tímarucainipa, tásihasera tájjicapa eta sache taicha muracapahihi eta apaquehe.

⁷ Eta apana evaraqui témircapa te taparereji eta itapequiji. Tiúrinainihi eta táimarusira, étasera eta itape tacachuricapa eta tajurusirahi, táemuriachapa.

⁸ Eta apana evaraqui témircapa te tiúrina máteji. Tijurucarahihi eta táimarusira. Tiúrinahivare eta tahi. Tájaracahi ichapemuri eta tahi —macahepa.

Te titapiricapa ema Jesús eta máechajirisiravacahi, máichavacapa:

—Te evarahapuca ecaicutiara, tavaraha eta epanerechinavaya —macahepa.

Ema Jesús máitametacavaca ena máimitureana eta juca máimiturapihi (Mt 13.10-23; Mr 4.10-20)

⁹ Tacahe, ena máimitureana nayaserecapa ema Jesús tájahapuca tacayemahi eta máimicutichaquenehi mayehe ema tévacarahi.

¹⁰ Émasera máichavacapa:

—Ema Tata tituparacanu nítametaheya éti eta juca mapanereruana táequeneruana. Mavarahahi ímatiequenehaya éti. Énasera ena apamuriana achaneana nímicutiarachinavacahi, apaesa vahi máejererémahi eta nacaicutiarairaya eta nasamaquenehi. Tavaraha napanerechinavaya. Te vahi yátupina eta navaraira nasuapa, váhivare nacaicutiaraimahi eta nímiturapiana.

¹¹ Étara eta juca tacayemaquenehi: Eta evaraqui tímicitijiricavahi eta máechajiriruva ema Viya eta nímiturapianahi.

¹² Natiarihi ena achaneana nasamaripahinéni eta nímiturapianahi, émasera ema Váinaraji vahi máisapahini tánasihini te nasamureana. Enevanehi macamatisicavaca eta nasamaquenehi, mamavarairahi nacasiñanuhini apaesa nucuchucuhavacayarehini. Éna, nacutihi eta máteji muracapahi te achene.

¹³ Natiarihivare ena apamuriana achaneana, nacutihi eta máteji máripahi. Te nasamararaca eta nímiturapiana, nasuapa, tíurisamureanarinehi. Váhisera naratahahini nacaravahuhini yátupinahíni. Vahi nácutihíni eta evaraqui tíuparehi. Anipirichu eta náehisirahi. Tinajicavanávane taicha eta náimairavahi eta nacatajivairahi.

¹⁴ Natiarihivare ena apamuriana achaneana nacuti eta máteji te távihahi eta itapequiji. Énerichuvare nasamararacahinéni eta nímiturapiana. Napaneréquenehahinéni, tahapapiricavachisera eta jácani táicharacavayare eta náitairesira. Váhivare náinajicahíni eta tacaefamarasiravaca eta tájiparacana, étapa eta navarairahi tirricochavana. Váhivare náinajicahini eta náichirahi eta tauriqueneana. Tamutu eta juca táemetavícahi eta navarairahi téhicanuana. Tamapurujíhi eta najacpirahi eta nímiturapiana. Tájina vahi nacaemataneacahini ema Viya.

¹⁵ Natiarihiserá ena apamuriana achaneana nacutihi eta tíurina máteji. Éna, nasamararacahi eta nímiturapiana, náunacahi yátupi te nasamureana. Tájina vahi náichiravainahíni eta náehisiranuhi. Ichape eta nacaemataneasirahi ema Viya. Vahi nayacujimahi.

*Éma Jesús máimicutiarachava eta lámpara eta máimituresira
(Mr 4.21-25)*

¹⁶ Ánivare macahe:

—Sínsuanahi nácani tiyustacanahi eta lámpara namicachuyarehi, tásihasera, najihapaicapucaini, nanacavarepucaini te tápecu eta náetsatsame náimasirare. Vahi tamicauchaimahi. Tacamunuhi nanacayarehi te anuquehe. Jéhesare ticaecherasareyarepa tamutu apaesa nácani tisiapanapahi, tímairiranarayepahi.

¹⁷ Tayanapanepuca ticayumuruquianahi, tamutuyarehisera ticaechera jácani tayumururevanahi. Tájina tépacuchaimahi jácani najajairairuvanahi. Tamutuyarehi téchacareya.

¹⁸ Eta tacahe, ecaquiñaicha yátupina eta juca. Taicha mácani máitururuequenehahi yátupi, tiápajucavayarehi eta máitupajijiasiravayarehi. Mácanisera apaesarichuhi eta máitucaquene, te váipa mapanerequenehahini, máemitisicayarehi eta máitucaquenénihi.

*Suítecapachapa esu maena ema Jesús énapa ena maparapenaveana
(Mt 12.46-50; Mr 3.31-35)*

¹⁹ Tacahe, esu maena ema Jesús énapa ena maparapenaveana títecapanapa te peti te máimituresihahi ema Jesús. Váhisera náitujicavahini nasiapahini taicha tiyututucavanahi ena achaneana.

²⁰ Nametacapasera ena apamuriana achaneana ema Jesús:

—Esu pémunaruquenehi pena énapa ena piparapenaveana nararihi ani te aneca, navarahi téchajicaviana —náichapa.

²¹ Émasera majicapavacapa:

—Yátupi némunacavacahi esu meme énapa ena nuparapenaveana. Nararihiserá ani te juca nuchacaya ena némunaruanahivare, nuparapenaveanahi. Taicha tisuapajirahianahi éna tayehe eta máechajiriruvana ema Viya, ticaemataneacanhivare éna —máichavacapa.

*Éma Jesús macaesamirica eta táepacusirahi eta une étapa eta técaticava
(Mt 8.23-27; Mr 4.35-41)*

²² Étana sache, ema Jesús tiávacuhapa eta te pacure. Tásiha, máichavacapa ena mayeheana apóstoleana:

—Viyana, viánueca te apachara —máichavacapa.

Tacahe, tiyananapa tiánuecanayarehi.

²³ Eta napaisirapahi, ema Jesús tívecapa tímacapaipahi. Tacahe, járajapainapa eta muraca técaticava. Tépacucapa muraca eta cáquiure. Tasiapauchapaipa eta une te pacure. Tipicanapa ena máimitureana, taicha tímaticavanapa eta náecharisiravayarehi.

²⁴ Tacahe nacajamicapa ema Jesús, náichapa:

—¡Maestro! ¡Maestro! ¡Péjamical! ¡Pímaha vécharicavainapa taicha eta tépacuca!

Enevanepa téchepucapa ema Jesús. Macamatnacapa eta técaticava étapa eta táepacusirahi eta une. Tésamiriecavapa tamutu.

²⁵ Tacahe, máichavacapa ena máimitureana:

—¿Tájaha tacayema vahi ácasíñavahini eta nutiarahirapahi eta eyehe? —máichavacapa.

Énasera tíaramecanapa. Tésenijiricanapa, tásiha nacahepa:

—¡Tétavacavapa eta máitupajjiasirava! ¡Jéhesare, yátupiquene eta émairahi machichahi ema Viya! Taicha eta mavanairipi, tamutu tasuapahi eta técativaca étapa eta une —nacahepa.

Ema achane návaháruanahi ena ichapemuriqueneana éreanana
(Mt 8.28-34; Mr 5.1-20)

²⁶ Tacahe, títetapanapa te apachara tayehehi apaquehe eta provincia Gadara. Te apachara tacanarapahi eta provincia Galilea.

²⁷⁻²⁹ Te tiúcupaica ema Jesús, énapa ena máimitureanahi, máuchujiuchavacapa ema émana achane. Ema maca achane mávasaichuhi tayehe eta juca avasare Gadara. Tájínapasera máimatiyahini mayanahini te peti taicha namaurishichaipahi ena camuriqueneana éreanana tiávahácanahi. Ánaquiaparipa eta návahásirahi. Nametapanéni ena achaneana nacaratata. Náitiaca te ichapepi carena étapa te enure, te náimahavarepa tacananesica naicha ena tiávahácanahi. Émasera, tétavacavaipahi eta matumevahi. Mavechuguimurivare eta carena máitihanahi. Tijunavare, tiyanavarehi te mávapahiana naicha ena éreanana. Macapenajuechavacahi eta ecariana. Mamuriarehi eta máítaresirahi.

Tacahe, te máimahapa eta matiarahirahi ema Jesús, mapauchapa. Tépuycapa te mamirahu. Ema Jesús mavanecavacapa ena éreanana náinajica ema achane. Ema achane tipiararecapa. Ánipa macahe:

—¿Tájaha picha píteca pipauchanu, piti Jesús, Machichaquenevihi ema Viya? ¡Pájapanunu vuíchaha picuvanecanu ánaqui te nucaicuñaiyayare! —máichapa.

³⁰ Tacahe, ema Jesús mayaserecapa:

—¿Tájaha píjare piti?

Ema achane majicapapa:

—Núti nucaijare “Nacapenaharu ena ichapemuriqueneana éreanana”.

Éma, tacahehi eta majicapirahi ema Jesús taicha camurianahi ena tiávahácanahi.

³¹ Tacahe, ena éreanana nayaseacapa ema Jesús vahi macuaquijicavaca te táupenaquene pusu náicuchihi návihayare éna.

³² Tatiarihivare eta camuriqueneana cóchiana. Tinihicanahi te táemiripaisine eta masihi. Ena éreanana nayaseacapa ema Jesús máisapahini nasiapahacavaca eta cóchiana.

³³ Tacahe, ema Jesús macuchuchujicavacapa te máquehe ema achane, máisapahivare nasiapahacavaca eta cóchiana. Te tasamapa eta cóchiana eta nasiapahasiravacahi ena éreanana, tijunaparacanapa témiririjicanapa te tachaui eta cáquiure. Téririjicanapa tamutu.

³⁴ Natiarihivare ena tijaneacanainihi eta cóchiana. Te náimahapa, tiáramecanarinehi. Tiyananapa tijunapanapaia timetajiricanapaipa nácani nácapajiruvanapahi, étapa te avasare namutuvare nametaca.

³⁵ Tiáramicaréinehi nayehe ena achaneana. Tiyananapa náimahapana tájahapuca eta táichavaquenevahi eta cóchiana. Te títetapanapa, náimahapa ema achane návaháruinihi ena éreanana. Téjarapahi te máivapechacaya ema Jesús. Tájinaripahi máichiravainahini. Ticamuirihapahivare. Tásihasera, típcanarinehi ena achaneana.

³⁶ Tavetijipa te náitametacapa ena tímahanahi eta macuchuchujisirahi ena éreanana te máquehe ema achane.

³⁷ Tacahe, te nasamairiricapa, namutu ena achaneana ticavasanahi te Gadara, vaipa napatsicavahini máitecapauchavacahini ema Jesús taicha náeñamaipahi tácahémahivaréni eta apamuriana náitátiqueneana. Nayaseacapa ema Jesús machavahini te másinehi. Tacahe, tiávacuhavarepa éma, tichavavarepa.

³⁸ Tacahe, ema achane mayaseacainipa ema Jesús máisapahini máehica. Émasera máévatacaichucha machava te mapena. Ánipa maicha:

³⁹ —Piyanchucha pichava te pipena. Pimetajiricaya eta majapanuiravivihi ema Viya eta macanarasiravivihi —máichapa.

Tacahe, tiyanapa tichavahi ema achane. Mametacavacapaipa namutu eta macanarasirahi ema Jesús.

Ema Jesús macanaraca esu machicha ema Jairo, ésupa esu apana esena sucajumaquenehivare

(Mt 9.18-26; Mr 5.21-43)

⁴⁰ Te títicapavarepa ema Jesús te apachara, enevanepa nácapahi ena ichapemuriqueneana achaneana taicha nacuchaparairicaipahicha. Tiúrisamureanarinehi eta náimairahi éma.

⁴¹ Títicapavarepa ema émana achane ticaijare Jairo. Ema maca achane, tuparairucahi tayehe eta náurujisirareva tayehe eta jena avasare. Tacahe, ema maca achane tépuycapa te mamirahu ema Jesús. Mayaseacapa macatajicahini mayanahini te mapena, macanarasinapanahini esu machicha.

⁴² Taicha ésunaracavahi esu machichahi. Doce áñoripahi eta suhañorahi. Téñamajirica-vaipahi ésu, taicha eta sujuma. Tacahe, tiyanapa ema Jesús, máehicapa te mapena. Náehicavarepa ena camuriqueneana achaneana. Váipanecha náratavapahini eta napaisirapahi.

⁴³ Sutiarihipavare esu apana esena, sucajumaquenehivare. Doce áñoripahi tayerevahi eta suhitiarevahi. Ichapemuripa eta sutanusirahí ena médicoana, váhisera sucanaracahini ésu.

⁴⁴ Tépiyayacavapa témeñahava te maquecu ema Jesús. Suémamajiacapa te tacheyarapi eta mamuiriha. Enevanerinehi tinaraca ésu. Tíchecapa eta suítine.

⁴⁵ Émasera ema Jesús masamarichucha eta suémamajiasirahi. Macahepa:

—¿Nájaha témamajiacuananahi? —macahepa.

Nájina tísapavaina.

Émasera ema Pedro énapa ena machamuriana náichapa:

—Maestro, pímaharichuhi eta nasimutuvahi ena achaneana. Tiyutucavanahi te pichacaya. Váiparinehi tímaticarémahi nájahapuca nácani témamajiacavianahi —náichapa.

⁴⁶ Émasera ema Jesús macahevarepa:

—Nacañárihi témamajiacuananahi taicha nusamavahi núti eta nuncanarasirahi eta jumare táichavenehi eta nítupajijiasiravahi —macahepa.

⁴⁷ Ésusera esu esena, tímaticavapa eta máimatirahi ema Jesús eta suémamajiasirahi, tiyanapa supauchahi. Tépuycapa te máivapechacaya. Tiyayacareripa eta supisirahi. Sutupiruvapasera timetaurecavahi eta ésuirahi témamajiacahi. Ánipa sucahehi:

—Tata, nútira némamajiacavihi, nuvarairahi nunaraca tayehe eta nujumahi. Nusamavai-pasera eta nunarasirahi —suíchapa.

⁴⁸ Tacahe, ema Jesús, máichapa esu esena:

—Tiuri, nuchicha, pinaracapa puiti táichavenehi eta picasiñairanuhi. Vaipa picueñamava eta pichaviraya te pípena —máichapa.

⁴⁹ Téchajiricavaichahahi ema Jesús eta suyehe esu esena, títecapanecha ema émana achane tiásihahi te mapena ema Jairo. Mametacapa:

—Esu pichicha tépenasamipahi. Vaipa picucamesa ema Maestro —máichapa.

⁵⁰ Émasera ema Jesús, te masamapa, máichapa:

—Vahi picuarameca, váhivare picueñamava. Pácasiñava eta nuyehe. Tinaracayareichu esu pichicha —máichapa.

⁵¹ Tacahe, tiyanavanepa ema Jesús. Te títecapanapa, vaipa máisapahini ema Jesús nasiapahini ena achaneana. Nacarichu tisiapanahi ema Pedro, ema Jacobo, ema Juan, émapa ema suiya esu amaperu, ésupa esu suena.

⁵² Natiarihihisera ena achaneana te tajuhe. Tíyahanaripa éna. Te máimahavacapa ema Jesús, máichavacapa:

—Vahi ecuiyaha. Váhira suépenahini esu suca amaperu. Tímacarichucha —máichavacapa.

⁵³ Téccavanarichuchasera eta mayehe éma, taicha náimahahi eta suépenirapahi.

⁵⁴ Tacahe, ema Jesús macaratacapa eta suvahuana. Tásiha, máichapa:

—Nuchicha, nuvanecavi: Péjamica, péchepuca —máichapa.

⁵⁵ Tacahe, esu amaperu tichavapa títareca. Tásiha, téchepucavanepa. Ema Jesús mavanecavacapa ena ticachichana náijaraca eta sunica.

⁵⁶ Ichaperinehi eta náramirahi ena ticachichana. Émasera ema Jesús matuparacavacapa vahi nacuechajisiha eta náimahaquenehi.

9

Ema Jesús mavanecavacapa ena dócequeneana apóstoleana, napaicayare tamutu avasareana

(Mt 10.5-15; Mr 6.7-13)

¹ Ema Jesús macurujimurihapa ena dócequeneana mayeheana apóstoleana. Tacahe, máijaracavacapa eta náitupajijiasiravanayare naratahairayare náquijica ena éreana, naratahairayareva nacanaraca nácani nacajumaqueneanahi.

² Tásiha, ticavanahianapa ticametairuanayare eta tacamunucarevayarehi náeneuchiravayarehi ena achaneana, náinajisiraina eta napecaturana, náehica ema Cristo. Ticanararecanayarepahivare nácani nacajumaqueneanahi.

³ Eta mavanesarayacahi, máichavacapa:

—Tájina iámaimahi eta eyereruva. Váhivare ecucayupairiquipahi. Tacuijavare ecaniruru-cuhaina te alforja. Étaripa eta plata, tacuijavare iama. Étanainarichu eta emuiriha iámayare.

⁴ Enasinumayarepahisera te jácani peti nayehe ena tíurihi eta najacapiraheya. Tíamainucava te táitecapa eta eyanirayareva.

⁵ Téhesera nacuijapuca nacuvaraha najacapahe tayehe te jácani avasare, váhivarepuca nacuvaraha nasama eta emetarairuya, iúchucavanepa. Étatapevachavanumayaresera eta máteji te ivapeana. Táicutiarayare eta máicuñasirayare ema Viya taicha eta namavarairahi najacapahehini —máichavacapa.

⁶ Tacahe, tiyananapa ena apóstoleana. Tamutu napaica eta avasarechichana. Ticametarairuanapaipahi eta máechajiriruva ema Viya, eta viúchucuiraya majacpirahaviyare éma. Ticanararecanapaipavare ena nacajumaqueneana nácani náetupiaruanapahi.

*Ena Herodes masamairiricavare tamutu eta juca máichaqueneanapahi ema Jesús
(Mt 14.1-12; Mr 6.14-29)*

⁷ Tacahe, ema aquenucachi Herodes masamairiricavare tamutu eta tiáramicareana máichaqueneanahi ema Jesús. Váipasera máitucacarehini. Taicha masamairiricahi náimijachahiji émahí ema Juan téchepucahi te máecari.

⁸ Ena apamuriana náimijachahivare téchepuca ema antivuini profeta. Ena apamuriana náimijachahivare ema Elías.

⁹ Émasera ema Herodes macahepa:

—Nútijacaru vahisera nucavanairipi náechatinuca ema Juan, eta máepenirahi. Puiti, ¿nájahapuca ema maca nusamaiririruasaparacahi eta máíchira eta tiáramicareana? Nuvarahasa nímatini ema mácara —macahepa.

*Ena Jesús máitaparaha máenicavaca ena camuriqueneana achaneana
(Mt 14.13-21; Mr 6.30-44; Jn 6.1-14)*

¹⁰ Tacahe, tichavanapa ena apóstoleana eta napaisirahi. Nametacapa ema Jesús tamutu eta náichaqueneanapahi. Tásiha, éma mámamurihavacapa te mávapahi, tinapaicahi eta avasare Betsaida.

¹¹ Téhesera náechavarepa ena achaneana eta macaijuhehi ema Jesús, tiyananavarepa nacapayacahi. Émasera majacpavacaichucha, máimitumuriharipavare tayehe eta náitaresira ena machaneranahi ema Viya. Macanaracavare ena nacajumaqueneanahi.

¹² Te náimahapa ena apóstoleana cáperehiyareipahi, témeñahavanapa eta mayehe ema Jesús. Tásiha, náichapa:

—Táuricapa pivanecavaca ena achaneana nayanapa natanuca eta nanisiha étapa eta náimasihaya te avasarechichana tachacayarahanahi eta juca viávihahi, taicha ani, tajina náviyavaimahi eta te juca —náichapa.

¹³ Tásiha, ema Jesús majicapapa:

—Étina, íjaraca eta nanica.

Énasera náichavarepa:

—Tájina viviyaimahi eta nanicahini ena nani achaneana. Jucárihinéni cinco eta pan, apiquipa jima jitaruca. Váiparinehisera nárataimahi. Tayanapane tatiarihinapucaini eta vivacharesihahini eta tinicacare, váiparinehivaresera nárataimahi ena nani camuriqueneana achaneana —náichapa.

¹⁴ Ena achaneana, cinco mil eta náichapemurivahi ena ajairana, énarichahavare ena esenana, énapa ena amaperuana.

Tásiha, ema Jesús máichavacapa:

—Evaneca náejahapaicavaca ena achaneana. Cincuentavacainapahi eta náiputsitsisiravaina —máichavacapa.

¹⁵ Énepasera tacahehi naicha ena apóstoleana. Tásiha, ticaejarecanapa namutu.

¹⁶ Tacahe, ema Jesús mavehapa eta cincoquene pan étapa eta apiqui jima. Máessenicapa te anuma. Mahasulupayachaipa ema Maiya eta máenisiravacayarehi ena camuriqueneana achaneana. Mayuvetutuhecavacapa, máijaracapa ena apóstoleana. Náijaracapasera namutu ena achaneana.

¹⁷ Namutupa tinicana, tísatuhevacapa. Váhicaruvare náitahini eta tinicacare. Dócehi saye ichapehiana tínicaíhi eta námacharájiana.

*Ena Pedro máimereucha ema Jesús eta émairahi Cristo
(Mt 16.13-19; Mr 8.27-29)*

¹⁸ Étana sache, ema Jesús énapa ena máimitureana tiápechavare típutsiacavana, tiyananapa tayehe eta nayujarasihayarehi. Te títvánapa eta nayujarasirahi, éma mayaserecavacapa:

—¿Tájaha nacayema ena achaneana eta nuyehe? ¿Nájahapuca náimijachanuhi éna? —macahepa.

¹⁹ Éna najicapapa, ánipa naicha:

—Ena apamuriana náimijachavihihi téchepuca ema Juan Tícachasiricarahini. Ena apamuriana tímijachavianahi ema víyarahaini profeta Elías, téchepucahi éma. Ena apamuriana tímijachavianahivare ema mácani apana profetaini antivuini, téchepucahi —náichapa.

²⁰ Ema Jesús mápechavare mayaserecavaca éna:

—Étiyapa, ¿nájaha ímijachanuhi nútí?

Ema Pedro majicapapa:

—Pítira yátupiqueneví Cristo, piásihaquenehi me Viya —macahepa.

Ema Jesús tímereuchava eta máepenirayarehi

(Mt 16.20-28; Mr 8.30-9.1)

²¹ Tásiha, matuparacavacapasera ema Jesús nacuija nacumetaca eta émairahi ema Cristo.

²² Tásiha, máichavarepa:

—Tacamunuichaha eta ichapemuriyare eta nucatajivairaya, nuti Manerejirunuhi ema Viya. Tépurunuanayare eta tuparairucana énapa ena aquenucarohana énapa ena escribánoana. Éna, tímicapacuanayareva. Mapanayareichuhisera sache eta nucaheyare eta népenirayare. Tásiha, nuchavayarehi néchepuca —máichavacapa.

²³ Tásiha, máimitucavacahi namutu ena achaneana, ániapa máichavaca:

—Nácani navaraha náehicanu, tacamunu náinajica tamutu eta tihapapiricana eta náehisiránuhi. Nacaravahuyareva eta nímiturapiana. Nájaracavavare eta táimicapasiraina eta náehisiránuhi.

²⁴ Nácanisera téñamanahi eta náitairesira, tiávamirahuanaya eta náehisiránuya, énajivayare ticamitiequenehavanaya eta náitairesira. Énasera nácani yátupihí tjaracavana téhicanuana, tayanapane táimicpacavacapuca eta náehisiránuhi, éna titujicavanayare tíuchucuhanayare eta náitairesiranaya.

²⁵ Énerichuvare nácani tacáañamararuanahi eta nacaimahaquenéirayare te juca apaquehe, tájina náimaequenehaimahi, taicha eta tacañamarasiravacahi tahapapiricavacahi tayehe eta náuchucuirayare.

²⁶ Énaripa nácani titsirihanapuca téhicanuana, náimitsirihapuca eta nímiturapiana, nútí apanava nutsirihayarevare nayehe ena nani. Nucaerajicainapa ena nani, nútí Manerejirunuhi ema Viya, te táitecapapa eta sáchevare nuchavirayare aquenucanuinapaipa. Te jena sáchevare, námainapaipa nútí eta nujaraíva, étaripa eta majaraíva ema Tata. Nucachanénapaipa ena sántoqueneana ángeleana.

²⁷ Nutupiruva numetacahe: Puítiripa te etaracu éti, etiaríhi éti vahi épenavanéimahi, ímahanumayare eta nucatuparahairahi aquenucanuya nuti Manerejirunuhi ema Viya —tacahepa eta máimituresirahí ema Jesús.

Ema Jesús, tihapamaichava eta máimahi

(Mt 17.1-8; Mr 9.2-8)

²⁸ Tiuri, te táequenepe eta óchoquenehi sache, tiyanapa ema Jesús, tiápanahi te anuquehe mari. Tiyujaracayarehi. Mapananarichusera ena mámaqueneanahi: ema Pedro, ema Jacobo, émapa ema Juan.

²⁹ Tacahe, eta mayujarasirahi ema Jesús énapa ena mámaqueneanahi, tjahúchavapa tísvachavahi eta máimahi ema Jesús. Apaimahipa eta mamira étapa eta mamuiríha. Tétavicavapa eta tajapuvahi tajararasirahi tamutu eta máquehe.

³⁰ Tásiha, tiáramicareanavarepa tímerecavana ena apinana ajairana. Téchajiricavanaripa mayehe ema Jesús. Ema émana, émahí ema víyarahaini Moisés. Ema apana, ema víyarahaini profeta Elías.

³¹ Tétavicavaipahivare tajararasirahi eta te natupihaiyahi. Náechajisihaipahi eta macatajivairayarehi máepenirayarehi ema Jesús tayehe eta avasare Jerusalén.

³² Tavarahaipaichanéni tímaca ema Pedro énapa ena apinana machamurianahi. Téhesera te náimahapa eta tjararacahi te nachacaya, témitiacarinehi eta náechapuneana. Náimarracarpahi eta majaraívahi ema Jesús, énapa ena apinana ajairana tíucupauchanahi.

³³ Tacahe, te máimahapa ema Pedro eta nachavirayarepa ena nani apinana, témeñahavapa. Tásiha, macahepa:

—Tata Maestro, tétavicavapa táuricacareva eta vívívairahi eta ani. Tiúripanahipucaini vépiyacahini eta epenahuinapachuhini. Pipenahuinarichuhini píti, mapenainarichuhivaréni ema Moisés, émapaini ema Elías —máichapa.

Váhinéni máimatiequenehahini ema Pedro tájahhipuca eta mavarahaquenehi macayema.

³⁴ Tacahe, eta máechajirisiravaichahahi, tjahúchavapa tíucupaicahi eta úcaji, tamuichavacapa ema Jesús énapa ena apinana ajairana.

³⁵ Tásiha, nasamarinehi eta mahu ema Viya, tayehe eta úcaji. Ániapa macahe:

—Ema maca ema yátupiquenehi nuchicha némunarquenehi. Éma esuapayare — macahepa.

³⁶Te tímatinapa eta mahu ema Viya nasamaquenehi, náimahapa ema Jesús, macarineipahi. Nájinariya ena tiúcupauchanahi.

Tacahe, ena mapanana apóstoleana, tiyerehi eta namametasirahi ena apamuriana nachamuriana eta náimahaquenehi.

*Ema Jesús macanaraca ema amaperu mávaháruhi ema éreana
(Mt 17.14-21; Mr 9.14-29)*

³⁷Te apanaquenepe sache, tiúcupaicanavarepa tayehe eta anuquehe mari návinehi. Natarihipavare ena camuriqueneana achaneana. Te náimahapa ema Jesús, tiyananapa nácapahi.

³⁸Matiarihihi ema émana achane te namuri ena camuriqueneana achaneana. Tipiara-capa muraca éma, ániya macahe:

—Tata maestro, picatajicanupaini pípuchinanuini ema maca nuchicha. Émanaracavahi te numirahu.

³⁹Mávaháruhi ema éreana. Macapiararerecahi técharipaicavavare ticarisasajacavare. Ichapemuri eta macatajivaira máicha. Vahi mávaraha máinajia.

⁴⁰Néchajiacaripahinéni ena pímitureana. Váhisera náratahahini nacuchuca ema éreana tiávahácahi ema nuchichasami —máichapa ema achane.

⁴¹Tásiha ema Jesús majicapapa:
—¡Tétavicava emasuapajiraivavaca eti achaneana! ¡Cúverarecaichapucaini eta nucami-chirahenahini! Piama ani ema pichicha.

⁴²Temeñahavainiya ema amaperu, tápechavarepa tacañamacahi tiáquiapaicavapa, téchari-ripacavaipavare. Émasera ema Jesús, máquijicapa ema éreana, muracapavare eta macaja-chirahi. Tásiha, májaracapa ema maiya, tinaracaipahi.

⁴³Náramirinehi ena achaneana taicha eta tamutuirahi marataha ema Viya, máitupajjiasiravahi.

*Tiápechavare ema Jesús tímereuchava máepenirayarehi
(Mt 17.22-23; Mr 9.30-32)*

Nanasirichahahi napanerequenehahi ena achaneana eta juca náimahaquenehi. Ema Jesús mápechavare mametacavaca ena máimitureana. Ániya macahehi:

⁴⁴—Ecaquiña yátupina eta juca numetarueya. Váhivare ecuemitsica. Núti Manereji-runuhi ema Viya, járajapainapa eta sáchezare tíjararecanuyare mácani achane nayehe ena ticatianacuananahi. Ticaratacanuanayareva —máichavacapa.

⁴⁵Énase ena máimitureana váhiquene nácaicutiarahini eta macayemaqueneanahi. Taicha émarichuhi ema Viya tíjaracahi eta vúichaha nácaicutiaraimahi. Váhivare napatsicavahini nayaserechahini tájahapuca tacayemahi eta máichiravacahi.

*¿Nájahapuca ema apóstole ticapicahupana?
(Mt 18.1-5; Mr 9.33-37)*

⁴⁶Te táequenepe eta juca, ena apóstoleana ticapinarujiricacanapa nájahahipuca ema ticapicahupanahi.

⁴⁷Émasera ema Jesús máimatiacavacapa eta náechajiririvanahi. Máichuhapa ema émana amaperuchicha, macatupihapa te namirahu.

⁴⁸Tásiha, máichavacapa ena apóstoleana:
—Nácani tijacapanayare ena amaperuana níchavenéinahi núti, ena nani yátupi náimere-cayare eta náemunasiranuhi núti taicha tímicitijiricavahi nútinahini najacapa. Taicha nácani tijacapanuanahi núti, énerichuvare tacahehi eta najacapirahi ema Ticachichanu, ema tivanechanuhi. Nácani náechapajiricayare namutu ena nachamuriana, náemunasiravacahivare, énahi ena ticapicahupananayare te etaracu —macahepa.

*Nácani vahi ticatianacahaviana, éna tímicitacahaviana
(Mr 9.38-40)*

⁴⁹Tacahe ema Juan mametacapa, máichapa:

—Tata Maestro, vímahahi ema émana achane máquijicavacahi ema éreana te píjare ticuti-rinehi pítinahini píjaracahini eta máitupajjiasiravahi. Tásihasera, vicavacahi éma, taicha vahi víumurivainahini —máichapa.

⁵⁰Émasera ema Jesús máichapa:
—Vahi ecucavaca éma. Taicha nácani vahi ticatianacahavianahi, éna tímicitacahaviana —macahepa.

Ema Jesús macajachavaca ema Jacobo émapa ema Juan

⁵¹ Te jena sácheanahi tíanenehipaipa títecapa eta mayanirayarehi ema Jesús te anuma. Tásiha, tíjaracavaichaha eta mayaniranumayare te Jerusalén.

⁵² Macavanairipipa tiyanana ena tínapumirauchanayarepahi. Titanucanayarehi eta máitecapihayare tayehe eta jácani avasare.

⁵³ Énasera ena samaritánoana vahi návarahahini najacapa taicha náimahahi éna eta matupiruirapahi te Jerusalén.

⁵⁴ Tacahe, ena apinana apóstoleana, ema Jacobo émapa ema Juan, tsemamajuheanapa eta namajacpirahi ema Jesús. Tacahe, náichapa éma:

—Tata Viáquenu, ¿pivarahapuca viyasesereca táemirica eta yucu tísiha te anuma? Étaina táitapaimuriha ena náenatajiana, tácuti eta máichaquenehi ema profetaíni Elías —náichapa.

⁵⁵ Tacahe, ema Jesús máimmaracapa éna. Tásiha, macajachavacapa, máichapa:

—¿Tájaha tacayema vahi tétupicava eta epanereruana? Ticutipa vahi mávaháruhénahi ema Espíritu Santo.

⁵⁶ Vahi étaina tímitecanu nícuñacavacayare ena achaneana, nuti Manerejirunuhi ema Viya. Tímitecanuhi nucuchucuhavacayare éna —máichavacapa.

Tásiha, tíanucuhanapa te apachacaya te apanhivare avasare.

*Vínajicayare tamutu, te vivaraha véhica ema Jesús
(Mt 8.19-22)*

⁵⁷ Eta napaisirapahi te achene ema Jesús énapa ena máimitureana, nacainunapa ema émana achane, mavarahapa máehica. Ánipa macahehi:

—Tata, núti apanavare nuvaraha néhicavi te jácani pivarahaqueneyare piámianu.

⁵⁸ Ema Jesús, ánipa tacahehi eta majicpirahi:

—Tamutu eta sárareana ticapenavaca. Énerichuvare eta cáyureana tamacajipachuvare. Nútisera núti Manerejirunuhi ema Viya, tájina nuviya nusiapihahini —máichapa.

⁵⁹ Te apanavarepa sache, máichuhapa ema Jesús ema apana máimiture apóstoleyare. Tásiha, ema majicapapa:

—Tata, nuyaseacavi písapanuhipucaini nuchava te nupena. Nucuchapanumayarehini eta máepeniraya ema ticachichanu, nécaranumaya. Tásiha, nucapayacavipa néhicaviya —macahepa.

⁶⁰ Ema Jesús majicapapa:

—Pésamirica náecaracacaichaha ena máecharaireana. Tájina tájjaracavimahi eta juca tihapasamurerecavihi. Yare, péhicanu. Níjaracaviyare eta pémataneyare. Picametarairuyare eta máechajiriruvana ema Viya —máichapa.

⁶¹ Matiarhivare ema apana énerichuvare macahehi:

—Tata náquenu, núti nuvaraha néhicavi. Písapanusera nucametavapananumaya te nupena —macahepa.

⁶² Ema Jesús majicapavare:

—Mácani achane tipaicapahi téyarecapahi vahi tichavaequenehavaimahi mámarairicahini eta mámaquene. Ene picaheyare piti, vahi pichavaequenehavaimahi tayehe eta tájiparacana. Taicha vahi nuvaraha mácani tínajicavahi eta macametarairuira eta máechajiriruvana ema Viya —máichapa.

10

Ema Jesús mavanecavaca ena setentaqueneana, tímiturecanayare

¹ Te táequenepa eta júcana, ema Viáquenu Jesucristo manerejicavarepa ena setentaqueneana apamuriána máimitureanahivare. Tiyananapa ticametarairuanayarehi te avasareana mapaisineanapahi éma. Apinanavacapahi eta napaisirayare éna.

² Máichapa eta matuparasiravacahi:

—Tétavicavapa eta vicamunuirava ena tímicatachavianaya tayehe eta juca vématanerepihi. Eyaseacayaresera ema Tata Vicaiyaquene májaracahavi ena náimicatachavi. Eta juca tímicutijiricavahi mácani achane eta macamunuiravahi ena tímicatacana eta máechatijisiraya eta maharusura.

³ Puiti, névatacaheyare eyana epaica. Nararihsera ena achaneana váinarajiqueneanahi étupiaruanayare. Éna nacutíhi eta sárare táíñehiqueneanahi. Étiserá ecutiyarehi eta uvesachicha eta tamansuvahi.

⁴ Eta epaisirayare, tájina íámaimahi eta tarera, váhivare íámaimahi eta billetera. Váhivare íámaimahi eta eparupeva. Eyaiyauchavayarepahiserá eta epaisirayarepahi te achene.

⁵ Te jácani peti ítecapihayarepahi, ani tacaheyare eta échajisirayare ena achaneana: “Ema Viya, tíúrichaheyare éti te juca peti”.

⁶ Nararihiyare ena achaneana navarahaya eta náurivaya mayehe ema Viya. Eta échajisiravacayare, tatupiruvaya me Viya májaraca eta náurivaya. Téhesera vahi nacuvarahana najacapahe, vahi ecucañamacava nayehe, taicha énapa téchinavana.

⁷⁻⁸ Te jácani avasare, jácani peti eta najacapiahepuca, enasipanayare tayehe eta peti íteca-pihahi. Vahi ecuepuru jácani tinicacareana náeniruheanayare. Étaripa jácani náesiruheanayare. Éti, táitsivayare eta ecaemataneasiranuyarepahi. Váhivare ecupamirahapahi ímacacuhapahi eta pétiana.

⁹ Ecanaracayarepahi ena nacajumaqueneana natiarihiqueneanahi. Tásiha, emetacavacapaipa námutu ena achaneana eta núcupaisiraripa nuti Cristo, nútirichuhi ema nacuchapaguenehi. Nucuchucuhavacayare námutu ena téneuchavana, ticasifínavanavare eta nuyehé nuti Mavanerunuhi ema Viya.

¹⁰ Téhesera nacuija nacujachapahe te jácani avasare ítecapihayarepahi, iúchucavanepa te calle.

¹¹ Ánipa ácahe: “Vétatapevachavahi eta juca tavaparu támaquenehi eta vívape. Eta juca táicutiarahi eta máicuñasiraheyare ema Viya taicha eta emavarairahi ejacapahavíhini. Vivarahasera vimetacahe eta máucupaisiraripa ema Cristo, émarichuhi ema vicuchapaguenehi, ema Mavaneruhi ema Viya. Macuchucuhahehíni éti, te éneuchavahíni, ácasifínavahíni mayehe” íchavacayare éna.

¹² Jéhesare, te táitecapapa eta juicio, tiápajucavainapa eta náicuñayare. Tacachuricayare eta nacaicuñairayare ena achaneana váinarajiqueneana ticavasanáini te avasaréni Sodoma — máichavacapa ema Jesús.

*Eta táicuñayare eta návasana ena achaneana masupajirairahana
(Mt 11.20-24)*

¹³ Tacahe, ema Jesús máechajicahi ena apamuriana achaneana, tímicutijiricavahi natiarihinahíni te mamirahu. Ánipa macahe:

—jPáurehesami eti nujaneanana ecavasanahi te avasare Corazín étipa eti ecavasanahi te avasare Betsaida! Ichape eta ícuñayare taicha eti ímaharipa tamutu eta tiáramicareana níchaqueneanahi te emirahu, váhisera ávarahahíni éneuchavahíni. Ena nani achaneana ticavasanahi te Siria, apavasanánahíníni, tétavicavahíníni eta namaurivahi, németecasera nútí téneuchavanavanehíni eta náimairahi eta níchaqueneanapahi. Enévanénahíni náimerecavahíni yátupi eta náeneuchiravainahíni.

¹⁴ Tásiha puiti, muracapanayare eta ícuñayare éti, taicha eta emavarairahi éneuchava. Tacachuricayare eta nacaicuñairaya ena achaneana apavasanana ticavasanahi te Siria.

¹⁵ Étaripa eti ecavasanahi te avasare Capernaúm, tamapuruji eta nútisurirahehi étapa eta ímairahi eta tiáramicareana níchaqueneanapahi. Eti ecasifínavavaicahi, ímijachaipapuca eta ticayapaheyare te anuma. Ichapesera eta etsirihacarevayare, taicha épujuquichavayare eta te yucu taicha vahi éneuchavaimahi éti —macahepa.

¹⁶ Tacahe, tiápechavavare máimitucavaca ema Jesús ena máimitureana, ánipa macahe:

—Nácani tisuapaheanayare, ticaecheranahi eta nasuapiranuyareva nútí. Énasera nácani tépuruheanayarepahi, ticaecheranayareva eta náepuruiranuhi nútí. Ene tacahehi eta náepuruiravare ema Tata tivanecanuhi —máichavacapa ena máimitureanahi eta napaisiayare.

Tichavanapa ena setentaqueneana vanairucanahi

¹⁷ Tacahe, tichavanapa ena setentaqueneana. Tiúrisamurereacavanapaipa eta náitecapihahi. Ánipa nacahe:

—Tata Viáquenu. Vítauchaipa eta pivanairipi. Viratahahivare víáquijicavaca ena éreanana taicha eta vipiarasirahi eta píjare —nacahepa.

¹⁸ Ema Jesús majicapavacapa:

—Tájinarinehi matumevaimahíni ema Satanás eta víáquiquijisirapahi ena majupahana. Taicha ema Espíritu Santo tímechanuhi eta nunecapirahi eta máquipaisiravahi ema Satanás, tacutíhi eta térameca eta táijahúchiravahi eta macaquijirahi te anuma.

¹⁹ Táitaurevaquene nútí, ichape eta nujaneasirahehi. Tayanapanepuca ícatayaca eta quichare, alacránpuca, tájinasera táicharachémahi. Eta juca ítupajijiasiravaya níjararuhehi, tacachuriaca eta máitupajijiasiravahi ema Váinaraji Satanás, énapa ena majupahanahi.

²⁰ Váhisera ecucasifínavavaica eta eratahairahi íáquijica ena éreanana. Iúrisamurereacavasera eta táejasiraipe te anuma eta elistana.

*Ema Jesús tiúrisamuréinehi mayehe ema Maiya
(Mt 11.25-27; 13.16-17)*

²¹ Tacahe, enévanehinehi táitecapauchahi ema Jesús eta máurisamurevahi maicha ema Espíritu Santo. Tásiha, macahepa:

—Tata Nucaiyaquene, tétavicava eta nucunachiravi. Jéhevare píti táquenuvahi eta anuma étapa te juca apaquehe. Títauchavaipa eta pipanereruhi. Vahi písapahini náitucahíni eta júcana ena achaneana tímijachavanahi téchemarahiana. Énapasera píjaracahi ena nani téticanuanahi, tájinahinéni náechemaraivainahíni. Puiti nasapiharipahi nacachuricahi ena títupajjiacavanahi. Tétávicavahi eta táurivahi eta pipanereruhi, píti Tata Nucaiyaquene.

²² Tacahe, ema Jesús máichavacapa ena achaneana:

—Ema Tata Nucaiyaquene, ema tjaracanuhi eta nútiraya néchaya tamutu. Nájina náratahaimahi énajivainahíni náimatihini ema Tata. Nucarichu nuti néchinavahi ena níminatiruanayare éma. Taicha nútí yátupíhi eta nímatirahi ema Tata Nucaiyaquene; tacutiquenéhi eta yátupirahivare eta máimatiranuhi éma —macahepa.

²³ Tacahe, mañajichamuripa ena máimitureana, máichavacapa:

—Tétávicavahi eta iúricacareva éti taicha tjaracahehi ema Viya eta juca ímairahi puiti eta níchaqueneanahi.

²⁴ Jéhesare, numetacahe: Acane ichapemuriana ena víyarahánini profetana énapa ena réyeánini, tétávicavahi eta navarairahi tímatinuana, navarairahivare náimaha eta juca níchaqueneanahi ímahaqueneanahi. Navarahahivare nasama eta nímituresirahi. Váipasera nacapayacahini —máichavacapa.

Ema Jesús máimicuticha, máechajishahi ema achane máuriquenahi, samarítanohi. Ti-japanurahi mayehe ema émana achane macajaraquenehi, tayanapane vahi émainahini majaneanainahini.

²⁵ Matiaríhihi ema achane, maestro tayehe eta mavanairipiana ema víyaraháini Moisés. Tiyanapa matanucahi ema Jesús, téchajiricavayarehi eta mayehe. Mavarahahi macacutiarayare. Máichapa:

—Tata maestro, ¿tájahapucaini nícharacavaini eta níurusirayare eta núchucuirayare te apana vítaresira? —macahepa.

²⁶ Ema Jesús majicapapa:

—¿Tájahasica tacayemahi eta téchajiriruvahi eta Sagrada Escritura? ¿Tájaha tacayemahi eta písamirahi eta péchajicuirahi? —macahepa.

²⁷ Tásiha, ema maestro majicapapa:

—Ani tacahehi eta néchejicuirahi: “Macarichu ema Viya pémunacayare te písamure. Macarichuvare éma piáchanevaqueneya. Píjaracaya tamutu eta pitumeva eta picamata-neasirayare. Éma pipanerechayare tamutu sácheana. Pémunacayareva ema piparaepiyahi tácuti eta pémunasiravahi píti”.

²⁸ Ema Jesús majicapapa:

—Tétupicava eta juca pijicapiranuhi. Te pítaucha eta juca, piúchuchayare.

²⁹ Émasera ema maestro vahi mavarahahini apaquehereruinahini. Máichapa:

—¿Nájahasica ema nuparaepiyahi? —macahepa.

³⁰ Ema Jesús máichavarepa:

—Nímicutichinaviyare eta juca. Matiaríhi ema émana achane. Tipacahi te achene, másiha te Jerusalén. Tiyanayarehi te Jericó. Eta mapaisirapahi te achene, náuchujiuchapa ena tíamerahiana. Náepuchiranumapa. Tíánehí nacapacayaréni. Námeychapa eta mámaqueneanapahi étapa eta mamuiríha.

³¹ Tásiha, macahepaipa ema émana tiyujaracarahi. Máimahapa ema achane te apaquehe te achenechacaya. Váhísera májapanuhíni máichejiuchahíni. Máétávicaichucha.

³² Tásiha, macahepaipavare ema apana achane. Éma, téchapajiricahi eta Templo. Énerichuvare te máimahapa, máétávicaichuchavare.

³³ Tacahe, macahepaipavare ema apana achane. Éma, indigenahi samaritano. Éma, te máimahapa ema macajaraquenehi, majapanurínehí.

³⁴ Tícheceanuma éma, témeñahavapa. Máipuchapa te aceite étapa eta alcohol eta majarana. Máepacuchavacapa te amaratataji. Tásiha, manaracuhapa manacaquechapa eta te maperapahi cavayu. Mámapa eta te máitecapihayarehi. Máipupuaracaipahi.

³⁵ Te apanapa sache, tiyanayarepa ema samaritano. Tivecuacavapa apipe eta maplata. Mavachachapa ema ticapenahi eta peti. Tásiha, máichapa: “Picatajicanu. Péchapajirisinánu ema maca achane. Te tatiaríhinapuca eta macamunuirava, píjarasinánuya. Nímahavirine nuvachachavi te nuchava” máichapa.

³⁶ Tiuri puiti, nuyaserecaviyare píti. ¿Nájahapuca ena nani mapanaqueneana ema tímunacahi ema maparaepiya najararuquenehi ena tíamerahiana? —máichapa ema Jesús.

³⁷ Ema maestro majicapapa:

—Ema témunacahi ema maparaepiya, ema tijapanuhi —macahepa.

Ema Jesús máichapa:

—Pímahaipajira, ene picaheyare piti apanava. Pijapanurahiyare —máichapa.

Ema Jesús máejirapanavaca te napena esu Marta ésupa esu María

³⁸⁻³⁹ Tímiyanavavarepa eta mapaisirahi ema Jesús. Máitecapauchapa eta avasarechicha suávasa esu ésuna esena ticaijaruhi Marta, ésupa esu suparape ticaijaruhi María. Mayanauchapa te supena esu Marta. Tétávicavahisera eta táurivahi eta najacapirahi éna. Tacahe, esu María téjacapa te máivapechacaya ema Jesús. Susamararacaripa eta máimiturapiana éma.

⁴⁰ Ésusera esu Marta tahapapiricaichucha eta sucaparujirahi, taicha eta suénisirayare ema Jesús. Tacahe, esu Marta tisemamajheripa eta suímairahi esu suparape suéjarasirahi. Tacahe, suíchapa ema Jesús:

—Tata Náquenu, picatajicanupa. Pivanesianu esu suca nuparape súimicatanuichu apaesaina tayehe eta ematanecana —suíchapa.

⁴¹ Tásiha, ema Jesús majicapapa:

—Páurevisami piti Marta, tétavicavapa tahapapirisiravi eta pématanerepiana.

⁴² Tituparacavi pínajica eta tihapapiricavihi. Picaravahu eta máechajiriruva ema Viya. Esu suca piparape María tétupicavahi eta supanereru. Suvarahahi suítucayare. Eta tacahe, tisamararacanuhi. Nájina tiverejicaimahi eta suvarahaquenehi suítuca —máichapa.

11

Ema Jesús títitucavahi eta viyujarasiraya

(Mt 6.9-15; 7.7-11)

¹ Tacahe, te jácani apanapa sache, ema Jesús máviahahi eta te mayujarasirarehi. Te títuyarápa, témeñahavapa ema émana máimiture, máichapa:

—Tata Viáquenu, pímitucavahi eta viyujarasirayare víti apanavare, tácuti eta máimitusiravacahi ema Juan ena máimitureanahi —macahepa.

² Tásiha, ema Jesús máimitucavacapa:

—Ani tacaheyare eta eyujarauchiravaina: Tata Vicaiyaquene, piti piávihahi te anuma, vipicauchahi yátupi eta pijare. Vivaraha ichapeina eta tasuapacarevaina eta pivana-ripiana nayehe namutu ena achaneana ani te apaquehe, tacuti eta nasuapiravíhi ena ángeleana te anuma.

³ Pájapanuhavi píjaracahavi puiti juca sache eta vicamunuqueneana vinicaquene-repiana.

⁴ Pájapanuhavivare piperdonachahavi eta viviurevana piyehe. Víti apanava viperdonachavacaripa namutu ena ticaviurevanahi viyehe. Vahi picuisapahavi vicha eta tamauriquene. Picatiuchahavi mayehe ema Váinaraji. Tacaheya eta eyujarauchiravaina.

⁵ Máichavare ema Jesús:

—Tiuri, nímicutichinaheya puiti. Matiaríhi ema émana achane. Tacahe, máitecapauchahi ema apana achane máitunacasarehi te enumuhu yati. Viájéropahi éma. Émasera ema avasarecuruhahi, tájina maviya eta máenicahini. Tásiha, mayana mayehe ema apana máitunacasarehivare. Máichainapapuca: “Picatajicanu, nucapucavi mapanaina pan.

⁶ Taicha títécapauchanuhi ema nítunacasare viájéropahi. Tájinasera nuviya nucumpirachahini”.

⁷ Tacahe, ema macaijuhequenehi váhipuca macujapanuhi, macahénapapuca: “Vahi picujarareca eta néchapune. Pésamirisinanuvare eta tapaja tacaerataquenehi. Tímacahnahivare ena nuchichanaveana. Vahi nítujicava néchepuca níjaracavíhini eta pivarahaquenehi” macahenapapuca.

⁸ Máitunacasarequénéihipuca éma, váhisera máipurajihini máechepuchahini máijarahahini eta mayaseseruhi. Téhesera te tímiyanavapuca mapiaraca ema ticamunuvahi, németeaca tipamicavayarehi téchepuca, máijaracayarehi eta macamunuquenepahi.

⁹⁻¹⁰ Eta tacahe, numetacahe: Échajica ema Tata Vicaiyaquene. Eyaseacayare eta ecamunuqueneana. Éma, tijapanurahi. Tisamaheyare, tíjaracaheyareva. Vahi ecuyacují eta eyaseasiraina. Téhevere tatiaríhinapapuca eta jácani íchiraya ichapehi eta tacajeravaya, eyaseacayare máijaracahéhini eta ítupaijijiasiravaya. Éma, tíjaracaheyare. Te jararíhipuca eta táichejimiráuchahe, éma macaevuísihainahayare.

¹¹ Eta juca títicujiricavahi te natiaríhipuca ena echichanaveanahi éti, te tiyaseacahanapuca eta pan nanicayare, váiparinéhi táuricaimahi íjaracahini éti eta márijahi, títicujiricavaipe ecavijaruhini ena echichanaveana. Étaripa te tiyaseacahanapuca eta jima, váhivare táuricaimahi íjaracahini eta quichare.

¹² Étaripa te tiyaseacaheanapuca eta varayuha, váhivare táuricaimahi Íjaracahini eta sáse.

¹³ Étiarihi éti vahi ecajirahihini nayehe ena achaneana. Íúrihisera nayehe ena echichanaveana. Ítucahi Íjaracavaca jácáni nayasearuheanahi táuriqueneana. Mavetiji ena Tata Ecaiyaquene tiávihahi te anuma. Éma, vahi ticavijaruheimahi eta te eyaseserepiana. Tíjaracaheyarehi tamutu eta eyasearuana, émaripa ema Espíritu Santo tiávahácaheyarehi —macahepa ema Jesús.

Ena achaneana téjcapavanahi eta náimijachirahi ema Jesús mávaháruhi ema Váinaraji Satanás (Mt 12.22-30; Mr 3.19-27)

¹⁴ Te apanaquenepa sache, ema Jesús macanaracahi ema achane, úpainihi eta máitaresira taicha eta mávahásirahi ema éreana. Tacahe, eta máuchusirapa ema éreana te máquehe ema úpainihi, tiúripa téchajica. Ichaperinehi nárami ena achaneana.

¹⁵ Natiarihíhisera ena apamuriana achaneana, ánipa nacahehi:

—Ema maca Jesús, vémeteaca majupahahi ema Satanás, ema náqenumurihi ena éreanana. Máijjararuhi jácáni eta máitupajijiasiravahi eta macuchusiravacahi éna —nacahepa.

¹⁶ Nararihíhivare ena apamuriana achaneana váhivare nasuapapajicahini ema Jesús. Eta tacahe, navarahapa nacaicutiarayarehi, nayaseacapa macuchucahini eta tiáramicare, máimereuchayare eta émarahi Cristo mavaneruhi ema Viya. Váhiserá nasuapapayarehini.

¹⁷ Émasera máimatihí eta napanereruana eta namasuapirahi. Máichavacapa:

—Nímicutichinahe puiti ena machanerana ema gobierno. Éna, vahi típutsimurihacacanaimahi apinainahipucaini partido. Te típutsimuriacacana, énajicacaipapucaini tiáquipaicacana. Émaripa mácani achane te camurianahi ena machichanaveana, váiparinehivare típutsimuriavananahi náehajiricacahini, énajicacahini náquipaicacahini.

¹⁸ Ene macahehi ema Váinaraji Satanás, váiparinehi máisapahini típutsicacana ena machamuriana, taicha mavarahahi tisimutuanayarehi éna, tímiyanavayarehi eta nacaetemajirisirahaviyarehi. Éti ímjachaipa nútirichuhi machamuri ema Satanás, táichavenehi eta nuratahairahi nucuchucavaca ena éreanana.

¹⁹ Tájina vahi étipucavahini éti eta juca epanereruana. Te émahipuca tímicatcanuhi ema Satanás, énerichuhivare éti máimicataruanahivare jácáni éma, eta ecuchusiravaca ena éreanana. Epanerechinávanuma.

²⁰ Émaquenehisera ema Viya, tíjaracanuhi eta juca nuratahairahi nucuchucavaca ena éreanana. Eta juca étara ícutiaraya éti eta matuparasiranuhi ema Viya eta nútirayare necha tamutu. Nútiripara nuti ecuchapaquenehi.

²¹ Tacutiquene mácani achane tume. Te macaratacahi eta mataquiriqui eta majaneasirahi jácáni macayehequeneana, nájina tiámeyechaimahi.

²² Téhesera macahepaipa mácani achane túmepanahi mayehe, maverejicayare eta mataquiriquini macasiñaquenehi. Máitiacavane. Tásiha, émapa técha tamutu eta majanearuinihi ema achane. Ene nucahehi nútí, túmepananuhi mayehe ema maca Satanás.

²³ Te vahi ecuehicanu, ecucaemataneacanu, éta tímereuchaheya machamurihehi éti ema ticatianacanuhi. Masapiha ímicatacahi éma eta macaetemajirisiranuhi.

Ena Jesús máimicutichinahi ena masuapajirairahanahi mayehe (Mt 12.43-45)

²⁴ Tímiyanava eta máechajirisiravahi ema Jesús, ánipa macahe:

—Énerichuvare éti ecuti mácani achane máinajiruhi ema émana éreana. Ema éreana tiyanainapa matanucainapa eta jácáni masiapihayarehi. Eta mamaichimavira eta mavarahaquene, mapanerechayarehi tichava. Macahénapuca: “Nuyanayare nuchava, nusiapahacayareva ema návaháruinihi”.

²⁵ Te títecapapa ema éreana mayehe ema achane mávaháruinihi, máimahapa ema achane máinajiripa tamutu eta mapeaturana, vuíchahasera máehicahini ema Viya.

²⁶ Tásiha, tiúrisamurepa ema éreana. Tásiha, tíchuarecapa ena siétequeneana machamuriana. Váinarajipanána éna. Nasiapahacainavarepa namutu éna. Jéhesare, tiápajucavapa eta mavainarajiva ema paure achane —máichavacapa ema Jesús.

Viúriyare te visuapa eta máechajiriruva ema Viya

²⁷ Mapaenumavahi títapirica ema Jesús eta juca máechajiriruvanahi, tipiaracapa esu ésuna esena te namuri ena achaneana. Ánipa sucahehi:

—¡Tétavacavapa eta sucunachacarevahi esu pena, táichavenehi eta suínasiravihi, suájisiravihi eta sucajurusiravihi! —sucahepa.

²⁸ Ema Jesús majicapapa:

—¡Tiápajucavayaresera eta nacunachacarevayarehi namutu ena tisamanayare eta máechajiriruvanahi ema Viya, yátupiyarehi eta nasuapirayareva! —máichapa.

*Éma Jesús macajachavaca eta namasuapajiraivahi ena achaneana
(Mt 12.38-42; Mr 8.12)*

²⁹ Tacahe, titecaparacana paichucha te machacaya éma Jesús ena camuriqueneana achaneana. Tásiha, eta máimitusiravacahi, máichavacapa:

—Nararihi ena achaneana puiti juca náetaviuchahi eta navainarajivana taicha vahi návarahahini nasuapa eta yátupirahi mavanerunuhi éma Viya. Tiyaseacuanahahi nímechayarehi eta tiáramicare táicutiarahi eta mavanésiranuhi éma Viya. Váhisera nímechaimahi. Tacarichu náimahayare eta níchararacavaya tacuti eta máichararacavahi éma profetaíni Jonás.

³⁰ Éma profetaíni Jonás yátupíhi ecutiararehi éma eta mavanésirahi éma Viya nayehe ena achaneana ticavasanahi te avasare Nínive. Ene nucahehi nuti Manerejirunuhi éma Viya, ecutiararenuhi puiti eyehe eti achaneana.

³¹ Tacutiquene, esu reina Seba eta acane, te susamairiricapa eta máitupajijiasiravahi yátupi éma Salomón. Ésu, tayerehiquenehineni eta suávasa, tiyanahisera sucapayaca éma Salomón taicha suvarahahi susamayarehi éma. Tacahe, te táitecapapa eta sáchehare téchepucanaya namutu, suyaseacainapa ésu eta nacaicuñahini ena nani máetupicushmanahi puiti. Sucáhénapapuca: “Táuricapa nacaicuñahini ena nani máetupicushmana, tájinapa náetseraruina nasamaripa éma Cristo, éma títupajijíapanavahi mayehe éma Salomón, tásiha vuíchahacaruva nasuapa” sucahénapa jácani.

³² Tacutiquene ena achaneana ticavasanahi acane te Nínive. Tisipecaturarahiana éna. Natupiruvahisera nasuapa eta mametarairu éma Jonás. Téneuchavavaneanahi. Tásiha, nacahénapapuca te jena sáchehare: “Táuricapa nacaicuñahini ena nani maparajuruana éma Cristo, taviuchahi eta namasuapirahi éma. Taicha éma máuriqueneapanahi mayehe éma Jonás” nacahénapa. Éta máimiturapiana éma Jesús, tamichahu eta vítaresira

(Mt 5.15; 6.22-23)

³³ Tímiyanava eta máechajirisirava éma Jesús, ánipa macahe:

—Súnsuanahi nácani tiyustacanaíhi eta lámpara namicahuyarehi, tásihasera nanacapa-pucaini te jácani tayumurevahi cuarto, najihapaicapucaini te cajune. Tacamunuhi nanacayarehi te anuquehe. Jéhesare, tamicauchasarepa tamutu apaesa tímairicanapaipa nácani tisiapanapahi.

³⁴ Éne ecahehi éti, eta esuapirahi eta nímiturapiana, tétavicavahi eta tamicauchiraya eta iáchanavana. Tímijunijicayare eta emaurivahi. Téhesera vahi esuapahini, tétavicavahi eta tamapicuvahi eta iáchanavana. Tanasipa tamutu eta tamaurivahi.

³⁵ Éta tacahe, machu ecaínajiruva tayehe eta juca esamaqueneanahi ímahaqueneanahivare, machu tayanariana te timapicu eta iáchanavana.

³⁶ Téhesera yátupina esuapa eta nímiturapiana, tétavicavaya eta tamicauchiraheya tayehe eta ítaresiranahi. Tásiha, vahi eyaseacanuimahi nímechahe eta tiáramicareana —macahepa.

*Éma Jesús máimereuchavaca eta nájecapiravana éna fariséana énapa éna escribánoana
(Mt 23.1-36; Mr 12.38-40; Lc 20.45-47)*

³⁷ Tacahe, te titapiricapa éma Jesús eta máechajisirahi, témeñahavapa éma émana fariseo. Macumpirachapa tinipanayarehi te mapena. Masuapahisera éma Jesús. Tiyana pa te mapena éma fariseo. Te tiúripa eta tunicacare, téjacapa éma Jesús te mesa.

³⁸ (Tiuri, éna fariséana, jucarihi eta nayeherepi te tinicanayare, tayanapanehipuca tipachivahuanahi, ticasipavahunumanayarehisera. Éta juca nasipavaurusiravahi, namavarairahi náechipejicahini eta náchanavana.) Émasera Jesús, vahi masipavaurucavanumahini. Tacahe, máraminehi ichape éma maca fariséo eta mamaitauchirahi eta nayeherepianahi éna.

³⁹ Émasera éma Viáquenu Jesús máichapa:

—Éti fariséana, eta eyeherepiana, ecaéñamaracavahi esipacanuma eta enisirareana étapa eta érirareana, emavarairahi táetseraruinahini tasiapahini eta pecatu te iáquehe. Étisera iápajupanavahi eta tachipejivahi eta iáchanavana táichavene eta evainarajivana, étapa eta tavayuasirahéhi eta ejamurachirahi tamutu.

⁴⁰ ¡Tétavicavasamíhi eta tamuracavahi eta esamureana! Éma Viya vahi tácarichu máímaha eta te iáquehe eta tiávihahi te ínahu. Énerichuvare máímahahi eta tiávihanahi te amahe esamureana. Éma yátupíhi eta máimatirahehi.

⁴¹ Tatuparacahi ejanurahiya nayehe ena ticamunuvanahi. Tátupiruva te esamureana te échajiricava apaesa tacuíjasarepa tachipejivaina eta iáchanavana.

⁴² ¡Páurehesami eti fariséana! ¡Tétavicavahi eta tamuracavaya eta ícuñayare! Éti ímijachavahi yátupiquenehi eta religiósohérahi eta epamisirava eta ecamavahuirahi me Viya

eta diésmuri tayehe tamutu eta évaraqui. Ecutnachacarehi taicha éta. Váhiserá ecatiuchavacahini ena achaneana páureana macatiuchavarahana. Váhivare émunacahini ema Viya. Yátupi tituparacahehi eta ecamavahu eta diésmuri iámavahuana. Énerichuvare tituparacahehi eta eJapanuraivaya, yátupinavare eta émunasiraina ema Viya.

⁴³ ¡Jucarihivare eta apana tiviucahehi eti fariséoana! ¡Tétavicava eta esiñavavaisirahi! Emetapa evaraha tipicauchaheana, ticaejacaheana te táurinaquene siya eta te iúrujisirarevana. Evarahavare tipicauchaheanayarehi eta náechajisirahéana te cálleana.

⁴⁴ ¡Jucarihivare eta apana tiviucahehi eti escribánoana, étipa eti fariséoana, táichavenehi eta apimirairahehi! Ímijachavahi epicauchacarehiji. Étiserá eta eyeherepiana, émejecapavacha ena achaneana eta náehisirahi ema Viya. Páureanasami éna. Váhi náimatiequenehahini eta náejecapiravahi táichavene eta evayuasirahi eta ecaetemairavacahi — máichavacapa ema Jesús.

⁴⁵ Matiarhivare ema émana maestro eta mavanairipiana ema Moisés. Máichavarepa: —Tata maestro Jesús, eta piyunasiravaca ena fariséoana, tétavicavapa tayunasirahavahi viti apanavare viti máestroana. ¿Pivarahapuca vicaviurevahivareni viti? —máichapa.

⁴⁶ Tacahe, ema Jesús majicapapa: —¡Eti apanavare eti máestroana, tétavicavahivare eta eviurevahi! ¿Tájaha tacayema epamicavacahi ena apamuriana achaneana eta júcana eyeherepiana tacajeraqueneana? Nájinapa tiratahaimahi títaucha. Apanasica éti váhivare ítauchahini.

⁴⁷⁻⁴⁸ ¡Jucarihivare eta apana tiviucahehi eta tamuracavaya eta ícuñayare! Éti ecaijare apimirana, taicha ímijachavahi machanerahe ema Viya eta eyehehearasirahi eta náecariana ena profetanaini nacaparuanahi ena iáchucanaveanaini. Puiti étarichuhi tacahehi eta epanereruanahi eta evarairahi ecapacahavi viti mavanaranahi ema Viya taicha eta épuruirahi eta vímiturapianahi táuriqueneanahi.

⁴⁹ Ema Viya, acane tímatihehi eta ecutirayarehi eta napanereru ena iáchucanaveanaini ticapacanahi ena profetanaini. Eta tacahehi eta máechajiriruvanahi: “Nuvanecayare ena profetana; tásiha, nuvanecayareva ena apóstoleana. Váhiquenesera nasupaimahi ena tisamanayarehi eta náimiturapianaya ena nuvanarana. Napanajiricavacayarechucha ena nuvanaranahi. Natiarhiyareva ena nacapacayarepahi” macahehi ema Viya.

⁵⁰⁻⁵¹ Eta tacahe, numetacahe nútí: Eti nujaneanana israelítana etiarihiqueneanahi puiti, ecaicuñayare, taicha timuriacahehi eta naviurevahi ena iáchucanaveanaini taicha eta nacapajisiravacahi ena profetanaini. Acane te tépanavainapa eta apaquehe, ema Abel máinapuiruhi nacaparuhi. Máequeneruhi nacaparuhi ema maca Zacarías, ema nacaparuhi te tamirahu eta Templo. Camurianahisera ena náumurivanaini. Puiti étipa tamuriacahi eta ícuñayare naicha ena iáchucanaveanaini.

⁵² ¡Páurehesamichapucaini eti máestroana! ¡Camuriquenehi eta eviurevanahi! Tamapurujipa eta ímatiequenehairainihí eta yátupiqueneana títuacáreana, taicha vahi esuapaimahi, váhivare éhicaimahi. Éti tásihahi íchejimírúrucavacahi ena tivarahanahi tisupanaya, náehicaya ema Viya —máichavacapa ema Jesús.

⁵³⁻⁵⁴ Tacahe, eta nasamirahi ema Jesús ena fariséoana énapa ena máestroana, tiseமானrinehi eta mayehe. Tépanavanavarepa náitsamarareca eta nayaseresirapahi, navarairahi nasama te máejecapavahipucaini eta macayemaqueneanapahi, navarairahi eta tiviucaharehi éma.

12

*Ema Jesús vahí mávaraha apimírahávina
(Mt 10.26-31)*

¹ Tacahe, te jena sácheanahi, títeparacanaipaichucha ena camuriqueneana achaneana. Tiyututucavanapa. Énaserá ena máimitureana ema Jesús návihahi te machacaya. Tásiha, máichavacapa namutu:

—Tímaticarehi eyehe eta levadura eta tasisijisirahi eta masa. Tacutirichu eta tapareasirahi eta apimirairanahi ena fariséoana. Échapavaicha éti, machu napareacahe éna.

²⁻³ Ema Viya tímararacahehi tamutu eta íchaqueneanahi, tayanapanenénipuca eyumurucavaqueneñapuca te timapícu. Tisamahehivare tamutu eta échajiriruvanahi. Tímatiehivare tamutu eta epanereruana. Te jácani sáchehare ticaecherayare tamutu, tétavicavaya eta etsirihairaya taicha eta emaurivanahi —macahepa.

⁴ Étiripa eti némunacasareana, numetacahe: Vahi ecupica nácani nacapacapuca eta íáquehe, tacarichusera náituruequenehayare.

⁵ Numetacaheva, macarichu ema Viya epicayare, taicha macarichu éma téchahi eta itaresirana. Jéhevare, éma maratahahi macamtiequeneha eta iáchanevana tayehe eta

táíñehiquene yucu infierno, te ecainajiruva táichavenehi eta episirapuca eta nacapasiráhena. Jéhevare, éma epicayare.

⁶ Nímicutichinahe eta cáyurechicha. Éti ímijachapapuca vahi tasivachahini éta. Téñamacareanahisera me Viya. Éma, téchavacahi eta táitaresiranahi.

⁷ Evetijipa éti, éñamacarepanahi me Viya. Éma téchahevare tamutu eta ítaresirana. Váiparinehi témítisicahémahi. Eta tacahe, vahi ecueñamava éti tayehe eta ítaresirana, taicha tétavicavahi eta emunavahi éti mayehe. Éma, máimatihí eta tatupa eta echutimacana. Vímereuchavayarehi eta véhisira ema Jesús

(Mt 10.32-33; 12.32; 10.19-20)

⁸ Numetacahe puiti, nuti Manerejirunuhi ema Viya: Namutu ena tímereuchavanahi eta náehisiranuhi te namirahu ena achaneana, nútí apanavare nímereuchaya eta nuchanerairavacahi éna te namirahu ena ángeleana mayeaneanahi ema Tata.

⁹ Nácanisera vahi návarahahini náimereuchavahini eta náehisiranuhi, nútí apanava nímereuchaya eta vahi nuchanerainahini éna te namirahu ena ángeleana mayeaneanahi ema Viya.

¹⁰ Namutu nácani ticaecahinuanahipuca nuti Manerejirunuhi ema Viya, tiperdonachacareana. Nácanisera nacaecahipuca ema Espíritu Santo, vahi tiperdonachacareanaimahi éna.

¹¹ Jararihiyare eta sácheanayare tíamaheanaya te namirahu ena nacapitarana eta te náuruji-sirarevana, énapapuca ena tuparairucana, énapapuca ena juéseana te jácani avasareana eta nayaseseriraya. Váhisera ecueñamava tayehe eta jácani ecatiuchiravayare.

¹² Ema Espíritu Santo tímitucaheyare eta táurivayare eta ecayemayare te jena sache ecayaseserehinapa —macahepa.

Vahi táurica tahapasamurechahavi eta vímahaqueneanayare

¹³ Matiaríhi ema achane te namuri ena camuriqueneana achaneana. Máechajicapa ema Jesús. Máichapa:

—Tata maestro, pímicataganu, pimetaca ema nuparape máijaraganu eta nuyehere parte eta nímaequeneruyare eta máimahaquenéni ema ticachichanuini —macahepa.

¹⁴ Ema Jesús májicapapa:

—Nuchicha, ¿tájaha tacayema pivaraha pinaganu juésnuayare eta eyehe? Vahi nútina néchaheyare tayehe eta máimahaqueneanaini ema ticachichahéni —máichapa.

¹⁵ Énerichu máichavacavare ena apamuriana achaneana:

—Échapavavare éti apanavare, machu émunahiricava, éjamurarahi tayehe eta tímahacareana. Taicha eta tímahacareana te juca apaquehe, vahi étaina ticaitarecaheyare. Vahi táéñamacarehini.

¹⁶ Tacahe, máimicutiarachinavare:

—Matiaríhi ema achane ricu. Ichape eta máesane. Tiúrína eta máevaru.

¹⁷ Tacahe, ema ricu mapanerechapa, ánipa tacahe eta mapanereru: “Ániquehepa eta juca névaru, tájinapa núnasiha. ¿Tájahapuca nícharacaya?

¹⁸ Tiúripanapuca nuvetataha eta núnavarahi nujanejuecha. Ichapepanainapa nicha eta táitsivaya. Tiúripanainapa, apaesa táirijica tamutu eta néchatijiru étapa eta apamuriana nucayehequeneana.

¹⁹ Tásiha, nucahénapa: Jéhevare puiti tétavicavapa eta núrivayare. Tájina níchiravaimahi. Ichapemuríhi eta núnaru. Taratahaquene juca áñoanayare. Nucanaracavaya nútí. Tamutu sache tiúriya eta nunisira, néraya. Ichape eta núsamurevaya” macahepa ema ricu.

²⁰ Tásihasera ema Viya máichapa ema achane: “Tétávicava eta pisunsuva, piti achane. Puiti jena yati pépenaya. Tájina vahi pítapanaimahi eta juca píúnaruhi”.

²¹ Ene nacahe ena achaneana ticurujiricana eta náimahaqueneana nayehéchiravarichu. Vahi nápanerechahini naicha eta táuriqueneana tacunachacarehini me Viya taicha tétávicavahi tahapasamurechirahi eta nacaimahaquenéraya.

Ema Jesús tímitucahavi eta majaneasirahavihi ema Viya

(Mt 6.25-34)

²²⁻²⁴ Te apahequenepa, ema Jesús máichavacapa ena máimitureana:

—Étisera, nuvaraha ácasíñava yátupina mayehe ema Viya. Vahi ecuaeñamaracavavaicha tayehe eta enicaquenerepi étapa eta emuiríharapi puiti juca ítaresiraichaha. Eta enicaquenerepi étapa eta emuiríharapi, tájina táéñamavacarevaina. Ímararacarichuhi eta cáyureana. Vahi tacaéñamaracavahini tayehe eta tanicaquenerepi. Vahi táevacahini, váhivare táechatijirichahini, táunachipucaini eta tanicaqueneayare. Émasera ema Viya máechapajirichahi

máijarasirahi tamutu eta tanaquenezepiana. Evetijipa éti, íápajupanavahi eta éñamacarévhahi me Viya tayehe eta cáyureana.

²⁵ Vahi táuricahini eta ecañamaracavahini eta júcana. Eyehe éti, nájina naratahahini étijivainahini ecajurucavahini, tayanapane te tihapasamurechahehipuca.

²⁶ Vahi étijivaimahi íturucava ecajurucavahini, váhivare táuricahini ecañamaracavahini tayehe eta júcana.

²⁷ Ímararacrichuhi eta tajurusirahi eta flúreana, vahi tacañamaracavahini tacaematanehini, táijururecahipucaini. Táitsivahisera, te tépunehapa, tétavicavahi táurinavahi eta taflurene. Nájina nácuti eta nacamuirihaira eta táurinava, émaripa ema víyarahaini rey Salomón eta tajananusira eta macamuirihairahinihi.

²⁸ Apanasica ema Viya máijaracahi eta táurinavahi, ánipirichuhinéni eta táitaresirahi. Evetijipa éti eta máechapajirisirahehi, máijarasiraheyarehi eta emuiriharapi eti achaneana. ¿Tájaha tacayema vahi ácasñavahini eta mayehe?

²⁹ Eta tacahe, vahi ecuañamaracavaicha tayehe eta enicaquenezepiana étaripa te échuririacapuca eta une érayare.

³⁰ Ena apamuriana achaneana te juca apaquehe, ichapemurihi eta tacañamarasiravacahi eta júcana. Vahi nácasñavahini mayehe ema Viya, nacuchapahipucaini eta máijararuyarehi éma. Étisera, ecasñavayarehi eta matiarahirahi ema Ecayiaquene. Máimatihí ema tamutu eta ecamunuiravanahi.

³¹ Eta tacahe, tativayare íjaracava ecaemataneacaya ema Viya, ecasamureraya eta ítauchirayare tamutu eta mavarahaqueneanahi. Máimaharinepa éma. Tíjaracaheyare tamutu eta ecamunuqueneana.

Te vicajirica eta vímahaqueneana, vijacapayare eta táitsivayare ánaqui te anuma (Mt 6.19-21)

³² Vahi ecupica, eti nuchichanaveana. Tayanapane vahi camurihénahini, eti máichuhaqueneanahi ema Ecayiaquenehi. Éma téchahehi. Eta tacahe, tétavicavahi eta mavapinairavahi eta majacapirahehi, machaneraheya.

³³ Tacahe, te ecaimahaqueneputa, íjararecayare eta ímahaqueneana. Íjaracayare nácani ticamunuvanahi. Tásiha, ema Viya máimahainepa, éma tíjaracaheyare eta táitsivayare ánaqui te anuma. Máitavacainapa eta ecaimahaquenéraya. Tájinvarepa tévajaicavaimahi. Váhivare táefñamavacare ánaqui taicha nájina taíameyechahemahi, váipavare cachusirimahi eta ímahaqueneanayare.

³⁴ Éti, te ecasamureputa eta ímahaqueneanahi te juca apaquehe, evarahahi enasiyare te juca. Vahi ávarahahini ejunijicahini eta ímahaqueneana. Téhesera te ecasamurehichapuca eta ícuchiana te anuma, ánaqui evarahayare eyanavaneyare.

Yátupina eta vicuneuchiravaina

³⁵ Éti, yátupina eta ecachapiranuya eta nuchaviraya. Etsecavaya tamutu sácheana.

³⁶ Ácutihí nácani achaneana músuana titsecavanahi te tapaja navejjequenéraya ema náquenu eta machaviraipahi másihairahi mayehe ema arayanahi. Te máehahamecapa eta tapaja, enevaneyarepa éna navejjequenehayare.

³⁷⁻³⁸ Tayanapane enumuhupuca yati, tíjararahipuca eta machavirayarehi ema náquenu. Tétavicavasera eta náuricacarevahi ema músuana eta machimahirahi ema náquenu eta nacuchahirahi, te vahi náimacaequenehahini. Nutupiruva numetacahe: Yátupinasarepa eta máurisamurevayare ema náquenu, macaejacavacainapa te mamesara, máenicavacainapa. Émajacaruvinapa máechapajiricavacayare.

³⁹ Nuvaraha ácaicutiaraqúenéna. Machu ácutiriana émcani achane námeyeruhi ena tíamerahiana. Tájina máechapiavahini tájahapuca hórayarehi eta náitecapauchiraya te mapena. Te máechahipucaini, ticuneuchavaipahini éma, váipasare nacuameyechahini.

⁴⁰ Eta tacahe, éti écaunchavayare tamutu sácheana, taicha vahí échaimahi tájamuhuyareputa eta nuchavirayare nuti Manerejirunuhi ema Viya, machu íárameca —macahepa.

Nararihi ena músuana tíúriana. Nararihivare ena músuana máurirahana (Mt 24.45-51)

⁴¹ Tacahe, ema Pedro mayaserecapa. Ánipa maicha:

—Tata Náquenu, eta juca pímicutiarachaquenehavihí, ¿vivyehayarechuchapuca viti dócequeneana, téhesera vimutupuca viti véhicavianahi? —macahepa.

⁴² Tacahe, ema Viáquenu majicapapa:

—Nímicutichinahepa eta apána. Macañárihipuca ema empleado máetaviuchahi eta máitupajijiasiravahi. Tisuapajirahivare éma. Ema máquenu tiyanayarehi te apána avasare.

Táitusiava matuparacahi ema empleado eta máijarasiraya eta tinicacare ena apamuriana machamusuvanahi.

⁴³ Tétavicava eta máuricacarevaya ema maca ticatuparahahi, te tamutuhi máitaucha jácani machimampirana ema máquenu.

⁴⁴ Németeaca, eta tamutuirahi tiuri eta machimampirahi, matuparacainapa éma téchayarehi tamutu eta máimahaqueneana. Eta tacahe, nuvaraha ácutipaini ema maca empleado tíurihi eta máitauraiwa.

⁴⁵ Téhesera, váhipuca tiuri eta mapanereruana ema mácani empleado, máimijachaichucha tiyereyarehi eta máitecapirayarehi ema máquenu. Tásiha, macaetemajiricavacapapuca ena machamusuvanahi, énapa ena vanaracana. Máichapapuca eta piesta, téniricapa térapa, ticavahapa.

⁴⁶ Tásiha, vaipa manecapauchavahini te títecapapa ema máquenu. Tásiha, machimampiraca ema empleado eta mamapachichijisiraipa eta máimahaqueneana. Eta tacahe, ema máquenu macavanairipinapa náestacayare muraca, taicha eta mamasuapajiraiivahi.

⁴⁷ Tacutiquene mácani musu, te máechahi eta mavarahaqueneanahi ema máquenu, tásiha vahi máitauchahi eta mavanahianahi éma, muracayarehi eta macaicuñairayare. Ticaestayarehi éma.

⁴⁸ Mácanisera musu, te vahi máechahi eta tacayemaqueneana, tásiha téjecapavapa, éma apaesayaréchu eta máicuñayare. Étipa eti ecaimitucasianahi eta yátupiqueneanahi, tatuparacahi ímitucavacayare ena apamuriana achaneana. Núti, ánaquiaparipa eta nímitusi-ráhehi; tásiha puiti, étipa táehanacahi eta juca ímituresirayare.

*Ena achaneana nacatianacainapa ena téhicanaya ema Jesús
(Mt 10.34-36)*

⁴⁹⁻⁵⁰ Núti, eta nítesirahi te juca apaquehe, tímitecanuhi eta népeniraya. Yátupiyare eta nucatajivairayare, naicha ena ticatianacanuanuana. Éti apanava, ticatianacaheanayare táichaveneyarehi eta éhisiranuhi núti. Tímicutjiricavayarehi te tipaica eta yucu, eta tamuruira eta muji. Eta juca, nuvarahaquenehi táitauchavavanehini.

⁵¹ Éti ímijachaipapuca eta nítesirahi te juca apaquehe, tájina tácyemacarémahí, ímijachai-pavarepuca tíuricavacareyarehi nícha. Váhisera ene tacahe. Táichaveneya eta éhisiranuhi, ena achaneana tépuruheanaya térajicavanaya eyehe.

⁵² Taicha puiti juca vicaijuheyare, te natiarihinapapuca te étanahi peti mácani achane, esu mayena, esu machicha, ema machicha, ésupa esu chínenaca. Te mapananahipuca ena téhicanuanahi, tásiha apinanahipuca ena ticatianacanuanahi. Téhesera apinanahipuca ena téhicanuanahi, mapananahivarepuca ena ticatianacanuanahi.

⁵³ Mácani achane, súcani esena, te natiarihi ena nachichanaveana, nacatichayarehi ena ticachichanahi táichaveneyarehi eta náehisiranuhi éna. Mácani apana achane masuapajirairahahi, súcani esena, nacatichayarehi ena nachichanaveana táichavenehi eta náehisiranuhi, énapa ena nachinenanaveana.

*Ena achaneana timasuapanahi eta máimeruana ema Viya
(Mt 16.1-4; Mr 8.11-13; Mt 5.25-26)*

⁵⁴ Tacahe, ema Jesús máechajicapa ena achaneana:

—Te ímaha timapicurume, émeteacaripa tíquivayare. Ene tacahehi.

⁵⁵ Técativapuca te vana, émeteacaripa váipavare tíquivaimahi*. Énevare tacahehi.

⁵⁶ ¡Eti masuapajirairahana! ¡Yátupihinéni ímatiequenehahi te tíquivayare, váhisera ávarahahini ímatiequeneha eta máimeruhehi ema Viya, te juca sácheana nucachanerahehi!

⁵⁷ ¿Tájaha tacayema vahi ávarahahini éhica eta juca yátupiqueneana?

⁵⁸⁻⁵⁹ Járjapainapa eta sache ticaicuñanainapa namutu ena achaneana. Tacamunurichu etanucayare puiti ema Viya, ecasiñayare ecuchucuyavaina. Eta juca tímicitjiricavahi mácani achane te ticametauchacasiya. Tatuparacahi tatívaya máetupiricanumaya eta mayaseasirayare perdón ema timetauchahi, mapurare vuíchaha masiapahini te cárcel. Taicha te masiapapa, ticajeraequenénapa eta máuchucuiraina. Numetacahehi puiti: Te jácani esiapa eta yucu infierno, váhiquene íuchuaimahi éti —máichavacapa ema Jesús.

13

Tavaraha náneuchava ena achaneana

* **12:55** Te jena avasare Judea, te táerisine eta sache eta tásirareasa eta tíquiva. Étasera eta táuchusiha eta técativaca te vana, tájjicahi tamutu, taicha tijuruhimuhuhivare.

¹ Étarichu te jena sache, títecapanavarepa ena apamuriana achaneana. Nametacaipa ema Jesús eta táínehiquene máichaquenehi ema Pilato, étaripa eta máimicapasiravacahi ena tiyujaracanahi te jena Templo te Jerusalén. Ánivare nacahe:

—Ena nani, galiléoanahi éna. Tépenanapa te tachacayanahi eta sárareana nacaparuanahi námavahuásanahi. ¿Étapuca eta nasipecaturaivahipuca tímicapacavacahi? —nacahepa.

² Tacahe, ema Jesús máichavacapa:

—Éti ímijachaipa táimicaparuihi eta nasipecaturaivanahi ena nani nayehe ena apamuriana najaneananahi te Galilea.

³ Nútisera numetacahe: Váhira étainahi táimicacahini eta nasipecaturaivanahi. Vahi étaparacaina. Tacamunusera éneuchavavane éti, machu tájahúchava eta épenira, machu ácuti éna.

⁴ Némechahe ena nani diéciochoqueneana tacaparuanahi eta táevajaisiravahi eta torre tayuchamarainihi te calle Siloé. Ímijachapapuca táimicacavacahi eta táichapevahi eta naviureva, navetijipapuca nayehe ena apamuriana ticvasanahi te Jerusalén.

⁵ Nútisera numetacahe: Váhira ichapena eta naviureva ena apamuriana. Étiripa, te vahi ecueuechava, énerichuvare tájahúchavaya eta épenira —macahepa.

Ema Jesús máimicuticha eta yucuqui máhiriquire

⁶ Eta máechajirisirahi ema Jesús, máimicutijirichinapa. Ánipa macahehi:

—Matiarihihí ema achane. Tatiarihihí eta masucure higo. Máhiriquirehisera.

⁷ Tacahe, máichapa ema mamusura: “Mapanapa año vahi ticahi eta juca nusucure. Péchupaicayare puiti taicha táípítaváiricaipa eta te juca isaniti” macahepa.

⁸ Émasera ema musu majicapapa: “Tiúripanapucaini, tata, vicuchapachahaini étanainavaréni año. Nuvaraha némurinahechayare eta máteji apaesa tacahipapucaini.

⁹ Téhesera váhiquenénaichapuca tacucahi, néchupaicasarepa” macahepa ema musu.

Ema Jesús macanaraca esu esena tépiñumaiquehe

¹⁰ Te apanapa sávaru, ema Jesús tímíturacavarepa tayehe eta náurujisirareva.

¹¹ Sutiarihihi esu esena mávaháruhi ema éreana, tépiñumaiquehehi eta suítaresira. Vahi táurihini sutupinahahini. Diéciocho áñoripa eta sucajumairahi.

¹² Te máimahapa ema Jesús, máichuhapa. Tacahe, supauchapa. Máichapa ésu:

—Páurevi piti esena, picajumahi. Puítisera pínaracainapa —máichapa.

¹³ Tacahe, ema Jesús manacapa eta mavahuana te suápusi. Enevanepa titupinahahi ésu, tinaracapa eta sujumainihi. Ichaperinehi eta sucunachirahi ema Viya.

¹⁴ Matiarihihivare ema táquenuruhahi eta náurujisirareva. Eta máimarahi eta juca, tisemarinehi taicha eta macanarasirahi ema Jesús esu sucajumaquene te jena sache sávaru tacapicahuquenehi. Tásiha, máichavacapa ena achaneana:

—Saisi sache tatuparaha eta vicaemataneraya, énerichuvare eta nacaipuirayareva ena nacajumaqueneana. Puítisera juca sache, vahi táuricahini nacaipuhini taicha tacapicahuquenehi —macahepa.

¹⁵ Tásiha, ema Viáquenu Jesús, majicapapa:

—¡Tétaavicavahi eta tamuracava eta esamureana! Te ticaitiquihi eta epera te jácani sache sávaru, evejapucayarehi eta ésichirayare eta une, tayanapane tacapicahuquenehinéni eta sache.

¹⁶ Suvetijicha esu suca esena vicutiquenehi achane, mámariequenehi ema viáchucaini Abraham, ticatajicacarehi eta nucanarasirayarehi tayehe eta máitiarapi ema Satanás. Taicha dieciocho áñoripahi eta máécájumachirahi ésu. ¡Táuricahi nucanaracayarehi puiti juca sache tacapicahuquenehi! —máichapa ema Jesús.

¹⁷ Eta nasamirahi ema Jesús, namutu ena ticatianacanahi titsirihanarinehi. Énasera ena apamuriana achaneana tiúrisamureanarinehi, taicha eta náimairahi eta táuricacarequeneana máichaqueneanahi ema Jesús.

Ema Jesús máimicuticha eta taqui eta mostaza

(Mt 13.31-32; Mr 4.30-32)

¹⁸ Ánivare macahe ema Jesús:

—Puiti nuvaraha nímicutichinahe eta nímiturapiana nuti Manerejirunuhi ema Viya.

¹⁹ Tacutíhi eta ánichichaquene taqui eta mostaza. Te máevacapa ema achane te máesane, tiúnarahiyahehi eta tajurusira. Tásiha, járajapainapa eta cáyureana, ticamacajiyarehi te tatavana eta sucureca.

Ema Jesús máimicutichavare eta lévadura

(Mt 13.33)

²⁰ Ánivare macahe ema Jesús:

—Nímicutichinaheyareva eta apana.

²¹ Eta nímiturapiana tacutihivare eta lévadura. Esu súcani esena tiúrihi eta tasisijisira eta suyehe lévadura te tamutu eta suépiyaruhi masa, tayanapane apinapucaini arroba eta suyehe jarina, tasihajicahisera. Jéhesare, tiápucayarehi tiuri —macahepa.

Vicamesavayare visiapa te tapaja ánicurichu
(Mt 7.13-14, 21-23)

²² Ema Jesús tiyanavare tipaica. Máimitucavacahi ena achaneana te jácani avasare máitecapihapahi. Macaijuhehi eta Jerusalén, váhisera máitecapavanehini.

²³ Matiarihíhi ema tiyaseserecahi éma, ániha maicha:

—Tata Viáquenu, ¿váhipuca camurihavianainaya viti viúchucuhanaaya? —máichapa.

Tásiha, éma majicapapa:

²⁴ —Vahi táechacare te ánimuriheanayareichupuca eti esiapanaaya eta mávasa ema Viya. Étiserá tacamunu epamicava esiapaya puiti. Vahi ecuyacuji. Taicha camurianayare ena apaesachicharichu eta navarairahi tisiapanaya, váhisera títujicavanaimahi.

²⁵ Taicha járajapainapa eta sáchezare, nératácainapa eta tapaja. Tásiha, itecapapapuca éti, éhahamecapa eta tapaja, epiaracanupa: “Tátachicha, pivejjequenehahavi”. Tásiha, nujicapahénapa núti: “¿Nájahaesica éti? Vahi nímatihe. Váhivare nuchanerahénahi éti”.

²⁶ Tásiha, ejicapauinapapuca: “Vítirichu picachanequeneanahi te mesa eta vinisirahi. Pímitucahavihivare te plaza te jena viávasa”.

²⁷ Tásiha, nujicapahénavarepa: “Esamanuripa, vahi nuchanerahéna éti. Évuisiha eta te juca, emutu eti ícharahianahi eta tamauriqueneana” nichahénapa.

²⁸ Járajapainapa eta sache ímahainapa te tajuhe eta mávasa ema Viya te návihahi ena viáchucanaveanainihi: émaripa ema Abraham, ema Isaac, ema Jacobo, énapa namutu ena profetana. Étiserá enasinapa te aneca. Tétavicavaya eta íyachiravaya, ecapitiquiahechiravaya taicha eta ecatisamurérvaya étapa eta etsiriraya eta emasiapirahi.

²⁹ Nasapiha tisiapanaya ena camuriqueneana achaneana tísihanayare te tamutu avasareana te juca apaquehe. Tétavicavainapa eta náurisamurevaya.

³⁰ Tásiha, te jena sáchezare, nácani téquenehanahi puiti, nasapihainapa tisiapanayare. Étiserá eti ínapureanahi puiti, étinavarepa vahi ítujicavaimahi esiapá —máichapa ema Jesús.

Ema Jesús ticatisamureva náichavene ena achaneana ticavasanahi te Jerusalén
(Mt 23.37-39)

³¹ Tacahe, te jena sáche, títecapanapa ena fariséoana te mávihahi ema Jesús. Náichapa:

—Piyana. Pítátájiva piúchuca eta te juca. Taicha ema Herodes mavaraha ticapacaviyare —nacahepa.

³²⁻³³ Émasera ema Jesús majicapapa:

—Eyana emetaca ema mácara ticaetemarahiquene. Vahi típicararecanuimahi núti eta juca mametarapihi. Nunasiyarechaha puiti, nucanararecanumayare ena nacajumaqueneana énapa ena návaháruanahi ena éreanana. Núti jucarihi eta nématanerepipahi eta tímipaicanupahi puiti juca sácheana, nítauchanumayare tamutu. Vahi émainayare técha eta népeniraya. Yátupisera eta Jerusalén návasahi ena ticapahianahi ena profetanahi.

³⁴ Tétavicavahi eta táimicatisamurechiranu eta viávasa Jerusalén. Namapuruji ena tachichanaveanasami. Éna, ticapapajicanahi ena profetanaini mavanaranahi ema Tata. Puiti navarahainapa nútípavaya ticapacanuana. Ichapemurinehi eta níchuiravacahi éna, náurujiacanuhini tacutihini eta varayu te tacurujimuriha eta tachichanaveana te tapava. Váhiquenesera návaraháhini.

³⁵ Náimahainapasera eta náicharacavayare. Ticaquipaicasiyare tamutu eta napenana. Táimijunavacainapa éna eta napisiraya. Numetacahevane puiti: Eta nínajiasiravacainapa, vaipa tímahanuanaimahi. Tíámainucavainapa te náitsivacha eta napanereruana, navarahainapa tijacapanuana. Nacahénapa: “Ichape eta vicunachiravi piti vanairucaquenévihí me Viya” nacahénapa.

14

Ema Jesús macanaraca ema achane tíamaquiape

¹ Tacahe, te jena sache sávaruhi, ema Jesús ticaichuhacasihi tinipanaya te mapena ema émana náiyamuri ena fariséoana. Ticaichuhacasianahivare ena apamuriana fariséoana, énapa ena máestroana tayehe máimiturapiana ema Moiséni. Navarahahi nacaicutiarayarehi ema Jesús.

² Tíjuhúchavapa tímerecava te nataracu ema émana achane macajumaquene. Tíámaquiavacahi éma.

³ Ema Jesús, eta máimairahi ema macajumaquene, mayaserecavacapa ena natirihiqueneanahi:

—¿Táuricapuca vicinaracavaca ena nacajumaqueneana puiti juca sávarumuhuirahi tacapichahuquenehi? —máichapa.

⁴ Énasera vahi najicapahini, timatinanarichucha. Tásiha, ema Jesús macaratavauchapa ema macajumaquene. Eta macaratavauchirahi, enévanepa tinaraca. Tacahe, máevatacapa mayana te mapena.

⁵ Tásiha, máichavacapa ema Jesús:

—Nímicutichinahe puiti. Éti, németeaca májina émanaina achane vahi macujapanuhini eta mapera burro, mavuierapuca, te tiáquipaicavahi te pusu te jena sache tacapichahuquenehi. Eta máeñamirahi, tipatsicavayarehi macaechepupana eta paure sárare, tayanapanehinéni eta sache tacapichahuquenehi —máichavacapa.

⁶ Énasera vahi napatsicavahini najicapahini. Timatinanarichucha.

Eta maconsejarapianahi ema Jesús

⁷ Eta máimarasiravacahi ema Jesús ena macumpirachaqueneanahi ema fariseo, énajivahi tinerejiuchavana eta náejasihayarehi tíurinapanana. Tacahe, ema Jesús maconsejachavacapa, ániapa máichavacahi:

⁸ —Te natirihinapuca nacumpirachahe, vahi ecaínapupuicavaimahi ecaejacava tayehe eta téjasihacareana taicha tijuricati eta máejasihayarehi mácani ticapichupanahi eyehe éti.

⁹ Taicha ema téniricahi, éma ticaejarecayarehi, tijuricati macaechepucavi te péjasihahi macaejasihayarehi mácani apana. Titsirihacarepahi eta macaejacavihini te náequenemuri.

¹⁰ Te ecaichuhacasipuca, ecaejacavaya te náequenemuri, apaesa ema téchahi tíchuhahénapa ticaejacaheyare te návihahi ena tipicauchacareanapanahi. Tásiha, ecunachacarénasarepa nayehe ena natirihiqueneana.

¹¹ Taicha nácani ticasínavavaicanahi tímijachavanahi ticapichuana, ema Viya máimicatsiriavacayarehi. Nácanisera mánsuanahi eta náitaresira, ichapeyare eta nacunachacarevayare me Viya.

¹² Ema Jesús maconsejachavare ema fariseo, ema ticumpirarecahi:

—Píti apanavare, te pénicarayare, vahi nacucarichu píchuhavaca ena pémunacasareanahicha, ena piparapenaveanapuca énaripa ena rícoana, táichavenénahi eta pivairairainahi títsirijicavanaya eta piyehe.

¹³ Píchuhavacayareva ena páureana, nácani nacahemahianahi: túpúpavaquiana, masariana, píchuquiana.

¹⁴ Taicha ena nani, vahi títsirijicavanaimahi eta piyehe. Táitsivasera tétávicavayare eta piúricarevayare píti eta pijacapirayare eta pícuhihi te jena sácheyare picachanevacayare ena náuriqueneanahi macaechepureana ema Viya —macahepa.

Ema Jesús máimicutichinavare ema achane tíchuhavacahi ena achaneana, máeniruanayare

¹⁵ Tacahe, eta nasamirahi ema Jesús ena natirihiqueneanahi te mesa, téchajicapa ema émana. Ániapa macahehi eta mayehe ema Jesús:

—Tétávicavayare eta viúricarevaya te visiapapuca eta mávasa ema Viya, vinicayare te mamesara —macahepa.

¹⁶ Tásiha, ema Jesús majicapapa, máichapa:

—¡Jéhesare, te esiapapapucaya! Nímicutichinahe puiti. Matirihíhi ema émana achane téniricahi eta ichapemuriquene tinicacare. Camuriana ena máichuhaqueneanahi.

¹⁷ Te máimahapa tíuripa eta tinicacare, mavanecapa ema mamusura mametacavaca náitecapa ena nacaichuhacasiqueneanahi taicha tíuriripahi eta tinicacare.

¹⁸ Namutusera natanucapa eta náetseraruyarehi. Ema apana ániapa macahehi: “Vuíchaha nítujicavaimahi níteca. Nuyananumayare nímahapanayare eta nuvachareruhi apaquehe”.

¹⁹ Ema apana énerichuvare, ánivare macahe: “Picatajicanuchaha. Vuíchaha nítujicavaimahi níteca, taicha nuyananumayare nímahapanayare eta cinco yúntaquene vuiye nuvachareruanahi”.

²⁰ Ema apana ánivare macahe: “Nupaenumava nítauchavahi eta nuvehacairahi. Eta tacahe, vahi nítujicavaimahi níteca”.

²¹ Te tichavapa ema musu vanairucahi, mametacapa ema máquenu eta namaitujisiravavacahi títecana ena máichuhaqueneanahi. Tásiha, tisemapa ema máquenu. Máichavarepa ema musu: “Tiuri, piyana puítirichu te plaza étapa te calleana. Píchuhavaca ena páureana, ena masariana, ena píchuquiana, nácani pétipiaruanayare nacahemahiqueneanahi”.

²² Tacahe, te tichavavarepa ema musu, mametacapa ema máquenu, máichapa: “Tata, nítaucharipa eta juca pivanairipíhi. Jucarihichahasera eta juca téjasihacareana”.

²³ Tacahe, ema máquenu máichavarepa: “Píyanavare puítirichu te isanítiana. Píchuhavaca ena achaneana, nácanipa piácapajíruanayarepahi te achene. Picamesavaca náiteca, apaesa nayuriticava eta juca téjasihacareana mávacuanaichahahi.

²⁴ Nusemacarupa puiti. Nájinava nénirui mahi ena nánapureanahi níchuhaqueneanahi” macahepa ema téniricahi — máichapa ema Jesús.

Vahi máejeraréna eta véhisiraya ema Cristo

²⁵ Te jena sácheana, camuriana ena achaneana téhicanahi ema Jesús. Tásíhasera, éma máesenimurihapa. Máichavacapa:

²⁶ —Te etiarihipuca éti evarahanayare éhicanu, tacamunu epamicavaya yátupina eta éhisiranuya. Nútínapa émunacapanayare, németavicainapa eta émunasiravacaini ena ticachichaheana. Mácani achane németavicayareva eta máemunasiraini esu mayena, machichanaveanapuca, maparapenaveanapuca. Váipavare éñamaimahi eta itaresira. Téhesera apaesarichupuca eta émunasiranuyare, vahi táuricaímahi éhicanuhini.

²⁷ Ecatajivayare taicha eta éhisiranuyare. Te epicahipuca íjaracava muraca, támicapacahepuca eta éhisiranuhi, tiúripaichu vahi ecuehicanu.

²⁸ Tacutiguene te epanerechahipuca éti épiyarecayare eta anuquehe peti apinapuca piso, vahi táuricahini émunanasicavahini enahahajísiravainarichuini ecaematane, epanerechanumayarehi áyanayarehipuca egastaruya ítauchirainahi eta evarahaquenehi épiyaca.

²⁹ Vahi ácaemuñavaimahi épiyareca eta tiúrina peti, te vahi áratahaimahi ítaucha.

³⁰ Tásiha, nacahénapapuca ena ticaecahiheanayare: “Ímahapa, váhira máratahahini máitauchahini eta jena peti, táurinaqueneyahíji. Tíjaracavasamipa. Ichape eta mamelaya” nacahanapapuca.

³¹ Émaripa mácani rey, te tise mahipuca, mavarairahi máichayare eta guerra, macanayarehi mácani apana rey camuripananahi ena machanerana, mapanerechanumayarehi te maratahayarepuca macanara taicha éma vahi camurianainahini ena machanerana.

³² Eta máimairahi vahi máratahayarehi, váhivare tíjaracavaimahi máehacacahini. Tásiha, máimivanerecainapa mayehe ema mánarayarehini táitavapa eta semanerehi, vaipa nacupanerechahini.

³³ Ene ecahehi éti. Eta evarairahi éhicanu, epanerechanumayarehi eta ínajisirayare tamutu, eratahairayarepa yátupi eta éhisiranuyare. Taicha te vahi eratahayare, vahi ecaemuñava éhicanuhini.

³⁴ Eta icheve, tétavicavahi eta táurivahi taicha eta tacamunucarevahi. Étasera eta tajachira eta icheve, tépurucarepahi.

³⁵ Tájínapa tacamunucarevainahini. Ticaquijiyarepa. Ene nacahehi ena tínajicavana eta náehisiranuhi. Nacutihi eta tajachira eta icheve. Te evarahapuca ecaicutiara, tavaraha eta epanerechinavaya — macahepa.

15

*Éma Jesús máimicutichinahi te témitiaca étana uvesa
(Mt 18.10-14)*

¹ Tiuri, te jácani sácheana, títecaparacanavarepa ena achaneana te mávihahi ema Jesús. Camurianapahi éna. Natiarihipahi ena cóbrarécarahiana eta impuestoana. Namutu éna, ichape eta náepurucarevahi nayehe ena fariséoana. Émasera éma Jesús, vahi máepurucacahini. Tásiha, témeñahavanapa éna te machacaya, taicha navarahapa nasamararacayarehi éma.

² Natiarihipahivare ena fariséoana énapa ena máestroana. Ena nani, vahi náuricahini eta macachaneiravacahi ema Jesús ena nani achaneana. Ánípa nacahe:

—¡Vahi tiuri eta máichaquenehi ema maca! ¡Namutuchucha majacapavaca ena nacahequetátájiana ticajachahacareanahi! ¡Nasapihapa macachaneiravacahi eta nanisirahi ena nánitajiana! —nacahepa.

³ Tacahe, te masamapa ema Jesús eta juca, máimicutichinavacapa eta máimitusiravacahi. Ánípa máichavaca:

⁴ —Esamanuchaha. Nímicutichinaheya puiti. Matiarahi ema émana achane. Ticayehehi eta cien uvesa. Te témitiyechapuca eta étana, ema achane tiyanayarehi matanuca eta táemitiaruhi. Eta máeñamiravahi, majunijicayarehi eta apamuri noventa y nueve uvesa te majaneasihahi.

⁵ Jéhesare, te máichimavapa eta táemitiaruhi, tichavapa tiúrisamurepaipa. Mámapaipa te machepa.

⁶ Te títicapapa te mapena, máichuhapa ena machacayapenana májiriareana. Tacahe, máichapa éna: “Yare, éti apana iúrisamurevare nuyehé nútí. Taicha níchimavaipahi eta uvesa táemitariuhi” máichapa ena májiriareana.

⁷ Tiuri, nútí numetacahe eta juca: Énerichu ema Viya te anuma tiúrisamurevare nayehe ena achaneana tiúritaresiranahi, taicha tájina nájecapiravainahini. Tétavicavainehisera eta máurisamurevahi ema Viya nayehe nácani achaneana tímatianahi eta nacapecaturairahi, tásiha téneuchavanapa, náinajicapa eta napecaturanaini —macahepa ema Jesús.

Ena Jesús máimicutichinahi eta táemitariu étana reale

⁸ Tímiyanava eta máechajirisirava ema Jesús, ánipa macahe:

—Nímicutichinaheya eta apana. Sutiarihi esu ésuna esena. Ticayehehi eta dies reale eta títapu plata. Te témitiyechapuca eta étape, tinanesiyarehi sutanucayarehi eta táemitariuhi. Eta sutanusirayare, suyustacainapa eta sumicahu. Supihicainapa tamutu eta te tajuhe eta supena.

⁹ Te suíchimavapa, tiúrisamurénapa. Suíchuhavacainapa ena suchacayapenana suájiriareana. Tacahe, suíchavacainapa éna: “Yare, éti apana iúrisamurevare nuyehé nútí, taicha níchimavaipa eta reale nucamítariuhi” suíchavacainapa esu esena ena suájiriareana.

¹⁰ Tiuri puiti, nútí numetacahe eta juca: Ene macahehi ema Viya. Tétavicavainehi eta máurisamurevaya te namuri ena ángleana eta máneuchiravapa mácani achane cápecaturarahini, máinajisiraipahi eta mapecaturanaini —macahepa ema Jesús.

Ena Jesús máimicutichinahi ema émana achane amaperu tacamitiriaru eta matuhusiva

¹¹ Tímiyanava eta máechajirisirava ema Jesús, ánipa macahe:

—Matirihíhi ema émana achane. Apinanahi ena machichanaveana. Ajairana.

¹² Étana sache, máichapa ema maiya ema émana machicha amuyapana: “Tata, picatajicanupa, píjaracanu puiti eta nuyeheyare tatucachaquenenuyare eta picayehequeneana” máichapa. Tacahe, tísapavapa ema naiya. Májaracavacapa eta máimahaqueneana ena apinana machichanaveana.

¹³ Tacahe, étarichuhi te jena sácheanahi, tétupiricavapa ema amaperu, tiyanavanepa. Mámapa tamutu eta mayehéchiravaripahi májjaruhi ema maiya. Tiyanapa te apana avasare tayerehiquene. Eta ánaqui, máitaiyahi tamutu eta máimahaqueneanaini. Tamutupa mamapachichijica.

¹⁴ Tacahe, eta jena sácheana, táitecapauchapa eta ecuha eta avasare mávihahi ema amaperu. Tacahe, namutu ena achaneana tayehe eta te avasare téchurihanapa eta tinicacare. Tivayuchavapa eta ecuha. Ema amaperu títarahaipahi eta máimahaqueneanaini. Tásiha, tájinapa maviyahini eta manica.

¹⁵ Tásiha, ticaquenurecapa mayehe ema émana achane. Tacahe, ema máquenuhi mavanecapa ema amaperu eta majaneasinaya eta cúchiana eta te máesane.

¹⁶ Ichapesera eta máecuavahi. Majamurachainehi manicahini eta taniru eta cúchiana, taicha nájina náitátihi éma.

¹⁷ Tacahe, téquecapapa eta mapanereruanahi. Tipanerequenehavapa émajiva. Ánipa tacahehi eta mapaneruhi: “Namutu ena mavanarana ema tata, tiúrihi eta nanisira. Nútisera ani ticapacanuina eta nécuava.

¹⁸ Níjaracava, nuyana nuchava eta me tata ticachichanu. Tásiha, níchayare éma: Tátachicha, nucapecaturaipa mayehe ema Viya étapa eta piyehe piti tata.

¹⁹ Tayanarinepuca táimicutijiricavainepuca vahi pichichanuina. Picatajicanusera. Pijacapanu, nímiáquenucharine piyehe piti tata. Nácutirine ena pivanarana. Níchayare ema tata”. Tacahepa eta mapaneruhi ema amaperu achane.

²⁰ Tásiha, tiyanapa tichava eta me maiya. Te tiánehipa títcapa ema amaperu, máimahapa ema maiya. Enurujipa máimativane. Ichaperinehi eta majapanuirahi. Enurujipa tiyana tijnunapa mácapa. Majupahacapa ema machicha. Máetserarecapa eta máurisamurevahi.

²¹ Émasera ema amaperu, téchajicapa. Ánipa maicha: “Tátachicha, nucapecaturapa mayehe ema Viya étapa eta piyehe piti tata. Tásihasera, tayanarinepuca táimicutijiricavainepuca vahi pichichanuina” máichapa.

²² Émasera ema maiya, mavaraha máimerecaya eta yátupirahi eta majacapirahi ema machicha. Vahi máicuñacahini. Tásiha, mavanecapa ena mavanarana. Máichapa: “Etátajirica, iama eta muíriare tiúrinapana. Emuiriacha ema maca nuchicha. Iama eta tiúrinapana surtíja; masurutíjaina. Iámavare eta tiúrinapana eparupeva, máeparupevaina.

²³ Énerichuvare épana eta jena mamona tiújepana. Ecapaca, vinica. ¡Víchayare eta piesta! Viúrisamurevaina eta máitecapirahi ema maca nuchicha.

²⁴ Taicha éma, tímicutijiricavahi eta máepenaquenénahini eta maca, puítisera tiúchujicapa tichavapa ani nuyehe. Máemitiaruhi te numirahu, puítisera nímahapa éma” macahepa eta maiya. Tacahe, ichape eta náurisamurevahi namutu.

²⁵ Tiuri, ema émana machicha máechavihi tiyanahi te isaniti. Te tichavapa, te tiánehipa eta napena, masamapa eta piesta te tajuhe.

²⁶ Tásiha, máichuhapa ema émana nacajurure. Mayaserecapa: “¿Tájaha tacayema eta juca piesta?” macahepa.

²⁷ Tacahe, máichapa ema macajurure: “Ema piparape títecapahi. Tásiha, ema piya máimicapacapa eta étana mamona tiújepana. Ichape eta piesta, taicha eta máurisamurevahi ema piya eta máitecapirahi ema piparape” máichapa ema macajurure.

²⁸ Tacahe, tise marinehi ema maparape. Vaipa mávarahahini masiapahini. Tacahe, te máechapa ema naiya, tiúchucapa. Macamesapa macasiapa.

²⁹ Majicapapasera ema machicha, áni pa maicha: “Pímaha, tata. Ánaquiapapa eta nítatíravíhi níti. Tájina nímatiyahini nácapaemachavihini te pivanairipiana. Tásihasera, tájina píjaracanuhi eta étanainahini chívachichainapucaini eta nunicahini nucapiestarahípucaini níti, nácachanehini ena nájiriareana némunacasareana.

³⁰ Tásiha, puíti pímicapacainehi eta mamona tiújepana, taicha eta máitecapirahi ema émana pichichatataji. Ema mácatataji títahacavahi eta píjararuinihi picayehequeneanainihi náichavenehi ena esenana túhusiana” máichapa ema machicha.

³¹ Tacahe, ema maiya máichapa: “Pímaha, nuchichachicha, píti ánaquiaparipa eta péjahasiranihi. Tásiha, tamutu eta nucayehequeneanahi, piyeheanahivare píti.

³² Puítisera, táuricaichucha vícha eta piesta eta víurisamurevainahi, taicha tímicutijiricavahi eta máepenaquenénahini ema maca piparape, puítisera tiúchujicapa, tichavapa éma. Ema máemitiaruhi te vimirahu, puítisera víápechavavarepa vímaha éma” máichapa.

Tacahehi eta máechajiriruvanahi ema Jesús nayehe ena achaneana.

16

Eta máimituresirahi ema Jesús, máimicutichina ema capataz timapachichijicahi eta máimahaquene ema máquenu

¹ Ema Jesús ánivare macahehi eta máimitusiravacahi ena máimitureana:

—Nímicutichinahe eta apana. Ema achane rico, matiaríhihi ema mayehe capataz, téchahi tamutu eta máimahaqueneana ema máquenu. Tásiha, masamairiricapa ema máquenu eta mamapachichijisiraipahi eta máimahaqueneana.

² Tacahe, ema máquenu máichuhapa. Mayaserecapa: “¿Tájaha tacayema eta juca? Nusamauchavihi eta pimapachichijisiraipahi eta nímahaqueneana”. Émasera ema capataz tájina maviyavahini macatiúchivahini taicha yátupíhi eta máeje capiravahi. Tacahe, ema máquenu máichapa: “Tiuri, vitupaequenehayare tamutu taicha vaipa nuvaraha pímiyanava eta nuyehe”.

³ Tacahe, ema capataz ichaperinehi eta mapanereresirahi taicha eta máuchusiraya. Tásiha, macahepa te mapanereruana: “¿Tájahainapupuca nícharacavayare puíti? Ema náquenu ticuchucanuina tayehe eta juca nématanerepíhi. Ichape eta nutsirihacarevayare taicha vahí núríhahini nucaematanehini eta isaniti, váhivare nuratahaimahi eta tamuracava eta emataneca. Títsirihacarehivare nuyaseserecahini eta nunicahuene.

⁴ Tiuri, áni nucaheyare. Némeñahavayare nayehe ena ticanteveanahi mayehe ema náquenu, tiámainucava te níucavapapucaini eta nítatijiyavayare” macahepa te mapanereruana.

⁵ Tacahe, máichuhavacapa namutu émanapahi ena ticanteveanahi mayehe ema máquenu. Tacahe, mayaserecapa ema máinapuiruhi: “¿Péchapuca áyana eta pintevehi mayehe ema náquenu?”

⁶ Tacahe, ema ticantevehi majicapapa: “200 lata eta aceite comer eta nuntevehi mayehe”. Tacahe, ema capataz máichapa: “Júcahi eta piyehe vale pífirmarúhi. Puítinarichu vítsivachaya eta apana vale. Vaipa pivachachaimahi tamutu. Cien latinarine eta pinteveyare” macahepa.

⁷ Tacahe, mayaserecavare ema apana: “¿Pítiyapa péchapuca áyana eta pintevehi?” Ema ticantevehi majicapapa: “Séisicientohi tarera eta trigo eta nuntevehi mayehe”. Tacahe, ema capataz máichavarepa: “Júcahi eta piyehe vale pífirmarúhi. Vítsivachaya eta piyehe vale. Vaipa pivachachaimahi tamutu. Quinientorine tarera eta pinteveyare”. Ene tacahehi eta máichirahi nayehe ena apamuriana ticanteveanahi, máitsivachirapaipahi eta nayeheana váleana.

⁸ Tacahe, te máechapa ema máquenuini eta máichaqueneanahi ema mayeheni capataz eta macatiuchiravahi, áni pa macahe: “Tétavicavapa eta máitusirahi masámápuha ema maena

nuyeheni capataz” macahepa ema máquenuini. Ene nacahehi ena achaneana máimatirahanahi ema Viya. Éna tiápajupanavanahivare eta náitusirahi eta tayanirava. Nacachuricahi ena téhicanahi ema Viya, taicha tavayuaçavacahi eta tájiparacana.

⁹ Puiti numetacaheyare eti nímitureanahi: Eta ítaresirahi te juca apaquehe tamauriquenehi, te ecaimahaquenehipuca, ecajiyare te napaucahepuca ena ticamunuvanahi. Tacahe, te ítecapapa te mávasa ema Viya, tiúriyare eta ítecapiraya, ánaqui ejacapainapa eta táitsivayare.

¹⁰ Taicha nácani tiúrihi eta náechapajirisirahi jácani ánichichaquenehi, ene tacaheyarehi eta táurivayare eta náechapajirisirayare eta camuriquenehi. Nácanisera vahi tiúrihi eta náechapajirisirahi jácani ánichichaquenehi, éneyareichuhivare vahi tiúrimahi eta náechapajirisirayare eta camuriquenehi.

¹¹ Taicha te vahi tiúrihi eta ítauchirahi eta ecatuparahairahi échapajiricaya eta tímahacareanahi eta te juca apaquehe, ema Viya vahi tituparacahémahi eta tímahacareana yátupi-queneana te anuma.

¹² Eta tacahe, ítaurahiyare tayehe jácani apayeheana apaesa májaracahe ema Viya eta ícuchihi, taicha eta máimairahi éma eta íturaivahi éti.

¹³ Éti, eta ítaresirahi, vahi táuricahini apinanainahini ena iáquenuana. Taicha émunacapanayarehi ema émana, tisuapacarepanayarehivare. Tásiha, ema apana, apaesarineya eta émunasiraina, váipainapa tisuapacaremahi éma. Ene tacahehi eta juca ímahaqueneana, vahi ecuisapa tahapasamurerecahehini eta plata, machu tahapapiricahehiana eta émunasirahi ema Viya, étapa eta ecaemataneasirahi éma —máichavacapa ema Jesús ena máimitureana.

*Ema Jesús maconsejachapa ena fariséoana
(Mt 19.1-12; Mr 10.1-12)*

¹⁴ Natarihihivaresera ena fariséoana. Nasamararacahi eta juca máimiturapianahi ema Jesús. Tásiha, nacaecahirichuchasera eta nasamirahi éma. Taicha tétavicavahi eta tavayuasiravacahi éna eta tímahacareana.

¹⁵ Tacahe, ema Jesús máichavacapa:

—Éti épiyacavahi iuri eta ímairavahi nayehe ena achaneana. Émasera ema Viya máimatihí eta esamureana. Macatianacahi ichape éma eta apimirahériahi.

¹⁶ Numetacahevare eta apana: Ema víyarahaini Moisés, énapa ena víyarahaini profetana tínapucanahi eta náechajisihahi tayehe eta nítésirayarehi nuti Cristo ecuchapaquenehi. Puiti ichape eta navapinairavahi ena camuriqueneana téhicanuanapaipa. Éti apana, tituparacaha éhicanuyareva.

¹⁷ Numetacahe puiti: Váhiquene títavaimahi eta tasuapacarevahi eta máechajiriruvana ema Tata. Máichecuarquire éta, tayanapanehipuca táitava eta anuma étapa eta juca apaquehe.

¹⁸ Éti, eta ímiturapi, ísapahi mácani achane máquijica esu mayena, tásiha, ísapahivare maveha esu apana esena. Nútisera numetacahe: Mácani achane, te máinajicapuca esu mayena, tásiha maveha esu apana esena, éma ticapecaturaipahi me Viya. Tacutiquene mácani apanavare achane mavehapa esu esena máinajiruhi ema suima, énerichuvare ticapecaturahivare me Viya taicha ésu, matiarichihahi ema suímaquenehi —máichavacapa.

Eta macatajivairahi ema rico étapa eta máuricacarevahi ema paure ticajiare Lázaro

¹⁹ Tacahe, ema Jesús máimitucavacavare ena achaneana. Ániapa macahe:

—Nímicutichinahe eta apana. Matiarihíhi ema émana achane. Mavayuchahi eta marricuva. Tétavicavahi táurinavahi eta macamuirihaira. Tijanunuhacanecha. Tamutuhi sácheana máicha eta táurinacquene piesta.

²⁰ Tásiha, matiarihíhivare ema apana achane paure ticajiare Lázaro. Ticajumahi. Amairihahi carachachaha eta majuma. Téjahapairicahi éma tamutu sácheana te mapajacura ema rico.

²¹ Ema maca paure tiyaseserecahi manicayare eta máemacharajiana ema rico. Tájinasera nájaracaimahi. Tavetijipa, vahi túmenahini ema paure. Vaipa maratahahini macatiuchavahini eta táeverasirahi eta tamucuana eta macarachana.

²² Étana sache títapapa eta máepenirahi ema paure. Nárajapapa ena ángeleana; náepanapa eta máchaneva ema Lázaro, námapa tayehe eta paraíso mávihahi ema viáchucaini Abraham. Tacahe, te táequenepa, tépenavarepa ema rico. Tiúrinavare eta náecarirahi.

²³ Eta máepenirahi éma, tiyanapa tayehe eta macatajivaiyayarehi. Tásiha, te téjami-háquichapa, máimahapa eta mávihahi ema Abraham, émapa ema Lázaro te machacaya. Mayerehivachahisera eta máimairahi.

²⁴ Tacahe, tipiaracapa ema rícoini: “Tata Abraham, pájapanunu. Picatajicanu, pivanesianuini ema Lázaro máechipaicaini apaesachichaini eta mavauqui te une. Máecasarechapaini eta nunene. Taicha tétavicavahi eta numaunevahi eta te juca nucatajivaiyahi tayehe eta juca návihahi táijurequene yucu” máichapa.

²⁵ Émasera ema Abraham majicapapa: “Vahi nuvanecaimahi. Péchavachucha, nuchicha, te achanevichaha, tétavicavahi eta piúricarevahi. Tájina pácamunuhini eta pítaresirahi. Ánipasera picatajivaiyahi. Émasera ema maca Lázaro, ichapemurihi eta macatajivairahi te achanerichaha. Puítisera vaipa macatajivahini. Puiti éma, majacaparipahi eta máuricacarevahi.

²⁶ Tacutiquene máitujihí eta mánuquirainahini eta ára piyehe. Pítiripa váhivare pítujicavaimahi pítecapauchahavi ani te juca viávihahi víti, taicha jucarihi eta tíchejimirauchahavihi eta viánucuirainahini tacutihi eta tiúchausi cajacure. Máitujihí eta mayanahini” macahepa ema Abraham.

²⁷ Tacahe, ema rícoini máichavarepa: “Tiuri, te váhipuca títujicacarehi, picatajicanusera. Pivanesianuini mayana ema Lázaro te nupena.

²⁸ Mametapaninanuini ena cincoqueneana nuparapenaveana. Maconsejachapanavacaini eta náeneuchiravainaini éna, apaesa váhini nacuitechahini tayehe eta juca návihahi núti nucatajivaiyahi”.

²⁹ Émasera ema Abraham máichavarepa: “Éna, narataha téchajicurecana, ticaravahuanayare eta Sagrada Escritura. Te nasuapahivarepuca eta tavanairipianahi, vahi tisiapanaimahi eta te jara ecuñaraqui piávihahi píti”.

³⁰ Ema rícoini majicapavarepa: “Táitaurevaquene ene tacahehi, tata Abraham. Tiúripanahiserahipucaini mayanahini ema émana máepaquenehi eta nayehe ena nuparapenaveana, mametapanavacahini. Németeaca téneuchavavaneapaini”.

³¹ Ema Abraham máichavarepa: “Te váhipuca nacusuapahini eta Sagrada Escritura, tacaheyarehi eta namasuapirayare mácani máechepurehi máepaquenehi” macahepa ema Abraham.

17

Ichape eta máicuñayare mácani tímiaquipaica te pecatu ena amaperuana
(Mt 18.6-7; Mr 9.42)

¹ Te táequenepa, ema Jesús mametamurihavarepa ena máimitureana. Ánipa macahe: —Yátupi eta vahi téjiacavaimahi eta tímiaquipaicayare tayehe eta pecatu ena achaneana. Ichapesera eta náicuñayare nácani táemesiavanayare námiaquipaisiraya nácani apamuriana tayehe eta pecatuana.

² Mácani tímiaquipaicaya ema émana amaperu, tíuripannahipucaini máepenahini mativainahini éma. Váhirichupucaini macucaicuñahini; taicha vahi macuimíquipaicahini ema amaperu tayehe eta pecatu.

³ Eta tacahe, échapavaya éti machu ímiaquipaica ena amaperuana.

Tatuparaca viperdonacha ena téjecapavana viyehe
(Mt 18.21-22)

Numetacahe eta apana: Te máejecapavapuca ema piparape eta piyehe, piconsejachaya. Téhesera máeneuchava eta piyehe, pipardonachaya éma.

⁴ Tayanapane siétehénapuca máejecapava te étana sache, máeneuchavaserá eta piyehe, tituparacavi piperdonachayare —macahepa ema Jesús.

Tamutuyare virataha te yátupihí visuapa ema Viya

⁵ Tiuri, ena apóstoleana nayaserecapa ema Jesús: —Tata Viáquenu, picatajicahavi. Pímitucahavi apaesa tajurucapapaini eta vicasíñairavahi mayehe ema Viya. Vivaraha ichapenaini eta vicasíñairavaya eta mayehe —nacahepa.

⁶ Tacahe, ema Jesús majicapavacapa: —Vahi tácomesa ichapenahini eta ecasíñairavahi mayehe ema Viya. Tayanapanepuca ánichichainarichu eta ecasíñairavahi, tácutipuca eta táquichicha eta mostaza, tamutuyare erataha. Étaripa eta jácani yucuqui, te evarahapuca ecayejea, eratahayarehi. Te ichapuca: “Piyejecava eta te juca, piyana pisucuchava te cáquiure”; tásiha, eta yucuqui tisuapaheyarehi. Tiyejecavainapa tayehe eta cáquiure.

Tatuparaca vítauchayare eta vicaemataneasirayare ema Viya

⁷ Étaripa ema mácani achane te ticamusurahi, te másihapapapuca ema musu te vámahí eta majaneasirahi eta vaca, te tísahhipuca, te títecapava te peti, ema máquenu váiparinéhi matátáuchaimahi máepiyaca eta tinicayare eta máenisiraya ema musu.

⁸ Matátáuchayarechucha mavaneca ema musu émaina máepiyaca eta tinicacare, máenicayare ema máquenu. Tásiha, máichainapuca: “Tiuri, nítanesipa. Pítipavapa pínica”.

⁹ Váiparinehivare mahasulupayachaimahi ema mamusura eta máítauchirahi eta mavanahianahi.

¹⁰ Ene ecahehi éti, ecuti ema musu. Te ítauchapa tamutu eta evanahiana me Viya, ecahenapa: “Viti músuanahi vahi vicunachacarémahi. Tacarichuhi vicha eta vivanahianahi” ecahenapa —máichavacapa ema Jesús.

Ema Jesús macanaracahi ena diésqueneana leprosoana

¹¹ Tímiyanavavare tipaica ema Jesús, macaijuhepa eta Jerusalén. Máetavicavacapaipa eta avasareana te provincia Galilea étapa eta Samaria.

¹² Te máitecapauchapa eta apana avasarechicha, tiúchujicanapa ena diésqueneana ajairana ticajumana eta lepra. Nacapayacapa éma. Váhisera náemeñahavahini éna, nayerehichucha.

¹³ Tacahe, napiaracapa ema Jesús:

—Tata Jesús Nazareno, pájapanuhavi. Picatajicahavi, picanaracahavi eta vijuma —náichapa.

¹⁴ Tacahe, ema Jesús máesenicavacapa. Tásiha, máichavacapa:

—Eyana, ímerecoa te namirahu ena tuparairucana apaesa náimamaracahe. Énainapa nametajirica eta iúriivaipa, enarasiraipahi eta ejumanainihi —máichavacapa.

Nasuapavanehi éna. Tásiha, eta nayanirahi, tinaracanapaipa.

¹⁵ Tacahe, ema émana, eta máimairavahi eta manarasiraipahi, tichavapa te mávihahi ema Jesús. Tipiaracapaipahi muraca eta macunachirahi ema Viya.

¹⁶ Matupirupa tépuycuhi te mamirahu ema Jesús. Tétipaica macaitcapa eta mamira te apaquehe, mamaverasiravahi eta mahasulupayachirahi ema Jesús. Ema maca achane, indigenahi samaritano.

¹⁷ Tacahe, ema Jesús máichapa:

—Ticutimahi diésnahi ena nuncanaruanahi. ¿Tájahapuca tacayemahi vahi nachavahini ena apamuriana nuévequeneana?

¹⁸ Macarichuhi tichava ema maca apavasaquenesamihí, macunachapaipa ema Viya.

¹⁹ Tacahe, ema Jesús máichapa ema achane:

—Pécheputa, piyana pichava. Pinaracaipasera táichavenehi eta picasiñairanuhi —macahepa.

*Eta ecutiareanaya eta máitesiraya ema Cristo
(Mt 24.23-28, 36-41)*

²⁰ Tiuri, ena fariséoana nayaserecavare ema Jesús tájamuhuyareputa eta máitecapiraya ema Cristo nacuchapaquenehi. Éma, majicapavacapa:

—Eta máitecapiraya ema ecuchapaquenehi, tájina metárapimahi eta máimeresiravaya éma. Vahi tácajerahini eta ímairaya.

²¹ Nájinavare timetajiricaimahi eta máitecapiraya taicha matiarahiripahi éma puiti ani. Nútiripa —máichavacapa.

²² Tacahe, máichavacapa ena máimitureana:

—Tatiarihiyare eta sáchevayare ichapeyare eta ecaimairunuiraya. Tétavicavaya eta evairaya íjahúchavayare ímahanu nuti Manerejirunuhi ema Viya eta nuchaviraya.

²³ Te navayuaracaheputa nacahenapuca: “Émaripa ema vímahaquenehi ánaqui”. Ena apamuriana nacahénavareputa: “Émaripa ema maca vímahaquenehi puiti eta ani”. Váhisera ecusuapavaca éna. Váhivare ecuehicavaca.

²⁴ Taicha te táítauchavapa eta nítecapiraya núti, nucutiare eta tájjahúchirava títecapa eta térameca. Namutuyare ena achaneana te juca apaquehe tinecapanuanayare. Tacaheyare eta nuchavirayare nuti Manerejirunuhi ema Viya. Ticaecherayaresera, tájina vahi máchasimahi.

²⁵ Tativayaresera nucatajivanumayare ichape. Tépurunuanayare ena achaneana natiarihiqueneanahi puiti.

²⁶⁻²⁷ Tacutiare eta acane ena achaneana machamurianaini ema Noé. Ena nani tinicairihianarinecha, náematanerinecha, térana, timarerecanahi ena nachichanaveana. Vahi téñamavanaimahi eta náimairahi ema Noé eta masiapirahi tayehe eta ichape pacure. Tájina vahi natsecavahini eta táitecapauchirayarehi eta ichape une. Tacahe, eta táemirisirapa eta ichapequene tíquiva, tacapapajicavacahi namutu éna. Ene nacaheyare ena achaneana te jena sáchevare. Vahi titsecavanaimahi tayehe eta nuchaviraya.

²⁸ Tacutiquene ene nacahehivare acane ena achaneana ena machamuriana ema Lot. Tinicairihianahivare éna, téraracavanahivare. Étanecha napanerechahi nájarareca eta

náevavareruana. Ena apamuriana natanujiricarinecha eta nacamunuqueneanahi. Tépiya-rerecanarichucha pétiana. Vahi naéñamavahini tayehe jácani ecuñaraquiya.

²⁹ Téhesera te majunijicapa ema víyahaini Lot eta avasare Sodoma, tjàhúchavapa tiquivapa eta yucu ticasiriqui azufre tiásihahi te anuma. Tacapapajicavacapa.

³⁰ Ene tacaheyare eta nusacherayare nuti Manerejirunuhi ema Viya eta nuchaviraya.

³¹ Te jena sácheare, nácani táchimararuanayare te aneca, vahi táuricaímahi nasiapahini te napena navehanumahini jácani náéñamaqueneanahi náimahaqueneana. Énaripa ena napáiririruanahi te vámahi, váhivare tichavaequenehavanaimahi náepanahini eta náéñamaqueneanahi.

³² Écharichuhi eta acane eta suíchararacavahi esu mayenaini ema Lot. Ésu, tétavicavahi eta suéñamaequenehairahi eta suímahaqueneana sujuniruanahi. Táichavenehi eta suvarairahi tichava, ésujiyapa ticamitiequenehava*.

³³ Nácani téñamanahi eta náitaresira, tahapapiricarinecha eta tájiparacana te juca apaquehe, éna témitiequenehanaya eta náitaresira. Énaserá nácani tahapapiriruanahi eta náehisiranuhi, tayanapanepuca táimicapacavaca, éna tíujicavanayare tíuchuchanayare eta náitaresiranaya.

³⁴ Numetacahevanecha: Te jena yátiyare, te apinanahipuca nácani natiarhiqueneanahi te tajuhe peti, émanayare ema níchuhaquenyare, ema apana manasiyare.

³⁵ Tacutiquene, apinanahipuca ena esenana tiyuvarecanahipuca. Énerichuvare ésuma esu níchuhaquenyare. Esu apana sunasiyare.

³⁶ Te apinanahipuca ena ajairana te vámahi, ényareichuvare émana ema níchuhaquenyare. Éma apana manasiyareva —máichapa ema Jesús.

³⁷ Eta nasamirahi ena máimitureana, nayaserecapa:

—Tata Viáquenu, ¿táviyahpuca táitachuiavayare eta juca pimetarapianahi? —nacahepa.

Majicapapa éma:

—Vahi ecueñamava eta táviyahpuca nítecapihayare. Núti nítecapauchaheya te jácani iáviyahhi éti† —máichavacapa.

18

Éma Jesús máimicutichinavare ema juez ésupa esu tépenaima

¹ Éma Jesús máimitucavacavare ena máimitureana vahi nacucainajiruva eta nayujarasirana. Tímiyanavanaya, tayanapane víuchaha najacapavanehini eta nayasearuanahi.

² Éta máimicutichinahi, ánipa máichavacahi:

—Matiaríhi ema achane. Juézhí tayehe eta avasare. Éma, tájina vahi mapicauchahini ema Viya. Nájinavare mapicauréna ena achaneana.

³ Sutiarihivare tayehe eta avasare esu ésuma esena suépenaimaquenehi. Suchavauruirichahi ema juez taicha eta sumetauchirahi ema sucatianaruihi.

⁴ Émasera ema juez vahi masuapahini eta sumetauresirahi ésu. Váhisera sucainajiruvahini. Tásiha, mapanerequenehapa macahepa: “Núti néchinava. Nájina nárataha napamicanuhini. Váhivare típamicanuimahi ema Viya.

⁵ Ésusera esu suca esena, nuyacujipa eta suchavauruirisiranuhi. Nícharinepuca eta suvarahaquenehi, apaesa vaipa sucuápechava suíteca” macahepa ema juez.

⁶ Puiti, nuvaraha ecaicutiaraqunehaicha eta juca nímiturapihi mayehe ema juez mapicauruiraha eta macatiuchirahi esu suca esena táichavenehi eta suchavauruirisirahi éma.

⁷⁻⁸ Ene macahehi ema Viya. Vahi máyererejimahi eta macatiuchirahevaneya eti manerejiruanahi, esamacareyarehi taicha eta emacainajiruvairahi eta eyujarasirainahi tamutu sácheana, yátiana. Étaripa te táitecapa eta nuchavirayare nuti Manerejirunuhi ema Viya, németeacahi natiarhiyareichaha nuchimapaqueneanaya ena vahi ticainajiruvanahi eta nayujarasira, nacutíhi esu suépenaimaquene eta sumacainajiruvairahi —máichavacapa ema Jesús.

Éma Jesús tímituchavi vahi vicasiñavavaicaimahi, váhivare vépururahimahi

* **17:32** Éma Viya mavanecahi ena apinana ángeleana, nametapana ema Lot eta máicuñasirayarehi eta avasare Sodoma. Ésusera esu mayena ema Lot, ticametacasihineni eta sujunairayare suchanayarehi ema suima, sucatiequeneharichucha eta suímahaqueneanainihi. Étapa tíviuchahi sunasipa te achene, tépiyavapa ichave máripuhi. † **17:37** Te máechajiruvahi ema Jesús, ani macahehi: “Te jácani mávihahi ema máepnaquene, éta táviyahare eta sipuquiana”. Éta juca mayehéhi proverbio, tatiaríhi eta tacayemaquenehi tayumurevahi.

⁹ Ema Jesús apanavare eta máimicutichinahi eta máimituresirahi, nayehe ena tímijachavanahi tiúriana, tájina náichiravainahi; náepuruvacahisera ena apamuriana achaneana. Tacahe, máichavacapa:

¹⁰ —Nimicutichinahe eta apana: Natiarihi ena apinana ajairana te Templo. Téneuchavanahi. Ema émana achane, fariséohi éma. Ema apana, tisipecaturarahi éma.

¹¹ Ema fariseo, eta macasiñavavaisirahi, témeñahavapa tayehe eta cuarto tacapicahuquenehi te Templo. Ánipa macahehi eta mayujarasirahi: “Nuhasulupayachavi, Tata Dios, eta núrivahi te pimirahu. Vahi nácutihini ena apamuriana achaneana tiámerahianahi, tisipecaturarahi, esenamareanahivare. Váhivare nácutihini ena mácatataji te juca nuchacaya.

¹² Píti pímatinuhi eta apiheirahi áyunanu te semanana. Níjaracavivare eta plata nuganareruasa. Te nuganachahipuca eta dies peso, étanahi peso eta níjaracaviparaca. Téhesera cien pésohipuca eta nuganareruhi, dies pésohivare eta níjaracavi. Vahi nuyavanahini eta námavahuásana eta piyehe” macahepa.

¹³ Émasera ena apana achane vahi máemeñahavahini. Tiyerehichucha eta máeneuchiravahi. Váhivare mapatsicavahini máesenicahini te anuma. Téhatupachavahisera eta máeneuchiravahi. Ánipa macahehi: “Tata Dios, nucatisamureva ichape eta nucapecaturairahi piyehe. Pájapanunusera piperdonachanu eta nupecaturana” macahepa ena achane.

¹⁴ Tiuri, nutupiru numetacahe: Ema maca achane, eta machaviraipahi te mapena, tijacapacaréinehi me Viya taicha yátupihí eta máeneuchiravahi. Émasera ena fariseo vahi majacapacarehini. Taicha nácani ticasiñavavaicanahi, tímijachavanahi ticunachacarehi, éna tépurucareanayarehi me Viya. Nácanisera ena tiyaseacanahi ena Viya eta májapanuiravacaina, yátupihí tijacapacareanayarehi mayehe —macahepa ena Jesús.

Ema Jesús mayujaraucha ena amuyana

(Mt 19.13-15; Mr 10.13-16)

¹⁵ Tacahe, ena achaneana námavacapaipahi ena amuyana eta mayehe ena Jesús, navarairahi máemamahacavacayarehi éma. Énasera ena máimitureana vahi náisapahini, nacaichepaipa ena tiámanapahi ena amuyana.

¹⁶ Émasera ena Jesús máichuhavacaichucha ena amuyana. Tásiha, ena máimitureana máichavacapa:

—Ésamiricachucha ena amuyana, náitecaichaha eta nuyehe. Vahi ecucaichepaica éna. Taicha ena nuchanerana nuti Cristo nacutiyarehi ena nani amuyana eta nasuapajiraiva éna.

¹⁷ Nutupiruva numetacahe: Nácani vahi nácutihí ena amuyana eta nasuapajiraiva, vahi nuchaneranaímahi éna —macahepa ena Jesús.

Ema achane rico téchajiricava mayehe ena Jesús

(Mt 19.16-30; Mr 10.17-31)

¹⁸ Matiaríhi ena achane. Náiyacararipahi ena achaneana. Témeñahavapa mayehe ena Jesús, mayaserecapa:

—Tata maestro, píti piúriquene. ¿Tájahapucaini eta nícharacavaini eta nítujsiravaina me Viya máichecuaraquirénahini eta nítaresira? —máichapa.

¹⁹ Ema Jesús majicapapa:

—¿Tájaha tacayema pímiarechanu “Píti piúriquene”? Mararihi ena Viya. Jéhevere éma, tétavicavahi eta máurivahi.

²⁰ Téhesera te pivarahapuca pecha eta apana vítaresira, pisuapayarehi eta mavanairipiana ena Viya. Píti pímatipa eta júcana: “Vahi picuveha esu esena apayena. Vahi picucapareca. Vahi picuamereca. Nacuija pépiyaequeneruina. Pémunacaya ena ticachichavianahi” —máichapa.

²¹ Tacahe, ena achane majicapapa:

—Tamutu nusuapahi eta juca vanairipiana eta námaperuvahi, puíticha juca ajairanuirapa —macahepa.

²² Tásiha, ena Jesús máichavarepa:

—Jucarihichahasera eta pítauchaquenyare. Píjararecaya tamutu eta pímahaqueneana. Tásiha, píjaracavacaya ena páureana. Jéhevere éta, píjacapayare eta pímahaquenyare te anuma, táitsivayare. Te tamutupa eta juca, pítecavanepa péhicanu —máichapa ena Jesús.

²³ Te masamapa ena achane eta juca macayemaquenehi ena Jesús, ichaperinehi eta mapanereresirahi, taicha mavayuchahi eta marricovahi. Macatiequeneharinehi tamutu. Tiyanaipa tipanererecapaipa.

²⁴ Eta máimairahi ena Jesús eta mapanereresirahi, máichavarepa:

—Yátupiquenehi máitujihí eta nájarasiravainahini eta náehisiranuinahini ena rícoana eta nasiapirainahini te anuma.

²⁵ Esamanuchaha. Eta juca tímicitujiricavahi eta vipera camello, máitujihí tánucuhahini te támicuejehe eta parirapa. Ene nacahehi ena rícoana —macahepa.

²⁶ Tacahe, ena tisamararacanahe, ánipa tacahehi eta nayaseresirahi:

—¡Tétavicavahi eta tamáitujicacarevahi! ¡Nájina títujicavaimahi náuchucuhahini!

²⁷ Ema Jesús majicapavacapa:

—Nájina émanaina achane émajivaimahi ticuchucuhava. Macarichu ema Viya marataha ticuchucuhahe —macahepa.

²⁸ Émaripa ema Pedro máichavarepa:

—Vítisera, Tata, vinaquicahi tamutu eta vicayehequeneana, vivarairahi véhicavihi.

²⁹ Ema Jesús majicapavarepa:

—Nutupiru numetacahe: Namutu nácani nanaquicahi eta napena, najunjicahivare ena ticachichana, ena naparapeneveana, nayenanapuca, nachichanaveanapuca, táichavenevarehi eta náehisiranuyare;

³⁰ Jararihiyare eta táitsivayare te juca apaquehe eta náimahaquenevare. Nararihiyarevare ena achaneana téchapajiricanayareva. Tásiha, tavetijinapa te náitecapapa te apana náitare-siraya, máichecuaraquirenapa eta náuricacarevaya —macahepa ema Jesús.

Ema Jesús tíápechavare máechajisíha eta máepenirayare

(Mt 20.17-19; Mr 10.32-34)

³¹ Ema Jesús máiputsiamurihapa mámamurihapa ena dócequeneana máimitureana. Tásiha, máichavacapa:

—Ímaha puiti, viyanainapa vicaijuhénapaipa te Jerusalén. Ánaqui táitauchiavayare tamutu eta nájucunachaqueneanahi ena profetanaini eta nícharacavayarehi núti Manerejirunúhi ema Viya.

³² Ánaqui nucaijararecasiyare núti nayehe ena apavasaqueneana romanoana. Énainapa ticaecahijiricanuanayare, ticaetemajiricanuanaya, tiátutuquichanuanayareva.

³³ Téstanuanayareva. Tásiha, ticapacuanainapa. Tásihasera te mapanaquenénapa sache, néchepucainapa te nécarí —máichavacapa.

³⁴ Énasera ena máimitureana vahi nacaicutiarahini eta juca mametasiravacahi. Váhivare náimatiequenehahini tájahapuca eta máechajisíhahi taicha vahi náemetecahini énemahinahíni náichahini ema Jesús.

Ema Jesús macaimairíca ema achane púchuqui ticavasa te Jericó

(Mt 20.29-34; Mr 10.46-52)

³⁵ Tacahe, te tiánehípa títecapa ema Jesús tayehe eta avasare Jericó. Matarihi ema achane púchuqui, téjacahi te achenechacaya tasiaparacuhi eta avasare. Tiyaseserecahi eta limosna.

³⁶ Te masamavacapa ena camuríqueneana achaneana tiánucuhanapaipa, macayasesererupa ema púchuqui tájahahipuca eta téchacarehi.

³⁷ Nametacapasera eta émairahi tiánucuhayarehi ema Jesús Nazareno.

³⁸ Tacahe, tipiaracapa ema achane púchuqui:

—¡Tátachicha Jesús! ¡Pítiqueneripa yátupiquenévihi Cristo! ¡Picatajicanupaini! ¡Pájapanunul —macahepa.

³⁹ Ena achaneana títapumiráuchanapahi ema Jesús navarahapa nacamatinacayarehini. Émasera tipiararecaichucha:

—¡Tátachicha Jesús! ¡Pítiqueneripa yátupiquenévihi Cristo! ¡Picatajicanupaini! ¡Pájapanunuinil —macahepa.

⁴⁰ Tacahe, ema Jesús te macanarapa, tíchecanumapa. Macavanairipipa náepana ema púchuqui. Te nacáitecapa, mayaserecapa:

⁴¹ —¿Tájaha picamunu nuyehe?

Ema púchuqui majicapavarepa:

—Tátachicha, nuvaraha picaimairicanupaini —macahepa.

⁴² Ema Jesús máichapa:

—Tiuri, nuchicha. Táichavenehi eta picasíñairanuhi, pinaracapa puiti —máichapa.

⁴³ Jéhesareinehi, tájuhúchavapa timairíca ema púchuqui. Tásiha, tiyanapa máehica ema Jesús tíurisamurepaipa. Macunachapaipavare ema Viya. Énapa ena achaneana tímararacanahe eta manarasirahi, ichaperinehi eta nacunachirahi ema Viya.

¹⁻² Tacahe, eta máitecapiraipa ema Jesús te tajuhe eta avasare Jericó, matiarahi ema achane rico, ticajare Zaqueo. Nacapitarahi ena cóbrarecarahiana eta impuesto.

³ Te masamairiricapa eta émairahi ema Jesús títicapapahi, mavarahapa máimatiyarehi. Étasera eta máichipichuvahi éma, vahi máratahahini máimahahini ema Jesús te namuri ena camuriqueneana achaneana.

⁴ Tásiha, tijunapapa eta te mayanياهوarepahi ema Jesús. Tiápanapa te yucuqui, máimara-racasaréipahi ema mavarahaquenehi máimati.

⁵ Tacahe, te macapecupa ema Jesús eta yucuqui mávihahi ema Zaqueo, máesenicapa ema Jesús te anuquehe. Tásiha, máichapa:

–Zaqueo. Yare, piúcupaica, taicha puiti nuvarahahi nunasinumayare te pipena – máichapa.

⁶ Tacahe, ema Zaqueo titátájipa tiúcupaica. Tiúrisamuréinehi eta majacapirahi ema Jesús.

⁷ Eta náimairahi ena achaneana eta juca, téchajicanapa mayehe ema Jesús. Náichapa:

–Émamesapa máitecapauchayarehi ema maca ticapecaturahitátáji –nacahepa.

⁸ Te téjacanapa te tajuhe, témeñahavapa ema Zaqueo te mamirahu ema Jesús. Tásiha, macahepa:

–Pímaha, Tata Náquenu. Núti néneuchavapa me Viya. Puiti níjaracayare ena páureana ticutumariacaca eta nímahaqueneana. Nímichavayareva te natiarhipuca ena nucaetema-queneanahi, cuátróhénapasera eta táitsivayare eta nímichavaqueneana –máichapa.

⁹⁻¹⁰ Tásiha, ema Jesús majicapa:

–Nímahapa puiti eta yátupirahi eta péneuchiravahi eta pipecaturana, taicha pivarahahi pimichavayare eta plata picaetemareruanahi. Tásiha puiti, pijacapacarepa me Viya. Vaipa pémitiequenéimahi. Taicha píti picutipa ema viáchucaini Abraham eta macasiñavairahi mayehe ema Viya. Píti nuchaneravipa, picutipa ena apamuriana nucurujiruanahi. Taicha éta tímitecanuhi nuti Manerejirunuhi ema Viya –macahepa ema Jesús.

Ena Jesús máimicutichinava ema príncipe eta máijarasirahi ena machanerana eta maplatane, apaesa nacajurucayarehi

¹¹ Tacahe, ena achaneana, eta náimairahi eta mánehiraripa eta Jerusalén, náimijachaipahi étapa tímiyanayare éma, eta máimeresiravayare eta marreyvayarehi. Tacahe, ema Jesús máimatiacaripa eta napanereruanahi. Tásiha, máimitucavacapa eta apamuri máimicutichinapa apaesa nácaicutiara eta tayerevaichaha eta marreyvayarehi.

¹² Máichavacapa:

–Matiarihíhi ema achane. Ichape eta mapicacarevahi. Tiyanyarehi te apana avasare tayerehiquene. Eta tímiyanayarehi ánaqui máepanihayarehi eta mávacureyarehi eta marreyvayarehi tayehe eta mávasa. Eta machavirayarepa, téjacayarepa éma.

¹³ Te tiyanayarépa éma, máichuhanumapa ena diésquneana machanerana. Máijaracavacapa étapevaca eta maplatane tasivachaquenehi. Tásiha, máichavacapa: “Ecajurucayare eta juca nuplatane. Te nuchava, táimecavaipa eta tachichanayare”.

¹⁴ Tacahe, tiyanapa ema rey-yarehi tayehe eta macaijuheyarehi. Te máequenepasera, tisemamurianapa ena majaneana. Ánipa nacahe: “Vahi vávaraha émaina viyehéna rey ema maca” nacahepa. Náimivanerecapa eta comisión, nayaseserecayare vahi nacuijaraca eta mávacuréna.

¹⁵ Ticamesavauchuchasera majacapaichucha eta mávacurehi. Te tichavapa te mávasa, téjacapa émapa reyhi. Tásiha, máichuhavacapa ena machanerana máijararuanahi eta maplatane. Mayaserecapa te tímecavaipahipuca eta tachichanahi.

¹⁶ Tiyana ena émana tímerecavapa. Máichapa: “Tata náquenu, eta piplatane píjararunuhi tímecavaipa eta tachichanahi. Díesripa eta tajurusirahi”.

¹⁷ Ema rey majicapapa: “Tiuri, nuchicha. Tájina táichava. Tétavicava eta piúri. Puiti vahi támapurujimahi eta piúrivahi tayehe eta juca ánichichaquenehi níjararuvíhi. Puiti níjaracavayare pituparahaya nujupahaviya. Píti táquenuya eta diésqune avasareana”.

¹⁸ Tímerecavarepa ema apana mamusura. Máichapa: “Tata náquenu, eta píjararunuhi piplatane, tímecavaipahi cinco eta tajurusirahi”.

¹⁹ Majicapavarepa: “Tiuri, nuchicha. Tájina táichava. Tétavicava eta piúri. Puiti nunacavayare aquenucaviya tayehe eta cincoqueneana avasareana”.

²⁰ Tímerecavarehi ema apana mamusura. Máichapa: “Tata náquenu, júchahi eta piplatane. Vahi nucajurucahini. Núnacaichucha, nítipuichahi te pañuelo.”

²¹ Taicha nupicahi nácaetehahini, machu pícuñacanu. Pétáviuchahi píti eta pivainarajiva, taicha píti pivehahi eta nématanevachayaréni”.

²² Tacahe, ema rey máichapa ema machanera: “Eta juca péchajiriruvahi, éta tímicaecherachavihi eta pépiyahiravahi. Piplujuvahi eta tichavihi.”

²³ Te pímatinuhipuca eta nuvainarajivahi, eta nuvehairaya eta pématanevacha, étapa eta nícuñasiraviyare te picamitiacapuca, váhiyapa pinacapaihi te banco eta nuplatane. Étainahini tajurusihahini apaesainahini nímaequenéahini puiti”.

²⁴ Tásiha, máichavacapa ena apamuriana: “Everejica ema maca eta nuplatane. Íjaraca ema ticajurucahi eta diéspequene”.

²⁵ Éna nacahevarepa: “Tata viáquenu, tímecavaipahinéni diéspepahi eta tajurusirahi”.

²⁶ Ema rey majicapavarepa: “Tiuri numetacaheya: Nácani ticajurucanahi camuri, nujanechinayare eta apana. Nácansera tájinaquenehi nacajururénahini, nuverejicayare eta nájjaracasinihi.

²⁷ Énasera ena ticatianacanuanahi éna vahi najacapanuhini eta nurreyvahi, íamina-nuyare ani te numirahu. Ecapapajicavaca éna”.

²⁸ Tacahe, te tamutupa eta juca máimituresirahi, ema Jesús tímiyanavavarepa tipaica. Macaíjuhepa eta te Jerusalén. Tínapucapa ena máimitureana.

*Títecapapa ema Jesús eta te Jerusalén
(Mt 21.1-11; Mr 11.1-11; Jn 12.12-19)*

²⁹ Te apanapa semana, tiyananavarepa. Te tiánehipa eta avasarechichana Betfagé étapa eta Betania, tacanarapahivare eta masihi ticaijare Olivoquiji, tíchecanumanapa. Mavanecapa ema Jesús ena apinana máimitureana.

³⁰ Máichavacapa:

—Eyanayare eta te jena avasarechicha Betfagé. Te ítecapayarepa, ímahayare eta burrico ticaitúhahi. Eta jena sárare mávuéquehéchaha, nájinaichaha ticaperainahi. Evejapuacayare, íáminanuyare eta ani.

³¹ Te natiarihinapuca náéfiama, emetacayare eta nucamunuirahi núti —máichapa.

³² Tacahe, tiyananapa ena vanairucanahi. Jéhesaréinehi étapaichuhi eta mametarapihi éma.

³³ Te navejapuacaripa eta burrico, ena ticayeheana nayaserecapa:

—¿Táviha íámihayare eta viyehe burrico?

³⁴ Éna najicapapa:

—Ema maena Viáquenu macamunuhi —nacahepa.

³⁵ Tacahe, náisapapa eta námiraya eta burrico. Te náitecapauchapa ema Jesús, náepacamae-quechapa eta náepacuhana. Tásiha, ticaperapa ema Jesús.

³⁶ Te náimahapa ena achaneana tíuchujicapaipahi ema Jesús, náimativanepa. Tiyananapa nácapahi éma. Tépacapairicanapaipa te mamirahu eta náepacuhana te mayanihayarepahi.

³⁷ Eta napaisirahi, témiricanapaipa te tachaui eta cerro ticaijare Olivoquiji. Namutu ena máimitureana téhicanahi ema Jesús típiaracanapaipa eta náurisamurevahi taicha eta náimahaqueneanahi tíáramicareana máíchaqueneanahi éma. Ichape eta nacunachirahi ema Viya.

³⁸ Ánipa nacahehi eta napiarasirapahi:

—Yare, Tata, ¡Piti réyquene, vanairucaquenévahi me Viya! ¡Asulupaya! ¡Puiti, te anuma viciticacahi eta viúrisamurevahi viti te eta juca apaquehe! Tétávicava eta vicunachira ema Viya eta macatajisirahavíhi —nacahepa.

³⁹ Tacahe, eta nasamirapahi ena fariséoana natiarihueneanahi eta napiarasirapahi ena achaneana, náechajicapa ema Jesús:

—Tata maestro, picamatinacavacaichu ena nani pímitureana —náichapa.

⁴⁰ Ema Jesús majicapavacapa:

—Tiuri, numetacahe puiti. Te namatinapuca ena nani, táitsivasera étainapa típiaracaya eta máriana —macahepa.

⁴¹ Tacahe, títecanapapa te tápusi eta cerro Olivoquiji. Ticaeherapa eta Jerusalén. Eta máimairahi ema Jesús eta avasare, tíyahapa táicha.

⁴² Macahepa eta máiyairahi:

—Páurevisami piti návasasami Jerusalén. Te nácaicutiaraini apaesachichainaini ena pichichanaveanahi eta nuvarairahi nucuchucuhavaca núti. Puiti juca sache nutiarihiraripa ani piyehe, náurihainehi nácamapuravahini eta náuricarevahini.

⁴³ Taicha járajapayare eta sáchezare táetaviuchavaya eta nacatajivairaya ena pichichanaveana náicha ena piánaranaya tichayacavianayare. Téhavianainapa, tájinapa piviyavaimahi picatiuchiavaimahi.

⁴⁴ Témetapaicavianainapa te apaquehe. Nacapapajicavacainapa ena pichichanaveana. Tájina nacaemachaquénemahi eta peti. Tamutuyare náquipapaica. Eta pivirevaya, eta juca pimajacapiranuhi eta néjirairavíhi nuti mavanerunuhi ema Viya —macahepa.

Ena Jesús macuchuchujicavaca ena tjararecanahi eta sárareana, cáyureana te tajuhe eta Templo

(Mt 21.12-17; Mr 11.15-19; Jn 2.13-22)

⁴⁵⁻⁴⁶ Tacahe, te apanapa sache, tiyanapa ema Jesús. Tisiapahi te Templo. Máimaharinehi ena achaneana tjararecanahi eta sárareana, cáyureana. Tásiha, tisemapa. Eta macuchuchujisiravacahi, máichavacapa:

—Ema Tata Nucaiyaquene, ani macahehi eta máechajiriruvahi te Sagrada Escritura: “Eta nupena tacarichu táicuchihi eta nayujarasirareya ena achaneana” macahepa. Étiserá eti tíamerahiana ecasiapavapa eta te juca. Emaeperajicapa eta tacapicahuirahi. ¡Eyana iúchucataataji! —máichavacapa.

⁴⁷ Eta manasiquenerahi ema Jesús, tamutuhi sácheana tímitureca tayehe eta Templo. Énaserá ena tuparairucana énapa ena escribánoana, napanerechaipahi eta navairairahi nacapaca ema Jesús.

⁴⁸ Váhisera napatsicavahini taicha natiarihi ena camuriqueneana achaneana tisamararacanahi eta máimiturapiana éma. Váhivare náisapaimahi náichahini ena ticatianacanáhi.

20

Nayasereca ema Jesús te vanairucahipuca me Viya

(Mt 21.23-27; Mr 11.27-33)

¹ Étana sache tímiturecaichaha ema Jesús tayehe eta Templo eta máechajiriruva ema Viya. Titecaparacanapa ena tuparairucana, énapa ena aquenucarahana, énapa ena escribánoana.

² Nayaserecapa ema Jesús:

—Píti, vahi vitupararuvinahini víti eta píchirahi eta júcana. ¿Nájahasica tivanecavihi? ¿Nájaha tituparacavihi picha eta juca píchaqueneana? —náichapa.

³ Ema Jesús majicapavacapa:

—Núti apanavare nuvaraha nuyaserecahe. Ejicapanuyaresera.

⁴ ¿Nájahapuca tivanecahi ema Juan eta máitesirahi eta máicachasirisirahi? ¿Émapuca ema Viya tivanecahi, émajivahipuca eta máitesirahi? —máichavacapa.

⁵ Váhisera náituruequenehahini eta najicapirayarehi. Tiácapaemajiricacanapa. Ánipa nacahe eta náechajiriruvanahi:

—¿Tájahasica vicayemayare eta vijicapirayare ema maca? Te vémunahacava vicha: “Mavaneruhi ema Viya”, éma macahénapapuca: “Tásiha, ¿váhiyapa esuapahini éma?”

⁶ Téhesera vácahepuca: “Émajivaichucha eta máitesirahi”, ticauyayacareipa nacapacahavi ena achaneana te márijahiana, taicha náechahi éna émairahi ema Viya tivanecahi ema Juan —náechajiricacapa.

⁷ Tacahe, ánipa nacahehi eta najicapirahi ema Jesús:

—Vahi vecha víti —nacahepa.

⁸ Ema Jesús máichavarepa:

—Énerichuvare núti, vahi numetacahémahi nájahapuca ema tituparacanuhi —máichapa.

Ena Jesús máimicutichina ena pártirárioana máurirahana

(Mt 21.33-44; Mr 12.1-11)

⁹ Tacahe, ema Jesús tépanavavarepa máimitucavaca ena achaneana. Ánipa tacahehi eta máimiturapiana:

—Nuvaraha nímicutichinaheya, tatiarihi eta isaniti amairiha úvaquiji, masucurehi ema émana achane. Tiyanayarehisera ema ticayehe, típairiricayarehi te apana avasare. Tacahe, matuparacavacapa ena tírehanayarehi te áñoana eta mayehe va. Partídoyarepa eta majunijisirayarehi.

¹⁰ Tacahe, te títecapapa eta caje tayairahi eta uva, máimivanerecapa ema mamusura mayaseapanavacayarehi ena pártirárioanahi eta tatucachaqueneayarehi éma. Énaserá ena pártirárioanahi, tájina nájaracahini. Tisemauchavanarichucha, náehapa ema vanairucainihi.

¹¹ Tásiha, ema ticayehe máevatacavarepa ema apanavare mamusura, mayaseapanavacayarehi éna. Énerichuvaresera náumehavarepa ema vanairucainihi, náehavarepa. Tájina nájaracahini.

¹² Tásiha, ema ticayehe vahi macainajiruvahini. Máevatacavarepa ema apanavare mamusura. Énerichuvare náehavarepa ema vanairucainihi. Najarachapa, náquijicapa.

¹³ Tacahe, ema ticayehe tipanererecaripa: “¿Tájahasica nícharacavayare?” macahepa. “Nuvanecapuca mayana émajacaruvaina ema nuchicha némunarquenehi. Tatiarihi te émainapapuca napicaucha te náimahapa”.

¹⁴ Tacahe, te náimahapa ema machicha, navetijichucha eta nasemirahi. Tímitujiricacana-ripa. Ánipa nacahe: “Émainapapuca ticayeheyare ema maca. Yare, vicapaca, apaesa tánasipa tamutu vítinapa vicayehe”.

¹⁵ Tacahe, nacaratapaca éma, nacuchucapa eta tayehe eta isaniti, nacapacapa.

Puiti nuyaserecaheyare: ¿Tájahapuca máicharacavayare ema achane ticayehe eta úvaquiji? Jéhesare, vaipa macayehehíni paciencia.

¹⁶ Títecavanénapa macapapanavacayarepa eta pártirárioanahi máurirahanahi. Tásiha, máijaracainavarepa eta úvaquiji ena apamuriana pártirárioanayareva —macahepa ema Jesús.

Tacahe, ena tisamararacana, ánipa nacahehi:

—Viti vicatajicacare, vahi vácutihini ena nani máurirahana —nacahepa.

¹⁷ Ema Jesús máesenimuriahavacapa. Tásiha, máichavacapa:

—Jéhepuca, németeacasa váuchaha ácaicutiarahini eta tacayemaquenehi eta Sagrada Escritura. Éta, áni tacahehi: “Ena tépiyarecarahiana eta Templo, tasapiha náepuruhi eta mari táicuchihi tatumearayare eta peti, taicha vahi náimatihini. Émasera ema Viya macaitecapapa eta táicuchihi eta tatuparahahi. Tacapicahuquenehi puiti” tacahehi eta Sagrada Escritura.

¹⁸ Puiti, núti nucutihí eta ichape mari náepuruquenehi. Eti epurunuanahi, iáquipaicavayare évetutujicayare. Tichimaraheyare eta muraca ecuñaraqui taicha eta emavarahairahi éhicanu —máichavacapa.

¹⁹ Ena tuparairucana navarahapa nájahúchayarehíni nacarataca ema Jesús, taicha tímaticavanapa éna eta énairahi tayunacavaca eta máechajiriruvana ema Jesús. Váhiserá napatsicavahíni taicha návamirahuhi ena camuriqueneana achaneana.

*Navarahahi náemejecapavacha ema Jesús tayehe eta impuesto
(Mt 21.45-46; 22.15-22; Mr 12.12-17)*

²⁰ Tacahe, náimivanerecapa ena apamuriana ajairana tépiyacavanayarepahi tíuriana te mamirahu, navarahahi natanucayare eta tímicaviuchayarehí. Énayarepa timetauchanavarehi mayehe ema aguenucahi prefecto Poncio Pilato.

²¹ Tacahe, nayaserecapa éma, ánipa nacahe:

—Tata maestro, vímatihí eta tatupiruvairahí tíuri eta juca pímiturapianahi. Nájinavare pinerejruinahíni ena achaneana, taicha pivarahahi náehichahíni namutu eta táurinaquene achene ticaijuhe me Viya.

²² Vivarahahísera víyaserecaviyare: ¿Táuricahipuca vivachacha eta víyasehana impuesto mayehe ema Presidente Emperador romano? Taicha víti, machanerahavihi ema Viya, ¿masí? —náichapa.

²³ Ema Jesús máimatiacavacapa eta tamaurivapahi eta napanereruana. Tacahe, máichavacapa:

—¿Tájaha tacayema evaraha ímiaquipaicanu?

²⁴ Nímahaseji, íáminanu étapena eta reale.

Éna náijaracapa. Tásiha, ema máichavacapa:

—¿Nájaha ticaijare eta juca? ¿Nájahavare ticavasimahí eta juca mirare eta te juca reale? —máichavacapa.

Éna najicapapa:

—Mayehe ema Presidente Emperador.

²⁵ Tacahe, éma máichavacapa:

—Tíuri. Táuricahí íjaraca ema Presidente Emperador eta juca mayeherichuhi éma. Tásiha, íjaracavare ema Viya eta mayeherichuhivare éma —máichavacapa.

²⁶ Váhiquenesera náratahahíni náimiaquipaichíni eta nayaseresirahi te namirahu ena achaneana. Táitsivahí ichape eta náramirahí eta táurivahí eta majicapiravacahí. Timitanapa tésamiricavanapa.

*Nayasereca ema Jesús náicharacavayarepuca ena náepenaqueneana eta náechepusirayare
(Mt 22.23-33; Mr 12.18-27)*

²⁷ Nacahepaipavare ena apamuriana achaneana. Saducéoana. Ena nani saducéoana, apana eta náimiturapiana; váhi nasuapa eta náechepusirayare ena náepenaqueneana. Éna natanucahí eta táetseraruvayahí. Tacahe, nayaserecapa ema Jesús:

²⁸ —Tata maestro, ema víyahaháini Moisés manaquicahí eta ajureca máechajiriruvahí eta víyehe: “Te máepenaquenehahipuca ema achane esu mayena, tásiha, nájinahipuca manaquiequeneruvainahíni machichainahíni; te matíarihíhipuca mácani maparapehí, mavehayare esu machinenaquene, apaesa émainapuca macachicha eta suyehe, máitsivainahí ema maparapeni”.

²⁹ Tacutiqune te natiarihipuca ena siétequeneana ticaparapejiricacana, te títauchavapa ena náechavimuri, máepenaquenehapasera esu mayena. Nájinahi machichainahini.

³⁰ Tacahe, ema maparape máitauchavare esu machinena. Énerichuvaresera máepenaquenehavare, nájinahare machichainahini.

³¹ Ema émana maparape máitauchavare ésu. Énerichuvare máepenaquenehavare. Namutu ena siétequeneana navehahi ésu, tásihasera náepenaquenehapahi, nájina émanainahini mácachichahini eta suyehe.

³² Te táequenepa, tépenapa esu esenaini.

³³ Tacahe puiti, te jéhesarepuca tichavanayare títarecana te táequenéna eta náepenirahi ena nani, ¿nájahapuca ena siétequeneana éma yátupiquenehi suímaquenehi esu esena? Taicha ena siétequeneana namutuhi suímanarihi —náichapa.

³⁴ Tacahe, ema Jesús majicapavacapa:

—Ena ajairana te juca apaquehe natuparacasivaichuhi títauchavanayare suyehe esu esena.

³⁵ Ánaquisera te apana náitaresira, nácani ticatuparahanayare eta nasiapirayare te anuma te náechepucapa, vaipa nácamuimahi esu esena. Énaripa ena esenana, vaipa nácamuimahi ema ajaira.

³⁶ Taicha vaipa tíápechavaimahi tépenana. Nacutinapa ena ángeleana eta namaepenacacairahi. Yátupinapa machichanaveanainapa ena Viya, taicha éma ticaechepucavacahi.

³⁷ Émaripa ena víyarahaini Moisés timetacahavi eta májurehi eta yátupirahi eta vahi tánasi tépena eta náchanevana ena náepenaqueneana. Te máimahapa ena Moisés eta yucuquí timurujihí, eta macametacasiyahi mayehe ena Viya eta émarichuhi ena macasiñaquenehi ena Abraham, ena Isaac, émapa ena Jacobo.

³⁸ Taicha ena Viya, ena téchahi eta náitaresirana ena téhicanahi, tayanapane tépenaripa. Namutu ena, tímianavarichucha títareca eta náchanevana te mamirahu éma —macahepa ena Jesús.

³⁹ Tacahe, ena escribánoana, ena natiarihiqueneanahi náichapa ena Jesús:

—Tétupicava eta juca péchajiriruva, tata maestro —nacahepa.

⁴⁰ Váipasera nacaemuñavahini nápechavahini nayasereca.

*Ena Cristo, yátupiquenehi Viya. Mámariéquenenihisera ena rey David
(Mt 22.41-46; Mr 12.35-37)*

⁴¹ Ema Jesús máichavacavarepa:

—Éti ecahehi eta échajiriruvahi: “Tíuchucayare ena Cristo, mámariequenehare ena víyarahaini rey David” ecahehi.

⁴² Yátupihí ena Cristo achanequenehi eta máimahi taicha mámariequenenihí ena víyarahaini David. Nuvarahasera epanerechaya eta juca máechajiriruvahi ena David te májurehi Salmo, ani macahehi:

⁴³ “Ena Viya máichapa ena Tata Náquenu Cristo: Yare, péjaca te nuvaure, eta picuchapihayare eta nucaepuyusiraya te pimirahu ena ticatianacavianahi” macahepa.

⁴⁴ Ema David, ena máimijarechirahi ena Cristo: “Tata Náquenu”, ¿tájahapuca eta macayemaquenehi? Nutupiruva numetacahe: ena Cristo yátupiquenehi Viya éma. ¿Tájaha íchahi éti? —máichavacapa.

*Ena Jesús máimereuchavaca eta náejecapiravana ena escribánoana
(Mt 23.1-36; Mr 12.38-40; Lc 11.37-54)*

⁴⁵ Namutu ena achaneana nasamararacahi ena Jesús eta máechajisiravacahi ena máimitureana.

⁴⁶ Ánipa macahehi eta nayehe:

—Échapavayare éti, machu éhica eta nayeherepiana ena escribánoana. Navarahavare ticapichuanayarehi eta náechajisiraya ena achaneana te jácani nácapajisihapahi éna. Tacutiqune tinerejiurucavana eta táurinaqueneana téjasihacareana te tiyanana te víurujisirarevana. Étaripa te nánisirana, ticaejacavanavare te jácani távihahi eta tíurinisipana tinicacare.

⁴⁷ Tacutiqune naverejicavare eta nacayehequeneana ena tépenaimana, nájina najapanuquenéna. Tásiha, tépiyacavanapa religiósoanahi, tíupiemana eta nayujarasira, namavarairahi tácacherahini eta náichira eta tauriqueneana. Énasera tíápajucavanahi eta nacaicuñairaya muraca.

21

*Eta sunaquiruva esu máimaru tacachuricahi eta nanaquiruvana ena rícoana
(Mr 12.41-44)*

¹ Esa Jesús máimarakahi ena rícoana eta nanaquisirava eta plata tayehe eta chapama nanaquisiraveva eta námavahuana mayehe ema Viya.

² Énerichuvare máimahavare tinaquícava esu ésuna esena suépenaimaquene. Páurequenehi ésu. Sunaquicahisera eta apipechichahi eta suplatane.

³ Tacahe, ema Jesús macahepa:

—Ímaha esu suca esena páurechicha. Ácuneucha eta suémunasirahi ema Viya. Jéhesare ésu, tímepanávahi eta sunaquiruva, sucachuricavacahi namutu ena apamuriana achaneana.

⁴ Taicha namutu éna tacarichu nanaquicahi eta náemacharajiana naplataneana. Ésusera esu suca páurehinéni, sunaquicahisera tamutu eta sucayehequenehi. Suítahi eta sunicavachayarehini —macahepa.

*Ema Jesús máimerecharipa eta táquipaisiravaya eta Templo
(Mt 24.1-2; Mr 13.1-2)*

⁵ Natiarihíhi ena téchajisihanahi eta Templo. Náechajisihahivare eta táurinaqueneana tayereruvana nanaquiruanahi ena achaneana, étapa eta táurinavavacahi eta máriana tayeheanahi. Ichapemurihi eta táejeravahi te nacaematanénapa. Tacahe, ema Jesús máichavacapa:

⁶ —Járajapayare eta sáchevayare ticaquipaicasinapa tamutu eta juca Témposami. Téjanerepaicainapa tamutu eta juca táurinaqueneanahi ímahaqueneana puiti —macahepa.

*Tatiarihíyare eta ecutiareanaya te tánehipaicha eta táichecuiraya
(Mt 24.3-8; Mr 13.3-8)*

⁷ Tacahe, nayaserecapa ema Jesús. Náichapa:

—Tata Maestro, ¿tájamuhuyarehipuca eta náimiaquipaisirayare eta Témposami? ¿Jararihiyarepuca eta ecutiareyare eta apana péchajisihaqueneana? —náichapa.

⁸ Ema Jesús máichavacapa:

—Ecuneuchavaicha yátupina, machu navayuacahe, taicha nárájapayare ena tépiyacavanayarepahi tímivasichavanayarepahi nuyehé. “Nútiripa Cristo” nacahénapa. Ena apamuriana nacahénapa: “Táitecapaquenepa puiti eta sache”. Váhisera ecusuapavaca, váhivare ecuehicavaca.

⁹ Étaripa te esamairicapuca eta guerra, revoluciónpuca, váhivare ecuarameca. Taicha eta táinapuraquianayarehi eta júcana ecutiareanayare, vuíchahasera étaimahi eta táichecuiraya.

¹⁰ Ánivare macahe:

—Téhacacayareva eta ichapequeneana avasareana. Ticanarajiricanainapa eta apamuriana.

¹¹ Tatiarihíyareva eta ichapeyare tayamurisirana eta apaquehe. Te avasareana tatiarihíyare eta ecuhamuhuyareva, jumaremuhyareva. Te anuma tímerecavainavarepa eta ichape ecutiareya, tiámayare eta ecuñaraquiyare.

*Ena achaneana napanajiricainapa ena téhicanahi ema Viáquenu
(Mt 24.9-28; Mr 13.9-23)*

¹² Tativanumayaresera tipanajiricaheanayare éti, táichavenénahi eta éhisiranuhi níti. Ticaratacheanayare, tiámaheanayare te náurujisirarevana, ecayaserehinapa nayehe ena juéseana. Ecaevatainapa te cárcel. Tásiha, etiarihíyare eti tiámaheanaya te namirahu ena aguenucana, téhevere te namirahu ena Presidenteana gobiernohanahi, ecaviurevayare táichavenehi eta éhisiranuhi.

¹³⁻¹⁴ Étumechavasera. Te námahepa te ecayaserehiyaya, ecamapuravainapa échajisianuyare. Váhi ecueñamava eta ecayemayare ecatiuchiravaya.

¹⁵ Nímahahéinepa níti, níjaracaheya eta ítusirayare ecatiuchava. Nájina ácutimahi eta ítupajijiasiravaya. Ichape ecachuriacayare ena íánaranaya.

¹⁶ Etiarihíyare éti énajacaruvainapa ena ticachichaheana tíjararecaheanaya énaripa nácani eparapeanapuca, énajacuruvayareva tíjararecaheana, ényarepaichupuca ena ejaneanana, ítumacasareana. Eneřejicavainapa eti nacaparuanaya.

¹⁷ Namutu ena acha neana ticatianacaheanayare táichavenénahi eta éhisiranuhi.

¹⁸ Tayanapanesera nacapacahepuca, nímahahéinepasera níti. Vahi émitiequenémahi. Étaripa eta echutimacana, tájinavare témitiequenémahi.

¹⁹ Téhesera ecamichahi tamutu, ímianavahi eta éhisiranuhi, níti níjaracaheya eta ítare-siraya.

²⁰ Te ímahapa ena suntaruana nachayacapa eta Jerusalén, étanaqueneyarehi ejercito eta náichapemurivaya, étainapa ícutiaraya eta táitavirayare eta avasare.

²¹ Tásiha, te ímahapa eta juca, táuricapa etátájinapa ejuna, eti etiarihuqueneanahi te Judea. Ecaijuhayare eta te céroana, étaina eyumurusiavaya. Nácani tiávihanahi te tajuhe eta avasare Jerusalén, tavarahaipahi náuchucavane tayehe. Nácani tiávihanahi te vámahiana, vaipa távarahahini nachavahini tayehe eta avasare.

²² Taicha táitecapauchainapa eta tasacherayarehi eta tacaicuñairaya, títauchavainapa eta tametarapi eta Sagrada Escritura.

²³ ¡Páureanasami nácani esenana tachimararanayare, nácani ticajarianahipuca, nácani esenana ticachichanahi eta amuya tiájicachaha! Támairijicainapa eta nacatajivairayare namutu ena achaneana tiávihanahi te Jerusalén taicha eta náicuñayare.

²⁴ Natiarihi ena tépenanaya te guerra, ena apamuriana nacaratatajicainapa prisionéroanainapa. Námavacainapa te apanaqueneana avasareana. Ema Viya máisapainapa tisiapana te Jerusalén ena apavasaqueneana. Énapa téchanayare eta Jerusalén. Tiámainucava te máicutichapa ema Viya, macuchucavacainavarepa.

*Eta máitesiraya ema Manerejiruhi ema Viya
(Mt 24.29-35, 42-44; Mr 13.24-37)*

²⁵ Tacahe, tímerecavanainapa eta ecutiarareyare te sache, te caje, étapa te jarairiquiana. Tipicanainapa ena achaneana te juca apaquehe. Tiáramecanainavarepa taicha eta nasamirayare eta muracaquene táepacuruha eta íchapequene une.

²⁶ Ena achaneana tiáquipaicavanainapa eta napsiraya, taicha eta náimairayare eta ecutiarareanayare, váhisera náimatiequenehaimahi tájahapuca eta náichararacavayarehi. Énerichuvare tiyjecavavacainapa eta tiávihanahi te anuquehe anuma.

²⁷ Nupaenumava nítecanapa nuchava núti Manerejirunuhi ema Viya. Namutu tímahanuanayare eta núcupaisirayare. Tiámanuinapaipa eta úcaji. Níñehinapaipa eta táetaviuchi-rayare eta nujaraivayarepahi.

²⁸ Te ímahapa tanacuchavapa eta juca ecutiarareanayare, evapinavainapa éti taicha tiánehiripa eta nítecapiraya nucatiuchiráheyare.

²⁹ Máimicutirachinavare eta máimituresirahi. Ánipa macahe:

—Ecauneyare eta jácani yucuquí.

³⁰ Te ímahapa títsivachavavacapa eta tapacajiana, tiánehiripa eta únemuhuyareipa.

³¹ Ene tacahehi, te ímahayarepa, ímatiacainapa eta tánehiriripa eta nítesirayare.

³² Numetacahevanecha: Vuíchaha títavanimahi ena achaneana náitarerunaichaha te táitecapapa eta juca ecutiarareanaya.

³³ Títavayarepa eta anuma étapa eta apaquehe. Tativayaresera títauchava tamutu eta numetaruhehi.

³⁴ Échapavaicha, machu tachimaracahe eta jena sache, vahi ecucuti ena tavayuaruana eta tércare, machu muracachutihéna táicha. Vahi ecueñamava eta ítaesira, machu tahapapicahé eta éhisiranuhi.

³⁵ Eta táitecapauchirayare eta sache nuchavirayare túmicutijiricavahi eta tájahúchirava eta táeratasirava eta trampa. Ene nacaheyare ena achaneana te tamutu avasareana eta namanecapauchiravaya.

³⁶ Eta tacahe, etsecavaicha yátupina. Eyujarauchavahi támutu sácheana, apaesa túmehénapa eta ecamichiraina tamutu eta juca táichararacavayare, apaesa tacuija ecuchiravaina eta ítecapauchiranuya te numirahu nuti Manerejirunuhi ema Viya —macahepa ema Jesús.

³⁷ Tiuri, tamutu sácheana tiyana eta te Templo ema Jesús. Tímiturecahi. Te yátivare tiyanavare te avasarechicha Betania te táequenehi eta cerro Olivoquí.

³⁸ Ena achaneana, tamutu yáticarahiana, tiyanana te Templo, titsecavanaripa eta nasamararasirayare éma.

22

*Napanerechapa eta nacaratasiraya ema Jesús
(Mt 26.1-5, 14-16; Mr 14.1-2, 10-11; Jn 11.45-53)*

¹ Tamirahupaipaicha eta piesta ticaijare Pascua, eta náepanavaira eta semana eta nanisirahi étachucha pan mayehere levadura.

² Tacahe, ena tuparairucana énapa ena escribánoana, navarahaichaha náimicapaca ema Jesús. Tásiha, natanucahi eta náicharacayare eta nacaratasirayare. Návamirahuhisera ena achaneana.

³ Tacahe, ema Satanás mávahácapa ema émana máimiture ticaijare Júlasí. Émarichuhi nachamurihi ena dócequeneana apóstoleana.

⁴ Tacahe, ema maca Júlasí tiyanapa matanupanavacahi ena tuparairucana, énapa ena nacápitárana ena suntaruana tayehe eta Templo. Téchajiripanavayarehi nayehe, mametacavacaipa eta táicharacavayarehi eta máijararesirayarehi ema Jesús eta nayehe.

⁵ Tiúrisamureanarinehi eta mametasiravacahi éma. Nametacapa eta náijarasirayarehi eta plata.

⁶ Tacahe, éma majacavavacapa eta naplatane. Tásiha, máichavacapa:

—Tiuri, núti népanahyare te nímahapa nacuijapa ena achaneana te machacaya. Námahénapa tayehe eta mávihahi éma —máichavacapa.

Ema Jesús mavanecahi ena apinana máimitureana, natsecayare eta naniruyare tayehe eta Pascua

(Mt 26.17-25; Mr 14.12-21; Jn 13.21-30)

⁷ Titecapapa eta sache táepaniravahi eta semana tapiestara eta nanisiraya eta pan mayehere levadura. Étarichuvare eta jena sache ticaijare Pascua, nacapasiraya eta uvesa ticaijare cordero pascual, nanisirayare te jena yati.

⁸ Ema Jesús mavanecavacapa ena apinana máimitureana, ema Pedro émapa ema Juan. Máichavacapa:

—Eyanayare étupiripanaya eta viniruyare tayehe eta Pascua.

⁹ Éna nayaserecapa:

—¿Táviha pívaraha vétupirisihaya?

¹⁰ Ema Jesús majicapavarepa:

—Eyanayare tayehe eta avasare. Te ítecapayarepa tayehe, íacapajicayare ema émana achane tiámaphi eta une te yupi. Éhicayare éma te peti masiapihayare. Éti apana esiapayareva.

¹¹ Emetacayare ema ticayehe eta peti. Ani íchayare: “Ema viyehe Maestro tivanecahavihi viyaserepanavi pímechahavi eta cuarto vinisihayare eta uvesachicha eta viyeherepi, vicachaneyare éma” íchayare.

¹² Éma, tímechahénapa eta ichape cuarto te anuquehe piso. Táuriquenéipahi eta jácara téjasi-hacareana. Tásiha, étupiricapa eta viniruyare —máichavacapa ema Jesús.

¹³ Tiyananapa ena vanairucanahi. Jéhesaréinehi, námahapa étapaichuhi eta macayemaqueneanahi ema Jesús. Tacahe, náetupiricapa eta naniruyare tayeheyarehi eta Pascua.

Ema Jesús máenimurihapa ena máimitureana

(Mt 26.26-29; Mr 14.22-25; 1 Co 11.23-26)

¹⁴ Tacahe, te hórapa eta nanisirayarehi, téjacanapa te mesa ema Jesús énapa ena apóstoleana.

¹⁵ Ema máeniravacapa, máichavacahi éna:

—Ichapemuri eta nuvarairahi nucachanehe eta nunisirayarehi eta juca téqueneha nénisirahehi puiti eta juca yati páscuairahi, mapurare vuíchaha táitecapahini eta népenirayare.

¹⁶ Tásiha, numetacahevaneya puiti, vaipa nápechavaimahi nunica eta Pascua, tiámainucava te táitauchavapa eta nusiapiraya eta nucavacureraya, nucajupahairaya ema Tata —macahepa.

¹⁷ Tacahe, mavehapa eta vasu náerirare, mahasulupayachapa ema Viya. Tásiha, macahepa:

—Era eta juca. Ecajijiricaca.

¹⁸ Puiti numetacahevane: Vaipa nápechavaimahi nera eta juca tachi eta uva, tiámainucava te táitauchavapa eta nusiapiraya eta nucavacureraya, nucajupahairaya ema Tata —macahepa.

¹⁹ Tacahe, mavehavarepa eta pan, mahasulupayachavarepa ema Viya. Mayuvetuhacapa, máijaracavacapa ena máimitureana. Tásiha, máichavacapa:

—Eta juca neche. Enica. Étivenehi níjararecavahi eta népenirayare. Eta juca aparahiyare te apaquehe, te étipava énicaca, éta témechaheyare nuyehe —máichavacapa.

²⁰ Énerichuvare, te títanesianapa, mavehavarepa eta náerirare vasu. Máichavacapa:

—Eta juca vino, táicutiarahi eta nítine táepusairuvaya íchavene éti, nufirmachirayare eta arairu matratune ema Vicaiyaquene, nucaejasirayareva eta matratune apaesa ejaacapareya mayehe.

²¹ Puitisera, ani te etaracu, mararihi ema tíjararecanuyare.

²² Yátupiquenehi eta nacapasiranuyarehi, taicha tacahehi eta mapanereruhi ema Tata eta nuyehe nuti Manerejirunuhi éma. Páuresamisera ema tíjararecanuya —macahepa.

²³ Tacahe, ena máimitureana tiyaserejiricanapa:

—¿Nájahapuca mácani te vitaracu ema tjárarecaya ema Viáquenu? —nacahepa.

Ema Jesús máimitucavaca eta nacapicahuirayare ena téchapajiricanahi ena nachamuriana

²⁴ Te táequenepa, tiácapaemajiricanapa ena máimitureana tayehe eta nájahayarepuca ema ichapequeneapanaya aquenuca te nataracu te náejasiraya te návacureanayare.

²⁵ Te máechapa ema Jesús, ánipa máichavaca:

—Ena réyeana énapa ena aquenucana te ichapequeneana avasareana nacaetemajiricavachi ena achaneana, navarairahi ticapicahuanayarehi.

²⁶ Étiserá vahi táuricaímahi ene ácahehíni. Téhesera evarahahipuca ecapicahu, vahi ecasiñavaimahi. Ecutiyare ema amaperu eta mamansuvahi. Tacutiquene nácani tivanecanahi, tatuparacavacahi téñamavanayare eta náechapajirisiravacayare ena nachamuriana.

²⁷ Eta nayeherepi ena achaneana, ichape eta napicauchirahi ema ténicahi eta tinicacare. Énaserá ena vanairucana téchapajiricanahi eta mesa, vahi nacapicahuhíni. Púitiserá, nímitucaheyare eta juca arairu nuvanairipi. Puiti ímahanuipa eta nitátirahehi. Nuvaraha ecutinuya. Ítaticacayare éti.

²⁸ Éti, ímararacanuhi eta náchiranuhi ena ticatianacanuani. Váhisera ejunijicanuhíni.

²⁹ Eta tacahe, níjaracaheyare núti eta etuparahanayare ecutinuyare núti eta nucatuparahairaya mayehe ema Tata.

³⁰ Éjacainapa tayehe eta ecutuparahairaya. Étinapa evanerecaya nayehé ena dócemuriqueneana ena vijaneanana israelítana. Ecachanenuinavarepa te mesa eta enisiraya ánaqui te nucatuparahairaya —máichapa.

Ema Jesús máimereucha ema Pedro eta máepiyasiraya vahi máimati ema Jesús
(Mt 26.31-35; Mr 14.27-31; Jn 13.36-38)

³¹ Ema Viáquenu máichapa ema Pedro:

—Nuchicha Simón, péchapavayare. Ema Satanás, ichape eta mavarairahi ticaicutiarahéyare tiáquipaicaheyare emutu éti.

³² Nútiserá nuyaseuchahehi me Tata, pítipa, apaesa vahi tacuemitiaca eta péhisiranuhi. Piáquipaicasamiyaresera. Tichavayaresera eta picasiñairanuya, tásiha péturechavacainavarepa ena apamuriana pichamuriana —máichapa.

³³ Ema Pedro majicapapa, máichapa:

—Tata Náquenu, tájina vahi nujunijicavímahi. Níjaracava néhicavi tayehe eta cárcel. Te nacapacavipuca, núti apanavare níjaracavavare nacapacanu apaesa nácachanevi —macahepa.

³⁴ Ema Jesús majicapapa:

—Numetacavivaneya, Pedro. Puiti jena yati, te tamirahuinarichaha eta táechajisiraya eta varayu, piti mapaheyare pépiyacavayare vahi pímatinu, eta picatiuchiravayare pítipija —máichapa.

Puiti etserereacavainapa

³⁵ Tacahe, ema Jesús mayaserecavacavarepa ena máimitureana. Máichavacapa:

—Te nuvanecahénapa epaíca, nutuparacahehi vahi ecuama eta tarera, eta billetera, eta eparupevana, zyátupihí, masí, vahi ecamunuvapahíni?

Ena najicapapa:

—Tájina vácamunuipahíni.

³⁶ Tásiha, máichavacavarepa:

—Púitiserá mácani ticatarerahi, tiúripanahi mámayare eta matarera, étapa eta mayehe billetera. Émarípa mácani tájinhí mayehénahi espada, tiúripanahi májjarareca eta masacu, mavacharesihaya eta mayeheyare espada.

³⁷ Tacahe numetacahévanécha. Ena achaneana nacatianacahaviya muraca. Títauchavainapa eta táechajiriruvanahi eta Sagrada Escritura eta nícharacavayarehi: “Timicu-tijiricavahi námerahihíni náicha”. Tamutu títauchavayarehi eta tacayemaqueneanahi eta Sagrada Escritura eta nuyehé —macahepa.

³⁸ Tacahe, ena máimitureana náichapa:

—Tata Viáquenu, jucarihi apinahi eta espada.

Éma majicapavacapa:

—Tiúri, tarataquene.

Ema Jesús tíyujaraca te Getsemaní
(Mt 26.36-46; Mr 14.32-42)

³⁹ Tacahe, tíuchucapa ema Jesús, énapa ena máimitureana, tiyananapa tayehe eta huerta Getsemaní tíviahí te táemiripaisinehi eta cerro ticajarehí Olivoquí, eta mayujarasi-rarehi éma.

40 Te títécapanapa tayehe eta Getsemaní, máichavacapa:

—Eyujarauchava. Eyaseaca ema Viya eta étumevaina apaesa vahi macuiturucahe ema Satanás —máichapa.

41 Térájipanavapa apaesa ema Jesús eta nayehe. Cincuenta metro eta mayerehinévacahi. Tépuycapa.

42 Eta mayujarauchiravahi, ánipa macahe:

—Tátachicha Nucaiyaquene, picatajicanupaini. Nuyaseacavi vahi tacuitauchavaini eta níchavaquenevayare. Váhini picuisapaini eta nucatajivairaya. Níjaracavaseca núti eta nítauchiraya eta pívarahaquenehi píti eta nuyehe —macahepa.

43 Tacahe, tiáramicarepa máucupaucha ema émana ángele tiásihahi te anuma. Máetumechapanayarehi.

44 Ichape eta máeñamiravahi eta mayujarasirahi. Témiricapa eta máepatsure tacasiriquia-mapahi eta máítine. Cuájujamapaipa eta táemirisirahi te apaquehe.

45 Te títapiricapa eta mayujarasirahi, téchepucapa. Tiyanapa te návihahi ena máimitureana. Máimahainehi éna, tímacanarípahi táichavenehi eta nacatisamurevairahi.

46 Tásiha, máichavacapa:

—¿Tájaha tacayema ímacaichucha éti? Échepuca. Eyujarauchava apaesaina. Eyaseaca ema Viya eta étumevaina apaesa vahi macuiturucahe ema Satanás —máichavacapa.

Nacaratacapa ema Jesús

(Mt 26.47-56; Mr 14.43-50; Jn 18.2-11)

47 Tacahe, téchejiricavainirichaha ema Jesús, títécapananecha ena camuriqueneana suntaruana. Máinapumirauchavacapaipahi ema Júlasí. Témeñahavapa eta mayehe ema Jesús. Máetserarecapa.

48 Tásiha, ema Jesús máichapa:

—Júlasí, ¿tájaha tacayema pétserecanu eta píjarasesiranuhi nuti Manerejirunuhi ema Viya? —máichapa.

49 Tacahe, ena máimitureana natiarihiqueneanahi, eta náimairahi ena camuriqueneana suntaruana, nayaserecapa ema Jesús. Ánipa nacahe:

—Tata Viáquenu, ¿vicatiuchava te espada?

50 Tásiha, ema émana mavehapa eta mayehe espada. Mayuchatipaisinapa eta machaca tinapa te vaure ema mamusura ema aquenuca Caifás.

51 Ema Jesús máicha nuti Manerejirunuhi ema vacapa:

—Ésamiricavachucha —macahepa.

Tásiha, ema Jesús mavehapa eta machacaini ema achane, máimichavapa máipistaca, tinarcavanepa.

52 Tásiha, máichavacapa ema Jesús ena tuparairucana natiarihiqueneanapahi eta nacaratásirahi éma, énapa ena aquenucarahana, énapa ena oficiáleana tayehe eta Templo. Macajachavacapa:

—¿Tájaha tacayema ecasíña eta espada, ecaepuchiriquipahivare eta etanusiranupahi, tímicutijiricavapa námerahihini núti?

53 Étayapasíca cape juca tamutuhi sácheana nucachanehehi tayehe eta Templo. Váhivare epatsicavahini ecaratacanuhini. Étiserá iúricapuca eta tamapicuvahi eta yátimuhuhi eta íchirahi eta tamauriqueneanahi taicha mávaháruhehi ema Satanás. Máisapaquenehevarepa ema Tata eta ecaratasiranuyarehi —máichavacapa.

Ema Pedro tépiyacavapa vahi máimati ema Jesús

(Mt 26.57-58, 69-75; Mr 14.53-54, 66-72; Jn 18.12-18, 25-27)

54 Tacahe, nacaratacapa ema Jesús. Námapa te mapena ema corregidor Caifás. Émasera ema Pedro máehiequenehavacapaipa.

55 Ánaqui te tajuhe te canchón, ticamururecanapa eta yucu násasiavayarehi. Téjamurihanapa te tachacaya eta yucu. Téjavarepa ema Pedro te namuri.

56 Sucahepaipahi esu sirvienta, suímahapa ema Pedro eta máejasirahi te tachacaya eta yucu. Suímararacarípahi. Tásiha, suíchapa:

—Eñi ñica achane éñirichu ñichamuri eñi Jesús.

57 Émasera ema Pedro tépiyacavapa vahi máimati. Máichapa:

—Pímaha, esena, vahi nímati núti ema píchaquenehi.

58 Te tiyererehachíhavare, máimarácaripavare ema apana. Máichapa:

—Píti pítirichu machamurivi ema maca.

Ema Pedro majicapavarepa:

—Vahi, tata. Vahi machamurinuina —máichapa.

⁵⁹ Te hórapapuca eta táetavisiravahi, máimahavarepa ema apana, máimatipa eta máechajirisirava ema Pedro. Máichapa:

—Yátupiquene pítirichu machamuri ema maena Jesús, taicha eti ecavasana te Galilea, tímaticarehi eta échajisira —máichapa.

⁶⁰ Ema Pedro majicapapa:

—Vahi nímati, tata, nájahapuca ema maena píchaquenehi —macahepa.

Tacahe, téchajiricavainirichaha ema Pedro, énevanepa téchajicanepa eta varayu.

⁶¹ Ema Viáquenu máesenicapa ema Pedro. Enévanerinehi téchava ema Pedro eta mametarapianahi ema Viáquenu eta máichirahi: “Te tamirahuinarichaha eta táechajisirayare eta varayu, píti mapaheyare pépiyacavayare vahi pímatinu”.

⁶² Tásiha, tiúchucavanepa ema Pedro. Tíyahapa taicha máimativanepa eta táichapevahi eta máejecapiravahi.

Nacaecahijiricapa ema Jesús

(Mt 26.67-68; Mr 14.65)

⁶³ Ema suntaruana tijaneacanahi ema Jesús, nacaecahijiricapa éma. Náehararacapa.

⁶⁴ Náitiuquichavare. Náehamirahavare. Tásiha, náichapa:

—Vímahasejicacha, te pijarauquipuca, pímatihaviyare nájahapuca ema téhamirahavíhi —nacahepa.

⁶⁵ Ichapemurivare eta napanararachirahi éma.

Nacatupihapa ema Jesús te namirahu ena aquenucana

(Mt 26.59-66; Mr 14.55-64; Jn 18.19-24)

⁶⁶ Te tijarahipa, ticurujicacanapa ena tuparairucana, énapa ena aquenucarahana, énapa ena escribánoana. Námapa ema Jesús, nacatupihapa te namirahu. Nayaserecapa:

⁶⁷ —Viyaserecaviyare. ¿Pítisaréji Cristo, ema vicuchapaquenehi? —náichapa.

Majicapapa ema Jesús:

—Tiuri, te numetacahe eta nútirahi, éti vahi esuapanuimahi.

⁶⁸ Téhevare nímechahepuca eta ícutiaraina eta nútirahi, éti váhivare esuapanuimahi. Énerichuvare váhivare ecaitanuimahi.

⁶⁹ Étainapasera nucaijuheyare te anuma nuti Manerejirunuhi ema Viya eta néjasirainapa te mavaure ema Tata, máitupajijihaquenehi éma —máichapa éma Jesús.

⁷⁰ Nayaserecavare namutu, náichapa:

—Tacahe píti, ¿pímijachavapuca machichavi ema Viya?

Ema majicapavacapa:

—Yátupi machichanu —máichapa.

⁷¹ Tacahe, éna nacahepa:

—Vaipa tácomesa vicayaserereruhini ena testígoana. Émaquenepa visamahi puiti eta juca máechajiriruvahi, étapa ticaviureya —nacahepa.

23

Námapa ema Jesús te mamirahu ema Pilato

(Mt 27.1-2, 11-14; Mr 15.1-5; Jn 18.28-38)

¹ Tacahe, téchepumurihanapa namutu. Námapa ema Jesús te mamirahu ema Pilato.

² Te nacaitecapa, náepiyaequenehapa éma. Ánipa nacahe:

—Viámaphahi ema maca achane ani te pímirahu. Mavarahahi mahapapisinahaviyare ena vichaneranahi. Énerichuvare macahehi váhiji táurica vivachachahini eta impuesto mayehe ema viyehe Presidente Emperador. Énerichuvare, macahevare eta émairahíji Cristo, ema réy-yarehíji —náichapa.

³ Tásiha, ema Pilato mayaserecapa ema Jesús:

—¿Yátupisareji réyvihí píti nayehe ena pijaneanana israelítana? —máichapa.

Ema Jesús majicapapa:

—Pitupiruvahi eta juca piyaseresiranuhi. Yátupihí eta nurreyvahi —máichapa ema Jesús.

⁴ Tacahe, ema Pilato máichavacapa ena tuparairucana énapa ena achaneana natiarihiqueaneanahi:

—Tájina maviurevaina eta nímairahi ema maca achane —máichavacapa.

⁵ Énasea nayurucapa muraca ema Pilato. Ánipa naicha:

—Ema maca, ichape eta mahapapisirahi eta napanereruana namutu ena achaneana vijaneanana israelítana, énaripa ena ticavasanahi te Galilea étapa ani te juca Jerusalén —náichapa.

Ema Jesús námavare te mamirahu ema Herodes

⁶ Eta masamiravacahi ema Pilato, macayasesererupa te étahipuca te Galilea macavasahi ema Jesús.

⁷ Te nametacapa eta étairahi macavasa ema Jesús, macavanairipipa ema Pilato nama mayehe ema Herodes, aquenucahi tayehe eta Galilea, taicha ema Herodes matiarihihitayehe eta Jerusalén eta jena sácheana páscuairahi.

⁸ Tacahe, tiúrisamuréinehi ema Herodes eta máimairahi ema Jesús. Ichapemurihi eta mavarairahi máimati taicha masamairiricahi tamutu eta tiáramicareana máichaqueneanapahi ema Jesús. Mavarahainehi tjahúchava máimahahini eta jácani tiáramicare.

⁹ Ichapemurihi eta mayaseseresirahi. Émasera ema Jesús, tájina vahi majicapahini.

¹⁰ Natiarihipahivare ena tuparairucana. Tétavicavahi eta nasemanevahi eta náepiyaequenehairapahi.

¹¹ Tásiha, ema Herodes énapa ena masuntarurana, ichaperinehi eta náepuruirahi. Tacahe, ema Herodes mavehapa eta mamuirihaini manaquiriaruvaipahi, táepahamequeneripahi eta tajanunmesirainihi. Mamuriachapa ema Jesús. Táicutiarahi eta nacaecahirahi éma. Tásiha, macavanairipivarepa ema Herodes náimichava te mamirahu ema Pilato.

¹² Ema Herodes émapa ema Pilato ticatianacacanainihi eta náitaresirahi. Étasera te jena sáchequenehi tichavapa eta náemunasiracacahi.

Ema Pilato macavanairipipa eta náetatasiraya ema Jesús

(Mt 27.15-26; Mr 15.6-15; Jn 18.39-19.16)

¹³ Tacahe, ema Pilato eta máimairahi náimichavirahi eta mayehe, macurujimurihapa ena tuparairucanahi énapa ena achaneana.

¹⁴ Tacahe, máichavacapa:

—Eta iámirapahi ema maca achane te numirahu, ímijachahi mahapapicavaca ena achaneana. Nútisera nímahahi tájina maviurevainahi eta nuyaseseresirahi te emirahu eta ímijachaquenehi eta máejeccapiravanahi.

¹⁵ Émaripa ema Herodes máimichavavare eta ani nuyehe taicha tájinavare máimahahini eta máejeccapiravainahini. Étainahipucaini taviuchahini táimicapacahini.

¹⁶ Tiúriserapuca nímivanereca macamecharahi, tásiha, nucaiticapa —máichavacapa.

¹⁷ Eta mayherepi ema Pilato te Páscuamuhuana te áñoana macaiticayarehi ema émana preso te jena sáchequenehi.

¹⁸ Tacahe, ena achaneana vahi návarahahini máuchucuhahini ema Jesús. Tipiaracanapa muraca. Ánipa nacahe:

—Vahi vávaraha máuchucuha ema maca. Émaina máuchucuha ema Barrabás —nacahepa.

¹⁹ Ema Barrabás te cárcel mávihahi. Táimicuñaruhi eta máichirahi eta revolución étapa eta macapahivahi.

²⁰ Émasera ema Pilato mavarahaichucha macaiticayarehi ema Jesús. Mayaseremurihavarepa.

²¹ Énasera muracapanapaichucha eta napiarasirahi:

—¡Pémetatareca te crusu! ¡Pémetatareca te crusu! —nacahepa.

²² Mapahequenepa eta mayaseresiravacahi éma:

—¿Tájasica eta maviurevahi ema maca? Núti tájina nímaha maviurevainahi táimicapacahini. Tiúriserapuca nímivanereca macamecharahi, tásiha, nucaiticapa —máichavacapa.

²³ Énasera tímítujiricacanapa eta napiarasiraina nayaseasiraina eta macaetatairaya te crusu.

²⁴ Jéhesaréinehi, ema Pilato masuapavacapa eta nayasearapihi ena tuparairucana.

²⁵ Émapa tiúchucuhahi ema Barrabás ema nayasesereruhi, táimicuñaruhi eta máichirahi eta revolución étapa eta macapahivahi. Macavanairipipa táitachava eta navarahaquenehi éna, eta nacapasiraya ema Jesús te crusu.

Náetatacapa ema Jesús te crusu

(Mt 27.32-44; Mr 15.21-32; Jn 19.17-27)

²⁶ Tacahe, námapa ema Jesús tayehe eta macaetataiyayarehi. Eta napaisirapahi te calle, nácapajicapa ema achane ticaijare Simón ticavasahi te Cirene. Éma, másihapahi te máesane. Napamicapa máevachacaya manaracuhayarehi eta macurusura ema Jesús, máehicapaipahi te máequene ema Jesús.

²⁷ Ichapemuriana ena achaneana téhicanapahi. Énaripa ena esenana, tipiararecanapaipa eta náiyairapahi taicha eta nacatisamurevahi, náimararasirahi eta máejapanuravapahi éma.

²⁸ Máesenimurihapa éma. Máichavacapa:

—Vahi ecuiyauchanu, eti esenana tachichanaveanahi eta Jerusalén. Étina íyauchava, náichavenénahi ena echichanaveana.

²⁹ Taicha tatiarihiyare eta sáchevayare nacapacayarevare ena. Ichape eta nacajapanuravairaya eta nacapasiraya. Tásiha ecahénapa: “Tétavicavapa náuriva ena esenana macheruana. Nájina náimipanererecahini”.

³⁰ Tásiha, ena achaneana, eta napisirayare, tijunanainapa te cérrona, tásiha, nacaheñapa: “Tiúripnanapucaini viyumurucavahini eta te juca cerro.” Ena apamuriana nacahenavarepapa: “Étapucaini te juca simena viyumurusiavahini”.

³¹ Apanasica núti ichapemuri eta nucatajivairahi, tájinahinéni taviuchanuhini. Navetiji-yarecha éta nátajivayare ena echichanaveana* —máichavacapa.

³² Énerichuvare natarihipahivare ena apinana tiámerahiana macutiqueneanayarehi ema Jesús eta macaetatairayare.

³³ Tacahe, nacaitecapapa tayehe eta masihi nacaetatairare ticajarehi Calavera. Náetatacapa te crusu ema Jesús, énapa ena apinana tiámerahiana. Ema émana nanacapa te mavaure, ema apana te sapa.

³⁴ Te náetatacapa ema Jesús, macahepa eta máechajiriruvahi:

—Tata, piperdonachavaca ena nani, taicha vahi nácacutiarahini eta juca náichiranuhi —macahepa.

Tacahe, ena suntaruana nasuerteachapa eta mamuirihaini eta nájarajirisiracacahi.

³⁵ Natarihihi ena achaneana tímararacanahi tamutu. Énaripa ena tuparairucana natarihihivare. Nacaecahijiricaripe éma. Ánipa nacahe:

—Ema mácacacha, macahehi eta máechajiriruvahi eta maratahairahíji macuchucuhavaca ena apamuriana achaneana. Tásiha puiti, vivaraha vímaha máimereuchava eta máitupajjiasiravahíji, te yátupihipuca Cristo éma, Manerejiruhíji ema Viya —nacahepa.

³⁶ Énerichuvare ena suntaruana nacaecahijiricahivare éma. Navarahapa náesichayarehi eta tasisiru vino.

³⁷ Náichapa éma:

—Te yátupinapuca piti reyvihi nayehe ena israelíta, pítijivaina picuchucuhava —náichapa.

³⁸ Tatiarihihivare eta ajureca nanacaquenehi te tachutisi eta macurusura. Eta juca ajureca tacajuquenehi te náechajiriruva te griego, te latín, téhapa hebreo. Ani tacahehi eta táechajiriruvahi: “Ema maca ema Rey nayehe ena israelítana”.

³⁹ Ema émana tiámerahi macaetataquenehi te machacaya, énerichuvare éma macaecahihi. Ani macahehi:

—Te yátupinapuca pítiquenehi Cristo, picuchucuhava pítijivaina. Tásiha, picuchucuhavivare víti apana —máichapa.

⁴⁰ Émasera ema apana macaetataquenehi macahepa:

—Váhipuca pipicahini píti ema Viya. Váhipuca péchahi étarichuhi viávacuha víti eta juca vícuñahi.

⁴¹ Víti, vivachachahi eta juca vitapiravahi taicha ichapequenehi eta véjecapiravanahi. Émasera ema maca Jesús, ticatajivahi tájinahinéni taviuchahini.

⁴² Tacahe, máichapa:

—Tata Jesús, péchanupaini te péjacapa tayehe eta piávacureya —máichapa.

⁴³ Ema Jesús majicapapa:

—Numetacavivane, puiti píti nucachaneviyare te paraíso —máichapa.

Eta máepenirahi ema Jesús

(Mt 27.45-56; Mr 15.33-41; Jn 19.28-30)

⁴⁴⁻⁴⁵ Tacahe, te las dócequenepa, témahapa eta sache. Timapicupa tamutu eta apaquehe. Mapana hora eta tamapicuirahi. Étarichuhi eta jena máepenirahi éma, tíjahúchavapa tétsayumeca eta tayehe cortina eta Templo. Ticutimecaca eta taetsayumesirahi.

⁴⁶ Ema Jesús tipiaracapa:

—Tata, pijacapinanu eta náchaneva —macahepa.

Te títapiricapa, tépenapa.

⁴⁷ Tacahe, ema nacapitara ena suntaruana romanoana, tipicarinehi eta máimairahi eta júca. Étapa macacutiarapa, macunachapa ema Jesús, ánipa macahe:

—Yátupiquenéichuyapa ema maca achane matapiravarehi —macahepa.

⁴⁸ Namutu ena achaneana natarihiqueneanahi, eta náimairahi eta júcana, ichaperinehi eta napisirahi. Téhatupachávanapápa eta nacatisamurévairahi.

* 23:31 Eta juca mayherepi proverbio ema Jesús te máechajiriruva, ani tacahe: “Te náichahi eta juca eta náimairahi eta yucuqui vérepacavacaichahahi, tétavicavahi eta navarairahi náquipaica te tájiquipa”. Tatiarihi eta tacayemaquenehi tayumurevahi.

⁴⁹ Énasera ena téhicanapahi emá Jesús te másihainapa te Galilea, énapa ena esenana, namutuhi nanecapararecahi eta juca táichavaquenevanahi. Nayererehihisera eta náimarasirahi.

*Nacucupaicapa te crusu emá Jesús, náecarapa
(Mt 27.57-61; Mr 15.42-47; Jn 19.38-42)*

⁵⁰⁻⁵¹ Matarihihivare emá achane ticaijare José. Ticavasahi te Arimatea te Judea. Tipicaurahihi éma. Tétavacavahivare eta máuriva. Masuapahi emá Jesús, eta émarahi emá Cristo mavaneruhi emá Viya, étaripa eta émarahi emá téchayarehi namutu ena achaneana. Emá maca José, náumurivahi ena aquenucarahana, váhisera mapauchavacahini ena machamurianahi tayehe eta juca náichaquenevanahi tauriquenevanahi.

⁵² Te cáperehichichapa, eta máimairahi máepenirapahi emá Jesús, tiyanapa mayehe emá Pilato, mayaseapanahi eta máquehe emá Jesús, mavarairahi máecarayare.

⁵³ Te tichavapa, macucupaicapa eta máquehe tayehe eta crusu. Máyuruacapa eta te sávana tijapu. Náiyaracuhapa tayehe eta máecari eta te mari nasecajueruhi. Nájinaiachaha nacaecarasihini tayehe.

⁵⁴ Titatajianapa taicha cáperehichichapahi. Taicha vahi táisapacarehini náecararecchini te yati, váhivare te tijarahiacaimahi taicha sávarumuhuyarepa.

⁵⁵ Ena esenana téhicanapahi emá Jesús te másihainapa te Galilea, tiyanapa tayehe eta máecari, náimatiyarehi eta mávihahi.

⁵⁶ Te náimatipa, tichavanapa te napena. Natsecapa eta perfume mayajihayarehi. Tinaranapasera te jena sáchequenehi, napicauchahi eta tapicauchacarevahi.

24

*Eta máechepusirahi emá Jesús te máecari
(Mt 28.1-10; Mr 16.1-8; Jn 20.1-10)*

¹ Te apanapa sache, te tijarahichichapa eta lumíncuquenehi, tiyananapa ena esenana tayehe eta máecari. Námapaipa eta perfumeana náicurevanahi, nacachanevacapaipa ena apamuriana esenana.

² Te títecapanapa tayehe eta ecari, náimaharinehi eta ticheyame mari tajihainihi eta ecari, téquehepuichavaipa.

³ Tisiapanapa éna, náejiacinehi eta máquehe emá Viáquenu Jesús. Májinaripahi.

⁴ Tiáramecanarinehi eta náejasirahi. Váipa náimatiequenehahini tájahahipuca eta máichararacavahi. Tásiha, tiáramicarepa náimahahi ena apinana ajairana titupihanahi te nachacaya. Tijanunucavacahi eta namuirihana.

⁵ Eta náramesirahi éna, tétipaimurihanapa. Énasera ena ajairana náimahaquenevanahi náichapa:

⁶⁻⁷ —Éti ímijachaipapuca manasihí tépenahi emá Jesucristo, Manerejiruhi emá Viya. Májinaripa, tichavaripahi títareca. Échavarichuhipuca eta macayemaquenevanahi te achane-richaha te manasiquenerichaha te Galilea. Macahehi eta máechajiriruvahi eta nacaratasirayarehi ena ticatianacanahi éma, náetatasirayarehiva te crusu. Téchepecuyarehisera te mapanaquénenapa sache —nacahepa ena ajairana.

⁸ Tacahe éna, enurujirinehi náechavane eta máechajiriruvanahi emá Jesús.

⁹⁻¹⁰ Te tichavanapa te napena, nametacapa ena óncequeneana apóstoleana, énapa ena apamuriana nachamurianahi. Te nataracu ena esenana tímahanahi ena ángeleana, sutiarihipahi esu María Magdalena, esu Juana, ésupa esu apanavare María, máenahi emá Jacobo.

¹¹ Énasera ena apóstoleana vahi nasuapahini, náimijachaichucha náepiyahiraivahi namaurishivahi ena esenana.

¹² Tiyanavanepasera emá Pedro tayehe eta ecari. Tijanapapapahi. Te títecapapa, máimahapa tacarinehi eta sávana. Mapanerequenehainehi eta juca táichararacavahi. Tacahe, tichavavarepa.

Tímerecavapa emá Jesús nayehe ena apinana máimitureana te táchehu ticaijuhe eta avasarechicha Emaús

(Mr 16.12-13)

¹³ Étarichu te jena sáchequenehi, tipicanapahi te achene ena apinana máimitureana emá Jesús. Násihahi éna te Jerusalén nacáijuheyarehi eta avasarechicha Emaús. Once kilometro eta tayerehivahi.

¹⁴ Eta napaisirapahi nacasamurepaipahi eta nasamairiruhi. Téchajiricavanapaipa.

¹⁵ Eta náechajisihairapahi eta juca táichararacavanahi, tiáramicarepa macapayamurihapa emá Jesús, macachanevacapaipa.

¹⁶ Énasera vahi náimatihini, taicha éma vahi másapahini náimati.

17 Tacahe, ema Jesús mayaserecavacapa:

—¿Tájahasica eta juca échajisihapahi eta epaisirapahi? ¿Tájaha eta tímipanererecahepahi? —máichavacapa.

18 Ema émana ticajirehi Cleofas majicapapa:

—Namutu ena achaneana náechahi eta juca táichararacavahi te Jerusalén puiti juca sácheanahi. ¿Picarichuhipuca píti vahi péchahini eta juca, eta piávihairahi te Jerusalén?

19 Éma máichavarepa:

—¿Tájahasica eta téchacarehi?

Éna náichapa:

—Émara véchajisihapahi eta máichavaquenévahi ema Jesús Nazareno, ema profeta máuriquenehini nayehe ena achaneana. Tamutuinihi tiuri eta náimiturapiana, tétávica-vahivare eta máitupajijiasiravahi taicha ema Viya, éma títaracahi tamutu.

20 Énase ena tuparairucana te viávasa, éna títararecanahi nayehe ena apavasanana taicha navarahahi náimicapaca. Tásiha, náetatacapa te crusu.

21 Víti ichapemuri eta vicasíñavairainihi eta mayehe. Vicuchapavainihi eta macatiuchi-rahaviyarehi vimutu viti israelítana. Tamapurujipasera puiti, taicha tépenapa éma. Puiti mapanaripa sache eta táetávisiravahi eta juca.

22 Icháquenesera te yáticarrahichichapa, ticaramecahavianapa ena esenana vichamur-rianahi eta nayatiruirahi tiyanana tayehe eta máecari.

23 Vaipa nachimapahini eta máquehe. Májinaipahi. Te tichavanapa, timetacahavianaipe eta náimairahi ena apinana ángeleana. Nametacavacapaji eta machaviraipahi títareca ema Jesús.

24 Tásiha, tiyanavaneanapa ena apamuriana vichamuriana tayehe eta ecarí. Jéhesa-réinehi májinaipa ema Jesús, étarichuhi eta nacayemaqueneanapahi ena esenana —náichapa.

25-26 Ema Jesús máichavacapa:

—Tétávica vapa tájinaira ácaucitiraquenéna eti páureana. Váhivarepuca ácaucitirahini eta náechajiriruvanahi ena profetanaini tayehe eta tacaheyarehi eta macatajivairayarehi ema Cristo eta máepeniranumaya, tásiha tichavayarehi títareca. Váhivarepuca ácaucitirahini eta tacaheyarehi eta mápanirayarehi tichava éma te mávasa anuma —máichavacapa.

27 Tásiha, mametacavacapasera tamutu eta táechajiriruvanahi eta Sagrada Escritura, eta táechajisihairahi éma. Tépanavapa tayehe eta májureanahi ema víyahaini Moisés; étpa eta apamuriana nájureanahi ena profetanaini.

28 Títecapananecha tayehe eta avasarechicha nacaijuhequenepahi. Mavarahapa ema Jesús majunijicavacayarehini.

29 Énase ena nacumpirachapa máehicavacahini te napena. Náichapa:

—Pácaherine eta ani viyehe, taicha yátinapa eta jena —náichapa.

Tásiha, ema Jesús manasipa tisiapapa eta nayehe.

30 Te tíuripa eta tinicacare, mavehapa eta pan, mahasulupayachapa ema Viya, mayuve-tucapa, máijaracavacapa éna.

31 Enévanerinehi náimativanepa éma. Émasera títahúchavapa témitiacahi te namirahu.

32 Tésenijiricacanapa éna. Tásiha, nacahepa:

—¿Tájaha tacayema eta vahi vímativanehini ichaquene te achene te ticapayacahavipa éma? Étpa eta vicachanerapahi, váhivare vímatiacavanehini, véjapusamurechapaipahinéni eta visamiravahi eta máimitusirahavipahi tayehe eta Sagrada Escritura —nacahepa.

33 Tacahe, enévanepa téquequecavanahi tichavana te Jerusalén. Te títecapanapa, tisiapanapa tayehe eta návihahi ena óncequeneana apóstoleana énapa ena apamuriana nachamuriana.

34 Ánaqui ticametacasianaripavare éna. Nacahevarepa ena apóstoleana:

—Yátupi eta máechepusiraipa ema Viáquenu. Máimaharipa ema Pedro —nacahepa.

35 Éna apinana najicapavarepa:

—Énerichuvare viti vímahaipavare éma, te achene eta vipaisirapahi. Váhiserá vímativa-nehini. Tapaenumava te mayuvetucapa eta pan, vímatipa éma —náichapa.

Tiápechavavare tímerecava ema Jesús nayehe ena máimitureana

(Mt 28.16-20; Mr 16.14-18; Jn 20.19-23)

36 Tacahe, téchajiricavanarichaha éna, títahúchavavarepa tímerecava ema Jesús te namuri. Máechajicavacapa, ánipa macahe:

—Íchararacava, nuchichanaveana.

37 Énase ena típcanarichucha, náimijachaichucha cunarehi éma.

38 Émasera ema Jesús máichavacapa:

—Vahi ecupicanu. Étumecha eta esamureana.

³⁹ Ímaha eta juca nuvahuana étapa eta nívapeana. Émamahacanu apaesa écha eta nútique-nérahí. Eta cunare, tájina táechena, tájinavare táperaina. Vahi tácutihini eta nucaqueherahí nútí —máichavacapa.

⁴⁰ Tacahe, eta máichiravacahí, ticajaruvauchavaipa eta mavahuana, étapa eta máívapeana.

⁴¹ Vuíchahasera nasuapahíní éna, tiúrisamureanaripahínéní eta náimairahí, tacachanehisera eta napisirahí. Eta tacahe, máichavarepa:

—¿Jararíhi nunica?

⁴² Éna náijaracapa eta nájimarú jima, étasipa vasu eta mápama.

⁴³ Majacapavacapa éma, tinicapa te namirahu éna.

⁴⁴ Tásiha, máechajiricavacapa:

—Eta juca níchavaquenevahí, étara eta numetaruhehí cape juca nucachanejiricahéichahahí. Eta tacaheyarehí eta táitauchiravayarehí eta májuchaqueneanahí ema víyarahainí Moisés nútí táechajisíhaquenehí. Étapa eta nájuchaqueneanahí vare ena profetanainí, étapa eta Salmo.

⁴⁵ Máemechavacaipahí eta táechajiriruvana eta Sagrada Escritura.

⁴⁶ Tásiha, máichavarepa:

—Étara eta juca tacajuqueneanahí eta népenirayarehí nuti Cristo. Néchepucayarehisera tayehe eta nécarí te mapanaquenepa sache.

⁴⁷ Étararéichuhí vare íámapicayare eta níjare eta ímituresiraya ena achaneana ticavasanahí te tamutu avasareana. Étaripa te juca Jerusalén, emetacavacayare ena achaneana eta náeneuchiravaina apaesa macaepaha ema Viya eta napecaturana.

⁴⁸ Éti, nutupararuheya eta ímituresiraya eta júcana.

⁴⁹ Enasiyarechahasera ani te juca Jerusalén. Tiámainucava te máitecapauchavevacapa ema Espíritu Santo nuvaneruyare, máijjarunuyarehí ema Tata. Éma, tíjaraheyare eta ítupajijiasiravanayare —máichapa.

Eta mayapirahí ema Jesús te anuma

(Mr 16.19-20)

⁵⁰ Te títapiricapa eta máimitusiravacahí, mámamuríhapa te tachachacu eta avasare Jerusalén, te tachacayahí eta avasarechicha Betania. Macanuquechapa eta mavahuana, mayujarauchavacapa éna.

⁵¹ Te títapiricapa eta mayujarauchiravacahí, tímutserahavapaipa ticanuquechavapaipa eta mayapirahí te anuma.

⁵² Eta náimairahí éna eta macanuquechiravapaipahí, tépuyumurihanapa eta nanecaparesirahí eta mayanirahí. Tásiha, tichavanapa tayehe eta Jerusalén. Tiúrisamureanapaipa.

⁵³ Tájina vahi náéjiacavahini tayehe eta Templo. Tiyujarauchavanaparacahí eta nacuna-chirahí ema Viya.

Tamutupa eta juca numetasiravíhi puiti.

Emá Apóstole Juan májuequenehahi eta máichararacavahi emá Jesucristo, ticajare puiti eta **EVANGELIO SEGÚN SAN JUAN**

¹ Eta acane, te táepaniravahi tamutu, matiarhiqueneípahi emá Jesucristo, emá Tímimatirahi me Viya*. Éma, macachanehi emá Maiya eta máítaresirahi, Víyahivare éma apanavare.

² Ena apinana, nacuticacahi eta napanereruana.

³ Eta táepaniravahi eta acane, émaríhi emá Cristo ticaemataneacahi tamutu eta tatiarihiqueneanahi puiti, máítauchirahi eta mapanereruanahi emá Maiya. Tájina máejequeruinahini, nájinavare apanainahini náepiyacahini eta tatiarihiqueneana.

⁴ Émarichuvare ticaitarechavihi viti achaneana. Émarichuvare tinacapa te viáchanevana eta tamícahu eta vítaresirahi.

⁵ Éma tímíyanava tímícauchahavi taicha mavaraha máimijunijisinahaviyare eta tamapícu te viáchanevana. Nararihísera ena vahi náuricahini eta mamícauchinavaca. Navaraha nacaemaha eta mamícauchiravacahi.

⁶ Tacahe, te máimahapa tíuri, emá Jesucristo tíucupaicapa te juca apaquehe. Tiáchanchavapa. Yátupíquenehi achane, macaechehi eta veche viti achaneana. Ticasíríquiuhavíhi te jena áñoanahi majurusirahi. Matiaríhivare emá apana achane ticajarehi Juan Tícachasíricarahi. Tacahe, emá Viya, te máimahapa tíuri, ticavanahípa emá Juan.

⁷ Máinapumírauchayarehi eta macametarairuyare eta máimeresiravaya emá Cristo, emá namicahuyare nácani ticasíñavanayare mayehe. Ehanechavapa. Yátupíquenehi achane, macaechehi eta veche viti achaneana. Tícamá Juan mametacayarehi ena achaneana natsecava eta najacapíraya emá Cristo.

⁸ Emá Juan, vahi émainahini tímícauchamurímahi ena achaneana. Émahísera ticametarairurahiarehi eta máucupáísirapa emá tíamahavíhi eta yátupíqueneana mapanereruanahi emá Viya.

⁹ Éma maca máechajísíhaquene emá Juan, éma yátupíquenehi eta mamícauchirahavíyarehi vimutu viti achaneana, taicha tímíeche viti achaneana. Ticatucahavi eta mapanereruana emá Viya.

¹⁰⁻¹¹ Emá Jesucristo, émahí acane tépiyacahí tamutu eta apaquehe, énapa ena viáchucaneveanani. Púiticha éma téchahaví vimutu. Téhesera te tíucupaicapa éma, namamatiquenehi ena achaneana Víáquenuírahí éma, váhivare navarahahíni najacapahíni éma.

¹² Natiarihísera ena tinerejicavanahi tíjacapanahi, téhicanahi éma. Ena nani, ichaperínehi eta macunachíravacahí táichavene eta nacasíñairavahí mayehe. Éna, yátupíquenerípa machichanaveanahi emá Viya.

¹³ Eta macachíchírahavíhi emá Viya víti, émahí emá Viya tinerejicahaví táichavene eta vicasíñairavahí mayehe. Vahí étaparacainahípucainí eta náehísírahíhípucainí ena ticachíchahavíana. Váhivare étaparacainahípucainí vívarahahípucainí íchape víti. Váhivare étaparacainahípucainí íchapenahípucainí eta mavarairahíni mácani apana achane.

¹⁴⁻¹⁷ Vítí véhicanahi emá Jesús eta matiaríhírahí te juca apaquehe, yátupí eta vímatirahí éma. Vímahahí te víúquihana. Vímatíavarepa eta másíhairahí te anuma, eta émaríahi emá macaríchuquenehi Machícha emá Viya. Yátupíhivare eta víyairahí éma, macutíhi emá Maiya. Éma, tímímatirahí me Viya, taicha éma máímerecáhi eta máétavíuchírahí eta máemunasírahavíhi, máíméchírahavíhivare eta yátupíqueneana mapanereruana emá Maiya. Emá víyaraháini Moisés ticatuparahí me Viya eta máímitusírahavíhi vítí achaneana eta vanáírípiana. Émasera emá Jesucristo ticatuparahí me Maiya eta máímitusírahavíhi eta máemunasírahavíhi, étapa eta máéchajírírúvana yátupíqueneana emá Viya. Emá Cristo, tétavícvahí eta máúríva eta víyehé vimutu. Eta majaneasírahavípahí, tíjaracahavíhi eta vítumevahí te tamutu sácheana. Émarípa emá Juan, aní macahehí eta máechajísíhírahí emá Jesús: “Émara emá maca emá néchajísíhaquenehí eta eyehé cape juca. Yátupí nútí nínapucahí eta núchusírahí, émasera matiaríhíqueneípahí eta acane, májínanuíchahahí nútí. Eta tacahe, típicachacarepanahí eta nuyehé” macahepa.

* **1:1** Emá Apóstole Juan, te májuchapa eta juca líbro, manacahí amairíha te letra gríega λογος (eta táechajícúirava: “logos”). Eta tacayemaquene te véchajírírúpa: “Tímímatirahí me Viya”. Étaríchueche vítí achaneana. Ticavare tacahe eta táechajísíhaquene eta apamuríana líbroana te castellanorupí, aní tacahehí: “la Palabra” étapa “el Verbo”.

¹⁸ Yátupiquene nájina náimatihini eta máimahi ema Viya. Émasera ema macarichuquene Machicha, tímimatichahavihi eta máuriva ema Maiya taicha étaquenehi másiha te masamure ema Maiya.

Emá Juan Tícachasiricarahi timetacavacahi ena achaneana tayehe eta máimeresiravayarehi ema Jesucristo

(Mt 3.11-12; Mr 1.7-8; Lc 3.15-17)

¹⁹ Tacahe, te jena sácheana, ena tuparairucanahi ticavasanahi te Jerusalén navanecapa ena náevanachana†, nayanaucha ema Juan Ticachasiricarahi. Éna, nayaserecapa, ánipa nacahe:

—Tamutu arairuhi eta pímiturapiana. ¿Pítinaripe ema Cristo vicuchapaquenehi? —nacahepa.

²⁰ Matupiruvapa eta majicapiravacahi. Ánipa macahe:

—Núti mavanerunuhi ema Viya. Váhisera nútina ema ecuchapaquenehi ema ticajare Cristo —macahepa.

²¹ Tacahe, nápechavarepa nayasereca:

—¿Nájahavisica píti? ¿Pítipuca picajare Profeta Elías? ¿Pichavahi eta te juca apaquehe? —náichapa.

Émasera majicapavarepa:

—Vahi nútina.

Tásiha, nápechavarepa nayasereca:

—¿Nájahavisica píti? ¿Pítipapuca ema apana profeta vicuchapaquenehi? —náichapa.

Émasera majicapavarepa:

—Vahi nútina.

²² Tacahe, náichavarepa:

—¿Nájahaviquenesica píti? Pimetacahavichucha te nájahavipuca píti. Vivaraha véchayare, apaesa vimetacavaca ena tivanecahavianahi —náichapa.

²³ Tacahe, ema Juan majicapavarepa:

—Nútichucha máechajisiquenehi te ajureca ema víyarahaini profeta Isaías. Núti nucame-tarairuhi nayehe ena achaneana vámahicurúhana. Níchuhavacahi éna apaesa natsecava eta jácani máitecapiraya ema Viáquenu —macahepa.

²⁴ Natiarihihivare ena navaneruanahi ena fariséoana.

²⁵ Nayaserecavarepa éna apanava:

—¿Tájahasica tacayemahi eta picachasirisirahi ena vijaneanana, te váhipuca pítinahíni ema Cristo, váhivare pítinahíni ema profeta Elías, váhivare pítinahíni ema apana profeta vicuchapaquenehi? Ena vijaneanana vahi tácamunuhini nacaicachasihini. Énasepa ena apavasanana, jéhesare tacamunu eta nácaicachasivaca —nacahepa.

²⁶ Tacahe, éma majicapavacapa:

—Tiuri, núti yátupi níchachasivacahi te une ena achaneana, apaesa natsecava eta jácani máitecapiraya ema vicuchapaquenehi. Matiarhipasera puiti te vitaracu. Étisera vahi ímatihini éma.

²⁷ Tímerecavavanénapa. Ticunachacarepanayaresera eta nuyehe. Váiparinehi nácutisamimahi eta máitupajijiasiravahi. Váiparinehivare nácaemuñavaimahi macamusuranuhini núti páuresami —máichavacapa éna ema Juan.

²⁸ Eta mávihahi ema Juan máicachasirisinehi ticajare Betábara, te apachara eta cajacure ticajare Jordán, tinapaicahi te táachusine eta sache. Eta nayaseresinepanahi ena vanairucanahi.

Emá Juan máimicacheracha ema Jesús eta émairahi ema Cordero, vanairucahi me Viya

²⁹ Te apanapa sache, máimahapa ema Juan eta mapauchirapaipahi ema Jesús. Tacahe, máichavacapa éna achaneana:

—Ímaha, márajapa ema Cordero, matapiravarequene éma, vanairucahi me Viya. Éma, támicaparuyare eta macaepahairayare eta vipecaturana viti achaneana te juca apaquehe.

³⁰ Émara ema maca ema néchajisiquenehi eta eyehe cape juca. Núti nínapucahi mayehe éma, émasera matiarihiquenéipahi eta acane, májinanuichahahi núti. Eta tacahe, típicauchacarepanahi eta nuyehe.

³¹ Nútiripa néchajisihahi éma, vuíchahasera númatihini. Numetacahehisera eti nujaneanana israelítana eta ecaicachasiraina apaesa etsecavahi eta ejacapuraina éma te jácani máimerecavapa.

† 1:19 Ena nani vanairucana, nararihihi ena tiyujarahiana te Templo, énapa ena téchapajirahiana eta tayereruvana eta Templo te Jerusalén.

³² Tacahe, cape sache, títicapauhanupa ema Jesús, mavarairahi níchasicayare éma. Tásiha, te viúcupaicapa te une, nímahapa ema Espíritu Santo eta máucupaisirahi te anuma, ticutiparine eta paloma. Masiapahacapa ema Jesús.

³³ Tacahe, te nímahapa, nupaenumavapa nímati éma eta émairahi ema vicuchapaquenehi Cristo, taicha ema Viya títitucanupa eta máicutiarayare. Ani macahehi: “Te pímaha ema Espíritu Santo máucupaucha te mápusi mácani achane, pímatiya eta émairahi ema Nuchicha nuvaneruhi. Éma, tjaracahevacayare ema Espíritu Santo, tisiapahacahevacinapa éti achaneana. Nuchaneraheinapa éti” máichanupa ema Viya.

³⁴ Tásiha puiti, nímatisa éma. Táitusiava numetacahe puiti eta émairahi ema Cristo, Machicha ema Viya —máichavacapa ema Juan.

Ena náinapuiruana máichuhaqueneana ema Jesús ena máimitureanaya

³⁵ Tacahe, te apanavarepa sache, ema Juan matiarihihi tayehe eta mávirareasahi, vítipa viti apinahavi máimitureanahi.

³⁶ Tásiha, máimahapa ema Jesús tiánucuhapaipahi. Tacahe, ema Juan máichahavipa:

—Ímaha. Ema maena Jesús, émahí ema Cordero matapiravarequene, vanairucahi me Viya —macahepa.

³⁷ Tacahe, eta vímairahi viti apinahavi máimitureana ema Juan, viyanapa véhicahi ema Jesús.

³⁸ Tásiha, ema Jesús téseniequenehavapa. Máimahapa eta véhisirapahi. Tiyaserecavipa: —¿Tájaha ecamunu nuyehé? —máichahavipa.

Víti vijicapapa:

—Tata maestro, ¿távihapuca eta pítecapirare?

³⁹ Ema Jesús tijicapahavipa:

—Yare, ímaha apaesa ímativa.

Tacahe, viyaninapa vímatipa eta mávirarehi. Vítaipahi eta jena sache eta viávihairahi eta mayehe, taicha las cuátroripahi sache te vítecapapa ánaqui.

⁴⁰⁻⁴¹ Andrés máijare éma nuchamuri téhicapahi ema Jesús. Tacahe, eta máurisamurevahi ema Andrés, tiyanavanepa matanucahi ema maparape Simón Pedro. Te máichimavapa, máichapa:

—Vímaharipa ema vicuchapaquene Mesías ema Cristo —macahepa.

⁴² Tacahe, ema Andrés tichavapa mámapa ema maparape Simón eta te mávihahi ema Jesús. Te náitecapauchapa, ema Jesús máesenicapa ema Simón. Tásiha, máichapa:

—Píti Simón, machichavihi ema Jonás. Nútisera núsivachaya eta píjare. Núti níjarechaviya Pedro, táichavenehi eta pétaviuchirayare eta pítureva —máichapa ema Jesús.

Ema Jesús máichuhapa ema Felipe émapa ema Natanael

⁴³ Te apanapa sache, ema Jesús mavarahapa tiyanayarehi te tinapaica eta Galilea. Tásiha, macainunapa ema Felipe. Tásiha, máichapa:

—Yare, péhicanu.

⁴⁴ Eta mávasahi ema Felipe eta te avasare ticaijare Betsaida, étarichuvare mávasahi ema Andrés émapa ema Pedro.

⁴⁵ Tacahe, ema Felipe tiyanavarepa, matanucahi ema Natanael. Te máetupiacapa, máichapa:

—Vímaharipa ema achane máechajisihaquenehi te libro májuchaquenehi ema víyarahaini Moisés, émarichuvare éma táechajisihaquenehi eta libro nájureanahi ena profetanaini. Ema ticaijarehi Jesús, machicha ema José. Ticavasahi te Nazaret —macahepa.

⁴⁶ Tásiha, ema Natanael majicapapa:

—Váiparinehi étainahini máuchusinehini ema achane tiuri tayehe eta avasare Nazaret —macahepa.

Tásiha, ema Felipe máichavarepa:

—Viyana, apaesa pímati —máichapa.

⁴⁷ Tacahe, te náitecapauchapa, ema Jesús máimararacaripa ema Natanael. Tásiha, macahepa:

—Nímativi eta pipanereru. Píti yátupiquenevi israelíta. Tétavicavahi táurivahi eta pítere-sirahi. Vahi pítuca pivayuareca —máichapa.

⁴⁸ Tásiha, ema Natanael majicapapa:

—¿Távihá pímatinenuhi?

Ema Jesús máichapa:

—Núti nímativipahi te vuíchaha máetupiacavihiní ema Felipe eta máichuiraviyarehi, te piáviharipa te tápecu eta yucuqui higo.

⁴⁹ Tacahe, ema Natanael masuapavanepa ema Jesús. Máichapa:

—Tata Maestro, pítiripa piti yátupiquene Machicha ema Viya. Píti yátupiquenévivare Reyvihu viyehe viti israelítana. Núti njaracavapa néhicaviya —máichapa.

⁵⁰ Ema Jesús majicapapa:

—Étachucha eta juca níchiravihi eta nímairavihi te tápecu eta yucuqui, pipatsicavapa pjaracava péhicanuya. Vahi tácarichu eta juca. Pímahayareva eta apana tiáramicareanapana tayehe eta juca.

⁵¹ Tásiha, ema Jesús máichahavipa vimutu:

—Éti ímahayare eta anuma téjiacayare, énapa ena ángeleana tiúcupauchanuanayare núti Manerejirunuhi ema Viya —máichahavipa.

2

Natiarihi ena araimanayarehi eta te avasare Caná

¹ Te mapanaquenepa sache eta táetavisiravahi, natiarihi ena araimanahi eta te avasare Caná te tinapaica eta Galilea.

² Tásiha, esu maena ema Jesús, ánaqui suávinehi taicha sucaichuhasiquenehi ésu. Énerichuvare ticaichuhasihivare ema Jesús, vítipa viti máimitureana.

³ Tacahe, ema arayanahi tacaimamarapa téchuriacapa eta máeresahi vino. Esu maena ema Jesús suíchapa ena suchicha:

—Téchuriacanapa eta náeresahi.

⁴ Tásiha, ema Jesús majicapapa:

—Picatajicanu, mémechicha. Vuíchaha picucamesanu. Nímahaine núti te táuripa. Nútipa néchinava —máichapa.

⁵ Tásiha, suíchavacapa ena tésiricanahi:

—Tiuri, ñímaháinepa éñi. Esuapayare éti eta ñivanairipiana —suíchapa.

⁶ Tacahe, tatiarihihi eta sáisihi ichapehiana tinajana, márihiana. Nayupisareana ena israelítana tayehe eta nayeherepiana. Eta táichapehivavacahi eta tinajana, cíncohi lata eta tacavacu.

⁷ Tacahe, ema Jesús mavanecavacapa ena tésiricanahi:

—Eyana eyereca eta une. Ínicachayare eta juca tinajana —máichapa.

Tacahe, náinicacajicavacapa éna eta tinajana.

⁸ Tásiha, ema Jesús mavanecavacapa:

—Tiuri puíti, eveha ániamaína, eyana íjaraca ema téchapajirica eta juca piesta —máichavacapa.

Tacahe, tiyananapa éna, náijarapanahi.

⁹ Mavehapa masamaecapa eta une, vínoripahi éta. Váhisera máechahini éma távihahipuca tásihahi éta. Nacarichu ena tésiricanahi náechahi eta únerahi.

¹⁰ Tacahe, ema téchapajiricahi eta piesta máichuhapa ena arayanahi. Máichapa:

—Namutu ena achaneana te térana, tativa naera eta tiúriamapana vino. Tapaenumava te ticavahahasianapa, náerapa eta vino váhipanaichu táuriamahini. Pítisera, apana eta pipanereruhi. Tiúrihi eta vino pjararuhavihi tativa. Puítisera eta juca vino, tétavicavahi eta táuriamavahi. Tacachuricarinehi tamutu —máichapa.

¹¹ Eta juca táinapuiruhi tiáramicare máimerecahi ema Jesús, tayehe eta avasare Caná. Ichaperinehi eta viáramirahi viti vinecapanahi eta juca máimeresirahi eta máitupajijiasiravahi. Tacahe, ichaperinehi eta visuapirahi viti máimitureanahi.

¹² Te táequenepa eta juca, viyanavarepa te apana avasare ticajjar Capernaum. Vimutupaipa, esu maena, ena maparapenaveana, vítipa viti máimitureana. Vinasipa jácani sácheana eta ánaqui. Vipaenumava viyanaya te Jerusalén.

Ema Jesús macuchuchujicavacapa ena tjararecanahi eta sárareana, cáyureana te tajuhe eta Templo

(Mt 21.12-13; Mr 11.15-18; Lc 19.45-46)

¹³ Tacahe, eta jena sácheanahi, tiánehiripa eta Pascua, pipiestarahi viti israelítana. Ema Jesús tiyanapa tayehe eta avasare Jerusalén, vítipa viti máimitureana.

¹⁴ Te vítecapapa, viyanapa visiapahi tayehe eta Templo. Máimahainehi ema Jesús ena títisiperecarahiana eta plata, énapa ena tjararecanahi eta vuíyeana, eta uvesana, étapa eta palómana.

¹⁵ Eta máimairahi éna, máepiyacapa eta machicute. Máquijimuríhapa eta naplataneana te apaquehe. Máequehepuichavacapa eta namesarana. Macuchuchujicavacapa namutu, étapa eta sárareana nájarareruanahi.

¹⁶ Tásiha, máichavacapa ena tjararecanahi eta paloma:

—¡Ecuchuca eta júcana eta te juca mapenahi ema Tata! ¡Vahi étaina ícuchina éti íjararecana eta tájiparacana! —máichavacapa.

¹⁷ Tacahe, viti máimitureana, eta vímairahi eta juca, enevanerine véchava eta táechajiriruva eta Salmo tayehe eta tamuracavahi eta máichararacavahi ema víyarahaini David táichavenehi eta máetaviuchirahi eta máimipicauchirahi eta, mapena ema Viya.

¹⁸ Jéhesare, enurujipa títecapanapa eta tuparairucana. Nayaserecapa éma:

—¿Tájaha tacayema eta picuchusiravaca ena vichamuriana? Pímijachavahipuca vanairucavi me Viya. ¡Pímechahavi eta tíaramicare te yátupihipuca pivanahi eta juca! —náichapa.

¹⁹ Ema Jesús majicapavacapa:

—Te íaquipaicayarepuca éti eta juca templo, nútisera nucaechepuca te mapanaquenéna sache —máichapa.

²⁰ Ena tuparairucana najicapavarepa:

—Cuarenta y seis año eta tayerevahi eta náepiyaresirahi eta Templo. ¡Tétavicavahi eta pisiñavavaisirahi picaemuñavayarehi picaechepucayare te mapanaquenéna sache! —nacahepa.

²¹ Eta máichiravacahi ema Jesús, máechajisihahi éma eta táechepusirayare eta máquehe.

²² Eta tacahe, te tiyerehi, te táequenepa eta máechepusirapa ema Jesús te máecari, véchavahi viti máimitureana eta juca mametarapihi tayehe eta máechepusirayarehi. Eta tacahe, visuaparinehi eta táechajisihairahi eta Sagrada Escritura eta mayehe.

Ema Jesús máimati eta napanereruana ena achaneana

²³ Eta manasiraichahahi ema Jesús te Jerusalén, te Páscuamuhu, camurihi eta tíaramicareana máichaqueneanahi. Camurianahivare ena achaneana tímahanahi. Tásiha, nasuapahi eta émairahi ema Cristo nacuchapaquenehi.

²⁴ Émasera vahi macasiñavahini eta nayehe taicha máimativacahi éna, vuíchaha yátupinahini eta náehisirahi éna.

²⁵ Taicha éma, tétavicavahi eta máitupajijiasiravahi, máimatirahi tamutu eta napanereruana ena achaneana te amahe eta nasamureana.

3

Ema Nicodemo máejirapana ema Jesús

¹ Matiarahi ema achane téhicarairicahi ena fariséoana. Ticaijare Nicodemo. Ema maca achane, tétavicavahi eta macunachacarevahi taicha máestrohi éma.

² Tacahe, eta jena yátiquenehi, ema Nicodemo tiyanapa mapaiquichapanapahi ema Jesús. Tacahe, eta náechajirisiravahi, macahepa ema Nicodemo:

—Tata maestro, véchahi eta vanairucavihi me Viya eta juca pítesirahi pímitusirahavipanahi. Taicha nájina apanaina achane títuruequenehaimahi eta juca tíaramicareana píchaqueneanahi píti —macahepa.

³ Ema Jesús majicapapa:

—Puiti numetacavi eta juca yátupiqueneana: Nácani navarahaya títujicavana tisiapana tayehe eta mávasa ema Viya, tacamunuhi náitsivachayare eta náitaresira. Te vahi yátupina eta nájarasiravaina eta máitsivachiravaca ema Espíritu Santo, vahi títujicavanaimahi tisiapana eta te mávasa ema Viya. Tímicutijiricavayarehi tíapechavanayarehi tíuchucana —máichapa.

⁴ Tacahe, ema Nicodemo vahi mácaicutiarahini eta máichirahi ema Jesús. Váhisera macuchapaimahi eta máitametasirahi ema Jesús. Ánipa macahe:

—Váiparinehi vichavaimahi eta amúyahavinahini viti ichasiana, vichavahivarepucaini visiapahini te sujuhe esu ticachichahavi —macahepa.

⁵⁻⁶ Majicapavare ema Jesús:

—Pisamanuchaha. Te tíuchuca eta amuya te sujuhe esu taena, tímaticarehi eta machichairahi ema suima. Tacutiquenehi, nácani mávaháruana ema Espíritu Santo, tíapechavanayare tépanava eta náitaresiranayare, taicha machicharipahi. Nutupiruva numetacavi: Nacarichu ena machichanaveana ema Espíritu Santo tisiapana eta mávasa ema Viya. Te tacuija eta machichairahéna éti, tájina vahi ítujicavaimahi esiapa.

⁷ Vahi picurami eta juca níchiravihi: Táitaurevaquene ticachichaheyarehi ema Espíritu Santo.

⁸ Eta juca tímicutijiricavahi eta técatícava, tacarichu visama eta tacaemaira. Váhisera tácaecherahini. Ene nacahehi ena mávaháruanaípa ema Espíritu Santo. Nanasirichu eta náimahi. Ticaitsvaipasera eta náitaresira —máichapa ema Jesús.

⁹ Tásiha, ema Nicodemo mápechavarepa mayasereca:

—¿Tájahasica tacayema eta juca?

¹⁰ Ema Jesús máichavarepa:

—Tétavicavahi eta picunachacareva píti, taicha tiúrihi eta pímitusiravacahi ena vijaneanana. Tasapihaseva vahi pímatiequenehahini eta júcana.

¹¹ Pisamanuchaha. Yátupiquene eta numétasirávihí. Tatupiruvahi eta néchajisihahi eta táichararacavanahi te anuma taicha nímahaipa. Étiseva vahi esuapanuimahi eta numetasi-rahehi eta nímahaqueneanahi.

¹² Te cape juca sácheana, nímicutichinahehi eta táichararacavanahi te juca apaquehe tayehe eta táichararacavanahi te anuma. Étiseva vahi esuapanuhini. Tavetijipa eta emasua-piranuya te nutupiruvahi numetacahe eta táichararacavanahi te anuma.

¹³ Nuti Manerejirunuhi ema Viya, nucavasahi núti te anuma. Tásiha, núcupaicahi eta numetasi-raheya. Nájina apanainahini mácani mametacahehíni eta táichararacavanahi te anuquehe, taicha nájina nayanahini nápanahini te anuma, eta jácani náimatihini.

¹⁴ Acane, eta napaisira ena víachucanaveanaini eta te mávapai apaquehe, táechucapahi eta quichareana ena masuapajirairahanapahi mayehe ema Viya. Tacahe, ema víyarahaini Moisés máepiyacahi eta metal eta táimahi eta quichare. Manacahi te anuquehe eta te yucuqui. Tásiha, ena achaneana táechureana eta quichare, te náesenica eta quichare máepiyaru ema Moisés, tinaracanapahi, vahi náepenapahíni.

¹⁵ Ene nucaheyare núti apana, tinacuanayareva te anuquehe. Eta níchararacavayare apaesa nucuchucuhapahi namutu ena nácani ticasifñanuanayarepahi. Tásiha, máichecuar-quirenapa eta náitaresirayare. Tájina ticamítiequenehavacaimahi.

Emá Viya, tétavicavahi eta máemunasirahavíhi

¹⁶ Taicha ema Viya, tétavicavahi eta máemunasirahaví viti achaneana te juca apaquehe. Eta máemunasirahaví, máijaracahi ema macarichuquenehi Machicha eta máucupaisirahi eta aní viyehé. Mavarahapa tjaracahavíya máichecuarquirénapa eta vítaresiraya vimutu viti vicasifñanahi éma. Tájina ticamítiequenehavimahi.

¹⁷ Taicha ema Viya, vahi tácahehíni eta mapanereruhi eta máucupaisirahi ema Machicha máicuñacahavíhíni viti achaneana. Étaseva eta tímitecahi éma, ticuchucuhahavíyare vimutu.

¹⁸⁻¹⁹ Taicha nácani ticasifñanayare ema Machicha ema Viya, vahi taicauñanaimahi. Nácaniseva vahi nácasifñahíni éma táimicuñacavacayarehi eta navíurevanahi éna. Taicha vahi náuricahíni eta tamícauchiravacahi eta majaraíva ema Cristo táucupairuhi te juca apaquehe. Étachucha náurica eta tímápicu taicha vahi návarahahíni tácaecherahíni eta náichirahi eta támaraíqueneana.

²⁰ Taicha nácani tíchanahi eta támaraíqueneana, nacatícha eta majaraíva ema Viya. Váiparinehi napauchaimahi, namavarairahi tacaecherahíni eta náichirahi eta támaraíqueneana.

²¹ Énaseva ena tisuapanahi yátupi eta máechajiriruva ema Viya, náuricayarehi napaucha eta majaraíva. Jéhesare ticaecheranasarepa eta machaneranaripahi ema Viya.

Emá Juan Tícachasiricarahí tíápechavavare máechajisihahi ema Jesús

²² Te táequeneva eta juca, tiyanavarepa ema Jesús, tayehe eta avasarechichana te táunava eta provincia Judea. Véhicahi viti máimitureana. Vinasipa jácani sácheana eta ánaqui. Viti máimitureana vícachasiricarípa ena achaneana tivarahanahi náehicaya ema Jesús.

²³ Tásiha, ema Juan tícachasiricahivare te jena Enón tachacayahi eta Salim, taicha ánaqui tatiarihíhi eta une. Ena achaneana napauchahi éma. Jéhesare máicachasivacapaipahi ena tivarahanahi náinajicayare eta napecaturana.

²⁴ (Eta juca máichahi ema Juan tamirahupaichaha eta jena sache eta náeratasirayarehi éma.)

²⁵ Tacahe, te jena sácheana, ena religiósana tiyananapa náimiyusemacavacapa ena máimitureana ema Juan, nametacahi eta vicachurisiravacahi viti máimitureana ema Jesús taicha tíapajumuriavanapanahi ena vícachasiruanahi.

²⁶ Tacahe, eta nasemirahi ena máimitureana ema Juan, tiyananapa nametapanahi éma. Náichapa éma:

—Tata maestro, pímahaini ema maena péchajiriruhi cape te tachausi eta juca cajacure Jordán. Ema Jesús pímaharecha Cristo, tícachasiricahi puiti éma. Jéhesare, namutuyarehíni náehica éma —náichapa.

²⁷ Tásiha, ema Juan majicapavacapa:

—Vahi ecueñamava. Ema Viya, éma téchahi eta máijarasirahi eta máitucaquenehi nácani manerejiruana. Németeaca tjaracahi ema Viya eta máitupajjiasirava ema maca Jesús.

²⁸ Éti échavahi eta numetasi-rahehi eta vahi nútinahíni ema Cristo. Yátupiseva nucavanahíni eta nínapumirauchirayarepahi éma, numetacavaca ena achaneana natsecavahi.

²⁹ Núti nímicutijirisinahe: Te natiarihi ena araimanahi, namutu ena nacaichuhasiqueneana tiúrisamureanahi eta náimairahi ena araimana. Nacunachahi ema arayena. Ene nucaherihi núti eta núrísamurevahi eta nímairahi puiti eta nacunachirahi ema Jesús.

³⁰ Éma, te jácani mapaisihayarepahi, tiápajucavayarepaipa eta macunachacarevaya. Éma, mapaenumavapa tépanava eta macaemataneasira ema Viya. Núti núrísamurehi tayehe éta. Núti, tiánehipa eta nítauchirainapa eta nématane. Tásiha, váhirichu nucunachacare núti — macahepa ema Juan.

Emá Jesús másihaquenehi te anuma

³¹ Éma Jesús, máimatirinehi tamutu eta táichararacavanahi te anuma taicha másihaquenehi éma te anuma. Vítí achaneana viávihahi vicavasanahi te juca apaquehe, vímatihí étachucha eta táichararacavanahi te juca apaquehe. Émasera ema Jesús, eta másihairahi te anuma, tímatihí tamutu, tiápajupavanahi eta máitupajijiasiravahi. Ticachuricahavihi.

³² Éma, tímitecahi eta mameatasirahavi tamutu eta máimahaqueneanahi étapa eta masamaqueneana te anuma. Nájinayarénisera nasuapahini eta macayemaqueneanahi.

³³ Vítisera viti visuapanahi eta mameatarapiana, vímatihí eta yátupihí eta máechajiriruvana ema Viya mámaqueneanahi ema maca Jesús.

³⁴ Taícha éma, vanairucahi me Viya, máechajisihayarehi eta máechajiriruvana ema Viya. Énerichuvare tétavicavahi eta máimicatasirahi ema Espíritu Santo taicha mávahácahi éma.

³⁵ Éma Vicaiyaquene máemunacahi ema Machicha. Eta tacahe, matuparacahi eta émairayarehi téchayare tamutu.

³⁶ Eta tacahe, nácani ticasiñanayare ema Machicha, máichecuaraquireyare eta náitaresiraya. Namutusera ena macasiñarahanahi ema Machicha ema Viya, vahi títarecanaimahi, taicha tanasihi eta navirevana táichavenehi eta napecaturanahi. Ticaicuñanayarehi máitavacac ayare.

4

Emá Jesús tiánucuha eta provincia Samaria. Ánaqui máechajicahi esu ésuna esena.

¹⁻³ Tacahe, camurianahi ena tivarahanahi tíjaracavanaya náehicaya ema Viáquenu. Tásiha, viti máimitureana vícachasicavacahi éna. Émasera ema Jesús vahi máicachasiricahini. Camuripanana ena vícachasiruana nayehe ena máicachasiruana ema Juan. Tacahe, ena fariséoana nasamairiricapa. Náramipa. Navanecapa ena tiaserecanaya. Tacahe, te tisamauchavapa ema Jesús eta napanereuchirahi, majunijicapa eta Judea. Tiyana tichavahi tayehe eta Galilea, vítipa víti.

⁴ Eta vipaisirapahi te achene, viánucuhapaipa eta te provincia Samaria.

⁵⁻⁶ Te la dócepa te sache eta vítecapirahi te távihahi eta nória máepiyaruhi ema víyarahaini Jacob. Máijaracasicharipahi ema machicha José eta juca mayeheni apaquehe. Eta nória, tachacayahí eta avasarechicha ticaijare Sicar. Tacahe, eta mavitairapaipahi ema Jesús, tíchecanumapa te tachaui eta nória.

⁷⁻⁸ Eta víchesirahi, vianapa viti máimitureana vivacharepanayarehi eta tinicacare te avasare. Macarichuipahi ema Jesús. Sucahepainecha esu ésuna esena indigenahi samaritana tícapanayarehi. Tacahe, máechajicapa ema Jesús:

—Nuchicha, picatajicanu picajinu une —máichapa.

⁹ Tásiha, esu esena sujicapapa:

—Píti israelítavíhi. ¿Tájaha tacayema piyaseacanu eta une, nuti samarítananihi, vahi pijaneananuinahi? —suíchapa. (Ani tacahehi eta suéchajirisirahi, taicha ena israelítana énapa ena samarítanoana vahi náurianacacahini.)

¹⁰ Tásiha, ema Jesús majicapapa:

—Te pímatihini eta mavarahaqueneanahi tíjaracavi ema Viya, téhevere pímatinuhivaréni núti nuyaseacavíhi eta une, németeaca piyaseacanuipahíni eta une ticaitarecarahí. Tásiha, núti níjaracavíhíni —máichapa.

¹¹ Tásiha, esu esena suíchapa:

—Tata, tíupenahi eta juca nória. Píti, tájina enurena piviyahini eta une. ¿Távihasica tásihayare eta une ticaitarecarahi eta pivarahaquenehi píjaracanu?

¹² Eñi viáchucaquenéni Jacob, vímaequenéhahi eta juca nória ñépiyaruhi. Nérirarénihí eñi énapa ena ñichichanaveana. Énerichuhi táerihahi eta ñiyeheana sárareana. ¿Píti pímiyachavapuca picuchucahini eta tíuriamapana une? —suíchapa.

¹³ Éma Jesús majicapavarepa:

—Namutu nácani térana eta juca une tiápechavanayarehi timauneanaya.

¹⁴Nácanisera téranayare eta une níjararuyarehi núti, vaipa tiápechavanaimahi timauneana. Taicha tacajurucayarehi eta náuricacareva. Tiúrinainavarepa eta náitaresira. Ticaitarecavacayare máepenacacayare —máichapa.

¹⁵Tacahe, esu esena, eta susamirahi eta máechajiriruvanahi, suíchapa:

—Tata, píjaracanupaini eta une ticaitarecarahi, apaesa vaipa nucuaepechavaini nu-maune. Váipavare nucuítecahíni eta te juca nória népanahini une —suíchapa.

¹⁶Ema Jesús majicapavarepa:

—Piyana, píchuhapana ema pima. Piáma eta ani.

¹⁷Ésusera sujicapapa:

—Nájina nímaina.

Tásiha, ema Jesús máichapa:

—Pitupiruva eta juca pimetasiranuhi eta nájinairahi pímainahini.

¹⁸Cincoanapaipahi eta pimanaveanainíhi. Tásiha puiti, ema picachanequenehi váhivare pímainahini. Pitupiruvahi eta péchajiriruvahi —máichapa.

¹⁹Tacahe, tiáramecarinehi esu esena eta susamirahi éma eta máichirahi. Tásiha, suíchapa:

—Tátachicha, németeacavihi eta pítiqenévavihi profeta. Nuvaraha pimetcanuya puiti, ¿távihapuca eta yátupiquene viyujarasirareyarehi?

²⁰Taicha ena viáchucanaveanaini samaritánoanaini eta nayujarasiraréni eta te juca táinahu eta cerro. Puíticha tanasirichuhi eta viyujarasirarehi. Étiserá eti israelítana, eta emetarapi eta viyujarasirareyare ñe Viya téhenapa te Jerusalén —suíchapa.

²¹Ema Jesús mametacapa:

—Nutupiruva numetacavi, nuchicha, áni pa táenasihayare puiti váipa tácomesaimahi íteca eyujaraca me Tata te juca táinahu eta cerro étaripa eyanahipucaini te Jerusalén. Tamutu-inapa eta táurivayare eta eyujarasihayare.

²²Eti samaritánoana, apaesachicharichu eta ímatirahi ema Tata eyujaraurehi. Vítiserá vímatíhi ema viyujaraurehi, taicha víti israelítana víti vicatuparahahi víámayare eta máechajiriruvana ema Tata eta macuchucuirayare namutu ena achaneana ticasíñavanahi mayehe.

²³⁻²⁴Numetacaviya eta apana: Ema Tata, tiáviyahí te anuma, jéhevare éma, yátupiquenehi Viya. Vahi mátejinahini eta maeché macutihini víti achaneana. Eta tacahe, nácani tiyujaracana mayehe, tatupiruvayarehi eta nasamure, tisuapajirahianahivare tayehe eta máechajiriruana. Vahi tácomesaimahi ticasíñarajlana. Eta juca tacaheyarehi eta mavarahaqueneanahi ema Tata eta eyujarasirayarehi —máichapa.

²⁵Tásiha, esu esena suíchapa ema Jesús:

—Téchacarehi eta ñitecapirayare te juca apaquehe eñi Cristo, ñivaneruya eñi Viya. Téchacarehivare eta ñimetasirahaviyare tamutu eta yátupiqueneanahi. ¿Píti, péchapuca tájamuhuyarepuca eta ñitecapihayare?

²⁶Ema Jesús majicapapa:

—Nútira nuti mavanerunuhi ema Viya. Nútira ecuchapaqueneenuhi —máichapa.

²⁷Tásiha, vítecapanecha víti máimitureana. Tacahe, viáraminehi eta máechajirisiravahi eta suyehe esu esena indigenahi. Vivarahahi viyasereca esu esena tájahapuca suvaraha eta mayehe. Vivarahahivare viyasereca ema Jesús tájaha tacayema eta máechajisirahi esu esena. Váhisera vipatsicava viyaserecahíni.

²⁸Tásiha, esu esena sunaíquicapa eta suyupi. Tijunapapa tiyana te avasare, sumetapanavacapa ena achaneana. Te títecapapa, suíchavacapa:

²⁹—Yare, ímahaya eñi achane profeta. Nímatíhi tamutu eta níchaqueneanahi néjecapiravanahi. Tamutuhi ñicuchuchujisinánuhi. Núti németeaca éñiripa eñi Ñivaneruhi eñi Viya, éñiripavare eñi vicuchapaquenehi ticaijare Cristo —suíchapa.

³⁰Ena achaneana sumetaruanahi tiyananapa náehica esu eta te mávihahi ema Jesús, náimahapanayarehi.

³¹Eta nayerevapaichaha ena achaneana suíchuhaqueneanahi esu esena, víti máimitureana víchuhapa ema Jesús tinicanumayarehi. Víchapa:

—Tata maestro, yare pinicanuma, apaesaina piávamina.

³²Tásiha, éma tíjicapahavipa:

—Núti, jucaríhi eta tinicacare tancasarehi eta náchaneva emáimatíequenéruhi éti —máichahavipa.

³³Tásiha, véjecapavasamurepa víti. Víchacacapa:

—¿Náenicaipapuca jácani?

³⁴Ema Jesús máimatíhi eta vipanereruanahi. Máichahavipa:

—Eta ticaitarecanuhi núti, eta nítauchirahi eta mavanairipiana ema Nucaiyaquene, taicha nuvaraha nítauchaya tamutu eta nucaemataneasira éma.

³⁵ Eta viyeherepi te véchajiriruva: “Puiti vítapa eta vévasirapa eta trigo, cuátroyere caje eta vicuchapira eta vicurujisiraya” vicahehi. Puitisera numetacahe núti: Vaipa táyoremahi eta vicurujisirainapa. ¡Ésenica puiti te achene! Nárajapa ena achaneana ena névaraquianahi.

³⁶ Ema Tata tjaracaheya eta ícuchiyare te ímicatcanuyare eta vicurujisira ena nani achaneana apaesa náuchucuhayare, máichecuaraquireyare eta náitaresira. Tásiha, tétavicaava eta víurisamureva vimutu: éti, nútipa.

³⁷ Ena achaneana, ticatisamurevanahi eta náechajirisira: “Vítira vévacahi eta vésene; apanapasera ema ticurujica” nacahehi.

³⁸ Vítisera te juca vivapinavayare. Núti níchuhahahi eta ecurujisiraya eta névaruhi. Énerichuvare nararihíhi ena tñapucanahi viyehe eta nacaematanerahi eta juca. Puiti vivapinavaya eta vícuchiyare taicha vicuticacahi eta vicaemataneasirahi ema Viya —máichahavipa ema Jesús.

³⁹ Ena ticavasanahi te jena avasare, camuriqueneanahi ena tisuapanahi eta émairahi Mavaneruhi ema Viya táichavenehi eta suíchirahi eta macuchuchujisinaquenehi tamutu eta suíchaqueneanahi.

⁴⁰ Tásiha, tiyananapa tiácaphaviana. Te títécapanapa, émaquenepa nasamahi. Tásiha, náechajicapa mánasipanahini nayehe. Masuapahisera ema Jesús. Apina sache eta mayerevahi, vítipa.

⁴¹ Tacahe, eta manasipanairahi tayehe eta avasare, namutupa nasamahi eta máimiturapiana. Tacahe, camurianainehi ena tisuapanahi, téhicanahivare éma.

⁴² Tásiha, náichavarepa esu esena:

—Puiti émaquenepa visamahi. Vaipa tácarichuhini visuapahini eta pimetarapihi. Véchapa víti apanava eta émaquenérahí ema Cristo, ema vicuchapaquenehi, ema ticuchucuhahaviyare vimutu víti achaneana —náichapa.

Ema Jesús macanaraca ema machicha ema aquenuca majupahahi ema rey

⁴³ Te táequenepa eta apinaquenehi sache, tiyanavarepa ema Jesús; macaijuhe eta te provincia Galilea. Véhicapaichuhivare víti apanava.

⁴⁴ Eta mayanirayarehi eta Galilea, vahi mácasifñavahichaini eta masuapacarevainahini nayehe ena achaneana. Émarichuhi, ani macahehi eta máechajiriruvahi: “Mácani profeta, vahi tivapinavanahi eta najacapirahi ena achaneana te mávasa”.

⁴⁵ Téhesera te máitecapauchapaipa ema Jesús eta avasarechichana tinapaicanahi te Galilea, namutu najacapahi. Taicha náimatipa éma taicha náimahapa eta tiáramicareana máichaqueneana te mávihaipa te Jerusalén te jena piéstairahi eta Pascua.

⁴⁶ Tásiha, tiápechavavarepa mayanaucha ema Jesús eta avasare Caná, te máepiyasinehi vino eta une. Te apanahivare avasare ticaijare Capernaúm, matiaríhihi ema majupaha ema rey. Macajumaquenehi ema machicha.

⁴⁷ Te masamairiricapa ema achane eta máitecapiraipahi ema Jesús te Caná, tiyanapa matanupanahi. Eta máichimavapa, mayaseacapa eta macatajicahini máehicavanehini te mapena, macanarapanahini ema machicha taicha ema macajumaquene tiánehiripa tépenayarehini.

⁴⁸ Émasera ema Jesús máimatipa eta masamure ema achane, tásiha, máichapa:

—Éti vahi esuapanuimahi, te vahi nímechahehi eta tiáramicareana —máichapa.

⁴⁹ Émasera ema achane máichapa:

—Picatajicanuchucha, tátachicha. Péhicanu, machu máepenacaru ema nuchichasami —máichapa.

⁵⁰ Ema Jesús majicapapa:

—Tiuri, piyana. Vahi picueñamava, ema pichicha vahi tépenaimahi. Máenahi tinaracaipahi nícha —macahepa.

Tacahe, ema achane masuapapa eta máichirahi ema Jesús. Tiyanapa tichavahi te mapena.

⁵¹ Te tiánehipaipahi títécapa te mapena, nácapapa ena macajureana. Náichapa:

—Tata, ema pichicha tinaracaipahi.

⁵² Tacahe, ema mayaserecavacapa:

—¿Tájaha hora te tinaracapa ema nuchicha?

Éna náichapa:

—Cape te la una te cáperehi, táetaviacapa eta fiebre —nacahepa.

⁵³ Tásiha, ema achane máechapa étairaichuhi eta hora eta mametasirahi ema Jesús eta manarasiraipa ema machicha. Tacahe, ichaperinehi eta masuapirahi éma, énapa éna machichanaveanahi te peti, eta émairahi ema Cristo, Mavaneruhi ema Viya.

⁵⁴ Eta juca eta tápinanehi eta tiáramicarehi máichaquenehi te Galilea, te táequenepa eta machavirahi eta te Judea.

5

Emá Jesús macanaraca emá achane macajumaquene eta muracaquiha, emá tiávihahi te tachacaya eta noque ticaijare Betesda

¹ Te táequenepa eta juca, tatiarihíhi eta apana piesta eta viúrujisirávana te Jerusalén. Tiyanavarepa emá Jesús.

² Te jena viávasa, tatiarihíhi eta ichape tapaja náimisipirare eta uvesana nacaparuasana. Tatiarihíhivare eta ichape noque vímijarechahi Betesda. Ticayehehi cinco eta cúlerureana.

³⁻⁴ Eta návihahi emá nacajumaqueneana púchuquiana, masariana, énapa emá muracaquiñana. Namutu éna, ticuchapanahi eta macayamurisira eta emá ángele. Tásiha, namutu tiyanana téchipapaicavana te une, taicha tímijachavana mácani títapuca téchipaicava, tacanaracayarehi eta jácani majuma.

⁵ Tacahe, matiaríhi emá achane macajumaquene. Tréintayocho áñoripahi eta macatajivairahi.

⁶ Tacahe, te tisiapapaipahi emá Jesús, máimahapa emá achane macajumaquene tívecahi. Máimatívare eta tayerevaipahi eta macajumairahi. Mayaserecapa:

—¿Piviraha pinaraca, nuchicha? —máichapa.

⁷ Tásiha, emá achane majicapapa:

—Nuvaraha, tata. Nájinasera ticasiapanuimahi tayehe eta noque, te tiyamurieca eta une. Ticachuricanuanaparaca emá apamuriana nucutiqueneana nacajumaqueneana —máichapa.

⁸ Tacahe, emá Jesús máichapa:

—Pécheputa, piveha eta pímacaraji. Piyana pipaica —máichapa.

⁹ Tásiha, emá máichirahi emá Jesús, enevanerinehi tinaraca emá achane. Mavehapa eta máimacaraji. Tiyanapa típaica.

¹⁰ Eta sache manarasirahi emá achane, sávarumuhuhi. Ticapicahuhi eta jena sache nayehe emá israelítana. Tacahepa, te náimahapa emá tuparairucana, nacajachapa éma. Ánipa náicha:

—¿Tájaha tacayema vahi pipicaucha puiti juca sache tacapicahuquenehi? Vahi vísapa piámahini emá pímacaraji puiti juca —náichapa.

¹¹ Emá achane majicapavacapa:

—Vahi nútina tásiha. Emá maca achane ticanaracanuhi, tivanecanuhi. Máichanuhi: “Piveha emá pímacaraji. Piyana pipaica” —máichavacapa.

¹² Tásiha, éna nayaserecapa:

—¿Nájahasica emá tivanecavihi pipaica emá piámirapahi emá pímacaraji? —náichapa.

¹³ Émasera emá achane vaipa máimatihini emá máijare emá ticanaracahi. Váipavare náetupiacacarehini emá Jesús te namuri emá camuriqueneana achaneana taicha tiyanaripahi.

¹⁴ Téhesera te táequenepa, tiyanapa emá achane emá te Templo. Ánaqui títicapavarepa emá Jesús. Te máimahapa emá Jesús emá achane macanararúhi, máichapa:

—Pímaha, vaipa picuapechava picuapeatura, machu tachavauchavi emá pijuma, máchuvare pávetiji —máichapa emá Jesús.

¹⁵ Tacahe, emá máimatirapa, emá achane tiyanapa mametapanavaca emá tuparairucana emá émairahi emá Jesús emá ticanaracahi.

¹⁶⁻¹⁸ Eta tacahe, emá tuparairucana tise-manapa. Ichaperinehi emá nacatianasirahi emá Jesús táichavenehi emá macanarasirahi te jena sache sávarumuhuhi tacapicahuquenehi. Tásiha, títicapapanapa, éna ticaratacanayarehini emá Jesús. Émasera máimatíhi emá napaneruana. Tacahe, máichavacapa:

—Emá Tata tamutuchucha sache ticaematane. Ene nucaheyarehi nuti apana. Nítauchayare emá mavanairipiana —macahepa.

Emá nasamirahi emá tuparairucana emá máichiravacahi, navetijipaicha emá nasemirahi. Navarahapa nacapacavaneyarehi éma. Eta tivíuchahi emá macanararesirahi te sávarumuhua, náimijachirahi máepuruhi emá nayeherepi. Tavetijipaicha emá máimicaecherachiravahi Machichairahi emá Viya, Váyairahi emá apana.

Emá Jesús macatuparahaquenehi me Maiya

¹⁹ Énerichuvare emá Jesús máichavacapa:

—Nutupiruva numetacahe: Nuti Machicha emá Viya, emá nutuparahanahi mayehe, váiparinehi nútijiricavaimahi nícha jácani nuvarahaqueneanahi. Núi nímaticuenehahi tamutu emá máematane-repíhi emá Ticachichanu. Étayareichuhi níchayarehi nútí.

²⁰ Taicha yátupihí eta máemunasilanuhi ema Ticachichanu. Eta tacahe, tímechanuhi tamutu eta máematanerepiana. Énerichuvare tjáracanuyareva eta nímechiraheya eta apamuri tíaramicareana. Tíapajucavayare eta táramicarevayare, apaesa iáramirineyare, epicayareva.

²¹ Ema Tata marataha macaechepuca ena náepenaqueneana, máimichavayarehi macaitarecavacaya. Énerichuva nuti Machicha, nuratahavare nucaitareca nácani nuvarahaqueneanaya, níjaraca eta náitaresiraya.

²² Nucatuparahahivare mayehe ema Tata eta nímairaya eta nacacuñairayare namutu ena náejecapavaqueneanahi. Vaipa émainahi tícuñareca éma.

²³ Taicha mavarahahi epicauchanu nuti Machicha, tácutirichu eta epicauchirahi ema Tata. Nácanisera vahi típicauchanuanahi núde, váhivare napicauchaimahi ema Tata.

²⁴ Yátupiquenevare numetacahe eta juca apana. Nácani ticaquiñanayare tisuapanayare eta néchajiruvana, nasuapavare eta nucavanahirahi mayehe ema Tata, éna títarecanayare, vaipa ticaicuñanaimahi. Taicha éna, tíuchucuharipa tayehe eta náicuñayaréni te yucu. Náicuhíhi eta náitaresiraya.

²⁵ Tacutiquene nutupiruva numetacahe nuti Machicha ema Viya. Táitecapaquene pa puiti juca sácheana, tisamanuanayare ena achaneana, tayanapane tépenahi eta náchanevana. Te nasuapajirahipuca, nucaitarecavacayare eta náchanevana.

²⁶ Taicha ema Tata namutuhí marataha macaitareca. Ene tacahe eta májjarasiranuhi núde Machicha eta namutuyareva nurataha nucaitarecavaca.

²⁷ Énerichuvare tituparacanuhi eta nícuñasiravacayarehivare taicha yátupiquenenuhi manerejirunuhi.

²⁸ Vahi ecuarami eta juca numetasirahehi. Járajapa eta sáchevare eta nasamirayare namutu ena náepenaqueneana eta nahu núde.

²⁹ Téchepucanainapa namutu te náecariana. Nácani tíchanahi eta táuriqueneana, títarecanainapa. Énasera ena tíchanahi eta tamauriqueneana, ticaicuñanainapa.

Ema Jesús máimereca eta macavanahirahi me Viya

³⁰ Núde vahi nútijiricaváimahi nícuñareca. Nucuchapayarehi eta mavanairipi ema Tata, ema tivanecanuhi. Tacahe, te nícuñareca, vahi numapachichijicaimahi, tatupiruvayarehi nícha. Taicha tacahehi eta mavarahaquenehi ema Tata.

³¹ Te nácarichu núde nútijiruvainachuchaini eta nímereruanahi, vahi tácomesahini esuapanuhini.

³² Váhisera nuçarichuimahi, taicha matiaríhihi ema apana títametasinanuhi, émaripa ema Juan Tícachasírícarahí. Nímatíhi núde eta matupiruvahí eta máichaqueneanahi eta tímereuchanuhi.

³³ Éti ecavanairipipa nayasereca ema Juan te nájahanuhipuca núde. Matupiruvahisera éma eta majicapiravacahi eta nútiqueneipahi éma ecuchapaquenehi.

³⁴ Váhisera étaparacaimahi eta juca eta matiaríhirahi ema tímereuchanuhi. Eta ticamunucarepanahi eta esuapiranuina apaesa íuchucuhaiya éti nícha núde.

³⁵ Ema Juan tímicitijiricavahi tímícauchahehi tayehe eta mametarapihi eta eyehe, te jena sácheanahi esamararasirahí éma. Iúrisamureinehi ichape, taicha eta tamicauchirahehi eta máechajiriruva.

³⁶ Váhisera mácarichu eta máimicaecherachiranuhi ema Juan. Jararihi eta apana táimicaecherachiranuhi, tíapajupanavahi eta táramicareva. Taicha núde nícha eta nématanerepiana májjararunuhi ema Tata.

³⁷ Émaripa ema Tata tivanecanuhi. Éma, vahi macutihémahi éti achaneana. Vahi esamahini eta mahu, váhivare ímahaimahi eta máquehe. Téhesera te jena Sagrada Escritura, tíméticahehi eta nítecapiraya.

³⁸ Éti vahi evarahahini esuapanuhini nuti mavaneruhi éma. Éta tímereuchahehi eta váhivare iúnacahini eta máechajiriruvana te esamureana.

³⁹ Éti, tamapurují eta ecaravahuirahi eta Sagrada Escritura. Ímijacharipapuca eta ticaitarecahevarehi. Váhisera ímatiequenehahini, váhivare ácaicutiarahini eta nútirahi táechajisihahi núde nucaitarecayarehi.

⁴⁰ Tacutiquene vahi ávarahahini epauchanuhini éti, níjaracahehini eta ítaresiraya máitavacacainahini.

⁴¹ Núde vahi nácomesa nacunachanuhini ena achaneana.

⁴² Títecapa, nímatíhevacahi emutu éti eta emaemunasirahí ema Viya.

⁴³ Núde nuvanecasivarichuhí me Tata eta nítesirahi. Étisera vahi esuapanuhini, váhivare ejacapanuhini. Téhesera te máitecahini mácani apana achane, tímijachavapuca Cristo ema ecuchapaquenehi, masapíhapucaini ema tisuapacarehini eta eyehe.

⁴⁴ Éti, vahi esuapanuhini taicha eta evarairahi ecutachacareva ena achaneana. Esapihachucha éti vahi ávarahahini ecutachacare me Viya.

⁴⁵ Váhisera nútínayare numetauchahe eta me Tata. Máimahaerinepa ema Moisés. Éma timetauchaheyare. Éti ímijachavahi ticuchucuhaheyare eta evarairahi ítaucha eta mavanairipiana éma. Tamapurujihisamisera.

⁴⁶ Te yátupinahini esuapahini eta mametarapiana ema Moiséini, esuapanuhivarepucaini nútí táechajisihaquenehi eta májureanahi ema Moiséini.

⁴⁷ Váhisera esuapahini eta májucaqueneanahi éma. Tavetijipa eta emasuapiranuhi eta juca numetarapiana eyehe —macahepa ema Jesús.

6

Éma Jesús máitaparajahi máenicavaca ena camuriqueneana achaneana
(Mt 14.13-21; Mr 6.30-44; Lc 9.10-17)

¹⁻⁴ Te táequenepa, te jena sácheana tiánehipa eta Pascua, vapiestarasahi viti israelítana. Émasera ema Jesús, tiyanavarepa tiámahavivare eta viánuecahi eta cáquiure Galilea (taicijarehivare Tiberias). Camurianasera ena achaneana tipaicapanahi téhicanapahi éma, taicha eta náimairahi eta tiáramicareana máichaqueneanahi eta macanarasiravacahi ena nacajumaqueneana. Te vítecapapa te apachara, viyanapa te jácáni anuquerehi mávapahi. Tacahe, véjacapa vinaracayarehi.

⁵ Téhesera te máimaha ema Jesús ena camuriana achaneana eta náitecapauchirahi, máichapa ema vichamuri Felipe:

—¿Távihapucaini vivacharesihaini eta tinicacare vénisihahini namutu ena nani achaneana? —máichapa.

⁶ Eta juca mayaseresirahi étachuchanéni eta mavarairahi éma macaicutiarayarehi te tájhapuca macayemayarehi ema Felipe. Taicha ema Jesús máechahi eta máichaquenyarehi.

⁷ Tásiha ema Felipe majicapapa:

—Tacamunuhi vácayehéhini eta camuri plata apaesa namutupaini vítaparahahini vénicahini apaesainahini návaminahini. ¡Vahi taratahahini eta dies mil páneana! —macahepa.

⁸ Tásiha, téchajicapa ema nuchamuri Andrés, maparapehi ema Pedro. Máichapa:

⁹ —Mararihi ani ema émana amaperu tiámaphahi eta cíncochichapahi eta pan, apinapa eta jima. ¡Váiparinehisera nárataimahi ena nani camuriqueneana achaneana! —macahepa.

¹⁰ Émasera ema Jesús máichahavipa:

—Evaneca náejahapaica námutu ena achaneana —macahepa.

Taicha tiúrinapahichichahi eta apaquehe, muñjipahivare. Cinco mil eta náichapemurivahi ena ajairana. Vahi náimitupachahini ena esenana énapa ena amaperuana.

¹¹ Tacahe, ema Jesús mavehapa eta páneana. Te tamutupa eta mahasulupayachirahi ema Viya, týjaracahavipa. Véniricapa víti, víjaracavacapaipa eta pan étapa eta jima. Tisimurivacapaipahi eta víjaraca.

¹² Tinicanapa namutu. Tisatuheanapa, nacaemacharichahavare. Tásiha, ema Jesús máichahavivarepa:

—Ecurujica eta náemacharajianahi, machu támapuruji —macahepa.

¹³ Tásiha, víti vicurujicapa eta pan náemacharajianahi. Táinicachaichahavare eta dócehiquene íchapehiana saye.

¹⁴ Tacahe, eta náimairahi ena achaneana eta juca máichaqueneanahi ema Jesús, ichape-rinehi nárami. Tásiha, nacahepa:

—Émaripa ema maca profeta ema vicuchapaquenehi máiteruyarehi te juca apaquehe —nacahepa.

¹⁵ Eta tacahe, navarahapa námayahéhini nayeheyarepa rey. Émasera máimatipa eta napanereruhi. Tacahe, térajicavavarepa eta nayehe. Tiyanapa macarichuhi te tápusi eta cerro.

Éma Jesús mapaicaeca eta une
(Mt 14.22-27; Mr 6.45-52)

¹⁶ Tacahe, te jena cáperehichichapa, viyanapa viti máimitureana tayehe eta cáquiure.

¹⁷ Te vítecapapa, viávacuhapa te pacure. Viánuecayarehi te apachara. Vicaijuheyarehi eta avasare Capernaum. Tivehahavipa eta yati eta viánuesirahi. Éma Jesús májinahi macachanehavipahini.

¹⁸ Eta vipaisirapahi, tachimaracapa eta muraca técatícava. Tépacucapa muraca eta cáquiure.

¹⁹ Cinco kilómetroipahi eta viyerehivahi, vétupiecapaipahi, te vímahapa ema Jesús. Mapaicaepaipahi eta une, tipauchahavipaipa. Víti vipicapa eta vímairahi.

²⁰ Émasera máichahavipa:

—Vahi ecupicanu. Nútichucha.

²¹ Tacahe, vímatipa éma. Viúrisamuréinehi eta vijacpirahi eta mávacuirapa eta te vipacure. Tásiha, vítecapanecha eta te vicaijuheharehi.

Ena achaneana natanujiricaipahi ema Jesús

²² Te apanapa sache, ena achaneana manaquiruanahi ema Jesús, natanujiricaipahi éma. Námatiacapa eta vicarichuirahi víánueca víti máimitureana. Tájinahivare apanainahini pacure.

²³ Tásiha, tacahepainecha eta apana pacureana, nayehehi ena tiásihanahi te avasare Tiberias. Títecanapa te tachacaya eta nanisinehi eta pan ena camuriqueneana achaneana.

²⁴ Tacahe, ena achaneana eta namaimairahi ema Jesús vítipa víti máimitureana, tiávucanapa te pacureana. Tiyananapa ticapayahavianayarehi te Capernaum, natanusirapahi ema Jesús.

Ena Jesús ticaitarecarahi

²⁵ Te títécapanapa ena achaneana te apachara, náetupiacapa ema Jesús. Tásiha, nayaserecapa:

—Tata maestro, ¿tájamuhu pítecapahi eta ani? —náichapa.

²⁶ Ena Jesús majicapavacapa:

—Nutupiruva numetacahe: Eti etanucanupahi táichavenehi eta nénisirahehi nésatuhechirahehi. Váhisera ácaicutiarahini eta nímechirahehi eta tiáramicareana.

²⁷ Eti tamapurujipa eta ecañamarasiravahi etanuca eta enicacuenerepi taicha títavayarehi. Tatuparacahisera etanucayare eta tinicacare ticaitarecaheharehi, máitavacacahi éta. Étara eta juca níjararuheharehi nuti Manerejirunuhi ema Viya. Éta tímereuchanuhi eta yátupirahi nuvanecasivahi eta mayehe ema Tata —máichavacapa.

²⁸ Tacahe, éna nayaserecapa:

—¿Tájahapucaini eta mavarahaqueneanahi ema Viya eta vicaemataneasirahi éma? —nacahepa.

²⁹ Ena Jesús majicapavacapa:

—Eta mavarahaqueneanahi ema Viya íchaquenyare, esuapanuyare nuti mavanerunuhi —macahepa.

³⁰ Tásiha, ena nayaserecavarepa:

—¿Tájahasica eta tiáramicare pímechahaviyare apaesa visuapavipa? Vivaraha vímaha.

³¹ Eta acane ema víyarahaini Moisés tíjaracavacahi ena víáchucaequeneanaini tinicanahi eta ticaijare maná, ánaqui te apaquehe mávapahi. Taicha tacahehi eta táechajiriruvahi eta Sagrada Escritura ani tacahehi: “Máenicavacahi eta tinicacare tiásiha te anuma”. Píti, ¿pímijachavapa pirataha picachurica ema víyarahaini Moisés? —nacahepa.

³² Ena Jesús majicapavacapa:

—Nutupiruvavare numetacahe. Éti, ichape eta éjecapirava. Ena víyarahaini Moisés, vahi émainahini macucupaicahini eta maná. Ena Tata, émahí ticucupaicahí eta maná.

³³ Jararihi eta apana numetarapi eyehe: Púiti ema Tata mavaraha máíjaracaheya eta yátupiquenehi tinicacarehi. Étaripa tinicacarehi tiásihahi te anuma ticaitarecavacayarehi namutu nácani tíjapanaya. Étara eta tímitecanuhi —macahepa.

³⁴ Tásiha, najicapapa éna:

—Tata maestro, píyaseasinahavi ema Viya máíjaracahavipaini máiejehainahini eta tinicacare péchajisihaquenehi —náichapa.

³⁵ Tásiha, éma máichavarepa:

—Nútira eta yátupiquene tinicacare nucaitarecaheharehi. Eta tacahe, nácani tisuapanuanayare, vaipa tíapéchavanaimahi técuhana. Váipavare timauneanaimahi.

³⁶ Étasera eta níchaquene, ímahanuipanení éti, váhisera esuapanuhini.

³⁷ Nuvaraha ácaicutiaraqueneá yátupina. Namutu nácani tipauchanuanayare, nútí vahi névatajicavacáimahi taicha tásihaquenéichuhi me Tata eta máíjarasiranuhi éna.

³⁸ Taicha nútí, eta núcupaisirahi te anuma, tímitecanuhi nítauchayarehi eta mavanairipiana ema Tata. Vahi nútíjiriruvainahini eta nítesirahi níchayarehi eta nuvarahaqueneahini nútí.

³⁹⁻⁴⁰ Eta mavarahaquenehi ema Tata eta mavanesianuhi, nucaitarecayarehi nácani máíjararunuanayarehi éma. Nácani tésenicanuanayare nuti Machicha, tisuapanuanayarevare, máichecuaraquereyare eta náitaresiraya te nucaechepucapa éna te náecariana te jena

sache táitecapapa eta népaníravacayare. Váhiquene nucamitiacaimahi ema émanaimahi — máichavacapa.

⁴¹ Tásiha, nararihi ena ticaecahirahiana eta máichiravacahi ema Jesús eta émairahi eta yátupiquene tinicacare, máucupairuhi te anuma, ticaitarecarahiyare.

⁴² Ánipa náichacacahi:

—Tépiyahirahipa ema maca. Víti, vímatihi ema maiya, ticaijare José. Énerichuvare vímatihivare esu máena. ¿Tájaha tacayema eta macahechajiriruvahi eta másihairahi te anuma? —nacahepa.

⁴³ Ema Jesús máichavacapa:

—Ámatina. ¿Tájaha tacayema épururahi?

⁴⁴ Nacarichu témunahiricavanaya tipauchanuana nácani máichuhaqueneanahi ema Tata. Eta tacahe, ena máichuhaqueneanayarehi éma, nucaechepecavacayare núti te táitecapapa eta sache népaníravacayare núti.

⁴⁵ Taicha tacahehi eta májurehi ema profeta víyarahaini Isaiás, ani tacahehi: “Náimitucasivayareichuhi me Viya namutu ena achaneana”. Tacahe, namutu ena máimitureana ema Tata, énara tipauchanuanayare puiti.

⁴⁶ Tayanapane váhihinéni náimahaimahi eta mamira ema Tata. Nucarichu núti nímahapa éma taicha étaquenehi eta násinehi eta mayehe.

⁴⁷ Nutupiruvahi numetacahe: Nácani tisuapanuanayare, níjaracayare eta náitaresirayare máitavacayare.

⁴⁸ Núti, yátupiquenehi eta nucaitaresiravacahi ena ticasiñavanahi eta nuyehe tacuti eta tinicacare tacaitarecachi eta víáqueheana.

⁴⁹ Éti, ena iáchucanaveanaini tinicanahi eta maná te mávapai apaquehe. Váhisera náitarecchini. Namutuhi tépenaracána.

⁵⁰⁻⁵¹ Nácansera tinicanahi eta néche, vahi tépenanaimahi. Taicha núti núcupaicaripa te anuma. Eta neche, yátupiquenehi tinicacarehi ticaitarecarahi. Nácani tinicanayare eta neche, máichecuarareyare eta náitaresiraya. Núti níjaracayare eta neche taicha nuvaraha tacaitarecavacchini namutu ena achaneana —máichavacapa.

⁵² Tásiha, ena natarihiqueneana tiácapaemajiricacánapa. Ena apamuriana, ánipa nacahe:

—¿Tájahapuca macayemahi eta májjarasirahavi eta maeche viniruyarehi?

Ena apamuriana, ánipa nacahe:

—Vaipa tétupícava eta juca mapanereruhi. Mavaraha vinicayarecacha eta máeche naváji —nacahepa.

⁵³ Émasera ema Jesús máichavarepa:

—Nutupiruva numetacahe: Te épuruhipuca enica eta neche, nuti Manereljirunuhi ema Viya, te épuruhivarepuca éra eta nítine, vahi ítarecainahi.

⁵⁴ Taicha nácani tinicanayare eta neche, téranayareva eta nítine, éna máichecuarareyare eta náitaresira. Tásiha, núti nucaechepecavacayare te náecariana te jena sache népaníravacayare.

⁵⁵ Taicha eta neche yátupiquenehi tinicacare tacaitarecarahi. Énerichuhi eta nítine, yátupi-quenehivare tércare ticaitarecarahi.

⁵⁶ Esamanuchaha. Nácani tinicanayare eta neche, téranayareva eta nítine, éna tiávahácuanayarehi núti. Tásiha, núti návahácavacayareva éna.

⁵⁷ Taicha ene nucahehi núti, tiávahácuanuhi ema Tata. Tásiha, núti návahácavare éma. Máitavacacahi eta máitaresira. Éma ticaitarecanuhi. Tivanecanuhivare nucaitarecayarehi. Tásiha, nácani tinicanayare eta neche, máitavacayare eta náitaresira nícha.

⁵⁸ Núti núcupaicahi te anuma eta níjarasiraheyarehi eta juca yátupiquenehi tinicacare. Vahi tácutihi eta maná nanaicquenehi ena iáchucanaveanaini éti. Tépenaracananarichuchaséra. Énasera ena tinicanayare eta neche, máichecuarareyare eta náitaresiraya —máichavacapa.

⁵⁹ Tamutu eta juca máimiturapiana ema Jesús te mávhaihahi te náurujsirareva ticaijare sínagoga tayehe eta jena avasare Capernaum.

Tacarichu eta máimiturapiana ema Jesús ticaitarerahi te visuapa

⁶⁰ Tacahe, ena téhicanahi ema Jesús, eta nasamirahi eta juca máimiturapianahi, camuriana ena vaipa návarahahini náehica. Ánipa nacahe:

—Ticajerapicha eta vicaicutiarirainahini eta juca máimiturapiana. Nájinavare tisuapanaimahi —nacahepa.

⁶¹ Émasera ema Jesús máimatihini eta napanereruanahi eta namavarairaripa náimiyana-vahini náehicahini. Tacahe, máichavacapa:

—Páurehehi éti eta evaraha ínjica eta éhisiranu taicha eta emacacutiarairahi eta nímíturapianahi.

⁶² Németeaca ímíyanavaichucha eta emasuapajiraivahi, tayanapanepuca ímahanupuca eta nárairaya nuchavirayarehi te anuma, te návinehi acane, taicha nútí Manerejirunuhi ema Viya.

⁶³ Ácaicutiara eta nucayemaquenehi. Vahi étaparacaini eta néchaquene. Eta juca nímíturapiana, te esuapapa, étara ticaitarecaheya taicha yátupiquenerihi.

⁶⁴ ¡Páurehehi eti váhiquenehi evarahahini esuapanu! —máichavacapa.

Eta juca macayemaqueneanahi ema Jesús, matupiruvahi eta máichiravacahi taicha máimatipahi eta napanereruana ena tijunijicanayarehi, émapa ema tjararecayarehi.

⁶⁵ Tacahe, máichavacapa:

—Puiti, evaraha ínjicanu. Eta tacahehi eta níchirahehi: “Nacarichu témunahiricavanaya tipauchanuana nácani máichuhaqueneanahi ema Tata” —máichavacapa.

⁶⁶ Eta nasamirahi eta nacayemaqueneanahi, tñajicavanapa ena camuriqueneanainihi. Vaipa náimíyanavahini náehicahini ema Jesús.

⁶⁷ Tacahe, tiyaserecavipá viti dócequeneana máimitureanahi. Máichahavipa:

—¿Evarahainapapuca ejunijicanuyare éti apanavare?

⁶⁸ Tacahe, ema Simón Pedro majicapapa:

—Tata maestro, vahi vijunijicavimahi, taicha nájina pácuti eta péchajiriruvana. Tétaví-cavahi eta tacaitarecaravahi.

⁶⁹ Viti vitupiruvahi eta visuapiravíhi. Véchahivare eta yátupiquenérvíhi Cristo, Machichaquénévíhi ema yátupiquenehi Viya —máichapa.

⁷⁰ Ema Jesús majicapapa:

—Dócehehinéni eti nunerejiruanahi. Mararihiserá ema émana te etaracu, ema mávaháruhi ema Váinaraji —máichahavipa.

⁷¹ Ema Jesús, máechajisihahi ema Júlasí. Taicha ema Jesús máimatíhi eta émarayarehi tjarareca, tayanapané éma vidocenéníhi viti apóstoleana.

7

Ena maparapenaveana ema Jesús váhivare nasuapa

¹ Tacahe, ema Jesús tímíyanapaipahi tipacapaipahi eta avasareana te tinapaica eta Galilea. Vahi mavarahahini machavahini tayehe eta avasareana tinapaica eta Judea, taicha ena tuparairucanahi te Jerusalén napanerechaipahi nacapacayarehi éma.

² Tacahe, te jena sácheanahi, tiánehipa eta vipiéstara viti israelítana eta vicapenahuiyavacahi eta viyusujiana. Étahi eta vítecapihavacahi te Jerusalén, vihasulupayacha me Viya eta macajurusinahavíhi eta visucureana te véseaneana.

³ Tiuri puiti, natíarihíhi ena maparapenaveana ema Jesús. Tacahe, náichapa éma:

—Te pímiachava píтира máestrovi, vahi pánasi eta te ani. Piyana te Judea, apaesa ena pímitureana tiávihanahi ánaqui náimaha eta píchaqueneanayare.

⁴ Taicha te pivarahahípuca náimatívi ena achaneana, tacamunuhi pímerecava yátupina te namírahu namutu. Vahi picuyumuruca eta pítucaqueneana —náichapa.

⁵ Taicha ena maparapenaveana váhiquenevare nasuapahini éma.

⁶ Tacahe, ema Jesús máichavacapa:

—Vuíchaha táitecapauchanuhini eta nuyanirayare te Jerusalén. Étísera tamutuchucha tiuri eta eyaniraina.

⁷ Nútísera ticatichanuanahi ena achaneana táichavenehi eta nímereuchiravacahi eta náichaqueneana tauriqueneana. Étísera vahi ticatichaheanaimahi taicha tájina taviuchahehíni.

⁸ Te evarahapuca, eyana éti te piesta. Nútísera vuíchaha nuyanaimahi taicha vuíchaha táitecapauchanuhini eta nuyanirayare —máichavacapa.

⁹ Máevatacáhi ema Jesús ena maparapenaveana, émasera ticaequenehavapa. Manasipanaichaha te Galilea.

Ema Jesús tíyanarichuchanéni tayehe eta piesta

¹⁰ Te tíyananapa te piesta ena maparapenaveana ema Jesús, énerichuvaréni éma tíyanavarepa. Váhisera máimerecavahichaini.

¹¹ Énasera ena tuparairucana natanucaipa éma, te jena píéstaquenehi. Tásíha, nacahepa:

—¿Macáñárihipucacacha ema mácani achane? —nacahepa.

¹² Énerichuvare ena achaneana natíarihiqueneanahi te piesta, náechajisihahi éma. Ánipa nacahehi: “Vahi tiuri ema maena achane. Macaetemavaca ena achaneana”. Ena apamuriána ánivare nacahe: “Tiúrihi ema maca. Vémeteaca tétavícala ema máurivahi”.

¹³ Váhisera nacuchujipicahini eta nacayemaqueneanahi taicha tipicacaracavana-richucha nayehe ena tuparairucana.

¹⁴ Te enumuhuquenepa eta piesta, mapaenumavapa tímerecava ema Jesús. Tiyanapa tisiapahi tayehe eta Templo. Tinahacavapa tímiturecahi.

¹⁵ Ichape eta náramirahi ena tuparairucana, eta náimairahi eta máitusirahi yátupi. Tásiha, ánipa nacahehi:

—Ema maca vahi vímiturenahini. ¿Táviha maviyahi eta máitucaquenehi ema maca? Vahi mávamirahuini eta máimitusiravacahi ena achaneana —nacahepa.

¹⁶ Émasera ema Jesús máimatihini eta napanereruanahi. Tacahe, máichavacapa:

—Vahi nútijiriruvaina nuvehahini te nuchuti eta juca nímiturapianahi. Ema Tata tivane-canuhi, émahini títuparacanuhi eta nímitusiraya eta máimiturapiana.

¹⁷ Te etiarihinapuca eti evarahahi ítaucha eta mavanairipiana ema Viya, ímatiacavane-yare eta juca nímiturapianahi étairahi tíasíhahi eta me Viya. Vahi nútijiricávainahini eta nímitusirahi.

¹⁸ Mácani achane émajiricavahi téchajisihava, mavarairahi ticunachacareyarehi. Nútisera, eta nuvarairahi ecunachayare ema Tata tivanecanuhi, vahi népiyahirahimahi. Nutupiruvahi néchajisiha eta yátupiqueneana tisuapacareana.

¹⁹ Échavarichu éti eta májarasirahehi ema víyarahaini Moisés eta mavanairipiana éhiru-yarehi. Váhisera ítauchahini éti émanainahini. ¿Tájahasica eta nuviureva eta evarairahi ecapacanuya? —máichavacapa ena tuparairucana.

²⁰ Ema achaneana najicapapa:

—¡Péjcapava píti eta pipanereru! ¡Máurishivipapuca píti! ¿Nájaha ticahehi eta vivarairahi vicapacavi? —náichapa.

²¹ Ema Jesús tímiyanava téchajiricava nayehe ena tuparairucana, ánipa máicha:

—Táichavenehi eta nípuresirahi te jena sache tacapicahuquenehi sávarumuhuquenehi, éta tivíuchanuhi ichape eta eyehe.

²² Étiyapa epamicavahi eta emarcachiraya mácani amuya ajaira te óchopa eta masacher-ahi, tayanapane sávarumuhupuca. Taicha ichape evaraha ítauchayare eta mayeherepini ema víyarahaini Moisés. (Váhisera émainahini máinapucahini manacuchahini eta juca eye-herapi. Ema víachucaini Abraham énapa ena machichanaveana títupucanahi nanacucha eta viyeherepiyarehi.)

²³ Te tíúrihi ímaha eta emarcachirahi mácani amuya alauchu te sávarumuhua, ítauchi-rapaipahi eta mavanairipi ema Moisés, tatuparacahe vahi ecusemahini eta nuyehe táichavenehi eta nuncanarasirahi ema maca achane te sávarumuhu.

²⁴ Vahi ecuémunanásicava eta epanereruana. Epanerechinava tayehe eta táuriqueneana. Ácaicutiara eta táurivahi eta vicanarasirahi ena achaneana, tayanapane eta sávarumuhupuca —máichavacapa.

Ema Jesús máechajisihapa eta máisinehi

²⁵ Tacahe, natiaríhi ena tinerejicavana ena ticavasanahi te Jerusalén, nacahepa éna:

—Ema maca, émara ema natanujiriruasa ena tuparairucana, ema navarahaquenehi nacapaca táichavenehi eta máimijachirava ema Cristo mavaneruhi ema Viya.

²⁶ Ímahasera éma, vahi mapicacaracavahini eta macametarairuirahi te juca Templo. Nájnavare ena tuparairucana nájaracavahini nacaratatahini. Nájnavare nacamatina-cahini. ¿Nasuparipapuca puiti éna, eta émairahi ema Cristo?

²⁷ Vémeteacasa vuíchaha émaina ema Cristo, taicha vímatihini ema maca, etapa eta máuchusinehi. Te máitecapa ema yátupiquene Cristo, nájina téchaimahi távihapuca eta máuchusi-hayare —nacahepa.

²⁸ Émasera ema Jesús máimatihini eta napanereruana. Tásiha, muracapanapa eta máechajisirahi eta te Templo máimituresirahi. Ánipa macahe:

—¡Éti ímijachava ímatínuhi, etapa eta núchusinehi! ¡Váhisera ímati eta tímitecanuhi! ¡Váhivare ímati ema Éternoquenehi, ema tivanecanuhi! Núti, vahi nútijiriruvainahini eta nítesirahi.

²⁹ Nútisera nímatihini éma taicha étaquenehi násinehi eta mayehe eta nítecapauchirahehi —máichavacapa.

³⁰ Eta nasamirahi éna tuparairucana, tíapajupanavahi eta nasemanevahi. Navarahapa nacaratacayarehini, náeratacayarepaini, vuíchahasera máisapahini ema Viya eta nacaratasira éma.

³¹ Natiaríhisera camuriana ena tisuapanahi. Tásiha, nacahepa:

—¡Víti vémeteaca émaripa ema Cristo ema maca! ¡Taicha nájina mácuti eta máichirahi eta tíaramicareana máichaqueneanahi ema maca! —nacahepa.

Ema tuparairucana náevatacapa ena suntaruana nacaratapanayarehi ema Jesús

³² Ena fariséoana nasamaemachapa ena achaneana eta nacunachirahi ema Jesús. Tásiha, napanereuchavanepa ticurujicacanapa ena tuparairucana. Náevatacapa ena suntaruana nacaratapanayarehi ema Jesús te Templo te mávihahi.

³³ Tacahe, ema Jesús máichavacapa ena suntaruana:

—Vuíchaha tituparacahe eta ecaratacanuhini. Yátupisera ánipirine eta nucaheyare eta eyehe. Tásiha, nuchavainapa mayehe ema tivanecanuhi.

³⁴ Éti, etanucanuinapa, váhisera íchimavanuimahi. Taicha vahi ítujicavaimahi ecapayacanu te návihayare núti —máichavacapa.

³⁵ Tacahe, ena ticatianacanaahi tiyaserejiricacanapa. Ánipa nacahe:

—¿Távihapapuca macaijuhénapa eta vaipa viratahaimahi vicapayacaimahi víti? ¿Mavarahapuca tiyanayare te tayerehiquene avasare, macapayacaya ena vijaneana israelítana tiávihanahi te tayerehiquene? ¿Mavarahapuca máimitucayare ena apavasanana?

³⁶ ¿Tájahapucáji tacayemahi eta juca máechajiriruvahi eta vaipa viratahaimahi vicapayaca te jácani macaijuheyare? —nacahepa.

Tétavicavayare eta viúricacarevana maicha ema Jesús, tacutiya eta ichape cajacure táuchurehi eta máriana. Ticaitarecaviya éma.

³⁷ Te jena téquenaha sache eta piéstairahi, tímahacarepana eta jena sache. Tiyanavarepa ema Jesús te namuri ena achaneana. Titupihapa, téchajicapa muraca. Ánipa macahe:

—Te natiarihinapuca nácani timauneanaahi, náitecapauchanu. Núti nívaracayare eta náerayare nácani tisuapanuanayare —macahepa.

³⁸ Taicha ani tacahehi eta Sagrada Escritura: “Ema Mavaneruhi ema Viya, tétavicavaya eta viúricacarevana máicha, tacutiya eta ichape cajacure táuchurehi eta te máriana. Ticaitarecaviya éma” tacahepa.

³⁹ Eta juca macayemaqueneanaahi ema Jesús, máimicaecherachahi eta masiapahasiravacayarehi ema Espíritu Santo te nasamureana nácani tisuapanayarehi éma. Vuíchahasera táitauchavahini, taicha vuíchaha machavahini mápanahini te mávasa te anuma ema Jesús.

Apanapanepa eta napanereruanaahi ena achaneana mayehe ema Jesús

⁴⁰⁻⁴³ Tacahe, ena achaneana apapanepa eta napanereruana mayehe ema Jesús. Ena apamuriana achaneana, nacunachapa éma. Ánipa nacahe:

—Yátupiquene ema maca achane, émaripa ema profeta ema vicuchapaquenehi máiteruyarehi.

Ena apamuriana, ánivare nacahe:

—Émaripa ema maca ema Cristo.

Énasera ena apamuriana, téjecapavanarichucha. Ánipa nacahe:

—Galileo ema maca Jesús. Váiparinehiséra étainahi máuchusiha ema Cristo tayehe eta avasare Galilea. Taicha eta Sagrada Escritura táechajisihahi ema Cristo émayarehi mámariequenyarehi ema víyarahaini Rey David. Téhesera te avasare Belén eta máuchusihayare, étaichuhi te mávasahi ema víyarahaini Rey David —nacahepa.

⁴⁴ Natiarihivare ena apamuriana navarahaichucha náemeratacyarehi, váhisera napatsicavahini nacaratacahini.

Ena tuparairucana vahi náurica eta nasuapirahi ema Jesús ena achaneana

⁴⁵ Tacahe, ena suntaruana vanairucanaahi tichavanapa nayehe ena tivanecanaahi tuparairucanaahi. Vahi nájjaracavahini nacaratacahini éma. Tacahe, náichapa ena tuparairucana:

—¿Tájaha tacayema vahi iámapahini éma?

⁴⁶ Ena suntaruana najicapapa:

—Víti vahi vipatsicavahini vicaratacahini éma, taicha tétavicava eta máitupajjiasirava ema maca. Émahipuca ema Cristo vicuchapaquenehi. Nájina mácuti eta máechajisira ema maca achane —nacahepa.

⁴⁷ Tacahe, ena fariséoana náichapa:

—¿Éti apनावare ísapavaipahi tivayuaracahe ema mácara!

⁴⁸ Nájina émanaina ema tuparairuca viyehe viti nasuapahini ema máenatataji. Váhivare émanaripa vichamuri fariséo, vahi masuapahini.

⁴⁹ Énasera ena nani achanetatajana máimatirahanahi eta viyehe ley, náehicávanetatajipa. Táurica nacaicuñahini táicha —nacahepa.

⁵⁰ Matiarihivare ema Nicodemo, ema tipaiipuchahi ema Jesús te jena yátiquenehi. Fariséohivare éma. Máichavacapa:

⁵¹ —Váiparinehi vétavicaimahi eta viyehe ley vítijiricavahini vicapacahini ema achane. Tacamunúhi véchanumayarehi eta maviurevahi —macahepa.

⁵² Éna najicapapa:

—Vémeteaca pítí apanavare pijaneanahipuca éma, pítirichupuca galiléovihi. Vivanecavi péchajicuha eta Sagrada Escritura apaesa pecha vahi étaimahi te Galilea máuchusihayare ema profeta Cristo vicuchapaquene —nacahepa.

⁵³ Tacahe, te titápiricanapa eta náechajisihairahi ema Jesús, téjanerecanapa. Tiyanaracana te napenana.

8

Esu esena ticayepahi

¹ Ema Jesús májinaripahi. Tiyanaripa te tachachacu eta avasare, te cerro ticajarehi Olivoquiji. Tatiarihihi eta avasarechicha ticajarehi Betania, eta máitecapihahi éma.

² Te apanavarepa sache, te tijarahichichapa, tiyanavarepa éma tayehe eta Templo. Téjacapa éma, tímiturecapa. Namutu ena achaneana tiyananahi napauca, nasamararacayarehi éma.

³ Tacahe, sutiarhihi esu esena ticayephipuca, esu suvehahi ema apana achane. Ena escribánoana énapa ena fariséona, eta náimereuchirahi ésu, námapa te mamirahu ema Jesús te namurihi ena achaneana.

⁴ Tacahe, náichapa ema Jesús:

—Tata maestro, esu suca esena nachimaracahi ticayepahi, suvehahi ema apana achane.

⁵ Eta viyehé ley májjararuhavi ema víyarahaini Moisés, tímitucahavihi vicapacayarehi eta vitupisisirayare te márijahiana nácani tícapecaturanahi. ¿Tájahapuca picayema pítí? —nacahepa.

⁶ Éna nayaseserecachi ema Jesús, taicha natanucachi eta tivichayarehi éma. Émasera ema Jesús tétipaicapa tíájupairicapa te apaquehe te mavauqui.

⁷ Énaserá tímiyanavanarichucha nayaseserecachi. Tacahe, máesenimurihapa. Máichavacapa:

—Te etiarihipuca éti mapecaturareanahi, enerejicava ínapuca eyuca esu suca esena —máichavacapa.

⁸ Tacahe, tétipaicavarepa tíájupairicavarepa éma.

⁹ Eta nasamiráhi eta juca, téchavanarichuhinéni eta napecaturana. Títisrihacavanapa. Tásiha, tímutserahavanapa tíuchuchujícana. Nativapa tíuchucanahi ena ichavicapanana.

¹⁰ Te máesenicavarepa ema Jesús, nájinaripahi éna. Sucarineipahi esu esena. Tásiha, máichapa esu esena:

—Nuchicha, tiyananapa namutu ena timetauchavianahi. ¿Nájina apanainahini ena navaraha ticapacaviana?

¹¹ Tásiha, ésu suíchapa:

—Nájina, tata.

Éma máichavarepa:

—Núti apanavare, váhivare nímicapacavimahi. Piyana pichava. Váipasera picuapechava picuquicha eta pecatu —máichapa.

Ema Jesús, ema namicahu ena achaneana

¹² Te táequenepa eta juca, tépanavavarepa tímitureca ema Jesús. Máichavacapa ena achaneana:

—Nútira numicauchahehi eti achaneana te juca apaquehe. Eta tacahe, nácani téhicanuanayare, vahi téjecapavanaimahi. Taicha eta nímiturapiana, étapa tímícauchavacahi. Tásiha, nacatichainapa eta timapicu, vaipa napauchainahi —máichavacapa.

¹³ Tásiha, ena fariséona natiarihipahivare. Tacahe, náichapa:

—Pítijiváichucha péchajisiavahi. Tájina pisuapacarevaina.

¹⁴ Ema Jesús majicapavarepa:

—Tisuapacare eta juca néchajiriruvana, tayanapane nútijivahi néchajisiava. Taicha nímatihí nutuparahaichuhi eta nímeresiravayare. Nímathivare eta nucaijuheyare. Étisera vahi ímatihini távihapuca eta násinehi, váhivare ímati eta nucaijuheyare.

¹⁵ Éti étachucha éhicahi eta nayeherepiana nanacaqueneana ena íachucanaveanaini. Étasera tíchahéhi eta épuruiranihi. Nútisera vahi népuruhéimahi éti.

¹⁶ Jéhevareséra, te jácani sáchehaya, népuruhepapuca táichavenéhi eta emasuapirahi, tatupiruvayarehi eta népuruirahéya taicha vahi nácarichuimahi népuruhe núti. Matiarhihi ema Tata tivanecanuhi. Ema apana máimahahi eta emasuapajiraivahi. Tépuruheyahivarehi éma.

¹⁷ Te eyeherepi éti, te natiarihipuca apinana ena títametacarahiana, te ticuticacanahi eta náechajiriruva, tisuapacareanayarehi éna.

¹⁸ Ene nucahehi núti. Yátupihí eta numetarapiana. Émapa ema Ticachichanuhi, éma títametacahehi eta yátupirahí eta numetarapiana —máichavacapa.

¹⁹ Énasea nayaserecavarepa:

—¿Távihasica mávihahi ema ticachichavihi?

Ema Jesús majicapavarepa:

—Éti vahí ímatinu. Váhivare ímatimahi ema Ticachichanu. Te ímatinuhini, ímatipahivareini ema Ticachichanu —máichavacapa.

²⁰ Eta juca eta máechajiriruvanahi ema Jesús eta máimituresirahi tayehe eta Templo. Eta máejasinehi te tachacaya eta nanasirareana eta námavahuana. Nájinasea napatsicavahini nacaratachihini taicha vuíchaha máisapavacaimahi ema Viya eta nacaratasirainahini éma.

Ema Jesús tímereuchavapa eta émairahí Cristo

²¹ Ema Jesús tíápechavavare mametacavaca:

—Puiti tiánehípa eta nuyanirayare. Éti etanucanuinapa. Váhísera íchimavanuimahi. Émepenainapa eta epecaturana. Tímicuñacaheyare te infierno taicha vahí ecamapuravahini eta nutiarirahí, esuapanuhini. Taicha vahí ítujicavaimahi ítécapa te návihaya núti —macahepa.

²² Tásiha, ena ticatianacanahe náichacacapa:

—Mavarahainapuca ticapacavayare. Táitusiava macahehi eta máechajiriruvahi eta váhiji viratahaimahi véhica éma. ¿Távihapuca eta macaijuheya? —nacahepa.

²³ Ema Jesús máichavarepa:

—Éti tayehehi eta apaquehe. Nútisera tayahenuhi te anuquehe. Eta iávasahi éti te apaquehe iávihahi. Núti návasaichuhi te anuquehe.

²⁴ Eta tacahe, numetacahenumahi eta tanasinapa eta epecaturana te épenapa. Taicha te vahí esuapanuhini eta nútiquenérahí ema ecuchapaquenehi, tanasiyare eta epecaturana te épena —máichavacapa.

²⁵ Tacahe, nayaserecapa éna:

—Píti pímiyachava mavaneruhí ema Viya. ¿Nájahavisica pítinavaji?

Ema máichavarepa:

—¿Áyahepapuca numetacahe?

²⁶ ¡Tétavicavahi eta tamuracavahi eta esamureana! Tavaraha muraca eta nucajachi-raheya. Vuíchahasera nicha. Émasera ema tivanecanuhi, tatupiruvahi eta máechajiriruvana. Eta tacahe, eta néchajiriruvana núti eyehe eti achaneana, étarichuhi eta nusamaqueneanahi mayehe —macahepa.

²⁷ Énasea váhiquene nácaicutiarahini eta mametasiravacahi eta mayehe ema Maiya.

²⁸ Tásiha, máichavarepa:

—Jéheveresera te ecaturiphanupa te anuquehe, tapaenumavainapa ímatinuyare eta nútiquenerahí ema Cristo ecuchapaquenehi. Ecaicutiarayareva yátupihí nímitucahe eta máimiturapiana ema Tata. Vahí étaina nuviyahini te nuchutí nútijiriruvainahini.

²⁹ Puíticha, ema Tata ticachanenuhi, vahí majunijlacanuhini, váhivare nácarichuhini taicha nítauchaipahisera núti eta mavarahaqueneanahi éma —máichavacapa éna.

³⁰ Eta nasamirahí ena achaneana eta mametarapianahi, ichaperinehi eta nasuapirahí ema Jesús ena camuriqueneana achaneana.

Tímaticareana ena mavanarana ema Viya énapa ena tavanarana eta pecatu

³¹ Tacahe, ema Jesús máichavacapa ena tisuapanaripahi. Máichavacapa:

—Te ímiyanava ecaratacava eta esuapirahí eta nímiturapiana, éti yátupiquenehe nímiturehehi.

³² Tásiha, ímatinapa eta yátupiqueneana táuriqueneana. Vaipa vanaracahémahi éti —máichavacapa.

³³ Nararíhihisera ena ticanarajiricanahi éma. Náichapa:

—Víti mámariequeneháviní ema viáchucainí Abraham. Tájina vímatiyahini eta vítare-sirahí nacavanarahavihini. ¿Tájaha tacayema eta picahehi vaipa vanaracahavimahi? —nacahepa.

³⁴ Ema Jesús máichavarepa:

—Nutupiruva numetacahe: Namutu nácani tíchanahi eta pecatu, tavayuaruanahi éna. Nacutihí ena vanaracana taicha tétavicava eta tavayuasiravacahi.

³⁵⁻³⁶ Ímijachavapahi machichahehi ema Viya. Váhísera tacahehíni, taicha tavayuaruhehi eta pecatu. Nútisera nuti Machicha ema Viya nuratahahi nucuchucuhahe. Vaipa vanaracahémahi. Vaipa tivayucacahémahi eta pecatu. Jéhesare, yátupina eta machichaheheraya, máichecuarequireyare éta.

³⁷ Néchahivare núti eta mámariequenehérahi ema viáchucaini Abraham. Epanerechaichu-chasera ecapacanu, taicha ecaticahahi eta nimiturapianahi.

³⁸ Núti néchajisihahi eta máimechaquenénuanahi ema Tata. Étiserá étachucha íchahi eta mavanairipianarichuhi ema ticachichahe —macahepa.

³⁹ Éna najicapapa:

—Víti machichaequeneánaichaha ema viáchucaini Abraham —nacahepa.

Ema Jesús máichavarepa:

—Te yátupinahini machichaequenehénahini ema Abraham, ecutihini éma eta yátupirahi eta macaemataneasirahi ema Viya.

⁴⁰ Esapiahahi éti, epanerechaichucha ecapacanu. Ema Abraham, vahi tácahehini eta mapanereruhi éma. Núti numetacahehi eta yátupiqueneana mapanereruana ema Viya. Váhisera esuapanuimahisami.

⁴¹ Éti ícharichucha eta máichaqueneasahi ema ticachichahe —máichavacapa.

Ena najicapavarepa:

—Víti vahi apáchichahávina. Émanaichu ema ticachichahavi, ema Viya —nacahepa.

⁴² Ema Jesús majicapavarepa:

—Te yátupinahini machichahenahini ema Viya, etupiruvaipahini émunacanu. Taicha núti étaquenehi násiha me Viya. Vahi nútijiriruvainahini eta nítésirahi puiti. Nuvanecasivahi mayehe.

⁴³ ¿Tájaha tacayema vahi árataha eacutiara eta nimiturapiana? Étaserapuca eta emava-rairahi esama.

⁴⁴ Nútiserá nímicaecherachinaheya ema ticachichahe. Émara ema Váinaraji. Ema téchahehi, taicha evarahahi íchayare eta máichaqueneana éma. Taicha éma, ticapahi eta máitaresirahi te tépanavainapa. Váhiquene mávarahahini máehicahini eta yátupiqueneana. Étachucha máurica tivayuarereca. Tépiyahirahipaipa. Máurihayapara eta máimahi. Éma, náiyahi ena tépiyahirahiana.

⁴⁵ Eta echichairahi ema maca tépiyahirahi, váhiquenehíni esuapa eta juca nimiturapiana yátupiqueneana.

⁴⁶ Éti, ímijachanupuca jararihi eta néjecapiravahi. Nutupiruvahinenisera eta numetasi-rahehi eta yátupiqueneana. ¿Tájaha tacayema vahi esuapanu?

⁴⁷ Taicha nácani mayeaneanahi ema Viya, náuricayarehi nasamararaca eta máechajiri-ruvana ema Viya. Étiserá vahi machichahénahini ema Viya. Eta tacahe, vahi iúricahini esamararacahini eta máechajiriruvana numetaruheanahi —máich avacapa.

Te májinaichahahi ema Abraham, manasiqueneripahi ema Cristo

⁴⁸ Tacahe, ena ticatianacanahi náichavarepa:

—Píti achane picahequenetatajichucha. Yátupiquenehi mávaháruvhi ema Váinaraji. Táitusiava, máurishivihi máicha —nacahepa.

⁴⁹ Ema Jesús majicapavarepa:

—Vahi máurishinuinahini. Eta juca nucaemataneasirahi ema Tata, nuvarairahi ecuna-chayare éma. Étiserá épurunuichucha.

⁵⁰ Núti vahi nucunachavaimahi. Matiarhisera ema ticunachanuhi. Éma téchahavihi, te nútupuca nétupicavahi eyehe, téhesera étihipuca.

⁵¹ Nutupiruva numetacahe: Nácani tisuapanayare eta numetarapiana, máepenacacayare éna —máichavacapa.

⁵² Najicapavarepa ena ticatianacanahi:

—Jéhevare puiti, vímaticavápa eta pímaúrishivaquenehi. Apanasicáji ena profetana tépenanahi, émapa ema Abraham. Tásiha puiti, picahechajiriruvavare eta nácani tisuapanayare eta pímetarapiana máepenacacanyarehi.

⁵³ Pivarahapapuca picachuricayare ema viáchucaini Abraham, apanasica ema tépenahi, énapa ena profetanaini. ¿Nájahavisica piti pivayuyuacavapa? —nacahepa.

⁵⁴ Ema Jesús majicapavarepa:

—Tájina nucunachacarémahi, te nútijiricavaríchuchapuca nucunachavahi. Mararihisera ema Tata ticunachanuhi, ema ímijachaquenehi ema ecasiña éti.

⁵⁵ Éti ímijachavahi ímati éma. Váhinéni ímatihini. Jéhevare núti nímatihi éma. Téhesera numetacahéhini eta numaimatirahi, népiyahirahiripapucaini nácutiheripahini éti. Étaserá yátupiquenehi eta nímatirahi éma, nusuapahivare eta mavanairipiana.

⁵⁶ Ema víyahahini Abraham ema iáchucaini, tétavicavahi eta máurisamurevahi eta máimatiranuhi núti —máichavacapa.

⁵⁷ Tacahe, ena ticatianacanahi náichapa:

—¡Vúichaha pácayehe cincuenta áñoina! ¡Picaemuñavapa pímati ema víyahaini Abraham!

⁵⁸ Ema Jesús majicapavare:

—Nutupiruva numetacahe: Májinaichahahi ema Abraham, nunasiqueneripahi núti — máichavacapa.

⁵⁹ Tacahe, tiápajucavapa eta nasemanevahi. Navehapa eta márijahiana, nayucayarepaini éma. Tiúchucapasera éma eta te Templo. Tiyanapa tiyumurucavapa.

9

Ema Jesús macanaraca ema achane máimiuchurehi eta mapuchuquiva

¹ Tacahe, eta mapaisirahi ema Jesús te tajuhe eta avasare, máetupiacapa ema achane máimiuchurehi eta mapuchuquivahi.

² Eta véhisirapahi ema Jesús viti máimitureana, viyaserecapa éma:

—Tata maestro, ¿tájahapuca tiviuachahi ema maca eta mapuchuquivahi te tiúchucainapa? ¿Énapuca tiviuachanahi ena ticachichana, téhesera mapecaturaichuhípucá éma? —vicahepa.

³ Tacahe, tijicapahavipa:

—Váhinéni étaina taviuchahini eta mapecatura éma. Énaripa ena ticachichana, váhivare énaparacaina. Mataparahaichuhi me Viya, mavarairahi nímerecayarehi puiti eta máitupajijiasiravahi ema Tata.

⁴ Núti apanava nucamapurayare eta sache níchirayare eta máematanerepiana ema Tata eta mavanésiranuhi taicha járajapavare eta yati nájina ticaematanena.

⁵ Ticamapuravacarerichaha eta nutiarihirahi te juca apaquehe nuti namicahuhi ena achaneana —macahepa.

⁶ Tásiha, tiátutuicapa te apaquehe ema Jesús. Máepiyacapa eta tiúrajichicha te matuture. Mayajihauquichapa ema púchuqui.

⁷ Tásiha, máichapa:

—Piyana picasipauquipana tayehe eta noque ticaijare Siloé —máichapa. (Te véchajiriruva, eta Siloé ticaijare Vanairuca.)

Tacahe, ema púchuqui tiyanapa ticasipauquipanahi. Tjáhúchava tímairirica. Tichavapa te mapena.

⁸ Náraminehi ichape ena machacayapenanahi énapa ena tímatianahi eta mapuchuquivainihi. Tásiha, nacahepa:

—Vímatihí ema émana limosnerohi púchuquihí. Émasera ema maca achane tímairiricahí. ¿Apanapuca éma? —nacahepa.

⁹ Najicapapa ena tímatianahi yátupi:

—Émara ema maca.

Ema apana, macahevare:

—Vahí émaina. Mavasichucha.

Émasera ema achane púchuquinihi máichavacapa:

—Nútira núti púchuquinihihi —macahepa.

¹⁰ Tásiha, nayaserecapa ema achane:

—¿Tájaha pícharacavahi eta pímaírisirahi? —náichapa.

¹¹ Éma majicapapa:

—Ema maena achane ticaijare Jesús máepiyacahi eta tiúrajichicha. Tásiha, tiyajihauquichanupa. Tivanecanupa nucasipauquipana te noque Siloé. Te nuyanapa nucasipauquipanahi, nímaíricarinehi —máichavacapa.

¹² Éna náichapa:

—¿Táviha ema mácara achane?

Éma majicapapa:

—Jéhepuca, vahí nécha.

Ema tuparairucana navaraha náecha eta manarasirahi ema púchuquinihi

¹³⁻¹⁴ Tacahe, nasamairiricapa ena fariséoana eta manarasirahi ema púchuquinihi. Tásiha, nacavanairipipa náepana ema púchuquinihi, taicha natanucahi éna eta tiviuachayarehi ema Jesús. Ichaperinehi eta nacatianasirahi éma táichavenehi eta máipuresirahi te jena sache sávarumuhquenehi.

¹⁵ Te títecapapa ema púchuquinihi, nacatupihapa éma te namirahu. Nayaserecapa tájahahípucá táicharacavahi eta máimairirisiraipahi. Éma, máichavacapa:

—Ema achane típuchanuhi tiyajihauquichanuhi eta máture. Tásiha, nucasipauquipa. Nímaíricapa —macahepa.

¹⁶ Nararihi ena nacahepa:

—¡Ema mácara achane vahi machaneraina ema Viya, taicha vahi mapicauchahini eta sávarumuhuana tacapicahuquene!

Ena apamuriana, ánvivare nacahe:

—Váiparinéhiserá máituruequenehaimahi maicha eta tíaramicareana te yátupinahini macapecaturarahihini —nacahepa.

Tacahe, apanapanenejiana eta napanereruana.

¹⁷ Tásiha, nápechavare nayasereca ema achane:

—¿Tájaha picayema píti mayehe ema achane ticaimairiricavihí?

Éma, máichavacapa:

—Núti németeaca émahí ema profeta.

¹⁸ Énaserá ena tuparairucaná váhiquene nasuapahini eta émairahí ema púchuquini. Tásiha, náimichuhapa ena ticachichanahí.

¹⁹ Nayaserecapa:

—Vívaraha víyaserecahe: ¿Yátupihí eta máimiuchurehí eta mapuchuquiva ema pichicha? ¿Tájaha táicharacavahí eta máimairirisirahí puití?

²⁰ Ena ticachichanahí najicapapa:

—Yátupi ema maca ema vichicha. Máimiuchurehivare eta mapuchuquivainihí.

²¹ Váhiserá véchahini tájahapuca táicharacavahí eta máimairirisirahí. Váhivare vecha nájahapuca ticaimairiricahí. Émaina eyasereca. Ajairaripa éma. Émapa téchinavahí eta mametasiraheyare —náichapa.

²² Tacahehí eta najicapirahí taicha tipicanahí éna nacaicuñahini, nacaquijihivaréni te náurujisirarevana taicha ena ticatianacanahí ema Jesús nacuchucapa eta vantu, nacavaripirapa nacuija nasuapa ema Jesús émairahí ema Cristo.

²³ Eta tacahéhi eta náichirahí: “Émaina eyasereca. Émapa téchinavahí”.

²⁴ Tacahe, ena tuparairucaná nápechavare náicha ema achane púchuquini. Ánipa nacahepa: —Pátupiruva pimetacahaví te máijarepuca ema Viya eta pinarasirahí. Vítiserá vímatihí ema maena achane tisipecaturarahí —nacahepa.

²⁵ Éma majicapavarepa:

—Jéhepuca, váhi necha núti te tisipecaturarahihipuca éma. Tacarichu néchahí eta nupuchuquivainihí nutí, puítiserá nímairiricaripa máicha —macahepa.

²⁶ Nápechavare nayasereca éna:

—¿Tájaha máicharacavihí eta macaimairirisiravihí?

²⁷ Majicapavarepa éma:

—Cápachi numetacaheripa. Vuíchahacaru esuapanu. ¿Evarahahipucasera éhicayare éma éti apanavare? —máichavacapa.

²⁸ Tacahe, nacajachapa éma:

—¡Pítiserá péhicaipahí éma! Vítiserá véhicahí ema víyarahainí Moisés.

²⁹ Taicha véchahí eta máechajisihahí ema Viya ema Moisés. Émasera ema máenatajají, vahí vecha távihapuca másiha —nacahepa.

³⁰ Ema achane majicapavarepa:

—¡Tájina échaqueni éna éti páureanasamí! Vahí ímatiequeneha távihapuca másihahí ema ticaimairircanuhí.

³¹ Váhípuca echa váiparinéhí tismacaremahí mayehe ema Viya mácaní achane ticapecaturarahí. Nacarichu tisuapacareanahí nácaní títauchanahí eta mavanairipianahí ema Viya.

³² Váhivare visamairirica nácaní nacaimairiricahini ema mácaní máimiuchurehí eta nupuchuquiva.

³³ Núti németeaca te tacuijahini eta vanairucairahí me Viya ema maena achane, váhiva macuratahahini maicha eta tíaramicareana máichaqueneanahí —máichavacapa.

³⁴ Tacahe, tise-manapa éna eta máichiravacahí. Nacahepa:

—¡Píti pétaviurequenehí eta picapecaturaivahí! ¡Éta tivíuchavihí! ¡Puití pisapíhapa pivarahaya pímitucahaví víti! —náichapa.

Tásiha, nacuchucapa éma.

Ena tépiyacavanahí púchuquiana taicha eta namasuapajiravahí

³⁵ Ema Jesús masamairiricapa eta náquijisirahí ema máipuchaquenehí. Tásiha, te macainunavarepa, máichapa:

—¿Pisuapapuca píti ema Machicha ema Viya?

³⁶ Ema achane majicapapa:

—Pimetacanupainí, tata. ¿Nájahapuca ema Machicha ema Viya, apaesa nusuapahini? —macahepa.

³⁷ Ema Jesús majicapapa:

—Nútiripara nuti pímahaquenehi, nuti péchajirunuhi.

³⁸ Tacahe, ema achane tépuyucapa te mamirahu ema Jesús. Tásiha, máichapa:

—Nusuapaví, Tata —macahepa.

³⁹ Ema Jesús máichavarepa:

—Núti tímitecanuhi te juca apaquehe, nímimatichayare ena máimatirahanahi eta yátupiqueneana máechajiriruvanahi ema Viya, apaesa náimatequeneha. Eta juca tímicutijiricavahi nucaimairiricayarehi nácani púchuquianahi tayehe eta máechajiriruvanahi ema Viya. Nácanisera tímijachavanahi téchemarahiana, nímahaya te najacapapuca eta nímiturapi, tísapavanayarepuca eta nucaimairirisiravacayare. Téhesera vahi nacuisapava, tiápajupanavainapa eta napuchuquivayare. Éta naviurevayarehi —macahepa.

⁴⁰ Tacahe, ena fariséoana natarihiqueneanahi te machacaya, eta nasamirahi, nayase-recapa:

—Píti pímiyachahaviripapuca púchuquihavihi. ¡Váhira púchuquihavinahini! —nacahepa.

⁴¹ Ema Jesús majicapavacapa:

—¡Éti épiyacavahi púchuquihé! Taicha vahi evaraha esuapanuhini. Tásiha, tanasipa eta eviurevahi táichavenehi eta epecaturana. Te yátupinahipucaini esuapanuhini, tacuijahini taviuchahehini —máichavacapa.

10

Ema Jesús tímicaecherachava eta majaneasirayare ena téhicanahi éma

¹⁻² Tacahe, ema Jesús máechajisihahi eta tajaneacasiva eta uvesa, máimicutichirahi eta macatiuchirahi ena téhicanahi éma. Ánipa macahe:

—Nutupiruva numetacahe: Mácani tijanearecahi eta uvesa, tétavicavahi eta máechapajiririrayarehi. Te yátiana, máimisipayarehi te tapena, tásiha, máeratacapa eta tapajacura eta majaneasirahi, apaesa tájina tacuquichiravaina. Taicha nararihi ena tíamerahiana, ticaetemarahianavare. Navarahahi ticayumuruquianayarehi eta nasiapirayarehi te tapena eta uvesa, námechayarehi.

³ Émasera ema pástulero, te yáticarahi mavejiéquenehahi eta tapaja, máichuhahi eta táijareana eta uvesana. Eta máichuirahi, tiúchuchujicanapaipa táehicapapa, taicha táimatiahuchahi ema pástulero.

⁴ Éma, máinapumirauchapaipa eta mayeheana uvesa. Táehimurihapaipa tamutu eta uvesana, taicha táimatihí eta mahú.

⁵ Váiparinehiséra táehicaimahi mácani apanaquene achane. Tavarahayarehi tijunaracana taicha vahi táimatiahuchahini ema apanaquene —máichapa ema Jesús.

⁶ Ema Jesús máimicutichinahi eta juca. Váhisera nácaicutiarahini éna eta máimitusiravacahi.

Ema Jesús ema yátupiquenehi tijaneacahavihi taicha máuriquenehi éma

⁷ Ema Jesús mápechavaca máimitucavaca. Ánipa macahe:

—Nutupiruva numetacahe: Núti nímicutijiricavahi tapajacurahí eta tapena eta uvesa te tanarasirarehi éta.

⁸ Tínapumirauchanuanahi ena tépiyacavana máestroana, váhisera máimitureanainahini ema Viya. Tiámerahianachucha éna, ticaetemarahiana. Váhisera táehicaimahi eta uvesana taicha vahi táimatiahuchahini éna.

⁹ Núti nujaneacavacahi ena nuchanerana, nucutihí eta tapena eta uvesa. Nácani ticasiñavana eta nuyehe, nucatiuchayarehi núti. Tájina náichavaimahi, tájinavare náechuricaimahi. Néchavacahi núti.

¹⁰ Ema tíamerahi, tímitecahi éma tíamerecayare, ticaparecayare. Macaejanerepaicayareva. Nútisera tímitecanuhi níjaracayare eta náitaresiraya. Máitavacayare eta náuricacarevayare nícha.

¹¹ Énerichuvare núti yátupiquenehi eta nujaneasiravacahi ena nuchanerana, tacutihí eta majaneasiravacahi mácani achane eta mayeheana uvesa. Núti níjarareca eta nítaresira eta nucatiuchiravacahi.

¹² Mácanisera tupairucachucha, vahi macatiuchaimahi eta uvesa. Te máimahapa eta tinicarahi sárare, tijunayarehi. Vahi tipatsicavaimahi macatiucha eta uvesa, taicha vahi mayehenahini. Tacahe, eta tinicarahi ticamapuravainapa tacapacayare eta uvesa. Eta tacaitruana, téjanerepaicanapa.

¹³ Ema maca achane tijunaya taicha vahi téñamavaimahi tayehe eta uvesa. Éma tímijachavahi majaneacavaca, étachuchasera macunehi eta mavacha.

¹⁴⁻¹⁵ Núti yátupiquenenu pastulérunu taicha tíurihi eta nujaneasiravaca ena nuchanerana. Tímatinuhivare ema Tata, tacutihí eta nímatirahi núti éma. Énerichuvare tacahehi eta nímatiravacahi ena nuchanerana. Éna tímatinuanahivare. Eta néñamairavacahi, núti nímiararecavahi eta nítaresira náichavenehi éna.

¹⁶ Nararihivare ena apamuriana nuchanerana. Váhisera ánina nacavasa. Nucurujicavacayaresera, népanayareva. Tisuapanuanayareva namutu. Étanayaréichupa eta náumuriva. Nucarinenapa núti néchavaca.

¹⁷ Ema Tata, yátupihí eta máemunasiranu taicha nímiararecahi eta nítaresira náichavenehi ena nuchanerana. Nuchavayaresera níta reca.

¹⁸ Nájinanéni napamicanuhini eta nísapiravaya ticapacanuana. Níjararuvahi núti eta nacapasiranuya. Taicha nutuparahaichuhi me Tata núti néchinavayarehi. Níjararuvayare. Tásiha, nuchavayareva níta reca —máichavacapa.

¹⁹ Eta nasamirahi ena achaneana eta juca máechajiriruvanahi ema Jesús, típutsimuriavacavarepa.

²⁰ Natiarihihi ena ticatianacana. Nacahepa:

—¿Tájaha tacayema esuapa ema mara? Máurishi éma, mávahárupuca ema Váinaraji —nacahepa.

²¹ Énasera ena apamuriana, ánvare nacahe:

—Te yátupinahini mávaháruinahini ema Váinaraji, vahi macuratahahini macaimairica ema púchuqui. Nájinavare mácuti eta máechajisira —nacahepa.

Ena tuparairucana vahi návarahahini najacapa ema Jesús

²² Te jena sácheanahi diciembrequenehi eta ticasarahimuhuana te Jerusalén, ena achaneana napiestachahi eta año táepaniravahi náetupirica eta Templo.

²³ Ema Jesús matiarihíhi te tajuhe eta te Templo te tayehe eta alar máepiyarúhi ema Reyni Salomón.

²⁴ Te náimahapa ena ticatianacana, nachayacapa ema Jesús. Tásiha, náichapa:

—¿Tájaha tacayema pímpanererechahavihi? Pátupiruvapa pimetacahavi te yátupivihupuca pítiquenehi Cristo —náichapa.

²⁵ Ema Jesús majicapavacapa:

—Cápachi numetacaheripahi. Vuíchahacaru esuapanu. Eta juca níchaqueneanahi ímahaqueneanahi tásihaqueneanahi me Tata, étaripara tímereuchanuhi.

²⁶ Étisera váhiquene esuapanu. Taicha vahi étinahíni nuyehenenahini uvesa.

²⁷ Eta nuyehena uvesa tímatiahuchanuanahi éta. Núti apanavare nímativacahivare. Eta tacahe, téhicanuanahi.

²⁸ Níjaracavacayaresera núti eta náitaresirayare máichecuaraquireyare. Váhiquene náimahahini eta náicuñayaréni. Nájinavare tiverejicanuanaimahi ena nujanearuanahi.

²⁹ Taicha májararunuanahi ema Tata. Éma, nájina ticachuriacainahini. Nájinavare tiratahaimahi tiverejicaimahi ena majanearuanahi.

³⁰ Taicha núti émapa ema Tata vicuticacahi eta vítupajijiasiravavacahi —máichavacapa.

³¹ Tacahe, ena ticatianacana natanucapa eta márijahiana. Navarahapa natupisicayarehini ema Jesús.

³² Máichavacapasera éna:

—Ichapemuríhi eta níchirahi eta táuriqueneana ímahaqueneanahi, májararuanahi ema Tata. ¿Étaserapuca tivichanuhi eta evarairahi etupisicanu te márijahi?

³³ Tacahe, najicapavarepa:

—Vahi étaparacaina eta píchirapuca jácani táuriqueneanahi. Eta tivichavíhi pímjachiravahi machichavi ema Viya. Pítirichuhi vicutiquenehi achane. ¡Pítisera pímjachavaipahi Vívavi! —nacahepa.

³⁴ Ema Jesús majicapavarepa:

—Eta ajureca te Salmo, vahi ímatiequenehahini eta táechajisiaherahi eta macayemaquenehi ema Viya: “Viyahéhi nícha eti nunerejiruheanahi”.

³⁵ Véchahi eta tacayemaquenehi eta ajureca, vahi tépiyahirahimahi. Taicha tamutu eta táechajiriruvana eta Sagrada Escritura táechajisihairahi eta juca máechajiriruvanahi ema Viya. Nácani nacatuparahahi me Viya, éma tímijarechavacahi “Víanahi”.

³⁶ Nútiripa púiti, nuvetijipa nímiarrechacare “Viya” taicha émarichu ema Viya tinerejicanuhi, tivanecanuhi eta núcupaisiraya te juca apaquehe.

³⁷⁻³⁸ Núti nítaucharahi eta mavanairipiana ema Tata tivanecanuhi. Tásiha, tatuparacahe esuapanuvaneyarehi. Tayanapane vahi tisuapacarehi eta nímiturapiana eta eyehe, étapaseraini esuapahini eta tíamicareana níchaqueneanahi. Étara tímereuchanuhi eta mávahásiranuhi ema Tata, návahásirahivare núti apanava éma —máichavacapa.

³⁹ Tacahe, tiápechavanavarepa navaraha nacaratacayarehini ema Jesús, napresuchayarehini. Émasera tiúchucavanepa.

⁴⁰ Tásiha, tiyanavarepa ema Jesús te tinapaica te apachara eta cajacure Jordán. Manasi-panapa eta te avasarechicha Betábara te máicachasirisinehini ema Juan.

⁴¹ Camuriana ena achaneana tiyanaracanaahi eta mayehe. Tásiha, nacahepa éna:
—Ema víyarahaini Juan, tayanapanehi tájina máimerecaini eta tiáramicareana, yátupihisera eta profetairahi éma, taicha tamutupa eta mametarapiana mayehe eta maca Jesús, vímaharipa puiti eta yátupiqueneanahi —nacahepa.

⁴² Tacahe, ánaqui camurianahi ena achaneana tisuapanahi ema Jesús, téhicanahivare.

11

Eta máepenira ema Lázaro

¹ Matiaríhi ema achane ticaijare Lázaro. Éma, máemunacasarehi ema Jesús. Ticavasahi tayehe eta avasarechicha ticaijare Betania, návasahivare ena maparapenaveana, esu María ésupa esu Marta. Te jena sácheana, ticajumahi muraca ema achane.

² (Esu suca María, ésuhi esu tisipapevachahi ema Jesús tayehe eta táijiyequenehi perfumeama. Suájapevachahivare te suchutimaca.)

³ Tacahe, ena náni apinana esenana ticaparapecacana náimivanerecapa, nametapanarehi ema Jesús eta macajumairahi muraca ema Lázaro.

⁴ Te máechapa ema Jesús, macahepa:

—Eta juca jumare, vahi títaimahi ema Lázaro. Matuparahaichusera me Viya, mavarairahi nímereca eta máitupajijiasirava éma, nímeresirayarevá eta nítapajijiasiravahi nuti Machicha, apaesa nacunachahavi ena achaneana —macahepa.

⁵ Jéhesare, ema Jesús yátupihi eta máemunasirahi ema Lázaro, énapa ena esenana maparapenaveana.

⁶ Váhisera mayanavanehini máimahapanahíni ema máemunacasare. Manasirichaha apinahi sache.

⁷ Tásiha, te apanapa sache, ema Jesús máichahavipa viti máimitureana:

—Viyana vichava te Judea.

⁸ Víti vijicapapa:

—Tata maestro, cáperichaha ena ticatianacavianahi navarahahi ticapacaviana. Tásiha, puiti pivarahaichaha piyanayare ánaqui nayehe —víchapa.

⁹ Ema Jesús máechajisihahi eta mavanecasivahi. Máichahavipa:

—Vahi táéñamavácarehini. Yátupi eta sache ticayehe doce hora. Te vipaica te sáchemuhu, vahi vicáyutetuímahi taicha vímairiricahi tayehe eta tijarahi.

¹⁰ Nácanisera tipaicanahi te yátimuhu, ticayuteterejianayarehi taicha vahi náimairiricahini. Ema Tata tijaneacanuhi nútí taicha nítauchahi tamutu eta mavarahaqueneana. Vahi máisapahini jácani náichanuhini; tapaenumava máimaha tiuri —macahepa.

¹¹ Tacahe, te táequenepa, macahevarepa:

—Ema vémunacasare Lázaro máenahi tímacahi. Nuyanayaresera nucajamipanayare.

¹² Víti víchapa:

—Tata, te tímacahipuca éma, étapa táicutiarahi eta mativareraya —víchapa ema.

¹³⁻¹⁴ Víti vímijachaichucha yátupihí tímaca. Tásiha, ema Jesús matupirupa timetacahavíhi:

—Tépenaipa ema Lázaro.

¹⁵ Núrisamuresera eta májanuirahi eta ánaqui. Tiúripanaya eta eyehe taicha ímahaya eta níchaqueneayare apaesa esuapanu. Puiti viyanaya vímahapanayare —macahepa.

¹⁶ Tacahe, ema vichamurí Tomás máichahavipa viti machamuriana:

—Viyana viti apanavare. Te nacapacapuca éma, nacapacahavirineva viti apanava —máichahavipa ema Tomás. (Tatiaríhivare eta máchucarapi Chame.)

Ema Jesús, ema téchahi eta macaechepusirayare ena náepenaqueneana, máimichavayare macaitareca

¹⁷⁻¹⁸ Tiuri, viyanapa vicaijuhe eta avasarechicha Betania. (Eta Betania tachacayahi eta Jerusalén, apina kilómetro y medio eta tayerehivahi.) Tásiha, te viánehipaipa, timetacahaviana pa cuátroripa sache eta náecarairahi ema Lázaroini.

¹⁹ Camurianahichahasera ena achaneana te napena ena maparapenaveana, esu Marta ésupa esu María. Nacamitisiripanahi apaesa vahi nacuiyaharacavaicha ena apinana.

²⁰ Tacahe, te suéchapa esu Marta eta máitecapirayarehi ema Jesús, tiyanapa suácapahi. Ésusera esu María sunasirichuhi te tajuhe eta peti.

²¹ Te suéchajicapa esu Marta ema Jesús, sumetacapa eta máepenirahi ema suparapeini. Tásiha, suíchapa:

—Tátachicha, te pitirihinahini eta ani, vahi ñicuepenahini eñi nuparapeini.

²² Váhiserá néñamava. Nucasiñavihi eta piyehe. Pímahinepa píti eta pícharacaya eta piyasea-sirayare eñi Viya —suíchapa.

²³ Ema Jesús majicapapa:

—Tiuri eta péñamirahi ema piparape. Váhiserá picupica. Tichavayare títareca te pimirahu —máichapa.

²⁴ Esu Marta suíchavarepa:

—Yátupi, Tata, néchahi eta ñichavirayare títareca te táitecapapa eta sáchezare náechepusiraya ena náepenaqueneana —suahepa.

²⁵ Ema Jesús máichavarepa:

—Jéhevare núti, nucaitarerahi nácani nucaecheppureanaya. Táitusiava numetacavi: Nácani tisuapanuanayare, tayanapanepuca náepena, nucaitarecayaresera núti.

²⁶ Ene ecaheyare éti éhicanuanahi, tayanapanepuca épenayare, nútisera nucaitarecaheyare. Tásiha, tájinapa tímiapéchaimahi épenahini. ¿Pisuapanupuca eta níchiravihi? —máichapa.

²⁷ Ésu sujicapapa:

—Nusuapavi, Tata. Pítira yátupiquenévihi Cristo, Ñichichavi eñi Viya. Pítiripa piti vicuchapaquenévihi píteruyarehi te juca apaquehe —suíchapa.

Ema Jesús tíyaha te tachacaya eta máecari ema Lázaro

²⁸ Te títapiricapa eta suéchajisirahi esu Marta mayehe ema Jesús, tiyanapa suíchuhapanahi esu suparape María. Sujajaicapa, ani tacachehi eta suíchirahi:

—Eñi Maestro ñirarihi eta ani. Ñicavanairipi piyanayaréji —suíchapa.

²⁹ Te susamapa esu María eta matiaríhírahí ema Jesús, téchepurucavanepa. Tiyanavarepa suácapahi.

³⁰ Taicha ema Jesús vuíchaha máitecapahini te napena. Manasirichuhi eta te suácapinehi esu Marta.

³¹ Eta náimairahi ena suchimarana eta suéchepusirahi súchusirahi esu María, tiyananapa náehiequenehahi. Náimijachahi éna tiyanayarehi ésu te máecari ema suparapeini, tíyahapanayarehi.

³² Tacahe, te suítecapauchapa ema Jesús, esu María sutupirupa tépuyuchi te máivapechacaya. Tásiha, suíchapa:

—Tátachicha, te pitirihinahini eta ani vahi ñicuepenahini eñi nuparapeini —suíchapa.

³³⁻³⁵ Tásiha, tíyahapa esu María, énapa ena téhicanapahi ésu. Eta máimairahi ema Jesús eta náiyairahi, ticatisamurevavarepa éma apanavare. Tíyahavarepa. Tásiha, mayaserecapa:

—¿Táviha écaríhahi? —máichapa.

Ena najicapapa:

—Yare, Tata, pímaha.

³⁶ Tacahe, ena natiaríhiqueneana eta náimairahi eta máiyairahi ema Jesús, téchajicacana:

—Piáha. Tíyahavaréra éma apanava. Tétavicavahipucáji eta máemunasirahi —nacahepa.

³⁷ Ena apamuriana, ánvare nacahe:

—Ema maca ticaimairiricahi ema púchuqui. ¿Tájahapuca vahi macanaracahini ema Lázaroínisami, apaesa vahi macuepenahini? —nacahepa.

Eta máechepusira ema Lázaro te máecari

³⁸ Tacahe, ichape eta macatisamurevairahi ema Jesús. Mapauchapa eta ecari nasecajueruhi te mari. Tatiaríhivare eta márime tajlhajachahi eta tapajacura eta ecari.

³⁹ Tacahe, ema Jesús mavanecavacapa:

—Ecaerajica eta jara tachujíhi eta máecari.

Ésusera esu Marta suíchapa:

—Tata, németeaca tijeheripa jácani taicha cuátrorípahi sache eta ñépenirahi —suahepa.

⁴⁰ Ema Jesús máichavarepa:

—Cápachi numetacavipa, te pisuapanu yátupina, pímahayare eta macunachacarevahi ema Viya taicha nímercaya eta tamutuirahi marataha —máichapa.

⁴¹ Tacahe, nacaerajicapa eta márime. Tásiha, ema Jesús máesenicapa te anuma, tiyujaracacana:

—Tata, nuhasulupayachavi eta pisamiranuhi.

⁴² Váhiquene péñauchanu eta jácani nuyasearuviana. Puiti nuyaseacavi eta pítipajijíásirava, apaesa náimaha ena nani achaneana natiaríhiqueneanahi, apaesa nacunachavi. Náechavare eta pítirahi pivaneanu —macahepa éma.

⁴³ Te títipiricapa eta mayujarasirahi, máimararacapa eta ecari. Tipiaracapa muraca, ánipa macahe:

—Lázaro, pécheputa eta te jara piávihihi. Yare, piúchuca —máichapa.

⁴⁴ Tacahe, ema máepenaquenénihi tíuchucapa. Mámapaichuhi eta máyuruhanahi étapa eta máepacamirahi. Tásiha, ema Jesús mavanecavacapa naveruruaca eta máyuruhanahi, apaesa tiyanayarepa te peti.

Ena tuparairucana napanerechapa nacaratacayarehi ema Jesús
(Mt 26.1-5; Mr 14.1-2; Lc 22.1-2)

⁴⁵ Tacahe, ena suchimaranahi esu María, eta náimairahi eta juca máichaquenéhi ema Jesús, camurianarinehi ena tisuapanahi éma.

⁴⁶ Natiarihiserá ena apamuriana tiyananapa nayehe ena fariséoana ticitianacahahi ema Jesús. Eta namaurisirahi eta juca, tiyanana nametapanavaca ena tuparairucana.

⁴⁷ Tacahe, ena tuparairucana náimichuhapa namutu ena juéseana, ticurujicacanapa. Tásiha, nacahepa:

—¿Tájaha vícharacavayare, tátanaveana? Ema maena achane Jesús, tétavicavahi eta máitupajijiásiravahi máichahi eta tíaramicareana.

⁴⁸ Vahi táurichahini vísapahini máimiyannahini máitarecahini, machu námaturiana náehica ena achaneana, masapihainapapuca nasuapayare éma. Machu ena aquenucana romanoana náimijachinapapuca tatiarihiyare eta tíñepiyare. Tisemanainapapuca. Nárjapainapapuca eta ani. Náquipaisinahavinapapuca eta viávasa. Nasapihainapapuca tiverejicahavianayare eta viávacureanahi —nacahepa.

⁴⁹ Matiaríhihi ema achane tciajarehi Caifás. Émahi ema ichapequenéhi tiyujaracarahi te jena áñohe. Tacahe, máichavacapa éna:

—Éti vahi ímatiequenéha eta víchararacavayare.

⁵⁰ Németeaca nútí tíuripana máepena ema émanaina achane mavachareca eta náitaresiraina namutu ena apamuriana achaneana —máichavacapa.

⁵¹ Eta juca máechajiriruvahi ema Caifás, váhinéni étainahini táichahini eta máechemaraivahini éma. Étahi eta émairahi ema ichapequenéhi tiyujaracarahi te jena áñohe. Manacasamureruichuhi ema Viya eta máechajisihahi eta máepenirayare ema Jesús náichavene ena israelítana.

⁵² Étasera juca máepenirayarehi ema Jesús, mavacharecainapa eta naviurevahi namutu nácani machanerananayarehi ema Viya te apanapanenequeneana avasareana. Vahi tácarichuhini eta naviurevana ena israelítana. Taicha te táequenénapa, mavarahahi macurujimuríhayarehi, étamurianayarehi namutu éna.

⁵³ Tacahe, tacutipa eta napanereruhi ena tuparairucana eta nacapasirayare ema Jesús.

⁵⁴ Eta tacahe, ema Jesús vaipa máimeracavahini eta te Jerusalén. Majunijicapa eta Judea. Tiyanapa eta te mávapahi apaquehe tachacaya eta avasare tciajare Efraín. Manasipanapa ánaqui, vítipa viti máimitureana.

⁵⁵ Tacahe, semanayare eta Pascua, vippiestara viti israelítana. Namutu ena achaneana tiávihana te apanana avasareana tiyanaracanapa tayehe eta Jerusalén. Tisipahacavanayarehi taicha náimijachahi ani tacahehi tacuija nacuquichiravaina eta náimeresirayare me Viya.

⁵⁶ Tacahe, ena achaneana nacunepaipahi te Jerusalén ema Jesús. Eta návihairahi te Templo, téchajiricacanaripa. Ánipa nacahe:

—¿Tájaha ecayema? ¿Títecayarepucáji ema Jesús puiti juca piéstaya? —nacahepa.

⁵⁷ Énaripa ena tuparairucana tivanerecanapa ena ticuneanayare ema Jesús. Te matiaríhinapuca, nametapanayarepa ena tuparairucana. Tásiha, éna náimicaratacayarepa.

12

Esu María susipapevacha ema Jesús te perfumeama
(Mt 26.6-13; Mr 14.3-9)

¹ Séisirinehi sache eta piéstayarehi eta Pascua. Tichavavarepa ema Jesús tayehe eta avasarechicha Betania, mávasahi ema Lázaro, ema macaechepurehi te máecari. Tacahe, ena máemunacasareana tíurisamureanarinehi eta náimairahi eta máitecapirahi ema Jesús eta nayehe.

² Ticacherujianapa náenicayarehi. Ema Lázaro macachanehi te mesa eta nanisirahi. Esu Marta téchapajiricavacahi.

³ Tacahe, esu María suámapaipa eta táijiyequene perfumeama te bótechicha. (Te navírare eta juca perfumeama te nasucure ticaijare nardo.) Tétavicavahi eta tasivachavahi. Ticutiama-cacahi te botella eta tasiamaavahi. Tacahe, suépusapevachapa ema Jesús, suájapevachapa te suchutumaca. Enevanerine táimicajuecha eta peti eta táijiyevahi.

⁴ Matiarihíhi ema vichamuri Júlasí. Ema maca émarichu tjararecayarehi ema Jesús. Témechajicavapa éma:

⁵ —¿Tájaha tacayema váhivaréyapa tacaijararecasihini eta juca tasivachaquenehi perfumeama? Vivehahini eta camuriquene plata, tásiha, vímicatasihahini ena páureana — macahepa.

⁶ Ema maca Júlasí, vahi étainahini eta majapanuirainahini ena páureana. Étachuchanéni mavarairahi mayumuruca eta plata, taicha ema tiámerahíhi. Títecapa émarichuhivare tiúnarecarahi eta plata.

⁷ Tacahe, ema Jesús máichapa:

—Pésamirica esu suca esena. Suíchachaha ésu eta suvarahaquene taicha nícumunuichuhi eta juca tayeheyarehi eta nécarí.

⁸ Ena páureana, tamutuchucha sácheana eta ecachaneravacayare éna. Te jácáni ávarahapupuca ímicatacayare, nararihi ena ticamunuana. Nútiserá vahi nánasiquenémahi eta eyehe —macahepa.

Ema Lázaro, navarahavare nacapaca

⁹ Tacahe, camuriana ena tisamairicanahi eta matiaríhirahi ema Jesús te Betania. Tiyananapa náimahapanayarehi. Énerichuvare náimahapanayahiva ema Lázaro, ema máechepurehi te máecari.

¹⁰ Tacahe, ena tuparairucana napanerechavarepa nacapacayarehi ema Lázaro.

¹¹ Taicha émavenéhi tíchahi eta nasuapiraipahi ema Jesús ena camuriqueneana achaneana. Vaipa nasuapahini eta navanairipiana ena tuparairucana.

Títecapa ema Jesús te Jerusalén

(Mt 21.1-11; Mr 11.1-11; Lc 19.28-40)

¹² Te apanapa sache, ena nani achaneana táimiyanaqueneanahi eta piéstayarehi eta Pascua, nasamairiricapa eta máitecapirayarehi ema Jesús tayehe eta avasare.

¹³ Tiúrisamureanarínehi. Eta náurisamurevahi, navehapa eta tajuru eta cáchipaca. Tiyananapa nácapahi éma. Eta napiarasirapahi, ániapa nacahe:

—¡Yare, Tata! ¡Piti yátupiquenévihi rey viyehe viti israelítana! ¡Asulupaya! ¡Piti vanáirucaquenévihi me Viya! ¡chape eta vicunachiravi piti! ¡Viva ema Viáquenu! ¡Viva! — nacahepa.

¹⁴ Ema Jesús ticaperapahi eta burricu eta masiapirahi, taicha ene tacahehi eta táechajiriruvahi eta Sagrada Escritura:

¹⁵ “Eti ecavasánahi te Jerusalén, vaipa ecupica, taicha márajapa ema eyeheyare Rey. Tímaticareyarehi éma, ticaperayare eta burricuchicha. Mámapahi eta iúritaresirayare” tacahehi eta Sagrada Escritura.

¹⁶ Eta juca ajureca eta vimacaicutiaraquenehi viti máimitureana. Tapaenumava te máechepucapa ema Jesús, vicaicutiarahi eta tacayemahi eta Sagrada Escritura, táechajisíhairahi éma, étapa eta tamutu eta apamuriana máicharacavanahi.

¹⁷ Tiuri puiti, ena apamuriana achaneana tímararacanaripa ema Jesús eta macaechepusirahi ema Lázaro te máecari, náechajisíhaipahi éna eta náimahaquenehi.

¹⁸ Eta tacahe, camuriqueneanahi ena achaneana tiyananahi nácapahi éma, taicha navarahahi náimati ema tíchahi eta tíaramicare.

¹⁹ Tásiha, eta náimairahi ena fariséoana eta camurianairahi ena tiácapanahi, náichacacapa:

—¡Váhichara víturucaimahi taicha tétavicavahi eta nasimutuvahi ena téhicanahi éma!

Ena apavasaqueneana navarahavare náimati ema Jesús

²⁰ Natiaríhivare ena apamuriana achaneana apajuecuruhana tayehe eta Jerusalén. Énerichuhi éna tímitecanahi tiyujarapananahi te jena piéstairahi.

²¹ Tiyananapa napauchahi ema vichamuri Felipe. Ániapa tacahe eta nayaseasirahi:

—Tata, víti apanava vivaraha vímati ema Jesús —nacahepa.

²² Tacahe, ema Felipe tiyanapa mametacahi ema Andrés. Tásiha, ena apinana tiyananapa nametapanahi ema Jesús.

²³ Tásiha, ema Jesús máichavacapa:

—Jéhevare puiti, tiánehipa eta népeniraya nuti Manerejirunuhi ema Viya. Nápechavayaresera nítareca, apaesa nucunachacareyare eyehe.

²⁴ Nutupiruva numetacahe: Te vahi vicuevaca eta evaraqui te apaquehe, vahi téjapacaimahi. Tanasiyareichuhi eta tasimutuva eta evaraqui. Téhesera vévacahi, tétavicavaya eta táejapasiyaya.

²⁵ Nácani téñamavanahi eta náitaresira, tiávamirahuana eta náehisiranu, énajivayare ticamitiequenehavanayare eta náitaresira. Nácani tjaracavanayare eta náehisiranuyare, tájinavare vahi náeñamavahini eta náitaresira te juca apaquehe, tiúchuchanayare éna. Máichecuaraquireyare eta náitaresirayare.

²⁶ Énerichuvare nácani tivarahanayare ticaemataneacanuana, tacamunu tímerecavanayare yátupi eta náehisiranuhi. Tásiha, núti nucaejacavacayare éna te néjasihayare núti. Ena nani, tétavicavayare eta macunachirayare ema Tata.

Ena Jesús tímereuchava eta máepeniraya

²⁷ Ena Jesús táimipanererecahi eta máepenirayare. Ánipa macahehi eta máechajiriruvahi: —Tiánehinapa eta népeniraya. ¡chape eta nupisirahi! ¿Tíuripuca nuyaseaca ema Tata macatiuchanuini apaesa vahi nucucatajivaini? ¡Váhiquene nuyaseacaimahi, taicha núti tímitecanuhi te juca apaquehe eta népeninavacaya ena achaneana!

²⁸ Tacahe, macahevarepa:

—Tata, pímereca eta pítupajjiásirava apaesa nacunachavi ena achaneana —macahepa.

Tásiha, tñahúchavapa nasamahi eta mahu ema Viya te anuma. Ánipa macahe:

—Nímerecaripa eta nítupajjiásiravahi. Jéhesare, nápechavayareva nímerecayare —macahepa.

²⁹ Tacahe, ena achaneana natiarihiqueneanahi nasamahi eta máechajisirahi ema Viya. Váhisera nácaicutiarahini, náimijachaichucha tirureca. Tásiha, ena apamuriana, ángelepuca éna téchajicahi nacahevare.

³⁰ Ena Jesús máichavacapa:

—Vahi nútivenéna eta juca esamaquenehi. Ena Tata tímisamahehi, mavarairahi esuapayare.

³¹ Achichu juca sácheanayare, ticapacanuainapa ena achaneana téhicanahi ema Váinaraji. Eta nacapasiranuya, tacaviureyare namutu ena achaneana te juca apaquehe eta náicuñayare. Eta népenirayare nuvachachainapa eta nuratahairaya nucuchucuhavaca nácani ticasifñavanahi nuyehe. Téquecavanainapa eta nuyehe ena machanerananihini ema Váinaraji.

³² Eta tacahe, te nacatupihanupa te anuquehe te crusu, te nacaicutiarapa ena achaneana apanapanenejiana eta nasamairirisiraya, énajivainapa tipauchuanayaya téhicanuanainapa —máichavacapa.

³³ Eta juca máichiravacahi ema Jesús, mavarahahi nacaicutiarayarehi eta táichararacavayarehi eta máepenira.

³⁴ Tacahe, ena achaneana tisamararacanaahi najicapapa éma:

—¿Tájahasica tacayema eta péchajisihahi eta pépeniraya te crusu? Viti vímijachaipahi pítiripa ema Cristo, piti Manerejiruvahi ema Viya. Viti visamahi eta Sagrada Escritura te náechajicuha máichecuaraquireyarehi eta máitaresiraya ema Cristo. Vahi vicaicutiarahini —náichapa.

³⁵ Ena Jesús máichavacapa:

—Ecamapurava esamararacanu mapurare nutiarihichaha eta eyehe. Numicauchahechaha taicha ánipirine eta juca ímairanuyare apaesa vahi ecucayutete tayehe eta tímapicu. Taicha nácani tájinahi náechaqueneñahi, ticayutetuanayare.

³⁶ Esuapanu eta juca numicauchahechaha apaesa ímiturecaya éti apanava, íamayare eta juca tajarahiquene —máichapa.

Te títapiricapa ema Jesús eta máichiravacahi, tiyanapa majunijimurihapa. Vaipa máimerecavahini eta nayehe.

Tétavicava eta namuracasamurevanahi ena ticavasanahi te Jerusalén

³⁷ Ichapemurihini eta náimairahi ena ticavasanahi te Jerusalén eta tiáramicareana máichaqueneanahi ema Jesús, váhiquenesera nasuapahini éna.

³⁸⁻³⁹ Étahisera tacahehi títauchavayarehi eta májuchaqueneanahi te ajureca ema profetai Isaiás tayehe eta tamuracavahi eta namasuapirayare. Ani tacahehi eta táechajiriruvahi: “Tata Viáquenu, nájina ticaicutiaranaina eta péchajiriruvanahi vímiturapianahi víti. Piti pímerecaripahi eta pítupajjiásiravahi, váhiquenesera nasuapavahini”.

Énerichuvare ani tacahehi eta májuchaqueneanahi ema Isaiás:

⁴⁰ “Ema Viya, eta máimairahi eta namuracasamurevanahi, máisapahi tiápajucava eta namasuapajirairavahi, tímicitijiricavahi púchuquiana éna. Váhiquene tétupirisamurechavanaimahi. Váhivare navarahaimahi nacasiñavahini me Viya, apaesa macanaracavacahini” tacahehi eta májuchaquenehi ema víyarahaini Isaías.

⁴¹ (Ema profetaíni Isaías, tíaramecahi eta máimairahi te mavapure eta táetavisiraya eta majaraiva ema Cristo, étapa eta masantuvahi eta te máejasihahi.)

⁴² Nararihihiserá ena aguenucarahana tinerejicavanaripahi ena tisuapanahi. Váhiserá návarahahini náimerecavahini eta náehisirahi, napisirahi nacaquijihini eta te návacureana.

⁴³ Taicha étachucha náuricahi eta nacunachacarevahi nayehe ena nachamuriana, ena fariséona. Tasapihaichucha náepuruhi eta nacunachacarevayahini me Viya.

Tímicuñarahi te vahi visuapa eta máechajiriruvana ema Jesús

⁴⁴ Ema Jesús tajaránupa eta máechajisiravacahi ena achaneana. Máichavacapa:

—Nácani navarahahi tisuapanuana, tímaticareanaripa eta nasuapirahivare ema Tata, ema tivanecanuhi.

⁴⁵ Tacutiquene nácani tímatinuanahi eta nímiturapiana, náimatipahivare eta mapanereruana ema Tata.

⁴⁶ Taicha nútí yátupiquenénuhi eta numicauchiravacahi ena téhicanuanahi te juca apaquehe. Váipasera tavehaimahi eta timapicu.

⁴⁷⁻⁴⁸ Tacutiquene nútí, vahi étaina táimitecanuhini te juca apaquehe eta núcuñacahéhi eti achaneana. Eta tímitecanuhi, nucuchucuhahéyarehi. Nácanisera nasamairicaripahinénipuca eta néchajiriruvana, váhiserá nasuapanuhini, nasapiha tépurunuanahi, muracayarehi eta náicuñayare. Eta náepuirahi eta néchajiriruvana, étaripa tiviuchavacainapa te jena sáchezare nacayaseresehipa te mamirahu ema Viya.

⁴⁹ Taicha vahi nútijiriruvainahini eta nímituresirahi. Ema Tata tivanecanuhi, éma tajaránuhi eta nímiturapianayahéhi.

⁵⁰ Eta tacahe, numetacahéhi puiti tamutu eta numetacasivanahi. Vahi nuhapapicaimahi, taicha nímatihí tacaitarecayarehi nácani tisuapanahi eta máimiturapiana ema Tata —macahepa.

13

Ema Jesús, masipapevachavacapa ena máimitureana

¹ Tiuri, te jena sácheanahi tamirahupaipahi eta Pascua, ema Jesús máecharipa táitecapauchayarepa eta majuníjisirayarehi eta juca apaquehe. Tiyanayarepa mayehe ema Maiya. Téyavicavahi eta máemunasirahavihi viti máimitureana.

²⁻⁴ Jéhesare ema Júlasi, máimipanerecharipa ema Váinaraji eta májararesirayarehi ema Jesús. Émasera ema Jesús, máecharipa eta machavirayarepa mayehe ema Maiya taicha eta másinehi. Émarichuhi ema Maiya tjaracahi eta tamutuirayarehi máituruequeneha. Tacahe, te jena yati, eta máenisirahavihi viti máimitureana, téchepucapa ema Jesús. Tivejamuhicavapa eta mamuiraha. Tiáyuruñequechavapa te mayehe paño.

⁵ Tásiha, majucuhapa eta une te bañadora. Tépanavapa tisipapevachahavihi eta vívapeana viti máimitureana. Mavehavarepa eta paño, tiájapevachahavipa.

⁶ Tásiha, te macapayacapa ema Pedro, éma vahi máisapavahini eta masipapevachira eta máivape. Máichapa:

—Tata maestro, vahi táurica eta pisipapevachiranuhini nútí —macahepa.

⁷ Tásiha, ema Jesús majicapapa:

—Páuresamivihí píti. Vuíchaha picaicutiarahini eta tacayemaqueneanahi eta juca. Achichuinapasera picaicutiarainapa.

⁸ Ema Pedro máichavarepa:

—Nútisera, vahi pisipapevachanuimahi.

Ema Jesús máichavarepa:

—Te vahi nucusipapevachavi, vaipa pítiparacaimahi eta nuyehe.

⁹ Tacahe, ema Pedro máichapa:

—Tata, vahi tácarichuimahi pisipaca eta nívapeana. Énerichuvare eta nuvahuana étapa juca nuchuti.

¹⁰ Tásiha, máichavarepa ema Jesús:

—Nácani nacaviravahi vahi tácomesaimahi tiápechavana ticasipana. Tacarichu ticasipayarehi eta návapeana. Éti, epachihavacaripa; váhiserá ámutuhini epachihahini —máichapa.

¹¹ Ema Jesús máichahavihi eta juca vahi vámutuhini vipachihahini taicha máimatihí ema tjararecayarehi.

¹² Te títavapa eta masipapevachirahavihi, ticamuirihavarepa eta mamuiriha. Tásiha, téjacapa te mesa. Máichahavipa:

—¿Ímatiequenehapuca éti eta juca níchirahehi?

¹³ Eti ímijarechanu “Tata Maestro”. Étipicahisera, taicha yátupiquenénuhi eta numaestruvahi.

¹⁴ Eta níchirahehi núti emastro nusipapevachirahehi, ene ecaheyare éti eta ítaresiraya. Espipapevachacacayare eta ívapeana.

¹⁵ Éhicayare eta juca níchaquenehi. Étayareichu eta nímitusirahehi.

¹⁶ Nutupiruva numetacahe: Ema musu vahi macachuricaímahi ema máquenu. Émaripa ema vanairucahi váhivare macachuricaímahi ema tivanecahi.

¹⁷ Te yátupina ecaravahuinapa eta juca nímiturapiana, tájina íchiravaimahi. Ecunachacareyareva eta ítauchiraya tamutu.

¹⁸ Néchahinéni núti vahi ámutuhini esuapanu. Nímatihéhivare eti yátupiqueneana nunerejruanahi. Títauchavayahisera eta táechajiriruvahi eta Sagrada Escritura, ani tacahehi: “Ema néniruasahi, masapíhahi ticatianacanuhi”.

¹⁹ Puiti nucaínapucava numetacahe apaesa te táitauchavapa eta juca numetarapi, ímatinuinapa nuti yátupiquenénuhi Cristo.

²⁰ Nutupiruva numetacahe: Nácani tijacapaheanayare éti nuvaneruana, ticaecheranahi eta najacapiranuhi núti apana. Énerichuvare, najacapahivare ema Tata Nucaiya quene.

Ema Jesús máechajisíha eta májjararesirayare ema Júlasí

(Mt 26.20-25; Mr 14.17-21; Lc 22.21-23)

²¹ Te títapiricapa eta máichirahavihi ema Jesús, téñamavaipa te masamure eta májjararesirayarehi ema émana vichamurihi. Tacahe, matupiruvapa máichahavihi:

—Nutupiruva numetacahe: Mararihi ani te etaracu ema tíjararecanuyare —macahepa.

²² Tacahe, víaramecarinehi eta máichirahavihi. Véseniuquijiricacapa. Vahi vímatihini nájahahipuca ema máichaquenehi.

²³ Nutiaríhisera nuti nachamuri máemunarupananuhi ema Jesús. Nucachacayahi éma eta véjasirahi te mesa.

²⁴ Tacahe, ema Pedro tíumatsiuquichanupa nuyaserecachini nájahahipuca ema máichaquenehi ema Jesús.

²⁵ Tásiha, núti nujajaicapa ema Jesús:

—Tata, ¿nájahasica ema píchahi?

²⁶ Tásiha, tíjicapanupa:

—Nuyvetumecaya eta pan, néchipaejicaya. Ema níjararuyare, émara ema tíjararecanuyare —macahepa.

Tacahe, máechipaejicapa eta pan, májjaracapa ema Júlasí.

²⁷ Jéhesaréinehi, ema Váinaraji enevanepa mávahácahi éma. Tásiha, ema Jesús máichavanepa: —Júlasí, eta juca pipanereruhi, táitauchavavanepa puítinaichu —máichapa.

²⁸ Váhiserá vácaicutíarahini eta juca máichirahi ema Jesús ema Júlasí.

²⁹ Vímijachahichucha eta mavacharesirayarehivare eta tñnicacare tayehyare eta piesta, mácajihivarepucaíni ena páureana, taicha émahí técha eta tarera máunasirarehi eta plata eta matesorerovali.

³⁰ Te títanésipa ema Júlasí eta manisirahi eta pan, tíanapa tíuchuchi. Tijunijicahavipa te jena yátiquenehi.

Ema Jesús macavanairípipa eta vémunasiracacayare

³¹ Eta máuchusiraipa ema Júlasí eta víyehé, ema Jesús máichahavipa:

—Títecapapa puiti eta táitauchiravayare ímahainapa éti eta máitupajjiasirava ema Viya étapa eta nítipajjiasiravayare núti Manerejirunuhi éma. Éti ecunachahavinapa.

³² Nímerecainapa eta máitupajjiasiravahi ema Tata, ema apana máimerecayareva eta nítipajjiasiravahi nuti Machicha. Puiti juca sácheanayare títauchavainapa.

³³ Nuchichanaveana, ánipirine eta juca ecachaneranuyare. Tásiha, nuyanainapa. Éti, etanucanuinapa; vúichahasera ítujicavaimahi ecapayacanu. Étarichuhi eta numetarapihi nayehé ena ticatianacanuana eta níchiravacahi vahi títujicavanaimahi ticapayacanuana.

³⁴ Puiti nunaquicayare eta juca arairu nuvanairípi eta eyehe. Émunacacayarehi ena echamuriana. Ecutinuyarehi eta némunasiráhehi núti. Ene ecaheyare éti apanavare.

³⁵ Te yátupina émunacaca, eta tímatiacaeheanayare ena achaneana étirahi eti nímitureanahi —máichahavipa.

Ema Jesús máimereucha ema Pedro eta máepiyasiravaya vahi máimati ema Jesús

(Mt 26.31-35; Mr 14.27-31; Lc 22.31-34)

³⁶ Tásiha, ema Pedro mayaserecapa:

—Tata Maestro, ¿távihainapa picaijuheya?

Ema Jesús majicapavarepa:

—Eta nucaijuheya puiti, éti vuíchaha ítujicavaimahi éhicanu. Ecapayacanuyaresera. Váhivare ánasimahi éti. Vuíchahasera t́jahúchavaimahi —máichapa.

³⁷ Ema Pedro majicapavarepa:

—¿Tájaha tacuichavaini vahi nuczatahahini néhicavi, Tata? Núti níjaracava népena píchavenénahi píti —máichapa.

³⁸ Tacahe, ema Jesús máichapa:

—Píti, pímiachavapuca píjaracava pépena eta picatiuchiranuya. Numetacavisera: Puiti juca yati, te tamirahuinarichaha eta táechajisiraya eta varayu te t́jararahi, píti mapaheyare pépiyacavayare vahi pímatinu, eta picatiuchiravayarehi píti —máichapa.

14

Ema Jesús, jéhevare éma téhicacare eta vítecapiraya me Viya

¹ Vahi ecueñamava éti. Ácasiñava eta me Viya; ácasiñavavare eta nuyehe.

² Taicha ánaqui te mávasa ema Tata, camuri eta tiávivaracare iávihayare éti, taicha ícuchihi éti. Tacahe, tatuparacahi nuyanayare nétupiricayare eta iávihayare.

³ Te táuripa eta iávihayare, nútijapainavarepa nuchavainapa népanahéna apaesa ácchanenu éti tayehe eta návihayare nútí.

⁴ Eti ímatiripa eta nucaijuheya. Ímatipahivare eta achene nuyanihayare.

⁵ Tásiha, ema Tomás majicapapa:

—Tata, váhira vímati távihapuca eta picaijuheyare; váhivare vímati eta achene piyanihayare —macahepa.

⁶ Ema Jesús majicapavarepa:

—Nútira néhicacare. Nútirichuva nuti yátupiquenénuhi. Nútivare nucaitarerahi, nájina apanaina ácasiñaimahi eta ítecapirayare me Tata.

⁷ Eta ímatiranuipa nútí, ímatiripahivare ema Tata, taicha ímahanuripa puiti eta juca nucachanérahehi —macahepa.

⁸ Ema Felipe máichapa:

—Tata, pímechahavipaini ema Viya apaesa viúrisamurepaini eta vímatirainahini.

⁹ Ema Jesús majicapavarepa:

—Ánaquiaparipa eta picachaneranuhi, píti Felipe, vuíchahacaruvare pímatinu. Eti ímahanuripahi, ímatinuipavare yátupíhi. Tímicutíjiricavaipahi émainahini ímararahini ema Tata. ¿Tájaha tacayema pívarahaichahavare nímechavi ema Tata?

¹⁰ ¿Váhípuca pisuapanuhi eta mávahásiranuhi ema Tata, tásiha, étape eta návahásirahivare nútí apanava? Eta juca nucayemaqueneanahi, vahi nuvehaqueneanaina te nuchuti. Étara eta mávahásiranuhi ema Tata, títauchavahi eta mavarahaqueneanahi.

¹¹ Esuapanu eta návahásirahi nútí ema Tata, étape eta mávahásiranuhivare éma. Te vuíchahapuca esuapanuhini eta numetarapi, étavanerécaínasera esuapa eta tiáramicareanahi níchaqueneanahi.

¹² Nutupiruva numetache: Nuyanainapa eta me Tata. Eta tacahe, éti yátupi eta esuapiranuhi, nítivahe éti. Níjaracahe eta eratahairaya ecuchuca eta tiáramicareana, ecutinuyare. Níjaracahevare eta eratahairaya ímitupirucha eta náchanevana ena achaneana. Jéhesare, eta juca tiápajupanavayare eta tacunachacareva tayehe eta tiáramicareana íchaqueneanayare.

¹³⁻¹⁴ Núti níjaracaheyareva tamutu j́cáni eyasearunuanayare te níjare, taicha nuvaraha ichape eta ecunachirayare ema Tata.

Ema Jesús macametarapi eta máucupaisiraya ema Espíritu Santo

¹⁵ Eta esuapiranuhi tímereuchaheya eta yátupirahi eta émunasiranuhi.

¹⁶ Tásiha, nútí nuyaseacainapa ema Tata máevataca ema Espíritu Santo. Éma, tímicatacaheyare, ticurisamurechaheyareva. Yátupiquenevare eta mávahásiraheyare eta itaresiyare. Vahi t́najiachémahi.

¹⁷ Éma, tímitucaheyare, máitmetacayare tamutu eta yátupiqueneanahi tásihaqueneana eta me Tata. Énasera ena achaneana, vahi ticaijaracasianaimahi, taicha vahi návarahahini najacpahini éma. Eta namaratahairahi náimaha éma, náimijachahi vahi máimaticarehíni éma. Étisera ímatiyare éma, taicha máitavacacayare eta mávahásiraheyare.

¹⁸ Núti, váhivare nujunijiacahémahi. Nuchavayare eyehe, ecachanenuyareva.

¹⁹ Puiti juca sácheanayare, ena achaneana vaipa tímahanuanaimahi. Étisera ímahanuparacaya, taicha nuchavayarehi nítareca. Éti apanavare ítarecayareva nícha nútí.

²⁰ Te nuchavapa nítareca, échavainapa éti eta mávahásiranuhi ema Tata, échavainavarepa eta návahásirahevare núti, éti apana iávahácanuhivare.

²¹ Nácani námatiyare eta nuvanairipiana, nátauchayareva, éta tímicaecherachayare eta yátupihí eta náemunásiranuhi. Tásiha, ichapeyare eta namunavayare me Tata táichavenénahi eta náemunásiranuhi. Núti apanavare ichapeyareva eta némunasiravacayare. Tásiha, nímerecavayareva nayehe —macahepa.

²² Ema Tadeo máichapa:

—¿Táicharacavayare, Tata, eta vicarichuirayare pímerecava eta viyehe; tásiha, ena apamuriana achaneana, vaipa tímahavianaimahi? —macahepa.

²³ Tacahe, ema Jesús majicapapa:

—Nácani témunacanuanayare, nasuapayare eta nuvanairipianahi. Tásiha, ema Tata, tétavicavayarehi eta máemunásiravacaya. Tásiha, vítijapainapa viávahácavacayare éna.

²⁴ Nácanisera vahi témunacanuanaimahi, váhivare nasuapaimahi eta nuvanairipiana. Eta juca esamaqueneanahi puiti, vahi tásihaquenenahini te nuchuti. Tásihaquenehi me Tata, ema tivanecanuhi.

²⁵ Nucamapurava numetacahe puiti taicha ánipirine eta juca nucaheyare eta eyehe.

²⁶ Émasera ema Espíritu Santo mavaneruyare ema Tata níchavenénahi núti, ema tímicatacaheyare, ticurisamurechaheyareva. Énerichu tímítucaheyare, témechaheyare tamutu eta juca numetaripiana eyehe.

²⁷ Puiti nucametavaya eta eyehe. Nuvarahasera tacuijahini íchiravainahini, ecanarasiraina eta epanereruana. Núti vahi nácutinuhini ena apamuriana achaneana eta nujunijisiraheya. Vahi ecuvayuchava eta éñamavairaina. Váhivare ecupica.

²⁸ Puiti numetacaheripa eta nuyanirayare; tásiha, étapa eta nuchavirayare eta eyehe. Eta tacahe, te yátupina émunacanu, evapinavayarehi nuyehe núti eta nuchavirainapa mayehe ema Tata, nápechavaya nucachane éma tayehe eta máetaviuchirahi eta majaravahi étapa eta máitupajijiasirava.

²⁹ Nucametarapivane eta juca, apaesa te ímaha táitachavapa, esuapainapa yátupi.

³⁰ Ánipirine puiti eta juca néchajirisiravahi eta eyehe taicha ávanepaipa títetapa ema Váinaraji eta mavarairahi tíaquipaicanuyare. Éma, yátupihí táquenuhi eta juca apaquehe. Váhiquenesera títahacanuumahi núti.

³¹ Nuvarahasera námatiya ena achaneana eta némunasirahi yátupi ema Tata; tásiha, nítauchaparacahi tamutu eta mavanairipiana. Échepuca. Viyana viyejecava eta te juca — máichahavipa.

15

Eta táenaqui eta uva étapa eta tasimutuquene eta tatavavajiana

¹ Núti nucutihi eta sucureca uva. Étiripa éti ecuti eta tatavana. Ema ticachichanu tímicitjiricavahi ema tijaneacahi eta sucureca.

² Éma máechuca eta máhiriquirehi tatava. Máepachiacavare eta apana tatava eta ticahirisi apaesa tacahipana.

³ Eti epachihavacaipahi taicha eta nímiturapiana emetacásivanahi.

⁴ Eta tacahe, ímianavayare eta iúrujiasiranuyare taicha eta návahásirahehi núti, apaesa ácuti eta tatava ticahíríqui. Taicha te viyuvetuca eta tatava eta uva, vaipa ticahimahi. Ene ecahehi éti, te vahi ecuimyanava iúrujiacanu, tájina vaipa ecaemataneacanuimahi.

⁵ Nápechava nímicutichinahe puiti. Núti necutihi eta táenaquihi. Éti tímicitjiricavahi nutavahehi. Te ímianava iúrujiacanu, ichapemuriyarehi eta ecaemataneasiranuya. Téhesera ácarichu éti, tájina eratahaqueneémahi ícha.

⁶ Nácani tijunijiacanuanayare, ticutianayare te ticaechu eta tatava. Tiájiqiyarehi. Tásiha, nacurujicainapa, náijuchainapa te yucu.

⁷ Ímianava yátupina eta iúrujiasiranu. Yátupinavare eta itauchiraina eta nímiturapiana. Tásiha, te eyasecanupuca jácani evarahaqueneanahi, núti níjaracaheya.

⁸ Nuvaraha ímerecavaya eta táurivayare eta ecaemataneasiranu, apaesa tétavicavainapa eta macunachacarevaya ema Tata. Tásiha, ecacheraipahi eta yátupirahi nímiturehe.

⁹ Ímianava eta iávahásiranu taicha tétavicavahi eta némunasirahehi tacuti eta máemunásiranuhi ema Tata.

¹⁰ Eta ímianirava itauchapaipa eta nuvanairipiana, tijurucapaipa eta ímatirahi eta némunasirahehi. Tacuti eta nítauchirahi núti eta mavanairipiana ema Tata, nímatipaipa eta máemunásiranuhi éma.

¹¹ Eta juca nímicutiarachirahi, nuvarahahi iápajuca eta iúrisamurevahi tásihaquenehi eta iávahásiranuhi núti. Ecutinuya eta núrísamurevahi.

¹² Nápechahe numetacahe eta juca nuvanairipi eta eyehe: Yátupina eta émunasiracacaina. Ácutinu eta némunasirahehi núti.

¹³ Ena achaneana, te navarahahi náimerecaya eta náemunasirahi nácani náemunaruanahi, natanucayarehi náijaracasicha. Nácani t́jararecavanapuca eta náepenirahi énavenehi ena náemunacasareana, éna yátupihí náimereca eta náemunasirahi. Ene nucahehi núti, níjaracavayare eta népeniraya íchavene eti námunasasareanahi.

¹⁴ Jéhevare, éti yátupiquenehi námunasasareanahi, eta ítauchirahi eta nuvanairipianahi.

¹⁵ Vahi v́anaracahéna nuyehe, taicha ena vanaracanahi vahi náimatimahi eta mapaneruanahi ema náquenu. Étiserá námunasasareanahi. Eta tacahe, numetacahe tamutu eta mapanereruana ema Tata.

¹⁶ Vahi étinahini enerejicanuhini eta éhisiranuhi. Núti nunerejicahehi. Puiti nutuparacahe, nuvaraha táuri eta ecaemataneasiranu eta epaisiraya eta ecametarairuirayare. Nuvaraha ecajimuyacahini ena achaneana náehicanuhini. Yátupina eta ímitusiraina apaesa náimiyana eta náehisiranuhi. Tásiha, ema Tata t́jaracaheyare tamutu eta eyasearuanayare te níjare.

¹⁷ Nuvaraha ítaucha eta juca nuvanairipiana. Yátupina émunacaca.

Ena achaneana ticatianacaheanayare tacutiyahe eta nacatianasiranuhi núti

¹⁸ Puiti numetacahevare, te nacatianacahe ena achaneana, échavayare éti vahi étinahini nacatianaca. Núti nacatianacahi.

¹⁹ Taicha, te étainaichahini ílavacuhahini eta tayeherepiana eta apaquehe, ena achaneana témunacaheanaripahini, tacutihini eta námunajirisiracacahi éna. Étaserá eta nunerejisirahehi te nataracu ena achaneana, étapa tivíuchahehi eta nacatianasirahehi taicha ínjajicaipa eta máeperajiquene tayehe eta apaquehe.

²⁰ Échavavare eta juca numetaruhehi: “Vahi másapíhaimahi ticaemunacasi ema musu mayehe ema máquenuhi”. Núti ticatianacuanahi; ene ecaheyarehi éti, eta nacatianasiraheyareva. Vahi nasupahini eta nímiturapiana. Váhivare nasupaimahi eta ímiturapiana éti apanava.

²¹ Eta éhisiranuhi núti, étaripa tivíuchaheyare tamutu eta juca nacatianasiraheina pa táichavenehi vahi náimatihini ema Tata tivanecanuhi.

²² Tacujarichuhipucaini naviurevainahini éna, te vahi nucuítecahini eta nímitusiravacahini. Tépurunuanahiséra, náepuruhivare eta nímiturapiana; tásiha, tétavicavahi eta naviurevanahi.

²³ Taicha nácani ticatianacuanahi núti, nacatianacahivare ema Tata.

²⁴ Énerichuvare tacujahini taviuchavacahini te vahi nucuímerecahini eta tíaramicareana níchaqueneanahi. Mamaratahaquenehi máichahini mácani apana achane tacutihini eta níchaqueneanahi núti. Étaserá náimaharipahi, váhiquenesera nasupahini. Nasapíha ticatianacuanarichucha, nacatianacahivare ema Tata.

²⁵ Étaserá tacaheyarehi eta táitauchiravayarehi eta táechajiriruvana eta Sagrada Escritura te Salmo, aní tacahehi: “Tájina taviuchanuhini eta nacatianasiranuhi”.

²⁶ Étiserá, mararihíyare ema tímícatacaheyare, ticurisamurechaheyareva. Te nítecapauchayarepa ema Tata, nuyaseacaya mavaneca ema Espíritu Santo. Éma, te máítecapapa, tímereuchaheyare eta yátupiqueneana. Tímereuchanuyareva núti eta eyehe.

²⁷ Éti apanavare ímereuchanuyareva taicha tíyereripahi eta ecachaneranuhi, tépanavapa te nunérejicahéna.

16

¹ Núti numetacahe eta juca apaesa vahi ecuarami eta nacatianasirahe, váhivare ecuina-jicava eta éhisiranuhi.

² Taicha tíajújicaheanayare tayehe eta víúrújisirarevana. Énerichuvare navarahayare ticapacaheana. Éna, náimijachayarehi tíúriyarehi eta náichirayare te mamirahu ema Viya.

³ Éna, náichayare eta juca táichavene eta namáimatirahi ema Tata, váhivare náimatínuhini núti.

⁴ Numetacahe eta juca apaesa te táítecapapa eta íchavaquenevaya, vaipa ecuarameca. Échainapa eta numetasirahehi.

Ema Espíritu Santo tímícatacahivíhi

⁵ Puiti tíánehinapa eta nuyaniraya nuchava eta me Tata. Eta nucachaneirahehi, ticatianacuanahi núti ena achaneana. Puítiserá eta májinairanuyare, ticatianacaheanainapa éti. Eta juca tacahehi, nupaenunava numetacahehi puiti. Étiserá németeaca vuíchaha

ecaicutiara eta numetarapi, taicha váhivare eyaserecanuhini eta nítametansirayare, étahinéni eta nucaijuheyare.

⁶ Esapiha éti ecatisamurevahi taicha eta juca numetasirahehi eta nuyaniraya.

⁷ Tayanapane vahi eyaserecanuhini, nutupiruvasea numetacahe: Tatuparacahi eta nuyaniraya nuchava mayehe ema Tata, taicha te vahi nucuyana, vahi títécainahi ema nuvaneruya. Éma tíurichaheyare, tímicitacaheyare, ticurisamurechaheyareva.

⁸ Énerichuvare ena achaneana te juca apaquehe, manacasamurechaya eta nacatuparahairahi náichayarehi eta táuriqueneana, náehicanuvare nútí. Manacasamurechavacayareva éna eta náimatiraina eta nasipecuraravahi. Taicha te vahi nacubaraha náinajica eta tamauriqueneana, téhevere vahi nacubaraha náehicanu nútí, ticaicuñanainapa te yucu.

⁹⁻¹⁰ Ema Espíritu Santo manacasamurechavacayare ena achaneana eta najacaparacarevaya me Tata nácani ticasifñavanapuca eta nuyehé, taicha nuyanaya eta me Tata, néchajuchavacayare éna. (Vaipa ímahanuimahi éti.) Nácanisera vahi nasuapanuhini nútí, tanasiquenehi eta napecaturanahi.

¹¹ Manacasamurechavacayareva ema Espíritu Santo eta yátupina táiturevayare éna eta máicuñayare ema Váinaraji náehiruhi te juca apaquehe. Éna apanava náepujuquichainapa tayehe eta yucu infierno.

¹² Maverachahaneni eta juca nuvarahaqueneanahi numetacahe. Váhisera eratahaimahi ecaicutiara puiti.

¹³ Téhesera máitecapapa ema Espíritu Santo, éma tiámayarepahi eta yátupiqueneana numaimitureheanarichaha, émainapa tímítacaheyare. Taicha mametacativahi eta máéchajisiraheyare, énerichuvare tímítacaheyareva eta íchavaquenévanayare.

¹⁴ Ichapenapa eta nucunachacarevayare máicha. Émainapa tímítacaheyare eta nuvanairipianayarehi eyehe.

¹⁵ Taicha ema Tata tituparacanuhi eta nútirayarehi nécha tamutu. Eta tacahe, eta juca mametarapianayare ema Espíritu Santo tásihaqueneanayare nuyehé.

Vahi tánasimahi ecatisamureva. Tichavayare eta iúrisamurevaya

¹⁶ Ánipiyareichusera eta emaimairanuyare. Téhesera táequenénapa, íapéchavainavarepa ímahanuyare. Taicha nuyanayarepa te mávihahi ema Tata.

¹⁷⁻¹⁸ Tacahe ena apamuriana nuchamuriana tiyaserecanuanapa:

—¿Tájahapuca tacayema eta juca mametarapihi, eta macahehi ánipirine eta vimaimarayare, tásiha, te táequenénapa víapéchavainavarepa vímaha? ¿Tichavavanepuca eta mayanirayare eta me Maiya? ¿Váhipuca mánasimahi eta machaviraya? Váipavare vácaicutiara eta ánipirine eta macaheyare eta viyehé —nacahepa.

¹⁹ Ema Jesús macaicutiaravacahi eta navarairahi nayasereca. Máichavacapa:

—Nútí numetacahehi eta ánipirine eta emaimairanuyare. Tásiha, te táequenénapa eta emaimairanuyare, íapéchavainavarepa ímahanuya. Eta juca emacaicutiaraquenehi.

²⁰ Tásiha puiti, nutupiruva numetacahe eta íyahairainasamipa éti, eجانuvairayareva. Énasera ena apamuriana achaneana, tíurisamureanainapa éna. Tásihasera te táequenénapa, vaipa íyahaimahi. Tétavicavasera eta iúrisamurevainapa eta táitsivaya.

²¹ Eta juca tímicitijiricavahi te tínacayare esu esena. Ánipichuhi eta sucatiruhavahi taicha eta suínasirayarehi. Téhesera te tamutupa eta suínasirahi, suémitisicainapa eta sucatiruhavaini. Tíurisamuréinapa eta suímairahi eta suchícha, tajurusirayarehi te juca apaquehe.

²² Ene ecaheya éti, ecatisamurehi puiti, ánipirichusera. Téhesera te víapéchava vímahacacaya, tétavicava eta iúrisamurevaya. Nájinainavarepa tihapapicahémahi eta iúrisamureva.

²³ Te jena sáchevare, vahi nútímahí eyaserecanu. Émasera ema Tata eyaserecayarehi. Éma, títjacaheyarehi tamutu jácani eyasearuanayare te nájare.

²⁴ Puitícha tájinaichaha eyasearapinahini me Tata te nájare. Ticamunucarehi eyaseacayare. Éma títjacadhénapa. Étainapa ticurisamurecaheyare ichape.

Numetacahe eta nucapaquechiravacayare ena nánaranayare

²⁵ Nútí nímicitichinahehi eta juca numetasirahehi. Téhesera te táequenénapa, nutupiruvainapa numetacaheyare eta yátupiqueneana mapanereruanahi ema Tata.

²⁶ Te jena sache, eyaseacainapa ema Tata te nájare. Váipayare tacamunuimahi nuyaseuchahe eta mayehé.

²⁷ Taicha émaripa ema Tata témunacahehi éti, táichavénehi eta émunasiranuhivare nútí. Éti esuaparipa eta yátupirahi eta mavanésiranuhi ema Tata. Títjacadhénavanepa eta eyasearuanayare.

²⁸ Nútí, eta násihahi mayehé eta nítésirahi te juca apaquehe. Puitísera nujunijicainavarepa eta apaquehe, nuchavainavarepa mayehé ema Tata —máichahavipa.

²⁹ Tacahe, viti máimitureana víchapa:

—Jéhevare puiti pitupiruvapa eta péchajisihahi. Vaipa pímicutiarachinahávihi.

³⁰ Vímativarepa eta yátupirahi pímatiequeneha tamutu. Jéhesare, pímatiequeneha tamutu eta vipanereruana, étaripa eta juca vivarairahi viyaserecaviyare. Visuaparipa puiti eta yátupiquenérvahi Machichavi ema Viya —víchapa.

³¹ Tacahe, ema Jesús máichahavipa:

—Jéhepuca eta esuapiranu puiti.

³² Puítisera juca yati, títecapainapa eta éjanerepáisirayare éti. Ejunijicanuinapa, nucari-chuinapa núti. Matiarihiyaresera ema Tata. Éma, ticachanenuyare.

³³ Numetacahevare tamutu eta juca apaesa vahi ecuarameca. Ácasiñava yátupina nuyehé apaesa tacuija ecuichiravaina, tayanapane ecatajivayare muraca te juca apaquehe. Ácasiñavahisera eta nuyehé, taicha núti májjarunuhi ema Tata eta nucapaquemurihairayare namutu ena nánaranahi —máichahavipa.

17

Eta mayujarasirahi ema Jesús, mayaseuchavacahi me Maiya eta náurivaina ena máimitureana

¹ Te títapiricapa ema Jesús eta máechajisirahavihi viti máimitureana, tépanavapa tiyujacacahi. Máesenicapa te anuma. Ánipa macahe:

—Tata Nucaiyaquene, títecapauchanupa puiti eta táitachiravayare eta pipanereruana. Nuvarahasera nucunacharéni eta piyehe, tácutini eta nucunachiravihi píti.

² Yátupihí eta píjarasiranuhi eta aquenucairanuyare, te namirahu namutu ena achaneana. Nucaitairesirayarehivare namutu ena píchuhaqueneanahi píjararunuanahi.

³ Níjaracayare eta náitairesirayare máichecuaraquireyare ena píjararunuanayare apaesa náimativi, píti Tata yátupiquenérvahi Viya, nútípa núti Jesucristo, núti pivanerunuhi te juca apaquehe.

⁴ Núti nímerecahi ne achaneana eta picunachacarevahi. Nítauchaipahi tamutu eta pivanaipianahi pivaraquenehi níchayarehi.

⁵ Puítisera nuchavainavarepa eta piyehe. Píjaracanuyare eta nuchavirayare te píjaraivahi. Néjacainavarepa te pivare tayehe eta návinehi acane te tépanavainapa eta apaquehe.

⁶ Nítamuturucaripahi eta nímitusiravacahi ena píchuhaqueneanahi píjararunuanahi píti. Nímimatichavacahivare eta piúrvahi píti. Yátupihisera eta píchichanaveanahi éna, taicha nasuapahi eta nímiturapiana píjararunuanahi núti.

⁷ Náecharipahi tamutu eta juca nímiturapiana tásihaqueneanahi piyehe.

⁸ Náecharipahivare eta yátupiquenérvahi eta pivanesiranuhi. Eta tacahe, natupiruvahi najacapa eta nímitusiravacahi eta péchajiriruvana.

⁹ Eta tacahe, puiti nuyaseacavi, Tata, eta pijaneasiravacaina ena píjararunuanahi téhicanuanahi, taicha píchaneranahi éna. Vahi éna nuyaseuchavaca ena masuapajirairahanahi te juca apaquehe.

¹⁰ Núti néchahi eta piyeheravacahi éna. Eta tacahe, néñamavahi eta nayehe, nuyehénaipahi éna. Yátupihí eta náimatiranuhi eta pivanerunuhi, tásiha ticunachanuanahi ichape.

¹¹ Puiti núti nunijicavacainapa ena píjararunua. Énaserá nanasiyarechaha te juca apaquehe. Nútisera nútíjapainapa eta piyehe. Tata Nucaiyaquene, píti yátupiquenérvahi eta písanuvahi. Nuyaseacavi pijaneasinanuvacachucha éna, apaesa náimiyavahi eta náurujasiracacaina, návahásiracacayare nácutihini eta vívahásiracacahi víti.

¹² Núti nímatichavihi píti eta nayehe, étapa eta píjare, apaesa yátupina eta náehisravina. Ichapemurihi eta nujaneasiravacahi éna eta nucachaneravacaichaha. Eta tacahehi, vahi náinajicavahini eta náehisrahavihi. Émanarichu ema téjecapavahi, ema tijararecanuyare. Étasera tacaheyarehi eta táitachiravayarehi eta Sagrada Escritura.

¹³ Puiti nútíjapainapa, Tata, tayehe eta jara piávihi. Eta nucachaneravacaichaha éna, numetacavacahi eta pipanereruana, taicha nuvaraha vácuticacahini eta víúrisamurvaina.

¹⁴ Taicha ena achaneana te juca apaquehe, ichapemurihi eta nacatianasiravacahi táichavenehi eta najacapirahi eta péchajiriruvana nímitusiravacahi. Éna, vaipa náehicahini eta tayeheana eta juca apaquehe, ticutinuaripahi núti eta numaehisrahahi eta tayeheana eta te juca apaquehe.

¹⁵ Vahi nuyaseacavi eta piviravacainahini te juca apaquehe. Nuyaseacavi núti eta pícatiuchiravacainahini mayehe ema Váinaraji.

¹⁶ Taicha yátupihí éna vaipa tayeheanainahini eta juca apaquehe, ticutinuanaripa nútí vahí tayeheuninahini eta juca apaquehe.

¹⁷ Píjaracavacahini eta náurivainahini eta piyehe, náitusirainahini cápachi eta péchajiriruvana yátupiqueneana.

¹⁸ Pítí pivaneacanuhi nímiturecayarehi eta péchajiriruvana nayehe ena achaneana te juca apaquehe. Tásiha, nútí nuvanecavacayareva ena nímitureana, náimituca ena apamuriana achaneana.

¹⁹ Puiti, eta némunasiravacahí éna, níjararecava nútí, nítauchayare eta pivarahaquenehi. Nuvaraha ene nácahehíni éna, yátupinahíni nájaracavahíni eta nacaemataneasiraviyarehi. Yátupinahivaréni nasuapa eta péchajiriruvana yátupiqueneana.

²⁰ Váhivaresera nacarichuhi éna nuyaseuchavacahí eta piyehe. Énerichu nuyaseuchavaca ena tisuapanayare eta táunavayare eta áñoana, ena tijacapanayare eta péchajiriruvana.

²¹ Nuyaseacavivare váhini tacuitavahíni eta náurujiásiracacayare éna. Píjaracahivaréni, Tata, te nasamureana eta návahásirahavinahíni tácutihíni eta víavahásiracacahí víti. Náurujiásirahavinavare víti, apaesa ena achaneana te juca apaquehe náimatihíni yátupina eta pivanesiranuhi.

²² Nútí níjaracavacaipahí éna eta náitupajijiasiravacayarehi tamutuirayarehi narataha. Vicutihí víti eta tamutuirá virataha. Návahácacahíni éna, vácutihíni víti eta víavahásiracacahí.

²³ Pítí piávahácanuhi nútí. Tásiha, nútí návahácavacahí éna apaesa yátupinahíni éna étainarichuyare eta napanereruana, apaesa ena apamuriana achaneana te juca apaquehe étainahíni náimatirainahíni eta pivanesiranuhi, étapa eta pémunasiravacahí ena nímitureana tacutihíni eta pémunasiranuhi nútí.

²⁴ Tata Nucaiyaquene, pítí píjaracacacahí ena nani píchuhagueneanahí. Nuyaseacavi puiti eta nucachaneravacainahíni tayehe eta návihayare nútí. Náimahahíni eta nujaráiva píjararunuhi taicha eta pémunasiranuhi te tépanavainapa eta tacaepiyairahí eta apaquehe.

²⁵ Tata Nucaiyaquene, pítí yátupiquenévihi eta pisantuvahí. Ena achaneana te juca apaquehe vahí náimativihíni. Nútisera náimativíhi.

²⁶ Ena nani píjararunuanahí nímitatichaviripahí. Tétavacavahí eta pémunasiranuhi. Tásiha, nuvaraha yátupina nasamava eta táetaviuchirahí eta pémunasiravacahí taicha éna tiávahácanuanahí nútí.

18

*Títecapanapa ena ticaratacanaya ema Jesús
(Mt 26.47-56; Mr 14.43-50; Lc 22.47-53)*

¹ Te titápiricapa ema Jesús eta mayujarasirahí, tiyanapa tiámamuriahavipa te apachara eta tatavarapí ticajjare Cedrón. Ánaquí tatiaríhi eta huerta ticajjare Getsemaní. Visiapapa tayehe.

² Tacahe, ema Júlasí máimatihíni eta juca víávirarehi taicha íchapemuríhi eta vicachanerahí ema Jesús tayehe eta huerta.

³ Tacahe, te jena yátiquenehi, títicapapa ema Júlasí. Máamuríhapaipahí ena oficialeana énapa ena camuríqueneanahí suntaruana romanoana, vanairucanahí éna nayehe ena tuparairucana, taicha napamicavacahí ena fariséoana. Ticamicahuanapaipahí. Ticaepuchiríquiapanapa, étapa eta nayehe espada.

⁴ Émasera ema Jesús mácharipa eta nacaratasirayarehi. Tacahe, mácapavacapa éna. Máichavacapa:

—¿Nájaha etánuca?

⁵ Ena najicapapa:

—Ema Jesús Nazareno vitanucapahí.

Éma máichavarepa:

—Nútira etánurepahí.

Ema Júlasí mapauchapa, máetserarecapa. Tásiha, titupihachaha te machacaya.

⁶ Eta majicapirahí ema Jesús, máichirahí: “Nútira etánurepahí”, tíáquipaimuríavanapa ena suntaruana te apaquehe.

⁷ Tásiha, mayasererecavarepa ema Jesús:

—¿Nájaha ema etánucapahí?

—Ema Jesús Nazareno —najicapavarepa.

⁸ Éma, máichavarepa:

—Cápachi numetacaheripahí nútíhira etánurepahí. Te nútichucha etánucanupahí, ísapayare nayana ena nani —máichavacapa.

⁹Éta paichuhi eta máechajiriruvahi ema Jesús te tiyujaracaipa nájjina émanainahini náemitia-cahini te namuri eta májararuanahi ema Maiya.

¹⁰Tacahe, ema Pedro, tatiarihíhi eta mayehe espada te mañahe. Mavehapa, máechuchacachapa eta machaca te vaure ema achane ticaijare Malco, mavanarahi ema aquenuca Caifás.

¹¹Émasera ema Jesús macahepa:

—Pinaca te tatumaramuhi eta piyehe espada. Vahi pihapapicaimahi eta tátauchiravaya eta mavarahaquenehi ema Tata, taicha nutuparahaichuhi mayehe eta juca nucatajivairaya —macahepa.

Nacaratacapa ema Jesús, námapa te mamirahu ema corregidor
(Mt 26.57-58; Mr 14.53-54; Lc 22.54)

¹²Tacahe, ena suntaruana émapa ema comandante nacaratacapa ema Jesús, náitji-vauchapa.

¹³Tiyananapa námapa te mapena ema Anás. Étarichu mapena ema Caifás, taicha ema maca Anás máimachucahi ema Caifás, émapasera tuparairucahi te jena áño hi máitsivae-quenehi ema máimachuca.

¹⁴Ema maca Caifás, émarichuvare ticaechajiriruvahi eta máepenirainahini ema émana achane tivachachayarehi eta náitaresirana namutu ena achaneana.

Ema Pedro tépiyacavapa vahi máimati ema Jesús
(Mt 26.69-70; Mr 14.66-68; Lc 22.55-57)

¹⁵Ema Pedro, nútípa nuti Juan viyanapa véhiequenehapaipa ema Jesús. Nusiapapa nútí te tajuhe eta canchón mapenahi ema aquenuca Anás, taicha náimaticasarenuhi ena mavanarana.

¹⁶Émasera ema Pedro manasipa te aneca te tapajachacaya. Tásiha, néchajiacapa esu vanaracahi téchahi eta tapaja, sucasiapahini ema Pedro.

¹⁷Tásiha, esu suyaserecapa ema Pedro, áni pa suicha:

—¿Pítirichu jácani apanava ñimiture eñi ñica Jesús?

Ema Pedro majicapapa:

—Vahi nútina.

¹⁸Tásiha, eta jena yátiquenehi táetaviuchahi eta tacasaraivahi. Ena mavanaranahi ema Anás, énapa ena suntaruana ticamurecanapa eta yucu, násasiavayarehi. Eta náuruji-asiraipahi eta yucu, titupihai pavare ema Pedro te nachacaya, másasiavahivare.

Ticayaserehipa ema Jesús te mamirahu ema Anás
(Mt 26.59-66; Mr 14.55-64; Lc 22.66-71)

¹⁹Tacahe, ema Anás mayaserecapa ema Jesús áyananapuca ena téhicanahi éma, tájahahi-varepuca eta máimiturapihi eta nayehe.

²⁰Ema Jesús majicapapa, áni pa macahe:

—Nútí vahi nuyumurucavahini eta nímituresirahi. Nímerecavahi te namuri namutu ena achaneana te víurujisirarevana, étapa te Templo. Éta nímituresirareanahi.

²¹¿Tájaha tacayema piyaserecanu nútí? Piyaserecapaini ena tisamararacuanahi. Énaina nametacavi eta nímiturapianahi nútí —macahepa.

²²Matiarihíhi ema émana suntaru te machacaya. Eta masamirahi eta máechajiriruvahi ema Jesús, máehamirahapa éma. Tásiha, máichapa:

—¿Tájaha tacayema tíñemahi eta pijicapirahi ema aquenuca macapichuquenehi? — máichapa.

²³Tacahe, ema Jesús majicapapa:

—Váhira táíñemahihini eta nujicapirahi ema aquenuca eta taviuchanuhini. ¿Tájaha tacayema péhanu? —macahepa.

²⁴Tacahe, ema Anás máevatacapa mayehe ema Caifás, émarichuhi corregidor. Ticaiti-hapai eta námirapahi éma.

Ema Pedro tíápechavavare tépiyacava vahi máimati ema Jesús
(Mt 26.71-75; Mr 14.69-72; Lc 22.58-62)

²⁵Tacahe, ema Pedro manasirichuhi titupihahi te tachacaya eta yucu, tiásacavahi éma. Nayaserecavarepa nápechahi:

—¿Pítirichu jácani máimiture ema maca achane? —náichapa.

Ema Pedro majicapapa:

—Vahi nútina —macahepa.

²⁶Tásiha, matiarihivare titupihahi ema mavanarahi ema aquenuca, macheji ema máechatichacaruhi ema Pedro. Tacahe, éma téchajicapa, máichapa:

—Núti németeaca nímahavihi picachanehi éma tayehe eta huerta te vicaratasinehi éma maca —máichapa.

²⁷ Émasera éma Pedro macahevarepa:

—Váhiquene nímati éma —macahepa.

Tásiha, enurujipa téchajicanecha eta varayu.

Éma Jesús námapa te mamirahu éma Pilato

(Mt 27.1-2, 11-14; Mr 15.1-5; Lc 23.1-5)

²⁸ Te jena yáticarahi, te tijarahipa, nacuchucapa éma Jesús te mapena éma Caifás. Námapa tayehe eta palacio mávihahi éma Pilato. Váipasera nasiapahini éna tuparairucana. Námichuhahi éma Pilato. Nanasipa te aneca, namavarairahi náechipejicavahini éta nanisirayarehi éta cordero pascual te jena sache.

²⁹ Tacahe, éma Pilato tiúchucapa, máechajimurihapa éna. Máichavacapa:

—¿Tájaha éta maviurevahi éma maca achane íámaquenepahi éta ani nuyehe? —macahepa éma Pilato.

³⁰ Éna najicapapa:

—Jucarihi éta maviurevahi. Éta tacahe, víamapahi éta piyehe.

³¹ Tásiha, éma Pilato, máichavacapa:

—Eyana íama. Étina ícuñaca éma maca, taicha jararihi éta eyeherepichuhi éti israelítana —máichapa.

Éna najicapapa:

—Étasera víti, vaipa ísapahavihini vítaucha éta viyeherepi vímicapaca mácani ticaviurevahi, vitupisica te márijahi. Émasera éma maca vivaraha máepena. Vivaraha pémetatacaini te crusu —nacahepa.

³² Tacahehi éta tátauchiravapaipa tamutu éta máechajiriruvanapahi éma Jesús éta máepenirayarehi te crusu.

³³ Tisiapavarepa éma Pilato te tajuhe. Máichuhapa éma Jesús. Tacahe, mayaserecapa:

—¿Yátupisarejí réyvihí pítí nayehe éna pijaneanana israelítana? —macahepa.

³⁴ Éma Jesús máichapa:

—¿Pitupiruvahipuca éta juca píchiranuhi, pivarairahi pecha te yátupihipuca éta nurreyvahi? ¿Pitanucahipucasera éta nuviurevayare, picutihipuca éta napanereruhi éna nujaneanana israelítana? —máichapa éma Jesús.

³⁵ Éma Pilato majicapavarepa:

—Vahi nímati éta epanereruana éti israelítana. Énarichuhi éna pijaneanana éna tuparairucana, éna tiámavianapahi éta ani nuyehe. ¿Tájaha éta piviorevahi éta nayehe? —máichapa.

³⁶ Tásiha, éma Jesús majicapavarepa:

—Jéhesare, jararihi éta návacurehi; váhisera étaina te juca apaquehe. Te étainahini te juca apaquehe éta návacurehi, téhacacauchanuaripahini éna nimitureanahi, váhivare nacucaratanuhini éna ticatianacuanahi. Taicha yátupiquenehi éta návacurehi, vahi étaina te juca apaquehe —macahepa.

³⁷ Tacahe, éma Pilato máechavarepa mayasereca:

—Tacahe, ¿yátupihí éta pirreyvahi? —máichapa.

Éma Jesús majicapapa:

—Yátupi réynuhi núti. Éta núcupaisirahi, núchucahi te juca apaquehe, nimiturecayarehi éta yátupiqueneana. Nácani tisuapajirahianayare, nasamararacayare éta yátupiqueneana —macahepa.

³⁸ Tacahe, éma Pilato macahevarepa:

—¿Pítí pímijachava pímati éta yátupiqueneana? Núti, németeaca nájina narataha náimatimahi éta yátupiqueneana —macahepa.

Éma Pilato macavanairipipa náetataca éma Jesús te crusu

(Mt 27.15-31; Mr 15.6-20; Lc 23.13-25)

³⁹ Te tamutupa éta mayaseresirahi, tiúchucavarepa éma Pilato. Máechajimurihapa éna ticatianacanáhi éma Jesús:

—Tájina maviurevaina éma maca achane éta númairahi núti. Étisera jucarihi éta eyeherepi te Páscuamuhua éta nucaitisirayare éma émana presu. ¿Evarahapuca nucaítica éma eyehe Rey, íáquenumuri éti israelítana? —máichavacapa éna.

⁴⁰ Énasera tipiararecanapa éta najicapirahi:

—¡Vahi vivaraha picaitica éma maca! ¡Émaina picaitica éma Barrabás! —nacahepa.

Éma Barrabás táemerataruhi éta máetaviuchirahi éta mámeraivahi.

19

¹ Tacahe, ema Pilato macavanairipia náestaca ema Jesús.

² Tásiha, ena suntaruana navehapa eta épire itapepi, náitsamemacapa. Nanacapa te machuti ema Jesús, majarapiyarehiji náicha. Namuiriachavarepa eta muíriare mularume.

³ Tásiha, nachayacapa éma, nacavayuemarajipa nacaecahijiricapa. Ánipa nacahe:

—Tata, ¡pítitataji nayehevihiji Rey ena israelítana! —nacahepa.

Náehamirahavare te mamira.

⁴ Ema Pilato tiápechavarepa tiúchucahi. Tásiha, máichavacapa ena achaneana:

—Nímereca te emirahu ema maca achane. Nuvarahasera ácaucutiariaini eta tamajinairahi maviurevainahini eta nímairahi núti —máichavacapa.

⁵ Tacahe, nacuchucapa ema Jesús, mámapaipa eta itapepi te machuti, majarapihi náepiyaruihí éna, étapa eta namuriaruihí mularume. Tásiha, máichavacapa ema Pilato:

—Mácaripa ema maca achane. Ticaemecharáhiripa, ticaestaripavare. Maratapa —macahepa.

⁶ Te náimahapa ena tuparairucana énapa ena nasuntaruana, tipiaracanapa:

—¡Pémetatareca te crusu! ¡Pémetatareca te crusu! —nacahepa.

Ema Pilato máichavacavare:

—Núti tájina maviurevainahini eta nímairahi. Étina écha eta iámairaya éma. Étina émetatareca te crusu —máichavacapa.

⁷ Éna najicapavarepa:

—Ichape eta maviurevahi ema maca eta viyehé, taicha tímijachavahi Machicha ema Viya. Vivaraha máepena, taicha váhiquene vísapahini eta juca —nacahepa.

⁸ Eta masamirahi ema Pilato eta machichairahipuca ema Viya ema Jesús, ichaperinehi eta mapisirahi.

⁹ Tisiapavarepa tayehe eta mayehe palacio. Máichuhavarepa ema Jesús. Mayaserecavarepa:

—¿Nájahavisica píti? ¿Távihasica eta piásinehi? —macahepa.

Émasera ema Jesús, tájina vahi majicapahini.

¹⁰ Tásiha, ema Pilato máichavarepa:

—¡Vahi pivaraha pijicapanu! Péchapuca píti eta nuratahairahi nucuchucuhavi, énerichuvare nuratahavare nucavanairipi náetatacavi te crusu —macahepa.

¹¹ Ema Jesús mapaenumavapa majicapa:

—Váhiquene piratahaimahi píti jiva pémetatarecanuhini te crusu. Émasera ema Tata tituparacavihi, mavarairahi títauchava eta mavarahaqueneanahi. Eta tacahe, ichape eta napecaturana ena tjararecanuanahi eta piyehé. Píti váhipanaichuhinéni eta pipecaturahi eta píchiranuhi —macahepa.

¹² Tacahe, ema Pilato mavarahainipa macuchucuhayarehini ema Jesús. Énasera ena tuparairucana tipiaracanavarepa:

—¡Te picáitica ema maca, vépiyaquenehaviyare mayehe ema ichapequene aquenuca Emperador! ¡Ema maca achane macatianaruihí ema Emperador taicha tímijachavahi rey! —nacahepa.

¹³⁻¹⁴ Tacahe, te masamapa ema Pilato eta náechajiriruvahi éna, tiyanapa te anuquehe, téjacapa tayehe eta máejasirare apaesa namutuyarepa náimaha. (Eta mávacurehi, amairiha máripahi. Eta jena sache, viérnesi táequenereruhi eta Pascua.) Tacahe, tiánehiripa las dóceyarehi eta sache macavanairipia nama ema Jesús. Tásiha, máichavacapa ena achaneana:

—¡Mácaripa ema eyehe Rey! —macahepa.

¹⁵ Énasera tipiaracanavarepa:

—¡Pémetatarecavane! ¡Máepenanepa! ¡Váhiquene vivaraha ema maca! —nacahepa.

Tásiha, ema Pilato máichavarepa:

—¡Vahi németatarecaimahi ema eyehe Rey! —macahepa.

Énasera ena tuparairucana najicapavarepa:

—¡Nájina apanaina viyehena Rey! ¡Macarichu ema Emperador! —nacahepa.

¹⁶ Tacahe, ema Pilato máisapapa. Májaracavacapa ena masuntarurana eta náetatasirayare ema Jesús. Jéhesaréinehi námapa éma.

Náetatacava te crusu ema Jesús

(Mt 27.32-44; Mr 15.21-32; Lc 23.26-43)

¹⁷ Tacahe, nájaracapa ema Jesús eta macurusuraya. Tiúchucapa éma, mámapaipahi te majihu. Námapa eta te Calvario (te hebreo ticaijare Gólgota).

18-19 Tásiha, ema Pilato máepiyacapa eta ajureca eta táechajiriruvahi, ánipa tacahehi: “Ema Jesús Nazareno, Rey nayehe ena israelítana”. Te tápusi eta macurusura nanacapa eta juca ajureca. Natiarihivare ena apinana ticaetatanahivare te machacaya. Émasera ema Jesús, te enumuhu mávihahi.

²⁰ Camuriana ena achaneana téchajicuhanahi eta ajureca, taicha eta macaetataiyahi ema Jesús tacachacayaichuhi eta avasare. Eta ajureca, te hebreo, te griego, téhepa latín. Mapana eta táechajiriruvanahi.

²¹ Eta tacahe, ena tuparairucana tiyananapa mayehe ema Pilato nayaseapanahi máitsivachahini eta ajureca. Éna navarahahi áni tacaheyarehi eta ajureca: “Ema maca tímijachavahi Rey nayehe ena israelítana”.

²² Émasera ema Pilato máichavacapa:

—Eta ajureca nunacaquenehi, nájina tihapapicaimahi —macahepa.

²³ Te náitauchapa ena suntaruana eta náetatasirahi ema Jesús, nasuerteachapa eta mamuiriha nayehe ena cuátroqueneana. Navehavarepa eta apana mamuiriha. Étasera tájina taparinahini, amairijuheichucha eta itsameruca.

²⁴ Vaipa návarahahini navetsayucahini. Tásiha, nasuerteachavarepa, náimairayarehi nájahayarehipuca mácani tivecuhayarehi.

Tacahehi eta tátauchiravahi eta Sagrada Escritura eta táechajiriruvahi: “Ticajijiricanapa eta numuirihaini. Nasuerteachavare eta apana numuiriha”. Jéhesare, tacahehi naicha ena suntaruana.

²⁵ Te tápecu eta macurusura ema Jesús, sutiarihihí esu maena, ésupa esu mápenaru, ésupa esu apana María mayena ema Cleofas, ésupa esu María Magdalena.

²⁶ Tacahe, te máimahapa esu maena eta sutiarihirahi te machacaya, nútupa nuti máimiturehi máemunaruquenehi, ánipa máicha ésu:

—Mémechicha, márahi ema nítsivayare ema pichichayare. Éma títátiviyare.

²⁷ Tásiha, énerichuvare tituparacanuvarépa nútí:

—Némunacasare, nutuparacavi esu meme. Esu pényare. Pímainanu —máichanupa.

Jéhesaresera, nútí Juan ichaperinehi eta nujacapirahi esu maena. Námapa te nupena.

Eta máepenirahi ema Jesús

(Mt 27.45-56; Mr 15.33-41; Lc 23.44-49)

²⁸ Tacahe, eta máimairahi ema Jesús eta tátauchiravaripa tamutu eta táechajiriruvanahi eta Sagrada Escritura, ánivare macahehi:

—Tétavicava eta numauneva —macahepa.

²⁹ Tatiaríhíhi eta tisisica vino te tinaja. Náechipajicapa eta machuchujiruyarehi. Náimicapayacapa tayehe eta majaca te tíuquí curina.

³⁰ Tacahe, machuchujicapa ema Jesús eta tisisica vino. Tásiha, macahepa:

—Jéhevare puití, títauchavapa tamutu —macahepa.

Tásiha, téyusicapa. Tépenapa.

Ema émana suntaru mayuvaracapa te machene ema Jesús tayehe eta lanza

³¹ Tacahe, ena tuparairucana vahi návarahahini nánasihini ena ticaetatanahi te crusu te jena sache sávaru páscuairahi. Tacahe, tiyananapa mayehe ema Pilato, nayaseapanahi macavanairipihini eta nacavetupaiquechavacayarehi apaesa náepenavanehini. Navarahahi náecarávane, taicha tétavicavahi eta tacapicahuirahi nayehe éna eta jena sácheana páscuairahi.

³² Jéhesaréinehi, tiyananapa ena suntaruana, nacavetupaiquechavacapa ena apinana tiámerahiana nacaetataquenehi te crusu te machacaya ema Jesús.

³³ Tásiha, éneyareichuhivaréni ema Jesus. Téhesera te náitecapauchapa, náimahapa eta máepeniraipahi. Tacahe, vaipa nacavetupaiquechahini éma.

³⁴ Táitsivahisera ema émana suntaru mayuvaracapa te machene tayehe eta lanza. Enevanépa tíuchucahi eta iti étapa eta une.

³⁵ Nútí Juan nájuequenehahi tamutu eta juca, nímahaqueneanahi. Nuvaraha nítame-tacahe tamutu. Yátupihivare eta numetasirahehi, taicha nuvaraha esuapahini éti apanavare.

³⁶ Títauchavahi eta juca táechajiriruvahi eta Sagrada Escritura: “Tájina vahi nacavetucaimahi eta máperana”.

³⁷ Jararihivare eta apana Escritura, ánivare tacahe: “Náimahayare ema najarachaquenehi”.

Nacucupaicapa te crusu ema Jesús, náecarayarepa

(Mt 27.57-61; Mr 15.42-47; Lc 23.50-56)

³⁸ Te tamutupa eta juca, matiarihahi ema achane José, ticavasahi te Arimatea. Émarichuhi tisuapajirahihí mayehe ema Jesús. Váhisera máimerecavahini, mapisiravacahi ena machamuriana aquenucarahana. Tiyanapa éma mayaseapanahi ema Pilato eta máquehe ema Jesús. Tachahesera ema Pilato máisapapa. Tiyanapa ema José, macucupaipanapa eta máquehe ema Jesús.

³⁹ Émapa ema Nicodemo macachanehi, ema téjirapanahi ema Jesús te jena yátimuhuquénéhi. Mámapahi éma eta treinta kilo eta perfume mayajihayarehi.

⁴⁰ Tacahe, ema José émapa ema Nicodemo navehapa eta máquehe ema Jesús, náyuruacapa eta te sávana tijapu táurinaquenehi. Nayajihacavarepa tayehe eta táijiyequene perfume. Tacahehi eta viyeherepi te vécarayare ena nápenaqueneana.

⁴¹⁻⁴² Tacahe, te tachacaya eta máepeninehi ema Jesús, tatiarihahi eta huerta te távihahi eta mari natsecajueruhi ecariyare tacutihí eta covacha. Nájinaichaha nacaecarasihini tayehe. Étapa náecarihahi eta máquehe. Tiputuvahuanapa taicha cáperehichicharipahi. Vahi táisapacarehini náecarahini te yati, váhivare táisapacarehini te apanapa sache taicha sávarumuhuiipahi.

20

*Eta máechepusira ema Jesús te máecari
(Mt 28.1-10; Mr 16.1-8; Lc 24.1-12)*

¹ Tacahe, te jena sache lumincuquenehi, te tijarahichichapa, tiyanapa esu María Magdalena tayehe eta máecari. Timapicuichaha te suitecapauchapa eta ecari, suímahapa tájinaripahi eta márima tajihainihí eta tapajacurahi eta ecari.

² Te suímahapa, tichavavanepa tijunapapaipahi. Suíchuhapanayarehi ema Pedro nútipa nuti Juan. Timetachavípa ésu:

—Námechapa jácani eta ñáquehéni eñi Viáquenu. Vaipa vecha távihahipuca nanasihahi —suahepa.

³⁻⁴ Tacahe, nútí émapa ema Pedro viúchucapa viyanapa vijunapapaipahi. Nucachuricapa ema Pedro. Nítecapavanepa nútí tayehe eta máecari ema Viáquenu.

⁵ Nétipaicapa. Nujiñañajuechapa. Tacarinehi nímaha eta máyuruhanainihí. Váhisera nusiapahini.

⁶⁻⁷ Te títicapapa ema Pedro, tisiapapa éma tayehe eta ecari. Máimahapa eta máyuruhanainihí. Tanasirinecha enurujuhí, étapa eta mamuhisiequene ema Jesús.

⁸ Tacahe, nusiapavarepa nútí tayehe eta ecari. Nímahapa eta táicharacavahi. Tásiha, ichaperinehi eta nusuapirahi.

⁹ Vipaenumavapa vícaicutiarahi eta táechajiriruvahi eta Sagrada Escritura, eta máechepusirayarehi ema Viáquenu te máecari.

¹⁰ Te tamutupa eta vímairahi, víchavapa te vipena.

*Ema Jesús tímerecavapa suyehe esu María Magdalena
(Mr 16.9-11)*

¹¹ Esu María Magdalena, énerichuvare tíápechavaripa tichava eta te máecari. Sunasipa, tíyahai. Tásiha, tétipaicapa sujíñañacahi te tajuhe.

¹² Tiáramicarepa suímaha ena apinana ángeleana, tijapumuirihavacahi. Téjacanahi éna te tajuhe eta máecarini. Ema émana te tanapainihí eta machuti, ema apana te máivape.

¹³ Tásiha, ena ángeleana nayaserecapa ésu:

—¿Tájaha ticaiyacaví, nuchicha? —náichapa.

—Ticaiyacanuhi eta námechirahi eta ñáquehe eñi Viáquenu. Vahi nécha távihapapuca nanasihahi —suahepa.

¹⁴ Te títapiricapa eta suíchiravacahi, téviurucavapa, suímaharinehi ema Jesús.

¹⁵ Tásiha, éma apanava mayaserecapa:

—¿Tájaha ticaiyacaví, nuchicha? —Nájaha pitanucahi? —máichapa.

Ésusera suímijachaichucha ema tjanearacarahi eta huerta. Tásiha, suíchapa:

—Tata, te píthipuca piámahi eta ñáquehe eñi Viáquenu, pícatajicanu pímetacanu távihapuca pinasihahi. Nuvaraha námayare nútí —suíchapa.

¹⁶ —¡María! —máichapa.

Suésenicainehi ésu. Supaenumavapa suímatihí éma. Tásiha, suíchapa:

—¡Pítiquenehi, Tata Náquenu!

¹⁷ Tásiha, ema Jesús máichapa:

—Vahi picuemamahacanu, taicha vuíchaha nápanahini te mávihahi ema Tata. Piyana pímetacavaca ena apamuriana nímitureana eta nápanirayare mayehe ema Tata, Ecaiaque-nehivare éti apanava —máichapa.

¹⁸ Tacahe, esu María Magdalena tianapa sumetapanavacahi ena suchamuriana eta suimairahahi ema Jesús, étapa eta mametarapianahi.

*Tímerecava ema Jesús nayehe ena máimitureana
(Mt 28.16-20; Mr 16.14-18; Lc 24.36-49)*

¹⁹ Étarichu te jena sáchequenehi lumincuquene, yátiripahi, viúrujicavahi viti máimitureana ema Jesús te tajuhe eta peti. Vérateaquenerecavahi taicha eta vípisirahi ena tuparairucana. Tiáramicarepa titupihahi ema Jesús te vimuri. Téchajicahavipa:

—¿Ícharacava, nuchichanaveana? —máichahavipa.

²⁰ Tásiha, tímechahavipa eta majarana te mavahuana étapa te machene. Tacahe, víti ichaperinehi eta viúrisamurevahi eta vímairahi éma.

²¹ Tásiha, máichahavipa:

—Vahi ecueñamava. Núti, mavanerunuhi ema Tata núcupaicayare te juca apaquehe, nímitucaheyarehi éti. Púiti nuvanecaheyare núti ímitucavacayarehi ena achaneana, apaesa náhicanuhini éna apanava —macahepa.

²² Tásiha, tiáchajuacahavipa víti. Tásiha, máichahavivarepa:

—Táuri eta ejacapiraina ema Espíritu Santo eta máitecapauchiraheya, mávahásiraheya.

²³ Éma, tímitucaheya eta ítametasiravacaya ena achaneana eta naperdonachacarevahi me Viya ena téneuchavanahi. Te vahi nacubaraha téneuchavana, tanasiyare eta naviurevana taicha eta napecaturana —macahepa.

Éma Tomás vahi masuapa eta máechepusiraipahi ema Jesús

²⁴ Te jena sache eta máimeresiravahi ema Jesús eta víyehe, májinahi ema vichamuri Tomás.

²⁵ Tásihasera, ena apamuriana vichamuriana nametacapa éma eta vímairaipahi ema Jesús. Émasera macahepa:

—Vahi nusuapa. Téhesera te nímaha eta majara te mavahu taicha eta clavo, nímisiapavare eta nuvaquí tayehe eta majara te machene, tapaenumava nusuapayare eta máechepusiraipahi —macahepa.

²⁶ Te óchopa sache eta táetavisiravahi, viúrujicavaipavare te viúrujisirareva. Matiarhipahi ema Tomás te vimuri. Tásiha, tiáramicarevarepa tímerecavahi ema Jesús. Titupihahi te vimuri. Téchajicahavivarepa.

—Ícharacava, nuchichanaveana —macahepa.

²⁷ Tásiha, máichuhapa ema Tomás:

—Yare, nuchicha —máichapa—. Pímaha eta nujarana te nuvahuana. Pímisiapa eta pivauquí eta te juca nuchene, apaesa pisuapanu.

²⁸ Tacahe, ema Tomás majicapapa:

—Tátachicha, piti yátupiquenévi Viya. Tétavicavahi eta nucasiñairavihi —máichapa.

²⁹ Éma Jesús majicapapa:

—Nuchichasami Tomás, pipaenumava pisuapanu eta pímairanuipahi. Tétavicavasera náuricacareva nácani tisupajirahianahi vahi tácomesahini náimahanuhini —macahepa.

Nuvaraha esuapa eta juca libro nájurehi

³⁰ Jucarihichahavare eta apamuriana tiáramicareana máichaqueneanahi ema Jesús, eta vímahaqueneanahi viti máimitureana. Váipasera tamutuhini tacajuhini te juca libro.

³¹ Nuvarahasera ácacutiara eta nájureanahi apaesa esuapahini ema Jesús eta émairaquenehi Cristo, Machichaquenehi ema Viya. Taicha te esuapapuca éma, máitavacayare eta itaresirayare.

21

Tiápechavavare tímerecava ema Jesús nayehe ena siétequeneana máimitureana

¹⁻⁴ Tiuri, te táequenepa eta juca, viyanapa víti te Galilea, vicuchapayarehi ema Jesús. Ánaquí matiarihíhi ema Pedro, ema Tomás, ema Natanael, ema nuparape Jacobo, nútipa nuti Juan. Natiarihivare ena apinanahi vichamuriana. Tacahe, ema Pedro máichahavipa:

—Nuyanayare nénipanayare te cáquiure —macahepa.

Tásiha, víti vijicapapa éma:

—Véhicaviyare víti apanava —víchapa.

Tacahe, te vítecapapa, víavacuhapa tayehe eta pacure. Vénicaipahi te jena yátiquenehi. Tájinasera vítucavahini. Te tijárahichichayaréipa, vímahapa ema Jesús. Titupihapahi te tachaúsi. Váhiserá vímativanehini.

⁵ Tásiha, téchajicahavipa:

—¿Ícharacava, nuchichanaveana? ¿Tájina ítucava eta jima? —macahepa.

Vijicapapa víti:

—Tájina vítucava —víchapa.

⁶ Tásiha, éma tivanecahavipa viáquijieca eta veyehe tarrafa te apachacaya eta pacure tinapaicahi te vaure.

—Éta ítusiavayare eta jima —máichahavipa.

Visuapahisera víti. Tásiha, te vichuruecapa eta veyehe tarrafa, vaipa víchinahini taicha táetaviuchahi eta camurirahi eta jima. Tijitacarenecha.

⁷ Tásiha, núti níchapa ema Pedro:

—¡Émara ema Viáquenu! —níchapa.

Masaminenurichuhi ema Pedro eta níchirahi, ticamuirihavanepa taicha tivejamuhia-cavahi éma eta mamuiriha. Tépuhecavapa, mavarairahi macapayacavaneyarehi ema Viáquenu.

⁸ Víti apamuriana vipauchapa eta tachausi. Vichuruecapaipahi eta veyehe tarrafa; tínica-paipahi eta camuriquene jima. Cien métrorichuhiserapuca eta viyerehirahi eta tachausi.

⁹ Te viúcupaicapa te tachausi, vímaharínehí tatiarihíhi eta yucu, éta pa eta jima jitaruca, éta pa eta pan.

¹⁰ Tásiha, ema Jesús máichahavipa:

—Íama eta íturevahi jima —máichahavipa.

¹¹ Ema Pedro machurupaicapa eta tarrafa. Vímaharínehí eta ichapemuriquene jima. Ciento cincuenta y tres eta tasimurivahi. Váhisera táetsayucahini eta veyehe tarrafa.

¹² Tásiha, tíchuhahavipa ema Jesús:

—Yare, enica —macahepa.

Tásiha, viyanapa víti, vínicayarehi. Váhisera vipatsicavahini viyaserecaini te nájahahipuca éma taicha tétaavicavahi eta viáramesirahi. Vímatiacahisera eta émairahi ema Viáquenu.

¹³ Tásiha, ema Jesús témeñahavapa. Mavehapa eta pan. Tíjaracahavipa. Éta pa eta jima táimaquienepa, tíjaracahavivarepa.

¹⁴ Eta juca eta mapahequene pa eta máimeresiravahi ema Jesús eta veyehe eta máechepu-sirahi te máecari.

Ema Jesús mavaraha macaicutiara te yátupipuca máemunaca ema Pedro

¹⁵ Te vítanésipa eta vinisirahi, ema Jesús mayaserecapa ema Pedro. Ánipa máicha:

—Píti Pedro, nuvaraha nuyaserecavi: ¿Picachuricapuca píti ena nani apamuriana eta pémunasiranuhi? —máichapa.

Éma majicapapa:

—Némunacavi, Tata. Pécharichuhi píti jácani némunasiravihi —macahepa.

Ema Jesús máichavarepa:

—Tiuri, te yátupihipuca pémunacanu, nuvaraha pijaneasinanuvaca ena téhicanuanayare, taicha vahi náitucahini nacatiuchavahini. Téñamacareanahi —macahepa.

¹⁶ Te táequene pa, mápechavare mayasereca:

—Pedro, nuvaraha nuyaserecavi: ¿Yátupi eta pémunasiranuhi? —máichapa.

—Némunacavi, Tata. Pécharichuhi píti eta némunasiravihi —máichapa ema Pedro.

Ema Jesús máichavarepa:

—Tiuri, te yátupipuca pémunacanu, pijaneasinanuvaca ena téhicanuanahi —macahepa.

¹⁷ Te táequenevarepa, mapahequene mayasereca:

—Pedro, ¿yátupi eta pémunasiranu? —máichapa.

Émasera ema Pedro titsirihapa taicha mapaheripa eta mayaseresirahi. Majicapavarepa:

—Pécharichuhi, Tata, eta némunasiravihi —macahepa.

Tásiha, máichavarepa ema Jesús:

—Tiuri, te yátupihipuca pémunacanu, pijaneasinanuvacayare ena téhicanuanahi.

¹⁸ Nutupiruva numetacavi: Eta piámaperuvahi, píti péchinavahi eta pítaresirahi. Picamuirahahi, píyanahivare te jácani pivarahaqueneanahi picaijuhe. Jácanisera áñoanayare eta pichávicavaipa, apanainapa eta pítaresirayare. Apanainapa ena tímuriachavianayare, taicha títijivauchavianayare, tásiha tíamavianainapa te jácani pimavarahaquenénihi picaijuhe —máichapa.

¹⁹ Eta juca máichirahi ema Jesús, mavarairahi máiminecapaequenehayarehi eta máicharacavayarehi eta máepenirayare ema Pedro. Tétaavicavainapa eta macunachacareva ema Viya maicha ema Pedro, taicha vahi téquecavaimahi eta máimairahi eta macatajivairaya. Tásiha, máichavare ema Jesús:

—Píti Pedro, tacuija tahapapiricahini eta pítauchira tamutu eta nutuparasiravianahi —máichapa.

Eta táichecuine eta májurehi ema Juan, máemunaruquenehi ema Jesús

²⁰ Tásiha, téseniequenehavapa ema Pedro, tímahanupa eta néhiequenehairapahi nuti máemunarunuhi ema Jesús. (Nútirichu núti nuyaserecahi te mesa te nájahhipuca ema tjararecayarehi.)

²¹ Eta máimairanuhi ema Pedro, mayaserecapa ema Jesús tájahapuca eta níchararacavayarehi núti apana. Ánipa macahe ema Pedro:

—Tata, ¿tájahapuca máicharacavayare ema apanava ema maca?

²² Ema Jesús majicapapa:

—Núti nécha. Te nuvarahapuca máitareca máimahayare eta nápechiravayare nuchavirayare, vahi tacuimipanerecavi. Pítamisera, pítaucha tamutu eta nutuparasiraviana. Tacuija tahapapiricahini eta péhisiranuhi.

²³ Tacahe, ena nuchamuriana, ichaperinehi eta napanerequenehairahi eta numaepenirayarehi. Váhisera mametacahini eta numaepenirayarehi. Tacarichu macahehi: “Te nuvarahapuca núti máitareca máimahayare eta nápechiravayare nuchavirayare, vahi tacuimipanerecavi” macahepa.

²⁴ Nuparapenaveana, núti yátupiquenenuhi eta máimiturenuirahi ema Jesús. Nutupiruvahi néchajisiha te juca nájurehi eta yátupiqueneana nímaqueneanahi.

²⁵ Jucarihichaha eta apamuriana máichaqueneanahi ema Jesús. Váipasera támutuhini nájuequeneháhini, taicha tétavicavahi eta táichapemurivahi. Te vítametacapucaiini tamutu eta máichaqueneanahi, váipapuca vicuratahahini vítuca, namutuhinéni ena achaneana te juca apaquehe tiájuequenerahiana.

Tamutupa eta juca nájurehi.

Emá San Lucas májuequeneháhi eta náichararacaváhi ena Apóstoleana eta náehisiráhi emá Jesucristo, ticáijare **LOS HECHOS**

¹ Piti Teófilo, títecapáuchaviripa eta táinapure nájure tayehe eta máichavaqueneváhi emá Jesucristo te títecapapa te juca apaquehe. Nájuhahi tamutu eta máichaqueneanahi, étapa eta máimiturapianahi.

² Nararihihi ena manerejiruana apóstoleana. Émaripa emá Espíritu Santo máimicatacáhi eta matúparasíravacáhi éna. Nájuhavarepa eta mayapiráhi te anuma. Puiti nímiama-recavare eta piyehe eta juca nájure, apaesa pímati tamutu eta téchacareana tayehe eta máichavaqueneváhi emá Jesús.

³ Te táequenepe eta máepeniráhi, téchepucapa te máecari, tíápechavavare títareca. Tásiha, cuarentaquenehi sache eta macáchanéravacaríhaha ena máimitureana. Máimerecháhi ichape eta machaviráhi títareca. Máimitucavacáhi éna, eta táichararacavayare eta náehisirayare emá Viya ena achaneana te tamutu avasareana.

Emá Jesucristo mametaca eta máucupaisirayare emá Espíritu Santo

⁴ Te jena sache, macáchanévacaríhaha ena apóstoleana, mametacavacapa. Ániapa maicha: —Váhi ecújúnijica eta juca víávasa Jerusalén. Ecuchapayare eta títauchiravayare eta máijjararuváhi emá Vicaiyaquene. Étaripa eta juca numetarapianahi.

⁵ Échavarichu emá Juan, máicachasicavacáhi te une ena achaneana. Étísera, puiti juca sácheaneyare, tíucupaicayare emá Espíritu Santo. Emá tícachasicaheyare, tíávahácháhéna —macahepa emá Jesús.

Eta mayapira emá Jesús te anuma

⁶ Tacahe, nayaserecúpa ena tíúrujiácanahi emá Jesús. Ániapa naicha: —Tata Viáquenu, ¿púitinarichu píjaracahavi víti israelítana eta vítináini vígóvernachacáca te juca víávasa? —nacahepa.

⁷ Emá Jesús májicapapa, ániapa maicha: —Vuíchaha táechacare. Váhi tatuparaca étinahíni echa tájahapuca sáchevayare, tájahapuca cájeyavare títauchavaya. Taicha tayumurureváhi eta juca maicha emá Tata Vicaiyaquene. Macarichu éma máituruéqueneha eta juca.

⁸ Jucarihísera eta ítucaquenezare. Emá Tata tíjaracaheyare emá Espíritu Santo, tíávahá-caheyare tímicatataheyare. Tacahe, échajisianuínapa nútí. Tamutuyare avasareana eta epaisíha, te Jerusalén, te Judea, te Samaría, étapa te jácani tayerehiqueneana avasareana tayehe te juca apaquehe —máichapa emá Jesús.

⁹ Tacahe, te títavapa eta máéchajirísiraváhi, tíyanapa tíyapa te anuma. Tacahe, ena máimitureana náimararaequenehaipa eta mayaniráhi. Táepacuchiráhi eta úcáji. Vaipa macaecherahíni te anuquehe.

¹⁰ Eta mayaniráhi emá Jesús te anuma, náimararacáichaha ena máimitureana. Tacahe, tíáramicareanapa tímeracavana ena apinana ángeleana. Tíjapumuiríhavaca.

¹¹ Tacahe, náichapa ena ángeleana:

—¿Tájaha íchahi ímararacáhi eta anuma, eti máimitureana emá Jesús? Puiti enecapararecháhi emá Jesús eta majuniisiraheripa, mayanirapa te anuma. Vimetacahe: Te jácani sáchezare, emá Jesús tíchavayare te juca apaquehe. Tíucupaicayare tacutiyaereichu eta mayaniráhi —náichavacapa ena ángeleana.

Nanerejicapa emá Matías, máitsivayarehi emá Júlasí

¹² Tiuri, eta návihairáhi te anuquehe masíhi ticáijare Olivoquíji. Tachacayáhi eta Jerusalén, apina kilómetro eta tayerehiváhi. Tíyananapa tíchavana tayehe eta avasare.

¹³ Te títecananapa te avasare, tísiapanapa te peti apina piso, eta náítecapiháhi. Tíápananapa te téqueneha piso. Natíarihíhi emá Pedro, emá Jacobo, emá Juan, emá Andrés, emá Felipe, emá Tomás, emá Bartolomé*, emá Mateo, emá apana Jacobo, emá Simón, émápa emá Judas.

* **1:13** Emá Bartolomé ticáijarehivare Natanael. Emá apana Jacobo, machicháhi emá Alfeo (váipasera véchápíríca eta máítaresira emá Alfeo). Emá Simón, nachamuríníhi ena revolucionario ticáijareana “cananístana”. Ena nani cananístana nacananarajirícháhi ena apavasanana romanoana, navarairáhi náquíjica, nacuchucayare te návasa Judea. Emá maca Judas, matiarihi emá maparape ticáijarehivare Jacobo, váhísera nachamurinahíni ena apóstoleana. Emá maca Judas, mapanahi eta máijare: eta Tadeo étapa eta Labeo, étapa eta Judas. (Te pívaraha pecha, pítanuca te libro Marcos 3.18 étapa te Mateo 10.3.)

¹⁴ Natiarihivare ena maparapenaveana ema Jesús, ésupa esu maena María, énapa ena apamuriana esenana. Tamutu sácheana, ena nani tiúrujicavanahi eta nayujarasirahi.

¹⁵ Tacahe, te jena sácheana, ena náurujiರುವಾನahi náetavicahi ciento veinte eta nasimutuva ena máimitureana ema Jesús. Tacahe, téchepucapa ema Pedro te namuri, titupihapa. Máichapa:

¹⁶ –Nuparapenaveana, ema víyahaini David macaimitucasiquenehi mayehe ema Espiritu Santo, ánaquiríchaha eta áñoana eta matiarahiraya ema Júlasí, ema tinapumiráuchaya ena suntaruana nacaratacaya ema Jesús. Títauchavapa eta mametarapihi ema Espiritu Santo.

¹⁷ Taicha ema Júlasí, émainichuhi vichamurini tayehe eta juca vématanerepihi –macahepa ema Pedro.

¹⁸ (Émasera ema Júlasí ticapacavahi tichumucavapa. Tiáquipaicavahiséra eta máquehe. Tiúchumuriapa eta maturupiana. Te táequeneapa, navehapa eta mavachainihi eta májararesirahi ema Jesús. Navacharecapa eta apaquehe.

¹⁹ Te náechapa ena ticavasana te Jerusalén, nacapa eta táijarehi Acéldama. Eta ticaijarehi puiti “Apaquehe máitinevacha ema Jesús”.)

²⁰ Tímiyanava eta máechajisirahi ema Pedro, ánípa maicha:

–Ema víyahaini David májucunachahi ema mametarapiana ema Espiritu Santo eta te Salmo. Áni macahehi: “Machu nacuija nacusiapa eta mapena majunijiruiapa nácani macutipanereruana eta mavainarajiva”. Ánivarepa macahe: “Tatuparacahi masiapaya ema apana achane máitsivaya te mávacurénihi” macahepaji ema Espiritu Santo.

²¹⁻²² Tacahe, tituparacahavi vinerejicayare ema apana, máitsivaina ema Júlasí, apaesa vahi macuejiacava te vimuri viti dócequeneana. Máimicatacahavi eta véchajisíha eta máechepusirahi ema Jesús. Nararihi ani te vitaracu ena vichamurianahi te juca áñoana te matiaríchaha ema Jesús te vimuri. Ena ticachanehavianahi te ticaicachasinapa ema Jesús me Juan. Vahi najunijicahavihini. Natiaríhiquenehi te tiyapapa ema Jesús te anuma –macahepa ema Pedro.

²³ Tacahe, ticanerejianapa ena apinana: ema ticaijare Matías, émapa ema apana ticaijare José Barsabás (énerichuvare námijarechahi Justo).

²⁴⁻²⁵ Tacahe, tiyujaracanapa, ánípa nacahe:

–Tata Viáquenu, piti pímati eta visamureana vimutu. Pímechahavi nájahapuca ema tiuri nayehe ena nani apinava vinerejiರುವಾನahi máitsivayare ema máemitariuhi apóstoleni Júlasí, táimicuñaruihi eta mapeatura –nacahepa.

²⁶ Tacahe, nasuertehachapa ena apinana. Tatocachapa ema Matías. Tásiha, natuparacapa eta mávacureyare nachamurirayarehi ena apamuriana apóstoleana.

2

Eta máucupaisirahi ema Espiritu Santo

¹ Tiuri, títecapapa eta sache napiestara ena israelítana ticaijarehi Pentecostés. Tiúrujicavanahi ena apóstoleana énapa ena apamuriana nasimutuvaqueneana máimitureana ema Jesús.

² Tacahe, tiáramicarepa eta ticaema te anuquehe tísiha te anuma ticutipahi eta muraca técatícava. Ticaemapá muraca te táinahu eta peti návihahi éna.

³ Tacahe, tiáramicarepa tímercava eta tacuti eta tanene eta yucu. Tijarahivacapa te nápusiana namutu ena náurujiರುವಾನahi.

⁴ Tacahe, ena mávahácavacaripa ema Espiritu Santo. Tiáramicareanapa apáechajiríruvavacapa taicha eta mávahásiravacáipahi ema Espiritu Santo.

⁵ Te jena sache, natiarihivare ena camuriqueneana israelítana te Jerusalén tísihana te tamútyaréini avasareana. Tipicaurahianahi tayehe eta nayehe religión.

⁶ Te nasamapa eta tacaemairahi te anuquehe, ticurujićacanapa ena achaneana. Náraminehi ichape táichavenehi eta nasamirahi ena apáechajiríruvavacarípaihi.

⁷ Ichaperinehi nárami. Tacahe, náichacacapa:

–¿Tájaha tacayema eta juca? Ena nani, váhira vichamurianaina tayehe eta avasare viávihahi. Ticavasana te Galilea ena nani.

⁸ Tásihasera, náitucahivare eta véchajiríruvapachu vímiuchurehi víti. ¿Tájahapapuca tacayema eta juca?

⁹ Camuriana eta véchajiríruvana taicha viti viásihahajíruvanahi te apanapanejianá avasareana. Nararihi ena tísihana te Partia, te Media, te Elam, te Mesopotamia, te Judea, te Capadocia, te Ponto, te Asia, te Frigia, te Panfilia, te Egipto.

¹⁰ Nararihivare ena tísihana te Cirene te Libia. Nararihivare ena tísihana te Roma, ena yátupiqueneana israelítana énapa ena tépiyacavanaripa israelítana.

¹¹ Nararihivare ena tiásihana te Creta étapa te Arabia. Vimutusera visama eta véchajiriruvapachu. ¿Tájahapuca tacayema? Ena nani téchajicanahi timetacahavianahi eta táurica-carequeneana tásihaqueneanayare me Viya. Vicaicutiarahi tamutu taicha téchajicanahi te véchajiriruvapachu —nacahepa.

¹² Namutu napanerequenehahi. Vaipa náimatihini tájahapuca tacayema. Tiyaserejiricacana-
navarepa:

—¿Tájahapuca tacayema eta juca? —nacahepa.

¹³ Natiarihisera ena apamuriana nacaecahirichucha, ánipa nacahe:

—Nacavahaqueneana ena nani —nacahepa.

Ena Pedro máechajicapa ena achaneana

¹⁴ Tacahe, titupihapa ema Pedro te namirahu ena achaneana. Natiarihivare ena óncequeneana apóstoleana. Téchajicapa muraca ema Pedro eta máechajisirahi, ánipa macahe:

—Tátanaveana nujaneanana, emutu eti ecavasana te juca Jerusalén, ecatajicanu esamanuchaha. Ácaicutiaraquenéna eta juca nucayemayare.

¹⁵ Eti ímjachahi vicavahaqueneana. Vahi vicavahaquenéna. Tapaenumava las nuéverava yáticarahi. Écharichuhi éti vahi vítuca vera viti israelítana te yáticarahi.

¹⁶ Eta juca ímahaquenehi íaramiquenehi puiti, eta tacaheyarehi taicha mametarapihi ema Viya mayehe ema víyahaini profeta Joel. Tásiha, ema Joel májucunachapa eta mametarapihi ema Viya, ánipa tacahe:

¹⁷ “Jararihiya eta sácheanaya níjaracayare ema Espíritu Santo nayehe namutu ena achaneana. Tásiha, ena echichanaveana, ajairana énapa ena esenana, nacametairuinapa eta néchajiriruva. Ena amaperuana, níjaracayare eta náechirayare eta táicharacavayare. Ena ichavicachichana ticametacasianayare te navapure.

¹⁸ Taicha nuvanecayare ema Espíritu Santo, níjaracayare mávahácavaca namutu ena nuchanerana. Tasiha, nacametairuinapa eta néchajiriruva tásihaquenehi nuyehe.

¹⁹ Te juca anuma nímerecayare eta tiáramicareana. Te juca apaquehe nucuchucayare eta ecutiarareanaya, apaesa ímatinu nuti nucarichu nurataha nicha tamutu. Nucamiricaya eta ecuñaraqui. Tépusaicavayare eta náitine ena achaneana váinarajiqueneanahi. Nucamiricayare te avasareana eta yucu étapa eta ichape quijare.

²⁰ Eta sache, nucaemahayare eta tajaraiva. Énerichuware nítivachayare eta táimahi eta caje. Ítimeyare nícha. Tásiha, títecapainapa eta nusacherayare nuchaviraya nuti Iáquenu. Te jena sácheyare, ichape eta napisirainapa ena achaneana taicha núcuñacavacainapa namutu ena ticapecaturarahianaichaha.

²¹ Étiserá eti ecasiñanuhi échajicanuhi eta te níjare nuti Iáquenu, nucuchucuhaheyare” macahepa ema Viya.

²² Tiuri puiti, nuparapenaveana nujaneanana, esamavare eta juca apana numetaruhayare. Ímatihí ema Jesús Nazareno. Ema maca ajaira, mavaneruhi ema Viya. Écharichuhi éti eta tiáramicareanahi máichaqueneanahi ema Jesús. Ema Viya májjaracahi eta máitupajijásiravayare, mavarairahi máímerecayarehi te emirahu eta émarahi mavaneru ema Viya.

²³ Tiyerehichahahi eta juca, ema Viya mapanerecharipahi eta máicharacavayarehi ema Machicha. Eta tacahe, máisapahi eta íjararesirahi ema Machicha nayehe ena váinarajiqueneana achaneana. Éma, émetataruhi te crusu. Éma, ímicaparuhi.

²⁴ Émasera ema Viya macaechepucahi ema Machicha. Macaitarecahi tayehe eta máepenirahi, taicha vahi mávarahahíni mánasihíni máepenahíni.

²⁵ Ema víyahaini rey David timetacahavíhi eta te Salmo eta máechajiriruva ema Jesús. Ánipa macahe: “Tata, piti pímararacanuhi eta picáchanéranuhi. Piti pijaneacanuhi te nuchacaya. Pétimechanuhi tamutu sácheana.

²⁶⁻²⁷ Tacahe, núsismure ichape. Nuvarahavare nujirauchaviyare néchajisihaviyare. Núti, te népenapa, tájina néñamavaimahi, taicha nucasiñavahi piyehe eta pínichavirayarehi piáchanechanu. Vahi písapaimahi témitiequeneha eta náquehe nuti pichicha pémunarquenehi.

²⁸ Piti píjaracanuhi eta picaechepusiranuyarehi te nécari, nápechiravayarehi nítareca. Tásiha, nuvavinavayare eta nutiaríhirayare te pímirahu” tacahepa eta Salmo.

²⁹ Nuparapenaveana, véchahi vimutu eta máepenirahi macaecarasirahi ema víachuaini David, taicha vímaharichaha puiti eta máecari.

³⁰ Ema víyahaini David, yátupiquenehi profeta. Macuchapahi eta táitauchiravayare eta mametacasihavi me Viya, eta matiaríhirayarehi ema émana mámariequeneayarehi ema ticaíjareyarehi Cristo ema téjacayarehi te trono. Máitsivayarehi ema máchucaini.

³¹ Ema Viya máimechahi ema David eta máicharacavayarehi ema Cristo máechepusirayarehi te máecari. Tacahe, ema David májucunacharipa eta vahi tánasimahi tépena eta máchaneva ema Cristo; váhivare témitiequenehaimahi eta máquehe.

³² Puíticha, ema Viya macaechepucahi ema maca Jesús. Tásiha, viti véchajisihahi eta juca taicha vímahaquenehi eta mápechiravahi títareca.

³³ Tacahe, ema Maiya macayapapa te anuma ema Machicha, macaejacaripa te mavaure. Tacahe, májjaracaripa ema Espíritu Santo ema máitsivayarehi taicha ema matuparaharichuhi. Tacahe, ema Jesús máevatacapa ema Espíritu Santo eta viyehe. Étara eta juca ímahaquenehi puítu, esamaquenehi eta máucupaisirahi ema Espíritu Santo.

³⁴⁻³⁵ Vahi ecuimijachahini émainahini ema David mápanahini te anuma. Émahisera téchajisihahi eta matiarahirayarehi ema apana tiápanayarehi te anuma. Ániya macahehi: “Ema Viya máichapa ema Tata Náquenu Cristo: Yare, péjaca te nuvaure, eta picuchapihayare eta nucaepuyusiraya te pimirahu ena ticatianacavianahi, máichapaji ema Viya”. Étara eta juca macayemaquenehi ema víyarahaini David.

³⁶ Tiuri puiti, emutu eti nujaneanana israelítana, nuvaraha ímatiyare ema Jesús émetataruhi, émara ema Viáquenu, émairahivare ema Cristo, maicha ema Viya —macahepa ema Pedro eta máechajiriruvahi.

³⁷ Tacahe, eta nasamirahi eta juca ena achaneana, ichaperinehi eta náeñamiravahi te nasamureana. Tásiha, nayaserecapa ema Pedro énapa ena apamuriana apóstoleana, ániya nacahe:

—Viparapaveana, ¿tájahapuca vícharacavaini víti? —nacahepa.

³⁸ Tacahe, ema Pedro majicapapa:

—Ítsivacha eta juca ítaresiraina te mamirahu ema Viya. Eta íjarasiravaya mayehe ema Jesucristo, ecaicachasiya emutu éti. Tásiha, ema Viya macaepahainapa eta epecaturana. Tíjaracahénavarepa ema Espíritu Santo.

³⁹ Taicha ema Viya mavarahahi tíjaracaheyare ema Espíritu Santo emutu éti énapa ena echichanaveana énapa ena apavasanana, namutupa nácani manerejruanahi máichuhaqueneanahi ema Viya, tayanapane ticavasanahi te tiyerehiqueneana avasareana —macahepa ema Pedro.

⁴⁰ Tacahehi eta juca máechajiriruvanahi ema Pedro. Ichape eta maconsejachiravacahi, ánivarepa máichahi:

—Ácájuhe ema Jesús. Ínajica eta eváinarajivana. Érajicava nayehe ena tíchana eta tamauriqueneana —macahepa.

⁴¹ Tacahe, natiarihi ena tisuapanahi eta máechajiriruvahi. Enevanepa ticaicachasiana éna. Mapanaqueneana mil ena tisuapajirahianahivare.

Eta náitaresirahi ena náinapureana téhicanahi ema Cristo

⁴² Ena achaneana, eta nasamarasirahi eta náimiturapiana ena apóstoleana, ichaperinehi nasuapa. Tásiha, tíuririnehi eta náitaresirana. Náemunacaine ena nachamuriana. Tamutu sácheana tícurujicacananahi eta nayujarasirayarehi étapa eta nanisirayarehi eta pan táicutiarahi eta máepenirahi ema Viáquenu.

⁴³ Ichape eta náramirahi ena achaneana, taicha náimaharipa eta tiáramicareana náichaqueneana ena apóstoleana, máimicatasiravacahi ema Viya.

⁴⁴ Namutu ena tisuapajirahiana tíurujicavanaparácahi ticajicacananahi eta náimahaqueneana.

⁴⁵ Te náimaha ema mácani nachamuri ticamunuvahi, nájjarareca eta náimahaqueneana. Tásiha, nájjaracapa eta plata ema ticamunuvahi, náimicatasihayare.

⁴⁶ Tamutu sácheana tíurujicacananahi eta te Templo. Tásiha, te napanana tíchuhacacananahi ténicacananahi. Ticachanecacananahivare eta nanisirahi eta pan táicutiarahi eta máepenirahi ema Viáquenu. Náurisamurevahi, táurivaipahi te nasamureana.

⁴⁷ Najiraucha nacunachahi ema Viya. Tacahe, namutu ena apamuriana achaneana napicauchahi éna. Tásiha, tamutu sácheana ema Viya máichuhavacahi ena apamuriana tisuapanavare.

3

Eta manarasirahi ema achane masarini

¹ Tiuri, étana sache, te las trespa cáperehi, ema Pedro émapa ema Juan tiyananapa tisiapanayarehi eta te Templo. Te jena hora, las trésqunenepa sache, hora eta nayujarasira ena israelítana.

² Mataríhi ema achane masari. Máimiuchurehi eta mamásariva. Tamutu sácheana nanapana eta te Templo. Nanaquica eta te ichapepana tapaja ticajjare Tiúrinapana, mayaseseresihayarehi eta limosna nayehe nácani achaneana tisiapanapahi.

³ Tacahe, ema masari, te máimahavacapa tisiapanayarehi ema Pedro ema Juan, mayaseacavacapa eta limosna.

⁴ Tacahe éna, násenicapa ema masari. Tasiha, máichapa ema Pedro:
—Pímararacahavi.

⁵ Tacahe, máimararacaripahi. Máimijachaipa nájaracayarehi eta plata.

⁶ Tásiha, ema Pedro máichapa:

—Tájina nuviya eta plata níjaracavihini. Jucarihisera eta juca nucatajicaviyare. Nucanaracaviyare. Táichavene eta máitupajijiasirava ema Jesucristo ema Nazareno, nuvanecavi: Péchepuca, pipaica —máichapa.

⁷ Tacahe, ema Pedro machuruvauchavanepa te mavahu vaure, macaechepecapa. Éneverínehi túmevaca eta mapaiqueana eta mayucarana.

⁸ Tacahe, ema masarini tjáhučhavapa titupiha, tipaica. Tacahe, tisiapanapa te Templo máehicavacapaipa éna. Máeteresinapaipa eta mapaisirapahi. Macunachapaipa ema Viya, mahasulupayachavare eta macanarasirahi.

⁹ Namutu ena achaneana námararacahi eta mapaisiraipahi, macunacharinehi ema Viya.

¹⁰ Te náimatipa ena achaneana ema masarini, ichaperinehi eta náramirahi. Ánipa nacahehi:

—Ánaquiaparipa eta mayaseseresirahi eta limosna ema maca, máejasiraparaca te tapaja ticajjare Tiúrinapana taicha eta mamasarivahi. Puítisera tipaica, tétérecavarepa. ¿Tájahapuca máicharacavahi eta manarasirahi? —nacahepa.

Ticametarairu ema Pedro te Templo

¹¹ Tacahe, ema masarini vaipa máinajiacavacahini ema Pedro ema Juan. Tacahe, náurujiacapa namutu ena achaneana te návihahi ena apóstoleana te tajuhe eta Templo, te tayehe eta alar máepiyaruhi ema reyni Salomón.

¹² Tacahe, eta máimairahi ema Pedro ena achaneana náramirahi eta juca, máichavacapa:

—Tátanaveana, nujaneanana israelítana. Iáramihi éti eta juca víchirahi víti. Ímjichapa vítijivahi vicanaraca ema maca achane masarini. Ímjichapapuca viti vítupajijiacavahi táichavene eta víjarasiravahi mayehe ema Viya. Eta juca ánira tacahehi, vahi vítina vicanaracahini ema maca. Ema ticanaracahi, émaquenehi ema Jesús Nazareno,

¹³ taicha ema Viya* tjaracahi eta tamutuirayare marataha ema Machicha Jesús. Émara ema maca Jesús ema épuruquenehi éti, íjarareruhi mayehe ema aquenuca apavasajuecu Pilato.

¹⁴ Éma, mavarahahineni macaitica ema Jesús, étisera vahi ávarahahini máuchucuhahini ema máuriquenénihí yátupiquenehi santo. Masapihapa eyaseserecachi máuchucuha ema ticapahi.

¹⁵ Tásiha, émapa ímicapacahi ema Ticaitarecavahi. Émasera ema Viya macaechepecachi te máecari. Véchajisihahi víti éma taicha vímahaquenehi eta mápechiravahi títareca.

¹⁶ Puiti, ímararacahi eta manarasirahi ema maca masarini. Eta juca eta tímicaecherachahi eta machavirahi títareca ema Jesús. Taicha émahí ema tjaracavahi eta vítupajijiasiravahi eta vicanarasirahi ema maca achane, táichavenehi eta vícasiñairahi éma.

¹⁷ Tiuri puiti, nuparapenaveana, éti ímicapacahi ema Jesús taicha vahi ímatihini eta émairahi ema Cristo ema vicuchapaquenehi. Énaripa ena tuparairucana eyehe, váhivare náimatihini éma.

¹⁸ Étatera tacaheyarehi eta juca taicha máechajiriruvaichuhi ema Viya nametacativahi ena profetana eta macatajivairayarehi ema Cristo.

¹⁹ Tásiha puiti, éneuchavainapa ecájuhénapa ema Viya, apaesa macaepaha éma tamutu eta epecaturana. Énerichuvare ema Viya técasarechaheyarepa éti.

²⁰ Ene ecahehi etsecava ejacapyare ema Jesucristo te machavapa. Éma, iáquenuyare taicha manerejiruhi ema Viya te tépanavainapa tamutu.

²¹ Ema maca Jesucristo puiti téjacahi te anuma. Jararihiyaresera eta sache eta machavirayare, máetupiricayareva tamutu. Ánaquiaparipa, eta juca mametarapihi ema Viya nayehe ena mayeheana santo profetanaini eta náimitusirayare ena achaneana.

²² Ema émana víyarahaini profeta ema Moisés, mametacahi ena víachucanaveanaini, ani macahehi: “Ema Viya Dios tivanecanuhi nútí numetacaheyare eta máechajiriruva.

* **3:13** Ema Pedro téchajicahi te náechajiriruva ena israelítana, máimijarechirahi ema Viya: “ema nacasiñaquehehi ena víachucanaveanaini ema Abraham, ema Isaac, ema Jacob, énapa ena apamurianaini víachucanaveanaini”.

Títecayare ema apanyare profeta mavaneruyareva ema Viya, tacutiyaare eta mavanesis-ranuhi nûti. Éma, tiúchucayare te namuri ena víamariéqueneana. Tatuparaca nasuapayare tamutu eta mavanairipianayare.

²³ Taicha ema Viya máimicapacayare namutu ena masuápajirírahánayare mayehe ema profeta máiteruyarehi, taicha mamavarahahi nacasiapahini ena machanerana” macahepa ema Moisés.

²⁴ Namutu ena apamuriana profetana, émaripa ema Samuél énapa ena náequenereruana profetana, náechajisihahi eta juca vímahaqueneanahi puiti juca sácheana.

²⁵ Ánaquiaparichaha, te vuíchaha máuchucahini ema víyarahaini Moisés, ema Viya mameta-caipa ema viáchucaini Abraham, ánipa macahe: “Nunerejicayare ema émana piámariéquene tiúchucayare. Éma, tíjaracaya eta táurivaya eta náitaresiraya namutu ena achaneana apánapanenéjiqueneána te juca apaquehe” macahepa ema Viya. Tiápechava mameta-caipa étarichuhi máechajiriruvana mayehe ema machichaini Isaac, énapa ena mámarinaveánaini. Puiti títauchavaripa eta juca máechajiriruvaichuhi ema Viya. Tásiha puiti, éti títiparacahehi ínapucayare ejacapa eta májjararuheya ema Cristo, taicha étirichuhi israelítahehi. Ímatihivare eta apamuriana máechajiriruvana ema Viya, nájucaqueneana ena víyarahaini profetana.

²⁶ Tásiha, eta macaechepusirahi ema Viya ema Machicha Jesús, tivanecahavipa vimetac-ahe éti. Te ecañavapuca eta mayehe, máquijisinaheyare eta evainarajivana. Tíjaraca-henapa eta iúricarevayare –macahepa ema Pedro.

4

Éma Pedro émapa ema Juan námaqueneanahi te namirahu ena tuparairucana

¹ Téchajicanarichaha ema Pedro ema Juan te namirahu ena achaneana, títecapanapa ena tuparairucana, énapa ena tímiturecarahiana ticaijareana saducéoana. Námapahivare ema náquenuruha ena tasuntarurana eta Templo.

² Tisemanapa taicha vahi náuricahini eta nasamairirisirahi ena apinana apóstoleana náimitusirahi ena achaneana. Vahi náuricahini eta nametasirahi eta yátupiquenerahi eta máechepusirahi ema Jesús te máecari, mápechiravahi títareca.

³ Tacahe, nacarátacavacapa, náimisipavacapa te cárcel. Váipasera nacayaseserehinhini, taicha cáperehichícharínehi. Tiámainucavapa te apanapa sache, nacuchucavacaya ticaya-seserehianayarehi.

⁴ Camurianasera ena tisuapanahi táichavenehi eta nasamararasirahi eta náechajiriruvahi ena apóstoleana. Eta natupahi ena téhicanaripa ema Viáquenu Jesucristo cinco mil ena achaneana ajairana. Camurianavare ena esenana énapa ena amaperuana.

⁵⁻⁶ Te apanaqueneapa sache, ema corregidor Caifás ticurujicapa ena apamuriana aguenu-carahana tayehe eta ichapequene cabildo te Jerusalén. Natiaríhivare ena escribá-noana. Mtiaríhivare ema Anás ema pasado corregidorhi, énapa ena machichanaveana: ema ticaijarehivare Juan émapa Alejandro. Natiaríhivare ena apamuriana machichanaveana.

⁷ Tacahe, náemepanapa ema Pedro ema Juan te cárcel. Nacatupiacapa te namirahu, nayaseserecapa. Ánipa naicha:

–Éti, vahi vituparacahehini eta ímitusirahi eta juca. ¿Nájaha tivanecahehi icha eta juca? ¿Nájaha ema tíjaracahehi eta ítupajijiasiravahi? –nacahepa.

⁸ Tacahe, ema Espíritu Santo máimicatacahi ema Pedro eta majicapirahi ena tiyaseserecanahi, ánipa macahe:

–Tátanaveana juéseana, tátanaveana víyacárana te juca viávasa.

⁹ Evaraha echa eta juca táuriqueneana táicharacavahi eta vicanarasirahi ema maca achane macajumaqueneníhi.

¹⁰ Vimetacaheyare puiti. Vivaraha vémechaheyare, eti énapa namutu ena achaneana te juca viávasa Israel. Éma maca achane, ímahaquenehi eta manarasirahi. Vivaraha vímimatichahe eta máitupajijiasirava ema Jesucristo ema Nazareno tacanaracahi eta vipiarasirahi te májare. Éma, émetatáruhi te crusu, ecaparuihi. Émasera ema Viya macaechepucahi te máecari.

¹¹ Éti, épuruihi ema Jesús, ema manerejiruquenehi ema Viya. Puiti, ecutipa ena máitucarahana tépiyarecana peti, te náepurupuca eta tatumequene esuíqui táesuíquirayarehini eta peti.

¹² Macarichu ema Jesucristo eta marataha eta macatiuchirahaviya macuchucuirahavivarehi. Taicha ema Viya manerejiruhichuhi ema Jesús eta macuchucuirahavivare. Nájina

apanaina manerejiruinahi te vimuri viti achaneana eta te juca apaquehe —macahepa ema Pedro.

¹³ Tacahe, ena tuparairucana náraminehi eta náitusirahi téchajicana ema Pedro ema Juan. Náichacapa:

—¡Tájina vahi napicacaracavahini eta viyehe! Ena nani tájina náitucaquenéna eta letra. Máitureanahi. Tájina náimatiyahini eta viyehe escuela. ¿Májaracavacahipuca ema Jesús eta náitupajijiasiravahi te macachanevacaichaha ema? —náichacapa.

¹⁴ Tájina naviyahini nacayema taicha matiarahi ema achane masarini, titupihahi te namirahu. Taicha náimahahi eta yátupirahi eta manarasirahi.

¹⁵ Tacahe, navanecapa eta nacuchusiraya ena apóstoleana eta te náurujsiavahi. Nanasipa ena aquenucana téchajiricavanaripa.

¹⁶ Ánipa nacahe:

—¿Tájaha vícharacavayare nayehe ena nani? Taicha namutu ena achaneana ticavasanahi te juca Jerusalén náechahi eta náichirahi ena nani eta tiáramicare. Tásiha, vahi visuapacaremahi te vépiyaequenehavacapuca.

¹⁷ Váhiserá távaraha vísapa náimiyana náimitureca nayehe ena achaneana. Vípícararecavacaya apaesa vahi nacuimiyana náechajisiha eta máechepusirahipuca ema mácanínávaji Jesús —nacahepa.

¹⁸ Tacahe, nacasiapavarepa ema Pedro ema Juan. Navanecapa éna, ánipa naicha:

—Vahi vivaraha ímiana échajisiha eta juca, váhivare ecuimitureca nayehe ena achaneana eta máechepusirahipuca ema Jesús —náichapa.

¹⁹ Najicapapasera ema Pedro ema Juan, ánipa naicha:

—Esamahavichaha. Ema Viya timetacahavi eta véchajisiháirayare. Étiserá ecatichapa véchajisiha éma. Émaquenehisera tisuapacarepanahi eyehe éti. Epanerecha yátupina.

²⁰ Vítí, vahi vimatinaimahi eta véchajisiháiraya tamutu eta juca vímahaqueneanahi visamaqueneanahivare mayehe ema Jesucristo —nacahepa.

²¹ Tacahe, ena tuparairucana eta nasamirahi eta namasuapirahi, tise-manapa. Tacahe, náipicararecapa. Tájínapasera náicharachahini. Nacaicapa taicha tájina naviuvevahini jácani táimicuñacahini. Taicha namutuhi ena achaneana nacunachahi ema Viya táichavenehi eta náimahaquenehi.

²² Cuarenta añoripa eta mahañora ema maca achane masarini. Tétavícvahi eta tiáramicarevahi eta manarasirahi maicha ema Vi ya.

Ena téhicana ema Jesús tiyaseserecana eta natumesamurevaina

²³ Eta náuchucuiraripa ema Pedro émapa ema Juan, tiyananapa eta te návihahi ena nachamuriana. Nametacapa tamutu eta nacatianasirahi ena tuparairucana.

²⁴ Te náechapa, ena nachamuriana tiyujaracanapa namutu. Ánipa nacahe eta nayujarasirahi:

—Tata Viáquenu, píti pépiyacahi eta anuma, eta apaquehe étapa eta ichapequene une mar. Pétipiricahi tamutu eta juca vímahaqueneanahi puiti.

²⁵ Píti pimetacahi ema víyahaini David pivanarainihi eta májucunachiraya eta te Salmo. Aní tacahehi eta májurehi: “Tatiarhiya eta avasareana, ena achaneana navarahaya nacanara ema Viya. Énaparichu ena nujaneanana, énerichuvare napanerechaya nacanara ema Viya. Máetupicushiana éna.

²⁶ Ena réyeana te juca apaquehe títsecavanayare eta nacanarairayare. Énaripa ena aquenucarahana nacapanererya nacanaraya ema Viya, nacanarayareva ema Cristo manerejiruhi éma” tacahehi eta májurehi ema David.

²⁷ Étaripa te juca víávasa, ticuticacahi eta napanerechirahi ema Herodes Antipas, ema Poncio Pilato, ena apavasanana, énapa ena vijaneanana israelítana, navarairahi nacapaca ema sántoquene pichicha Jesús, ema pinerejiruquenehi.

²⁸ Títachavahi naicha eta juca pipanereruana étairayarehi tacaheyarehi eta péchajiriruvana.

²⁹ Pítiserá, Tata Viáquenu, pímararachavihi puiti eta náichirahavihi viti pivanaranahi. Píjaracahaviserá vitumesamurevaina eta véchajisihairaya eta péchajiriruva.

³⁰ Píjaracahavi eta vítipajijiasiravaina víratahairaina vícanaraca ena nacajumaqueneana, vímeresiraina eta tiáramicareana táichavenehi eta vícasiñairahi ema sántoquenehi pichicha Jesús —nacahepa.

³¹ Te titapiricanapa eta nayujarasirahi, tíjahúchavapa tiyayacare eta apaquehe návihahi éna. Tacahehi eta mávahásiraváchivare namutu ema Espíritu Santo. Váipasare napicacaracavahini eta náechajisirahi eta máechajiriruva ema Viya.

Ticajicacanahi tamutu eta náimahaqueneana

³² Namutu ena nasimutuvaqueneana tisuapajirahianahi, ticuticacahi eta napaneruana eta nacajicacairahi. Namutu nácani téchanahi eta náimahaqueneana nacayehequeneanahi, vahi nayavanihacacahini. Tatupiruvahi te nasamureana eta nacajirahi.

³³ Tacahe, tímivanavanahi ena apóstoleana eta náechajishairahi eta máechepusirahi ema Viáquenu Jesucristo. Tisuapacarepaicha eta náimiturapianahi. Máimicatavacahivare ema Viya eta téhicanapahi ema Jesús. Namutu éna, tipicauchacareanahivare ne achaneana.

³⁴ Nájina émanáinahíni te nataracu máemepaurechavahíni. Taicha ena ticayeheana apaquehe, pétipuca, nájararecapaipa.

³⁵ Tásiha, nájaracavare eta plata ena apóstoleana. Tásiha, ena apóstoleana nájaracavacavare nácani páurepananahi.

³⁶ Matiarihivare ema achane ticajare José. (Éma máuchurehi eta te tíurupuhi te mar ticajare Chipre.) Ema maca José náumurivaichaha ena levítana. Ena apóstoleana nanacapa eta májarehi Bernabé (te véchajiriruva ticajare Ticaurisamurerahi).

³⁷ Ema maca májararecapa eta mapenapahini. Tásiha, májaracapa eta plata ena apóstoleana.

5

Eta mapecturahi ema Ananías ésupa esu mayena Safira

¹ Matiarihivare ema achane ticajarehi Ananías ésupa esu mayena ticajaru Safira. Énerichuvare nájararecapa éna eta nayehe apaquehe napenapahini.

² Ema maca achane macaerajicapa ticutimuriahacaca eta plata tavachahi eta mayehe apaquehe. Esu mayena suéchahi eta mayumurusirahi eta ticutimuriahacaca eta plata.

Tacahe, te títecapapa ema achane nayehe ena apóstoleana, máichapa:

—Nájararecahi eta nuyehe apaquehe. Júcahi tamutu eta plata tavachahi —macahepa.

³ Tásiha, ema Pedro máichapa:

—Píti, Ananías, ¿tájaha tacayema písapavahi ticaetemavi ema Satanás? Pipanerechaipa pivayuaracayare ema Espíritu Santo eta piyumurusirahi ticutimuriahacaca eta tavachahi eta piyehe apaquehe.

⁴ Pímaha, Ananías. Piyeherichuhi eta apaquehe píjarareruhi. Nájina tipamicavinahi eta pinaquisiravaya. Puiti eta juca píjarasiravahi pinaquicava, pépiyahirahipaipa pímiñachahi tamutu eta juca plata tavachahi eta piyehe apaquehe. Pátupiruvapaini eta pivarahaquenehi pinaquica. Émasera ema Viya máimamaracahi eta juca pépiyahiraivahi. Vahi vítinahini pivayuaracahini —máichapa ema Pedro.

⁵ Te masamapa ema Ananías eta juca, tiáquipaicavapa, matupiru tépena. Te nasamairicapa ena achaneana, namuturinehi tipicana ichape.

⁶ Tacahe, nararihi ena natuparaháichuhi técararecana. Navehapa eta máquehe ema Ananías. Náyuruacapa. Námapa te ecari, náecarapanapa.

⁷ Te táequenepa eta mapanaquene hora, títecapapa esu Safira, mayena ema Ananías. Vuíchaha suéchahini eta máicharacavahi ema suima eta máepeniraipahi.

⁸ Tacahe, ema Pedro mayaserecapa, ániapa maicha:

—Pimetacanu. Eta juca plata mámaquenepahi ema pima, ¿étahipuca tamutu eta tavachahi eta eyehe apaquehe? —máichapa ema Pedro.

Tásiha, sujicapapa:

—Eta tavachahi tamutu —suíchapa.

⁹ Tacahe, ema Pedro máichapa:

—¿Tájaha tacayema ecuticacahi eta juca épiahiraivahi evayuarasirahi ema Espíritu Santo? Ávane tichavana ena técarapananahi ema pímaini. Tásiha, puiti pítipavayare tiámavianayare —máichapa.

¹⁰ Tacahe, eta máichirahi ema Pedro, enevanepa tiáquipaicavahi ésu te máivapechacaya ema Pedro. Tépenavarepa. Te tichavanapa ena técarapananahi ema suímaini, náimaharinehi ésu tépenaipavare. Navehavarepa esu, námavarepa náecarapana te machacaya ema suímaini.

¹¹ Te nasamairicapa namutu ena achaneana, ichaperinehi eta napisira ema Viya, navetijipa eta napisirahi ena téhicanahi ema Cristo.

Májaracahi ema Viya ena apóstoleana eta náimeresiraya eta tiáramicareana

¹² Tacahe, ena apóstoleana, ichape eta májarasiravacahi ema Viya eta náimeresirayare eta tiáramicareana te namirahu ena apamuriana achaneana. Ticurujicánahivare tamutu sácheana ena tisuapajirahiana te náurujisirareva te tajuhe eta Templo, te tayehe eta alar máepiyaruhi ema reyni Salomón.

¹³ Namutu ena apamuriana achaneana máehicarahanaríchaha ema Jesucristo, vahi napatsicavahini nacanara taicha namutu napicauchahi.

¹⁴ Camuriana paipasera ena ajairana énapa ena esenana ena téhicanapaipahi ema Jesús.

¹⁵ Camuriana pa ena nacanararuanapáipahi ena apóstoleana. Tacahe, námavacapai ena apamuriana nacajumaqueneana, nanaquicapai pa te calle mayanihayarehi ema Pedro. Eta máetavisirayarehi éma, távichayare eta macuna, tacanaracayarehi eta najumana.

¹⁶ Énerichuvare, títeapanapa te Jerusalén ena achaneana tiásihana te avasareana nachacayarahanahi. Námapahi ena nacajumaqueneana énapa ena návaháruana ena éreanana. Namutu ena nani tinaracanapahi tayehe eta náichavaquenévana.

Naémeratacapa ema Pedro émapa ema Juan

¹⁷ Váipasera máuricahini eta juca ema corregidor, énapa ena machamuriana. (Saducéoa-nahi éna.) Tisemanarinéhi táichavenéhi eta náehisirahi ena camuriqueneana achaneana eta náimiturapihi ena apóstoleana.

¹⁸ Tacahe, nacavanairipipa nacaratatajica ena apóstoleana. Náimisiapapa te cárcel, ticaeratanapa.

¹⁹ Émasera ema Viya majaneacavacahi éna. Te jena yati, mavanecapa ema mayehe ángele. Mavejiapanapa eta cárcel návihahi éna. Mavanecapa náuchuca, ánipa maicha:

²⁰ —Eyana ímerezava te jena Templo. Emetaca ena achaneana eta mavarairahi ema Viya máitsivachaya arairuya eta náitaresirayare ena téhicanaya ema Jesucristo —máichavacapa ema ángele.

²¹ Náuchusihapa ena apóstoleana te cárcel, timapicucuhichaha te tiyananapa tayehe eta te Templo. Tinahacavanavarepa tímiturecana.

Tacahe, te jena yáitarahi ema corregidor mavanecapa ena comisarioana máimichuhapa namutu ena apamuriana tuparairucana énapa ena náiyacarana israelítana. Te tíurujicavanapa namutu, nacavanairipipa náepana ena apóstoleana eta te cárcel.

²² Te títeapanapa te cárcel ena suntaruana, navejiacapa eta tapaja. Nájinari pahisera. Tacahe, tichavanapa nayehe ena náquenuruhana. Nametacapa eta nájinari pahí ena apóstoleana.

²³ Tacahe, náichapa:

—Te vítecapauchapa eta cárcel, vímahapa tanasihi ticaeratahi eta tapaja. Natarihivare ena séntinélana tíjaneacanahi eta tapaja. Tacahe, te vivejiacapa eta tapaja, nájina émanainahini vichimaphini te tajuhe —nacahepa ena vanairucana.

²⁴ Te máechapa ema corregidor, énapa ena machamuriana tuparairucana, émapa ema náquenunuri ena tasuntarurana eta Templo, náramirinehi ichape. Tacahe, náichacacapa:

—¿Tájaha tacayema eta juca? Vaipa vímatiequeneha. ¿Tájahapuca vícharacavaya? —náichacacapa.

²⁵ Téchajiricavanarichaha éna, títecapanecha ema émana achane. Mametacavacapa éna. Ánipa macahe:

—Ena naena ajairana érataruanahi te cárcel, náenahi ánaqui te Templo tímiturecanahi nayehe ena achaneana —máichapa.

²⁶ Tacahe, ema náquenuruha ena suntaruana, émajacaruvapa tiyana. Mámamurihapaipahi ena suntaruana, náepanayarehi ena apóstoleana. Jéhesare, námamurihapa, tájinasera náicharacaphini eta námirapahi taicha napicahi ena apamuriana achaneana natupísicavachini te márijahiana.

²⁷ Te nacaitecapapa, nacatupihapa te namuri ena tuparairucana. Tásiha, ema corregidor ánipa maicha:

²⁸ —Víti vivanechahéhi muraca eta vaipa ecuapechava ecuimitureca eta máechepusirahipuca ema Jesús, tasiha, éti ímiyanavarichucha ímitureca. Namutupa ena achaneana tayehe eta juca víavasa Jerusalén náitucapa eta ímiturapiana éti. Visapihapa evaraha vítiyare táecatitiha eta máepenirahi ema achane Jesús. ¿Tájaha tacayema vahi esuapahavihini? —macahepa.

²⁹ Tacahe, ema Pedro énapa ena apamuriana apóstoleana najicapapa, ánipa naicha:

—Tatúparáca mativayare visuapa ema Viya. Éma tisuapacarepana eyehe éti.

³⁰ Víti, véhicahi ema Viya, émarichuhi nacasiñaquenehi ena viáchucanaveanaini. Émahi ema ticaechepucahi ema Jesús, ema ímicaparuhí eta émetatasirahí te crusu.

³¹ Tásiha puiti, ema Viya máunacahi te anuquehe anuma. Macaejacahi te mavaure tayehe eta trono. Májjaracaripa eta matuparahayarehi Aquenucayarehi Ticaturahiyareva. Taicha mavarahahi ema Viya vimutuyare víti israelítana véneuchavaya mayehe, apaesa éma tiperdonachahaviyare tamutu eta vípeaturana.

³² Viti véchajisihahi eta juca taicha vímahaquenehi eta mápechiravahi títareca. Viti véchajisihahi maicha ema Espíritu Santo májáraruhavíhi ema Viya viyehe viti visuapana éma — náichapa ena apóstoleana.

³³ Te nasamapa eta juca ena aquenucana, tisemanapa. Navarahapa nacapacavacayarehini.

³⁴ Matiaríhíhisera te nataracu ema achane ticajare Gamaliel. Ema tuparairucahi doctrinero fariseo. Ema maca achane ticapicahuhi nayehe namutu ena achaneana. Tacahe, titupihapa te namirahu. Macavanairipípa náuchucachaha ánipina ena apóstoleana.

³⁵ Tacahe, máichavacapa ena machamuriana aquenucarohana:

—Tátanaveana, nujaneanana israelítana. Échapava eta evarahaquenehi íchaya nayehe ena nani achaneana.

³⁶ Échapuca éti cape juca táitaresirahi, téchepucahi ema émana achane ticajare Teudas. Éma macahehi eta máitupajijíásiravahi. Tásiha, camuriana ena achaneana téhicanahi. Cuátrócientoanahi ena ajairana ena machanerana. Tásihasera, nacapacahi ena mánarana. Tásiha, namutu ena téhicanainíhi téjanerepaicanahi. Titavapa tamutu.

³⁷ Tásiha, te táequenevarepa, te jena sache eta nacatupairahi ena achaneana, téchepucavarepa ema apana ema ticajare Judas, ema ticavasa te Galilea. Camurianavare ena téhicanahi. Énerichuhivareséra nacapacahi ena mánarana. Namutuhivare téjanerepaicana ena téhicanainíhi.

³⁸ Tiuri puiti, esamanu eta juca numetaruheya. Ésamiricachucha ena nani achaneana. Vahi ecuimicasiapava nayehe. Taicha eta juca náichaquenehi te nayehechuchapuca éna, títavayarehi.

³⁹ Téheserapuca mayehéhi ema Viya, vahi eratahaimahi ecamitiaca. Échapavachucha. Machu ecuaemuñava ecanara ema Viya —máichavacapa.

⁴⁰ Tacahe, tésamiricavanapa namutu. Náimisiapavarepa ena apóstoleana. Náestacavacapa. Tásiha, navanecavarepa eta vaipa nacuapechava nacuechajisíha eta máechepusirahi ema Jesús. Tásiha, nacaicavacapa.

⁴¹ Tacahe, tíuchucanapa ena apóstoleana te náurujisíavahi ena tuparairucana. Tiúrisamureanapáichucha eta nacaestairahi. Ánipa nacahe:

—Ema Viya máimararacahi eta vicamichirahi tamutu eta náimicatsiriasirahavíhi táichavene eta véhisirahi ema Jesús —nacahepa.

⁴² Váhiquene nacatsimavahini. Tímiturecanáichucha tamutu sácheana, náechajisihahi ema Jesucristo. Tímiturecanahi te Templo étpa te pétiana.

6

Ticaturacasia ena síéteana ajairana

¹ Te jena sácheana, eta nasimutuvaipa ena téhicanahi ema Jesús tisiapanapaipa ticajenurianapaichucha. Natíarihivare ena israelítana, apáechajíríruvanarípa éna. Natíarihíhi ena páurepanana te nataracu énapa ena máimaruana. Ena nani najacapahí eta nayehe ración tamutu sácheana. Étana sache, ena nani apáechajíríruvanarípa vaipa náurisamurehini taicha vaipa nácuticacahini náechajírírahini ena máimaruana. Ánipa nacahe:

—Váipa nácuticacahini eta najacapirahí eta tinicacare ena vijaneananarichuhi máimaruana —nacahepa.

² Tacahe, ena dócequeneana apóstoleana nacurujicapa namutu ena téhicanahi ema Jesús. Tásiha, náichapa:

—Vahí táuricahini víchepaicahini eta vicametarairuira eta máechajíríruva ema Viya. Ticaichepairicahavípa eta víjarasirahí eta tinicacare ena vichamuriana.

³ Tiuri puiti, nuparapenaveana, tacamunu vinacayare síéteanaina ena ajairana te emurí éti, nácani ímatiqueneana tíúriana achane, téchemarahiana náimatíequeneha tamutu, mávaháruanahivare ema Espíritu Santo. Énaina vituparaca naicha eta juca.

⁴ Taicha viti vímíyanavayare víyujaraca vímiturecayare eta máechajíríruva ema Viya — náichapa ena apóstoleana.

⁵ Tacahe, namutu navaraha eta náechajíríruvahi. Tacahe, ticanerejianapa ena ticaturarahanayare. Navehapa ema Esteban, achane tiuri, tisuapajirahiquene mayehéhi ema Viya, mávaháruhivare ema Espíritu Santo. Navehavarepa ema Felipe, ema Prócoro, ema Nicano, ema Timón, ema Parmenas, émapa ema Nicolás*.

* 6:5 Ema maca Nicolás, ticavasainíhi eta te avasare Antioquía eta máuchusinehi. Éma, apavasanihi, máchicahiníhivare eta nayeherépiana ena israelítana. Tásiha puiti, máehicaípa ema Jesucristo.

⁶ Tacahe, náichuhapa te namirahu ena apóstoleana. Tásiha, nanacapa eta navahuana te nachutiana, nayujarauhapa, náijarasihapa eta náematanerepiyarehi.

⁷ Tiuri, eta nasamirahi eta máechajiriruva ema Viya, camurianapaipaicha eta téhicanahi tayehe eta avasare Jerusalén. Tisimutuanavare ena tiyujaracarahiana israelítana nánunacaipa te nasamureana eta náehisiraipa ema Jesucristo.

Eta nacaratasirahi ema Esteban

⁸ Tiuri, ema Viya máimicatacahi ema maca Esteban. Máijaracahivarehi eta ichape eta máichirahi eta tiáramicareana te namirahu ena achaneana.

⁹ Tatiarihivare te Jerusalén eta apana náurujisirareva. Tiúrujicavanahi ena israelítana prisionéroanaini náuchucureanapasera. Éna tiásihanahi te apanana avasareana, te Cirene, te Alejandría, te Cilicia, éta te Asia. Nácapaemajirica ema Esteban te yátupihipuca ema Jesús émaquenehi Cristo. Vahi nasuapahini taicha tétavicavahi eta namasuapajiraivahi.

¹⁰ Ema Espíritu Santo máijaracahi ichape ema Esteban eta máitusiraya téchajica. Eta tacahe, vahi náratahahini nacachuriaca éma. Tisemanapa eta máitahasiravacahi.

¹¹ Tacahe, náimitucapa ena apinana ajairana navachachaqueneanahi eta náepiyequenehairaya ema Esteban. Ánipa naicha eta náimitusirahi:

—Visamahi ema maca macaecaahihi ema víyahaini Moisés, macaechavare ema Viya — náichapa.

¹² Tacahehi, eta nacahepusirahi eta semanere nayehe ena achaneana, énapa ena aquenucarahana, énapa ena escribánoana. Náimiyusemacavacapa. Tásiha, nacaratacapa ema Esteban. Námapa ticayaserehiya te namirahu ena tuparairucana.

¹³ Tásiha, náichuhavare ena apamuriana tépiyaequenehanaya. Ánipa nacahehi eta náepiya-hiraivahi:

—Ema maca achane vahi máituca timatina macaecaahi eta viyehe Santo Templo. Máepuruvare eta viyeherepiana.

¹⁴ Énerichuvare macahehi ema Jesús Nazareno máquipaicareji eta Templo, máitsivachayarehiji eta viyeherepiana máijararuhavihi ema víyahaini Moisés —náichapa ena tépiyahirahianahi.

¹⁵ Tacahe, namutu ena natiarihiqueneanahi náejaruanahi náimaracaripa ema Esteban. Eta mamira macavasirahi ema ángele.

7

Eta maconsejarapi ema Esteban

¹ Tacahe, ama corregidor mayaserecapa ema Esteban, ánipa maicha:

—¿Yátupihí ene picahehi eta juca nametarapianahi ena nani? —máichapa.

² Tacahe, majicapapa ema Esteban, ánipa maicha:

—Tátanaveana, nuparapenaveana. Esamanuchaha. Eta acane, ema Viya tiúcupaicahi másihahi te mávasa anuma. Tímerecavapa mayehe ema viáchucaini Abraham. Ema Abraham, mávihalchaha te tinapaica te apaquehe ticajiare Mesopotamia, ticajiarevare Caldea. Vuíchaha mayanahini macavasahini te Harán.

³ Máechajicahi ema Viya ema Abraham, ánipa maicha: “Pijunijica eta juca piávasa, énapa namutu ena pijaneanana. Piyana eta te apana apaquehe. Núti níjaracaviya eta arairu piávasaya” máichapa ema Viya.

⁴ Tacahe, ema Abraham masuapapa; tiúchucapa eta te tinapaica te Caldea. Tiyana eta te avasare Harán. Te táequenepa eta máepenirahi ema máiyaini, mavanecapa ema Viya ema Abraham máiteca eta te juca apaquehe viávihihi puiti víti. (Te jena áñoana ticajarehi Canaán.)

⁵ Tájinasera máijaracahini mayehenahini apaquehe, ánicuchicháinahipucáini. Mametacahisera eta máijarasirayarehi eta mayeherehi apaquehe. Taicha eta apaquehe máijarayarehi nayehehehi ena machichanavequeneana te maépenapa ema Abraham. Nájinari-chahasera machichanaveanainahini te jena áñoanahi.

⁶ Énerichuvare mametacahi ema Viya, ánipa maicha: “Ena pichichanavequeneanayare ticavasarecanaya nayehe ena apavasajuecuana. Ticatajivanayaresera naicha ena napauranaya. Nacajireyare. Cuatrociento áñooyare eta náichirayare.

⁷ Nútisera, níjaracayare eta náicuñayare ena achaneana te jena avasare nácani ticajireanayare ena pichichanavequeneanayare. Tásiha, te táequenenapa, nucuchucuhavacainapa. Tásiha, títicanainapa ani te juca najirauchihanuyare” máichapa ema Viya.

⁸ Ema Viya mafirmachapa eta matratune eta máitachirayarehi eta juca máechajiriruvahi mayehe ema Abraham. Énerichuvare mavanecapa ema Abraham timarcachavayare, máicutiarayarehi eta macasiñavairahi me Viya. Namarcachayareva namutu

ena machichanaveana ajairana, énapa ena mámariequeneana ajairana. Eta tacahehi, te óchoquenepa sache eta máuchisirahi ena Isaac machicha ena Abraham, mamarcachapa. Énerichuvare, máichahi ena Isaac te macachichapa ena Jacob. Ena Jacob, énerichuhivare máichavacapahi ena dócequeneana machichanaveana, ena víyanaveanaini víti.

⁹ Ena José, nacapinaruhi ena maparapenaveana taicha máemunacapanahi ena naiya. Eta tacahe, nájararecapa ena maparapenaveana nayehe ena apavasanana. Tásiha, éna náquecapa nájararecapa mayehe ena ticavasa te apana avasare Egipto. Émasera ena Viya majaneacahi ena amaperu José.

¹⁰ Macatiuchahivare tayehe eta macatajivairana. Májaracahivare eta máituaqueneayare. Ena rey aquenucahi tayehe eta Egipto máemunacahi ena José. Máimatiacahi eta máitusirahi. Eta tacahe, ena rey macajupahahi eta majaneasirahi tamutu eta máimahaqueneana. Aquenucahi máicha, nayehe namutu ena ticavasa te Egipto.

¹¹ Tásiha, te jena áñoanahi, táitecapachapa eta ecuha te tamutu eta avasareana tayehe eta táunavahi eta Egipto étapa eta Canaán. Tétavicavahi eta nacatajivairahi ena achaneana. Tásiha, ena viáchucanaveanaini, tájina naviyahini eta nanicaquene.

¹² Émasera ena Jacob te masamairiricapa eta tatiarirahi eta tinicacare te Egipto máunaruhi ena rey, máevatacapa ena machichanaveana eta navacharepana eta tinicacare. Te téchuricianavare eta tinicacare, mápechavarepa máevataca ena machichanaveana.

¹³ Te apihequenepa eta nachavirahi, ena José tímimatichavapa nayehe ena maparapenaveana. Tacahe, ena rey mapaenunavapa máimati éna irahi maparapenaveana ena José.

¹⁴ Tacahe, ena José máimichuhapa ena maiya Jacob énapa ena natiarihiqueneanahi te mapena. Setenta y cincoqueneana eta nasimutuva éna.

¹⁵ Tacahehi eta mayanirahi ena Jacob macavasairahi tayehe eta te Egipto. Étapa máepenihahi. Te táequenepa, étarichuvare náepenihahi ena machichanaveanaini viáchucanaveánaini.

¹⁶ Váhisera nacaecarasihini eta náperanaini te Egipto. Nacayecapapa eta nacaecarasirahi eta te ecari te tachachacu eta avasare Siquem te tinapaica eta Canaán. Étarichuhi eta máecari ena Abraham*.

¹⁷ Tiuri, tiánehipa eta máitachirayarehi eta máechajiriruvahi ena Viya matratunehi mayehe ena Abraham, ánaquiaparíchaha eta áñoana eta májarasirayarehi eta apaquehe nayeheyarehi ena machichanavequeneana. Ena nachichanaveana ena viáchucanaveanaini, ánaquiapa náejapasihahi te Egipto.

¹⁸ Tayerevahi eta año, titupihapa ena apana rey te Egipto. Éma arairuhi rey, vaipa macapayacahini máimatihini ena José. Váipavare mávarahahini maecha eta manaquiruanaini máemataneanaini ena José.

¹⁹ Masapihapa macatianacavacahi ena viáchucanaveanaini taicha eta náejapasirahi éna. Macaetemajiricavacapa. Macavanairipapa eta vahi nacueperajica ena amuyana ajairachichana náuchusiravanahi. Najunijica apaesa vahi nacuitareca.

²⁰ Tacahe, te jena sácheanahi, tiúchucapa ena amuya alauchu Moisés. Ena Viya máemunacahi ichape ena maca amuya. Mapana caje eta nacajurusirahi ena ticachichana te napena.

²¹ Te náimahapa téchemarahipaipa ena amuya, vaipa mayumurucarehini. Tacahe, nayumurucapa ena amuya te pacurechicha te curichepiraquiana távihahi te cajacure. Ésusera esu machicha ena rey suíchimavapa, suvehapa. Ésupa ticajuracahi suchichayarehi.

²² Tacahe, ena amaperu Moisés ticaimitucasipa tamutu eta náitupajijiásiravanahi ena ticavasanahi te Egipto. Tacahe, ichape eta máitupajijiásiravahi eta máechajisirapahi étapa ena máematanerepianahi.

²³ Te ticayehepa cuarenta año ena Moisés, mavarahapa tiyana máejirapanavaca ena majaneanana israelítana.

²⁴ Te títicapapa ena Moisés, máimahapa ena émana achane ticavasa te Egipto téhararecahi, máehahi ena majaneana ena Moisés. Tacahe, macatiuchapa ena majaneana. Émapa títisirijiequenehahi. Macapacapa ena ticavasa te Egipto.

* **7:16** Ánaquiaparipa tatiaríhi eta avasareni Siquem, návasa ena mámariequeneana ena achane ticajire Hamor. Te tachacaya eta jena avasareni, tatiaríhihi eta mari enurujuhe. Tacahe, ánaquiaparipa ena Abraham mavacharecapa eta apaquehe táimivehapa eta mari enurujuhe, mavarairahi sucaecarasiyayarehi esu mayena Sara, énapa namutu ena machichanaveana. Émarípa étarichuyareva macaecarasiyahi. Ena machichanaveana ichapemuríhi áñoana eta náechapajirisirahi eta ecari, taicha étarichuyarehi nacaecarasiyayarehi éna, énapa ena apamuriana mámariequeneana ena Abraham.

²⁵ Eta mapanereruhi ema Moisés, mavarahahi nacaicutiarayare ena majaneanana eta mavaneruirahi me Viya eta macuchucuiravacayarehi eta te nacatajivairahi. Váhisera nácaicutiarahini éna.

²⁶ Tacahe, te apanaquenepa sache, ema Moisés máimahapa téhacacanahe ena apinana majaneanana. Mavarahapa macaichepaica. Máichapa: “¿Tájaha tacayema éhacaca éti? Ímaha eparapecahí” máichapa.

²⁷ Tacahe, ema túmepanahi mayehe ema apana, máevatajicapa ema Moisés, máichapa: “¿Tájaha tacayema pímisipava píti eta viyehe? ¿Nájahapuca tivanecavihi juéseviyarehi eta viyehe, viáquenumuriviyarepuca víti?”

²⁸ ¿Pivarahapuca picapacanuyareva núti, tacutiya-repuca eta picapasirahi cape ema egipcio?” máichapa.

²⁹ Te masamapa ema Moisés eta náechirahi ena achaneana émairahi ticapaca, tiyanapa tijunahi eta te apaquehe ticajare Madián. Ánaquipa eta máerajisiavahi máitatijiyavahi. Mavehapa esu mayena, ticaparapepa. Apinana ena machichanaveanahi ajairana suyehe esu mayena.

³⁰ Te cuarenta añoa eta mávhairahi ánaqui, te étana sache, tipairiricahi te mávapahiana apaquehe tachacaya eta cerro ticajare Sinaí, majanearesirahi eta uvesana. Tacahe, tiúcupaicapa ema Viya eta te táviahahi eta chéyaráji yucuquí. Timurujirinehi eta yucuquí maicha ema Viya. Váhisera tájuchahini táitahini eta tapacajiana.

³¹ Eta máimarasirahi eta juca ema Moisés, máramirinehi. Tiyanapa mapauca, máimatiyarehi. Te macachacayapa, masamapa eta mahu ema Viya. Ánipa máichahi:

³² “Núticucha Viya nacasiñaquenehi ena piáchucanaveanaini. Nútrichu macasiñaquenéni ema Abraham, ema Isaac, émapa ema Jacob” máichapa ema Viya. Tacahe, ema Moisés tiyayacareinehi eta mapisirahi. Vaipa mapatsicavahini máimarasachihini.

³³ Tásiha, ema Viya máichavarepa: “Pivejuchupevachava eta péparupeva taicha santo eta juca apaquehe piáviyahí piácatayapairuhi.

³⁴⁻³⁵ Písamanuya puiti, jucarihi numetacaviyare. Núti nímararacahi eta nacatajivairahi ena nuchanerana tiávanahi te Egipto. Nusamahi eta náiyairahi. Nuvaraha nucatiuchavacayare. Eta tacahe, núcupaichahi numetapanaviya. Nuvanecaviyare puítirichu piyana tayehe eta Egipto, picuchucuhavacayarehi” máichapa ema Viya.

Tacahehi eta matuparasirahi ema Moisés mayehe ema Viya, mavaneruhi náquenumuriyarehi ena majaneanana, macuchucuhaya éna eta te nacatajivaiyahi. Étasesa te tínapucainapa vahi náesachahini éma.

³⁶ Tásiha, émarichuhi ema maca Moisés macuchucuhavacapa namutu ena majaneanana tiásihanahi te Egipto. Eta macuchucuiravacahi, máimerecachi eta tiáramicareana te jena avasare Egipto, étapa eta te mar ticajare Títsiama Une, étapa te mávapahiana vámahí. Cuarenta año macahehi ema Moisés eta máichirahi eta juca.

³⁷ Émarichuva ema Moisés ticaechajiriruvahi nayehe ena majaneanana israelítana eta máuchusirayarehi ema profetayare. Máichapa: “Ema Viya Dios tivanecanuhi núti numetacaheyare eta máechajiriruva. Títecayare ema apanayare profeta mavaneruyare ema Viya, tacutiya-re eta mavanesisiranuhi núti. Éma, tiúchucayare te namuri ena viámariequeneanayarehi. Tatuparaca nasuapayare tamutu eta mavanairipianayare” macahehi ema Moisés.

³⁸ Émarichuvare ema Moisés, ema máichuhaquenehi ema ángele tiápanaya eta te jena cerro Sinaí, nacuchapirahi ena achaneana machamuriana te vámahí. Tasiha, máechajicahi ema Viya ema Moisés. Te títapiricapa ema Viya, ema Moisés tiúcupaicapa, mametacavacapa ena achaneana tamutu eta mametacasisanahi me Viya. Énerichuvare ema Moisés májuchapahi te libro eta mavanairipiana ema Viya, tisuapacareanahi viyehe víti israelítana véhicanaya.

³⁹ Eta mávhairahi ema Moisés te cerro, vaipa náimahahini ena viáchucanaveanaini. Tásiha, vaipa návarahahini náehicahini éma. Navarahapa tichavanayarehi te Egipto.

⁴⁰ Tacáhénapa, te náichapa ema Aarón: “Vivarahá pépiyasinahavi eta visiñarajina táinapumirauchahaviya, taicha vaipa vecha tájahapuca máicharacavahi ema Moisés, ema ticuchucuhahavihi tayehe eta viávinénihí te Egipto” náichapa.

⁴¹ Tacahe, náepiyacapa eta nasiñarajiyarehi, amairiha oro, tavasimahi eta torillo. Napiestachayarepa eta náepiyaruhi nasiñaraji. Tacahe, ticaparecanavare eta vaca; nájaracasicahí eta nasiñaraji eta námavahuhí, námicutichaipa ema Viya. Ténicacanapa. Tiúrisamureanapa eta náimairahi táurinavahi eta nasiñaraji náepiyaruhi.

⁴² Émasera ema Viya, eta máimairahi eta juca, vaipa máuricahini. Tásiha, vaipa majaneacavacahini éna. Váhisera máicuñacavanehini. Máisapapa ticasiñarajiana, téneuchavanapa te tamirahu eta nasiñarajiana. Tásiha, tamutupa nacasiñaraji eta jarairiquiana. Taicha ánipa tacahehi eta Sagrada Escritura nájurehi ena profetana. Ánipa maicha ema Viya:

“Émitisicanuhi núti, eti israelítana. Vaipa nútinahini ácasíña eta jena cuarentaquenehi año te mávapahi vámahi.

⁴³ Éta pa ecasíñahi épuyumirauchahi eta esíñarajiana ticaijare Moloc. Énerichuvare ecasíñahi eta jarairiqui ticaijare Renfán. Eta ecaparuhi, vahi nútinahini Íjaraca. Éta pa Íjaracahi eta esíñarajiana. Éti, éperajiricapa eta esíñarajiana te tayeheana trono tapenahuana épiyaruana. Eta tacahe, nucajanerepaicaheya te apachacaya apaquehe ticaijare Babilonia” máichapa ema Viya.

⁴⁴ Te jena mávapahi vámahi ema Moisés mavanecapa ena viáchucanaveanaini náepiyaca eta mapenayarehi máucupaisirareyarehi ema Viya. Mavecunaruhi eta tíaviha te anuma máimechaquenehi ema Viya. Étarichu náunasirare eta ajureca tíama eta mavanairipiana ema Viya.

⁴⁵ Te tépenapa ema Moisés, máevachacapa ema Josué émapa máitsivahi téchapajiricayarehi ena achaneana. Tacahe, tiyananapa mámamurihapa ema Josué. Ena achaneana námaphi éna eta mapena máucupaisirare ema Viya. Nacaijuhepa eta apaquehe natuparahahi. Natarihisera ena achaneana ticavasana tayehe. Váhisera tácajerahichaini eta náitahasiravacahi ena nánaranahi taicha ema Viya máimicacavacahi. Tacahe, tayerevahi eta áñoana ena náeperajicahi eta mapena ema Viya. Te tijurucapa ema rey David, ticatuparahapa, machimapapa eta tatiaririchaha. Émapavavare máechapajirica.

⁴⁶ Taicha ema maca rey David máemunaruhi ema Viya. Tacahe, ema David mavarahapa tépiyarecaya eta mapenaya ema Viya amarihayarepa mari.

⁴⁷ Váhisera táitauchahini eta mapanereruhi ema David, taicha ema Viya vahi máisapahini. Émapa títauchahi ema machicha ticaijare Salomón. Émapa tépiyacahi eta Templo.

⁴⁸ Tiuri puiti, numetacahavare, ema Viya ticavasahi te anuquehequene anuma. Vahi títecaimahi macapena te témplona vépiyaruanasami viti páureanasami achaneana. Taicha ema Viya máichapa eta máechajiriruva:

⁴⁹ “Te anuma táviha eta nuyehe trono néjasihahi. Ánaqui tásiha eta nuvanairipiana tayehe te juca apaquehe. Núti vahi nácamunu eta peti te juca apaquehe. Núti vahi nácamunu eta nunarasirarena.

⁵⁰ ¿Váhipuca échava eta nútirahi népiyaca tamutu eta juca ímahaqueneanahi te juca apaquehe?” macahepa ema Viya eta máechajiriruvahi.

⁵¹ Puitiripa eti esamararacuananahi, ¿tájaha tacayema éhichahi eta namuracasamurevanaini ena iáchucanaveanaini? Váhivare ávarahahini esama puiti eta máechajiriruvahi ema Viya táichavenehi eta evainarajisamurevavacahi étapa eta emasuapirahi ema Espiritu Santo. Éti, eta epanereruana tacuti eta napanereruana ena iáchucanaveanaini eta navainarajivana.

⁵² Éna, námecatajivachahi namutu ena profetanaini. Nacapacavacahi nácani téchajisihanahi eta máitesirayarehi ema Cristo. Tásiha puiti, eta máitesiraipa ani, épururipa éma, masapihapa Íjararecachi ímicapacahi éma taicha tétaicavahi eta máurivahi.

⁵³ Étaripa eta mavanairipiana ema Viya, ángeleana eta tíjarapananahi ema Moisés. Échajicuhai pahinéni éti, esamaripahinéni; váhi queneséra esuapahini —máichapa ema Esteban eta maconsejachiravacahi.

Eta máepenira ema Esteban

⁵⁴ Te nasamapa ema Esteban eta máichirahi, tise manarinehi. Tinicavanarinehi eta nase maneva.

⁵⁵ Émasera ema Esteban vahi mapicaracavacahini éna taicha mávaháruhi ema Espiritu Santo. Máesenica te anuma. Máimaharine eta majaraiva ema Viya, émapa ema Jesús titupihahi te vaure tinapaicahi eta majaraiva ema Viya.

⁵⁶ Tacahe, ema Esteban máichavacapa ena achaneana natiarihiqueneanahi:

—Ésenica te anuquehe. Núti nímahahi eta anuma téjiacahi. Émapa ema Jesucristo, máenahi titupihahi te mavaure ema Maiya —máichavacapa ema Esteban.

⁵⁷ Énase ra eta nase manevahi, tichujiquíñahavanapa. Tijajamurihanapa náetereuchapa namutu.

⁵⁸ Nacaratacapa, námapa te tachachacu eta avasare. Ánaqui eta natupisihayarehi nacapasihayarehi te márijahiana. Ena téhanahi nanaquicapa eta náepacuhána, natuparacapa ema nayehehi comisario ticaijarehi Saulo.

⁵⁹ Tacahe, nanahacaripa natupisicahi ema Esteban. Tiánehiripa nacapaca. Émasera tiyujarauhavaichaha. Ánipa macahehi:

—Tata Náquenu Jesús, pijacapinanu eta náchaneva.

⁶⁰ Eta máquipaisiravahi, tépuyucapa tipiaracapa muraca. Ánipa macahe:

—Tata, piperdonachavaca ena nani eta juca náichiranuhi napecaturahi —macahepa.
Te titapiricapa eta mayujarasirahi, tépenapa.

8

Emá Saulo mapanerecha mapanajiricavaca eta macatichiravacahi ena téhicanahi emá Jesús

(Hch 22.6-16; 26.12-18)

¹⁻² Emá maca Saulo, eta mapanereruhi tacutihi eta napanereruana ena ticapacanaahi emá Esteban. Tiúrisamurepa éma. Natiarihivaresera ena apamuriana ajairana tiúripa-nereruanahi. Navehapa eta máquehe emá Esteban, náecarapanapa. Tíyahanapa ichape eta nacatiequenerahi. Étarichu te jena sache tépanavanapa napanajiricavaca muraca ena téhicanahi emá Jesús tayehe eta avasare Jerusalén. Téjanerecanapa náicha, ena camuri-queneana. Tiyananapa te apana avasareana tinapaica te Judea étapa te Samaria. Énasesa ena apóstoleana nanasirichuhi te Jerusalén.

³ Tacahe, emá Saulo, emá náinapuarauqipahi ena tipanajiricanahi ena téhicanahi emá Jesús. Tisiapanapaipa te napenana. Nacaratacavacapaipa ena nachimapaqueneanapahi ajairana, esenana. Nachururupaicavacapaipa eta námirapahi te cárcel.

Emá Felipe ticametarairu te avasare Samaria

⁴ Te jácani avasareana náitecapihapahi ena najunaqueneanahi, tímiyanavanarichucha ticametarairuana eta máimiturapiana emá Jesucristo.

⁵ Emá maca Felipe majunaquenehivare. Títecapapa eta te avasare ticajare Samaria. Tacahe, ticametarairuapa nayehe ena achaneana eta náehisiraya emá Jesús, émairahi Cristo emá nacuchapaquenehi. Tiúrujicavanapa ena achaneana.

⁶ Namutu nasamararacahi eta macametarairuirahi emá Felipe.

⁷ Taicha náimahapa eta macanarasiravacahi ena nacajunaqueneana camuriqueneana: ena muracaquihana, ena tiyayacareana, énapa ena masariana. Camuriana ena éreanana máimijunaqueneanahi te náquehe ena achaneana návaháruanahi. Tipiáreacanapáipa eta náuchusirapahi.

⁸ Eta tacahe, ichaperinehi eta náurisamurevahi ena achaneana tayehe eta jena avasare.

⁹ Te jena avasare Samaria, matiarihíhi emá émana achane ticajare Simón. Iápemarehi éma. Ánaquiaparipa eta macaetemajirisiravacahi ena achaneana. Títupajijiácavahi tépiyacava éma.

¹⁰ Namutuhi ena nasimutuvaqueneana achaneana énapa ena ticaimahaqueneana nasamararacahi nasuapahi eta macayemaqueneanahi. Nacunacharinehi, ánipa nacahe eta náechajiriruvahi:

—Emá maca achane títupajijiácavahi ichape maicha emá Viya —nacahepa.

¹¹ Ánaquiaparipa eta mavayuarasiravacahi éna, tayehe eta mahiápemarevahi. Eta tacahe, napicauchahi éma.

¹² Téhesera nasamapa emá Felipe, nasuapapa eta nasamirahi eta máechajiriruva emá Viya. Náehicapa eta mametarairuhi mayehe emá Jesús eta émairahi Cristo, emá nacuchapaquenehi. Tacahe, camuriana ena ajairana énapa ena esenana ena ticaicachasianahi taicha eta nasuapirahi emá Jesús.

¹³ Émaripa emá iápemaréni Simón, masuapavare éma. Ticaicachasivarepa. Máehicapa macachanepaipa emá Felipe. Ichape máramipahi eta ichapequeneana tiáramicareana máichaqueneánapahi emá Felipe.

¹⁴ Tiuri, te Jerusalén, nasamairiricapa ena apóstoleana eta náehisiraipahi emá Jesús ena achaneana ticavasanahi te avasare Samaria. Tásiha, ticaevatavaneanapa emá Pedro emá Juan.

¹⁵⁻¹⁶ Tiuri, ena téhicanaripa emá Jesús, vuíchaha máucupauchahini emá Espíritu Santo, mávahácavacahíni éna. Tacarichuichaha eta nacaicachasirahi eta navarairahi náehica emá Viáquenu Jesús. Tásiha, te títecapanapa emá Pedro emá Juan, tiyujaracanapa nayaseacapa emá Viya máijarasiraina emá Espíritu Santo eta mávahásiravacaina ena téhicanaripahi.

¹⁷ Tacahe, emá Pedro émapa emá Juan nanacapa eta navahuana te nápusiana éna. Tacahe, emá Espíritu Santo mávahácavacaripa eta náemamachutichiravacahi éna.

¹⁸ Tacahe, emá Simón eta manecapirahi eta mávahásiravacahi emá Espíritu Santo te náemamachutichiravacahi éna, mavarahapa éma mavachachavaca ena apóstoleana.

¹⁹ Ánipa máichavaca:

—Íjaracanu nútí apana eta nútusiraina eta ítucaquenehi, apaesa te nunaca eta nuvahuana te nápusiana ena nácáni achaneana, máucupaicapaini emá Espíritu Santo, mávahácaini éna —máichavacapa.

²⁰ Tacahe, ema Pedro máichapa:

—Pémitiequenehaya píti étapa eta piplatane. Taicha píti vahi tiuri eta pipanereru. Pímijachahipuca vicavacharapiyare eta máijararuhaviana ema Viya.

²¹ Vahi pítiparacaina píti, taicha eta pipanereruana vahi tátupiruvahini mayehe ema Viya.

²² Pínajica eta pivainarajivana. Piyaseaca ema Viya, tijuricati tiperdonachavi eta tamaurivahi eta pipanereruhi píti.

²³ Taicha nímatiacavihi eta pétáviuchirahi eta picapinaruraivahi. Eta juca picahehi taicha vahi tínajiacavimahi eta pivainarajiva —máichapa ema Pedro.

²⁴ Tacahe, tipicapa ema Simón. Ánipa maicha:

—Ímicatacanu éti, eyuarauchanu me Viya apaesa vahi tacuitauchava eta juca ecayemaqueneanahi —máichapa.

²⁵ Tacahe, ema Pedro ema Juan tinahacavanapa túmiturecana eta máimiturapiana ema Viáquenu Jesucristo. Te tamutupa eta náimituresirahi, tiyananapa tichavanayarepa te Jerusalén. Tétávajicanapa te avasarechichana tayehe eta Samaria. Ticametarairuanapa nayehe ema achaneana.

Ema Felipe máimituca ema achane ticavasa te Etiopía

²⁶ Tiuri, te jena sácheana, tiúcupaicapa ema émana ángele mavaneruhi ema Viya. Máechajicapa ema Felipe. Ánipa maicha:

—Felipe, pétupiricava, piyana te tinapaica te vana. Pivenacuhayare eta achene tiásiha te Jerusalén, tiyana te avasare Gaza. Pétavicayare eta mávaphiana vámahi —máichapa.

²⁷ Tacahe, tétupiricavapa ema Felipe, tiyanapa. Te achene ticainunacacanapa ema achane ticavasa te avasare ticajiare Etiopía. Ema maca achane*, sujupaha esu Candace, reina tayehe eta apaquehe ticajiare Etiopía. Ema maca achane ema tijaneaca eta suímahaqueneana esu reina. Éma, másinehi te Jerusalén, máejirapanahi ema Viya.

²⁸ Ema maca achane machavaquenepaipahi te mávasa. Eta mapaisirahi, téjacapahi te mayehe carro. Téchajicurecapahi eta Sagrada Escritura májure ema profetai Isaiás.

²⁹ Tacahe, ema Espíritu Santo mametacapa ema Felipe, ánipa maicha:

—Pémeñahava te tachacaya eta jena carro —máichapa ema Espíritu Santo.

³⁰ Tacahe, te témeñahavapa ema Felipe, te macachacayapa eta carro, masamapa ema achane téchajicurecapahi. Tásiha, mayaserecapa. Máichapa:

—¿Picaicutiara eta jara péchajicurepahi?

³¹ Ema achane majicapapa:

—Váiparinehi nucaicutiaraimahi taicha nájina nametacanupahini eta tacayemapahi. Te pítucapuca píti pimetacanu, picatajicanu. Yare, piávacuha péjaca te juca nuchacaya —máichapa ema achane.

³² Tiuri, eta máechajicurepahi ema achane, ani tacahehi: “Eta uvesa, te nacarataca nacapacayarepuca, vahi ticatiuchavaimahi. Te nachucamecapuca, váhivare tipiararecaimahi. Ene macahehi ema maca achane, vahi mácapauchavahini, váhivare máechajiuchavahini te námapa tayehe eta nacapasihayarehi.

³³ Tétavicavahi eta nacatsirirairahi éma, tayanapane tájinanéni maviurevainahini. Nájinvare nacatiuchahini. Ena mámariequeneanaini, nájina náechajisihahini éna”.

³⁴ Tacahe, ema maca achane mayaserecapa ema Felipe. Máichapa:

—Picatajicanu pimetacanu. ¿Nájaha ema táechajisihahi eta juca libro májurehi ema profeta? ¿Ema táechajisihahi ema maca profeta, vahi apanapuca? —macahepa.

³⁵ Tacahe, ema Felipe tépanavapa mametaca ema táechajisihaguenehi eta libro. Mametacapa eta émairahi táechajisihahi ema Jesús, ema Cristo ema nacuchapaquenehi.

³⁶ Tacahe, te máechapa ema achane, mapanerequenehinehi eta napaisirapahi. Tacahe, te nacapayacapa eta úneure, macahepa ema achane:

—Te juca jararihi une. Nuvaraha picachasicanu —macahepa.

³⁷ Tacahe, ema Felipe majicapapa:

—Tiuri, te yátupihipuca eta pisuapirahi te pisamure eta picasiñairaya ema Jesús, nícachasicavi —máichapa.

Majicapapa éma:

—Yátupi nusuapa ema Jesucristo eta émairahi machicha ema Viya —macahepa.

³⁸ Tacahe, macavanairipipa nacaicheca eta carro. Tiúcupaicanapa éna, tiyananapa te úneure. Tacahe, ema Felipe máicachasicapa ema achane.

* 8:27 Eunucohi ema maca achane.

³⁹ Te tichavanapa tayehe eta únequire, tǎjahúchavapa témitiaca ema Felipe, taicha ema Espírítu Santo manaracuhapa. Váipa macaecherahihini. Váipavare máimahahini ema achane. Tímiyanavapasera tipaica ema achane. Tiúrisamurepaipahi.

⁴⁰ Eta máucupaisinehi ema Felipe eta te avasare ticajare Azoto. Tacahe, tétavajicapaipa eta te avasareana. Ticametarairupaipahi eta máitecapirapahi eta te apana avasare ticajare Cesarea.

9

*Éma Saulo masuapa eta máichuirahi ema Jesucristo
(Hch 22.6-16; 26.12-18)*

¹ Tímiyanavarichucha ema Saulo eta mapánajirisiravácahi ena téhicanahi ema Jesús, mavarairahi máimicapacavacaya. Tiyanapa tiyasesereca eta órdeno mayehe ema corregidor tayehe eta Jerusalén.

² Máichapa ema Saulo:

—Nuharaha nuyanaya te jena avasare Damasco. Nuvarahavare píjaracanu eta órdeno, eta nuclaratasiravacaina ena téhicanahicacha ema Jesús, namutu nácani nétupiaruanayarapahi ajairana, esenanapuca. Nutanucavacayare te náurujisirarevana ena vijeananana. Présaanayarapahi eta námirayare eta te juca Jerusalén —máichapa.

³ Tacahe, tiyanapa ema Saulo. Eta mapaisirapahi éma te achene, tiánehipa títecapa te avasare Damasco, tiáramicarepa eta majaraiva ema Vija tiásiha te anuma. Tamicauchapa éma.

⁴ Tásiha, tiáquipaicavapa eta mapisirahi. Tásiha, masamapa eta mahu ema Jesús. Máichapa: —Saulo, Saulo, ¿tájaha tacayema picatianacanu pipánajiricanu? —máichapa.

⁵ Majicapapa ema Saulo, mayaserecapa:

—¿Nájahavi piti Tata?

Majicapapa:

—Núti Jesús. Núti picatianaruhi, eta pipanajirisiravaca ena téhicanuanahi. Pésamiricavachucha, taicha pítijivaichucha píchavahi. Vahi piúrimahi te pímiyanava picatianacanu. Péhicanusera píti —máichapa ema Jesús.

⁶ Tacahe, ema Saulo tiyayacarenecha eta mapisirahi eta máechajisirahi ema Jesús. Macahepa:

—¿Tájahapuca eta pivarahaquene nítauchaquenéna piyehe, Tata? —máichapa.

Tacahe, ema Jesús máichapa:

—Pécheputa. Piyana pítecapa te jena avasare. Ánaqui mararihi ema timetacaviyare eta pítauchaqueneyare nuyehé —máichapa ema Jesús.

⁷ Ena apamuriana ajairana macachanequeneanapahi ema Saulo, ichape eta tiáramecana. Taicha nasamahi ema téchajicahi, váhisera náimahahini.

⁸ Tacahe, ema Saulo técheputaca eta te máquipaisinevahi. Vaipa máimairiricahini. Tacahe, nachurucapaipahi eta nacaitecapiraya tayehe eta avasare Damasco.

⁹ Mapana sache eta mapuchuquivahi. Váhivare tinica. Tájinvare máerahini.

¹⁰ Tiuri, eta te jena avasare Damasco, matiarihahi ema apana téhichavare ema Jesús, ema ticajare Ananías. Émarichuvare máechajiruhi ema Viáquenu Jesús. Ánipa tacahe eta máechajisirahi:

—¡Ananías!

Éma majicapapa:

—Nutiarihi, Tata —macahepa.

¹¹ Tacahe, ema Viáquenu Jesús máichapa:

—Piyana pitupiruya te jena calle ticajare Titupina. Te jena mapena ema Judas, picayasesereryare ema achane ticajare Saulo, ema tiásihahi te avasare Tarso. Puiti máenahi tiyujaracahi.

¹² Núti néchajicahi éma. Numetacahi éma eta pítecapiraya mayehe. Nuvanecavi pinacaya eta pivahu te mápusi apaesa tachava eta máimairirisira —máichapa ema Jesús.

¹³ Te masamapa ema Ananías, macahepa:

—Tata, namutu timetacanuana eta máichararacavanahi ema achane eta mavainarajivahi nayehe ena téhicaviana ticavasana te Jerusalén.

¹⁴ Éma, tímitecahi puiti eta ani, mámapahi eta órdeno nájararuhi ena tuparairucana eta te Jerusalén eta máepanirahaviya mapresuchirahaviya vimutu viti véhicavianahi —macahepa ema Ananías.

¹⁵ Émasera ema Jesús máichapa:

—Piyanchucha, taicha ema maca, nunerejiruhichuhi núti. Nuvanarayarehi éma. Nuvanecayare mayana macametarairu eta níjare nayehe ena achaneana te apanana

avasareana étapa eta nayehe ena vijaneanana israelítana. Nuvanecayareva máechajisiha eta nijare nayehe ena ichapequenana aquenucana réyeana.

¹⁶ Núti nímechayare eta macatajivairayare ichape táichavenenahi eta máehisiranuyare — máichapa ema Jesús.

¹⁷ Tacahe, masuapahi ema Ananías. Tiyanapa tayehe eta peti mávihahi ema Saulo. Tichavapa. Máechajicapa. Manacapa eta mavahu te mápusi. Tásiha, máichapa:

—Nuparape Saulo, ema Viáquenu Jesús tímerecavahi eta piyehe te achene te pítecainapa. Éma, tivanecanuhi níteca eta piyehe. Mavarahahi tichavayare eta pímairisira. Mavarahave tiávahácaviya ema Espíritu Santo —máichapa.

¹⁸ Tacahe, enevanepa témitiaca eta tépacuchainihi eta máuquiha, téjamihauguicha. Tichavapa eta máimairirisira. Tásiha, ema Saulo téchepucapa, matupirupa ticaicachasi.

¹⁹ Te tamutupa, tinicapa. Tichavapa eta matumeva. Manasipanapa jena sácheana nayehe ena machamurianaripahi téhicanahi ema Jesús tayehe eta avasare Damasco.

Tépanavapa ticametarairu ema Saulo

²⁰ Tacahe, tépanavapa ticametarairu ema Saulo te náurujisirareva ena israelítana. Máechajisihapa ema Jesús émairahi Machicha ema Viya.

²¹ Namutu ena tisamararacanahi, ichaperinehi nárami. Tásiha, nacahepa:

—¿Tájaha tacayema? Émara ema maca ema tipánajiricavacahi eta téhicanahi ema Jesús, ena ticavasana te Jerusalén. Tímitecahi te juca eta mapresuchirapanavacayarehi ena apamuriana, mámamurihayarehi nayehe ena tuparairucana eta te Jerusalén. ¡Tásiha puiti, émarinechavare ticametarairuhi mayehe ema Jesús! —nacahepa.

²² Émasera ema Saulo tiápajucavapanapa eta máitusira ticametarairu. Máimerecahi eta yátupiquenerahi ema Jesús émairahi ema Cristo, ema nacuchapaquenahi. Te tamutu eta náurujisirarevana ena israelítana eta te Damasco, macapaquechamuripa nácani ticatianacani eta véhiruhi.

Éma Saulo nacaratacayarepaini ena israelítana. Émasera tiyanapa tijuna.

²³ Tayerevahi eta áñoana,* ena israelítana napanerechapa nacapacaya ema Saulo.

²⁴ Émasera masamairiricapa eta náemauchirahi. Tamutu sácheana, yátiana nacunehi eta te acheneana máuchujisihayarehi, taicha ichape eta navarairahi nacapaca éna.

²⁵ Énasera ena machamuriana náitucahi eta nayumurusirahi náiyaracuhapa eta te ichape saye. Náitacapa te tiupi enure. Tacahe, nacajuchuchucapa eta te apachacaya eta yúchama. Tacahehi eta máitujisiravahi tijuna.

Éma Saulo títecaparipa te Jerusalén

²⁶ Te títecapapa ema Saulo te Jerusalén, mavarahapa masiapamuriha ena náinapureanahi téhicanahi ema Jesús. Énasera napicarichucha éma, taicha vuichaha nasuapahini eta máehisiraipa ema Jesús.

²⁷ Matiarihisera ema achane Bernabé. Émapa tiámahi ema Saulo tímimatichahi nayehe ena apóstoleana. Mametamurihapa eta máichararacavahi ema Saulo eta máimairahi ema Viáquenu Jesús eta te achene, étapa eta máechajisirahi, máichuirahivare ema Saulo. Mametacavare eta yátupirahi máituca ticametarairu ema Saulo mayehe ema Jesús eta te avasare Damasco.

²⁸ Tacahe, ema Saulo manasipa te Jerusalén. Masiapamurihapa éna, énapa macachanejiricavacahi. Vahi mapícaracavahini eta macametarairuirahi mayehe ema Viáquenu Jesús.

²⁹ Máechajiricavacapai ena israelítana† te jácani mácapajisihavacapai. Macanaraemachavacahi éna. Vahi náurichahini eta máimiturapianahi. Tisemanapa mayehe. Tásiha, navarahapa nacapacaya éma.

³⁰ Nasamairicapasera ena machamuriana. Tacahe, náevatacapa mayana tayehe eta te mávasa Tarso. Náehicapa ena apamuriana tinapananayarehi tayehe eta avasare Cesarea, étapa nachavinehi. Tiánucuhapa éma, tiyanapa macarichupa.

³¹ Tacahe, tíuricavanapa ena náumurivana ena téhicanahi ema Jesús tiávhana te apanana avasareana tayehe te Judea, te Galilea, étapa te Samaria. Tásiha, tétumechacacani eta náimiyániravaya napicauchiraya ema Viáquenu. Máimicatamurihahivare ema Espíritu Santo. Eta tacahe, camurianapaipavare ena téhicanahi.

Éta manarasirahi ema achane ticajare Eneas

* 9:23 Te pivaraha pecha, pitanuca te libro Gálatas 1.18. † 9:29 Ena nani, yátupiqueneanahi israelitanahi, náuchureanahisera te jácaniana apanana avasareana. Táitusiava, apaechajiririvanaripa eta ticajare griego. Puiti tichavanaripa eta te Jerusalén, návasahi ena ticachichanaini.

³² Tiuri, ema Pedro tiyanapa máejiravacapaipa ena machamuriana eta te avasareana. Títecapapa nayehe ena apamuriana machamuriana ticavasanahi eta te avasare ticajiare Lida.

³³ Matiarahi ema émana achane ticajarehi Eneas. Macajumaquenehi éma. Ocho añoripahi eta macajumairahi. Vaipa táurihini tiyamuriaca, váhivare máechepuchahini te macamane. Tacahe, máitecapauchapa ema Pedro.

³⁴ Máichapa:

—Pésenicanu, Eneas. Ema Viáquenu Jesucristo ticanaracaviya. Puiti tájinapa eta pijumaini. ¡Pécheputa! —máichapa.

Tacahe, ema Eneas enevanepa técheputa. Tájinapa máichiravainahini.

³⁵ Tacahe, náimahapa eta manarasirahi namutu ena ticavasanahi tayehe eta te avasare Lida énapa ena ticavasanahi te tachacaya ticajiare Sarón. Eta náimairahi, náinajicapa eta nayehepianaini. Tásiha, náehicapa ema Viáquenu Jesús.

Eta suápechirava títareca esu Tabita

³⁶ Te jena sácheanahi, sutiarahi esu esena ticajiaru Tabita, eta suátserepihi Dorcas. Ésu, ticavasahi eta te avasare ticajiare Jope. Ésurichuhivare téhichi ema Jesús. Eta suítarésirahi esu suca esena, sucajivaca ena páureana eta suímahaqueneana. Tímicatarahi nayehe nácani ticaijuheanapahi.

³⁷ Te jena sácheanahi, esu Dorcas ticajumapa. Suvayuhapa, tépenapa. Tacahe, navehapa, náicachapa eta suáquehe. Nacasiapapa te tajuhe te anuquehe téqueneha piso.

³⁸ Eta juca avasare Jope tachacayaichuhi eta apana avasare Lida, eta mávihahi ema Pedro. Náecharipahi eta matiarahirahi ema Pedro te Lida. Tacahe, navanecapa ena apinana ajairana, náichuhapanayare éma. Te náitecapauchapa, náichapa:

—Vivaraha víamavi puítirichu ánaqui te Jope. Pímahapanaini esu vémunaruquenehi vichamuri Tabita. Tépenaipahi —náichapa.

³⁹ Tacahe, tiyanapa ema Pedro, máehicavacapa éna. Te títecapanapa, náimisipapa eta te tajuhe suávihahi esu Dorcas. Namutu ena esenana máimaruana, te náimahapa ema Pedro, náurujiacapa. Tíyahanapa, náimechapa ema Pedro eta namuirihana supariruanahi ésu te achanerichaha.

⁴⁰ Tacahe, ema Pedro macavanairipipa náuchuca namutu. Tacahe, tépuyucapa éma, tiyujaracapa. Tacahe, máimarracaripa esu esena suépenaquene. Tásiha, máichapa:

—Tabita, pécheputa.

Tacahe, ésu téjamihauquichapa. Suímahapa ema Pedro. Téjahapaicapa.

⁴¹ Tacahe, macaratacapa eta suvahu, macaechepucapa. Énevanepa máichuhavaca ena máimaruana énapa ena apamuriana machamuriana. Máimechapa eta suchaviraipa títareca.

⁴² Tacahe, náechapa namutu ena ticavasanahi eta te avasare Jope. Camurianarine ena tisupapanahi ema Viáquenu Jesús.

⁴³ Ema Pedro manasipanapa jena sácheana tayehe eta avasare te mapena ema machamurihivare ticajiare Simón, náimijarechavare Suélareru.

10

Ema Viya mavaneca ema Pedro máimitupanayare ema Cornelio

¹ Te jena avasare ticajiare Cesarea matiarahi ema émana achane romano ticajiare Cornelio. Militar ema achane. Eta mávacure ema capitán, comandante te étana compañía tayehe eta batallón ticajiare Italiano.

² Ema maca achane mapicauchahi ema Viya. Tamutuhi sácheana tiyujarauchavahi. Máimitucavachivare namutu ena machichanaveana énapa ena tiávihanahi te mapena. Énerichuvare máimicatavacahini ena israelítana páurequeneana, máijaracahi eta camuri plata.

³ Te jena sache, las trésqunenepa cáperehi, ema Cornelio tiyujaracahi. Tíjahúchavapa máimaha máucupachahi ema émana ángele mavaneruhi ema Viya. Máehajicapa ema ángele, máichapa:

—¿Pícharacava? Cornelio —máichapa.

⁴ Tásiha, ema Cornelio típcarinehi eta máimarrasirahi ema ángele. Majicapapa:

—¿Tájaha pivaraha eta nuyehe, tata?

Tásiha, máichapa ema ángele:

—Tímitecanuhi numetacavi. Eta piyeheana oración piyujarauchiravana étapa eta pímicatasiravacahi ena ticamunuvana páureana, táitecapauchahi tamutu ema Viya.

⁵ Pímvianereca puiti náepana ema achane ticajiare Simón, eta máchucarapihivare Pedro. Ema tiávihahi puítí te jena avasare ticajiare Jope.

6-7 Eta peti máitecapihahi mapena ema apanavare Simón ema náimijarechaqueneva Suélareru. Eta táviha eta peti mapenahi te tachausi eta mar. Ema maca Pedro ema timetacaviyare eta pítauchaqueneánayare —máichapa ema ángele.

Te tamutupa eta máechajisirahi ema ángele, tiyanapa tichava. Tacahe, máichuhapa ema Cornelio ena apinana mamusurana. Máichuhavare ema émana masuntarura. Énerichuvare tipicaurahi mayehe ema Viya, títaurahivare mayehe ema máquenuhi.

⁸Tacahe, mametacavacapa eta mametarapi ema ángele. Tacahe, máevatacapa tayehe eta avasare Jope.

⁹Te apanapa sache, tiánehianapáipa ena vanairucana tayehe eta avasare. Te jena las dócequenepa sache, ema Pedro tiápanapa eta te téqueneha piso. Tiyujaracayarehi.

¹⁰Técuháipaicha éma, taicha tájinarichaha manicachini. Vuíchaha náimaquerecachini eta tinicacare. Tacahe, eta mayujarasirahi máimahapa téjiacahi eta anuma.

¹¹Máimahavare eta tiúcupaicapahi eta te mávihahi éma, tacutiyaaréni eta ichape sávana. Ticaitiapusivacapahi te esquinana.

¹²Camuri eta sárareana, quichareana, cáyureana, támaqueneanapahi eta sávana, tamutu eta apánapanenéjiqueneána sárareana.

¹³Tásiha, masamapa ema téchajicahi te anuquehe. Máichapa:

—Péchepuca, Pedro. Picapaca étanaina sárare. Pinica.

¹⁴Émasera ema Pedro, majicapapa:

—Vahi, Tata. Tituparacahavi vahi vicunicahini vinica viti israelítana eta juca sárareana vicajachaqueneana, vinicachini. Tájina nímatiya nunicahini eta juca —macahepa.

¹⁵Tiápechavavare máechajica ema Viya, máichapa:

—Vahi picuimijarecha ticajachacareana eta níjararuvianahi tinicacareana —máichapa ema Viya.

¹⁶Mapahe eta máechajisirahi ema Viya ema Pedro. Tacahe, tichavapa eta sávana tiápana te anuma.

¹⁷Ema Pedro manasirichaha macájarasamúrehi eta mapanerechirahi tájahapuca tacayemahi eta máimahaquenehi. Títecapananecha te tapaja ena vanairucana mayehe ema Cornelio. Nacayasesererupaipa eta mapena ema Simón Suélareru.

¹⁸Eta náitecapirahi, nacayasesererupa te étahapuca mávihahi ema Simón Pedro.

¹⁹Émasera ema Pedro manasirichaha tipanererecarichaha taicha eta máimahaquenehi. Tásiha, ema Espíritu Santo máichapa:

—Nararihi te juca ena mapanana ajairana titanucavianapahi.

²⁰Piyana pímahavaca éna. Vahi picueñamava eta péhisiravacayare, taicha núti nuvanecavacahi éna —máichapa ema Espíritu Santo.

²¹Tacahe, masuapapa ema Pedro. Tiúchucapa tiyanapa nayehe ena titanucanapahi. Te máitecapauchavacapa, máichapa:

—Nútira etanurepahi éti. ¿Tájaha tímitecahehi?

²²Tásiha, najicapapa éna:

—Tivanecahavihi ema capitán Cornelio. Ema achane tipicaurahi mayehe ema Viya. Títurahivare nayehe ena achaneana. Namutu ena israelítana napicaucha náemunacavare éma. Puíti viti, vítecapauchavípa, taicha cape juca, ema ángele mavaneruhi ema Viya mametapanahi ema Cornelio máimichuhavi píteca te mapena, apaesa masama eta pimetarapianaya —nacahepa éna.

²³Tacahe, ema Pedro macasiapavacapa te tajuhe. Nanasipa jena yati mayehe ema Pedro. Te apanapa sache, tiyananapa. Náehicapa ema Pedro ena apamuriana machamuriana ticavasanahi te Jope.

²⁴Te apanaquenepe sache, napaenumavapa títecapana te avasare Cesarea. Ema Cornelio macuchapaipahi te mapena. Tiúrujicavanaripa ena majaneanana énapa ena máemunacasáreana máichuhaqueneánahi.

²⁵Te títecapapa ema Pedro te mapena ema Cornelio, mácapapa máepuyumirauchapa matsiucayarepa.

²⁶Émasera ema Pedro máichapa:

—Péchepuchacha pitupíha. Vahi táuricahini pitsiucanu, taicha nútirichuhi picutiquenehi achane —máichapa.

²⁷Te tamutupa eta náechajisirahi, tisiapanapa te tajuhe. Máimaharine camurianahi ena náurujiruvanahi.

²⁸Tacahe, ema Pedro máichavacapa:

—Écharichu éti eta viyeherepiana viti israelítana. Vahi tituparacahavi visiapamurihahe eti apavasanana. Émasera ema Viya tivanecanuhi eta vahi nucupica eta nusiapamurihairahyare. Nájinavare nunerejirumahahi nácani ticajachacareana.

²⁹ Eta tacahehi, nítécavanepa. Tájina nácyemahini. Tiuri puiti, nuvaraha néchaya. ¿Tájahapuca eta tímichuhanuhi? —macahepa.

³⁰ Tacahe, ema Cornelio majicapapa:

—Cuátropa sache eta táetavisiravahi eta juca nímahaquenehi. Te jena cáperehi sache hora las tres, núti nunasiqueenehi te juca nupena. Ayunanuhi nuyujarachivare. Tíjuhúchavapa tímrecava ema ángele. Tijanunuca eta mamuiríha.

³¹ Máichanupa: “Cornelio, ema Viya masamáhi eta piyeheana oración piyujarasirana. Táitecapáuchahívare eta pímicatasiravacáhi ena ticamunuvana páureana.

³² Pímivanerecaya puiti náepana ema achane ticaijare Simón, eta máchucarapi naicha Pedro. Ema tiávihahi puiti te jena avasare ticaijare Jope. Eta peti máitecapihahi ema apanavare Simón ema náimijarechaqueneva Suélareru. Eta távihahi eta peti mapenahi te tachusi eta jena mar. Te máitecapapa ema Pedro, éma tímítucaviyare” máichanupa ema ángele.

³³ Tacahe, enevanepa nímichuhavihi. Tájinasera táichiravainahini eta pítesirahi. Tímaracahávihi ema Viya eta juca víúrujisiravahi puiti. Vivaraha visamaviya tamutu eta pímetacativanahi mayehe ema Viya —máichapa ema Cornelio.

Ticametarairupa ema Pedro te mapena ema Cornelio

³⁴ Tacahe, tépanavapa ticametarairu ema Pedro. Ánipa macahe:

—Nucaicutiarapa puiti vahi vácarichu viti israelítana vijacapacare mayehe ema Viya.

³⁵ Namutuchucha majacapavaca nácani típicauchanahi éma, tíchanahívare eta táuriqueneana.

³⁶ Taicha cape juca ema Viya macaitecapahi eta máechajiriruva viyehe viti israelítana. Tivanecahavihi vímetacavacayare eta najacapacarevahi me Viya nácani ticasifivanahi mayehe ema Jesucristo, maperdonachiriripa ema Viya eta napecaturana. Émara Viáquenu vituparaha téchajiricahaviya vimutu víti achaneana: víti israelítana, étipa eti apavasana.

³⁷⁻³⁸ Écharichupuca éti eta táichararacavahi te viávasa Judea cape juca táitaresirahi. Te ticaicachasipa ema Jesús Nazareno mayehe ema Juan, máucupauchapa ema Espíritu Santo máijjararúhi ema Viya. Mávahácapa éma, máijjaracariya eta máitupajijíásiravaya. Tacahe, tépanavapa ticametarairu nayehe ena achaneana ticavasana te Galílea. Te jácani mapaisihapahi, máichapahi eta táuriqueneana. Macanaracavacapahi ena nacatajivaqueneana mávaháruanahi ema Váinaraji. Maratahahi éma máichahi eta juca, taicha ema Viya máimicatapahi.

³⁹ Tiuri, víti véchajisiha eta juca, taicha vímahaquenehi tamutu eta máichaqueneanapahi ema Jesús tayehe eta mapaisineanapahi avasareana te Judea, étapa te Jerusalén. Énasera ena tuparairucana nacatichahi éma; náemetatarecapa te crusu eta náimicapasirahi.

⁴⁰ Émasera ema Viya macaechepucáhi te máecari te mapanaquenepe sache. Tásiha, máimerecavare te vimuri eta machavirahi títareca.

⁴¹ Vaipa námutihini ena achaneana náimahahini. Vítinecha vímahaparacáhi viti manerejruanahi ema Viya. Vinecapaequenehahi tamutu eta vicachanerahí ema Jesús te vinisirana. Tásiha puiti, vímetacahiva ena achaneana eta vímahaqueneanahi.

⁴² Taicha tivanecahavipa vicametarairuya. Vímetacayare eta émairahi ema Jesús viyeheyarehi Juez viti achaneana énapa ena náepenaqueneana. Taicha ema Viya ema tituparacáhi eta mávacureyare juésyarehi.

⁴³ Étaripa eta acane namutu ena profetanaini náechajisihahi ema Cristo. Ánipa nacahehi: “Namutu ena tisuapanaya ticasifianaya ema Cristo, maperdonachavacayare ema Viya tamutu eta napecaturana táichavene eta nacasifairaya ema Cristo”.

Eta mávahásiravacáhi ema Espíritu Santo ena apavasanana

⁴⁴ Tímiyanavarichaha eta máechajisirahi ema Pedro, tíucupaicapa ema Espíritu Santo. Mávahácapa namutu ena tisamararacanáhi eta mametarairúhi ema Pedro.

⁴⁵⁻⁴⁶ Tíjuhúchavapa ena mávaháruanahi apáechajiríruvanapa. Nacunacharipa ema Viya. Nasamapa ena machamurianapahi ema Pedro tíásihanahi te Jope. Náraminehi éna eta mávahásiravacáhi ema Espíritu Santo ena apavasananahi, taicha ena israelítana náimijachahi nacarichu ena mávaháruanahi ema Espíritu Santo.

⁴⁷ Tacahe, ema Pedro máichavacapa:

—Tájina náechajisiacarevaimahi eta nacaicachasiraya ena nani, cápachi mávahácaripa ema Espíritu Santo vicutiripa víti eta mávahásirahavihi —máichapa.

⁴⁸ Tacahe, macavanairipapa nacaicachasi namutu te máijare ema Viáquenu Jesucristo. Te tamutupa, nayasecapa ema Pedro vahi macuyanavanehini. Tacahe, manasipanapa te jena sácheana eta nayehe.

11

Eta mametarapiana ema Pedro nayehe ena machamuriana te Jerusalén

¹ Tacahe, téchacarevanepa te Jerusalén eta nasuapirahi ena apavasanana eta máechajiruruva ema Viya. Tásiha, napanerequenehapa ena apamuriana apóstoleana énapa ena náumurivana.

² Tásiha, te títecapapa ema Pedro te Jerusalén, nacajachapa ena apamuriana máinajicarahanaichaha eta nayeherepiana ena israelítana.

³ Ánipa naicha:

—¿Tájaha tacayema péjirapanavacahi ena apavasanana? ¡Písapavavare pinica te namesara! —náichapa.

⁴ Tacahe, ema Pedro majicapapa mametacapa eta máicharacavahi eta mapaisirahi. Ánipa maicha:

⁵ —Esamanuchaha. Te návihaipa te avasare Jope, nuyujaracaipahi. Nímahapa téjicahi eta anuma. Nímahavare eta tiúcupaicapahi tásiha te anuma tacutiyaeni eta ichape sávana. Ticaitiapusivacapahi te esquinana. Títecapapa te návihahi núti.

⁶ Nímahapa eta apánapanenéjiqueneána sárareana támaqueneanapahi eta sávana. Tátiarihi eta táíñehiqueneana sárareana, quichareana, cáyureana.

⁷ Tacahe, nusamapa eta mahu ema Viya, máichanupa: “Pécheputa, Pedro. Picapaca étanaina sárare. Pinica”.

⁸ Nútisera nujicapapa: “Vahi, Tata. Tituparacahavi viti israelítana vahi vicunicahini eta juca sárareana vicajachaqueneana. Tájina nímatiya nunicahini eta juca”.

⁹ Tacahe, tiápechanuvare téchajicanu ema Viya, máichanupa: “Vahi picuimijarecha ticajachareana eta níjararuvianahi tinicacareana” máichanupa.

¹⁰ Mapahe eta juca máechajisiranuhi ema Viya. Te tamutupa, tichavapa tiyapa te anuma tamutu.

¹¹ Étarichu jena hora, títecapanapa ena mapanana ajairana titanucanuanapahi eta te peti nítecapihahi núti. Mavaneruanahi ema émana achane ticavasahi te Cesarea.

¹² Tacahe, ema Espiritu Santo tivanecanupa néhicavaca éna, taicha tájina táéñamavacarehini. Énerichuvare téhicanuanapa ena nani sáisiqueneana vichamuriana. Vimutuhi visiapa eta mapena ema achane.

¹³ Timetacahavipa éma eta máimairahi ema ángele tiúcupauchahi eta te mapena. Titupihahi te mamirahu. Tacahe máichapa: “Pímivanereca puiti náepana ema achane ticajjare Simón, eta máchucarapi naicha Pedro.

¹⁴ Ema maca Pedro, ema timetacaviyare eta piúchucuiraya, píti, esu piyena, énapa ena pichichanaveanahi” máichapa ema ángele.

¹⁵ Tacahe, népanavapa nímitucavaca ena náurujiruvanahi. Te néchajicaipa, tíjahúchavapa tiúcupaica ema Espiritu Santo nayehe éna. Mávahácavacapa tacutihi eta mávahásirahavihi viti te tépanavainapa.

¹⁶ Tacahe, enevanepa néchavahi eta mametaruhavihi ema Viáquenu Jesús. Áni macahehi: “Échavarichu ema Juan máicachasicahi te une ena achaneana. Étisera tiúcupauchaheyare ema Espiritu Santo. Éma, ticachasicaheyare tiávahácáhéna” tacahehi eta máechajiruvahi.

¹⁷ Tiuri, ema Viya májaracavacahi ena apavasanana ema Espiritu Santo táichavenehi eta náehisirahi ema Viáquenu Jesucristo, tacutihi eta májjarasirahavihi viti. Tásiha, váiparinehi nácapaemachaimahi núti eta mavarahaquenehi ema Viya —máichavacapa ema Pedro.

¹⁸ Tacahe, ena ticajachanahi ema Pedro, te náechapa, timatinanapa. Nacunachainehi ema Viya, nacahepa:

—Yátupirichuhi eta majacampiravaca ema Viya ena apavasanana eta náeneuchiravaina. Nácutihavihini viti eta visiapirayare te anuma, máichecuaraqúirénapa eta vítaresiraya maicha ema Viya —nacahepa.

Náhicavare ema Jesús ena achaneana ticavasana te avasare Antioquía

¹⁹ Te jena sácheana, te nacapacapa ema Esteban, napanajicavare ena apamuriana téhicanahi ema Jesús. Eta tacahe, tijunanapa. Téjanerepáicanapa tiyananapa te Siria, ena apamuriana tiyananapa te tiúrupuhi te mar ticajjare Chipre, ena apamuriana te avasare Antioquía. Te jácni náitecapihapahi, ticametarairuanapahi mayehe ema Jesucristo nayehe ena najaneanana israelítana. Vuíchaha nametacahini ena apavasanana.

²⁰ Tásiha, títecapanapa ena apamuriana* eta te avasare Antioquía. Énasera ticametarairuanapa nayehe ena apavasanana. Nametacavacapa, ánipa naicha:

* 11:20 Ena nani téhicanahi ema Jesús, yátupihini israelítanahi éna. Náuchusinehisera éna te apanana avasareana: te jena avasare Cirene, étapa eta avasareana táunavanahi eta tiúrupuhi ticajjare Chipre.

—Te esuapa éhica ema Viáquenu Jesucristo, éma ticuchucuhaheyare eta ícuñayaréni taicha eta epecaturana —náichapa.

²¹ Ichape eta tasuapacarevahi eta nametarairuana taicha ema Viya máimicacavacahi. Eta tacahehi, nasuapahi ena camuriqueneana achaneana. Náinajicapaipa eta nayeherepinihi tauriqueneana, náehicapa ema Jesús.

²² Te nasamairiricapa ena nachamuriana ticavasananahi te Jerusalén eta juca téchacareanahi te avasare Antioquía, ticaevatapa ema Bernabé, mayana macacutiarapana te yátupihipuca.

²³ Tacahe, te titecapapa éma te Antioquía, máimahapa eta máimicatasiravacahi ema Viya. Tiúrisamureinehi. Maconsejachavacapa namutu éna eta náetumechiracacaina eta náehisirahi ema Viáquenu. Vahi nacucainajiruva te tatiarihnapuca jácani náichavaquenevaya.

²⁴ Taicha ema Bernabé, tétávicavahi eta máuriva. Mávaháruhivare ema Espíritu Santo. Tisuapajirahi éma. Tacahe, camurianahi ena tisuapanahi téhicanahi ema Viáquenu maicha ema Bernabé.

²⁵ Te táequenepa eta juca, ema Bernabé tiyanapa te avasare Tarso. Matanupanapa ema Saulo.

²⁶ Te máetupiacapa, mámapa te avasare Antioquía. Tacahe, nanasipa ánaqui. Étana año nacahe eta nacachaneravacahi ena nachamurianahi. Camuriana ena náimitureanahi. Te jena avasare Antioquía, táepaninevahi eta nacaijarerahi cristianoana namutu ena téhicanahi ema Jesús.

²⁷ Te jena sácheana, natiarihahi te Jerusalén ena profetana máijararuanahi ema Viya eta máechajiriruvana. Tacahe, tiyananapa nacaijuhe te Antioquía.

²⁸ Te titecapanapa, ema émana ticaijare Agabo titupihapa te namuri ena machamuriana. Macaimitucasiquenehi éma mayehe ema Espíritu Santo. Mametacavacapa eta tatiarihivare eta ecuha te tamutu avasareana. (Eta juca táichavaquenevahi eta ecuha te avasareana te jena áñoanahi matupihairahi ema aguenucaini Emperador Claudio.)

²⁹ Tacahe, ena téhicanahi ema Jesús ticavasana te Antioquía napanerechainapa náimiamarecaya eta nanaquiruana, náimicatasiraya ena nachamuriana ticamunuvanahi, énaripa ena ticavasananahi te Judea.

³⁰ Tacahe, tinaquiucavanapaipa eta naratahaqueneya nanaquica. Tacahe, náimiamarecapa mayehe ema Bernabé émapa ema Saulo. Náijaracayarehi ena náiyarahana pastoreana. Énapa tíjaracanayarehi ena ticamunuvanahi.

12

Nacapacapa ema Jacobo. Náeratacapa ema Pedro.

¹ Te jena sácheana, matiarahi ema rey ticaijare Herodes Agripa. Ema macavanairipipa nacaratacavaca ena tachutirihanapahi ena téhicanapahi ema Jesús, náemecharecavacapa.

² Énerichuvare, máimicapacavare ema apóstole Jacobo maparapeni ema Juan. Nayuchatipiquenuhapa eta nacapasirahi.

³ Tacahe, ema rey, eta máimairahi náurisirahi ena ticatianacanahi ema Jesús, máimicaeratacavare ema Pedro. Te jena semanahi, napiestarahi ena israelítana eta nanisiraya eta pan mayehere levadura.

⁴ Eta nacaeratasirahi ema Pedro, náimisiapapa te cárcel. Navanecapa ena dies y seis suntaruana tijaneacanaya te machacaya. Cuátromurianahi ena patrullanahi. Ema Herodes Agripa, mapanerechahi macapacayareva ema Pedro te namirahu ena achaneana te táequeneraya eta napiestara.

⁵ Tacahe, ema Pedro, muracahi eta najaneasirahi te cárcel. Énaserá ena machamuriana tiyujaracanahi me Viya. Nayaseacahi ichape eta nasamacarevaina máuchucuiraina ema Pedro.

Ema Viya macuchucuha ema Pedro tayehe eta cárcel

⁶ Tacahe, ema Herodes Agripa máijarechapa eta sache eta máemepaniraya te cárcel ema Pedro eta nacapasiraya te namirahu ena achaneana. Te jena yati tamirahupa jena sache, ema Pedro tímacahi te nachacaya ena apinana suntaruana. Tícaitiahi te apipi cadenana. Ena apinanavare suntaruana najaneacahivare eta tapaja.

⁷ Tíjahúchavapa tímerecava ema ángele mavaneruhi ema Viya. Tijarahijuheinehi eta cárcel. Tacahe, ema ángele macayamuricapa ema Pedro. Macajamicapa. Ánipa maicha:

—Pedro, péjamicá. Péchepuca —máichapa ema ángele.

Tíjahúchavapa téjapumuriha eta cadenana máitihanahi te mavahu ema Pedro.

⁸ Máichavare ema ángele:

—Picapitijuechava eta pítijuhe. Pinaca eta péparupevana.

Tacahe, ema Pedro masuapahi. Tacahe, ema ángele máichavarepa:

—Pinaca eta pépacuhasa. Yare, péhicanu —máichapa.

⁹ Tacahe, ema Pedro máehicavanepa ema ángele. Ema Pedro váhi máimatihini eta máicharacavapahi, máimijacharichucha mavapure.

¹⁰ Tacahe, náetavicapa ena tünapucana sentinélna, náetavicavare ena apamuriana. Títecapanapa eta te tapajacura eta cárcel. Eta tapajacura amairihahi fierro tijitacarehi. Témunahiricavapa téjiaca. Tiúchucanapa te aneca te calle. Te tiyerehianapa eta napaisirahi, majunijicapa ema ángele.

¹¹ Tacahe, ema Pedro mapaenumavapa macacutiara. Macahepa:

—Nímahapa puiti eta yátupirahi tijaneacanuhi ema Viya. Mavanecahi ema ángele ticuchucuhapananuhi eta macapasiranuyarehini ema Herodes énapa ena nujaneanana —macahepa.

¹² Tipanererecapaipa eta mapaisirapahi. Matupirupa te supena esu María, maena ema Juan ticajarehi puiti Marcos. Éta, náurujisihavahi nayujarasihahi ena camuriqueneana machamurianahi.

¹³ Títecapapa ema Pedro te tapajacura eta nayehe canchón. Máehahamecapa eta tapaja. Tacahe, esu esena amaperu ticajaru Rode, tiyanapa suímahapana nájahapuca ema téhahamecahi eta tapaja.

¹⁴ Suímatahuchavanepa ema Pedro, váhisera suvéjiáequenehahini eta súrisamurevahi. Tiyanapa tijunapa te tajuhe, sumetapanavacapa eta matiarahirahi ema Pedro te aneca te tapaja.

¹⁵ Énasera vahi nasuapahini. Tacahe, náichapa:

—Máurishivipapuca píti.

Ésusera sumetacarichucha eta yátupirahi. Énasera náichavarepa:

—¡Váhipuca émaina! Émapuca ema mayehe ángele ema tijaneacahi —nacahepa.

¹⁶ Émasera ema Pedro tímiyanavarichucha máehahamecahi eta tapaja. Tacahe, tiyananapa navéjiáequeneha. Náimaharine émasarehi. Tiáramecanarinehi éna.

¹⁷ Émasera máimicutiarachapa te mavahuana eta namatina. Tacahe, mametacavacapa eta macuchucuirahi ema Viáquenu tayehe eta cárcel. Te tamutupa eta mametasiravacahi, máichapa:

—Emetapana ema Santiago* énapa ena apamuriana vichamuriana —máichapa.

Tacahe, tiúchucapa tiyanapa te apana avasare.

¹⁸ Te tijarahipa, ena suntaruana tinanesicarajianaipa taicha vahi náechahini tájahapuca eta máicharacavahi ema Pedro.

¹⁹ Tacahe, ema Herodes Agripa máimivanerecapa natanuca ema Pedro. Májinasera náetupiacahini. Eta namaetupiasirahi, ticayaserehianapa ena suntaruana tijaneacanihi. Nájinasera émanainahini nanecapahini eta máuchusirahi ema Pedro. Tacahe, macavanairipipa ema Herodes nacapacavaca ena suntaruana. Te tamutupa eta juca, tiyanapa ema Herodes te apana avasare Cesarea; étapa mávihahi.

Eta máepenirahi ema Herodes Agripa

²⁰ Te táequenepa, ema Herodes Agripa tise mapa nayehe ena achaneana ticavasana te Tiro étapa te Sidón. Énasera náimivanerecapa mayehe ema Herodes. Tiyaseserecanapa eta náurivaina mayehe éma. Taicha eta návasanahi táitecapauchahi eta tinicacare tiásihahi eta te mávasa ema rey. Tacahe, nacasiñapa ema Blasto, ema majupaha ema rey, máechajiuachavacaya eta náurivaina.

²¹ Tacahe, ema Herodes májirechapa eta sache, máimichuhairaya ena achaneana eta jena sáchequenehi. Ticamuirihapa ema rey eta mamuiriha tiúrina. Téjacapa ema Herodes te máejasirare. Téchajicapa.

²² Tacahe, ena achaneana eta nasamirahi éma, tipiaracanapa. Nacahepa:

—¡Ema maca téchajicahi váhiya achanena! ¡Viya ema maca! —nacahepa eta nacunachirahi éma.

²³ Tacahe, tñahúchavapa ema émana ángele mavaneruhi ema Viya májjaracapa eta majumahi ema Herodes Agripa. Taicha ema Herodes tímijachavahi Viya, máuricaipahi eta náejirairahi natsiusirahi ena achaneana. Eta tacahe, tanicapa eta vusanuana te majuhe. Tacapacapa.

* **12:17** Ema maca achane, maparapehi ema Jesucristo. Te náechajiriruva ena israelítana, ticajare Jacobo. Te véchajiriruva ticajarehi Santiago. Émarichuhi ema tiájucharahi eta carta ticajarehi Santiago.

²⁴ Tacahe, tavetijipaipaicha camurianapaicha ena achaneana tisuapana eta máechajiriruvana ema Viya.

²⁵ Te títavanapa eta natuparahahi ema Bernabé ema Saulo, tichavanavarepa te avasare Antioquía. Námapa ema Marcos.

13

Ema Bernabé émapa ema Saulo tépanavanapa tipaicana ticametarairuanayare

¹ Ena téhicana ema Jesús ticavasanihi te avasare Antioquía, natiarihi te namuri ena ticametarairuahiana eta máechajiriruva ema Viya. Tímiruhianahi éna. Natiarihichaha ema Bernabé émapa ema Saulo. Natiarihivare ema Simón (ema náimijarechavare Negro), émapa ema Lucio (eta máuchusinehi te avasare Cirene), émapa ema Manaén (ema machajuruhi ema Herodes Antipas, machicha ema Aluresini).

² Étana sache, ticurujicanapa eta nayujarasirahi me Viáquenu. Náichahivare eta ayuna. Tacahe, máechajicavacapa ema Espíritu Santo. Máichapa:

—Ema maca Bernabé émapa ema Saulo, natuparahaichuhi ticametarairuanaya taicha nunerejiruanahi éna. Évatasinanuya puiti ena nani apinana —máichapa.

³ Tacahe, titsecavanapa ena apinana eta napaisiraya. Te tamutupa, tiápechavanapa nahayunacha namutu. Eta nayujarauchirahi, nanacapa eta navahuana te nápusiana ena tipaicanyare. Nayaseacapa ema Viya eta táurivainapahi eta napaisiraya. Tacahe, ticametavanapa. Tiyananapa.

Ema Bernabé émapa ema Saulo tépanavanapa ticametarairuana te tiúrupuhi Chipre

⁴⁻⁵ Tacahe, ena nani ema Bernabé ema Saulo, mavaneruanahi ema Espíritu Santo, tiyananapa te puerto ticaijare Seleucia. Máehicapahivare ema Juan Marcos. Tímicatarecapahi nayehe. Tacahe, tiánuecainanapa nacaijuheya eta tiúrupuhi ticaijare Chipre. Te títécapanapa te puerto ticaijare Salamina, tiyananapa eta te nárujisirárevana ena israelítana (taicha tamutu avasareana tatiarihípaahi eta nayehe sinagoga). Ticametarairuanapa eta máechajiriruva ema Viya.

⁶ Tamutu napaica eta táichapevahi eta tiúrupuhi. Títécapanapa te avasare ticaijare Pafos. Ánaqui matarihíhi ema émana israelita ticaijare Elimas Barjesús. Iápemare ema maca. Tépiyahirahivare tímijachavahi máimati ema Viya.

⁷ Ema maca iápemare macachanejiricahi ema Prefecto Sergio Paulo. Ema maca Prefecto, téchemarahi. Tásiha, máimivanerecapa náichuhapana ema Bernabé émapa ema Saulo, taicha mavarahahi masamaya eta máechajiriruva ema Viya.

⁸ Émasera ema maca iápemare macatianacavacapa éna. Mayurucapa ema Prefecto eta vahi macusuapa eta máechajiriruva ema Viya.

⁹ Tacahe, ema Saulo (éna ticaijarehi puiti Pablo), mávaháruquenehi ema Espíritu Santo, mámararacapa ema iápemare.

¹⁰ Tacahe, máichapa:

—¡Tivayuarahitataji matsiriarairaha! ¡Piti machicha ema Váinaraji! ¡Piti picatianaca tamutu eta táuriqueneana! Piti píchejimiráuchavacahi ena tivarahana téhicana ema Viáquenu. ¡Píñajica eta juca pivainarajivahi!

¹¹ Puiti ema Viya tícuñacaviyare. Púchuquiyare máicha. Tiyereyare eta vahi pímahimahi eta tajaraiwa eta sache —máichapa ema Pablo.

Jéhesaréinehi, tjáhúchavapa témaha eta máimairirisira, púchuquipa ema iápemare. Tacahe, matanucapa ena tichurucanaya te mavahu.

¹² Te máimahapa ema Prefecto eta juca, tipicarinehi. Tásiha, masuapapa eta masamirahi eta náimiturapiana ena apóstoleana mayehe ema Viáquenu Jesús.

Ema Pablo émapa ema Bernabé tiyananapa tayehe eta avasare ticaijarevare Antioquía Ichipichu

¹³ Tacahe, ema Pablo énapa ena macompañeroana tiávacuhanapa. Najunijicapa eta Pafos. Tiyananapa tayehe eta avasare Perge táunavahi eta provincia Panflia. Te títécapanapa te Perge, eta jena sácheanahi, ema Juan Marcos majunijicavacapa éna. Tichavapa te Jerusalén.

¹⁴ Éna, tiánucuhanapa nacaijuhepa eta avasare Antioquía Ichipichu te tinapaica eta Pisidia. Te títécapanapa, te apanapa sache sávaru, tisiapanapa eta te nárujisirareva ena israelítana eta nayujarauchirahi. Téjacanapa.

¹⁵ Tacahe, tisiapanavarepa ena tuparairucana tayehe eta nárujisirareva. Náechajicuhapa ánipi eta Sagrada Escritura májurehi ema Moisés étapa eta nájurehi ena profetana. Te tamutupa eta náechajicuirahi, nayaseracapa ena araitecapianahi. Náichapa:

—Viparapenevane, te tatiarihípuca eta échajisihayare consejo viyehe víti, táuricapa econsejachahavipa —náichapa.

¹⁶ Tacahe, ema Pablo titupihapa. Macanuquechapa eta mavahuana eta máechajisirayarehi, mavarahahi tauri eta nasamiraina (taicha tacahehi eta nayeherapi). Ánipa macahe:

—Esamanuchaha, nuparapenaveana israelítana. Étipa eti epicaurahianahi mayehe ema Viya.

¹⁷ Ema Viya vicasiñaquenehi viti israelítana manerejicavacahi ena viáchucanaveánaini. Te návihaichaha te apanaquene avasare ticaijare Egipto, macaejapacavacahi ena nachichanaveana. Énerichuvare, te máiputsicavacapa te jena avasare návinénihí, máimerecapahi eta máitupajijiasiravahi máimicatasiravacapahi éna.

¹⁸ Tásihasea, cuarenta año eta macamichirahi ema Viya eta náejecapirávana tayehe eta návihairahi te mávapahi vámahí.

¹⁹ Te táequenepa, macamítiequenehavare eta siétequene avasareana ena apánapanéjiqueneána ticavasanainihí te Canaán. Tásiha, máijaracapa ena viáchucanaveanaini eta jena apaquehe natuparahaquenehi maicha ema Viya.

²⁰ Tacahe, 450 año eta majaneasiravacahi, mavanecapa ena juéseanaya téchapajirícana-yarehi. Tacahe, tiámainucavapa te tijurucapa ema profeta ticaijare Samuel, máequeneréruhi nayehehi juez.

²¹ Tacahe, éna nayaseacapa ema Viya ema nayeheyarehi rey. Tásiha, máijarasihapa ema Viya ema nayeheyarehi rey ticaijare Saúl, machicha ema Cis, mámaríequenéni ema viáchucacaequenéni Benjamín. Cuarenta año eta macatuparahairahi.

²² Te táequenepa, ema Viya máitsivachapa ema Saúl. Ticaijarapa ema David, émapavapa reyhi. Taicha macahepa ema Viya: “Nímararacahi ema David, machicha ema Isaí, núrica eta máurivahi. Taicha máítauchayare tamutu eta nuvanairipianaya” macahepa ema Viya.

²³ Tiuri, eta máechajiriruvahi ema Viya, matiarihiyare ema émana mámariequeneayare ema maca David tíuchucayarehi ema Ticatiurahiyare viyehe viti israelítana. Puiti vimetacaehe eta máimeresiravaipa ema Jesús ema Ticatiurahiquene viyehe.

²⁴ Te tamirahupaichaha eta máimeresiravayarehi ema Jesús, ticametarairuripa ema Juan nayehe ena achaneana vijaneanana israelítana. Mavanecapahi eta náeneuchiravaina náinajisiraina eta napecaturana, étapa eta nacaicachasiraina. Títecapapa eta sache máítauchiraipa ema Juan tamutu eta mavanahianahi me Viya. Ticametarairurichaha ema, máichavacapa ena achaneana:

²⁵ “Ímijachaipapuca nútihí ema Cristo, ema vicuchapaquenehi. Váhira nútina. Títecapainapasera éma, téchanupahi te néquene. Malayarinehi nútí nácutinasihini eta máitupajijiasiravahi éma. Váiparinehi nácaemuñavaimahi macamusuranuhini nuti páuresami” máichavacapa ema Juan.

²⁶ Esamanuchaha, emutu eti nujaneanana, eti nucutiqueneanahi eta mámariequenerahavihi ema viáchucaini Abraham, étipa eti apamuriana epicaurahianahi mayehe ema Viya. Ema Viáquenu tivanecahavi vimetacaeheyare yátupina eta iúchucuirayare éti apanava, te ecasiñava me Jesús.

²⁷⁻²⁹ Máchusera ácutihini ena tuparairucana te Jerusalén, énapa ena ticavasanahi te jena avasare. Tamutu eta sávaruana eta náurujisiravana, náechajicuhaparacahi eta libro nájúchaquenehi ena profetanaini. Váhisea nácaicutiarahini. Eta tacahehi, vahi náimatihini ema Jesús eta émairahi Cristo. Váhivare najacapahini. Éma, tájinahinéni matapiravainahini taviuchahini eta táimicapacahini. Énasea nayaseacapa ema Pilato eta máimicapasiraya. Tacahepa masuapapa éma eta nayasearapihi. Tásiha, te títauchavapa eta nacapasirahi, ena máimitureana nacucupaicapa te macurusura, náecarapa. Tacahehi eta táítauchiravahi tamutu eta nametarapiana ena profetanaini eta máícharacavayarehi ema Cristo eta máepenirahi, taicha tacajuquenehi éta te Sagrada Escritura.

³⁰ Émasera ema Viya macaechepucahi te máecari.

³¹ Tacahe, camuri eta sácheana máimeresiravahi ema Jesús nayehe ena máimitureana, ena nani macachanevacapahi te másihapa te Galilea, téhepa te tiyanapa te Jerusalén. Ena nani tímahanahi, énara ena téchajisihanahi puiti eta máechepusirahi.

³²⁻³³ Acane, ema Viya macametarapihi nayehe ena viáchucanaveanaini eta macucupaisirayarehi ema Cristo. Títauchavaipahisera puiti eta máechajiriruvahi taicha vímatiripa ema Cristo viti nachíchanavéqueneana. ¡Tímerecavaipa ema Jesús, émairahi yátupiquenehi Cristo manerejiruhi ema Viya! Máimerecapa ema Viya ema Jesús eta émairahi yátupiquenehi Cristo, taicha macaechepucahi te máecari. Étara tímitecahavi vimetapanaehe eta juca táuriquene téchacareana. Étara tacayemaquenehi eta máechajiriruva ema Viya eta te Salmo 2, ánipa macahehi: “Pítira nuchichavi. Puiti jena sache, nímmatichaviyare nayehe ena achaneana eta nuchichairavahi eta nucaechepusiravahi te pécari” máichapa.

³⁴ Eta máechepusirahi ema Jesús te máecari, vaipa tiápechavaimahi tépena. Taicha máechajicahi ema Viya ena israelítana, áni pa máichahi: “Níjaracaheyare ema máuriquene Iáquenuyare. Éma ticatiuchaheyare tamutu sácheana. Máichecuaraquireyare eta itaresiraya máicha, eta ecachanerayare éma. Taicha níjararuvahi eta juca néchajiriruvahi mayehe ema David” máichapa ema Viya.

³⁵ Énerichuvare, acane ema Cristo macahehi eta máechajiriruvahi te apana Salmo: “Vahi písapaimahi témitiequeneha eta náquehe nuti pichicha pémunaruquenehi” máichapa.

³⁶ Tiuri, ema David, yátupihí eta máechapajirisiravacahi ena machanerana. Te títecapapa eta matuparahahi mayehe ema Viya, tépenapa ema David. Tacahe, náecarapanapa éma. Tépaichaivahi eta máeche te máecari.

³⁷ Émasera ema Jesús vahi táepachaicavahini eta máeche te máecari taicha macaechepucahi ema Viya.

³⁸ Nuparapenaveana, nuvaraha numetacahe puiti apaesa ímatiéqueneha. Ema Viya mavaraha típerdonachahe eta epecaturana te ácasiña ema machicha Jesús.

³⁹ Viti israelítana, ichape eta véjecapiravahi me Viya taicha vimaitaichirahi eta viyeherepiana májararuhavíhi ema Moisés. Téhesera véhica puiti ema Jesucristo, víperdonachacareya víti mayehe ema Viya.

⁴⁰ Tásiha puiti, ecaunevayare éti, machu ácutiriana ena achaneanaini máechajiruanahi ema Viya eta acane. Ani máichahi:

⁴¹ “Ímahayare, eti épurunuanahi nútí. Nútí níchayare eta tíáramicare te emirahu te juca sácheana. Te nímmetacahepa eta juca, váhiquene esuapahini éti. Tásiha, tapaenumavainapa te ímahapa eta níchaqueneya, íáraminapa. Nímatihesera eta emásuapajiráivanahi. Épenainapa táicha” máichapa ema Viya.

⁴²⁻⁴³ Te tamutupa eta máechajisirahi ema Pablo, nayaseacapa ena achaneana, áni pa naicha:

—Picatajicahavi. Piápechahavini pímitucahavi eta juca te apanainavare sávaru —náichapa.

Te tíuchucanapa eta te náurujisirareva, tíyananapa ena apinana apóstoleana eta te náitecapihahi. Náehicapa ena camuriana israelítana, énapa ena apavasanana tépiyacavanaripa israelítana taicha napicauchaipa ema Viya. Ticaimitucasianapa táurivaina eta najicapiraya eta máurivahi ema Viya, nacasiñairava me Machicha Jesús.

⁴⁴ Te apanavarepa sávaru, namutuyareni ena achaneana ticavasanahi te avasare tíurujicavana nasamararacayarehi eta máechajiriruva ema Viya mametarapiyarehi ema Pablo.

⁴⁵ Énaser ena israelítana masuapajirairahanahi, te náimahapa eta natiarahirahi ena apavasanana, tisemanapa eta mametisiravacahi ema Pablo eta najacapacarevahi me Viya éna apanava. Eta tacahe, nácapaemachapa ema Pablo, nacajachapa.

⁴⁶ Te nasamapa ema Pablo émapa ema Bernabé eta náichirahi ena ticatianacanahi, tájina vahi nayútutuémahini. Náichavacapa:

—Tatuparacahi éti vayahéhi eti víjaneanana vímitucahe eta juca máechajiriruva ema Viya. Étiser vahi íúricahini eta esamirahi, váhivare ésachahini ésenica eta mávasa ema Viya. Tacahe puiti, énarínepuca vímitucavacaya ena apavasanana.

⁴⁷ Taicha víti vívanecasivahi me Viya. Vítauchayare eta juca mavanairipi, ani macahehi: “Nutuparacaviyare píti pipaicyare tamutu avasareana te juca apaquehe. Picametararuyare eta néchajiriruvana nayehe ena achaneana eta nucuchucuiraya nácani tisuapananaya” —macahepa ema Pablo.

⁴⁸ Te nasamapa eta juca ena apavasanana, tíurisamureanapa. Tásiha, nacahepa:

—Tétavicavapa táurinava eta juca máechajiriruva ema Viya —nacahepa.

Énerichuvare, nasuapapa ena máichuhaqueneanahi ema Viya eta náitaresiraya máichecuaraquireya te táequenenapa eta náepeniraya.

⁴⁹ Tacahe, ena tisuapanaripa nacametarairuvare eta máechajiriruva ema Viya nayehe ena achaneana ticavasanahi te tachacayahana eta avasare Antioquía Ichipichu.

⁵⁰ Nararíhiser ena ticatianacanahi ema Pablo émapa ema Bernabé. Israelitanahi éna. Tacahe, náimitucapa ena tuparairucana te avasare, énapa ena ésenana ticapicahucareanahi, téhicanahi eta nayeherepiana ena israelítana. Énerichuvare napamicapa ena achaneana, navarairahi náquijicaya tayehe eta avasare ena apóstoleana. Jéhesareínehi, ticuticanapa eta nacatichiravacahi, nacuchucavacapa ena apinana.

⁵¹ Tacahe, ena nayahirayarepa ena apóstoleana, náetatapevachavaca eta náeparupevana te namirahu ena ticatianacanahi. Táicutiarahi eta namáimitucacárevahi éna, tájinavarepa tímiapchaimahi náimitucavacahini. Tacahe, tíyananapa nacaijuhapa eta te avasare Iconio.

⁵² Énaser ena apamuriana téhicanaripa tímiyanavanapa eta nasuapirahi ema Viya. Tíúrisamureanahivare éna taicha eta mávahásirahi ema Espíritu Santo.

14

Emá Pablo émapa ema Bernabé títecapanapa eta te Iconio

¹ Tacahe, títecapanapa ema Pablo émapa ema Bernabé eta te avasare ticaijare Iconio. Tiyananavare natupiru eta te náurujisirareva ena israelítana. Ticámetaráruanavarepa. Tacahe, camurianavare ena achaneana tisuapanahi eta nametarairuhi: ena israelítana énapa ena apavasanana.

² Váhisera téjiacavana ena apamuriana israelítana masuapajirairahanahi. Nayurucavacapa ena apamuriana achaneana apavasanahi. Navarahapa náimiyusemacavaca. Navarahahivare ticuticacanayare nacatíchavaca ena téhicanaripa ema Viya.

³ Eta tacahe, nanasipanapa ena apóstoleana. Vahi nayanavanehini. Tiyerehi eta náimituresirahi, taicha navarahahi náetumechavacaya eta nacasiñairahi ema Viya. Tacahe, ema Viya máimicatavacahi. Májaracahi eta náichiraya eta tíaramicareana. Eta juca, máicutiarahi eta mavanésiravacahi eta nacametairuirayarehi eta majacapiravacahi nácani achaneana ticasíñavana mayehe.

⁴ Tásiha, típutsimuríhavanapa ena achaneana ticavasanahi tayehe. Ena apamuriana náehicapa ena israelítana masuapajirairahana. Ena apamuriana náehicapa ena apóstoleana.

⁵ Tacahe, ticuticacanapa eta napanereruana ena apavasanana énapa ena israelítana énapa ena náquenuruhana, eta nacajachiraya ena apóstoleana. Navarahapa nacapacaya natupisicaya te márijahiana.

⁶⁻⁷ Énaserá, ema Pablo émapa ema Bernabé, te nasamairiricapa, tijunanapa nacaijuhapa eta te provincia ticaijare Licaonia. Ánaqui ticametairuana tayehe eta avasare Listra, tásiha, tiyananavarepa te avasare Derbe, étapa te avasareana tachacayarahanahi.

Emá Pablo macanaracahi ema masari ticavasahi te avasare Listra

⁸ Te jena avasare ticaijare Listra, matiaríhihi ema émana achane masaríhi eta máitare-sirahi. Vahi táuríhini tipaíca, taicha máimiuchurehi eta mamasarivahi.

⁹ Macheripa ticasamarahíhi éma eta mametarairuhi ema Pablo. Tacahe, ema Pablo máesenicapa, máimaticapa eta macasiñavairahi ema masari mayehe ema Viya macanarasirayarehi.

¹⁰ Tacahe, ema Pablo mapiaracapa:

—Pécheputa píti. Pétumecha eta jara píapeana. Pitupíha —máichapa.

Eta masamairahi eta juca ema masaríni, enevanepa técheputuca. Titupíhapa. Tipaicapa.

¹¹ Eta náimairahi ena achaneana eta macanarasirahi ema Pablo ema masaríni, náraminehi ichape. Tipiaracanapa te náechajiriruvaichu, ánípa nacahehi:

—Viyana ena nani. Achaneahianahiséra eta náimahi eta náucupauchiráhávíhi.

¹² Ema maca ticaijare Bernabé, émara Viya Júpiter. Ema maca apana ticaijare Pablo, émara Viya Mercurio taicha ema ticametairurahi —nacahepa.

¹³ Tiúri, tatiaríhi eta petí te tasiaparacu eta avasare, mayujarasirarehi ema achane tavanarahi eta nasiñaraji ticaijare Júpiter. Tatiaríhivare eta apina turu mamansuríhi. Tacahe, ema maca achane máepanapa eta turu. Mayehehecapa eta flure taicha mavarahi macapacayarehi eta turu. Májaracasichayarehi ema Pablo émapa ema Bernabé. Énerichuvare ena achaneana navarahahi náejirayarehi ena nani apinana apóstoleana taicha náimijachaipe énaripa ena nasiñarajanahi.

¹⁴ Étásera te nasamairiricapa ena apóstoleana eta náichirayarehi, ichape eta náeñamirava. Tiúchucanapa, nasiapamuríhapa ena achaneana. Tipiaracanapa, ánípa nacahe:

¹⁵ —¡Tátanaveana, mémenaveana! ¡Váhirine táuríhini eta juca íchirayare! Vítirichu ecuti-queneana achaneana. Tímitcachavíhi vimetapanáhe ínajica eta juca eyeherepianahi. Taicha vahi tiuri, tamapurujíhi eta eyehesiraparacahi eta esíñarajiana. Ínajicaya eta juca. Éhicayaresera ema Viya, ema yátupiquenehi tísamahavi. Éma tépiyacahi eta anuma, eta apaquehe, eta íchapeque mar. Tétupiricahi tamutu eta vímahaqueneanahi puiti.

¹⁶ Ánaquiaparipa eta macamichirahi ema Viya eta náichirahi eta navarahaqueneana ena achaneana.

¹⁷ Máimerecáhinéniserá eta émarahi tépiyaca eta juca táuriqueneana. Tíjaracahavíhi eta tíquiva. Tiúrinachayare eta sucurecana vínicahueneana máicha. Májarasirahavíhi tamutu eta vicamunuqueneana. Ticurisamurechahavíre. Eta tacahe, ímatiquenéha yátupina eta émarahi Viya esíñarajíya —náichapa ena apóstoleana.

¹⁸ Eta tacahehi, nametacarpahínéni eta taurivahi eta juca navarahaquenehi naicha. Énaserá ticamesavanarichucha eta navairahi ticaparecana eta túruana. Váhiqueneséra náisapahíni ena apóstoleana náichahíni eta juca.

Natupisicapa te márijahiana ema Pablo

¹⁹ Tayerevahi eta sácheana, títicapana ena israelítana tíasihanahi te Antioquía Ichipichu étapa te Iconio. Éna ticitianacana ena apóstoleana. Nayurucavacapa ena achaneana, náimiyusemacavacapa. Eta nachimpirahi ema Pablo te calle, natupisisihapa te márijahiana. Náquipaica. Eta náimairahi máquipaisiravahi, náimijachaipapuca tépenahi. Nachururupaica náquijicayarehi te tachachacu eta avasare.

²⁰ Tacahe, tiyananapa ena machamuriana ema Pablo, náimahapanayarehi. Te náitecapuchapa, náurujiacaripa. Émasera téchararahaipa téchepucapa. Máehicavacapa tiyanapa eta te máitecapihahi. Te apanapa sache, tiyananapa ema Pablo émapa ema Bernabé te avasare Derbe.

²¹ Te títicapana tayehe eta avasare Derbe, nanasipanapa tayehe. Ticametarairuanahi eta máechajiriruva ema Viya. Camuriana ena tisuapanahi téhicanahi ema Jesús. Te tamutupa eta náimitusiravacahi, tiyananavarepa tichavanapaipa eta te avasareana náimituresinepahi eta te Lистра, te Iconio, étapa te Antioquía Ichipichu.

²² Eta te juca avasareana, náimitucavarepa ena téhicanaripa ema Jesús. Náetumechavacapa eta táurivaina eta náehisiraya ema Viya. Náichavarepa:

—Vahi ecuarameca eta nacatianasiráhe ena achaneana táichavene eta éhisira ema Viáquenu. Ecamichachucha tamutu. Échava eta esiapiraya eta mávasa ema Viya —náichapa.

²³ Énerichuvare, natanucapa ena nayeheanapachu pastor nácani náijamuripachu. Téchanayarehi eta nayujarasirana. Tacahe, natuparacapa eta návacureanaya. Te tamutupa eta natuparasiravacahi, tiyujaracanapa nahayunachavarepa, nayasecapa ema Viya eta majaneasiraina táurivaina eta náehisiraya namutu ena ticasañanaripa ema Viya.

Éma Pablo, ema Bernabé tichavanavare tayehe eta avasare Antioquía

²⁴ Tacahe, tiyananapa ema Pablo émapa ema Bernabé, tétavajicanapa eta te avasarechichana tayehe eta Pisidia. Náitecapirapa tayehe eta avasare Perge táunavahi eta provincia Pamfilia.

²⁵ Ticametarairuanapa eta máechajiriruva ema Viya nayehe ena achaneana ticavasana tayehe eta avasare. Te tamutupa eta nacametarairuirahi, tiyananavarepa nacaijuhepa eta Atalia.

²⁶ Étapa návacuinehi eta nánuesiraya eta mar, nacaijuhepa eta avasare Antioquía. Tichavanapa tayehe eta juca avasare náuchusinehi te ticavanahianapa mayehe ema Espíritu Santo. Étarichuvare nayujarauchinehi ena nachamuriana eta majaneasirayare ema Viya ena apóstoleana eta napaisirayare. Puiti eta juca náitaucaquenéipa eta náematanehi.

²⁷ Eta náitecapiraipa, nacurujicapa ena nachamuriana. Nametacapa tamutu eta máimicasiravacahi ema Viya tayehe eta napaisirapahi. Étapa eta majacapiravacahi ema Viya ena apavasanana eta nasuapiravacahi nacasiñairahi éma.

²⁸ Tacahe, ema Pablo émapa ema Bernabé, tiyerehi eta nanasirahi nacachaneravacahi ena nachamuriana.

15

Ticurujicacanapa te Jerusalén. Ticaechacasinapa eta panererucanahi.

¹ Te jena sácheana, títicapana te Antioquía ena apamuriana israelítana, tíasihanahi te Jerusalén. Navarahapa nahapapiricavaca ena apavasanana téhicanaripa ema Jesús. Ánipa naicha eta náimituresirahi:

—Te evaraha iúchucuha eta ícuñayaréni, tacamunu ítauchayare eta mavanairipihí ema Moisés eta vicamarcairaya* —nacahepa.

²⁻³ Émasera ema Pablo, émapa ema Bernabé nacapaemachavacapa muraca ena tipamicanahi ena apavasanana eta nacamarcairahi. Ichape eta nacapaemachiracacahi. Tacahe, ena nachamuriana navarahahi náetupirica eta juca. Tásiha, natuparacapa ema Pablo émapa ema Bernabé, nayanahini eta te Jerusalén. Eta ánaqui, ticaechacasiyarehi nayehe ena apóstoleana énapa ena náiyarahanahi. Náevatacavare ena apamuriana téhicanayarepahi ena apinana.

Tacahe, eta napaisirapahi te achene, tétavajicanapaipahi tayehe eta avasarechichana táunavanahi eta Siria, étapa te Samaria, návihahi ena apamuriana nachamurianahi. Nametacapaipa eta náinajisirahi ena apavasanana eta nayeherepianaini tamauriqueneana, taicha eta náehisiraipe ema Jesús. Tacahe, ena nachamuriana, eta nasamairirisirahi eta juca, tíurisamureanarinehi éna.

* **15:1** Eta mavanairipini ema víyarahaini Moisés ticamarcanayarehi namutu ena amuyana ajairana israelítana. Éta tímereuchayarehi eta yátupiquenerahi israelítana. Te juca, ena napaipiruanahi tíasihanahi te Judea, navarahapa nacamesaqueheha nacamarcavaya ena ajairana ichanaruaripa, apavasananhavare.

⁴Tacahe, eta náitecapirahi eta te Jerusalén ema Pablo émapa ema Bernabé, ena apóstoleana énapa ena náiyarahanaahi pastoreanahi nacurujicapa ena nachamuriana eta najacapiraya ena araitecapianahi. Tacahe, ena apinana nametacapa eta máimicatasiravacapahi ema Viya eta napaisirapahi éna.

⁵Natarihivare ena religiósosana téhicanarípahi ema Jesús. Titupihanapa éna. Téchajicanapa, ánipa nacahe:

—Táitaveaquene tacamunurichu nacamarca ena apavasanana téhicanaripa ema Viáquenu Jesús. Tacamunuhivare nacaravahu náehica eta juca mavanairipianahi ema Moisés —nacahepa.

⁶Tacahe, te apanapa sache, tiúrujicavanapa ena apóstoleana énapa ena náiyarahana. Navarahapa náetupirica eta juca.

⁷Nacaemataneacaripa eta juca náechajisihahi. Tacahe, titupihapa ema Pedro. Máichavacapa:

—Nuparapenaveana, écharichuhi éti ánaquiaparipa eta manerejisiranuhi ema Viya eta nucametairuya eta nayehe ena apavasanana eta náuchucuirayarehi táichavenéni eta nasuapirayare ena apana.

⁸Ema Viya máimatihí eta nasamureana ena apavasanana eta nasuapirahi. Tásiha, máimerecahi eta majacapuravacahi eta mávahásiravacahi ema Espíritu Santo tacutihí eta mávahásirahavihí víti.

⁹Ema Viya, nájina manerejiruina eta máemunasirahavi. Témunacahavihí vimutu: viti israelítana, énapa éna apavasanana. Eta tacahehi, masípasinavacaripa eta nasamureana éna táichavénéhi eta nasuapirahi.

¹⁰Étiserá evarahapa épuruyare eta máichaqueneanahi ema Viya. Ticajeraequenepa eta véhisirainahini eta nayeherepiana ena viáchucanaveanaini. Énaripa vahi náitachapahini tamutu eta nayeherepianapahi. Vítiripa váhivare váratahahini vítauchahini. Tacahe, váipa táurichahini vécatihevachahini ena vichamuriana apavasanana náichahini eta juca.

¹¹Vécharipahisera yátupi eta viúchucuiraya táichavénéhi eta macatajisirahavihí ema Viáquenu Jesucristo. Viti israelítana, vahi étaparacaina eta vicamarcairahi. Ena apavasanana, váhivare étaparacaina eta tájinairahini namarcainahini —máichapa ema Pedro.

¹²Tacahe, timatinanapa namutu. Nasamararacaripa ema Bernabé, émapa ema Pablo. Nametamurihapa eta máimechirahi ema Viya eta mavanésiravacahi éna, taicha májaracavacahi eta náichirahi eta tíaramicareana te namirahu ena apavasanana.

¹³Te títapiricanapa eta nametarapianahi, émapavapa ema Santiago téchajica. Macahepa:

—Nuparapenaveana, esamanuchaha.

¹⁴Ema Simón Pedro timetacahaviripa te tépanavainapa majacapavacainapa ema Viya ena apavasanana machaneranayarehi.

¹⁵Eta juca eta náechajisihagenehi namutu ena víyahaini profetana. Émaripa ema víyahaini profeta Amos májuchahi eta juca máechajiriruvana ema Viya, ani macahehi:

¹⁶“Te táequenénapa eta juca, nápechavaya núcupaicayare te juca apaquehe. Nétupiripanya eta nupena táquipairuvahi. Tásiha, tíápechavanayare tiyujarauchanuanayare ena achaneana, tacutihare eta náejirairanuhi ena machaneranaini ema rey David. Tisuapanuanayareva.

¹⁷Énerichuvare títanucanuanayare namutu ena apavasanana. Nuchaneranayareva éna, taicha námayare eta níjare”.

¹⁸Étara eta juca macayemaquenehi ema Viya. Ánaquiaparipa eta mavarairahi vicaicutiaraya eta juca.

¹⁹Tímiyanava eta máechajiriruvana ema Santiago, ánipa macahe:

—Tiuri, eta juca eta nupanereruhi núti: Tiúripana vésamiricavacachuca ena vichamuriana apavasanana náequeruvanaripa mayehe ema Viya.

²⁰Taratarichu vicajurevaca tametaca eta vaipa nacuapechava nacunica eta taeche eta sárare nájaracasiruana eta nasiñarajiana. Váhivare nacuveha súcani apana esena. Énaripa ena esenana, váhivare nacuveha ema apana achane. Váhivare nacunica eta taeche eta sárare namaechatinure. Étaripa eta táitine, váhivare nacunica.

²¹Eta vimetacavacayare ena vichamuriana apavasanana eta juca, apaesa vahi nacusemaracavaca ena téhicanarichaha eta mavanairipiana ema Moiséini. Taicha ánaquiaparipa te avasareana eta náechajicuiraparacahi ena vijaneana israelítana eta mavanairipiana ema Moiséini te náurujisiravana. Puíticha nararihichaha ena náimicapicaucharichucha —macahepa ema Santiago.

²²Tacahe, ena apóstoleana, énapa ena náiyarahana, énapa ena náumurivana, tiúrihi nasama eta mapanereruhí ema Santiago. Tacahe, ticavanahianapa ena apinana téchemarahiana

ticapicahuanahi, ema Judas Barsabás émapa ema Silas. Éna téhicanayarehi ema Pablo émapa ema Bernabé eta nachaviraya te Antioquía.

²³ Tiuri, eta juca táechajiriruvahi eta carta. Ani tacahehi:

“Vímiamareca eta juca véchajiriruva viti apóstoleana, énapa ena víarahana, énapa ena vichamuriana te juca Jerusalén. Vivaraha tativayare véchajicahe eti viparapeneveanahi te mavahuana ema Viáquenu: eti apavasanana tiávianahi te Antioquía, étipa eti tiávianahi te táunavanahi eta Siria étapa eta Cilicia.

²⁴ Visamairiricahi eta nayanirahi ena tiásihanahi ani te juca. Tiávajiriricaheanapa. Navarahahi nahapapicayare eta epanereruana. Ticamesaheanahi itauchayare eta mavanairipiana ema Moisés eta ecamarairaya. Váhisera vanairucanaina eta viyeha eta náimitusirahehi eta juca.

²⁵⁻²⁷ Vévatacahi ema Judas émapa ema Silas, vanairucanahi viyeha. Éna, timetacaheanayare tamutu eta juca téchacareanahi viyeha. Ena nani téhicanapahi ema Bernabé ema Pablo, ena viparapeneveana vémunaruqueneana. Ema maca Bernabé émapa ema Pablo, tíjaracavanahi éna náepenacaya ema Viáquenu Jesucristo taicha eta nacametairuirahi.

²⁸ Ani te juca viti, vicuticacahi eta vipanereruanahi, máimitusirahavihi ema Espíritu Santo. Vahi vávarahahini tacajeraequenehini eta éhisirayare ema Viáquenu.

²⁹ Tacarichu vimetacahe eta juca ticamunucarepana te mamirahu ema Viya:

1. Vahi ecunica eta taeche eta sárare nayujaraurehi ena achaneana te tamirahu eta nasiñarajiana.
2. Váhivare ecunica eta táitine eta sárareana.
3. Váhivare ecunica eta taeche eta sárare namaechatinure.
4. Váhivare ecuveha esu apana esena. Énerichuvare eti esenana, vahi ecuveha ema apana achane. Énerichuvare ímitucavaca ena echichanaveana tacuija eta natuhusivaina.

Te yátupina esuapa eta júcana, tájina íchiravaimahi te mamirahu ema Viya. Éma tímicatacaheyare tijaneacaheyareva tamutu sácheana. Tamutupa eta juca véchajiriruvanahi eta eyehe”.

³⁰ Tacahe, tiyananapa ena tiámana eta carta, nacaijuhepa eta Antioquía. Te títecapanapa ánaqui, nacurujicapa ena nacaijuhequeneanahi nachamuriana. Náijaracapa eta námaque-nepahi carta.

³¹ Te najacapa eta carta, navejiacapa. Náechajicuhapa te namirahu namutu ena nachamuriana. Tétavicavahi eta náurisamurevahi eta nasamirahi.

³²⁻³³ Nanasipanapa jena cájeanahi ema Judas émapa ema Silas. Éna, énerichuvare eta títucanahi eta máechajiriruva ema Viya. Tiúrihi eta náimitusiravacahi ena nachamuriana. Naconsejachavacahi, náetumesámurechavacáinehi náicha. Te tamutupa eta náimituresirahi, tichavanayarepa nayehe ena tivanecanahi. Tacahe, ena nachamurianahi náchejiejmachavacapa. Nayaseacapa ema Viya táurivainapahi eta napaisiraina.

³⁴ Émasera ema Silas mavarahapa manasiyare.

³⁵ Énerichuvare, ema Pablo émapa ema Bernabé nansivarepa tayehe eta avasare Antioquía. Tímiyanavanapa ena tímíturcana nayehe ena nachamuriana. Ticametairuana nayehe ena apamuriana achaneana. Natiarihivare ena apamuriana tímicatacanahi.

Tiápechavánavare tiyanana ena apóstoleana te avasareana

³⁶ Te táequenepa eta juca semanana, ema Pablo máichapa ema Bernabé:

—Viyonavare viápechava vipaica tayehe eta avasareana, véjiravacapai ena vichamuriana te vipaisineanapahi cape juca te tínapucainapa viyanahi. Vímaha tájahapuca náicharacavahi —máichapa.

³⁷ Tacahe, ema Bernabé tísapavahi tiyana. Mavarahapasera mama ema Marcos.

³⁸ Émasera ema Pablo vahi mávarahahini mayanahini ema Marcos. Taicha te tínapucainapa tipaicana manaquimuriahahi ema Marcos te avasare Perge tayehe eta Panfilia. Vahi máimicatacáhini tayehe eta náemataneanapahi.

³⁹ Nacaemataneacaripa eta mamavarairahi mayanahini ema Marcos. Tacahe, tínjicacanapa. Ema Bernabé tiyanapa, macachanehi ema Marcos. Tiávacuhanapa, nacaijuheyarepa eta tíurupuhi Chipre.

⁴⁰ Tacahe, ema Pablo mapanerechapa mámayare ema Silas. Te tétupiricavanapa, nayujaruchanumapa ena nachamuriana. Nayaseacapa ema Viya eta máimicatasirainapahi eta napaisiraya. Ticametavanapa tiyananapa.

⁴¹ Eta napaisirapahi te achene tétavajicanapaipa tayehe eta avasarechichana Siria étapa te Cilicia. Náejiravacaipa ena nachamuriana natiarihiqueneanapahi. Náetumesámurechávacapáipahi.

16

Emá Timoteo máehicavacapa emá Pablo, emá Silas

¹ Tacahe, emá Pablo émapa emá Silas náejiravacaipa ena nachamuriana ticavasanahi te Derbe. Tásiha, tiánucuhanavarepa te Listra. Ánaqui te Listra matiarihihi emá Timoteo, suchicha esu ésuna esena israelíta, téhichahivare emá Jesús. Émasera emá maiya, apavasanahi griego éma. Emá maca Timoteo émarichuvare téhichahi emá Jesús.

² Énerichuvare, nacunachahi eta máurivahi ena machamuriana ticavasanahi te Listra énapa éna ticavasanahi te Iconio.

³ Tacahe, emá Pablo mavarahapa mámayare emá Timoteo eta napaisiraya. Tacahe, mavanecapa macamarca* apaesa tacuija nacucayema ena israelítana ticavasanahi tayehe eta napaisihayare. Taicha náimatihí éma eta machíchairahi emá apavasanahi.

⁴ Tacahe, tiyananapa. Náejiravacaipa ena nachamuriana te tamutu avasareana. Nametacapahí éna eta táechajiriruvapahí eta carta náimiamareruhivare ena apóstoleana énapa ena náiyarahana tiávihanahi te Jerusalén.

⁵ Ena nachamuriana, eta nasamirapahi eta mametarairu emá Pablo, tétumechacacanaipa eta nasupajiravapahi. Tamutu sácheana ticajanemuriánapáichucha ena téhicanapahi.

Emá Viya máechajicahi emá Pablo mayana eta te Macedonia

⁶ Tiuri, emá Espíritu Santo mametacahi vahi nacuyana eta te tinapaicahi eta avasareana te Asia. Tásiha, náetavicapa eta avasarechichana táunavanahi eta Frigia (ticajjarehivare Galacia).

⁷⁻⁸ Nacaijuheryarehi eta provincia ticajjare Bitinia. Téhesera te tiánehianapa, emá Espíritu Santo mavanecavarepa vahi nacuyana tayehe. Tacahe, náetaviequenehapa. Tiánucuhanapa tayehe eta táunavahi eta Mísia. Náitecapirapa te puerto ticajjare Troas.

⁹ Te jena yati, máimahapa emá Pablo te mavapure emá émana achane ticavasahi te tinapaica te Macedonia. Titupihahijí éma. Máichapaji eta máechajisirahi:

—Picatajicahavi, piánueca te juca viávihihi Macedonia. Pímicatapanahavi —máichapaji.

¹⁰ Eta máimairahi emá Pablo te mavapure eta juca, enevanepa vétupiricavapa eta viyaniraya tayehe eta Macedonia, taicha véteteacahi eta mavarairahi emá Viya eta viyaniraya eta ánaqui, vicametarairuyare.

Títecapanapa te avasare ticajjare Filipos

¹¹ Tacahe, viávacuhapa eta te puerto Troas. Viyanapa tayehe eta tiúrupuhi ticajjare Samotracia. Te apanapa sache, vítecapapa te Neápolis.

¹² Viúcupaicaipa viyanapa te avasare Filipos. Eta juca avasare nayehe colonia ena romanoana. Eta ichapepanahivare tayehe eta avasarechichana tinapaicahi eta te tacunahu táuchusine eta sache eta Macedonia. Vinasipanapa tayehe te jena sácheana.

¹³ Te jena sache sávaru, viyanapa eta te nayujarasirarehi te tachachacu eta avasare te tachausi eta cajacure. Véjacapa tayehe. Vicametarairupa nayehe ena esenana náurujiruvanahi tayehe.

¹⁴ Sutiarihi esu ésuna esena ticajjaruhi Lidia. Ésu, tiásihai eta avasare eta suchusinehi. Esu suca tíjararecarahi eta yérerucava sédana mularumeana. Ésurichu, típicaurahi me Viya. Susamaracaripa eta mametarairuhi emá Pablo. Emá Viya mavejiasinaipa eta susamure sujacpirayarepahi eta mametarairu emá Pablo.

¹⁵ Enevanehi ticaicachasihí esu esena énapa namutu ena tiávihanahi te supena. Tacahe, suvarahapa tiámahavi eta te supena. Sucahepa:

—Te esuapapuca eta yátupirahi eta néhisirahi núti eñi Viáquenu Jesús, ítecapauchanupaini te nupena —sucahepa.

Tásiha, ticamesahavipa tiámahavi te supena. Tacahe, vísapavapa véhica.

¹⁶ Te apana sache, te viápechavavarepa viyana tayehe eta nayujarasirare, vicainunapa esu ésuna amaperu mávaháruhi emá éreana. Tijarauquihí ésu máicha. Esu suca amaperu vanaracahi. Ichapemurihí eta plata suvachanahi, sujaracaphisera ena suáquenuana.

* 16:3 Eta juca nayeherepi eta nacamarcairahi ena israelítana, te tíuchuca emá amuya ajairachicha, te óchopa sache eta máuchusirahi, namarcachayarepa. Émaripa emá Timoteo ichanaruipahinéni. Émasera emá Pablo macavanairipipa macamarcachivaréni éna apanavare, apaesa tacuija nayunacahi ena israelítana.

17 Te tímahahavivare viánucuha, téhichavivare esu suca amaperu. Tipiaracapai te véquene. Ánipa sucahe:

—Ena nani ajairana ñivanarana eñi Viya Viáquenu vimutu viti achaneana. Náechajisi-havare eta eyehe eta achene ticaijuhe ñe Viya nayanihayare ena náuchucureanayare —sucahepa.

18 Ichapemuri eta sácheana eta suéhicarairisrahavihi. Mapuñacapa ema Pablo. Téqueru-cavapa. Tásiha, máichapa ema éreana ema tiávahácahi ésu:

—Te máijare ema Náquenu Jesucristo, nuvanecavi piúchuca te suáquehe esu suca amaperu —máichapa.

Enevanepa tiúchuca ema éreana. Majunjiacapa ésu.

19 Te náechapa ena suáquenuanahi, tise-manapa taicha tájinapa suviahini eta suplatane-chihavacahini. Tacahe, nacaratapaca ema Pablo émapa ema Silas. Námapa te plaza te namirahu ena tuparairucanahi.

20-21 Tacahe, nametauchavacapa nayehé ena tuparairucanahi. Ánipa nacahe:

—Ena nani ajairana israelitanacacha. Nacaechepuca eta tamauriqueneana. Navarahapa tímínajicahaviana eta viyeherepiana. Navarahavare véhica eta vimaimatiequeneruhi viti romanoana. Váhivare táisapacarehini vítauchahini eta nayeherepianahi énatatajiana —náichapa.

22 Tacahe, ena achaneana tise-manapa nayehé ema Pablo émapa ema Silas. Tacahe, ena tuparairucana juéseanahi nacavanairipipa navejamuhiacavaca, náestacavacapa te yucuquípiana.

23 Te tamutupa eta náestasiravacahi, námapa te cárcel. Navanecapa ema nacapitara ena carceléroana máechapajirica muraca eta tapaja.

24 Te masamapa ema nacapitara eta navanairipihi, máimisipavacapa tayehé eta téqueneha cuarto. Máeratapaiquehavacapa te cepo. Manacapa cantavu eta tapaja.

25 Tacahe, eta jena enumuhuquenepa yati, eta nacaeratairahi ema Pablo émapa ema Silas, tijranaichucha tiyujaracanhivare me Viya. Ena apamuriana présoanahi nasamaracaripa eta jirasare.

26 Tjahúchavapa tiyamurica muraca eta apaquehe. Tiyamuricapa eta yúchamana. Tjahú-chavapa téjiacavaca eta tapajacurana eta cárcel. Téjapucapa eta cadenana náitihanahi ena présuana.

27 Téjamiuchavapa ema nacapitara ena carceléroana. Máimaharine eta tapajana téjiacavacari-pahi. Máimijachapa nájinari-pahi ena présoanahi. Tásiha, mavehapa eta mayehé espada. Mavarahapa ticapacavayahini táichavenehi eta mapisirahi.

28 Émasera ema Pablo mapiaracapa:

—Vahi picucapacava. Vitiaririchuhi vimutu. Nájina émanaina téjiacavaina —máichapa.

29 Tacahe, ema nacapitara tiyaseserecapa eta namicahuyare. Tisiapapa máimamuriha-yarehi éna. Tiyayacrepainecha eta mapisirapahi. Tépuycapa te namirahu ema Pablo émapa ema Silas.

30 Máichuhavacapa éna, mámapa te mapena. Mayaserecavacapa:

—Tátanaveana, ¿tájahapucaini nícharacavaini eta núchucuirayare nútí apana?

31 Éna najicapapa:

—Pácasiña pisuapa ema Viáquenu Jesucristo. Tásiha, éma ticuchucuhaviyare píti, énapa ena pichichanaveana —náichapa.

32 Tacahe, náimitucapa éma eta máechajiriruva ema Viya, énapa namutu ena tiávihanahi te mapena.

33 Étarichu jena yati ema nacapitara masipasinavacapa eta najarana ema Pablo émapa ema Silas. Tacahe, ticaicachasipa éma, esu mayena, ena machichanaveana, énapa ena apamuriana tiávihanahi te mapena.

34 Te táequenepa eta juca, mámamurihavarepa te mapena. Máenicavacapa. Tiúrisamur-ri-pa éma, énapa namutu ena tiávihanahi te mapena, eta macuchucuiravacayare ema Viya eta nasuapiraipa.

35 Te las nuévepa sache, ena juéseanahi navanecapa ena nasuntarurana nacuchupanava-cayarehi ena náerataruanahi.

36 Tacahe, ema nacapitara ena carceléroana máichapa ema Pablo:

—Jucarihi eta órdené nayehé ena juéseana eta nacaitisiraheya. Tiúripa eyana iúchuca. Vaipa táéñamavacare —máichapa.

37 Émasera ema Pablo máechajicavacapa ena suntaruana. Máichapa:

—Víti tavanarahavi eta Estado te Roma. Viávacuhahi eta ley. Vahi táuricahini náichaha-vihini ena juéseana ticaratacahavianapa téstacahavianapa te namirahu ena achaneana. Vahi nayaserecavahinumahini te tatiarhipuca eta viviurevahi. Tásiha puítí, navarahapa

nayumurucayare eta nacuchusirahaviyare. ¡Vahi ene tácahe! Emetaca énaína náiteca nacuchupanhavi —máichapa ema Pablo.

³⁸ Tacahe, tichavanapa ena vanairucana. Nametacapa ena juéseana eta máechajiriruva ema Pablo. Ichaperine típica ena juéseana eta nasamirahi tavanaranairahi eta Roma.

³⁹ Tacahe, tiyananapa ena juéseana nacuchupana. Tiperdonachavanapa nayehe. Náichapa:

—Ájapanuhavi. Eperdonachahavi eta juca víchirahahi. Ecatajicahavi, vahi ecumetauchahavi. Ájapanuhavichucha, tíuripanhípucáini iúchucaini eta te juca avasare víavihahi, apaesa náesamiricahepa ena iánaranahi —náichapa.

⁴⁰ Tacahe, te tíuchucanapa te cárcel ema Pablo émapa ema Silas, tiyananapa tichavana te supena esu Lidia, víavihahi víti. Vicurujicapa ena vichamuriana. Tásiha, náetumechavacapa, náimitusiranumapa eta náimiyavachucha eta nasupajiravaina mayehe ema Viya. Tásiha, tiyananapa.

17

Nacaechepuca eta semanere ena israelítana te avasare Tesalónica

¹ Eta nayanirahi ema Pablo émapa ema Silas, tiánucuhanapa tayehe eta avasareana Anfípolis étapa te Apolonia. Títecapanapa tayehe eta apanavare avasare Tesalónica. Tatiaríhihi ánaqui eta náurujisirareva ena israelítana.

² Eta mayeherepihi ema Pablo, matupiru te náurujisirareva. Mapana sávaru eta macame-tarairuirahi nayehe ena achaneana.

³ Manerejicapahi eta te Sagrada Escritura eta máechajicurepahi. Máimitucavacahi eta máitesiraipahi ema Cristo. Ánipa máichavacahi:

—Tiyeréhi eta vicuchapirahi eta máimeresiravayare ema Cristo eta viyehe víti israelítana. Timitucavahi eta Sagrada Escritura eta macatajivairayarehi, nacapacayarehi. Émasera téchepucayarehi te máecari. Puiti numetacahe: Nímatipa ema Jesús Nazareno, ema nacaparuhi. Téchepucaipahi éma. Eta juca tímicaecherachahi émahí ema Cristo —máichapa.

⁴ Tacahe, tinerejicavanahi ena achaneana. Natiaríhi ena tisuapanahi, náurujicahi ema Pablo émapa ema Silas. Camurianavare ena griégoana apavasanana típicauchanahi ema Viya, téhicanahivare. Énerichuvare ena esenana nayenana ena táiyarahana eta avasare tinerejicavanahivare ena téhicanahi.

⁵ Énasera ena apamuriana israelítana masupajirairahanahi, ticapinaruanahi eta náimairahi ena camuriqueneanahi achaneana téhicanahi ena apóstoleana. Tisemasamureanarichucha. Nacurujicapa ena ajairana víinarajipaneruanana, máematanereanahi te cálleana. Tíchuhajiricacanapa eta nacaechepusiraya eta semanere. Natanucapa ema Pablo émapa ema Silas, navarairahi nacaetemajiricavaca te namira ena achaneana. Tiyananapa eta te mapena ema Jasón. Náquipaicapa eta tapaja. Tisiapanapa.

⁶ Eta namaichimavirahi ema Pablo émapa ema Silas, nacaratacapa ema Jasón énapa ena apamuriana machamuriana. Nachururupaicavacapaipahi eta námirapahi te namirahu ena tuparairucanahi. Tipiaracanapa eta nasemanevahi, nacahepa:

—Títecapauchahavianahi ena nani achanetatajiana náitecapaurehavianahi. Najararecapahi eta viyeherepiana, nahapapicahivare eta napanereruana ena vijaneanana.

⁷ Éna majacapaqueneanahi ema Jasón te mapena. Namutu ena nani nacaecahihi ema aquenuca viyehe Emperador romano, náepuruvare eta mavanairipiana. Náimijachahiji mararíhi ema apana rey ticajarehipuca Jesús —nacahepa.

⁸ Te nasamapa eta juca, ena tuparairucana énapa ena apamuriana achaneana, napane-requeneháinehi.

⁹ Tájinasera apanainahini náicharachini, nayaseacapa nanaquica eta prenda eta náuchusirayare ema Jasón énapa ena machamuriana. Tiámainucava te náuchucapa te avasare ema Pablo ema Silas, náimichavayarepa eta prenda.

Ema Pablo, ema Silas títecapanapa te avasare Berea

¹⁰ Te jena yátiquenehi, ena vichamuriana námapa nayumurucapa eta nacuchusirahi ema Pablo émapa ema Silas tayehe eta avasare. Tiyananapa nacaijuhe eta avasare Berea. Te títecapanapa ánaqui, tiyananavare tayehe eta náurujisirareva ena israelítana.

¹¹ Éna nani israelítana ticavasanahi te Berea, tíuripanereruanapana nayehe ena ticavasanahi te Tesalónica. Navapina éna, nasamararaca eta mametarairuhi ema Pablo. Tamutu sácheana nacaravahuhi eta Sagrada Escritura. Navarahahi náechayare te yátupihipuca eta mametarapíhi ema Pablo.

¹² Jéhesareinehi, camuriana ena tisuapanahi. Camurianavare ena apavasanana tisuapanahi. Te namuri, natiaríhivare ena esenana ticapicahuqueneanahi, énapa ena ajairana.

¹³ Nasamairiricavarepasesa ena israelítana ticavasanahi te Tesalónica eta macametarairuripahiva ema Pablo eta te Berea. Enevanepa tiyanana nacapayaca. Te títecapanapa, náimiyusemacavarepa ena achaneana.

¹⁴ Énasesa ena machamuriana ema Pablo enevanepa náevataca éma te tachaui eta mar. Nanasipasera te Berea ema Silas, ema Timoteo.

¹⁵ Ena tiámanahi ema Pablo, te títecapanapa te puerto, tiávacuhanapa tiyananapa tayehe eta avasare Atenas. Te títecapanapa, étapa nachavinehi ena tinapananahi ema Pablo. Tacahe, ema Pablo matuparacavacapa nametaca ema Silas, ema Timoteo nayanavane nacapayaca éma eta te mávihahi.

Títirecapa ema Pablo te avasare Atenas

¹⁶ Eta macuchapiravacahi náitecapiraya ema Silas, ema Timoteo, vaipa máitucacarehini ema Pablo eta máimairavacahi ena achaneana nayehearacahi eta camuriquene nasiñarajiana.

¹⁷ Tacahe, tamutu sávaruana, tiyana eta te náurujsirareva ena israelítana. Máechajisihahi eta tiúrina échájirucava nayehe éna, énapa ena apavasanana griego típicauchanahi ema Viya. Tamutuvare sache máechajisihahi éma te plaza nayehe ena achaneana natiarihique-neanahi.

¹⁸ Natiarihahi ena ajairana ena téhicanahi eta máimiturapi ema ticajare Epicuro, énapa ena apamuriana ticaravahuanahivare eta náimiturapiana ena estoicoana. Te jena sácheana, téchajiricavanapa mayehe ema Pablo. Váhisera nácaicutiarapahini eta macayemapahi. Nacahepa:

—¿Tájahasamipucara tacayemahicácha eta mapanereruhi ema maca?

Ena apamuriana ánvare nacahe:

—Ema maca ticametarairurahi tayehe jácani apanavare masiñarajianarichu —nacahepa. Nacahehi éna eta juca, taicha ema Pablo mametacavacahi eta máepenirahi ema Jesús étapa eta máechepusirahi, máechiravahi títareca.

¹⁹ Tacahe, tiyananapa tayehe eta cabildo náurujsirareva ticajarehi Areópago. Ánaqui nayaserecapa ema Pablo:

—Vivaraha vímati víti eta juca arairuhi pímiturapihi eta viyehe.

²⁰ Taicha tiáramicarehi eta juca vimaimatiquenehi. Vivaraha véchayare tájahapuca tacayemahi eta juca —náichapa.

²¹ Taicha ene nacahehi namutu ena ticavasanahi te Atenas, énapa ena náiteruanapahi. Náuricarinehi náechajisihahi tamutu sácheana eta náimahaqueneana nasamaqueneanapahi arairuqueneana.

²² Tacahe, ema Pablo titupihapa te namirahu te nayehe cabildo. Máichavacapa:

—Tátanaveana, eti ecavasana te juca Atenas. Nímararacahehi eta yátupirahi religióshe.

²³ Taicha te nítecapanapa núti eta ani eyehe, nupaicahi tamutu eta eyujarasirareana. Nímahapa eta eyehe altar tatiarihahi eta ajureca ani tacahehi: “Ema Viya vimaimatiquene”. Tiuri, ema maca Viya eyujaraureasa emáimatiquenehi éti, émara ema Viya néchajisihaquenehi núti.

²⁴ Émara tépiyacahi eta apaquehe, étapa eta vímahaqueneanahi távapahianahi eta juca apaquehe. Émara téchahi ticavanairipihahi te anuquehe étapa te juca apaquehe. Ema Viya vahí tácarichuimahi máucupaisihaya eta te vépiyaruanaahi templo, taicha vahí mácamunu eta mapenainachuhini eta te juca apaquehe.

²⁵ Váhivare mácamunu víjaracasichahini eta viámavahu viti achaneana. Vítira vicamunuvahi eta mayehe. Éma, téchapajiricahavihi vimutu. Tíjaracahavihi eta táurivahi eta vítaresira.

²⁶ Acane te tépanavainapa tamutu, ema Viya máepiyacapa ema máinapuiru achane ticajare Adán. Vimutu viti achaneana, mámariequenehavi ema Adán. Apánapanenéjihavhiséra maicha ema Viya. Tamutu eta apaquehe viávapaicahi máicha. Máimicutiarachapahisera eta táenasihayarepahi eta viávasanapachuyarehi. Énerichuvare, máimicutiarachahivare eta táichecuiarayare eta vítaresirana.

²⁷ Vitiarihisera viti achaneana vémitisicaipa ema Viya. Émasera mavarahahi vitanucayare. Váhinéni máyerehihávihini. Titsecavahi éma te vichacaya. Mácani mavaraha matanuca, máichimavávanevarehi.

²⁸ Taicha vítarecachi máicha, tímipaicahavihi, achanehavihi máicha. Émaripa éma ichapequene escribáno te emuri éti macahehi eta máechajiruvahi: “Viti achaneana cáitarecavahi ema Viya”.

²⁹ Vítí vímatihahi eta máchanechirahavihi ema Viya, macaitaresirahavihi. Viyamuricahi vipaicahi máicha. Tacahe, véjecapiravahi viti te vímijachapuca virataha viáchanecha eta

visiñaraji. Vímviasichahinini eta jácani, váhisera tasamarahihini, váhivare tapaicahini, váhivare tayamuricahipucaini. Tayanapanepuca táurina te vépiyaca eta óropuca, plátapuca, chínapuca. Váhivare váratahaimahi nacasiñacarehini vícha.

³⁰ Te vicasiñarajhipuca eta vépiyaruana, vimáimatirarichaha. Ánaquiaparípa eta macamichirahi ema Viya ena achaneana eta nacasiñairahi eta nasiñarajiana. Puitísera vaipa macamicha eta juca. Tivanecahavipa vimutu viti achaneana vínajica eta juca, tátupiruvapa eta véneuchiravaina eta mayehe.

³¹ Taicha tatiarihiyarehi eta jena sácheyare máicuñacayare namutu ena tíchanahi eta juca. Tamutuinapa máetupiricayare. Mararihi ema achane manerejiruhi ema Viya, juéseyare eta viyehe. Éma, ticaijare Jesús. Ema Viya máimerecahi eta manerejisirahi ema Jesús juéseyarehi, taicha macaechepucahi te máecari te táequenepa eta máepenirahi —macahepa ema Pablo.

³² Te nasamapa eta máechajisihairahi eta máechepusirahi te máecari ema Jesús, natiarihi ena nacaecahiríchucha. Énaserá ena apamuriana napanerequenehapa. Tacahe, náichapa: —Téhenarinevare apahena péchajisihavare eta juca, apaesa visamavi —náichapa.

³³ Tacahe, tiúchucapa ema Pablo eta te náurujisirareva. Tiyanapa.

³⁴ Natiarihisera ena apamuriana nasuapahi náehicapa eta mametarapi ema Pablo. Mاتيarihihi ema Dionisio táiyaraha eta nayehe cabildo, ésupa esu ésuna esena ticaijaru Dámaris. Natiarihivare ena apamurianahi.

18

Éma Pablo tiyanapa te avasare Corinto

¹ Te táequenepa eta juca, tiyanapa ema Pablo. Tiúchucapa eta avasare Atenas. Ticaijuhe eta apana avasare ticaijare Corinto.

² Ánaqui macainunapa ema émana israelíta ticaijarehi Aquila, ésupa esu mayena ticaijaru Priscila. Ema maca Aquila máachusinehi te tinapaica eta departamento Ponto. Tayerevahisera eta áñoana, tiyananapa tayehe eta avasare Roma. Macáemataneínehi ánipihi. Émasera ema aquenucaini Emperador Claudio macavanairipipa náuchuca namutu ena israelítana eta te Roma. Tacahe, tiyanapa ema Aquila tayehe eta avasare Corinto, étapa macainunainehi ema Pablo.

³ Énapa mávayechavacahi ema Pablo. Ena nani ticiticacananahi eta námatanerepiana tálabarteroana. Tímicatacacana eta nacaematanerahi.

⁴ Tiuri, tamutu sávaruana ema Pablo tiyanahi tayehe eta náurujisirareva. Maconsejachavacahi ena achaneana. Macajimuyacahi eta nasamureana ena israelítana énapa ena apavasanana.

⁵ Tacahe, napaenumavapa nacapayaca ema Silas émapa ema Timoteo, tíasihanahi te Macedonia. Eta natiarihirahi éna, tépanavapa ema Pablo ticametarairu tamutu sácheana eta máechajiriruva ema Viya. Mavarahapa macajimuyacavacaya ena israelítana ema Jesús émairahi Cristo ema nacuchapaquenehi.

⁶ Natiarihisera ena apamuriana masuapajirairahanahi. Nacatianacapa ema Pablo, napanararachavare. Tásiha, tétatajiacavapa ema Pablo eta máepacuhasa, táicutiarahi eta namáimitucacarevahi ena nani. Majunjicayarepa. Tásiha, máichavacapa:

—Étipa ecatapiravayare vaipa iúchucuhaimahi tayehe eta ecuñaraqí te apana vítaresira taicha eta emajacapirahi eta máechajiriruva ema Viya. Vaipa necha nútí. Puiti juca nuyarinapa, nímiturecaya nayehe ena apavasanana —máichavacapa.

⁷ Tacahe, tiúchucapa tayehe eta náurujisirarevahi. Tiyanapa te mapena ema apana machamurihi ticaijare Justo. Ánaquipa eta máimituresihahi. Ema maca Justo, vahi israelítana, mapicauchahisera ema Viya. Eta mapenahi te tachacaya eta náurujisirareva ena israelítana.

⁸ Mاتيarihi ema apana achane ticaijare Crispo, tuparairucahi tayehe eta náurujisirarevahi. Masuapahi éma, ésupa esu mayena, ena machichanaveana, énapa ena apamuriana tíavihanahi te mapena. Camurianavare ena tisuapanahi ticavasanahi tayehe eta avasare Corinto eta nasamirahi eta máechajiriruva ema Viya. Namutu ticaicachasianahi.

⁹ Tacahe, étana yati, ema Viáquenu Jesús máechajicapa ema Pablo, ánipa maicha:

—Vahi picupica. Pímiyanavachucha picametarairu te juca avasare,

¹⁰ taicha camuriana ena nuchaneranaya. Nútí nutiarihiya te pichacaya. Tájina náicharacavimahi ena piánarana —macahepa ema Jesús.

¹¹ Tacahe, ema Pablo manasipa. Étana año y medio macahehi tayehe eta avasare Corinto. Timiturecahi nayehe ena achaneana eta máechajiriruva ema Viya.

¹² Étasera jena sácheana matupihairahi ema Prefecto ticaijare Galión. Aquenucahi éma tayehe eta avasare Corinto tayehehi capital eta departamento Acaya. Tiuri, ticuruji-cacanapa ena nacanarayarepa ema Pablo. Nacaratacapa námapa te mamirahu ema aquenuca, nametauchayarehi.

¹³ Tacahe, náichapa ema aquenuca:

—Ema maca achane macontracha eta viyeherepi. Ema máimitucavaca ena vijaneanana, náitsivachayare eta véjirairaya ema Viya —náichapa.

¹⁴ Téchajichavayarepaini ema Pablo, émasera ema Galión macachuricapa. Máichapa ena israelítana:

—Tiuri, esamanuchaha éti. Te tíñehihipuca eta máejecapiravahi ema maca, ticaparecapipuca, nútí apana nímisiapavahini juésenuinahini eta eyehe eta nusamirahénahini.

¹⁵ Étasera echájirirucavánachucha te máijare ema mácani apana, étapa eta eyeherepiana éti. Tájina táíñehicaréna eta juca. Vahi nímisiapavaimahi nútí, juésenuinahini tayehe eta juca. Ímahainepa éti —máichapa.

¹⁶ Tacahe, máevatacavacapa náuchuca te mamirahu.

¹⁷ Tacahe, namutu ena apavasana griégoana nacaratacapa ema Sóstenes, nacapitarahi ena israelítana. Náestacapa te mamirahu ema Prefecto Galión. Émasera váhiquene máimisipavahini. Váhivare macatiuchahini. Ema Pablo tichavapa tayehe eta Antioquía

¹⁸⁻¹⁹ Tiyerehichaha eta jena sácheana manasirarichaha ema Pablo. Te ticaicutiaravapa, mavarahapa tiyanaya eta te Jerusalén, tétavajisirayarepahi eta te avasare Efeso, étapa te avasare Tiro, táunavahi eta Siria. Tásiha, ticametavapa nayehe ena machamuriana. Macachanevacapaipa ema Aquila ésupa esu mayena Priscila. Tiyanapa tipaicana eta te puerto ticaijare Cencrea. Te tíanuecanayarepa, ema Pablo ticachusinumapa tíhahisinumapa eta machuti, máitachirayarehi eta mayehe promesa. Te títecanapa te avasare Efeso, nanasihayarehi ema Aquila ésupa esu Priscila. Te jena sache sávaru, tiyanapa ema Pablo tayehe eta náurujisirareva ena israelítana. Téchajiricavaipa nayehe, máimitusiravacahi éna.

²⁰ Tacahe, éna navarahapa náiminasicha, émasera vahi máisapavahini.

²¹ Téhesera te ticametavapa nayehe, máichapa:

—Nuyanayare tayehe eta Jerusalén. Ánaqui nunarasihayare eta jena sácheana piéstairayare. Nuchavayaresera nímahapanaheyare éti, te mavaraha ema Viya tacuíjaichu níchava —máichavacapa.

Tacahe, tíavacuhavarepa. Majunijicapa eta Efeso.

²² Te títecapapa ema Pablo tayehe eta avasare Cesarea, tíanucuhapa tayehe eta Jerusalén. Máechajipánavacapa ena machamuriana. Te táequenepa, tiyanapa te avasare Antioquía.

²³ Tiyerehi eta cájeana manasiranumahi tayehe eta avasare Antioquía. Tacahe, tíápechavavare tipaica. Máejiravacapahi ena machamuriana te jácani návihavacapahi tayehe eta avasarechichana te Galacia étapa eta Frigia. Maconsejachavacapahi ena machamuriana. Matiaríhi ema Apolo te Efeso

²⁴ Te jena sácheanahi, títecapahi te avasare Efeso ema émana israelíta ticaijare Apolo. Éma máuchurehi te avasare Alejandría. Máituca ticametairairu éma. Máimativare yátupi tamutu eta Sagrada Escritura ticaijare Antiguo Testamento.

²⁵⁻²⁶ Mavapinahí éma tamutu, étaripa eta máechajisirana. Ema Apolo máitucahi eta máimiturapiana ema Juan Tícachasiricarahi eta máitecapirayare ema Cristo ema nacuchapaquenehi. Máechahi eta máicachasisírahí ema Juan ema Jesús, ema yátupiquenehi Cristo. Váhísera tamutuhini maecha eta máíchavaquenevahi ema Jesús. Tamutu sávaruana, tiyanapa tayehe eta náurujisirareva ena israelítana. Ticametairirupa, vahi mapicacaracavahini. Ánipa macahe:

—¡Títecapaipa ema Cristo ema vicuchapaquenehi! Ema ticaijare puiti Jesús. Vétupiricavaya vimutu eta viyaniraya te Jerusalén. Ema véhicaya taicha ema viáquenuya —macahepa.

Étasera te nasamapa ema Aquila ésupa esu Priscila, námapa éma te napena. Tásiha, náimitucapa tamutu eta apamuriana téchacareana mayehe ema Jesús.

²⁷ Manasipanapa ema Apolo te jena cájeana. Tacahe, mavarahapa tiyanayare te tinapaica eta departamento Acaya. Tásiha, ena machamuriana náimicatacapa. Ticajureanapa eta carta nayehe ena machamurianahi tayehe eta avasareana macaijuheyarehi apesa táuri eta najacapiraina. Te títecapapa éma tayehe eta Acaya, ichape eta máimicatasiravaca ena machamuriana taicha ema Viya májjaracahi eta máitupajijiasiravahi.

²⁸ Máimitucahivare ena israelítana eta te náurujisiravana. Máiminecapáequenehávacahi tayehe eta Sagrada Escritura ema Jesús émahí ema Cristo ema nacuchapaquenehi.

19

Títecapapa ema Pablo te avasare Efeso

¹ Tiuri, manasipa ema Apolo eta te avasare Corinto. Te jena sácheana, ema Pablo tiúchucahi eta avasareana táunavanahi eta Frigia. Eta mayanihapahi te achene te márijuecuana. Tacahe, títecapapa tayehe eta avasare Efeso. Te jena avasare, natiarihihi ena apamuriana tisuapajirahianahi. Máimatívacaipa éna.

² Tacahe, mayaserecavaca:

—¿Mávaháruhépa ema Espíritu Santo te ecáijuhéinapa ema Viya? —máichavacapa.

Tásiha, éna najicapapa:

—Váhira visamairirica eta matiaririrahi ema Espíritu Santo.

³ Mápechavare ema Pablo mayaserecavaca:

—¿Tájahasica tacayemahi eta ecaicachasirahi éti? —máichavacapa.

Éna najicapapa:

—Eta vicaicachasirahi véhicahi eta máimiturapianahi ema Juan Tíchasiricarahi —náichapa.

⁴ Ema Pablo mametacavacapa:

—Tiuri, yátupi ema Juan máicachasicavacahi ena achaneana eta náitsivachiraya eta náitaresirana. Énerichuvare, mametacavacahi eta nasuapirayare ema achane téhiequenehapahi éma. Puiti numetacahe: Ema maca téhiequenehapahi ema Juan ticaijare Jesús. Émaqueneripahi ema Cristo —máichavacapa.

⁵ Tacahe, te nasamapa eta juca, navarahapa ticaicachasiana te máijare ema Viáquenu Jesucristo. Tacahe, ema Pablo máicachasicavacapa.

⁶ Tacahe, manacapa eta mavahu te nápusiana. Tásiha, tiúcupaicapa ema Espíritu Santo, mávahácavacapa. Témunahiricavanapa apáechajiriruvána. Ticametarairuanapa eta máechajiriruva ema Viya.

⁷ Eta nasimutuvahi ena nani, dóceanahi ena ajairana.

⁸ Tamutuhi sávaruana tiyana ema Pablo te náurujisirareva ena israelítana. Mapana caje ticametarairu nayehe ena achaneana. Vahi mapicacaracavahini eta macametarairuirahi. Macajimuyacavacahi ena achaneana, náehisiráina ema Jesús, náimatiraina eta émairahi Cristo, ema nacuchapaquenehi.

⁹ Natiarihisera ena apamuriana murácasamuréanarichucha. Váhivare návarahahini náehicahini ema Jesús. Te jácani náurujisiravana, nacaecahirichucha eta arairu máimiturapihi ema Jesús. Tacahe, ema Pablo térajicavapa eta nayehe. Máiputsimurihapa ena tisuapajirahianahi, mámamurihapa tayehe eta colegio máimituresirarehi ema ticaijare Tirano. Tacahe, ema Pablo tímiyanavapa tímitureca tamutu sácheana nayehe ena machamuriana.

¹⁰ Apina año eta máimituresirahi. Tacahe, ena máimitureanahi tiyananapa tipaicana. Ticametarairuanapaipa eta máechajiriruva ema Viya nayehe ena achaneana ticavasanahi eta te avasarechichana táunavanahi eta avasare Efeso, tayehehi capital eta departamento Asia. Tásiha, nasamairiricapa namutu ena achaneana: ena israelítana énapa ena apavasanana.

¹¹ Ema Viya máimicatacahi ichape ema Pablo eta máichirayare eta tiáramicareana.

¹² Ichapemuriana ena achaneana macanararuanapahi tayehe eta páñoana, camisapuca macaratajiruanapahi. Máijaracavare nacaitecapaya nayehe ena nacajumaqueneana, tásiha tacanaracapaipa. Énerichuvare táquijicapahi ena éreana.

¹³⁻¹⁴ Te jena avasare, natiarihihi ena siéteana israelítana ticaparapejiricacana, machichanaveanahi ema ticaijarehi Esceva, náiyarahaini ena tiyujaracarahiana te Jerusalén. Tacahe, ena nani siétequeneana napaiririruanahi. Náitucahi naveha eta itiriji. Éna, eta navehairahi eta itiriji, navarahapa éna apanava napiaracayare eta máijare ema Jesús. (Váhiserá náehicahini eta máimiturapiana.) Matiarihivare ema achane macajumaquenehi maicha ema éreana. Tacahe, te napauchapa ema macajumaquenehi, náichapa:

—Piti éreana, vivanecavi te máijare ema Jesús máechajisihaquenepahi ema Pablo. Piúchuca te máquehe ema maca macajumaquene —náichapa.

¹⁵ Tásiha, ema éreana majicapapa:

—Nímati ema Jesús, émapa ema Pablo. Étiserá vahi nímatihe. ¿Nájahahepuca? ¿Ásajipucaini nusuapahehini! —máichapa.

¹⁶ Tacahe, ema achane mávaháruhi ema éreana majunauchavacapa éna. Máehavacapa máquipapaicavacapa namutu ena siétequeneana. Tiyananapa tijunana, najunijicapa eta mapena ema macajumaquene. Mamuiriareanapaipa, ticajaranapaipa.

¹⁷ Tásiha, téchacarehi eta juca nayehe namutu ena ticavasanahi tayehe eta avasare Efeso, énaripa ena israelítana. Te nasamairiricapa, tipicanarinehi. Tásiha, nacahepa:

—Tétavicavapa tamutuiara tarataha eta máijare ema Jesús, náquenu ena nani —nacahepa.

¹⁸ Tacahe, ena téhicanapaipa ema Jesús, te náurujisiravana te tiyujaracana, timetaurecanapaipa tamutu eta náejecapiravana eta náitaresirahi.

¹⁹ Natiarihi ena apamuriana ticaratacanahi eta iápmarecare. Námavacapaipa eta náitucaqueaneanaini nasiñarajianainihi, nayehepuca libro. Nájuquechavacapaipa te namirahu ena nachamuriana. Vaipa nacatiequenehapahini. Natupaequenehapasera eta tavachanahi te navacharecainapa tacapayacahi eta \$b250,000.

²⁰ Tacahe, ichape eta nasuapira ena achaneana eta máechajiriruva ema Viya. Camurianaapaipa ena téhicanapahi.

²¹ Te táequenepa eta juca, ema Pablo macahepa:

—Nuvarahapa néjirapanaya ena vichamuriana ticavasana te Macedonia énapa ena apamuriana ticavasana te Acaya. Tásiha, nánuhayare te Jerusalén. Te tamutupa eta juca, nuyaninavarepa te Roma —macahepa.

²² Tacahe, máevatacavacapa nánapuca ena apinana machamuriana ema Timoteo émapa ema Erasto. Tiyananapa tayehe eta Macedonia. Émasera manasipanarichaha tayehe eta Efeso.

Tisemamurianapa ena achaneana te avasare Efeso

²³ Tacahe, te jena sácheanahi, tisemamurianapa ena apamuriana achaneana taicha camurianapaipa ena téhicanapahi ema Viáquenu Jesús. Áni tacahehi eta nasemirahi.

²⁴ Matiaríhihi ema achane ticaijare Demetrio. Ema maca achane, máepiyacahi eta suyehe trónochicha esu nasiñaraji ticaijaru Diana. Ticutihí eta péticichicha eta táimahi eta templo suávihahi ésu. Amairihahi plata. Tiúrihi eta maganaresira éma, énapa ena apamuriana plateroana macutiéqueneanahi.

²⁵ Tacahe, macurujicapa ena apamuriana plateroana. Tásiha, máichavacapa:

—Tátanaveana, éti ímatihí eta juca vématanerepíhi, tiúrihi eta viganaresira.

²⁶ Ímaharichuhi puiti éti, esamahivare ema maca Pablo macahehi eta máechajiruvahi ena nani visiñarajiana vépiyaruana viti achaneana váhiji yátupinahini vénainahini. Ichape-murianaripa ena tisuapanahi, taicha nasamarípa eta máimiturapiana namutuyareni ena achaneana ticavasanahi te juca viávasa Efeso, énerichuhivare ena ticavasanahi eta te avasarechichana táunavana eta Asia.

²⁷ Ticauyayacarehi eta juca. Táemitiequenehahini eta juca táurivahi eta viganaresira. Étaripa eta templo suávihahi esu súrinaquene visiñaraji Diana témitiequeneñapapuca, nacuijapapuca nacuechahi. Náemitiscáinapapúca eta táurivainihi eta náejirairahi namutu ena achaneana te juca apaquehe —máichavacapa.

²⁸ Tacahe, eta nasamirahi ena apamuriana, tisemanarinehi, tipiaracanapa. Ánipa nacahe:

—¡Viva esu Diana visiñaraji viti efesioana! —nacahepa.

²⁹ Tacahe, tisemamurianapa ena apamuriana achaneana. Apanapa eta napanerecha. Tiuri, natiarihihi ema Gayo émapa ema Aristarco, macompañeroana ema Pablo náuchureanahi eta te avasare Macedonia. Tacahe, ena achaneana nacaratacapa ena nani apinana. Námapa tayehe eta náurujisiráreva.

³⁰ Émapa ema Pablo mavarahapa masiápamuriháyarehíni máechajicavacayarehi, énasera ena machamuriana vahi náisapahini.

³¹ Natiaríhivare ena apamuriana, tuparairucanahi tayehe eta departamento Asia, mayeaneanahi amigo ema Pablo. Nacametarapipa vahi macuímisiápava.

³² Tacahe, eta náurujisirávahi tijajamuríhanahi. Ema émana tipiaracahi, apanahi eta macayema. Ema apana, énerichuvare tipiaracahivare apanahivare eta macayema. Namutuyareni ena achaneana apápipíjivácachucha eta nacayemaqueneana. Vahi náimatiequenehahini tájahapuca tacayemahi eta náurujisirávahi.

³³ Tacahe, ena apamuriana israelítana náichuhapa ema Alejandro. Nametacapa eta táicharacávahi eta náurujisirávahi. Tacahe, navanecapa téchajica, maconsejachavacayarehi ena achaneana. Tásiha, ema titupihapa te namirahu. Máimicutiarachapa te mavahu namatinachaha.

³⁴ Tásiha, náimativanepa ema émarichuhi israelítahi. Tépanavanavarepa tipiaracana. Apina hora nacahe eta napiarareresirahi:

—¡Viva esu Diana visiñaraji viti efesioana! —nacahepa.

³⁵ Tacahe, títecapanecha ema tayehehi alcalde eta avasare. Macamatinacavacapa. Tásiha, téchajicapa. Ánipa macahe:

—Tátanaveana, mémenaveana. Emutu eti tachichanaveana eta juca viávasa Efeso. Nájina émanána achane vahi macuechahini eta véchapajirisira vimutu eta templo suávihahi esu súrinaquene visiñaraji Diana, esu sucapicahuquenehi taicha eta juca mari suáquehehi ánaquiaparipa eta táemirisirahi te anuma.

³⁶ Nájina tépuruina eta juca. Ésamiricavachucha. Vahi ecuijajahuchava. Epanerechinava te tiúriyarepuca.

³⁷ Taicha ena nani ajairana iámaqueneanapahi, tájina natapiravainahini. Vahi nacaecahi esu visiñaraji, váhivare námeyecha ésu eta suyereruvana.

³⁸ Tiuri puiti, ema Demetrio, énapa ena machamuriana, te navarahapuca timetaurecana, nararihi ena juéseana. Nacaunehi nácani timetaurecanaya. Táuchusihayare eta natapiravana.

³⁹ Téheserapuca apana jácani evarahaquene, ticaechacasiyarehi te reunión tásihaquene-yarehi viyehe viti tupairucana.

⁴⁰ Tíñehicare eta juca íchaquenehi. Námijachaipa ena achaneana víchahi eta revolución puiti jena sache. Tijuricati natiarihi tiyaserecahávianaya eta táicharacavahi eta juca. Tájina viviyavaimahi —macahepa ema alcalde.

⁴¹ Te tamutupa eta máechajisirahi, mavanecapa téjanerecana ena achaneana. Títavapa eta náurujisirávahi. Tacahe, téjanerecana ena achaneana, tamutupa eta nasemirahi.

20

Tiyanavare ema Pablo te departamento Macedonia étapa te Acaya

¹ Tacahe, te táequenepa eta jácani sácheana, ema Pablo máichuhavacapa ena machamuriana, maconsejachavacapa. Tásiha, ticametavapa nayehe. Tiyanapa tiánuca macaijuhepa eta te departamento Macedonia.

² Máejiravacapaipa namutu ena machamuriana ticavasanapahi te avasarechichana. Máetumechavácaphi éna eta maconsejachiravacaphi, máitecapirapa tayehe eta avasare Corinto, táunavahi eta departamento Grecia (ticaijarehivare Acaya).

³ Ánaqui manasipanapa tayehe, mapana caje eta mávihairahi. Tásiha, mapanerechaipa tiávachuhaya te pacure eta mánesirayare macaijuheraya eta te Siria. Étasera te máechapa eta navairairahi nacapaca ena israelítana mánarana, téquecavapa eta mapanereru. Tiyanapa tipaica tichavapa tayehe eta Macedonia eta mávacuíyayarehi.

⁴ Eta machavirapa, náehicapa ena machamuriana ema ticaijare Sopater ticavasahi te Berea, ema Aristarco émapa ema Segundo ticavasanahi te Tesalónica, ema Gayo ticavasahi te Derbe. Máehicavare ema Timoteo. Natiarihivare ema Tíquico émapa ema Trófimo ticavasanahi te tinapaica eta Asia.

⁵ Tacahe, tétecanapana te Filipos, návihahi núti. Tacahe, ena siétequeneana vichamuriana tinapucanapa tiyanana tiánuceanapa, nacaijuhepa eta apana puerto ticaijare Troas. Ánaquiapa nacuchapihahavihi.

⁶ Tásiha víti, te táequenepa eta Pascua vinisirahi eta pan mayehere levadura, vipaenu-mavapa viúchuca tayehe eta Filipos. Viávachuhapa viyanapa. Cinco sache eta viánuesira. Vicápayamuríhapa te Troas. Vinasipanapa tayehe, siete sache vicahe.

Máejirapa ema Pablo ena machamuriana ticavasanahi te Troas

⁷ Te jena tinapuca sáche tayehe eta semana, tiúrujicavanapa ena vichamuriana. Viyuvecuayare, vinicayare eta pan táicutiarahi eta máepenirahi ema Viáquenu Jesucristo. Tacahe, ema Pablo maconsejachavacapa jena yati, taicha tiúchucayarehi te jena yáticarahi. Tiúnahi eta máechajisirávacahi. Te énumuhupa yati tímiyanavaríchaha téchajica.

⁸ Eta viúrujisirávahi te anuquehe peti te mapanaquene piso. Tatiarihíhi camuri eta namicahuana.

⁹ Matiaríhíhi ema émana amaperu ticaijare Eutico. Téjacahi éma eta te ventana. Tacahe, eta táunavahi eta máechajisirahi ema Pablo, ema amaperu téyucapahi. Eta máimasirahi, tiáquiavacapa te anuquehe ventana. Tacahe éna, tiúcupaicavaneánapa nacáechepupánayarehi. Éma tépenaripahi.

¹⁰ Tacahe, ema Pablo tiúcupaicapa, mapauchapa ema amaperu. Mayuratanauchapa majupahacapa. Tacahe, máichapa ena machamuriana:

—Vahi ecueñamava. Tichavayare títareca —máichapa.

Jéhesaréinehi, tichavapa títareca ema amaperu.

¹¹ Tacahe, tichavanavare tiápanana te náurujisirávahi. Tacahe, tinicanapa. Tásiha, ema Pablo tijárahíacarichaha eta máechajisirávacahi. Te títapiricapa, tiyanapa.

¹² Tacahe, te téjanerecana, námapa ema amaperu máitareruhi. Ichape eta náurisamurevaphi.

Tiúchucanapa tayehe eta Troas, nacaijuhepa te Mileto

¹³ Viti viávacuharipa, viyanapa vicainapucavahi tayehe eta apanavare puerto Asón eta mávacuiyayarehi ema Pablo, taicha ichape eta táepiñu. Émasera ema Pablo tipaicayarehi timitupiruchavapa.

¹⁴ Te vítecapapa te Asón, tiávacuhapa éma. Tacahe, viyanapa vicaijuhehi eta apanavare puerto Mitilene.

¹⁵ Te apanapa sache viúchucavarepa tayehe, viánucuhapa te tachacaya eta tiúrupuhi ticaijarehi Quío. Te apanavarepa sache, vítecapapa te apanavare tiúrupuhi ticaijarehi Samos. Víchecapa tayehe, vinaracanumapa eta te puerto ticaijarehi Trogilio. Te apanapa sache viyanavarepa, vítecapapa te puerto ticaijarehi Mileto.

¹⁶ Vaípa vétavajicahini te Efeso, taicha ema Pablo vaipa mávarahahini váyereréjipahini eta vipaisirapahi te táunavahi te Asia. Taicha mavarahahi títecapavaneyare te Jerusalén, eta máimaiyayarehi eta napiestara ticaijare Pentecostés. Étapa tiámahaviyare te viratavaya-repuca.

Eta maconsejachira ema Pablo nayehe ena náiyarahana pastoreana ticavasana te Efeso

¹⁷ Etasera eta viávihairahi te Mileto, ema Pablo máimichuhavacapa ena náiyarahana pastoreana tayehe eta avasare te Efeso.

¹⁸ Te títecapanapa éna, majacapavacapa. Tásiha, tépanavapa máechajiricavaca, máichavaca: —Éti ímatinuhi táichararacavahi eta nítaresirahi eta jena sácheana te nítecapauchahénapa. Tájiina níchahini nútí eta nuyehéchiravana.

¹⁹ Tájinavare vahi népiyacavahini aguenucanuinahini eta eyehe. Nucaemataneacahi ema Viáquenu. Vahi nusemairahi tayehe tamutu eta níchavaquenévanahi naicha ena nujaneanana israelítana, navarairahi títaequenehanuana. Tasapiha ticaiyacanú naicha eta namásuapajiráivana.

²⁰ Tamutu numetacahehi eta táuriqueneana tiúrichaheyare éti apanava. Nímitucahehi te jácáni viúrujisirávana étape epenana.

²¹ Nuconsejachahivare namutu ena achaneana, eta náeneuchiravaina me Viya, eta náitsivachiraina eta náitaresirana, étape eta nasuapiraina nacasiñairaina ema Viáquenu Jesucristo.

²² Puítisera nuyaninapa te Jerusalén. Taicha nuvanecasivahi mayehe ema Espíritu Santo. Vahi necha nútí tájahapuca nícharacavaya eta ánaqui.

²³ Tacarichu necha eta mametasiranuana ema Espíritu Santo. Tamutu eta avasareana nupaisihanapahi, timetacanupahi éma eta nucatajivairaya, napresuchiranuya te cárcel te Jerusalén.

²⁴ Tájinasera vahi nupicacava. Tayanapanéine népenapuca, vahi néñama eta nítaresira. Nuvaraha nímiyanavaya eta núrivahi mayehe ema Viya. Nuvapinavahi eta nítauchiraya eta nutuparacasivahi mayehe ema Viáquenu Jesucristo. Taicha éma tituparacanuhi nucameta-rairuya eta máemunasirahavihi ema Viya vimutu viti achaneana.

²⁵ Numetacahe: Puiti juca nuyaniraya, vaipa íápechavaimahi ímahanu. Eti ínapureanahi nímitureanahi emutu éti te íávasanapachuhi. Nímitucahehi tamutu eta véhisiraya ema Viáquenu Jesucristo.

²⁶ Eta tacahe, numetacahe puiti: Vaipa nútiparacáina te natiarihinapuca téjecapavanaya te etaracu éti.

²⁷ Tamutuhi numetacahe eta mavarahaqueneana ema Viya. Tájiina vahi nuyumurupicahini.

²⁸ Tiuri puiti, ejaneacavayare éti, énerichuvare ejaneacayare ena iúmuvirana taicha etuparahaípa mayehe ema Espíritu Santo eta ejaneasirayare ena manerejiruanahi ema Viáquenu, énavenehi tépenahi éma, máepusaicahi eta máitine.

²⁹ Ecaunevaicha muraca, taicha puiti juca nujunijisiraheya, tijuricati títecanaya ena navarahaya témejecapávachahéanaya. Navarahaya táicanerecaheanaya tacutiyaere eta chuye tinarahi te tacajanereca eta varayua.

³⁰ Énaparichu ena vichamuriana te etaracu, natiarihiyare ena tímiturecanaya nahapapicayare témejecapávachanaya ena nácani apamuriana vichamuriana, navarairainahi éhicayare eta napanereruana.

³¹ Tásiha, ecaunevaicha yátupina. Échavayare eta mapanaquene año eta nutiarihirahi eyehe. Tamutuhi sácheana, yátiana nuconsejachahehi, émanapachuhi numetaca. Niyahasamurehi taicha eta nímairahehi.

³² Puítisera, nuparapenaveana, nuyanainapa. Nuyáseuchahéyareséra me Viya eta majaneasiraheya. Ecaravahuirainapa yátupina eta máechajiriruvana ema Viya. Túmehe-yarepaipa táicha. Ema Viya mavarahahi ímijuruchayare eta juca máechajiriruva; taicha

mavara ha tjaracaheya eta ícuchianahi te anuma eta íávihayare, ecachaneraya ena apamuriana masántuchaqueneánarípa.

³³ Eta návihairahi eyehe, vahi nujamurachahini eta emuirihana étaripa eta plata íjaracanhini.

³⁴ Ímararacanuhi éti eta táichararacavahi eta nucaematamera. Nucaematanehi tíásihanahi te nuvahuana, nuviyahi eta nucamunuqueneana, énapa ena tímicitacananuanihi.

³⁵ Tamutu nímítucahehi tacaheyare eta vicáematanéraya, vímicatasirayareva ena ticamunuvana, nacajumaqueneana. Véchavayare tativa eta máechajiriruvahi ema Viáquenu Jesucristo, ani macahehi: “Viúripanaya me Viya, te vicajirica eta vímahaqueneana nayehe ena apamuriana. Vahi vicujamuracha náíjaracasichahavi” macahepa.

³⁶ Te tamutupa eta juca maconsejachiravacahi ema Pablo, tépuyucanapa namutu. Tiyujaracapa mayaseuchavacapa me Viya.

³⁷ Tásiha, tíyahanapa namutu, najupacapa náetserarecapa ema Pablo.

³⁸ Tipanererecanaipa taicha eta mametasiravacahi váipa tíápechavanaimahi náimaha éma. Tásiha, tiyananapa nanapana eta te mávacuiyarehi.

21

Eta viyanirapa eta te Jerusalén

¹ Te vijunijicapa ena vichamuriana, viávacuhapa viyanapa vitupiruruchapaipa eta tíurupuhi ticaijare Cos. Te apanapa sache vicaijuhepa eta tíurupuhi ticaijare Rodas. Te apanavarepa sache viánucuhavarepa eta puerto ticaijare Pátara.

² Étapa vicainunainehi eta apana pacure tiyanayarehi tayehe eta apachara apanavare departamentu Siria. Tacahe, viávacuhapa tayehe, viyanapa.

³ Eta vipaisirapahi, viánucuhapa eta tíurupuhi Chipe tanapaicapahi te sapa eta viyehe. Vímiyanavachucha vipaica vítecapira te puerto ticaijarehi Tiro tayehe eta Siria. Taicha eta pacure véhirupahi tanaquicayarehi eta carga támaquenepahi tayehe eta puerto.

⁴ Étapa vicainunainehi ena apamuriana vichamuriana. Vinasipanapa nayehe, siete sache vicahe. Te juca, ema Espíritu Santo mametacavacahi ena vichamuriana eta máichavayare ema Pablo te Jerusalén. Tacahe, nametacapa ema Pablo eta vahi macuitecapa te Jerusalén.

⁵ Téhesera tíuchucayarepa eta pacure véhirupahi, viyanapa te puerto. Téhicahavianapa namutu ena vichamuriana, énapa ena nayenana énapa ena nachichanaveana. Tinapanahavianapa te pacure. Te vítecapa te playa, vépuyucapa vimutu, viyujaracapa.

⁶ Te tamutupa, vémamavauchavacapa vicametavapa eta nayehe, viávacuhapa. Tásiha, tichavanapa éna te napenana.

⁷ Eta viásihairahi te Tiro, vítecapa te Tolemaida. Étapa táenasihahi eta vipaisirahi te une. Viyanapa véchajicavacahi ena vichamuriana. Vinasipa étana sache eta nayehe.

⁸ Te apanaquenepa sache viyanapa vicaijuhepa eta avasare Cesarea. Te vítecapa, viyanapa te mapena ema Felipe ema ticametarairurahi, ema nasietenehi ena nanereji-ruanahi téchapajiricanahi eta nirureana nayeheana ena máimaruana. Vinasipa eta mayehe.

⁹ Ema Felipe, natiarihi ena cuátroana machichanaveana esenana, máimaruarichaha. Ena nani máíjaracahi ema Viya eta náitusirahi ticametarairuana.

¹⁰ Eta jena sácheana viávihairahi mayehe ema Felipe, títecapa ema émana profeta ticaijarehi Agabo. Éma tíásihahi te Judea.

¹¹ Títecapauchahavipa tímahapanahaviyarehi. Tacahe, mayasecapa eta máitijuhe ema Pablo. Tásiha, títiápechavapa, étapa eta mavahuana. Tásiha, macahepa:

—Ema Espíritu Santo ani macahehi eta máechajiriruvahi: “Ena vijaneanana te Jerusalén nacaratacayare ema ticayehe eta juca itijuere. Náitiacaya, náíjararecayareva nayehe ena apavasananá” —macahepa ema Agabo.

¹² Tacahe, vimutu viti, énapa ena ticavasanahi tayehe, viyasecapa ema Pablo eta vahi macuyana te Jerusalén.

¹³ Émasera ema Pablo máichahavipa:

—¿Tájaha tacayema ímipanererecanu eta juca íyáuchiranuhi? Vahi nupica te náitiacapunuca. Núti nájarcava népena te Jerusalén máichavenénahi ema Viáquenu Jesucristo — máichapa.

¹⁴ Te vímahapa vahi váratahahini víchejica, vísapapa tiyana. Vicahepa:

—Énenarinepuca tácahe, máimahavirinepa ema Viya —vicahepa.

¹⁵ Te tamutupa, vétupiricavapa. Viyanapa te Jerusalén.

¹⁶ Téhicahavianapa ena vichamuriana ticavasanahi te Cesarea. Téhicahavipahivare ema vichamuri ticaijare Nasón. Ánaquiripahi eta máehisirahi ema Jesús. Éma, máuchurehi eta te tíurupuhi Chipre. Tatiarihiserá eta mapena te Jerusalén, eta vítecapihayarehi.

Éma Pablo máejirapanapa ema Santiago

¹⁷ Te vítecapapa te Jerusalén, ena vichamuriana tiúrisamureanaríne eta najacapirahavihi.

¹⁸ Te apanapa sache ema Pablo tiámahavipa, viúrujicavayarehi te mapena ema Santiago. Vichimapapa natiarihípa namutu ena víyarahana pastoreana.

¹⁹ Tacahe, ema Pablo máechajicavacapa éna. Mametacavacapa tamutu eta máimicasirapahi ema Viya eta macametarairuirapahi nayehe ena apavasanana étapa eta máichirapahi eta tiáramicareana.

²⁰ Te nasamapa ena mametaruanahi, nacunacharinehi ema Viya. Tacahe, náichapa ema Pablo:

—Tétavacavapa táuriva eta juca pimetarapiana. Pímahapasera natiarihíhira ena camuri-queanea ena vijaneanana téhicanahi ema Jesús. Énaserá, muracaqueneana hi religió-soanahi, téhicanahi eta mayeherepini ema Moisés.

²¹ Puiti, jucarihi eta pépiyaequenehi eta pihápapicahíji eta pímitusiravacahi ena vijaneanana ticavasanahi te avasareana estranjeroana. Pímitucavacahíji eta váhiji nacusuapa eta mavanairipiana ema Moisés, váhivaréji nacumarcacha ena nachichanaveana ajairana, váhivaréji nacuehica eta viyeherepiana.

²² ¿Tájahapuca táicharacava eta juca? Tijuricati ena achaneana tiúrujicavanainapa, te nasamairiricapa eta pitarihírahí.

²³ Tiúripána eta juca píchayare. Nararihi te juca vitaracu ena cuátroana ajairana. Títáuchanapáipa eta nayehe promesa.

²⁴ Pisipahacavaya, piámamuriha éna eta pímeresiravaya tayehe eta Templo. Pivachachinaya eta uvesa navehaqueneana apaesa éna náisapava nacachucasi eta nachutimacana. Eta táicutiaryare eta váhi yátupinahi eta pépiyaequenehi, apaesa náimahavi eta pipicau-chirahi eta mavanairipiana ema Moisés.

²⁵ Énaserá ena vichamuriana apavasanana, vímiamarecaripa eta vicartane. Náecharipa eta vaipa étaparacáinahíni nayehe eta juca. Tacarichu váhi nacunica eta taeche eta sárare nayujareurehi te tamirahu eta nasiñarajiana, váhivare nacunica eta táitine eta sárareana, váhivare nacunica eta taeche eta sárare namaechatinure. Énerichuvare váhi nacuveha esu súcaini apana esena. Énaripa ena amaperuana, tacuija eta natuhusivaina —náichapa ena pastoreana.

Nacaratacapa ema Pablo eta te Templo

²⁶ Tacahe, ema Pablo tísapavapa. Te apanaquenepa sache, tisipahacavapa, énapa ena cuátroqueneana ajairana. Mámavacapa, tiyananapa te Templo. Nametapanayarehi ena téchapajicarahiana eta Templo, semanayareipahi eta nanaquisiravayare eta námavahuana.

²⁷ Tacahe, te náitachapa eta siete sache eta nasipahasiravahi, tichavanapa te Templo. Te jena sache, natiarihípvare ena apamuriana najaneanana tiásihanahi te tinapaica eta Asia. Eta mávihairarichaha ema Pablo te Templo, náimahapa éma. Tacahe, náimiyusemacapa namutu ena achaneana. Nacaratacapa ema Pablo.

²⁸ Tipiaracanapa:

—¡Tátanaveana israelítana! ¡Yare, ímicatachavi! Émara ema maca achane ema tipaichi tamutu avasareana. Tímiturecapahi nayehe ena achaneana eta macontrachirahi eta viávava. Énerichuvare macatianacahi eta mayeherepi ema Moisés, étapa eta juca viyehe Templo. Puiti macasiapavare te juca Templo ema apavasanatataji. Majararecapa eta juca tacapichahuquenehi —nacahepa.

²⁹ Ena nayunacahi eta juca, taicha náimahahi te calle ema Pablo macachanepahi ema Trófimo ticavasahi te Efeso. Náimijachahi mámahí ema Pablo te tajuhe eta Templo.

³⁰ Tacahe, tíjúnacaparajíanapáipa namutu ena achaneana te tajuhe eta avasare. Ena ticatianacanahi ema Pablo nacaratacapa éma, nachururupaicapaipa eta nacuchusirahi tayehe eta Templo. Tacahe, ena apamuriana náeratacavanepa eta tapajacura eta Templo.

³¹ Navarahapa nacapacavaneyarehini. Masámairiricavánepaséra ema comandante nayehe ena suntaruana, tatiarihírahí eta revolucíon te tajuhe eta avasare.

³² Tacahe, ema comandante máichuhapa ena masuntarurana énapa ena oficialeana. Tiyananapa tíjunapanapaipa. Ena achaneana, te náimahapa eta máitecapauchirahi ema comandante, náinajicapa eta náehairahi ema Pablo.

³³ Tacahe, ema comandante mapauchapa ema Pablo, macavanairipipa nacarataca, náitiacapa te apipi cadena. Tásiha, mayaserecapa te nájahhipuca, tájahapuca maviurevahi.

³⁴ Én asera ena achaneana tipiaracanarichucha, apapipijipa eta nacayema. Vaipa mácaicutiarahini ema comandante tájahapuca eta nacayemahi taicha eta najajasirahi. Tásiha, macavanairipipa náma te cuartel.

³⁵ Ticajerahisera eta nápanirapaipa te tayehe grada eta cuartel. Nanaracuhapa ema Pablo, taicha ena achaneana navarahaichucha nacapacavane.

³⁶ Taicha namutu náehicapahi tipiaracanapaipa:

— Máepenávanetataji — nacahepa.

³⁷ Te tisiapanayarepa te tajuhe te cuartel, ema Pablo máichapa ema comandante:

— ¿Písapanupuca néchajica?

Tacahe, ema comandante majicapapa:

— ¡Jéhepuca, píti pítuca péchajica te véchajiriruva griego!

³⁸ Tacahe, ¿váhiyara píatina ema ticavasa te Egipto, ema tíchahi eta revolución ticaeteharecahi cape juca viásinequenehi, ema majunaquenehi tíamamurihahi te mávapai ena cuatro mílqueneana ticapahiana? — máichapa.

³⁹ Tacahe, ema Pablo máichapa:

— Vahi nútina, tata. Nútirichu israelítanu. Eta núchusine te Tarso. Tavanaranu eta ichape avasare capital te Cilicia. Picatajicanusera písapanu néchajicaya nayehe ena achaneana — máichapa.

Téchajicapa ema Pablo te namirahu ena achaneana

⁴⁰ Tacahe, ema comandante máisapapa téchajica. Titupihapa ema Pablo te tayehe grada eta cuartel. Tacahe, macanuquechapa eta mavahu, macamatinaçapa ena achaneana. Te timatinanapa, tépanavapa téchajica eta náechajiriruva ena majaneanana, ániapa macahe:

22

¹ — Tátanaveana, nuparapenaveana. Esamanuchaha eta néchajisiraheya nucatiuchiravaya — macahepa.

² Tacahe, te nasamapa eta máechajisiravacahi te náechajiriruva, té samirimuriávanapa ticasamarahanapa. Tinahacavapa téchajica ema Pablo, máichavacapa:

³ — Nútirichu ejaneana, israelítanu. Eta núchusine te avasare Tarso tayehe capital eta Cilicia. Ánipasera nujurusinehi te juca viávasa Jerusalén. Ema tímitucanuhi ema víyacara Gamaliel. Nujuruchahi eta nupicauchirahi yátupi eta viyeherepi nájararuhavihi ena viáchucanaveanaini. Eta nítaresirahi, nímicapicáuchahi ema Viya, tacutihí puití eta ímicapicáuchirahi éti te juca sácheana.

⁴ Eta nítaresirahi, nucatianacavacainihi ena téhicanahi ema Jesús. Nupresuchavacahi nucasiapavacahi te cárcel ena ajairana énapa ena esenana. Nímicapacavacahi éna.

⁵ Timatinuanarichuhi namutu ena aguenucarahana émapa ema corregidor. Taicha éna tíjaracuanahi eta órdena nayeheya ena vijaneanana ticavasanahi te Damasco, náimicatasiranuyare eta nucaratasiraya ena téhicanahi ema Jesús. Tacahe, nuyanapa népanavacayarehini éna, ticaemecharahianayarehi.

Ena Pablo mametacavacapa eta máehisrahiva éma apanava ema Jesús

(Hch 9.1-19; 26.12-18)

⁶ Tacahe, eta nupaisirapahi te achene, nánehiripa eta avasare Damasco. Te jena las dócequenyárepa sache, tiáramicarepa eta tíjarahi tímícauchanuhi tísiha te anuma.

⁷ Náquipaicavapa te apaquehe. Nusamapa ema téchajicanuhi, máichanupa: “Saulo, Saulo, ¿tájaha tacayema picatiananacu pipánájiricanu?”

⁸ Tacahe, nuyaserecapa: “¿Nájahavi píti tata?” níchapa. Tásiha, tíjicapanupa: “Nutí Jesús Nazareno, nutí picatianaruchi, eta pipánájirisíravaca ena téhicanuanahi” máichanupa.

⁹ Énerichuware ena téhicanuanapahi náimahahi eta tíjarahi tímícauchanuhi. Tiáramecanarinehivare éna apanava. Váhisera nácaicutiarahini ema téchajicanuhi.

¹⁰ Tacahe, nujicapapa nútí: “¿Tájahasica níchayare, Tata?” Tásiha, ema Viya máichanupa: “Pécheputa, píyana pítecapa te avasare Damasco. Ánaqui mararihi ema timetacaviyare tamutu eta pématanerepiyare pítauchaquenyare nuyehe” máichanupa.

¹¹ Tásiha, píchuquinupa taicha eta tíjarahi. Tacahe, ena nucompañeroanapahi tíamanuanapa tichuracuananapaipa te nuvahu, nacaitecipiranupa te avasare Damasco.

¹² Eta ánaqui, matiarihíhi ema émana vijaneana ticaijare Ananías. Títaurahi éma tayehe eta mavanairipiana ema Moisés. Namutuhi ena vijaneanana ticavasanahi te Damasco nacunachahi éma.

¹³ Títecapa ema Ananías, tímahapananuhi. Te títecapauchanupa, máichanupa: “Nuparape Saulo, tachava eta pímairisira”. Tacahe, tíjahúchavapa nímaírrica. Nímahapa éma.

¹⁴ Tacahe, máichanupa éma: “Ema Viya nacasiñaquenehi ena viáchucanaveánaini, píti manerejiruvihí taicha mavarahahi tímimatichaviya eta mapanereru. Énerichuvare mavarahapa tímimatichavi éma máuriquene Cristo, émaquenehi téchajicavihí eta cape.

¹⁵ Péchajisihayare éma eta picametarairuirayare nayehe namutu ena achaneana picainu-naqueneanaya. Pimetacayare eta juca pímairahi étapa eta pisamirahi éma.

¹⁶ Tiuri púiti, enevane picaicachasiya te máijare éma Viáquenu Jesucristo. Picasiñava mayehe eta tacasipairaya eta pipецaturana” máichanupa éma Ananías.

Ema Pablo mametacavacapa eta macavanahirahi nayehe éna apavasanana

¹⁷ Tásiha, te nuchavapa ani te Jerusalén, nítecapa ani te juca Templo. Te nuyujaracaipa, tíapechanuvarepa téchajicanu éma Viya.

¹⁸ Eta nímairahi éma, máichanupa: “Piyayauchavayare eta piúchusiraya te juca Jerusalén, taicha vahí tisuapavianaimahi eta péchajisiháiranuya”.

¹⁹ Tacahe, núti níchapa: “Tiuri, Tata. Énaserá, tímatinuanahi eta néstarasiravacahi nupresuchiravacahi éna téhicavianahi. Tamutuhi te nárujisirarevana nutanusihavacapahi éna.

²⁰ Énerichuvare, te nacapacapa éma Esteban éma pivanarainihi, nutirihivare. Nímica-tacahivare éna ticapacanahi, nujaneasiravacahi eta namuirihana. Tijuricatipuca nasamararacanu eta numetasiravaca eta péchajisiranuhi” níchapa.

²¹ Émasera éma Viáquenu tipamicanuichucha: “Piyanyaresera. Núti nuvanecavi pipaica-yare nayehe éna apavasanana ticavasanahi te tayerehiqueneana” máichanupa.

²² Tacahe, éna achaneana, eta nasamirahi eta juca, vaipa návarahahini nasamararaca. Tisemanapaicha. Tipiaracanapa:

—Tiúripána máepenachucha éma maca achanetataji. Vaipa táuricahini máitarecarícha-hahini —nacahepa éna mánarana éma Pablo.

Ema comandante macasiapapa te tajuhe éma Pablo

²³ Muracanapana eta napiarasira. Tivejamuhiacavanapa eta nacamisana eta nase-maneva. Navehavare eta máteji. Náevajasicapa éma Pablo.

²⁴ Tacahe, éma comandante macavanairipipa nacasiapa éma Pablo te tajuhe eta cuartel. Macavanairipivare náestaca, mavarairahi máimicaecherachaya éma Pablo eta maviure-vahi, tájahapuca tacayemahi eta nasemirahi éna achaneana eta mayehe.

²⁵ Étasera te náitiacayarepa eta náestasirayarehi, téchajiuchavanumapa éma Pablo eta mayehe éma nacapitara éna suntaruana. Máichapa:

—Núti tavanaranuhi eta viávasa Roma. Picunevachucha, machu péjecapava eta péstasiranu, viúchaha táimaticarehini eta nutapiravapuca —máichapa.

²⁶ Te masamapa éma nacapitara eta juca, tiyanapa mametaca éma comandante. Máichapa:

—Péchapavachucha eta pivarairahi pémostareca éma maena achane. Taicha tavanaráji eta Roma —macahepa éma nacapitara.

²⁷ Tacahe, éma comandante tiyanapa mapauchahi éma Pablo. Máichapa:

—¿Yátupisaréji tavanaravi eta Roma? —macahepa.

Ema Pablo majicapapa:

—Yátupi —máichapa.

²⁸ Tásiha, macahepa éma comandante:

—Núti, ichapemuri plata náquijica eta nusiapirayare eta tavanaranuirayare eta Roma. Píti, tájahapuca eta pítujsiravahi eta pisiapirahi? —máichapa.

Ema Pablo máichavarepa:

—Núti tavanaranuhi eta Roma taicha étarichuvare náuchusinehi éna ticachichanuana —máichapa.

²⁹ Tacahe, térajijicavanapa éna téstacanayarehini éma Pablo. Émaripa éma comandante, te máechapa eta tavanarairahi eta Roma, tipicarinehi eta máitiasirahi.

Ema Pablo námapa te namirahu éna aquenucarahana

³⁰ Te apanapa sache, éma comandante mavarahapa máechayare tájahapuca eta maviure-vahi éma Pablo eta nayehe éna majaneanana. Mavejapucapa eta cadenana máitihanahi. Macurujicapa éma corregidor énapa éna aquenucarahana. Tiyanapa mámahí éma Pablo, macatupihapa te namirahu.

23

¹ Tacahe, éma Pablo máesenimurihapa éna aquenucarahana, máichavacapa:

—Nuparapenaveana. Núti éna nítaresirahi píuticha juca nucahehi, tájina níchiraváinahi eta nusamiravahi te mamirahu éma Viya —macahepa.

² Ema corregidor Ananías, tise mapa eta masamirahi eta máechajiriruvana ema Pablo. Macavanairipia ena titupihanahi te machacaya ema Pablo. Máichapa:

—¡Ésapajacacha ema mácatátaji!

³ Émasera ema Pablo majicapapa:

—¡Pítira téhaviyare ema Viya, táichavene eta apimirairavi! Te juésvihipuca píti eta péjasirahi eta te jara, tatuparacavi pímatinuma te tatiarihipuca eta néjecapirava apaesa pémehanu. ¿Tájaha tacayema eta juca pivanairipihi? —máichapa.

⁴ Ema apamuriana achaneana natiarihiqueneanahi náichapa ema Pablo:

—¿Tájaha tacayema piácapaemacha ema corregidor, macapicahuquenehi tiyujaracarahi mayehe ema Viya? —náichapa.

⁵ Ema Pablo majicapapa:

—Tátanaveana, eperdonachanu. Vahi néchahini eta émairahipuca corregidor, macapicahuquenehi tiyujaracarahi. Tájina nímatiya nucajachareca ena tuparairucana, taicha nusuapa eta máechajiriruva ema Viya. Ani tacahe: “Vahi picucajacha mácani tuparairuca tayehe eta piávasa”.

⁶ Tacahe, ema Pablo máimativacapa ena aquenarahana, natiarihirahi ena saducéoana, énapa ena apamuriana fariséoana. Tásiha, tijaranupa eta máechajisirahi:

—Nuparapenaveana. Nútirichuvare fariséonu. Énerichuvare ena ticachichanuana fariséoanahivare. Ecatupiacanuhi te juca emirahu táichavenehi eta nucuchapirahi eta véchepusiraya te táequenenapa eta vépenira —máichavacapa.

⁷ Te nasamapa eta juca, ena fariséoana énapa ena saducéoana típutsmuriávanapa, napane-requenehapa.

⁸ (Taicha ena saducéoana, vahi nasuapa eta náechepusiraya ena náepenaqueneana; váhivare nasuapa eta natiarihirahi ena ángeleana; váhivare nasuapa eta tatiarihirahi eta náchaneva ena náepenaqueneana. Énaserá ena fariséoana nasuapa tamutu eta juca.)

⁹ Tacahe, téchajicanapa muraca. Tacahe, te nataracu ena fariséoana, natiarihihi ena escribánoana. Técheputcana. Nacahepa:

—Ema maca achane, tájina matapiravaina. Éneserapuca táechajicahi eta máchaneva ema Jesús, ángelepuca mácani. Vahi vicucanara ema Viya —nacahepa.

¹⁰ Tacahe, ichape eta semanere. Tíñepipa náicha. Tacahe, ema comandante, eta máimairahi eta nasemavahi, tipicanecha tájahapuca náicharachahini ema Pablo. Tásiha, máimichuhavanepa ena suntaruana navehapa ema Pablo, náimijunijicapa te namirahu ena mánanarahi. Náimichavavárepa ema Pablo te cuartel.

¹¹ Tásiha, te jena yátiquenehi máechajicapa ema Viya ema Pablo, máichapa:

—Túmevinachucha, Pablo. Taicha tiúrihi eta péchajisihairahi eta níjare te juca Jerusalén. Puiti piyanayare eta te Roma, éneyareichu tacaheyare eta péchajisiraya —máichapa.

Napanerechapa eta nacapasiraya ema Pablo

¹² Te apanaquenepa sache, natiarihihi ena apamuriana napanerechapa eta nacapasiraya ema Pablo. Nacahepa eta náechajiriruvahi:

—Tacamunurine máepenaevane ema mácatátaji Pablo. Tásiha puiti, víti vinacaya eta juca vícutiaraya. Vuíchaha vinicaímahi, vuíchahavare véraímahi, machu vásapiha vícaicuña me Viya te vahi vícutaucha eta juca vipanereruhi. Tiámainucava te víturucapa vícapaca ema maca, vinicapa —nacahepa.

¹³ Náetavichipuca cuarentana ena ajairana, ena tjáracavanahi ticaechajiriruvanahi eta juca.

¹⁴ Tacahe, tiyananavarepa nayehe ena tuparairucana. Náichapa:

—Víti víjaracavapa eta vítaequenéhairaya ema mácatátaji Pablo. Vinacaripa eta juca vícutiaraya. Vuíchaha vinicaímahi, vuíchahavare véraímahi, machu vásapiha vícaicuña me Viya te vuíchaha vícutaucha eta juca vipanereruhi.

¹⁵ Tacahe, puiti eti tuparairucana eyaseacayare ema comandante máma achichu te emirahu, etanuca eta etseraruina macayaserehi ema Pablo eta juca máichavaqueneváhi. Tásiha, víti vítsecavayare eta vícapasirayare éma te vímahapa máuchuca —náichapa.

¹⁶ Tiuri, matiarahi ema suchicha esu maparape ema Pablo. Masamairicapa eta juca. Tiyanapa te cuartel mametapana ema Pablo.

¹⁷ Tacahe, ema Pablo máichuhapa ema nacapitara ena suntaruana, máichapa:

—Piáma ema maca amaperu te mamirahu ema comandante. Jucarihi eta juca mametacaya —máichapa.

¹⁸ Tásiha, ema nacapitara mámapa ema amaperu mayehe ema comandante. Máichapa:

—Ema máena macaerataquene Pablo tiyaseacanuhi náma eta piyehe ema maca amaperu. Jucarihihi eta timetacaviya —máichapa.

¹⁹ Tacahe, ema comandante macaratavauchapa ema amaperu, mámapa máiputsiacapa. Tásiha, mayaserecapa, máichapa:

—¿Tájahasica eta pimetacanuya?

²⁰ Ema amaperu máichapa:

—Nararihi ena nujaneanana navarahahi nacapaca ema nécuca. Achichu tiyaseacaviayare piama éma te namirahu ena tuparairucana te cabildo. Nacaetseraruya ticayaseserehiyare eta juca máichavaquenévahi.

²¹ Váhisera picusapavaca taicha cuarentana ena ajairana ticuchapanahi te picuchacapa éma, nacapacayarepa. Taicha najurachahi eta nacapasiraya ema Pablo, tásiha napaenunavainapa te náitauchapa eta napaneruhi, tinipanainapa. Puiti éna, pítinecha nacuchapahi te pisuapayarepuca éna —máichapa ema amaperu.

²² Tacahe, ema comandante macahepa:

—Tiuri, piyana te pipena. Nacuijasera picumetaca eta juca pimetarunuhi —macahepa.

Ema comandante máevatacapa ema Pablo mayehe ema Prefecto Félix

²³ Tiuri, ema comandante máichuhapa ena apinana nacapitarana ena suntaruana. Máichapa:

—Etsecayare ena docientoana suntaruana tíamanaya eta espada, docientoanavare ena tíamanaya eta lanza, setentana ena ticaperanayarepahi. Enápanayare ema Pablo te Cesarea. Íuchuca puiti te las nueve yati.

²⁴ Énerichuva etsecayare étanaina cavayu maperainapahi ema Pablo. Táuriserá eta iámirainapahi. Íjaracaya ema Prefecto Félix —máichavacapa.

²⁵ Tacahe, máimiamarecavarepa eta carta. Eta juca táechajiriruvapahi eta carta:

²⁶ “Nuti Claudio Lisias nímiámareca eta juca carta piyehe piti piúriquene excelentísimo aquenuca. Néchajicavinuma tativa.

²⁷ Jucarihi eta juca téchacarehi. Ena israelítana nacaratatachi ema émana achane ticaijare Pablo. Navarahahi nacapacaya. Étasera te néchapa núti tavanarairahi éma eta Roma, nuyanapa námahi ena nusuntarurana nucatiuchapanapa.

²⁸ Eta nuvarairahi necha eta maviureva, námapa te namirahu ena tuparairucana israelítana te juca.

²⁹ Nímahapa tájina matapiravainahini táimicapacahini táemeratachahipucáini te cárcel. Étachuchanénipuca tímicitichahi eta nayeherepiana.

³⁰ Tásiha, nusamairircavarepa eta nacamesairayarehi nacapaca. Tacahe, nímiámarecapa puiti eta piyehe. Énerichuvare nuvanecahi ena timetauchanahi náiteca ara piyehe, étaina macayaserehiya.

Tamutupa eta juca néchajiriruvanahi piyehe”.

³¹ Tacahe, ena suntaruana náitauchahi eta vanairipi. Námapa ema Pablo te jena yati. Títecapanapa te avasarechicha ticaijare Antípatris.

³² Étapa nachavinehi te apanapa sache ena suntaruana ena tipaicanapahi. Énasera ena ticaperana tímiyanavánapa eta nanapaniraya ema Pablo.

³³ Tacahe, te títecapanapa te Cesarea, nájaracapa ema prefecto eta carta, émapa ema Pablo.

³⁴ Te tamutupa eta máechajicuirahi eta carta, ema prefecto mayaserecapa ema Pablo:

—¿Táviha eta piúchusine pítí? —macahepa.

—Núti núchusine te Cilicia —máichapa ema Pablo.

³⁵ Tacahe, ema prefecto máichapa:

—Tiuri, véchayare te náitecapa ena piánarana —máichapa.

Tásiha, macavanairipipa macajaneha te palacio máepiyaruinihi ema ichavicaini Aluresi.

24

Téchajichavapa ema Pablo te mamirahu ema Félix

¹ Te táequenepa eta cincoquene sache, títecapanapa te Cesarea ena tuparairucana tíasihanahi te Jerusalén. Matiarihíhi ema Ananías corregidorhi, énapa ena apamuriana náiyacaranahi. Matiarihipahiva ema abogado ticaijare Tértulo. Tiyananapa mayehe ema prefecto, timetaurecanapa.

² Tacahe, náepanapa ema Pablo. Te títecapapa, tépanavapa téchajicapa ema Tértulo, ánipa macahe:

—Vihasalupayachavi, tátachicha Prefecto, eta viúrivahi pícha. Tájina víchiravainahini eta pítusirahi, pijaneacahavi eta juca aquenucairavíhi eta viyehe.

³ Vimutu víti achaneana te avasareana, tamutuvare sácheana vicunachavíhi. Vihasalupayachavíhi, tátachicha Félix, eta piúrivahi eta viyehe.

⁴ Picatajichaví, tata, pisamahaví. Vahi picuyacujihavi eta juca viyasearuvianaya.

⁵ Puiti vímatipa ema maca ach Janetataji, tihapirahi éma. Tamutu avasareana te jácani viávihapahi viti israelítana, mayurucavaca ena vijaneanana. Émarichuva tachutirihahi nayehe ena téhicana ema Jesús Nazareno.

⁶ Énerichuvare mavarahapa máechipejicayare eta tacapicahuquene Templo. Eta tacahehi vicaratacapa. Vicuñacayarehi taicha tacahehi eta tavesirahavahi eta viyehe ley.

⁷ Émasera ema comandante macatiuchapa tiverejimirauchahavipa taicha camuriana ena masuntarurana.

⁸ Tásiha, máichahavipa: “Te evarahapuca emetaucha ema maca, eyana te mamirahu ema viáquenuruha Prefecto” máichahavipa. Tiuri, puiti vitupiruvahi viti eta vimetasiravi. Te pivaraha, picayasesereru éma eta yátupirahi eta máichavaquenevahi ema maca eta vimetauchirahi puiti —macahepa ema Tértulo.

⁹ Tacahe, ena apamuriana natiarihiqueneanahi, énerichuvare nacahehi:

—Yátupi eta juca máechajiriruvanahi —nacahepa namutu.

¹⁰ Tacahe, ema prefecto máimicutiarachapa máechajiuchava ema Pablo. Tépanavapa téchajica ema Pablo, ánipa macahe:

—Tájina táichava néchajichavaya te pimirahu taicha néchahi núti ánaquiáparipa eta juéseravihi tayehe eta viávasa.

¹¹ Tiúripa picayasesereru. Núti, dóceravahi sache eta nítecapirahi te jena viávasa Jerusalén eta néjirairayarehi ema Viya.

¹² Nájina nucájachaquenéna. Nájina nímiyusemaruina te tajuhe eta Templo, étaripa te nárujisirareva ena nujaneanana. Téhepucaini cálleana nucajacharecahini.

¹³ Ena nani ticatianacanuana, tájina naviya náetseraruinahini eta nametauchiranuhi. Vaipa tisuapacareana.

¹⁴ Ena nani náimijachahi vahi nétupicava eta nímituresirahi. Nútisera nusuapa tacutihi eta nasupirahi namutu ena viáchucanaveanaini. Émarichuhi nucasíhahi ema Viya, ema nacasiñaquenehivare ena viáchucanaveanaini. Núti nusuapahi tamutu eta táechajiriruva eta Sagrada Escritura.

¹⁵ Núti nucasíhavihi mayehe ema Viya, nucuchapavahi eta véchepusiraya te vécarí vimutu viti matapiravareanahi, énapa ena ticatapiravana. Puiti, énaripa ena timetauchanuanahi ticutinuanahi eta nasupirahi eta macaechepusiraya ema Viya ena náepenaqueneana.

¹⁶ Núti, eta nusuapirahi tamutu eta juca, vahi návarahahini néjicapavahini te mamirahu ema Viya. Váhivare návarahahini néjicapava te namirahu ena achaneana.

¹⁷ Tiuri, camuripa áñoana nupaisirahi. Tacahe, nuchavapa te návasa Jerusalén. Náminapahivare eta nanicavachaya ena nujaneanana páureana. Énerichuvare nucamavahupahiva me Viya.

¹⁸ Te tamutupa eta tacasipairahi eta náchaneva éta pa eta nuvahuana, nuyanapa te Templo eta nunapanayarehi eta námavahuana me Viya. Eta návihairahi te Templo, tichimanuanapa ena nujaneanana tiásihanahi te departamento Asia. Nájinasera achaneanahini nachimaphahini te nuchacaya. Váhivare náimahanuini nímiyusemacavacahini ena achaneana.

¹⁹ Ena nani nujaneanana tiásihanahi te Asia, énapa titecanayarehini timetaurecana, te tatiarihinahipucaini eta nuviureva.

²⁰ Piyasereca ena nani natiarihiqueneanahi puiti, te náimicaecherachapuca eta nuviurevahi te ticatupiacanuanapa te namirahu ena tugarairucana.

²¹ Téheserapuca eta tímícvíuchanuhi eta numetasiravacahí éna: “Puiti juca sache ecatupihanuhi te juca emirahu táichavenahi eta nusuapirahi eta véchepusiraya te táequenéna pa eta vépenira” níchavacapa núti —máichapa ema Pablo.

²² Émasera ema Prefecto Félix máecharipahi tamutu eta náehisirahi ena achaneana ema Jesús, éta pa eta táurivahi eta nayeherepiana. Tásiha, te tamutupa eta náechajirisiravahi, máichavacapa:

—Tiuri, tácaheine achichupaine vécha eta juca, te máitecapa ema comandante Lisias. Nuyaserecaya éma eta juca íchavaquenevahi éti —máichavacapa.

²³ Tacahe, ema prefecto Félix mavanecapa ema mayehe capitán máimichava te palacio ema Pablo. Macavanairipivare vahi nacuerataca, táuri eta manarasiraina. Táuri eta náechajirisiraina ena vichamuriana, téjiranayarepahi.

²⁴ Te jena sácheana, tiyanapa ema Félix te apana avasare. Te tichavapa, mámapa esu mayena ticajaru Drusila. Ésurichuhivare israelíta. Náimichuhapa ema Pablo, téchajiricavanayare. Tacahe, ema Pablo mametacavacapa eta táicharacavahi eta máehisirahi ema Jesucristo.

²⁵ Eta máechajirisiravahi ema Pablo, máichavacapa:

—Te ecasiñava me Jesucristo, éhicavare eta máimiturapiana, tiperdonachaheyare ema Viya. Matapiravarehena te mamirahu. Énerichuvare, tiúrinapa eta itaresiraya, eratahainapa ecaratavayare. Puiti, táuricapa ecasiñavavane, taicha járajapa eta sácheyare nacayaserehirayare nácani ticatapiravanahi. Ticaicuñanainapa te yucu —máichavacapa ema Pablo.

Te masamapa eta juca ema Félix, tipicarinehi. Máichapa:

—Tiuri, taratapa puiti eta juca. Nuvarahasera nápechavaya nusamararacavi. Te apahenavare nímichuhaviyare —máichapa.

²⁶ Ema Félix ticuchapavahi te máijaracayarepuca eta plata ema Pablo eta máuchucuiraya. Eta tacahehi máimichuhaparacahi téchajiricavanayarehi.

²⁷ Váhisera máuchucuhahini ema Pablo, taicha ema Félix mavarahahi tiúriyarehi nayehe ena israelítana. Apina año eta tayerevahi. Ticaitsivanecha ema Félix. Tisiapapa ema Porcio Festo, émapavapa prefectohi.

25

Nacatupiacapa ema Pablo te mamirahu ema Festo

¹ Te émapavapa aquenucahi ema Festo, te mapanaquenepa sache, tiyanapa te Jerusalén.

² Tacahe, ema corregidor énapa ena apamuriana tuparairucanahi, ticurujicacanapa mayehe ema aquenuca Festo. Nametauchapa ema Pablo.

³ Nayaseacapa ema Festo macátajicavacahini eta máevataca te Jerusalén ema Pablo. Taicha navarahahi titsecavanayarehi te achene eta nacapasiraya.

⁴ Émasera ema Festo majicapapa:

—Tiuri, ema Pablo ticaeratahi te Cesarea. Núti achichupaichu nuyanayare nuchavaya tayehe.

⁵ Eta tacahe, te tatiarihipuca eta échaqueneanahi eti tuparairucana, tiúripa éhicanu te Cesarea apaesa vecha te ticaviurevahipuca ema maena achane —máichavacapa.

⁶ Te tiánehipa eta diésquene sache eta mávihairahi ema Festo te Jerusalén, tichavapa te Cesarea. Te apanapa sache téjacapa tayehe eta mávacure. Máimichuhapa ema Pablo.

⁷ Te títecápapa ema Pablo, tisiapapa te mamirahu ema Festo. Témeñahavanapa ena mánarana tiásihanahi te Jerusalén. Timetaurecanapa ema Pablo. Camuri eta májécapiravahiji. Ichape eta maviurevahiji nayehe. Tájinasera naviyahini eta náetserarúinahini.

⁸ Émasera ema Pablo máichavacapa eta macatiuchiravahi:

—Núti tájina nutapiravaina tayehe eta nayeherepiana ena nujaneanana, étainapucáini eta Templo, émainahivarepucáini nucaecahi ema íchapequene aquenuca Emperador —máichavacapa.

⁹ Émasera ema Festo, énerichuhivare mavarahahi tiúriyare nayehe ena israelítana. Tacahe, mayaserecapa ema Pablo:

—¿Pivarahapuca piyana te Jerusalén, étaina tacaechacasiya te numirahu eta juca píchavagenévahi?

¹⁰ Tacahe, ema Pablo majicapapa:

—Étaripa návihahi puiti te pimirahu píti viyehe juez manacaquenevivi ema Emperador. Pítipa tituparacavi picuchucuhanuyarehi taicha pécharichuhi píti tájina nuviurevainahini nayehe ena nujaneanana.

¹¹ Téheserapuca nucaviurevahini, táimicapacnuríne eta nuviureva. Vahi nucatiuchavaimahi. Tájinasera nuviurevaina eta nametauchiranuhi ena nani. Váhivare tituparacavi píjararecanuhini eta nayehe ena nani. Téheserapuca te vahi picucaitanu, nuyasesereca puiti nuyana te mamirahu ema Emperador. Étaina nucametauchacasiya mayehe —máichapa ema Pablo.

¹² Tacahe, ema Festo macayasasererupa nayehe ena mayeheana abogado. Tásiha, máichapa:

—Píti Pablo, piyaserecachi piyana te mamirahu ema Emperador. Nísapavi piyana —máichapa.

Títecapapa ema rey Agripa, ésupa esu Berenice

¹³ Te jena sácheana, títecápapa te Cesarea ema rey Agripa, ésupa esu Berenice. Náechajipanyarehi ema Festo.

¹⁴ Eta nanasiquenerahi te jena sácheana, ema Festo mametacapa ema rey eta máichavagenévahi ema Pablo. Máichapa:

—Mararíhi ani ema achane ticaeratahi ticaijare Pablo. Manaquiruhi ema Félix.

¹⁵ Te nuyanapa te Jerusalén, ena tuparairucana timetacananapa eta máichavaquenevahi, tiyaseacananapa eta nímicapasiraina.

¹⁶ Tásiha, núti nujicapavacapa: “Viti aquenucarahana tayehe eta Roma, vahi tituparacahavi vímicapacahini mácani ticametauchacasihi te vuíchaha ticamirahucacanaahi ema mánarahi” níchavacapa.

¹⁷ Tacahe, te títecapanapa ani, vahi náyererejihini núti. Te apanaquenepa sache néjacavanepa te návacure, nímichuhapa ema Pablo.

¹⁸ Núti nímijachapa ichape eta maviureva. Étasera eta nemetauchirahi, tájina vahi táifñepihini.

¹⁹ Étachuchanénipuca tímicaviuchahi eta nayeheana religión. Émapa ema náehiruhi ticajarehipuca Jesús, ema mácani tépenahi. Puítisera ema Pablo máechajisihahi eta mápechiravahi títareca.

²⁰ Núti vahi nímatiequeneha eta táicharacavaya eta juca. Tacahe, níchapa ema Pablo: “¿Pivarahapuca piyana te Jerusalén, étaina tacaechacasiya eta juca píchavaquénévahi?”

²¹ Émasera tiyaseuchavapa eta mayaniraya te mamirahu ema Emperador Augusto. Tacahe, nímivanerecapa macajaneha tíamainucava te nítujicava nímivanerecapa nanapana mayehe ema Emperador —máichapa ema Festo.

²² Tacahe, ema Agripa máichapa ema Festo:

—Núti apana nuvarahasa nusamaini ema mácara achane —máichapa.

Tacahe, ema Festo máichapa:

—Tiuri, achichu pisamaya éma.

²³ Tacahe, te apanapa sache tisiapanapa ema Agripa ésupa esu Berenice tayehe eta náejasirare ena aquenucana. Tiúrina eta náitecapira. Jánunuhacavaca eta namuirihana. Énapa ena aquenucana tachutirihana nayehe ena militáreana énapa ena tuparairucana tayehe eta avasare. Tacahe, ema Festo máimichuhapa ema Pablo.

²⁴ Tacahe, téchajicapa ema Festo, ánipa macahe:

—Tata Rey Agripa. Tátanaveana. Emutu eti etiarihiqueneanahi te juca viúrujisirávahi. Mácahi ema maca achane nametaurehi ena majaneanana eta nuyehe, ánaqui te Jerusalén, étapa ani te juca Cesarea. Nararihi camuriana navaraha náimicapaca ema maca.

²⁵ Nútisera tájina nímaha matapiravaina táimicapacahini. Émasera tiyaseuchavapa tiyanare te mamirahu ema Emperador Augusto. Nisapahisera mayana eta mayehe.

²⁶ Vuíchahasera nucajurehini ema náquenu Emperador, taicha tájina nuviyahini eta matapiravainahini. Puítisera nucatupiha éma te pimirahu piti rey Agripa, étipa eti tátanaveana. Nuvaraha ímicatacanu eta táicharacavaya eta juca, apaesa nucajurepaini ema Emperador.

²⁷ Taicha vahi tiuri vévataca ema présuhi te tájina matapiravaina —macahepa ema Festo.

26

Ema Pablo téchajiuchavapa te mamirahu emarey Agripa. Mametacavacapa eta máitaresirahi te vuíchaha máehicahini ema Jesús.

¹ Tacahe, ema Agripa máichapa ema Pablo:

—Tiuri, nímaha péchajica —máichapa.

Tacahe, ema Pablo macanuquechapa eta mavahu. Tépanavapa téchajica, ánipa macahe:

² —Tiúrisamurécare eta nítujisiravahi néchajica te pimirahu, piti rey Agripa, eta nucatuchiravaya núti apanava eta juca nametauchiranuhi ena nujaneanana israelítana.

³ Núrísamure ichape taicha píti pímatihí tamutu eta juca viyeherepiana viti israelítana, étapa eta véchapajirisirahi. Eta tacahe, nuyaseacavi puiti pisamanu eta nucayemaya. Pácayehe paciencia nuyehe.

⁴⁻⁵ Eta námaperuvahi núti, fariséonuhi te návasa núchusinehi étapa te Jerusalén nujurisinehi. Néhicahi eta viyeherepiana viti israelítana eta nítaresirahi. Nucachanevacahi ena fariséoana ena típicauchacaréanapána. Namutu ena nuchajuruanahi tímatinuanahi eta nítaresirahi. Ena tímetacavianaya eta nítaresirahi.

⁶⁻⁷ Puiti ticatupiacanuanahi te pimirahu, piti rey, táichavene eta vicuchapiravahi eta macaechepusirahaviya ema Viya te vépena, taicha tacahehi eta máechajiriruvahi nayehe ena viáchucanaveánaini. Vimutu viti tachichanaveanahi eta viávapairu Israel, vimutu vicuchapavahi eta juca táitauchiravaya eta máijararuhaviya ema Viya. Eta tacahehi, tamutuhi sácheana, yátiana vítatihí ema Viya, viyujaracahí mayehe. Táichavenehi eta nucuchapiravahi núti, tímetauchanuanahi ena nujaneanana.

⁸ Tiuri puiti éti, németeaca tisuapacarehi eyehe eta macaechepusiraya ema Viya ena náepenaqueneana.

Ema Pablo mametacavacapa eta mapánajirisíravaca ena téhicanahi ema Jesús (Hch 8.1-3; 9.1-2)

⁹ Nútiripa acane nímijachahi nétupicava eta me Viya eta níchaqueneánahi nucatianasiravacahi ena téhicanahi ema Jesús Nazareno.

¹⁰ Eta juca níchirahi te Jerusalén. Tímícatacanuanahi ena tuparairucana eta nucaratasiravacahi ena matapiravareanahi téhicanahi ema Jesús; nímisipiravacahi te cárcel. Eta nímairahi eta nacapasirayarepahi, néhichahi eta napanereru éna.

¹¹ Ichapemurianahi ena nucarataruana. Némecharecavacapahi ena nétupiaruanapahi te náurujisirarevana. Níminajicavácápáipa eta náehisirahi ema Jesús. Nécatihavare eta náepuruiraya. Muraca eta nuvainarajichiravahi nayehe. Tamutuhi nutanusihavaca te apanaqueneana avasareana tayerehiqueneana.

*Éma Pablo mametacavarepa eta máehisiraipa éma apanava ema Jesús
(Hch 9.1-19; 22.6-16)*

¹² Étarichuvare tímiyananuhi te avasare Damasco. Tivanecanuanapa comisiónnuhi ena tuparairucana; tíjaracanuanahi eta órdena.

¹³ Tacahe, tata rey, te nánehipa te avasare, te jena sache las dócequenepa, tíjahúchavapa tímícauchanu eta majaraiva ema Viya, tíásiha te anuma. Tijarahipana tayehe eta sache. Tímícauchanupa, énapa ena téhicanuanapahi.

¹⁴ Tacahe, víaquipáicavapa vimutu eta vipisirahi. Nusamapa ema Viya, téchajicanuhi te véchajiriruva víti israelítana. Máichanupa: “Saulo, Saulo, ¿tájaha tacayema picatianacanuhi? Pésamiricavachucha, taicha píitijiváichucha píchavahi. Vahi píúrimahi te pímiyanava pipanajiricavaca ena téhicanuanahi” —máichanupa.

¹⁵ Tacahe, níchapa: “¿Nájahavi, píti Tata?” Tíjicapanupa éma: “Núti Jesús. Núti picatíanaruhi, eta pipanajirisiravaca ena téhicanuanahi.

¹⁶ Péchepuca, pitupíha. Núti nímerecavahi eta píyeha, taicha nunerejiruvíhi nuvanaraviya. Púiti numetacaviya eta juca pématanerepiyare eta nuyeha. Péchajisihayare eta níjare nayehe ena achaneana eta juca pímairanuhi píúiti, étpa eta apamuriana nímerereruanayare.

¹⁷ Núti nucatiuchaviya te tájahapuca náicharacavi ena vijaneanana israelítana énapa ena apavasanana. Púiti nuvanecavíhi péchajisihanuya eta nayehe ena apavasanana.

¹⁸ Pímitucavacayare eta mavanairípiana ema Vicaiyaquene. Nacaijuhe éma, apaesa náitujicava náimaha eta majaraiva. Náinajicapa eta náichaqueneasana te tímápicu. Vaipa nacuehica ema Satanás. Ena tisuapanuanaya téhicanuanaya, nuperdonachavacaya eta napacaturana. Nasiapamurihaya ena náinapureanahi nunerejiruana” máichanupa ema Jesús.

Éma Pablo mametacavacapa eta masuapirahi eta matuparacasivanahi me Jesús

¹⁹ Tacahe, tata rey Agripa, nusuapahi núti ema Jesús eta mavanesianuhi.

²⁰ Nucametarairupa tatíavahi nayehe ena ticavasanahi te Damasco. Te nuchavapa, étpa te Jerusalén, étpa te avasarechichana te Judea. Tásiha, núchucapa tayehe eta avasareana tayerehiqueneana nayehe ena apavasanana. Numetacavacapahi eta nácaijuharaina ema Viya, náneuchiravaina náitsivachiraina eta náitaresiraina, táuripa eta náitaresiraina.

²¹ Étara eta juca tíviuchanuhi nayehe ena nujaneanana eta nacaratasiranuhi te Templo, navairahi tícapacuanana.

²² Émasera ema Viya tímícatacanuhi. Púitirichucha tímícatacanuhi éma. Eta tacahe, nutiarihichucha píúiti. Tásiha, vahi núchávacuéjchavahíni nucametarairuyarechucha nayehe namutu ena achaneana, ena páureana énapa ena rícoana. Tájinasera vahi nuhapapicahini eta táechajiriruvanahi eta Sagrada Escritura eta táitauchiravayarehi eta macatajivairayarehi máepenirayarehi ema Cristo.

²³ Tásiha, émayarehi tínupuca téchepuca te máecari. Éta, táicutiarahi eta véchepusiraya víti apana te vécarí vimutu víti achaneana, víti israelítana énapa ena apavasanana. Tásiha, tivanecahavípa vímetacaya ena achaneana, apaesa nácasíñava mayeha éma.

Éma Pablo mavarahapa macajimuyasamurechayare ema Agripa eta máehisiraipa ema Jesús

²⁴ Tímiyanavarichaha téchajica ema Pablo eta máechajíuchiravahi, témechajicavapa muraca ema Festo, macahepa:

—Máurishivípa píti Pablo, táichavene eta pívayuchiravapa pícaravahu. Étpa tímaurishichavíhi.

²⁵ Émasera ema Pablo majicapapa, macahepa:

—Váhiya máurishinuina, tata aquenuca Festo. Nutupíruvahi eta juca nucayemaqueneanahi. Jéhevare eta yátupíqueneanahi.

²⁶ Émaripa ema maca rey Agripa máimativare tamutu eta juca. Eta tacahehi vahi nupicacaracavahini eta néchajisirahi te mamirahu taicha nucasiñavahi núti eta máimatihahi ema. Namutuhivare ena achaneana náechahi, taicha tájina vahi tayumurucavahini.

²⁷ Pítiripa piti rey Agripa çpisuapahi jácani eta nacayemaqueneanahi ena profetanaini? Núti németecahi pisuapahi piti.

²⁸ Ema rey Agripa majicapapa:

—Picájmuyacayaréni eta nusamure. Núti apanavare néhicayare jácani ema Jesús.

²⁹ Tacahe, ema Pablo máichavarepa:

—Tiúripa pisuapavane puítinarichu, yátupina te pisamure. Nuyaseacaya ema Viya eta pisuapiraina. Énerichuvare nuyaseacayare eta esuapiraina emutu eti apamuriana eti esamararacananahi. Éhicavanéni ema Jesús, tácutihini eta néhisirahi núti. Váhisera nacuératatachéni, vahi ecucutinuhini núti eta nucaeratairahí táichavenehi eta néhisirahi ema Jesús —máichapa.

³⁰ Te nasamapa eta juca máechajiriruvahi ema Pablo, téchepucapa ema rey, ema prefecto, esu Berenice, énapa namutu ena natiarihiqueneanahi náejaruanahi.

³¹ Tásiha, tiyananapa típutsiacavanapa, náechajisihayarehi eta juca. Náichacacapa:

—Ema maca achane, tájina maviurevaina táimicapachahini. Váhivare táuricachini macaeratahini te cárcel.

³² Ema Agripa mametacapa ema Festo:

—Tiúrihini picaitica ema maca achane te vahi macúyaseserécachini eta mayaniraya te mamirahu ema Emperador —máichapa.

27

Ticaevatapa ema Pablo te Roma

¹ Tiuri, matiarhihi ema capitán ticajjare Julio, nacapitarahi ena masuntarurana ema aquenucaini Augusto. Tacahe, te tiúripa eta napanereri eta náevatasirahaviya te Roma, nataparacapa ema Julio mámaya ema Pablo énapa ena apamuriana présoana.

² Viávacuhapa te ichape pacure tiásihahi tayehe eta puerto Adramitio. Tiyanayarehi te apanavare puértoana te Asia. Téhicahavipahi ema Aristarco ticavasahi te Tesalónica tayehehi capital eta departamento Macedonia.

³ Te apanapa sache, vítecapapa te puerto Sidón. Tacahe, ema Julio majapanupahi ema Pablo, máisapahi tiyana máejirapanavaca ena vichamuriana. Náechapajiricahi ema Pablo.

⁴ Te viásihavarepa te Sidón, vétavicapa eta tiúrupuhi Chipre tinapaicapahi te sapa, váipasare viácapanahini eta técticava.

⁵ Tacahe, vijuchehericapapa eta mar te tachacayapahi eta Cilicia, étapa eta Pamfilia, vítecapirapa te avasare Mira tayehe eta Licia.

⁶ Eta tayehe, viávacuhavarepa tayehe eta apanapa pacure máechajiaruhi ema capitán Julio. Eta juca pacure tiásihahi te avasare Alejandría. Puiti tacaijuheryarepa te Italia.

⁷ Te jena sácheana vahi vijuricatipahicháini eta vipaisira. Muracarichucha eta técticava eta viácapanahini. Muraca eta nacaemataneasirapahi, vítecapirapa te tánara eta puerto Gnido. Tacahe, vétavicavarepa eta puerto Salmón te tasumuqui eta apanavare tiúrupuhi ticajjare Creta. Viávicuchapápa eta tiúrupuhi, étapa tiávichahávipahi tayehe eta técticava.

⁸ Ticajerapahi eta vipaisirapahi. Vijúchehericapáichucha, vítecapiravarepa tayehe eta apanavare puerto Buen Puertohiji eta ticajjare te tachacaya eta avasarechicha Lasea.

⁹ Ticachurichavipa eta tiempo taicha eta viyérerejívapahi. Tíñehiripa eta tapaisirava te mar, taicha tinacuchavaipa eta muracana técticava. Eta tacahehi ema Pablo maconsejachavacapa, macahepa:

¹⁰ —Tiuri, tátanaveana. Váipara tiuri vímianavahini vipaica, taicha tíñehicarepa vécharicava. Machu vicamitiaca eta pacure, eta carga, vítipa machu vérica —macahepa.

¹¹ Émasera ema capitán Julio, ema comandante tayehe eta pacure, émapa ema piloto vahi návarahahini nánasihini. Vahi nasuapahini ema Pablo.

¹² Taicha vahi táurihini eta puerto, tájina távichahini tayehe eta muracana técticava. Napanerechachucha tiyananayare. Ánipa nacahehi:

—Vahi tiuri eta vánasi te juca. Viyanachucha tayehe eta apanavare puerto Fenice tayehe eta juca Creta. Tiúripa eta jena, távichahi tayehe eta muracana técticava. Étaina vicuchapiha eta te táetupiricavapa eta sácheana —nacahepa.

¹³ Tacahe, tépanavapa eta técatiticavahi te vana. Tiápajuecavanapa éna. Náimijachapa tímiyanavanayarehi tiuri eta náehisirayarepahi eta técatícava*. Vahi náemetecahini táequecavahini te cajaha. Viánehipaipa vicachacaya eta tiúrupuhi Creta.

¹⁴ Te ticaicutiaravapa, tíjahúchavapa téquecava, muracapa técatícava tiásiha te cajaha.

¹⁵ Tavehapa eta vipacure. Tiámahavipa. Viyerehipa eta tachaui. Navarahainipa náimichava eta pacure te tachauiipahi, váhisera náratahahini. Tásiha, náisapapa tiámahavi eta técatícava.

¹⁶⁻¹⁷ Témetavichavipa te apachacaya eta tiúrupuhichícha ticaijare Claudia, éta pa tiávichavahi. Váiparichu muracainahini eta técatícava. Éta pa víturusine vijataca eta étasi pacure vichururepahi. Vinacacuhapa te tajuhe eta ichapepana pacure. Ichapesera eta vicaematanearapahi. Tacahe, náinunuacapa eta pacure te enureana apaesa vahi tacuvejiajuecha eta táepacuruha. Nacamiricapa eta ichapepana tavanterame tévatajicapahi eta pacure taicha napicahi támahini eta técatícava, táejahapaicahini eta pacure tayehe eta playa ticaijare Nácharisirareva. Tacahe, táevatajicapaipa eta vipacure, vétaviequenehairapa eta playa.

¹⁸ Tífehichucha eta táepacuruhana. Eta napisirahi éna, náepuhecavacapa te une eta támaquenepahi.

¹⁹ Te mapanaquenepa sache, vivehavarepa eta apamuri támaqueneanapahi tayereruvanaipachuhi eta pacure, véchipaicavarepa.

²⁰ Jéhesare, ichapemurihi eta sácheana vahi tacaecherahini eta sache, éta pa jarairiquiana. Eta vímairahi vahi tarasahini eta muraca tépacuca, vaipa vémetecavahini víúchucuhahini.

²¹ Ichapemurihi eta sácheana tájina vinicahini. Tacahe, ema Pablo titupiha te vimirahu, máichavavipa:

—Tátanaveana, tiúripanáichuhupucáini esuapanuhini te vuúchaha víúchucuhini tayehe eta Creta. Puiti vahi vicucatajivahini.

²² Puitisera, vahi ecupica, taicha nájina tépenaimahi. Técharicavayaresera eta pacure, témitiacaya.

²³ Néchahi núti eta juca, taicha yati téchajicanuhi ema ángele mavaneruhi ema Viya, ema náquenuhi nucaematanearuhi.

²⁴ Ani macahehi eta mametasiranuhi ema ángele: “Vahi picupica, Pablo. Vahi pépenaimahi. Énaripa ena nani picachanequeneanapahi, váhivare tépenanáimahi táichavenehi eta pitarihirapahi eta nayehi. Picamesavayare pitecapaucha ema Emperador pitupihamiraureya” máichanupa ema ángele.

²⁵ Eta tacahe, tátanaveana, túmehénachucha, taicha núti nucasiñavahi mayehi ema Viya. Nusuapahi eta mametarapiana ema ángele eta nuyehi.

²⁶ Tiámahaviyaresera eta técatícava tayehe eta tiúrupuhi —máichavacapa ema Pablo.

²⁷ Apinaquenepa semana eta támirahavipahi eta muraca técatícava te ichapequenehi mar. Te jena enumuhuquenepa yati, ena marinéroana náimijachaipa tiánehianaripa eta tiájipahi taicha nasamahi eta cachuela te tachaui.

²⁸ Náicutiecapa eta táupenava eta une. Náimahapa treinta y seis metro eta táupenavahi. Te tiyererehavare, náicutiecarepa, veinte y siete metro eta táupenava. Náemetecapa tiánehianaripa eta tachaui.

²⁹ Tacahe, nacajuchucupaca eta cuatro ánclana te tahivu eta pacure, taicha napicahi táemestaquihahini eta vipacure tayehe eta máriana. Navarahaipaicha tájahúchavahini tijarahi.

³⁰ Eta napisiraipaicha, ena marinéroana navarahapa tijunanayarehini, tijunijichaviana-yarepa. Nacucupaica eta étasi pacure vicavacurehi. Nacaetserarupa nacajuchucuyare eta apana áncla te tasumu eta pacure.

³¹ Ema Pablo máimatiacavacapa eta navairahi tijunana. Tacahe, mametacapa ema capitán Julio énapa ena masuntarurana. Máichavacapa:

—Te vahi nacunasi te juca pacure ena nani, éricayare éti, vahi iúchucuhaimahi —máichavacapa.

³² Tacahe, ena suntaruana náechupicavacapa eta enureana táitihapahi eta étasi pacure. Náinajicapa te une.

³³⁻³⁴ Te tijarahipahi, ema Pablo tivanecahavipa vimutu vinicanuma. Máichavavipa:

—Enicanumapa apaesaina, taicha apinapa semana eta juca iávamina, emaimasirahivare. Tatuparaca enicanuma apaesa táetumechahe eta iávaresirayare. Nájinasera témitiacaimahi te vitaracu —máichavacapa.

* **27:13** Acane eta ichapequeneana pacure, amairihaichaha te náurape eta napaisihahi te une. Camurianahi ena achaneana tínacuanapahi. Nacatupihavare eta ichapemequeneana sábanana tímícatacayarepahi tévatajica eta técatícava.

³⁵ Tacahe, te tamutupa eta mavaneriravacahi, ema Pablo mavehapa eta pan; mabendiciónchapa te vimirahu. Mavejecapa, tinicapa.

³⁶ Vétumechavapa vimutu, vinicapa víti apanava.

³⁷ Camurihavihi viti támaqueneanapahi eta pacure. 276 eta visimutuvapahi.

³⁸ Te vítanésipa eta vinisirahi, navehapa ena marinéroana eta apamuri trigo, náquijicapa te une, navarairahi téchacayare eta támaquene eta pacure.

Técharicavapa eta pacure

³⁹ Te tjarahipa, ena marinéroana vahi náimatívahini távihahipuca eta viávihihi. Náimahasera eta tachausi ticayehehi playa. Navarahapa náimipauchayare eta pacure, viúcupaisihayarehi te playa.

⁴⁰ Tacahe, náechuacavarepa eta enureana ticaratacanahi eta ánclana. Tanasivacapa te amahe une. Nacaesimucavarepa eta tayeheaná leme eta pacure. Tacahe, nacanunquechapa eta étana tavanterame ticarataca eta técatícava tiávihapahi te tasumu. Táimicatapaca eta napauchiraya eta playa.

⁴¹ Tiámahavipasera tayehe eta remanso. Vaipa táupenahini. Tásiha, ticaratacavahipa eta playa. Tachuchucapa eta tavaparú. Vaipa tayamuricahini. Tacahe, eta tamuracavahi eta tépacuca, tacavaracapa eta tahívu eta pacure.

⁴² Ena suntaruana navarahapa nacapacayarehi ena présoana, napsirahi náitujicavahini tijunana eta návaresiraya.

⁴³ Émasera ema capitán Julio vahi máisapahini taicha mavarahahi macuchucuhayarehi ema Pablo. Macavanairipipa ena náitucanahi tiávarecana napaucha eta tachausi.

⁴⁴ Ena apamuriana máitucaranahi tiávarecana nayuratamecavacapa eta tabla, nacuchucuiyavahi te tájipahi. Tacahehi eta viúchucuirahi vimutu.

28

Emá Pablo mávihalpa te tiúrupuhi Malta

¹⁻² Tacahe, te vimutupa viúchucuhahi, tiúchujichahavianapa ena ticavasanahi tayehe eta tiúrupuhi. Timetacahavianapa eta tájijarehi Malta eta viúcupaisihahi. Nacamuruequechapa eta yucu, tichuhahavianapa viásacavayarehi taicha vicasarechavacaipahi taicha eta une étapa eta tiquiva. Énapa titátihavianahi.

³ Tacahe, ema Pablo tinerecapa eta yucuquí májjuquechapa. Tatiarihhipuca eta quichare te manereru. Tásiha, tiúchujicapa eta quichare, táimijunapa eta yucu. Táechucapa te mavahu ema Pablo.

⁴ Te náimahapa ena ticavasanahi tayehe eta tiúrupuhi eta táechusirahi ema Pablo te mavahu, nacahepa:

—Ema maca achane ticaviurevapuca jácani, ticáparecahíchupuca. Tiúchucuhahi te une, ánipasera taviyihahi te tájipahi eta matuparahahi. Vaipa máuchucuhahíni —nacahepa.

⁵ Émasera ema Pablo máquijipicapa te yucu eta quichare. Tájiha máichavahini.

⁶ Tacahe, ena tímararacanihi nacuchapaipa máepenahini, támahipucahini eta mavahu. Eta náimairahi tájiha máichavahini, napanerequenehapa.

—Viyachupuca ema maca —nacahepa.

⁷ Te tachacaya eta vécharisnevahi, tatiarihíhi eta barraca, maverahi eta pétiana napenanahi ena machaneranahi ema subprefecto, tuparairucahi tayehe eta tiúrupuhi. Ema ticajarehi Publio. Émapa tichuhahavihi téchapajiricahavihi eta jena mapanaquenehi sache.

⁸ Matarihíhivare ema maiya ema Publio. Ticajumahi éma, eta muraca fiebre. Tisachivare íti. Tivecahi éma te matuleta. Tiyanapa ema Pablo, máejirapanahi. Tiyujaracapa, mayaseacapa ema Viya eta macanarasiraina ema macajumaquene. Tásiha, manacapa eta mavahu te máinahu. Jéhesare, tinaracapa ema achane.

⁹ Eta náimairahi ena apamuriana achaneana eta macanarasirahi ema macajumaquene, náepanavacapa ena apamuriana nacajumaqueneana. Macanaracavacapaipa ema Pablo.

¹⁰ Mapana caje eta viávihairahi tayehe eta tiúrupuhi. Ichaperinehi eta náitátirahavihi ena achaneana. Te viávacuhayarepa, tjaracasichaháavianapa eta vícamunuqueneánayarehi eta vipaisirayareva.

Tímiyanavanavarepa eta napaisirahi, nacajuherahi eta Roma

¹¹ Tasiha, viávacuhavarepa tayehe eta apanavare pacure tachimararuhivare eta muracana técatícava tayehe eta puerto viávihihi. Eta juca pacure ticajarehi Castor-Polux, Chámeana. Tiásihavare te Alejandría.

¹² Eta vipaisirahi, vítecapapa te apanavare puerto ticajarehi Siracusa. Víchecapa tayehe mapana sache vicahe.

¹³ Te viyanavarepa, vijuhechecapaipa vítecapirapa tayehe eta puerto Regio. Te apanapa sache tépanavarepa eta técativava te vana. Tímícatacahavipa eta vipaisirapahi. Te apanapa sache, vítecapapa tayehe eta puerto Puteoli.

¹⁴ Te jena avasare, vicainunapa ena apamuriana vichamuriana, tímínasichahavianapa. Étana semana vicahe eta nayehe. Tásiha, vipaicapa te tiájipahi, vicaijuhepa eta te Roma.

¹⁵ Ena apamuriana vichamuriana ticavasanahi te Roma tisamairiricahavianapa eta vítecapirayarehi. Nárajapapa tiácapahavianahi te achene te apanahivare avasare ticaijarehi Foro de Apio. Énerichuvare ena apamuriana tiácapahavianahivare, ticuchapahavianapa tayehe eta apanahivare avasarechicha ticaijare Tres Tabernas. Te máimahavacapa ema Pablo, tíurisamuréinehi naicha eta nácapirahavihi ena vichamuriana. Tétumechavapa ema apana. Mahasulupayachapa ema Viya.

¹⁶ Te vítecapapa te Roma, ema capitán Julio mahentregachapa ema comandante tayehe eta guardia ena présoana. Émasera ema Pablo náisapapa títecapapa te apana peti, matiarihisera ema émana suntaru tijaneacahi.

Ena Pablo máimitucavacapai ena téjirapanana te máítecapihahi

¹⁷ Te mapanapa sache eta vítecapirahi te Roma, ema Pablo máimichuhavacapa ena náiyarahana ena israelítana ticavasanahi te jena avasare. Te tíurujicavanapa, ema Pablo máichavacapa:

—Nuparapaveana, tájjananéni nutapiravainahini. Tájjanavare nícharacahini ena vijaneanana. Váhivare nucaecahi eta nayeherepianaini ena viáchucanaveanaini. Nucaeratahisera te Jerusalén, tímétauchuanuanahi te namirahu ena tuparairucana romanoana.

¹⁸ Eta nayaseresiranuhi, navarahahineni ticaiticanuana taicha náimahi éna tájjan taviuchanuhini táimicapacananhi.

¹⁹ Énasera ena vijaneanana tuparairucanahi váhiquene návarahahini nacaiticanuhini. Eta tacahehi nuyaseserecapa núti étaina nucametauchacasiya te mamirahu ema Emperador. Tájjanasera vahi numetauchaimahi ena nujaneanana tiaetemajiricanuanahi.

²⁰ Eta tacahe, nímicuhahahehi nuvarahahi nímatihyare éti, numetacaheyareva eta juca níchavaquenevahi. Ticaviurenuhi eta néhisirahi ema Cristo, ema vicuchapaquenehi vimutu viti israelítana, eta tímíticanuhi puíticha te juca cadena —máichavacapa.

²¹ Tásiha, ena náichapa:

—Tájina váhiya visamairiricavi. Váhivare vijacapa eta carta tiásiha te Judea táechajisihavihini píti. Énapa ena vichamuriana israelítana tiásihanapahi eta ánaqui, váhivare náechajisihahini eta pivirevahipuca píti.

²² Vivarahasera visamavi puiti péchajisiha eta pipanereruanahi, taicha visamairiricahi eta nacatichirahi ena vijaneanana tiávihanapahi te avasareana eta juca arairuhi éhiruhi —náichapa.

²³ Tacahe, náijarechapa eta sache máechajisiraya. Te jena sache, títecapanapa ena camuriqueneana israelítana tayehe eta máítecapihahi ema Pablo. Tépanavapa te jena yáticarahi téchajicahi éma. Tíamainucava te cáperehichichapa títapiricapa eta macametarairuirahi eta máechajiriruva ema Viya. Máimivehapticapahi eta máechajicuirapahi eta Sagrada Escritura. Máimitucavacahi éna eta náimatiraya ema Jesús eta émairahi Cristo, ema nacuchapaquenehi. Macajimuyacavacahi eta náehisiraina éma.

²⁴ Tásiha, típutsimurihavanapa ena tisamararacanahi. Natiarihihi ena apamuriana nasuapa eta macayemaqueneanahi ema Pablo. Natiarihisera ena apamuriana vahi nasuapahini.

²⁵ Éna, vahi návarahapahini nasama, tímutserahavanapaipa tiyanana. Tacahe, ema Pablo máichavacapa:

²⁶⁻²⁷ —Machu ecucutihini ena viáchucanaveánaini acane. Matupiruvahi ema Espiritu Santo eta máechajisihavacahi éna te mametacapa ema víyarahaini profeta Isaiás. Máichapa: “Píyanapa pímetaca ena naena achaneana. Ani píchayare: Nímatihe éti eta emasuapajiraivahi. Épiyacavahi religiósohehi; tétavicavahisera eta tamuracavahi eta esamureana. Eta juca emasuapajiraivahi, tahapapiricahi eta ecaicutiarairahi eta numetarapiana étapa eta nímereuchaqueneana. Tájinapa táichahini vicuchapahini eta éneuchiraváina, evarairapucaini ecasiñahini me Viya, apaesa macanaracaheni” máichapa ema Espiritu Santo.

²⁸ Ácaicutiaraqueneña éti, puiti juca vicaijuheya vimetacaya ena apavasanana eta mavarairahi macuchucuhaya éna apana ema Viya. Tásiha, éna nasapihayare nasamaracayare —máichavacapa ema Pablo.

²⁹ Te tamutupa eta máechajisirahi ema Pablo, tiyananapa ena majaneanana, tíumehavanapaipahi.

³⁰ Apina año macahehi ema Pablo tayehe eta máitecapihahi. Tamutu sácheana majacapa-
vacahi ena tipaipiuchanapahi.

³¹ Máechajisihahi eta máechajiriruva ema Viya, máimitucahivare eta náehisiraina ema
Viáquenu Jesús, émairahi yátupiquenehi Cristo. Nájina nacamatinaahini. Náisapahi ticame-
tarairu.

Tamutupa eta néchajiriruvana eta piyehe.

Eta macartane ema Apóstole Pablo nayehe ena machamuriana ticavasanahi te Roma, ticajire ROMANOS

¹ Nuti Pablo, mavanaranuhi ema Viáquenu Jesucristo, manerejirunuhivare eta mayehe-nuyarehi apóstole. Tituparacanuhi eta nucametarairuyare eta mapanerechirahi ema Viya eta mavarairahi macuchucuhaya namutu ena ticasíñavanaya mayehe ema Machicha.

² Ema Viya, ánaquiaparipahi eta juca mametasiravacahi ena víyarahaini santo profetana eta mapanerechirahi eta macuchucuiraya ena achaneana. Tásiha, nájuequeneharipahivare éna.

³ Eta Sagrada Escritura táechajisihaipa ema Machicha ema Viya eta máucupaisirayarehi te juca apaquehe. Yátupiyarehi Cristohi éma. Achanequenehi eta máimahi.

⁴ Natiarihihisera ena ticatianacananahi éma. Náimicapacahi éma. Émasera ema Espiritu Santo, tíaramicarehi eta macaechepusirahi éma te máecari. Étapa tímerechahi eta yátupique-nérahí Machicha ema Viya.

⁵ Puiti ema Viáquenu Jesucristo tijapanunuhi eta matuparasiranuhi eta nuyaniraya nupaicaya te tamutu avasareana, nucametarairuyarehi eta najacapacarevayarehi me Viya namutu ena tisuapanayare, náehica éma.

⁶⁻⁷ Te namuri ena nasimutuqueneana, etiarihivare éti apanava. Tíchuhahehivare ema Viya, machanerayarehi ema Machicha Jesucristo, mavaraha tauri eta ecaemataneasiraya éma. Puiti nucajurehe eta juca nucartane emutu eti nuchamuriana ecavasanahi te avasare Roma, máemunaruqueneanahi ema Viya. Nuvaraha macatajicahehini ichape ema Tata Vicaiyaquene, émapa ema Viáquenu Jesucristo; nájaracahéhini táurivaina eta epanereruana.

Ema Pablo mapanerechaipa tiyanayare te Roma

⁸ Núti, tétavicavahi eta nucunachirahi ema Viáquenu Jesucristo, nuhasulupayachahi ema Viya íchavenehi emutu éti. Namutu ena achaneana te avasareana téchajisiaheanahi eta yátupiraripahi éhica ema Viya.

⁹ Núti nuvapinavahi eta nucaemataneasirahi ema Viya, eta nucametarairuirihi eta máimiturapiana ema Machicha Jesucristo. Ema Viya tímararacanuhi eta néñamiravahi eyehe éti. Núti, tamutu sácheana te nunarasirana, te néchepusirana, nuyaseuchahehi me Viya, májaracahehini eta iúrvínahíni éti.

¹⁰ Nuyaseuchavahivare eta máisapiranuínahíni nítujsiravainahini nupaipuchahe.

¹¹ Ichape eta nuvarairahi nímahaha, nímicatacahehini eta tajurusiraya eta íachanevana apaesa muracaquenénapaini eta éhisiraya ema Viya.

¹² Éti apanava ímicatacanuhini. Vétumejiricacahivaréni eta véhisirahi ema Viáquenu.

¹³ Nuparapenaveana, nuvaraha numetacahe apaesa echa. Ichapemurihi eta nuvarairahi níteca nímahapanaha. Puíticha, vuíchahasera nítujevaca. Tijuricati nétipicavahini eta nítesirainahini eyehe, natiarihichuhupucaini nucajimuyacavacahini eta nanerejisiravainahini náehicahini ema Viáquenu, tácutihini te nupaicainapa te apana avasareana.

¹⁴ Taicha ichape eta néñamiravahi núti eta nucatuparahairahi nucametarairuyare nayehe namutu ena achaneana te íchapeana avasareana énapa ena tiávihana te vámahiana, ena tiávihana te isanitiana. Nájina nunerejiruimahi. Namutuyare numetacavaca: ena cráyanaa rícoana énapa ena páureana.

¹⁵ Tacahe, núti nutserereacavahi eta nupaipiuchiraheya te iávasa Roma, nuvarairahi nímitucahe eta máechajiriruva ema Viya tayehe eta véhiruhi.

Vijacapacareipahi mayehe ema Viya táichavene eta vicasiñavairahi mayehe

¹⁶ Núti nuvapinavahi eta nímitusirahehi tayehe eta véhisirahi ema Cristo. Tájina vahi nutsirihahini, taicha tétavicavahi eta macasiñacarevahi ema Viya máitauchayare tamutu eta macuchucuirahavi. Éma, tétavicavahi eta mavarairahi nacasiñavahini ena israelitana eta mayehe, énapa namutu ena apamuriana achaneana. Tétavicavahi eta máitupajijiasiravahi máitsivachinahi eta náitaresirana, tamutupa arairuhi máicha.

¹⁷ Taicha ema Viya máimerecaripa eta vijacapacarevahi eta mayehe vimutu viti vicasiñavanahi mayehe. Tájinapa vácamunuhini. Tarataripa eta vicasiñavairahi mayehe. Tásiha, éma ticuchucuhaviripa. Taicha eta Sagrada Escritura, ani tacahehi eta táechajiriruvahi: “Nácani ticasíñavanahi eta me Viya, tijacapacareanahi, máichecuaraquireyare eta náitaresiraya táicha”.

Ticaviurevana namutu ena achaneana táichavene eta nájecapiravana

¹⁸⁻¹⁹ Acane ema Viya manacasamurechahi ena achaneana eta matiarahirahi éma. Manacasamurechahivare eta máicuñasiraya namutu ena téjecapavanahi, máurirahanahi. Yátupihí eta nacaicuñairayare táichavenehi eta namasuapirahi eta yátupiqueneana, váhivare návarahahini náinajicahini eta navainarajivana.

²⁰ Máimahasihinéni ema Viya Eterno eta viyehe, véchahisera eta matiarahirahi, taicha tamutu vímaha eta máepiyaruanahi, étaripa eta apaquehe éta eta tatiariqueneanahi. Émarichuhi ema Viya téchapajiricahi tamutu eta táepaniravahi eta juca apaquehe, puíticha eta juca víavacurehi. Étara vímatiarahi eta matiarahirahi ema máitupajijiaruvaquenehi. Énaserá ena achaneana, vai návarahahini nacasiñavahini eta mayehe. Éta naviurevahi éna.

²¹ Tamapurujihisera eta náimatirahi ema Viya, vahi návarahahini nasuapahini; váhivare napicauchahini. Váhivare nahasulupayachahini éma. Tétavicavahi eta tájecapiravahi eta napanereruana. Étachucha napanerechahi eta tájiparacana. Muracasamureanahivare.

²² Ticasíñavaicanahi taicha tímijachavanahi títipajijiacavana. Tétavicavahisera eta namaiturerevanahi.

²³ Vaipa najirauchahini ema Viya máepenacacahi. Váipavare mapicauchacarehini nayehe. Tásiha, náemitisicaipa éma. Nasapihapa najirauchahi eta nasiñarajiana achane-mirana matumerairahanahi náipunchucha ena achaneana. Tamutuchucha nacasiñarajipahi cáyurepuca, quicharepuca, sáramirapuca.

²⁴ Tacahe, eta máimairahi ema Viya eta náichirahi eta júcana, máisapapa éma. Máinajiacavacapa. Puíticha navaraharichucha tímianavana naicha eta natuhusivana títsiriaca-reanahi. Tavayucahivare eta najamuraraivana tamauriqueneana. Tétavicavahi eta namaeperajisiracacahi.

²⁵ Tétavicavahivare eta náepuirahi ema Viya, émayarehi najiraureyarehini. Tasapihapa téjecapavanahi, eta náimijachirahi tíuripana eta najirauchira eta nasiñarajiana náepiyaruanahi. Tásiha, náemitisicapa ema yátupiquenehi. Jéhevarequenehi máichecuaráquireyarehi eta majirauchacareva. Amén.

²⁶ Eta tacahe, ema Viya macaerajicavacapa. Vaipa mávarahahini máemechavacahini. Máisapapa náichahi eta navarahaqueneanahi. Tásiha, tétavicavahi eta náichaqueneanahi. Nararihi ena esenana, énajicacapa náichacacahi eta napecaturana. Vaipa nácomesahini ema ajaira.

²⁷ Énaripa ena ajairana, nararivare énajicacahi náichacacahi eta pecatuana. Vaipa nácomesahini esu esena. Navayuchaipa eta najamurachiracacahi. Váhiquene nátsirihahini. Táichavenehi eta náejecapiravahi, énajivapa tímitaequenehavana tayehe eta náicuñayare.

²⁸ Ena nani, ichape eta nacaerajisiravahi eta me Viya. Vaipa návarahahini náesenicahini éma. Váhivare návarahahini napanerechahini eta táuriqueneana. Tásiha, ema Viya máinajiacavacapa, vaipa émainahini máechavacahini. Máisapapa tímianavana eta náichirahi eta tájiparacana tamauriqueneana.

²⁹ Tétavicavahi eta náepiyaresirahi eta napecaturana tamauriqueneana: Navehahi esu esena apayena. Ena amaperuana náichahi eta natuhusivanahi. Téharahiana nayehe nácani matapiravareanahi. Tamutupa navaraha nacayehe, cáetemarahiana, ticapinarurahiana, ticapahiana, tiplararecana te tise mana, tivayurecana, sémarairihiana, téchejihiana.

³⁰ Tíñemahi eta náechejisirana nayehe ena apana achaneana. Nacatichavare ema Viya. Tíacapaemarahiana, cájamuravana, píncanillana, tísiñavavairicana. Tísipanerehiana eta náichirayare eta apana pecatu navarahaqueneana. Masuapajirairahanavare nayehe ena ticachichana.

³¹ Tímijachavanahi tétupicavana eta náichirahi eta tamauriqueneana. Tivayarահiana eta náechajirisiravana. Vahi témunarահiana. Váhivare típerdonarahiana, nájina najapanu- quenéna.

³² Náechahinéni éna eta tamaurivahi eta júcana me Viya. Náechahivare éna, eta táimicapacásiravacayarehi, tímianavanarichuchasera eta náichirahi. Náimiquipaicahi nácani apamuriana. Émasera ema Viya máitachayarehi eta náicuñayare.

2

Ema Viya títipiruvahi eta máitachirayarehi eta náicuñayare

¹ Étarihisera éti ímijachahi tájina eviurevaimahi eta vahi ácutimahi ena apamuriana máimatirahanahi ema Viya. Ímijachavahi tájina epecaturaina. Éti ecaecahivacahi ena tíchanahi eta tamauriqueneanahi. Váhiserá étupicavahini eta ecaecahirahi, taicha étirichuhi nacutiqueneanahi eta íchaqueneana. Énerichuhivare eti ecaviurevahivare.

² Viti véchahi matupiruvahi ema Viya eta máicuñasiravacaya ena tíchanahi eta juca tamauriqueneana.

³ Étipa, éjecapavahi eta ímijachirahi ticaitcaheyare eta ícuñayare, eti ícharahiana eta tavasi-queneana ecutirichuhinéni ena ecaecahiqueneana.

⁴ Émasera ema Viya, tétavicavahi eta máurivahi eta eyehe. Vahi maícuñacahevanehini. Ticamichahehi, ticuchapahevihare, mavarairahi éneuchavahini eta mayehe, ínjacihini eta íchira eta tamauriqueneana. Tásiha, vahi ecuemepurureca eta máurivahi eta eyehe.

⁵ Taicha táifehiqueneayare eta ícuñasamiyare éti, te vahi ecueuechava, ínjacjavare eta tamuracavahi eta esamureana. Taicha evayuchapaichucha eta ecurumutusrirahi eta etapi-ravana.

⁶ Taicha éma, matupiruvahi eta májjarasirayare eta táitsivayare eta víchaquenepachu.

⁷ Vítiripa viti machanerana ema Viya, tíjaracahavinapa éma máichecuaraquireyare eta vítaresiraya, taicha vivaraha puiti vicurisamurechaya éma, vímivanavaya eta vivapinai-ravayare vicha eta táuriqueneana. Vicuchapavaya eta visipiraya eta te majaraivahi, vicunachacareya mayehe, máichecuaraquireya eta víuricacarevaya.

⁸ Muracainapasera eta máicuñasiravacaya namutu ena masuapajirairahanahi énaripa ena ticatianacanahi eta yátupiqueneana, tasapihahi náuricahi eta tamauriqueneanahi. Navayucharipa eta náimiyusemasirahi ema Viya.

⁹ Ichape eta nacatajivairaya, tíyahacavanayare namutu ena tíchanahi eta juca tamauri-queneana. Ticuticacanayare namutu eta náicuñayare, ena israelítana énapa ena apava-sanana.

¹⁰ Étiserá eti íchanahi eta táuriqueneana, tíjaracahénapa ema Viya eta íávihaya te ma-jaraivahi. Tétavicavaya eta ecunachacarevaya mayehe. Tinaracainavarepa eta epanere-resiranainihi. Ecuticacaya emutu eta iúricacarevaya. Eti israelítana, vahi ecachuricaimahi ena apavasanana.

¹¹ Ema Viya vahi manerejicaimahi ena máicuñaruanaya. Ticuticacanayarehi máicha.

¹² Nácani máimatirahanahi eta mavanairipiana ema víyarahaini Moisés, ticaicuñanayare. Énerichu nácani náimatihinénipuca, tavetijinapa ticaicuñanayare taicha vahi nasuapahini.

¹³ Taicha vahi tíjacapacareanaimahi mayehe ema Viya nácani vahi náitauchahini eta nasamaqueneanahi. Tíjacapacareanayaresera nácani títauchanahi tipicauchanahi eta vanairipiana.

¹⁴ Nararihivare ena tinerejicavanahi ena apavasanana, váhinéni náimatihini eta vanarip-iana, nasapihasera natupiruvahi te nasamureana eta náichirahi eta táuriqueneanahi, taicha yátupíhi eta nasuapirahi eta manacasamurechaquenehi ema Viya.

¹⁵ Éna, náimerecahi eta manacasamurechirahi ema Viya eta vanairipi te nasamureana. Énajivaya tisamavana te napanereruana eta táurivahi eta náichaqueneana, éta ticatiucha-vacahi. Te téjecapavanapuca, tisamavanahivare eta taurivahi eta náichaqueneana. Tásiha, napicahi eta náicuñayarehi táicha.

¹⁶ Járájapa eta sácheyare, ticayasereserhianainapa namutu ena achaneana te mamirahu ema Viáquenu Jesucristo. Éma, máimatiya tamutu eta náichaqueneana tayumururevanahi. Étarichuhi eta numetarapíhi te nucametarairupa.

Ena israelítana, ena ticatuparahainihi eta vanairipiana, váhisera náitauchahini

¹⁷ Étiserá eti israelítana, ímijachavahi yátupíhi ítaucha eta vanairipiana, ecunachavaipahi mayehe ema Viya.

¹⁸ Ímijachahivare ítuca eta mavarahaqueneanahi ema Viya. Énerichuvare eta vanairipi éhiruhi tímitucahehi eta enerejisirayare ícha eta táuriqueneana.

¹⁹⁻²⁰ Tétavicavaipahivare eta ecunachiravahi taicha ímijachavaripa ecatuparaha eta ímitusraya ena apavasanana apaesa náesenicahini ema Viya, náimatiyareva eta máechaji-riruvana, náinjicayareva eta napecaturana, váipavare nanasimahi eta te timapícu. Ímija-chahivare ímatiequeneha tamutu eta vanairipiana, ítamutusrirahi tamutu eta tayeheana yátupiqueneana.

²¹ Éti evarahahipuca ímitureca. Tituparacahesera étivaya ítaurahi. Éti, ímiturecahi vahi nacuamereca ena achaneana; étiserá epanerechahi eta íámeresiraya.

²² Tacutiquene váhivare iúrica nacaesenarahini ena eparajairavana; étiserá epanerechahi eta ecaesenaraya. Ecatichavare eta nasiñarajiana; étiserá matsirairairahahehi eta eve-hairahi eta tájjaracasiana eta nasiñarajiana.

²³ Ecunachavahi eta ímijachiravahi ítuca eta mavanairipiana ema Viya; étiserá tamutu sácheana ícatayayajicahi eta mavanairipiana. Tétavicavahi eta emapicauchirahi éma.

²⁴ Aní tacahe eta Sagrada Escritura: “Ena achaneana vahi napicauchahini ema Viya íchavenihi éti israelítana” tacahepa.

²⁵ Eti ecunachavaipahi eta israelítairahehi. Tacamunuhisera eta itauchirainahini eta vanairipiana. Taicha eta juca emaitauchirahi, tímcutijiricavaichucha vahi étinahini israelítanainahini.

²⁶ Ticachuricaheanaripa nácani apavasanana, nasapihaipa náitauchahi eta vanairipianahi. Ema Viya máimahari eta táurivahi eta náitauchirahi, váhineni israelítanainahini éna.

²⁷ Ena apavasanana títaurahianahi tayehe eta vanairipiana, éna týaseserecanainapa eta ícuñayare emutu eti emaitauchanahi, émpururecavaipahi israelítairahehi, étapa eta ecaravahuirahi eta vanairipiana.

²⁸ Váhivare étaimahi ecunachacarevaya eta ecamarcairahi te íaquehe eti israelítana.

²⁹ Nácanisera yátupiquenehi eta nasuapajiraiva, jéhevare ena yátupiqueneanahi israelítana. Vahi tácomesaimahi ticamarcana te náqueheana, taicha éna yátupiquenehi te nasamureana námahi eta nacamarcairahi eta machanerairavacahi ema Viya. Vahi étaparacainahini eta nacaravahuirahipuca eta vanairipiana, étainapapucaini nacunachacarevainahini nayehe ena achaneana. Eta ticamunucarehi eta náitauchirayare eta mavanairipiana ema Viya. Étapa nacunachacarevaya eta mayehe.

3

Ena israelítana tímijachavanahi nacarichu ticunachacareana

¹ Eti nujaneanana ímijachavaipa ecunachacarehi taicha eta israelítairahehi, ecamarcairahivare te íaquehe.

² Jéhesare, jararihi eta ecunachacarevahi, máicha ema Viya. Éma, matuparacavacahi ena víachucanaveanaini eta náimituresirahi eta yátupiqueneana máechajiriruana, vítipa viti námariégueneana.

³⁻⁴ Tayanapane natiarihihi ena vijaneanana vahi náitauchahini eta natuparahahi, émasera ema Viya, váhiquene títavaimahi eta máitauchiraya tamutu eta májararuvanahi eta nayehe. Taicha tétavicavahi eta máitauravahi éma. Tayanapanepuca natiarihi ena achaneana énaína náepiyahirahi, émasera ema Viya máitauchayare tamutu. Eta Sagrada Escritura, ani tacahe: “Tayanapane ena achaneana vahi navarahahini nasuapa eta pítauravahi, píti Tátachicha, tamutu sácheana pímerechahi píti eta pítauravahi. Tayanapane natiarihi náimijachahi vahi tátupiruvahini eta píchaqueneana, tétavicavahisera eta pitupiruvahi te tamutu” tacahepa.

⁵⁻⁶ Vimutu vímati tétavicavahi eta majapanuravahi ema Viya. Németeacasera etarihi eti ímijachahi tíapajucavayarehi eta macunachacareva taicha eta esipecurairavacahi. Ímijachavavare vahi tátupiruvahini eta masemairahi eta ecapecurairahi. ¡Tétavicavahi eti éjecapiravahi! Ecuti ena achaneana mapanererureana. Ema Viya, tatuparacahi máicuñacavacayare namutu ena téjecapavanahi, taicha tétavicavahi eta masantovahi.

⁷⁻⁸ Ímijachavahi tísapacarehi eta épiyahiraiva, taicha ímijachavahi títametacahe eta yátupirahi eta tatupiruvahi eta máechajiriruvana ema Viya. Ánipapuca tacahe eta epaneruruana: “Ema Viya ticajare tíjapanurahi. Tacahe, tíapajucavayare eta macunachacarevahi éma, taicha táetaviuchayare eta majapanuirahavi eta máimairainapa eta vivayuchiravahi eta vivainarajivana. Tásiha, vahi tátupiruvahini eta mavarairahi tícuñacahavi, taicha tíapajucava eta macunachacareva vícha, ¿masi?” ecahepuca eta epanereru. Natiarihivare ena tépiyaquenehahavi náimijachahiji tacahe eta vímiturapi viti apóstoleana. Muracayaresera eta náicuña namutu ena tacahehi eta napaneruruana.

Vimutu viti achaneana vicaviurevahi eta me Viya

⁹ Eti nujaneanana, vahi ecuímijachava viti israelítana víúripanahi nayehe ena apamuriana achaneana. Tájinaquene víúrivainahini te mamirahu ema Viya. Taicha vímatiequenehapa eta vimutuirahi vicaviureva me Viya viti achaneana, viti israelítana énapa ena apavasanana.

¹⁰ Eta Sagrada Escritura, ani tacahe: “Nájina náurihini, émanainahipucáini máurihini, ésunainahipucáini esena súrinhini.

¹¹ Nájnavare énajivainahini náimatihini ema Viya, váhivare navaraha náesenica ema Viya.

¹² Namutuhi téjecapavana, namutuhivare táquipacahi eta tamauriqueneana. Nájina náichahini eta táuriqueneana, émanainahipucaini máichahini.

¹³⁻¹⁴ Tíñemahipi eta náechajirisiravana. Tétavicavavare eta navayuaravainahi. Éna nacuti eta quichare téchurahi, tétavicavahi eta nacaetemaraiiva. Náematanechucha namaldicióncha nácani apamuriana.

¹⁵ Apaesarichu nacamunu navarahaipavare ticaparecana.

¹⁶ Sirujiana eta náitatesirana, ticaetemarerecana.

¹⁷ Vahi natanucaimahi eta náurivainahini nayehe ena apamuriana.

¹⁸ Tájina vahi napicauchaimahi ema Viya” tacahepa eta Sagrada Escritura.

¹⁹ Nujaneanana, eti ímijachavaipapuca vahi étinahini táechajisiha eta Sagrada Escritura. Téchajisihahehisera, taicha eti íávacuhanahi eta vanairipiana. Emutuhi ecaviurevahi. Te jena sáchezare, vaipa ecatiuchavaimahi. Ematinainaripa emutu taicha eta eviurevanahi. Táurica eta ecaicuñairayare emutu.

²⁰ Natiarihipucasera nácani tímijachavanaripahi tijacapacareana taicha navarahainapa náitauchaya eta vanairipiana. Váhiquenesera tijacapacareanaimahi me Viya, taicha vahi étaparacaimahi eta náitauchirahi. Taicha eta vanairipiana, tímimaticahavichucha eta vicapecaturairahi.

Vijacapacarehi mayehe ema Viya táichavenehi eta vicasiañavairahi mayehe ema Machicha Jesucristo

²¹ Puitisera, ema Viya tímimaticahaviripa eta vijacapacarevayarehi eta víuchucuiraya. Vahi étaparacaina eta vivarairhipuca vítaucha eta vanairipiana. Tanasiqueneripa eta Sagrada Escritura, táechajisihaipahi eta máitecapiraya ema ticatiuchahaviya, vijacapacareya máicha.

²² Eta tacahehi puiti, yátupihí eta vijacapacarevahi vimutu viti vicasiañavanahi mayehe ema Jesucristo. Ema Viya vahi manerejicaimahi nácarichuhini ena tíuriana. Váhivare máepuruimahi ena achaneana tisipecaturanahi. Eta nacasiañavirahi eta mayehe, majacavacahi namutu.

²³ Taicha yátupihí eta vicapecaturairahi vimutu. Vimutu véchuriaca eta víurivana, vijacapacaréni me Viya. Nájina émanáinahíni mátipuruhíni.

²⁴ Étasera eta máemunasirahavihi ema Viya, tijapanuhavihi. Tijacapahavihi táichavenehi eta vicasiañairahi ema Machicha Jesucristo. Émapa tivachachinahavihi eta vitapiravana táichavenehi eta vipecurana.

²⁵⁻²⁶ Ema Viya, tétavacavahi eta matupiruvairahi. Vahi macamichaimahi ena téjecapavanahi te machacaya. Tásihasera, tijapanuhavihi. Májararecahi ema Machicha eta mavachachirahi eta vipecurana, vímicapacahi éma. Eta vicasiañaira ema Jesucristo, macaepahahi eta véjecapiravanahi vipecuranahi. Tásiha, vijacapacarehi mayehe ema Viya.

²⁷⁻²⁸ Tacahe, puiti visamaripahi eta majacapirahaviripa ema Viya, étachucha tíchahi eta vicasiañairahi ema Jesucristo. Vahi vétupicavahini eta vicasiañavairisirahi eta vítauchiraipa eta vanairipiana. Váhiquenevare étaparacaina.

²⁹⁻³⁰ Vahi ácarichuimahi eti israelítana ejacpacarehi me Viya. Énerichuvare tijacapacareanahi namutu ena apavasanana ticasiañanahi. Tijacapahavihi ema Viya vimutu viti vicasiañavanahi eta mayehe.

³¹ Váhivare ecumijacha nútinahipucaini nímitucahe vaipa tasuapacarehini viyehe eta mavanairipiana me Viya. Viti véhicanahi ema Jesús, táitusiava vicarichuhi virataha vítaucha eta mavanairipiana ema Viya. Vahi vínajicaimahi.

4

Vicutiyarehi ema víyarahaini Abraham eta macasiañavairahi mayehe ema Viya

¹⁻² Németeaca etiarihi eti evarahaipa échajisiha ema víáchucaini Abraham. Evaraha ecunacha eta macamataneasiranahi ema Viya, ímijachirahi éta tíchahi eta majacpacarevahi me Viya. Ímijachahivare táuríha eta macasiañavavaisiravapuca éma. Numetacahesera: Eta majacpacarevahi me Viya, vahi étainahini táichahini eta macamataneasirahi ema Viya.

³ Eta Sagrada Escritura, ani tacahe: “Ema Abraham, tétavacavahi eta macasiañavairahi me Viya. Eta tacahe, tijacapacarénehi me Viya” tacahepa.

⁴⁻⁵ Tiuri puiti, viti achaneana, te vicaematanerecahi, tatuparacahi ena vicaemataneyeuranahi eta navachachirahaviyarehi. Vahi tíjaracasichahavianaimahi eta najapanuirahavihini. Émasera ema Viya tijapanuhavihi, tijacapahavihi táichavenehi eta vicasiañavairahi eta mayehe. Vahi étaparacaimahi eta vicaematanesirahi.

⁶ Énerichuva ema víyarahaini David máechajisihahi eta náuricacarevahi ena ticapecaturarahiana eta majacapiravacahi ema Viya, tájina étaparacaina eta nacaematanesirahi.

⁷⁻⁸ Ánipa macahehi: “Tétavacavapa eta náuricacarevahi nácani maperdonachaqueneanahi ema Viya eta napecaturanaini, tijacapahavihi tímicitijiricavainehi tacujahini véjecapiravainahini” macahepa.

⁹ Tacahe, eta juca víuricacarevahi, vahi vácarichu vicituparahahini viti israelítana. Énerichuvare tatuparacahivare ena apavasanana. Vécharipahi eta majapanuirahi ema Viya ema Abraham. Tacarichuhi eta macasiañavairahi, majacapahi ema Viya.

¹⁰⁻¹² Ímijachaipapuca éti, eta majacpacarevahi ema Abraham tásihaquenehi eta macamarcairahi. Numetacahesera: Váhiquene étainahi táichahini eta macamarcairahi

éma, taicha te táequenepa eta majacpirahi ema Viya, mapaenumavahi ticamarca ema Abraham. Éta pa tácutiarayarehi eta majacpiraipa ema Viya táichavenehi eta macasiñavairahi. Émara ema achane máinapuiruhi ticasíñavahi me Viya. Puiticha ema Abraham, émapa vicaiyaquenehi vimutu viti vicasíñavanahi me Viya, vijacapacareipa víti apanava. Tacamunuipasera vácuticacahini vicasíñavahini mayehe, viti israelitana étipa eti apavasanana.

Éma Viya máitauchayare eta májjarasirahaviya eta vícuchihi táichavene eta vicasíñavairahi eta mayehe

¹³ Éma Viya tjaracavahi eta májjarasirayare ema Abraham éna pa ema mámariequeneana tamutu eta apaquehe, návapairuyare. Májjaracayare táichavenehi eta macasiñavairahi ema Abraham. Vahi étaparacainahini eta masuapirainahini eta vanairipiana.

¹⁴ Taicha te tatiarihinahini eta náicuchihi ena tútauchanahi eta vanairipiana, tamapurujipapucaini eta vicasíñavairahi, tamapurujipavarepucaini eta májjarasiravahi ema Viya eta majacpirahaviyare.

¹⁵ Taicha eta vanairipiana, étachucha támaparaucha eta náicuña ena téjcapavanahi. Tásiha, vimutu vicaicuchiyarehini eta vícuña, taicha vimutu véjcapavahi*.

¹⁶ Éma Viya, tétavicavahi eta majapanuraivahi. Tásiha, yátupi máitauchayare eta májjarasiravana nayehe namutu ena mámariequeneana ema Abraham. Vahi nácarichuhini ena téhicanahi eta vanairipiana. Nayeheyareva namutu ena ticasíñavanahivare mayehe, ticutianahi ema Abraham eta macasiñavairahi. Eta tacahe puiti, eta vicaiyairahi vimutu víti ema Abraham te mavahuana ema Viya.

¹⁷ Taicha ema Viya, áni pa maicha ema Abraham: “Puiti nunacaviyare píti nacaiyaquene yare ena achaneana te camuriquene avasareana”. Tásiha, ema Abraham, ticasíñavahi muraca me Viya eta máitauchirayare eta májjarasirayare ema machichaya, tayanapane eta mácheruanahi éma, ésupa esu mayena. Taicha ema Viya, tamutuhi máituruequeneha. Éma Abraham ticasíñavahivare eta majacpirayare eta máicuchihi, tayanapane tájinaichaha máimahahini.

¹⁸ Éma Viya mametacavarepa ema Abraham eta macachichairayare, camurianayare ena mámariequeneanayare. Éta nasimutuvayare, tamutu nacavasayarepahi, camurianayarehi eta návasanaya. Éma Abraham, ticasíñavahi eta táitauchiravayarehi tamutu. Ticuchapavaipa eta máachusirayare ema machichayarehi.

¹⁹⁻²¹ Éma Abraham, ichavicaipa éma, cien año eta mahañora. Ésupa esu Sara, ichavicaipavare, macheruhivare. Vaipa náuriahini eta nacachichairayarehi. Váhisera máeñamavahini ema Abraham. Ticasíñavahi muraca eta mayehe ema Viya eta tamutuirahi máituruequeneha eta máitauchirayarehi tamutu eta májjarasiravanahi. Váhisera mapicacaracavahini. Eta macasiñavairahi, tétavicavahi eta macunachirahi ema Viya.

²² Éta tacahe, ichape eta majacapacarevahi me Viya táichavenehi eta macasiñavairahi muraca.

²³ Tacahe, eta vicaravahuirá eta Sagrada Escritura, vímatiequeneha vahi mácarichuhini ema Abraham majacapacarehini me Viya.

²⁴⁻²⁵ Puiti, víti apanava vijacapacarehi me Viya eta vicasíñavairahi mayehe. Taicha ema Viáquenu Jesucristo táimicacacahi eta vipecaturana. Émasera ema Viya macaechepucahi ema Machicha te máecari apaesa vijacapacareyarehi mayehe vimutu viti vicasíñavanahi mayehe.

5

Tétavica eta víuricacarevahi táichavene eta majacpirahavihi ema Viya

¹ Puitiripa vijacapacareipa me Viya táichavenehi eta vicasíñavairahi eta mayehe. Tásiha, tétavicavaipa víurivahi eta mayehe. Vaipa vipicacaracavahini tayehe eta vícuñayarehini, taicha ema vímicuñaruhí ema Viáquenu Jesucristo, macaepaharipa eta vícuñayarehini.

² Máichavenehi ema Cristo, tétavicavahi eta majapanuirahavihi ema Viya. Tásiha, tijacapahaviripa táichavenehi eta vicasíñavairahi eta mayehe. Tamutu sácheana víurísamurehi eta vicuchapiraipa eta vijacapirayare eta vícuchihi vísiapirayare te majaraivahi ema Viya.

³ Te tatiarihnapuca eta vicatajivairayare, vivapinavachucha eta vicamichirahi taicha tétumechahaviya eta vímianirava véhica ema Viáquenu.

* 4:15 Éma Pablo te mayeherepi eta máechajiriruvana, ani macahe: “Te táviha tájina vanairipi, nájinavare ticaviurevahini eta náejecapira tayehe”. Étasera eta macayemaquenehi, ani tacahe: “Tatiaríhi eta víviurevahi vimutu, taicha tatiaríhi eta vanairipi te tamutu jácani vicaijuhepuca”.

⁴ Táichavenehi eta vímiyanirava véhica, vijacaparipavare eta vitumevayare viratahairayare vicamicha tamutu. Tásiha, eta vicamichirahi tamutu, vicuchapainapa eta táitsivayare vícuchihi.

⁵ Tájina tímipanereréahavimahi taicha yátupiyarehi eta vijacapirayare eta vícuchihi. Vicasíñavahi mayehe ema Viya taicha tímimatichahaviripa te visamureana eta máemunasirahavihi máichavenehi ema máijjaruhavihi Espiritu Santo.

⁶ Víti, tájina viviyaimahi eta vicuchucuiraváinahini. Émasera ema Cristo, te tíurihi eta máimairahi, tjaracavahi tépena víchavenehi víti máurirahanahi, eta macuchucuirahaviya.

⁷ Váhiserá tácuticacahini eta visamureana víti achaneana. Vimutuhi véñama eta vítaresira. Téhesera tatarahinapucaini eta véñamirainahini mácani achane máetaviuchahi eta máuriva, vijaracavapucaini vépena eta vicatiuchirainahini éma.

⁸ Émasera ema Viya, tétavicavahi eta máemunasirahavihi, tayanapane eta vicapecaturarahirichahanéni. Májararecahisera ema Machicha Jesucristo máepeninahavihi.

⁹⁻¹⁰ Tásiha puiti, vijacapacareipa me Viya táichavenehi eta vicasíñairahi ema Jesucristo eta máepeninahavihi. Ichapehinéni eta véjecapiravahi, vimaesenisirahi ema Viya, mavarahisera éma macaepahayarehini eta vícuñayarehini táichavenehi eta vipecaturana. Eta máepenirahi te crusu ema Machicha, puiti ema Viya tíchuhahavihi vipauchayare éma. Tájina vipicahini eta víavahásiraipa éma. Tásiha puiti, eta vicasíñavairahi eta mayehe, vaipa véñamavahini tayehe eta víuchucuirayare taicha eta máechepusirahi te máecari, eta tímicaecherachahi eta máitupajjiasiravahi eta macuchucuirahaviya.

¹¹ Puiti, tétavicavaipa eta víurisamurevahi mayehe ema Viya máichavene ema Víaquenu Jesucristo. Tétavicavahi eta víúrivahi mayehe.

Éma Adán tímiaquiapaicahavi vimutu. Émasera ema Cristo émapa ticuchucuhahaviyare.

¹² Tacahe, ema Adán, ema máinapuiruhi achane tiávapaicahi eta juca apaquehe, éma tinacuchahi eta pecatu. Tásiha, táichavenehi eta pecatu, jaraipapa eta vépenira, tavachaequenehi eta pecatu, taicha tímirijicahaviripa tayehe eta pecatu.

¹³ Te tájinaichaha májuchahini ema Moisés eta vanairipiana, tatiarihipahi eta pecatu te juca apaquehe. Étasera tamajinairachaha eta vanairipiana, víuchaha nacaviurevahini ena achaneana.

¹⁴ Namutusera ena mámariequeneana ema Adán tépenanapaipahi taicha mámaparaucharipahi eta mapecatura éma, tayanapanepuca eta napecurana vahi tácutihini eta mamasuapajiraivahi, tayanapanehivare tájinaichaha eta vanairipi májurehi ema Moisés. Éma Adán, émapa ticaetehavivihi. Te táequenepa, márajapainapa ema apana, émainapa tétupiripanahaviyare.

¹⁵⁻¹⁶ Víti, tétavicavaipahi eta visimutuvahi víti vicaicuñanayarehini tayehe eta ecuñaraqui te yucu infierno, étanaichuhinéni eta májecapiravahi ema víachucaini Adán. Émasera ema Viya, ichaperinehi eta majapanuirahavihi vimutu, mavarairahi ticuchucuhahaviyare máichavenehi ema Machicha Jesucristo. Tamuturipahi macaepahahi eta tasimutuqueneana vipecaturana. Tájina tavachaequenenahini. Tájinavere jácani vicaematanearcaimahi.

¹⁷ Étanarichuhinéni eta pecatu májecapiravahi ema émana achane, émaripa ema víachucaini Adán. Tiámairijicahaviripasera eta vépeniraya vimutu. Émasera ema Viya tiápajucavaipa eta majapanuirahavihi. Tijacpahaviripa máichavenehi ema émanaquenerichuvare achane, ema Jesucristo. Tjaracahavinavarepa eta arairuyare vítaresirayare vimutu víti vicasíñavahi eta mayehe.

¹⁸ Eta mapecaturahi ema Adán, yátupi tiámaparáuchahaviripa vimutu eta vicaicuñairaya. Émasera ema Jesucristo, tájina matapiravainahini eta máitaresirahi. Éma, tiámaparáuchahaviripa eta vítaresiraya víti, vijacapacareipa me Viya.

¹⁹ Camurivahi víti tacaerajiruanahi me Viya, táichavenehi eta mamasuapajiraivahi ema émana achane. Puítisera camurivahi víti vijacapacareanaripahi me Viya táichavenehi eta masuapajiraivahi ema apana achane Jesús, taicha tájina matapiravainahini eta máitare-sirahi.

²⁰ Te táequenepa eta májecapirahi ema Adán, ema Viya manaquicahi eta vanairipi. Éta tímitchahaviyarehi eta tavayuchiravahi eta vipecaturanahi. Puíticha tiápajucavapaipaicha eta pecatu, émasera ema Viya tiápajucavaichucha eta majapanuirahavi.

²¹ Tacahe, eta pecatu, ichape eta támaparáuchirahavihi tayehe eta vépenira. Étasera eta majapanuirahavi ema Viya tiámaparáuchahaviripahivare eta vijacapacarevahi mayehe. Tásiha, píjaracahavinavarepa eta vítaresiraya máichecuaraquireyare máichavenehi ema Víaquenu Jesucristo.

6

Puiti eta majacapirahavipa ema Viya, vicutuparahapa vitupiruvainapa eta vítaresiraya. Vínajicainapa eta pecatuana.

¹ Tiuri puiti, németeaca etiaríhi eti ímijachaipapuca tíurihi vímíyanava vicha eta pecatu apaesapuca tácaecherapahi eta táetaviuchiráhi eta majapanuirahavi ema Viya.

²⁻³ Váhiquenesera táuricahíni vímíyanavahíni vicha. Taicha tépaharipa eta tapamisirahavini eta pecatu. Nuvaraha vahi ecuemitisica eta ímitucasivanahi. Eta vicaicachasirahi eta víjarasiravahi véhicaya ema Viáquenu Jesucristo, víurujiacaripa éma. Tásiha, tímicitijiricavaipa vácachanehíni eta máepenirahi, vépenahivaréni víti. Vaipa tárataha tipamicahaví eta pecatu.

⁴ Eta vicaicachasiraipa te une, tímicitijiricavahi vicaecarasíhi, vicachanepa ema Cristo eta máepenirahi. Énerichuvare eta víuchusirahi te une, vicutipa éma eta máechepusirahi te máecari. Tanasiripa eta ichasíni vítaesira. Tásiha puiti, arairupa eta vítaesirahi taicha máetaviuchiráhi ema Viya eta macemataneasirahaví tacuti eta ichape máitupajijiasiravahi te macaechepucapa ema Machícha. Vaipa táuricahíni víchahíni eta pecatu.

⁵ Taicha eta víurujiasiraipa ema Cristo, vicutiripahi éma eta máepenirahi. Tásiha, étarichu vicaheyarehi víti apanava eta véchepusirayarehi, vicutiyarehi éma eta máitaresirahi, tájina matapiravainahíni. Tásiha víti, arairuinapa eta vítaesira.

⁶ Tacutiquene, eta tamaurivainíhi eta ichasíni vítaesira tacapecaturavainíhi, tímicitijiricavahi te vicaquenureca. Tétavicavahi eta tacavanarairahavíhi, tipamicahavíhi eta víchirayarehi eta tamauriqueneana. Púitísera táecarasipa eta ichasí vítaesira, tacutíhi eta náecarairápa ema Viáquenu Jesús. Vaipa tipamicahavímahi.

⁷ Taicha mácani achane eta máepeniraipahi, tíchecaipahi eta macapecaturairahi.

⁸⁻⁹ Puiti vécharipa eta máechepusirahi te máecari ema Viáquenu Jesucristo, tájina tíaipéchaimahi máepenahivaréni taicha tájina tárataha táimicacahíni. Ene vicahehi víti eta víurujiasirahi ema Cristo. Vécaráipahi eta tamarivahi eta ichasíhi vítaesirahi. Puiti, tamutupa ticaitsivahi. Vicutinapa éma eta vítaesirainapa.

¹⁰ Eta máepenirahi ema Cristo, éta tímicapacahi eta vipecaturana. Éma, vaipa tíápechavaimahi tépena. Tamuturipahi. Tásiha, eta máechepusiraipahi, máichecuaraqurénapa eta máitaresira te mavaure ema Maiya.

¹¹ Ene ecaheyare éti, écarainapa tamutu eta tapamisirahéni eta epecaturana. Puiti eta ítaresirainapa, macarichu ema Viya ecaematanearya, táichavenehi eta iúrujasirahi ema Viáquenu Jesucristo.

¹²⁻¹³ Vaipa eucisapa eta tapamisirahe eta pecatu. Váhivare ecusuapa jácani tajamurachaqueneanahi eta iáqueheana, taicha tétavicavahi eta tamarivahi eta tajamurachaqueneanahi. Tímicitijiricavainapa épenaquene, vaipa échaimahi eta pecatu. Ítarecainapasera mayehe ema Viya, íjararecainapa eta iáqueheana mayehe. Ísapainapa ema Espíritu Santo tipamicahé eta ecaemataneasiraya ema Viya, eta íchiraya eta táuriqueneana.

¹⁴ Eta pecatu, vaipa ticavanarahémahi. Émainapasera puiti ema Viya, tímicitacahénapa eta íchirahi eta táuriqueneana. Énerichuvare vaipa tácamunuhíni eta táipicararesirahe eta vanairipiana apaesa vahi ecuquicha eta tamariqueneana.

Ene ticapecaturarahiana tímicitijiricavahi ena ticaquenurecana eta tapamisirahi eta náichirahi eta pecatu

¹⁵ Puiti, németeaca etiaríhi eti ímijachahi tísapacarechaha eta vicapecaturaira taicha vaipa táipicararechavíhíni eta vanairipiana. Étísera, tétavicavahi eta táejecapiravahi eta epanereruana. Ímipanapa eta majapanuravahi ema Viya. Vaipa epicauchahíni.

¹⁶ Écharichuhi éti, te ímíyanavayarechuchapuca eta tapamisirahehi eta pecatuana, ecutirichahapuca mácani ticaquenurecahi, tipamicavayarehi eta masuapirayarehi ema máquenu. Ene ecahehi eta esuapiraichaha eta pecatu. Éta tíámparáuchahehi eta esiapiraya te yucu íferno. Téheserapuca émainapa esuapaya ema Viya, tatupiruvainapa eta ítaresiraya.

¹⁷⁻¹⁸ Nuhasulupayachasera ema Viya eta ínjasisiraipa eta tapamisirahénihi eta pecatuana. Puiti tatupiruvaipe te esamureana eta esuapirahi eta véhiruhi ímitucasivahi. Puiti íjaracavainapa ecaemataneaca ema Viya, iávácharipa eta táuriva eta ítaresiraya.

¹⁹ (Nímicitichinahehi eta juca, taicha vahi máejerarena eta ecaicutiarairaina éta. Nuvaraha yátupina eacutiaraya.) Cape eta ítaresirahi, étarichaha íjararecahi eta iáquehe tayehe eta tamariqueneana, étaviuchahi eta evainarajivanainíhi. Puiti íjararecaya eta iáquehe íchayare eta táuriqueneana, táurivaya eta ítaesira. Tacuíja tahapapicahé eta ecaemataneasiraya ema Viya.

²⁰ Taicha cape juca ítaresirahi étarichaha tipamicahehi eta epecaturana. Vuíchaha étainahini ecaemataneaca eta táurivaya eta ítaresira.

²¹ Tájinavare ímaequenehahini eta íchirahi eta tamauriqueneana. Puítisera, tétavicavahi puiti eta etsirihacarevahi tayehe, taicha ímatipa tiámaparáuchahehi eta esiapirayarehini te yucu infierno.

²² Puíti iúchurepa tayehe eta tapamisirahehi eta pecatu. Iávacuhaipa eta ecaemata-neasiraya ema Viya. Jéhevare eta iúritaresirayare me Viya, máichecuaraquirenapa eta ítaresiraya.

²³ Eta víchirahi eta tamauriqueneana, tacarichu tiámaparáuchahavi eta visiapiarayarehi te yucu infierno. Émasera ema Viya mavaraha tíjaracasichahaviya eta vítaresirayare máichecuaraquireya, te yátupina eta vicasíñarayare mayehe ema Viáquenu Jesucristo.

7

Víti véhicahani ema Jesucristo, títavaripa eta tapamisirahavihi eta vanairipiana

¹ Nuparapenaveana, écharichu éti eta yátupirahi tisuapacarehi eta vanairipiana nayehe eta achaneana, étachuchasera te titarecanarichaha.

²⁻³ Tímicitijiricavahi súcani esena sucaimaquene. Tatuparacahi ésu sucachaneyarehi macarichuhi ema suima, vahi sucucaecahi éma, te jácani achanerichaha éma. Te suvehapuca ema apana achane, ticapecaturaipa ésu. Téhesera te tépenaipapuca ema suima, ésupa téchinava. Tísapacare suapéchava suácaima mayehe mácani suvarahaqueneayare suímayare. Vahi pecatuina eta suapéchiravayare ticaíma.

⁴ Ene ecahehi eti nuparapenaveana. Ema Cristo, máepeninahehi te crusu, macaeparaharipa eta tapamisirahénihini eta vanairipiana. Puiti émapa téchahehi ema Cristo. Ecutiripa esu esena suépenaimaquene te tiapéchava ticaíma, tásiha apanapa ema téchahi ésu. Puiti mavanaraheripa ema Cristo, ema máechepurequenehi te máecari. Mavarahahi ichapeyarehi eta ecaemataneasiraina eta mayehe ema Viya.

⁵ Taicha cape juca ítaresiraichaha, esuapahi eta tavarahaqueneana eta íáqueheana. Te esamapa eta vanairipi tiápajucavahi eta evarairahi ícha eta tamauriqueneana. Tásiha éta, tiámaparáuchahehi eta ícuchihini eta esiapirayare te yucu infierno.

⁶ Puitisera vaípa tapamicahavihinini eta vanairipiana. Puiti viúchucurepa eta ichasi vítaresiraini. Émapa vicaemataneacayare ema Viya taicha tépanavaripa eta arairu vítaresira eta mávahásirahaviripa ema Espíritu Santo.

Eta viáquehe tichurucavahi eta tavarairahi vicha eta tamauriqueneana

⁷ Etiaríhipuca eti ímjichahini tipamicahehi eta vanairipiana eta ecapeaturairaya. Váhiquenesera étaina. Vítiripa vahi vímatiequenehavanehinini eta tamaruvahi eta vicapecaturairahi, te vuíchaha vímatihini eta vanairipiana. Vuíchahavare vímatihini eta tamaruvahi eta vijaumurachirana eta apayehe. Eta vanairipi, ani tacahehi: “Vahi picujamuracha eta apayehe”.

⁸ Téhesera te vímatipa eta juca vanairipi, viápajucavapa vijaumuracha tamutu eta vímahaqueneana tájiparacana. Te tacuijahini eta juca vanairipiana, váhirichuhini vicujamurachahini eta apayeheana.

⁹ Eta viámaperuvaichaha apaicape, vuíchaha vímatihini eta vanairipiana. Téhesera te vímatiequenehapa, visamavapa eta tatiaríhipa eta véjecapiravahi eta vímaitauchirahi eta vanairipiana. Tásiha, véchapa eta vépenirayare, tatiaríhirahi eta vícuchihini eta vícuñayarehi.

¹⁰ Tacahe, víti vímjichaipahi viúchucuhayare te vítauchapapuca eta vanairipiana. Tájinachuchasera tájjarachavihinini eta viúchucuirainahini. Étachucha tiámaparáuchahavi tayehe eta vépenirayarehi.

¹¹ Téhesera te amahe eta visamure, jararíhi eta pecatu. Tavayuarachavipaipa, tacamapurairavahi eta tatiaríhirahi eta vanairipiana, taicha tavaraha táimicapachavi.

¹² Nuvaraha numetacahe: Tiúrihisera eta vanairipi, sántohivare, tatupiruvahivare.

¹³ Németecasera etiaríhi eti ímjichapuca vahi tiuri eta vanairipi taicha támapiricahi eta vépenirayarehi. Vahi tacucahe eta epanereruana. Numetacahe: Váhiquene étainahini eta vanairipi támaparauchavihinini eta vépeniraya. Étarichu eta vicapecaturairahi, étapa tiámaparáuchahavihi eta vépenirayarehi. Étasera eta vanairipi tímereuchahavi eta vimaurivahi víti te visamureana, tétavicavahivare eta vimasupajiraivahi.

¹⁴ Eta vanairipiana tavarahahinéni tímitupiruchahavi. Étasera eta veche máteji, tavayuararuhi eta tavarairahi víchaya eta tamauriqueneana.

¹⁵ Taicha víti váhiquene vímatiequeneha tájahapuca eta vícharacavaya. Vahi véhicahini eta vipanerechahenehi vivarahaquenehi vícha. Tasapíhachucha víchahi eta vicatichahenehi vimavarahaquenehi vícha.

¹⁶ Tatupiruvahi eta vanairipiana eta tametasirahavi eta vicaicuñairayare táichavenehi eta vipecaturana. Tásiha, te víchapunuca eta tamauriqueneana, visamava te visamure eta tamaurivahi eta víchirahi, vémechaemachirava eta tametasirahavihi eta vicaicuñairayare.

¹⁷ Tatiaríhi te viáchaneva eta pecatu. Tásiha, váipanéni vítijiricavahini víchahini eta pecatu. Étasera eta távahásirahavihi te visamure eta pecatu, étapa tipamicahavihi eta víchirayarehi eta tamauriqueneana.

¹⁸ Véchahivare víti eta tamaurivainihi eta táitaresiraini eta viáquehe. Tétavicavahi eta tamasuapajiraivainihi. Tímicutijiricavaipa tichururerechavihi. Vivarahahinéni vétupiricavahini, váhiquenesera táisapahavihini eta viáquehe vétupiricavahini.

¹⁹ Te vivarahainipa vicha eta táuriqueneana, vahi váratahaimahi vicha. Étachucha víchahi eta tamauriqueneana vimavaraquenehi vicha.

²⁰ Te víchahipuca jácani vimavaraquenehi vicha, vaipa vítinahini tásihahini eta víchirahi, étapa eta pecatu tipamichahavihi, taicha tiávahácahavi víti.

²¹ Te vivarahainipa vicha eta táuriqueneana, tasapíhachucha eta pecatu tímiapítavairicavahi tíchejimirauchahavihi. Eta tacahehi eta víchavaquenevahi.

²² Étasera eta viáchaneva, tétavicavahinéni eta tajamurachirahi víchahini eta mavaraqueneanahi ema Viya.

²³ Jararihisera eta pecatu te amahe eta viáquehe. Ichapemurihi eta táehacacairahi tacanarahi eta paure viáchaneva. Tavaraha tíchejimirauchahavi apaesa vahi vicuitauchahini eta mavaraqueneana ema Viya. Tétavicavahi eta táitiasirahavihi, tímicutijiricavaipa vicaerata.

²⁴ ¡Tétavicavapa eta véjapanuraivasamíhi víti páureana! ¡Tacahehi eta vícharacavahi! Németeaca eta vipaneruanahi víti, ticutimahinepa nájina tiratahaimahi ticuchuchahavi tayehe eta tavayuasirahi eta viáquehe eta pecatu, támirahaviyare tayehe eta vépenira.

²⁵ ¡Mararihisera ema Viáquenu Jesucristo! ¡Macarichu éma marataha ticuchuchahavi tayehe eta juca tamauriqueneana! Puitiripa núti, ichape eta nuhasulupayachirahi ema Viya. Tétavicavahi eta nuvapinairavahi eta níchirahi eta mavaraqueneanahi. Étasera eta ichasiqenetataji náquehe, ticavanaranuichucha tayehe eta pecatu.

8

Tiúriyarehi eta vítaesira taicha eta mávahásirahavihi ema Espíritu Santo

¹⁻⁴ Puitisera témitiacaripa eta vícuñayahéni víti viávahácanaipahi ema Cristo Jesús. Eta mávahásirahavihi ema Jesucristo, tiávahácahaviripavare ema Espíritu Santo. Émapa, ticaepahahi eta tapamisirahavihi eta pecatu, étapa eta támaparauchirahavihi eta visiapiraya te yucu infierno. Ema Viya, eta máimairahi eta vimaetumechiravahi, vimaratahairahi vítauchahini eta vanairipiana, mavanecapa tiúcupaicahi ema Machicha, macaqueheyarehi eta juca viáquehe víti achaneana. Eta májjarasiravahi, macamítiequenehaipa eta tapamisirahavihi eta viáquehe eta vicapecaturairana. Puiti émainapa téchahaviyare ema Espíritu Santo. Véhicainapa eta mavaraquenehi. Tásiha vínajicainapa eta visuapirainihi eta tavarahaqueneanainihi eta viáquehe tacapecaturaraivaini. Émapa tétumechahavihi eta vítauchiraya eta mavaraqueneana ema Viya.

⁵ Nácanisera nasuapahi eta tavarahaqueneana eta náquehe, étachucha napanerechahi eta náichiraya eta tamauriqueneana. Vítisera víti visuapanahi eta mavaraqueneana ema Espíritu Santo étainapa vipanerechaya eta vicurismurechiraya ema Viya.

⁶ Nácani napanerechahi eta tavarahaqueneana eta náquehe, támaparaucharipa eta nasiapiraya te yucu. Vítisera víti vipanerechanahi eta mavaraqueneanahi ema Espíritu Santo, víti vítarecayare. Viúrina mayehe ema Viya.

⁷ Nácani napanerechaichucha eta tavarahaqueneana eta náquehe, éna macatianaruanahi ema Viya. Taicha váhiquene návarahaimahi nasuapa eta mavanairipi.

⁸ Tacahe, éna étachucha nacurismurerechahi eta náquehe, vahi náitucahini nacurismurechahini ema Viya eta mavaraquenehi.

⁹ Puitisera éti, eta mávahásiraheripahi ema Espíritu Santo, vaipa étaimahi epanerecha eta tavarahaqueneanahi eta iáquehe. Étapa epanerechaya eta mavaraqueneanahi éma. Nácani vahi mávaháruanainahini ema Espíritu Santo, váhivare machaneranainahini ema Cristo.

¹⁰ Étisera, eta mávahásiraheripa ema Cristo, tayanapane táicuchirichuhi eta iáquehe eta táepeniraya táichavenehi eta pecatu, étasera eta iáchaneva títarecayarechucha, taicha ejacaparéipahi me Viya.

¹¹ Táichavene eta mávahásiraheripa puiti éti ema Espíritu Santo, ema Viya macaechepucayare eta iáqueheana, tayanapanepuca épenaquenénaripa. Tacutiyarehi eta macaechepusirahi ema Machicha Jesucristo te máecari. Éti iápechavayare ítareca maicha ema Espíritu Santo.

¹² Tacahe, nuparapenaveana, vicutuparahapa eta visuapiraya ema Espíritu Santo. Vaipa étaimahi visuapa eta tavarahaquene eta viáquehe.

¹³ Taicha te étachuchapuca esuapa eta tamauriqueneana tavarahaqueneanahi eta iáquehe, tájinapa iúchucuiyaimahi, ecaicuchihi eta épeniraya. Téhesera éhicahi eta mavarahaquenehi ema Espíritu Santo, ínajicayareva eta íchira eta tavarahaqueneanahi eta iáquehe, ejacapainapa eta ícuchihi eta ítaresirainapa.

¹⁴ Taicha vimutuhi viti visuapanahi ema Espíritu Santo, machichahaviripa ema Viya.

¹⁵⁻¹⁶ Émaripa ema Espíritu Santo timetacahaviripa eta machichairahaviripa ema Viya. Visamavaipa te amahe eta visamure. Éma, vahi tipamicahémahi. Váhivare típicararecahémahi tayehe eta ícuñayarehini. Timimaticahénapasera eta yátupirahi macachichairahahi ema Viya. Tásiha, ecasiñavaipa eta mayehe ema Viya, émairaipahi ecaiyaquenehi. “Tátachicha Nucaiyaquene” ecaheyarehi.

¹⁷ Eta macachichahaviraipa ema Viya, vijacapainapa eta vícuchihi májjaruhaviya. Vicutinapa ema Cristo eta májjarasirahi eta máicuchihi éma. Puiti, eta vicatajivairahi te juca vítaresirahi, vicutihi ema Cristo eta macatajivairahi, tásiha, vicachanéna éma tayehe eta mávihahi eta majaraivahi.

¹⁸ Puiti németeacahi núti, tayanapane ichapepuca eta vicatajivairahi puiti juca sácheana, tájinachucha táichavahi taicha jararihiyare eta ichape táitsivayare, vijacapaya eta ichape víuricacarevaya te majaraiva ema Viya.

¹⁹ Jéhevare, tétavicavahi eta tajamurachacarevahi te táitecapapa eta sáchevare eta vímairaya eta vicuchapaquenehi eta tacaitsivairaya eta viáquehe vimutu viti machichanaveana ema Viya.

²⁰⁻²² Tacutiquene te jena sáchevare vicuchapaquenehi, tamutuinape témitiacayare eta témecatajivachahavianainihi te juca apaquehe. Tamutuinape arairuyare, tétavicavainapa eta táurivaya eta apaquehe. Vímahá puiti ticatajivanahi tamutu te juca apaquehe: Eta sárareana, ticajumanahi, táepenahi; étapa eta sucurecana. Eta tacatajivairahi tacutihi eta sucatajivaira esu súcani esena ticacatiruhahi eta súinasira. Étasera eta arairuyare apaquehe, ticaitsívainapa tamutu. Vaipa pecatupairemahi, tamicauchainevarepa eta majaraiva ema Viya eta viávhaya viti machichanaveanahi.

²³ Ema Espíritu Santo máitsivacharipa eta viáchanevana. Vaipa táesachaimahi vicha eta pecatu. Váipavare víchaimahi eta tamauriqueneana. Tásiha, viti, ichaperipa eta vicuchapiraipaicha eta jena sáchevare eta tacaitsivairayare eta viáqueheana. Títauchavainapa eta macachichairahavinapa ema Viya. Yátupinapa mayehavainapa.

²⁴⁻²⁵ Yátupihí puiti eta machichahavirahi ema Viya. Ichapevare eta vicasíñavahi eta mayehe eta vicuchapirahi eta víuchucuirayare te jena sáchevare. Vácámicha tamutu, vímíyanava eta vicasíñavairahi eta mayehe támutu sácheana. Tapaenumavainapa vímahainapa, tájinapa vicuchapaimahi.

²⁶ Énerichuvare, ema Espíritu Santo tímícatacahavíhi te tamutu eta vimaratahqueneanahi. Tavetijí tímícatacahavíhi eta vimaitusirahi eta viyaseuchiravayarehi te viyujarasirana. Éma, tíyaseuchaví te viáchanevana. Víúmitichahi taicha muraca eta vivarairahi eta mayasearuana. Vaipa virataha véchajicahini.

²⁷ Émasera ema Viya máimatihí eta visamureana jácani vivarahaqueneana viyaseaca, étaripa eta mayasearapí ema Espíritu Santo. Taicha ema Espíritu Santo máimatihí eta mavarahaqueneanahi ema Viya, tásiha tíyaseuchahavíhi viti machaneranahi.

Éma Viya mavaraha ticachanehaviyare víti te majaraivahi

²⁸ Vécharipahivare tétavicavahi eta majaneasirahavíhi ema Viya vimutu viti vémunacanahi éma. Tayanapane vicatajivahipuca, éma tamutuhi tíuri máicha. Títauchavayare eta mananeruana éma eta víuricacareyarehi eta máichuirahavíhi.

²⁹ Acaneripahi eta máimatirahavíhi, tinerejicahavipa machichahaviyarehi. Mavarahahi éma vicutiya ema Machicha Jesucristo eta máurivahi. Tímícutijiricavayarehi viparapeya éma, véchavimuríhi eta macachichairahavíhi ema Viya.

³⁰ Tásiha, te máimahapa tíuri, tíchuhavípa viti manerejiruanahi. Eta visuapirahi vipauchaipa éma, tíjacapahavípa. Tásiha, tíjaracahavípa eta vícuchihi eta visiapiraya tayehe eta majaraiva.

Tájinaquene ticaerajicahavimahi mayehe ema Viya taicha yátupihí eta máemunasirahavíhi

³¹ Tásiha puiti, nuvaraha yátupina eta ecaicutiariraya eta juca: ¡Tétavicavahi eta macatiuchirahavihi ema Viya! Tájina táichava eta nacatianasirahavipuca nácani achaneana. ¡Váhisera nárataha ticapaquechahavianaimahi!

³² Eta majapanuirahavihi ema Viya, vahi mavayuacahini májjararecapa ema Machicha eta nacapasirahi víchavenehi vimutu víti. Tásiha, mavetijinapa eta macatiuchirahaviyare eta nacapasirahi eta jácani víchavaquenevana.

³³ Puiti tájinaapa viviurevaina táimicuñacahavihini viti manerejiruanahi, taicha ema Viya tépachiacahaviripa eta majacapirahavihi.

³⁴ Tájinaqueneapa tímicuñacahavimahi taicha ema Cristo máepeninahaviripa, tichavari-pavare titareca. Puíticha téjacahi te mavaure ema Viya, téchajurucahviriripa éma.

³⁵ Ema Cristo, tájinaquene vahi máinajicaimahi eta máemunasirahavihi. Tásiha, yátupina eta vicasiñairaina éma. Tayanapanepuca vicatajivahi, váhivarepuca vicuitucahi vétupirica eta víchavaquenevanahi, vicamichahisera máicha. Te vécuhapuca, te vítajihapuca, vahi vicainajirucahini máicha. Te típicaracahavianapuca, te tipanajiricahavianapuca, te navarahapuca ticapacahaviana, váhiquenesera vicainajiruvahini máicha.

³⁶ Te tamutu eta juca, vicuti ena machanerana ema Viya ena táechajisihaguenevahi acane eta Sagrada Escritura, ani tacahehi: “Tamutu sácheana ena ticatianacanahi ema Viya titanucahavianahi viti machanerana, navaraha ticapacahaviyare. Tivapinavanahi eta nacapasirahavihi, ticuti ena ticaparecanahi eta vaca te náichayare eta ichape piesta”.

³⁷⁻³⁹ Váhiquenesera vipicaimahi eta náipicararesirahavianahi. Tétavicavahi eta máetumechirahavihi ema Jesucristo táichavenehi eta máemunasirahavihi. Tájinaavare tíhapapicahavimahi eta véhisirahi éma. Núti nucasíñava ema Viáquenu eta majaneasirahaviya. Tájinaquene ticaerajicahavimahi eta máemunasirahavihi. Vahi étainapucaini eta vicatajivapuca eta vítaresira, étainapucaini eta vépenira, étainapucaini náipicararesirahavipuca puiti juca vítaresiraichaha, étainahipucaini táimipanererechavihini, jácani víchavaquenevaya eta vítaresiraya. Tájinaquene vahi vipicahini eta tipicacareanahi te juca apaquehe, éna napucaini ena ichapemuriqueneana mayeheana Váinaraji, étainahipucaini eta náíñehivanahi. ¡Tájinaquene ticaerajicahavimahi mayehe ema Tata taicha yátupihí eta máemunasirahavihi taicha víavahácahi ema Viáquenu Jesucristo!

9

Ena israelítana, éna manerejiruanahi ema Viya

¹⁻³ Nuparapenaveana, tétavicavahi eta némunasirahi ena nujaneanana israelítana. Eta tacahe, ichape eta náimipanerechiranihi nucatisamurehivare, táichavenehi eta namaehisirahi ema Viáquenu Jesucristo. Táetaviucha eta néñamiravahi eta nayehe, nuvarahainehi njararecavahini nuyanahini núti te jena yucu, apaesa vahi nacuyanahini éna. Énainahini náurihini éna mayehe ema Cristo. (Núti nutupiruva puiti juca numetasirahehi. Ema Espíritu Santo, émaripa téchahi tamutu eta nupanereruanahi. Tímismanuhi eta nétupirisirahi eta numetasirahehi.)

⁴⁻⁵ Tétavicavahi eta náuricacarevayarehini éna, taicha manerejiruanahi ema Viya, máichavenehi ema náchucaequenéni Israel, mavarairahi ema Viya machichanaveanayarehi. Ichapemuríhi eta macachaneravacahi, máimechirahi eta majaraiva. Májjaracavaca eta matratune eta majaneasiravacayare. Máimimatichahivare eta mavanairipiana. Máimimatichahivare eta náechajisiraya émachuca te nayujarasirana. Mametacahivare eta máitesirayarehi ema ticatiurahiyare nayehe. Ena nani, tétavicavahi eta táurivahi eta náicuchiyarehini taicha manerejicavacahi ema Viya éna máumurivanarichuhi ema Cristo, najaneanarichuhi eta máucupasirahi te juca apaquehe. Émasera, Viyahi éma. Puíticha émaripa téchahi tamutu. Máitavacaipa eta víjirauchirahi. Amén.

⁶ Tayanapane eta macatajisiravacahi ichape ema Viya ena nujaneanana israelítana, tamapurujisera, éna namutuyaréni témepururecavana. Vahi návarahahini náehica. Váhisera étainahini táichahini eta mamaitauchirahi eta matratune ema Viya. Nasapihapa namapurují namutuyaréni, vahi machichanaveanainahini ema Viya, táichavenehi eta namasupajirai-vanahi.

⁷⁻⁹ Nuvaraha némechahe eta manerejisirahi ema Viya ena apinana machichanaveana ema Abraham. Matiaríhíhi ema Ismael, émapa ema Isaac. Ema Viya vahi manerejicahini ema Ismael, májjarasiravacayarehi eta náicuchíhi ena mámaríéqueneana. Macarichu ema Isaac, manerejiruquenehi ema Viya. Eta mametacasiyahí ema Abraham eta me Viya, ani tacahehi: “Puiti juca cájeyare, njaracaviyare píti ésupa esu Sara ema echichayare, ticaijareyare Isaac. Núti njaracayare eta máicuchiyarehi ema Isaac, énapa ena mámaríéqueneana” macahepa. Puiti nuvaraha ecaicutiaraya eta juca: Ema Viya máimijarechahi

“nuchichanaveana” nacarichuhi ena navaraha najacapyare eta náicuchihi, nuapirahi eta májjarasiravahi nayehe.

¹⁰ Numetacaheyareva eta táicharacavahi eta macachichairahi ema Isaac ésupa esu mayena Rebeca. Chámeanahi ena náinapureanahi nachichanaveana.

¹¹⁻¹³ Tacahe, vuíchaha náuchuchahini ena nani amuyana, tájinaichahavare napecaturainahini, táimaticarepahipucaini eta táuriva eta náichaquene. Te tiánehipa eta suinasirayare, ema Viya mametacapa esu Rebeca, ánipa macahe: “Chámeanayarehi ena pichichanaveana. Émasera ema tnapucayare tiúchuca, éma, mósoyare mayehe ema máti”. Éta paichuhi eta macayemaquenehi ema Viya te Sagrada Escritura, ani macahehi: “Némunacahi ema Jacob, máequenereruhi tiúchuca. Émasera ema Esaú, máinapurehi tiúchuca, vahi núrianaca éma” macahepa. Tacahe puiti, vímatiequenehaipahi eta táichararacavahi eta manerejisiravacahi ema Viya, máichuiravacahivare nácani mavarahaqueneana. Vahi éta paracainahini jácani táurivainahini eta náichaqueneana.

¹⁴ Puiti, vahi ecuimijachahini vahi tétupicava ema Viya eta manerejisiravacahi ena achaneana. Váhiquenesera énéna tácahe.

¹⁵ Ema Viya mametacahivare ema Moisés, ani macahe: “Núti necha mácani nujapanuquenyare” macahepa.

¹⁶ Tacahe, vahi vámutu vácuticaca eta majapanuirahavi ema Viya máichuirahaviyarehi. Éma téchahi eta manerejisiravacahi nácani majapanuqueneana máichuhaqueneanayare. Vahi étainahini eta náimaticahiravahi tíchuhacareana taicha eta náurivahíji, napamisirahipuca naicha eta táuriqueneana.

¹⁷ Ema Viya ánvare macahehi eta te Sagrada Escritura mayehe ema rey te avasare Egipto: “Núti nunacavihi eta piávacurehi pirreyvayarehi, taicha nímativi eta pímuracasamurevahi. Nuvarahasera núti níimaticahivayare eta tamutuirahi nurataha nítapajjiasirava, apaesa táimaticare eta níjare te tamutu eta juca apaquehe” macahepa ema Viya.

¹⁸ Tacahe, ema Viya manerejicahi nácani mavarahaqueneanayare máichuha. Máisapahisera ena masuapajjirairahana tajurucachuchaini eta namuracasamurevahi.

¹⁹ Németeaca, áninapapuca ecaheyare éti: “Ene tacahe jácani, ¿tájahapuca tacayema eta vicaviurevahi eta mayehe? Taicha vahi véchavahini eta víchirahi eta tamauriqueneana. Émarichuhinéni tíchahavihi” ecahénapapuca éti.

²⁰ Vahi tacucahe eta epanereruana. ¿Vahi epicahini iácapaemachirahi ema Viya? Eta cachapare mátejisi vahi táuricaimahi tácapaemachahini súcani tépiyacahi: “¿Tájaha tacayema pímpipanajicanu eta pépiyasiranuhi, váhiyapa nucunachacarehini eta pépiyasiranuhi?” vahi táichaimahi.

²¹ Esu típarecarahi, ésu téchinavahi jácani táimahanayare eta suípune, suíchayarehi eta suícarahiyare, tásiha suépiyacavare eta suyehe vásenilla, tacahehi eta suvarahaquenehi.

²² Tatuparacahi ema Viya máicuñacavaneya namutu ena achaneana váinarajiqueneana, máimitaequenehavacavane éna. Tatuparacahivare máimerecavane eta máitupajjiasirava éta pa eta masemirahi tayehe eta namaurivahi. Tétavicavahisera eta macayehavahi paciencia.

²³ Viti apana, ene tacahehi eta táetaviuchirahi eta majapanuirahavihi, máimerecahi eta táichapeva eta macunachacareva. Acaneripahi eta manerejisirahavihi eta vicachaneraya éma tayehe eta majaraiva.

²⁴ Vahi vácarichuhini viti israelítana manerejiruhavihi; énerichuhi eti apavasanana manerejiruhehivare.

²⁵⁻²⁶ Eta Sagrada Escritura májurehi ema víyahaini Oseas, eta máechajjiriruva ema Viya, ema yátupiquenehi eta macasñacarevahi, ani macahehi: “Núti nunerejicayare níchuhavacayare ena ichapemuriqueneana ena achaneana apavasanana. Tayanapane vahi náesenicanuhini cape eta náitaresirahi, tijacapacareanahisera nuyehe. Ichape eta némunasiravacayare taicha nuchichanaveanayarehi éna” macahepa.

²⁷ Énasera ena nujaneanana israelítana, ánimurianarichuhi ena tisuapanahi eta máichuarapi ema Viya. Nacuti éna ánimuriqueneana náechajisihahi ema víyahaini profeta Isaías, ani macahehi: “Tétavicavahinéni visimutuva viti israelítana, ánimurihavirichuchasera viti viúchuchuanayare.

²⁸ Ema Viya, váipa macamichaimahi eta náejecapiravanahi ena achaneana. Tíjahúchavayarepa eta máicuñasirayare eta apaquehe. Máijahúchayarehi máitaequeneha tamutu”.

²⁹ Ánvare macahehi ema Isaías: “Muracarinehi eta náquipaisirahi eta viávasa. Te tacuijahini eta majapanuirahavihi ema Viya viti vinerejiruanahi véhica éma, vítaequenehini vimutu. Nájina nánasihini te viávasa. Vicutiyaréni ena ticavasanahi te Sodoma, énapa te Gomorra, máitaequeneruanahi ema Viya, ema tétavicava eta máitupajjiasirava, máituruequenehahi tamutu” macahepa ema Isaías.

Ena israelítana, vahi návaraha náehica ema Jesucristo

³⁰ Nuvaraha numetacahe eta juca, apaesa écha. Ena apavasanana nasapihahi tijacapacareanahi me Viya, váhinéni náesenicahini éma cape eta náitaresirahi. Tacarichusera puiti, táichavenehi eta nacasiñavairahi eta mayehe, tijacapacareanaripahi éna.

³¹ Énaserá ena nujaneanana, tímijachavanahi tijacapacareanayarehi me Viya táichavenehi eta navairairahi náehica eta vanairipiana. Váhisera najacapacarehini.

³² Taicha éna, náemepururecahi eta najacapacarevayarehini me Viya. Vahi návarahahini nacasiñavahini mayehe ema Machicha Jesús. Éna tímijachavanahi étachucha nacunchiavahi tayehe eta náitachirahi eta navanesiracacanáhi. Eta tiviuchahi eta nacatianasirahi muracaquenehi ema Viáquenu Jesús, vahi návarahahini nacasiñavahini eta mayehe.

³³ Ema Viya, eta máechajiriruvana eta Sagrada Escritura, ani macahehi: “Puiti névatacaya ema Nuchicha Cristo nayehe ena israelítana. Nímahaya nájahapuca ticatianacanaya éma, énapa ena ticasiñavanayare eta mayehe. Nácani ticatianacanapuca, énajivayare ticamitiéquenehavanayare, ticaicúñanayareva táicha. Nácanserá ticasiñavanayare eta mayehe ema nuvaneruyare, vahi máinajiacavacaimahi” macahepa ema Viya.

10

¹ Nuparapenaveana, tétavicavahi eta néñamiravahi nayehe ena nujaneana israelítana. Eta nuyaseserepi me Viya te nujujarasirana, nuvarahahi náuchucuhahini.

²⁻³ Nucunachavacahi éna eta náetaviuchirahi eta napicauchirahi ema Viya. Téjicapavanahisera éna eta táichararacavahi eta vijacapacareva me Viya. Éna, tímiuricavanahi tíurianihi, tímijachavanahi tijacapacareanahi me Viya táichavenehi eta náitachirahíji eta vanairipiana. Vuíchaha náimatihini eta táichararacavayarehi eta najacapacareva eta nacasiñavairaya me Viya. Váhivare návarahahini nasuapahini.

⁴ Taicha ema Cristo macaepaharipa eta tasuapacarevahi eta viyehe eta mavanairipiana ema Moisés. Vaipa étaracaina eta viúchucuiraya. Tacarichu eta vicasiñavairahi mayehe éma, vijacapacareyare me Viya.

⁵ Émarichuhi ema Moisés, muracahi eta matuparasirahi ena achaneana, ánipa macahe: “Éti, tapamiruanahi eta ítauchirayarehi tamutu eta vanairipiana. Te yátupipuca ítauchahi tamutu sácheana, te tájinapuca eta éjcapiravainahi, tásiha ejacapacarenapa me Viya” macahepa. Nájinasera náratatahahini náitachahini eta vanairipiana.

⁶⁻⁸ Máejerepanasera eta vijacapacarevahi me Viya táichavenehi eta vicasiñavaira eta mayehe. Vahi tácomesahini vitanupanahini ema Cristo te anuma, taicha tíucupauchahaviripa éma. Váhivare tácomesahini vitanupanahini te máecari vicaechepupanahini éma, taicha téchepucaripahi éma. Tacamunuhisera eta vicasiñavairaina mayehe ema Cristo te visamureana. Eta vipiarasiraina eta máijare eta vjarasirava eta véhisirayare éma.

Tásiha núti, eta nucametarairuirahi, néchajisiha étachucha eta arairu véhiruhi eta majacapirahavihi ema Viya viti vicasiñavanahi eta mayehe.

⁹⁻¹⁰ Eta juca eta nímiturapi: Eta viúchucuiraya viti achaneana, tacamunuhi eta visuapiraina ema Viya eta macaechepusirahi ema Machicha te máecari. Éma, macaepahayare eta vipeaturana, te yátupina eta vicasiñavairahi te visamure ema Jesucristo. Tacamunuhivare yátupina eta vjarasiravahi véhica éma. Vichayarehi éma: “Núti níjaracavahi néhicavi, Tata Jesús. Pítipa náquenuvivi, péchanupa pítí” vícahenapa.

¹¹ Eta Sagrada Escritura, ani tacahehi: “Nácani ticasiñavanayare mayehe ema nuvaneruyare, tájina náichiraváimahi. Tamutu tíuriyare eta náitaresira”.

¹² Ema Viya, vahi máepuruimahi nácani ticasiñavanahi mayehe. Ticuticayarehi eta majacapiravaca ena israelítana énapa ena apavasanana, taicha émaichuhi ema Viáquenuhi vimutu. Tétavicava eta majapanuirahavihi, tíuchucuhahaviya vimutu viti vicasiñavanahi mayehe.

¹³ Taicha ánivare tacahehi eta Sagrada Escritura: “Ema Viáquenu macuchucuhavacayare namutu nácani típiaracanáhi eta máijare táichavenehi eta nacasiñavairahi mayehe” tacahepa.

¹⁴ Tásiha, eta náuchucuhairayare, tacamunu napiaracaya eta máijare ema Viáquenu táichavenehi eta nacasiñavaira mayehe. Táurivaina eta nasamirahi eta náimitucasivana. Tacahe, tacamunuhivare eta víyana vípaicayare viti te tamutu avasareana eta vicametarairuiraya nayehe éna.

¹⁵ Émaripa ema Viáquenu, ichape eta máichuhairahavihi viti visuapajirahiana, mavaraha eta vicametarairuirayare. Títauchavayare eta tacayemaquene eta Sagrada Escritura, ani tacahehi: “Tétavicavahi eta náurisamurevana ena achaneana eta nasamirahi eta táuriquenehi máichuarapi ema Viya eta majacapiravacaya. Tásiha tíuriyare eta majacapirahavihi viti mavanerua ena Víya” tacahepa.

¹⁶ Váhisera námutuhini nasuapahini eta juca arairuhi véhiruhi vímitucaquenehi. Ema Isaías, ani macahehi te Sagrada Escritura: “Tata Náquenu, ánimurianarichu ena tisuapanahi eta juca nímiturapiana nuvanahiana piyehe” macahepa.

¹⁷ Téhesera te táurihini nasama ena achaneana eta vímiturapiana mayehe ema Cristo, titupiruvanayarehi ticasifávana mayehe.

¹⁸⁻¹⁹ Esamanuchaha. Ema nujaneanana israelítana, tájina naviyahini nayunaca eta namacasiñavairahini mayehe ema Cristo. Nasamapa eta máechajiriruvana ema Viya, taicha te tamutu avasareana tisamacarepaipa. Eta Sagrada Escritura, ani tacahehi: “Tamuturipahi te juca apaquehe ticasamahúhi. Eta máechajiriruva ema Viya tamuturipahivare tacaitatapahíhi te juca taquíñacucujiana te apaquehe” tacahepa. Náimatipavare. Váhivare návarahahini nasuapa. Eta máechajiriruvanahi ema Viya májurehi ema Moisés, ani macahehi: “Ímaha, eti israelítana. Nasapihaya nujacavacayare nuti ena apamuriana achaneana, énaripa ena máesenicanurahanahi. Nuvaraha etsirihaini éti, éneuchavayare eta nuyehe” macahepa.

²⁰ Jararihivare eta apana máechajiriruvahi, májurehi ema víyahaini Isaías, ani macahehi: “Núti nímercavaipa nayehe ena nani váhiquenehi náesenicanuhini, váhivare nacayaseseruhini”.

²¹ Ánivare macahe ema Viya: “Tamutuhi sácheana eta níchuiravacahi ena nani israelítana. Tétavacavahisera eta namasuapajiravahi. Vahi návarahahini nachavahini eta nuyehe” macahepa.

11

Ánimurianarichu ena israelítana ena tisuapajirahianahi, macuchucureanayare ema Viya

¹ Esamanuchaha. Nuvaraha vahi ecuimijachaimahi macaerajicavacahipuca ema Viya ena machanerana israelítana. ¡Váhiquene énéna tácahe! Éti ímatinuhi nútirichuhi israelítanuhi, mámariequenenuhivare ema Abraham, émapa ema apanavare náchuca Benjamín.

² Eta acane, tétavicavahi eta máemunasirahavihi ema Viya viti israelítana. Púiticha vahi máinajiacahavihini. Échava éti eta tacayemahi eta Sagrada Escritura eta máichavaquenevahi ema víyahaini profeta Elías. Ani tacahehi eta mametauresiravahi me Viya eta mayujarasirahi:

³ “Tátachicha Nucaiyaquene, ena nani apamuriana nujaneanana israelítana nacapapajicavacahi namutu ena piyeheana profetana nuchamuriana. Puiti navarahahivare ticapacanuana. Navetataicavare eta pipena. Nucarinehi núti nútarecahi puiti” macahepa.

⁴ Tásiha, ema Viya majicapapa, ániapa macahe: “Vahi picarichuhini píti. Nararíhi siete mil ena ajairana nujanearuanahi, ticasifánuanahi. Vahi náisapavahini éna náepuyumirauhahini ema nasiñaraji Baál ena masuapajirairahanatatajiji” macahepa ema Viya.

⁵ Ene vicahehi víti, vahi vámutuhini víti israelítana masuapajirairahanahi me Viya. Vítirihichaha ánimuríhavihi viti manerejiruanahi majapanuquenehavihi.

⁶ Numetacahe: Ema Viya, eta majapanuirahavihi víti israelítana, váhiquene táichavenénahini jácani víchirainahipucaini eta táuriqueneana. Jéhesare, tijapanuhavihi táichavenehi eta táetaviuchirahi eta máemunasirahavihi. Tájina étaparacaina eta víchirapuca eta táuriqueneana.

⁷ Tacahe, vímaha puiti ema nujaneanana, ánimurianarichuhi ena ticasifávanahi me Cristo, manerejiruanahi majacapaqueneanahi. Énasamisera ena apamuriana, vahi nacasiñavahini mayehe, muracanaichucha te nasamureana. Étapa tivíuchahi vahi tijacapacareanaimahi me Viya, tayanapane nácani navarahahi.

⁸ Títauchavapahi eta táechajiriruvahi eta Sagrada Escritura eta nayehe. Émarichuhi ema Viya ticamitisicavacahi apaesa vahi nacucaicutiara eta máimiturapiana ema Cristo. Púiticha ene nacahehi.

⁹ Ema víyahaini David, ánivare macahehi tayehe eta Sagrada Escritura: “Ena nani, ticasifávavaicana eta tavayuchirahi eta náimahaqueneana. Ichapemurihi eta nacapie-starairana náenisiracacana. Ichapevaresera eta náichirahi eta tamauriqueneana. Puiti, Tátachicha, pítsivachayare eta náurisamurevahi. Járjapainapa eta pícuñasiravacayare.

¹⁰ Nuvaraha púchuquianaina pícha. Vahi nacucaicutiara eta náítaresira. Tacaetipapacainapa eta tajitacareva eta napisirahi. Tájinapa nanarasiraimahi” macahehi ema David.

Eta majacapirahi ema Viya ena apanapanenejiqueneana

¹¹ Esamanuchaha. Nuvaraha vahi ecuimijacha tanasiyarehi eta náquipaisirahi ena nujaneanana. ¡Váhiquene énéna tácahe! Púitiserá nasapiha ena apavasanana najacapacarehi me Viya, taicha mavaraha máimcatsiriavacava ena israelítana, apaesa náneuchavayare eta mayehe.

¹² Puiti tijacapacareanahi me Viya namuturipa ena apanapanenejiqueneana achaneana te juca apaquehe, taicha eta náquipaisiravaipa ena nujaneanana. Puiti eti apavasanana, tétavicavahi eta iúricacarevaipa. Jéhesare tiápajucavapanayaresera eta iúricacarevaya éti, étapa eta náuricacarevayare éna, te nachavapa náeneuchava.

¹³ Németeaca ímatinuhi núti eta nucatuparahairapa eta nímitusiraheyare eti apavasanana. Táitusiava puiti tétavicavahi eta nucunachiravahi eta nucaemataneasirahehi.

¹⁴ Numetacavacahi ena nujaneanana eta yátupirahi eta ejacapacareirahi me Viya, apaesa nímahahini éna, te najamurachayarepuca eta najacapacarevahi éna apanava, ticutiheanayarepuca éti. Nuvaraha nanerejicavahini nácani náeneuchavahini, apaesa náuchucuhayare.

¹⁵ Páureanasami éna eta náquipaisirahi. Esapihahi éti apanapanenejiqueneana te juca apaquehe, tétavicavahi táuriva eta ejacapacarevahi me Viya. Jéhesaresera, tétavicavapaini eta tajaraivainahini te visamure te nachavirainahini, náeneuchavapaini éna, náehicapaini ema Cristo. Tímicutijiricavapaini eta navayuchirahi eta náurisamureva ena achaneana te macaechepusiravacaya namutu ena náepenaqueneana tíúrianahi.

¹⁶ Eta natiarihirapa puiti ena nujaneanana tinerejicavahani téhicana ema Cristo, németeaca namutuyare jácani náehicayare ena apamuriana.

Tacutiquene, viti machaneranahi ema Viya vicuti eta ichape yucuqui. Ema Abraham macutihí eta táquehequi. Viti israelítana mámariequeneanaini vicutihí eta tatavavajiana. Ema viáchucaini majacapaqueneripa ema Viya. Tásiha, németeaca namutuyaréni ena nujaneanana, énerichuvare náeneuchavapapucaini nacasiñavahini me Viya te jácani sáchehare, apaesa najacapacarevarepáini éna apanava.

¹⁷ Puiti ena nujaneanana náquipairuvahi, vuíchaha nasiapahini eta náicuchihi te namuri ena machaneranahi ema Viya. Étipa eti apavasanana, esapihaipa machaneraheripa ema Viya. Tíjaracaheripa éma eta táuricacarequene iávilhayarehini te majaraivahi eta náicuchinihi ena israelítana.

¹⁸ Puiti étipavaipahi machanerahehi ema Viya. Nutuparacahesera, vahi ecucasiñavavaica eta ítujisiravahi esiap tayehe eta náicuchihi ena nujaneanana israelítana. Taicha vahi ecachuriacavacaimahi éna eta iúrivahinéni eta ejacapacarevahi me Viya. Vahi ecuemitísica eta esiapirahi táichahi eta náquipaisiravahi ena masupajirairahana. Éti máetumechaqueneana ema Viya; vahi étina étumehahini éma.

¹⁹ Váhivaresera ecupanerecha te esamureana: “Yátupi éna máquijicavacahi ema Viya eta namasupajiravahi. Tásiha, tinerejicavahipa víti, taicha víúripanahi víti eta máimairahavihi ema Viya” váhinéni tácahehini eta epanereru.

²⁰ Tacahe, échapava éti apanava, machu ácutiriana ena nujaneanana. Éna, eta náquipaisiravahi tímicutijiricahi ticaechuanahi, táichavenehi eta namacasiñavairahi me Viya. Puiti étipa náitsivahi éna eta ecasiñavairahi mayehe. Váhisera ecucasiñavavaica. Ecuneuchava éti apanava. Epicaucha ema Viya.

²¹ Ena nujaneanana israelítana, éna títapucanayarehíni nasiapamuriha ena machanerana ema Viya. Váhisera nacasiñavahini eta mayehe. Éti apanava, tacamunuhivare ecasiñava eta mayehe apaesa esiapahini.

²² Tacahe, ticaecheravapa eta máurivahi ema Viya, étapa eta matupiruvahi. Tétavicavahi eta matupiruvairahi eta náerajisiravacahi ena masupajirairahana. Tétavicavahivare eta máurivahi eta eyehe, eta ímiyaniravahi eta ecasiñavairahi eta máurivahi. Nácanisera vahi nacasiñaimahi, macaerajicavacayare.

²³ Tiuri puiti, te náeneuchavapuca me Viya ena nujaneanana, nacasiñavahivarepuca mayehe, éma majacapavacayarehi éna, machíchanaveanavarepa. Taicha éma, tétavicavahi eta majapanuirahi.

²⁴ Taicha éti cape juca eta ítaresira, énerichuvare masupajirairahahi éti, emaesisirahi ema Viya, tásiha, tájinahinéni ejacapacarevainahini. Esapihasera éti esiapamuriharipa ena apamuriana machaneranahi ema Viya. Ene nacaheyarehi ena israelítana. Éna, te náesenicapa ema Viya, camuriqueneanayarehi ena ticasíñavanaya mayehe. Tisiapanayareva tayehe eta náicuchihi.

Te namutupa ena apavasanana manerejiruanahi ema Viya, tapaenumavainapa náesenicayare ema Viya ena israelítana

²⁵ Tiuri puiti, nuparapenaveana, vahi nuvaraha ecasiñavavaica eta ítupajijiasirava. Tásiha, nuvaraha numetacahe eta juca tayumurevainihi, máimimatichaquenénuhisera ema Viya. Eta namuracasamurevavacahi ena nujaneanana, vahi tánasimahi. Téhesera námutupa nasiapa ena apavasanana manerejiruanahi ema Viya, napaenumavainapa ena nujaneanana náesenicayare ema Viya.

²⁶ Tacahe, eta nacasiñavaira me Viya, tiúchucuhanayare namutu éna. Títauchavayare eta máechajiruvahi ema Viya te Sagrada Escritura, ani macahehi: “Nuvanecayare ema Ticatiurahiyare nayehe ena achaneana. Ticavacureyarehi te Jerusalén. Masipahacavacayare ena majaneanana israelítana eta navainarajivana, máitsivachirayareva eta náitare-sirana.

²⁷ Núti nítauchayare eta nutratunehi nayehe eta népachiasiravacayare namutu eta napecaturana” macahepa.

²⁸ Tacahe, ena nujaneanana nacatianacapa puiti eta juca véhiruhi. Étasarepa ítujisavayare éti. Émasera ema Viya máemunacavacarichucha, taicha manerejiruanahi ena náchucanaveanaini.

²⁹ Taicha ema Viya, tamutu eta máijjaruanahi, vahi máemepururecaimahi. Máitauchayarehiva tamutu eta máichuarapiana.

³⁰ Éti acane eta ítairesirana, vahi ávarahahini esuapahini ema Viya. Puítiserá eta namasupajiraivahi ena israelítana, ichaperipahi eta majapanuirahéhi éma.

³¹ Énerichuvare éna, te jena sáchezare, majapanuvacayarehi éna, tacuti eta majapanuirahéhi éti puiti.

³² Taicha ema Viya máimatihí eta emutuirahi emasupajiraivahi éti apavasanana, vítipa viti israelítana. Mavarahasera vicuticacayarehi eta majapanuirahavíhi vimutu.

³³ Ema Viya, ¡tétavacavahi eta majapanuravahi eta viyehe, tavayuchahi eta viúricarevahi máicha! ¡Tétavacavahivare eta máitupajijiasiravahi! ¡Tétavacavahivare eta macachuriasirahavíhi eta máimatiequenehairahi tamutu! ¡Matupiruvahi éma tamutu eta manerejirisirahi! ¡Vahi víturuequenehaimahi vicaicutiara eta mapanereruana!

³⁴ Taicha nájina tímatiequenehaimahi eta mapanereruana. Nájinavare náimitucahíni éma.

³⁵ Nájinavare náijjaracasichahíni tájaháinahípucáini, étanainahípucáini máitsirijicavacahípucáini eta máijjarasirahi éma.

³⁶ Taicha tamutu eta tatiarihiqueneanahi, tacarichu tásihaqueneanahi mayehe, étaripa eta víjararuanahi mayehe, mavaraha tátauchavapaini eta mapanereruanahi táurique-neanahi. ¡Máitavacacahi eta vicunachirahi éma! Amén.

12

Vicatuparahahi yátupina víjaracava eta véhisira ema Viya

¹ Tacahe, nuparapenevana, nuvaraha ácaicutiara yátupina eta majapanuirahéhi ema Viya. Eta táetaviuchirahi eta majapanuirahéhi, ecaturarahahi íjaracava yátupina eta íáqueheana étapa eta íáchanevana eta éhisiraina émainachucha ema Jesucristo. Tacutihí eta íámavahuhi me Viya. Jéhesare, tétavacavaya eta ecurisamurechiraya éma tayehe tamutu eta ecaemataneasirana éma.

² Énerichuvare eta ítairesirana, vaipa ecuehica eta tayeherépi eta juca apaquehe. Ítsivachapasera eta epanereruana, apaesa támutupa apanainahi eta ítairesiraina. Tásiha, ímatisarepa eta mavarahaqueneanahi ema Viya, ítucayare icha eta táuriqueheana. Ecurisamurechayare éma eta íchira eta tatupiruvacueneanahi.

³ Núti mayehenuhi apóstole ema Viya. Tituparacanuhi numetacaheyare: Emutu éti, tátupiruva eta epanereruana tayehe eta ítucacueneana máijjararuheanahi ema Viya, apaesa táuri eta ecaemataneasiraina mayehe. Nacuija nacasiñavavaica.

⁴ Tacutihí eta víáquehe viti achaneana. Camurianihi eta táunavanahi, táematane-pachuhivare. Vahi étainarichuhini eta táitucacueneanahi.

⁵ Ene vicahehi víti. Camurihavíhi, étanaichuhisera eta víáquehehi eta víúrujasiracacahi eta véhisirahi ema Cristo, vímicatcacairahi eta vicaemataneasirahi éma.

⁶ Ema Viya, apanapanenejíhi eta vítucaqueneana eta máijjarasirahavíhi eta vématane-pachuyarehi máicha. Tacamunuhisera vahi vicuemepururecava eta vítucaqueneanahi máijjararuhavianahi, apaesa táuri eta vicaemataneasiraya. Te tíjaracahavipuca éma eta vítusirayare vicametarairu, vijaneacavainapa, machu vihapapiricahini eta táimiturapiana eta véhiruhi.

⁷ Te tíjaracahavipuca eta vítusirayare vímicatata ena vichamuriana, tatupiruvayarehi te visamure eta vímicatasiravacaya. Nácani náítucahi tímíturcana, vahi nayacujimahi eta náimituresiraya.

⁸ Nácani náituruequenehahi eta náetumechiraya nácani apana, váhivare nayacujimahi. Nácani tíjaracasírecanahi eta náimahaqueneana, tátupiruvayarehi te nasamure eta nacajirahi ena ticamunuvanahi. Nácani cátparahananahi téchapajiricarahianayare, tivapinavanayare eta náitauahirahi eta natuparacasivahi. Nácani tímicitacananahi ena tíjapanucareanahi, tíúrisamureanaya eta náimicataresirahi.

Eta viúrivahi nayehe ena achaneana ticaecherayare eta yátupirahi eta véhisirahi ema Viáquenu Jesucristo

⁹ Nuparapeneaveana, yátupina eta émunasiracacaina ena echamuriana. Vahi apimira-hemahi, ímijachava eta émunasiracaca. Evapinavaya eta íchira eta táuriqueneana. Épuruyare eta tauriqueneana.

¹⁰ Tiápajucavainapa eta émunajirisiracacaina eta echamuricacairahi. Eacunachainapa namutu ena echamuriana. Yátupina eta epicauchiracacahi.

¹¹ Étumechavaina eta ecaemataneasirahi ema Viáquenu. Tavapinava eta esamureana. Tacuija eplujuvavacaina.

¹² Iúrisamurereacavayare eta ejacapiraya eta ecuchapaquenehi. Ecayeheyare paciencia tayehe eta ecatajivairana. Vahi tacuechuquiha eta eyujarasirana.

¹³ Ímicatajiricaca ena echamuriana, tayehe eta nacamunuiravana. Tiúriyare eta ejacapi-racaca te epaipuchacaca.

¹⁴ Te natiarihinapuca nácani náehahe, napanajiricahepuca, eJapanuyare éna. Eyaseuchaya me Viya eta náuricacarevaina. Váhisera ecuyaseucha jácani náicuñavanéna.

¹⁵ Te tatiarihinapuca jácani tiúrisamurecare nayehe nácani, éti apanava iúrisamure-yareva. Téhesera te tatiarihinapuca eta ticatisamurecarehi nayehe nácani, eJapanuva-cayare éna, iyahayareva éti apana.

¹⁶ Ecurisamurechacacaya ena echamuriana. Vahi ecucasiñavavairica. Ácuticacahi nayehe ena mánsuanahi, váhivare ecucasiñava eta ítusirahi.

¹⁷ Te tatiarihinapuca náicharacahe eta nacatichirahe, vahi ecuitsicava. Íchayaresera eta jácani táuriqueneanahi nayehe namutu ena achaneana.

¹⁸ Nacuija ecucaticha. Te natiarihinapuca nacatianacahe eyanauchayare te napena émemunacavayare apaesa vaipa nacucatichahe.

¹⁹ Némunarúqueneana, te tájahapuca náicharacahe, vahi ecuitsicava. Cápachi mararihi ema Viya, máimahainepa éma téchayare eta náicuñayare. Taicha ema Viáquenu, ani macahehi tayehe eta Sagrada Escritura: “Nímahainepa núti eta táitsivayare. Núti néchahi eta náicuñayare ena ticaviurevanahi eyehe” macahepa.

²⁰ Ánivare macahe éma: “Te pímaha máecuhapahi mácani ticatianacavíhi, pénicayare. Te mamaunepahipuca, pésichayare. Eta máimairainahi eta pémunasirahi, ticatisamurevainapa titsirihainapa” macahepa.

²¹ Vahi ecuisapava ítsicava eta náichiraheya te táíñehiqueneana. Étumechavasera eta íchiraya eta táuriqueneana. Étapa ticaepahayare eta nasemaneva.

13

¹ Éti, emutu esuapajirahiyare nayehe ena tuparairucana, taicha éna manacaqueneanahi ema Viya eta návacureanahi. Nájina émanaina máemunasicavahini.

² Eta tacache, nácani tiácapauchavanahi nayehe ena tuparairucana, tímicitijiricavahi nácapaemachahivare ema Viya. Jéhesare, ticaicuñanayarehi ena téjecapavanaripahi.

³ Taicha ena tuparairucana, vahi étaina tíminacavacahi éna eta náipicaresiraya nácani tíchanahi eta táuriqueneana. Nácánisera ticaviurevanahi, táuricahi tipicanayarehi. Te evara-hahipuca iúri nayehe, esuapajirahiya nayehe, tásiha, éna ticunacháheanainapa.

⁴ Taicha ema Viya, émahí macaejacavaca te návacureanahi, náurichayarehi ena achaneana. Téhesera ecaviurevahi, epicayarehi taicha éna vahi támapurujimahi eta nacatuparahairahi. Natuparacasivahi me Viya eta náicuñasirayare ena ticaviurevana.

⁵ Eta tacache, tavarahaichu esuapajirahiyare nayehe ena tuparairucana, apaesa vahi nacuiçuñacahe. Tavetijipa esuapajirahiyare taicha éti etuparacasivahi me Viya.

⁶ Tacutiquene tatuparacahéhi eta evachachirayare eta impuesto. Taicha ena tuparairucana, natuparacasivaichuhi mayehe ema Viya, náitachiraya eta nacaemataneasira éma.

⁷ Tásiha, ítaurahiyare te jácani nayaseasiraheana eta cuota étapa eta nayaseasiraheana eta impuesto. Epicauchavare nácani tipicauchacareanahi. Émunacavare nácani témunacacareanahi.

⁸ Nacuija ecantevéya. Tituparacache evachachavaneyare jácani entévehi nayehe. Tituparacaveare émunacavayare ena echamuriana. Nácani títauchanahi eta juca námunasira, náitachahí eta mavanairipi ema Viya.

⁹⁻¹⁰ Te pémunarahíhi píti nayehe ena achaneana piparaepiyanihi ticutiyahehi eta pémunasiravahi píti, vahi pipanerechaimahi picapinaru, váhivare picaparecaimahi, váhivare piámerecaimahi, váhivare pivehaimahi esu apana esena mayena ema apana achane, váhivare pépiyaequenerecaimahi. Taicha nácani témunarahianahi, vahi

nacaetemaimahi ena naparaepiyana. Te yátupi eta émunaraivaya, máejerare eta itauchirayare tamutu eta vanairipiana.

¹¹ Eta tacaheyare eta itaresirayare. Vaipa véjearacha eta sácheana. Vahi vímacacaracavaimahi. Vitsecavayarehisera taicha viánehipaicha eta jena sácheyare eta máitecapiraya ema véhiruhi.

¹² Eta vicuchapiraipa eta machavirayare ema Viáquenu, tacutihi te vicuchapaipa te jena yati eta tijararahi. Puiti vímahapa eta tajarahiquene. Tásiha, ínajicapa eta íchaqueneanaini te timapicu. Puiti tiápajucavaserá eta iúrivana, étapa eta íchaqueneanaina te tijarahi.

¹³ Ímicapicauchavayare eta itaresirana. Iúrisiyare tamutu sácheana. Vahi ecavahaimahi. Váhivare ímisipavaimahi nayehe ena ticapiestaranahi. Váhivare tóhushihémahi. Vahi tivayua-cahémahí eta tájiparacana. Vaipa iúmeharerecáimahi, váhivare ecapinarurahimahi.

¹⁴ Tásihasera, ímereco eta iúrivaina. Ácuti ema Viáquenu Jesucristo eta máurivahi éma. Vaipa ecusuapa eta tajamurachaqueneanahi eta iáqueheana. Váhivare ecupanerecha eta íchiraya éta.

14

Vahi ecucaecahi ena echamuriana

¹ Te napauchahépuca nácani navarahahi tisiapamurihaheana, echamurianayare, vahi ecuepuruvaca. Ejamanuvacasera eta ejacapiraya. Te jácani apaesarichuhi eta nacasiñavairahi mayehe ema Viáquenu, napicauchaichaha eta nayeherepiana ichasiana, vahi ecucapaemachahini éna.

²⁻³ Nararihi ena títuca nanica tamutu eta tinicacareanahi. Nararihivare ena apanahi eta nayeherepi, náimijachahi vahi tiuri nanica eta vaca. Tásiha, máechejirechucha eta nanica. Éna, vuíchaha muracanainahichaini tayehe eta véhiruhi. Eti ítuca enica tamutu, vahi ecuepuruvaca éna vahi tinicanahi eta vaca. Étipa eti máechejirehi eta enica, váhivare ecuepuruvaca ena tinicanahi tamutu. Taicha majacapaquenehevacaipahi ema Viya emutu.

⁴ Vahi ecuimijachavaimahi étinahi échavaca eyaseserecarahi ena machaneranahi ema Viya. Éma, téchavacahi ena mavanaranahi. Máimararacahi eta táurivahi náicha, macunachavacahi éna. Te váhipuca, émainahi techa te máemehiravacaya.

⁵ Tacutiquene váhivare ecuepurucaca tayehe eta sache iúrujisiravana eyujarasirana. Nararihi náimijachahi tiúripána te sávarumuhuana. Nararihivare tiúripánahi nasama te lumincumuhuana. Nararihivare tamutuchucha sácheana tiúrihi eta náimairahi. Étipa échinava eta sache éhiruyare.

⁶ Nácani tiyujarauchavanahi te jena sache, ena navarahahi napicaucha ema Viáquenu. Ena apamuriana, vahi tácomesahini nanerejichahini eta sache, éna apanava napicauchahi ema Viáquenu. Ena nacahehi nácani tamutuchucha nanicahi, eta napicauchirahi ema Viáquenu, nahasulupayachahi éma. Nácanisera náepuruhi nanica eta jácani tinicacareana, táichavenehivare eta napicauchirahi ema Viya, nahasulupayachavare éma. Tamutuhi tiuri náicha.

⁷⁻⁸ Taicha vahi vítijiriruváinahini eta vítaresira. Émaripa téchahavihi ema Viáquenu. Émachucha vicaematanearuhi, visuapirayarehi éma te tamutu. Étaripa eta vépenirapuca, váhivare vítijiriruváinahini véchinavahini. Émarichuhi téchahavihivare te tamutu.

⁹ Ema Jesucristo, tatuparacahi eta máepeninahaviyarehi, tiápechavayarehivare tichava títareca, apaesa émainapa Viáquenuya viti vítareruanaichaha, énapa ena náepenaqueneanaripa.

¹⁰ Étiserá, vahi étinahini tátuparacahéhini échavaca eyaseserecarahi ena echamuriana. Váhivare étupicavahini eta épurujisiracacahi. Échavarichu eta vimutuirayare vicayaseserehi te mamirahu ema Viáquenu Jesucristo.

¹¹ Ema Viáquenu, ani macahehi te Sagrada Escritura: “Núti acaneripahi eta nítaresirahi; puíticha máepenacacanhivare eta nutiarahirayare. Tásiha, nútirichu nucatuparahahi nuyaseserecavayare namutu ena achaneana. Namutu tépuyumirauchanuanayare te numirahu. Tímatinuanayare eta yátupirahi núti tituparacanu júesnuhi nayehe, nuti láquenu” macahepa.

¹² Tacahe, vimutu émanapachuhaviya vimetaurecava mayehe ema Viya. Éma máimatiya tamutu. Tájina virataha víyumurucahini.

Vahi ecuimiquipaica ena echamuriana

¹³ Tásiha éti, vaipa ímijachavaimahi étinahi échavaca, eyaseserecarahi ena echamuriana. Táurisera eta ecachanéracacaina. Tasapihasera, te tamutu jácani íchaqueneana, étaviuchaya eta iúrivahi nayehe. Tacuija jácani táimiaquipaicavaca éna ícha.

¹⁴ Núti, eta mavanaranuirahi ema Jesucristo, numetacahe: Tájina eta tinicacareana tamaeperajicahavimahi eta vinisirahi. Nararihisera ena vichamuriana, tépuruana eta jácane tinicacareana, napisirahi eta tamaeperajisiravacayahijí.

¹⁵ Tásiha, nuconsejachahe: Vahi ecuimiyusemaca ena nani, váhivare ecuacapaemachahini tayehe eta jácane tinicacare, machu ímicainajiruchavaca ena echamuriana mavachareruanahi ema Cristo eta mápenirahi.

¹⁶ Máchuvare émechajisiava tayehe eta ímatiquenehi tíuri.

¹⁷ Taicha eta véhiruhi ema Viya, vahi étaparacaina jácane vinicaquenerepiana, véraqueneana. Étaripa eta ticunachacarehi mayehe, eta víchirapaipa eta táuriqueneana, navetijiva nayehe ena vichamuriana. Mavarahahivare vítucavahini tájina tahapapiricahini eta vicurujisiracacahi, apaesa táimiyanavaini eta víurisamureva vimutu, maicha ema Espíritu Santo.

¹⁸ Éti, te yátupina eta émunasiravacahi ena echamuriana tépuruanahe eta jácane tinicacare, tíuriyare eta ecaemataneasiraya ema Cristo. Tétavicavahi eta ecurisamurechirahi ema Viya, ecurinachacarehivare nayehe ena achaneana.

¹⁹ Tacahe, vitanucayare eta víurivaya nayehe ena vichamuriana, apaesa vétumechacaca tayehe eta véhiruhi.

²⁰ Vaipa iácapaemachacacaimahi tayehe eta jácane tinicacare. Váipavare ecuiputsicacaimahi, machu émitiaca eta echamuricacairahi eti majanearuanahi ema Viya. Yátupiquene eta táurivahi tamutu eta tinicacare. Tájina táimanéna. Énasera nácani tépuruanahe jácane tinicacare, te nanicapuca, ticauyayacare táimiaquipaica tayehe eta pecatu.

²¹ Tíuripanaichu vahi ecunica eta vaca, váhivare ecuera eta cátsiama, machu étaina táimiaquipaica ena echamuriana tayehe eta pecatu, máchuvare nacainajiruva eta véhiruhi.

²² Éti, yátupihí eta esuapirahi ema Viya tayehe eta tinicacareana. Ejaneacavasera te mamirahu éma. Tétavicava eta náuricacareva nácani náimatihí eta náurivahi te nasamure, vahi nacaecahirahihini énajivainahini.

²³ Nácanisera tísapavanahi tinicana, tiávmirahuanahi, énajivapa tímiaquipacavanahi eta nansirahi, taicha vahi tátupiruvahini eta nansirahi. Tamutu jácane vahi tátupiruvahi eta visamure eta víchira, pecatuanahi éta.

15

Ecurisamurechaya ena eparaepiyana. Vahi étijiricavaimahi ecurisamurechava.

¹ Tacahe, viti vímatianahi eta táurivahi eta vinisirahi eta jácane tinicacareana, tituparacahaviripa véchapajiricavacaya ena vichamuriana tímijachanahi vahi táurihini eta nanisirapuca. Vácayehe paciencia nayehe. Vaipa vipanerechahini étachucha vicurisamurechirava vítijiricáva.

² Emutuchuchasera éti, ecurisamurechaya ena eparaepiyana. Éñamava éti eta náuricacarevayare, apaesa tápajucavapaipa eta nasuapiraina eta véhiruhi.

³ Taicha ema Cristo, vahi mácarichuhini macurisamurechavahini. Éma, ticurisamurechahi ema Maiya te tamutu. Eta tacahe, nacatianacahi ena achaneana váinarajiqueneana. Tásiha, títauchavahi eta tametarapi eta Sagrada Escritura, ani tacahehi: “Núti nímiyanavahi eta nítauchirahi eta pivanairipiana eta nuyehe, tayanapane eta náumehairanuanahi ena piánaranahi” tacahepa eta Sagrada Escritura.

⁴ Ema Viya tivanecahi ena víyarahanaíni profetana nájuchahi eta máechajiriruvana te Sagrada Escritura. Éta, ticamapuravacareyarehi eta táimitusirahaviyarehi, apaesa táetumechahavi eta véhisira, taurisamurechahavinavare. Tímitucahahivare yátupina eta viciasíñava me Viya eta májjarasiraparaca eta víuricacarevaya.

⁵ Puiti nuvaraha májjaracahéni ema Viya eta evarairahi ecutiya ema Jesucristo eta mapanereruana, étaripa vahi mácarichuhini macurisamurechavahini. Ema Viya máetumechahehí emutu, macurisamurechahevaréni te jácane ícharacavanapuca, apaesa táuri eta echaneacaira.

⁶ Nuvarahavare ácuticacahini eta epanereru. Tásiha, te íurujisiravana, étanainarichuhini eta íahuana eta ecurinacarayare ema Viya, Macaiyaquene ema Víáquenu Jesucristo.

Ema Pablo ticatuparahahi ticametarairuyare nayehe ena apavasanana

⁷ Tacahe, nuparapenaveana, ejacapacayare eti echamuricacanahi, apaesa macunachacarehi ema Viya nayehe namutu ena achaneana. Ecutiya ema Víáquenu Jesucristo eta majacapirahavihi viti.

⁸ Écharichuhivare eta máucupaisirahi éma te juca. Tétavicavahi eta mamansuvahi eta máimitusiravacahi ena majaneanana israelítana. Mavarahahi máimimatichavaca éna eta

máitauravahi ema Viya tamutu eta máechajiriruvana máijararuvana nayehe ena viáchucanaveanaini. Váhiqene tivayuarahi.

⁹ Énerichuvare máimimaticahí ena apavasanana eta majapanuiravacahi ema Viya apaesa nacunachayarehi éna apanava éma. Títauchavayarehi eta máechajiriruvahi ema Cristo eta Sagrada Escritura, ani macahehi: “Puiti nútí, énapa ena nuchaneranahi apavasanana vicuticacahi eta vicunachiravihi, piti Tata, vijirauchiravihi eta vípicauchiravihi”.

¹⁰ Te apana Escritura, ánvare tacahe: “Eti apavasanana, étipa eti israelítana, étamurihéipa ecuticacainapa eta iúrisamurevaya me Viya”.

¹¹ Te apanavare Escritura, ánvare tacahe: “Étamurihénapa eta ecunachirahi ema Viya, eti apavasaqueneanahi. Váhivare ínajicahini eta ecunachiraya éma”.

¹² Eta májurehi ema víyarahaini Isaías te Sagrada Escritura, ánvare tacahe: “Tíjuhúchavainapa ema Cristo, te nájina nacuchapaimahi. Éma, aquenucayare nayehe ena apavasanana. Macarichuyare éma ticasíñavanayare mayehe, eta nacuneraya éma” tacahepa.

¹³ Ema Viya, tétavicavahi eta macunecarevahi, ticasíñacarehivare. Tásiha puiti, tétavicavahi eta nuvarairahi májaracahéni éti eta tavayuchiraina eta iúrisamurevaina, tavayuchirainavare eta ecasiñaira mayehe, apaesa tanaracaina tamutu eta epanereruana. Eta mávahásirahéhi ema Espíritu Santo, máetumechahéni muraca apaesa táetaviuchiravaya eta ecasiñavairayare mayehe ema Viya eta májjarasiraparaca eta iúricacarevaya.

¹⁴ Tiuri puiti, némunaruqueneana nuparapenaveana, nucasíñavahi nútí eta eyehe, eta étaviuchiraipa eta iúriya étapa eta ímatiequenehairahi tamutu eta máimiturapiana ema Viáquenu. Yátupihivare ítucahi econsejachacaca.

¹⁵ Nucasíñahéhivare eyehe puiti juca eta níjarasirava nucajurehe eta juca nucartane étapa eta juca táechajisíhaqueneanahi, apaesa vahi ecuemitísica, taicha nutuparahahi me Viya eta nujaneasiraheya eti apavasanana.

¹⁶ Éma, tituparacanuhi eta nuyanirayare nupaipica te tamutu avasareana, nucametarairuiraya nayehe namutu ena achaneana eta najacapacareipahi me Viya eta nacasiñavairahi eta mayehe. Tituparacanhivare eta nujaneasiraheyare emutu eti esuapanahi éma. Tásiha, nuvaraha nútí nímerecaheya te mamirahu ema Viya te jena sache ticutiyaehi námavahuhe. Éma tíúrisamurénapa eta majacapiraheya, taicha máepachiaruhéipahi ema Espíritu Santo.

¹⁷ Eta mavanaranuirahi ema Jesucristo, nucunachava eta nucaemataneasirahi ema Viya.

¹⁸ Váhisera nucasíñavaimahi, nucuneuchavaimahi tayehe eta jácani nacaemataneasiranahi ena apamuriana mavanarana. Nútisera nítauchahi eta nucatuparahairahi me Cristo eta nímitachiravacahi ena apavasanana eta nasuapirahi ema Viya, náehisirapaipahi eta nímiturapihi étapa eta núrivihi eta nayehe.

¹⁹ Nímechavacahi ichape eta tíaramicareana eta nítapajjiasirava maicha ema Espíritu Santo. Tacahehi eta nítauchirahi tamutu eta nucametarairuirahi eta máimiturapiana ema Jesucristo. Tamutuhi nupaica, népanavahi te Jerusalén, níchechuhapa tayehe eta departamento Ilírico.

²⁰ Taicha ichape eta nuvarairahi nítecapauchaya tamutu avasare, te jácani nájinaichaha nacametarairuhini. Nuvarahaya nucametarairuyare nayehe ena achaneana tájinahi nasamihahini eta májare ema Cristo.

²¹ Nítauchahi eta táechajiriruvahi eta Sagrada Escritura, ani tacahehi: “Náechapa puiti eta májare ema Cristo ena achaneana tájinaquenehi apaesainahini nasamairiricahini eta májare. Náimatiequenehapa eta máimiturapi, éna eta namaitucaquenehi namasamaquenehivare” tacahepa.

Ema Pablo mapanerechapa tiyanayare te Roma

²²⁻²³ Ichapemurihi eta áñoana nuvarairahi nupaipiuchahe éti, nucachaneheya apaesaina. Váhisera nútujicava, taicha eta nupaipiuchirapahi eta apana avasareana. Puítisera nítauchapa eta nupaísirahi tayehe eta avasareana.

²⁴ Tásiha, puiti nupanerechahi nétavauchaheyare achichu juca, nuyaniraya te avasare España. Nuvaraha vicaurisamurechacainapa. Te támutupa eta nucachaneraheya eta nétavauchiraheyare, németeaca ímicatcanuyare jácani eta nuyanirayareva.

²⁵ Nuyanatumayaresera te Jerusalén. Nunapanumayare eta nanaquiruvana ena vichamuriana nayeheyare ena apamuriana vichamurianahivare ticavasanahi ánaqui.

²⁶ Taicha ena vichamuriana te Macedonia, énapa ticavasanahi te juca Acaya, tinaqui-quicavanahi eta náimicatasihaya ena apamuriana vichamuriana páureana ticavasanahi te Jerusalén.

²⁷ Tétavicavahi eta náurisamurevahi eta nanaquisiravahi, navarairahi títsirijicavanaya nayehe. Táurica eta juca náitsirijisravaya, taicha ena nachamuriana israelítana tímimati-
chanahi ena apavasanana eta máimiturapiana ema Viáquenu. Tásiha puiti, énapavaya ena
vichamuriana apavasanana, nacajiyare ena nachamuriana israelítana.

²⁸ Tacahe, te támutupa eta níjarasiravacayare ena vichamuriana páureana eta nanaqui-
ruvana ena nuchamuriana te juca, nuyaninavarepa nucaijuhe te España. Nétavajicaina-
pasera eta ara eyehe.

²⁹ Németeaca eta nítecapauchiraheya, ichapeyare eta víurisamurevaya eta vétumechiraca-
cayare taicha eta véhisirahi ema Cristo.

³⁰ Nuparapenaveana, nuyaseacahe te máijare ema Viáquenu Jesucristo étapa eta vémun-
siracacahi maicha ema Espíritu Santo. Nuyaseacahe ímicatatanuhíni eyaseuchanu me Viya
te eyujarasirana.

³¹ Eyaseacahini eta majaneasiranuhini eta nítecapauchiravacayare ena masuapajiraira-
hanahi ticavasanahi te Judea. Étape eta juca námaqueneyarepahi nanaquiruvanahi ena
vichamuriana, táurihini eta najacapirayare ena vichamuriana ticavasanahi te Jerusalén.

³² Eyaseacahivaréni ema Viya máisapanuhini eta núrismurevainahini eta nítecapauchira-
raheya, ímicatasiranuhini eta nítujuisravaina nucachanehe.

³³ Ema Tata Vicaiyaquene, tétavicava eta macanarasirahi tamutu eta vipanereruana.
Nuvaraha puiti yátupina esamava eta macanarasirahehi éti. Amén.

16

Ema Pablo mámechajirisíha te macartane namutu ena máimatiqueneana machamuriana

¹ Nutuparacahe emutu échapajirisinanu eta suítecapauchiraheyare esu apana vichamuri
Febe. Taicha ésu, tétavicavahi eta suítatiravacahi ena vichamuriana te avasare Cencrea.

² Tauri eta ejacpiraina esu, evapinavayare te máijare ema Viáquenu Jesucristo. Ímere-
cayare eta yátupirahi eparapehivare ésu eta echamurirahi tayehe eta véhiruhi. Ímica-
tacayare te jácani sucamunuiravana. Taicha ésu, camurianahi ena suímicataruanahi.
Nútiripa, tétavicavahivare eta suímicatasiranuhi.

³ Échajisinanuyare ema Aquila ésupa esu mayena Priscila. Vahi némitisicavaca éna eta
nucachamurirahi tayehe eta vicaemataneasirahi ema Jesucristo.

⁴ Ena, vahi nacatiequenehahini eta náitaresirana eta nacatiuchiranuhi. Nuhasulupaya-
chavaca éna. Énerichuvare nahasulupayachavare namutu ena apamuriana vichamuriana
apavasanana.

⁵ Échajisinanuvare ena apamuriana vichamuriana tíurujicavaráhanahi te napena ema
Aquila ésupa esu Priscila. Échajisinanuvare ema némunaruquenehi níunacasare Epeneto.
Éma tínapucahi majacapahi ema Cristo apaicape te nuyanapa te Acaya.

⁶ Échajisinanuvare esu María. Nusamairiricahi eta ichapemurirahi eta suímicatasirahehi
éti.

⁷ Échajisinanuvare ena nujaneanana Andrónico émapa ema Junias. Éna, nuchamuria-
nainihi eta vicaeratairahi te cárcel. Tétavicavahi vémunasirahi éna viti apóstoleana. Éna,
tínapucanahi nuyehe eta náehisirahi ema Cristo.

⁸ Échajisinanuvare ema Amplias, émarichuvare némunaruquenehi eta véhisirahi ema
Viáquenu.

⁹ Échajisinanuvare ema Urbano, ema vichamurirahi tayehe eta vicaemataneasirahi ema
Viáquenu Jesucristo. Échajisinanuvare ema némunaruquene Estaquis.

¹⁰ Échajisinanuvare ema Apeles. Yátupihí éma eta máímeresirahi tíurirahi eta máehisirahi ema
Cristo. Échajisinanuvare ena machichanaveana ema víyarahaini Aristóbulo.

¹¹ Échajisinanuvare éma apanavare nujaneana Heredión. Énapa ena machichanaveana
ema víyarahaini Narciso, tétavicavahi eta nasuapajiraivahi éna me Viáquenu Jesucristo.

¹² Échajisinanuvare esu Trifena ésupa esu Trifosa. Énarichuvare ticaemataneacanahi ema
Viáquenu. Échajisinanuvare esu némunaruquene vichamuri Pérsida. Tétavicavahivare eta
suaemataneasirahi ema Viáquenu.

¹³ Échajisinanuvare ema Rufo. Éma, tétavicavahivare eta masuapirahi ema Viáquenu.
Échajisinanuvare esu maena. Ésu, tímicitijiricavahi mémenahini eta nuyehe ésu.

¹⁴ Échajisinanu ema Asíncrito, ema Flegonte, ema Hermas, ema Patrobas, ema Hermes.
Échajisinanu ena vichamuriana tíurujicavarahiana te napena.

¹⁵ Échajisinanu ena Filólogo, ésupa esu Julia, ésupa esu Olimpas émapa ema Nereo, ésupa
esu maparape. Échajisinanuvare ena vichamuriana tíurujicavarahiana te napena.

¹⁶ Puiti eta néchajisirahehi emutu eti nuchamuriana, nuvaraha nétserarecahe emutu te máijare ema Cristo. Ani te juca, téchajicaheana namutu ena apamuriana vichamuriana te tamutu avasareana.

¹⁷ Nuparapenaveana, nuvaraha ecuneuchavare nayehe ena tipanerechanahi típutsimurahaheana taicha navarahahi tihapapicaheana eta te éhiruhi. Ena nani nacatianacahi eta juca vímiturapihi íaravahuhi.

¹⁸ Érajicavayare eta nayehe, taicha éna vahi émainahini nacaemataneacahini ema Viáquenu Jesucristo. Énajivachucha navaraha tíurichavana. Tétavicavahivare eta náitusirahi téchajiricavana. Títivehi eta náechajirisirava. Étachuchasera navarahahi tivayuarecana te nasamureana ena achaneana tijimuyapanereruana.

¹⁹ Namutuhi tímatiheana éti, náechahivare eta esupajiravahi. Eta tacahe, tétavicavahi eta núsismurevahi ícha. Ecajurucaseraini eta íchirahi eta táuriqueneana. Vahi ecuquicha eta tauriqueneana.

²⁰ Nuti nucasiñavahi me Viya, máimicatasiraheya íputsicavaneya ena machanerana ema Satanás. Tásiha, tíuriyare eta ícharacavahi maicha ema Viya. Nuyaseacaparacavare ema Viáquenu Jesucristo táetaviuchahíni eta iúricacarevaya máicha.

²¹ Téchajicahe ema Timoteo, ema nuchamurihi eta vicaemataneasirahi ema Viáquenu. Énapa ena nujanenana: ema Lucio, ema Jasón, émapa ema Sosípater.

²² Núti apana nuti Tercio, núti nájuchahi eta juca carta, néchajicahe núti apana te máijare ema Viáquenu Jesucristo.

²³ Téchajicahevare ema Gayo, ema nítecapaurehi te mapena. Étarichuhivare víúrujisiravahi te viyujarasirana. Téchajicahevare ema Erasto, ema tayehehi secretario tésorerohi eta te alcaldía. Téchajicahevare ema viparape Cuarto.

²⁴ Nuyaseuchaheparaca emutu éti me Viáquenu Jesucristo, táetaviuchahíni eta iúricacarevaya máicha. Amén.

Eta táichecuaraqui eta macartane ema Pablo

²⁵⁻²⁶ Nuvarahahi vácuticacaini eta vijirauchira ema Viya. Éma, mavarahahi tétumechaheya tayehe eta éhisirahi ema Viáquenu Jesucristo. Eta tacahehi eta nucametarairuirahi, nímitucavacahi namutu ena achaneana eta majacapiravacahi ema Viya eta nacasiñavairahi me Machicha. Acane eta táepaniravahi eta apaquehe, ema Viya Eterno mapanerechapa eta majacapirayare namutu ena achaneana ticasiñavanaya eta mayehe. Ena israelítana énapa ena apanapanenejiqueneana achaneana, namutu tijacapacareanayarehi. Étaripa eta náechajisihagueneanahi ena víyarahánaini profetana tayehe eta Sagrada Escritura. Nájinasera nácaicutiarahini. Mapaenumavapa tímimatichanuhi núti ema Viya eta mapanereruhi.

²⁷ Ema Viya, ¡tétavicavahi eta máitupajijiasirava! ¡Macarichuhi tijirauchacarehi ticunachacarevare tayehe tamutu! ¡Máitavacacayarehi eta vihasulupayachirayare éma tivanecahavihi ema Jesucristo eta macuchucuirahaviyarehi! Amén. Tamutupa.

Eta macartane ema Apóstole Pablo nayehe ena machamuriana ticavasanahi te avasare Corinto, ticajare 1 CORINTIOS

¹⁻² Nuti Pablo, mayehenuhi apóstole ema Jesucristo. Níchuarecasivaichuhi mayehe, manerejirunuichuhi ema Tata Vicaiyaquene, mavarairahi nímitucaya eta náechajiriruvana éna. Puiti nucajurehe nútí émapa ema vichamuri Sóstenes, eta juca carta eyehe eti vichamuriana ecavasanahi tayehe eta avasare Corinto. Puiti éti iávaháruvava eta Viya taicha etupiruvahi esuapa eta máichuirahéhi éti apanava, mavarairahi émayarepa ema Machicha Jesucristo ecaemataneacayarehi. Ecutiripa ena apamuriana vichamuriana ticavasanahi te tamutu avasareana, taicha ecasiñavahi eta eyujarasirana eta mayehe. Vimutu víti, émanarichuhi ema Viáquenu Jesucristo ema visuapaquenehi.

³ Nuvaraha macatajicahehíni ichape ema Tata Vicaiyaquene, émapa ema Viáquenu Jesucristo; nájaracahéhini táurivaina eta epanereruana.

Viúricarepa ichape maicha ema Cristo

⁴ Nútí nuhasulupayachaparaca ema Viya táichavene eta majapanuiraheripa. Eta iávahásirahi ema Jesucristo, ichaperinehi eta iúricarevahi.

⁵ Tíjaracaheripa eta ítupajijiasiravahi eta échajisirana, échemaharipihi tamutu.

⁶ Écharipa eta numetacahequenehi eta májarasiraheya ema Cristo eta iúrivaya. Puítipa tíjaracaheripahi.

⁷ Tamuturipa tíjaracahéhi ema Viya. Tájinapa iátajivainahini eta ítupajijiasiravaipahi. Étanecha eucchapayare eta jena sácheyare machavirayare ema Viáquenu Jesucristo.

⁸ Puiti ema Viya tétumechaheyare puiti juca vicaijuheyare eta itaresiraya apaesa tacuija ecuavamirahu te jena sácheyare machaviraya ema Viáquenu Jesucristo.

⁹ Ema Viya vahi mahapapicaimahi eta mapanereruanahi. Yátupi eta máitachirayarehi eta máichuirahéhi, mavarahahi iúrujicavayare ecachanenapa ema Machicha Jesucristo ema Viáquenu.

Vahi táurica vicaerajicaca

¹⁰⁻¹¹ Nuparapenevane, tájáhápapuca ecayema éti vaipa tétupicava eta epanereruana? Nútí nusamairiricahi eta íputiasiravavacaripa. Taicha tacahehi eta nametasiranuhi ena suchichanaveana esu vichamuri vénaraha Cloé. Nuparapenevane, nutuparacaheyare te májare ema Viáquenu Jesucristo, tácticáca eta epanereruana. Nuvaraha étanainarichu eta epanereruana. Vaipa ecuiputsiacaca.

¹² Taicha ani tacahehi eta nusamairirisirahehi. Ena apamuriana ánipaji nacahehi: “Víti viúripanahi víti véhicanahi ema Pablo”. Ena apamuriana énerichuvare nacahehiji: “Vítira viúripanahi víti véhicanahi ema Apolo”. Ena apamuriana énerichuvaréji nacahehi: “Jéhevaresera víti viúripanahi víti véhicanahi ema Pedro”. Ena apamurianavare nacahepaji: “Vítira viápajupanavahi viúripanahi víti véhicanahi ema Cristo”.

¹³ Váhira tiuri énenahini ácahehíni, taicha ema Cristo vahi apapipijinahini eta máimiturapiana. Nuti Pablo, váhira nútinahini népenahini te crusu íchavenénahíni éti. Eta ecaicachasirahi, váhivare étainahini te níjare.

¹⁴⁻¹⁵ Tiúririchuhi vahi nútinahini nícachasicahéhini éti. Nájinna tiyunacaimahi eta nútinahini nícachasicahéhini te níjare, náepiyaequenehanuhipucaini. Yátupi nícachasicavacahi ema Cristo émapa ema Gayo. Téhesera te májare ema Cristo eta nícachasisravacahi.

¹⁶ (Néchavapasera eta nícachasisrahivare ema Estéfanos, énapa ena machichanaveana. Váipasera néchava nájahapuca nácani nícachasiruanahi.)

¹⁷ Ema Náquenu Jesucristo tituparacanuhi nucametarairuyare eta viúchucuirayare máicha. Váhira étainahini mavanecanuhini nícachasiricahini. Tacahe, tatupiruvahi eta nucametarairuirahi. Váhiserá nuvayuyujicaimahi nútinahapucaini eta nápapucavahini eta nusuapacareva, tásápihapapucaini vahi tacusuapacarehini eta máepenirahi ema Cristo te crusu.

Ema Viya májaracahi ema Machicha Jesús eta máitupajijiasiravahi

¹⁸ Natarihihi ena achaneana náimijachahi súnsurupiana eta juca nucametarairuirahi eta viúchucuiraya taicha eta máepeninahivahi te crusu ema Viáquenu Jesucristo. Ena nani masuapajirairahanahi énará táiturevanayare eta ecuñarame. Vítiserá víti macuchucureanayare, tiúrihi visama eta yátupiqueneana tásihaquenehi me Viya.

¹⁹ Ema Viya ani macahehi eta máechajiriruva eta te Sagrada Escritura: “Tamapurujihí eta náitucaqueneanaini eta títipajijihanainihí, énaripa máehicanurahanahí. Súnurupihí nuyehe eta náechemaraivanahí” macahepa.

²⁰ Eta tacahe puiti, tájina tacunachacarevainasami me Viya eta máitucaquenehi ema achane títipajijiacavahí, mácani máestropuca, tayanapane macarichuhi nayehe ena apamuriana tímatiequenehanahivare eta tayeheana eta juca apaquehe. Taicha tájina vahí étaparacaina mayehe ema Viya eta júcana taicha súnurupianachucha eta mayehe éma.

²¹ Tamutusera eta mapanereruanahí ema Viya, tétavicavahí eta tapachinavavacahí. Éma, tivanecahavihi viti vicametarairuanayare. Nararihi ena tisuapanapahí eta vimetarairuana. Énaripa tíuchucuhanayarepahí. Tayanapane ena apamuriana náimijachahí súnurupianahí eta vimetarairuana. Ena nani achaneana, tamapurují eta náechemaraivanahí, taicha vahí táimimatichavacahini me Viya.

²² Ena nani nujaneanana israelítana náepiyarichuhi tíyaseserecana, navaraha náimaha eta tíaramicareana tíásihana me Viya. Ena griégoana eta nayeherepi natanucahí eta tápajusiravaya eta náechemaraivaya.

²³ Eta tacahe, vahí tasuapacarehini nayehe eta vimetasirahí eta víuchucuirayare táichavene eta máepenirahí te crusu ema Cristo. Ena nujaneanana títsirihanahí eta juca, tásiha náepuru náehica éma. Ena apamuriana apavasanana náimijachaichucha súnurupiana eta juca.

²⁴ Natirihisera ena tisuapanapahí eta máichuirahí ema Viya, ena israelítana énapa ena apavasananahí. Náimatiripa ema Cristo, eta vanairucairahí mayehe ema Maiya taicha éma tíjaracahí ema Machicha eta máitupajijiasiravahí étapa eta matumeva.

²⁵ Tayanapaneinesera te súnurupihípuca nasama ena achaneana eta vimetarairuana, étasera tíápajucavahí tíúripanahí tayehe eta náitucaqueneanahí éna. Tayanapanevare náimijachahí mamaratahairainahí ema Viya, émahisera túmepanahí nayehe namutu éna.

²⁶ Ímativaichuhi, eti nuparapenevaneana, te tíchuhahepa ema Viya, vahí ámutuhini ímatihini eta táichararacavahí eta ítaesirahí te juca apaquehe. Váhivarenéni ámutuhini tuparairucahevacaínahini. Váhivarenéni ámutuhini ecaimahaquenevacahini.

²⁷ Tayanapane ena achaneana náimijachahepuca súnusuhéna éti, manerejiruhehisera ema Viya, taicha mavarahahí máimicatsiriacavacayarehi ena tímijachavanahí títipajijiacavana. Tinerejicaheheripa éti váhirichu túmejicuhénahini, mavarairahí máimicatsiriacavacayarehi ena tímijachavanahí túmejicuana.

²⁸ Tayanapane eta épurucarehi, náimijachavare máiturerehe, manerejiruhehisera ema Viya. Eta tímicaecherachavacahí eta táejecapiravahí eta napanereruana mayehe ema Viya, taicha vahí énaína matanuca ema Viya ena títipajijiacavana, aquenucaraghana, ticaimahaqueneanapuca.

²⁹ Eta juca mapanereruhi ema Viya, mamavarairahí nacuija nacucasiñavavaica te mamirahu éma, náimijachirapuca matuparaca éma nayehe éna.

³⁰ Púitsera éti, majacapaqueneanaripa ema Viya. Mávaháruhevarepa ema Jesucristo maicha ema Maiya. Tacahe, ichaperipa eta échemaraivahí máicha. Sántuheripa máicha, ecutipaipa eta masantuvahí éma. Íuchucurepaipahí tayehe eta ticaviurecarevana.

³¹ Tavaraha vítaucha eta táechajiririvanahí eta Sagrada Escritura, ani tacahe: “Vahí vítijivaimahí vicunachava taicha eta vítipajijiasiravana. Éma vicunachayare ema Víaquenu taicha ema tíúrichahavihi”.

2

Ema Pablo macametarairuhi eta máepenirahí ema Jesucristo te crusu

¹ Nuparapenevaneana, échavarichuhi te nítecapauchahénapa cape juca víásinequenehi. Eta nímitusirahéhi eta máechajiriruva ema Viya, tíúrihi eta níminecapaequenehairahéhi, tamutuhí ticaicutiaracare eta néchajirisirahéhi. Vahí tácajerapihini eta néchajirisirahéhi.

² Taicha nuvarahahí níimimatichaheyare ema Jesucristo, nuvarahahivare yátupinahini ácaicutiara eta masivachaquenehi macatajivairahí éma eta máepenirahí te crusu íchavenéhi éti. Eta tacahe, nupamicavahí nútí eta nímitusirahéhi.

³ Nútí, te nímitucahénapa, vahí nítipajijihahini eta nusamiravahí. Nupícaracavahí támapurujihini eta nímitusirahéhi. Ichape eta tayayacarevahí eta náquehe taicha eta néñamiravahí vahí tacusuapacarehini eta eyehe eta nímiturapiana.

⁴ Nútí, vahí nácutihini mácani achane mavayuyupica eta máechajirisirava. Étiserá ecaicutiaravanehi eta nímitusirahéhi maicha ema Espíritu Santo. Ecaicutiaravanehi étairahí eta yátupiqueneana tásihaqueneana me Viya.

⁵ Taicha nuvarahahi yátupina muracaina eta ecasiñavairahi mayehe ema Jesucristo taicha ímatihí te esamureana eta yátupirahi másihairahi me Maiya. Vaipa ecuehica eta nayeherepianaini ena viáchucanaveanaini.

Ema Espíritu Santo tímimatichahavihi eta mapanereruana ema Viya

⁶ Étiserá ánaquiaparipa eta éhisirahi. Ímatiequenehávacaripa. Tacahe, táuricapa puiti vímitucaca eta apamuri échajirirucava títucacareana ticajerarapianahi. Eta juca títucacareana tiásihanahi me Viya. Vahi tásihaqueneháhini mayehe mácani vicutiquene achane. Énainahípucaini tásihahini nayehe ena ichapequeneana aquenucana, taicha vahi tánasimahi eta napanereruana éna.

⁷ Eta júcana títucacareana tásihaqueneanahi me Viya, mapanereruanahi te tépanavainapa acanevaca. Ánaquiaparipasera eta macaerajisirahini. Tapaenumavapa puiti máimicaecherachinahavihi viti achaneana, mavarairahi visiapaya tayehe eta mávasa anuma.

⁸ Ena aquenucanahi, vahi náimatihini eta mapanereruana ema Viya. Nájina émanainahini ema ichapequene aquenuca máimatihini. Taicha te náimatihini eta mapanereruana ema Viya, váhirichuhípucaini nacuémetatacahíni te crusu ema Viáquenu. Tájina náimatihini eta émairaquenehi Viya, tiásihahi te anuma.

⁹⁻¹⁰ Vítiserá víti, máimitureanahi ema Espíritu Santo. Vímatihí eta mapanereruana ema Viya. Émahi ema tímimatichahavihi taicha macarichu máimatihí eta tayumururevanahi te mapanereruana ema Viya. Taicha ani tacahe eta Sagrada Escritura: “Tétavicavaya eta náuricacareva ena nani témunacanahi ema Viya. Taicha májaracavacaya eta náicuchihi natuparahahi maicha éma. Máimahasirichaha eta tacutiquenehi eta náuricacarevaya. Váhivare tisamairicarehíni eta tacutiquenehi te jácani tiyerehi avasareana. Nájina naratahahini náimijachaimahi eta táetaviuchiravaya” tacahepa eta Sagrada Escritura.

¹¹ Viti achaneana, vicarichu vecha eta vipanereruanapachu tásihaqueneanahi te visamureana. Nájina apanaina náratayahini naecha. Ene macahehí ema Espíritu Santo. Macarichu éma téchahi tamutu eta mapanereruanahi ema Viya, taicha émarichuhi máchanevahi.

¹² Víti, tájina vahi vítijivainahini vímipanerechavahini mayehe ema Viya. Émasera ema Espíritu Santo tímítuchahavihi tamutu eta títucacareana tásihaqueneanahi me Viya, taicha mavarahahi véchayare.

¹³ Eta tacahe, eta juca vímiturapianahi tásihaqueneanahi mayehe ema Espíritu Santo. Vahi tásihaqueneháhini te vipanereruana. Táitusiava, ena vímitureanahi natupiruvahi najacapa taicha mávaháruanahi ema Espíritu Santo.

¹⁴ Énaserá nácani achaneana vahi mávaháruanaina ema Espíritu Santo, vahi najacapaímahi eta máimiturapiana, taicha náimijachahi súnsurupiana. Váhivare nárataha nacaicutiarahini, taicha ticamunucarehi eta máimitusiravacainahini ema Espíritu Santo.

¹⁵ Vítiserá víti yátupiqueneanahi mávaháruana, vicaicutiarahi tamutu eta máimiturapiana éma. Énaserá éna máehicarahanahi, vahi nacaicutiaraimahi eta apanairaipahi eta viyeheropianahi víti.

¹⁶ Tacahehí eta táechajiriruvana eta Sagrada Escritura: “Nájina émanaina achane máemunahírícavahini máimatihini eta mapanereruana ema Viáquenu. Tavetijicha májina mácani máitucahini máimituca ema Viya eta mamaitucaqueneanapucaini” tacahepa. Nájjinavare nácutihavíhíni víti vicaravahuquenehi eta máechajiriruanahi ema Cristo. Vímatirípa eta mapanereruana.

3

Vimutu vicompañerocaca tayehe eta vicaemataneasirahi ema Viya

¹ Nuparapenevaneana, cape te nítecapauchahénapa, vahi tacajerapahini eta nímitusirahehi. Tacutihí te vicajuruca eta amuya, vépiyayasínahi eta vímitusira. Tativahi nímitucahe eta epaisirayare éhisirayarehi ema Jesucristo. Taicha éti vuíchaha támutuhini ínajicahini eta tajamurachaqueneana eta iáqueheana. Vuíchahavare éhicahini eta mavarahaquene ema Espíritu Santo.

² Vahi námainunujicahehíni eta nímitusirahehi. Éti ecutihí ena nácani amuyana tiájicanarichaha. Vahi námainucavahini nanicahini eta cheruji. Ene ecahehí éti, vahi iámainucavaimahi ácaicutiarahini támutuhini. Puítirichucha vuíchahavare áratahaimahi ácaicutiarahini eta apamuriana títucacareanahi murácapanánahi.

³ Taicha éti vuíchaha támutuhini ínajicahini eta tajamurachaqueneana eta iáqueheana. Taicha ecapinarujiricacaichaha, ecatianajiricacaichaha, ípúsímuríajiricacaichaha. Eta epanereruana ecutirichaha eta napanereruanahi ena apamuriana achaneana masupajirairahanarichaha.

⁴ Éti épurujiricacahi nayehe ena echamurianahi, ánipa ecahe: “Víti viúripanahi viti véhicanahi ema Pablo”. Éti apamuri ecahepa: “Vítira viúripanahi viti véhicanahi ema Apolo”. Eta juca ecahehi, tacutíríchaha eta napanereruana ena apamuriana achaneana masuapajirairahanarichaha.

⁵ Váhira nútinayarehi éhica nuti Pablo. Váhivare émaimahi ema maca Apolo éhicayare. Vahi véhicacare víti, taicha mavanarahavichucha ema Viáquenu Jesús. Yátupi viti vímitucahehi. Tamutuhisera mayeaneanhi ema Viya eta esamaqueneanahi. Ema Viáquenu tjaracahavihi eta vituparahapachuyarehi.

⁶ Yátupi nútí nínapucahi nímisamahehi eta máechajiriruva ema Viya. Te néquenepa, titecapuchahepa ema Apolo, émapa títametacahehi tamutu. Émasera ema Viya, ema ticajurusinahehi eta esuapajiraivanahi.

⁷ Táitaurevaquene nútihinéni névacahi te esamureana eta echajirirucavana, tájinasera vahi nútina néchahe. Émaripa ema Apolo, ema títametacahehi, váhivare émaina téchahe. Émara ema Viya, ema téchahi tamutu eta juca. Éma ticunachacare.

⁸ Nútí, émapa ema Apolo, vicuticacahi vínunahi eta vícaematane. Vituparahapachuhisera. Ema Viya tjaracahaviya eta vícuchianapachu, te tíurihi eta vícáematanérana.

⁹ Víti mamusurahavihi ema Viya. Éti ecutihí eta sucurecana eta macajurusirahehi ema Viya.

Eta éhisirahi ema Jesús tacutihí eta náepiyasirahi eta ichapequene peti.

¹⁰⁻¹² Tativa, ema maestro tépiyarecarahi peti arquitecto, éma tinacucha eta labriyu eta tatumearaya eta yúchama. Tásiha, ena apamuriana máestroana, énapa tíunachana eta yúchama étape eta tamaiquehe. Tiúriyare eta nacaemataneraya. Nanerejicayare eta táuriqueneana tasivachaqueneana, navarairahi tjanunucayarehi eta náematane. Váhiya nanacaimahi eta tjuachacareana, yucuquí, muiji, cáchipaca; apaesa vahi tacuiju eta peti. Taicha titecayare máimahapanaya ema ticayeheyarehi eta peti. Tásiha, te máimahapa tíurihi, mavachachainapa namutu ena ticaemataneanahi. Nuti manerejirunuhi ema Viya eta nímimatichirahehi ema Jesucristo, éhicapaipa éma. Puíticha eta ecajuherapaipa te anuma, nájina apanaina naratahahini námahehini. Macarichuhi marataha éma. Puítí, ena apamuriana mamusurana ema Viya tímitucahehi apaesa tajuruca eta esuapirahi. Tacamunusera tíuriyarehi eta náimitusiraheya.

¹³⁻¹⁴ Taicha tatiarihiyare eta sácheyare máimahayare ema Viya eta vémataneanapachu, te tíuripuca. Te tíurihi eta vémataneanahi, ema Viya tjaracahaviya eta táitsivayare eta vématanerepihi. Téhesera vahi táurihini, eta mayucune tájuchayarehi eta vémataneanahi.

¹⁵ Tacamitiequenehayare tamutu jácáni tájina tacunachacarevainahini. Tájina táimaequeneánaimahi. Yátupi víuchucuhahi víti, tájinasera vímaequenéhaimahi.

¹⁶⁻¹⁷ Écharichuhi éti eta mávahásirahehi ema Espíritu Santo. Éti ecutihí mayehehi templo ema Viya, étarichuhi eta máucupaisirarehi máemunaruquenehi. Éma, máicuñacayare muraca náicani tjararecanahi éta. Táitusiava, ejaneacava éti, machu ejarareca eta iúrujasiracacahi, ímijusemaca ema Viya.

¹⁸ Vahi ecuejecapava eta ímijachirahi ímatipa tamutu eta juca vítaresirahi. Étisera ecaravahuya eta me Viya. Éma, tímitucahe eta ítupajijiasiravanaya yátupiqueneana. Échemaraivaina máicha.

¹⁹ Taicha eta náitucaqueneanahi ena achaneana te juca apaquehe, súnurupianachucha eta máimairahi ema Viya. Taicha eta Sagrada Escritura, aní tacahe: “Ena tímijachavanahi náimatiequeneha, énajivachucha tímiaquipaicavanahi maicha ema Viya, taicha eta namáetupisirávanahi”.

²⁰ Ánivare tacahe eta Sagrada Escritura: “Ema Viya máimati eta napanereruana ena tímijachavanahi títupajijiacavana. Tájina eta tacunachacarevanahi eta mayehe”.

²¹ Táitusiava, vahi tíuri ecasiñavaicahini. Vahi étupicava eta éhisiravacahi ena enerejiruanahi éhica.

²² Ecaravahuinaserá tamutu eta vímiturapiana viti mavanaranahi ema Viya: ema Apolo, émapa ema Pedro, nútípa nuti Pablo. Ecamapurava eta ítaresiraichaha te juca apaquehe. Jararihiyarehi eta iúricacareva puítí étape eta sácheana vícajuhequeneana. Vaipa ecupica eta épeniraya.

²³ Échava ema Viya ema téchahehi, taicha éti mayeheripa ema Machicha Cristo.

4

¹ Nuvaraha némechahe eta vicutuparahairahi viti mayeaneanahi apóstole ema Cristo. Mamusurahavihi viti. Tivanecahavihi eta vímitusiraheyare eta mapanereruana ema Viya, eta tayumurevanainihi.

² Puíticha, mácani ticatuparahayare tayehe eta ematanecana, tacamunuhi yátupiyare eta máitachiraina.

³ Natiarihipuca ena ticaunenuanahi te nítaurahhipuca. Étiripa, enevanehipuca ecaunenu. Núti, tájinavare tácyema te ticaunenuanahipuca. Németeaca nítauchapaipa tamutu eta nucatuparahairahi me Viáquenu.

⁴ Váhisera nucasínavavaicahini, taicha néchahi ema Viáquenu, máimahahi éma tamutu eta nucaemataneasirahi éma, te tíurhipuca, váhipuca.

⁵ Eta tacahe, vahi táuricahini tativainahini ecaunehini eta júcana, te vuíchaha ímatieque-nehahi. Ecuchapaya eta mápechiravayare títeca ema Viáquenu. Éma tímicaecherachayare eta tayumurevahi te timapicu. Éma tímereuchahaviya eta vipanereruana te visamurea- napachu. Tacahe, ema Viya ticunachahavinapa eta víurivanahi.

⁶ Nuparapenaveana, numetacahe eta juca eta tíurichaheyare apaesa ácuti eta máuriva ema Apolo, ácutinuvare núti apana eta núrivahi, taicha étanarichuhi eta vímiturapianahi tayehe eta véhiruhi. Vahi táurica enerejicahini nácani émunaruanaya. Vácuticacasera eta émunasirahavina viti vímiturahianahi. Nacuijavare épuruquenéna nácani tímiturahianahi.

⁷ ¿Tájaha tacayema ímijachavahi éti íuripana nayehe ena apamuriana? Tájina apanaina ecasínavaiya, tacarichu ecasínavaiyaya tayehe eta máijjararuheanahi ema Viya. Váchuripa tójjaracheripa éma eta íurivanahi, vahi étijivainahini íurichavahini. Tásiha, ¿tájaha tacayema ecasínavavaicarichucha éti?

⁸ Éti, eta esamiravahi ecaemuñavaipa tímicutijiricavaipa ecayehehini tamutu, ecaimaha- quenehini. Ímicutichavaipavare aquenucahenahini eta esamiravahi. Ímijachavaya vaipa nucamunucarehi eyehe. Jéhechapucaini malayarine yátupinahini aquenucahenahini apaesa viti apanava vémeñahavapaiña eta eyehe.

⁹ Ímatirichu éti eta procesión náichaqueneasa ena tiverearecanapahi tayehe eta guerra. Nanacahi te náijiquimuri ena ticatuparahanahi eta náepeniraya taniruanayare eta sárareana. Ichape eta náimahacarevahi nayehe ena achaneana. Viti apóstoleana ticutumahi tinacahavi ema Viya eta vicutíhi ena nani páureanasamí. Ichape eta vímahacarevahi nayehe ena achaneana, énapa ena ángeleana.

¹⁰ Viti apóstoleana, eta vicaemataneasirahi ema Cristo, tisunsuchahavianasamihiji ena achaneana. Étisera étaviucharipahiji eta ítupajijiasiravahi tayehe eta títucahareana mayehe ema Cristo. Tacutiquene náimijachahivare matumerairahahavisami. Éti, tétavicavaipáji eta etumevavacahi. Tipicauchaheanaripáji ena achaneana. Vítisami tájinapa vípicaucha- carevainahini nacahehi éna eta náechajiriruvahi.

¹¹ Puítiripa vinasirichuhi eta vicaatájivairahi eta vinyaquenerepi, eta vimauneva, étapa eta véchuriasirapa eta vimuiriharapi. Ena achaneana téhahaviana. Tájina viviyava víju- naiya.

¹² Vicávitaraacávahi te vivahuana eta vicaematanera. Ena achaneana ticajachachajica- haviana. Vítisera tájina vácyemahini nayehe. Tiúrihi eta víjicapiravacahi éna. Tipanajirica- havianapa, vítisera vicamichahi tamutu.

¹³ Tamutu sácheana téchajicanahi eta viyehé. Tíñemahi eta nacayemainahavi. Ichape eta vépurucarevahi nayehe. Vítisera vícayehéhi paciencia nayehe, víconsejachavacahi.

Eta mahapasamuresiravahi ema Pablo nayehe ena machamuriana

¹⁴ Eta juca nucajureheirahi, vahi étaina nupanerecha nímicatsiriacahe. Nuvarahahisera núconsejachahevare. Tétavicava eta némunasirahehi, tacutirichu eta nucachichairahéhi.

¹⁵ Tayanapane camurianahi ena eyeheanahi máestroana tímítucaheanahi eta éhisiraina ema Cristo, diez mílnáinahipucaini; nútisera tímicutijiricavahi nácarichuhini éyanuinahini maestro taicha núti nímitatichahehi tayehe eta íuchucuirayare maicha ema Jesucristo.

¹⁶ Eta tacahe, nécatiacahehi eta éhisiraina eta núrivahi núti.

¹⁷ Eta tacahe, névatacyare eta ara eyehe ema némunaruquene nuchicha Timoteo. Éma, títaurahi eta macaemataneasirahi ema Viáquenu. Éma, tímítucaheyare, mámechirahe- yareva eta tacayemaqueneana eta nímiturapiana eta véhisirahi ema Cristo. Táuriquenehi eta máimiturapiana taicha étarichuhi eta nímiturapihi nayehe ena vichamuriana te jácani nupaisineanapahi.

¹⁸ Etiarիրipapuca eti ecasínavaripa eta numaitujisiravaripa néjirapanahéhi. Ímija- chaipapuca nupicahi.

¹⁹ Nuvarahapaicha nútí nįjahuchavahini nítecapauchahehini. Nucuchapahi eta nútujisiravainahini maicha ema Viáquenu. Te nítecapauchahepa, nįmahainapa ena nácarana tisiñavavaicanahi, te yátupihípua eta nacaemataneasirapa. Vahi tisuapacareimahi eta nacuna-chiravana te vahi náimicaecherachahini eta táurivahi eta nacaemataneasirahi ema Viya.

²⁰ Taicha eta véhisirahi ema Cristo, tacamunuhi vítauchayare vicaemataneacayare. Vahi tácarichuimahiya eta véchajiriruvana.

²¹ Tiuri puiti, te ímıyanava ene ecahehi, némecharecaheyarehi te nítecapauchahepa. Téhesera te étupiricava eta epanereruana, ichape eta nńrisamurevayarepahi eta nįmairahayare, nétserajicahénapa.

5

Éma Pablo mavaraha nacaerajica mácani téjcapavahi

¹ Jucarihivare eta juca apana téchacarehi eta matiarihirahi ema émana echamuri téjcapavahi, tíñehicarehi eta juca máichaquenehi. Mavehahiji esu máenaharuva. ¡Váhicha tiuri eta juca máichaquenehi! Énaripa ena navayurevaqueneana ticapecaturarahiana vahi náuricaimahi eta juca.

² Esapihaichucha éti, ¡tétavicavahi eta tahapasamurechirahehi eta íputsimuricacairahi tásihaquenehi eta ecasiñavavaisirahi! ¡Ílurihaipa etsirihapaini, táichavenehi eta máichaquenehi ema echamuri! ¡Ílurihapavare étupiricahini ema maca! Taicha ema Viáquenu Jesús títparacahavi vicuchucayare te vimuri nácani téjcapavanahi te vahi návarahahini néatupiricava.

³⁻⁴ Puiti, nuvaraha íúrujicavayare éti. Eyaseacayare ema Viáquenu Jesucristo máimicacatache eta étupirisirayare eta juca. Nútı apanavare, tayanapane eta nuyerehihehi, étasera eta náchaneva ticachaneheya.

⁵ Íchayare: “Te májıare ema Viáquenu Jesucristo, víti émapa ema Pablo, vicuchucavi te vimuri. Vaipa tijaneacavimahi ema Viya. Máimahavinepa ema Satanás, émainapa téchaviyare. Vivaraha píñajicaini eta juca pímaurivahi, apaesa táuchucuhaini eta píáchaneva te táitecapapa eta jena sáchezare machavirayare ema Viáquenu Jesús” íchayare.

⁶⁻⁷ Éti, vahi táuricahini ecasiñavavaicahini. Tacamunu ecuchucavane ema mácara achane téjcapavahi apaesa vahi macupareacahe eti apamuriana, machu mámairijicahe. Taicha éma macutiripa eta levadura te nanaca te masa eta pan, tayanajicahi tamutu. Étisera, nuvaraha ecutiya eta pan mayehere levadura vinicasare te páscuamuhua. Yátupiquenehi arairu taicha vahi tasisjicahini. Ene ecaheyare éti, vahi tépahaimahi eta iásinequenehi te arairuhepa tacuti eta épaniravahi te éhicainapa ema Jesucristo. Taicha éma, tamutuhi mavachacha eta vímicapasirahi, macutíhi eta uvesa eta vímijararesirahi.

⁸ Táitusiava puiti, vicutinapa ena nujaneanana israelítana eta nacaerajisira eta levadura te napenana te páscuamuhua. Tamutusera sácheana vicauneuchavaya tayehe eta tamauriqueneana, vahi pecatumarehavimahi. Tamutu sácheana eta juca vítaesirahi matapiravarehavinahi, tájınasarepa víchiravaimahi te mamirahu ema Viya.

⁹ Cape eta nucartanehivare eyehe, nįmimetacachehi eta tamaurivahi eta ecachanevacahini ena tíchanahi eta juca pecatua tıvehajiricacana: Súcani esena suvehahi ema apana achane, mácani achane mavehahivare esu apana esena.

¹⁰ Tiuri, nútı eta numetasirahehi, váhisera éna ena nani máehicarahanarichaha ema Viya ena nani tıvehanahi esu apana esena apayena, énapa ena tavayuaruana eta plata, énapa ena tíamerahiana, énapa ena tıcasiñarajiana. Ena nani, náetaviuchahi eta nasimutuvavacahi, tamutuhi návihávaca. Tacamunıpapuca vérajicavahini eta te juca apaquehe, apaesa vaipa nacuitecapauchahavihini. Váhira éna nıcháqueneháni.

¹¹ Mácanisera tímıjachavahi echamuri, vahi nuvaraha ecachanejirica ema tıvehahi esu esena apayena, émapa ema tıvehahi esu esena amaperu máimaruchaha, émapa ema tavayuaruhi eta plata, émapa ema tıcasiñarajiji, émapa ema títpıarahi, émapa ema tıcavarası, émapa ema tíamerahi. Mácani echamuri, te ene macachehi, tájına vahi táuricahini ácachanevacahini te enisirana.

¹²⁻¹³ Vahi nútına tatuparaca eta nacayaserehiyayare te numirahu ena aneacque-neanahi eta viyehe. Téhesera te mamirahu ema Viya eta nacayaserehiraya. Éma téhavacahi éna. Étisera éti, échahi ena echamurianahi. Éti eyaserejiricacayare étıjicacaya. Eta tacahe, ecaevisihayare ema mácara téjcapavahi te emuri.

6

Vahi táurica vímetauchacacahini te namirahu ena máehicarahanahi ema Viya

¹ Énerichuvare nuvaraha numetacahe eta apana: Te natiarihinapuca ena echamur-
rianahi navaraha timetauchacacana, vahi távaraha nayanahini nayehe ena tuparairucana
máehicarahanahi ema Viya. Étarichu nacamirahucacaiyayare te emirahu eti nachamuri-
ana.

² Tativayare échava eta machaneraherahi ema Viya. Étjivayarehi étupiricaca eta íchava-
quenevanahi. Vahi étinayare etanuca ena masupajirairahanahi taicha járajapayare eta
sácheyare ticayaseserehianaya te emirahu éti ena masupajirairahanahi. Puitisera eta
íchavaquenevanahi ánichichaquenevanahi, éti tatuparaca étupiricaya.

³ Écharichu éti tituparacahaviyareva ticayaseserehianayareva ena ángeleana te vimi-
rahu. Tacumapurujichapucaini eta tayeheanahi te juca vítaresirahi, vahi vicuiturueque-
nehahini.

⁴ Puiti éti, te tatiarhipuca eta íchavaquenevahi tayehe eta juca vítaresira puiti, váhique-
nesera etanucaimahi ena emetauresihahini nácani vahi énaparacaimahi nayehe ena
echamurianahi.

⁵⁻⁶ Némechahe eta juca, nímaha te etsirihapuca. Váhiquene táuricahini mayanahini mácani
vichamurihi matanucahini ena tuparairucana máehicarahanahi ema Viya. Tasapihahini
étainahini mametauchihahini mácani machamurihi. Cúverarecapa nacuijahini te etaracu
mácani émanainahini vahi macuituruequenehahini mayasesereca jácani téchacareanahi
nayehe ena vichamuriana.

⁷ Vahi táuricahini íchahini eta juca. Étjicacainahini eta echamuricacahi evarahapa
ejararecaca. Tivarahacarepana eta eratahairaina ecamicha, tayanapanerine ecatajivahi
naicha, tiámeyechaeanapuca.

⁸ Étisera etivavaicapa íchahi eta juca émecatajivachacacapa. Vahi táuricahini eta juca;
násapihahini énahini echamuriana ena etupiaruanahi.

⁹⁻¹⁰ Váhipuca échahi éti eta namaitujisiravaya tisiapana te mávasa ema Viya ena tíchanahi
eta tamauriqueneana. Taicha yátupihí eta namaitujisiravayare tisiapana ena ajairana
tivehanahi esu apana esena apayena énapa ena vahi nayenacacaquenena, énapa nácani
tivehana esu esena amaperu máimaruchaha. Énerichuvare ena esenana, váhivare títujicava-
naimahi tisiapana te mávasa ema Viya, súcani tivehahi ema achane vahi suímaquenevahi,
ésupa súcani amaperu esena namutuchucha suvehapahi. Váhivare títujicavanaimahi tisi-
apana ena nani tivehacacana ajairacacana, énapa ena nani ticasíñarajiana, ena nani
tiámerahiana, ena nani ticapinarurahiana, ena nani ticavaharasiana, ena nani titupia-
rahiana, énapa ena nani náipicararecapahi eta námeresirayare.

¹¹ Ene ecaheni éti eta iásinequenéni. Puitisera títsivachavaipahi eta itaresira, sántuheripa
maicha ema Espíritu Santo, ejacapacarepa mayehe ema Viya, máichavenehi ema Viáquenu
Jesucristo.

*Tiávaháchaviripa ema Espíritu Santo eta te viáquehe viti machanerana ema Viya; tásiha,
tituparacahavipa tacuija eta vituhusivaina*

¹²⁻¹³ Puiti jucarihvare eta numetacaheyare. Nararihipuca ena nacahehi: “Núti néchinava
eta nítaresirahi. Eta náquehe tajamurachahi eta tavarahaquenevanahi. Eta tinicacare
táicuchihi eta viami. Eta viami tatuparahaichuhi tajacapaya eta vinicaquenevare. Ene
tacahe eta náquehe tavarahahi nuveha esu esena tacutíhi eta viami tavarairahi tinica”
nacahepa. Nútisera te nupanereru, vahi énéna tácahe. Yátupi viti véchinavahi. Váhiserá távara-
hacarehini támutuhichaini vichahini eta tavarahaquenevanahi eta viáquehe, vivayuchahini
vichahini eta tamauriqueneana. Yátupi tísapacarehi eta vinisiraya eta tinicacareana.
Tatiarhisera eta sácheyare, vaipa vácamunuimahi eta tinicacare, maicha ema Viya. Ema
Viya máepiyacahi eta viáquehe, mavairahi viceamataneacayare éma. Émapa téchahivíhi
puiti eta juca vítaresirahi. Vahi étainahini táemeiyacahavíhíni eta víchiraya eta pecatuana
esenamarehavinahini.

¹⁴ Ema Viya macacachepucahi ema Viáquenu Jesús te máecari. Ene vicaheyare viti eta
macacachepusirahaviyare viti apanava, taicha tétavicavahi eta máitupajjiasiravahi.

¹⁵ Écharichuhi emutu éti, eta iáqueheana mayeheripahi ema Cristo. Émaripahi téchahehi.
Etarihipucasera ímijachapuca táuricahini vímicachanechahini eta viáquehe tayehe eta
suáquehe esu esena túhusi. Váiparinehi táuricaimahi.

¹⁶ Nuvarahavare némechahe, te mavehahi ema achane súcani esena túhusi, tiánecacahi eta
náqueheana eta nacamujichiracacahi. Acane, ema Viya máijaracapa esu Eva mayehe ema
Adán. Tásiha, eta Sagrada Escritura, ani tacahe: “Te tivehacacapa, tímicitujiricavapa étana-
rinehi eta náqueheana”.

¹⁷ Ene tacahehi eta vítaresira mayehe ema Viya, eta mávahásirahavi ema Viáquenu, eta
viáchaneva tacachaneripa éma.

¹⁸ Eta tacahe, ejaneacava yátupina, machu iáquipaicava tayehe eta túhusicare. Tamutu eta pecatuana náichaqueneanahi nácani achaneana, tajararecahi eta náchanevapachu. Taveti-jipa, mácani achane tivehahi esu esena vahi mayenaquenenahini máimijararecahivare ichape eta máquehe. Ticajachacareinehi eyehe éti eta juca.

¹⁹ Écharichuhivare éti eta mávahásiraheeripa ema Espíritu Santo eta te iáqueheana, taicha mavanerúchuhi ema Viya eta mávahásiraheyarehi ema Espíritu Santo. Vaipa étinahini écha eta iáqueheana.

²⁰ Taicha mavachareruhehi ema Viya. Ichapemurihi eta macatajivairahi íchavenehi éti. Puiti, eta iáqueheana étapa eta iáchanevana mayeheripahi ema Viya. Tacahe, puiti, ejaneacavapa eta ítaresiranahi te namirahu ena achaneana, apaesa namutu nacunachaya ema Viya.

7

Eta maconsejarapi ema Pablo nayehe ena máimaruana, énapa ena nacaimaqueneana

¹ Tiuri puiti, nujcapaheyare eta juca eyaseresiranuhi te ecartane. Yátupi tíurihinéni máyénerénahini mácani achane.

² Táichavenesera eta tavayuaravahi eta pecatu, ticamunucarehi ena ajairana nayenapachuina, énaripa ena esenana ticamunucarehivare náimpachuina.

³ Mácani achane te sutiarhipapuca esu mayena, tacamunuhi máitauchayare eta máitátiraya máemunásiraya esu mayena. Ésuripa esu esena te ticaimaripapuca, énerichuvare suítauchayare eta suítátiraya suémunasiraya ema suima.

⁴ Taicha esu esena vaipa ésuinahini téchinava eta suáquehe. Émapa téchahi ema suima. Ene macahehi ema achane, váipavare émainahini téchinava eta máquehe. Ésuripahi téchahi esu mayena.

⁵ Éti ecaimaqueneanaripa, vahi ecuepurucaca tayehe eta iánesiracacairana. Téhesera tatiarihinapuca eta eyujarauchiravayare me Viya, ecuticacahipuca eta epanereruhi, tísapacare ínajica ánipina eta iánesiracacana. Te táequenénapa, táuricavare échávauchacavare, apaesa ema Satanás vahi macuíturucahe eta máimijamurachiraha ena apanana.

⁶ Tiuri, eta juca numetasirahehi, vahi nútina nucavanairipi. Nísapasera eta énéna ácahe.

⁷ Nuvarahahinéni ácutinuhini nútí eta mayénarenuirahi. Víjaracasipachusera me Viya eta vítaresiraya. Nararihi ena ajairana máyéneana eta náitaesira. Nararihivare ena esenana máimaruana eta náitaesira. Nararihivare ena apamuriana máijjaruichu ema Viya ticaimana.

⁸ Énaripa ena nácara vichamuriana máyéneanachaha, énapa ena máimaruanchaha, énapa ena tépenaimana, tíuripahaninéni nánasihini máimaruainahini; nácutinuhini nútí.

⁹ Étaserá te vahi náratáhahi ticaratacavana, tacamunuichuhi ticaimanayare, apaesa vahi nacuepujuquichava tayehe eta pecatu.

¹⁰⁻¹¹ Tásíha puiti, nutuparacavacayare ena nacaimaqueneanaripa. Ema ajaira vahi macuinajica esu mayena. Esu esena váhivare sucuinajica ema suima. Eta juca vanairipi tásíhaquenehi mayehe ema Viáquenu, vahi tásíhaquenéna nuyehe nútí. Téhesera natiarihinapuca ena vichamuriana náinajicaca, vahi táuricahini nápechavahini nacaimahini, nacachanehipucaini. Tacamunuhi tichavauchacacanayare tivehacacana.

¹² Tiuri puiti, tájinachaha vanairipina tásíhaquenéna me Viáquenu tayehe eta náinajisiracaca ena nacaimaqueneana. Níjaracahesera eta juca nupanereru nútí. Te matiarhipuca mácani vichamuri esu mayena vuíchaha vichamurinahi, te tíurihipuca eta nacachaneracacahi, vahi táuricahini máinajicahini ésu.

¹³ Énerichuvare, te sutiarhipuca súcani esena vichamuri ema suima vuíchahavare vichamurinahi, te tíurihipuca eta nacachaneracacahi, váhivare táuricahini suínajicahini éma.

¹⁴ Taicha ema suima, ichape eta majapanucareva me Viya táichavenehi eta sucaimairahi esu mayena. Énerichuvare esu esena mayenahi ema vichamuri, ichape eta sujapanucareva me Viya táichavenehi eta mayenairahi ema achane vichamuri. Énaripa ena nachichanaveana majapanuhivare ema Viya náichavenehi ena ticachichana, vaipa náepurucarehini me Viya.

¹⁵ Téhesera mácani vuíchaha vichamurina suímahi esu vichamurihi mavarahapuca máinajica esu mayena, suisaparine máinajica. Ema Viya vahi macavanairipi eta suíchejiricahini éma, mayanarine. Taicha ema Viya mavarahahi víuriyare, tacuijapa tahapapiricahavíhi eta vípanereruana. Énerichuvare súcani esena vuíchaha vichamurinahi mayenahi mácani vichamuri, te suvarahapuca suínajica ema suima, énerichuvare máisaparinevare suyana.

¹⁶ Taicha piti esena, vahi pecha te pimaitacayarepuca picajayayasamurecha ema pima eta máehisiraina ema Viya. Pítipa piti achane, váhivare pecha te pimaitacayarepuca picajayayasamurecha esu piyena eta suéhisiraina ema Viya.

¹⁷ Ema Viáquenu títaracahehi eta ématanerepianahi te tíchuhahenapa. Etuparahapachuhi eta ématanerepiya. Váhisera ínjajaimahi, ímíyanavare ítauchaya eta etuparahanahi. Étara eta juca nuvanairipi nayehe ena vichamuriana ticavasanahi te tamutu avasareana.

¹⁸ Nácani ticamarcanaripa te máichuhavacapa ema Viya, vaipa táuricahini nacaepahavahini eta nacamarcairahi. Nácani má márcareanarichaha te máichuhavacapa ema Viya, vaipa táurica nacamarcahini.

¹⁹ Tájina vahi étaparacaina te vicamarcahipuca, étasera tivarahacarehi vicaemataneacayare eta mavarahaqueneanahi ema Viya.

²⁰ Namutu nácani máichuhaqueneana ema Viya, vahi náitsivachaimahi eta náematanerepianahi náijaracahi te máichuhainapa ema Viya.

²¹ Te ecaquenuhipuca éti te tíchuhahenapa ema Viya, vahi ecueñamava eta ecaquenuirahi. Téhesera ímaha eta íuchucuiraina, tájinachucha táichava.

²² Taicha mácani achane músuhi eta máítaresira, tayanapanerine matiarihinahi ema máquenuinahi; téhesera te mamirahu ema Viya, tínunánaripahi mácani achane nájina máquenuinahini eta máítaresira. Puiti ena apinana mavanaranaripahi ema Viáquenu Jesucristo, taicha ticuticacanaripa eta nacaemataneasiraipa ema.

²³ Taicha mavachareruhehi ema Viya. Ichapemurihi eta macatajivairahi íchavenehi éti. Puiti machaneraheripa éma. Eta tacahe, te navarahapuca nayurucahe ena achaneana, vahi ecuisapava nahapapicahe eta ecaemataneasirayare ema Viya.

²⁴ Eta tacahe, nuparapenaveana, ímíyanavayare ecaematane mayehe ema Viya. Ítauchayare eta ématanerepipachu íjaracasíhi me Viya.

²⁵ Tiuri puiti, tájina vanairipina tásihaquenéna me Viáquenu nayehe ena amaperuana máyéneanarichaha éna ena máimaruanachaha. Nútisera numetacaheya eta nupanereruhi. Nuvarahasera esuapanu taicha nútí nucaimitucasiquenehi mayehe ema Viáquenu, táichavenehi eta majapanuiranuhi.

²⁶⁻²⁷ Puiti juca vítaresirahi, tétavicavahi eta vicatajivairahi. Eta tacahe, németeaca nútí tíuririchu nánasi ena ajairana nayehe ena nayenana nácani nacayenaqueneanaripahi. Vahi nacuinajicaca. Énaripa ena máyéneanarichaha, vahi nacutanuca ena nayenaina.

²⁸ Mácanisera sutiaríhi esu mayena, tájinachucha pecatuina eta mavirahi esu esena. Ésuripa súcani amaperu esena, te tatupiruvahi eta sucaimaira, tájinachuchavare pecatuina eta sucaimairahi. Táitsivasera ichapeyare eta nacatajivairaya eta náitátiracacaya, tavetijipa te natiarihinapa ena nachichanaveanaya. Eta tacahe, nuvaraha numetacahe apaesa vahi eucatajivahini.

²⁹ Tiuri, nuparapenaveana, nuvaraha numetacahe ticutimahi ánipirine eta juca vítaresiraya puiti juca vicaijuheyare. Eta tacahe, táurica eta íjarasiravahi yátupina eta ecaemataneasira ema Viáquenu. Étiripa, éti natiaríhi ena eyenana, vahi tacucarichu eta ecaeñamásirava nayehe ena eyenana, énerichuvare me Viya.

³⁰ Te jararihipapuca eta tacáiyasiráhe écatismurepuca, vahi ecuisapa tahapapicahehine eta ecaemataneasira ema Viáquenu. Te jararihipapuca eta tacaúrisamurechirahe, váhivare ecuisapava tahapapicahehine. Te ecaímahaquenehipuca, tísapacare eta ecamapura eta ímahaqueneana eta máíjararuhehi ema Viya, váhivare ecuisapa tahapapicahehine eta ecaemataneasirahi ema Viáquenu.

³¹ Nuvaraha táuríhine eta ítaresirayare te juca. Váhisera ecuisapava ecañamaracava eta ecayeheirayare eta ímahaqueneana te juca apaquehe. Taicha tamutyarehi témitiaca te táitecapapa eta táitaviraya eta juca apaquehe.

³² Eta tacahe, vahi nuvaraha ecañamaracava tayehe eta júcana, taicha mácani achane máyénearehi, tájina tahapapiricahini eta macaemataneasirahi ema Viáquenu, mavarahahi máícutichiravaya eta macurismurechiraya ema Viáquenu.

³³ Mácanisera achane te sutiaríhine esu mayena, ticañamaracavainapa taicha eta máitátirayare esu mayena, mavarairahi macurismurechaya ésu.

³⁴ Ene nacahehi ena esenana. Vahi tácuticaca eta napanereruana suyehe esu esena sucaimaquene ésupa esu esena máimaruchaha. Taicha súcani máimaruhi tahapasamurechahi eta suítátiraya ema Viáquenu, suvarairahi suítauchaya eta mavarahaqueneana. Sújaracayarehi ema Viya eta suáchaneva étapa eta suáquehe. Ésusera esu esena sucaimaqueneapa tahapasamurechapa eta suítátiraya ema suima, suvarairahi sucurismurechaya éma.

³⁵ Eta júcana nuconsejarapianahi eyehe, nuvaraha eta táurivaina eta ícharacavaya. Vahi nuvaraha nupamicache tayehe eta tacajeraqueneana. Nuvarahasera tacuijahini eta tihapapicahe eta ítátirayare ema Viáquenu.

³⁶ Tiuri puiti, eta juca nuconsejarapi mayehe mácani achane te sutiarhipuca esu machicha esena máimaruchaha. Te tahapapiricaipapuca eta sucaimairayare esu machicha, táichavenehi eta suítanahasiraipa; te tiúrihi eta máimairahi, máisapayarehi ticaima esu machicha. Tatupiruvayaresera eta sucaparaperayare. Tájinachucha táimanena; váhivare pecatuina.

³⁷ Mácanisera achane, te tájina máichiravainahini, nájnavare tipamicaimahi; te mavaraha-papuca suánasi máimaruina esu machicha, tiúrihi maicha.

³⁸ Tacahe, tiuri máichayare mácani achane máimachayarehi, tatuparacahi ticaparapeyare esu machicha. Mácanisera vahi máimachahini esu machicha, éma tiúripana maicha.

³⁹ Esu esena ticaima tatuparacahi suítauchayare eta suíjarasiravahi ticaima, sunasirichuyaya eta mayehe ema suima eta náitaresirana. Tiámainucava te táitecapapa eta máitaviraya ema suima, tiúchucuhapa ésu. Ésupa téchinava eta suítaresirayare. Tísapacarepa eta suápechava suaima. Tacamunuhisera mácani vicutiqunehi vichamurihi tisuapajirahi me Viya.

⁴⁰ Tiápajucavasera tiúripanaya te suánasipa máimaruina. Eta juca tásihaquenepe te nupanereru. Németeacahi núti tétupicavapahi eta nuconsejarapiana taicha mávahárunuhi ema Espíritu Santo.

8

Éma Pablo mametacavaca eta nayaseresirahi te tiúrihipuca nanica eta tinicacareana tacayujarahuquene te tamirahu eta nasiñarajiana ena achaneana

¹ Puiti numetacaheya eta táicharacavahi eta enisira eta tinicacareana nayujararehi te tamirahu eta nasiñarajiana ena achaneana. Yátupi vimutu vímatiequeneha tájinachucha táimanena eta juca. Váhisera vácasíñavaimahi eta vítusirahi. Tacamunuhisera tajurucaya eta vémunasiravaca ena vichamuriana, vímicatasiracacaya eta véhisira ema Viáquenu.

² Taicha nararihi ena ticasíñavavaicanapa, tímijachavanapa náimatiequeneha tamutu. Eta juca náichahi táimerecachi vuíchaha náitucahini, vuíchaha nacapayayaracahini eta mapanereru mácani yátupipa máituca.

³ Nácanisera yátupihí témunacanahi ema Viya, éta tímicaecherachahi eta machichanaveanairahi éma.

⁴ Tiuri puiti, numetacaheyare eta juca nuconsejarapi tayehe eta juca enisirana eta tinicacareana tacayujarahuquenehi te tamirahu eta nasiñarajiana ena achaneana. Tájinachucha táichava, taicha eta nasiñarajiana vahi yátupinahini víyanainahini te juca apaquehe, taicha émanarichuhi ema yátupiquenehi Viya.

⁵ Ena achaneana náimijachahi camurianahi ena víyana te anuma, étaripa te juca apaquehe. Namaveracapa ena náquenuanahi nayeheanahi viya, camurianapa naicha eta nasiñarajiana.

⁶ Vítisera viti vímatiequenehanahi émanarichuhi ema Viya Vicaiyaquene te anuma. Éma Jesucristo, émanarichuhi ema Viáquenuhi. Éma Tata Vicaiyaquene mapanerechapa eta tatiarihiyare tamutu eta vímahaqueneanahi; vítipa vimutu achaneana, mavaraha vitiar-ihiya eta vicaemataneasiraya éma. Tásiha, ema Machicha tépiyacahi tamutu. Puiti émapa téchahavihi vimutu. Éma, tíjaracahavihi eta arairu vítaresira.

⁷ Tisimutuanasera ena vahi náimatiequeneha eta juca. Énaripa ena vichamuriana, nararihi ena vuíchaha náemitiscvahini eta navaraira napicaucha eta nasiñarajianaini. Éna, tísamanahi vaipa náetupicavanahi eta nanisirahi eta tinicacare tacayujarahuquenehi, vahi táuricahini eta nasamirahi.

⁸ Numetacahesera puiti, vahi étaparacaina eta tinicacare, vijacapacareyare me Viya táicha. Váhivare étaimahi tiúrichahavihi mayehe ema Viya, te vahi vinicahi. Váhivare tíjararecavimahi mayehe te tiúrihipuca eta vinisira.

⁹ Eta tacahe, ecauneuchava yátupina machu émejecapavacha ena apamuriana vichamuriana vuíchaha náimatiequenehahini eta júcana.

¹⁰ Étisera éti ímatiequeneanaripa, te ísapavayahipuca enica eta tinicacare nayujarareanahi te tamirahu eta nasiñarajiana; tacahe, te máimahahepuca ema echamuri, énerichuware tísapavayarehi tinica. Táitsivahisera tipicacaracavahi jácani te masamure.

¹¹ Eta tacahe, échapavaya éti tayehe eta ímatiequenehairaripa machu émejecapavacha ema echamuri mácani vuíchahapiravahi máimatiequenehahini eta júcana. Émarichuhi iúmurivahi eta mavacharesirahehi ema Cristo eta máepenirahi te crusu.

¹² Éti, te ehapapicapuca eta táurivahi eta napanereruana ena echamuriana, éti ecapecaturaipa eta mayehe ema Cristo, taicha eta émejecapavachirahi ena echamuriana.

¹³ Ácutinu eta juca nuyeherepihi: Te nútinahipuacaini némejecapavachaini mácani nuchamuri táichavene eta nunisirainahini eta vaca, váhirine nunicaimahi, apaesa vaipa nuquemecapavachahini éma. Éti apanava, ene ecaheyare. Váhivare ecuemecapavacha ena echamuriana.

9

Éma apóstole Pablo, tatuparacahi náitátiyare ena máimitureana

¹ Núti, nájina náquenuinahini te juca apaquehe. Yátupi apóstolenuhi mayehenuhi éma Viáquenu Jesucristo. Nucutinasivacahi eta návacurehi nayehe ena apamuriana apóstoleana taicha nímahaquenehi éma Viáquenu Jesús. Étiripa, etupiruvahi esupanu eta nímitusi-rahehi. Éta tímereuchanuhi eta táurivahi eta nucaemataneasirahi éma Viáquenu.

² Tayanapane nacañajivarinepuca nácani vahi tisuapapajicanuanahi eta apóstolenuirahi. Étiserá esupanuyarehi, taicha etiaríhi eti nímitureanahi, étira ímereuchanuhi eta yátupirahi apóstolenuirahi mayehe éma Viáquenu.

³ Étara nucatiuchiavahi eta juca nayehe ena tépurujiricanuanahi.

⁴ Éti tituparacahéhinéni ítátinuhini núti tayehe eta nunicaquenerepi táichavenéhi eta apóstolenuirahi.

⁵ Énerichuvare tituparacahéhi ítátiívaréni te sutiaríhinahini esu esena nuyenainahini, súcani nucutiquenehi tisuapajirahi. Tácutihini eta ítátirovacahi ena esenana nayanahini éna apamuriana apóstoleana, émaripa éma Pedro, énapa éna maparapenaveanahi éma Viáquenu.

⁶ Éti, ímijachaipapuca núti émapa éma Bernabé, vicarichuhi vahi tatuparacahavíhini eta ítátirovavíhini eta vicametarairuirahi.

⁷ Puiti nuvaraha nímicutiárahinaheyare eta nacaitaticasira éna ticaemataneráhiana. Aní tacahe: Namutu éna suntaruana ticaitaticasianayarehi nayehe éna comandanteana. Énerichuvare, éma tísucurecáhi eta tinicacare, tatuparacáhi masamapuhayarehi eta tahi eta masucureanahi. Émaripa ticayehehi vaca tatuparacáhi máerayarehi eta tacheneama eta mavacane.

⁸ Éta juca níchirahehi, vahi nácarichu núti nucapanereruhi eta júcana. Énerichuvare eta Sagrada Escritura májurehi éma Moiséini títametacahavíhivare.

⁹ Ánipa tacahehi eta táechajiriruvahi: “Vahi picuitisumucha eta pivuíyerana, te ticaematanepahi taicha técuhanapahi éta”. Táitaurevaquene éma Viya vahi tácarichuhini eta vuíye eta máechajisihahi.

¹⁰ Énerichuvare víti mayunacáhi te máechajiriruvahi. Mavarahahi vicaenicasiyare vimutu víti vicaemataneráhiana. Tacutihí mácani achane ticaematanerahi. Macaematanecáhi muraca eta máesane, mavarairahi máimaquenehayare eta távameanahi eta máesane.

¹¹ Ene vicahehi víti eta vévasirahi eta máechajiriruva éma Viya te esamureana. Éta tíúrichahéhi. Tásiha, éti ecutinapa eta sucureca tímecavahi eta táhi. Tájiina táichava eta ítátirovavíyarehi víti.

¹² Éna apamuriana ticasínavanahi eta eyehe. Tásiha éti, tíúrihi eta ítátirovahi. Vivetijipa víti vítáticarehi eta eyehe.

Váhiserá vávarahahíni vicasínavahíni víti eta eyehe, víyaseacahehíni eta ítátirovavíhíni. Vicamíchahí tamutu, vímavarairahí tatiátirovavíhíni jácani apanainahíni tahapapiricahíni eta esamirayarehi eta máechajiriruva éma Cristo.

¹³ Écharichuhi éti eta mavanairípi éma Viya nayehe éna téchapajiricana eta mayehe Templo, nanicayarehi eta tinicacare námaqueneasana éna achaneana nájaracasiruanahi éma Viya. Cájaracasianayareva éna eta vaca táeche eta námvahuanahi éna achaneana.

¹⁴ Ene tacahehi eta mavanairípihi éma Viáquenu eta víyehe víti vicametarairuanahi eta tapachinaquene máechajiriruva, tituparacahavíhi víjacapayarehi eta vinicaquene taicha eta vicametarairuirahi.

¹⁵ Nútiserá tájiina nímatiyahíni nuyaseacahehíni eta ítátirovavíhíni. Étaripa puiti te juca nucartane, váhivare nuyaseacahe íjaracanhíni. Nucamíchahí tamutu. Tíúrirovavíhíni nípénavanehíni, machu tachimaracancuáru táitava eta juca núrisamurevahi núti tamajínairahi nuyaseacahehíni.

¹⁶ Núti vahi étaparacáina nucasínavahi taicha eta nucametarairuirahi. Nutuparahaichuhi eta juca. ¡Páurechichanusami te némunahacava nínajica eta juca nucametarairuirahi!

¹⁷ Táicha núti, vahi nútíjivainahíni níjaracavahíni mayehe éma Viáquenu eta nucametarairuiraya, étapapucáini nujacapihahíni eta nuvachayarehi eta mayehe. Nuvanecasihiserá me Viya eta matuparasiranuhi eta juca némataneyarehi.

¹⁸ Ichapesera eta nuvarairahi eta nucametarairuira, taicha tijarahi te nusamure eta nuratahairahi nucametarairu, tamajinairahivare nuyaseacahehini eyehe éti. Vahi nupamicahehini eta ítátiranuinahini táichavenénahini eta nucatuparahairahi eta apóstolenuira.

¹⁹ Nájinahinéni te juca apaquehe napamicanuhini eta nucaemataneasirainahini táichavénehípucaini jácani náitátiranuhini, énaiahípucaini náechanuhini. Nútisera njaracavahi nátauchayarehi tamutu eta nucamunucarevahi nayehe ena achaneana, apaesa étainahípucaini núturusihavacahini ena nasimutuvaqueneana, machanerainahini ema Cristo.

²⁰ Étaripa te nitecapauchavacavare ena nujaneanana israelitana, ichaperinehivare eta nupicauchiravacahi éna, apaesa najimuyasamurepapuracaini eta náehisirainahini ema Cristo, étainapuracaini núturusihavacahini éna. Ena nani, ichape eta nasuapirahi eta mayeherepiana ema Moiséini. Tásiha, te nucainunavaca éna, tájinavare vahi nucaecahihini eta nayeherepihi, nupicauchahivare éna apanava. Váhineni nútíparacainahini tayehe eta náehiruhi.

²¹ Tatiarhisera eta yátupiquenehi néhiruhi nuvanahihi mayehe ema Viya, májjararunuhi ema Cristo. Énerichuvare te nucainunavaca nácani apavasanana máehicarahanahi eta mayeherepianahi ema Moiséini, váhivare nucaecahivaca. Nupicauchahivare éna, nuvarairahi nucajimuyasamurechavacahini éna apanava.

²² Te nucainunahivarepuca ena vichamuriana nácani vúichahahi náitamuturucahini náimatiequenehahini eta véhisirahi ema Cristo, váhivare nucaecahivaca eta namaimatiequenehairarichaha. Ichaperinehi eta nujapanuiravacahi. Nímicitacavacapa, nuvarairahi náimatiequenehapaini yátupinahini eta véhiruhi. Namutu ena achaneana, nujapanuvacahi. Nutanucahi eta nucajimuyasihayare eta nasamureana apaesa nanerejicavapaini náehicahini ema Cristo, machanerainahini éna.

²³ Núti nátauchahi tamutu eta júcana apaesa najacapa eta tapachinaquene máéchajiriruva ema Viya, apaesa vácuticacapaii vámutuhini vijacapa eta víurivayare maicha ema Viya.

²⁴⁻²⁵ Écharichuhi éti, ena ticavijarurahiana pelota, tijaneacavanayarehi muraca, ichape eta ticaravahunumanayare apaesa túmeanainapa eta naratahairaya navereasihaya ena nánaranayarehi. Te vahi najaneacavahini, vahi tiverearecanaimahi. Ene ecaheyare éti, ichape eta étumechiravayare apaesa tauri eta ecaemataneasiraya ema Viáquenu, ejacapihainasarepa eta etuparahahi mayehe. Eta navereareruanahi ena ticavijarurahiana, vahi tánasimahi. Témitiequenehavanyarehi. Vahi tácutimahi eta vijacapaquenyare me Viya. Éta, tájinapa ticamitiequenehaimahi.

²⁶ Nútiripa eta nucaemataneasirahi ema Viáquenu, ichape eta nupamisiravahi, taicha eta námátirahi eta mavarahaquene. Vahi némepururecavaimahi.

²⁷ Nucaratacavahi muraca. Vahi nusuapahini eta tajemurachaqueneanahi eta náquehe. Nupamicahi eta táemitisirainahini eta tamauriqueneana, machu néjecapavapuracaini, tásiha váipapuracaini nucujacapaii eta nícuchihí. Ichape eta nutsirihacarevapapuracaini, tavetijipa eta camurianairahi ena nímitureana tayehe eta véhisira ema Cristo.

10

Ena Pablo maconsejachavaca vahi nacucuti ena ticasíñarajijana

¹ Nuparapenaveana, nuvaraha némechaheyare eta náichararacavahi acane ena viáchuca-naveanaini máumurivanaini ema Moiséini. Eta náehisirahi éma, tatiarihi eta úcaji tímícauchavacapaii namutu éna. Eta nánuesirahi eta mar ticaijarehi Títsiama Une, namutu náimahahi eta tájijivahi eta nánuesiraya.

² Namutu ena nani tíjaracavanahi eta nátauchiraya eta náehisiraya ema Moisés, eta nánuesirahi eta ichape une mar, náehisirahi eta úcaji*.

³ Énerichuvare namutu ticuticacanahi eta nanisirahi eta tinicacare tásihaquenehi me Viya.

⁴ Namutuhivare térana eta une tásihaquenehi me Viya. Eta juca une náeresaparacahi éna, táuchurehi tayehe eta mari, maicha ema Cristo. Émairahi ema tinapumirauchapaii éna, máitátivacapaii eta napaisirapaii.

⁵ Tamapurujihisera eta majaneasiravacahi ema Viya. Vahi émainahini éma náesenicahini. Tájinachucha vahi nacaurisamurechahini éma. Eta tacahe, máicuñacavacapa ema Viya. Namutuyaréni tépenaracánahi tayehe eta mávapahi apaquehe. Tiúchucuhanahisera ena nachichanaveana.

* **10:2** Ena Pablo máimicuticha eta nánuesirahi eta ichapequene mar, tímícutijiricavahi eta nacaicachasihini te une, étapa te jara úcaji.

⁶ Ena viáchucanaveanaini, táimicuñacahi eta najamurachirahi eta tamauriqueneana. Étara eta juca ticauyayacarehi eta viyehe, énémahihávinahini víti apanavare vácutihini éna eta najamurachirahi eta tamauriqueneana.

⁷ Váhivare ecucutipa éna eta nacasiñarajirana. Échava eta Sagrada Escritura ani tacahehi: “Ena achaneana náichapa eta napiestachirahi eta nasiñaraji. Ticaejacacanapa eta nanisiraya, téranapa. Téchepucanapa tírimaicana te tamirahu eta nasiñarajihí” tacahepa eta Sagrada Escritura.

⁸ Váhira énéna vicucae víti. Váhivare vicuveha esu apana esena. Tacuija eta vituhusivaina. Machu vácutiriana éna eta nacaicuñairahi táichavenehi eta náichirahi eta juca tamauriqueneana. Tépenaracanapa. 23,000 achane ena tépenanahi te jena étanaquenehi sache.

⁹ Váhira vicuyurujica tayehe eta mapanereruanahi ema Viáquenu. Ena nani tiyuruchavanahi, vaipa nasupahini ema Viya. Tásiha, máicuñacavacapa éma, táechucavacapa eta quichare. Tépenaracanapa.

¹⁰ Váhira tacucarasacava eta échajisirana mayehe ema Viya. Vahi ecucuti eta náejecapiravahi ena viáchucanaveanaini. Macapapajiruanahi ema ángele mavaneruhi ema Viya.

¹¹ Tacahehira eta juca náichavaquenevahi ena viáchucanaveanaini. Púiticha tanasíhi te ajureca téjacahi tamutu maicha ema Viya. Tamutu eta juca témechahavíhi víti, ticatsimavacarehivare viyehe víti vinecapaequenehanahi eta juca táitavirainapa puiti juca sácheana vícaíjuheyare.

¹² Eta tacahe, vahi ecumijachahini tájina tiáquipaicahe. Tatuparacahi ecauneuchavayare tayehe eta tamauriqueneanahi.

¹³ Puiti juca eta vítaresira, jararihi eta tavaraha témejecapavachahavi. Váhiseru ecuramihini, taicha eta tacahehi eta náichararacavahi namutu ena achaneana te juca apaquehe. Ecasiñavayaresera muraca mayehe ema Viya, taicha yátupi eta macasiñacarevahi. Éma, vaipa máisapaimahi távayuchavahichaini eta tapamisirahe. Jéhesare éma, tíjaracahénapa eta etumevayare, ecamichirayare tamutu.

¹⁴ Tásiha puiti, eti nuparapenaveana némunarqueneana, érajicavayare nayehe ena ticasíñarajijiana.

¹⁵ Éti ímatiequenehahi tamutu. Eta tacahe, numetacahe apaesa táuri eta epanerequenehairaya.

¹⁶ Étaripa eta juca vérasahi vimutu viyujaraureasahi te vinicayare, étarichuhi táicutiarahi eta máitine máepusairuhi te crusu ema Viáquenu Jesucristo. Étaripa eta pan vinicaqueneasa viyuvetuhejiricacahi, étarichuhivare táicutiarahi eta máeche ema Viáquenu. Eta vérirahi étapa eta vinisirahi, táicutiarahi eta víurujiasiracacahi te máijare, tásiha éma tiávahácahavihivare vimutu víti víurujiacanahi éma.

¹⁷ Yátupi apanapanenejihavíhi víti, visimutuvaqueneanahi. Émanarichuhisera ema víavaháruhi. Eta vinisirahi eta pan, étarichuhi te máijare eta viyujarauchirahi.

¹⁸ Eta juca víurujiasiracacahi, vicativacaipa ena nujaneanana israelítana. Éna, tíurujiacacanahi eta nanisiraya eta tacayujarahuquenehi me Viya eta tinicacare, navarairahi mávahácavacaini ema Viya táichavenehi eta nanisira.

¹⁹ Tiuri puiti, vímatiequenehahi tájinachucha táimanéna eta vaca nayujaraurehi náijaracaseruhi eta nasiñaraji ena achaneana. Tacutirichu eta vaca mayujaraurehi. Taicha eta nasiñaraji, tájinachucha tasamacarevainahini.

²⁰ Nuvarahasera némechahe, eta nayeherépiana ena nani máimatirahanahi ema Viya, énachucha nájaracasichahi ena éreanana eta tinicacare. Vahi émainahini ema Viya nájaracasichahini. Eta tacahe, vahi nuvaraha ímicasiapava éti eta nayehe, machu náimivehahe nayehe ena éreanana.

²¹ Vahi táuricahini apiquerehahavinahini: eta véhisirahi ema Viáquenu, tásiha véhicahivarepucaíni ena éreanana. Te enicayare eta tinicacare, te érayarepuca, tatupiruva eta ecurujisiracacaina mayehe ema Viya. Mácarichu émaina ecasiña.

²² Machu ímiyusemaca ema Viáquenu, taicha vahi áratahaimahi ecanara éma.

Vímerecaya eta vémunarivaianaya nayehe ena vichamuriana

²³ Yátupinéni víti véchinavahi, viyeherepipachuyarehi eta vinisiraya, váhisera tácuticacahini tácuticavahini mayehe ema Viya, váhivare tácuticacahini táimicatacavahihini eta vípauchiraya ema Viya.

²⁴ Tásiha, nuconsejachahe puiti: Vahi ácarichuimahi eti iúrichavayarehi; énerichuvare etanucayarehi eta táurichiravacayarehi ena apamuriana.

²⁵ Te enicayarepuca eta vaca tíasiha te mercado, vahi ecuavamirahu eta enisirayare, váhivare eucamesa ecuecha te ticayujarahuhípuca eta vaca, apaesa tacuija tahapasamurechahe.

²⁶ Taicha ema Viáquenu, éma tépiyacahi eta apaquehe, étapa tamutu eta távapahianahi. Vituparahaichuhi eta vinisiraya máicha.

²⁷ Títecapa te náichuhahepuca enica nácani vahi vichamurianainahini, te ísapavayarepuca tíamaheana, tíurichucha enica eta náijararuheyare. Váhisera ecuyasereca te ticayujarahuhípuca eta tinicacare.

²⁸⁻²⁹ Téhesera natiarihinapuca nácani tinecapaequenehanahi, te nametacahepuca eta nayujarauchirahi te tamirahu eta nasiñaraji, tíuripana vahi ecunica, apaesa tacuija tahapasamurecha eta mapanereru ema timetacahehi. Éti, émitisicapuca eta epicauchirahi eta nasiñarajiana. Émasera ema echamuri, vuíchaha máemitisicahini. Tásiha, nuvaraha tacuija tahapapicahini eta mapanereruana icha éti.

³⁰ Téhesera etiarihinapuca ecahe: “Vahi núrica nucarinepapuca nútí tituparacanuhi nujaneacavayare apaesapuca vaipa nucuemejecapavacha eta mapanereru ema apana. Nútí nuhasulupayachaparaca ema Viya eta nunisirayare” ecahepuca.

³¹ Tiuri puiti, nuconsejachaheya: Tamutu eta enisirana étapa eta érirana, étapa eta ecaematanerana, tíuriyare tamutu eta íchirayare te mamirahu ema Viya énapa ena achaneana. Jéhesare, ena achaneana nacunachainapa ema Viya taicha eta náimairaheyarehi tíuríhi icha tamutu.

³² Jéhesare, nájinapa émejecapavaruímahí, énaripa ena israelítana, énaripa ena apavasanana, navetijipa ena vichamurianahi, taicha vicuticacahi eta machichairahavihi ema Viya.

³³ Ácutinu nútí eta nuyeherepihi. Ichapemuríhi eta nuvarairahi nucurisamurechavaca namutu. Vahi nácarichuhini nútí nutanucachini eta núrichiravayare. Énerichuva nutanucahivare eta núrichiravacaya ena apamuriana, taicha nuvarahahi tauri eta náehisiraina ema Viya, náuchucuiraina éna apanavare.

11

¹ Nútí puiti juca nítaresirahi, étapa nupanahi eta máitaresirahi ema Cristo. Nuvaraha éne ácahéni éti apanavare, epananuyare nútí eta juca nítaresirahi.

Esu esena témetserajicavaya nayehe ena suchamuriana te úurujisravana

² Ichape eta nucunachahe eti nuparapenaveana, taicha eta emaemitisiranuhi. Ímiyanavahivare éhica eta ímitucasivanahi nuyehe.

³ Nuvarahasera némechaheyare eta juca apanavare téchacarehi. Ema Tata Vicaiyaquene, éma machutirihahicha ema Cristo. Ema Cristo, émapa vichutirihahi vimutu viti ajairana. Ene nacachehi ena ajairana nacayenaqueneanapa, éna nachutirihanahivare ena esenana nayenana.

⁴ Eta tacahe, viti ajairana vahi víuríhahini vicaepacasihini te viyujarauchavaya étaripa te vicametarairuyare. Taicha te vicaepacasihi, tímicutijiricavaipa vémeperuhi ema Cristo eta vichutirihairahi éma.

⁵ Ésusera esu esena tatuparacahi ticaepacasiyarehi te tiyujarauchavayare, étaripa te ticametarairuyare. Taicha te vahi ticaepacasihi, tímicutijiricavaipa suémepuruhi ema suima eta suchutirihairahi éma. Te vahi ticaepacasihi ésu, tímicutijiricavaipa sucachuca-siquenénahini ésu. Sucutihí ena túhusiana.

⁶ Esu súcani esena vahi suávarahahini ticaepacasi, ésu tivaraha sucutiyare ema mácani ajaira. Tásiha, te suvarahapuca suácutihavi viti ajairana, tíuripanahi sucachucasipaini, suítahisivanepaini. Téhesera te tímitsiriacavayahípuca eta suítahisiraya, tíuripanaichuhi sucaepacasihini, suácutihini ena supáaesénávana.

⁷⁻⁹ Taicha te tépanavanainapa ena achaneana, ema máinapuiruhi ajaira vahi étainahini máuchusinénahini suyehe esu esena. Te mavahuana ema Viya máepiyasinehi ema ajaira. Ema Viya manacahi eta máimahi, mavasirichuhi eta máimahihi ema Viya. Eta máurinavahi tásihaquenehi me Viya. Ésusera esu esena suínapuiruhi, súchurepa esu te máquehe ema ajaira, étaripa eta súrinavahi tásihaquenehi mayehe. Eta témepiyacahi esu esena, macompañerayare ema ajaira, mayenayarehi ésu. Vahi ésuina esu suémepiyacahini ema ajaira eta sucaimairaya. Eta tacahe, eta viyujarauchiravana, viti ajairana tatuparacahavi vahi vicaepacasihini, taicha viti vicaquehehi ema Viya, vicuticacahi ema viáchucaini Adán.

¹⁰ Énasera ena esenana, tatuparacavacahi ticaepacasianayare eta nayujarauchiravana, nacutiyarehi ena ángeleana ticaepacamiranahi te natupíhamirauchayare ema Viya, navarairahi náimereca eta napicauchirahi.

¹¹ Puítisera, eta juca vítaresirahi véhisirahi ema Viáquenu, ichapemurihi eta véjiasiraipa eta náitátirahaviya ena esenana. Vítiripa ichapemurihivare eta náejasirahavihi éna eta vítátiraya víti ajairana.

¹² Esu esena, yátupihí eta súchusirahi ésu te maeche ema ajaira, puítisera víti ajairana étapa víúchusihahi te sujuhe esu esena ticachichahavi. Viásihaquenehisera vimutu mayehe ema Viya.

¹³ Nuvaraha epanerequenehaya yátupina eta juca. Németeaca nájina éti ímijachavahini tíuríhi esu súcani máepacasinávehi eta suyujarauchiravahi me Viya.

¹⁴ Víti ajairana véchahi eta tatsirihacarévahi víújijiquihini eta víchutumaca.

¹⁵ Suímiturevahisera esu súcani esena súrihahi tíújijiquiyarehi eta suchutumaca. Étara tíúrinachahi ena esenana. Náijaraichuhi éna eta nacaepacasiraya taicha natuparahaichuhi éna.

¹⁶ Te natarihinapuca nácani vahi navaraha nasama eta juca nímiturapihi, tacamunuhi napanerechinavayare tatívaina. Tájina vímatiyahini eta juca apayeherepi. Énaripa namutu ena víchamuriana, tájina apanaina nayeherepinahini.

Ema Pablo macajachavaca eta namaetupisiravahi te tinicanayare eta tinicacare táicutiarahi eta máepeninahavihi ema Viáquenu

¹⁷ Tiuri puiti, numetacaheyare eta juca apana. Tájina eacunachacarevainahini nuyehe, taicha vaipa táetupicavahini eta íúrujisiravanahi eyujarauchiravana.

¹⁸ Jucarihisera eta juca ticatíhi nuyehe. Nusamáiricahi te íúrujisiravana íchirana eta culto, vaipa tacuticahini eta epanereruana, íputsimuriavavacapa. Németeaca núti cañarihihi eta íchavaquenévhahi.

¹⁹ Páurehesami eta íputsimuriavairacacahi. Étainapasera ecaecheraiyaya eti yátupique-
neanahi machaneranahi ema Viya, énapa ena vahi machaneranainahini.

²⁰ Eta juca tíchahehi vaipa táetupicavahini te ecurujicaca enisirayare eta tinicacare táicutiara eta máepeninahavihi ema Viáquenu te crusu. Váipasera émainahini tatupiruruchahini.

²¹ Títecapa vaipa ecuchapacacahini. Nararíhi ticainapupuiricavanapa tinicana nayéhe-
chirávavacapa. Tinahacavanapa térana técavahachávanapa. Nararíhisera ena apamuri-
ana técuhananaripaicha.

²² Tájina taurivainahini eta juca íchaquenehi. Ticutipa tacuijaquenéahini epenai-
nahini, étainapaini enisihahini érihahini. Tímicutijiricavaipa épuruvacahi ena apamuriana
machaneranahi ema Viya. Ímicatsiriacavare nácani tájinaquenehi naviyavahini. Étupica-
vaipapuca eta juca ecahehi. Tájinaquenepasera eacunachacarevaina eta nuyehe.

Eta táetupisiravahi eta vinisirahi eta tinicacare táemechahavihi eta máepeninahavihi ema Viáquenu te crusu

(Mt 26.26-29; Mr 14.22-25; Lc 22.14-20)

²³ Núti tatupiruvahi eta nucaimitucasirahi mayehe ema Viáquenu. Tásiha, étarichuhivare eta nímiturapihi eyehe. Taicha ani tacahehi eta nímitusirahehi: Te jena yátiquenehi te ticaija-
rarecasiyarepa ema Viáquenu Jesús, mavehapa te mavahuana eta pan.

²⁴ Te tamutupa eta mahasulupayachirahi ema Viya, mayuvetucapa eta pan. Tásiha, máichavacapa ena máimitureana: “Enica eta juca néche. Étivenehi nímiararecavahi eta népeniraya. Eta juca aparahiyare te apaquehe, te étipava énicaca, éta témechaheyare nuyehe” macahepa.

²⁵ Te tamutupa eta nanisirahi, mavehavarepa te mavahuana eta máerirare, mahasulu-
payachavare ema Viya. Tásiha, máichavarepa ena máimitureana: “Era eta juca nítimeama táepusairuvayare. Eta juca táicutiarahi eta nucaejasirayare eta arairu matratune ema Tata Vícaiyaquene eta eyehe, majacapiraheyare eti ecasiñuanayare, arairupa eta éhiruyare. Eta íchiraparacayare te énicaca, éta témechaheya eta nuyehe” macahepa ema Viáquenu.

²⁶ Puíticha tanasi eta juca. Aparahiyarehi viyehe. Te vénicaca étapa eta vésicacaca, vémechacacahi ena víchamuriana eta máepeninahavihi ema Viáquenu. Tíamáinuacava vícainajiruyare te mápechavavare máiteca.

Tacamunu eta vípicauchirayarehi te vinicaya

²⁷ Namutu nácani tinicanahi téranahi eta táicutiarahi eta máepeninahavi ema Viáquenu, te vahi tétupicavahi eta napanereruana, váhivare napicauchahini, ticapecaturanaripa éna. Náemepururecaripa eta máítine étapa eta máepenirahi.

²⁸ Eta tacahe, nácani tinicanayare, tativanumayare tipanereacavanayare te tájinahipuca náichiravainahini te mamirahu ema Viya. Te tájinahini nasama, tísapavanayarehi eta nanisira-
yare, náerirayare.

²⁹ Taicha te vahi tipicauchacarehi eta náimairahi eta máeche ema Viáquenu eta nanisirayare, náerirayare, énajivaichucha tíchavanahi, tímicuñacavanaripahi eta nanisirahi.

³⁰ Étara tíchahehi eta juca táitusiava esimutupa eti ecajumanahi, tájinapa tatumevannahini eta iáqueheana. Ena apamuriana tépenanapaipa táicha.

³¹ Téhesera vítijivahi vétupirica eta vítaresirahi, ema Viáquenu vahi tícuñacahavimahi.

³² Taicha mavarahahi vétupiricayarehi. Vaipa vícaicuñamahi tayehe eta nacaicuñairayare ena apamuriana achaneana mámatirahanahi ema Viya.

³³ Eta tacahe, eti nuparapenaveana, te ecurujicacayare eta enisirayare, ecuchapacacayare apaesa ínuna eta enisirayare.

³⁴ Téhesera matiarhipuca mácani técuhasamureripaicha, tíuripana manicanuma te mapena, apaesa vaipa macuemeharecahe ema Viya taicha eta tamaetupisiravahi eta iúrujisiravahi. Étasesa eta juca apamuriana téchacareanahi viyehe, námaharinepa nútí. Nétupiricaya te níteca eta ara eyehe.

12

Vimutu viti vítupajjiasiravapachuyare maicha ema Espíritu Santo

¹ Nuparapenaveana, nuvaraha numetacaheyare eta apana téchacareana, apaesa yátupina ácacutiara. Jucarihi apanapanenejihi eta vítupajjiasiravanayare maicha ema Espíritu Santo.

² Écharichuhi éti, te víuchaha émainahini éhica ema Viáquenu Jesucristo, ísapajiricavaichaha tipamicaheana éhica eta nasiñarajiana tájinaquenehi eta tájicaparaiváinahíni.

³ Nuvaraha némechaheyare eta juca ímatirayare nayehe nácani vahi mávaháruanaimahi ema Espíritu Santo. Te nacahepuca: “Másájtatajipucaini ema iáquenu éti”, te nacahepuca eta juca, ímativacaya éna. Taicha ena mávaháruanahi ema Espíritu Santo, nacarichu ena tatuparacahi náimatiyare eta aquenucairahi ema Jesús. Énasesa ena vahi mávaháruanainahini ema Espíritu Santo vahi tatuparacahini nácahepucaini: “Ema Jesús émara Viya Viáquenuhi”.

⁴ Viti mávaháruanahi ema Espíritu Santo, apanapanenejihi eta vítupajjiasiravana májjararuhavianahi. Émanarichuhisera éma.

⁵ Énerichuvare apanapanenejihi eta vémataneana májjararuanahi ema Viáquenu. Émanarichuhisera éma.

⁶ Te tamutu eta vícaemataneasira, ema Viya émarichuhi ema téchahavihi, tíjaracahavihi eta vítumevahi, víratahairaya vimutu.

⁷ Énerichuvare ema Espíritu Santo, víjaracasipachuhi eta vítupajjiasiravayare maicha, vímitusihayarehi eta tasimutuqueneanahi namutu ena vichamuriana.

⁸ Nararihi ena máimicatavaca ema Espíritu Santo eta náitusiraya téchajicana, náimitu-resiraya. Ena apamuriana májjaracavacavare máejerereyare eta nacaicutiariraya eta mapanereruana ema Viya. Émanarichuhisera ema Espíritu Santo tíjaracahi eta juca.

⁹ Nararihivare ena májjararuanahi eta nacuchapirayare muraca eta nayasearuanahi ema Viya táichavene eta nacasiñavairahi eta mayehe. Nararihivare ena májjararuanahi eta nacanarasirayare ena nacajumaqueneana.

¹⁰ Nararihivare ena májjararuanahi eta nacuchusiraya eta tíáramicareana. Ena apamuriana nájjarachuvare eta tícametacasianaya mayehe ema Espíritu Santo eta máechajiriruvanahi ema Viya. Ena apamuriana májjaracavare eta náimatiasiravaneya ena achaneana nájahapuca nácani mávaháruanahi ema Espíritu Santo, nájahavarepuca ena mávaháruanahi ena éreanana. Ena apamuriana májjaracavare eta tíuririchuya eta náechajisiraya eta apaechajiriruvana. Ena apamuriana májjaracavare eta náitusirayare, nápepica náechajisihia eta apaechajiriruva, trépeteanayarehi.

¹¹ Tamutu eta juca máichaqueneanahi ema Espíritu Santo. Macarichuhi ema máitaparalahi májjaracavaca eta náitucaquenepachuyare namutu ena mavarahaqueneanahi májjaraca.

Émanarichuhi ema véhiruhi

¹² Viti achaneana, apanapaneneji eta tájijareana eta víáquehe. Tisimutuhi eta táitupajjiasiravana. Étanarichuhisera eta táuchusihahi te víáquehe. Ene tacahehi eta véhisirahi ema Viáquenu Jesucristo. Vimutu viti véhicanahi éma, apanapanenejihavihi, visimutuhivare. Émanarichuhisera ema véhiruhi.

¹³ Tacahe, vahi étaparacaina te israelítahávipuca, te apavasasajuecuhavihivarepuca, étaripa te máquenurehavihipuca. Téhesera te vícaicachasipa eta véhisirayare ema Viáquenu,

étanarinepa eta vímahi maicha ema Espíritu Santo. Énerichuvare, eta mávahásirahaviripa, vicuticacaripa eta máecasarrechirahavihi eta viáchanevana.

¹⁴ Yátupi eta viáquehe vahi étanainarichuhini eta táimahanahi, étapa eta táitupajijiasiravanahi.

¹⁵ Étaripa eta vívape, vahi távasihini eta vivahu, váhivare tacuticacahini eta táitupajijiasiravanahi. Étarichuhisera táunavahi eta viáquehe.

¹⁶ Étaripa eta vichaca, vahi távasihini eta viúquiha. Étarichuhivaresera táunavahi eta viáquehe.

¹⁷ Váiparinehi táuricaímahi amairihainahini eta viáquehe tacaquihahini. Tásiha, tacuijapucaini viquíñainahini, tacuijapaini visamaquenénahini. Váhivare táuricaímahi amairihainahini eta viáquehe tacaquíñahini. Tásiha, tacuijapucaini visirinahini, tacuijapaini vijuirenahini.

¹⁸ Ema Viya manacahi eta táematanerepianayarepachuhi eta juca táunavanahi eta viáquehe. Taicha tacahehi eta mapanereruhi ema Viya te tépiyacahavinapa.

¹⁹ Vahi mávarahahini étanainarichuhini eta táitupajijiasiravainahini eta viáquehe, amairiquihahavinahipucaini.

²⁰ Yátupi tisimutuhi eta táitupajijiasiravanahi eta viáquehe, étanarichuhisera eta táviahahi.

²¹ Tamutu eta juca viáquehe ticamunujiricacahi. Étaripa eta viúquiha tacamunuhi eta vivahuana. Étaripa eta vichuti tacamunuhivare eta vívapeana, vipaisihayare.

²² Étaripa eta távihanahi te amae vijuhe, matumearairahaipahi eta vímairahi, étahisera tiápajucavahi ticamunucarepanahi.

²³ Jucarihi eta viáquehe ticutimahi vahi múnainahi eta vímairahi. Étahisera tiápajucavapanahi vimuiriachahi. Jucarihivare eta viáquehe vaipa táuricahini vímerecohíni. Tásiha, tiápajucavapanahi vépacurehi, vicatiuchahivare.

²⁴ Jucarihivare eta apana táunavahi eta viáquehe ticutimahi vaipa vicamunuhi vépacuhahini. Timererecavahi nayehe ena achaneana. Tamutu eta juca máepiyaruanahi ema Viya, máicuchahi eta táimahanapachuhi, mavarahahi tácuticacahi eta vémunasiraya tamutu eta táunavanahi eta viáquehe.

²⁵ Eta tacahe, te vícaematane, tamutu eta viáquehe tiyamuricahi, tímicatajiricacahi. Ichapehi eta táejiasiracacahi. Vahi táiputsiacacahini.

²⁶ Étaripa te tatiarihipuca eta táichavaquenevahi eta táunavahi eta viáquehe, támairiacahi ticati eta viáquehe. Téhesera tatiarihipuca eta táurisamurevahi taicha eta táitupajijiasiravanahi, tamutuyarehi eta viáquehe tíurisamure.

²⁷ Ene ecahehi éti eta éhisirahi ema Viáquenu Jesucristo. Eta iúrujisiravahi mayehe, ecuticacahi eta táunavanahi eta máquehe.

²⁸ Énerichuvare, ema Viya tituparacahavipachu eta viávacurepachuhi, mavarairahi vijaneacaheyare eti vichamuriana, machaneranahi. Tituparacahavihi viti apóstoleana vímahahaeya, énapa ena profetana, énapa ena tímitecarahianahi eta máechajiriruvana ema Viya, énapa ena títurequenehanahi nacuchuca eta tiáramicareana, énapa ena ticanararecanahi ena nacajumaqueneana, énapa ena tímicatorahianahi nayehe ena nacamunucue névana, énapa ena tíurianahi eta nacavanairipirana, énapa ena tíuririchu eta náechajisiha eta apaechajiriruvana, énapa ena trépeteana tíucanahi nápepica eta apaechajiriruvana.

²⁹ Vahi étanainarichuhini eta viávacureanahi. Vahi vámutuhini apóstolehavinahini, vahi vámutuhini profetahavinahini. Vahi vámutuhini vímirecaini. Vahi vámutuhini vícuchuca eta tiáramicareana.

³⁰ Vahi vámutuhini vítupajijiacavahini vicanararecaini ena nacajumaqueneana. Vahi vámutuhini véchajicanahini te apaechajiriruvana. Váhivare vámutuhini trépetehavinahini.

³¹ Tiuri puiti, étipa tacamunu eyaseaca ema Viya májjaracae eta ítupajijiasiravaina eta ticamunucarepana. Jéhesare, nuvaraha nímitucaheyare eta apana táurinaqueneana. Esamanuchaha.

13

Eta ticamunucarepanahi eta vémunaraivaya

¹ Vítiripa, te tacuijahipucaini eta vémunaraivainahini, vaipa tisuapacaré mahi eta vimetarairuana. Vémunasiricavapa. Tayanapane vítucahipuca véchajica tamutu eta apaechajiriruvana, vácutipucaini eta náechajisira ena ángeleana.

² Te tacuijahipucaini eta vémunaraivainahini, tájinapa vicunachacaré mahi me Viya. Tayanapane vicametarairuhipucaini eta vimetacasicavanahi te anuma, támutuhivarepucaini víturequeneháini, étaripa te májjuhúchapucaini macayejecaini ema Viya eta

ichapequene mari táichavenénahíni eta viyaseasirainahini eta vicasifavairainahini eta mayehe.

³ Tásiha, te tacuijahipucaini eta vémunaraivainahini, tájina vijacapacarémahi me Viya táicha. Tayanapanevare vicajiricahipucaini tamutu eta vímahaqueneana te vipena, téhevare vísapapucaini náijuchaini eta víáquehe táichavenénahini eta namaurisirahi véhica ema Víáquenu.

⁴ Téhesera yátupihí vémunarahi, vicayeheyarehi paciencia, vijapanurahiyare. Vahi vicapinarurecaini. Váhivare píncanillahavimahi. Váhivare vicasifavaivaicaini.

⁵ Váhivare vicavapajaimahi jácani táifemahiqueneana. Váhivare viverejimirauchaimahi ena apamuriana achaneana. Váhivare tijuricati visemaimahi. Váhivare vicationarecaini.

⁶ Váhivare táurichahini vicaeahirahihini te vímaha nácani ticaejeanahi. Viúrisamuresera te vímaha ena achaneana tíuríhi eta náitaresira.

⁷ Te yátupihí vémunarahi, vicamichayare tamutu. Vahi énevanémahi visuapa eta echajirirucavana náepiyapiruanahi ena achaneana. Vicuchapayarehi eta táetupirisiravayare eta panererucana. Vahi víjahúchavaimahi vínjicava, vicuchapainávayare.

⁸ Tájinapa títaimahi eta vémunaraivayare, vímíyanavainapa eta vítaresiraya. Eta jena sácheanayare, vímatiequeneha tamutu. Vaipa vicamunu eta vimetacasivana eta metarapianayare tásihaqueneanayare me Viya. Tájinapa víatájivaimahi eta visamirayare eta apaechajiriruvana. Váipavare tácajerainahi eta visamirayare vímatiequenehavanénapa.

⁹ Taicha puiti te juca vítaresirahi, apaesachicharichu eta vímatiequenehairahi, apaesachicharichu eta vítusirahi eta metarapiana tásihaqueneanahi me Viya.

¹⁰ Járjapainapasera eta sácheayare, vímatiequenehainapa yátupí eta mapanereruana ema Viya, eta vímámatiequeneruanahi puiti. Vaipa vácamunu ena tímítucahavana.

¹¹ Nímícutichavahi nútí eta víámaperuvahi. Vuúchaha vítucahini vípanerereca, vimapachichíjiricavaichaha. Téhesera te ajairahavipa, te esenapuca, títsivachavapa eta vipanereruana. Vínjicapa eta víámaperuvainíhi.

¹² Ene vicahehí víti eta juca vítaresirahi. Puiti vuúchaha támutuhíni vímatiequenehahini. Tícutíríchaha te vímararacaicha eta vícuna te jácani ichasí espejo, vahi tacaecherahini. Járjapainapasera eta sácheayare ticaecherainapa tamutu. Puiti, ticajera eta vicaicutiarairahi víti. Ema Viya vuúchaha tímítucahávihini tamutu eta mapanereruana. Téhesera te apajarainapa, tamutuya vicaicutiara máicha. Tacutíríchu eta máimairahi puiti eta vípanereruana víti te amaha eta visamureana.

¹³ Puiti, eta juca vicaijuheya, vímíyanava vámutu muracaina eta vicasifavairahi me Viya, váhivare vicuyacujihini eta vicuchapirapaipa eta víúrvainapaipa, tacuijavareni tahapapiricahini eta vémunaraivayare. Jéhesare, tíápajucavapanayarehi eta vémunaraiva. Étara tícunachacapanahi me Viya.

14

Tísapacare eta náechajisiraya eta apaechajiriruvana

¹ Tacahe, nuvaraha nútí yátupina eta émunaraivaina. Nuvarahavare eyaseaca ema Espíritu Santo eta ítupajjiasiravaina, étaripa eta ítusiraina ecametarairu eta máechajiriruva tásihaqueneanahi mayehe ema Viya.

² Tájina táichava, nácani téchajicana ema Viya eta apaechajiriruva. Éma masamahi. Vítipasera víti apamuri vaipa vácaicutiarahini eta náechajiriruvahi. Yátupihipuca máimituranahi ema Espíritu Santo, váhisera náimereuchavahini eta máimiturapihí ema.

³ Vahi tácutí nácani nacametarairuhi eta máechajiriruvana tásihaqueneanahi mayehe ema Viya, ticaicutiaracarehi tamutu eta nametarapianahi. Tatupiruvahi eta náimitusiravacahi ena apamuriana. Náetumechahi eta náchanevana eta nasuapiraina. Éta nacurisamurechihavacahi te jácani napanereresirana.

⁴ Ema mácani téchajicahi ema Viya te apaechajiriruva, mayechiravarichuhi te máchaneva eta macajurusiraya eta masuapajiravaya. Émasera mácani tícametarairuhi eta máechajiriruvana tásihaqueneanahi mayehe ema Viya, macajurusinahi eta nasuapajiravayarehi ena machamuriana.

⁵ Nuvarahahinéni nútí ámutuhini ítupajjiacavahini maicha ema Espíritu Santo, échajicahipucaini te apaechajiriruvana. Tíápajucavahisera eta nuvarairahi ecametarairuhini eta máechajiriruvana tásihaqueneanahi mayehe ema Viya, taicha étara tíúripanahi eta juca tayehe eta échajisirainahini te apaechajiriruvana. Tíúrihinéni échajicahini, tacamunuhisera natarihinahini nácani trépete, nametacavacasarepaini ena apamuriana eta tacayemaqueneanahi apaesa tajurusihapaini eta nasuapajiravainahini.

⁶ Nútiripa, nuparapenaveana, nítecapauchahepucaini néjirapanahéhini, tásiha néchajicapahipucaini te apaechajiriruva eta eyehe, éti vahi ácaicutiaraimahi, váipavare tímícatacahémahi eta tajurusirainahini eta ecasiñavairahi me Viya. Tacamunuhi néchajicahíni te échajiriruvaichu eta nímitusirahénahini, éti ecaicutiarasarepaini tamutu eta numetacasi- vanahi me Viya, étapa eta máimerechaquenenuhi, étapapuca eta máimatiquenehi, arairu eta viyehe.

⁷ Eta juca tímícutijiricavahi te mapacharajíhi eta masiviviripi ema ticasivivihi. Vaipa tacaicutiaracarehini tájahapuca eta masiviviripi. Émaripa ema violinista, váhivare ticaicutiaracarehini tájahapuca eta mapununerapi.

⁸ Énerichu tacutíhi mácani cúnretéru nayehe ena suntaruana, te váhivare ticaicutiaracarehi eta macachujairahi, váiparinehi tíúrujicavanaimahi ena suntaruana táichuhaqueneanahi, taicha vahi nácaicutiarahíni.

⁹ Ene ecahehi éti, eta échajisirahi eta apaechajiriruva, nájina nacaicutiarahíni. Tímícutijiricavaipa nacuijahíni nasamararacahehíni eta échajisirahi.

¹⁰ Yátupi tisimutuhi eta apaechajiriruvanahi te juca apaquehe. Nayehepachuhisera nácani ticaechajiriruvanapahi.

¹¹ Vítiripa te náechajicahavipuca ena extranjeroana te náechajiriruva, váiparinehi vácaicutiaraimahi. Énaripa váhivare ticaicutiarahavianaimahi víti.

¹² Tiuri puiti, vahi tacunapurúji eta evarairahi ejacapa eta ítupajjiasiravanaya máijjaru- ruheyaehi ema Espírítu Santo. Tíúripana eyasesereca eta ítusiraina ímitucavaca ena echamuriana apaesa tajurucapaipa eta nasuapajiraivaina éna apanava.

¹³ Tásiha, mácani téchajicahi te apaechajiriruva, tacamunuhi mayaseacahíni ema Viya eta máítusirainahíni mametacavaca eta tacayemaquenehi eta máechajiriruvahi apaesa nacaicutiarasarepaini nácani tisamararacanahi.

¹⁴ Taicha eta viyujarasirahi víti te apaechajiriruvana, te vítapiricapa eta viyujarasirahi, vahi tánasihíni véchavahíni eta vicayemaqueneanapahi, vémitisicavanehi tamutu.

¹⁵ Eta tacahe, tíúripanahi viyujaraca te véchajiriruvaichu, tásihaqueneanahi te visamure. Te vijirayarepuca, tíúripanahivare te véchajiriruvaichuvare, tásihaquenénavare te visamure, vícaicutiarasarepaipa eta vicayemaqueneanapahi.

¹⁶ Téhesera apaechajiriruvahi eta eyujarasirahi me Viya, yátupíhi eta ecunachirahi éma. Énasera ena tisamararacaheanahi vahi náehicaímahi eta eyujarasirahi náimicatasirahehíni eta nayujarasirahi; taicha vahi nácaicutiarapahíni eta ecayemaqueneanapahi.

¹⁷ Tíúrihinéni eta eyujarasirahi eta ehasulupayachirahi ema Viya, énasera ena echamuri- ana vaipa táimicatacavacahíni eta eyujaracasahi.

¹⁸ Jéhevaesera nútí, ichape eta nuhasulupayachirahi ema Viya taicha eta níтусirahi néchajica eta apaechajiriruvana. Nucachuriacahehi emutu éti.

¹⁹ Étasera te nucametarairuyare te namuri ena vichamuriana, vahi nuvaraha nácuti ena tíúpiemana eta náechajisira te apaechajiriruvana. Nútí ánipirichu te néchajica, tamutuhisera ticaicutiaracarehi nayehe ena nímitureanahi.

²⁰ Nuparapenaveana, éti vaipa amaperuhénahíni. Nuvaraha táuripaini eta epane- reruana, eta íchirayare eta táuriqueneana. Nuvarahasera ácutihíni ena amaperuana vuíchaha náitucahíni naicha eta tamauriqueneana. Énenapaini ácahehíni éti.

²¹ Ema Viya, ani macahe eta te Sagrada Escritura: “Nutuparacayare ena apanaqueneana achaneana apaechajiriruvana náimitureca eta nuvanairipiana eta nayehe ena achaneana távacuanahi eta avasare. Váhiquenesera nasuapaimahi” macahepa ema Viya.

²² Tacahe, nácani tiyujaracanahi te apaechajiriruvana, tácutiarahi eta máijjarasiravacahi ema Viya náichavenehi ena máehicarahanarichaha ema Víáquenu. Jéhesare, tayuchusamu- rechavacayare eta nasamararasirahi. Énasera nácani ticametarairuanahi eta máechajiri- ruvana ema Viya, tayuchusamurechavacayare ena téhicanahi ema Jesús, taicha ticarava- huanayare eta nasamararasirahi.

²³ Étasera te jácani iúrujisiravana, te eyujaracahipuca emutu te apaechajiriruvana, tásiha, te natiaríhipuca nácani masuapajirairahanarichaha, ticaechiheanayarehi éna, náimija- chayarehi máurishihehi.

²⁴ Tíúripanayare eta ecametarairuiraya emutu eta máechajiriruvana ema Viya, te échaji- riruvaichu. Tásiha, te natiaríhipuca te iúrujirisiravahi ena masuapajirairahanarichaha, ticatisamurevanayarehi taicha eta nasamararasiraya. Tipanerequenehavanainapa eta nacapecaturairahi.

²⁵ Tacahe, tímaticavanainapa eta máimatirahi ema Viya tamutu eta napecaturana tayumurevanainíhi. Tépuycanainapa téneuchavanainapa mayehe ema Viya. Téchajisia- heanainapa: “Yátupiquenéyapa mávhácavacahi ema Viya ena nániana” nacahenapa.

Tacapicahu tamutu eta iúrujisiravana

²⁶ Nuparapenaveana, áni tacaheyare eta iúrujisiravanayare. Eneřejicava eti íputsiacavayare eta ejirairaya. Énerichuvare tinereřejicavayare mácani tjaracavayare ema timiturecayare. Énerichuvare te matiarihinapuca mácani mavarahahi ticametarairuyare eta mametacasivanahi me Viya, tájinachucha táichavahi. Tísapacarehivare eta échajisirayare te apaechajiriruvana. Tacamunuhisera matiarihiyare ema trépeteyare. Tamutu eta júcana, étara ticajurucayare eta nasuapajiraivainapaicha ena echamuriana.

²⁷ Téhesera te natiarihinapuca apinana, mapananapuca ena tivarahanahi téchajicana te apaechajiriruva, tájinachucha táichava. Tísapacarechucha. Tévacajiricacanayarehisera te jácani náechajisirayare. Váhivare téjiacavaimahi ema nayeheyare trépete.

²⁸ Téhesera nájinapuca naviyavahi ema nayeheyare trépete, tiúripanaichuhi vahi nacuechajica te apaechajiriruva te namuri ena echamuriana náurujiivanahi. Tiúri, te navarahahipuca náechajica ema Viya, tavarahahi nacarichuyarechucha eta náechajisiraya.

²⁹ Nácani ticametarairuanayare eta máechajiriruvana tásihaqueneanahi mayehe ema Viya, te apinanahipuca, mapananahipuca, tájinachucha táichavahi, tiúrichucha. Ticamunucarehisera ena náurujiivanahi tisamararacanáhi napaneréquenehayarehi tamutu eta nacayemaqueneanapahi ena ticametarairuanahi.

³⁰ Téheserapuca matiarihíhi mácani máejaruhi, ticametacasihiquenehi me Viya; tásiha mavarahapuca macuchujipica eta mametacasivahi, tísapacarechucha eta máechajisiraina. Macuchapavayaresera máitapiricanuma mácani máinapuiruhi téchajica.

³¹ Emutu eti ecametacasiqueneanahi eta máechajiriruvana ema Viya, ítsivajiricacayare. Émanainapachu mácani téchajicayare, apaesa ena ímitureanahi namutu nacaravahu, náetumechavahivare éna apanava.

³² Ena ticametarairurahiana tatuparacahi ticuchapavanayare. Vahi ticainapupuicavanaimahi.

³³ Taicha ema Viya vahi mávaraha mapacharajinahini nácani ticametarairuanayare. Tásiha, éti ecaejarusinavayare apaesa ecurisamurecha ema Viya.

Táepiyarichuhi eta juca viyeherepi víti te víurujisiravana.

³⁴ Ena vichamuriana esenana timatinanayarehi. Vahi téchajicanaimahi. Nasamararasinavaichucha. Taicha sújaraichuhi me Viya esu esena susamararasirayareichuhi.

³⁵ Te tatiarhipuca eta suvarahaquenehi suecha esu esena, tiúripanahi te náitecapapa te napena suyaserecapa ema suima. Taicha vahi súriahini esu esena sucayasesereruhini eta suvarahaquenehi suecha te namuri ena echamuriana.

³⁶ ¿Tájaha tacayema eta ecasiñavavaisirahi? Vahi étinahini ínapuchahini mametacahehíni ema Viya eta máechajiriruva. Váhivare ácarichuhini éti tatuparacahini eta ejacpirahi.

³⁷ Te natiarhipuca nácani tímijachavanaripa náimatequeneharipa tamutu eta máechajiriruva ema Viya, náimijachaipuca mávahácavacaripa ema Espíritu Santo, tatuparacahi éna napánerechinávanumayare eta juca nájurehi eyehe, tásihaquenehi me Viáquenu, mavanairipichuhi éma.

³⁸ Téhesera matiarihíhipuca mácani tépuruyare eta juca numetarapianahi, émaina máepurucare, vaipa tisamacaremahi eta eyehe.

³⁹ Tiuri, nuparapenaveana, epamicavachucha ecametarairu eta máechajiriruva ema Viya. Tásiha, táuricachucha ísapa nácani téchajicanaparacahi te apaechajiriruva.

⁴⁰ Tacapicahuhisera támutu eta iúrujisiravana. Ecaejarusinavapahi tamutu eta íchaqueneanayare te iúrujisiravanahi.

15

Eta máechepusirahi ema Cristo te máecari

¹ Nuparapenaveana, nuvaraha némechaheyare eta numetarairuhi eyehe eta máechajiriruvahi ema Viya tayehe eta víuchucuirayare. Étara táemesiavahi eta juca te esamanapa, etupiruvavanehi ejacpa. Puíticha tanasíhi eta esuapirahi.

² Tásiha, puiti íuchucuhapaipa táichavenehi eta ímiyaniravahi esuapa eta numetarairuanahi eyehe. Németeaca yátupíhi eta íjarasiravahi eta éhisiraya eta juca esamaquenehi.

³ Écharichuhi eta nímiturapianahi eyehe, étarichuhivare tacahehi eta nímitucasivahi. Eta júcana eta tisuapacarepanahi: Yátupirahi máepenahavihi ema Cristo táichavenehi eta vipecaturana, émairahi ema táechajisihahuenehi eta Sagrada Escritura.

⁴ Eta náimairahi tépenapa éma, náecarapa. Téchepucahisera éma te mapanaquenepa sache, taicha tacahehi eta tametarapíhi eta Sagrada Escritura, timetacahavihi tamutu eta mácharacavayarehi éma.

⁵ Tímerecavahi mayehe ema vichamuri Pedro, énerichuvare ena apamuriana apóstoleana.

⁶ Tásihapa tímerecavavarepa nayehe ena quinientoqueneana eta nasimutuvanahi ena vichamuriana. Puíticha nararihichaha maverana ena tímahanahi. Nararihipasera ena tépenanapaipahi.

⁷ Te táequenevarepa, tímerecavavarepa mayehe ema Santiago. Tásiha, tiápechavavarepa tímerecava nayehe namutu ena apóstoleana.

⁸ Tásiha, te táequenevarepa eta júcana, tiápechavapa tímerecava nuyehe, nútupavapa nímahahi éma. Ichape eta táramicarevahi nuyehe eta máichuiranuhi nútí néquenereruhi mayehenuyarehi apóstole, tacuti eta táijahúchirava te tújucayare esu esena.

⁹ Ichapemurihinéni eta némepuruirávahi nútí nayehe ena apamuriana apóstoleana. Váhivare táuricachini apóstolenuinahini eta nímairavahi, taicha ichapemurihi eta nupanajirisirávacahi ena náinapureanahi machaneranahi ema Viya.

¹⁰ Tíchuhunuhisera ema Viya, taicha eta máemunasiranusamihi. Apóstolenuhi puiti eta mayehe. Váhisera némepururecavahini eta máemunasiranuhi. Jéhevare nútí, nucachuricahi ena apamuriana apóstoleana. Ichapemuripanihi eta nucaemataneasirahi éma. Váhisera níputsiaracavahini nútí. Eta máemunasiranuhi ema Viya, tímicatcanuhi eta nucaemataneerahi. Tíjaracanhivare eta námumechiravahi.

¹¹ Tájinasera vahi étaparacaina eta juca nájahapuca nácani ena ticaemataneapanahi. Étarichuhi eta vímiturapiana eyehe, eta esuapaquenehi puiti.

Tayanapane vépenaipapuca, vécheputayarehisera

¹² Víti vímitucaheripa eta máecheputsirahi ema Cristo te máecari. Németeacasera etiarichichaha eti vúichaha esuapahini taicha nusamairiricahi eta ecahehiji: “Vahi técheputcanaimahi ena náepenaqueneana”. ¿Tájahapuca tacayema vúichahacaruhi tasuapacarehini eyehe?

¹³ Éti éjcapavahi eta epanereruana. Ímijachaipapuca vahi máratahaimahi ema Viya mácaechepucavaca ena náepenaqueneana. Te vahi macuratahahini, váhivarepucaini macuacéchepucahini ema Cristo te máecari.

¹⁴ Tacahe, te vahi macuechepucahini ema Cristo, váipapucaini tacusuapacarehini eta vímiturapianahi eyehe, tamapurujipapucaini eta esuapirahi.

¹⁵ Te yátupinahini vahi tacusuapacarehini eyehe eta náecheputsirayare ena náepenaqueneana, váhivare tacusuapacarehini eta macaechepusirahi ema Viya ema machicha Cristo. Tímicutijiricavaipahini vépiyahirahihini vivayuarerecaipapucaini víti te máijare ema Viya, taicha eta vímitusirahéhi eta macaechepusirahi ema Viya ema Cristo.

¹⁶ Te yátupinapuca vahi tisuapacarehi eta náecheputsirayare ena náepenaqueneana, váipavarepuca tásuapacarehi eta máecheputsirahi ema Cristo.

¹⁷ Énerichuvare, te váhipuca tisuapacarehi eyehe eta máecheputsirahi ema Cristo, tásiha énerichuvare váipapuca tisuapacarehivare eta macaepahaira ema Viáquenu eta epecaturana táichavenéhi eta ecasiñairahi éma.

¹⁸ Te yátupinapuca vahi tisuapacarehi eta júcana, tímicutijiricavaipa témítiequeneanaripa ena náepenaqueneanahi téhicanahi ema Cristo te achaneanarichaha.

¹⁹ Te yátupinapuca vahi tisuapacarehi eyehe eta júcana, tamapurujiripa eta vijaneasiravahi eta vítaresirahi puiti juca táichavenéhi eta vicuchapiravahi vivarairahi vicachane ema Cristo te apana vítaresira. Te vahi tacuitauchava eta juca, ichapeyare eta vicatisamurevairaya.

²⁰ ¡Yátupiquenehisera eta máecheputsirahi ema Cristo te máecari! Tacahe, éma ecutiararehi víyehe eta vécheputsirayare víti apanavare te vépenaripapuca.

²¹ Taicha eta vépenira manaquipairuhi ema máinapuiruhi ajaira te juca apaquehe ticaijare Adán. Ene macahehi ema Cristo, éma tinaquipaicaíhi eta máinapuisirahi tayehe eta vécheputsiraya te vécarí.

²² Táichavenéhi eta mámariequenerahavihi ema Adán, émapa tiámahavihi tayehe eta vépenira. Puítisera táichavenéhivare eta véhisirahi ema Cristo, émapa tiámahaviyare tayehe eta víápechiravayare vítareca.

²³ Yátupiquenehi táejarurevahi eta juca. Tínapucahi ema Cristo técheputca. Éma ecutiararehi víyehe. Tásiha, te mápechavavare máiteca te juca apaquehe, énaína técheputcanayare ena náepenaqueneanaripa machaneranahi.

²⁴⁻²⁷ Tacahe, tiánehinapa eta táichecuaraquiyare eta tamauriqueneanahi te apaquehe. Taicha ema Cristo macamítiequenehainapa tamutu eta náitupajijiasiravanainihi ena táquenuhanainihi eta tamauriqueneana. Ema Viya máíjaracayarehi eta matumevayare

macapaquechirayarehi namutu ena mánaranahi, étainapa mácatayanusihavacayare. Tacahe, macaepahainapa eta vépeniraini. Nájjinainapa tépenaimahi. Taicha ema Cristo matupara-haichuhi mayehe ema Maiya eta aquenucairayarehi, émayarehi téchayarehi tamutu. Taicha ánipa macahehi ema Viya eta te Sagrada Escritura: “Éma nutuparacahi téchayarehi tamutu”.

²⁸ Tájinasera vahi ticasañavavaicaimahi ema Cristo eta émairaipa técha. Te máimahapa támupapa máetupirica, macuchapainapa eta vanairipianayarehi mayehe ema Maiya, taicha éma tjaracahi ema Machicha eta máitupajjiasirava. Tásiha, ema Cristo máimereuchainapa étairahi tásiha eta vanairipiana mayehe ema Maiya. Émarichuhi téchahi tamutu.

²⁹ Tiuri puiti, nararihi ena apamuriana ticaicachasianahi náitsivahi ena náepenaque-neanaripa, namavarairahi náemitiequenehahini tayehe eta náechepusirayare. Ena nani, muracahi eta nasuapirahi eta yátupirahi eta náechepusirayare ena náepenaqueaneanaini.

³⁰ Nuvaraha ácutihavi víti eta vicasañairavahi me Viya. Tayanapane ichape eta tacauyayacarevahi eta vépenirainahini puiti juca sácheana, vicamichahisera tamutu taicha vicuchapavahi eta macaechepusirahaviya ema Cristo.

³¹ Nútiripa, nuparapenaveana, tamutuhi sácheana ticauyayacarehi eta népenirainahini. Ichape eta tapicacarevahi. Nucurismurechavaserá eta núrismurevahi icha éti eta iúri vaipahi mayehe ema Viáquenu Jesucristo.

³² Núti muracahi eta nusuapirahi eta véchepusiraya te vécariana. Te váhipuca nusuapahini, vahi nacucanaranuhini te juca avasare Efeso. (Náetaviuchahi eta navainarajivanahi, nacutihi éna eta sárareana táifehiqueneanahi.) Tájinachuchasera táimaequénéahini nuyehe eta nímiyanavayare eta nucatiuchira eta véhiruhi, te tacuija yátupinahini eta véchepusirayare te vépena. Nararihiserá ena téjcapavanahi eta napanereruana. Timijachavanahi vaipa téchepucanaimahi te náepenapa, taicha ani nacahehi: “Vicamapuravachucha puiti vera vinica, viúrisamureyare taicha achichupuca vépenacaru. Tásiha, títavainapa tamutu eta viyehe” nacahepa.

³³ Vahi tacucahe eta epanereruana éti. Taicha éna, vahi tétupicavahi eta nayeherepianahi. Ticauyayacarehi najarareca eta táurinavaipahi eta eyeherepiana.

³⁴ Tátupiruvapa táuri eta itaresiraina éti. Váipavare ecuquicha eta pecatuna. Taicha nararihi ena vuíchaha náimatihini ema Viya te emuri. Titsíriacareripahi eta nacasiriquirahehi eti machaneraqueneanahi ema Viya.

Apanainapa eta vicaqueheyare eta véchepusirainapa

³⁵ Németeaca núti nararihi vuíchaha nasuapahini. Navarahapuca tiyaserecanuanaya: “¿Tájahapuca náicharacavayare eta náechepusirayare ena náepenaqueaneanaini? ¿Tájaimahinapapuca eta nacaqueheraya?”

³⁶ Ena tiyaserecanuanaya, tájina náechaquenéna. Puiti, nuvaraha epanerequeneha. Nímicitiarachinaheyare tayehe eta evaraquí. Eta evaraquí váhira tímaruca te vahi vémuria-chahini te apaquehe. Ene vicahe viti achaneana. Tínapuca eta vépenira étapa eta náecarairahavi. Tásiha, te táequeneapa, vijacapaya eta viáqueheana arairuya.

³⁷ Te vévacapa eta jácani evaraquí, vémuriachapa te apaquehe. Te tinanapahi eta apaquehe, tímarucapa eta vévaraquí. Váhisera étainahini tachavahini táuchuchahini eta evaraquíhi.

³⁸ Táquehepachuhi eta táimarusirahi eta evaraquí maicha ema Viya. Vahi apaimamajinahini eta táimaru.

³⁹ Étaripa eta veche viti achaneana, vahi távasimahihini eta taeche eta sárare. Apanahi eta táimahi. Eta taeche eta cáyure, apanahivare eta táimahi. Eta taeche eta jima, énerichuvare apanahivare eta táimahi.

⁴⁰ Énerichuvare, eta nacaquehera ena tiávihanahi te anuma, vahi távasihini eta vicaqueherahi viti viávihanahi te juca apaquehe. Apanahivare eta táurinavahi eta nacaqueherahi éna. Viti, apanahivare eta táurinavahi eta vicaqueherahi.

⁴¹ Énerichuvare nuvaraha ácaicutiara eta tajaravahi eta sache, apanahivare eta táimahi. Vahi távasihini eta tajaravahi eta caje. Étaripa eta tajaravá eta jarairiquiana, apanahivare. Jararihivare eta tjarahipanavacahi tayehe eta apamuriana.

⁴² Ene tacaheyare eta vicaquehera viti te véchepucapa. Apanayare eta táimahi. Te vépenapapuca, ticaecarasiyarehi eta viáquehe, timuyuyarepa eta véche, tépachaicavayarehi. Téchepucayarehisera eta apana viáqueheyare eta máepenacacainapa.

⁴³ Ticaecarasiyarehi eta viáquehe, taicha ticajachacarepuhapa eta véche. Téchepucayarehisera eta tapachinaqueneyare viáqueheyare. Ticaecarasiyarehi eta viáquehe, matumerairahahi. Téchepucayarehisera eta viáquehe, tétavicavainapa eta tatumevayare.

⁴⁴ Ticaecarasiyarehi eta enaha viáquehe. Téchepucayarehisera eta viáqueheyare apaimahinapa, tjarahinapa eta vicaqueheraya vicutinapa eta macaqueherahi ema Cristo eta máechepusiraipa. Tanasiyareichuhi eta táimahi eta viáquehe, espírituinapasera.

⁴⁵⁻⁴⁶ Eta Sagrada Escritura, tacahehi eta táechajiriruvahi: “Ema Adán, máinapuiruhi ajairahi máchaneruhi ema Viya”. Éma ticaejaparecahi eta vímarusirahi viti achaneana, vicutíhi éma eta víjurusirahi eta vítaresirahi. Tásiha, te táequenénapa, ema apana ajaira ticaijare Cristo, émapa tjaracahaviyare eta apanayare vítaresirayare, vicaquehenapa eta máquehe.

⁴⁷ Ema ajaira máinapuiruhi, te ticaepiyainapa, máteji eta máquehehi. Éma, távapahiyarehi eta apaquehe. Émasera ema apana ajaira, mávasarichuhi te anuma. Éma Viáquenuhi.

⁴⁸⁻⁴⁹ Viti achaneana, énerichuhivare mátejihi eta viáquehe, taicha mámariequenehavihi ema máinapuiru ajaira. Eta vicaqueherahi tavasimahíhi eta macaqueherahi éma. Tipachinayarehisera eta viáqueheyare, tacutiyare eta tapachinavahi eta macaqueherahi ema ticavasahi te anuma. Eta vicaqueherayare tavasimahiyare eta macaqueherahi ema ticavasahi te anuma, taicha machichahavihi viti.

⁵⁰ Nuvaraha níminecapáequenehahéyare, nuparapenaveana, eta veche máteji vahi étaimahi tisiapayare te mávasa ema Viya. Tínapucayarehi ticaitisiva eta veche máteji, máepenacacayarehi éta.

⁵¹ Énerichuvare nuvaraha níminecapáequenehahéyare eta juca tayumururevainíhi: Vahi vámutuimahi vépenayare viti vítareruanáichaha. Ticaitisivyaresera eta viáquehe, viti énapa ena náepenaqueneanaripahi.

⁵² Ticaema eta chujare, tíchuhahavinapa viti véhicanahi ema Cristo. Tíjahúchavainapa eta táitsivachiravainapa eta viáquehe viti vítareruanáichaha, tacutiyarechucha víumatsisina. Tíjahúchavainavarepa téchepucanayare ena náepenaqueneana, máepenacacainavarepa éna.

⁵³ Taicha tatuparahahi eta viáquehe ticaitisivyare, máepenacacainapa. Máichecuaraquir-
renapa eta vítaresiraya.

⁵⁴ Te tamutupa eta táitsivachiravayare eta viáquehe, títaúchavainavarepa eta tametara-
pianahi eta Sagrada Escritura: “Ema Viáquenu macaepahaipa eta vépeniraini”.

⁵⁵ ¡Vaipa tápicacarehi viyehe eta vépenirapapuca, taicha vahi vánasimahi vépena! ¡Yátupíhi eta véchepusiraya te vécarí!

⁵⁶⁻⁵⁷ Eta tacahe, víhasulupayacha ema Viya, taicha éma ticatiuchahaviyare tayehe eta vépenira. Tájiha vahi vémitiequenémahí, véchepucayarehisera máíchavenehí ema Viáquenu Jesucristo. Tásiha, te jena sácheyare, vaipa vicapecaturaimahi. Váipavare vicaicuñaimahi táicha. Vaipa vépenaimahi.

⁵⁸ Táitusiava, eti némunarucueneanahi nuparapenaveana, ímiyanavachucha eta étumechi-
ravaina tayehe eta juca véhiruhi. Vahi tacuequequécava eta epanereruana. Ecaema-
taneacaquenena yátupina ema Viáquenu, taicha écharichuhi éti vahi támapurujimahi eta
ecaemataneasirahi éma.

16

Eta nanaquiruvanayare

¹ Étasera eta juca enaquiquisiravayare eta nayeheyare ena vichamuriana ticavasannahi te Jerusalén, étarichu éhicayare eta nímitusiravacahí ena vichamuriana ticavasannahi te avasareana eta táichapevahi eta departamento eta Galicia.

² Puití, nuvaraha nutuparacaheyare: Te lumincumuhuana, íputsisinavayarepahi, émanapachu eta manaquiruvanayare. Étiserá échinavahi áyanahipuca jácani evachasanahi te semanamuhuana. Íunasinávapaipa apaesa tacuijapa étaparacaimahi te nítecapauchahépa.

³ Te nítecapapa eta ara eyehe, vévatacapa ena enerejruanahí éti nayana te Jerusalén. Éna tíamamayare eta enaquiruvanahi éti. Níjaracayaresera eta nucartane eta náimeraquiya-
repahi.

⁴ Téheserapuca nútínapaichu návaraha nuyana apaesa nútínapaipa nácáchanenupahi ena vanairucanayare.

Ema Pablo mavarahapa tiyanaya máejirapanavacaya

⁵ Eta nítesirayare, nuvaraha nétavajicayarepahi te avasareana tayeheana provincia eta Macedonia, nítecapirainapa eta ara eyehe.

⁶ Nuvaraha nunasipanayare eta eyehe. Tijuricati nucuchapa eta táetavisirahavina eta muracana técativaca. Tijuricati ímicatacanupahi éti apanava eta nímiyaniravayare nupaica.

⁷ Taicha vahi návarahahini ánipinarichuhini eta néjirairahéyare. Nuvarahahi nunasipa-
nayare. Émapasera téchanuyare ema Viáquenu.

⁸ Nuvarahahivaresera nunasipananumayare ani te juca Efeso. Tíámainucava te táetavi-
cavapa eta piesta ticaijare Pentecostés, nútíjapainapa.

⁹ Taicha nuvarahahi nucamapuravanumayare nucametarairu taicha camurianahi ena tivarahanahi tisamararacanuana. Énerichuwaresera nararihivare camuriana ena viánaranahi.

¹⁰ Nutuparacaheya, te máitecapauchahepa ema Timoteo, tauri eta ejacampiraina. Échapa-jirisinanuyare, taicha émarichuhi nucutiquenehi eta vicaemataneasirahi ema Viáquenu.

¹¹ Nutuparacahevare nacuija nacuepuru éma. Ímicatacasera eta mapaisirayare éma apesa máitecapauchanúvane, émapaicha nucuchapahi nútí, énapa ena apamuriana nuchamuriana te juca.

¹² Nuvarahahivaréni mayanahini ema vichamuri Apolo eta ara eyehe, máhicavacahini ena tiámanahi eta nucartane. Váhisera máisapavahini mayanahini puiti. Téhnarínevare apahenavare, mayanapa.

Táichecuaraqui eta macartane ema Pablo

¹³ Ecuneuchava yátupina. Túmehénahi tayehe eta juca véhiruhi. Yátupina eta éjairavacáina. Vahi ecupica eta vicatajivairanahi.

¹⁴ Eta émunaraivayare yátupina táuchurena te esamureana, étaina táemesiava tamutu jácani íchaqueneanayare.

¹⁵ Puiti nuvaraha némechahe ena tnapucanahi téhicana ema Viáquenu te avasare Corinto, ema Estéfanos, esu mayena, énapa ena machichanaveana. Ichapemuriri eta nájjarasiravahi eta náitátirahi ena apamuriana vichamurianahi.

¹⁶ Puiti nuvaraha epicauchavaca esuapavaca ena nani. Énerichuware epicauchavare esuapa ena apamuriana tímicitacahavianahi eta vicaemataneasirahi ema Viáquenu.

¹⁷ Ichaperinehivare eta núrisamurevahi puiti eta náitecapauchiranuhi ema Estéfanos, ema Fortunato, émapa ema Acaico. Tímicitijiricavainehi ámutuhini ítecapauchanuhini éti eta nímairavacahi ena nani mapanana tiásihanahi eta ara eyehe.

¹⁸ Téchararahainehi eta nusamure, túmenuinevare eta nusamiravahi. Ene ecaheyare éti eta táetumechiravayare eta esamureana eta ímairainahi ena nani mapanaqueneana te nachavapa eta eyehe. Epicauchayare ena nani, émunasinavayare.

¹⁹⁻²⁰ Téchajicaheana namutu ena vichamuriana ticavasanahi tayehe eta avasareana te juca Asia. Téchajicahevare ema Aquila ésupa esu Priscila, énapa namutu ena tíurujiricavanahi te napena, taicha énarichuhi vicutiqueneanahivare eta véhisirahi ema Viáquenu. Te iúrujicavapa, ejupacacayare éti, táicutiarainahi eta émunajirisiracacahi.

²¹ Nuti Pablo eta nímiamaresirahi eta néchajiriruva eta eyehe, nútíjucaruvapa nájucha eta táichecuaraquihi eta nucartane.

²² Nácanisera máesacharahanahi ema Viáquenu náimainavapainepa éna eta náicuñayare te machavapa. ¡Tata Viáquenu, pítecávanéni!

²³ Nuyaseuchaheparaca me Viáquenu Jesucristo táetaviuchahíni eta iúricacarevaya máicha.

²⁴ Nuvaraha ejacapaini ámutu eta némunasiráhevacahi máichavenehi ema Viáquenu Jesucristo. Tamutupa eta néchajiriruvanahi eyehe.

Eta macartane ema Apóstole Pablo nayehe ena machamuriana ticavasanahi te avasare Corinto, ticajare 2 CORINTIOS

¹ Nuti Pablo, mayehenuhi apóstole ema Jesucristo. Manerejirunuichuhi ema Tata Vicaiyaquene, mavarairahi nímutucaya ena achaneana eta máechajiriruvana éma. Puiti juca nucartane, nápechava nucajurehe núti, émapa ema viparape Timoteo. Véchajicahehi emutu eti machaneranahi ema Viya ecavasanahi tayehe eta avasare Corinto, énapa namutu ena vichamurianahi machaneranahivare ema Viya ticavasanahi te avasareana tayehe eta departamento Acaya.

² Nuvaraha macatajicahehini ichape ema Tata Vicaiyaquene, émapa ema Viáquenu Jesucristo. Nájaracahehini eta táurivaina eta epanereruana.

Tétavicavahi eta macurisamurechirahavi ema Viya, macaepahairahi eta vicatajivairanahi

³ Núti nuvaraha nucunachaparaca ema Viya Macaiyaquene ema Viáquenu Jesucristo. Taicha éma, Vicaiyaquenehivare víti. Tétavicavahi eta majapanuirahavihi, tétavicavahivare eta macurisamurechirahavihi.

⁴ Puiti éma, ticurisamurerechavihi tayehe tamutu eta viátajivana, apaesa viratahahivaréni víti apanava vicurisamurechavacahivaréni nácani ticatajivanahivare, tacutihi eta macurisamurechirahavihi víti ema Viya.

⁵ Tayanapanehipuca ichapepuca eta vicatajivairahi eta véhisirahi ema Cristo, táetaviuchaquenehivare eta táichapevahi eta macurisamurechirahavihi ema Espiritu Santo májjararuhavihi ema Cristo.

⁶ Yátupiquene ichape eta vicatajivairahi táichavenehi eta vímitusirahehi eta máechajiriruvana ema Viya, vivarairahi vétumechaheyare apaesa iúchucuhayare. Émapasera ema Viya ticurisamurechahavipa tayehe eta vicamichirahi tamutu. Taicha éma, mavarahahi ímatiequenehayare eta macurisamurechirahe éti apanava te tamutu jácani ecatajivairana.

⁷ Víti vicasínavahi eyehe eta ecamichirayare taicha vicuticacahi eta vicatajivairahi étapa eta macurisamurechirahavihi vimutu.

Eta macatajivairana ema Pablo

⁸ Nuparapenevaneana, nuvarahavare numetacahe eta vícharacavahi víti tayehe eta jena avasare departamento Asia. Ichapemurihi eta vicatajivairahi. Tiánehipa véchurihayaréni eta vitumevanahi tayehe eta vicamichirana tamutu. Váipavare vémetecahini víuchucuhahini tayehe eta vépenira.

⁹ Vicutiripa nácani nacaparuasana te navahu ena aquenucana. Ema Viya máisapapa eta juca, mavarairahi vaipa vítijivaimahi vicasíñava. Mavarahapa yátupina eta vicasíñarayarehi eta mayehe, taicha éma, macarichu maratahahi máimichava ticaitarechavi te vépenapapuca.

¹⁰ Cape juca ticatiuchahaviripa tayehe eta vépenirayarehini. Puiticha ticatiuchahavirichaha. Tétavicavainehivare eta vicasíñavairahi eta mayehe, vahi tísapahavimahi vépenávanehíni.

¹¹ Tacahe, nuvaraha ímicatacavahini eyujarauchahavini víti. Éti, németeaca camurihénapa éti eyujarauchahaviyare, camuriheyareva éti ehasulupayachainapa ema Viya eta máimiyánirava ticatiuchahavi.

Ema Pablo vahi máitujicavavanehini mayanahini tayehe eta avasare Corinto

¹² Visamavahisera víti eta vicunachiravahi eta tájinairahi víchiravainahini, váhivare apiapiemahavinahini. Sánturuhahaviripa te nataracu namutu ena achaneana, evetijipa éti. Émahisera ema Viya tímicatacavahihi táuríhi eta vítaresirahi táichavenehi eta máemunasirahavihi. Vahi vítijiriruvainahini eta vítupajjiasiravanahi.

¹³ Puiti, tacahehi eta nucartaneana. Vahi apiapiemanuinahini. Váhivare tácajerahini eta ímatiequenehairayare.

¹⁴ Éti, ímatiequenehapaipa eta nímiturapiana. Puiti nuvaraha esamayareva eta nuconsejarapiana apaesa vácuticaca vivapinacaca vítijicaca te jena sache te machavapa ema Viáquenu Jesucristo.

¹⁵⁻¹⁶ Tacahe puiti, eta táinapuiruhi nupanereruhi, nuvarahahi néjirapanaheyarehini, nétavauchiraheyarehini te nuyanirayarehi tayehe eta departamento Macedonia. Tásiha, te nuchavayarepaini, nápechavavare néjirapanáhe, apiheyarehini eta nucurisamurechiraheyarehini. Tacahe, te tamutuyarepa, ímicatacanupapucaini éti eta nuyanirayarevare tayehe eta departamento Judea.

¹⁷ Apanaripahisera eta nupanereruhi. Vuíchaha néjirapanahémahi. Váhivare nuvayua-cahemahi ema nuvarairahi néjirapanaha. Nítauchayare núti. Vahi ímjachaimahi éti nucuti mácáni achane te mapanerechahi, váhisera máitauchahini.

¹⁸ Núti nucasíñavahi eta máimatiranuhi ema Viya. Vahi nuvayua-cahemahi éti.

¹⁹ Cape juca, te nímitucahepa núti, émapa ema Silvano, émapa ema Timoteo, vímima-tichahehi ema Jesucristo, Machichaquenehi ema Viya. Puiti ímatipa éma, tájinaquenehi mavayuaravaina éma. Núti apanava, tájina nuvayua-cahehinehi taicha mavanaranuhi núti.

²⁰ Máichavenehi éma, títauchavahi tamutu eta mapanereruanahi ema Viya. Víti, te visamavaipa eta máijararuvanahi ema Viya, vijirauchahi éma. Vicahehi: ¡Amén! ¡Vicasíñava vímahainapa eta máitauchirainapa!

²¹⁻²² Émaripa ema Viya témuracachahavihi eta viúrujasirahi ema Cristo, víti étipa éti. Timarcachahaviripahivare éma, táicutiarahi eta machichairahavipa, taicha manerejiru-havihi. Tíjaracahaviripavare eta mávahásirahavihi ema Espíritu Santo te visamureana, máitametasirahaviparaca títauchavaya tamutu eta viúricacareyarehi.

²³ Núti, vuíchaha nítecaimahi eta ara eyehe, taicha némunacahehi, numavarairahi nucara-meacahehinehi éti. Ema Viya tímatinuhi eta nutupiruvairahi.

²⁴ Vahi nuvaraha nupamicahe eta esuapiranuinahini nápepejicahehinehi, taicha éti muracaheripahi eta esuapirahi eta juca véhiruhi. Nuvarahahisera nímicatacahe eta tápaju-siravaina eta iúrisamurevayare éti.

2

¹ Eta tacahe, vuíchaha nítecaimahi. Taicha vahi návarahahini nápechavahini némecatajiva-cahehinehi te esamureana eta néjirairaheyare.

² Taicha te ecatisamureva nícha, tímaticaréipahi nájina ticurisamurechanuimahi núti. Ecarichuyarehi éti ecurisamurechanuyarehi.

³ Tacahe, eta táitsivahi eta néjirapanairahe, nucajurehepa eta táinapuiru nucartane, nu-varairahi ésamiricavayare apaesa vaipa nucatisamurevaímahi icha éti. Nuvarahahisera núsrisamurehinehi icha. Tacahe, németeaca étiripa iúrisamurehivareni ámutu eta nuyehe.

⁴ Jéhevare, te jena sache, te nucajurehepa eta nucartane, ichapemurihi eta nupanerere-sirahi, nucatisamurevahivare. Niyahacavahi ichape. Váhiserá étaparacainahini nuvaraha némecatajivachahinehi te esamureana. Núti nuvarahahi ímatihinehi eta táichapevahi eta némunasirahehi.

Ema Pablo máijaracahi eta maconsejarapi eta naperdonachirayarehi ema téjicapavahi

⁵⁻⁶ Tiuri puiti, ema maca téjicapavahi máichahi eta pecatu, tétavicavahi eta ecatisamu-revahi máicha. Núti apanavare nucatisamurevahivare. Váhiserá táurica vivayuchava eta vémecharesira éma. Puiti, tarataharipa eta ecuchusirahi te emuri éti.

⁷ Puiti táurica eperdonachayare eta máichavaquenevahi. Ecurisamurechainapa éma apaesa vahi macuvayuchava eta macatisamurevahi, máinajicavapuca.

⁸ Nuvaraha puiti íapechavahinehi ímereca eta émunasirasamihinehi éma. Ejacapavare te emuri.

⁹ Eta tacahe, nucajurehi cape juca, nuvarairahivare nucaicutiaraha te esuapayarepuca eta nuvanairipianahi.

¹⁰ Núti nuperdonacharipa ema maca achane te máijare ema Cristo. Táurica eperdonachayareva, ecutiranuyare eta nuperdonachirahi.

¹¹ Taicha te váhipuca viperdonachacacahi, tíñehicarehi macamapurava ema Satanás, taicha tímaticarehi eta mavarairahi tímiáquipaichahivayare.

Vaipa máitucacarahahinehi ema Pablo

¹²⁻¹³ Núti, te nítecapapa eta te avasare Troas, nímiijachahi nuchimaphahinehi ema nuparape Tito. Tétavicava eta néñamiravahi, nuvarairahi néchayarehi tájahapuca eta ícharacavahi éti. Yátupihinéni natiarihinehi ena camuriqueneana ena tívarahanahi tisamana eta nímitu-resirahi eta máimiturapiana ema Jesucristo. Étasera eta néñamiravahi eta eyehe émapa ema Tito, nucametavavarepa nayehe ena vichamuriana. Nuyanavarepa tayehe eta juca departamento Macedonia, nutanusirayare éma.

Ema Viya, tétavicavahi eta majaneasiravacahi ena mavanaranahi

¹⁴ Tásiha, tétavicavahi eta núsrisamurevahi eta nuchimpirahi ema Tito eta te juca. Puiti, ichape eta nuhasulupayachirahi ema Viya eta majaneasirahaviparaca, tíjaracahavivare eta máitupajijiasirava eta viratahairahi vicanara tamutu, táichavenehi eta mávahásira-havihi ema Jesucristo. Tituparacahavivare vicametarairuyarehi eta máimiturapiana, mavarairahi tíuriyarehi eta nasamiraya namutu ena achaneana tacuti eta najiusira jácane táijijequeneana.

15-16 Taicha eta vicametarairuira hi tímicitijiricavahi eta táijiyeva eta incienso, eta máijarasirahi ema Cristo te mamirahu ema Maiya. Tacapusisiacahi namutu ena tisamahaviana. Natiarihi ena masuapajirairahana, náemituaruanayare taicha namavarairahi nasuapahini. Tijechehi eta najjusira tacutihí eta máquehe mácani máepenaquenehi. Natiarihivare ena tisuapanapahi náuchucureanayarehi; ticitirinehi najiucahini eta táijiyequene. ¡Tétaví-cavahi eta néñamiravahi eta vicatuparahairahi!

17 Viratahasera vítaucha eta vituparahahi. Taicha víti, eta vicametarairuira, tájina vahi vicavacharapi eta máechajiriruva ema Viya, vétupiripicapahipucaini, vivarairai-nahini tajamurachacarehini, tácutihini eta náichira ena apamuriana tímijachavanahi yátupi-queneana mavaneruana ema Viya. Vítisera yátupiquenehavahi mavanarahavihi ema Viya; vitupiruvahi eta vicametarairuira eta máimiturapi ema Cristo.

3

Viti vicametarairurahiana eta téqueneha matratune ema Viya

1 Vahi nuvaraha ímijachahavi eta vicunachiravainahini puiti. Váhivare vácutihini ena nácani apamuriana tímiturahianahíji, tipairiricana tiámanahi eta carta táechajisihahi eta nacunachacarevahi. Tájinavare vímatiyahini viyasecahehini víti eta carta vímeraquinapahini táechajisihahini eta ecunachirahavinahini.

2-3 Étisera, tájina véñamiravaimahi eyehe. Taicha tímaticarehi te avasareana eta táurivahi eta ítaresirana éti, táichavenehi eta vinacasamurechirahehi eta máechajiriruva ema Viya. Eta juca tímereuchahavi víti eta yátupirahi mavanarahavianahi ema Viya. Éti, ecutihí eta carta vímeraquinapahí. Émaquene ema Cristo, ema íájuchahi, taicha tíjaracahehi ema Espíritu Santo máitsivachaheyarehi eta ítaresirana, táuriyarehi eta esamureana. Arairuripa eta ítaresirahi. Puiti juca eta ítaresirahi, tájinapa étaparacaina esuapahini eta vanairipiana tacajuquenehi acane te márime tabla.

4 Eta tacahe, tájina vahi néñamavaimahi tayehe eta apóstolenuirahi. Nétumechava ichape, taicha nusiñavahi eta manerejirunuirahi ema Cristo, máijarasiranuhivare ema Viya eta máitupajijiasiravana.

5 Taicha víti vahi vítijivainahini víjaracava eta vítupajijiasirava. Émaquenehi ema Viya tíjaracahavihi eta vítumevanahi eta vicaemataneasirahi éma.

6 Émaquenehi tituparacahavi vicametarairuyarehi eta arairu matratune. Vahi étainahini nupamicahyare eta esuapirayarehi eta vanairipiana. Taicha eta juca arairu matratune ema Viya, tíjaracahehi emutu ema Espíritu Santo, máitsivachinaheyare eta ítaresirana, arairuinapa. Étasera eta vanairipi tacarichu táimivanerecachi eta náepeniraya ena téjecapavana.

7 Acane, te jena sache te tíucupaicapa ema Moisés te cerro, mámapahi eta vanairipiana tacajuquenehi te márime tabla. Eta mamira, tétavícvahi eta tarapepesirapahi táichavenehi eta macachanerahi ema Viya. Ena achaneana, vaipa náratahahini náimarraca eta mamira. Ichapehinéni eta tapicauchacarevahi eta vanairipiana taicha tétavícvahi eta tarapepesirapahi eta mamira ema tiámapahi. Étasera eta mayerevapa, tímutserahavapaipahi témitiaca eta tarapepesirahi. Eta vanairipiana, tacarichuhí táimicapacachi nácani téjecapavanahi.

8 Étasera eta arairu matratune ema Viya, eta nucametarairuquenehi puiti, tétavícvahi eta tápajusiravahi eta tasuapacarevahi taicha tiámahavihi eta mávahásirahavihi ema Espíritu Santo.

9 Yátupihí eta tasuapacarevahi eta vanairipiana, tiápajucavahisera eta tasuapacarevapanahí eta máichuarapi ema Viya, vijacpacarehi mayehe táichavenehi éta.

10 Yátupi tirapepecahi eta mamira ema tiámapahi eta vanairipiana, váhisera étaparacainahini táurichahavihini. Jéhevarequenehi puiti, tétavícvahi eta víurivahi maicha ema Espíritu Santo.

11 Eta tarapepesirahi eta mamira ema Moisés, tímutserahavapaipahi témitiaca. Eta juca táicutiarahi eta ánipirichuhi eta tasuapacarevayarehi eta mavanairipiana. Étasera eta juca máichuhairahavi ema Viya, tiápajucavahi eta tasuapacarevahi taicha máichecuaraquireyarehi eta víurívaya táicha.

12 Étavenehi eta vicasiñavairahi vímahayare eta juca sache vicuchapaquenehi, viti matupararuana vétumechavahi eta vicametarairuirana.

13 Váhi vácutihini ema víyarahaini Moisés, tépacamirahavahi te páñome, tíuriyarepa eta náimarrasirayarehi ena machamuriana. Váipasare nanecapahini te tímutserahavapa eta táemahairapahi eta tarapepesirahi eta mamira, táicutiarahi eta táepahairaya eta tapamisirahavini eta vanairipiana eta vítauchirayarehi.

¹⁴⁻¹⁵ Puíticha ena nujaneanana israelítana vahi nácaicutiarahini eta juca. Tacahe, te náchejicuhá eta ichasiquene matratune ema Viya tacajuquenehi eta te libro májurehi ema Moisés, vuíchaha nácaicutiarahini. Tímicutijiricaváichucha táepacuchahi eta máepacimirahi ema Moisés. Ticajeraichucha eta nacaicutiarairayarehi.

¹⁶ Mácanisera achane, esenapuca, tjaracavapa eta máehisirayarehi ema Viáquenu, ichapenapa eta macaicutiarairayarehi. Tájina pa táepacaquiñahaimahi.

¹⁷ Jéhésare, ema Viáquenu tjaracahavisarepa ema Espíritu Santo. Tásiha, vaipa vipicacacavahini eta vipauchiraya éma. Yátupina eta vivapinairavahi maicha ema Espíritu Santo.

¹⁸ Tacahe, vimutu víti véhicanahi ema Viáquenu vicitiripa eta espejo eta tarapepe-sirahi eta tajaravahi eta sache. Víti, yátupihí vímerecohi eta máurivahi ema Viáquenu. Vaipa vicaepacimirahini. Eta tacahe, víti puiti tíapajucavainapaipa eta vicitirayare ema Viáquenu taicha tíapajucavahi eta majaraivahi te visamureana. Étavenehivare eta mávahásirahavíhi ema Espíritu Santo májjaruhi ema Viáquenu.

4

¹ Eta tacahe, váhiquene viyacujiequenehavamahi eta vicametarairuira, taicha ema Viya tímechahavíhi eta máemunaraiva eta matuparasirahavíhi eta juca vicaemataneasirayarehi éma.

² Víti, tájina vímatiyahini viyumurujiricahini eta víchagueneana. Váhivare víchahini eta titsirihacareana. Váhivare vítserurupinahipucaini víhapapicahipucaini eta máimiturapiana ema Viya, taicha vivaraha vicurismurechaya éma. Tamutuhi véchajisihahi eta yátupiqueneana. Jéhésare, vivaraha nacaicutiarahini ena achaneana eta vímiturapianahi tásihaqueneanahi me Viya.

³⁻⁴ Nararíhisemisera nácani vahi nacaicutiarahini eta vímiturapiana, taicha ema Váinaraji, tacaiyaquenehi eta juca apaquehe, éma tépacaquiñahavacahi éna. Taicha vahi mávarahahini náimatiequenehahini eta máimiturapiana ema Jesucristo, tétavicavahi eta tajarahiquenériahi taicha émaquenehi macanaquenehi ema Viya. Táitusiava éna, vaipa nácaicutiarahini eta vímiturapi. Náemitaruanayarehi tayehe eta ecuñaraqui táicha.

⁵ Te vicametarairu víti, vahi vítinahini vicunachavahini, vivarahahini éhichavi. Vivarahisera esupahini ema Jesucristo, ecaquenuyarehivare éma. Víti vanairucahavichucha eta eyehe, taicha vicaemataneacahi ema Jesús.

⁶ Ema Viya, te máepiyacainapa eta juca apaquehe, macavanairipipa tatiarihiyarehi eta tjarahí, témitiacayarepa eta tímipicuqueneeníhi. Ene macahehi eta veyehe. Tímimatichahávíhi eta majaraiva ema Machicha. Tétavicavahi eta tajaravahi te visamureana. Éma, tímimatichahavipaipahi eta máetaviuchaquenehi máurivahi ema Viya.

Puiti eta vítaresirahi, vímerecovaya yátupihí eta vicasíñairahi eta macatiuchirahavipaipa ema Viya

⁷ Eta juca véhiruhi vímiturapianahi, tétavicavahi eta tacunachacarevahi. Vahi vítinahini vicunachacarehini. Taicha víti páureanasami, vicitichucha eta muñeca náipune. Émasera ema Viya máimerecachi eta máitupajijiasiravahi, májjarasirapa eta tatumevayarehi eta víaquehe. Váhiserá vítijivainahini.

⁸ Táichavenehi eta vicametarairuira, tatiarihihi jácani víchavaquenevahi; ticatiuchahavíhisera ema Viya apaesa víuchucuhaparaca. Ichapevare jácani eta táimipaneresirahavíhi; vicasíñavahisera eta majaneasirahavíhi ema Viya.

⁹ Típanajiricahavianahi ena víanarana, váhisera tíjunijiacahavimahi ema Viya eta majaneasirahavíhi. Tayanapane nachururupaicahavíhini, émasera ema Viya vahi máisapaimahi ticapacahaviana.

¹⁰⁻¹¹ Tamutu te jácani vicaijuheanapahi, natiarihi ena navaraha ticapacahaviana táichavenehi eta véhisirahi ema Jesús. Tamutu sácheana víamarairicapahi eta vépenira, vicitíhi ema Jesús eta napanereuchirahi éma. Émarichuhisera ema Jesús máechepuquenehi. Éma máimerecachi eta máitupajijiasirava eta macuchucuirahavipaipahi tayehe tamutu eta vícharacavaqueneanahi.

¹² Tayanapane víti víamarairicahi eta vépenira táichavenehi eta vímituresirahi, táitsivahisera ejacapai éti eta tamaichecuarequireyarehi eta ítaresira táichavenehi eta esupirahavíhi.

¹³ Ema víyarahaini David, ani macahehi eta máechajiriruvana eta te Salmo: “Núti nucasiñavahi mayehe ema Viya, tásiha vahi nupicacacavahini eta néchajisirayare mayehe” macahepa. Énerichuhi vicahehi víti puiti. Vicasíñavahi mayehe eta macatiuchirahaviyare. Táitusiava, vahi vipicacacavaimahi eta vímituresiraya.

¹⁴ Taicha véchahi eta macaechepusirahaviyarehi ema Viya, vicutyarehi eta macaechepusirahi ema Machicha Jesús te máecari. Tásiha, étamurihavinapa, éti apanavare, eta vímérésiravayare te mamirahu éma.

¹⁵ Tamutu eta juca víchavaquenevanahi, támahi eta iúrivayarehi. Vicamichahi tamutu, taicha vivarahahi eti esimutuquenevanahi ejacapahini eta iúrivayare máijjararuhehi ema Viya, apaesa ámutuhivaréni eti esimutuquenevanahi ehasulupayachahini éma, ecunachahivaréni.

¹⁶ Eta tacahe, váiparinehi vicainajiruvaimahi. Tayanapanepuca tivitaji eta viáquehe, étasera eta viáchaneva tétavicavaichucha eta tatumeva tamutu sácheana.

¹⁷ Taicha eta viátajivanahi puiti juca vítaresiraichaha, vahi táunacacare. Tétaticavánachucha, tiánucuhávanepa. Énerichuvare, jararihi eta táitsivahi, taicha vijacapahi eta táetaviuchiravaya eta viúricarevayare. Puiti tájina tácutimahi eta viúricarevaya, taicha máichecuarquirénapa éta.

¹⁸ Eta tacahe, vahi vipicacaracavaimahi eta viátajivanahi, taicha vahi táunacacarehini. Vicasíñavahisera mayehe ema Viya eta máimisíapirahaviya eta te mávasa anuma. Tásiha, máichecuarquirénapa eta viúricarevaya eta viávihairaya tayehe.

5

¹ Vimutuhi vímati te náquipaicapuca eta viáquehe, tépenayarehi éta. Taicha éta, vahi muracainahini. Tacutihi te viáquipaica eta peti. Máéjerarehi vicha taicha vahi muracainahini. Jararihisera eta viáqueheyarehi te anuma vícuchihi mayehe ema Viya. Éta, nájinapa tíratahaimahi tiáquipaica taicha máepiyaruhi éma.

² Puiti, tétavicavahi eta tacatajivairahi eta viáquehe. Tamutuhi tasama. Eta tacahe, vivarahinehi tájjahúchavahini tacaitsivahini eta viáqueheyare te anuma.

³ Taicha vicamunurinehi eta arairu viáquehe, apaesa vahi vitsirihaimahi eta vicachanarayare ema Viáquenu taicha vicutyare éma.

⁴ Puiti eta juca vítaresiraichaha, tamutuhi tasama eta viáquehe. Ichapemurihi eta táimipanereresirahavihi. Váhisera étainahini eta vivarairainahini vépenávane, étasera vivarairahi tacaitsivahini eta viáquehe arairuinahini.

⁵ Tacahe, ema Viya tamutuhi máicucha eta táicharacavayare te apana vítaresira. Puiti tíjaracahavivare ema Espíritu Santo. Émapa tímatetacahaviparaca eta vijacapirayare eta vícuchianahi.

⁶⁻⁷ Tacahe, núti vahi nupicahini eta népenirayarepuca, taicha ichape eta nucasíñavairahi mayehe ema Viya. Tájina vahi néñamavaimahi mayehe eta máijjarasiranuinapa eta arairu náquehe, tayanapane víuchaha nímahahini. Eta táimiyániravaya eta nítaresirahi, nuyerehi eta nícuchihi náqueheyare.

⁸ Nuvarahainehisera tájjahúchavahini tacaitsivahini eta juca náquehe, nuyanasarepaini nucachanehini ema Viáquenu.

⁹ Eta tacahe, vivaraha ichapemurihi eta vicurisamurechirahi eta vicaemataneasira ema Viáquenu puiti juca vítaresiraichaha. Tásiha éma, tiúrisamureyare eta vyehe te vímerecavainapa te mamirahu.

¹⁰ Taicha vimutu vímerecavayare te mamirahu ema Cristo te mávacureyare. Ánaqui tímaticareyare tamutu eta víchaqueneanapachuhi puiti juca vítaresiraichaha, te víchahipuca eta táuriqueneana, te étahipuca eta tamauriqueneana. Te víchahipuca eta táuriqueneana, vijacapainapa eta vícuchianapahi.

Éma Viya mavaraha vipauchayarehi éma, macaepahairaya eta vipicacarasiravahi eta vícuñayare

¹¹ Nútisera, ichape eta nupicauchirahi ema Viya. Eta tacahe, nímiyanava numetacavacahi ena achaneana eta mayehe, taicha nuvarahahi námutihini napicauchahivaréni éma. Émasera, tétavicavahi eta máimatiranuhi táurivahi eta nupanereruana eta nucaemataneasirahi éma. Puiti nuvaraha échahivaréni éti apanava eta táurivahi eta nupanereruana.

¹² Tacahe, eta juca néchajisihahi, vahi nútinahini nucunachavahini. Nuvarahahisera nucunachacarehini eta eyehe, apaesa áratahahini ecamatinaca ena tímijachavanahi námatiequeneha. Váhisera yátupinahini táuchurequenénahini te nasamureana.

¹³ Éna, tépiyaequenehanuanahi, máurishinuhíji náicha, taicha ichape eta nuvapinairavahi eta nucaemataneasirahi ema Viya. Tiúrihisera eta nuchuti. Nuvarahaparaca ichapenaini eta iúricarevaina éti.

¹⁴⁻¹⁵ Núti nímatihí eta táetaviuchirahi eta máemunasirahavihi ema Cristo, taicha máepinahavihi te crusu. Vimutu viti achaneana vituparahaichu vépenirapachu. Mavachachai-pasera tamutu ema Cristo. Eta tacahe, tatuparaca vítsirijicava vicaemataneaca éma. Tásiha

puiti, viti machanerahavipa. Vaipa vítijiricavaimahi. Émapa téchahi eta vítaresira, taicha eta machavirahi títareca.

¹⁶ Eta tacahe, viti véhicaripa ema Cristo, étainapa vipanerechayare eta vítsivachiraipa eta vítaresira. Vaipa véhicaimahi eta apana panereruca tayeheanahi te juca apaquehe. Étaripa cape juca viásinequenehi váhirichu visuapapajicahini ema Cristo, vímijacharichucha éma vicutihi viti achaneanasami. Puítisera vaipa tácahehi eta vipanereruana. Visuapahi émairahi Machichaquenehi ema Viya.

¹⁷ Puítiripa viti viúrujicanahi ema Cristo, apanahaviripa. Vínajicaipa eta viyeherepinihí tamauriqueneana. Tamutupa arairuhi puítí eta viyeherepiana.

¹⁸⁻¹⁹ Ema Viya, tétavicavahi eta máurivahi eta viyehe. Éma, mavarahahi vipauchayarehi éma. Mavarahahivare macaepahayarehini eta vipicacarasiravahi eta vícuñayare táichavenehi eta vipecaturana. Tásiha, mavaneca ema Machicha Jesucristo apaesa macaepahayarehi eta vipecaturana vimutu viti vicasíñavana eta mayehe, vaipa máechairicaimahi. Tásiha, tájina eta vípicacarasiravaimahi eta vícuñainahini. Tásiha puítí, ema Viya tituparacahavipa viti véhicahahi eta víchuhairavacayare namutu ena apamuriana achaneana, apaesa éna apanava nacasiñavavare eta mayehe, váipavare tipicacaracavanaimahi eta mayehe.

²⁰ Tacahe, viti mavaneruhavihi ema Cristo víchuhavacayarehi namutu. Tímicutijiricavaipa émaquenénahini máechajicavacahini ema Viya. Puiti viyaseacavacahi namutu nacasiñava mayehe ema Jesucristo; váipavare tipicacaracavanayarehini eta náicuñainahini náicuchiyaréni.

²¹ Ema Cristo, tájina mapecaturainahini. Étasera mavairahi ema Viya viúchuchayare viti, émapa ema Cristo tamuriacahi eta vipecaturana. Puítí, tájinasarepa víchiravaimahi, tájinavarepa viviurevaina te mamirahu ema Viya vimutu viti viúrujjaruanahi ema Cristo.

6

¹ Tásiha, núti mavanaranuhi ema Viya, nuyasecaheyare ímíyanava tauri eta éhisirahi éma. Vahi ecuemepurureca eta máemunasirahehi, majacapirahehivare.

² (Taicha ani macahehi eta máechajiriruvahi tayehe eta Sagrada Escritura: “Nuchicha, tétavicava eta pisamacarevayare eta nuyehe te pipiaracan. Nucatiuchavivaneyare” macahepa. Jéhesare, puiti juca sache ticamapuracarehi eta epiarasirayarehi éma, ejacapacarechaha me Viya mapurare achanehechaha. Esamacarechaha puiti, taicha ema Viya mavaraha ticuchucuhayare eta te ícuñayaréni taicha eta epecaturana.)

³ Núti nuvaraha nacuija nacaecahini eta vématanerepi viti apóstoleana. Eta tacahe, nupamicavahi núti tíuriyare eta nuyeherepiana.

⁴ Eta tacahe, ichape eta néchajiravahi te nímitureca. Nímerecavahi yátupi eta mavanarairanuhi ema Viya. Ichapemuri eta nucamichirahi eta nucatajivairana, eta néchuriasirana, étape eta tacajeravana eta nitátijirisirava.

⁵ Vahi nucaínajiruvaimahi táichavene eta náestasaranuhi ena nánarana, náeratasiranuhivare, tájinanéni viviurevainahini. Te apana avasareana timurijacananahí taicha eta nasemanevahi. Eta nitátijirisiravahi, ichape eta tamuracavahi eta nucaematanerahi. Camurihivare eta numacaimasiravahi. Camurihivare eta nécuava eta nupaisirana.

⁶ Éti ímatinuhi yátupihí eta táurivahi eta nítaresira. Ímatinuhivare eta nucaimitucasihi mayehe ema Jesucristo. Táichavenehi eta mávahásiranuhi ema Espíritu Santo, nucayehéhi eta paciencia nayehe namutu, nujapanurahihivare. Yátupiquenehi eta némunaravahi.

⁷ Nímitucahi eta yátupihí máimiturapiana ema Viáquenu. Énerichuvare ema Viya tímícatacananuhi tayehe eta máitupajijiasiravahi te tamutu eta nucametarairuirahi eta máechajiriruvahi, étape eta nucatiuchirahi eta véhiruhi.

⁸ Eta nupaisirapaipahi, natiarihíhi ena ticunachananahí, tíuriemanahí eta nuyehe. Natiarihihivare ena tépurunuanahí, tíñemahipivare eta nacayemaquene eta nuyehe. Natiarihihivare ena tímijarechanuana tépiyahirahi. Nutupiruvahisera tamutu eta nítaresirahi.

⁹ Natiarihivare ena vahi tisuapanuanaimahi, taicha tépuruanahí eta apóstolenuirahi. Natiarihisamivaresera ena tisuapanuana taicha tisamairiricanuanahí eta yátupirahi eta nímiturapiana. Tatiarihihivare te tíánehípa eta népenirayaréni. Núchuchahisera, maicha ema Viya. Natiarihihivare ena téhanacanuana muraca. Váhísera máisapavaca ema Viya eta nacapasiranuinahini.

¹⁰ Tatiarihihivare te nucatisamurevahi ichape. Nútisera nucurisamurereacavahi tamutu sácheana. Páurenuhi eta náimairanuhi ena achaneana. Ichapemurianahisera ena nijaruaruanahí eta tacaimahaquenehi eta náchanevana. Ani, tájina nímahaquenéna. Téhesera apana nítaresira, tétavicavaya eta nucaimahaqueneraya.

¹¹ Nuparapenaveana némunaruqueneana, nutupiruvahi te nusamure eta juca nuconsejarapianahi eyehe.

¹² Vahi nuvaraha ecuimijachahini nínajiacache eta némunasirahehi. Németeacahisera éti ínajiacanuhi eta émunasiranuhi.

¹³ Éti, ecutihí nuchichanavehénahini eta némunasirahehi. Nuvaraha tachavahini eta émunasiranuhi, esuapiranuhivaréni.

Víti, tiávahácavahi ema Viya taicha machanerahavihi

¹⁴ Nuparapenaveana, vahi ecuávahácavaca nácani máehicarahanahi ema Viáquenu. Étaripa te arayenaheyare, vahi ecuvehá nácani máehicarahanahi. Taicha téjecacayarehi eta panererucana. Vítí véhicanahi ema Viáquenu, tatupiruvahi eta vipanereru. Énasea ena máehicarahanahi, tavayuacahi eta tauriqueneana. Vítí víuricahi eta tijarahi; énasea náuricahi eta timapicu.

¹⁵ Taicha víti, mávaháruhavihi ema Cristo. Váiparinehi vicachanémahi ema Váinaraji. Tásiha, te viávahácavaca ena masuapajirairahana, tiápitavairicanahi eta véhisirahi ema Viáquenu.

¹⁶ Énerichuvare, tiávahácavahi ema Viya, émaripa ema Vicaiyaquene. Taicha ani macahehi: “Núti návahácavacaya ena téhicanuanahi. Néchavacayareva éna, taicha éna yátupiqueneanahi nuchaneranahi” macahepa. Eta tacahe, váhiquene táuricahini eta vicasi-piravahini eta nayehe ena vahi machanerainahini ema Viya, taicha apanahi ema nasiñarajihí.

¹⁷ Taicha acane macavanairipipa ema Viya, ani macahehi: “Érajicava eta te namuri ena vahi nuchanerainahi, machu napareacahe eta namaeperajivana éna. Tacahe, éti nujacapaheyarehi.

¹⁸ Núti yátupiquenénuyarehi Ecaiyaquenenuhi. Éti nuchichanaveanahi” macahepa ema Viya máitupajijihaquenehi.

7

¹ Tacahe, némunaruqueneana nuparapenaveana, vahi távarahahini vínajicavahini tayehe eta juca vicuchapaquenehi puiti. Tacahe, vépachinachayarehi tamutu eta viáquehe étape eta viáchaneva. Vjáracavayarehi tamutu te visamureana me Viya taicha eta vipicau-chirahi éma.

Eta máurisamurevahi ema Pablo táurivaipa eta náitasesira ena machamuriana

² Nuparapenaveana, nuvaraha ímianavahini esuapanuhini. Taicha nájinahi te etaracu éti nacatajivahini nánajicavahini níchavenénahini núti. Nájinavare nucaetemaquenénahini, nímipananájicavacahipucaini.

³ Váhivare nuvaraha nucajachahe puiti. Nutupiruvahi eta numetasirahehi cape juca: “Tétavacavahi eta nucasamurerahéhi. Tájina ticamitiscanuumahi, tayanapanepuca népena”.

⁴ Ichape eta nucasíñavairahi eta eyehe, nucunachahehi eta ecurisamurechiranuhi. Tayanapanehinéni ichape eta nucatajivairahi, tétavacavahisera eta étumechiranuhi ecurisamurechiranuhi.

⁵ Étaripa te nítecapapa tayehe eta Macedonia, tájina nunarasirainahini. Ichape eta nucatajivairahi naicha ena ticatianacuanahí. Ichaperinehivare eta néñamiravahi eta eyehe.

⁶ Émasera ema Viya tétavacavahi eta máetumeravahi nayehe nácani téñamavasamureanahi. Nútiripa nétumechavainehi maicha éma, eta nímairapa máitecapauchiranuhi ema Tito.

⁷ Tavetijipa eta mametasiranupa ema Tito eta ecurisamurechirarinehi éma. Timetacuvare ichape eta éñamiravahi eta nuyehe; evarairaipacha ímahanu; ichapevare eta evarairahi esuapanu eta étupirisirahi ema maca achane téjecapavahi. ¡Eta juca, tétavacavainehi eta ecurisamurechiranuhi!

⁸ Ichapehinéni eta táimipaneresirahehi eta nucartane. Nútiripa, ichaperinehivare eta táimipaneresiranuhi nucatisamurevahi te nucajurepa. Némitiscapasera puiti, taicha ánipi eta táimipaneresirahehi.

⁹ Púitiserá, tétavacavainehi eta núrissamurevahi ícha, eta táetaviasiraheripahi eta ecatisamurevahi. Eta núrissamurevahi, vahi étainahini taicha eta ecatisamurevahi. Núti núrissamurevahi taicha títsivachavaipahi eta táurivaipahi eta epanereruana, evarairahi ecurisamurecha ema Viya. Eta tacahe, víti tájinapa vácayemahini eta eyehe.

¹⁰ Taicha tatiarihíhi eta jácani májjararuhi ema Viya, táimipaneresirahehi, mavarairahi eta éneuchiravaya tayehe eta ejacapiravahi apaesa macuchucahe. Eta ecatisamurevahi

tiámahi eta iúricacarevaya. Énaser a ena apamuriana achaneana tayehe eta juca apaquehe, yátupi ticatisamurevanahi, váhisera náneuchavahini eta me Viya. Éta, tiáma eta náepenira.

¹¹ Étiser a, jítavacavahi eta iúrivahi tásihaquenehi eta ecatisamurevairahi! Enevane-rinehi ínajicahi eta éjecipiravahi taicha evarahahi ímijanava ecurisamurecha ema Viya. Ichaperinehi eta nucunachirahehi taicha epicauchainehi ema Viya tayehe eta juca íchava-queneváhi. Evarahainehi níjahúchavahini nítecaini eta eyehe nímicatacahehíni. Étiser a enevanepa ecurujicacahi taicha eta esemanevahi maicha ema téjecipavahi te etaracu. Enevanepe émecharecapa éma. Ímerecavahi eta tamajinairahi éjecipiravainahini éti.

¹² Núti, te nucajurehénapa eta táinapure nucartane, vahi émainahíni máimipanerereca-nuhíni ema téjecipavahi, váhivare émainahíni máimipanererecanuhíni ema maiya, émaripa ema majarareruhi. Íchavenehi éti eta ímipanereresiranuhi te nucajurehénapa, nuvarairahi ímereuchavayarehi eta yátupipapuca eta esuapiranuínahini te mavahuana ema Viya.

¹³ Éta tacahe, tétavacavainehi eta étumechiranuhi núti eta nusamairisirahehi eta esuapi-ranuipa.

Tavetijipa eta núsamurevapa eta táurivahi eta ejacpirahi ema Tito. Tétavacavahi eta máurisamurevapai ícha éti eta ésamirisiravaipa.

¹⁴ Váhirichu támapurujihini eta nucunachirahehi mayehe ema Tito eta núsamurevahi ícha éti. Puítiripa, ímereuchavapa yátupíhi eta ecunachacarevahi.

¹⁵ Éma, tiápajucavapaipa eta máemunasirahehi éti. Máecharaicahi eta táurivahi eta ejacpirahi éma, esuaparinehivare, táichavenehi eta emansuiravahi étapa eta epicauchirahi íchape ema Viáquenu.

¹⁶ Núti apanavare, tétavacavahivare eta núsamurevahi ícha éti. Nucasiñavahi táimijanava eta esuapiranuina te tamutu.

8

Tatupiruvayare te visamure te vivaraha vicajirica

¹ Tiuri puiti, nuparapenaveana, vivaraha vimetacahe eta nanaquisiravahi ichape ena apamuriana vichamuriana ticavasanahe te avasareana tinapaica te juca Macedonia. Éna, nasuapavanepa eta manacasamurechirahi ema Viya eta nacajirisirayarehi.

² Ichapemurihinéni eta náichirahi ena ticatianacanahi náemepaurechavacahi, váhisera náinajicavahini. Tivapinavanarichucha. Tatupiruvahi te nasamureana eta nájjarasirahi eta nanaquiruvana. Páureanahinéni, tímecavahisera eta nanaquiruvana, ticutirine rícoanai-nahini.

³ Núti néchajisihahi eta juca taicha nunecapaequenehahi eta tápajusiravahi eta nanaqui-ruvana. Vahi náefñamahini, nájjaracahi jácani nacayehequene. Vahi vipamicavacahini víti.

⁴ Énaser a, ichapemurihivare eta nayaseasirahavihi visapahini tinaquicavana éna apanava, navarairahi nacajiyare ena vichamuriana ticavasanahe te Jerusalén.

⁵ Éna, náetaviuchahi eta navapinairavahi. Tínapucapa tinaquicavanahi eta nacaemata-neasirahi ema Viya, navarairahi nacurisamurecha éma. Tásiha, étapa eta náicurehi ena vichamuriana.

⁶ Éta nímairahi núti eta navapinavairahi eta nacajirisiraya, nupanerechahi nuvanecaya ema Tito machava máiteca eta ara eyehe apaesa táitauchavapaini eta enaquiruvanahi éti apanava. Cape juca épaniravainapa. Puiti ítauchavanepaini.

⁷ Taicha éti, ichapemuri eta ecasiñavairahi me Viya. Tétavacavahivare eta échemaravahi. Camurihevere éti ímiturahiana. Evapinavahivare eta ecaemataneasirahi ema Viya. Tétavi-cavahivare eta émunaravahi eta viyehe. Éta tacahe, táurica tápajucavahivaréni eta enaqui-ruvana ecajirisiraya.

⁸ Váhisera nupamicache eta nuanesirahénahini. Nuvarahahisera ímatiequenehahi eta navapinaraivahi ena apamuriana vichamuriana apaesa ímerecaini éti apanava eta yátupiquenérahí émunaravahi.

⁹ Ímatirichuhi éti eta máemunasirahavihi ema Viáquenu Jesucristo. Éma, tamutu tiúrica-carehi te mávihahi te anuma, tájinahinéni mácamunuhini. Etivenehisera tiúcupaicapa te juca apaquehe. Páurehi éma eta máitaresirahi apaesa éti ejacapahini eta iúricacareva maicha éma.

¹⁰⁻¹¹ Németeaca táurica ítauchavanéni eta juca enaquisiravahi, váchupa épanavaquene-ripahi cape año. Táimijanava eta evapinairavayarehi eta ítauchiraya eta enaquiruvanayare tásihaquenehi eta jácani tatiarihiqueneanahi ecayehequeneanahi.

¹² Etiaríhi erataha enaquica apaesachicha. Etiaríhivare erataha íápajucava eta enaqui-siravahi. Etiaríhi erataha enaquica camuri. Tacamunuchucha tátupiruva te esamureana, evapinavahi eta enaquiruvaya apaesa tijacapacareya mayehe ema Viya.

¹³ Vahi nuyaseacahe échuriahahini éti táichavénenahini eta ímicatasirayare ena apamuriana.

¹⁴ Nuvarahahisera ímerekavahini eta ímicatasiravacayare ena vichamuriana. Puiti ecaimahaquenevacahi, eratahahi ecajirica ena náechuriaruanahi. Tijuricati te apana año, étipavainapupuca échuriaca. Éna títsirijicavanainapa eta eyehe, énapavainapa tinaquicavanayare. Ene tacaheyare eta itaresirayare, ecuticacayare. Nacuija nacucatajiva tayehe eta ecamunuqueneana.

¹⁵ Vítauchayare eta tacayemaquenehi eta Sagrada Escritura, ani tacahe: “Namutuhi ticaniruana. Nájina nácatajivahini, nájinavare náechuriahahini, váhivare námempururerecahina” tacahepa.

Éma Tito énapa ena apinana vanairucanahi mayehe éma Pablo

¹⁶ Núti nuhasulupayachahi éma Viya eta manacasamurechirahi éma Tito máeñamiravahi eta eyehe, tacutihi eta nusamure néñamiravahi eta eyehe.

¹⁷ Éma, matupiruvahi tijicapanuhi eta nutuparasirahi téchapajiricaheyare. Ichape eta mavarairahi téjirapanaheyare, taicha tétavicavahi eta máemunasirahehi.

¹⁸ Eta mayanirayare éma Tito eta ara eyehe, vévatacayare macachaneyarepahi éma apana vichamurivare. Timaticarehi éma eta macunachacarevahi te jácani máimituresirapahi nayehe ena vichamuriana tayehe eta véhiruhi.

¹⁹ Éma maca nerejihu ne vichamuriana eta máimicatasiranuyare eta vipaisirayare, víjarasirayare ena vichamuriana eta enaquiruvanahi. Víchahi eta juca, vivarairahi vícurisamurechaya éma Viáquenu. Vímereuchaheyareva eta evapinairavahi éti ecajiraivahi.

²⁰⁻²¹ Taicha núti eta víamirayare eta íchapequene enaquiruvana, nuvaraha nímerecayare eta táuriva eta víchira, apaesa vahi nacuechajisanu nácani achaneana. Éma Viya tímaracanuhi eta táuriva eta nupanereruana. Nuvarahavare tiuri eta náimairahi ena vichamuriana.

²² Énerichuvare vévatacayareva éma apanavare vichamuri. Éma, ichapemurihi tímerechava eta mavapinairahi eta macemataneasirahi éma Viáquenu. Puiti éma, tivapinavavarepa eta máitecapauchiraheya, taicha macasiñavahi eta máimatirainapa eta evapinavahi eta ecajiraivahi éti.

²³ Núti nuvarahahi náimatiyarehi namutu éma Tito, eta émairahi nujupaha tayehe eta juca vématanerepi. Vicuticacahi eta vicaemataneasirahe, véchapajirisirahehi éti. Étaripa te nacayasesererpupuca nayehe ena apinana vichamuriana macachanequeneanayarehi éma Tito, énerichuvare emetacayare eta nerejianahi ena apamuriana vichamuriana, táichavenehi eta táurivahi eta nacaemataneasirahi éma Cristo.

²⁴ Nuvarahahi ímerekavayare eta nayehe ena nani apinana vichamuriana eta yátupirahi eta émunaravahi, apaesa ecurisamurecha namutu ena vichamuriana te nasamairiricapa, náimatirayare vahi támapuruji eta nucunachirahehi.

9

Tíuripana vivapinavayarehi eta vinaquisiravana nayeheyare ena vichamuriana

¹ Tiuri puiti, núti nímatihiripahi eta evapinairava tayehe eta ecajirisira nayeheyarehi ena vichamuriana ticavasanahe te Jerusalén. Vaipa tácamunucarehini nápepejiricahehini.

² Ichapemurihi eta nucunachirahehi nayehe ena vichamuriana ticavasanahe te juca Macedonia. Numetacavacahi eta evapinairavahi eta épaniravahi ena quicava cápequeneripahi te apanahi año. Tacahe, eta nasamairirisirahi eta evapinairavahi éti, éna apanava tivapinavanavarepa ichape.

³ Éta tacahe, névatacachi puiti ena nani mapanana vichamuriana, apaesa vahi ecuvayuaracanu. Vahi tacumapuruji eta nucunachirahehi eta enaquisirava. Nuvaraha tatsecavaipa támutu te nítecapauchahépa.

⁴ Tijuricati náehicanupahi te níteca ena vichamuriana ticavasanahe te juca, tacuijirichaha tatsecavahi machu átsirihacare, machu támapurujipa eta nucunachirahehi. Váipasare ecumicatsiriacanu núti apanava.

⁵ Tásiha, tacahehi eta nupanereruana eta névatasirahi puiti ena nani vichamuriana, nánapumirauchanu náitecapauchaha, náimicatacahe eta ecurujisirayare eta enaquiruvana. Nuvaraha evapinavayarehi eta enaquisiravahi. Nájina vahi náimijachanu nútinchucha nupamicaha.

⁶ Némechaheyare jucarihi eta échajirirucava, ani tacahehi: “Mácani achane ánicuchicharichu eta máesane máevaruhu, ánimurichicharichu eta mavehayare eta távame eta máesane. Mácanisera ichapepana eta máesane, ichapemurivare eta távame mavehaqueneare” tacahepa.

⁷ Namutu nácani tinaquicavanayare, tavarahahi tatupiruvayarehi te nasamureana eta nanaquisiravaya. Vahi nacatiequenehaimahi, taicha nájina tipamicaimahi. Taicha ema Viya, tétavicava eta máemunasirahi mácani tatupiruvahi eta máijaracasiresirahi.

⁸ Ecasiñavaya yátupina mayehe ema Viya, taicha éma, tétavicavahi eta máitupajjiasiravahi. Mavarahahi tjaracaheya tamutu eta camunuqueneana. Vaipa échurihaimahi maicha éma. Ecayehenasarepa eta ímicatasiravacaya nácani apamuriana ticamunuvanahi.

⁹ Ecutiyarehi ema achane tiuri, ema táechajisihahi eta Sagrada Escritura, ani tacahehi: “Ema achane tíurihi ticonachacarehi me Viya, tivapinavahi eta macajiraparacahi ena páureana. Tájina vahi téchuricaaimahi eta macajirisira te tamutu eta máitaresirahi” tacahepa.

¹⁰ Ema Viya, émahí ema tinaquicahi eta evaraquiána. Éma, macaejapacahivare eta tinicacare, étapa víachanechiavayarehi. Ene macaheya eyehe éti. Tjaracahepa eta enaquisiravaya, tímicitijiricavahi eta táejapasira eta evaraqui. Éma, ticajurucayareva eta enaquiruhi paesa camuriana ena ecatajiruanayare.

¹¹ Tásiha, ema Viya tjaracahenapa eta ímahaqueneanayare apaesa ímivanavayarehi íjaracasireca. Púitiripa eta víamaquenyare enaquiruvanahi nayehe ena vichamuriana, ichape eta nahasulupayachirayarehi ema Viya.

¹² Taicha eta ímicatasiravacahi ena vichamuriana, ecuchucuhavacayarehi tayehe eta nacamunuiravahi. Tásiha éna, tíápajucavainapa te nasamureana eta nahasulupayachirayarehi ema Viya.

¹³ Ichapeyarehivare eta najirauchirayarehi ema Viya, nacunachirayareva éma. Eta evapinairavahi eta ecajirisirahi eta ímeresiravahi eta esuapirahi yátupi eta véhiruhi, étaripa eta máimiturapihi ema Cristo. Tímereuchahehivare eta íachanevahi nayehe nácani ticamunuanahi.

¹⁴ Tásiha, tiyaseuchaheanainapa me Viya te nayujarasirana. Ichape eta náemunasiraheyahehi, navararayareva náimahahevane táichavenehi eta ítsirijisiravahi eta máemunasi-
rahehi ema Viya.

¹⁵ ¡Tétavicavahi eta víuricacarehi maicha éma! ¡Tájinapa viviya apanaina vácayema eta vihalupayachira ema Viya táichavenehi eta juca víjaracasí!

10

Yátupi eta masuapacarevahi eta apóstolérihi ema Pablo

¹ Nuti Pablo, yátupiquenénuhi eta apóstolenuira. Puiti nuyaseacahe eta ímatiranuína eta námunasirahehi. Nucutihí eta máemunaraivahi ema Cristo étapa eta majapanuraivahi. Etiarihipuca eti ímijachahi népiyacavahi núri te emirahu; tásiha, te nuyerehihevere, tétavicavahíji eta nuvainarajivahi mapicaurairahanuhíji.

² Puiti nutuparacahe: Étupirisamurechavaipahini te tamirahu eta nítecapauchiraheya, apaesa vahi tacuitauchava nucusemaracahehini. Ena nani náimijachahi nucutihí mácani achanetataji, étachucha nutanuca eta nuvarahaquenehi. Nucamatina vacayaresera te nítecapauchahépa.

³ Yátupi ecutiquenenuhi achanenuhi. Váhisera nácutihini ena apamuriana ajairana nápicararecanuma eta náeharaivana, navarairahi tisuapacareanayarehi.

⁴ Taicha núti vahi néhacacaimahi te nuvahuana, tájinavare nácasíñaimahi. Mararihisera ema Viya ema tjaracanuhi eta nítipajjiasiravaya nucamatinasihayare éna. Ema Viya, nájina ticachuricaimahi.

⁵ Eta tacahehi eta nucaepahirahi eta semanereana, ena ticasíñavaicanahi, tímijachavanahivare ena téchinavanahi, vahi návarahahini máimicatavacahini ema Viya. Váhivare návarahahini náesenicahini éma. Níturucayarehisera nácani muracapanereruanahi eta nasuapiraina yátupi ema Cristo.

⁶ Nucuchapahesera eta yátupina eta esuapajiraivaina. Tásiha, te nítecapa, nímiratahacava eta nítsivachirayare eta napanereruana ena masuapajirairahanahi. Te váhipuca náneuchava, némechavacayare.

Natiarihi ena tímijachavanahi apóstoleana, tímicutichavanahi ema Pablo

⁷ Éti ímijachaipapuca tájinaquenénuhi nítipajjiasiravainahini, eta ímairanuhi eta nímahisami. Németeacavare natiarihi ena ticonachavanahi machaneranihi ema Cristo. Nuvarahasera náimatínuhini eta machanerairanuhi núti apanava.

⁸ Natiarihipapuca náimijachaipapuca vahi nétupicavahi núti eta nupamisirahehi eta esuapiranuhi. Váhisera nutsirihahini taicha yátupihí nutuparahaichuhi eta návacure apóstolenuhi. Taicha ema Cristo mavarahahi nétumechaheyaere eta éhisirahi éma. Tájina vahi nucamítiequenehahémahi núti.

⁹ Numetacahehi eta juca, váhisera tácarichuimahi nípicararecahehini te juca nucartane. Tamutuyare títauchava te nítecapauchahepa.

¹⁰ Ena nacahehi eta náechajiriruvahi: “Vahi ecusuapa eta macartane. Tayanapane muracapahi eta táechajiriruvana, émasera tájina mamuracavaina. Énerichuvare muracacaema eta máechajisira” nacahepa.

¹¹ Éna náimijachahi tacarichuhi muraca eta táechajiriruvahi eta nucartane. Tímahanuanayaresera te váhipuca nusuapacarehi te nítecapauchahepa eta ara eyehe.

¹² Núti vahi nímicutichaimahi nayehe ena tímijachavanahi ticunachacareanapanahi. Ena nani énajiricavaichucha ticunachavana, tímijachavanahi nájina ticachuricanaina éna. Súnsurupichucha eta juca náichaquenehi.

¹³ Nútisera vahi nútijivaimahi nucunachavahini. Émayarehi ema Viya ticunachanuyarehi, taicha éma tíjaracanuhi eta nusuapacarevahi eta eyehe, tásihaquenehi eta níjarasirahehi eta táurinaqueneana máechajiriruvana ema Cristo.

¹⁴ Váhivare nétaviviriacavahini eta nusuapacarevahi eta eyehe. Nútihinéni nínapucahi te nítecapauchahepa te nímitucahepa eta máechajiriruva ema Cristo. Tacahe, tituparacanuhi eta esuapiranuyarehi.

¹⁵ Váhivare nucunachavaimahi tayehe eta apaematanehi násapihahipucaini. Nuvarahasera tápajucavaini eta esuapajiraivaina mayehe ema Cristo. Nuvarahavare nímitucaheyare eta apamuriana yátupiqueneana, nítauchiraina eta nucatuparahairahi me Viya. Tájina vahi nétaviviriacavahini eta nusuapacarevahi eta eyehe.

¹⁶ Núti, váhiquene nímicasiapavaimahi te jácani avasare nacametarairuquenéipa nácani apana, nucunachiravayarepuca tayehe eta táitaurevapaipa apaemataneanahi.

¹⁷ Numetacahe: Nácani tímijachavanahi ticunachacareana, yátupinahiseráini eta nacunachacarevaina mayehe ema Viya.

¹⁸ Taicha mácani achane, te yátupihí eta macunachacarevahi, vahi émajivaimahi ticunachava. Émayarehi ema Viya ticunachayarehi.

11

Ichape eta máeñamiravahi ema Pablo nayehe ena machamuriana

¹ Tiuri puiti, nuvaraha ecamichaini eta juca nucayemaqueneanayare eta eyehe. Ticuti-yare súnsurupiana. Nuvarahasera ítasamahini.

² Puiti, tétavicavahi eta néñamiravahi ícha éti, tásihaquenehisera me Viya. Nucutiripa mácani achane suiya esu amaperu eta majaneasirahí ésu. Taicha nuvaraha táurihini eta majacapiraheyare ema Cristo te jena sáchezare. Ácutihini súcani esena amaperu te sutupiruvahi eta sucaimaira, tájinasarepa mácajemahini ema suima.

³ Eta néñamiravahi eyehe, nuvarahahi ecuijahini iáquipaicava, ecucamitiequenehahini eta táurivahi eta éhisirahi ema Cristo. Vahi ecucuti eta suáquipaisiravahi esu vénarahaini Eva, maicha ema Váinaraji Satanás.

⁴ Ímicatisamurechanuhi eta esuapiravanehi ena tépiyahirahiana, apapipahi eta nametarairu tayehe eta náuchucuiraya. Núti, émahí ema Jesucristo ema néchajisihasahi. Énasera, apanahi ema náechajisihahi. Émaripa ema Espíritu Santo, váhivare émainahini náechajisihahini éna. Apanachucha ema nacasiñahi. Éti ejacaparipahi ema yátupiquenehi Espíritu Santo.

⁵ Núti németeaca vahi ticachuricanuanaimahi eta nucametarairuira ena tímijachavanahi apóstolequeneana ticametarairuriahinahíi náichava.

⁶ Tayanapanepuca táepurucarehi nayehe eta néchajisirasami, étasera eta nítipajjiasirava, tamutuhi nímatiequeneha. Ímatinuhi éti tayehe tamutu jácani nímitusiraheana níchaqueneanahi.

⁷ Etiarihiserapuca éti ímijachahi néjecapava eta némepaurechiravahi. Táitusiava népurucarehi eyehe, ichaperipahisera núrichaheripahi éti.

⁸ Váhivare nuyaseacahhipucaini eta nunicaquenerepi eta nímitusirahehi. Yátupi tíjaracuanahi ena apamuriana vichamuriana eta nénsiavayare.

⁹ Tásiha, te nítahapa eta plata, váhivare nuyaseacahehini eta nunicaquene. Taicha ena vichamuriana ticavasanahi te provincia Macedonia náimiamarecahi eta nucamunuqueneanahi. Tacahe, nujaneacavahi, vahi nuyaseacahehini éti. Váhivare nuyaseacahémahi puiti.

¹⁰ Jéhesare, nájina tiratahaimahi tihapapica eta nucunachacarevahi tayehe eta tájina nucobrachirahinehi eta nímitusirahehi emutu eti ecavasanahi te Acaya, taicha yátupihí eta nímatiequenehairahi tamutu eta yátupiqueneanahi máimiturapiana ema Cristo.

¹¹ Eta juca nucayemaqueneana, vahi ímijachaimahi étainahipucaini táichanu eta numaemunasirahénahini. Ema Viya máimatihí eta yátupirahí némunacahe.

¹² Énesera nucaheyare núti. Váhiquene nuyaseacahémahi. Nímiyanavaya eta nujaneasirava apaesa tacuija naviya eta taviuchanu nayehe ena tímijachavanahí tímíturahiana nácutinuhini eta apóstolenuirahí núti. Taicha navarahí ticunachacareanayarehí tímicutichavanayarehí eta nucunachacarevahí núti.

¹³ Éna, tépiyacavanahí apóstoleana. Tivuyarahianasera eta náitaresirahí. Váhiquenevare vanairucanaimahi me Viáquenu Jesucristo.

¹⁴ Ena nani, vahi tiáramicareana éna eta navayuaravahi, taicha ema Satanás, yátupi-quenehí náquenu éna, tépiyacavahí macutí ema ángele vanairucahí me Viya, mavairairahí tivayureca.

¹⁵ Éna nacaheyarehí ena nani mavanaranahí ema Satanás, tépiyacavanapahí pastoreana náuriqueneana. Járajapayarehísera eta sáchezare najacapirayare eta náicuñayare táichave-neyare eta juca náimiauipaisirahéhi.

Ichapemuri eta macatajivairahí ema Apóstole Pablo taicha eta macametairuirahí

¹⁶ Nuvaraha nápechava numetacahe: Vahi ecusuapa eta náimijachiranuhí máurishinu. Te etiarihipuca éti ímijachanu máurishi, ecayehe paciencia eta nuyehé. Ecamichanu eta juca nucunachiravasamipaini apaesachichainahini nácutipaini eta nacunachiravahí ena apamuriana.

¹⁷ Tájina mavanairipina ema Viáquenu tayehe eta vicunachacarevahí. Tíchanuhisera nucunachava taicha éti ímijachanu máurishinuhí.

¹⁸ Táichavenehisera eta nusamairirisirahí eta nacunachiravahí eyehe eta náitupajjiasiravahí, énenapa nucaheyare núti eta nucunachirava.

¹⁹ Éti, ímijachavahí ichape eta échemaravavacahí. Evapinavahisera eta esuapirahí eta nayaseasirahéhi ena máurishiana.

²⁰ Ecamichahivare tamutu eta napamisirahe ítaucha eta tivitacareana vanairipiana. Tiverējicaheanahí eta ecayehequeneana. Tiyuracaheana éhicavaca éna. Tasapihapa éti ecamichahí tamutu eta juca.

²¹ Núti, tétavicavahí nutsirihahí énemahinuhinahini nácahehí. Te ímijachahipuca tíurihi tamutu eta juca náichirahéhi, eperdonachanuhini vahi níchahini éta.

Ena nani ticunachavanahí eta náurivahí. Núti apanava núriha eta nucunachiravayarehí, tayanapane ímijachanupuca máurishinuhí.

²² Éna ticunachavanahí énaírahí hebreo israelítana. Núti apana hebréonuvare, israelítanuvare. Énerichuvare núti mámariequenenu ema viáchucaini Abraham, nucutirichuhivare éna.

²³ Éna, tímijachavanahí mavanarana ema Cristo. Nútisera, jéhevarequenenuhí mavanaranuhí ema Cristo. Nápapujanavahí núti eta nayehe. (Máurishinuhí eta nímaíravahí eta juca nucunachiravahí.) Jéhevare núti nápapujanavahí eta nucaemataneasirahí ema Viya, nucachuricavacahí namutu éna. Eta juca nucaemataneasirahí me Viya, témestacanuhi, témeratacanhivare. Énerichuvare ichapemurihí eta táimicapasiranuyarehini. Ena nani nánarana, vahi náichahini, nájina nacatianacavacahini.

²⁴ Tacutiguene cíncohevare nucaesta naicha ena nujaneanana israelítana te jácani nupaisiranapahí. Mapana arroba eta náestasikanuhí.

²⁵ Mapahevare tépuchiricanuanahí. Étahevare tiyucararacuanahí te márijahiana. Mapahevare térica eta pacure tíamanupahí. Tásiha, étanavare sache étanapa yati nucahehí te táinahu eta une te ichapequene mar.

²⁶ Ichapemurihivare eta nupaisiranahí. Nímahavahivare eta táínehicarevahí eta tamuracava tajunapirahí eta une te ichape cajacure. Nupicacavahivare naicha ena tíamerahiana. Tipanereuchanuanapahí ticapacanuana ena nujaneanana, énapa ena apavasanana. Tamutuhi náemauchianupahí te jácani avasare, téhepa te mávapahí apaquehe, étapa te jácani nupaisirana te une tayehe eta pacure. Énerichuvare témauchanuana ena tímijachavanahí nuchamuriana táichavenehí eta népiyaequeneanahí.

²⁷ Ichapemuri eta nucaematanerahí. Nucatajivahí muraca. Ichapemurihivare eta numacáimarasiravahí. Nucatajivahivare tayehe eta nécuava étapa eta numauneva. Ichapemurihivare eta nucamichira eta ayunanuiranuhí. Nucatajivahivare taicha eta ticasarahí. Néchurihavare eta numuiriharapi.

²⁸ Tayanapaneinesera eta nucatajivairahí ichape, nímiyanavahisera eta néñamiravahí ícha emutu eti nuchamuriana te tamutu avasareana, nuvarairahí tacuijahini tahapapiri-cahehíni tayehe eta éhisirahí ema Cristo.

²⁹ Te etiarhipuca eti vahi túmehénahini eta éhisirahi ema Viáquenu, ichaperinehi eta néñamiravahi nútí. Tacutiquene te etiarhipuca éti náimíaquipairuhehi, tétavicavahi eta nutsirirahivare, nusemasamurevarepa.

³⁰ Téhesera tatiarhipuca eta nacunachiravahi, nútí apanavare nucunachavavare. Étasera numaitupajijiasiravahi, étachucha ticunachacarehi eta nuyehe.

³¹ Émasera ema Tata Vicaiyaquene, Maiya ema Viáquenu Jesucristo, máimatíhi éma eta tatupiruvairahi eta nucayemaqueneanahi te juca nucartane. Éma, máitavacacahi eta majirauchacarevahi.

³² Tacutiquene te návíhaipahi te Damasco, ema tuparairucahi tayehe, majupahahi ema rey Aretas, máimivanerecahi ena séntinelana te tapajana tayehe eta avasare, mavarairahi ticaratacanuana.

³³ Énasea ena nuchamuriana tinacacuhanuanapa tayehe eta ichape saye túmehi, ticuchucanuanapa te ventana, ticajuchucanuanapa te tíupi enure te apachacaya eta yúchama tayehe eta avasare. Tacahehi eta núchucuirahi. Vaipa nacaratacanuhini.

12

Ema Pablo mavapuchahi tímerecava ema Viya

¹ Yátupi tájina nuvehaimahi eta nútíjivairahi nucunachava. Numetacaheyaesera eta nímairahi te nuvapure máechajisiranuhi ema Viáquenu.

²⁻³ Catorce áñoa eta táetavisiravahi eta nímairahi tíamanuanapa tímipairiricanuanahíji te anuma te mávasa ema Viya. Váhiser necha te étahipuca eta náquehe námaphi eta nuyani-rahi, te étachuchapuca eta náchaneva. Émasera ema Viya, éma téchahi eta níchararacavapahi eta mámiranuhi te mávasa anuma.

⁴ Ánaquí nusamapa eta mahu. Timetacanupa eta téchacareanahi tayumurevahi. Váhiser táisapacarehini numetajiricahini.

⁵ Étapapucaini nucunachiravahini tayehe eta nímahaquenehi nusamaquenehivare, taicha tímimatichanuhi ema Viya. Váhiser nucunachavaimahi tayehe. Nútí nucunachavahi tayehe eta numáitupajijiasiravahi. Étachucha nucasíñavaiyahi tayehe.

⁶ Yátupihinéni eta nucunachacarevahi. Váhiser nucajamuravahini, taicha tájina nímatihini nutanuca eta nacunachiranuhini ena achaneana. Nuvarahasera nanecapae-quehenehahini eta táurivahi eta nítaesirahi.

⁷ Tétavicavahi eta tíaramicare eta nímahaqueneana te anuma. Tásiha, ema Viya vahi mávarahaimahi nucasíñavavaicahini eta nímairahi. Máisaphi ema Váinarajiquene Satanás técajumachanuhi, cítirine tatiarihinahini itape tayuvaraca te neche. Taicha ema Viya mavaraha vahi nucuvayuchava eta nucunachacarevaina.

⁸ Mapahe eta nuyaseasirahi ema Viya eta macanarasiranuinahini eta nucatiruhavahi.

⁹ Émasera ema Viya, ánipa máichanuhi: “Vuíchaha nuncanaracavimahi. Nujapanuvisera. Níjaracaviyare ichape eta pitumevaya, tayanapane eta pimaitupajijiasiravahi. Taicha nuvaraha náimatiyarehi ena achaneana eta nítipajijiasiravahi piyehe” máichanupa. Eta tac-ahe, núrísamuréichucha puiti eta tamajinairahi eta nítipajijiasiravainahini apaesa máimerecavahini ema Cristo eta máíjarasiranuhi eta máitupajijiasiravahi.

¹⁰ Tásiha, nuvavinavahi puiti eta napanajisiranuhi, nucatajivairahi náicha, náumehairanuhivare táichavenehi eta mavanarairanuhi ema Cristo. Nuvavinavahivare eta numaitupajijiasiravahi étapa eta néchurisirana, taicha eta nímairavahi tamajinairahi nítipajijiasiravainahini, nútísera nusamavahi eta nutumevapaipaicha maicha ema Viáquenu.

Ema Pablo tétavicava eta máéñamiravahi nayehe ena machamuriana

¹¹ Yátupi puiti eta néchajisiavairahi nucatiuchiravahi, tímicutíjirícavaipa máurishinuínahini. Íchavenehisera éti, taicha éti tatuparacahi ecatiuchanuyarehini, váipasare nucuechajisiavahini nútí, vahi nútíjivainahini nucunachavahini. Navetijisera ena tímijachavanahi apóstoleanahíji ena éhiruanahi, jéhevare éna, tájinaquenepa nacunachacarevaina.

¹² Nímerecavahisera eta eyehe eta yátupiquenénuirahi apóstolenu eta nucaemataneasirahehi. Tayanapane camuri eta nucatiruhavana, nucamichahisera tamutu. Nímehaheripahinéni eta tíaramicareana níchaqueneanahi, maicha ema Espíritu Santo. Éta tímícaecherachanuhi eta yátupiquenénuirahi apóstolenu.

¹³ Ena apamuriana vichamuriana te apana avasareana ticajinuanahi éna eta nucamunqueneanahi. Étisera, tájina vahi nuyaseacahehini étainhipucaini eta nunicaquene, nítecahipucaini íjaracanuini. ¡Váhiser ecusema eta juca numaitcapauchirahihi!

¹⁴ Puiti nutserereacavaipa eta mapaherayarepa níteca eta ara eyehe, nupaiupiuchiraheya. Váhivaresera nácamunuimahi ítátinuhini. Váhivare étaina nutanucapahini eta ecayehequeneana. Étiqenesera nucamunuhepahi eta esuapiranuinahini. Taicha nuchichanavehehi éti. Vahi étinayare ítátinu. Núti nítátiheyare taicha núti ecaiyaquenenuhi.

¹⁵ Váhivare néñamíahemahi eta nucayehequenehi eta nítátirahéyare. Váhivare nuyacujimahi eta nucaemataneasiraheyare táurivayare eta iáchanevana. Tayanapane váhipuca ecumunanajcanuhi, nútisera tétavicavahi eta némunasirahehi.

¹⁶ Nararihivare ena téchajicanahi eta nuyeye. Ani tacahehi eta náechajiriruvahi: “Yátupi te tipaiupiuchahavi éma, váhinenicacha tiyaseacahavi eta macamunuquene. Máitucasera eta mavereasirahaviya eta viplatane” nacahehi.

¹⁷ Eti ímatihí vahi énavanerecainahipucaini ena névataruasanahi eyehe, éñainahipucaini navereacahehini nichavenénahini núti.

¹⁸ Te nuvanecapa ema Tito émapa ema macachanequenepahi, téjirapanahéanayarehi, jtájinavare mayaseacahehini éma! Taicha vicuticacahí víti eta víúrivahi eta eyehe, táchavenehi eta vémunasirahehi ichape.

¹⁹ Eti ímijachaipapuca nutanucahi núti eta nucatiuchiravayarehi eta eyehe. Váhisera tácahehini. Vahi tácamunucaréimahi eta nucatiuchiravaya taicha núti nutupiruvahi eta néchajisirahehi te mamirahu ema Viya éta pa te máijare ema Cristo, nuvarairahi tajurucahini eta táurivaina eta iáchanevana, eti némunaruqueneanahi nuchamurichichana.

²⁰ Núti, te níteca eta ara eyehe, nupicahi vahi núricaimahi ácahemahihíni eta nuchimapi-raheya: éhajiricacahipucaini, ecapinarujiricacahipucaini, esemajiricacahipucaini, íputsimuríacacahipucaini, épiyéquenerejiricacahipucaini, iúmehajiricacahipucaini, ecasiñavavairicahipucaini, váhipuca tacaquejiricacahí eta epanereruana. Te ecahehipuca, vahi iúricaimahi némecharecahehini.

²¹ Nupicahisera nátsirihacarehini núti mayeye ema Viya íchavenénahini éti, vuíchaha étupiricavahini eta nuchimapi-raheyare. Vahi nuvaraha ecaiyacanu éti enerejicavana éjcapavanahi, taicha eta ánaquiaparipahi eta émainajisiraichaha eta ecapecaturairana. Ímijanavaichucha eta esenamarahehi, éta pa eta emapicaurahivaichucha.

13

Eta máipicararesirahi ema Pablo eta táichecuaraqui eta macartane

¹⁻² Puiti mapahenapa eta néjirairaheya. Cape te nítesinehi, numetacahévanehi nútjicaruvahi, camuriripa eta nuconsejachirahehi eti éjcapavanahi. Iúrihapaini ínajica eta emaurivana. Puiti te nucartane, nápechavahi numetacahe emutu. Vaipa nucaiticaimahi nácani téjcapavanahi. Núti nétupiricavacaya.

³ Etiarihíni eti épurunuhi eta mavanesianuhi ema Cristo. Ímahayaresera ichape eta máimicatasiránuhi eta nétupirisiraheyare. Taicha éma, títapajjiacavahi eta mámecharesiraheya. Tipicacare eta máicuñaraqui.

⁴ Yátupi éma tísapavahi ticaetata, tímicutijiricavaipahi vahi macuratahahini ticatiuchava. Váhisera mánasihini máepenahini, tichavahi títareca puiti taicha eta máitupajjiiasiravahi ema Viya. Ene nucahehi núti nísapayarehi, tímicutijiricavahi vahi nucuratahairainahini. Ímahanuyaresera eta májjarasiranuhi eta máitupajjiiasirava táchavenehi eta mávahásiranuhi eta nétupiricaheyarehi taicha nucatuparahahi eta nujaneasiraheyarehi emutu éti.

⁵ Nuvaraha esamavayare étijiva, te yátupihipuca tíúrihi eta éhisirahi ema Viáquenu Jesucristo, te yátupipuca eta mávahásirahehi éma. Taicha éma mávahácavacahi namutu ena machichanaveana yátupiqueneana. Machu émepururecava eta íjarasiravahi éhica éma.

⁶ Nuvarahasera némechahe ímatinuhini yátupinahini eta mávahásiranuhi ema Cristo, jéhevere núti yátupiquenenuhi machaneranuhi.

⁷ Núti, ichape eta nuyujarauchirahehi, nuyaseacahi ema Viya eta étupirisiravayarehi apaesa tacuija eviurevaina mayeye. Ichape eta nuvarairahi íchahini eta táuriqueneana. Tayanapanerinehipuca náepurunuhini, nuvarahasera ímijanavayare éti íchayare eta táuriqueneana.

⁸ Taicha núti nutupiruvahi nicha eta táuriqueneana yátupiqueneana. Váhiquene nísapavaimahi nuhapapica eta yátupiqueneana. Eta tacahe, yátupina ésamiricava. Vaipa ecucamesa eta nápepejiricahe numetacahe.

⁹ Ichape eta ecurisamurechiranuya te yátupinapa étupiricava. Étijivainapa eratahayare ecaratacava. Vaipa nútiparacaimahi eyehe. Puiti eta nuyasearapi núti me Viya, tamutu-yarepa tichavaya eta táurivahi eta ítaresira.

¹⁰ Puiti nucajurehe eta juca carta, nucuchapavahi núti eta néjirairaheyare, támuturi-pahini étupirica apaesa tacuijahini nucucayema. Váhivare nucusemaini eyehe. Nuvarahasera nétumechaya eta iáchanevana. Étahi eta nutuparacasivanahi me Viáquenu eta apóstolenuirahi mayehe.

¹¹ Tiuri puiti, nuparapenaveana, ítátijirícavahi. Etanucayare eta táuriqueneana eta ítare-sirana. Ecurisamurechacaca. Tacuijahini eta semanerena eta eyehe. Tácuticaca eta epanereruana. Máijaracahehini ema Viya eta tanarasiraina eta iáchanevana, taicha tétavicavahi eta máemunaraivahi éma.

¹² Núti néchajicahe emutu. Nuvaraha nétserarecahevacyare táicutiarahi eta táetavisiravahi eta némunasirahehi te mavahuana ema Viáquenu.

¹³ Ani te juca téchajicaheana namutu ena vichamuriana.

¹⁴ Nuyaseuchaheparaca emutu éti me Viáquenu Jesucristo táetaviuchahini eta iúricarevaya máicha, evapinavavaréni taicha eta máetaviuchirahi eta máemunasirahehi ema Viya. Macurisamurechaheparacaini tamutu sácheana ema Espíritu Santo. Tamutupa eta néchajiriruvanahi eyehe.

Eta macartane ema Apóstole Pablo nayehe ena machamuriana ticavasanahi te Galacia, ticajare

GÁLATAS

¹ Nuti Pablo, yátupiquenenuhi mayehenu apóstole ema Jesucristo taicha manerejirunuhi. Ema Tata Vicaiyaquene ticutihí eta mapaneruhi ema Machicha eta máichuiranuhi. Puiticha émaquenehi ema Jesucristo tinacanuhi eta juca návacurehi apóstole, émarichuhi ema macáechepucasiquénehi te máecari. Vahi apanainahini achane ema tinacanuhi, émainahipucaini ena nucutiqueneanahi apóstoleana nanacanuhini eta juca návacurehi.

² Puiti nucajarehe eta juca carta eyehe eti nuchamuriana ecavasanahi tayehe eta avasareana tayeheana provincia eta Galacia. Téchajicaheana ena apamuriana vichamuriana te juca návihahi.

³ Nuvaraha macatajicahehine ichape ema Tata Vicaiyaquene, émapa ema Viáquenu Jesucristo. Nájaracahehine eta táurivaina eta epanereruana.

⁴ Ema Viáquenu tjaracavahi tépena te crusu taicha mavarahahi ticuchucuhahiviyare tayehe eta vícuñayarehine táichavene eta vipecaturana, macámítiásinaháviripahivare eta vijamurachirainihí eta tamauriqueneana tayehe eta juca apaquehe. Eta tacahehi eta mapaneruhi ema Tata Vicaiyaquene.

⁵ ¡Máichecuaraquireyarehi eta vijirauchiraya éma! Amén.

Étanarichu eta doctrina véhiruhi, tájina apanaina

⁶ Ichaperinehi eta ímpanereresiranuhi. Váhicha németeaca ene ácahehine eti éhicahine eta apanaquene doctrina. Tasapihapa esuapahi eta juca, vaipa émainahine esuapa ema Viya. Ínjicavanepa eta esuapirainihí éma. Émepururecapa eta máichuirahéhi. Tasapiha émepururecapa eta máepeninahéhi ema Jesucristo eta máemunásirahéhi.

⁷ Nutupiruva numetacahe, tájina apanaina doctrinaina tácuti eta juca véhiruhi víti. Néchahi eta juca íchararacavahi éti, nararíhi ena témejecapavachaheanahi, navarahahi nahapapicayare eta vímiturapianahi tásihaqueneanahi mayehe ema Cristo.

⁸⁻⁹ Víti vímitucaheripahi eta juca yátupiqueneana, étarichuhi eta máéchajiriruva ema Viya. Cape juca, te víavíhaichaha eyehe, vimetacahévanehi eta macatichira ema Viya eta apanapanequeneana doctrina nahapapiruanahi. Puiti nápechahevare numetacahe: Ticaticahacareya me Viya nácani nahapapica eta vímitureheanaripa yátupiqueneanahi. Nútiripa, te nápechavahívaréni níteca eyehe, apánainapáipahivarepucaini eta nímiturapiana, ticaticanuhine ema Viya taicha eta nuhapapisirainahine eta máéchajiriruvana. Téhevare máitecapucaini mácani émana máimicutichavapahine ema ángele másihaqueneánahipucaini te anuma, te mavarahahivarepuca mahapapica eta vímitureheanaripa víti, énerichuvare macatichayarehi ema Viya.

¹⁰ Nararhipuca ena témetecanuanahi nuhapapicahi eta máéchajiriruvahi ema Viya, étainahipucaini níтусihahine ena achaneana, némemunasiravainahine nayehe. ¡Tájinasera vahi nuhapapicahine núti! Nutupiruvahi eta nímituresirahi taicha nuvarahahi nucurisamurechaya ema Viya, nímerecavayarehi eta núriva eta mavanaranuirahi ema Jesucristo.

Ema Pablo tímereuchava eta táichararacavahi eta masiapirahi apóstoleyare

¹¹ Nuvaraha numetacahe eti nuparapenaveana eta juca nucametarairuirahi, vahi tásihaquénéahi te nupanereru núti.

¹² Váhivare nímitucasivainahi mayehe mácani apana achane nucutiquenehi apóstole. Émaquenehi tímitucanuhi ema Jesucristo.

¹³⁻¹⁴ Éti esamairicanuhi jácani eta níchararacavahi eta nítaresirahi cape juca násinequenehi, te étarichaha néhicahi eta nayeherepiana ena israelítana náchucanaveanainihí núti. Núti, eta nujurusirahi, nímahahi eta tacapichuirahi eta viyeherepiana. Ichapehi eta némuracachiravahi, nucachuricavacahi ena nuparajuruanahi. Nímicaucauchahi muraca, numavarairahi táemitiequenehine eta viyeherepianahi nanaquipairuanahi ena náchucanaveanaini. Eta tacahehi, ichapemurihi eta nupanajirisiravacahi ena machaneranahi ema Viya, nuvarairahi nucámítiequenehavacayarehine eta náehisirahi ema Jesucristo.

¹⁵ Námaqueneváhiséra eta manerejisiranuhi ema Viya, te vuíchaha núchuchahine te sujehe esu ticachichanu; tacahehi eta mapaneruhi eta máichuiranuyarehi, taicha eta máemunásiranuhi.

¹⁶ Tásiha, tímimatichanuhi ema Machicha, taicha mavarahahi nucametarairuyare nayehe ena apavasanana eta macuchucuirayare namutu ena tisuapana ema Machicha.

Váhisera nutanucachini nácani náimitucanuhini eta nucametarairuirayare. Nájinavare nuyasereruina.

¹⁷ Váhivare nuyanahini te Jerusalén nutanupanahipucaini ena nánapureanahi apóstoleana. Téhechucha apaquehe Arabia nucaijuhehi. Émasera ema Jesús, éma tímítucanuparacahi. Te váchupa, nuchavavarepa te avasare Damasco.

¹⁸ Te mapanaquenepa año, nupaenumavapa nuyanahi te Jerusalén, étapa nímatinehi ema Pedro. Nunasipanapa quince sache nucahehi eta mayehe.

¹⁹ Émapa ema Santiago, maparape ema Viáquenu, ema nímahaquenehivare. Énasera ena apamuriana apóstoleana, nájina nímahavacahini.

²⁰ (Puiti tímímaracanuhi ema Viya, tájina vahi népiyahiravaina eta juca nucáyemaqueneá-napahi te juca nucartane. Nutupiruvahi eta numetasirahehi.)

²¹ Tájinasera vahi nucaimitucasihini nayehe taicha nuyanavanevarepa nucaijuhehi eta te Cilicia, nánucuhapa tayehe eta Siria.

²² Tacahe, ena vichamuriana ticavasanahi te Judea, váhivare náimatinuhini taicha vahi náyerehini tayehe.

²³ Tisamairiricanuanahisera eta néquesiravaripahi. Ánipaji tacahehi eta nasamairirisi-ranuhi: “Ema maca Pablo tipanajiricahavihi cape juca viásinequenehi, ¡téquecavaripahi! Cape juca mavarahahi ticámítítequenehaháviyarehini eta juca véhiruhi. ¡Puiti émarinecha téttucaracavahi ticametairuhi eta juca véhiruhi víti!” nacahepaji.

²⁴ Tacahe, ichaperinehi eta nacunachirahi ema Viya níchavenehi núti eta néquesiravahi.

2

Ema Pablo tímereuchava eta masiapamurihairapa ena apóstoleana, tásiha natupiruva najacapa éma

¹ Catorce áñoripa eta táetavisiravahi, nupaenumavapa nápechavahi nuchava te Jerusalén. Émapasera ema Bernabé nucachanehi, émapa ema Tito.

² Taicha numetacasihini me Viya te nuvapure eta nuyanirayarehi tayehe eta Jerusalén, véchajicacayare nayehe ena tachutirihanahi. Eta nítecapirapa, viúrujavapa, énachuchasera vicachanehi ena tachutirihanahi. Tásiha numetacavacapa eta nímiturapianahi eyehe eti apavasanana étapa eta esuapirahi. Taicha nuvarahahi ena vichamuriana israelítana najacapahehini eti apavasanana vichamurianaripahi.

³⁻⁴ Te jena, natiirihini ena tépiyacavanahi vichamurianahi, tépiyahirahianapahi eta nasiapamurihairahavihi. Éna, navarahahi tipamicahavianayarehi eta vímitusirahe éti apavasanana éhica eta nayeherepiana ena israelítana. Taicha tacahehi eta náechajiriruvahi éna, itauchayarehiji eta nayeherepiana éna, váhiji tacarichuimahi eta éhisirahi ema Jesu-cristo. Navarahavare napamicayarehini eta macamarca ema Tito, eta apavasanairahi éna.

⁵ Tájinasera vahi vísapavahini nacachuriacahavihinini, taicha víti vivarahahi tacuijahini tahapapicahihinini eta éhisirahi eta yátupiqueneana téhicacareanahi.

⁶⁻⁹ Tacahe, énaripa ema Santiago, ema Pedro, émapa ema Juan, énapa ena apamuriana náiyarahana ticutinuanahi eta nupaneruruhi. Tájinavare vahi nametacanuhi eta apamuriana téchacareanahi nayehe. Étasera eta nasamiranuhi, náimativanepa eta émairahi ema Viya tituparacanuhi eta nucametarairuiraya nayehe ena apavasanana. Nucutihi eta macatuparahairahi ema Pedro máimitusirayarehi ena israelítana. Ema Viya máijaracahi eta mávacurehi ema Pedro apóstolehi nayehe ena israelítana. Máijaracahivare eta máitupajijiasiravahi. Ene nucahehi núti tjjaracanuhi eta návacurehi apóstolenuhi nayehe ena apavasanana. Tjjaracanhivare eta nítipajijiasiravahi. Eta tacahehi, náimatipa eta émairahi ema Viya tjjaracasichanuhi eta juca nítucaquenehi. Tacahe, tijupacahavianapa, núti émapa ema Bernabé. Eta juca náichirahavihi táicutiarahi eta náisapirahaviyarehi vímíyanava vímitucavacayare ena apavasanana. Éna, tímíyanavanayare tímíturacanhivare ena israelítana. (Tépurunuanarichuchapuca eta náimairanuhi. Tayanapanesera váhipuca nujacapacarehi nayehe eta apóstolenúirahi. Nútisera néchahi eta manerejisiranuhi ema Viya eta apóstolenúirayare.)

¹⁰ Tacarichu tituparacahavianahi eta vímicatasirayarehi ena páureana. Eta tacahehi puiti, nítauchahi núti eta nuvancasivahi nímicatasiravacaya ena páureana.

Ema Pablo tímereuchava eta macajachirahi ema Pedro

¹¹ Te táequenepa, te jena áñoanahi, títecapauchahavipa ema Pedro te avasare Antioquia. Étasera eta mávhairahi veyehe, téjcapavainapa. Eta tacahe, nucajachapa éma.

¹² Eta máitecapirapa ema Pedro, tájinaípa máichiravainahini eta masamiravahi eta macachanejirisiravacahi ena apavasanana vichamurianahi, tinicahi eta nayehe. Tacahe,

te jena sácheana, títecapanapa ena máemunacasareanahi ema Santiago, israelítana vichamuriahivare. Te máimahavacapa ema Pedro, titsirihapa éma eta macachaneravacahi ena apavasanana vichamurianahi. Vaipa mávarahahini macasiriquivacahini. Tipicahi eta nacaecahirahi ena tímicapicauchanahi eta nayeherepianahi ena israelítana.

¹³ Tacahe, ena apamuriana israelítana vichamurianahi, énerichuvare éna náehicapa eta máejecapiravahi ema Pedro. Térájavavanavare éna apanava. Émaripa ema Bernabé máehicavarepa eta náejecapiravahi éna.

¹⁴ Tacahe, te nímahapa núti eta náejecapiravahi, vahi táurihini eta náichaquenehi, nucajachapa ema Pedro te namirahu ena vichamuriana taicha máejequihapa eta tavanairipihí eta yátupiqueneana máechajiriruvana ema Jesús. Níchapa ema Pedro: “¿Tájaha tacayema eta pitsirihahi ena vijaneanana israelítana eta picachaneravacahi ena apamuriana vichamuriana apavasanana? Pémitisicavapapuca eta israelítavirahi cape juca pítaresirahi, táitusiava eta picachanejiricavacahi ena apavasanana vichamurianahi. Tásiha puiti, eta pímairapa náitecapirahi ena vijaneanarichu násihaqueneanahi te Jerusalén, péquecavarepa nayehe. Váipa pávaraha picachanehini ena apavasananahi vichamurianahi ticutiripahi eta vahi vichamurianainahini éna. Pivarahapuca náepiyacava israelítanáina éna apanavare” níchapa ema Pedro.

Namutuchucha tijacapacareanaya me Viya nácani navarahaya téhicanayare ema Jesús

¹⁵⁻¹⁶ Tacahe, numetacavacapa namutu eta juca yátupiquenehi: Véchahi viti eta vahi tácomesaimahi vítauchahini eta nayeherepianaini ena víachucanaveanaini. Tarataripahi eta véhisirahi ema Jesucristo, vijacapacarépa vimutu eta mayehe ema Viya. Énaripa ena apavasanana, tayanapanehi náetaviuchahi éna eta nasipecaturarivahi viyehé viti israelítana, tíujicavanayarehísera tijacapacareanaya me Viya taicha eta náehisirahi ema Jesucristo. Tayanapané vitamuturuchahipuca eta mavanairipiana ema Moiséini, tájina vahi vájacapacarémahí viti eta me Viya táicha. Vimutu vijacapacare eta me Viya táichavenechucha eta véhisirahi ema Jesús.

¹⁷ Natarihipuca ena téjicapavanahi te napanereruana, ánipuca nacahehi eta náechajiriruvahi: “Yátupipucáji eta vijacapacaréhi me Viya táichavenechucha eta véhisiraya ema Cristo, vivetijinapaserapuca tíapajucavainapapuca eta visipecaturavaya taicha vínájicainapa eta vanairipiana. Tacahe, émapapuca ema Cristo táemesiavaya eta vicepecaturavaya” tacahenapapuca eta napanereruhi. Éna, tímápachichijiruvachucha te napanereruana. Ema Cristo váhiquene émaina tásiha eta pecatuana.

¹⁸⁻¹⁹ Eta néhisirainihí apaicape eta vanairipiana, tájinachucha vahi táimicatacanuhini eta nujacapacarevayarehi me Viya taicha váhiquene étaparacaina. Eta tacahe, nínajicahi eta néhisirainihí. Nímatiripasera eta nujacapacarevarehi me Viya táichavene eta nucasiñairahi eta mayehe. Púiticha tíúripa eta nítaresirahi me Viya. Tásiha, ichapenapahini eta néjecipiravaya núti apana, te nuchavapuca néhica eta mavanairipiana ema Moiséini.

²⁰ Eta nusuapirahi eta máepenirahi ema Cristo te crusu, nujacapacaréhi me Viya. Puiti, vaipa nútijivaina necha eta nítaresirahi. Émapa téchanuhi ema Cristo tamutu eta nítaresirahi. Émapa nucasiñahi taicha yátupihí eta macasiñacarevahi taicha yátupiquenehi Machichahi ema Viya. Eta máemunasiranuhi, tímijararecavahi níchavenehi núti.

²¹ Vahi némpurecainahí núti eta máemunasiranuhi ema Viya. Nararihísera ena tímijachavanahí tijacapacareana mayehe táichavenechucha eta navarairahi náítaucha eta vanairipiana. Ena nani, tímicutijiricavahi náempurecachi eta mapanereru étape eta máemunasiravacahi. Tímicutijiricavahi náempurecavare eta máepenirahi ema Jesucristo te crusu.

3

Tacarichuchucha eta vicasiñairahi ema Jesús, vijacapacarépa me Viya

¹ ¡Páurehechapucaini, eti nuparapenaveana gálatana! Ímijachaipapuca étupicavahi eta juca ecahehi. Ínajicavanepa eta éhisirainihí eta yátupiqueneanahi. Vímimatichaheripahi eta iúricacarevahi tásihaquenehi eta máepenirahi ema Víáquenu Jesucristo te crusu. ¿Tájaha tacayema émpurecachi eta juca iúricacarevayarehini?

² Esamanuchaha, puiti nuvaraha numetacahyare. Eta mávahásirahehi ema Espíritu Santo, éta tíchahi eta éhisirahi ema Jesucristo. Vahi étainahini taicha eta ítauraivainahipucaini eta vanairipiana.

³ ¡Tétavacavapa eta esunsuvavaca éti! Te épanavapa eta éhisirahi, tájinainiripahi íchiravainahini máicha ema Espíritu Santo. Éma tétumechahehi. Púitísera éti evarahapa ínajicaya eta mávahásirahénihi, ímijachaipapuca eta ticuchucuhaheyare eta éjairavanahi.

⁴ Tamapurujinapapuca eta máimicatasirahehi ema Espíritu Santo. Németeacasera núti vuíchaha émepurecavaimahi.

⁵ Ema Viya tjaracaheripahi ema Espíritu Santo eta mávahásirahehi. Tímechahehivare eta tiáramicareana. Étaripa macatajisirahehi táichavenehi eta ecasiñavairahi tayehe eta máechajiriruvana. Étasera eta ítauraivainahípucaini eta vanairipiana, tájinainapa táimijaracahehini.

⁶ Énerichuvare macahehi ema viáchucaini Abraham. Ticasiñavahi éma tayehe eta máechajiriruvana ema Viya. Tásiha, ema Viya, ichape eta majacapirahi éma. Máemitisicahi tamutu eta máejecapiravanahi.

⁷ Puiti, yátupina ácaicutiara eta juca: Te yátupina vicasíñava me Viya, vijacapacareya mayehe, taicha vicutiyare ema viáchucaini Abraham eta macasiñavairahi me Viya.

⁸ Ema Viya mametacahi ema Abraham eta najacapacarevahi mayehe, nácani ticasíñavanayare éma. Áni macahehi eta máichirahi: “Tétavicavayare eta náuricacareyanaimahi. Ánivare tacahe eta vanairipiana. Eta tacahe, náviraichu ticaicuñaya, vahi tijacapacareanaimahi. Ánivare tacahe eta vanairipiana. Te itamuturuca eta vanairipiana, máichecuaraquireyare eta ítasesirayare táicha”. Tásiha, vímatiequeneha eta juca: Eta náitamuturusira ena achaneana, éta tavaraha eta vanairipiana. Tájina étaparacaina eta nacasiñairava me Viya. Ánisera tacahe eta Sagrada Escritura: “Nácani ticasíñavanahi me Viya, tijacapacareanahi, máichecuaraquireyare eta náitasesiraya táicha”. Tásiha, nuvaraha ácaicutiara eta juca: Eta vijacapacarevahi tásihahi eta vicasíñavairahi me Viya. Eta vítauchirapuca eta vanairipiana, tájina étaparacainahíni tayehe eta vijacapacareva me Viya.

⁹ Tásiha, viti vicasíñanahi puiti, tétavicavayarehi eta viúricacarevayare, taicha vicutinapa ema Abraham eta macasiñairahi ema Viya.

¹⁰⁻¹² Natarihisera ena tímijachavanahi tijacapacareanayare me Viya táichavenehi eta navarairahi náitamuturuca eta vanairipiana. Téjcapavanapahisera. Taicha ani tacahe eta vanairipi: “Tamutu sácheana ítauchayare tamutu eta juca vanairipiana. Te éjequiha apaesachichaina, éta tímicuñacaheyare”. Váhiquenesera naratahahini náitaucha tamutu eta vanairipiana. Eta tacahe, náviraichu ticaicuñaya, vahi tijacapacareanaimahi. Ánivare tacahe eta vanairipi: “Te itamuturuca eta vanairipiana, máichecuaraquireyare eta ítasesirayare táicha”. Tásiha, vímatiequeneha eta juca: Eta náitamuturusira ena achaneana, éta tavaraha eta vanairipiana. Tájina étaparacaina eta nacasiñairava me Viya. Ánisera tacahe eta Sagrada Escritura: “Nácani ticasíñavanahi me Viya, tijacapacareanahi, máichecuaraquireyare eta náitasesiraya táicha”. Tásiha, nuvaraha ácaicutiara eta juca: Eta vijacapacarevahi tásihahi eta vicasíñavairahi me Viya. Eta vítauchirapuca eta vanairipiana, tájina étaparacainahíni tayehe eta vijacapacareva me Viya.

¹³ Ánivare tacahe eta Sagrada Escritura: “Mácani achane ichape eta maviureva, ticaeta-tacasiyarehi te yucuqui. Eta táicutiarahi eta máicuñasirayare ema Viya eta máchaneva”. Viti achaneana, ichape eta vícuñayarehíni taicha eta vímaitauchirahi tamutu eta vanairipiana. Émasera ema Jesucristo, tépeninahavíhi te crusu, tamuriasirahi tamutu eta vícuñayarehíni víti.

¹⁴ Éma máichahi eta juca, mavarairahi eta iúricacarevayare eti apavasanana táichavenehi eta ecutirahi ema Abraham eta macasiñairahi ema Viya. Puiti, tétavicavahi eta viúricacareva vimutu, taicha tiávahácahavihi ema Espíritu Santo máijararuhavihi ema Viya táichavenehi eta vicasíñairahi ema Jesucristo.

Tájinachucha tájaracahavi eta véhisirahi eta mavanairipiana ema Moiséini. Macarichu ema Viya tjaracahaviya eta viúricacarevaya.

¹⁵ Nuparapenaveana, nuvaraha nímicutiarachináheyare eta juca. Te matiarhipuca ema achane, te tépiyarecáhi tratu mayehe ema apana achane, náfírmachayarehi eta natratunehi. Tásiha, náfírmacharipa eta natratunehi, vaipa táuricaímahí nacaepaha eta tacajuquenehi. Nájinapavare hitapapicaimahi.

¹⁶ Ene macahehi ema Viya eta matratunehi mayehe ema Abraham. Ani macahehi: “Níjaracaviyare píti eta piúricacarevayare. Énerichuvare níjaracayare eta máuricacarevayare ema piámariéqueneyare” macahepa ema Viya. Tacahe, émanarichuhi ema mámariequenehi ema táimijarechaquenehi eta matratune, vahi námutihíni ena nasimutuqueneanayarehi mámariequeneanayarehi ema Abraham. Émahí ema ticaijarehi Cristo.

¹⁷ Tiuri puiti, nuvaraha nímicacacherachaya eta eyehe: Eta juca matratunehi ema Viya mayehe ema Abraham, mafírmachaquenehi eta máijarasirayare eta náuricacarevaya nácani ticasíñavana eta mayehe. Étasera eta táetavisiravahi eta 430 áñoripahi, te májuchapa ema Moiséini eta vanairipianahi, vahi macaepahahíni ema Viya eta matratunehi, váhivare máitsivachahíni eta máijarasirayarehi ema Jesús, mámariequénehi ema Abraham.

¹⁸ Ema Viya mametacahi ema Abraham eta máijarasirayare eta máuricacarevayare, taicha eta máemunasirahi éma. Ene vicahehi víti. Ema Viya tjaracahaviyare eta viúricacareva taicha témunacahavihi. Eta viúricacarevaya, vahi étainahíni eta vítauchirainahípucaini eta vanairipiana.

19-20 Etiarihipuca eti evaraha eyaserecanu, ánipapuca ecaheya: “Te yátupipuca vaipa étaparacaina eta vítauchiraina eta vanairipiana, ¿tájahasera puca tacayemahi eta mavanesirahi ema Viya májucha ema Moiséini eta juca mavanairipiana?” Tiuri, puiti numeta-caheya: Yátupi ema Viya máimivanerecahi ema Moiséini májucha eta vanairipiana, taicha mavarahahi máimimatichayare ena achaneana eta tamaurivahi eta pecatuana. Téhesera te títecapapa ema Cristo, vaipa táimiyavahini tasuapacarehini eta mavanairipianahi ema Moiséini. Arairupa tamutu eta véhiruhi maicha ema Jesús. Yátupi ema Viya matupiruvahi eta máechajisirahi ema Abraham. Vahi máimivanerecahini ema Viya, émajacarúvahi éma, eta máechajisirahi. Émasera ema Moiséini macaimitucasiquenchucha nayehe ena ángeleana.

Eta mavanairipiana ema Moiséini tivanecahavi vahi vicuquicha eta pecatuana taicha tíñehicarehi eta júcana mayehe ema Viya

21 Puiti németeaca etiarihichaha eti ímijachahipuca tacarichuhi téhicacarehi eta vanairipiana. Esamanuchaha. Váhiquene étaimahi vájacapacarehini eta me Viya. Váhivare étainayare ticaitarecaviyare.

22 Esama eta juca máechajiruvahi ema Viya eta te Sagrada Escritura, ani tacahe: “Náicuhirichuhi eta náicuñayarehi namutu ena achaneana taicha eta napecaturanahi” tacahepa. Jararihisera eta víuchucuirayare taicha tíjaracavahi ema Viya ticuchucuhaviyare vimutu viti vicasíñanaya ema Machicha Jesucristo.

23 Ánaquiaparipa eta tacaratasiravacahi eta mavanairipiana ema Moiséini nayehe ena israelítana náchucanaveanaini núti. Vahi táisapahini tasimutuhichaini eta napecaturana. Tiámainucavapa te títecapapa ema Jesucristo, émapa tímítucahavahi eta arairuyarehi eta véhiruyare.

24 Táitaurevaquene eta mavanairipiana ema Moiséini eta típcararécahávihi tayehe eta táíñehicarevahi eta vicepacaturairana. Éta, tétupiricahavihi tacutihi mácani profesor eta máetupirisiravacahi eta napanerurana ena máimíturana. Ene tacahehi eta táechapajirisi-rahavihi eta mavanairipiana ema Moiséini. Púitiserá eta máitecapiraipahi ema Jesucristo, émapa véhicayare, víjacapacarénapa me Viya taicha eta vicasíñairahi ema Jesús.

25 Púiticha, émainapa véhicayare éma, vaipa étaimahi véhica eta mavanairipiana ema Moiséini.

26 Puiti, eta ecasiñairapa ema Jesucristo, machichaheripa ema Viya.

27 Puiti, eta ecaicachasirahi te máijare ema Jesucristo, tiávahácaheripa éma, éti ecutinapa eta máurivahi.

28 Tayanapane apavasasajuecuhehi éti; tayanapanehivare ecasiriquíquijíhi eti ajairana, ena esenana; tayanapanehivare músuanapuca, líbreanapuca. Téhesera te mamirahu ema Viya, étanarichuhi eta vímahi.

29 Puiti machichaheripa ema Cristo; tásiha, ecutiripa mámariequenehénahini ema Abraham. Ímaequeneharichucha eta matratunehi ema Viya eta máijarasiraheyare eta iúricacareyare táicha.

4

1-2 Esamanuchaha. Nuvaraha nímicutiarachináheyare. Te matiarhipuca ema achane camurihi eta máimahaqueneana te mapena, te matiarhipuca ema machicha, téhesera te amaperurichaha éma, natiarihiyarehi ena téchapajiricanayare, énapa ena tímítucanayareva. Vahi náisapaimahi mamápachichijicaimahi eta máimahaqueneanahi ema maiya, tayanapane émahinéni ticayeheyare tamutu. Tiámainucavasera te máimahapa ema maiya eta máechemarávahi ema machicha, máisapainapa eta máemamaca eta máimahaqueneanahi.

3 Ene vicahehi víti cape juca viásinequene te vuíchaha vímatihini ema Cristo, vicitinihi ena amaperuana. Tipamicahavianahi véhica eta nayeherepiana ena viáchucanaveanaini.

4 Émasera ema Viya, te máimaha tiuri eta táitauchiravayarepa eta mapaneruhi, máevatacapa ema Machicha te juca apaquehe. Ema Jesús, tiáchanehavapa te sujhe esu maena. Eta máchusirahi, vivasimahi eta vicaqueherahi viti achaneana. Eta majurusirahi, ticaravahupa eta veyeherepiana viti israelítana.

5 Eta tímitecahi éma, mavarahahi ticuchucuhaviyare viti achaneana. Mavarahahivare vimutu víjacapacareyarepa me Viya, machichahaviyarepa.

6 Puiti, eta machichairaheripa ema Viya, tíjaracaheripa ema Espíritu Santo tiávahácaheripa te esamureana. Émapa témechahehi mayehe ema Viya, tímítucahepa eta eyujarauhichiravaya: “Tátachicha Vícaiyaquehe” ecahenapa.

7 Tacahehira eta machichairaheripa, vaipa ísapaimahi nácani napamicahéhini tayehe eta nayeherepiana. Tíjaracaheripa ema Cristo eta iúrivaya, iúchucuirayare máicha.

Ema Pablo, nahapasamurechahi ena machamuriana

⁸ Cape juca iásinequenehi éti, vuíchaha ímatihini ema Viya, váhivare epicauchahini éma. Énachucha epicauchavacahi ena esiñarajiana. Tájina eratahaimahi émitisica eta eyujarauchirahi tayehe. Éna, vahi yátupinahini víyanainahini, váhivare távahácavacaimahi eta máchaneva ema Viya.

⁹ Puitisera, ímatipa ema yátupiquenehi Viya. Tásiha, énerichuvare éma tímatihevacapa, esamacapare mayehe, taicha machichaheripa. Tásiha puiti, ¿tájaha tacayema evarahavarepachavayare eta ecasiñayare eta esiñarajiana? Eta ecasiñasanihi, tájina vahi tisamaheanaimahi, váhivare tímícatacaheanaimahi tayehe eta panererucana. ¿Tájaha tacayema ísapava napamicahé eta ítauchira eta nayeherepiana?

¹⁰ ¿Tájaha tacayema enasirichuhi epicaucha eta piéstamuhuana, étapa eta aracherumuhuana caje?

¹¹ ¡Ichape eta néñamiravahi eyehe! ¡Tájuricati támápurujipahi eta juca nímitusirahehi!

¹² Esamanuchaha, nuparapenaveana. Nuvaraha vácuticacahini eta vípanereruana. Váhini vicuehicaini eta nayeherepiana ena achaneana. Németeaca esuapanu taicha vahi eyacujíequenehanuhini.

¹³ Éti etupiruvahi ejacapanu cape te nítecaínapa eta ara eyehe. Écharichuhi eta nucajumairapahi te nítecapauchahepa. Etupiruvahisera esuapa eta numetarairuhi eta eyehe.

¹⁴ Vahi eacacahinuhini eta nucajumairapahi. Váhivare épurunuhini. Tiúrihi eta ejacapanuhini tímícutijiricavanehi ángelenuinahini, Crístonuinahipucaini.

¹⁵ Ichape eta iúrisamurevahi te jena sácheana eta návihairahi eyehe. Nímatihi tétavicavahi eta émunasiranuhi. Te nucamunuvahi, evarahahi íjaracanu eta ecayehequeneana. Tájina éñamahini. Ichape eta nucunachirahehi. Tacahe, máejeha néchajisiháhe eta émunasiranuhi.

¹⁶ Eti ímijachaipapuca nucatichirahehi eta numetasirahehi puiti eta juca yátupiqueneana.

¹⁷ Ena nani téchapajiricaheanahi, váhisera tátupiruvahini eta náemunasirahehi, navarairachucha típichisacaheanayare apaesa vahi ecusuapanu nútí, eta vaípa ecuehicanuhi. Navarahahivare éhicayare eta nayeherepiana apaesa énaína échapajiricyarehi.

¹⁸ Tiuri, nútí vahi nucaticha eta ítairaina ena apamuriana achaneana. Taurisera eta náemunasiráhena tácuti eta némunasirahehi nútí. Éti apanavare evapinavayare tácutirichu te nutiaríhíhi eyehe.

¹⁹ Nuchichanavechichana, tétavicavapa tacativa nusama taicha eta ímipanererésiranuhi. Ticutirinehi súcani esena ticatiruhapa, taicha ticatíhi susama eta amuya. Ene nucahehi nútí eta nucatísamureravahi, néñamiravahi icha éti. Nuvaraha ácutini ema Cristo eta máurivahi. Tiámáinucava te nímaháhepa ecutinasipa éma eta máurivahi, núrísamurenapa ícha.

²⁰ Eta tacahe, nuvarahanecha níjahúchavahini nítecapauchahe. Nútíjucaruvainapáini néchajiricavahini eta eyehe eta nímitusirahenahini. Ichapemuríhi eta ímipanererésiranuhi.

Éma Pablo máimicuticha ena apinana machichana ema Abraham

²¹ Éti evarahapa éhica eta mayeherepianaini ema Moiséini, puiti nuvaraha níminicapaequeneháheya eta táechajiriruvahi eta Sagrada Escritura mayehe ema Abraham.

²² Táechajisihahi éma, apinanairahi ena machichanaveana ajairana. Éma máinápurehi machicha ticajarehi Ismael, esu maena ticajjaru Agar. Éma máequereruhi machicha ticajarehi Isaac, esu maena ticajjaru Sara. Esu Sara, mayenaquenehi ema Abraham. Esu Agar, suvanarahi esu Sara.

²³ Esu Agar, araitanaichahahi ésu, te sucachichainapa ema Ismael. Ésusera esu Sara macheruhi eta sútaesirahi. Étasesa eta máitupajjiasiravahi ema Viya, májjaracapa ema suchichahi Isaac. Taicha ema Viya máechajicahi ema Abraham, ánípa macahe: “Esu piyena Sara ticachayahare. Ajairayare ema suchicha”.

²⁴⁻²⁵ Puiti, nuvaraha nímicutiarachinaheya nayehé ena nani apinana esenana. Esu Sara, tájina suímatiyahini eta vanaracacare, nájina nahapapiricahini ésu. Ene vícahehi víti eta véhisirahi ema Cristo, nájina tihapapiricahavimahi. Vahi suácutíhini esu Agar, tapamicahi eta suématanerepi taicha sirvientáhi ésu. Ene nacahehi ena ísraelítana náchucanaveanaini nútí, napamicasivahi naicha tayehe eta nayeherepianaini. Étarichuhi eta vanairipiana májuchaqueneanahi ema Moiséini te mávihalpahi eta te anuquehe mari ticajarehi Sinaí, táupahiva eta provincia Arabia, návasahi ena suámariequeneanaini esu Agar. Puiticha ena nujaneeana tachichanaveanahi eta Jerusalén nanasirichuhi eta tapamisiravacahi eta vanairipiana.

²⁶ Jararihisera eta apanahivare avasare ticajjare Jerusalén, tiávihahi te anuma. Víti tachichanaveanahi. Vaípa vítiparacainahini tapamicahavíhini eta vanairipianaini.

²⁷ Éma Viya máechajisihahi eta te Sagrada Escritura eta juca arairu Jerusalén. Máimicutichinahí esu ésuna esena. Ánípa macahe: “Pítí esena macheruvíníhi eta pítaesirahí, tájina

vahi pímatihini eta tacativa eta amuya. Puítisera tétavicavainapa eta piúrisamurevaya. Vaipa pánasimahi macheruvimahi taicha nárajapainapa ena pichichanaveanaya nijararuviyare núti. Picachuricainapa nácani esenana ticachicharahiana” —macahepa ema Viya.

²⁸ Nuparapenaveana, viti véhicanaahi ema Jesus, vítira tachichahavianahi eta arairu Jerusalén, taicha vituparahaichuhi eta tachichairahaviyare tacuti eta sucaturahairahi esu Sara mayehe ema Viya, eta suchichairayare ema Isaac.

²⁹ Tacahe, ema Ismael, suchicha esu Agar, macatianacapa ema amuya Isaac, ema suchicha esu Sara máijararuhi ema Espíritu Santo. Puíticha, tanasirichuhi eta nacatianasi-rahavihi ena téhicanaahi eta vanairipiana vimutu viti mávaháruanahi ema Espíritu Santo.

³⁰ Ánivarepa tacahe eta Sagrada Escritura: “Pivaneca esu Agar émapa ema suchicha, nayana náuchuca eta piyehe. Taicha vahi táuricahini mavehahini eta pímahaqueneana te táitecapapa eta pépeniraina. Macarichuyare ema pichicha suyehe esu piyenaquene tivehayare tamutu” tacahepa.

³¹ Nuparapenaveana, ene vicahehi víti. Vahi vácutihini ema suchicha esu sirvienta. Vicutihí víti ema Isaac eta tamajinairahi eta vipamicasivainahini eta vítauchiraya eta vanairipiana, maicha ema Jesús.

5

Vímivanavachucha véhica ema Jesús. Vahi vicuehica eta mavanairipiana ema Moiséini.

¹ Puiti nuvaraha yátupina ácaicutiara eta macatiuchirahehi ema Cristo, eta vaipa étapara-cainayare ítaucha eta vanairipiana. Váipavare ecuisapava te návirachupuca napamicaha, taicha ticajerayare eta ítauchiraina, machu ajirehéna táicha. Étipasera tacamunu étumechava te nayehe ena nani.

² Nuti Pablo nutupiruva numetacahe: Te ísapavapuca namarcatchahe, tímicutijiricavahi tépurucarehi eyehe ema Cristo. Tímicutijiricahivare vahi márataha ticuchucuhahe éti.

³ Énerichuvare numetacahe: Namutu nácani ajairana tísapavanayare ticamarcana, tacamunuhi náitauchayare tamutu eta vanairipiana. Tájina ánichichaimahi náejequihaimahi éta.

⁴ Eti enerejiruvana éhica eta vanairipiana, ímjajachaipapuca ejacapacareipa mayehe ema Viya. Émepururecaripasera eta máemunasirahehi ema Viya. Émepururecavivare eta máimicatasirahehi ema Cristo.

⁵ Vítisera viti vicasíñanahi ema Jesucristo vicunearipa eta majacapirahaviya ema Viya máichavenahi ema Espíritu Santo eta mávahásirahavihi.

⁶ Eta mávahásirahavi ema Jesucristo, vahi étaparacaimahi eta vicamarcapucaini. Tacarichu ticamunucarehi eta vicasíñairayare yátupina éma, vémunarahinapa eta vítare-siraya.

⁷ Éti, iúrinipahi eta éhisirahi ema Jesús. ¿Tájahasera puca tacayemahi eta evarairahi ecainajiruvu? Ísapavayarepa tiyurucaheana, tímijnajicaheanayarepaini eta yátupiqueneanahi.

⁸ Éti máichuhaqueneanarichuhi ema Viya eta éhisiraya eta yátupiqueneanahi. Váhiquene mávarahahini ísapavahini nácani nahapapicahéhini.

⁹ Échapavaicha nayehe ena tiyururahiana, machu napareacahe.

¹⁰ Nútisera nucasíñavahi eta me Víáquenu eta mamaisapiraheyare ínajicava. Németeacahi vahi ínajicaimahi eta nímiturapianahi. Émasera ema Viya téchahi eta juca náicuñayare nácani tivarahanahi tihapapicahéana.

¹¹ Esamanurichuhi, eti nuparapenaveana. Natiarihhipuca nácani tépiyaequenehanuanahi eta nupamisirahehi ecomarca eti nuchamurianahi apavasananahi. Étasera eta nímitusirahehi, tájina váhiquene nupamicahéhini eta ecomarcairayare. Nasapihapa ena nujaneanana israelítana tipanajiricanuanahi taicha vahi nupamicahéhini ecomarca. Étara tímíyusemacavacahi eta nasamirahi eta nucametarairuirahi eta viúchucuiraya táichavenahi eta máepenirahi te crusu ema Jesús.

¹² Ena nani tipamicahéanahi ecomarca, ¡náechaticavaichaha énajivaina! ¡Nuvarahasa yátupinapaini náechatihicavaini!

¹³ Taicha eti nuparapenaveana, vahi étaina tímichuhahehi mayehe ema Viya eta éhicayare eta mavanairipiana ema Moiséini. Váhivaresera étijiricavaimahi íchayarehi eta evarahaqueneanahi tauriqueneana. Ema Viya tíchuhahehi, mavarairahi étijivaya ítátijiricayarehi taicha eta émunasiracainahi.

¹⁴ Ema ticavanairipi, ánipa macahe: “Pémunaca ema piparaepiya tacuti eta pémunasiravahi píti” macahepa. Te vítauchapuca yátupi eta juca mavanairipi, vahi tácajera eta vítauchiraina jácani apana vanairipi.

¹⁵ Vahi táurica ecaticahajiricahini. Váhivare táurica ecatianajiricahini, machu étijivaina ecamitieuenehacaca.

Ena Espíritu Santo tímícatacahavi eta vahi vicusuapa eta tajamurachaqueneanahi eta viáquehe

¹⁶⁻¹⁷ Esamanuchaha. Ena Espíritu Santo mavaraha tímícatacahavi eta vahi vicusuapa eta tajamurachaqueneanahi eta viáqueheana. Étasera eta viáquehe vahi táisapa eta víchiraina eta táuriqueneana. Étachucha tavaraha vicha eta tajamurachaqueneanahi. Eta tacahe, ichapemurihi eta tacanarairahi ena Espíritu Santo. Tacahe, nécatíacahecha puiti eta esuapirainai cha eta mavarahaqueneanahi maicha ena Espíritu Santo eta eyehé.

¹⁸ Eta tacahe, éti, te émainapuca ena Espíritu Santo tímítucahe, máejeha eta íchiraina eta táuriqueneana. Vahi étaparacaimahi eta episira eta ícuñayarepuca, táichavenehi eta jácani éjécapiravanapuca tayehe eta vanairipiana.

¹⁹ Tímaticareanahi eta tamauriquenehi eta náchaqueneana ena tisuapanahi eta tavarahaquenehi eta náquehe: Navehapa esu apana esena, ésupa esu esena suvehapa ena apana achane. Ena amaperuana náichahi eta natuhusivanahi. Nararihi ena tivehacacananahi ena nacutiqueneana ajairana. Tavayuasiravacahi eta najamurarairavanahi.

²⁰ Natanucahi eta nasiñarajiyare. Nacaravahuhi eta iápemarecáre. Ticitianarecanahi tisemacacananahi. Téteajiricacananahi. Apaesarichu nacamunu tisemanaripavare. Énachucha navaraha tíducavana, nacachuriaracapa mácani achane. Típutsimuríávanapa nayehe nácani apamuriana. Vaipa navaraha típauchacacana.

²¹ Ticapinarucacananapa. Ticapahianapa. Ticavaharasianavare. Piéstamareana. Tamutuchucha naicha eta tájiparacana. Puiti numetacahevare nápechava, tacutihi eta numetasirahehi cape juca viásinequenehi. Vahi títujicavanaimahi tisiapaná te mávasa ena Viya ena tíchanahi eta juca tamauriqueneanahi.

²² Vítisera, tiávahácahavihi ena Espíritu Santo. Te vísapa éma, tíjaracahavihi eta vémunaravaya. Viúrisamurerecavayare, tinaracainapa eta vipanereruana máicha. Tíjaracahavi eta vícayehera ya paciencia. Vijapanurahiya máicha. Vicajiravayareva máicha. Vítaurahiya. Vétaviuchaya eta viúrivayare. Tímícatacahaviya eta vijaneasiravaya apaesa vahi vicuquicha eta tamauriqueneanahi.

²³ Te vítauchahi tamutu eta júcana, vicurisamurechahi ena Viya*.

²⁴ Tacahe, viti véhicanaripa ena Jesucristo, vaipa víchaimahi eta tamauriqueneanahi tajamurachaqueneanahi eta viáquehe.

²⁵ Tásapihapapuca, eta mávahásirahaviripa ena Espíritu Santo, vísapavaya vámutu eta mavarahaqueneana máichayare te viáquehe.

²⁶ Vaipa táuricahini ecasiñavavaichini ecapinarujiricacahipucaini. Váhivare etanucaimahi eta semanere mayehe mácani echamuri.

6

Vímícatajiricacayare

¹ Nuparapenaveana, te natiarhipuca ímaha téjécapavanahi ena vichamuriana, econsejachayare éti ímatiequeneharipa maicha ena Espíritu Santo. Táurisera eta échajirisiraina. Ecauneuchava éti apanava, machu iáquipaicava tayehe eta máquipaisiavahi ena echamuri.

² Ímicataca eta ecatiuchiravaina eta jácani íchararacavanahi. Ene tacahehi eta itauchirahi eta mavanairipi ena Viáquenu Jesucristo, étaripa eta vémunasiracacayarehi.

³ Taicha nararihi ena tímijachavanahi vahi tiáquipaicavanaimahi tayehe eta pecatuana. Vahi eucache éti. Vahi tacaemuñavacarehini, taicha eta juca vahi tánecapácare.

⁴ Váhivare tácaemuñavacare vácachepucaini: “Núti, váhirichu nusipecatúra. Núripána nayehe ena apamurirana”. Te viúrihipuca, vimatinairayarechucha. Vítí véchinavahi eta viúrivahi eta vítaresirahi.

⁵ Véchaquenevapáchupa vítí eta vítaresiraya mayehe ena Viya.

⁶ Nutuparacache eta apana. Ecajiyare eta ímahaqueneana mácani tímítucahe eta máechajiriruva ena Viya, taicha eyeherehi eta máimiturapiana eta tíurichaheherehi.

⁷ Numetacahevare eta apana. Nuvaraha étupiricaya eta epanereruana. Machu ecatianaca ena Viya. Taicha te icha eta pecatuana, yátupiqueneyare eta ecamítiequenehavayare.

⁸ Te icha eta tájiparácana tavarahaqueneanahi eta iáqueheana, étarichuhi ticamítiequenehavayare eta ítaresirana, tímicuñacahehereva. Téhesera icha eta táuriqueneana mavarahaqueneanahi ena Espíritu Santo, yátupína táurina eta ítaresira. Ímahayareva eta iúchucuiraya, máichecuaraquirénapa eta iúricacarevaya.

* 5:23 Ena Pablo te mayeherepi eta máechajiriruvana, ani macahe: “Tájina jácani vanairipi tapamicahavihihi vahi vícha eta juca táuriqueneana”. Étasera eta macayemaquenehi, ani tacahe: “Vicatuparaha víchayarehi tamutu eta juca táuriqueneana”.

⁹ Eta tacahe, vahi vicucainajiruva eta víchirahi eta táuriqueneana. Váhivare vicuyacujieque-nehava eta vicuchapirahi eta vícuchihi mayehe ema Viya te táitecapapa eta jena sáchezare májjarasirahaviyare.

¹⁰ Táitusiava, te tatiarihinapuca eta vicamunucarevana nayehe ena achaneana, te vímaha-hipuca eta nacamunuiravahi, vítijivayare víchayare eta táuriqueneana nayehe. Tavetijipa te énahipuca tipauchahavianahi ena víchamurianahi tayehe eta juca véhiruhi, vicajiyarehi éna.

Eta táichecuaraqui eta máechajiriruva ema Pablo

¹¹ Ímaha ichapevacanecha eta juca nuletrana. Nuvahurupajipa núti eta juca nucajurei-rahehi éti.

¹² Ena nujaneanana israelítana, tétavicavahi eta nasemanevahi viyehe viti vicameta-rairuhi eta viúchucuiraya táichavenehi eta máepenirahi ema Cristo te crusu. Tásiha, ena nani ticamesajiricaheanahi navaraha ecamarcaya, éna navaraha témemunacavanayare nayehe ena nujaneanana, apaesa vaipa nacupanajiricavaca. Navaraha nahapapicayarehi eta nasemaneva.

¹³ Navarahahivare ticunachavanayare eta nacamesairahehi ecamarca te iáquehe, náimiturehéna éti eta éhisiraina eta vanairipiana. Énayapasica vahi náitauchahini támutuhini eta vanairipiana.

¹⁴ Nútiserá, eta nítaresirahi, nuvavinavahi ichape maicha ema Jesucristo, máepeninanuhi te crusu níchavenehi núti. Tacahe, núti apana nínajicaripa eta néhisirainahini eta tayehe-repiana eta apaquehe. Vaipa nútiparacaina tayehe, taicha eta máepenirahi níchavenehi núti.

¹⁵ Eta mávahásirahavihi ema Jesucristo, tamuturipa arairuhi eta vítaresira. Apanapa eta viyeherepiyare. Vaipa étaparacaimahi eta viyeherepiana ichasiqueneanahi, váhivare eta vicamarcapucaini te viáquehe.

¹⁶ Éti, te esuapa eta juca nímiturapianahi eyehe, nuvaraha májapanuhehini ema Viya, májjaracahehini táurivaina eta epanereruana taicha eti yátupiquenehi machanerahehi ema Viya.

¹⁷ Tiuri puiti, németeaca núti tájina táeñamavacarehíni eta esuapajiravahi eta nuyehe, váhivare ísapavahíni ena nácani ticamesajiricaheanahipuca éhica eta nayeherepiana. Núti, yátupiquenenuhi apóstolenuhi mayehe ema Viáquenu Jesús. Eta juca nujaranahi te náquehe, éta tímereuchanuhi eta yátupiquenéráhi eta nucaemataneasirahi éma.

¹⁸ Nuparapenaveana, nuyaseuchaheparaca emutu éti me Viáquenu Jesucristo, táetaviu-chahini eta íuricacarevaya máicha.

Tamutupa eta juca néchajiriruvahi eyehe.

Eta macartane ema Apóstole Pablo nayehe ena machamuriana ticavasanahi te avasare Efeso, ticajare EFESIOS

¹ Nuti Pablo, mayehenuhi apóstole ema Jesucristo, taicha manerejirunuichuhi ema Tata Vicaiyaquene, navarairahi nimitucaya ena achaneana eta máechajiriruvana. Tásiha puiti, nucajurehe eta juca carta eyehe eti nuchamuriana ecavasanahi tayehe eta avasare Efeso, taicha éti machaneraheripa ema Viya, táuriquenehi eta éhisirahi ema Jesucristo.

² Nuvaraha macatajicahehine ichape ema Tata Vicaiyaquene, émapa ema Viáquenu Jesucristo. Nájaracahehine eta táurivaina eta epanereruana.

Tétavicavahi eta viúricacarevana táichavenehi eta viúrujasirahi ema Jesucristo

³ Núti nucunachaparaca ema Viya, ema Macaiyaquene ema Viáquenu Jesucristo taicha ichape eta máimicatasirahavihi táichavenehi eta viúrujasirahi ema Cristo. Puiti tachichahaviripa eta anuma. Ichape eta viúricacarevahi maicha ema Espiritu Santo.

⁴⁻⁵ Acane, te tamirahu eta táepaniravapa eta apaquehe, ema Viya tétavicavahi eta máemunasirahi namutu ena achaneana natiarihiqueneanayarehi. Tásiha, émajivapa manacahi eta mapanereruhi eta mavarahaquenehi, étarichuhi eta majacapirayarehi namutu ena ticasañavanayare mayehe ema Machicha Jesucristo. Eta viúrujasirayare ema Jesucristo, yátupiqueneharehi machichahavi, matapiravarehaviyarehi te mamirahu, sántohaviyarevare.

⁶ Taicha mavarahahi vijirauchayare éma, vítsirjicavayarehi eta táetaviuchirava eta máemunasirahavihi. Mavarahahivare ichape eta viúricacarevana táichavenehi eta viúrujasiraya ema máemunaruquene Machicha.

⁷⁻⁹ Tásiha ema Viya, tíurihi eta máimaira, máimercahi eta máemunasirahavihi ichape. Tíjaracahavihi ema Machicha tépeninahaviyarehi eta macaepahairayare eta vipecaturana, viúchucuhayarehi máicha. Énerichuvare tíjaracahavivare eta véchemaraivaya vímatiequenehairaya ichape, taicha tímítucavahi eta mapanereruana. Váhisera máimercavanehine eta juca mapanereruanaahi acane; tapaemunava te tíucupaica ema Machicha. Tivapinavahi éma eta máitauahiraya eta mapanereruanaahi ema Maiya.

¹⁰ Tamutu eta juca mapanereruanaahi títauchavayarepahí, jácane tatuparaquipahi. Te jena sácheyare manerejicaripa, ema Viya manacainapa ema Machicha Jesucristo aquencacueneyarehi, téchayarehi tamutu eta táicharacavana. Nasuapayarehiva namutu ena tíavihanahi te anuma, énapa ena tíavihanahi te juca apaquehe.

¹¹ Eta acane te tépanavainapa, ema Viya máetupiricapa eta mapanereruhi. Vahi máejequihahine. Tásiha, manacapa eta mavarahaquenehi. Acane tinerejicahavihi machichahaviyarehi vimutu viti viúrujicanayarehi ema Jesucristo, mavarairahi tíjaracahavi eta vícuchianahi.

¹² Viti vínapuicanahi véhica ema Cristo, mavarahahi tíuriyare eta vítaresiraya, apaesa nacunachayare ema Viya ena apamuriana achaneana eta máimicatasirahavi ichape.

¹³ Tacutíquene éti, te tínapucainapa esama eta máechajiriruva ema Viya eta mavarairahi ticuchucuhahe, enévanehi éhichehi ema Cristo. Tásiha, eta iúrujasiraipa éma, tíaváhacahe-ripavare ema Espiritu Santo. Émapa títametacahe eta machichairahapa ema Viya. Ema Espiritu Santo, ema vituparahahi vimutu viti vicasañanahi ema Cristo.

¹⁴ Eta mávahásirahavihi éma, títametacahaviparaca eta vijacpiraya eta vícuchianahi mayehe ema Viya te táitecapapa eta viúchucuiraya viti machichanaveanahi. Tásiha, tétavicavainapa eta vicunachirayare ema Viya taicha ichapequene eta máimicatasirahavihi.

Te tiyujaraca ema Pablo, mayaseaca ema Viya eta náitupajijiasiravaina ena téhicanahi ema Jesús

¹⁵⁻¹⁶ Eta tacahe, núti néchahehi éti tamutu te nuyujarasirana, taicha nusamairiricapa eta yátupirahi éhica ema Viáquenu Jesucristo émapa eta émunajirisiracacahi emutu eti machaneranaahi ema Viya. Nuhasulupayachahi ema Viya eyehe.

¹⁷ Éma, macaiyaquenehi ema Viáquenu Jesucristo. Máetaviurehi eta majaraiva te mávihahi te anuma. Nuyaseacahi májaracahehine eta échemaraivainahine maicha ema Espiritu Santo, apaesa ímatiequenehahine yátupina eta emetacasivanaya eta mapanereruanaahi ema Viya. Nuvaraha ímatipaipaichahine éma.

¹⁸ Nuyaseacahivare éma yátupina eta ecaicutiarairaya, eti máichuhaqueneanahi éma, eta táetaviuchirayarehi eta viúricacarevayare te jena sáchezare vicuchapaquenehi. Nuyaseacahivare ecaicutiaraya eta táetaviuchirayarehi eta táuricacarevayare eta viávihaya te anuma, vicuchihi viti machanerana ema Viya.

¹⁹ Nuvaraha ecaicutiaravare eta táetaviuchirahi eta máitupajijiasiravahi ema Viya, váhiquene tivitaimahi. Éma, macaemataneacahi eta vítaresira, mavarairahi viúripanayare viti vicasíñavanahi mayehe.

²⁰ Ema Viya máimerecahi eta máitupajijiasirava ichape te macaecephucapa ema Cristo te máecari, macaejacapa éma te mavaure tayehe eta anuma mávihahi puiti.

²¹ Ema Cristo, émaripa ichapequenehi aquenuca nayehe ena ángeleana. Tétavicavahi eta masuapacarevahi nayehe. Énerichuvare ena éreanana, mapamicavaca eta nasuapiraina. Éma, tétavicava eta macapicahuirahi. Nájina nácutihini éma. Nájina nayehe ticachuricaimahi. Apajarahiyarehi eta aquenucaira éma.

²² Ema Viya macaejacahi éma téchahi tamutu eta tatiarihiqueneana. Émaripa vicaiyaquenehi vimutu viti machanerana.

²³ Víti, eta viúrujiasirahi éma, tímicitijiricavaipahi máquehehavihi te juca apaquehe. Vicaemataneacahi eta táuriqueneana tímicitijiricavahi émainahini macaematanehini, taicha tamutu eta víchaqueneanahi, éma téchahavihi, tétumechahavivare.

2

Eta máemunasirahavi, ema Viya ticuchucuhavivihi tayehe eta vícuñayarehini

¹ Ema Viya tíjaracaheripa arairupa eta itaresira. Tichavapa títareca eta iáchanavana, tacuti eta machavirahi títareca ema Cristo te máecari. Taicha éti, cape juca itaresirahi, tímicitijiricavaichaha épenaqueneanahi táichavenehi eta evainarajivanaini étapa eta epecaturanaini.

² Cape juca itaresirahi éti, éhichahivare eta tayeherepiana eta apaquehe, tauriqueneanahi. Esuapahivare eta mavarahaqueneana ema Váinaraji, éma mapamicavacahi ena achaneana masuapajirairahanahi me Viya.

³ Vimutu viti, tacahenihí eta vítaresirahi eta acane. Étachucha véhicahi eta tavarahaqueneana eta viáquehe. Vítijiricavaripahi víchahi eta tajamurachaqueneana eta viáquehe, étapa eta vipanereruana tauriqueneanahi. Ichapemurihi eta vímisyemasirahi ema Viya, vicutihi ena apamuriana masuapajirairahanahi mayehe.

⁴⁻⁵ Tímicitijiricavaichaha vépenaqueneanahi táichavenehi eta vipecaturanaini. Tétavicavasera eta majapanuirahavihi ema Viya. Ichapevare eta máemunasirahavihi. Tíjaracahaviripa arairupa eta vítaresira táichavenehi eta viúrujiasirahi ema Cristo. (Táichavenehi eta majapanuirahahi, ticuchucuhavivarehi.)

⁶ Puiti, eta viávahásirahi ema Cristo, yátupihí eta véchepusiraya, vicaicuchipa eta macaejasirahavinapa tayehe eta viávacureyare te anuma, vicachaneya ema Cristo.

⁷ Eta juca émavenehi ema Viya, mavarahahi máimereca maverahi eta viúricacarevana máijararuhavivare eta viyehe te jena sáchezare, taicha tétavicavahi eta máemunasirahavihi táichavenehi eta viúrujiasirahi ema Jesucristo.

⁸⁻⁹ Taicha eta viúchucuirayare eta viápechiravaya vítareca, étavenehi eta majapanuirahavihi ema Viya. Vijacapareripa eta mayehe, táichavenehi eta vicasíñairahi ema Jesús. Vahi étaparacaina tacuchucuhavivihini eta víchaqueneanahi, taicha vahi vítijivainahini váratahahini vijacaparerehini. Tacahehi éta, apaesa nacuija nacucasiñavavaica eta nacuchucuiravapuca.

¹⁰ Arairuinapa eta vítaresira maicha ema Viya. Émarichuvare ticajurucahavi eta véhisirahi ema Jesucristo, mavarairahi víchayare eta táuriqueneana. Eta víchirahi, vítauchahi eta mapanereruana acane.

Eta véhisira ema Jesucristo, étamurthavinapa. Vaipa víputsmurivavacaimahi.

¹¹ Németeaca échavahi éti eta nacatianasiráhehi ena nujaneanana táichavenehi vahi éhichahini eta nayeherepiana.

¹² Éti, cape juca, tájina ímatiyahini eta máimiturapianahi ema Jesucristo. Vuíchahavare ímatihini eta iúricacarevayarehi táichavenehi eta matratune ema Viya viyehe viti israelítana, taicha ticaerajicaheanahi te vimuri. Vuíchahavare ímatihini eta ícuchianayare máijararuheanaya ema Viya. Eta tacahehi, éti ímijachaipa vahi ejacapacare eta mayehe. Vuíchahavare ácasíñavahini eta mayehe.

¹³ Puitipasera eta éhisirahi ema Jesucristo, iúrujicaripahi éma. Tásiha, émeñahavaipahi mayehe ema Viya, taicha ecasíñavahi eta máepenahehi ema Jesucristo.

¹⁴ Énerichuvare, étavenehi eta viúrujasirahi éma, tihétamurichahaviripahi vimutu: éti apavasanana, vítipa viti israelítana. Vaipa víputsimuriavavacahini. Timicutijiricavaipahi étanainehi eta viúchusine. Macaepaharipahi eta vicitianajirisiracacáinihi.

¹⁵⁻¹⁶ Eta máijararesirahi eta máquehe te crusu ema Jesucristo, macaepaharipavare eta tapamisirahavini véhica eta vanairipiana étapa eta nayeherepiana típicauchacareana. Puiti, vaipa étaparacainahini eta viúchucuiraya. Énerichuvare macaepaharipa tamutu eta vicitianajirisiracacáinihi táichavenehi eta apavasanahavirahi. Puiti vimutu viti véhicanahi ema Jesucristo, étamurihaviripahi máicha. Tájina víchiravaimahi. Táitusiava tiúrichahaviripa vimutu mayehe ema Viya.

¹⁷ Eta tímitecali ema Jesucristo, timetapanahavihi eta táurinaquene echajirirucava eta najacapacarevaya namutu ena achaneana. Éma, tiúrichahaviyarehi mayehe ema Viya vimutu: viti vínapucanahi vímati eta máechajiriruvana, étipa eti epaenumavahi ímati eta máechajiriruvana.

¹⁸ Puiti, eta viúrujasirahi ema Jesucristo, tiávahácahavihi ema Espíritu Santo. Tásiha, máichavenehi ema Espiritu Santo, vimutu viciticacaipahi eta vipauchiraipa ema Tata Vicaiyaquene.

¹⁹ Eta tacahe, tájinapa táéñamacarehini eta ejacapacareva eta veyehe viti machanerana ema Viya. Esiapamuriahaviripahi víti. Tachichaheripa eta mávasa anuma.

²⁰⁻²² Eta esiapamuriahavirahi te vimuri, nímicuticharipa te náepiyaca eta ichape peti. Ema Jesucristo, tétavicavahi eta máetumechirahavihi vimutu viti véhicanahi éma. Macuti eta tatumearaya eta yúchamana, eta manasirahi eta máimiturapiana. Tásiha, visiapa viti apóstoleana énapa ena profetana. Tacahe éti, eta esuapirahi eta vímiturapiana, esiapari-pahivare. Ecuti eta labriyuana étapa eta yucuquiána. Ema Espiritu Santo, tétavicavahi eta máitupajijiasiravahi tihétamurichahavihi. Vituparahapachuhi eta manasirahavihi. Máepiyacavacapaipa. Te máítauchapa tamutu, tétavicavainapa táurinavaya eta ichape-quenehi templo, mapenayare ema Viáquenu, sántoquenehi.

3

Emá Pablo, éma ticatuparahahi ticametairuyare nayehe ena apavasanana

¹⁻² Németeaca nuti ímatiequeneharipa eta máetaviuchirahi eta máemunasirahehi ema Viya. Éma, tivanezanuhi níchuhaheya eti apavasanana, mavarairahi éhicayare ema Machicha Jesucristo. Eta juca nucametairuirahi eta eyehe, étara tiviuhanuhi puiti juca nucaeratairahi. Nútisera nuyaseuchaeparaca éti te nuyujarasirana.

³⁻⁴ Taicha ema Viya timetacanuripahi te nuvapure eta mapanereruhi tapaemunava tétacharehi. Puiti te juca nucartane, eta échajicuirá eta nájurehi, németeaca ímatiequenehayare tamuturipa nímatiequenehahi eta mapanereruhi ema Viya tayehe eta macuchusirahavihi ema Jesucristo.

⁵ Eta juca mapanereruhi ema Viya, nájina náimatiequenehahini cape juca tásinequenehi. Púitsera, ema Espiritu Santo tímechahaviripa viti mayeheana santo apóstoleana énapa ena profetana.

⁶ Ani tacahehi eta juca tayumurevanainihi: Eti apavasanana, éti apanavare ejacapacarehivare mayehe ema Viya maicha ema Jesucristo. Iúchucuhayare táichavenehi eta éhisirayare eta vimetarairuana. Esiapamuriahaviyare viti machanerana ema Viya. Étamuriahaviripa. Viciticacainapa eta vícuchihi viti israelítana.

⁷ Tétavicavahi eta majapanunuhí ema Viya! Nútisamipa máichuhaquenehi eta nucametairuyarehi eyehe. Tásiha éma, tétavicavahivare eta máetumechiranuhi te tamutu eta nucametairuirahi.

⁸ Vahi németeacavahini nútinasamihini manerejica, taicha nararihihi ena títupajijipapanavahi eta nuyehe. Tijapanunuhisera ema Viya. Nútisamipa manerejiruhi, mavarairahi numetapanahe eta máichuirahéhi éti apana eti apavasanana, eta ejacapiraya eta táuricacarequene vícuchi maicha ema Cristo. Tétavicavaya eta víúricacárevayare.

⁹ Tacahehi eta mapanereruhi ema Viya eta veyehe acane te tépanavainapa máepiyacaya tamutu. Váhisera táijahúchavahini mametacahavihini. Tapaenumava timetacanuhi níti, matuparasiranuhi eta numetasiraheyare tamutu.

¹⁰⁻¹¹ Taicha mavarahahi natarihiyare camurianayare ena tisuapanayare yátupi. Eta táurivayare eta náehisira, tímereuchayarehi eta máetaviuchirahi eta máitupajijiasiravahi ema Viya. Náraminehi ena aquenucanahi tiávihanahi te anuma eta náimairahi eta juca. Eta tacahehi eta mámirapahi ema Viáquenu Jesucristo tamutu eta mapanereruana eta acane ema Maiya.

¹² Tásiha puiti, tájina táéñamavacaréimahi eta vipauchira ema Viya. Vicasiñavahi eta mayehe, taicha ema Jesucristo émahí ema vicasíñasarequenehi.

¹³ Eta tacahe, nutuparacaheya: Vahi ecuinajicava eta juca éhiruhi, váhivare ecupica eta esamairirisirahi eta nucaeratairahi táichavenehi eta nucametairuirahi eyehe. Evapinasera eta nucamichirahi eta nátajivana, taicha nuvarahahi nímera eta táetaviuchirahi eta némunasirahehi.

Éma Pablo mayujaraucha éna machamuriana

¹⁴ Eta némechirana eta táetaviuchirahi eta máitupajijiasiravahi éma Viya eta juca mapaneruanahi, nútí népuyumiraucha éma Macaiyaquene éma Viáquenu Jesucristo, nucunachirahi éma.

¹⁵ Éma, Táiyaquenehi tamutu te anuma. Émarichuvare téchahi tamutu te juca apaquehe.

¹⁶ Nuyaseaca éma májaracaheni éti, ichapenahini eta ítupajijiasirava éta éta etumevaihahini te iáchanévana, maicha éma Espíritu Santo. Taicha éma Viya, tétavicava eta máitupajijiasirava, váhivare mayavanaimahi.

¹⁷ Nuyaseacavare yátupina eta ecasiñairaya éma Cristo, yátupinavare eta éhisiraina eta máimiturapiana. Túmeheya eta émunaravahi. Tájina tihapapicahéimahi eta éhisirahi.

¹⁸⁻¹⁹ Nuyaseacavare ácutihini éna apamuriana echamuriana te tamutu avasareana, te yátupina ecaicutiara eta táichapevahi eta máemunasirahavi éma Cristo. Tájina títaina éta. Tayanapane vahi vicúcaicutiaraquénéna. Nuyaseacahivare yátupina émainahini ecasamure éma Viya.

²⁰ Tétavicavahi eta nucunachirahi éma Viya, taicha máituruequenehahi tjaracahavi tamutu, máemetavichahi eta viyasearuanahi, éta éta vipanerechirana. Tétavicava eta máitupajijiasirava éma Espíritu Santo eta máetupirisirahi eta visamureana.

²¹ ¡Vicunachaparacahini éma Viya vámutu víti véhicanahi éma Jesucristo! ¡Máichecuaráquirénapa eta vicunachira! ¡Amén!

4

Viúrujiacacahi maicha éma Espíritu Santo

¹ Yátupi nútí tipresuchanuhi puiti táichavenehi eta néhisirahi éma Viáquenu. Eta tacahe, nutuparacaheya: Tacuíja íchiravaina eta ítasesira te mamirahu éma Viya; taicha éti máichuhaquénéherichuhi éma, mavarairahi machaneraheya.

² Yátupina éta emansuvaina, éta éta iúrivaina. Ecayehe paciencia. Ecamichayare jácani te ticaviurevanapuca nácani echamuriana, táichavenénahi eta émunasiracacainahi.

³⁻⁴ Émanarichuvare éma tiávahácahe, émaripa éma Espíritu Santo. Ísapava éta macurujisirahehi. Tacuíja íchiravaina eta iúrujisiravahi. Étanairichuhi éta epanereruana. Taicha éma Viya tíchuhahéhi. Puiti ecuchapahi éta iápechiravayare ítareca.

⁵ Émanarichuhi éma Viáquenu. Tacarichuhi véhica éta máimiturapiana. Étanarichuhivare éta vicaicachasira éta viúrujisira éma.

⁶ Émanarichuhivare éma Viya, Vicaiyaquenehi vimutu. Éma téchahavihi vimutu. Ticaemaneacahavihi vimutu. Émavare tijaneacahavihi vimutu.

Vítucaquenepachuhi maicha éma Espíritu Santo

⁷ Énerichuvare éma Cristo, éma tjaracahavihi éta vítucaqueneyarepachu, jácani mavara-haquenehi.

⁸ Taicha éta Sagrada Escritura, ani tacahehi: “Te tiárapa éma te anuma, mámamurihapaipa éna macchureanahi. Májaracasichavacapa éta náitupujijiasiravaya éna machanerana” tacahepa.

⁹ Epanerechaya puiti éta tacayemaquenehi éta márairahi. Eta juca tavaraha vicaicutiara éta mácupaisirahi tativa te juca apaquehe.

¹⁰ Te títauchavapa éta timiucupaicahí, tiárapa tichavapa te mávasa anuma. Tichavavarepa éta émarayare técha tamutu.

¹¹ Tásiha, éma Viáquenu tituparacahavi víti, tjaracahavivare éta vítucaqueneanayarepachu. Taicha tinacahavipa éta viávacurepachuya apóstolehaviya víti manerejiruqueneanahi. Éna apamuriana, manacahivare profetanahi náimatiequenehayarehi éta mapanereruanahi éma Viya apaesa náitametacavaca éna vichamuriana. Éna apamuriana, manacavare ticametairurahianayare, náichuhayare éna achaneana náéhica éma Viáquenu. Éna apamuriana, manacavacavare pastóreanayarehi, najaneacavacayare éna vichamuriana. Énapa éna apamuriana, manacavacavare máestroana, náimitucavacayare éta máimiturapiana éma Viáquenu.

¹² Taicha éma, mavarahahi máetupiricayarehi tamutu te etaracu éti machanerana; mavarahavivare vitiarihiyare víti vítátijiricaheya éti vichamuriana, vicajurusiraheya éti éhisirahi éma.

¹³ Apaesa yátupina vácuti vámutu eta máurivahi ema Machicha ema Viya; táitecapavanevaréni eta sache eta viúrujisiravaya, tájinapa tahapapicahavimahi eta véhisirahi; vítamuturucaripahini tamutu eta vítucaqueneanahi tásihaqueneanahi me Cristo. Vácutipaini éma tamutu eta máitupajjiasiravahi.

¹⁴ Mavarahahivare vimutuyare vímatiequeneha. Vaipa vácutimahi ena amuyana, témunasiricavanarichaha éna. Tísapajiricavanarichaha navayuaca tayehe eta apana námiturapiana ena títuruéquenehana tivayuarecana, napamisiravacahi namutu náehica eta tauriqueneana.

¹⁵ Eta tacahe, vétumechavayare eta véhisirahi eta máimiturapiana yátupiqueneana, yátupinavare eta vémunaravahi, vicajurucacayahivare eta viúruva, vicutiyaere ema Viáquenu Jesucristo, taicha émahí ema téchahavihi.

¹⁶ Nímicutichahehi eta viáquehe. Camurihi eta táunavahi eta viáquehe; étanaichuhisera. Camurihivare eta táitupajjiasiravanahi; tamutuhisera ticaematanehi, víchirahi eta vivarahaquenehi. Tájina vahi táejiacavahini. Tamutu tijaneacacahi. Ene vicahehi víti machaneranihi ema Jesucristo. Éma, tétumechahavihi vimutu víti. Eta viúrujiasirahi mayehe éma, étamurihavihi. Vimutu vítucaqueneapachuhi máicha. Vématanerepíachuhi máicha. Vijaneacacahivare. Vicajurucacapaipahi táichavenehi eta vémunasiracacahi.

Apanainapa eta vítaresira taicha eta viávahásirahi ema Cristo

¹⁷ Eta juca numetarapiana eyehe, nutuparacahéicha taicha matupararunuhi ema Viáquenu. Nucavanairipipa puiti: Vaipa ecuapecha ecuquicha eta náichaqueneanahi ena máimatirahanahi ema Viya, náichahi éna eta náitaresirahi jácani tavarahaqueneanahi eta napanereruana súnsurupiana.

¹⁸ Tamutu eta napanereruana tétavícavahi eta tamapicuvahi. Vahi apaesainahini tavehahini eta tijarahi. Mácharaireanahi éna, táichavenehi eta tamuracavahi eta nasamureana. Váhiquene navarahaimahi napaucha ema Viya apaesa macanaracavacahini éna.

¹⁹ Tájinapa apaesainahini náimatihini eta títsirihacare. Tíjaracavanapa tayehe tamutu eta najamuraraviana. Tétavícavahi eta navapinairahi náichahi eta tauriqueneana tájiparacana.

²⁰ Étísera vahi tacucahe eta ítaresiraya puiti eta éhisirahi ema Cristo.

²¹ Taicha németeaca yátupihí esamararacahi eta vímitusirahehi. Ímatiripahi eta táuriqueneanahi yátupiqueneanahi tásihaqueneanahi mayehe ema Jesucristo.

²² Tásiha puiti, vaipa ecuesacha echavaucha eta ítaresirainihí acane echípejiricavahi taicha tivayuacahe eta ejamurachirahi eta tauriqueneana.

²³ Puiti éti, ísapaya ema Espíritu Santo mávahácahe, máitsivachirayare eta epanereruana étapa eta ejamurachirana te íachanevana.

²⁴ Tásiha, apanainapa eta ítaresiraya. Yátupi eta ecaquehéraina ema Viya, ácutini éma eta máurivahi étapa eta masantuvahi.

Étupiricayare tamutu eta ítaresirana

²⁵ Tásiha puiti, vaipa épíyahirahimahi. Étupiruvayare tamutu eta échajirisiravaya nayehe ena echamuriana eparapiyana, taicha étanarichuhi eta echamuriracacairahi, émanarichuhivare ema Viúrujaruhi, ema Jesús.

²⁶ Te tatiarhipuca eta táimiyusemacahe, ejaneacavaicha machu ecapecatura. Te esemapuca, vahi tacunasi eyehe. Énevanéna eperdonachacaca.

²⁷ Ecaunevayare, machu máiturucache ema Váinaraji, táichavenénahi eta esemanevahi.

²⁸ Mácani tíamerahinihi, vaipa macuapechava macuamereca. Mácaematane apaesa macunachacare, apaesavare eta jácani máematanevachayare eta maviyihayare eta macajirayare ena ticamunuvanahi.

²⁹ Váhivare ecunacajacahava eta tájiparácana échájirirucavana tauriqueneana. Tátupiruva eta échajirisiraváina apaesa étaina eyuchusiha eta nasuapiraina nácani tisamaheanayare, éta tétupirisamurechavacayare éna.

³⁰ Vahi ecuisapava ícha jácani tauriqueneana, machu ímipanerereca ema Espíritu Santo, émaripa ema sántoquenehi, tiávahácaheripa éma. Eta mávahásirahehi tímicutíjiricavaipahi eta ecamarachi, taicha ímaticaréipahi eta machanerahéirahi ema Viya; puíticha, étapa eta te títecapapa eta jena sáchezare viúchucuirayare.

³¹ Váipavare ecunaca eta semanereana. Váipavare ecatianarahimahi. Váipavare ecusemarairihí, váhivare ecuijajachava ecapiaracava. Vahi ecuchanareca. Ínajicaya éti tamutu eta júcana tauriqueneana.

³² Táitsiva étaviuchayare eta iúrivayare nayehe nácani apamuriana, eجانurahiyare. Te tatiarhipuca eta nájecapirava, eperdonachacacayare taicha ene macahehi ema Viya eta maperdonachirahehi máichavenehi ema Cristo.

5

Tiúriyarehi eta náitaresirayare ena machichanaveanahi ema Viya

¹ Puiti éti machichaheripahi ema Viya, máemunaruqueneheripa, tásiha ácutipa éma eta máurivahi.

² Émunajiricacayare eta itaresiraya. Ecutyare ema Cristo eta máemunasirahavihi. Éma, macurisamurecharipa ema Maiya eta máimijararesiravahi víchavenehi víti, macutihi eta sárarechicha uvesa nacaparuhi eta námavahuhi me Viya.

³ Eta machaneraheraripa ema Viya, vaipa táuricahini íchahini eta túhusicare. Tíñehi te mamirahu ema Viya. Váhivare ecupanerecha ícha jácani tíamanahi eta tamauriqueneana. Váhivare tacuvayuacahe eta tájiparácana.

⁴ Vahi ecunacajacachava eta échajirucavana titsirihacarepiana, súnsurupiana, tájiparácaqueneana, taicha tájina tacunachacarévaina éta. Tamutusera eta échajisiranaya, amairipiquenéna eta ehasulupayachiraya ema Viya. Jéhevare, éta iúrihaquenehi.

⁵ Németeaca ímatiequeneharipa éti eta vahi tiúchuchuanaimahi nácani ticaecahicacayare, ema achane te mavehapuca esu esena apayena, esu esena te suvehapuca ema achane apaima; nácanivare ena amaperuana tivehajiricacananahi; mácanivare achane mavehapuca ema maparajairava; nácanivare tijamurachana tamutu jácani náimahaqueneanahi. (Ena tavayuacavacahi eta najamurachirana, énarichuhi ticasíñarajiana.) Namutu ena nani tímereuchavanahi vahi machaneranainahini ema Cristo. Vahi tisiapanaimahi te mávasa ema Viya.

⁶ Tásiha éti, vahi ecuisapava nácani navaraha navayuacahe te náechajiriruva súnsurupiana, napamisiraheya ícha eta júcana tamauriqueneana, taicha eta júcana, éta tivichavacayare nácani masupajirairahanahi me Viya, muracayare eta náicuñayare.

⁷ Tásiha, ejaneacava, machu ácuti ena nani tíchanahi eta júcana tamauriqueneana.

⁸⁻⁹ Échavaripa tacáhénihí eta itaresirahi acane étarichu ímapiricainihí iávachuhi te timapicu. Puítisera eta iúrujasiraipa ema Viáquenu, tijarahiripa eta itaresirahi. Tásiha, ímerezayare eta emicauchirayare ena apamuriana achaneana, ímerezirayare eta iúriya, éta pa eta tipachinaqueneana eta itaresira, éta pa eta yátupirahi eta éhisirahi ema Viya.

¹⁰ Tamutu sácheana ecaravahuinavarepa eta mavarahaqueneanahi máuriruanahi ema Viáquenu.

¹¹⁻¹³ Ejaneacava éti, machu iápechava ícha eta tamauriqueneana náichaqueneásahi ena achaneana te timapicu. Taicha tétavicavahi eta tatsirihacarevahi eta náichaqueneanahi eta nayumurusiravahi. Étisera ímitucavacayare éna. Emicauchayare eta tamaurivahi eta náichaqueneana, apaesa náimaha eta táíñehivahi eta náichaqueneanahi. Tásiha, natirihipuca ena tivarahanaya náinajicayare.

¹⁴ Eta emicahuchiravaca éna, tacuti eta táechajiriruva eta jirasare, ani tacahe:

Pítisami pímicutijiricava pépenaquene taicha
eta tavayuasiravivi eta pecatuana.

Péjamiuchavaichu eta pímacacarasiravahi
te timapicu.

Písapava macaechepucavi ema Cristo,
mavarahahi tímícauchaviyare.

¹⁵ Eta tacahe, yátupina eta ejaneasiravaina. Vahi ecucuti ena máecharaireana. Ímerezavaya eta ítupajijiasiravahi.

¹⁶ Ecamapuravachaha tamutu sácheana eta ímitusiravacahi ena achaneana, taicha mavarana ena tíchanahi eta tamauriqueneana.

¹⁷ Tacuija eta esunsuvanaina. Epanerechayare apaesa ácaicutiara yátupi eta mavarahaquenehi ema Viáquenu.

¹⁸ Vahi ecucavaha taicha éta ticauyayacarehi ticamitiacahe. Ísapavasera émaira máechahe ema Espíritu Santo tamutu eta itaresira.

¹⁹ Eta ímiturapiyare nayehe ena echamuriana, eta salmo éta pa eta jirasareana majirihuana ema Viya. Eta ecunachirainahi ema Viáquenu, iúrisamureyarehi eta ejiraira.

²⁰ Ehasulupayachaparacaya ema Vicaiyaquenehi te máijare ema Viáquenu Jesucristo tayehe tamutu jácani íchararacavana taicha tásihaqueneanahi eta mayehe.

²¹ Emutu éti, ímereco eta iúriya táichavenehi eta epicauchirahi ema Viya. Ísapava eta nacamunuirahahi ena echamuriana. Vahi étainachucha éhica eta evarahaqueneana.

Ena achane ésupa esu mayena náimerezayarehi eta náuriva énjicacayarehi

²² Étiripa eti esenana ecaimaqueneanaripahi, tituparacahehi epicauchayarehi ena ímanaveana. Esuapajirahiyarehiva nayehe, tacutiyaieichu eta esuapirahi ema Viáquenu.

²³ Taicha mácani achane, tatuparacahi éma, téchaya eta máitátiraya esu mayena, tacutihi ema Jesucristo tatuparacahi éma téchahaviyarehi vimutu viti véhicanahi éma. Émarichuvare ema ticatiuchahaviya vimutu viti machaneranahi.

²⁴ Tásiha, yátupihí eta vipicauchirahi visuapahi ema Cristo. Ene nacaheyarehi ena esenana, nasuapayarehi napicauchayarehi ena náimanaveanahi te tamutu.

²⁵ Étiripa eti náimanaveanahi, tituparacahehi émunacavacayare ena eyenana, tacutihi eta máemunasirahavihi ema Jesucristo viti machaneranahi. Éma, tímijararecavahi víchavenehi,

²⁶ taicha mavarahahi tisantuchahaviyarehi. Tásiha, masipahasinahaviya eta víachanevana eta visuapirahi eta máimiturapiana. Eta masipahasirahavi tacuti eta sucavira te une esu araimayare te tétupiricavapa tayehe eta sucaimairayare.

²⁷ Taicha mavaraha tacuija víchiravaina viti machanerana te táitecapa eta sache vitupihamirauchirayare éma. Vétaviuchayarehi eta viúrinavaya. Tájina véchipejicaimahi, tájinavare tijararecavimahi, apanaimahi víchava. Mavarahahivare tétavicavayarehi eta visantovaya. Yátupi matapiravarehaviya viti.

²⁸ Ene ecaheyarehi eti náimanaveanahi, ímrecayarehi eta émunasirahi ena eyenana, tacutihi eta émunasirahi eta íáqueheana. Mácani máemunacahi esu mayena, tímicutijiricavahi eta máemunasiravahi éma.

²⁹ Taicha viti achaneana, eta vítaesirahi, váhiquene vícatichaimahi eta vécheana. Tétavicavahi eta vijaneasirahi, véchapajiricahi, vénicahivare eta véche. Ene macahehi ema Cristo eta majaneasirahavihi, máechapajirisirahavihivare viti machanerana.

³⁰ Viti tímicutijiricava eta táunavanahi eta máquehe táichavenehi eta víavahásirahi éma. Vicutijiricavavare eta maeche, máperanavare.

³¹ Échavaya eta táechajirisirahi eta Sagrada Escritura, ani tacahe: “Mácani amaperu achane ésupa esu mayenayare, te ticaimanapa, tatuparacavacahi típutsicavanayarehi eta napenana ena ticachichana. Énajivainapa tíaticavanayare. Eta navehacacairahi, tímicutijiricavaipa étanarinehi eta náqueheana” tacahepa.

³² Te juca tametarapi, jararihi eta tacayemaquene tayumurevaquenehi. Puiti nímitucahe: Viti machanerana ema Cristo, eta viúrujasirahi éma, étanamuriháviripa tacuti eta étanarinehi eta náqueheana ena ticaimanahi.

³³ Tásiha, nuvaraha yátupina ácaicutiara eta juca nucayemaquenehi. Tituparacahehi eti ajairana, yátupina eta émunasiraina ena eyenana tacuti eta émunasirahi eta íáquehe. Énerichuvare eti esenana, tituparacahehi epicauchayarehi ena ímanaveana.

6

Ena amaperuana, náimerecayarehi eta náuriva nayehe ena ticachichana

¹ Étiripa eti amaperuana, yátupina eta esuapajiraivaina nayehe ena ticachichaheana, taicha tituparacahehi ene ecaheyarehi eta éhisirahi ema Víáquenu.

²⁻³ Ema Viya tijaracavapa tijaracaheyare eta iúricacarevaya eti esuapajirahiana, taicha ani tacahe eta máechajiririva: “Epicauchayare ena ticachichaheana. Te esuapajirahi éti, nucajurucaheya te apaquehe. Tájina íchiravaimahi, iúritaresirainapa” macahepa. Tétavicavahi eta tasuapacarevahi eta juca mavanairipi ema Viya eta eyehe.

Ena náiyana, náenana, táurini eta náimitusiravacaina ena nachichanaveana

⁴ Énerichuvare, eti náiyana, náenana, vahi ecuimiyusemaca ena echichanaveana tayehe eta evanesirana. Tauri eta ecavanairipira, apaesa napicaurahi eta najurusiraina, énajivayare ticaratacavana. Ímitucavaca tamutu eta máimiturapiana ema Víáquenu, apaesa nasuapajirahi.

Ena ticaquenurecana, táurini eta nacaemataneasiraina

⁵ Énerichuvare eti ecaquenurecana, tituparacahehi esuapajirahiyare nayehe ena íáquenuanahi. Epicauchavacayareva, émunacayareva. Táurivainahini eta ecaemataneasirahi, tacutirichu eta táurivahi eta ecaemataneasirahi ema Cristo.

⁶⁻⁷ Evapinavayarehi te esamureana eta ecaematamera, vahi tacucarichu te natiarihi ena íáquenuanahi te emirahu. Vahi ecuyacujiriríha. Evapinavayaresera eta ecaemataneasirahi éna, taicha émarichuvare ema Víáquenu ema ecaematanearuhi. Ímrecavayare eta yátupirahi mavanarahehi éma. Tacaheyarehi eta itauchirayare eta mavarahaqueneana ema Viya.

⁸ Taicha écharipahi émutu éti, vijacapayare eta vícuchihi mayehe ema Víáquenu te vítauchahi tamutu eta táuriqueneana. Vahi manerejicaimahi nácani líbreanahi énapa ena ticaquenurecanahi; vínunayarehi tayehe eta vícuchihi.

Éna pa ena náquenuana, tituparacavaca eta náurivaina nayehe ena nachanerana

⁹ Énerichuvare eti náquenuana, tituparacahehi iúriyareva nayehe ena echanerana, eapanuyare éna tayehe eta evanesirana. Vahi ípicararerecainahi te evanesirana. Ínunayarehi échava eta matiarahirahi ema Iáquenuhivare éti apanava, ema tiávihahi te anuma. Taicha éma, nájina máepuruquenéna ena acha neana.

Yátupina eta vicasiañavairahi me Viya; vétumechavavare eta véhisirahi

¹⁰ Puiti nutuparacahavare, nuparapenaveana, ecasiñava yátupina mayehe ema Viáquenu apaesa májaracahe éma eta matumeva étapa eta máitupajijiasirava.

¹¹⁻¹³ Nuvaraha numetacahe eta juca: Éma Váinaraji ticanarahavihi víti machanerana-havihi ema Viya. Tétavicavahi eta mavarairahi tiáquipaichavi. Tásiha, tituparacahéna eta véchapajirisiravaya eta vicatiuchiravaya mayehe éma. Natiarhivare ena camuriqueneana majupahana, énapa ena masuntarurana. Váhisera achaneanainahini, váhivare viparaepiyainainahini. Éreananahi éna, váinarajiqueneanahi. Tétavicavahi eta nasimutuvahi éna. Tétavicavahivare eta náitupajijiasiravahi étapa eta natumeva eta nacaematamera tayehe eta juca apaquehe, tamapicuquenehi náicha. Eta tacahe, échapajiricavayare eta ecatiuchiravayare tayehe eta mavayuarauiana ema Váinaraji. Étumechava eta éhisira. Ecuti ema suntaru ticasiañavahi tayehe eta mamuiraha vahi tasiapahacaimahi eta espada. Tásiha, eratahayare ecamicha tamutu eta ecatajivairana. Vahi ecainajiruvaimahi. Iáquipacayareva namutu ena machamuriana ema Váinaraji.

¹⁴ Yátupinahisera esupa eta vímiturapiana yátupiqueneana. Vahi ecuchavacuéjchava. Átupiruvahini eta itaresirahi. Ecutiare ena suntaru, manacahi eta máitijuhe, étapa eta fiérromehi tiávichayarehi eta matupa, tájinasarepa náicharaca ena mánarana.

¹⁵ Vahi tacuechuquiha eta ecametarairuirayare eta majacapiraya ema Viya namutu ena achaneana. Etanucayareva eta eparupevaya apaesa erataha eta epaisirayare te acheneana eta itecapirayare tayehe eta tayerehiqueneana avasareana.

¹⁶ Tacutiquene eta ticamunucarehicha, yátupinahí eta ecasiñavairaina mayehe ema Viya. Eta ecasiñavairayare táimicutijiricavahi iávihuinahini eta ticaemahaequenehayarehi eta tamuruirapahi eta mayucaraquí ema Váinaraji.

¹⁷ Tacutiquene, ecasiñavahi yátupina eta iúchucuirayare, tácuti eta macasiñavaira ema suntaru eta mayehe casco te machuti. Iúnacahi eta máechajiriruva ema Viya, máimiturehequenehi ema Espíritu Santo. Eta juca tímicutijiricavahi eyehenahini espada eta ecatiuchiravahi.

¹⁸ Te eyujaraca, eyaseacaya ema Viya májaracahe eta etumevaina. Eta eyujarasirana, tacuija tahapapiricahe eta máimitusirahehi ema Espíritu Santo. Vahi ecuyacuji eta eyaseuchiravaca namutu ena vichamuriana, majaneacavacahini ema Viya, táurivaina eta náehisirahi.

¹⁹ Énerichuvare, te eyujarasirana, eyaseuchanuhini me Viya, apaesa májaracacahini éma eta nuvapinairava, tacuijavare tahapapiricanu eta néchajisirayare ena achaneana. Nuvaraha tasuapacarehini nayehe eta najacapacarevahi mayehe ema Viya.

²⁰ Éma Viáquenu tinacanuhi nútí námayarehi eta máechajiriruva, nucutiarehi mácani achane embajador mayehe ema aquenuca Emperador. Éta tíchanuhi ticaviurenuhi eta napresuchiranuhi puití. Eta tacahehi, nutuparacahe eyujarauchanu, eyaseuchanu me Viya, májaracacahini eta nutumevaina eta nucametarairuirayarehi nayehe namutu ena achaneana te avasareana, váhivare nucuyacujihini eta nucametarairuirayarehi.

Eta táichecuaráqui eta macartane ema Pablo

²¹ Tiuri puiti, máimahaherinesera ema vémunaruquenehi vichamuri Tíquico. Éma, tíametacahéva tamutu eta nícharacávahi nútí. Tétavicavahi eta máimicatasiranuhi eta vícaemataneasirahi ema Viáquenu.

²² Éta tacahe, névatacahi éma eta ara eyehe. Títametacahéva eta vícharacavahi, tétumechahéva éti eta éhisiraya ema Viáquenu.

²³ Puiti nuyaseacahi ema Vicaiyaquenehi émapa ema Viáquenu Jesucristo, nájaracacahini eti nuchamuriana eta enasirahi te esamureana tamutu eta epanereruana, tajurucahivaréni eta ecasiñavairahi eta nayehe, étapa eta émunasiracacahi.

²⁴ Nuyaseuchahevare táetaviuchahini eta iúricacárevaya emutu eti yátupihí éta émunasirahi ema Viáquenu Jesucristo.

Tamutupa eta néchajiriruvanahi eyehe.

Eta macartane ema Apóstole Pablo nayehe ena machamuriana ticavasanahi te avasare Filipos, ticaijare FILIPENSES

¹ Nuti Pablo émapa ema Timoteo, mavanarahavihi ema Viáquenu Jesucristo, vímiamareca puiti eta juca vicartane eyehe emutu eti vichamurianahi ecavasanahi te Filipos, énaripa ena pastoreana énapa ena najupahana. Taicha eti machaneranahi ema Viya eta iúrujasiravahi ema Jesucristo.

² Nuvaraha máetaviuchahini eta macatajisirahe ema Tata Vicaiyaquene, émapa ema Viáquenu Jesucristo; náijaracahehini táurivaina eta epanereruana.

Em a Pablo mayaseuchavaca te mayujarasirana ena machamuriana

³ Tatiarihi eta te néchahe, nuhasulupayachahi ema Viya íchavenehi éti.

⁴ Te tamutu eta nuyujarasirana, tétavicavahi núrismureva eta nuyaseuchirahehi emutu éti.

⁵ Taicha te jena títapucainapa sache eta nucametarairuahi eta eyehe, ichapequene eta ímicatasiranuhi. Puiticha enasirichuhi.

⁶ Ema Viya, tétavicava eta máurichirahe eta ítaesira cape juca. Núti, tétavicavahi eta nucasínavairahi mayehe eta máimiyániravaina eta máurichiraheya, mavarairahi iuri eta machimapiraheya ema Jesucristo te jena sache machavirayare.

⁷ Énerichuvare nucasínavahi eyehe eta ejaçapiraya eta máurichirahehi éma, taicha némunacahehi ichape emutu éti. Nucasínavahivare vicuticacaipahi eta vijacapirahi eta máimicatasirahavihi ema Viya, tayanapane viyerehicacahipuca, étaripa te juca návihahi cárcel. Étaripa te nutupihamirauchavaca ena tuparairucana eta nucatiuchirayarehi eta yátupira eta viúchucuiraya maicha ema Jesucristo, apaesa te nasuapapuca éna apanava.

⁸ Tímararacanuhi ema Viya eta némunasirahehi emutu éti, nucutíhi ema Jesucristo eta máemunasirahehi éma.

⁹ Nuyaseacahivare ema Viya eta iápajusiravainahini eta émunaraivaya. Ítupajijiacavahini, támutuhini ímatiequeneha, apaesa ímatiparacahini eta enerejisiraya eta táuriquenehi.

¹⁰ Taicha nuvaraha tápajupánávainahini eta iúrivaina eta ítaesirana, tájina téchípejicahémahi. Matapiravarehéya, tíuriyarepa eta machimapiraheya te machava ema Jesucristo.

¹¹ Nuvarahavare iápajusiravainahini eta íchaqueneana táuriqueneana eta ecaemataneasirahi ema Viáquenu Jesucristo. Tásiha, tétavicavayarehi eta nacunachirayarehi ema Viya ena achaneana eta náimairahahi éti.

Eta vítaesirahi, puiti émapa ema Cristo téchahavihi

¹² Nuparapenaveana, nuvaraha numetacahe tájinaichucha táichavahini eta nucaertairahi. Eta návihairahi núti te juca cárcel, camuriana ena numetaruanahi eta máemunaraivahi ema Viya eta nayehe.

¹³ Énaripa ena tasuntarurana eta palacio énapa ena apamuriana achaneana náecharipahi eta táemeratasiranuhi eta néhisirahi ema Cristo.

¹⁴ Tacutiquene, eta náimairanuhi eta nupresuvahi, ena camuriqueneana nuchamuriana táetumechavacainehi eta nacametarairuira eta máechajiriruva ema Viya. Vaipa napicahini taicha ichape eta nacasínavairahi mayehe ema Viáquenu.

¹⁵⁻¹⁷ Nararihi éna, tíurihi eta napanereruana eta náimituresirahi te máijare ema Cristo. Tatupiruvahi eta náichirahi, tásihaquenehi eta náemunasiranuhi, taicha náechahi éna eta návihairahi ani, nucatiuchirayarehi eta yátupira eta viúchucuiraya maicha ema Jesucristo. Nararihisamisera ena tímiturecanahi te máijare ema Cristo, váhisera tátipuruvaquenéhini eta napanereruana. Nacapinaruraivarichucha, navarairahi ticachuricanuana. Napanerechaichuchavare tiápajucavayarehi eta néñamiravana, tavetijipa eta návihairahi nuti te juca cárcel.

¹⁸ Tájinachuchasera táichavahi. Núti vahi nucapinaruvacaimahi ena nani páureanasami. Ticurisamurechanuanarichucha núti eta náechajisihairahi ema Cristo namutu.

Énerichu ichapemuriyarechucha eta núrismurevaya,

¹⁹ taicha németeaca tíuriyare tamutu eta níchavaquenevayare. Taicha tisamacarehi me Viya eta eyaseuchiranuhi. Émaripa ema Espíritu Santo, ichape eta máimicatasiranuhi.

²⁰ Núti, ichape eta nuvarairahi váhini nucutsirihaini. Nuvaraha nuvapinava eta nímiyanirava nucasínavaya mayehe ema Cristo eta majaneasiranuhi apaesa náimatihini ena

achaneana eta yátupirahi eta macasiñacarevahi ema Cristo. Tájina vahi nupicavahini eta náimicatichiranuhipuca, táimicapacanupuca.

²¹ Taicha, eta nítaresirahi puiti, ema téchahi ema Cristo. Te népenapuca, tiápajucavainapa eta núricarevaya.

²² Téhesera te nítarecarichahapuca, nucamapuravayarehi nucaemataneacayare ema Viáquenu. Eta juca, vaipa nímatiequeneha tájahapuca tiúripanayarehi nuyehe.

²³ Nuvarahaipanéni níjuhúchavahini népenahini apaesa nunaracapai te machacaya ema Cristo. Eta juca tiúripanahi eta nímairahi. Váhisera nímatiequeneha tájahapuca eta néhiruyare.

²⁴ Néchahevaesera éti, néñamahevare nujunijicahe. Tiúripanaichupuca vuíchaha nucuepena.

²⁵⁻²⁶ Tásiha, németeaca vuíchaha mavaraha népenahini ema Viáquenu. Nucuchapa nápechavahivaréni níteca eta ara eyehe, nucachaneheyaréchaha éti. Nímicatacahenumayare apaesa tápajucavahini eta iúrisamurevana eta ecasiñavairahi me Viáquenu Jesucristo. Tacahe, tétavicaupaini eta viúrisamurevainahini eta viúrujiacacairaya.

²⁷ Eta ítaresiraya, ímerea yátupina eta éhisiraina eta máimiturapiána ema Cristo. Tayanapané váhupuca nucuiteca eta eyehe, ímiyanavasera eta étumechiravaina eta iúrujiacacacahi. Nusamairiricahehine táurihini eta ímiyaniravahi éhica emutu, étanainarichuhi eta epanereru, evapinavahi eta ecametarairuira eta véhiruhi tayehe eta viúchucuiraya.

²⁸ Vahi ecurameca naicha nácani iánanarahi. Eta nacatiansirahehi, tímicaecherachahi eta nacaicuchirahi eta náicuñayare. Táimicaecherachahi eta iúchucuirayarehi éti maicha ema Viya.

²⁹ Éti, iúricarehi maicha ema Viya eta ejaicapacarevahi mayehe, táichavenehi eta ecasiñavairahi me Cristo. Tacamunuhisera eta ecatajivairayare táichavenehi eta éhisirahi éma, ecaicuchirahi éta.

³⁰ Ecutinuripahi eta vicanarajirisiravacahi ena viánanarahi. Éti ímahanurichuhi cape juca eta nuncanairavacahi, puiticha esamairiricanuipahivare eta nunasirichuhi nuncanaravacahi.

2

Tétavicaupahi eta masuapajiraupahi ema Cristo. Tásiha puiti, tétavicaupayarevare eta masuapacarevayare.

¹ Tacahe puiti, németeaca esamavahi eta máetumechirahehi ema Cristo, iúrisamurehivare táichavenehi eta máemunasirahehi; evapinavahivare eta mávahásirahehi ema Espíritu Santo, máimutisirahehi eta ecajirahi eapanurahihihivare.

² Tacahe puiti, nuvaraha étanainarichuvare eta epanereru, ácuticacaini eta ecaemataneasiraina ema Viya; tácuticacahivaréni eta émunasiracacahi. Tásiha, tétavicaupayare eta núrisamurevaya ícha.

³⁻⁴ Éti eta ítaresiraina, tacuija eta ecasiñavavaisiraina, váhivare ecuimijuquiha eta evarahaqueneana. Nuvarahasera ímereichahini eta emansuvaina nayehe ena echamuriana; énahi émunaruqueneanahini. Nativaina ímicatacavaca éna, táetaviuchiravainahini eta náuricacareva ícha. Vahi ecutítátijiva.

⁵ Emutu éti iámanahini eta táurivahi eta juca mapanereru ema Jesucristo, tisuapajirahi éma.

⁶ Éma, tacahehi eta mapanereruanahi: Vahi macasiñavahini eta víyairahi éma. Tétavicaupahisera eta mamansuvahi, étapa eta máurivahi. Tisapajiricavahi.

⁷⁻⁸ Tacahe, manaquicahi eta mávacuréni. Eta máucupauchirahavihi, macutipaipa mácani achane macaheguenechucha eta máuchusirahi. Tamutusera eta máitaresirahi, tétavicaupahi eta masuapajiraupahi, macutihi mácani moso. Eta masuapajiraupahi, étapa tiámaparauchahi eta máepenirahi te crusu. Titsirihacavahinene, máitauchahisera.

⁹ Eta tacahe, ema Viya máijaracapa eta máejasihayarehi tayehe eta anuquehepana mávacureyarehi, étapa eta tacapicahuirahi ichape eta máijare,

¹⁰ apaesa námutu nácani tisananahi eta máijare Jesús, tépuyucanayarehi: ena tiávihanahi te anuma, énapa ena tiávihanahi te apaquehe, énapa ena nacaerataquenehi puiti te amaquehe.

¹¹ Namutu náichayare: “Yátupi Aquenucaquene éma”. Tacahe, tétavicaupahi eta vicunachirayarehi ema Tata Vicaiyaquenehi.

Tétavicaupahi eta najaraiva ena téhicana ema Jesús, nacuti eta jarairiqui

¹²⁻¹³ Núti nuncanahahehi, eti nuparapenaveana némunaruqueneanahini, taicha tétavicaupahi eta esuapiranuhi te nutiarihichaha te echacaya. Puitisera nuvaraha tápajucavaini eta esuapiranuyare, puiti eta nuyerehirahehi. Ema Viya, émarichuhi ema tinacahi te

esamureana eta evarairayare ecurisamurechayare éma; tiávahácahevere eta ítachirayare tamutu. Tásiha, muracaina eta ejaneasirava tayehe eta tájiparacana, epicavareni eta ímicatisamurechira ema Viya. Tacuija táemitiequenehahini eta tapachinavahi eta íachanevana.

¹⁴ Te tatiarihinapuca jácani íchaqueneanayare, vahi ecuevataemachavaca, váhivare ecuacapauchava,

¹⁵ apaesa tacuija échajisicarevaina emutu. Tacuijavare etapiravainahi eta náimairahayare ena achaneana. Ímerecavayarehi eta machichahérahahi ema Viya, tájina táechipejicahehine nayehe ena achaneana váinarajipaneréruana. Nímicutichinahe eta táurinavahi eta jarairiquiana vímahaqueneana te anuma te jácani yati timapicuquenehi.

¹⁶ Ímitucavacahini eta máechajiriruva ema Viya, eta íchuhairavacavare náehicavare, apaesa náuchucuhahini tayehe eta apana náitaresira. Tacahe, te máiteca machava ema Viáquenu Jesucristo, eta máimairahayarehi eta juca táuriqueneana íchaqueneanahi, tétavicaivainapa eta nucunachiravaya núti íchavenehi éti eta táurivahi eta nímitusirahehi. Vahi támapurujihini eta nucaemataneasirahehi.

¹⁷⁻¹⁸ Nímicutichahe eta esuapajiraivahi tayehe eta ecaemataneasirahehi ema Viya. Ticutihi eta íámavahuhi mayehe. Núti, tíjuricati táimicapacanupuca eta nucametairuirahahi eta eyehe. Eta népenirainapucaini tacutiyaeva eta námavahuhi mayehe ema Viya, tacachane eta íámavahuhi éti. Núti nuvapinavahi eta níjarasiravahi népena, núsamurehivare eta nucamavahirahahi me Viya. Nuvaraha iúrisamureyareva éti apanava. Vahi ecucatiequenehanu. Ácutinu eta núsamurevahi núti.

Éma Timoteo émapa ema Epafrodito, vanairucanayare me Pablo

¹⁹ Nupanerechahi névatacayaréni ema Timoteo eta ara eyehe, máimahapanahé apaesa núsamurepaini eta nusamairirisiraheya te machavapa. (Máimahahavirinesera ema Viáquenu Jesús eta vítujisiravaya.)

²⁰ Taicha ema Timoteo, yátupihí macutinuhí eta nuhasamurechirava eta iúricacarevaihahini éti. Nájina apanainahini nácutihini éma.

²¹ Nararihinéni ena apamuriana, énachuchasera tiyayauruircavanahi. Vahi tihapasamurechavanaimahi eta iúricacarevaina eti machaneranahi ema Jesucristo.

²² Ímatiripahí éti eta máurivahí ema Timoteo eta máimicatasiranuhí tayehe eta vicametairuirahí, tacutihí mácani machicha ema achane, eta táurivahí eta máimicatasirahehi ema máiya.

²³ Vuíchahasera névatacaimahi éma. Néchanumayare eta juca níchararacavayare te juca.

²⁴ Nucasiñavahinénisera mayehe ema Viáquenu Jesucristo eta nútijacarúvaihahini nímahapanahé.

²⁵ Tásihasera, nupanerechahi névatacahiravéni pútirichu ema apana viparape Epafrodito, ema évataruhi tímicatacanyarehi, tiámaphivare eta enaquiruvana. Puiti éma, tétavicaivahi eta máimicatasiranuhí tayehe eta juca vématanerepíhi, vicanarairahí eta tamauriqueneana.

²⁶ Mavarahaipaichavare tímahahé éma apanava. Téñamavaipahí eta eyehe emutu éti taicha máechahí eta esamairirisirahehi eta macajumairahí.

²⁷ Yátupihí eta macajumairahí, tiánehiyarehíni tépena. Majapanuhisera ema Viya; tinaracahí. Tijapanunuhivare núti apana apaesa vahi nucueñamavahichainí, vahi tacuapiquihanuhíni eta néñamiravahí puiti.

²⁸ Eta tacahe, nuyayaucha puiti névataca éma, apaesa eta ímairainahini éti, iúrisamurevarepaini. Te néchapa eta iúrisamurevahi, étapa tacaepaha eta néñamavahí eyehe.

²⁹ Táurisera eta ejacapiraina éma te esamureana, taicha yátupihí echamuríhi éma eta éhisirahí ema Viáquenu.

³⁰ Taicha éma, yátupihí tiánehipa eta máepenira, táichavenehí eta táetaviuchirahí eta mavaraira macaemataneaca ema Cristo. Váhiquene tiyavanavahini eta máitaresirahehi, taicha muraca eta mavarairahí máitaucha eta etuparasiranahí mayehe. Taicha éma ítívahí éti, eta vahi ítujicavahini ítecahíni étijacarúvaihahini ítátinuhíni.

3

Tiúripa névica eta juca yátupiqueneana

¹ Nuparapenevaneana, evapinava eta macachaneraheripa ema Viáquenu. Núti, vahi nuyacují eta nápechirayare numetacahe te juca néchajiriruvahi te nájure taicha eta tiúrichahayare éti.

² Échapavayare nayehe nácani achaneana tipimicahéana éhica eta mavanairipiana ema Moiséini, navarairahivare ecamarcayare, náimijachahi machanerahéya ema Viya taicha

eta ecamarcairahi. Ena nani, tétavicavahi eta náíñehivahi eta náemejecapirachira ena vichamuriana. Éna, nacutihí eta jácani tamucu tétavicavahi eta tanicaraivahi.

³ Jéhesaresera vítiqenehi machaneranahi ema Viya yátupiquenehavíhi. Vicamarcaque-
neanahi víti te visamureana maicha ema Espíritu Santo. Vítiqenehi yátupiquenehavíhivare
viti véneuchavahi me Viya. Vivapinavahivare táichavenehi eta vicasíñairahi eta machanera-
havirahi ema Jesucristo. Véchahi vahí étaparacainahini vítauchahini eta vanairipiana, étaina-
pucaini visamacarehíni táicha.

⁴ Jéhevare núti, táuricahínéni nucasíñavahini núti nusamacarehíni, taicha nítauchahi
tamutu eta viyeherepiana viti israelítana. Nucachuricahi ena nujaneanana.

⁵ Núti yátupiquenenuhi israelítanuhi taicha nucamarcaripahi te óchopa sache eta
núchusirahi, náítauchahi éna eta viyeherepi. Mámariéquenenuíni ema Benjamín. Yátupi-
quenenuhi hebreo. Yátupiqueneanahivare hebréoana ena ticachichanuana, énapa ena
náchucanaveanaini. Núti náchamurinuínihivare ena fariséoana. Nítucahi nímicapicaucha
eta náítauchiraina yátupi eta víápajusiravahi religiósohavíhi nayehe ena apamuriana nu-
janeanana israelítana.

⁶ Eta nímicapicauchira, ichape eta nupanajirisiravacahi ena náinapuraana creyénteana.
Nucasíñavahi núti eta nítauchirahi yátupi eta viyeherepiana. Tájina néchajisiacarevahini
nayehe ena achaneana.

⁷ Puitisera eta néhisira ema Cristo, vaipa tacunachacarehíni eta nusamiravahi tamutu eta
juca níchaqueneanahi nusiñavirainíhi.

⁸ Tacahe, eta nímairahi, váhinéni étaparacainahini tayehe eta víuchucuiraya. Puiti nínajicapa
tamutu eta júcana, taicha tihapapicanuhi eta néhisirayarehi ema Cristo; táichavare vahí
tácutihini eta táetaviuchiravahi eta táurivahi eta néhisirahi ema Náquenu Jesucristo. Puitícha
tamutupa némitisica. Émachucha nucaemataneacahi.

⁹ Puiti eta návahásirahi éma, vahí étainahini eta táurivahi eta néhisirahi eta viyeherepiana.
Ema Viya tijacapanupa táichavenehi eta nucasíñavairahi me Cristo. Taicha namutu ena
ticasiñavanahi éma, tijacapacareanaya me Viya.

¹⁰ Nuvarahahi núti tajuracachucha eta nímairayarehi ema Cristo. Nuvarahavare tacuija
tahapapica eta macaemataneasiranuhi, máimeresirahi eta táetaviuchiravahi eta máitupa-
jijasiravahi, tacutipa eta máechepusiraipa éma te máecari. Nuvarahavare nucapayayará-
cahivaréni eta macatajivairahi. Étapa eta népenira, nuvarahavare táurichavacayare ena
nuchamuriana, tácutihini eta táurichirahivíhi eta máepenira ema Jesús.

¹¹ Taicha núti nucaunevahi eta néchepusiraya núti apanava te nécari.

Yátupiya eta vicaratasiravaya te vivaraha vítujicava víveha eta vícuchihi

¹² Núti vahí nímijachavaimahi tamutuhini nítaucha eta nítujisiravaya. Vuíchaha nítamu-
tura. Nímijanavaichuchasera eta nupamisiravahi, nuvarairahi nucurisamurechayare
ema Cristo te tamutu, taicha eta tacahehi eta máichuiranuhi néhisirayare.

¹³ Nuparapenevana, yátupiquenehi vuíchaha támutu nucapayayaracahini. Nuvara-
haipasera némitisicayare tamutu eta nunaquiruana. Tásiha, nétumechavainapa eta
nítauchiraya tamutu eta mavarahaqueneanahi níchaqueneanayarehi.

¹⁴ Nupamicavahi taicha ichape eta nuvarairahi nucurisamurechahini ema Viya, nu-
vehahini eta nícuchihi mayehe. Taicha eta tacahehi eta máichuirahivíhi, mavarairahi
tjaracahavi eta víurujiasirahi ema Jesucristo.

¹⁵ Tacaheyarehi eta epanerechirayare éti. Ecutinuyarehi emutu eti échemachanaripahi
eta juca véhiruhi. Te vuíchaha ecaicutiarahini eta juca, németeaca títitucaheyare ema Viya.

¹⁶ Jéhesare, yátupina vímijanava véhica tamutu eta vímitucasivanahi.

¹⁷ Nuparapenevana, nuvaraha yátupina ácutinu núti eta núrivahi eta nítairesira, éhica-
varéni eta náurivahi ena apamuriana téchemachanaripa.

¹⁸ Ichapemurihi eta nutuparasirahehi tayehe eta juca. Puiti eta nápechirahehi numeta-
cahehi, níyahasamurehi taicha nararihichaha ena vuíchaha náimatiequeneha eta tacayema-
quenehi eta máepenirahi ema Cristo te crusu. Eta nacatichirahi, vahí nuvaraha nasama-
raraca te véchajisíha.

¹⁹ Ena nánisami témitiequeneanayare taicha tétavicava eta tavayuasiravacahi eta najamu-
rachaqueneana. Nacasamurechucha eta tájiparacana te juca apaquehe. Tisiñavavai-
canahí, tivapinavanahi eta náichirahi eta tamauriqueneana titsirihacareana.

²⁰ Vítisera tachanerahivíhi eta anuma. Eta tacahe, vicunevaipa eta vicuchapirahi ema
Viáquenu Jesucristo ticatiurahíquene, másihairaya te anuma.

²¹ Máitsivachainapa éma eta juca víáquehesami. Apanainapa eta táimahiyare. Tacutinapa
eta macáquehéra éma, tapachinaquenehi. Tétavicavainapa eta tatumevayare taicha ichape-
quene eta máitupajijasiravahi éma. Maratahahi macapaquecha tamutu.

4

Iúrisamureeacavayare me Viáquenu

¹ Nuparapenaveana némunarqueneanahi, tétavicavahi eta nuvarairahi nímahahe, taicha nucajamurahehi éti, tétavicavahi eta núsismurevahi ícha. Puiti nuvaraha ímianava túmehéna tayehe eta éhisirahi ema Viáquenu, eti némunarqueneanahi.

² Nuvarahavare nutuparacavaca ena vichamuriana esu Evodia ésupa esu Síntique: Tachavaini eta náemunasiracaca. Vahi tacunasi eta nacatichiracacahi, taicha naparapejiricacahi te mavahuana ema Viáquenu.

³ Nutuparacavivare, piti némunarquenehi nucompañeruvahi: Pímicatacavacahini ena nani apinana esenana viparapenaveanahi, taicha éna ichapemurahi eta náimicatasiranuhi tayehe vicametarairuihahi. Náimicatacahi ema Clemente, énapa ena apamuriana ena nucompañeruanahi. Eta náijareana ena nani ticajuanaripa tayehe eta libro tiana eta víjareana víti vítarearuanayare.

⁴ Támutihini sácheana iúrisamureeacavahini me Viáquenu. Nuvaraha nápechahe numetacahe: Iúrisamureeacavahini mayehe.

⁵ Námutihini ena achaneana náimatihéhini éti eta táetaviuchirahi eta iúriava. Taicha ema Viáquenu, tiánehipa eta máitesiraya.

⁶ Vahi ecueñamava, te tatiarihinapupuca eta íchava. Ecasíñavasea eta eyaseasira ema Viya te eyujarasirana. Ehasulupayachavare tayehe jácani máijjararuheanahi.

⁷ Jéhesare, ema Viya macaepahayare eta jácani ecatisamurevana eta juca máijjarasiraheyarehi táurivayare eta esamureana étapa eta epanereruana, táichavene eta iúrujiasirahi ema Jesucristo. Eta macurisamurechirahavahi ema Viya, tétavicavahi eta tacachuriasirahi eta nacurisamurechira nácani achaneana.

Epanerechayare eta táuriqueneana

⁸ Títecapa, nuparapenaveana, epanerechinavayare tayehe tamutu eta yátupiqueneana, tayehe tamutu eta tipauchacareana, tayehe tamutu eta itauravaya tacuija taviuchahe, tayehe tamutu eta ticatajicaheyare eta íchirahi eta táuriqueneana. Epanerechayareva tayehe tamutu eta ecurisamurechirahi ema Viya, tayehevare tamutu eta ticunachacareana. Ecasamure tamutu jácani táuriqueneana apaesa ticunachacareyare tamutu eta íchaqueneanaya.

⁹ Ímianava éhica eta nímiturapiana. Ítauchayare eta numetarapianahi esamararuanahi. Ácutinu eta níchaqueneanahi ímahaqueneanahi. Ítauchaya eta juca, tásiha ema Viya, tamutuinapa tajaracaheyare eta táurivaya eta epanereruana éti.

Tinaquiquicavanapa ena machamuriana ema Pablo, náimicatasiraya éma

¹⁰ Tétavicava eta núsismurevahi eta mayehe ema Viáquenu eta máijjarasirahehi éma eta epanerechiranuhi tayehe eta íapechavahi ímiámareca eta nuyeye. Németeaca váhiquene émitisicanuhini. Étachucha eta emaitujisiravavanehi ímiámareca eta ímicatarapi eta nuyeye, tapaenumavahi.

¹¹ Vahi táichavenénahini jácani nuvayuchiravainahini eta nucamunuirava. Núsismureíchucha, nítucasamihí nútí eta nítátiravahi tayehe jácani tatiarihiquenehi.

¹² Nítucahi eta nítairesirahi puiti eta nupauréravahi. Nítucahivare te nucaimahaqueneíchaha. Nítucahi eta nucamichirahi eta nátajivanahi, te nunicapuca, váhipuca; te nucaimahaquenehipuca, te tájinahivarepuca nímahaqueneénahini.

¹³ Nútí nuratahahi nucamicha tamutu, taicha ema Cristo éma tétumechanuhi.

¹⁴ Tájinasera táichavahini eta ímicatasiranuhi tayehe eta ímiámarreruhi, evarairahi ímerezcanu eta émunasiranuhi, ítátiranuhi eta numaitujisiravahi nutanuchavahini.

¹⁵⁻¹⁶ Eti nuchamuriana, nucunachahe eta némechirahehi eta ímicatasiranuhi eta nupaisirahi eta nucametarairuirahi te apanana avasareana. Tayanapane epaenumavahinéni épanava éhica ema Viáquenu, camurianahi eta ímiámaresinanuhi eta enaquiruvana te náviharipa te Tesalónica. Énerichuvare, te núchucapa te provincia Macedonia, éti íapechavahi ímiámareca eta enaquiruvana. Jéhevare nájina apamurianainahini nacutihéhini eta ímicatasiranuhi.

¹⁷ Váhiserá étainahini jácani nuvarairahini íapechavahini ímiámareca eta nuyeye eta enaquiruvana. Nuvarahahi níminecapaequenehahe: Eta ímicataravahi te juca apaquehe, puiti te anuma ánaqui táurujiasivahi eta enaquiruvana te mamirahu ema Viya.

¹⁸ Nuti ichapemuripa eta nujacapirahi eta enaquiruvana, eta mámaquenepahi ema Epafrodito. ¡Tétavicavahi eta ecajiravahi! Eta ímiámarreruana, tacutirinehi eta inciensoinahini, eta tájijyevahi te mamirahu ema Viya. Tivapinava ema Viáquenu eta majacapirahi. Tacutihivare eta nanaquisira eta námavahuana te Templo.

¹⁹ Máimahéine ema Viya. Éma, máitsivachayare tamutu eta enaquiruvanahi. Tíjaracahayare te jácani ecamunuiravana. Émarihi téchayarehi ema Viáquenu Jesucristo. Éma, tétavacavahi eta tamutuira marataha.

²⁰ ¡Máíhecuaráquireyare eta vicunachiraya ema Tata Vicaiyaquenehi, tijarahi eta vijirauchira éma! Amén.

Eta táíhecuaráqui eta macartane ema Pablo

²¹ Eta iúrujjiasiracacahi mayehe ema Viáquenu Jesucristo, nuvaraha échajisinanuini namutu ena machaneranahi ema Viya, vichamurianahi eta véhisirahi ema Viáquenu Jesucristo. Téchajicaheanahi éti ena nucompañeruana, ena nucachanequeneanahi ani te juca.

²² Téchajicaheanahivare namutu ena vichamuriana machanerana ema Viya, ena ticavasanahi ani te juca. Nararihivare ena tiávihanahi te mayehe palacio ema Emperador, énarichuvare vichamuriana. Téchajicaheanahivare éna apana.

²³ Nuyaseuchaheparaca emutu éti me Viáquenu Jesucristo táetavicavahini eta iúricarevaya máicha.

Tamutupa eta néchajiriruvanahi eyehe.

Eta macartane ema Apóstole Pablo nayehe ena machamuriana ticavasanahi te avasare Colosas, ticajare COLOSENSES

¹⁻² Nuti Pablo, mayehenuhi apóstole ema Jesucristo, taicha manerejirunuichuhi ema Tata Vicaiyaquene, navarairahi nimitucaya eta náechajiriruva. Puiti nucajurehe eta juca carta eyehe eti nuchamuriana ecavasanahi tayehe eta avasare Colosas, taicha éti machaneraheripa ema Viya, tiúrihi eta éhisirahi ema Jesucristo. Téchajicahé ema vichamuri Timoteo.

Nuvaraha macatajicahéhini ichape ema Tata Vicaiyaquene, máijaracahéhini eta táurivaina eta epaneruana.

Ema Pablo masamairirica eta náehisirahi ema Jesús ena ticavasanahi te avasare Colosas

³⁻⁸ Puiti titecapauchahaviripa ema vémunaruquene Epafras, ema vichamurihi eta vicametarairirahi. Éma, ichape eta macunachacarevahi. Tiúrihi eta máítauchirahi tamutu eta macavanarairahi ema Cristo, máimitusirahehi yátupi eta máimiturapiana ema Viáquenu. Ema Epafras titametacahavihi eta ichararacavahi, eta éhisiraipa ema Jesucristo, etapa eta émunasiracairahi emutu éti, émunasirahivare ena iúmurivanahi te apana avasareana, machaneranahivare ema Viya, taicha ecuchapavainapa eta esiapiraya tayehe eta mávasa anuma. Viúrisamurevahi eta visamairisirahi eyehe, vihasulupayachaparacahi ema Viya Macaiyaquene ema Viáquenu Jesucristo. Tamutu sácheana te viyujarasirana, viyaseuchahehi me Viya. Ichape eta viúrisamurevahi eta táurivahi esama eta macametarairirahi ema Epafras eta yátupiquene máechajiriruva ema Viya, etupiruvahi esuapa eta ímitucasivahi, te esamainapa eta máemunasirahehi éti apanava ema Viya. Étarichuhi eta juca vímiturapihi nayehe ena apamuriana achaneana ticavasanahi te apanana avasareana. Natiarihipahi ena tisuapanapahi eta vímiturapiana.

Ema Pablo mayaseuchavaca te mayujarasirana ena machamuriana

⁹ Eta tacahe, te visamairiricahepa, viyaseuchaheparaca me Viya tamutu te viyujarasirana. Viyaseuchahehi máijaracahéni eta ítusiraina, ímatiraina yatupina eta mapanereruhi ema Viya. Máijaracahéni eta échemaraivainahini, ecaicutiarayare eta máechajiriruvana, máichavenénahini ema Espíritu Santo.

¹⁰ Viti viyaseacahi ema Viya tacuijahini etapiravaina te mamirahu taicha eti machanerahehi éma, ítauchahini tamutu eta ecaurisamurechirayare éma. Táurihini eta ecaemataneasirahi, támutuhini ítparaha eta táuriqueneana. Iápajucavapáipahivaréni eta ímatirayare éma.

¹¹ Énerichuvare viyaseacahi ema Viya máijaracahéni eta ichapequene máitupajijiásirava apaesa ecamichahini tamutu eta ecatajivairana, ácayehéhini paciencia muraca, iúrisamureacavachuchaini.

¹² Ehasulupayachahini ema Tata Vicaiyaquene eta máichuirahéni éti apanava, mavarairahi tjaracahaviyare vimutu eta tajarahiquene vícuchianahi viti machaneranahi éma.

Ema Viya mavaraha ticuchucuhaviyare

¹³ Ema Viya ticatiuchahaviripa mayehe ema Váinaraji ticaratacavahinihi. Téquecaviripasera véhicayarehi ema Machicha Jesucristo máemunaruquenehi. Vaipa véhicaimahi eta nayeherépiana ena timapicumareana. Émapa téchahavihi puiti. Viávacuhaipa eta mavanairipiana.

¹⁴ Taicha ema Viáquenu Jesucristo tépenahi te crusu eta macaepahairaya eta vipecaturana, viúchucuhapahi máicha.

Ema Jesucristo, ema tinacuchahi tamutu. Émarichuvare téchahi puiti.

¹⁵ Yátupi máimahasihi ema Tata Vicaiyaquene. Émasera ema Jesucristo tétavicavahi eta macavasirahi ema Maiya, émapa tímimatichahavihi eta máurivahi ema Maiya. Éma, ichapequenepanahi Aquenuca. Éma, téchahi tamutu.

¹⁶ Éma, mavanahihi me Maiya eta máepiyasirahi tamutu eta vímahaqueneanahi puiti: te anuma, etapa te juca apaquehe, etapa tamutu eta vimaratahaqueneanapa vímaha. Ticavacureanahivare máicha ena ángeleana. Nararihi ena majupahaqueneanahi te machacaya, énapa ena túparairucanahi, énapa ena apamuriana tijacapanahi eta vanairipi nayehe ena majupahanahi, énapa ena apamuriana ángeleana masuntaruranahi. Máepiyacahi tamutu, máítauchiraripa tamutu eta mapanereruanahi.

¹⁷ Ema Cristo manasicueneripa acane te tamirahuichaha eta táepanirávayarehi tamutu. Puíticha éma téchahi tamutu.

¹⁸ Énerichuvare ema téchahavihi vimutu viti véhicanahi éma, taicha machichaquenehaviripa. Éma, vínapuarauquihi viti véhicanahi, taicha éma tinacuchahi eta juca arairuhi véhiruhi. Énerichuhivare maratahahi ticaechepecava te máecari, éne tacaheyare eta macaechepusirahavare viti apanavare. Puíticha, éma téjacahi tayehe eta mávacurehi aquenucairahi. Ichapequeneva eta vipicauchira vimutu.

¹⁹ Taicha ema Viya májaracapa ema Machicha macutiyarehi eta masantuvahi, étapa eta máurivahi, étapa eta máitupajjiasiravahi.

²⁰ Eta mapanereruhi ema Viya eta mavanisirahi ema Machicha te juca apaquehe, tépenayare te crusu taicha máetupiricayarehi tamutu eta juca apaquehe pecatupaire, étapa tamutu eta anuma. Macaepahayarehiva eta majarareruquenehi ema Satanás émapa ema Adán. Tichavayarehi tiuri tamutu.

Eta máepenirahi ema Jesucristo, mavacharecahi eta mámirahaviyare mayehe ema Maiya

²¹ Étiripa eti, cape juca iásinequenehi ecatianacainihi ema Viya. Vahi táurihini eta epaner ruana, taicha eta íchirahi eta tauriqueneanahi. Iávamirahuinhi epauchahini ema Viya. Epicainihi éma. Émasera mavarahahi macamitiasinaheyare eta ecatianasirainihi.

²² Eta tacahehi eta máimitesirahi ema Jesucristo te juca apaquehe. Tépenahi te crusu táichavenehi eta macaepahairayare eta etapiravanainihi, masantochirahayareva, apaesa tacuijapa ecuavamirahu te jena sáchezare eta mámiraheyare te mamirahu ema Viya.

²³ Tacahe, nuvaraha étumechavayarechucha, ímiyanava táuri eta éhisirahi. Vahi ecúyacujé- quenehava eta ecuchapirahi eta íuchucuiraya. Vahi ecuemepurureca eta esuapiraipahi eta máechajiriruva ema Viya. Tétavicavahi tasuapacarevahi nayehe namutu ena achaneana te juca apaquehe, nájina tanerejiruina. Nútiripa nuti Pablo vanairucaquenenuhi, étarichuhivare tacahehi eta nucametairuirahi.

Ema Pablo matuparahaichuhi máechapajiricayare ena máumurivana

²⁴ Puiti nútí, vahi nucatiequenehavahini eta nucatajivairahi táichavenehi eta nucatuparahairahi nucametairuru eyehe eti apavasanana. Ema Viáquenu Jesucristo, ichape eta macatajivairahi te crusu víchavenehi viti. Tatiarihichahasera eta macatajivairayarehi. Eta juca nucatajivairahi, tácutihini eta macatajivairahi éma. Nucatajivanumapaipahi íchavenehi eti machichanaveana, eti vichamurianahi.

²⁵ Taicha tituparacanuhi ema Viya eta néchapajiricaheyarehi emutu éti. Nuvanecativahi mayehe eta nímitusiraheyare tamutu eta máechajiriruvana.

²⁶ Nímimatíchaheyare tamutu eta juca mapanereruanahi ema Viya, tayumurevainihi eta táitaresirahi acane, énaripa ena víachucanaveanaini vahi támutuhini náimatihini. Puítisera ema Viya tímimatíchahaviripa viti machaneranahi tamutu eta júcana.

²⁷ Tétavicavahi táramicarevahi maicha ema Viya eta máimimatíchirahavihi eta juca tayumurevainihi ímitucasivahi puiti eti apavasananahi. Eta juca tayumurevainihi, émahí ema Jesucristo titecapauchaheripahi tiávahácaheripa. Puiti, ejaacapacarépahe me Viya. Ecunevainapa maicha ema Jesucristo eta esiapiraya te mávasa anuma.

²⁸ Eta tacahe, émaquenehi ema Cristo véchajisihahi viti te vicametairuru. Étaripa te viconsejareca, te vímiturecapahi nayehe namutu nácani achaneana vicaimunaqueneanapahi, émarichuhi véchejisihahi, apaesa nácaicutiaraini tamutu eta mapanereruanahi ema Viya, náechemaravacachini táicha. Vivaraha ítamuturucaripahini te táitecapapa eta sache vímeresiraheyare te mamirahu ema Cristo.

²⁹ Eta tacahe, nupamicavahi nútí eta nucaemataneasirahi ema Viáquenu. Émaquenehi tétumechanuhi eta nuratahairahi tamutu eta nímitusirahehi emutu eti nuchamurianahi.

2

Ema Pablo tímereuchava eta máemunasiravacahi ena machamuriana

¹ Nútí ichapemurihi eta néñamiravahi eyehe eti numaimatiqueneanarichaha, énapa ena apamuriana vichamurianahivare ticavasanahi te Laodicea.

² Nuvarahahi ámutuhini étumechavahini te esamureana. Evapinavahini te iúrujisiravana taicha eta émunasiracacahi. Nuvaraha yátupina ímati ema Cristo, émahí arañumahi vanairucahi me Viya. Nuvarahahivare ímatiequenehayare eta mapanereruanana ema Viya apaesa ichapenahini eta ecasíñairavainahini eta mayehe.

³ Nájina mácuti ema Cristo, ema tíjaracahavihi tamutu eta vítupajjiasiravanahi, véchemarahivacahi máicha.

⁴ Eta tacahe, nutuparacahecha: Vahi ecuisapava nahapapicahe ena tiyururahiana.

⁵ Tayanapane viyerehicacahi, vahi vímahacacahini, núrismurehisera ticutirinehi étainahini návihahini eta ara eyehe, néchirahi eta tamajinairahi íchiravainahini, yátupihí esuapa eta éhisirahi ema Cristo.

Vímiyanava tauri eta véhisirahi ema Jesucristo

⁶ Tásiha puiti, tauri eta iávahásiraina ema Viáquenu Jesucristo. Ímiyanava eta ítauchira eta íjarasiravahi éhica éma.

⁷ Etupihayare muraca mayehe ema Cristo, apaesa tápajucavapaipa eta ítupajijiasiravaina, ímatirainapáipaicha éma. Émuracachavayare eta éhisirahi éma, yátupina esuapa taicha tacahehi eta ímitucasivanahi. Vahi ecucainajiruva eta ehasulupayachiraya ema Viya.

⁸ Échapavayaresera, taicha nararíhi ena navarahayare tiyurucacheana, navairaya éhica eta napanereruana. Vahi ecuisapava náemejecapavachahe éna. Machu náimitucahe eta nayeherepiana, náehiruhi ena náinapureanaini ticayeherepianahi tásihaquenechucha te napanereruana éna. Eta júcana, tájina tavehapica apaesainahini eta máimiturapiana ema Cristo. Vahi ecusuapa ena nani.

⁹ Ema Viáquenu Jesucristo, jéhevare éma, yátupiquenehi santo. Taicha ticuticacanahi ema Tata Vicaiyaquene eta nasantuvanahi éna. Ticuticacanahivare eta náurivahi, étapa eta náitupajijiasiravahi.

¹⁰ Éti apanavare, puiti eta iávahásiraripa ema Cristo, tísantuchahevacaripahi éma. Tájinapa ácamunuhini puiti eta iúchucuirapa. Taicha ema Viáquenu, téchavacahi ena ángeleana. Éma, túmepanahi nayehe ena éreanana.

¹¹ Ema Cristo, tímarchaheripa eta iáchanavana puiti eta iávahásiraipa éma. Ticamití-sicaheripahi eta tajamurachaqueneanainihí eta iáquehe tavarahaqueneanainihí icha eta tamauriqueneanahi. Jéhevarequene, eta emaracahi éti, ecachuricahi eta nacamarcairahi ena israelítana náechatisirahi eta náquehe.

¹²⁻¹³ Éti, cape juca iásinequenehi, vahi ímatihini ema Cristo. Vuíchaha ecamarcaini mayehe. Tímicutijiricavahi táepenaquenénahini eta iáchanavana taicha eta epecaturanahi. Tímicutijiricavahi épenaquenénahini, eacarasihini tacutihí eta macaecarasirahi ema Cristo te máecari. Puitísera, eta ecasiñairaripa ema Jesucristo, ema Viya macaitaresinaheripa eta iáchanavana. Puiti ticutiripa échepurénaripahini éti, tacutiripahi eta máechepusirahi ema Cristo, maicha ema Maiya. Eta ecaicachasiraripa eta mayehe ema Cristo, táicutiarahi eta juca macaechepusiraripa eta iáchanavana.

¹⁴ Taicha ema Viya, eta máimairahi eta macatajivairahi ema Machicha máepenirahi te crusu, típerdonachahaviripa eta vipecaturana. Énerichuvare macaepaharipa eta vitapiravana tímicuñacahaviyarehini. Puiti matapiravarehaviripa eta máimairahavíhi éma.

¹⁵ Eta máepenirahi ema Jesús tayehe eta crusu, máitahacavacaripa ema Váinaraji énapa ena machanerana éreanana. Tájinarinehi natumevainahini eta mayehe. Puiti táquijicavacahi éna, te vipiaraca te máijare ema Jesús. Vaipa típauchahavi anaimahi.

Ema Pablo mavanecavaca vahi nacusuapa ena tiyururahiana

¹⁶ Puiti nutuparacahe: Vahi ecusuapavaca ena navarahahi éhica eta nayeherepiana, apanapanenejiqueneana, nácani vahi tísapaheanaimahi enica eta apamuriana tinicacareana. Váhivare ecusuapavaca te ticamesajiricaheanahipuca epicaucha eta napies-tarana. Étaripa eta ecaematanerana te aracheruana caje, navarahaya epicaucha. Étaripa eta sache sávarumuhuana, navarahayareva epicaucha.

¹⁷ Tamutu eta júcana, vaipa tásuapacare taicha náchucarapianachucha éna. Étasera eta juca máechajiririvanahi ema Cristo, jéhevare eta yátupiqueneanahi. Tísuapacareanahi.

¹⁸ Eta tacahe, vahi ecusuapa ena nácani navaraha típicararecaheana, te náichahepuca: “Vahi tíuri eta juca éhiruhi”. Váhivare ecusuapavaca, te ticamesajiricaheanahipuca éstacava, étapa eta ejirauchírainaji ecasiñairainaji ena ángeleana. Éna náimijachahi tacarichu eta ejacacareya me Viya taicha eta juca. Ena nani, ticasíñavavaicanahi taicha tímijachavari-pahi máechajicavacahíhi ema Viya. Vaipa navaraha nacainajiru eta navayucasivanahi. Tamutu eta juca tímereuchavacahi éna, máehicarahanahi ema Cristo.

¹⁹ Vítísera vímutu víti apanapanenejiquenehavianahi véhicanahi ema Jesucristo. Eta víúrujasiraipahi éma, vaipa apaimajihavinahini máicha. Tímicutijiricavaipahi mácani achane máítucahi eta macajurusirahi ena machichanaveana. Náurujacahi namutu nácani machinanaveana, machinenana, mámarinaveanapuca. Émanarichuhisera ema téchahi. Ene vicahehi víti véhicanahi ema Cristo. Macarichu ema tírchahavíhi. Vímicatajiricacahi vícituajiricacahivare vímutu maicha ema Viya.

20-22 Puiti, eta éhisiraipa ema Cristo t́iminajica heripa eta éhisirainihi eta nayeherepiana ena achaneana t́amauriqueneana. Tacahe, vaipa ecusuapa ena ticamesajiricahe nahi te navanecahepuca: “Éhica havi eta viyeherepiana tayehe eta vinisiraya, apaesa e japanucare eta me Viya”. Machu navayuacahe ena nani, taicha tamutu eta juca nayeherepianahi, tájina vahi étaparacaina tayehe eta viyapiraina te anuma. Eta juca nayeherepianahi, tásihaqueneanachucha te nachuti ena náchucanaveanaini.

23 Eta juca nayeherepiana cútirinehi yátupi quenénahini tásihaquenénahini eta me Viya. Tásihasera vahi táimanaca. Ichape tayerehi eta máechajiriruvana. Ena nani, t́imijachavanahi nacurisamurechahi ema Viya. Tépiyacavanaripahi mánsuanahi eta náichirahi eta muraca penitencia. Téstacavanapa nájararecaripa eta naeche tayehe eta tacatiquene. Tamapurujhisera eta náichirahi, náviraichuhi náichahi eta tajamuraravahi eta náqueheana.

3

Tihapasamurerecahaviyare eta vivarairayare véhica eta máurivahi ema Cristo

1-2 Puitisera arairupa eta itaresira maicha ema Cristo. Étainapa tihapasamurerecaheyare eta máurivahi éma étapa eta itecapauchira éma tayehe eta anuma máejasihahi te mavaure ema Maiya. Vaipa étaimahi tihapasamurerecaheyare eta eyeherepianainihi t́amauriqueneanaini.

3 Taicha íjararuvaipe eta ínjisirayare eta júcana. Puiti ticaitarecaheripa éma táichavenehi eta iávahásiraipa ema Jesucristo. Iúricahi puiti. Vuíchahasera ímahahini tamutu eta táetaviuchiraya eta iúricarevaya.

4 Téhesera te machava ema Viáquenu Jesucristo, máitsivachainapa eta iáqueheanayare, tajarahiqueneanayare. Tásiha, ecachenapaipa éma. Tétavicavaya eta viúricarevaya vimutu máicha.

Vínajicayare eta viyeherepini eta viásinequene

5 Tásiha puiti, ínjaicainapa eta eyeherepianaini t́amauriqueneanahi. Nacuijapa nacuveha esu apana esena. Vaipa ecupanerecha eta panerercana t́amauriqueneana. Vaipa ecujamuracha icha eta t́amauriqueneanahi. Vaipa tihapapiricahemahi eta ecaimahaquenéraina, taicha ena titanucanahi eta juca, nacutihí nácani t́icasíñarajiana.

6 Ena masuapajirairahana, náichahi tamutu eta juca t́amauriqueneana. Étapa t́imicuñacarehi éna, taicha táimiyusemacaichucha ema Viya.

7 Éti apanavare étainichuhivare iávacuhainihi cape juca iásinequenehi.

8 Puitisera ínjica tamutu eta júcana: esemarajivana, ecatianaraviana, evainarajivana, iúmeharaviana, étapa eta táifíemahiqueneana eta échajiriruvana.

9 Vahi ecuépiyaequenehacáca. Ímereuchava yátupina eta ínjisirahi tamutu eta eyeherepianaini cape juca itaresirainihi.

10 Puiticha, amairiharipahi arairupa eta juca itaresirahi, machichaheripa ema Viya. Tajurucapaipaini eta ecutirayare éma eta masantuvahi étapa eta máurivahi éma.

11 Tayanapane apavasananjihavihi viti véhicanahi ema Viáquenu, émasera tihetamurichahaviripa viti israelítana, étipa eti apavasanana, énapa ena máicachasianana. Te mamirahu ema Cristo, vaipa apavasananjihavinahini, étanarinepa eta vímahí maicha éma. Tayanapane tájina emarcainahini te iáqueheana. Váhiserá ticachuricaheanaimahi ena ticamarcanahi. Tayanapanevare ecaquenuhipuca. Váhivaresera vicachuricahemahi viti líbreanahi. Ema Cristo tiávaháchahavihi vimutu.

Vicaravahuinapa tiúriyare eta vítaresira

12 Ema Viya tétavicavahi eta máemunasirahehi. Eta tacahe, tinerejicahehi eti machaneranayarehi éma, ecutipaipe éma, eta masantuvahi. Eta tacahe, puiti étijiváinapa ecaravahuyare eta táurivayare eta itaresirayare. Étaviuchayare eta e japanuravaya, émunarahivareva. Ímerecaya eta emansuvayare. Ecamicha tamutu.

13 Te tatiarihinapuca eta náejecapiravaina ena echamuriana eta eyehe, vahi ecucaticha, ácayehevare paciencia. Eperdonachacayare, ecutiyaere ema Cristo eta maperdonachirahehi éti.

14 Tamutu eta juca numetaruheanahi, itauchayare. Énerichuvare tiápajucavayare eta émunaravayare. Taicha te vémunajiricacahi, tétavicavayarehi eta viúricarevaya eta viúrujíásiracacahi.

15 Vahi ecuemepureca eta iúrivahi maicha ema Cristo. Ísapavavare mayehe ema Cristo macanaracahe tamutu eta epanereruana. Taicha tacahehi eta máichuirahahi, mavarahahi étanayaréichuhi eta epanereruana eta iúrujíasiracacahi. Ehasulupayachahivaréni tamutu sácheana.

¹⁶ Étaviuchahini eta iúnasiráina te esamureana eta máechajiriruvana ema Cristo. Étumechacacahini eta ímitusiracacaya eta échemaráivayare. Evapinavahini te esamureana eta ejiraira te iúrujisiravana. Ejirayare eta majiriahuaana ema Viya, eta ehasulupayachirayarehi éma.

¹⁷ Tamutu jácani ecaematanerana, échajirisiravana, ímereuchava eta machaneraheirahi ema Viáquenu Jesucristo, iámirapaipa eta májare. Te tamutu eta jácani íchararacavana, ehasulupayachayarehi ema Tata Vicaiyaquene.

Vímerecayare eta viúrivera nayehe ena vichamuriana

¹⁸ Étiripa eti esenana ecaimaqueneanaripahi, epicauchayarehi ena ímanaveana. Esuapajirahiyare eta nayehe, taicha etuparahahi eta éhisirahi ema Viáquenu.

¹⁹ Eti apanavare eti náimanaveanahi, émunacayare ena eyenana. Vahi ecuímipananajica éna.

²⁰ Eti apanava eti amaperuana, esuapayare ena ticachichaheana, esamararasinavaya te jácani náechajisiraheana. Te ítaucha eta juca, ecurisamurechayare ema Viya.

²¹ Énerichuva eti náiyana, vahi ecuímíyusémaraca ena echichanaveana apaesa vahi nacuípuñacava eta eyehe.

²² Étiripa eti ecaquenurecanahi, esuapajirahiyare nayehe ena iáquenuanahi. Ítauchayare eta navanairipianahi. Tátupiruva te esamureana eta ecaematanerana. Vahi tácarichuimahi ítaurahiyare te natiarihi te echacaya ena iáquenuanahi. Te nájinahipuca, tacutiyarerichu eta ecaematanerayare. Taicha ema Viya tímararacahehi. Éma epicauchayarehi.

²³ Evapinavayare icha eta evanecasivanahi nayehe ena iáquenuana, támicutijiricavahi émainahini ecaemataneca ema Viáquenu.

²⁴ Taicha eti mamusurahehivare ema Cristo, ema tíapajucavahi iáquenupanahi. Écharichuhi éti eta tatiaririhahi eta ícuchihi íjaracasiyarehi eta mayehe.

²⁵ Énasea ena téjecapavanapuca, máimararacahi ema Viya eta náejecapiravanahi. Étáinapa tímicuñacayarehi. Nájina mamunanequeneanaimahi.

4

¹ Éti apanavare eti náquenuanahi ena músuana, tíuriyareva eta ecavanairipiraya, vahi ecuímipananajicavaca. Ítauchayare íjaraca eta nacamunuqueneanahi. Échavayare éti apanavare eta máimararasirahehi ema Viya, émahí íáquenuquenehi.

Eta téqueneha matuparasirahavihi ema Pablo viti véhicanahi ema Viáquenu

² Puiti emutu éti, étumechavachucha eta eyujarasirahi eta me Viya. Vahi ecuyacujihini. Énerichuvare ehasulupayachaparacayare tamutu me Viya.

³ Énerichuvare ímicatacahavi eyujarauchahavi, apaesa vítujicavapaini viúchucuha, vímíyanavapaini vímimaticahini ena achaneana eta juca tayumurevainihi mayehe ema Cristo. Étavenehi puiti présunuhi táicha.

⁴ Nécatíacahecha ímicataganu eyujarauchanu apaesa nítujicava nucametairiru, taicha nutuparahaichuhi me Viya.

⁵⁻⁶ Táuri eta ítaresiraina nayehe ena máehicarahanarichaha ema Jesús. Tátupiruva tauri eta échajirisiravana, tapicauchacarehi. Táurivare eta ejicapiraina te natiarihinapuca nácani tiyaserecaheanayare. Ecamapuravachaha puiti juca sácheana eta ímitusiravacahi.

Eta táichecuaraqui eta máechajiriruva ema Pablo

⁷ Máimahaherinesera ema vémunaruquenehi vichamuri Tíquico. Éma, títametacaheyare tamutu eta nichararacavahi núti taicha éma nucachanehi eta te juca návihahi. Tétavicavahi eta máimicatasiranuhi eta vícaematanearahí me Viáquenu.

⁸ Eta tacache, névatacahi máiteca eta ara eyehe. Éma tímetacaheyare eta víchararacavahi. Énerichuvare tétumechaheyare éti apanava.

⁹ Énerichuhivare névatacahi ema Onésimo némunaruquenehivare. Éma, tíasíhahi eta ara eyehe. Puiti émarichuhi vichamurihi eta te juca. Tétavicavahi eta máítauravahi eta macaemataneasirahi ema Viáquenu. Ena nani apinana, éna títametacaheanayare eta víchararacavahi víti te juca víávihahi.

¹⁰ Téchajicahe ema Aristarco, ema nucutíquenehi eta nucaeratairahi. Téchajicahevare ema Marcos, ema macheji ema Bernabé. Éti écharipa eta máitesirayare eta ara eyehe ema Marcos. Te máitecapauchahepa, tíuriyare eta ejicapirayare éma.

¹¹ Énerichuvare téchajicahe ema Jesús Justo. Nacarichuhi ena nani mapanana nujaneanahí israelítana tímicatacananahí. Nacachuricahi ena apamuriana nujaneanana

vichamurianahi. Ichape eta náimicatasiranuhi eta vicametarairuirahi eta máechajiriruvana ema Viya. Ichape eta nacurisamurechiranuhi éna.

¹² Téchajicahevare ema Epafra, ema eyehe pastor. Ema maca, yátupiquenehi mavanara ema Jesucristo. Tétavicavahi eta máecharairisirahehi éti te mayujarasirana, mavarairahi ímiyanavahini étumechava yátupinahini ítauchahini eta mavarahaqueneana ema Viya.

¹³ Ichapemurihi eta nímararasirahi nútí ema Epafra eta máecharairisiráhehi éti, énapa ena ticavasanahi te avasareana Laodicea étapa Hierápolis.

¹⁴ Énerichuhivare téchajicahe ema médico Lucas, ema vémunaruquenehivare. Téchajicahevare ema Demas.

¹⁵⁻¹⁶ Tacahe, te támutupa eta échajicuirayare eta juca nucartane, ímiamarecaya nayehe ena apamuriana vichamurianahi ticavasanahi te avasare Laodicea. Nuvarahavare échajisinanuini éna. Échajisinanuvare ema Nínfas, énapa namutu ena tíurujicavarahanahi te mapena. Nímiamarécahivareséra eta nucartane nayeheyare namutu éna. Te táitecapauchaha, échajicuhayarevare éti apanava.

¹⁷ Piti apanavare piti Arquipo, nutuparacaviyare: Pítauchayare tamutu eta juca pématanerepianahi, taicha eta pituparahahi me Viáquenu.

¹⁸ Nuti Pablo nútiquenepa nájuca eta juca táichecuaraquihi eta nucartane tayehe eta némechajirisirahehi. Nutuparacaha vahi ecuemitisicanu te eyujarasirana. Eyaseasinanu eta núchucuirávanéna.

Nuyaseuchaheparaca me Viáquenu Jesucristo, táetaviuchahini eta iúricacarevaya máicha. Tamutupa eta juca néchajiriruvahi e yehe.

Eta macartane ema Apóstole Pablo nayehe ena machamuriana ticavasanahi te avasare Tesalónica, ticaijare 1 TESALONISENSES

¹ Nuti Pablo, némechajiricahe eti nuchamuriana ecavasanahi te Tesalónica. Téchajicahe ema Silas*, émapa ema Timoteo. Vímiama recahi eta juca vicartane taicha eta iávahásiraipa ema Tata Vicaiyaquene, táichavene eta éhisiraipa ema Viáquenu Jesucristo. Nuvaraha macatajicahehíni ema Tata Vicaiyaquene, émapa ema Viáquenu Jesucristo; nájaracahehíni eta táurivaina eta epanereruana.

Ema Pablo tíurisamure eta máechirahi náimiyániravahi náehisirahi ema Cristo

² Viti vihasulupayachaparaca ema Viya eyehe emutu eti. Tamutu sácheana, te viyujarasirana, viyaseuchahe me Viya.

³ Taicha tamutu sácheana vécharairicaheparaca eta ímeresirahi eta esuapirahi éhisirahi ema Viáquenu Jesucristo, étapa eta epamisiravahi ecaemataneacahi yátupi táichavene eta émunasirahi éma, étapa eta ecamichirahi tamutu táichavene eta ecuchapiravahi eta machaviraya. Ema Tata Vicaiyaquene máimaha tamutu eta ícharacavana.

⁴ Nuparapenaveana, éti, máemunaruánaripa ema Viya. Véchahi eta manerejisirahehi éma.

⁵ Taicha te vímitucahepa eta máechajiriruva ema Viya tayehe eta víuchucuiraya, éti etupiruvahi ejacapa eta vimetarairuana taicha ímatihí yátupiquenériahi mayehe ema Viya. Ema Espíritu Santo tinacasamurechahehi eta táurivahi esama eta vímitusirahehi. Ímatihavíhi eta mavanesarahavíhi ema Viya. Ímahahívere eta víúrivahi eyehe.

⁶ Jéhesare puiti, étijivapa eta épaniravahi éhichavi eta víúrivahi víti, vícutiyare eta máuriva ema Viáquenu. Ecátajivanúmahi ichape taicha eta ejacapirahi eta vimetarapiana. Íurisamurehiséra maicha ema Espíritu Santo.

⁷ Tacahe, ena apamuriana vichamuriana ticavasanahi te tinapaica eta Macedonia étapa te Acaya, eta náimairahi eta yátupirahi eta esuapirahi, étarichuhi náehicahi éna.

⁸ Éti ímisamahi eta máechajiriruva ema Viya namutu ena achaneana ticavasanahi te Macedonia étapa te Acaya. Téchacarehívere te tamutu avasareana te jácáni vítecapihapahi eta juca yátupirahi esuapa ema Viya. Vaipa tácomesahíni vimetataracavacahíni éna eta esuapajiraivahi éti.

⁹ Timetacahavianapahívere eta etupiruvairahi ejacapa eta vimetarapiana, étapa eta ínajisiraipa eta esíñarajianaini, équesiravarípa eta ecajúherapa yátupi ema Viya. Púiticha tépanavaripa eta ecaemataneasirahi éma. Éma, yátupiquenehi Viya. Yátupiquenehívere eta masamariva.

¹⁰ Énerichívere timetacahaviana eta ecuchapirahi eta machaviraya ema Machícha ema Viya máshairaya te anuma, ema maca Jesús émarichu ema macaechepucasiquenehi te máecari maicha ema Maiya. Émara ticatiuchahavíyare tayehe eta ecuñaraqúí náicuchíhi ena masuapajirairahana.

2

Eta máematanerepíhi ema Pablo nayehe ena ticavasanahi te Tesalónica

¹⁻² Écharichuhi eti nuparapenaveana, tamutu eta náichirahavíhi ena achaneana, tímicuñachavianahi ánaqui te avasare Filipo. Váhisera vácatsímavahíni te vítecapauchahépa ani, vímíyanavaríchucha vícametarairu taicha tétumechahávírichucha ema Viya eta vímitusirahehi eta máechajiriruva, camurianahíneni ena ticatianacahavianapahi. Váhisera támapurujihíni eta véjirairahehí. Éti etupiruvahi ejacapa eta vimetarairuanahi.

³ Taicha vahí véjecapavahíni eta vímitusirahehí. Váhívere étainahíni vipanerechapahíni eta tájiparacana tamauríqueneana, váhívere vívayuaráquina eta véchajisírapahi.

⁴ Víti manerejiruhavíhi ema Viya taicha máechahi eta vítauchirayarehi eta vítuparacasivayarehí mayehe. Eta tacahe, títiparacahavíhi muraca víámáyare eta máechajiriruva nayehe ena achaneana eta náuchucuiraina. Étaichuhi eta juca véchajiriruvanapahi. Vahí étaina vívaraha táememunacahávíhíni nayehe ena achaneana. Vítauchahi eta mavarahaqueneana ema Viya eta vícurisamurechíhahi éma, taicha éma, máimararacahi eta vísamureana.

* 1:1 Ema Silas, eta májarequene Silvano te náechajiriruva ena romanoana.

⁵ Écharichuhi éti eta vicayemaqueneanapahi, vahi vémetserajiricavapahini eyehe. Váhivare étaina vétserauiinapahini vivereacahehine eta eplatane. Vitupiruvapahi eta vicayemaquenehi te mamirahu ema Viya.

⁶ Vahi vápanerechahini náetserajicahavihini ena achaneana, étiripa, viratahahinene vímereca eta vituparahaquenehi mayehe ema Viáquenu Jesucristo. Váhiserá vávarahahini vímerecava vácutihini mácani achane ticamusura.

⁷ Véchapajirícahehiséra tacutihí eta suéchapajirisira suémunasira súcani esena ena suchichanaveana.

⁸ Ichape eta vémunasirahehi. Vímitucahehi eta máechajiriruva ema Viya eta iúchucuiraya. Víjaracavahi ichape te visamureana, vivarairahi esupa éti apanava, taicha vémunacahehi.

⁹ Nuparapenaveana, te vinasiqueneripa eta eyehe, eta vicametarairuirahi eta máechajiriruva ema Viya, ímararacahavirichuhí éti eta vicaematanerahi muraca eta vítátijirisi-ravahi. Tamutuhi sácheana, yátiana vicaematanehi, taicha vahi vávarahahini vétsepaná-racahéini eta vinicaquenerepi.

¹⁰ Éti enecapaquenehahi tamutu eta vícharacavahi. Tímaracahávhivare ema Viya. Vitupiruvahi yátupi eta víúrvahi eta eyehe eti vichamurianahi. Tájina naviyahini nayunaca ena apamuriana achaneana.

¹¹ Énerichuvare échahi eta vétumechirahehi, émanapachuhi viconsejacha vicutihí mácani achane tiuri eta maconsejachira ema machicha.

¹² Vécatiacáhehi ichape eta iúrvaina éti, ímerecaya eta macáchichairaherípa ema Viya, taicha íchuarecasivaipa mayehe eta ecachaneraya éma tayehe eta mávasa te anuma, te táviahí eta majaraiva.

¹³ Eta tacahe, vihasulupayachaparaca ema Viya eta táurivahi esama eta máechajiriruva vimetarapianahi. Éti, etupiruvahi ejacapa eta vimetasirahehi taicha eta esamirahi yátupiquenehi, tásihaquenehi ema Viya. Ímativanehi vahi vipanereruinchuchaini víti, émainapucaini mácani apana achane. Eta juca eta tíúrichahehi eti esupanahi.

¹⁴ Énerichuvare tíúrihi eta ecamichirahi eta ecatajivairahi nacatianasirahehi ena ejaneanana, ecutihí ena apamuriana vichamuriana ticavasanahi te Judea. Nuparapenaveana, ene nacahehi eta nacatajivairahi naicha ena najaneananarichu israelítana, táichavene eta náehisirahi ema Viáquenu Jesucristo.

¹⁵ Ena nani nujaneanana nacapacahí ema Viáquenu Jesucristo nacutihí ena náchucana-veánaini eta nacapasiravacahí apacape ena profetanaini. Tipanajiricahavianavare víti. Ena nani náimiyusemacahí ema Viya. Váhivare návaraha nasamahini ena apamuriana achaneana eta máechajiriruva ema Viya.

¹⁶ Taicha te vivarahainipa vímitucavaca ena apavasanana apaesa náuchucuhahini éna apanava, nacatichavare ena nujaneanana eta vímitucavaca éna. Tíchejimíríuchahavianapa. Eta tivíuchahi, tivayuchavapaichucha eta natapiravana. Ema Viya vaipa macamichahini eta náječapírávana. Púitiserá táitecapáuchainapa eta náicuñaya máicha.

Ena Pablo mavaraha tíápechava máejiravaca ena machamuriana

¹⁷ Nuparapenaveana, tayanapane viyerehicacahí puiti juca cájeana, vahi vímahacacahini, tanasihisera vicaimairuhehi te víúquihana. Vivarahaine víjahúchavahini vítecapauchahe vímahahéini.

¹⁸ Nútiripa nuti Pablo, ichapemurihinene nuvaraha níteca eta ara eyehe, énapa ena apinana nucompañeroana. Émasera ema Satanás tíchejimíríurucahávhichupáca jácani.

¹⁹⁻²⁰ Véñamavahi víti eta eyehe taicha vivarahahi tánasihíni eta iúruva eta machimapi-raheya eta machaviraya ema Viáquenu Jesucristo. Tásiha, víti vicuchapavainapa eta vijacapirayare eta vícuchihi mayehe éma. Víúrisamurénapa víti te jena sache, íchavenehi éti.

3

¹⁻² Eta tayerevaipahi eta vimaimanasirahehi, tétavícvahí eta véñamiravahi eta eyehe. Vaipa víúrisamurehíni. Vivarahaipaicha vecha tájahapuca eta ícharacavahí. Tásiha, vipanerechapa vévataca ema vichamuri Timoteo, máiteca máimahapanáhe. Vinasipa víti vicarichu te Atena. Taicha ema maca Timoteo, émarichuhi mavanara ema Viya, émarichuvare vícutiquenehi eta vicaematanerahi tayehe eta máechajiriruva ema Viáquenu Jesucristo. Nuvanecahi tímícatapanáheyare témuracacháheyare eta esupajiravaina,

³ apaesa nacuíja nacuchavacuejehava tayehe eta ecatajivairana naicha ena ticatiana-rahiana. Écharichuhi éti eta vicatajivairaya táichavene eta véhisirahi ema Jesucristo.

⁴ Váhiserá táramicare eta juca, taicha vimetacahévanehi te vinasiquenerichaha eta eyehe, eta vicatajivairayarehi. Jéhesaréinehi títauchavahi púitiripa, ímaharipahi éti.

⁵ Eta tacahe, tétavacavahi eta néñamiravahi núti eta eyehe. Vaipa núrisamurehini íchavenehi éti. Tacahe, nuvanecapa ema Timoteo máimahapanáhe te enasirichuhipuca eta éhisirahi ema Jesús. Taicha nímicauyayahehi máquipaicahehíni ema Satanás, támapurujihini eta vicaemataneasirápa ema Viya.

⁶ Púitsera eta machaviraipa ema Timoteo, másihairahi eta ara eyehe, timetacahavipa tájjinairahi íchiravainahini eta éhisirahi ema Viáquenu Jesucristo, étapa eta émunasiracacahi. Timetacahavivare eta écharairisiráhávíhi émunasirahavíhi víti, evarairahi íjahúchavahini ímahahavi. Vicuticacahi eta vivarairahi vímaháhe víti.

⁷⁻⁸ Eta tacahe, nuparapenaveana, véchararaháinehi eta visamairirisirahehi eta táurivahi eta éhisirahi ema Viáquenu. Tacamitiacarine eta véñamiravahi. Étumechahavirinehi eta vicatajivairana. Tichavarinehi eta víurisamureva.

⁹ ¡Ichape eta vihasulupayachirahi ema Viya táichavenehi eta iúrivahi! ¡Tájinarine tácutihini eta víurisamurevahi mayehe ema Viya, íchavenehi éti!

¹⁰ Tamutu sácheana, yátiana, viyujaracahi mayehe ema Viya, viyaseacahi vítujisirávainahíni víápechava vímaháhe. Vímitucahehíni eta apamuriana tútuacareana tayehe eta juca véhisirahi ema Jesús. Támutuhini ítuca.

¹¹ Eta tacahe, viyaseacahi ema Tata Vicaiyaquene émapa ema Viáquenu Jesucristo nájjaracahavíhíni eta vítujisirávaina víteca véjjirapanáhe.

¹² Énerichuvare macajurucahini ichape ema Viya eta émunaraivaina nayehe ena echamuriana, énapa ena apamuriana achaneana, tácutihini eta vémunasirahehi víti.

¹³ Májjaracahéni táurivaina eta esamureana tacuija etapiravaina, máepachinachahini eta íachanevana apaesa ecurisamurecha ema Tata Vicaiyaquene te jena sácheyare machaviraya ema Viáquenu Jesucristo, másihairaya te anuma, mámirayarepahi ena apamuriana manerejjiruanahi.

4

Mavaraha ema Viya táuri eta vítaresiraina

¹ Tiuri puiti, nuparapenaveana, vituparacahecha muraca te májjare ema Viáquenu Jesucristo. Táuri eta ítaresiraina puiti juca epaisirayare. Te tauri eta ítaresiraina, ecurisamuréchayare ema Viya. Puiti íápajupanaváinapápa eta iúrivaya.

² Ítucaripahi eta juca ímitucasivanahi viyehe. Étarichuhi vivanecasivanahi mayehe ema Viáquenu Jesucristo.

³ Taicha eta juca mavarahaquenehi ema Viya, tíápajucavayare eta iávahásirahi éma. Vaipa ecuquicha eta pecatuana. Nacuijapa nacuveha súcani apana esena. Ésuripa esu esena, vahí sucuveha ema apana achane. Énaripa ena echichanaveana, tacuija eta natuhusivaina.

⁴ Nacuchapa eta náitauchiraváina yátupina te mamirahu ema Viya. Emutu éti, yátupina eta émunasiraina ena eyenanaveana. Tauri eta ítaresiraina te epenana.

⁵ Vahi ecucutipa ena ajairana esenamareana. (Éna náichahi eta juca taicha eta namaimatirahi ema Viya.)

⁶ Nacuija nacuveha esu mayena ema mácani echamuri. Taicha ema Viya, yátupi eta máicuñasirayare nácani ena tíchanahi eta juca. Étarichuhi eta vímiturapianahi eyehe cape juca te vítecinapa eta ara eyehe.

⁷ Taicha víti máichuhaqueneánaripa ema Viya, mavaraha tíúrinayare eta vítaresiraya, vaipa víchaimahi eta juca tamauriqueneana.

⁸ Tacahe, ema mácani tépuruhi eta juca vímiturapianahi, máepuruhivare ema Viya; taicha mavanairipianahi eta juca, vimetacasivahi víti mayehe ema Espíritu Santo, eta mávahásirahavíhi.

⁹ Puiti numetacáhe núti: Tájinapa vaipa néñamava eta eyehe eta émunasiracacahi, taicha ema Viya tjjaracaheripa eta émunasiracacahi.

¹⁰ Vaipa néñamavahini taicha nusamairiricaheipa eta émunaraivahi nayehe ena echamuriana títecapachaheanahi tíásihanahi tayehe eta táunavanahi eta iávasa Macedonia. Nuparapenaveana, puiti vituparacahecha íápajucavayare éti eta émunaraivaya.

¹¹ Énerichuva víápechava vituparacáhe tauri eta ítaresiraina. Échapajirica eta émataneana. Ecaemataneacava yátupina, eviyihayare eta ecamunuqueneana tásihaqueneánayare te evahuana,

¹² apaesa tacuija ecucamunu te epenana. Te ítaucha eta juca, típicachaheanayare ena apamuriana achaneana.

Vahi téñamavacareana ena vichamurianaini náepenaqueneana taicha tíápechavanayare títarecanayare

¹³ Nuparapenaveana, énerichuvare vivaraha vimetacahe eta náichararacavayare ena vichamuriana náepenaqueneanaripa. Vahi ecucatisamureva nayehe. Ena apamuriana achaneana ticatisamurevanapa te náecarapana ena náepenaqueneana, taicha vahi nácasinavahini me Viya, nacunevahini eta nápechiravaya téchepucana te náecari. Vahi ecucahe éti.

¹⁴ Vítí visuapahi eta máechepusirahi ema Jesús te táequenepa eta máepenirahi. Tásiha, visuapahivare eta macaechepusirahaviya ema Viya te vépenapa, vicáchanénapa ema Jesús viti véhicanahi éma.

¹⁵ Eta tacahe, vimetacahe eta juca vímitucasívanahi mayehe ema Viya. Te machavapa ema Viáquenu Jesús, te vuíchahapuca vicuepenahi vítí, vahi vicainapucavaimahi nayehe ena náepenaqueneana.

¹⁶ Taicha émarichu ema Viáquenu tiúcupaicaya tichavayare, tiásihaya te anuma. Tipiaracaya muraca tíchuarecaya. Ema Arcángele énerichuvare típiaracayareva. Ticaemayareva eta machuja ema Viya. Tacahe, téchepucanainapa títapucanaya ena náepenaqueneana ena tisuapajirahianahi mayehe ema Cristo.

¹⁷ Tacahe, viti vítareruanaichaha viyanainapa. Vimutu vicáchanénapa ena náepenaqueneánani. Viácapajicáinapa ema Viáquenu te anuquehe te táviahahi eta úcaji. Tásiha, máichecuarequireyare eta vicachaneraya ema Viáquenu.

¹⁸ Eta tacahe, emetajiricacayare nayehe ena echamuriana tamutu eta juca vímiturapianahi, apaesa nacurisamurechavaya éna apanava.

5

Tíaramicareyarechucha eta machaviraya ema Viáquenu

¹⁻² Nuparapenaveana, vahi ecuemitiscava. Ecunevaicha yátupina, taicha téchacareipa eta táramicarevaya eta máitesirayare ema Viáquenu. Tacutiyaie mácani tíamereca te yati, nájina tinecapaina. Ene tacaheyare eta máitesirayare ema Viáquenu. Váhisera vécha tájamuhuyarepuca.

³ Énaripa ena achaneana vuíchaha náemeteacaimahi eta tánehiriripa eta máitecapiraya. “Víuirichucha puiti. Tájina víchiravaimahi” nacaheyare éna. Vahi tinecapauchavanaimahi eta táitecapauchiraya eta náicuñayare tacutiyaie esu súcani esena ticajari, tíjahúchavapa ticati eta sujuhe eta suínasiraya. Ene nacaheyare éna. Tájina najunaiyaimahi.

⁴ Étiserá, nuparapenaveana, écharipa eta juca. Vaipa iáramecaimahi te jena sache máitecapiraya ema Viáquenu, taicha tamutu sácheana ecuchapahi eta máitecapiraya.

⁵ Taicha vítí víáviahahi te majarivahi ema Viya, viti vipaicahi te sáchemuhu. Vahi táíñehavina eta yati, taicha vínjajicaipa eta tamapicuquene.

⁶ Eta tacahe, tavaraha vicuneuchava tamutu sácheana, vijaneasiravainahini muraca. Váhini vicucutihini ena tivayuchavanahi tímacarácavana, tájina náechaquenena éna. Vítiserá vijaneacavaya tamutu sácheana, yátiana. Tájina víchiraváimahi.

⁷ Ena achaneana, tímacarácavanahi te yátiana, ena apamuriana ticávahaháracavánahi te yátiana. Vahi najaneacavahini éna.

⁸ Vítiserá tamutu sácheana vicunevayare. Tiúriyarehi eta vipaisira, tájina víchiravaimahi. Yátupina eta véhisira ema Jesús. Vímiyanavahini eta vémunasiracacaina. Vácasiñavahini eta macuchucuirahaviya éma. Tájina vahi vicuyacujiequenehava eta vicuchapiraya eta jena sache.

⁹ Taicha ema Viya manerejiruhavihi eta macuchucuirahaviya máichavenehi ema Viáquenu Jesucristo. Vaipa vicaicuñaimahi.

¹⁰ Ema Jesucristo tépenahi te crusu vítivenehi, mavarairahi vítarecayare vicachaneyare éma. Te máitecapa éma, macaechepucainapa ena náepenaqueneana vichamurianaini. Tásiha, viti vítareruanaichaha tíhetamurichahavinapa, taicha mavarahahi vicachaneyare éma.

¹¹ Eta tacahe, étumechacaca, ecaticacavare. Núti nucasiñavahi eta eyehe eta íchirapaipa puiti eta juca.

Ema Pablo tímiyanava eta maconsejachiravaca ena machamuriana

¹² Nuparapenaveana, énerichuvare vituparacahe eta epicauchiraina ena víyarahana pastoreana taicha ena ticonsejachaheanahi, tímitucaheanahi eta juca éhisirahi ema Viya.

¹³ Échapajiricavacaya éna. Émunasinávaicha, taicha éna tíuríhi eta náimcatasirahehi. Tacuija ecuichiravaina éti eta nayehe.

¹⁴ Énerichuvare vituparacahe, nuparapenaveana, epamicayare muraca nacaematane ena plújuana, vahi náesachahi ticaemataneana. Énerichuvare étumechavaca ena tiyacujirihana. Ena nani tínanájiricavanahi, muracaina eta ímitusiraina. Ecayehayaresera paciencia nayehe namutu.

¹⁵ Échapavayare. Tijuricati natiarihína navaraha titupiacaeana, vahi ecujicapa. Váhivare ecuitsicava. Ímrecayaresera eta iúrivaya nayehe ena echamuriana, énapa namutu ena apamuriana achaneana.

¹⁶ Iúrisamurerecaya tamutu sácheana.

¹⁷ Vahi ecucainajiruva eta eyujarasirana mayehe ema Viya.

¹⁸ Tamutu jácani íchararacavanahi, ehasulupayacha ema Viya, taicha eta mavarahahi ema Viya ecaheyare eti éhicanahi ema Viáquenu Jesucristo.

¹⁹ Váhivare ecuemepurureca eta mavarahaqueneanahi maicha ema Espíritu Santo eta eyehe.

²⁰ Te esama nácani téchajisihanahi ema Viya, vahi ecuepuru.

²¹ Vahi ecuemunanasicava. Epanerechinavayare te tájahapuca jácani esamaqueneanahi, ímahaqueneanahi. Éhicaya eta táuriqueneana.

²² Téhesera vahi tiúrihi, vahi ecuisapava, taicha eta tamauriqueneanahi.

²³ Tiuri puiti, májaracahéni ema Viya táurivaina eta epanereruana. Yátupinahini tacuijahini ecuichiravaina eta iávahásirahi éma. Majaneasinahehini eta iáchanavana, eta iáqueheana. Tacuija eta etapiravainahini te machavapa ema Viáquenu Jesucristo.

²⁴ Taicha éti máichuhaqueneanahi éma. Yátupi eta macasiñacarevahi. Máitachayareva tamutu eta juca.

Eta téqueneha matuparaha ema Pablo

²⁵ Nuparapenaveana, ímicatacavahi eyujarauchahavi me Viya.

²⁶ Échajisinhavi namutu ena vichamuriana.

²⁷ Nutuparacahe te májare ema Viáquenu échajicuha eta juca vicartane te namuri ena vichamuriana apaesa námutu nasama.

²⁸ Nuyaseachaheparaca me Viáquenu Jesucristo táetaviuchahíni eta iúricacarevaya - máicha.

Eta macartane ema Apóstole Pablo nayehe ena machamuriana ticavasanahi te avasare Tesalónica, ticajare 2 TESALONICENSES

¹ Nuti Pablo, némechajiricahe eti nuchamuriana ecavasanahi te Tesalónica. Téchajicahe ema Silas*, émapa ema Timoteo. Vímiamarecahi eta juca vicartane taicha eta iávahásiraipa ema Tata Vicaiyaquene, táichavene eta éhisiraipa ema Viáquenu Jesucristo.

² Nuvaraha macatajicahehini ema Tata Vicaiyaquene, émapa ema Viáquenu Jesucristo; nájaracahehini eta táurivaina eta epanereruana.

Ema Viya máicuñacayare ena ticapecaturarahiana te táitecapapa eta machaviraya ema Cristo

³ Nuparapenaveana, tatuparaca vihasulupayachaparaca ema Viya, taicha visamairicahi eta tápajusiravapaipaicha eta esuapirahi ema Viya. Tajurusirapaipahi eta émunasiracacairahi. Eta tacahe, vihasulupayachaparacahi ema Viya.

⁴ Tájinarine tácuti eta vicajamurairahéhi nayehe ena vichamuriana te víurujisirávana te jácani vítecapihapahi. Vimetacavacapahi eta táimiyanírávahi eta éhisirahi, ecamichirahivare tamutu eta nacatianasirahehi ena achaneana étapa eta ecatajivairana, táichavene eta éhisirahi ema Viya.

⁵ Tímararacahehisera ema Viya eta ecamichirahi eta ecatajivairahi. Máimerecahi éma eta máuriva, máitachirahi tamutu. Éma tijacapaheyare eta esiapirayare tayehe eta mávasa.

⁶ Máimáháinepaséra ema Viya eta máicuñasiravacayare ena ticatianacaheanahi éti, taicha macarichu éma ticatuparahahi juésyarehi téchayarehi.

⁷ Étiserá, ticanaracaheyare ema Viya eta ecatajivairana, vicuticacainapa eta vinarasirayare te mamirahu ema Viya. Vinaracainapa vimutu, te máitecapapa ema Viáquenu Jesús, mápechiravaya títeca, másiháiraya te anuma. Te jena sáchezare, mámayarepahí ena mayeheana ángeleana, tíñehianainapáipa máicha. Tacutinapaipa eta ichapequene yucu eta máucupaisirayare.

⁸ Eta tímitecayare éma, máicuñacayare ena váhiquene návarahahini náimati ema Viya, váhivare návarahahini nasuapa eta máechajiriruva.

⁹ Ena nani máehicarahanahi ema Viáquenu Jesucristo, ticaquijianainapa eta te infierno. Váhivare nacamichahini náimarakaca eta mamira taicha táetaviuchahi eta máíñehivahi. Tájina náuchucuiraimahi.

¹⁰ Te jena sáchezare te máitecapapa ema Viáquenu, viáramimícainapa ichape eta mayehe vimutu viti manerejiruanahi. Tétavicavaya eta vicunachirainapa éma. (Éti apanava etiarihivarehi, taicha esuapahi eta vímiturapianahi.)

¹¹ Eta tacahe, tamutu sácheana te viyujarasirana, viyaseuchahehi me Viya eta ímianiravaina eta iúrive, taicha éti íchuarecasivahi eta mayehe. Énerichuvare viyaseuchahe me Viya eta májjarasirahéna eta ítupajjiásiraváina tayehe eta juca ématanerepíhi táichavenénahi eta esuapajiraivahi. Eta juca, ichape tacurisamurecha ema Viya.

¹² Tásiha, ena apamuriana achaneana nacunachayare ema Viáquenu Jesucristo táichavenéhi eta náimairahi eta íchirahi éti eta táuriqueneana. Énerichuvare, éti ecunachacaréna me Viya, taicha tétavicavahi eta máemunasirahehi, émapa ema Viáquenu Jesucristo.

2

Ema Achane Váinarajiquene

¹⁻⁴ Puítiripa, nuparapenaveana, nariríhi ena tépiyaequenehanaripa ema Jesús, náimijacharipa matiarihiripa, tichavaripa puítí. Vituparacahecha vahi ecusuapa nácani tépiyahirahianapahi. Tayanapane nácahepuca: “Eta juca vimetacavahi me Espíritu Santo”. Nácahepuca: “Ema Pablo tímítucavahivíhi eta juca”. Te náepiyaequenehahavipuca náimechahépuca eta carta, náimijachayarehi tásihaquene viyehe, váhiquenesera ecusuapavane. Váhi tacuimipanererecahe eta juca. Váhivare ecuarameca. Taicha te máitecapa yátupina ema Jesús, ticurujicahávinumayare viti manerejiruanahi.

Nuvaraha numetacahe eta apana. Te tánehipaicha eta máitesiraya ema Jesús, ena achaneana vaipa napicauchaimahi ema Viya. Náepuruinapa eta máechajiriruva. Tásiha, tímerecaváinapa ema Achane Váinarajiquene. Ema maca achane, macatichainapa masama

* 1:1 Ema Silas, eta májjaréquene Silvano te náechajiriruva ena romanoana.

eta máijare ema Viya. Étaripa eta nasiñarajiana ena achaneana, váipavare máuricaimahi. Macavanairipinapa ena achaneana te tamutu avasareana náepuyumirauchayare éma. “Nuti Víyanu. Núti ecasiñayare” macahénapa. Masapihainapa, ticaejacavainapa tayehe eta Templo. Téhesera támutupa, yátupiquenenapa eta máicuñayare muraca.

⁵ Échavarichuhi éti eta nimitusiraheparacahi cape juca te návihaichahahi eyehe. Numeta-cahehi eta tácharacavayarehi.

⁶⁻⁷ Puiti ena achaneana, nararihipa tivinarajichavanapaipahi. Vuíchahasera máisapahini ema Viya navayuchavahini. Mararihi ema mavaneruhi tíchejimiráuchavacarácha. Eta tacahe, vuíchaha máuchujicahíni máimerecavahíni ema Achane Váinarajiquene. (Éti ímatichuhi ema tíchejimiráurucahi.) Tacahe, ema Viya máisapainapa téréjicava ema tíchejimi-ráurucahi.

⁸⁻¹⁰ Tásiha, mapaenunavainapa tímerecavayare ema Achane Váinarajiquene. Tuparairucayare mayehe ema Satanás. Éma, tijaracayarehi eta máitupajijíásiravayarehi. Tamutuyare máimereca eta tíaramicareana tacutiya yátupiquenénahíni mayehénahíni ema Viya. Ema maca, máetaviuchainapa eta mavayuraiva nayehe ena achaneana. Éna, tísapavanainapa náehica eta táíñehiqueneana mavayuaraiquianapahi. Váhisera máyerémahi. Túcupaicavanénapa ema Viáquenu Jesús. Tíaramicarénapa eta majaravayarepahi. Te máchajurapa, máquipaicainapa macapacainavarepa ema Achane Váinarajiqueneni. Tacahe, ena nani achaneana máiturevanahi témitiequenehanainapa. Ticaicuñanainapa taicha vahi návarahahíni náehica eta yátupiqueneana tíuriana échájirirucavana. Te nasuapahini, tíuchucuhanahini tayehe eta ecuñaraqui.

¹¹ Taicha eta namasuapirahi ema Viya, máisapayarehi ena nani achaneana nasuapa eta mavayuaraiquiana ema Achane Váinarajiquene.

¹² Tacahe, namutuyare ticaicuñanayare éna, taicha vahi návarahahini nasuapa eta yátupiqueneana vímiturapiana. Navapinaichucha eta náichiraya eta tamauriqueneana.

Tíuchucuhanayare ena téhicanahi ema Viya taicha manerejiruanahi

¹³⁻¹⁴ Étiserá, nuparapenaveana, máemunaruanahi ema Viya. Viti tatuparaca vihásulupayachaparacayare ema Viya íchavenehi éti, taicha manerejiruhehi ema Viya te tépanavainapa. Táitusiava, te esamapa eta vimetarairuhi, etupiruvapa ejacapahi; taicha esamapa eta máichurahehi éma. Éma ticuchucaheyaare taicha ímiyanavahi esuapa eta yátupiqueneana máimiturapiana ema Cristo. Émapa ema Espíritu Santo máimiyana eta máváhásirahehi, máijaracáhe eta esantuvainapaipaicha puiti juca ecáijuheyare. Tásiha, ítujicavainapa esíapa tayehe eta mávihahi ema Viáquenu Jesucristo, ímahainapa eta majaraiva.

¹⁵ Tiuri puiti, nuparapenaveana, ímiyanava eta éhisiraina ema Jesucristo. Vahi ecuemitísica eta vímiturapianahi, te vimuturichaha eta eyehe, étapa eta juca véchajiriruvanahi te carta, vémevataruanahi eyehe.

¹⁶ Nuparapenaveana, tétavacavahi eta máemunasirahavihi ema Viáquenu Jesucristo, émapa ema Tata Vicaiyaquene. Tayanapane vahi víuríhíni, énasera navarahahi tícurisamurechahavianaya. Tásiha, vicunevainapa eta víuricacarevaya, máichecuaraquirénapa náicha.

¹⁷ Puiti nuvaraha esamavaini éti eta nacurisamurechirahe te esamureana. Náetumecha-varéni eta ímiyaniravaya ícha eta táuriqueneana, táurihivaréni eta échajirisiravana.

3

Ema Pablo mayaseacavaca eta nayujarauchiraina me Viya

¹ Títecapa, vivaraha vituparacáhe puiti, eti nuparapenaveana: Eyaseuchahavi te eyujarasirana mayehe ema Viya. Tasuápacarevínahíni muraca nayehe ena achaneana eta vimetarairuana máéchajiriruvana ema Viya, tácutihini eta esuapirávanehi éti. Táítecapauchavanehíni ena ticvasanahi te tayerehiqueneana te juca apaquehe.

² Énerichuvare, eyaseuchahavi macátíuchirahávinahíni ema Viya nayehe ena achaneana váinarajiqueneána títiparahiana. Taicha camuriana ena masuapajirairahanahi me Viya.

³ Váhisera táéñamavacarehíni eta máurivahi ema Viya eta viyehe, yátupíhi eta máitachirahi tamutu. Tétumechaheyare éma eta ímiyanavairaya. Tijaneacaheyareva mayehe ema Váinaraji.

⁴ Viti vicasiñavahi eyehe eta esuapirahaviya tamutu eta vitupararuheanahi taicha éti éhícali ema Viáquenu, táicha esuaparípa eta táinapureanahi vitupararuheanahi cape juca.

⁵ Máimicatacahehíni ema Viya eta ímatiraina eta máemunasirahehi. Májaracahevaréni eta ecayeheraya paciencia, ácutihini ema Cristo.

Tatuparaca vicaematanyare

⁶ Nuparapenaveana, te natiarihinapuca ena echamurianahi plújuana, váhipuca náesachahi ticaemataneana, te váhipuca návarahahini náetumechavahini, nasuapahini eta vímiturapianahi, vivanecahe éti te máijare ema Viáquenu Jesucristo: Vahi ecuemēñahava nayehe.

⁷ Écharichuhi éti eta etuparahahi ítusraina ítátijirícava, éhisirayarehi eta viyeherepianahi víti te víávihaichaha eta ara eyehe. Vahi plújuhávímahi.

⁸ Váhivare vinicairihihini te epenana. Víti vícaematanehi muraca eta vítátijirísiravahi. Tamutu sácheana, yátiana, vícaematanehi, taicha vahi vávarahahini vétsepanáracahéhini eta vínicaquenerepi.

⁹ Tatuparacahinéni víyaseacahehíni eta énisirahavinahíni, vívarahahísera vímechahe-yarehi eta vícaemataneiraivana, apaesa étainarichuhíni éhica éti.

¹⁰ Étaripa te vinasíqueneichaha eta eyehe, vivanecahehi: Vahi ecuenica mácani vahi mavarahahi ticaematane.

¹¹ Puítiripasera visamairiricahi eta natiarihirahi ena echamuriana tinerejicavanahi plújuana. Vahi náesachahini ticaemataneana, tinicairihianahi. Tímiapitavairicavanapaipahi te pétiana.

¹² Étihi íchanahi eta juca, vivanecahe te máijare ema Viáquenu Jesucristo: Yátupina táuri eta ecáemataneáina, eviyayare eta ecamunuqueneana.

¹³ Éti apamuriana nuparapenaveana, vahi ecuinajica eta táurivahi eta ecaematanerana.

¹⁴ Te natiarihinapuca nácani vahi nacusuapa eta vívanairípianahi te juca carta, ecauneyare éna. Tásiha, emetacapa ena echamuriana vaipa nacucachane éna, apaesa nátsiriháichu ena nani eta namasuapajiravahi.

¹⁵ Váhísera ecucatichavaca, econsejachavacachucha taicha echamurianahi éna.

Ena Pablo mayujarauchahi ena machamuriana

¹⁶ Tiuri puiti, nuyaseacahi ema Viáquenu ema tíurichahavirahi, máimiyana vahíni máijaracahéni eta iúrivaya te epanereruana, tijuricati tájahapuca ícharacava te sácheana, taicha mavarahahi eta iúrivaya. Ámutuhíni mávahácahehíni ema Viya.

¹⁷ Nuti Pablo, nútijacaruvapa nájucha eta juca táichecuaráquihí eta nucartane, apaesa ímati eta táimahihí eta nuyehé letra nuvahurupajihí.

¹⁸ Nuyaseuchaheparacahi emutu éti me Viáquenu Jesucristo, táetaviuchahini eta iúricarevaya máicha.

Tamutupa eta juca néchajiriruvahi eyehe.

Eta macartane ema Apóstole Pablo mayehe ema machamuri Timoteo, ticajare 1 TIMOTEO

¹ Nuti Pablo mayehenu apóstole ema Jesucristo. Nuvanecasivahi mayehe ema Viya Macatiurahiquenehi viyehe, émapa ema Viáquenu Jesucristo, ema vicunequenehi eta mápechiravayare tichava.

² Nímiamareca eta juca nucartane piyehe piti nuparape Timoteo. Némunacavihi tímuc-tijiricavahi nuchichavinahíni táichavénehi eta péhisiranuhi eta nusuapajiraivahi mayehe ema Cristo. Nuvaraha macatajicavini majapanuvini ema Tata Vicaiyaquene, émapa ema Viáquenu Jesucristo. Náijaracavini eta táurivaina eta pipanereruana.

Ema Pablo mametaca ema Timoteo eta macunerayare ena tihapapirahiana

³ Pécharipahi eta juca numetaruvihi, te nuyanayarepa tayehe te tinapaica eta Macedonia, eta nutuparasiravihi pinasiyaréhi tayehe eta avasare Efeso. Vuíchaha pijunijicaimahi taicha pímatirípahi píti ena nani navarahahi tihapapicana eta vímiturapiana. Vahi picuisapavaca.

⁴ Pécatiacaicha ena vichamurianahi, vahi nacusuapa eta echájirirucavana náepiyapiruanahi ena achaneana, taicha eta juca tacutirichucha eta náchucarapiana. Ena nani achaneana, súnsurupiana eta náechajiriruvana te náechajisiha ena viáchucanaveanaini. Eta juca náechajiriruvana, ticauyayacarehi táemejecapavachavaca ena vichamuriana, machu nachavacuejehava táicha. Étavanerecáinahípucáini náimicatacahávihipucáini eta vítauchirínahini eta véhisirahi ema Viya.

⁵ Nutuparacavihi taicha nuvarahahi náimerecaya ena vichamuriana yátupina eta náemunasiracacaina táuchurenavare te nasamureana, tapachinavareni eta napanereruana. Tacuija nacúquichiraváinahini eta nasamiravahi te mamirahu ema Viya. Tauri eta náehisiraina ema Viáquenu. Yátupina nasuapa.

⁶ Taicha nararihi ena téjecapavanapaipa, nasuaparichucha eta tájiparacana súnsurupiana. Eta juca táiminajicavacapaipa tayehe eta vímiturapiana.

⁷ Tásiha, tépiyacavanapa náimatihí tamutu eta Sagrada Escritura. Navarahavare tímiturecana, váhisera nácaicutiarahíni eta tacayemaqueneana eta táechajisihaqueneanahi. Ena nacahehi: “Víti véchahi tamutu”, tájinanéni náechihahíni.

⁸ Tájiina táichava eta tatiarihiraíni eta mavanairipianahi ema víyahaini Moisés. Véchahi eta táuriva eta mavanairipiana, taicha éta, táimitucavacahi ena achaneana eta vahi nacuejecapava.

⁹ Taicha véchahi eta tacaemataneasirahi eta vanairipiana eta táimitupiruchiravacaya ena ticapecaturarahiana. Nácani achaneana tíuriana, vahi énáina tatuparaca eta vanairipianahi. Tatuparacahisera ena nácani mapicaaurirahana masuapajirairahana; énapa nácani váinarajipaneréruana ticapecaturarahiana; énapa nácani mapicaucharahana ema Viya, ena ticatíchana eta máechajiriruvána; énapa nácani téhana ena náiyana, ena náenana; énapa nácani ticapahiana;

¹⁰ Énapa ena túhusiana énapa nácani ticaecahiana ena nayenana, navehapa esu apana esena; énapa nácani tivehana ena nacutiqueneanahi ajaira; énapa nácani tiámerecana achane, amaperupuca, esenapuca; énapa ena tépiyahirahiana; énapa ena tépiyaequenerahiana. Énerichuvare eta vanairipi tatuparaca ena ticatichana eta táuriqueneana vímiturapiana.

¹¹ Taicha nútí nutuparacavahi me Viya eta nímituresiraya eta táurinaqueneanahi máechajiriruvana, eta tímcaijuhechahaviya tayehe eta táurinaquene mávasa ema Viya. Tétavicavahi eta macunachacarevahi éma.

Ema Pablo mahasulupayacha ema Jesucristo taicha eta máichuirahi

¹² Nútí nuhasulupayacha ema Viáquenu Jesucristo, taicha eta máichuiranuhi mavanaranuyarehi. Tétumechanuhi yátupi taicha máimahahi eta nítauchirayarehi eta nutuparacavayarehi mayehe.

¹³ Éma, tituparacanuhi eta juca, ichapemurihinéni eta néjecapiravahi mayehe, tíñemahihi eta néchajiriruvanaíni mayehe. Nupanajiricavacahi ena náinapureanahi téhicanahi éma. Tijapanunuhisera éma, vuíchahahinéni nusuapahini néhicahini éma. Taicha vahi néchahini émahinéni puca nucatianacahi, eta níchirahi ena machanerana éma.

¹⁴ Tásihasera tétavicavahi eta máemunasiranuhi ema Viáquenu Jesucristo. Ichaperinehi eta májjarasiranuhi eta nusuapirahi yátupi éma, étapa eta májjarasiranuhi eta némunaraivahi.

¹⁵ Nuvaraha námutihini ena achaneana nasuapa eta véhiruhi taicha yátupihini eta juca vímiturapiana: Ema Viáquenu Jesucristo títitecahi te juca apaquehe macuchucuhavacayarehi ena ticapecaturarahiana.

Nútiripahi nuváyuchapanaváinihi eta nucapecaturaraváinihi.

¹⁶ Émasera ema Viáquenu Jesucristo tijapanunuhi, táitusiava tíchuhanihi níti. Taicha mavarahahi máimerecayare ichape eta mayehe paciencia eta nuyehe, nuvayurevaqueneñihi eta nucapecaturaraváinihi. Eta tacahe, nucaicutiarapa eta majacapirayareva namutu ena tisuapanayare, máichecuaraqirénapa eta náitaresiraya máicha.

¹⁷ Eta tacahe, macarichu vicunachayare vijirauchayare tamutu sácheana ema Viya, taicha macarichuhi éma tamutu máituruequeneha. Éma, máimahasiquenehi, máepenacachivare. Jéhevarequene éma, viyehihi Rey acanequene te tépanavainapa, éta puiti juca vicaijuheyare. Amén.

Ema Pablo matuparacahi ema Timoteo

¹⁸ Nuchicha Timoteo, nutuparacavicha muraca eta piratahairaina picanara eta tamauriqueneana. Tiúriyare eta péhisiraya ema Viya. Tájina píchiravaimahi te mamirahu ema Viya. Péchavahi eta náechajisivirahi eta piúrivahi ena vichamuriana mametaruanahi ema Espíritu Santo. Vahi picuemepurureca.

¹⁹ Taicha nararihi ena ticainajiruvapai, náechahinéni eta táifehivahi eta náichaqueneanahi, váhisera návarahahini nácaínajiruvahini eta tamauriqueneanahi. Tíñajicavanarichucha eta náehisirainihi ema Viya.

²⁰ Émaripa ema Himeneo émapa ema Alejandro, tacahehi eta náinajisiravahi eta náehisirainihi ema Viya. Puítisera, ena nani níjararupa ema Satanás, taicha nuvaraha nachava, náinajicayare eta nacaecahirahi ema Viya.

2

Ema Pablo máimituca eta nayujarauhíravaya

¹ Tativayaresera nutuparacahe, vahi tacuechuquiha eta eyujarasiraina. Eyaseuchava. Tamutu ehasulupayachayare ema Viya. Eyaseuchayareva namutu ena achaneana.

² Énerichuvare eyaseuchayare ena aquenucana énapa ena apamuriana tuparairucana, apaesa táuri eta náechapajirisiraina eta avasareana, váhini vicuimahaini eta táifehiqueneana. Víti vímijanavahini viúrihini te mamirahu ema Viya, vicapicahuhini nayehe ena achaneana.

³ Taicha ema Viya Macatiurahiquene máuricahi eta víchirahi víti eta júcana.

⁴ Taicha mavarahahi éma máimimatchayare namutu ena achaneana eta yátupiqueneana máechajiriruvana apaesa náuchucuha éna apanava.

⁵ Taicha májina apanainahini ticatiuchavacaina éna, macarichu ema Tata Vicaiyaquene. Émapa ema Machicha ema achane Cristo Jesús, macarichuhi ema téchajirurahi viyehé viti achaneana te mamirahu ema Tata Vicaiyaquene. Nájina apanaina téchajirurahínihi viyehé.

⁶ Ema Viáquenu Jesucristo tíjaracavahi tépena taicha eta macuchucuirahaviya vimutu viti achaneana. Puítisera mavaraha máimimatchayare namutu eta juca arairuhi vímiturapiana.

⁷ Eta tacahehi, manerejirunuichuhi mayehenuhi apóstole, nucametarairuyare tamutu avasareana, nímitucayarehi ena apavasanana eta nasuapiraina éna eta yátupiqueneana máechajiriruvana ema Viya. Nutupiruvahi níti eta juca néchajisirahi, vahi népiyahiravainahi.

Ema Pablo máimitucavaca eta náicharacavaya te náurujisiravana

⁸ Tiuri, nutuparacavevare pímitucavacavare ena vichamuriana eta juca apana: Tauri eta náurujisiravaina te nayujarasirana. Ena ajairana, vahi nacueñamavahini me Viya eta máitachirayare eta nayasearuhi. Tátupiruvahini te nasamureana. Vahi nacúsemamajuhéhi ena nayujarasirayarehi nacajapavaquichavapuca.

⁹ Énaripa ena esenana, táurihini eta nacamuirihairana. Vahi nacúyeheheácaicha eta nacamuirihaira. Náetupiricavahiséraini. Váhivare nacuvayuchaini eta nacatatasirana. Váhivare nacuvayuchaini nacuyeheheacavahini eta oro, eta perla, eta tasivachaqueneana múiriareana.

¹⁰ Étaripa náurinavahi yátupiquenehi, eta náimeresiravaina eta yátupina náehisirahi ema Viya, náichirainavare eta táuriqueneanapa.

¹¹ Énerichuvare, tiúriyare eta nasamararasira eta náimitucasivana. Vahi nacuécapemarahi nácani timitucanahi.

¹² Énerichuvare ena esenana, vahi tatuparaca náimitucahíni ena víyarahana pa te víurujisiravana, taicha vahi tatuparacahini náimiturecahíni éna. Nasamararacayarechucha eta náimitucasivana.

¹³ Taicha te máepiyacainapa ema Viya ena víachucanaveánaini, tnapuca máepiyacahi ema Adan, téquenehapa esu Eva.

¹⁴ Váhivare émainahini ema Adan máinapucahini máquipaicavahíni. Ésuhi esu esena, tísapavahi mavayuaca ema Satanás. Eta suísapiravahi, tíaquipaicavanapa tayehe eta pecatu.

¹⁵ Tásiha, ticatajivainapa eta suínasirana. Puiticha tanasihi nayehe ena esenana. Tiúchuchanayaresera, te náimiyana náehica ema Jesús, étapa eta náemunasiraina ena vichamuriana. Tacuijavare natapiravaina te mamirahu ema Viya, táurihini eta napanereruana.

3

Tiúrianayarehi eta náitaresira nácani tatupararuanayare eta avacurecacare pastorecare

¹ Étaripa eta juca evacureca pastorecare, puiti nutupiruva numetacahe. Te natiarihinapuca nácani ajairana návaraha ticavacureana eta pastorecare, tájina táichiravaina, taicha eta juca evacureca pastorecare, éta tiúriana evacureca ticaijuhacare.

² Tacamunuhisera mácani ticavacureya eta pastorecare, tájina matapiravainaya eta máitaresirahi, tacuija nacuyunaca ena achaneana. Mácani ésunarichuhi esu mayena. Mácani ticapicahuhi. Mácani tijaneacavahi eta máitaresira, máitucahi tipanerereca. Mácani achanesamure tijacaparahi nayehe nácani tichimarachanaya. Mácani máituca tímitureca.

³ Mácani vahi tavayuaruina eta tércare. Váhivare macueharahi. Vahi macujamurarahi. Váhivare macutupiarahi. Váhivare tacuvayuaca eta plata. Tatuparacayare mácani tijapanurahi.

⁴ Ticaiyacareyare te mapena. Máitucayare eta macajurusirayare ena machichanaveana, tisuapajirahianayare tipicaurahianayare máicha.

⁵ Vahi tisiapaimahi mácani achane vahi máitucahi ticavanairipi te mapena. Taicha nararihi ena vahi náituca ticavanairipiana. Tavetijipapuca eta juca evacureca, vaipa náitucaimahi eta náechajirisiraina najaneasirayarehi ena vichamuriana.

⁶ Vahi tisiapaimahi eta pastorecare mácani mapaemunavahi máehica ema Viáquenu, machu macasiñavavaica eta masiapirahi eta matuparahahi. Eta tacahe eta máquipaisiravahi ema Váinaraji.

⁷ Énerichuvare tacamunuhi mácani pastoreyare ticapicahu nayehe ena apamuriana achaneana, apaesa vahi nacuechajica eta mayehe. Machu máituruca ema Váinaraji.

Tiúrianayarehi eta náitaresira nácani tatupararuanayare eta avacurecacare ticaijare diácono

⁸ Énerichuvare, nácani ticavacureya eta diáconocare, tacamunuhi ticapicahuanayare eta náitaresirahi. Vahi apipiemanaimahi eta náechajirisiravana. Váhivare ticavaharasianaimahi. Váhivare tijamurarahanaimahi.

⁹ Tacamunuhivare náimatiyare yátupi eta tisuapacareanahi mayehe ema Jesús, náitaurichiraripa tamutu, tájinapa náichiravaimahi te mamirahu ema Viya.

¹⁰ Nacasamairunumaya te yátupihipuca tiuri, tájinapuca náichiravaimahi. Téhesera tiúrianahi, énara tuparairucanayarehi eta evacureca diáconocare.

¹¹ Énerichuvare, ena esenana, tacamunuhi ticapicahuana. Vahi nacuechajihí. Súcani tijaneacavahi eta suítaresira. Tájina náichiravaimahi, títaurahíanayare.

¹² Ema tuparairucayare, tacamunuhi mácani ésunarichuvare esu mayena. Máitucayare eta máimitusirayare ena machichanaveana. Ticaiyacareyare te mapena.

¹³ Taicha te náitachahi tamutu eta natuparahana ena tuparairucana, ticunachacareanahi típacachacareánahivare. Tásiha, énerichuvare tétumesamúrechaváinapa eta nacametarairuirahi eta máimiturapiana ema Jesucristo.

Jéhevere eta juca téhicacare

¹⁴⁻¹⁵ Puiti nucunevaipa eta nítecapiravaneya eta ara piyehe, téhesera vuíchahapuca nucuitujicava níteca. Nucajurevihisera eta juca carta, apaesa pítuca eta táurivaina eta pítaresiraya, taicha machichavihi píti ema Viya. Viti manerejiruanahi ema yátupiquenehi Viya. Viúnacahi vímiturecahi yátupi eta máechajiriruvana.

¹⁶ Taicha eta juca véhiruhi vimutu, tétavicavahi eta táuriva: Vimutuhi visuapahi eta máucupaisirahi te juca apaquehe ema Jesucristo, macaqueherahi eta juca víaquehehi viti achaneana.

Émaripa ema Espíritu Santo macametarapihivare eta yátupirahi Machicha ema Viya.

Náimahahivare ena ángeleana eta máechepusirahi te máecari.

Te tamutupa, tichavapa éma te mávasa anuma.

Tásiha, viti mavanarana véchajisihahi tamutu avasareana eta macuchucuirahaviyare vimutu viti achaneana.

Ichapemuriana ena ticasifivanahi mayehe, téhicanahi éma.

4

Natiarihiyare ena tinajicavanaya eta náehisira ema Jesús

¹ Eta mametarapi ema Espíritu Santo, puiti juca vicaijuheyare, natiarihinapa ena timútserahávanayarepahi tinajicavana eta náehisirahi ema Jesús. Nasuapainapaipa ena tiyururahiana. Náehicainapa eta náimiturapiana ena éreanana.

² Nasapihainapa tisamacareanayare ena apiapiemana tépiyahirahiana. Ena nani, máimatiacavarahánahi eta náepiyahiraivana taicha náitunaipahi eta nacahirana.

³ Ena nani achaneana nayurucainapaipa ena vichamuriana. Ánipa nacaheyare: “Vahi táurica vitanucahini esu esena viyenainahini. Jucarihivare eta tinicacare, énerichuvare vahi táurica vinicahini” nacaheyare. Tamutusera eta juca tinicacareana máepiyaruana ema Viya vinicayarehi viti vímatiequenehanahi eta máechajiriruvana. Vihasulupayachayarehi te vinicaya eta máijjararuhavianahi ema Viya.

⁴⁻⁵ Taicha tamutuhi tiuri eta máepiyaruana ema Viya. Vahi táuricahíni vépuruhíni. Vijacapayarehi tamutu, vihasulupayachayarehi te vinicaya; taicha vījaracasíhi mayehe ema Viya, timetacahavihi eta táurivahi. Tacaursamurechahi ema Viya eta viyujarasirana. Puíticha tanasíhi viyehé viti. Te vinica, vihasulupayachayarehi ema Viya.

Ema yátupiquene mavanara ema Jesucristo

⁶ Te pímitucavaca eta juca ena vichamuriana, pímerecahi eta yátupirahi mavanaravi ema Jesucristo. Eta juca táurinaquenehi échájirirucava, étarichuhi eta vímiturapianahi eta piyehé, éta tétumechaviyare eta pímiyaniravahi pisuapa eta juca véhiruhi.

⁷ Váhiserá picusuapavaca ena nani tīchanahi eta juca échájirirucavana tamauriqueneana. Súnurupianachucha éta. Pímiyanavasea picaravahu eta piúrítaresiráina mayehe ema Viya.

⁸⁻¹⁰ Tacuti eta náimicaravahuchirava ena ticavijarurahiana eta pelota, navaraha náetumecha eta náqueheana. Tacamunuhisera nápepejiricava te sácheana. Píti, vahi tacuechuquiha eta picaravahuirahi. Te yátupíhi vicaravahu viúrítaresiraya mayehe ema Viya, tétavicavaya eta viúrivaya eta visamiravaya puiti juca vicahehi, énerichuvare véchapajiricavainapa eta vicaijuheraya eta mávasa ema Viya, vicachaneraya éma. Eta tacahe, vétumechavachucha apaesa viúrítaresira eta mayehe. Vímiyanavachucha vímitucavaca ena achaneana apaesa náurítasesira éna apanava mayehe ema Viya. Taicha yátupiquene eta échájirirucava ani tacahe:

Ema vicasíñaquenehi, éma yátupiquenehi Viya.

Éma, téchahavi vimutu viti achaneana.

Vivetiji viti véhicanaripa éma,

tétavicavahi eta macatiuchirahavipahi.

¹¹ Ena pímitureanaya, pituparacavacaicha muraca eta júcana.

¹² Picuneuchava yátupina apaesa vahi nacuepuruvi eta pímituresirahi, taicha eta piámaperuváichaha. Pímerecayare eta piúriava apaesa étaina náehicavi ena vichamuriana. Tauri eta péchajisiráina. Tauri eta pítaresiraina, tájina pitapiravaimahi. Pémunarahi nayehe ena vichamuriana, énapa ena apamuriana achaneana. Yátupina eta péhisirahi, étapa eta picasíñavairahi mayehe ema Viáquenu.

¹³ Te vuíchahapuca nuцитеcapa, pímiyanava eta pímitusirayare ena vichamuriana. Pímiyanavavare eta pétumechiravacaina. Péchajicuínayare eta Sagrada Escritura apaesa nasama namutu.

¹⁴ Pémechavayare eta nametarapianahi ena víyarahana mametaruanahi ema Espíritu Santo eta picavacureraya. Péchavare eta nanasirahi éna eta navahuana te piápusi. Puiti, vahi picuemepurureca eta péchemaravahi maicha ema Viya.

¹⁵ Pipanerecha yátupina eta juca pímetacasivanahi. Pímereca eta táurivahi eta péhisirahi, apaesa náimaha namutu eta piúriváinapaicha.

¹⁶ Péchapaváicha yátupina eta pímituresirahi eta juca véhiruhi. Pítijiva pipamicava pítauchayare tamutu. Te pítaucha eta juca, picuchuhavayare píti, énapa ena pímitureanahi.

5

Vímerecayare eta viúrivayare nayehe ena vichamuriana

¹ Te natiarihinapuca náejecapava ena víyarahana ichavicapananahi piyehé, vahi picucajachavaca éna. Piconsejachavacaséra tauri, tácuti te péchajica ema ticachichavi. Énerichuvare

ena amaperuquijiana ajairana, tauri eta piconsejachiravacaina tácuti eta péchajisira ena pichuquiqueneana.

² Énerichuvare ena vénarahana ichavicapananahi piyehe, te náejecapavapuca, piconsejachavaca tauri tácuti eta péchajisira esu ticachichavi. Énapa ena amaperuana esenana, piconsejachavaca tauri tácuti eta péchajisira ena pichuquiqueneana. Tátupiruva eta péchajirisiravacaina éna.

³ Pímicatacavacaya ena tépenaimanahi, nácani tájinahi naviyavahini, yátupihí eta nacamu-nuiravana.

⁴ Téheserapuca natiarihihi ena suchichanaveana esu tépenaimahi, suámarianapuca, énapa títátianayarehi. Ticaravahuanainapa eta náitátijirisiravaya. Títisirijicavánainapa eta nacajurusiravacahi ena náenana, nátseanapuca. Eta juca, máurica ema Viya. Taicha tatuparacahi ena echichanaveana eta náitsirijisiráváina eta nacajurusira ena ticachichana.

⁵ Pímicatacayaresera súcani tépenaimahi sucarichuhipuca, nájina suchichainahi, nájinavare suviyavahi. Sucuchapainapa eta tásihaqueneya mayehe ema Viya, taicha sujáraruvaipa yátupi eta mayehe. Tiyujaracainapa tamutu sácheana, tamutu yátiana.

⁶ Ésusera súcani suícutichiravahi suicha eta suvarahaqueneanahi, ésu tímicutijiricavaipa suáquijiruvahi eta mayehe ema Viya.

⁷ Pímitucavacayare ena tépenaimanahi, apaesa táuri eta nacaemataneasiraina ema Viya, tacuija natapiravaina.

⁸ Taicha ena vichamuriana, tatuparacavacahi náenamavayarehi tayehe eta náitátira ena náenana, ena nátseana. Nácani vahi nacuquicha eta juca, tímicutijiricavaipa vahi náitachahini eta náehisirahi ema Viya. Tiápajucavapanapa éma eta nayehe ena masuápa-jirairahánahi.

⁹ Nacarichu pinacayare te nalista ena tépenaimana ena ticayehearipa sesenta año eta nahañora. Súcani émanarichuhi ema suímahi eta suítaresirahi.

¹⁰ Ésupa súcani tímaticarehi eta táurivanahi eta suématanerepiana. Súcani tiúrihi eta sucajurusirahi ena suchichanaveana. Súcani tijacaparahi te supena nayehe nácani tichim-rachanapahi. Súcani tiuri eta suéchapajirísira ena vichamuriana. Súcani téchapajirahi nayehe nácani ticatajivanahi ticajumanahi, ticatiruhanahi. Súcani tamutuhi suítaparaha suicha eta táuriqueneana.

¹¹ Énaserá ena tépenaimanahi amaperuanarichaha, vahi picunaca te lista. Tijuricati tiáquipaicavana taicha tavayuacavacarichaha eta tájiparacana, natanucarichaha ema ajaira, navarahaichaha tiápechavanayarehi ticaimana. Tijuricati ticainajirua ena náehisirahi ema Cristo.

¹² Tacamitisicavacapáipa, énapa tímínajicanapahi eta náehisirahi ema Cristo.

¹³ Énerichuvare ticauyayacarehi nayehe ena amaperuanarichaha, te pinaca eta te nalista, tijuricati tépiyacavanapa plújuana. Náematane pa típaipiricana te pétiana, námapaipa eta cuéntoana. Tímisiáparacavánapáipa. Nacaemataneaca náechajisihapáipa jácani náimahaqueneanapahi te pétiana. Vahi tácatuparaha náichahini eta juca.

¹⁴ Eta tacahe, ena tépenaimanahi amaperuanarichaha, nuvaraha nápechava nacaimavare, nacachicha, nacaenacarehi te peti, apaesa tacuija nacucayema ena ticunerahiana.

¹⁵ Taicha nararihi ena tépenaimanahi tímínajicavanapaipa eta náehisirahi ema Jesús, náehicapa ema Satanás.

¹⁶ Te sutiarihhipuca tépenaimahi esu vichamurihi, te natiarivarepuca ena sujaneanahi vichamurianahivare, ena títátianayarehi ena sujaneanarichu; apaesa vahi sucuapita-vairicahi nayehe ena máimaruanahi ítátijiríruanahi, táichavenehisera jácani tamajinairahi naviyahini éna.

Tatuparacavacahi ena vichamuriana náimicatacayare ena pastoreana eta náitátiravahi

¹⁷ Ena pastoreana, te tiúrihipuca eta náechapajirisiravaca ena vichamuriana, ichapeyare eta námemunacacarevayarehi. Tatuparacavacahi ena vichamuriana náimicatacayare tayehe eta nanaqueneperi ena pastoreana, taicha éna, eta námatanerepili tímiturecanahi ticametariruanahi.

¹⁸ Taicha aní tacahehi eta Sagrada Escritura: “Vahi picuitisumucha eta pivuiyera te ticaemataneahi taicha técuahapahi”. Ánivare tacahe: “Ema achane ticaematanehi, tatuparacahi ticavachayarehi mayehe ema macaematanearuhi”.

¹⁹ Vahi picusuapavane te tatiarihinapuca eta máepiyaequeneana mácani náiyacarahi ena vichamuriana. Téhesera natiarihinapuca ena apinana, mapananapuca tincapaequenehanahi eta máejecapiravahi, jéhesare tisuapacare éta.

²⁰ Téhesera yátupiquenehipuca eta máejecapiravahi, picajachayare muraca te nami-
rahu ena machamurianahi náiyacarana, apaesa nátsiriha napica ena apamuriana, vaipa
nacuquicha eta juca.

²¹ Nutuparacavicha muraca, pítauchayare yátupina eta juca numetarapianahi piyehe.
Vahi picunerejicavaca, nácuticaca eta píjarasiraina eta piyehe justicia. Vahi pépacuchaimahi
eta máchavaquenevahi mácani téjecapavahi, taicha máimararacahi ema Tata Vicaiyaquene,
émapa ema Viáquenu Jesucristo, énapa ena mayeheana ángeleana manerejiruanahi.

²² Te matiarihinapuca mácani navaraha nacasiapa pastor, picasamairunumaya te
túirihipuca éma. Vahi picuíjahúcha picunacavane éma. Tijuricati tatiarihinapahi eta máejeca-
piravahi. Machu píтина tamuriaca taicha eta pímisipiraina éma. Pijaneacavaicha tayehe
eta juca.

²³ (Puiti néchavahi eta picajumamajipa eta pítaresirahi te piami. Tásiha, nuconsejachavi:
Pímisiriquicha apaesainarichu eta vino eta péresarama une, pípurujinahi.)

²⁴ Tacamunuhisera eta picasamairunumaya nácani tisiapanayare eta pastorecare, taicha
nararihi ena máchasihi eta napecaturana. Vahi táimaticarevane, tapaenunavaya picasa-
mairunuma éna. Nararihisera ena ticaecheravane eta napecaturana. Táimaticarenavane.

²⁵ Ene tacahehi, nararihi ena táimaticarenavanehi eta náichirahi eta táuriqueneanahi.
Nararihiveare eta tacamunuhi eta picasamairunuma, apaesa ticaecheravanehi eta
táuriqueneana náichaqueneanahi.

6

¹ Ena vichamuriana músuanahipuca, tatuparacavacahi napicauchayare ichape ena
náquenuanahi. Vahi tijicapairihianaimahi apaesa vahi nacuyunaca ena achaneana eta
máijare ema Viya, váhivare nacucaecahi eta vímiturapiana.

² Étaripa te nacaquenuhipuca mácani vichamurihi, tiápajucavayare eta napicauchirayare.
Vahi tímipanavanáimahi eta nachamurirahi éma. Náimerecayare yátupi eta táurivaya eta
náemataneana, taicha ema nacaemataneyeruhi, nachamurihi máemunaruvere ema Viya.

Ticurisamurechahavihi eta véhisira ema Jesús

Píti nuchicha Timoteo, pímitucayare tamutu eta juca nayehe ena vichamuriana.
Pémechavacayare eta vímiturapiana.

³ Natiarihinapuca ena nácani navaraha tímiturecana eta apana doctrina. Nahapapi-
cainapa eta vímiturapiana, tájinasera vahi tavehapiicaimahi eta juca yátupiqueneanahi
tásihaqueneanahi mayehe ema Viáquenu Jesucristo.

⁴ Ena nani, ticasañavaváicanahi, tájinahineni náitucaquenéhaníni. Ena nani, náurica
téchajicana. Navayurevanapahi nácapaemachapahi tayehe eta tacayemaqueneana eta
véchajiriruvana te tímiturecachi. Ticapinarurahiana éna, tíumeharahiana, tíchanarahiana,
típícararácavanapa.

⁵ Tamutu sácheana ticatianarerecana taicha máuripanererurahána ena, máimatirahanahi
eta yátupiqueneana. Navaraha nacavacharapiyare eta nayehe religión. Píti vahi picupau-
chavaca ena nani.

⁶ Jéhesareva, tétavivaca eta viúricicareva máicha ema Viya, eta véhisirahi éma. Tavetiji te
vicurisamurechava tayehe eta vicayehequeneanahi máijararuhavianahi éma.

⁷ Taicha te viúchucapa suyehe esu ticachichahavi, tájina viámaphini vímahaqueneanahíni.
Ene tacaheyare eta vítavirayare, tájinavare viámaimahi eta vímahaqueneanahi.

⁸ Eta tacahe, te tatiarihipuca eta vinícaquenéna te vípenana, vicamuirihahipuca,
tarataripa visuapayarehi.

⁹ Énasera nácani tipanerechanahi tirricuchavana, apanapanepa eta najamuracha-
queneana. Tacananesiricapa eta naplatanechiavaya. Énajivapa tímicuñacavana taicha
eta najamuraraivana súnsurupianahi. Eta juca ticauyacarehi étaina táimicuñaca eta
náchanevana.

¹⁰ Táitsivahisera ena achaneana, náetaviuchahi eta tavayuasirahi náichapa tamutu eta
tájiparacana, táichavenehi eta najamurachira eta plata. Namapurujipaipa ena vichamu-
rianaini. Natiarihinapaipa tímutserahavanapaipa eta tayurusiraina eta najamura-
raivana. Tásapihapapuca táiminajicapahi eta náehisiraníni ema Jesús. Énajivapa titanuca-
vanahi eta naviurevahi, tímutserahavanapaipa eta nacatajivairanahi eta náitaresiranahi.

Yátupina eta véhisiraina ema Jesucristo

¹¹ Pítisera vahi picupanerecha eta juca mamavarahaqueneana ema Viya. Pérajicava
tayehe, taicha mavanaraviripa éma. Tátupiruvahi eta pisamure mayehe éma. Táimiyana
eta juca táurivahi eta pítaesira. Tauri eta péhisiraina. Pémunaca yátupina. Picamichayare
tamutu. Yátupina eta pímansuvaina te pisamure.

¹² Pétumechavachucha eta picaemataneasirahi ema Viáquenu. Muracaina eta picasiñavaira mayehe. Vahi picuyacujiequenehava eta picuchapirahi eta pítaresiraya máichecuarquireyare, taicha máichuhaquenevirichuhi ema Viya. Vahi picuemepurureca eta péchajiriruvanahi te namuri ena vichamuriana, te píjaracavainapa eta péhisirayare ema Viya.

¹³ Puiti, tímararacavihi ema Viya eta nutuparasiraviya. Éma, ticaitarecahi tamutu eta vímahaqueneanahi eta te juca apaquehe. Tímararacavihivare ema Viáquenu Jesucristo. Pécharichuhivare eta matupiruvairahi eta máimereuchiravahi éma te mamirahu ema Poncio Pilato.

¹⁴ Pítauchayare píti tamutu eta juca nuvanairipianahi taicha tásihaqueneanahi me Viáquenu. Vahi pihapapicaimahi, apaesa tacuija táimicajachavi mayehe. Tauri eta machimampiravina ema Viáquenu Jesucristo te máitecapa te táitauchavapa te jena sáchezare máicutiarahi ema Tata Vicaiyaquene.

¹⁵ Ichapenapa vicunachainapa ema Tata Vicaiyaquene taicha macarichuhi éma yátupiquenehi tamutu marataha. Émahi Réyquenehi, Viáquenuquenehi. Tivanecahi namutu ena réyeana énapa ena aquenucana.

¹⁶ Macarichu éma, yátupiquenehi máepenacaca. Máetaviuchahi eta maváyuháquiráivahi. Nájina tiratahaina ticachacayaina eta majaraiva tayehe eta mávihahi. Éma, nájina tímahaina, taicha máimahasiquenehi éma. Éma, vipicauchaquenehi vivapinaquenehi ichape. Máitavacainapa eta vicunachirayare éma. Jéhevare éma, tamutu marataha. Amén.

¹⁷ Énerichuvare ena vichamurianahi ticaimahaqueneanahi rícuana, pímitucavacayare eta vahi nacucajamurava. Váhivare nacucasiñava eta nacaímahaquenerahi, taicha tijuricati títava eta náimahaqueneanahi, témitiequenehapa tamutu. Nácasíñavasera mayehe ema Viya, jéheverequene ema ticasíñacare. Éma tíjaracahavihi tamutu eta vicamunuqueneana, víúrisamurerecahi máicha.

¹⁸ Tacahe, ena vichamuriana rícuana, pímitucavacaichavare eta náurivainaicha. Náimicatarahi ichape tayehe eta ematanecana. Nájapanuráhi nacajirahi nayehe ena ticamunuvanapahi. Tátupiruva te nasamure eta nájarasiraina ena ticamunuvanahi.

¹⁹ Te yátupina náitaucha eta juca, tatiarihi eta sáchezare najacapiraya eta apanayare náimahaqueneanayare te anuma. Éna, ticaijaranainapa eta nápechiravaya títarecana, taicha éna yátupihí eta náimicataráivahi eta náitaresirahi te apaquehe. Máichecuarquirénapa eta náuricarevaya.

Eta téqueneha matuparaha ema Timoteo

²⁰ Tiuri puiti, Timoteo, péperajica yátupina eta juca vímitucasivahi mayehe ema Jesucristo taicha tacapicahuquenehi ichape. Vahi picujicapavaca ena nácani téchajisihana eta tájiparacana, técativánachucha. Váhivare picujicapa ena nácani navaraha ticanaraemachaviana. Ena nani tímijachavanahi náimatihíji eta táuriqueneana, tásihasera ichape nayerehi eta náehisirainahíni ema Viya.

²¹ Nararihipaipa ena vichamurianaini tinajicavanapa eta náehisirahi ema Jesús, taicha nasuapahi ena nani tépiyahirahiana.

Nuyaseuchaviparaca me Viáquenu Jesucristo táetaviuchahini eta piúricarevaya máicha. Tamutupa eta néchajiriruvahi piyehe.

Eta macartane ema Apóstole Pablo mayehe ema machamuri Timoteo, ticajare 2 TIMOTEO

¹ Nuti Pablo mayehenu apóstole ema Jesucristo. Ema Viya tivanecanuhi eta nucameta-rairuirayare eta máechajiriruva, taicha macaechajiriruvahi eta májarasirahaviya víti eta vítaresiraya táichavenehi eta mávahásirahavihi ema Machicha Jesucristo. Máichecuarauqui-rénapa eta vítaresira máicha.

² Puiti nápechavavare nucajurevi eta juca apana nucartane piyehe piti nuchicha Timoteo némunarquene. Nuvaraha macatajicavini majapanuvini ema Tata Vicaiyaquene, émapa ema Viáquenu Jesucristo. Nájaracavini eta táurivaina eta pipanereruana.

Ema Pablo máetumechahi ema Timoteo

³ Núti nécharaicavihi te sácheana yátiana te nuyujarasirana, nuyaseuchavihi me Viya. Nuhasulupayachahi éma eta piúrivahi máicha. Éma nucasíñahi núti, tacutihi eta nacasi-ñairahi ena viáchucanaveanaini. Tájina níchiravainahi eta nusamiravahi te mamirahu.

⁴ Tétavicavahi eta nuvarairahi nápechavahini nímahavi. Vahi némitisicavahini eta píyairahi te nujuníjavinapa. Nuvarahahi píjahúchavahini pítecapauchanuhíni, núrísamurepáini eta nímairavínahíni.

⁵ Taicha némechavahi yátupíhi eta pímiyaniravahi pisuapa ema Viáquenu. Picápayayará-cavacáinehi eta susuapirahi yátupi esu piátse Loida ésupa esu pena Eunice. Ichaperínehi pémechanuhi eta nayehe éna. Eta tacahe puiti, vahi néñamavahini eta piyehe.

⁶ Puiti nutuparacavicha muraca vahi picucaemaha eta péchemaravahi maicha ema Viya. Pímiyanavachucha. Vahi tacumapuruji eta nunasirahi eta nuvahuana te piápusi.

⁷ Taicha ema Viya vahi mavaraha vipícacarácavahini. Éma tíjaracahavihi eta vitumesa-murevana eta vicatuparahairahi. Éma tímitucahavihi eta vémunaraivaya. Tíjaracahavivare eta vicaratasiravayare yátupi eta vítaresira.

⁸ Eta tacahe, vahi picutsiríha eta picametarairuiraya eta máechajiriruvana ema Viáquenu. Váhivare picutsiríha eta táemeratasiránuhi eta nucametarairuiranahi núti apana. Yátupina picamicha eta picatajivairaya. Taicha ema Viya, éma tíjaracaviya eta pitumevaya eta pímiya-niravaya picametarairu.

⁹ Ema Viya tiámavahi eta máemunasirahavihi acane te tépanavainapa tamutu. Tijapanuhavihi máichavenehi ema Machicha Jesucristo. Eta tacahehi te mapanerechainapa eta máichuirahaviyare vimutu víti véhicanayare ema Machicha, mavarairahi ticuchucuha-haviyare, váhinéni viámavahini víúrihíni eta vítaresirahi. Puitísera ema Viya mavaraha mapecaturarehaviya te mamirahu.

¹⁰ Puitícha, eta majapanuirahavihi ema Viya, máevatasinahavihi ema Machicha Jesucristo ticatiuchahaviyarehi. Éma, máechepurehi te máecari. Puiti manaquicahi eta máechajiriruvahi eta macaitasirahaviya víti apana. Te jena sácheyare máitsivachainapa eta viáquehe, máepenacahávinapa.

¹¹ Ema Viya tituparacanuhi nucametarairuyare eta juca. Éma tinacanuhi apóstolenuhi, nímitucayarehi ena apavasanana.

¹² Eta tímicaviuchanuhi eta juca, puitícha nucatajivahi ichape, taicha eta nítauchirahi eta nutuparacavíahi. Váhísera nutsiríha eta néhisirahi, taicha nímatíhi núti eta yátupirahi eta macasíñacarévahi ema nucasíñaquenehi. Néchahivare eta majacapirahi tamutu eta némata-nerepiana. Nucunevainapa eta jena sácheyare eta májarasiranuyare eta nícuquíhi mayehe.

¹³ Píti apana, eta péhicayare eta juca yátupíqueneana nímiturapianahi piyehe, tájina vahi pihapapicaimahi. Yátupina pisuapa, yátupina eta pémunaraivaina taicha tiávahácavirípa ema Jesucristo.

¹⁴ Piúnacaicha yátupina eta juca máechajiriruvana ema Viáquenu. Te natíarihípuca návaraha nahapapica eta vímiturapiana, vahi pícuísapava. Máimahavínesera ema Espíritu Santo, ema tiávahácavíahi. Éma tímicatacaviyare.

¹⁵ Titecapa, pécharichuhi píti eta namáimicatasiránuhi ema náiyarahanahi ena víchamuri-ana ticavasanahi te Asia. Émavanénahíni máitecáhini ema Figelo, émainahípucaini ema Hermógenes.

¹⁶⁻¹⁸ Macarichu títecapauchanuhi ema Onesíforo. Te títecapapa éma te Roma, matupíruhi titanucanu, tétupícanupa te juca cárcel nucaerataiyahi. Éma, tájina mapicaimahi ena ticatianacanuana. Ticajínuhi eta nucamunuqueneanahi. Pímaharichuhi píti apana eta

máimicatasirahavihi te viávihaichaha te Efeso. Eta tacahe, nuyaseacahi ema Viya macatajicahini máimicatacahini éma, énapa ena machichanaveana. Majapanuhini te jena sáchezare vítecapauchiraya ema Viya.

2

Yátupina eta véhisiraya ema Jesucristo

¹ Pítisera némunarquene nuchicha Timoteo, nuvaraha yátupina máetumechavini ema Viáquenu Jesucristo.

² Píti pímatirichuhi tamutu eta nímiturapiana, taicha pisamahi eta nímitusiravacahi ena vichamuriana te avasareana. Puiti pitanucaya ena apamuriana vichamuriana nácani pimitureana títaurahianahi. Pituparacaya éna tauri eta náimitusiraina ena apamuriana vichamurianayareva, tácutirichu eta nímitusiravihi núti.

³ Nutuparacavi: Picamichayare piti tamutu eta picatajivairana. Yátupina eta masuntaruravina ema Jesucristo.

⁴ Picutiyaere eta máuriva ema suntaru, tacarichu máechapajiricahi eta mavanairipiana ema mayehe comandante. Vahi máemitisicaimahi eta mavanahiana, tahapapicahipucáini jácani tájiparacana. Ene picaheyare piti eta pítauchirayare eta mavanairipiana ema Viáquenu.

⁵ Éta juca tacutihí ena ticavijarurahiana eta pelota. Te vahi náitauchahi tamutu eta tavanairipianahi, vahi tivéarecanáimahi.

⁶ Píti pipamicavaya muraca eta pítauchiraya eta pituparahana. Picutiya eta mapamisirava mácani isanítireru eta macaematanera te máesane, mavarairahi tíuchucuhayare eta máematane.

⁷ Pipanerecha yátupina eta juca numetaruvianahi. Németeaca tímicatacaviyare ema Viáquenu eta picaicutiarairayare tamutu.

⁸ Vahi picuemitisica eta juca nímiturapianahi mayehe ema Jesús, eta émairahi yátupiquene Cristo, mámaríquenenihi ema rey David. Éma, máepenaquenénihi. Macaechepucahisera ema Viya.

⁹ Eta tímicaviuchanuhi eta juca, púiticha nucatajivahi ichape taicha eta nucametarairuirahi. Étara témeratacanuhi puiti, ticutirinehi nucaviurevahini. Váhisera vicainajiruvaimahi eta vicametarairuiraya eta máechajiriruva ema Viya, cápachi etiarihípa éti. Étinapa nítsivaheyare.

¹⁰ Nucamichahisera tamutu eta náichiranuhi, nuvarairahi nasuapahini nácani máichuhaqueneánayarepahi ema Viáquenu Jesucristo, apaesa náuchucuhahini éna apanava, náitujicavahini nasiapa tayehe eta táuricacarequene mávasa. Máichecuaraquirequene eta vicachaneraya éma.

¹¹⁻¹³ Jéhesare, yátupiquenehi eta juca véhiruhi vimutu:

Te vépenaca mayehavíhi ema Viáquenu,

éma ticaitarecavíyare vicachanenapa

éma tayehe eta mávasa.

Te vicamicha eta vicatajivairanahi

máichavenénahi éma, vítujicavayare vicajupahayare

éma eta macavacureraya.

Téhesera vicaerajicavahi eta véhisirahi éma,

éma apanavare ticaerajicavíyareva te mamirahu.

Te vínajicavahípuca eta véhisirahi éma,

émasera vahi máinajicavíhíni.

Manasirichucha ticuchapavíhi te

viápechavayarepuca vichavayare mayehe.

Taicha éma, vahi apánapanéna eta mapanereruana.

¹⁴ Nutuparacavi: Pémechavaca ena pímitureana tamutu eta júcana. Pécatiacaicha muraca te májare ema Viáquenu. Vahi nacuevataemajiricáca te jácani náechajirísiravána. Taicha tájina tájaracaimahi, machu étaina tahapapica eta napanereruana ena vichamuriana eta nasámararásirainahi.

Yátupiyare eta náurivaya ena mavanarana ema Viya

¹⁵ Píti, yátupina tauri pícha eta picaematanerahi ema Viya, picurisamurechirayare éma. Tájinasarépa piávamirahumahi taicha tamutuhi tiuri eta pémataneana. Tatupiruvayarehi eta pímituresirahi eta yátupiqueneanahi máechajiriruva ema Viya.

¹⁶Téhesera natiarihinapuca ena téchajisihanahi eta tájiparacana técativacana, vahi picujicapajiricavaca éna. Pérajicava nayehe, taicha ena nani navetijiyarepáichucha eta náichira eta tamauriqueneana.

¹⁷Tífeliqueneanahi eta náechajirisiravana taicha eta tavayuarasiravahi, ticauyayacarehi nahapapica ena vichamuriana. Ene tacahehi eta náejecapiravanahi ema Himeneo, émapa ema Fileto.

¹⁸Péchapavayare nayehe ena nani apinana, taicha nacaerajiruvaipahi tayehe eta yátupi-queneana vímiturapiana. Taicha ena nani tépiyaequenehanahi eta táetavisiravaripahiji eta náechepusiraipahiji ena náepenaqueneana. Jéhesare, natiarihipahi ena náemejecapavaruanapáipahi.

¹⁹Vitirihichahasera viti vímijanavahi véhicahi ema Viya. Taicha muraca eta vicasifnavairahi eta majaneasirahavihi, taicha éma tímatihavihi eta machanerairahavihi. Yátupivare visuapa eta juca máechajiriruva, ani macahe: “Náinajicayarehi eta tamauriqueneana namutu ena tíamanahi eta máijare ema Nuchicha Jesucristo” macahepa.

²⁰⁻²¹Eta tacahe, víti, ichape eta vijaneasiravayare tayehe eta tamauriqueneana. Yátupiyarehi eta vicamunucarevaina mayehe ema Viya, vítauchirayarehi eta vicaemataneasira éma. Jéhesare, ichapenapa eta vimunavayarehi mayehe. Véperajicavayarehiséra mayehe tacutiyaere eta náeperajísira ena rícoana eta nayereruvana táuriqueneanahi nayeheana jarra oro, nacurujana plata. Vahi náimipananajicáimahi. Vahi náimicutichaimahi eta apamuriana nayereruvana yucuquisiana: eta raveta, eta yuvaraqú, étapa eta nacasuelana mátejísiana.

²²Eta tacahe, vahi picuehica eta natuhusivana ena amaperuquijiana. Tamutuhi najamuracha éna, nacaravahuhi jácani tamauriqueneanahi. Pítisera pímiyanava eta táurivahi eta pítaresirahi. Táuri eta picasiñairahi ema Viáquenu. Yátupinavare eta pémunaravaina. Pétipiricayareva eta náichavaqueneva ena achaneana. Énaina pitanuca pácachanevaca nácani pichamurianarichu tíuripanereruanahi, taicha éna nacasamurehi ema Viáquenu tamutu sácheana.

²³Énerichuvare vahi picujicapajiricavaca nácani navarahahi tiyaserecaviana eta súnsurupiana. Taicha pímatipahi ena nani eta nacahirana, étachucha natanuca eta semanereana.

²⁴Viti mavanarana ema Viáquenu, vahi víúriha vímisiaparacavahíni tayehe eta semanereana. Táitsivasera vétaviuchayarehi eta víúriava eta nayehe namutu. Vicayehyareva paciencia eta nayehe namutu ena achaneana. Vímiturahiyareva eta táuriqueneana.

²⁵Énaripa ena víánaranahi, tíuriyare eta véchajirisirayare. Vicuchapayare eta táetupirisiravaina eta napanereruana, májjaracahíni ema Viya nasupiraina eta máechajiriruvana,

²⁶apaesa nacuchucuhavahíni eta náchanevana eta tacaeratairahi maicha ema Váinaraji. Taicha eta máiturusiravacahí éma, mavarahahi náitauchaya eta mavarahaqueneanahi éma.

3

Ena achaneana tévínarajichavanáinapáipa

¹Eta apana eta juca nuvaraha péchayare. Puiti juca vicaijuheyare tavetijinapaipa eta táejeravayare nasamira ena achaneana eta náehisiraina ema Jesús.

²Taicha tivayuchavainapa eta náichirayare eta najamuraraivana. Tavayuacainapa eta plata. Ticasifnavainapa, navayuchayare eta náechajirisiravana. Tipanarahiana. Énerichuvare, masuápajirírírahánainapa nayehe ena ticachichana. Tájinainapa eta náitsirijirápinaya. Váipavare napicauchaimahi ema Viya, nasapihayarechucha nacaecahiyare éma.

³Nájinapa náemunaruimahi. Nájinavarepa najapanquenenámahi. Téchajihianainapa. Vaipa téchajicacareanáimahi. Titupiarahanainapa. Nacaticainapa eta táuriqueneana.

⁴Cáetemarrahiana. Mapicauruirahanainapa. Ticasifnaváicanainapa. Náuricanapa náicha eta piesta, tasapihainapa napauchayare, vaipa émaimahi napauchaimahi ema Viya.

⁵Nararihipuca ena tímijachavanainapa yátupinahíni nácajuhe ema Viya. Váhisera náunacaimahi eta máechajiriruvana, váhivare tisapavanaimahi máemetupirucha ema Espíritu Santo eta napanereruana.

Púitiripa nararihipa ena achaneana, étapa návacuha eta juca. Pérajicava eta nayehe ena nani. Vahi picuimisiapava nayehe.

⁶Taicha nararihi ena achaneana tiyurarahiana tépiyacavanapaipa tipaipicana te pétiana, nayurucavacapaipa nácani esenana máecharaireana. Ena nani esenana tísipecaturanahi, tavayuaruanahi eta tájiparacana.

⁷Nametaínipa ticaravahuanahi, tájinasera vahi nacaicutiaraimahi eta yátupiqueneana.

⁸Púiticha ena nani tiyurarahianahi, éna ticaeahiana eta vímiturapiana yátupiqueneana taicha máuripanerérurahíana éna. Tacutihí acane ena íápemareana ema Janes émapa ema

Jambres tiácapaemachanahi ema víyahaini Moiséini. Tímaticareanahisera eta namaima-tirahi eta yátupiqueneana.

⁹ Váhiserá camurianaímahi ena náiturevanaya, taicha ena achaneana náimatiacavane-yarehi eta náepiyahiraivana súnsurupianahi éta, tacutiyaehi eta náimatisiravacahi acane ena achaneana ena nani apina iápemareana tiácapaemachanainihi ema Moiséini.

Eta téqueneha matuparacasivahi ema Timoteo mayehe ema Pablo

¹⁰ Pítisera péhichahi yátupi eta nímiturapiána. Picutinuhi eta núrivahi nayehe namutu achaneana, étaripa eta nupamisiravahi eta néhisirahi ema Jesús, nucasiflavahi yátupi mayehe. Picutinuhivare eta nucayeherahi paciencia, étaripa eta némunaravahi, étaripa eta nucamichirahi tamutu.

¹¹ Péchahivare eta náichiranuhi ena achaneana, eta nucatajivairahi náicha. Ichapemurihi eta napanajirisiranuhi eta te avasareana Antioquía Ichipichu, te Iconio, étapa te Listra. Émasera ema Viya ticatiuchanuhi tayehe eta juca náichiranuanahi.

¹² Énesera tacaheyarehi eta juca. Tímiyanavanayare tipanajiricahavianayarehi vimutu víti vivarahana véhica yátupi ema Jesucristo.

¹³ Énerichuvare, ena achaneana váinarajiqueneana tiápajucavainapa eta navainaraji-vanaya. Énerichuvare ena ticaetemarahiana, tiápajucavainapa eta nacaetemaravaya. Énajicacainapa ticaetemacacanayare.

¹⁴ Pítisera pímiyanavahi eta péhisirahi eta juca pímitucasivanahi. Yátupihí pímercahi eta pisuapirahi. Píti pímatihavirichuhi víti vímitucavianahi, nútiripa.

¹⁵ Piámavahi te amuyavichaha pímatihí eta Sagrada Escritura. Éta, túmitucavihí tayehe eta víuchucuiraya te apana vítaresira, táichavenehi eta visuapirahi yátupi ema Jesucristo.

¹⁶ Taicha tamutu eta Sagrada Escritura tásihaqueneanahi mayehe ema Viya. Jéheva-requene eta viviyihayare eta ticaravahucareana, eta vímitusihaya véhajisihayare ena achaneana eta viconsejachiayareva, vímitupiruchihavacaya tayehe eta táurivayare eta náitaresirana.

¹⁷ Tacahe, ena vichamuriana mávaháruana ema Viya téchemarahianayarehi, yátupi náitucayarehi tamutu eta náichiraya eta táuriqueneana.

4

¹ Puiti nutuparacaviyare muraca te máijare ema Viya, émapa ema Viáquenu Jesu-cristo. Taicha éma, títecavaneyare eta macavacureiraya te juca apaquehe. Víti vítarerua-naichaha énapa ena náepenaqueneanaripa vicayaseresehinapa te mamirahu tájahahipuca eta vícaemataneasiranahi éma.

² Eta tacahe, pímiyanavachucha picametarairu eta máechajiriruva ema Viya te jácani pítujsiravana. Vahi picúyacujitéquenehava. Pécatiacavacaicha muraca ena téjcapavanahi eta náeneuchirávaina. Piconsejachavaca. Pétimechavaca ena tíuripanereruanahi. Pácaye-hesera paciencia eta pímitusiravacaya namutu.

³ Taicha tatiarihiyare eta sácheyare ena achaneana vaipa nasuapaimahi eta vímitu-rapiána táuriqueneana, étainapa náichayare eta navarahaqueneanarichu. Natanucainapa ena nácani túmitucanayare tayehe eta tájiparacana, nacarichuinapa tisamacareanayare nayehe.

⁴ Tasapihainapa náepuruyare eta yátupiqueneana, nacaepaquecuinapa. Étasera eta náepiyapiruana ena achaneana, tasapihayare eta tisuapacareyarehi nayehe.

⁵ Pítisera pinasiyareichu tájina píchiravaimahi. Picamichayare tamutu eta picataji-vairana. Pímiyanavachucha picametarairu eta máechajiriruva ema Viya. Pítauchayare eta pítiparacasivahi.

⁶ Púitiserá, nútí tiánehipa eta nítaviraya te apaquehe. Nucutiripa eta yúcupi te títavayarepa témahayarepa, éneripa nucahehi nútí.

⁷ Váhiquene néñamavacare. Nítavarerupa eta nuncanarairahi eta tamauriqueneana. Vahi nuvitaequenehahini. Nítauchahi eta nutuparacasivahi mayehe ema Viáquenu. Núnacahi muraca eta nusupirahi ema Jesús.

⁸ Puiti nútí étanecha nucuchapahi eta jena sácheyare eta máijarasiranuyare eta níjara-casiya me Viáquenu, taicha eta néhisirahi yátupi. Taicha éma, máítauchayarehi eta máijara-siránuyare eta níucuhíhi mayehe. Váhivareséra nácarichuímahi nútí nucaijaracasiyare. Énerichuva máijaracayareva namutu nácani ticuchapanahi eta machaviraya.

Ema Pablo máimichuha ema Timoteo

⁹ Pítátijiricavaicha eta pítesirávanezare ani nuyehe.

¹⁰ Puiti tíjunijicanuripa ema Demos, taicha tétavicavahi majamurachirahi eta mavaraha ticaimahaquenezare te juca apaquehe. Tíyanapa macaijuhíhi tayehe eta Tesalónica.

Émasera ema Crescente, névatacahi te departamento Galacia. Énerichuvare ema Tito, névatacattivare te departamento Dalmacia.

¹¹ Macarinehi nucachanehi ema Lucas. Pivenumapahi ema Marcos, máiteca ema apanavare. Tétavicavahi eta nucamunuirahi éma.

¹² Ema Tíquico, nuvanecahi máiteca ara piyehe te avasare Efeso. Émainachaha pítsivaina.

¹³ Te píteca, pétavajicayarepahi te Troas, pivenuminanuya eta nuyehe capa nunaquiruhi mayehe ema Carpo, étapa eta nuyeheana libro, étapa eta apamuri ajumerucana.

¹⁴ Numetacavivare eta májecapiravahi ema Alejandro eta nuyehe; tétavicavahi eta macatichiranuhi ema maca herrero. Máimahainesera ema Viáquenu. Éma títsirijiequenehayare eta máichiranuhi.

¹⁵ Eta tacahe, picuneuchavaicha eta mayehe, taicha tétavicavahi eta macatichirahi eta vicametarairuirahi.

¹⁶ Étaripa, te títapucainapa nucatiuchavahi te mamirahu ena tuparairucana juéseana, nájina námicatacanuhini. Namutuhi tijunijjicanuanahi. Tiuri, tacuijaseraini macuíchacacáini ema Viya, maperdonachavacaini ena tijunijjicanuanahi.

¹⁷ Émasera ema Viáquenu tijaneacanuhi, tímicatacanuhi. Vahi máisapanuhini nanacanuhi te tapena eta sárareana tinicarahiana. Nítujicavahi núchuca nuyana tayehe eta apanaqueneana avasareana, nucametarairuhi nayehe ena apavasaqueneana.

¹⁸ Ene tacaheyare eta máimiyániravayare ticatiuchanu ema Viáquenu tayehe eta táíñehiqueneana. Tiámanuyarehi tayehe eta mávasa anuma. Máichecuareyarehi eta vijirau-chiraya éma. Amén.

Eta táichecuaraqú eta máechajirirúva ema Pablo

¹⁹ Péchajisinanuvaca ema Aquila ésupa esu mayena Priscila, énapa ena machichanaveana ema Onesíforo.

²⁰ Émasera ema Erasto, nunaquicahi te Corinto. Émapa ema Trófimo nunaquicattivare te Mileto taicha ticajumahi éma.

²¹ Pítecavanecha te tamirahuinarichaha eta muracana técatícava. Téchajicaviana ena vichamuriana ema Eubulo, ema Pudente, ema Lino, esu Claudia, énapa ena apamuriana vichamuriana.

²² Núti nuyaseuchaviparaca me Viáquenu Jesucristo majaneacavihini tamutu sácheana, táetaviuchavaréni eta iúricacarevaya emutu éti máicha.

Tamutupa eta néchajiriruvahi piyehe.

Eta macartane ema Apóstole Pablo mayehe ema machamuri TITO

¹⁻⁴ Nuti Pablo, nucajurevi piti nuparape Tito. Némunacavihi tímicitijiricavahi nuchichavinahini táichavenehi eta péhisiranuhi eta nusuapajiraivahi mayehe ema Cristo. Nuvaraha macatajicavini ichape, májapanuvini ema Tata Vicaiyaquene, émapa ema Viáquenu Jesucristo, émaripahi ema Macatiurahiquene viyehe. Nájaracavini eta táurivaina eta pipaneruana.

Acane, eta táepaniravahi eta juca apaquehe, ema Viya macametarapihi eta májjarasirahaviya eta vítaresiraya máichecuaraquireyare. Ene tacaheyare, taicha ema Viya tájina máepiyahiraivaina. Puiti, títécapauchahaviripa eta sache máicitiairahi ema Viya, eta májjarasirahaviripa viti apóstoleana eta máechajiriruvana, étaripa vémechaquenehi puiti ena achaneana. Tacahe, núti mavanaranuhi ema Viya. Manerejirunuhi ema Jesucristo, ema Macatiurahiquenehi viyehe. Tituparacanuhi nítauchayare núti eta námirayare eta máechajiriruva. Tivanecanuhi eta nímitusiraya ena apamuriana manerejiruana ema Viya eta nasuapajiraivanayare, mavarairahi náimatiequeneha tamutu eta tímucacareana yátupiqueneana apaesa tauri eta náitaresiraina. Tacahe, nacunevaina eta jena sáchehare te májjaracahaviya eta vítaresiraya máichecuaraquiréna.

Eta macatuparahaira ema Tito

⁵ Péchavarichuhi te nunaquicavinapa eta te tíurupuhi te mar ticaijare Creta. Nutuparacavihi pítauchayare tamutu eta numaitaureanahi. Eta nutupararuvihí pinerejicaya ena pinacaqueneanayare eta návacureanaya ena pastoreanaya téchapajiricanayare nácani nájjamuripachu tisuapajirahiana.

⁶ Nayehepachuina pastor, tacamunusera mácani achane maoaporavare eta máitaresira. Mácani, ésunarichuhi esu mayena. Tisuapajirahianahivare ena machichanaveana. Tacuija natapiravaina. Tisamarahiana éna.

⁷ Taicha tacamunu matapiravarena nácani pitupararuanayare; taicha éna, tuparairucanayavare mayehe ema Viya. Mácani, tímucacarehi. Mácani, vahi tiseमारairihí. Váhivare tavayuaruina eta tétacare. Váhivare macueharahi. Váhivare tijamurarahi.

⁸ Mácanisera achanesamure tijacaparahi nácani tichimarachana. Máurica macachane ena tíuripaneréruana. Mácani, máituca tipanerereca. Mácani, títaurahi tamutu nayehe ena achaneana. Mácani, macaijuhe ema Viya, títaurahihivare mayehe. Mácani, táuriquene eta macaratasirava.

⁹ Énerichuvare tacamunu ema mácani tisuápajiráhiquene tayehe eta vímiturapiana tisuapacareana, apaesa éma táurivare eta máimituresiraina. Taicha tacamunu eta májjarasirayare eta natumevaina ena tisuapajirahianahi. Tacamunuhivare eta macajimuyasiravacaina ena nácani ticatianacanárichaha eta máimiturapiana. Májjaracainavare eta nasuapajiraivaina.

¹⁰ Taicha nararihi camuriana ena titupiarahiana. Náetaviucha eta náechajiricavarasivana, tivayuarahiana éna. Nararihi ena nujaneanana tíapajucavana eta natupiaraviana.

¹¹ Picamatinacayare ena nani. Vahi picuisapa eta náimitureca eta tamauriqueneana, machu náemejecapavacha ena vichamurianahi. Taicha vahi táuricacarehíni eta náimiturapiana. Ena nani náichahi eta juca taicha navarahahi navereacavaca eta naplataneana.

¹² Matiarihinihi ema nayehehihi profeta najaneanaichu ena cretenseana. Macahehi eta máechajiriruvahi nayehe: “Ena nujaneanana cretenseana, tépiyahirahiana éna. Tíñehi eta náichaquene nacutí eta sárare tíñehi. Cánisiuquiana. Plújuanavare éna” macahepa éma.

¹³ Yátupi tacahehi eta náitaresirahí puiti ena cretenseana. Eta tacahe, pituparacaicha muraca ena vichamuriana cretenseana, apaesa vaipa nacuaquipaicava tayehe eta tájiparácana. Tauri eta náehisira eta véhiruhi.

¹⁴ Vaipa nacusuapa eta náimiturapiana navayuarapiana ena nujaneanana israelítana. Machu nacusuapa eta náimiturapiana ena nácani navaraha tihapapiricavaca ena vichamuriana eta náehisira eta yátupiqueneana tímucacareana.

¹⁵ Ena tipachinanahi te napanereruana téhepa nasamureana, éna ena nani nacaijuhe eta táuriqueneana taicha náurica eta nasamarasira tamutu eta táuriqueneanahi. Énasera ena masuapajirairahana váinarajipanereruana, éna vahi táurihini nasamira eta tíuriana echajirirucava yátupiqueneana. Taicha tachipejiquenehi tamutu eta napanereruana, muracasamureanapa táicha. Tájina nasamahini eta tamarivahi eta náichirahi.

¹⁶ Éna nacahehi: “Véhica ema Viya”. Tímaticareanahisera eta namáehisirahí ema Viya, taicha náicharichucha eta tamariqueneana tíñemahiana. Émasera ema Viya macaticha

tamutu eta juca náichaqueneana táifemahiqueneana. Ena nani, masuapajirairahanahi eta mayehe. Tájinasera vahi náituruequenehaimahi ena nani náichahini eta táuriqueneana.

2

Eta yátupiquene vímiturapiana

¹⁻² Pítisera pímiturecaya tamutu eta táuriqueneana. Ena víyarahana ichanaruana, pímitucayareva eta najaneasiravaina eta náitaresira, náitaurahivaina, náitusiraina tipanererecana, nasuápagiráhiquenéna tayehe eta mavanairipiana ema Jesucristo. Náemunarahi nayehe ena achaneana. Yátupina eta nacamichiraina tamutu.

³ Énerichuvare ena vénarahana ichanaruana, pímitucayareva éna tauri eta náitaresiraina taicha éna, tuparairucanahivare mayehe ema Viya. Vaipa téchajihianaimahi. Váhivare tacuvayuaca eta téracare. Náimiturahisera eta táuriqueneana.

⁴ Náimitucayareva ena amaperuana esenana apaesa náituca eta náemunasiraina ena náimanaveana énapa ena nachichanaveana.

⁵ Náitusirayareva tipanererecana. Napicaucha ena náimanaveana. Nasuapajirahivare nayehe. Napicauchacare nacaenacare te napenana, náitusiraina náechapajirica eta nayerevuna. Náurivaina éna, apaesa tacuija náechajisiacarevaina tayehe eta náehisirahi eta máechajiriruva ema Viya.

⁶ Énerichuvare piconsejachayare ena amaperuana ajairana, yátupina eta náitusiraina tipanererecana.

⁷ Tamutu eta juca, pinaquipairuyare píti eta piúrivaina, apaesa étaina náehica ena vichamuriana eta piúrivahi píti. Étanarichu eta pímiturapiya, vahi pihapapicaimahi eta pímitucasivahi. Váhivare picuitsivacha. Tapicauchacare eta pímituresiraya.

⁸ Táuri eta pímvivehapisirayare eta jácani péchajirisiravanaya, apaesa tacuija nacuviyava eta nacaecahiravina ena piánaranahi, titsirihavianayarechucha táicha.

⁹ Piconsejachayare ena músuana eta nasuapajiravaina nayehe ena náquenuana. Náitauca tamutu jácani navarahaqueneana ena náquenuana. Vahi nacujicapairihi tayehe eta vanairipiana.

¹⁰ Váhivare nacuvijaca eta nacayehequeneana ena náquenuana. Yátupina eta nacasiñacarevaina tayehe tamutu eta natuparahanahi. Náimereca yátupina eta náurivaina apaesa tajamurachacare eta véhiruhi, étarichuhi eta vímiturapiana mayehe ema Macatiurahiquenehi Viya.

¹¹ Ema Viya, acaneripa eta majapanuirahavihi vimutu viti achaneana. Eta tacahe, máimitesinahavihi puiti ema Machícha eta macuchucuirahaviya. Eta juca tímicaeche-rachahi viti eta majapanuirahavihi ema Viya.

¹² Puiti ema Viya mavaraha eta táuri eta vítaresiraina te juca apaquehe. Mavaraha yátupina eta vítusiraina vipanerereca, etapa eta víturaivaina tamutu nayehe ena achaneana, etapa eta víturaivaina mayehe ema Viya. Vaipa víchaimahi eta tájiparacana tauriqueneanahi. Váipavare víchaimahi eta tajamurachaqueneana eta víaquehe.

¹³ Tásiha, vicunevainapa eta machavirayare ema Víaquenu Jesucristo ema Macatiurahiquenehi viyehe. Eta máitesiraya mámayarepahi eta tapachinaquene majaraíva. Tétavicava eta viúrisamurevainapa te jena sáchezare.

¹⁴ Éma, máepeninahavihi, mavarairahi macaichepaicaya tamutu eta víchirahi eta tauriqueneanahi. Máepachinachayare tamutu eta tamaeperajivana eta víachanevana. Taicha mavarahahi machaneraquenehaviyare. Tacahe, puiti vivapinavayarehi vicha eta táuri queneana.

¹⁵ Tiuri, pímitucayare eta júcana nutupararuvianahi, tamutu piconsejachavacayareva ena achaneana. Tijuricati natiaríhi navaraha téjecapavana, picortachavaneyare. Pétumehava eta pímitusirahi taicha eta pituparacasivahi. Piúriyare eta pítaresira apaesa námutu napicauchavi, váhivare nacuepuru eta pituparahahi.

3

Eta vítaresira viti véhicana ema Cristo

¹ Pémechayareva ena vichamuriana eta nasuapiraina ema ichapequenehi aquenuca, tásiha, énapa ena tuparairucana. Énerichu pémechavare ena vichamuriana énaína nápajucava eta návanacare tayehe jácani ematanecanaya.

² Vahi nacuechajica nayehe nácani achaneana. Váhivare nacumehareca. Váhivare nacutupiarahi. Mánaruanáinasera, najapanurahi nayehe ena achaneana.

³ Vítí, acane eta masuápiráirahahavirichaha, vimáimatiéquenehahinivare. Víchahi tamutu eta tájiparacana tavarahaqueneana eta viáquehe. Tétavicavahi eta viváinarajívainihi eta vítaresirahi. Vicapinarurahini. Vímicatichavainihi nayehe ena achaneana. Vicatianarahinivare nayehe éna.

⁴⁵ Puítisera, vaipa vácahehíni, taicha máitsivacharipa eta vítaresira ema Macatiurahiquenehi Viya. Émasera, tétavicava eta máuriva eta viyehe. Témunacahaviripa. Váhinéni víchahíni eta táuriqueneana, tíjapanuhavisera éma. Masipacaipa eta visamureana, máquijicaipa eta tamauriqueneanahi eta viyehe. Énerichuvare tíjaracahavipa ema Espírítu Santo. Ema Espírítu Santo máitsivachinahávipaipahi eta vítaresira, tímitucahavipa eta viúrivayare eta viyeherepiyare.

⁶ Tétavicavahi eta viúricacarevanahi maicha ema Espírítu Santo máijjararúhi ema Jesucristo Macatiurahiquenehi eta viyehe.

⁷ Majacapahaviripa ema Viya, tiásihaquenehi eta máemunasirahavihi ichape. Énerichuvare tímetacahavihi eta máijjarasirahaviyare eta vítaresiraya máichecuaraquirénapa. Tásiha, vivapinavahi víti eta vicuneiravahi eta jena sáchezare.

⁸ Yátupiquenehi tasuapacareva eta juca vímitucasivahi. Eta juca néchajisihaqueneanahi puiti, nuvaraha pímitucayare tamutu sácheana apaesa náimiyana naicha eta táuriqueneana ena vicutiqueneana tisuapajirahiana me Viya. Tétavicavahi táuriva eta vímiturapiana. Tájiha táichiravaina, taicha eta juca tíjaracarahi eta náurivaya nayehe namutu ena achaneana.

⁹ Puíticha nararihi ena tisuapanarichaha eta nahapapiruanahi nayeherépiana ena viáchucanaveánaini. Te návarahapuca névataemachavi, vahi picujicapajiricavaca, taicha súnurupianachucha eta nayasereruvianaya. Váhivare picumicasiapava nayehe nácani tiyunacana eta mayeherepiana ema Moiséini. Te navarahapuca nácani ticajachaviana, vahi picujicapa. Pihapapicayaresera eta tajuricatira eta nasemanevanahi. Técativachucha éta.

¹⁰ Te matiarhipuca ema mácani mavaraha mahapapica eta napanereruana ena vichamuriana, pímicuhayare picórtachávaneya eta mapanereruhi. Te apihequenénapa eta pímicuha, te máviraichu vahi macusuapavi, pévatacayare mayana máuchuca.

¹¹ Taicha tímaticarepahi ema achane eta mamaimitucacarevaya. Étavenérahí eta mapecurana táimicuñacaya.

Eta téqueneha matuparacasivahi ema Tito mayehe ema Pablo

¹² Tiúri, névatacayare pítsivayare ema Artemas eta ara piyehe, téhesera émapuca névataca ema Tiquico. Te máitecapauchavipa ara piyehe, pítecávaneyare ani nuyehe te juca avasare Nicópolis, taicha nunasiyarechaha ani.

Nuvaraha táetavicavanúmachaha eta muracana técativaca, nupaenumavainapa nuyanaya.

¹³ Énerichuva títecapauchaviya ema vichamuri abogado Zenas, émapa ema vichamurivare Apolos. Pímicatacavacayare éna eta nayanirayare. Péchapajiricayare éna, te náechuriapuca eta napaisiraya.

¹⁴ Pímitucayare ena vichamuriana eta achanesamurevacaina, máejeraréna eta nacajiraivaina nayehe ena achaneana. Yátupina náitaucha eta nacamunucarevanahi.

¹⁵ Téchajicaviana namutu ena natiariqueneanahi nuyehe. Tásiha, péchajisinanuya namutu ena némunacasáreana vicutiqueneana eta visuapajiraivanahi mayehe ema Viya.

Nuyaseuchaheparaca emutu éti me viáquenu Jesucristo, táetaviuchahini eta iúricacarevaya máicha.

Tamutupa eta néchajiririvanahi piyehe.

Eta macartane ema Apóstole Pablo mayehe ema machamuri FILEMÓN

¹ Nuti Pablo tapresuchaquenenuhi eta néhisirahi ema Jesucristo, puiti nucachane ema Timoteo eta vicajureravihi eta carta piti Filemón, vichamurivihí vémunaruviqenehi tayehe eta vématanerepianahi.

² Vémechajisihavare namutu ena vichamurianahi tíurujicavarahianahi te pipena. Péchajisinhavivare esu vichamuri Apia, émapa ema Arquipo, vicompañeroquenehi muraca tayehe eta vématanerepianahi.

³ Nuvaraha macatajicahehíni ichape ema Tata Vicaiyaquene, émapa ema Viáquenu Jesucristo. Nájaracahehíni táurivaina eta epanereruana.

Eta máurivahi ema Filemón

⁴ Néchaviparaca te nuyujarasirana, nuhasulupayachahi ema Viya.

⁵ Taicha nusamairiricahi eta pímiyanirávahi pémunaca ema Viáquenu Jesús, péhicahi yátupi. Pémunachavare namutu ena machanerana ema Viya.

⁶ Nuyaseuchavacahi me Viya nayehe namutu ena téhícvianapaipahi táichavenehi eta náimairahi eta pisuapirahi yátupi. Nuvaraha nácaicutiaraquenénáini muraca tamutu eta táuriqueneana májararuhavianahi ema Cristo Jesús.

⁷ Ichaperinehi eta núrísamurevahí picha piti nuparape. Tijarahinehi picha te nusamure eta nusamairírísirahi eta pímiyanirávahi pémunacavaca yátupi ena vichamuriana, étapa eta picurisamurechiravacahí ichape éna.

Ema Pablo máchejiucha ema Onésimo mayehe ema Filemón

⁸⁻¹⁰ Tiuri puiti, nuvaraha néchajiucha ema Onésimo. Picatajicanu piperdonachinanu éma. Núti yátupiquenenuhi mayehenuhi apóstole ema Cristo. Tituparacanu hinéni nuvanecavihíni. Étasea eta vémunasiracacahi, nuyaseacavi nuti paure ichavica, nucaerataquenehi puiti máichavenehi ema Cristo. Puiti éma, nuchichahi némunaruquenehi te juca cárcel taicha éma téhícvahiripa eta visuapirahi ema Jesús.

¹¹ Ema maca Onésimo, cape juca másinequenehi, vahi máitaurahíni eta picamusurairahi. Tijunahivare. Púitiserá éma, ichaperinehi eta máitátiranuhi. Eta máitátiranuhi núti tacutiyaere eta máitátiraviyareva píti apana.

¹² Puiti névatacayare éma eta ara piyehe. Picatajicanu pijacapinanuyare táimicutijiricava nútínayarehi nítecapauchavi piyehe.

¹³ Nuvarahahíneni mánasihíni eta ani nuyehe. Émainahíni pítsivainahíni eta pivairairahi píteca píttínuya eta návhairahi te juca cárcel táichavenehi eta nucametairuirairahi eta máechajírírúvana ema Viya.

¹⁴ Nuvarahahíneni níminasicha éma, nucuchapahisera tájahapuca picayemayare píti. Váhísera nuvaraha nupamicavi eta juca picatajísiranuya, nucuchapayare eta pijicapiranuyare. Nuvaraha étachucha tásihaquenyarehi eta táurivaina eta pipanereru.

¹⁵ Táitaurevaquene tijunjicavíhi áni pi ema Onésimo. Émarichuserapuca jácani ema Viya tásihahi máisapahi eta macaheyarehi ema Onésimo. Púitiserá tétupiricavapa éma. Márajapainapa tichavayare eta ara piyehe, apajarahinapa eta máitátiraviya.

¹⁶ Váipa tácutimahi cape juca másinequenehi. Puiti pímahainapa eta máurivayare macamunucarevayare eta piyehe, taicha váchupa puiti vichamuripahi éma te mavahuana ema Viáquenu. Núti, ichape eta némunasirahi ema maca. Énénapa picaheyare píti apanava, tíapajucavainapaipa eta pémunasiraya ema maca.

¹⁷ Te yátupina pémunacanu eta nuchamurivírahí, pijacapinanuyare éma táimicutijiricava nútínayarehi pijacapa.

¹⁸ Te tatiaríhinapuca eta máejecapiravahi piyehe, ticantevehipuca, nútínarine pico-bracha.

¹⁹ Nuvachachaviyare núti. Nuti Pablo, nútiquenehi nájuchahi eta nufirmachirahi puiti eta nuvachachiraviyare. Nuvarahahíneni némechavi píti apana eta pintevehi nuyehe eta nucatiuchiravíhi.

²⁰ Tiuri, nuparape, picatajicanuchaha eta juca nuyasearuvíhi táichavenehi eta nucachamurivirahi mayehe ema Viáquenu. Picurisamuréchanuya.

²¹ Németeaca vahí táéñamavacare eta juca pisuapiranuyare. Eta tacahe, nucajurevíhi puiti. Taicha néchavivare eta vahí tácarichuimahi pítauchaya eta juca nuyasearuvianahi. Tatiaríhiyare jácani apanayare píjararuvanayare píti tásihaquenyare te pisamure.

²² Énerichuvare nuvaraha pétupirisinanuya eta nítecapihaya. Étanecha nucuchapahi eta tasamacarevaina eta eyujaracasana me Viya eta nítujiisiravaina nítecapauchahe.

Eta táichecuaraqui eta máechajiriruva ema Pablo

²³ Téchajicavi ema Epafras, ema nucompañerohi te juca cárcel, tapresuchaquenehivare ema apana eta véhisirahi ema Jesucristo.

²⁴ Énerichuvare téchajicaheana ena apamuriana vicompañeroanahi tayehe eta vémata-nerepianahi: ema Marcos, ema Aristarco, ema Demas, émapa ema Lucas.

²⁵ Nuyaseuchaparaca ema Viáquenu Jesucristo táetaviuchahíni eta iúricacarevaya máicha. Tamu tupa.

Eta apanavare carta nayehe ena israelítana téhicanahi ema Jesús, ticaijare HEBREOS

Emá Jesús títametacahavi eta máechajiriruvana ema Tata Vicaiyaquene

¹ Acane eta náitaresirahi ena viáchucanaveanaini, natiarihihi ena camuriqeneana santo profetana mavanaranahi ema Viya. Éna, náitametacahi ena achaneana eta máechajiriruvana mapaneruanahi. Ichapemurivare eta náimeresirahi eta máitupajijiasiravanahi ema Viya. Apanapanenéjivare eta náimituresira eta máechajiriruvana.

²⁻³ Puitisera viti vítareruanahi puiti juca áñoana, ema Viya mavanecahi ema Machicha eta viyehe, títametacahaviya eta táequenereruana mapanereruana. Ema maca Jesucristo, Viyahivare éma, taicha machichahi ema Viya. Acane émahí tépiyacahi eta apaquehe, eta anuma, étpa eta vímahaqueneanahi puiti, máitauahirahi tamutu eta mapanereruana ema Maiya. Émarichuvare ticatuparahahi me Maiya eta émairahi téchahi tamutu. Puiticha émahí téchahi tamutu, máetaviuchahi eta máitupajijiasiravahi. Ema Cristo ticayehéhi eta majaraivahi máijararuhi ema Maiya. Eta máucupaisirahi eta viyehe, tímimatichahavipa eta máurivahi ema Maiya. Tásiha, te tamutupa eta macaepahairahi eta vipecurana vimutu viti achaneana, tichavapa te anuma. Ánaqui ema Maiya macaejacapa te mayehe trono te mavaure.

Emá Cristo, éma ticapicahupanahi nayehe ena ángeleana

⁴ Tacahe, ema Cristo, éma ticapicahupanahi nayehe namutu ena ángeleana, taicha ema Maiya máijaracahi eta ichapequene mávacurehi ticapicahuhi.

⁵ Taicha eta máechajiriruvahi ema Viya mayehe ema Cristo, ani macahehi: “Píti yátupiquenévihi nuchicha. Puiti nucaejacavihi te piávacure” macahepa. Tacahe, ena ángeleana, tájina vahi máichahini: “Píti nuchichavi”. Váhivare máichahini: “Núti picaiyaquenehi”. Ema Viya máechajisihahi ema Cristo, ani macahehi: “Ema maca, ema yátupiquenehi nuchicha, taicha nútiquenenuhivare máiyani” macahepa.

⁶ Tacahe, te macucupaicapa ema macarichuquene Machicha te juca apaquehe, macavanairipipa eta natsiusirayare nacunachirayare namutu ena ángeleana.

⁷ Énasera ena ángeleana, táechajisihahi eta Sagrada Escritura, ani tacahehi: “Ena ángeleana vanairucanachucha éna. Nacutihi eta técticava eta najuricativa te ticavanahiana. Nacutihivare eta yucu eta nasisirayare jácani tamaeperajiqueneana” tacahepa eta Sagrada Escritura.

⁸ Ánisera tacahehi eta táechajisihairahi ema Cristo: “Píti yátupiquenevihi Viya. Máitavacayarehi eta aquenucavirayare. Tétavicava eta tatupiruvairayarehi eta pivanairipi.

⁹ Píjaracayarehi eta táurivayare eta náitaresira ena achaneana tíuriana tisuapavianaya. Énerichu píjaracayare eta náicuñayare ena achaneana váinarajiana masuapajirairahanahi eta piyehe. Eta tacahe, ema Tata Vicaiyaquene, ema Ticachichavihi, tíjaracavihi tamutu eta picapicahuirayare nayehe ena pichamuriana téhicavianahi. Tétavicavahi eta náurismureva pícha”.

¹⁰ Ánivare tacahehi: “Píti yátupiquenévihi Viáquenu. Píti pítucahi eta táimahiyare eta táepaniravahi eta apaquehe étpa eta anuma, pépiyruanahi te pivahuana.

¹¹⁻¹² Tayanapane títavayarehi tamutu eta juca vímahaqueneanahi, ichasipaipahi tacuti-paipa eta táichasivapaipa eta vimuiriha. Pítisera pinasiyarehi. Te pímahapa táuricapa eta pítsivachiraya tamutu, máejerareyarehi pícha. Picañapupujicainapa tamutu. Taicha píti, máitavacacaviyarehi eta pítaresirahi” tacahepa.

¹³ Jararihi eta apana máechajiriruvahi ema Viya, ani macahehi mayehe ema Cristo: “Yare, péjaca te nuvaure, eta picuchapihayare eta nucaeypuyusiraya te pimirahu ena ticitianacavianahi” macahepa. Énasera ena ángeleana, tájina vahi máichahini: “Péjaca ani te nuvaure”.

¹⁴ Taicha ena ángeleana, mavanaranahi ema Viya. Éna, espírituanahi. Vahi énajivainahini nacapicahuhini. Eta natuparahahi éna, tíjaneacahavianaya víti macuchucureanayare ema Jesús.

2

Tacamunuhi eta vipamisirava tayehe eta véhisirahi ema Jesús

¹ Eta tacahe, tituparacahe yátupina eta ecaravahuiraya eta ímitucasiqueneanahi, machu émitisica, machu étaina taviuchahe vahi iúchucuhahini.

² Eta acane, ena ángeleana, éna tímitucanahi ema víyahaini Moisés eta vanairipiana. Tétavicavahi eta tásuapacarevahi. Ticaicũñavaneanahi ena téjcapavanahi, timasua-panahi eta nasamaquenehi.

³ Puiti numetacahe: Tisuapacarepanahi eta véhiruhi. Tájina vahi ticaíticahémahi eta ícũñayare te váhipuca ecucamapuravahi eta iúchucuirayare. Taicha émarichuhi ema Viáquenu tĩnapucahi máichuhavacahi ena achaneana eta náuchucuirayare. Tacahe, ena tisamanahi éma, tíchuhahavianapa víti.

⁴ Énerichuvare, ema Viya máimerecapahi eta tiáramicareana, máicutiaranahi eta émairahi vanairuca, mavairahi tisuapacareyarehi eta nametarapiana. Énerichuvare puiti ema Espíritu Santo, éma tjaracahavihi eta vítucaquenepachuyare apaesa vítauchayarehi eta vématanerepipachuhi víjarahi máicha.

Ema Jesucristo, achanehi eta máimahi eta máitesirahi te vitaracu

⁵ Ema Viya, váhivare énaínahini matuparacavacahini ena ángeleana eta énaírayare téchanaya eta arairuyare avasare eta vicuchapaquenehi, étaripa eta véchajisihaqueneyarehi.

⁶ Eta Sagrada Escritura, ani tacahehi eta táechajiriruva: “Piti Tata Viáquenu, tétavicavahi eta pijapanuirahavihi viti achaneanasami. Víti, váhinéni táunahini eta vítaresirahi. Váhivare véñamacarehini. Pítisera péñamavahi eta viyehé, váhivare pémitisicahavihini viti pépiya-ruanahi.

⁷ Te pépiyacapa ema viáchucaini Adán, vahi mácutinasivacahini ena ángeleana. Ena, nacachuricahi éma eta náitupajijiasiravana. Váhiserá tánasimahi eta nacachuriasirahi. Taicha pijapanuhavihi viti mámariequenehana ema Adán. Pjjaracahavihi eta viávacurehi tajarahiquenehivare, tétavicavahivare eta vicapicahuirahi. Aquenucahavihi pícha. Véchahi tamutu eta pépiyuanahi.

⁸ Visuapacarehi viti tamutu eta pituparasirahavihi” tacahepa eta Sagrada Escritura.

Tacahe, téchajisihahavihi eta Sagrada Escritura eta véchirahi tamutu eta máepiyuanahi ema Viya, tájina ticaejeraimahi, maicha ema Viya. Vuíchahasera vimahahini vicayamuri- cahini tamutu táichavenénahini eta visuapacarevahi.

⁹ Mararihisera ema Jesús. Tiúcupaicahi ánipíhi te juca apaquehe, nacachuriacaripa ena ángeleana eta náitupajijiasiravana. Eta máemunasirahavihi vimutu viti achaneana, ema Viya máimicapacarichahavare te crusu vítivenehi. Téhesera te táequenepa, macaejacapa ema Jesús tayehe eta tajarahiquene mávacurehi tacapicahuquene, táitsivahi eta macatajivairahi eta máepenirahi.

¹⁰ Ema Viya émarichuhi téchahi tamutu. Ema, tétavicavahi eta máéchemarairahi eta manerejisirahi ema Machicha eta macuchucuirahaviyarehi, tiámahaviyarehi eta te mávasa, viti machichanayarehi. Émaripa ema Jesús, eta macamichirahi tamutu eta mátajivana, títauchahani tamutu eta matuparahahi.

¹¹ Eta máepachinachiriripa eta viáchanevana, visiapamurihaipa ena machichanaveanahi ema Viya, vicutiripa ema Jesús eta machichairahi ema Maíya. Eta tacahe, ema Jesucristo, ichape eta máurisamurevahi eta viyehé eta majacapirahavihi maparapehaviyare.

¹² Eta te Sagrada Escritura, ani tacahehi eta máechajiriruvahi ema Cristo: “Nuvapinava eta néchajisihairaviyare, Tata, nayehe ena nuparapenaveana. Nuvaraha nujirauchavi- yareva, nacachanenuhivare éna”.

¹³ Ánivare tacahehi: “Tétavicava eta nucasiñavairahi mayehé ema Tata Nucaiyaquene”. Eta apana, ánivare tacahehi: “Ani návihahi núti, énapa ena pichichanaveanahi, ena pinere- jiruanahi píjararunuanahi piti Tata” macahepa.

¹⁴ Viti achaneana, étanarichuhi eta vicaechera étapa eta vítine. Ene macahehi ema Jesucristo, macaechéhi, macaitnehivare étarichuhi tacutíhi eta vítine víti. Eta tacahe, eta máepeninahavihi, macapaquechihayarehi ema Váinaraji, émarichuhi muracaquenénihí eta máitupajijiasiravahi eta macaparesirahi.

¹⁵ Viti achaneana, ichapequenénihí eta vipisirahi eta vépenirayarehi, taicha vipicahi eta vícũñayare. Eta vipisirahi tahapapiricahi eta vítaresira. Émasera ema Jesucristo macaepa- haripa eta vícũñayarehini, vaipa tápicacarehini eta viyehé.

¹⁶ Éma, eta máitesirahi, vahi étainahini táimitecáhiní ema máimicatasiravacayarehi ena ángeleana. Yátupihisera viti achaneana, viti máimicataruanayarehi, taicha eta vicasiñavairahi eta mayehé, vicutirahi ema víyahaini Abraham eta macasiñavairahi me Viya.

¹⁷ Eta tacahe, eta máucupaisirahi ema Viáquenu, tatuparacahi macaqueheyarehi eta viáquehe eta máitaresirahi, ticutihaviyarehi viti maparapenaveana te tamutu eta vítare- sirahi, yátupiyarehi eta máetaviuchiraya eta majapanuirahaviya, máetaviuchayareva eta

macasiñacarevaya eta viyehe. Taicha macarichuhi ema tiyaseuchahaviparacahi te mami-
rahu ema Viya Macaiyaquene, macaepaháinahaviyarehi eta viivrevanahi táichavenehi
eta vipecaturana viti achaneana.

¹⁸ Ema Jesús, ichape eta macatajivairahi, macaitsamarajiquenehi ema Váinaraji. Macami-
chahisera tamutu, vahi máisapavahini. Tásiha puiti, éma marataha tímícatacahaviyare viti
eta vicamichirayare eta viátajivana táichavenehi eta macaitsamarajirahavihi ema Váinaraji.

3

Ema Cristo tiápajucavahi eta macunachacarevapanahi mayehe ema víyahaini Moisés

¹ Nuvaraha numetacaheya eta apana, eti nuparapenaveana máepachiaruanahi ema
Viya, máichuhaqueneanahivare eta esiapiraya eta mávasa. Nuvaraha epanerecha apaesa
ácaicutiara eta táetaviuchirahi eta máitupajjiasiravahi ema Jesús. Éma, yátupihí mavaneruhi
ema Viya eta máimitusirahaviyarehi eta juca véhiruhi. Macarichuhi ema tiyaseuchahavi-
paracahi te mamirahu ema Viya.

²⁻⁶ Ema Jesús, tétaicavahi eta máítauchirahi tamutu eta mavanahiana matuparacasi-
vanahi me Viya. Énerichuvare ema víyahaini Moisés, títaurahivare eta mavanahi eta
maconsejaraivahi, máimitusirahivare ena achaneana tamutu eta mavanairipiana ema
Viya. Énerichuvare máechajisihahi tatiarihiyare eta apana mapanereruana ema Viya
vuíchahasera máimerecaini ema Viya. Émasera ema Jesucristo, ema tiápajucavapanahi eta
macunachacareva, macachuricahi ema víyahaini Moisés. Ticunachacarepanahi taicha
machichahi ema Viya, ticatuparahahivare téchahavihi vimutu viti machanerana ema Viya.
Émasera ema Moisés vanairucaichucha. Ema Moisés máichuhavacahi ena achaneana.
Émasera ema Jesucristo, émahí tépachinacahi eta viáchanevana viti machanerana, tíheta-
murichahavivare. Viti yátupihí machanerahavihi, te vímíyanava eta juca véhisirahi éma,
vicasiñavavare eta mayehe, viúrisamurevare eta vicuchapirahi eta viúchucuiraya te jena
sáchehare.

Ema Viya tícuchahavihi eta vinarasihayare viti machanerani

⁷ Eta tacahe, nuvaraha ejaneacava. Ema Espíritu Santo, ani macahehi eta máechaji-
riruvahi tayehe eta Sagrada Escritura: “Puiti jena sache, esamayare esuapayare éti eta
numetarapiana nútí.

⁸ Tacuija eta tamuracavaina eta esamureana. Vahi ecucuti ena achaneana mámaque-
neanahi ema Moisés te mávapahi apaquehe. Ichape eta namasuapajiraivahi eta nuyehe,
náetaviuchirahi eta nacaitsamarajiranuhi nútí.

⁹ Tétaicavahisera eta nucamichiravacahi eta namasuapajiraivahi. Cuarenta añoripa-
hinéti eta nímechiravacahi eta tiáramicareana níchaqueneanahi, váhisera nasuapanuhini.

¹⁰ Eta tacahe, te táequenepa, nusemapa nayehe eta nasamureana. Vahi návarahini náimatihini eta
táurinaquene achene, nuvarahaquenehi nímechavaca.

¹¹ Nútí nétupiricaripahi eta náicuchihí nanarasihayarehini eta nuyehe. Tétaicavahisera
eta náimiyusemasiranuhi. Tásiha, nucahepa nútí: Ena nánitátají váhiquene nasiapaimahí
tinaracanaimahí eta nuyehe” macahepa ema Espíritu Santo.

¹² Eta tacahe, nuparapenaveana, nuvaraha ejaneacavayare yátupina. Machu éhica eta
napanereru ena masuapajirairahana, machu emutserahava íminajicava eta éhisirahi ema
yátupiquenehi Viya Vicaiyaquene.

¹³ Étumechacacayaresera nayehe ena apamuriana echamuriana támutuhi sácheana puiti
juca vicaijuheyare, apaesa nacuija navayuaca ena tivayuarahiana tayehe eta pecatu,
machu étaina táemuracacha eta esamureana.

¹⁴ Taicha viti machamuriahavianahi ema Cristo. Vijacapainasarepa eta vícuchihí mayehe
éma, te vímíyanavahi eta vicasiñairava mayehe, vétumechiravahivare eta véhisirahi.

¹⁵ Eta tacahe, nápechavavare némechahe eta máechajiriruva ema Espíritu Santo: “Puiti
jena sache, esamayare esuapayare éti eta numetarapiana nútí. Tacuija eta tamuracavaina
eta esamureana. Vahi ecucuti ena achaneana mámaqueneanahi ema Moisés te mávapahi
apaquehe. Ichape eta namasuapajiraivahi eta nuyehe, náetaviuchirahi eta nacaitsamara-
jiranuhi nútí” macahepa.

¹⁶ Puiti nuvaraha epanerechaya eta juca. Némechaheya ema víyahaini Moisés eta
macuchusiravacahi ena viáchucanaveanaini tayehe eta avasare Egipto. Tétaicavayaréni
eta náuricacareva. Tamapurujisera eta nasamirahi eta mahu ema Viya, májarasirahi eta
mavanairipiana. Náimiyusemacapaipa éma eta namasuapirahi.

¹⁷ Tamapurujivare eta cuarenta añoñi eta macamichiravacahi ema Viya. Taicha tavayuacahi eta napecaturana éna, étapa tiviuachahi eta náepenasirahi te mávapaihapaquehe.

¹⁸ Eta namavarairavacahi nasuapahini, éma manacapa eta mayehe juramento eta namaitujisiravayare tisiapana nanaracahini eta mayehe.

¹⁹ ¡Ácaicutiara éti! Táichavenehi eta namasuapajiravahi, puiti vímahaipahi eta namaitujisiravahi tisiapana tayehe eta mávasa ema Viya.

4

¹ Tacahe puiti, vicasiñavayare me Viya apaesa vítujicava vinaraca mayehe. Ticamunucarehisera eta ejaneasiravayare muraca machu émpururecava éti, tijuricati vahi ecuitujicava esiapa.

² Taicha víti vicametacasihivare eta víuchucuirayare tacutihi eta nacametacasihira éna. Tamapurujihisera eta nacametacasihira eta náuchucuirayarehíni, váhiquenesera nasuapahini.

³ Yátupisera jararihi eta vinarasihayarehi, taicha ánipa macahe ema Viya: “Núti nétupiricaripahi eta náicuchihi nanarasihayarehini eta nuyehe. Tétavicavahisera eta náimiyusemasiranuhi. Tásiha, nucahepa núti: Ena nánitátaji váhiquene nasiapaimahi tinaracanaimahi eta nuyehe” macahepa ema Viya. Vítisera víti visuapajirahiana, vítujicavayare visiapa tayehe eta juca vinarasihayare eta mayehe ema Viya.

Émarichuhi ema Viya máetupiricaripahi eta vinarasihaya, taicha tinaracapa éma, te táequenepa eta máítauchirahi macaemataneasirahi tamutu eta juca apaquehe.

⁴ Taicha eta Sagrada Escritura, ánipa tacahe: “Saisi sache eta macaematanerahi ema Viya. Téhesera te siétequenepa sache, tinaracapa éma, taicha máítaucharipahi tamutu” tacahepa.

⁵ Tásiha, nápechavavare némechahe eta juca máechajiriruvana ema Viya: “Váhiquene nasiapaimahi tinaracanaimahi eta nuyehe” macahepa.

⁶ Tacahe puiti, mávacuichahahi eta nanarasihayarehini ena tinapucanahi tisananahi eta náuchucuirayare, táichavenehi eta namasuapajiravahi. Étainapasera víávihayare víti véquenereruana visuapajirahianayare.

⁷ Ánaquiaparipahi eta táetavisiravahi eta añoñahi te táequenepa eta namasuapirahi ena nani, máichapa ema Viya eta te Salmo, ánipa macahe: “Puiti jena sache, esamayare esuapayare éti eta numetarapi núti. Tacuija eta tamuracavaina eta esamureana”. Eta macaheirahi eta juca, ema Viya máimicutiarachahi eta apana sache ticamapuravacarehi eta visiapirayare eta te vinarasihayare eta mayehe.

⁸ Yátupihí ema víarahaini Josué macaitecapavacahi ena nani achaneana tayehe eta apaquehe natuparahahi. Váhiserá étainahini eta nanarasihayare mavarahaquenehi ema Viya. Eta tacahe, eta máechajisihapa eta apana sáchezare visiapiraya víti.

⁹ Tacahe, jararihichaha eta juca tacapichahuenehi vinarasihayare, táicuchihi eta víáchaneva víyehe víti machanerananahi ema Viya.

¹⁰ Eta visiapirayare vinaracaya eta mayehe ema Viya, yátupi máitavacacayare eta vinarasiraya, vaipa vicaematanémahi. Vicutiayare ema Viya eta manarasirahi tayehe eta máemataneanahi.

¹¹ Eta tacahe, tavarahahi vétumechavayarehi tayehe eta visuapiraina éma, apaesa vítujicava visiapa tayehe eta vinarasihaya. Machu vémpurureca eta vícuchihi, machu vácuti ena masuapajirahanahi.

¹² Taicha eta máechajiriruva ema Viya, tétavicavahi eta táitupajijiasiravahi máicha, tamutuhi tarataha. Tacachuricahi eta tacasiriva eta espada. Tacapayacayarehi te amahe tayehe eta víáchanevana víti achaneana. Tímechahavi eta tamaurivahi eta visamureana. Tasiapavare eta vipanereruana. Tímitucahavivare eta vétupirisieca eta vítaesirana.

¹³ Ema Viya máimamaracahi tamutu. Tájina vahi viratahaimahi víyumuruca eta víchaqueneanahi. Tamutuyarehi tíuchujica te mamirahu éma vépuyumiraureyarehi te máichuhahavipa eta vimetauresiravayare mayehe.

Ema Jesús macarichu éma tiyaseurahi eta víyehe

¹⁴ Ema Jesús, yátupiquenehi Machicha ema Viya. Macarichuhivare ema tiyaseurahi eta víyehe taicha mávaháruhi puiti ema Maiya mávihahi te machacaya. Eta tacahe, vicaratacavayarehi muraca tayehe eta véhiruhi.

¹⁵ Éma, yátupihí tiyaseurahiquenehi eta víyehe, taicha tímatihavi eta vimatumevahi. Tijapanuhavisera, taicha éma énerichuvare ticatajivahi tamutuhi macaitsamaraji ema Váinaraji, tacuti eta macaitsamarajirahavíhi víti. Váhiserá macapecaturahini ema Jesús.

¹⁶ Eta tacahe, vicasifavayarehi te viyujarasirana, vémeñahairavahi me Viya témunarahiquene. Taicha tétavicavahi eta majapanuraiva táichavenehi eta máemunasirahavihi. Éma, yátupihí eta máimicatasirahavi tayehe tamutu eta vicamunuiravana.

5

¹ Nuvaraha epanerechaya nayehe ena nácani catuparahayanare tiyujaracarahiana viyehe viti israelítana. Éna, nerejianahi te nataracu ena achaneana. Natuparacasaichuhi éna ticaitecapanayarehi me Viya eta námavahuana ena achaneana, étapa eta nanaquiravana táichavenehi eta napecaturana, nayaseuchirayarehi ena achaneana mayehe ema Viya.

² Éna, tijapanurahianayarehi nayehe ena máiturereana énapa ena téjecapavana, taicha énarichuvare ticatajivanahi tayehe eta naeche máteji.

³ Étaripa eta nacatajivairana, ticamunuvanahi éna apana ticamavahuanahi mayehe ema Viya táichavenehi eta napecaturana.

⁴ Tacahe, mácani ticatuparahayare tiyaseurahiyarehi, vahi émajiriruvaimahi máichuhacasarichuhi. Émahi ema Viya tjjaracahi eta matuparahahi mapicahuyarehi, tacutihí eta májjarasirahi ema víyarahaini Aarón eta matuparahahi macapicahuirahivare.

⁵ Ene macahehi ema Cristo. Vahi émajiriruvainahini eta macatuparahairahi tiyaseurahiyarehi eta viyehe. Émarichuhi ema Viya tjjaracahi eta matuparahahi mapicahuyarehi, taicha ani macahehi ema Viya: “Píti yátupiquenévihí nuchicha. Puiti nucaejacavihi te piávacure” macahepa.

⁶ Eta apana máechajiriruva, ánivare tacahe: “Nunerejicavihi píti piyaseurahiyare. Nutuparacavihi péchajurahiyare nayehe ena achaneana. Máitavacayare eta juca pituparaha, picutiyaie ema nuvanaraini Melquisedec” macahepa ema Viya.

⁷ Tacahe, ema Cristo, te matiarichaha ani te juca apaquehe, tiyaseuchavahi te mayujarasirana eta me Maiya. Muraca eta máumitirahi, máiyahairahivare. Tiyaseuchavahi vahi máemitisicahini ema Maiya eta macaechepusirayarehi te máecari te táequenepa eta máepenirahi te crusu. Jéhesare, tisamacarehi te mayujarasirana, táichavenehi eta mavarairahi máitaucaha tamutu eta mapanereruana ema Maiya.

⁸ Taicha ema Cristo, machichahi yátupiquene ema Viya. Váhisera máeñamavahini. Váhivare majunjicahini eta macatajivairanahi. Macamichahi tamutu, macaravahuirahi eta masuapajiraivahi.

⁹ Eta tamutuirapa eta máepenirahi, téchepucavarepa, tásiha maratahapa eta macuchuchuhairahivare vimuti viti visuapanahi éma. Máitavacayarehi eta vítaesiraya máicha.

¹⁰ Eta tacahe, ema Viya manacahi eta mávacure téchajuirahi eta viyehe macutihí ema víyarahaini Melquisedec.

Ecunevahi machu ánasi ácuti ena amuyana

¹¹ Ichapemuriyare eta táechajisiquenehi eta juca numetaruhehi. Ticajerahisera nítametacahehíni taicha tétavicavahi eta tamuracavahi eta echutiana.

¹² Ánaquiaparípahínéni eta ecaravahuirahi, iúrihípahíni puiti máestrohevacaínaipahíni. Ecamunuichahisera natiarihiyarehi nácani tíapechaheanaya títametacaheanayarehi jácani vahi tácajerahíni eta vímitucasivanahi me Viya. Puiti éti épiyacavaripahi máiturerehe. Ecutiripa ena amuyana, tacamunuhi vésicahayarehi eta leche eta ticaitarecayarehi, taicha vuíchaha táitucahíni tanicahíni eta tinicacareana.

¹³ Taicha ena amuyana tíajicanachaha, vuíchaha técharecana, vuíchahavare napanerequenehaimahi eta táurivayare eta náitaresira. Ene ecahehi éti, apaesarichuhi ecaratacavahi eta éhisira eta táuriqueneana.

¹⁴ Énasera ena yátupihí eta nacaravahuirahi, ena nacutihí ena ichanaruanahi. Téchavariripa náitucaripa tinerejuchavana eta táuriqueneana, náepurupa eta tauriqueneana.

6

¹ Núti, nuvaraha ímíyanavayare eta ecajurusiraya eta échemaravahi tayehe eta juca véhiruhi. Ichanaruhénahíni tayehe, vaipa ecutihíni ena amuyana. Éhicapaini yátupi eta máimiturapi ema Cristo. Vaipa ecuápechavahíni épanaequenereca eta táinapureanahi íaravahuanahi. Éti, vaipa ecamunuhi viápechahéhi vímitucahehíni eta éneuchiravayarehi eta epecaturana tímicapacaheyaréni, váhivare viápechavahíni vímitucahe eta ecamunuirahi yátupina eta ecasifavairayarehi me Viya.

² Éti ímatipa eta táichararacavahi te ecaichasinapa, étapa eta táichararacavahi te nanacapa eta navahu te echuti. Ímativarepa tamutu eta vímiturapiana tayehe eta náechepusirayare ena náepenaqueneana, étapa eta ecuñaraqú máitavacayare.

³ Tásiha puiti, nímitucaheyare eta apamuri, te máijaracanurichahapucaini ema Viya eta nítipajjiasiravaya, éta pa eta ecaravahuiraya.

Ecunevahi, machu ínjacava eta véhiruhi

⁴⁻⁶ Páureana samisera ena tinajicavanapuca eta véhiruhi, tichavanayarepuca. Taicha nácani natupiruvahi najacapa ema Jesús, tásiha énévanehi najirica te nasamure eta majacapijavacapa ema Viya, machichanaipa; mávahácaripa ema Espíritu Santo; tacurisamurechavacavarepa eta máechajiriruva ema Viya; náimatiequenehavarepa eta náuricacarevaya tayehe eta arairuyare avasare, téhesera te nácani náinajicapuca eta náehisirahi, vaipa táitujicacareimahi tíapechavana náeneuchavahini. Taicha eta náinajisiravapa, náepuruipahi ema Machicha ema Viya. Timicutijiricavaripa nacaecahihini éma te namirahu ena achaneana, nápechavahini náetataca te crusu éma.

⁷ Nímicutichayare. Eta macamirisirahi ema Viya eta tíquiva, táerapisiravanehi tamutu eta apaquehe. Jararihi eta apaquehe, tíurinasarepa eta tasucucureruvana, maicha ema Viya.

⁸ Jararihivare eta apana apaquehe, tájina tasucucureruvaina. Itapeparechucha, ijarevare. Ema Viya máijaracayarehi eta táicuñayare, tíjuinapa te yucu táicuchihi.

Vahi vínajicavaimahi taicha tatiarihi eta vicuchapaquenehi

⁹ Puiti, muracacaha apaesa eta numetasirahehi, nútisera nucasiñavahi eta eyehe eta vahi ínjacavaimahi, eti némunaruanahi nuparapenaveanahi. Nucasiñavahi eta máijarasiraheya ema Viya eta iúricacarevayare te macuchucuhavipa.

¹⁰ Ema Viya tétavicavahi eta máitauravahi, váiparinehi máemitisicaimahi eta ecaemataneasiranahi. Éta pa tímereuchahehi eta émunasiravacahi ímicatasiravacahivare ena echamurianahi tayehe eta juca véhiruhi. Máimahahi eta ímiyanavairahi ecaemataneaca.

¹¹ Nuvarahavare ímiyanavahini eta evapinavairavaca ámutu éti eta ecaemataneasirahi, yátupina ecasiñava mayehe ema Viáquenu, ecuchapaya eta machaviraya.

¹² Váhivare nuvaraha plújuhéna. Ímiyanavahi éhica ácuti ena echamurianaini yátupiquenehi eta nacasiñavairahi me Viáquenu, nacamichahi tamutu. Jéhesare, ecuticacasarepa éna eta ejacapiraya eta ícuchihi mayehe ema Viya.

¹³⁻¹⁴ Émechava eta acane eta máechajiriruvana ema Viya eta máijarasiravahi eta máuricacarevayare ema Abraham. Ánipa máicha: “Yátupiyare eta njarasiraviyare eta piúricacarevayare, tásiha, njaracaviyareva eta náichapemurivaya ena piámariéqueneana. Nútijiva nupamicava eta nítauchirayare eta juca néchajiriruvana njararuviyare” máichapa. Ani tacahehi eta máechajiriruvana, taicha nájina apanainahini tipamicaimahi éma. Tásiha, émajiva tipamicavayare.

¹⁵ Ema víyarahaini Abraham, ichapemurihi eta macasiñavairahi me Viya, eta macuchapirahi eta máijararuvana ema Viya. Tásiha, tétavicavahi eta máuricacarevahi. Máimahavivare ema machicha Isaac éna pa ena mámarinaveana.

¹⁶ Tacutihi mácani achane, te maicha eta juramento, majurachahi te mamirahu ema Viya, mavaraha ema Viya mapamicarehehi eta máitachiraina. Te mácani achane majurachapuca, tájina táéñamavacarehini eta máitachirayare.

¹⁷⁻¹⁸ Ene macahehi ema Viya, tjarcavahi eta mapamisiravayarehi máitacha eta máijarasirahaviyare eta víuricacarevayare. Tipamicavayare, taicha mavaraha vahi véñamavaimahi. Tímaticarehi eta máurivahi ema Viya. Tájina táéñamavacaréna eta vicasíñavairaya muraca eta mayehe, taicha éma vahi máitsivachaimahi eta mapanereruana, váiparinehivare tépiyahirahimahi. Tájina véñamavaimahi eta vicuchapirahi eta máijarasirahaviyare eta vícuchihi.

¹⁹ Eta juca vicuchapaquenehi, é tara tétumechavivihi muraca te viáchanevana. Tétavicavayarehi eta vicasíñavaira eta vipauchirayare ema Viya, taicha mararihiyare ema tímisiapahaviyare te máviahahi ema Maíya.

²⁰ Taicha ema Jesús, ema tinapumirauchayarepahi eta máetupirisirayare eta viyanirayarehi, taicha macarichuhi éma ticatuparahahi eta mayaseuchirahaviyare, macutihi ema víyarahaini Melquisedec.

7

Ema Jesús, ema tíyaseurahi eta viyehe, macutihi ema víyarahaini Melquisedec

¹ Ema maca Melquisedec, é mahi maparajuruhi ema Abraham. Taicha acane, te jena año, ema viáchucaini Abraham éna pa ena masuntarurana téhacacanapa nacanarapa ena réyeana, navarairahi nacuchucuha ena námereruana, émaripa ema máneva Lot, éna pa ena machichanaveana. Máitahacacavachisera. Matiarihivare ema apana rey, táquenuhi eta avasare Salem. É mahi ema Melquisedec. Éma, mavanarahivare ema Viya, tíyujaracarahi

é. Tacahe, te tichavapa te mapena ema Abraham, mácapapa ema Melquisedec, mavarahapa mayujarauchaya ema Abraham.

² Tacahe, ema viáchucaini Abraham tísríjicavapa. Májaracapa ema Melquisedec eta diésmuri tayehe eta maganareruanahi nayehe ena mánarana. Étahi eta mámvahuhi me Viya. Ema Melquisedec, aquenucahi éma tayehe eta avasare ticaijare Salem. Eta májare, te véchajiriruva ticaijare: “Éma Rey máuriquenehi, tájina táichava tamutu te mávasa”.

³ Ema maca Melquisedec, eta majurusirahi, vahi táimaticarehini nájahahipuca eta ticachichanahi, nájinavare majaneanaina. Váhivare táechacare eta máuchusira étapa eta máepenirahi. Énerichuvare, nájina ema máitsivainahini ema Melquisedec. Eta matuparahahi, ene macahehi puiti ema Machicha ema Viya, nájina máitsivainahini. Máichecuaraquirehi eta mávacure tiyaseurahi.

⁴ Nuvaraha epanerequeneha. Ema maca Melquisedec ticapichupanahi maicha ema Viya. Eta tacahe, ema viáchucaini Abraham májaracahi eta diésmuri eta maganareruhi nayehe ena réyeana máitaruanahi.

⁵ Acane, matiarhihi ema mámariequenéni ema Abraham, ticaijare Leví. Te táequenepa, matiarhihi ema mámariequenéni ema Leví, ticaijare Aarón, maparapehi ema Moisés. Tásiha, ema Moisés manacapa eta vanairipi, tatuparacahi namutu ena mámariequeneana ema Aarón, tiyujaracarahianayare éna. Tavanecahi ticobrecanayare eta diésmuri eta navachayare ena najaneananarichuhi, mámariequeneánaini ema Abraham. Nájina tacaitiruinahini.

⁶ Émasera ema Melquisedec, vahi mámarinahini ema Leví. Majacaphisera eta diésmuri mayehe ema Abraham, te tamutupa eta mayujarauchirahi éma. Tayanapane tímijachavahipuca ticunachacarepanahi ema Abraham táichavenehi eta májararuanahi ema Viya eta mayehe ema Abraham.

⁷ Eta tacahe, vimutu vecha víti, mácani tiyujarauchahi ema apana, éma ticunachacarepanahi mayehe mácani mayujarauchaquenehi.

⁸ Tacahe, ena apamuriana tiyujaracarahiana tépenanapaipahi, tásihasera namutu ticaitivanapahi. Émasera ema Melquisedec vahi macaitsivahini. Puiti eta Sagrada Escritura táechajisihahi éma, máichecuaraquire eta máitaresirahi.

⁹⁻¹⁰ Émaripa ema Leví énapa namutu ena tiyujaracarahiana mámariequeneanáníni, natuparaháichuhi náicuchihí eta náuchusirayare mámariequeneanayare ema Abraham. Tásiha, tímicutíjiricavahi éna apanava navachachahi eta diésmuri ema Melquisedec te jena sache eta mavachachirahi ema Abraham. Énarichuyarehini najacapaya eta diésmuri.

¹¹ Ena tiyujaracarahiana mámariequeneanáníni ema víyahaini Aarón, éna tímítucanahi ena achaneana eta vanairipiana májureanahi ema víyahaini Moisés. Váhisera naratahaimahi napamicavaca ena achaneana náitaucha tamutu. Taicha te náitauchapucaini, váipapucaini tacamunuini ema apana tiyujaracarahi macutiyarehi ema Melquisedec, vaipa mámariequeneánahini ema víyahaini Aarón.

¹² Émasera ema Viya máechajisihahi ema apana tiyujaracarahiyare matupararuyarehi. Émapa tímechahaviyare eta máitsivachirayare eta víyanihayare mayehe.

¹³⁻¹⁴ Jararihi puiti eta apana. Taicha ema Viáquenu Jesús, vahi mámariequeneánahini ema Aarón. Éma, máchucaini ema Judá. Te nataracu namutu ema majaneanaini, nájina émanainahini mayujaracarahihini. Ema Moisés vahi máechajisihahini matiarhiyare ema tiyujaracarahiyare, mámariequenehi ema Judá. Émasera ema Jesús táechajisihaquenehi eta Sagrada Escritura eta émayare tiyujaracarahiyare.

¹⁵ Tacahe, vímatiequenehahi yátupi eta máitsivachirapa ema Viya eta víyanihayare eta mayehe, taicha ema arairuyare tiyujaracarahi, tacamunuhi eta macutirayarehi ema Melquisedec.

¹⁶⁻¹⁷ Taicha tacahehi eta máechajiriruvahi ema Viya, ani macahehi: “Nunerejicavihi píti, piyaseurahiare. Nutuparacavihi péchajurahiare nayehe ena achaneana. Máitavacayare eta juca pituparaha, picutiyare ema nuvanaraini Melquisedec” macahepa. Tásiha, vímatiequenehahi puiti ema ticatuparahahi ema Jesús táichavenehi eta máitaresirayare máitavacacahi. Vahi étaparacainahini eta nájahahipuca ema máchucaini.

¹⁸⁻¹⁹ Tacahe, tépahapa eta vanairipiana náehiruinihí ena náinapureana tiyujaracarahiana, étaripa eta vanairipiana manaquiruanahi ema Moisés. Taicha tájina táratahaini tacuchucuhahavihini táichavenehi eta vimáitauchirahini víti. Vahi tacaitcapahavihini me Viya. Puitisera ema arairuhi, tétavacavapa eta macasiñacarévahi éma. Émapa ticaitecapahavihi mayehe ema Viya.

²⁰⁻²² Ena náinapureana tiyujaracarahiana, tájina eta júramentoinahini eta nacatuparahairahi. Émasera ema Jesús, ticapichupanahi eta mávacurehi taicha tjjaracavahi ema

Viya eta juramento, te matuparacapa ema Machicha. Taicha eta Sagrada Escritura táechajisihahi, ani tacahe: “Ema Viya, váhiquene máitsivachaimahi eta máechajiriruvana. Majurachapa, ánipa macahe: Nunerejicavihi píti, piyaseurahiyare. Nutuparacavihi péchajiurahiyare nayehe ena achaneana. Máitavacacayare eta juca pituparaha, picutiyaare ema nuvanara Melquisedec” macahepa. Jéhesare ema Jesús, tétavacavahi eta macasiñacarevahi eta máitauahiraya tamutu eta májjararuvanahi ema Viya. Tiúripanahi eta arairu viyanihayare me Viya.

²³ Tiuri, eta tayerevahi eta áñoanahi, camurianahi ena tiyujaracarahiana mámariéque-neánaini ema Aarón, taicha ticaitsivanapahi, arairuanapahi éna. Étasera tíchahi ena tépenanapaichucha, vahi náimiyannahini náitarecahini.

²⁴ Émasera ema maca Jesús, máepenacacahi éma. Nájina nasiapahini máitsivainahini tayehe eta mávacurehi.

²⁵ Tásiha puiti, macarichu éma maratahahi ticatiuchahavihi viti vicasiñanahi éma. Éma, ticaitecapahavivare me Viya. Máitavacacayarehi eta máechajiuchirahavihi taicha váiparinehi tépenaequenehahavimahi.

²⁶ Tacahehi puiti eta macatuparahairahi ema Jesús téchajiuchahaviyare. Tétavacavahi eta vicamunuirahi éma, taicha yátupiquenehi santo, matapiravarehi éma. Tájinvare máimatiyahini macapeaturahini. Váhiquene mácutihini ena pecatumareana eta napanereruana. Púiticha éma máviahahi tayehe eta anuquehe anuma te machacaya ema Viya.

²⁷ Éma, váhivare mácutihini ena apamuriana tiyujaracarahiana. Éna, nacamunuichaha tamutyarehi sácheana nacapaca eta sárare náijuchaqueneharehi, tásiha nativayarepa tiyaseuchavana tayehe eta napecaturaichu. Te tamutupa, tapaenumavapa nayaseucha tayehe eta napecaturana ena achaneana. Émasera ema Jesús, étaheichuhi eta mavachachirahi eta vipeaturana vimutu, tíjaracavainapa eta máepenirahi te crusu.

²⁸ Ena nani ajairana ticatuparahana tiyujaracarahianayarehi taicha eta vanairipiana, étasera vahi nánasihini te juca apaquehe, náepenaequenehapaichucha eta náematanerepianaini. Émasera ema Jesucristo tiyaseurahiquenehi yátupihí. Eta macatuparahairahi tacachurichahi eta nacatuparahairahi ena nani. Máitavacacavivare eta máechajiúchirahávihi. Taicha ema Viya máichahi eta juramento eta matuparasirahi ema Machicha.

8

Ema Jesús ema vituparahahi téchajiuchahavihi viti véhicahi eta arairu viyanihayarehi

¹ Tiuri puiti, nuvaraha yátupi ácaicutiara eta juca: Ticunachacarepanahi ema téchajiurahi eta vijehe víti. Taicha matiaríhi te anuma, téjacahi éma te mayehe trono te mavaure ema Viya.

² Ánaquí, eta máitauchihahi eta mávacure tayehe eta yátupiquenehi Santuario tiáviahahi te anuma, máepiyarúhi ema Viya. Vahi tácutihini eta náepiyarúhi ena achaneana.

³ Namutu ena tiyujaracarahiana, tatuparacahi náimerecayare eta námavahuana étapa eta nanaquíruvana. Éne macahehi ema Jesucristo, tatuparacahi máimerecaya eta námavahu-yarehi, tiúripanahisera éta.

⁴ Ena náinapureana tiyujaracarahiana, nacarichuhi ena ticatuparahanaahi náimerecayarehi eta námavahuana tacamunuqueneanaahi eta nayujarasirahi eta te Templo te jena Jerusalén. Émasera ema Jesucristo, tájina vahi mácamunuimahi ticamavahu tayehe eta Templo. Taicha éma, anuma eta mayujarasirarehi.

⁵ Énasera ena tiyujaracarahiana te juca apaquehe, eta námamacasareana te nayujarasirana, étachucha eta tavasihi eta tiávihanahi te anuma. Véchahi eta tavasichucha, taicha ema Viya máemechahi ema víyarahaini Moisés eta yátupiquene Santuário tiáviahahi te anuma. Ánipa maicha: “Pépiyacayare eta Santuário tavasiyare picha eta tiáviahahi te anuma nímeruvihi te piávihaipe te cerro” macahepa.

⁶ Émasera ema Jesús, tiúripanahi eta máematanerepi taicha te anuma eta máechajiuchirahavihi. Éma, téchajiurahi tayehe eta arairu matratune ema Viya. Eta arairu matratune, tiúripanahi eta táinapurehi, taicha tétavacavahi eta víuricacarevayarehi taicha májjaracahi eta máechajiruva ema Viya.

⁷ Jéhesare, eta táinapuiru matratune, vahi náitauchaimahi ena achaneana. Taicha te náitauchahipucaini, vahi tácamunuhini májjaracahini eta apana arairu.

⁸ Émasera ema Viya, eta máimairahi vahi náitauchahini, tiápechavavarepa eta máechajiriruvahi, ánipa macahe: “Tatiarihayare eta sáchevayare tépanavayare arairu eta nutratune nayehe ena achaneana israelítana.

⁹ Vaipa tácutimahi eta natratunehi nayehe ena náchucanaveanaini te jena sache te nuvecuhainapa te nuvahu, nucuchucavacapa tayehe eta avasare Egipto. Váhisera náitauchahini eta nutratunehi eta nuyehe. Eta tacahe, nunujijiacavacapa.

¹⁰ Eta nutratuneyare nayehe ena nani israelítana te jena sácheyare, nunacachutichayare te nachutiana eta nuvanairipiana. Najiricainapa te nasamureana. Jéhevarénapa núti nacaiaquenyare. Tásiha, éna, jéhevarénapa nuchichanavequeneanainapa.

¹¹ Vaipa nácomesaimahi ticaimitucasiana nayehe ena nachamuriana, énaripa ena naparapenaveana eta náimatiranuyare. Núti yátupiquenenuhi náquenunuhi. Namutuinaapa tímatinuanayare: ena amaperuana, ena ichanaruana, énapa ena ichavicana.

¹² Énerichuvare nuperdonachavacainapa núti eta napecaturana navainarajivana. Vaipa nécharairicaimahi eta natapiravanaini” macahepa ma Vía.

¹³ Tacahe, ema Vía, te máechajisiha eta arairu matratune, tépaharipahi eta táinapurénihi. Éta táemitiaruripahi. Vaipa tasuapacarehini.

9

Eta santuário tiávihaini te Jerusalén, tavasihi eta táimahi eta Santuário tiávihahi te anuma

¹ Tacahe, eta táinapuiruhi matratune ema Vía nayehe ena nani náinapureana tiyujaracarahiana, tatiarihíhi eta nayeherepichuhi te tiyujaracana me Vía. Jéhesare, te jena Jerusalén eta távihahi eta santuario nayujarasirare.

² Ani tacahehi eta táimahi te náepiyacainapa: Eta tínapuca cuarto ticaijarehi “Lugar Santo”. Tacapicahuquenehi éta. Éta távihahi eta candelero éta pa mesa távirare eta pan sagrado.

³ Eta apana cuarto, ticaijarehi “Lugar Santísimo”. Éta tétavicavapanapa eta tacapicahuira. Tatiarihíhi eta ichapequene cortina.

⁴ Te tachacaya eta ichapequene cortina, tatiarihivare eta mesa náijuchirare eta incienso, amairiha oro. Te tajuhe, tatiaríhi eta cajune, amairihavare oro, tacaunaiyahi eta márimeana ajureca eta diez mandamiento, éta pa eta cajeta amairihavare oro tacaunaiyahi eta maná, éta pa eta matsucurupa ema Aarón eta tamarutsicaipahi.

⁵ Te táimahi eta cajune, natiarihíhi ena apinana ángeleana, ticaijare “querubín”. Eta juca querubín táimahi eta majaravahi ema Vía. Tásiha, eta napavana táepacuhicahi eta cajune, eta náepusaisirarehi eta iti tavachasarehi eta napecaturana namutu ena achaneana. Jararihivare eta apamuriana tayereruvanainihi eta santuario, váhisera nuvaraha nájuchahini te juca puiti.

⁶ Eta tacahehi eta táimahi eta náemamacasareana eta te santuario. Tacahe, tamutu sáchean ena tiyujaracarahiana tisiapaparacanahi tayehe eta tínapuca cuarto eta náitauchi-haparacahi eta náematanerepiana.

⁷ Étasera eta te apajuhe, táetaviuchahi eta tacapicahuvahi. Macarichuhi tisiapa ema náquenumuri ena tiyujaracarahiana. Étaherichuvare tisiapa te étana año, mámayarepahi eta táitine eta sárareana. Éta tivachachayarehi eta mapecatura ema tisiapahi, éta pa eta napecaturana ena achaneana.

⁸ Émasera ema Espíritu Santo mavaraha vímatiequenehaya eta juca. Eta cortina, éta tiávimirachahi eta Lugar Santísimo, vahi táisapahini tisiapana ena achaneana. Puítisera vísapacarehi víti eta vítecapauchaya ema Vía.

⁹ Tamutu eta juca tacamunuhi vímatiequenehayare. Eta jena náichasareanahi ena nani tiyujaracarahiana eta nacamavahuirahi, vahi tacanarasinávachahini eta napanereruana ena téneuchavanahi, apaesa tíuriyarepahini eta náitaresirana.

¹⁰ Vahi étaparacainahini tayehe eta náchaneva, taicha eta námavahusana éna, tinicacareanachucha téaracrechucha, éta pa eta nacasípavahuira te tisiapana tayehe eta Templo. Eta júcana nayeherepianahi, vahi tímiyanavaimahi. Taicha te tépenapa ema Cristo te crusu, máitsivachahi ema Vía eta vítecapauchirayarehi éma.

Tíuripanihi eta yátupiquenehi Santuário tiávihahi te anuma

¹¹ Puítisera, tímerecavapa ema Cristo. Jéhevere éma, yátupiquenehi tiyujaracarahi eta viyehere. Tétavicavahi eta táuriva eta víachanevana máicha. Eta Santuario te anuma távihahi eta mayujarasirare, vahi tayehe te juca apaquehe tauriquenehi. Te jena, tamutu tíuríhi, típachinahivare. Tétavicavahi eta tacunachacareva. Tacachuricahi eta santuario nayujarasirare ena apamuriana tiyujaracarahiana, náepiyaruchucha ena vicutiqueneana achaneana.

¹² Ema Cristo, jéhevere éma mávihahi tayehe eta yátupiquene Lugar Santísimo te anuma. Vaipa mámahuhini eta táitine eta sárareana chíqueru, chívanahípucaini. Eta mámahuhí éma, étaquenepa eta máitine. Étaherichuhi máicha éma. Vimutuhisera viti macuchucureanahi. Tásiha, máitavacaipa eta vítaresiraya.

¹³ Ena nani tiyujaracarahiana náepusapaicarichaha te náinahu ena nachipejiqueneanahi. Eta náepusapairuhi, eta táitineana eta toro étapuca eta chívachicha, étapa eta tsimapama tayehe eta esena chiqueru náijureasa. Eta júcana, tépachinachinavacahi eta náqueheana, apaesa táisapacarepa nasiapa tayehe eta Templo.

¹⁴ Étasera eta máitine ema Cristo ema matapiravarequenehi, tétaavicavahi eta táitupajijiasiravahi. Tacachuricahi eta náepusapairuhi ena nani tiyujaracarahiana. Taicha taratahahi tacaepaha tamutu eta vipecaturana, viperdonachacarepa táicha. Tímicutijiricavahi tisipacahavihi tamutu eta vipaneruanaini tamaeperajiquenehi, étaripa eta tímicapacahaviyarehini. Puítisera eta vítaresiraya, émainapa vicaemataneacainapa ema yátupiquenehi Viya. Ema Espíritu Santo máetumechahi muraca ema Jesús eta máijarasiravahi tímicapacava te crusu, taicha mavarahahi eta mámahuyarehi me Viya.

Ema Jesucristo, éma yátupiquenehi abogado eta viyehe

¹⁵ Puíticha ema Cristo, éma yátupiquenehi viyehe abogado, téchajirucavahi tayehe eta táequeneruhi matratunehi ema Viya. Eta máepenirahi ema Cristo, mavachacharipahi tamutu eta vipecaturanaini viti máichuhaqueneanahi éma: viti, énapa ena náinapureanaini tijacapanahi eta táinapurénihi matratune ema Viya. Tásiha, yátupihí eta macuchucuirahavihi, máijarachavi eta vítaresiraya máitavacacayarehi.

¹⁶ Nuvaraha nímicutichinahe: Mácani achane te manaquicahi eta testamento, májuchapa eta mavairahi máijaracasichavacayarehi ena machichanaveana te máepenapapuca. Eta tasuapacarevayarehi, eta ley tacamesaequenehayarehi tacayasesereru te yátupipuca tépenaripa ema achane. Te yátupihí tépenaripahi, eta testamento tisupacarehi.

¹⁷ Vuíchahasera tasuapacarehini eta testamento, te vuíchahahi tépena ema maca tépiyacahi.

¹⁸ Tacutiquenehi, eta táepeniravahi eta táinapuiruhi matratune ema Viya, tacamunupa tépena eta sárareana, apaesa navehaya eta táitine.

¹⁹ Ema víyahaini Moisés macametarapipa tamutu eta vanairipiana nayehe namutu ena achaneana. Tacahe, mavehapa eta titsi lana máitapuschapa eta yucuquí, máepusapaisihayarehi eta ítiama, táitineana eta chíqueruana, chívana. Tativa máepusasaca eta libro tíamahi eta vanairipiana. Máepusacavare ena achaneana náurujiruvanahi.

²⁰ Tacahe, mamecacavacapa éma: “Eta juca ítiama népusaruhehi, eta táicutiara eta íjarasiravahi ítauchayare tamutu eta matratune ema Viya eta eyehé éti” máichavacapa ema Moisés.

²¹ Énerichuvare ema víyahaini Moisés máepusacavare eta ítiama te tapaja eta santuário étapa tamutu eta náemamacasareana te nayujarasirana.

²² Taicha tacahehi eta vanairipi: Ticaepusahayarehi te iti tamutuyaréni eta náemamacasareanahi eta nayujarasirayarehi, náepachiasihayarehi. Taicha te vahí tacuepusacavahini eta iti, váhivare tacuepahahini eta pecatuana.

Eta máitine ema Cristo tacaepaha eta pecatuana

²³ Tacahe, eta juca náemamacasareanahi ena nani, tacamunuhi náepusacayarehi eta nayujarasirayarehi apaesa tapachinavacahini. Eta santuário te Jerusalén náepiyaruhi ena achaneana étapa eta náemamacasareanahi, náicutipaqueneanahi eta tíávihanahi te anuma. Étasera eta Santuário tíávihihi te anuma, tacamunuhi eta apana iti tasivachaquene, tacachuricayarehi eta iti náepusaruhi tayehe eta santuário tíávihihi te juca apaquehe.

²⁴ Ema Jesucristo, tájina máimatyahini mayujarachahini eta te jena santuário te juca apaquehe. Étaquenehisera masiapa eta mayujarasirayare eta te Santuário tíávihihi te anuma. Puíticha matupihamirauachahi ema Viya eta mayaseuchirahavihi viti.

²⁵⁻²⁶ Ema maca tiyujaracarahi te juca apaquehe, áñojahi eta masiapira tayehe eta téqueneha cuarto Santísimo. Ticamavahupahi eta táitine eta sárare, vahí máitinénarichuhíni éma. Émasera ema Cristo, étaherichuhi eta máepusaisirahi eta máitine. Vahí mápepejiricavahini te áñoana. Te mápepejiricavahini, énerichuhivaréni tíápepejicavahini eta máepenirahi puiti juca táepeniravahi eta apaquehe. Ema Viya mapanerequenehapa eta táicharacavayarehi tamutu. Te máimáhapa tíuri, mavanecapa ema Machicha te juca apaquehe. Tímitecahi eta macaepahairayarehi eta pecatu, máijarasiravaripa eta máepenirayarehi. Étaherichuhi máicha.

²⁷ Víti achaneana, eta víchararacavahi eta vítaresirahi, étaherichuhi eta vépeniraya vimutu. Te táequenepe, járajapainapa eta viyaseserehiyare.

²⁸ Énerichuvare, eta máitaresirahi ema Cristo, étaherichuhi eta máepenirahi te crusu eta macaepahairayare eta vipecaturana viyehe viti camuriqueneana achaneana. Yátupisera tíápechavaya tímercava. Váipasera étaimahi tímiteca mavachachaya eta pecatuana. Eta tímitecayare éma, tépanahaviyarepa viti véhicanahi vicuchapanahi éma eta macuchucuirahaviyarehi.

10

Eta máitine máepusairuhi ema Cristo, tacarichuhi tarataha tépachiacahaviyare

¹ Eta mavanairipiana ema Moisés, étachucha táicutiarahi eta arairuyarehi viyanihayare me Viya, eta tíurichahaviyarehi. Ticutihi eta tacuna eta yucuqui. Vahi tánasihini máitavacacainahini eta mavanairipiana, taicha vahi táurichahini ená achaneana nácani tivarahanaahi ticaijuheana ema Viya, taicha váhivare nasamavahini eta náuchucuirahi, tayanapane nápepejiricavahini te áñoana eta nacapasirahi eta sárareana.

² Te yátupinahini táurichavacahini eta náichirahi eta nayeherapi, vahi nacuaepepejiricavahini nacamavahuhini ena tiyujaracarahiana, énerichuvare ena achaneana tisamavannahini eta náuchucuirahi.

³ Taicha tacamunuhi nápechava te áñoana eta nacapasirahi eta sárareana, taicha tíapechavana ticapeaturanahi. Étaripa eta táepeniranahi eta sárareana táemecharairicavaca eta nacapecaturairaripa.

⁴ Taicha eta táitineana eta toro, étapa eta chivu, yátupiquenehi váhiquene táratahaimahi tacaepaha eta pecatuana.

⁵ Étasera te tíucupaicayareipahi te juca apaquehe ema Cristo, ánipa macahe mayehe ema Maiya: “Píti Tata, vahi pácamunu eta nucamavahuhini nunaquicavahipucaini eta piyehe, táitinehi eta sárareana. Píti píjaracanuhi eta juca náquehehi. Váhisera táemepurecavaimahi eta píjarasiranuhi. Eta náquehe tisuapaviyare jácani pivanesiranuya.

⁶ Váipavare pácamunu eta nacamavahuira ena achaneana eta sárareana, náijuchahini te pimirahu, táimicapacahini eta tacaepahairayarehi eta pecatuana.

⁷ Núti, tímitecanuhi puiti nítauchayare tamutu eta pivarahaqueneanayare eta nuyehe, píti Tata. Nusuapaviyare te tamutu eta pituparasiranuhi tacajuquenehi eta te Sagrada Escritura” macahepa.

⁸ Tiuri puiti, nuvaraha ecaicutiarayare eta vaipa mácamunuhini ema Viya, váipavare máurica nácamavahuhini eta sárare náijuchahipucaini ena achaneana, navairairahi táepahayare eta napecaturana, tayanapane nayeherepichucha eta náitauchirahi eta vanairipiana.

⁹ Énerichuvare, nuvaraha epanerechavare eta juca máechajiriruva ema Cristo: “Tímitecanuhi puiti nítauchayare tamutu eta pivarahaqueneanayare, píti Tata”. Eta tacahe, vímatiequenehahi vaipa tácamunuhini eta táinapure nayujarasirahi ena achaneana. Taicha ema Viya máitsivachahi eta apana, arairupa, taicha ema Cristo macarichuhi máitauchahi eta mavarahaqueneana ema Maiya.

¹⁰ Jéhevere, ema Viya tépachiacahaviripa máichavenehi ema Cristo, eta masuapirahi máitauchirahi eta mavarahaqueneana ema Maiya, májjararecahi eta máquehe eta máepeninahavihi. Étaherichuhi máicha, vahi mápepejiricavahini.

¹¹ Namutu ena nani tiyujaracarahiana vahi nanaracahini. Tamutuhi sácheana ticame-savana nanacahi eta námavahuana. Vahi táechuquihahini eta náichirahi eta juca. Tájinasera váhiquene tacaepahahini eta pecatuana.

¹² Émasera ema Jesucristo étaherichuhi eta máichirahi. Váhiquene mápepejiricavahini. Tacahe, téjcaripahi te mavaure ema Viya.

¹³ Énerichuvare puiti eta máejasiraipahi, macuchapavacaripa eta macaepuyusiraya ema Viya te mamirahu ena ticatianacanahi éma.

¹⁴ Taicha eta máepenirahi, eta mámvahuhi me Viya eta máquehe. Tétavicavainehi eta tajacapacarevahi me Viya eta máepachiasirahaviyarehi viti máichuhaqueneanahi. Váhiquene tacamunuhini mápepejiricavahini.

¹⁵ Éma Espíritu Santo, étarichuhivare tacutihi eta máechajiriruvahi, títametacahavihi.

¹⁶ Ani macahehi: “Eta nutratuneyare arairu nayehe ena nani te jena sáchezare, níjarcavayare nunacasamurechayare te nasamureana eta nuvanairipiana. Najiricainapa te napanereruana”.

¹⁷ Ánivare macahe: “Yátupina eta nucaepahairayare eta napecaturana. Vaipa néchaimahi eta natapiravanaini étapa eta navainarajivanaini” macahepa.

¹⁸ Tacahe, nuvaraha ecaicutiara eta juca: Te yátupihí táepahairahi eta pecatuana eta mámvahuhi, vaipa tácomesahini tápepejiricavahini nacamavahuhini ena apamuriana.

Vicasíñavayare eta vicaijuheiraya ema Viya

¹⁹ Tacahe, nuparapenaveana, vácasiñava yátupi eta vítecapauchirayare ema Viya tayehe eta mávihahi Santísimo, táichavenehi eta máepachiasirahavihi te máitine ema Jesucristo.

²⁰ Véhicayare eta juca arairu achene mavejiaruhi, yátupi eta tacaijuhériahi me Viya. Tájinapa táichejimirauchahavihini taicha mavejiacahi tamutu ema Cristo, eta máepenirahi te crusu.

²¹ Tacahe éma, yátupiquene tiyujaracarahi eta viyehe taicha émaquenehi téchahi namutu ena machichanaveana ema Viya.

²² Eta tacahe, tatupiruvayarehi eta visamureana eta vicaijuhéraya ema Viya. Vácasiñavaini eta mayehe, vahi véñamavaimahi taicha éma masipacaripahi eta visamureana apaesa tacuija vitapiravaina tayehe eta vipecaturana. Tájina eta táechipejicahavihini eta vipecaturana, tímicutijiricavahi vicavahini eta te tapachinaquene une.

²³ Eta tacahe, vímianava vétumechava eta véhisirahi. Vahi viyacujimahi. Yátupina eta vicuchapira eta vícuchihi taicha ema Viya máitachayare tamutu eta máijararuvahi eta viyehe.

²⁴ Puiti vétumechavayare vímicatajiricayare eta tápajusiravaina eta vémunaraivanaya. Vímitucacayareva eta víchirayare eta táuriqueneana.

²⁵ Váhivare viyacujimahi eta viúrujisiravana. Vahi ecucutihini ena vichamuriana, tinerejicavanahi mayanarahanahe te viúrujicava. Vétumejiricayaresera, tavetijipa puiti eta vímairapa eta tánehirapa eta masacheraya ema Viáquenu eta machavirayare.

²⁶ Taicha te ímianavaichuchapua icha eta pecatuana, tayanapanehi ímatiripahi puiti eta yátupiqueneana, eti émepururecaripahi ema Cristo eta ímicapasirahi táichavenehi eta epecaturana. Páurehesami, taicha nájina apanainahini ecasiñahini.

²⁷ Ena nani náemepururecaripahi ema Cristo, tétavicavahi eta tamuracavaya eta náicuñayare. Tisiapanayare eta táifehiquene yucu tájirequene. Eta juca eta náicuchihi návihayare ena ticatíananahí ema Viya.

²⁸ Tacutihí acane eta macaícuñaira mácani téjecapavahi tayehe eta mavanairipiana ema Moisés. Te natirihihipuca apinanahi, mapananahipuca ena testigoanahi, tímahanahi eta májecapiravahi, tatuparacahi nacapacavaneyarehi ena tuparairucana. Vahi tijapanuacaremahi éma.

²⁹ Tásiha, tétavicava muraca eta náicuñayare ena témepururecanahi ema Machicha ema Viya, ¿masi? Taicha náemepururechavire eta máitine máepusairuhi, nacaecahivare ema Espíritu Santo, náemépururechavire eta máemunasiravacahi ema Viya. Váhivare návarahahi náimati eta máitine máepusairuhi, étara vivachahi eta majacapirahaviyarehi ema Viya.

³⁰ Vimutuhi vecha eta máechajiriruvahi ema Viáquenu, ani macahehi: “Núti tituparacanu nícuñasiravacayare. Nútichucha némecharecavacayare éna”. Tásiha, ánvare macahehi: “Ticayaserehianayare ena achaneana te numirahu”.

³¹ ¡Tipicacarequenehi eta náicuñayare ena témepururecanahi te mamirahu ema Viya, tamutuquene máimaha!

³² Németeacaserá ímianavayare éti tauri eta éhisirahi. Écharichuhi eta ítaresirahi cape juca, te épanavainapa eta ejacapirahi eta juca tajarahiquene máechajiriruva ema Viya. Ichape-muríhi eta ecatajivairahi naicha ena ticatíanacaheanahi. Ecamichahisera éti.

³³ Etiaríhihi éti ecaumehacasihi ecaehanahi te namirahu ena achaneana. Etiaríhivare éti ímicatíananahi tayehe eta náichavaquenevanahi ena tícaehanahí.

³⁴ Ejanaruhivare nácani tícaeratanahi te cárcel. Tacutiquene ecurisamurechavachucha eta naverejisiraheanahi eta ímahaqueneana, taicha échahi éti tatiaríhihi eta ímahaqueneanayarehi te anuma. Tétavicavahi tíuripanahi tayehe, máitavacacahi éta.

³⁵ Tásiha puiti, vahi ecuyacujihini. Étumechavasera eta ímitusirahi eta máechajiriruva ema Viya. Éta tíuríchaheyare, ejacapayare eta mavachachiraheyare ichapequeneya.

³⁶ Ecayehechahavare paciencia. Ímianavavare ítaucha eta mavarahaquenehi ema Viya, tásiha yátupina ejacapaiapa eta ícuchi eta mayehe.

³⁷ Taicha eta Sagrada Escritura, ani tacahehi: “Vaipa máyeremahi márajapainapa ema Cristo ema vicuchapaquenehi”.

³⁸ “Nácani natupiruvahi eta nasamureana, ticasíñanuanayarehi eta náítaresirahi. Énasera nácani tíchavacuejehavanahi, nucaerajicavacayare táicha” tacahepa.

³⁹ Vítisera vahi vácútimahi ena tíchavacuejehavanahi, énajívaya tímitaequenehavanayare. Vítisera viti vímianavanahi eta vicasiñavaira me Viya, vicuchuchayarehi eta víachanevana táicha.

11

Tétavicavaya eta viúricacareva te vicasiñavahi mayehe ema Viya eta vítaresira

¹ Te yátupi visuapa eta máechajiriruva ema Viya, vicasiñayare éma, vicasiñavavare eta mayehe eta máitachirayare tamutu eta máijararuvanahi, tayanapane vuíchaha vímahaimahi.

² Ena víachucanaveanaini, tétavicavahi eta nasuapajiraivahi. Macunachavacahi ema Viya taicha eta nasuapajiraivahi.

³ Tacuti quene, te visuapa eta máechajiriruva ema Viya, vímatiequeneha eta máepiyasirahi acane eta juca apaquehe, tájinarichahasera eta táimahacarehíni. Visuapahi tamutuhi máitaucha eta mapanereruhi, máetupirisirahi tamutu eta vímahaqueneanahi puiti.

⁴ Émaripa ema víyahaini Abel, eta masuapajiraivahi mayehe ema Viya, tétavicavahi eta tajacapacarevahi eta mámahuhíni mayehe ema Viya, tacachuricahi eta mámahuhíni ema maparape Caín. Tásiha, ema Viya macametarapihi eta majacapacarevahi ema Abel. Puiticha, májinaripahinéni, ánaquiaparihi eta máepenirahi, tanasihisera eta tacunachacareva eta masuapajiraivahi.

⁵ Étapa eta masuapajiraivahivare ema víyahaini Enoc, vahi máepennumahini te juca apaquehe eta mayaniraya te anuma. Tamutuhi eta máquehe mámahíni tayehe eta apana vítaresira, eta mámirahi ema Viya. Eta Sagrada Escritura táechajisihahi eta macurisamurechirahi ema Viya. Táitusiava, mámapa éma.

⁶ Tásihasera víti, te tájinahi eta visuapajiraivainahini me Viya, váiparíni vicurisamurechaimahi éma. Eta vicaijuheiraya éma, tatívayarehi tacamunu yátupina eta vicasiñavaira mayehe, eta majacapirahaviya, víuricacareyare máicha.

⁷ Émaripa ema víyahaini Noé, ticasínavahi me Viya. Tásiha, tijacapacarepa. Taicha masuapahi eta mavanecasivahi máepiyasirayarehi eta ichapequene pacure, eta macuchucuiyavayarehi éma, énapa ena machichanaveana tayehe eta ichapequene une. Tájinachahanéni ecutiararenahini eta taquívairayarehi. Máichuhavacavarepa ena apamuriana achaneana nasiapavare. Ticaicuñanapasera, taicha eta namasuapirahi.

⁸ Émapa ema víyahaini Abraham, masuapahivare eta máichuirahi ema Viya, májarsirayare eta apana apaquehe mávasayarehi. Tacahe, ema Abraham tíuchucapa te mávasaini, váhinéni máimatihini távihapuca eta macaijuheharehi. Ticasínavahisera me Viya eta mámirahi.

⁹ Eta máitecapirahi, tímiyanava eta macasiñavairahi me Viya. Manasipa macavasahi eta apaquehe májararui ema Viya, tayanapane víuchaha mayehenahi eta apaquehe. Tájinavare mapenainahini. Cárpachucha eta mapenahi. (Ema machicha Isaac, eme macahehi eta máitaresirahi, émapa ema mámari Jacob. Taicha éna, énerichuvare natuparacahi eta juca apaquehe návasayarehi.)

¹⁰ Émasera ema Abraham, vahi máéñamavahini. Yátupíni eta macasiñavairahi, ticuchapa-vaichucha eta májarsirayare ema Viya eta mávasayare máepahacacayarehi eta tísihaque-neyarehi te mavahuana ema Viya, máetupiriruhi tamutu.

¹¹ Ésuripa, esu Sara ticasínavahivare mayehe ema Viya, máitauchayarehi eta májarsirava eta sucachichairaya, ichavicachicharipahinéni. Macheruhivare ésu. Májaracahisera ema Viya eta suchicha taicha eta susuapirahi eta máitauchirayare ema Viya tamutu eta májarruvanahi eta suyehe.

¹² Tacahe, ema Abraham ichavicachicharipahivare, mapaenumavapa ticachicha. Tásiha, tíuchucanapa ena camuríqueneana mámaríequeneana. ¡Tétavicavahi eta nasimutuvahi! ¡Vaipa natupachacarehini!

¹³⁻¹⁴ Tacahe, namutu ena nani néchajisihaqueneana, tímiyanavana eta nasuapirahi ema Viya tamutu eta náitaresiranahi. Tétavicavahi eta nacasiñavairahi eta máitauchiraya eta májarruvanahi. Te navapureana, náimahapa eta návasaqueneyarehi. Tásiha, vahi náetupiricavahini eta nanasirayare te juca apaquehe. Navarahaipahi náitecapauchaneyarehi eta arairu avasare natanujiriruhi.

¹⁵ Éta tímicaecherachahi vahi nacatiequenehahini eta apaquehe návinénihi, taicha vahi náechajisihahini nachavahini.

¹⁶ Natanucahisera eta arairu apaquehe tíuripanahi, eta tíávihihi te anuma. Eta tacahe, tétavicavahi eta máurisamurevahi ema Viya eta nayehe, táichavenehi eta nacasiñavairahi eta mayehe éma. Taicha máicuchavacahi eta arairu návasayarehi, émarahi nacaiyaquenehi éma.

¹⁷ Apanavare eta máimerechirahi ema Abraham eta masuapajiraivahi, te ticavanahipa eta macapasirayarehi ema machicha Isaac, májuchirayarehi eta macamavahuiraya me Viya. Vahi macatiequenehahini ema émanaracavahi machicha. Taicha yátupíni eta masuapirahi ema Viya eta máechajiriruva, ani macahehi:

¹⁸ "Ema pichicha Isaac, njaracayare ena camuríqueneana mámaríequeneanayare".

¹⁹ Taicha ema Abraham máimatíni eta tamutuirahi máituruequeneha ema Viya. Maratahahi macaechepuca ema Isaac te táequenepa eta máepenirahi. Téhesera te macapacayarepaini ema machicha, ema Viya téchajicapa. Vaipa máisapahini eta macapasirayarehi, taicha máimahapa yátupíni eta masuapajiraivahi ema Abraham. Tásiha, tímicitíjiricavahini máecheperénahini ema amaperu Isaac.

²⁰ Émapa ema Isaac, yátupihivare eta macasiñavairahi me Viya eta máitachirayare eta máechajiriruvana. Te ichavicapa, mabendiciónchapa ema machicha Jacob émapa ema maparape Esaú, mavarairahi najacapayare eta táurinaqueneana máijaruanaya ema Viya.

²¹ Émaripa ema Jacob, yátupihivare eta macasiñavairahi me Viya. Te tiánehipa eta máepenirayarehi, énerichuvare mabendiciónchapa ena apinana machichanaveana ema José, mavarairahi najacapayarehi eta náicuchiana. Te titapiricapa tamutu, téneuchavapa me Viya, ticayupaicaripa eta te mayupairiqui.

²² Émapa ema José, te tiánehipa eta máepenirayarehi, macaechajiriruvapa eta náuchusirayare ena israelítana tayehe eta apaquehe Egipto, nayanirayare te apaquehe náicuchihi. Eta macasiñavairahi mayehe ema Viya, macavanairipipa eta náunasirayarehi eta máperana éma, tásiha, námayarehi te náuchucapa.

²³ Énerichu eta nasuapajiraivahi ena ticachichanahi ema Moisés, ticasíñavanahi mayehe ema Viya. Vahi napicahini eta mavanairipiana ema rey eta nacapapajisirayarehi ena amuyana ajairana. Eta náimairahi eta máurinavahi ema amuya, nayumurucapa éma. Mapana caje eta nayumurujirisirahi.

²⁴ Tásiha, náitucahi eta sucajurusirahi esu esena rícoquenehi, taicha ésu, machichahi ema rey.

Tacahe, ema Moisés, te ichanarupa énerichuvare tisuapajirahihí. Vahi macatiequenehahini eta majunijiasirayarehi esu ticajurucahi.

²⁵ Váhivare mapicaracahini eta macatajivairayarehi eta macachanerayare ena majaneanana machaneranahi ema Viya. Vahi tavayucachini jácani tájiparacana pecatuanahi te apaquehe.

²⁶ Ticasíñavaipahi éma eta tatiaririhayare eta máimahaqueneanayare táitsivanayare eta macatajivairaya táichavenehi eta macatiuchirahi ena machamuriana, tacutihi eta macatiuchirahavíhi víti ema Cristo. Tájinahinéni mácamunuhini eta táimahaquenehi tayehe eta avasare Egipto.

²⁷ Táichavenehivare eta masuapajiraivahi ema Moisés, vahi mapicaracahini eta masemirayare ema rey tayehe eta Egipto eta macuchucuiravaca, má mavacahi ena machamuriana israelítana. Tétumehavarichucha taicha ticasíñavahi eta majaneasiravacaya ema Viya, tayanapane máimahasi ema Viya.

²⁸ Eta masuapajiraivahi ema Moisés, máitachupa eta mavanairipi ema Viya. Mavancavaca ena machamuriana nacapacayare eta uvesachicha, nátsiquiriacaya eta iti te tapaja eta napenana, apaesa vahi macuesirujicavaca ema ángele ema tiámayarehi eta náepenira ena náechavimuri te jácani peti.

²⁹ Énaripa ena machumariana ema Moisés, eta nasuapajiraivahi, naratahahi nánueca eta ichape Mar Tísi. Témunahiricavahi tiájiji te túpiricuha eta nayanihayarepahi. Tásiha, ena masuntarurana ema rey te Egipto, navarahavarepa tiánuecana. Tichavapasera eta une. Téricanapa namutu.

³⁰ Táichavenehivare eta nasuapajiraivahi ena israelítana, tiáquipacavapa naicha eta tayuchamarana eta avasare Jericó, te jena siétequenepe sache eta návicuarasirahi eta avasare.

³¹ Ésuripa esu Rahab túhusini, eta susuapajiraivahi, vahi suépenahini te tépenaracanapa ena masuapajirairahanahi. Taicha ésu sucatiuchapa ena vanairucana me Josué.

³² Nuvarahahineni numetacahe tamutu eta nasuapajiraivanahi ena apamuriana: ema víyarahaini Gedeón, ema víyarahaini Barac, ema víyarahaini Sansón, ema víyarahaini Jeffé, ema víyarahaini David, ema víyarahaini Samuel, énapa ena víyarahaini profetanaini. Nararihivare ena apamuriana, tétavicavahivare eta nacasiñavairahi mayehe ema Viya. Váhisera nunaca támutu te juca eta náijareana.

³³ Eta nasuapajiraivahi éna, nararihihi ena títahacanapahi ena nánarana te avasareana. Nararihihi ena apamuriana aquenucanahi, tatupiruhi eta nagobernachirahi eta návasana. Ema Viya, eta majaneasiravaca ena apamuriana, máeratajacachavacahi eta tajacana eta táifehiqueneana sárareana.

³⁴ Ena apamuriana, macaemahainehivare eta tájiturequene yucu te jórnú. Ena apamuriana, macuchucuhavacahi te navaraha náechatinucavacayarehi ena nánarana. Nararihivare ena matumerahanahi, máetumehavacahisera eta nacaemataneasirahi éma. Ena apamuriana, tétavicavapa eta náitupajijiasiravapahi tayehe eta guerra, náitahavacapaipa eta ichapequeneana ejército ena nánaranahi.

³⁵ Natiarihivare ena esenana, eta nasuapajiraivahi, mápechava máimichava ema Viya títarecana ena najaneanaini náepenaqueneanahi. Natiarihivare ena apamuriana

náemépenahi eta nacatajivairasamihi. Nacamichahisera tamutu taicha eta nasuapajiraivahi, namavarairahi náinajicahini ema Viya, navarairahivare náimahayarehi eta táuricacarequene eta náítaresirayare te náecheputapapa.

³⁶ Natiarihivare ena apamuriana, ichapemurihi eta nacaecahirasamihi, ticaestanhivare, táimitiacavachivare te cadena tayehe eta cárcel te nacaerataiyapahi.

³⁷ Ena apamuriana, natupisiruanapahi te márijahiana eta nacapasirapahi ena achaneana. Ena achaneana, eta návarairahi náiminajicayarehi eta náehisirahi ema Viya, nayuchatihecavare. Ena apamuriana náechatinucavacapahi te espada. Napanajiricavaca ena apamuriana, náimijunavacavarepa te napenana. Tiyananapa témestajiricavanapapa. Tépacuchavanapa te taparumachichana eta sárareana eta náechuriasirapa eta nacamuirahaquene. Tájinapa naviyavapahini taicha eta napaurevavacapaipa.

³⁸ Ena nani páureanasamí, ichape eta napicauchacarevainihi. Vaipa náuriahini eta najunanairisirahi te mávaphiana apaquehe eta tataracuana eta máriana, nacapenajuechapahi eta enurujuheana.

³⁹ Jéhesare, namutu ena nani néchajisahaqueneanahi, ticatajivanahi eta náítaresirahi. Majacapavacapaihi ema Viya táichavenehi eta nasuapajiraivanahi. Vuíchahasera náijahúchavahini nacajaracasihini eta náicuchianahi me Viya.

⁴⁰ Taicha mavarahahi éma tihetamurichahaviyarepa viti véquenehanahi visuapanahi ema Jesús énapa namutu éna. Vicuticacayarepa eta viúricacarevayare vimutu.

12

Vicutiyare ema Jesús eta macamichirahi tamutu

¹ Puíticha viti apanavare vicamichayare tamutu eta vicatajivairana, vácutivaca eta nacamichira ena nani náinapureanahi téhicanahi ema Viya. Taicha puíti éna tímararacahavianahi viti tájahapuca táicharacavahi eta vipaisirahi viti. Eta tacahe, tituparacahavi vinajicayarehi eta táitiasirahavihi eta tájiparacana, tíamaparaurahiana tayehe eta pecatuna. Tacahe, vicamichayare tamutu, táurivaya eta vicaemataneasirahi ema Viya, apaesa vijacapa eta vícuchihí.

² Vicutiyaeva ema Viáquenu Jesús. Éma, tímitucahavihi eta véhiruhi, éma tínapuisinahavivare eta masuapajiraivahi. Tayanapane ichape eta matsirihahi te máimahapa eta macatajivairayare eta macaetatairayare te crusu, vahi machavacuejehavahini. Tétumechavahisera taicha máechahi éma tatiarihíhi eta táitsivayarehi. Tétavicavahi eta máurisamureva eta máejasirahi te mayehe trono te mavaure ema Maiya.

³ Puíticha éta, epanerequenehayare éhicayareva eta macamichirahi ema Jesús tamutu eta macatajivairahi naicha ena ticatianacanahi. Ene ecaheyare éti, vahi ecuyacujihini, étumechavayaresera eta éhisirahi éma.

⁴ Táitaurevaquene éti, tájinaichaha ímahahini ecatajivahini táimicapacahehipucaini eta ínjiasiraipa eta tájiparacana te juca apaquehe pecatupaire.

⁵ Vahi ecuemitisita eta máemunasirahehi ema Viya te jácani máemecharesiraheana táichavenehi eta machichaheirahi. Taicha ani tacahehi eta Sagrada Escritura: “Piti nuchicha, vahi picueñamava jácani máemecharesiraviana ema Viya, mavarairahi máetupiricayare eta pipanereruana. Váhivare picuinajicava tayehe eta maconsejachiraviana.

⁶ Taicha éma, máemecharecayarehi nácani máemunaruanahi machichanaveanahi” tacahepa.

⁷ Tacahe, ecamichayare éti jácani máemecharesiraheyare ema Viya táichavenehi eta máemunasirahehi eti machichanaveana. Tácuti mácani achane, te matiaríhi ema machicha, tímerecavahi eta tacaiyairahi eta mapena eta máemecharesirahi ema machicha, mavarairahi máetupiricayare eta mapanereruana.

⁸ Yátupíhi eta máemecharesirahavi ema Viya vimutu viti machichanaveana. Téhesera te tacuija ímaha eta máemecharesiraheana éma, máimerecaripa éma vahi yátupinahini machíchahénahíni.

⁹ Tacutihí eta vijurusirahi viti te amuyahavirichaha. Témecharecavahi ena ticachichahiviana, visuapavacapa táicha. Tásiha, tavetijipa eta visuapirayarehi ema Tata Vicaiyaquenehi apaesa éma tíjaracahaviyarehi eta táurivayarehi eta vítaresiraya.

¹⁰ Ena ticachichahiviana, ánipirichu eta náimitusirahavihi jácani eta navarairahi éna viúriyarehi nayehe ena achaneana. Émasera ema Viya, tíuripanahi eta vímitucasivahi mayehe. Éta tíapajucava tíurichahaviyare. Tépacinachahaviyarehivare éta. Mavarahahi vicutiyaehi eta masantuvahi éma.

¹¹ Jéhevare, te tatiaríhipuca eta vicaemecharahirana, vahi viúrisamurémahí táicha. Ticatihí visama. Téhesera te vétupiricava táicha, tétavicavayarehi eta viúricacarevaya te visamureana taicha tatupiruhi eta vítaresira.

Tétavicava tavarahacareva te visama eta máechajiriruva ema Viya

¹² Tacahe, nuparapenaveana, nutuparacaha étumehacaca nácani nayacujhipuca. Ímica-tacaca eta etupihaira muraca eta éhisirahi.

¹³ Énerichuvare eta ecaijuheira eta me Viya, etanucayare tatupiruina eta ecaijuheira eta me Viya, etanucayare etupiruina eta eyanirayare. Vahi ecuepiñuñuica, machu náevejuca ena matumerahana ena téhicaheanahi te équene. Táuri eta lámiracacaina, apaesa nacaravahuyare náetupirica eta napanereruana, náetumehavavare énajiva.

¹⁴ Tacuijavare ecuichiravainahi nayehe namutu ena achaneana. Yátupina eta epachinavaina te esamureana étapa eta iúriya eta ítaresirana. Taicha te vahi tiúrihi eta ítaresirana, vahi eratahaimahi ítecapaucha ema Viáquenu.

¹⁵ Ejaneacavaicha yátupina, machu etiarihipuca eyacujihí, tásiha émepurureca eta máimicatásirahé ema Viya. Tacuija eta ecuimipananajicava eta esemirana. Machu tapareacavaca ena echamuriana eta evainarajivana, tacuti jácani sucureca máurirahana, tapareacayare eta apana sucureca táurinaquenehi, táimicapacapa.

¹⁶ Nacuijavare te etaracu nacuveha esu apana esena. Nacuija nacuepuru jácani tipicau-chacareanahi. Vahi ecucuti ema achane ticaijare Esaú. Eta mavarairahi tñahúchava tñica, máijjararecapa eta máicuchinihi mayehení, taicha éma, máechavihi ema maparape.

¹⁷ Écharichuhi éti, te táequenepa, te mavarahainipa majacapa eta mayehe bendición ema maiya, vaipa majacapacarehini, mametainipa tñyahahi. Vahi maratahahini ticajimuyacahini ema maiya.

¹⁸ Éti, tájina étaparacaina eta napisirahi ichapequenehi ena achaneana israelítana, acane te náitecapauchapa eta cerro Sinaí. Eta jara cerro, tatiarihihi eta yucu timuruhi te tápusi. Énerichuvare te távihahi eta timapicuquenehi, távihahivare eta táíñehiquene emarere.

¹⁹ Muracaquene eta machuja ema ángele. Muracavare eta mahu ema Viya eta máechajisiravacahi éna. Ichapequenehi eta napisirahi ena tisamanahi. Eta tacahe, tiyaseserecanapa vaipa macuechajicavacahini.

²⁰ Eta napicacarasiravahi, navaraha tichavacuejehavana. Ichapequenehi eta tapicahucareva eta cerro, taicha tatiarihihi eta muraca vanairipi, ani tacahehi: “Ecapaca nácani achane, jácanivare sárare tiápanapuca te juca cerro. Ecapacavaneyarehi te márijahi, te váhipuca ticayuravarehi te lanza” tacahepa.

²¹ Tacahe, tétavicavahi eta táíñehiva, émaripa ema Moisés ani macahehi: “Nuyayacarenecha eta nupisirahi” macahepa. Nuparapenaveana, numetacahe: Tájina étaparacaina eyehe tamutu eta juca tipicacareanahi.

²² Étísera tachichaheanapa puiti eta mávasa ema Viya Vicaiyaquene, ticaijare Arairu Jerusalén*, eta távihahi eta cerro Sión te anuma, te náurujsihavahi ena camuriqueneana ángeleana eta najirauchirahi ema Viya.

²³ Éti esiapapa eta nasimutuva ena ecutiqueneanahi machichanaveanahi ema Viya. Ecajucunavare eta nalista. Natiarihipa ánaqui eta náchanevana ena machichanaveana náepenaqueneana. Natupiruhi eta náitaresirahi. Tipachinavaqueneanaripahi puiti, sántohivare. Matiarihivare ema Viya, yátupiquenehi Juese veyehe vimutu víti.

²⁴ Matiarihivare ema Jesús ema tiyaseurahiquene eta veyehe. Émahi ema tiámahi eta arairu matratune ema Viya. Émaripa máepusaicapa eta máítine tasipahacahaviyarehi, apaesa vijacapacareyarehi me Maiya. Eta máítine ticunachacarepanahi tayehe eta máítine ema víyarahaini Abel.

²⁵ Eta tacahe, échapavaicha éti. Vahi ecuepuru eta máichuarapianahi ema Jesucristo. Machu ácuti ena tépuruanahi eta mavanairipiana ema Viya, máimiturapianahi ema Moisés. Étapa tímicuñacavacahi éna. Vivetijinapapuca víti eta vícuñayare, te vicaepaquecupuca eta máichuarapiana puiti ema Viáquenu, taicha éma tiásihahi te machacaya ema Viya te anuma.

²⁶ Taicha eta acane, eta mahu ema Viya, tétavicava eta tamuracava. Tiyayacarehi taicha eta apaquehe. Puítísera, ani macahehi éma: “Étaherineyare tiyayacare nicha eta apaquehe. Váhisera tácarichuimahi. Éneyareichuvare te anuma” macahepa.

²⁷ Eta juca máechajiriruvahi, tímaticareipahi eta táitavirayare tamutu jácani tiyamuricanahi máepiyaruanahi ema Viya te juca apaquehe. Tacarichu tanasiyare jácani máitavacacagueneana taicha mayamurianahi.

²⁸ Étaripa eta mávasa ema Viya, mavarahaquenehi máimiáviyahavihi, máitavacacaguenehi éta. Eta tacahe, vihasulupayachaparaca éma. Vétaviuchainavare eta vipicauchiraya éma. Tásiha, vicurisamurechaina éma eta vivapinava ichape eta vijirauchirahi éma.

* 12:22 Te pivaraha pecha eta apana tayehe eta Arairu Jerusalén, pitanuca te libro Apocalipsis 21.2-27 étapa 22.1-5.

²⁹ Taicha ema Viáquenu macutihi eta yucu, maratahahi máitaequeneha mámainuca.

13

Vicurisamurechayare ema Viya

¹ Tiuri, nuparapenaveana, vahi ecucainajiruva eta émunajirisiracacahi, táichavenehi eta echamuricacairahi te mavahuana ema Viya.

² Vahi ecuemitiscava eta táurirayare eta ejacapiraya ena echimarana te epenana. Taicha tajuricati ángeleanainapahi nácani típaipiuchaheanahi, éta vahi ecumatíhi.

³ Énerichuva échayareva nayehe ena ticaerata. Ejanuvaca éna, táimicutijiricavahini étinahini ecaeratahini ecachanevacahini. Énerichuvare ejanuvayare nácani náemejapanuráruana taicha éna étarichuhi eta náqueheana tacutihi eta iáqueheana éti.

⁴ Ámutu epicauchacaca éti ecaimaqueneanaripa: eti esenana, étipa eti ajairana. Taicha máimaha tiuri ema Viya eta evehacacairahi. Tacuijaserá eta échipeacava eta evehacacairahi ena apanana. Ema Viya máicuñacayarehi nácani tivehacacacani vahi nacuchapahini nátauchavahini, énapa ena ticayepecacani.

⁵ Váhivare tacuvayuacahe eta plata. Taratarichu tacurisamurechahe jácani ítrevahi ecayehequenehi. Ema Viya ani macahehi eta máechajiriruvahi: “Vahi nujunijicavimahi, váhivare némitiscavimahi” macahepa.

⁶ Tacahe, vicasínavayare mayehe ema Viya te viyaseaca. Ani vicaheyare te visamure: “Ema Viáquenu ema tímicitacacani. Vahi nupicaimahi jácani náichiranuhi nácani achaneana” vicaheyare.

⁷ Échavayare ena tímítucaheanapaini tímísimahéanahini eta máechajiriruva ema Viya. Natupiruhi eta náitaresiraini. Éti, epamicava ecutiyahe éna eta nacasínavairahi me Viya.

⁸ Ema Viáquenu Jesucristo, vahi máitsivacha eta máurivahi eta viyehe. Manasíhi puíticha, étapa eta apajarahiyahe.

⁹ Eta tacahe, vahi ecuisapava ecuehica eta jácani apanapenejiqueneana náimiturapiana. Tiúripa étumechayare eta esamureana, táichavenehi yátupiquene eta máemunasirahavíhi ema Viya. Étapasera eta nayeherepiana tayehe eta tímícareana, vahi étaparacaina taicha tájinachucha táimicitacavacahini ena ticayeherepianahi.

¹⁰⁻¹¹ Eta nayeherepiníhi ena tiyujaracarahiana tayehe eta santuario te Jerusalén, natuparahahi eta nanicasarehi eta námavahuana ena achaneana. Étahi eta navachachahi eta nacaemataneasirahi. Étasera eta sárareana námavahuanahi, navarahahi tacaepahayarehi eta napecturana, éta, tituparacava vahi nacunicahini. Étachucha eta táitine mámahí ema náquenu ena tiyujaracarahiana tayehe eta téqueneha cuarto Lugar Santísimo. Étasera eta táqueheana, náijuchaqueneayarehi te tachachacu eta avasare. Vítisera, mararihi ema apana tiyujaracarahí eta viyehe, apanapavare eta mayujarauhí. Vahi énaparacaimahi ena nánapureana tiyujaracarahiana.

¹² Ema Cristo, ticatajivahi eta máepenirahi te tachachacu eta avasare, mavarairahi máepachicahavíyarehi viti achaneana tayehe eta máitinerichu éma.

¹³ Tacahe puítí, vínajicavayarehi eta nayeherepiana ena vijaneanana. Vahi étaparacaina viyehe. Yátupina véhicayare ema Jesús. Tayanapane vicatajivayarepuca, vicutiyaesera éma eta macatajivairahi.

¹⁴ Taicha te juca apaquehe, tájina vahi táyeremahi eta avasareana étapa eta tayeherépiana. Vítisera tachichahavípa eta avasareyare arairuyare. Apanainapa eta viyeherepiana víchaqueneanayare. Tétavicava eta vijamurachirahí viyápávane.

¹⁵ Tásiha puítí, eta véhisirahi ema Jesús, tavaraha eta vijirauhíraparacayarehi ema Viya tamutu sácheana, yátiana. Te jácani tájahapuca vícharacava, váhasulupayachavare éma. Eta juca eta víámavahuhi eta mayehe. Éma vicavapajayarehi.

¹⁶ Énerichuvare, vahi ecuemitiscica eta íchirahi eta táuriqueneana. Ecayiyareva ena echamuriana eta ecayehequeneana. Eta tímícutijiricavaipa eta iámavahuhi me Viya. Éta ecurisamurechirahi éma.

¹⁷ Esuapayareva nácani tímítucaheanahi, evapinavayare nayehe eta esuapajiravíhi. Taicha éna, tíjaneacahéanahi eta iáchanevanahi éti. Náechahi éna eta ticayaserehianayarehi te mamirahu ema Viya. Ecurisamurechavaca éna eta esuapajiravíhi, tavapinacarénapa eta nacaemataneasirahéna éti. Vahi ecuimipanechavaca eta eyacujiva, emasuapajiravípuca.

¹⁸ Eyaseuchanuyare nútí te eyujarasirana. Nucasínaváipahínéni nútí táurivaipahi eta nupanereru. Tájinapa níchiravainahini. Nuvaraha níchayare eta táuriqueneana nayehe namutu ena achaneana.

¹⁹ Nuvarahasera eta eyaseuchinanu me Viya, máisapanuhini éma níjahúchavahini nuchavahini eta eyehe.

Ema Apóstole mayaseuchavacahi ena machamuriana me Viya

²⁰ Ema Viya, tétavicavahi eta macanarasirahavihi eta vipanereruana. Éma tétavicavahivare eta máitupajijiasirava taicha macaecheputacahi ema Viáquenu Jesucristo te máecari, apaesa émayarehi yátupiquenehi Pastoryare, tíjanearahi viyehe viti machichanaveana. Tisipahacahavipa eta te máitine apaesa máitavacacayarehi eta vicachanerayare éma.

²¹ Núti nuyaseuchahe me Viya, máimicatacahehini ítauchayare tamutu eta mavarahagueeneana, íchirahi eta táuriqueneana apaesa ecurisamurechahini éma te tamutu eta ítaresira eta éhisirahi ema Machicha Jesucristo. ¡Máitavacacayare eta vicunachira ema Cristo! Amén.

Eta táichecuarahui eta natuparacasivahi

²² Nuparapenaveana, nuvaraha nuyaseacahe ácahehíni paciencia tayehe eta juca nuconsejarapihi eta eyehe. Ánipichichahi nájurehi tayehe eta juca nucartane. Jararihisera camuriqueneana eta apana nuvarahahi numetaruheyarehini.

²³ Numetacahevare ema viparape Timoteo tíuchucuharipa te cárcel. Te máitecapavaneputa éma, nuchachanevarepahi te níteca eta ara eyehe. Nuvarahahi nímahapanaha.

²⁴ Néchajicahe emutu eti ejanearahiana ena vichamuriana. Échajisinanuvaca namutu ena vichamuriana vicutiqueneanahi tisuapajirahianahi te jácani návihahi éna. Ani te juca, nuchachanevaca ena vichamuriana náiteruana te Italia. Téchajicaheanavare éna.

²⁵ Nuyaseuchaheparaca emutu éti me Viáquenu Jesucristo, táetaviuchahini eta iúricacarevaya máicha. Amén.

Tamutupa eta juca néchajiriruvahi eyehe.

**Eta macartane ema Santiago nayehe ena majaneanana
machamurianahivare, náéjanerepairuanahi te avasareana,
ticajare
SANTIAGO**

¹ Nuti Santiago, mavanaranuhi ema Viya, mavanaranuhivare ema Viáquenu Jesucristo. Nuvaraha nucaitecapa eta juca néchajiriruva eyehe emutu eti nujaneanana israelítana éjanerepairuanahi te tamutu avasareana.

Eyaseacayare eta ítupajjiasiravaina

²⁻⁴ Nuparapenaveana, nuvaraha nuconsejachahe: Te tatiarihinapuca eta ecatajivairana puiti juca ítasesirahi, vahi eucainajiruva. Evapinavachucha, ácasifiava mayehe ema Viya. Taicha te yátupina ecasifiava mayehe, vahi tiáquipaichémahahi ema Váinaraji. Énerichuva ácamicha yátupina jácani apana táitecapaureheanaya. Ácuti nácani achaneana náitucahi ticaratacavana. Mavarahahi ema Viya tátupiruvahini eta ítasesirana. Eta tacahe, te tatiarihipuca eta ecatajivairana, ecaurisamurechavachucha. Evapinavaya, taicha iúripanayare eta iúchucuirayare.

⁵ Tacahe, te tatiarihinapuca eta téchacare, te váhipuca íturuequenehanini, eyaseacayare ema Viya eta ítupajjiasiravaina. Éma, tíjaracaheyare, taicha tájina mayavana éma. Váhivare ticajachahavimahi eta víyaseasirana jácani vicamunuqueneana.

⁶ Yátupinahisera ácasifiava me Viya eta eyaseasirana eta ítupajjiasiravaya. Vahi eueñamava mayehe. Taicha te éñamavapuca, tímicitijiricavaipahi ecutihí eta táepacuruha eta une téquequerecavahi.

⁷⁻⁸ Taicha nararihi ena téquequerecavanachucha eta napanereruana. Vahi étanainarichuhini jácani navarahaquenevare náicha. Nácani tacahehi eta napanereru, éna tájina májaracaimahi ema Viya.

⁹ Émaripa mácani vichamuri, te páurehipuca eta máítaresirahi, tivapinavayaresera taicha eta máimicatasiraipa ema Viya taicha eta máemunasirahi.

¹⁰ Émaripa mácani vichamuri rícoquenehi eta máítaresirahi, énerichuvare tivapinavayareva, tayanapane títahapuca eta máimahaqueneanahi. Taicha eta vímahaqueneanahi te juca apaquehe, vahi táeñamacarehini, taicha títavayarehi tamutu.

¹¹ Ánipirichu eta táurinajiva eta flureana; taicha te járajapapa eta muracana sache, tacajiyujicapa. Tamutu títava eta táurinajivainihi. Témiricaipavare eta taflurena. Ene macahe mácani rico, vahi tánasimahi eta máimahaqueneana, tayanapane vahi macuvaraha táitava, máitucahipuca eta macematanera.

¹² Tétavícava eta náurivayare nácani vichamuriana ticamichanahi tamutu eta nátajivanahi. Járajapayare eta sácheanayare eta najacapuraya eta táitsivayarehi maicha ema Viya, májaracainapa eta táurivayare eta náitaresirayare, taicha ticunachacareanahi. Tacahehi eta mapanereruhi ema Viya nayehe ena témunacanahi éma.

Máisapa ema Viya eta jácani víchavaquenevanaya, mavairairahi tétupiricahaviyare

¹³ Téhevare tatiarihinapuca eta éjecipavaya jácani tamauriqueneanahi, vahi émaimahi émeteaca ema Viya. Taicha vahi tásihaquenéna me Viya eta juca tájiparacana. Nájinavare mapamirumahi náichahini eta júcana.

¹⁴⁻¹⁵ Nácanisera náquipairuvana tayehe eta tamauriqueneana, táuchurepa te napanereru tamauriqueneana, tásiha navaraha náichayarehi eta pecatuana. Vaipa nanecapavahini eta náichiraipa. Téhesera te táequenéna, étapa tivichayarehi. Tíñehicha eta táimicapasiravacaina.

¹⁶ Némunarqueneana nuparapenaveana, machu éjicapava tayehe eta juca numetaruheanahi.

¹⁷ Éma Viya, étanarichuhi eta mapanereru. Vahi apanapanenejinahi eta máuriva viyehé. Éma, tíjaracahavihi viti achaneana eta majaraiva, étapa tamichahuhi eta víachanevana. Taicha tamutu eta juca táuriqueneanahi vijacapaquenehi puiti, tásihaqueneanahi me Viya. Vahi apaesajiruinaichuhini eta táurivahi. Jéhevare eta yátupiqueneanahi.

¹⁸ Taicha acane tacahehi eta mapanereruana, mavairairahi vijacapayarehi eta yátupiqueneanahi máechajiriruvana apaesa machichahaviyarehi. Eta máitsivachirahi eta víachanevana, ticaeherahi máitsivachayarehi tamutu eta apamuriana máépiyaruana te juca apaquehe.

Vímerecavaya yátupi eta visuapirayare eta máechajiriruva ema Viya

¹⁹ Eta tacahe, eti némunarqueneana nuparapeneveana, nutuparacahecha yátupina tauri eta esamiraina eta máechajiriruvana ema Viya. Vahi ecuijajahúchava esema. Epanerechinava eta échajisiraya.

²⁰ Taicha nácani tiseमारairihiana, vahi étainahini náichahini eta mavarahaqueneana ema Viya.

²¹ Puiti te juca vítaresirahi, jararihi eta tavarairahi vipanerechaya tayehe eta tájiparacana, tamaeperajisira eta víachanevana. Tétavicavavare eta tapamisirahavihi vicha eta tamauriqueneana. Puitisera nutuparacahe: Ínajicapa tamutu eta júcana. Ecasamureyareva eta máechajiriruva ema Viya eta ímitucasivanahi. Yátupina esuapa. Jéhevare, éta ticuchucuhayare eta íachanevana.

²² Ítauchayare eta tametarapianahi eta máechajiriruvana ema Viya. Vahi tacuejecapava eta epanereruana, machu ímijachapuca taratarichuhi eta esamararasirahi.

²³ Vahi ecucuti nácani nasamarararuchucha, tásiha vahi náitauchahini eta tavanairipihi, tímicitijiricavaipa nácani tímacunachavanahi te espejo.

²⁴ Tásihasera, vahi nasipacahini eta náimahaquenehi nachipequivahi. Tásiha, tiyananavanepa, náemitisicavanepa.

²⁵ Étiserá ecutiyare ena natupiruvanahi eta nasamirahi táuriva eta yátupiqueneana vímiturapiana tásihaqueneanahi me Viáquenu. Vahi ecuemitisica. Tásiha, ítucayare enerejica eta táuriqueneana, esuapayareva eta ímitucasiqueneanahi. Tásiha, tétavicavaya eta iúrivaya táicha.

²⁶ Nararihipuca nácani tímijachavanahi religiósoana. Téhesera vahi náituchahini ticaratajacachavana, ena nani téjecapavanahi eta napanereruana. Tájinachucha vahi émainahini nasuapahini ema Viya.

²⁷ Vítisera, eta vítauchirahi eta yátupiquene téhicacare, te vivaraha tájina véchajisicarevaina te mamirahu ema Tata Vicaiyaquene, tatuparacahi vijapanuyare vítátiyare ena amaperuana váchachichana énapa ena náepenaimaqueneana tayehe eta nacamunuiravanahi. Tituparacahavihivare vahi víchaimahi eta pecatuana te juca apaquehe.

2

Nácuticaca ejacapa ena achaneana

¹ Nuparapeneveana, éti éhicanahi ema máitupajijihaquenehi Viáquenu Jesucristo, vahi táurichahini enerejicavaca ena echamuriana ejacapaqueneanaya.

² Étaripa te natiarihinapuca nácani nasiapauchahe te iúrujisirarevana íchirana eta culto, vahi macarichuimahi tiuri eta ejacapiraya mácani tíurinahapahi eta macamuirihairahi, ticasurutijapahipuca eta oro. Énerichuvare ejacapayare mácani paure, tévichijihapahípuca.

³⁻⁴ Taicha téjecapavahi eta epanereruana, te macarichuhi mácani tíurinamuirihapahi, échapajiricahi eta ecaejasirahi, mácanisera paure, te váipapuca ecuechajiricahi, váipapucaini ecuijaracahi eta máejasiha, tasapiha evanecainapapuca téjahapaica. Éti, vaipa étupicavaimahi eta juca enerejisiravacaichucha nácani ejacapaqueneanaya.

⁵ Némunarqueneana nuparapeneveana, esamanuchaha. Ena páureanahi te juca apaquehe, majacapavacahi ema Viya, táichavenehi eta nacasiñairahi ema Machicha. Éna, tíapajupananahi eta náurivaya taicha ena ticaicuchianahi eta mávasa ema Viya taicha machaneranahi. Nacachaneyarehi ena apamuriana témunacanahi éma.

⁶ Étiserá evarahapa ímitsirihavaca ena páureana, nasapiha échapajiricahi ena rícoana. Ticutiripa vahi ímativacahini eta náemeratasiraheripa, te apaesachichapa éjecapava.

⁷ Ticutiripavare vahi ímativacahini eta nacaecahirahi ema Cristo, nacaecahivivare eta íámirahi eta májare tacapichuquenehi.

⁸ Puitisera éti, yátupiyare ítaucha eta ticunachacarepanaquenehi mavanairipi ema Viya tayehe eta Sagrada Escritura. Ani tacahehi: “Pémunacayare ema piparaepiya tácuti eta pémunasiravahi píti”.

⁹ Téhesera enerejicaichucha nácani émunaruanahi, ecapecaturaichucha eta emasuapirahi eta mavanairipi ema Viya, éta tiviuachaheya.

¹⁰ Taicha te natiarihipuca nácani náitaucha tamutuyaréni eta vanairipiana, téhesera apaesarichu eta néjecapiravahi, étapa tiviucahi eta náicuñayare, tímicitijiricavahi vahi náitauchahini.

¹¹ Taicha ema Viya, ani tacahehi eta mavanairipihi: “Vahi picuveha esu apana esena. Váhivare picucapareca”. Píti, te váhipuca pivehahini esu apana esena, picaparechisera rapuca, piáviraichuhi picaviurevahi.

¹²Iúrihainehi ejacaparalihini nayehe namutu, táurihini eta échajirisiravana. Vahi ecuemitisica eta tatiarhiraya eta sache ecayaserehiraya tayehe eta juca vanairipiana. Étara tétupirichavíhi.

¹³Taicha nácani majapanurairahanahi nayehe nácani apamuriana, tájinavare najapanucarevaimahi te nacayaserehipa. Nácanisera tijapanurahianahi, ichape eta najacapacarevanaya me Viya te jena sáchehare.

Vímerecaya eta visuapajiraivaya étapa eta vicaemataneasiraya ema Viya

¹⁴Nuparapenaveana, nuvaraha níminecapaequenehaheyare. Te natiarihinapapuca nácani nacahehi: “Núti nusuapa ema Viáquenu”, tásiha vahi náichahini eta táuriqueneanahi, vahi tisuapacare eta náechajiriruvahi. Németeaca vahi yátupinahini nasuapahini ema Viáquenu.

¹⁵Nuvaraha nímicutichinaheyare eta juca. Te mararhipuca mácani vichamuri ticamunuvahi eta mamuiriharapiyare, manicaquenerepipuca te sácheana.

¹⁶Tásiha, mácani echamurihi tépiyacavahipuca tijapanurahíhi. Máichahipuca: “Páurevisami piti, te picaserechahipuca, pépacuchava. Te pécuhapuca, pinica”. Tásihase, te vahi máijaracahini eta macamunuquenehi, tamapurujichucha eta máichirahi.

¹⁷Ene vicahe viti véhicana ema Viáquenu. Te vahi víchahini eta táuriqueneana, tamapurujichucha eta véhisirahi, vaipa tásuapacarehini.

¹⁸Tiuri puiti, németeaca etiarihiyarepuca eti épuruyare eta juca numetaruheanahi. Áninapapuca ecaheyare: “Tarataripa eta vicasíñavairahi me Viya. Vaipa étaparacaina víchahini jácani apamuriana táuriqueneana” ecáhénapapuca. Nútisera numetacahe: Vahi tisuapacaremahi eta ecasíñavairahiji, te vahi íchahini eta táuriqueneana. Taicha eta íchirahi eta táuriqueneana, étapa tímereuchaheya eta yátupirahi eta ecasíñavairahi mayehe ema Viya.

¹⁹Éti ímijachaipapuca tarataripahi ticuchuchahaheyare eta esuapirahi eta matiaririrahi émanarichu ema Viya. Táitaurevaquene esuapahi eta matiaririrahi ema Viya. Apanasica ena éreanana nasuapahivare eta matiaririrahi ema Viya. Tayanapane eta nasuapirahi, váhiquene tíuchuchanaimahi éna. Énaripa, tiyayacareanahi éna te nasama eta máijare ema Viya.

²⁰¿Vuíchahacaru ácaicutiarahini? Tiuri puiti, níminecapaequenehaheyare, taicha nuvaraha ácaicutiara: Tacamunuhi íchayare eta táuriqueneana tacachaneyarehi eta ecasíñavairahi. Tamapurujicha eta ecasíñavairahi te vahi ecuquichahini eta táuriqueneana.

²¹Nuvaraha némechahe mayehe ema viáchucaini Abraham. Eta acane, émaripa macaitsamarajíhi ema Viya, te yátupihipuca eta masuapajiraiva. Mavanecahi máechatinucayarehi ema machicha Isaac. Tacahe, ema Abraham, máechatinucayarepaini ema machicha, máimeresirayarehi eta masuapajiraivahi yátupi. Eta tacahe, ema Abraham, tétavicavahi eta majacapacarevahi mayehe ema Viya.

²²Étara ícutiaraya eta juca masuapajiraivahi yátupi ema Abraham. Vahi máeñamahini ema machicha eta mavarairahi máimerecyare yátupíhi eta masuapirahi.

²³Taicha eta táechajiriruvahi eta Sagrada Escritura, ani tacahehi: “Ema Abraham masuapahi ema Viya. Tásiha, tétavicavainehi eta majacapacarevahi ema Abraham. Éna, máemunacasarehi ema Viya”.

²⁴Ácaicutiara yátupina eta juca. Viti achaneana vijacapacare me Viya táichavene eta vímeresira eta visuapirahi. Vahi tarataha eta vicaheira: “Núti nusuapa ema Viya”.

²⁵Níminecapaequenehahe eta acane tacahevare eta súchucuirahi esu esena túhusiquenénihí ticaijaru Rahab. Ésu, ticatiuchavacahi ena vanairucanahi mayehe ema víyaraha Josué, suímicatacavachivare eta náitujisiravayarehi tijunana nayehe ena ticaratacanayarehini. Eta máimairahi ema Viya eta juca suíchirahi, ichaperinehivare eta majacapirahi ésu.

²⁶Eta juca tacutihí eta viáquehe te tajunijica eta viáchaneva, enevanerinehi tésamiricava eta viáquehe, tépenavaneyarehi. Ene tacahehi eta visuapajiraiva. Títavavare te vaipa vímeracahi eta viúrivahi, víchirahi eta táuriqueneana.

3

Eta vijaca, tamutu tajarareca

¹⁻²Nuparapenaveana, yátupi vimutu véjecapava tayehe eta véchajisirana. Nájina émanaina vahi macuejecapavaini eta máechajisira. Te matiarihinaini mácani achane vahi macuejecapavaini, ichapehini eta macunachacarevainahini, taicha éna, yátupíhi eta máitupajijiasiravahi, máitucavare ticaratacava eta máquehe. Eta tacahe, nuvaraha nuconsejachahe: Tacamunu najaneacava muraca nácani náimereca eta navarairahi máestroanayarehi tayehe eta máimiturapiana ema Viáquenu. Échavayare eta vicayaserehirayarehi muraca me Viya viti máestroanahi.

³ Nuvaraha nímicutichinahe. Eta juca tímicutijiricavahi te vicapera eta cavayu: vinacapa eta freno, vichurujacachapa, viámapa te jácani vivarahaquene viámihia.

⁴ Tacutiquene eta ichape lancha, táevatajicaneni muraca eta técatícava, étapa eta tajunapira muraca eta une, taratahayarehisera táimitupirucha eta tayehe leme váhineni ichapenahini, ema piloto máimitupiruchayarehi te jácani mavarahaquene máimihayarepahi.

⁵⁻⁶ Ene tacahehi eta juca vijaca. Ánichicharichunéni tayehe eta viáquehe. Tasapihahisera táechajisihahi eta ichapequeneana. Tacutiquene eta yucu. Ánichicharichunéni eta táepanirava táijucha, taratahahisera táijucha eta ichapequene vámahí. Nácani achaneana te vahi náitucahini ticaratajacachavana, amairijipa tamutu eta náitaresira. Tífehicarehi najarareca ena nácani camuriana achaneana taicha eta náechajiririvanahi. Ena nani téchajisihanahi eta tauriqueneana, éna mávaháruanahi ema Váinaraji, téchahi eta infierno.

⁷ Ena achaneana narataha namansucha eta cáyureana étapa eta quichareana étapa eta táifehiqueneana sárareana tiávihana te apaquehe étapa te une.

⁸ Étasera eta jacare, nájina ticaratacaina, táechajisihayarehi eta tauriqueneana. Tacutihi eta jumare te nájina tiratahaimahi típuchaina, tiámahivare eta tacapasiravacayare ena achaneana.

⁹⁻¹⁰ Eta jacare, étarichuvare táuchusiha eta náechajiriruvana ena ticunachanayarehi ema Tata Vicaiyaquene. Ticunachacarehi eta juca. Váhisera ticunachacaremahi te tiúchuchahi eta jacare eta náumehaira ena nacutiqueneana achaneana naparaepíyanahi me Viya. Nuparapenaveana, tatuparacahi vahi eacacahihini ena ecutiqueneana tiámanahi eta macaquehera ema Viya.

¹¹ Tacutiquene eta une, te tipachinahi eta tajututurusirahi te apaquehe, vahi tjahúchavaimahi titsiriecava, táuchucapucaini tusucareamahini, ticheveamapuchahini.

¹² Tacutiquene vahi tiúchucaimahi eta aceite tayehe eta tahi eta yana. Étaripa eta narasa, vahi tiúchucaimahi eta tahi siñávehinahini. Ene tacahehi eta une, vahi tajututuruchahini te apaquehe eta tipachina une tachanepahipucaini eta ticheveama. Nuconsejachahe: Ecnachachucha. Vahi ecumehareca.

Te yátupihí eta véchemaraivahi, tatuparacahí víchayarehi eta táuriqueneana

¹³ Te natiarihinapuca te etaracu nácani náechemahahi tamutu, tatuparacahi náichayare eta táuriqueneana, yátupinavare eta namansuvayare. Étapa tímicaecherachayarehi eta náitusirahi.

¹⁴ Te etarihipuca eti ímjachavahi échemahahi tamutu, tásiha ecapinarurecarichuchasera te esamureana, evarahapa iápajupanavayarehi nayehe ena apamuriana eta ítupajijiasiravaya, vahi yátupinahini eta ítupajijiasiravainahini.

¹⁵ Eta juca échemaraivavacahi, vahi étainahini tásihaquenénahini me Viya. Tayehecucha te juca apaquehe tásihaquenechucha eta ne achaneana, máevaequeneruhi ema Váinaraji.

¹⁶ Taicha ena ticapinarujiricanahí téhajiricanapa. Vahi tácuticacahini eta napaneruana. Náicharichucha eta tájiparacana.

¹⁷ Nararihisera ena yátupiquenehi eta náechemaraiva, tásihaquenehi me Viya eta náitupajijiasiravanahi. Náimerecahi tativa tatupiruvahi eta napaneruhi. Táurivahivare eta náitaresira. Ticatiurahianahivare nayehe ena apamuriana. Tisamarahianavare. Tijapanurahianavare. Eta náichirahi eta táuriqueneana, ticajirahianahi. Nájina nanerejiuina. Tatupiruvahi eta náechajirisiravana.

¹⁸ Nácani ticatiurahianahi, náetupiricahi eta náitaresira ena apamuriana. Jéhesare, tájinasarepa náichiravainahi. Nanaquipaicahi eta táuriqueneana.

4

Ema Viya mavaraha vínajica eta tájiparacana

¹ Puítiripa, ¿tájaha tacayema eta éhajiricácahi? Éti ecuticacahi ena apamuriana eta ejamurairavanahi. Éta, timaurichahehi eta tájiparacana, étijivaichucha íchavahi.

² Éti ejamurachahi ecaimahaquene. Étasera emaitusiravahi, evarahapa ecapaca ena ticaimahaqueneanahi. Éti ecapinarurecachi. Éta emaitusiravahi, téhacacapa eta échajirisiravana; tásiha, éhacacauchapa. Nuconsejachahe: Eyaseaca ema Viya eta ecamunuqueneanahi.

³ Éti eyaseacahinéni éma, váhisera májjaracahehini, taicha vahi táetupicavahini eta eyasearapiána, étachucha eta tajamurachaqueneanahi eta iáquehe.

⁴ ¡Tétavicavapa eta ematupisiravahi eti achaneana! ¡Éjcapavahi ichape mayehe ema Viya! Evarahapa éhica eta nayeherepianahi ena achaneana masupajirairahanahi. Tihapapicahepa eta tájiparacana te juca apaquehe. Masapihapa epuruyarehi ema Viya, ecatianacapa éma.

⁵ Éti ímjachaipapuca táepiyevahi eta táechajiriruvahi eta Sagrada Escritura. Ani tacahehi: “Eta mávhásirahavihi ema Espíritu Santo, téñmahaviripa vahi vihapasamurechaimahi tayehe eta tamauriqueneana”.

⁶ Étaripa eta máemunasirahavihi ema Viya, tétumechahavihi, mamavarairahi víchahini eta tamauriqueneanahi. Taicha ánivare tacahe eta Sagrada Escritura: “Ema Viya macatianacavaca ena tisiñavavairicana. Máemunacavacahisera máimicatavacahivare ena mánsuana”.

⁷ Eta tacahe, esuapa yátupina ema Viya. Ecanaraya ema Váinaraji, te mavaraha mavayucache. Jéhesare, tijuníjicahénapa éma.

⁸ Puiti, yátupina eta epauchirahi ema Viya. Tásiha, ema apanavare tipauchahayare. Ínjajicapa puiti eta íchira eta tamauriqueneana. Émitiscainapa eta ejamurachira eta tájiparacana te esamureana. Taicha éhicasareipa ema Viya. Vaipa ecupanerecha eta nayeherepiana ena achaneana masupajirairahana te juca apaquehe.

⁹ Puiti, éneuchava me Viya. Íyauchava táichavenehi eta éjcapiravanahi. Vaipa ecuecarairicava, vaipa ecurisamure eta íchira eta tamauriqueneana. Ácatisamurevasera táichavenehi eta tamutu eta tamauriqueneana íchaqueneanahi.

¹⁰ Ecajapanuravayare eta éneuchiravayare te mamirahu ema Viáquenu. Tásiha, tétavicavayare eta ejacapacarevainapa mayehe ema Viya.

Vahi picucaecahi ema pichamuri

¹¹ Nuparapenaveana, vahi ecuechajica mayehe mácani echamurihi. Taicha mácani téchajicahi mayehe mácani machamuri, macacahípucapuca, mavaraha máicuñaca mácani machamuri. Émaripa máepururipahi eta mavanairipi ema Viya. Nuvaraha numetacahe: Te épuruhi éti eta mavanairipi ema Viya, eta tímicaecherachahehi eta emasupirahi éma.

¹² Ema Viya, émahí ticavanairipihí. Macarichu éma tatuparacahí téchayarehi te tíurihípucapuca eta náichaqueneana ena achaneana. Téchayarehivare eta máicuñasiravacahi ena téjcapavanahi. Vahi étina tatuparacahéhi ícuñacahini ena echamuriana.

Vahi vítina vecha eta vítaresira

¹³ Esamanuchaha. Vahi táuricahini ácahehíni: “Puiti juca sácheana, achichupuca, nuyanaya te apana avasare. Níjararecaya eta nucayehequeneana. Tíámainucava nuchava te apana año. Ichapeyare eta nunganareruyare”.

¹⁴ Éti, vahi échahini tájahapuca eta íchavaquenévaya achichu. Taicha vahi evachareruina eta ítaresira. Tacutichucha eta iyaru. Ánipirichu eta tacaecheraira. Tásiha, témitiacaripavare.

¹⁵ Íúrihainehi ácahehíni: “Ema Viya téchahavihi eta vítaresira. Te mavaraha éma, vítauchayarehi eta juca vipanereruhi” ácahehíni.

¹⁶ Étisera, tétavicavapa eta ecasiñavavaisirahi eta échajisirana. Ticutirinehi étinahini échinavahini eta ítaresirana. Vahi táurihini eta ecasiñavavaisirahi.

¹⁷ Némechahe eta juca yátupiquenehi: Mácani máimatihí eta macatuparahairahi máichaya eta táuriqueneana, tásiha te vahi máitauchahini máíchahini, ticapecaturaipahi te mamirahu ema Viya.

5

Eta náichavaquenévaya ena rícoana

¹ Tiuri puiti, nuvaraha numetacahe eta náicharacavaya ena rícoqueneana. Éna, ichape eta nacatajivairayare. Náuríhaipa náiyahasamureripahini taicha eta nacatajivairaya.

² Taicha títavainapa eta náimahaqueneana. Étaripa eta nacamuirihairana eta táurinaqueneana, tanicacamecainapa eta cachusiri.

³ Tájnapa táichaquenemahi eta naplataneana étapa eta nayehe oro. Ichape eta nacatajivairaya, taicha eta náéñamirahi, tájina náimicatarapínahini. Étainapa tímicuñacavacayare te jena yucu te táitecapapa eta jena sácheyare.

⁴ Nararihi ena nani rícoqueneana, ichape eta navayuasiravacahi eta navachachirahi ena ticaemataneacanahi eta nayehe. Tatiaríhiyaresera eta sácheyare táitecapauchayare eta náicuñayare, taicha ema Viya máimarahacahí tamutu, masamahivare eta nayaseserepianahi ena páureanasami músuana.

⁵ Ena rícoana puiti te juca apaquehe, tétavicavahi eta náuritaesirahi. Tamutuhi nanica eta táurinisiqueneana, tísatuheherecanahi. Tésinanacavanahi nacuti eta cuchi te náesinacha.

Éna, tñjahúchavayare eta náepenirayare, nacutiyare eta tájahúchirava nacapaca eta cuchi náesinaruhi.

⁶ Tacutiquene náimicaviurehi náimicapacavare ena matapiravareanahi, náimipanapa eta namaitusirahi tiácapauchavana nacatiuchavahini.

Vicamichayare tamutu, taicha táetumehahavi eta vicuchapirahi eta machavirayare ema Viáquenu

⁷ Étiserá, nuparapeanaveana, ecamichayare tamutu, táchavenehi eta ecuchapirahi eta machavirayare ema Viáquenu. Ecutiyare mácani achane ticaematanerahi. Macamichahi tamutu eta macatajivairana. Tiámainucava te tiúchucuhapa eta máevaru, mapaenumavapa majacapa eta macuchapaquenehi máevaraqui.

⁸ Ene ecaheyare éti, yátupina ecamicha tamutu, váhivare ecuinajicava eta juca éhiruhi. Ecuhapavachucha, taicha tiánehipa eta máitesirayare ema Viáquenu.

⁹ Nuparapenaveana, vahi ecuquicha eta tájiparacana nayehe ena echamuriana. Váhivare ecumeteaca éna, apaesa tacuija eta táimicatsiriacahe te ecayaseserehipa te mamirahu ema Viya. Écharichuhi éti eta tánehirapa eta máuchujisirayare ema Juez, ecayaseserehinapa.

¹⁰ Nuparapenavechichana, nuvaraha ácutini ena profetanaini eta nacamichirahi tamutu eta nacatajivairahi, táchavenehi eta nacametarairuirahi te májare ema Viáquenu.

¹¹ Némechahe: Ichape eta nacunachacarevahi eta viyehé nácani ticamichanahi eta nátajivanahi. Écharichuhi eta macamichirahi ema víyahaini Job. Échahivare eta táuriquenehi májharacasíhi me Viáquenu. Taicha tétavicavahi eta majapanuraivahi ema Viáquenu.

¹² Tacutiquene nutuparacahecha éti nuparapenaveana: Te ecayaseserehipuca, vahi ecuquicha eta juramento te májare ema Viya, ema tépiyacahi eta anuma étapa eta juca apaquehe. Váhiquene ecuquicha eta juramento. Átupiruvachucha te itauchayarepuca, “Nítauchayare” ácahepa. Téhesera váhipuca, étupiruvayare “Vahi nítauchaimahi” ácahepa. Apaesa tacuija taviuchahe mayehe ema Viya.

Tatuparaca eyujarauchacacayare

¹³ Te etiarihinapuca éti ecatajivahi, tatuparacahi éneuchavayare me Viya. Te etiarihinapuca eti iúrisamureanahi, tatuparacahi ejira eta alabanza.

¹⁴ Téhevale etiarihinapuca eti ecajumanahi, ímichuhayare ena víyacarana vichamuriana apaesa nayajisicahe eta aceite, te májare ema Viáquenu. Tásiha, tiyujarauchaheanayare.

¹⁵ Jéhesare, tisamacareyarehi eta nayaseasirana, táchavenehi eta nacasiñairava me Viya. Tásiha, ema Viáquenu macanaracayarehi eti ecajumaquenehi. Te étapuca tiviucahehi eta epecaturana, macaepahayareva ema Viya eta epecaturana.

¹⁶ Eta tacahe, te tatiarihipuca eta éjecapiravanahi mayehe ema echamuri, eyaseacayare maperdonachahe. Tásiha, eyaseuchacacayare te eyujaraca eta enarasiraina. Taicha tétavicavahi eta tasamacarevahi eta nayujaracasa ena matapiravareana.

¹⁷ Émaripa ema vicutiquenéni achane víyahaini profetaini Elías, te tiyujaracapa éma, tiyaseserecapa vahi tacuquiva. Tisamacarehi éma. Vaipa taquivahini. Mápana año, saisi caje eta tamajinairahi tiquiva.

¹⁸ Tásiha, tiápechavavarepa tiyujaracahi. Tiyaseserecapa táemiricahini eta tiquiva. Tiquivavarepa. Tacahe, tiúrinainehi eta evaraquiana te apaquehe.

¹⁹⁻²⁰ Nuparapenavechichana, te natiarihinapuca nácani vichamuriana téjecapavanahi tayehe eta yátupiqueneana, eti ecatuparaha iúrichavacayarehi éna, econsejachavacayare apaesa nachava éna, náinajicahini eta náejecapiravana. Tétavicavahi eta táurivahi eta iturusiraina eta nachavira, taicha táemesiava eta ecuchucuiravacayare tayehe eta náicuñayarehini, taicha eta táemesiavahi eta táepahairapa eta camuriquenehi eta napecaturana.

Tamu tupa.

Eta macartane ema Apóstole Pedro, ticajare 1 PEDRO

¹ Núti Pedro, mayehenu apóstole ema Viáquenu Jesucristo. Nucajurehe eta juca nucartane eti nuchamuriana éjanerepairuanahi ecaquijiqueneanahi tayehe eta apana avasareana: eti iávihanahi te provincia Ponto, eti iávihanahi te Galacia, eti iávihanahi te Capadocia, eti iávihanahi te Asia, étipa eti iávihanahi te Bitinia.

² Emutu eti, yátupiquenehi eta manerejisirahehi ema Tata Vicaiyaquene taicha tacahehi eta mapanereruhi acane eta táepaniravahi. Émaripa ema Espiritu Santo, tiávahácheripa máepachiasirahehi eta epecaturana eta te máitine ema Jesucristo, máitsivachinahehivare eta itaresirana, máimicatasirahehivare eta esuapajiraivahi me Viya. Puiti, nuvaraha tajurucaini eta ecaicuterairra eta máemunasirahehi ema Viya; tájinavare tahapapiricahini eta táurivahi eta epanereruana.

Vijacapyare eta vícuchihi te anuma te tauri eta vítaresiraina

³⁻⁴ Tétavicavahi eta vicunachirahi ema Viya, Macaiyaquene ema Viáquenu Jesucristo. Tétavicavahi eta majapanuirahavihi, vijacapacarehi mayehe eta macachichairahaviripa. Tásiha, viratahahi vicamichahi tamutu eta viátajivana te juca vítaresirana taicha vicuchapahi eta sácheyare visiapaya eta mávasa ema Viya. Máitavacacayare eta vítaresirayare, táichavenehi eta máechepusirahi ema Machicha Jesucristo te máecari. Ánaqui, tájinapa ticapacahemahi, váipavare íchaimahi eta tamauriqueneana. Máitavacacayare eta iúrisamurereasiravanayare.

⁵ Puítisera, tétavicavahi eta máitupajijiasiravahi ema Viya eta majaneasirahehi, táichavenehi eta ecasiñavairahi mayehe. Taicha mavaraha ticuchucuhahayare te jena sache táepaniravayare eta viúritaresiraya.

⁶ Puiti, apanapaneyarechaha eta ecatajivairayarechaha. Nucasíñavahisera eyehe éti, vahi ecainajiruvaimahi. Eta ecasiñavairahi me Viya, evapinavaichucha eta ecamichirahi tamutu, taicha ímatihí vaipa táunaimahi eta ecatajivairaya.

⁷ Ema Viya máisapahi eta juca ecatajivairana, mavarairahi ímereuchavayare eta yátupiquenehi eta ecasiñavairahi eta mayehe. Ecutiyare eta oro te nacaitsamaraji te yucu te yátupihipuca étaquenehi. Étisera étaviviriacahi eta tatumeva eta oro, taicha eta oro titavayarehi, témitiacayarehi. Te vahi ecainajiruva eta ecasiñavairahi mayehe ema Viáquenu, tétavicavayare eta ecunachacarevayarehi mayehe éma eta machimampirahayare te machava.

⁸⁻⁹ Éti, víuchaha ímatihini eta mamira ema Viáquenu. Émunacahisera éma. Ichapehivare eta ecasiñavairahi eta mayehe. Tásiha, ichapeyarehiva eta iúrisamurevaya, tájina eviyaimahi ácayemahini eta ecunachiraya éma, te jena sache iúchucuhainapa eta itaresiraya máichecuarquirenapa. Étasera eta táitsivahi eta ecasiñavairahi mayehe ema Viáquenu.

¹⁰⁻¹¹ Eta juca viúchucuirayare, acaneripahi eta tacaecherairahi. Énaripa ena víyarahainaini profetanaini nájuequeneharipa tayehe eta Sagrada Escritura eta máitesirayarehi ema ticuchucuhahaviyarehi. Émaripa ema Espiritu Santo máitametacavacahi éna eta macatajivairayarehi éma Cristo étapa eta machavirayare tayehe eta táurinaquenehi mávasa. Énasera ena profetana vahi náimatimahi tamutu. Navarahahi náimatiyare ¿nájahapuca ema máiteruyarehi? ¿Tájahapuca eta májareya? ¿Tájamuhuyarepuca eta máimeresiravaya?

¹² Émasera ema Espiritu Santo (ema másihaquenehi te anuma), mametacavacapa vahi náimahaimahi ema Cristo, taicha camuriyarehi eta áñoana eta máitecapiraya. Vítipasera puiti víti vítareuanáichaha, vítipa vímatihí éma. Te vicametarairupa mayehe ema Jesucristo, ema Espiritu Santo titametacahehi te esamureana. ¡Tétavicavayare eta viúricacarevayare víti, te viúchucuhapa! Énaripa ena ángeleana, ichape navarahahi náimatihini tájahapuca táichararacavayare eta viúricacarevayare.

Ema Viya, eta máichuirahavihi, mavarahahi tépachinachahaviyare eta vítaresirayare

¹³ Eta tacahe, ecaratacava tayehe eta epanereruana, táurivainavare eta itaresiraya. Ecasiñavayare eta ejacapirayare eta ícuchihi me Viya, májjararuheyare te machavapa ema Viáquenu Jesucristo.

¹⁴ Ímerecavayareva eta machichairahahi, esuapajirahiyare. Vaipa ecuquicha eta íchaqueneanaini eyeherepianaini cape juca te víuchaha ímatihini ema Viya.

¹⁵ Puítisera, sánturuhahénapa eta itaresirayare. Taicha ema tíchuhahehi, tétavicavahi eta masantuvahi.

¹⁶ Taicha ema Viya, ani macahehi eta máechajiriruvahi tayehe eta Sagrada Escritura: “Nuvaraha sántuhéna eta itaresiraina, taicha núti, yátupiquenehi eta nusantuva”.

¹⁷ Te eyujarasirana éti, ani ecahehi: “Tata Vicaiyaquene” ecahehi mayehe ema Viya. Ímatiyare yátupi éma eta nájinairahi manerejiruina, tacutiquene eta máemecharesirahi ena téjecapavana, máitsivachavacahivare nácani tíchanahi eta táuriqueneana. Tacahe, yátupina eta epicauchiraina éma tamutu sácheana puiti juca itaresiraichaha te juca apaquehe.

¹⁸ Ema Viáquenu Jesucristo ticuchucuhaheripa tayehe eta tamaurivainihi eta itaresirana, iámapiricaichaha eta nayeherepianaini ena iáchucanaveánaini. Écharichuhi éti eta mavacharesirahehi ema Cristo eta iúchucuirahi, váhisera te plátainahini, óroinahipucaini.

¹⁹ Étasera eta máitine máepusairuhi éma eta mavacharesirahehi, étivenehi ímijararecahi éma, cútiripa te cájararecasi eta uvesa matapiravarequenehi.

²⁰ Acane te tépanavainapa eta apaquehe ema Viáquenu Jesucristo ticatuparahaipa tacahe-yarehi eta máepeniraya. Váhisera táitachavavanehini. Tapaenumavapa puiti, títauchavahi eta étavenepa eta iúchucuirayarehi éti.

²¹ Énerichu táichavenehi eta éhisirahi ema Cristo, ímatipa puiti ema Viya, ema ticaeche-pucahi ema Machicha te máecari. Puiticha téjajaripa éma tayehe eta mávacure te anuma. Eta tacahe, tétavicavainehi eta ecasiñavairahi mayehe éma, ecuchapavaipa eta mayehe.

²² Puiti tipachinaripa eta iáchanevana táichavenehi eta esuapirahi eta yátupiquene máimiturapiana ema Jesucristo, máimitusiraheripa ema Espíritu Santo. Eta tacahe, ímerezavainapa puiti yátupina eta émunasiracacahi nayehe ena echamuriana. Evapinavavare eta te esamureana eta émunasiracacairahi.

²³ Cape juca, eta itaresirahi, tájina vahi íturuequenehahini eta iúchucuiraya. Puitipasera machichaheripahi ema Viya. Ítsivachaipahi eta itaresirainihi eta esuapirahi eta máechajiriruva ema Viya. Éta ticaitarecaheyarehi; jéhevare eta máitavacacahi.

²⁴ Eta Sagrada Escritura, ani tacahehi eta táechajiriruva, májurehi ema víyarahaini profeta Isaías: “Eta vítaresirahi víti achaneanasami te juca apaquehe, vicutíhi eta táimarusira eta muiji. Tijurucapa, tásiha tiájijipa. Eta vitumevainihi étape eta vítupajjiasiravainihi, títavayare tacutíhi eta flore: tépunehapa, tíjyupa, témiricapa. Étasera eta máechajiriruva ema Viya, jéhevare eta máitavacacahi” tacahepa.

²⁵ Eta juca máechajiriruva ema Viya, étaquenehi eta emetacasivanahi apaesa táuripa eta éhisirahi.

2

¹ Eta tacahe, támutupa ínajica eta evainararajivanainihi, tamutu eta ecaetemaraivainihi, eta apiipiemaírahénihí, eta ecapinaruraivainihi, étapa eta échajivanainihi.

²⁻³ Puiti, eta ímatiraripahi yátupi eta máurivahi ema Viya, tíjurucainapa puiti eta esuapirayare eta máechajiriruvana. Ecutinapa eta najurusira ena amuyana. Ánipichichapachu téchuhana, tiájicanaripavare te nacheneana ena náenana. Ene ecahehi éti, yátupina eta evarairaya ecaravahu eta máechajiriruva ema Viya, apaesa tiápajucavaya eta ímatiequenehairaina eta mapaneruana.

Ema Cristo macutíhi eta mari máepenacacahi

⁴ Yátupina eta ecasiñavaira me Viáquenu, taicha tétavicavahi eta macasiñacarevahi, macuti eta mari máepenacacahi. Éma, náepuruquenehi ena achaneana. Manerejiruhisera ema Viya taicha tétavicavahi eta macunachacarevahi mayehe.

⁵ Éneripa ecahehi éti, ecutiripa eta márijahiana máepenacacahi. Tacahe puiti, táuripa eta ecachaneracainapa. Macarichu ema Viya ema ecaemataneacaya. Tivayuaachaeya eta esuapajiraivaya eta májjarasiraheyarehi eta ématanepachuyare. Énerichuvare ecaturarahaipa sántuhénapa. Ecutiyare ena tiyujaracarahiana eta te Templo. Ecaturarahaipavare eyaseurahiya nayehe ena echamuriana. Étape eta ecamavahura me Viya, étaripa eta esuapajiraivahi, eta ehasulupayachirahi ema Viya, étapa eta ecunachirahi éma. Tamutu eta juca, ecurisamurechayare éma, taicha émarichuhi ema Jesucristo ticaitecapinaheyarehi me Viya.

⁶ Eta Sagrada Escritura, ani tacahe eta máechajiriruvahi ema Viya: “Núti névatacachi ema Nuchicha Cristo eta eyehe. Taicha nunerejiruhi éma eta macurujisirayarehi ena nuchanerana návaháruanaya. Tétavicavahi eta macunachacarevahi eta nuyehe. Nácani ticasínavanahi eta mayehe ema nuvaneruyare, vahi máinajiacavacaimahi” macahepa ema Viya.

⁷ Éti, tétavicavahi eta macunachacarevahi ema Cristo eta eyehe, taicha yátupihí eta ecasiñairahí éma. Énasera nácani masuapajirairahanahi mayehe, náepuruhi éma, nacuti eta tépiyarecarahiana eta Templo, eta náepuruirahi eta mari ticunacharepanayare eta te peti.

⁸ Nácani masuapajirairahanahi eta máechajiriruvana ema Viya, tacutiqueneyarehi náepuruhi ema mavaneruhi ema Viya. Nacutihi mácani achane máquipairuhi táichavenehi eta macayuteturahi. Tisemahi, mavaraha térajicavayare eta tímicyutetuchahi.

Ena machanerana ema Viya

⁹ Étiserá manerejiruberipa ema Viya, machichaheripa. Tachichaheripavare eta mávasa. Sántuhepa máicha. Tituparaca heripavare éma eyaseuchinavacayare ena achaneana eta mayehe. Majupahahehivare ema Rey. Puiti émapa macarichuhi téchahehi taicha mavecuhagueneheripahi tayehe eta timapicu, tímisiapaheripa tayehe eta táuricacarequene majaraiva éma, apaesa emetajiricaya eta táuricacarequeneana máematanerepi ema Viya.

¹⁰ Cape juca itaresirahi éti, vuichaha ímatihini ema Viya. Eyerehichaha éma, vuichaha échahini eta majapanuirahéhi éma. Puítiserá evapinavahi eta ímatirahi yátupí eta majapanuirahéhi, taicha machaneraheripa.

Yátupina eta ecamataneasirayare ema Viya eta itaresiraya

¹¹ Némunarúqueneana nuparapenaveana, puiti éti, tímicitijiricavaichaha estranjerohehi taicha íáviharichaha te juca náquehe. Váipasera áyeremahi eta eyanirayare eta íávasayare te anuma. Eta tacahe, nuconsejachahe: Vaipa táurichahini íchahini eta tajamurachaqueneana eta íáqueheana. Taicha tétavicavahi eta tavarairahi tácamitequeneha eta íáchanevana.

¹² Íúrihisera eta ecachanerarichaha ena achaneana te juca apaquehe máímatirahanahi ema Viya. Tayanapanerine ticitianacaheana, téchejicanahi eta eyehe ecutihí ena máuritarerisrana náicha. Ímerecayaresera eta iúrivahi apaesa éna nacunachayare ema Viya, navarahainapa náehica ema Cristo taicha náimahahi eta táurivahi eta itaresiranahi.

¹³⁻¹⁴ Táichavenenahi eta éhisirahi ema Viáquenu, ímerecayareva eta esuapajiraiva mayehe ema Emperador Presidente, énapa ena prefectoana, énapa namutu ena apamuriana tuparairucana tanacaqueneanahi eta ley. Éna, títatuparahanahi náicuñacavacayare ena achaneana váinarajiqueneana, téjecapavanahi. Énasera ena achaneana tíuriana títaurahianahi, ticaemunacasianayarehi.

¹⁵ Taicha ema Viya, éta mavarahahi íchayare eta táuriqueneana apaesa ecamatinacaya ena máecharaireana nácani téchajicanahi eta eyehe.

¹⁶ Yátupihí vaipa tapamiruhénahi éti eta esuapirahi eta mavanairipianaini ema Moisés eta iúchucuirayare. Váhisera ecuyunaca eta vahí tapamisirahenahini, táetseraruina icha eta tauriqueneana. Esapíhasera ímerecavayare yátupihí eta mavanarählerahi ema Viya.

¹⁷ Epicaurahiyare nayehe namutu ena achaneana. Émunajiricavayare nayehe ena vichamuriana. Ímerecapa eta epicauchirahi ema Viya. Epicauchayahivare ema Emperador Presidente.

Vácuti ema Jesucristo eta macamichirahi eta mátajivana

¹⁸ Éti, te ecamatanerecapuca, esuapajirahiyare, epicauchayareva nácani íáquenuanahi. Vahí nacucarichu esupa nácani tíuriana achaneana. Tácuticaca eta epicauchiraina nácani váinarajianahi.

¹⁹ Te ecatajiva náicha, tájinapa eta eviurevanainahini, tétavicavahi eta ecunachacarevaya me Viya te ecamichahi tamutu, taicha evarahahi itaucha eta mavarahaquenehi ema Viya.

²⁰ Téhesera náicuñacahepuca táichavenénahi eta íchirahi eta tauriqueneana, tájina ecunachacarevaimahi eta ecamichirahi, taicha tatupiruvahi eta ecaicuñairayare. Téhesera táimicuñacahepuca eta íchirahi eta táuriqueneana, ecamichirahi eta náichirahéhi, tétavicava eta ecunachacarevaya te mampirahu ema Viya.

²¹ Taicha ema Viya, eta máichuirahéhi, mavarahahi ecutihyarehi ema Cristo eta macamichirahi tamutu eta mátajivana íchavenehi éti, mavarairahi ecaravahu eta máurivahi, ecutihyarehi éma eta macayehera paciencia.

²² Éma, tájinahineni maviurevainahini, mapecaturainahipucaini. Nájinavare macaetemaquenénahini.

²³ Te nacaetemajiricapa, éma, vahí mácapaemachavachahíni, macatitiemahipucaini eta náemecatativachirahi. Máechajichahisera ema Maiya, máimahainehi éma. Taicha yátupihí eta máicuñasiravacaya ena témecatativachanahi.

²⁴ Yátupihí ema Cristo ticaicuñahi víchavenehi víti eta vícuñayaréni vícuchinihi táichavenehi eta vípecaturana. Tétavicavahi eta mátajivana te máquehe eta náemetatasirahi eta te crusu. Macamichahisera tamutu, mavarahahi vaipa tacuvayucavahi eta pecatu, tatupiruvayahéhi eta vítaesiraina. Eta majarana, éta ticanaracaheyare.

²⁵ Eta ítasesirainihi acane éti, ecuti eta uvesa táemitiaru. Puítisera iávahácaripa ema Cristo, émapa tijaneacahehi, ticatiuchahehivare eta iáchanevana.

3

Tiúriyare eta náitasesirayare ena nacaimaqueneana

¹ Tacutiquene eti esenana ecaimaqueneana, epicauchayareva ena ímanaveana, apaesa mácani vahi masuapahini eta máéchajiriruvana ema Viáquenu, ecajimuyasamurechavaca táichavenénahi eta iúrivahi nayehe.

² Vaipa tácomesaimahi échajirica taicha náimahayare eta esuapajiraivahi nayehe, epicauchirahivare.

³⁻⁴ Ímerecayareva eta iúri va yátupiquenehi, tásihaquenehi te esamureana, tímicitijiricavahi eta iúrina eta emira. Tayanapanepuca ichanaruheripa, iúrinachavaya te esamureana. Evayuchahini eta étupisirava eta ésamirisirava. Eta juca, tétavicavahi eta ecunachacarehi mayehe ema Viya. Vahi étaparacaina eta evayuyujisirahipuca eta ecamuirihaira étapa eta ecatatasirana, váhivare étaina eta ecayehera oro.

⁵ Taicha acane ena vénarahana esenana náinapureanahi téhicanahi ema Viya, tacahehi eta náurinachiravahi eta náitasesirana, taicha yátupihí eta nacasiñavairahi mayehe ema Viya. Tásiha, tétavicavahi eta nasuapajiraivahi nayehe ena náimanaveana.

⁶ Ecutiyare esu vénaraha Sara. Suímerecachi eta susuapajiraiva mayehe ema suima Abraham, taicha ani sucahehi mayehe: “Náquenu eñi”. Tásiha éti, vahi ecupica eta esuapirahi ena ímanaveana. Ímereca yátupina eta iúrivahi nayehe.

⁷ Étipa ajairana ecayenaqueneana, eجانunayare ena eyenana. Ejaneacavare, échahi éna eta vahi túmenahini. Yátupinahisera eta émunasirahi éna, taicha ecuticacayare eta ejacapi-rayare eta ícuchihí eta ítasesiraya mayehe ema Viya te jena sáchezare. Te iuri nayehe, esamacareya te eyujaraca.

Tiúriyare eta ecamichirahi eta iátajivana táichavenénahi eta íchirahi eta táuriqueneana

⁸ Ámutu éti, ácuticacahi eta epanereruana. Eجانucaca, émunacacavare nayehe namutu ena echamuriana. Ecajirahi. Mánsuhénahi.

⁹ Tijuricati natupiacahepuca, náumehahe, váhisera ecujicapa. Eyaseacachucha ema Viya eta náuricacarevaina. Taicha mavaraha ema Viya vijapanurahiyarehi víti, vicutyare éma eta majapanuraivahi. Tatiarihiyare táitsivayare viyehe máicha.

¹⁰ Taicha ani tacahehi eta Salmo: “Mácani mavarahahi tiúritasesira te apaquehe, támutyare sácheana tiúriya, vahi téchajijicaimahi tivayurecaimahi. Váhivare ticaetemarecaimahi tépiyahirahimahi.

¹¹ Váhivare máichaimahi eta tauriqueneana. Máichahisera eta táuriqueneana. Macamitacahi eta semanereana.

¹² Ema Viya majaneaca ena náuriqueneana; tisamacareanahi eta nayujarasirana. Énasera ena tíchanahi eta tauriqueneana, macatianaruanahi éma” tacahepa eta Salmo.

¹³ Nájina tíjaracavaimahi titupiacahéana te náimahahi icha eta táuriqueneana.

¹⁴ Tijuricati natirihipuca ena ticitianacaheanahi táichavenehi eta táurivahi eta ítasesirahi, tásiha, tétavicavaya eta iúricacareva. Váhivare ecupica eta jácani náichirahépuca, váhivare iávamirahuimahi nayehe.

¹⁵ Íjaracavasera yátupi eta éhisira ema Viáquenu. Te nayaserecahepuca eta tacayema eta éhisirahi éma Jesucristo, tiúrihi eta ejicapiravacaya tayehe eta ecuchapaquene. Mánsuhéna éti, epicaurahivare.

¹⁶ Tátupiruva tamutu eta íchaqueneana, táurivare eta náimairahena namutu ena achaneana, apaesa ecamatinaca nácani téchajisiaracaheanahi eta táurivahi eta éhisirahi ema Jesucristo, nátsirihapaini eta náéchajjisira.

¹⁷ Te máisapahipuca ema Viya eta náemecatajivachirahe táichavenehi eta iúrivahi, tacunachacareyare mayehe eta ecamichira. Tájinasera ecunachacarevaimahi te ecaviurevahi.

¹⁸ Yátupi ema Cristo, étaherichuhi vímicapacahi táichavenehi eta vipecaturana. Éma, tétavicava eta máuriva, matapiravarehivare. Tijaracavahisera ticatajivaya víchavenehi víti váinarajiqueneana, mavarairahi tiámahavi mé Viya. Tépenahi eta máquehe, étasera eta máchaneva tímiyanavaichucha títareca.

¹⁹⁻²⁰ Tiyana varepa máejirapanavacahi eta náchanevana ena náepenaqueneanaini nacaerataqueneanahi te infierno. Ticametarairupa nayehe ena nani náepenaqueneana antivuanaini, machamurianaini ema víyarahaini Noé. Ichapehinenihí eta macamichiravacahi ema Viya eta macuchapiravacahi eta nasuapirainahini, vahi náeñamavahini eta náimairahi ema Noé máepiyasirahí eta ichape pacure. Tacahe, te témiricapa eta ichapequene tiquiva,

macarichuhi ema Noé ésupa esu mayena, énapa ena machichanaveana énapa ena nayenana, óchoanaichuhi ena tiúchucuhanahi tayehe eta ichapequene une.

²¹ Tiuri puiti, eta une ticaeririjicavacahi ena masuapajirairahana, nímicutichahehi eta vícachasi. Eta vicaicachasirahi te víjaracavapa véhica ema Jesucristo, vahi étaparacaina táepachiacahavimahini eta víáquehe. Étasera eta vicaicachasirahi, étapa tímereuchahavi eta maperdonachirahaviripa ema Viya tamutu eta vipecaturana. Máepachinchinahaviripavare eta víáchanevana, tájinapa taviuchahavihini, eta visamiravahi te mamirahu. Yátupina eta víúchucuirayare táichavenehi eta máechepusirahi te máecari ema Víáquenu Jesucristo.

²² Puiti éma, tiyanaripahi te anuma; téjacaripa te mavaure ema Maiya. Tétavicavahi eta masuapacarevahi nayehe namutu ena mayeheana ángeleana. Énapa ena váinarajiana, nasuapahivare.

4

Eti éhicanahi ema Víáquenu, tituparacahé ecaratacavayarehi apaesa vaipa íchaimahi eta tauriqueneana

¹ Ema Cristo, ichapemurihi eta macatajivairahi eta máepenirahi te crusu. Macamichahisera éma tamutu. Éti apanavare, ecutiyare éma. Vahi iávamirahumahi eta ecatajivairaya. Nímicutichaheyare eta mácani achane tépenapa, máinajicaripa eta pecatu.

² Eta tacahe éti, táichavenehi eta iúrujasirahi ema Jesucristo, tímicutijiricavaipa épenaipahini, inajicaripavare eta pecatu. Puiti eta tápechiravaripa táitarecahini eta iáchanevana, tatuparacahi ecaemataneacayare ema Viya. Vaipa tivayuacahémahi eta tajamuraraiva eta iáquehe.

³ Tamapurujipa eta táetavisiravaripa eta áñoana eta íchirahi eta tauriqueneana, taicha emaimatirahi ema Viya. Tamutuhi ícha eta tájiparacana, tivayuacahéhi eta tajamuraraiva eta iáquehe. Evayuchavahi eta esenamaréranahi étapa eta ecavaharasiva. Ecasamurehi eta íchira eta piesta. Íchahi eta tájiparacana tauriqueneana eta ejaneasirahi eta esiñarajiana achanemirana.

⁴ Puitisera éti, vaipa ecasiriqumirihini ena émunacasareana. Vaipa íchaimahi eta táíñemahiquene eta náitaresirahi. Ichapemurinehi eta náejiasirahehi. Tásiha, téchajicanapa eta eyehe.

⁵ Járापainapasera eta sáchezare nacayaseserehirayare te mamirahu ema Víáquenu, taicha éma yátupiquenehi eta macatuparahairahi eta vicayaseserehiraya víti, vítarerua-naichaha énapa ena náepenaqueneana.

⁶ Eta tacahe, ema Jesucristo ticametarairuhi nayehe ena náepenaqueneana, mavarairahi macuchucuhayare eta náchanevana apaesa nápechavahini náitareca te mamirahu ema Viya, tayanapane eta náche máteji táitavapapuca tayehe eta tacaecarasiyahi.

Yátupina eta émunajirisiracacaya, ítátijiricacayareva

⁷ Esamanuchaha, tiánehipa eta táitavirayare tamutu eta juca. Eta tacahe, ecaratacava eta epanereruana apaesa táurivaina eta eyujarasiranaya.

⁸ Táapajucavayarehisera ichape eta émunajirisiracacayare éti. Te yátupihí eta émunajirisiracacahí, máejerareya eta eperdonachiracacaya eta jácani éjecipiravana.

⁹ Evapinavaya eta ejacapiracacaya, te epaiyuachaca te epenana.

¹⁰ Ema Viya tjaracahévacaripa eta ítucaquenepachuhi. Tacahe, yátupina ítauchaya eta ecaemataneasiracacahi te mamirahu.

¹¹ Eti máimitureana ema Viya eta échajisira, ecuneuchava échajica yátupi eta máechajiriruvana éma. Eti ímicatarahiana ítátivaca ena echamuriana, vahi éñamaimahi eta etumeva májjararuhehi ema Viya. Étavenehi éhisirahi ema Víáquenu Jesucristo, tamutu tauri eta jácani íchaqueneana apaesa nacunacha ema Víáquenu namutu ena tímahaheana. Éma, ¡tétavicavahi eta macunachacarevahi! ¡Tétavicavahivare eta máitupajijiasiravahi eta máechirahavihí tiuri! ¡Máitavacacahivare eta véhisiraya éma! Amén.

Vahi ecuavamirahu eta ecatajivairaya táichavene eta éhisirahi ema Jesucristo

¹² Némunarqueneana nuparapenevana, vahi ecuarami eta muracairaya eta iátajivanyare, tímicutijiricavayarehi táramicarehini eta eyehe.

¹³ Evapinavachucha taicha ecapayayaracahi eta macatajivairahi ema Cristo apaesa evapinava te jena sáchezare eta enecipirayare éma eta máucupaisiraya mámirayarepahi eta majaraiva.

¹⁴ Te náumehahepuca máichavenénahi ema Cristo, tétavicavayare eta iúricacarevaya éti. Taicha tiávahácaheyare ema Espíritu Santo, másihaquenehi te majaraiva ema Vi-caiyaquene. Tayanapane náepurupuca éma, étisera ecunachahi éma.

¹⁵ Te etiarhipuca eti ecatajivahi náicha, tacuijasera étaimahi tiviuchahémahi jácani ecapahivainahini, jámeraiivainahipucáini, váhivare étaimahi tiviuchahémahi jácani ímisiapirasiravainahipucáini tayehe eta náichaqueneana nácani apanana achaneana.

¹⁶ Étisera, te ecatajivapuca táichavenénahi eta éhisirahi ema Cristo, vahi ecutsiriha. Evapinavachucha, ehasulupayachavare ema Viya tayehe eta ecaijarerahi eta máijare ema Cristo.

¹⁷ Puiti juca sácheana viávacurehi, táitecapaurehviripa ichape eta vicatajivairayare, mavarahahi ema Viya vímereuchava eta viúri viti machichanaveana. Énasera ena masuapajirairahanahi eta náichuirahi ema Viya, páureanasami taicha tiápajucava eta nacatajivairaya, ichape eta náicuñaya.

¹⁸ Ichape eta vicatajivairahi te juca apaquehe viti macuchucureanayarehi ema Viya. ¡Páureanasamisera ena achaneana masuapajirairahana, váinarajiqueneanahivare! ¡Ichapepanayare eta nacatajivairaya!

¹⁹ Puiti viti véhicanahi ema Cristo, ichape eta vicatajivairahi. Váhiserá vicainajiruvaimahi. Vímiyanavayarehi vicha eta táuriqueneana. Vácasiñava mayehe ema Vicaiyaquene eta majaneasirahavihivare, taicha éma, tétavicavahi eta máitauravahi.

5

Ena Pedro maconsejachavaca ena machamuriana

¹ Tiuri puiti, nuparapenaveana, nuvaraha nuconsejachahe emutu eti pastoreana ejaneacanahi ena vichamuriana. Nútiripa pastornuhi. Énerichuvare testigonuhi eta nímararasirahi eta macatajivairahi máepenirahi eta te crusu ema Cristo. Esuapanuyare puiti eta nuconsejarapi taicha vicuticacayare tayehe eta vicatuparahairaya viáviyahare te majaraiva ema Cristo te táitecapa eta machaviraya.

² Tauri eta ejaneasiravacaina namutu ena vichamuriana, taicha éna tímicitijiricavahi uvesanainahini mayehe ema Viya. Ítauchayare eta etuparacasivahi. Ema Viya mavarahahi evapinavahini eta ejaneasiravacahi. Vahi eucuyaciequenehavaca. Váhivare ecupanerecha ecavacha. Evapinavayaresera eta ecaemataneasiravacaya.

³ Váhivare ímipanánajicavacáimahi taicha vahi ecavanaravacahini. Ímrecayarehisera eta iúrivaya nayehe, apaesa éna náehica eta iúri vanahi.

⁴ Apaesa te machavapa ema yátupiquene Pastor eta viyehé, tétavicavaya eta macunachirahéya. Tíjaracahenapa éma eta evachayare ícuchihi. Máitavacainapa eta ecachaneraya éma te mávihahi eta te majaravahi.

⁵ Eti apanava eti amaperuana, nuconsejachahe: Esuapayare eta navanesiraheana ena víyarahana. Emutyare esuapacaca. Mánshéhahi. Taicha ema Viya vahi majapanuimahi ena ticasíñavavairicana. Tétavicavasera eta majapanuiravacaya ena mánsupanereruanahi.

⁶ Te ímreca eta emansuvavacahi tayehe eta ecasiñavairahi eta me Viya, éma, te máimahapa tiuri, ticatiuchahenapa te tamutu eta íchararacavaqueneana. Tásiha, tétavicavayare eta iúrisamurevaya.

⁷ Te tatiarhipuca eta éñamiravana, emetaca tamutu ema Viya. Éma, ticanaracaheyare taicha tétavicavahi eta máeñamiravahi eta eyehe.

⁸ Ecuneuchava yátupina. Ejaneacavahivare, taicha ema viánarahi Váinaraji, macuti eta táifnehiquene sárare tatanujiriricahi eta tanicayarehi. Ene macahehi éma, matanucahi ena máquipairuanayare.

⁹ Eta tacahe, túmehéna ecanarairayare éma, machu máquipaicahe. Ácasiñava muraca eta mayehe ema Viáquenu. Écharichuhi vahi ácarichuhini eta ecatajivairahi. Túmehénahi eta ecamichiraina, ecutyare eta nacamichirahi ena vichamuriana ticavasanahi te tamutu avasareana.

¹⁰ Ema Viya, tíchuhavivihi, mavarahahi visiapayare tayehe eta mávasa táichavenehi eta véhisirahi ema Jesucristo. Ánipirinesera eta ecatajivairaya puiti juca sácheana. Émasera ema Viya, tétavicavahi eta majapanuraivahi. Éma, tímararacahehi eta ecamichirahi; tásiha éma, tíjaracahenapa eta evayuchiravainapaicha eta etumevaya. Tájina ticayacahemahi máicha.

¹¹ Éma, ¡máitavacacahi eta macunachacarevahi! ¡Macachuricahi eta máitupajijíasirava, máitavacacahivare éta! Amén.

Ena táichecuarqui eta macartane ema Pedro

¹² Ímati emutu ema vichamuri Silvano. Éma, tétavicavahi eta máitauravahi te tamutu. Puiti, émahí ema tiáminanurihi eta juca nucartane. Núti, ánipichichahi nájurehi eta eyehe. Esamanusera eta nuconsejachirahéhi. Eta numetasirahéhi tamutu eta juca, nuvaraha nétumechahe eta véhiruhi, taicha yátupíhi eta vicaijuheirahi me Viya táicha.

¹³ Énaripa ena vichamuriana ticavasanahi te juca avasare Babilonia, téchajicaheana. Énerichuhivare éna, manerejiruanahi ema Viya ecutihi eti eta manerejisirahehi. Téchajicahehivare ema nuchicha Marcos.

¹⁴ Núti, eta néchajirisirahehi éti nuchamuriana, nuvaraha nétserarecahe emutu, táicutiarahi eta tavayuchirahi eta némunasirahehi emutu éti.

Puiti nuyaseuchahehi me Viya, máijaracahehini tanaraca tamutu eta epanereruana emutu éti machaneranahi ema Viáquenu Jesucristo.

Tamutupa eta juca néchajiriruvahi eyehe.

Eta macartane ema Apóstole Pedro, ticajare 2 PEDRO

¹ Nuti Simón Pedro, mavanaranuhi ema Jesucristo. Manerejirunuhivare mayehenuhi apóstole. Nucajurehe eta juca nucartane eti nuchamuriana taicha tétavicavahi eta evapinairavahi eta juca véhiruhi. Puiti éti apanava ejacapacarehivare me Viya, ecaicuchiripavare eta iúchucuiraya maicha ema Viáquenu Jesucristo.

² Puiti, nuvaraha tajurucaini eta ecaicutiaraira eta máemunasirahehi ema Viya, tásihaquenehi eta ímatiequenehairapaipahi eta mapanereruana éma, émapa ema Viáquenu Jesucristo. Tájinavare tahapapiricahini eta táurivahi eta epanereruana.

Eta náurivana ena téhicanahi ema Jesucristo

³ Táichavenehi eta vímatirahi ema Viya, tétavicavahi eta máitupajjiasiravahi eta macaematanesirahavihi eta vítaesirana, mavarairahi vétaviuchahini eta víúrivahi, vicutiyarehi éma eta masantuvahi. Étahi eta mapanereruhi eta máichuirahavihi. Tásiha, visuapavanepa taicha vímahapa eta majaraivahi, vímahavarepa tétavicavahi eta máurivahi taicha camuriquenehi eta táuriqueneana máichaqueneanahi.

⁴ Tíjaracavaripavare éma táetaviuchayare eta víuricacarevanayare maicha te jena sáchehare, tíjamurachacareanahi tamutu. Muracahi eta vicasiñavairahi eta máitauchirayare tamutu eta júcana, taicha tétavicavahi eta máurivahi étapa eta majaraivahi. Táichavenehi eta ecasiñavairahi mayehe, tinacasamurechahehi eta ecasamurerayarehi étachucha eta táuriqueneana, ecutiya éma eta macasamurerahi eta táuriqueneana. Vaipa tivayuacahemahi eta tajamurachaqueneanahi eta ítaqueheana, taicha tétavicavahi eta tamaeperajichirahehi eta cape juca eta ítaresirana.

⁵ Eta tacahe, etuparahahi puiti, ímiyanavahini eta éhisirahi éma, epamicavavarehini iúriya nayehe namutu ena achaneana.

⁶ Epamicavavarehini ecaravahu apaesa ímatiequeneha eta mapanereruana ema Viya, ecaravahuvarehini ecaratacava, étumechavavarehini eta ecamichira eta jácani íatájivana. Epamicavahivareni ácuti ema Viya eta masantuvahi.

⁷ Epamicavahivareni íápajucaya eta émunaraivahi nayehe ena echamuriana, ecajirayare. Epamicavahivareni eta émunaraivahi nayehe ena apamuriana achaneana, tayanapane vahi náehicahavihini.

⁸ Eta tacaheyare eta ítaresirana éti, ítamuturusirahi tamutu eta júcana iúrivanahi, ecuti-paipahi ema Viáquenu Jesucristo eta máurivahi éma. Énerichuvare te muracahi íjaracava ecaravahupaipahi eta júcana, tíápajucavapaipahi eta ímatiequenehairahi eta máimiturapiana, tíápajucavapaipahivare eta etumeva tayehe eta ecaemataneasirahi éma.

⁹ Nácanisera vahi návarahahini nacaravahu, tímicitijiricavahi ena púchuquiana énainapa ticatajivanayare. Taicha náemitisicaipahi eta máepachinachiravacahi ema Viya tayehe eta táinapurénihini napecaturana náichaquenénihini cape eta náítaresirahi.

¹⁰ Étisera, eti nuparapenaveana, nuvaraha échavahini eta máichuirahéhi ema Viya, manerejisirahéhi. Epamicavahini eta ímeresirahi yátupi eta machichahehahi. Eta ímiyaniravahi eta ecaravahuirá eta juca néchajisiqueneanahi, jéhesare, tájinapa tímiáquipaichémahi.

¹¹ Tásiha, tétavicavaya eta iúricacarevaya eta machimapiraheya ema Viáquenu Jesucristo te macuchucuhapea eta te juca apaquehe, mámiraheya eta te mávacureya. Máitavacacaya eta macachanerahaviya vimutu.

¹² Tacahe núti, nupamicavahi puiti eta némechiraheya eta júcana, tayanapane nímatihehi eta ímatiriripahi, muracaripavare eta éhisirahi eta yátupiqueneana ímitucasivanahi.

¹³ Németeaca nétupicavahi eta juca nuconsejachirahehi puiti juca nítaresiraichaha te juca apaquehe.

¹⁴ Taicha vaipa náyeremahicha eta nítaviraya. Ema Viáquenu Jesucristo tímimetacanuhi eta nunarasiravanenapa te machacaya.

¹⁵ Nuvarahahisera vahi euemitisica eta juca numetaruheanahi, tayanapanéinepuca népenaipa. Eta tacahe, nupamicavahi eta nímiájurecahe emutu, taicha nuvarahahi échayarehi tamutu sácheana.

Viti vímahahi eta majaraivahi ema Jesucristo

¹⁶ Viti vitupiruva eta vímitusirahehi tayehe eta táichararacavayare eta machaviraya ema Viáquenu Jesucristo, máimeresiraya eta máitupajjiasirava ichape. Vahi vépiyahirahimahi, váhivare vivehaquenéna te vichuti. Vímatipa yátupi, taicha vímahahi te víúquihana eta majaraivahi eta aquenucairahi.

¹⁷⁻¹⁸ Taicha víti vitiarihihi te machacaya ema Viáquenu Jesús, vicachanehi éma tayehe eta cerro santo, te vinecapaequenehapa eta macaijareirahi éma eta Aquenucairaya. Visamahivare eta mahu ema Tata Vicaiyaquene eta macunachirahi ema Machicha. Ánipa macahehi: “Ema maca éma yátupiquenehi Nuchicha némunarquenehi. Tétavicavahi eta núrismarevahí máicha” macahepa.

¹⁹ Víti vítametacahi eta nacayemaqueneanahi ema víyarahánaini profetana tayehe eta Sagrada Escritura, eta náechajisíhairahi eta aquenucairayarehi ema Viáquenu. Eta náimiturapiana tacutihi eta tajaraiwa eta lámpara eta tamicauchirahavihi apaesa táuriyare eta vítaresirana te juca apaquehe taurivahi. Tacahe, étumechava tayehe eta ecuchapiravaya eta sácheyare te márajapainapa ema yátupiquene eta majaraíwa, tétavicavayarepa eta mamicauchirahayare tamutu eta esamureana. Tacahe, tituparacahehi esuapayare eta juca esamaqueneanahi vímitucasivanahi.

²⁰⁻²¹ Nuvarahasera yátupina ímatiequeneha eta juca: Vahi táurica viveha te vichuti eta vímijachirahi eta tacayemaqueneanahi eta Sagrada Escritura. Vicatuparahahi vicaravahuyarehi eta yátupiquenehi. Ema víyarahánaini profetana, váhivare navehaquenénahíni te nachutiana eta nájuequenehairahi eta máechajiriruvana ema Viya. Ema Espíritu Santo, éma tímitucavacahi eta nájuequenehairaya éna tayehe eta Sagrada Escritura vímahaquenehi puiti.

2

Natiarihiyare ena tépiyahirahianaya tímijachavanayare pastoreana

¹ Tiuri, acane natiarihivaresera ena tépiyahirahiana tímijachavanahi profetana te namuri ena náchucanaveanaini israelítana. Ene tacaheyare puiti, natiarihiyareva ena tépiyahirahianaya, tépiyacavanaya pastoreana eyehe. Éna típichasicahéanayare. Témejecapavachaheanaya, apanaya eta náimiturapiana. Vahi émaimahi náechajisíha ema Viáquenu ema náimicaparuhivare. Énajivahi tíchavanahi natanucahi eta náicuñayare, táijahúchiravayarehi eta náemitiequenehairayare.

² Camurianayare ena náemejecapavaruanayare, náehicainapa eta nayeherepi, táetaviuchirahi eta natuhusivahi. Náichavenehi éna, téchajicanainapa ena apamuriana achaneana, nacaecahinapa eta juca véhiruhi táurinaquenehi achene.

³ Ena nani, tímitucaheanaya eta náimiturapiana náepiyahiraivanahi, taicha navarahahi títicavana tivereacaheanainapa éti, taicha tétavicavahi eta najamurarasirahi eta plata. Tájinasera náipuinyare, vahi táevejuacaimahi eta náicuñayare. Taicha acanevacaiapa eta tacaecherairahi eta náicuñayare.

⁴ Nacutiya ena ángeleana téjecapavanahi. Tájina vahi maperdonachavacaimahi ema Viya. Máquijicavacapa tayehe eta táíñehiquene infierno távivahi eta timapicuquene. Ticaitihanahi puiti te cadena. Te táitecapapa eta juicio, tiápajucavanainapa eta náicuñayare éna.

⁵ Nuvaraha némechahe nayehé ena machamurianaini ema víyarahaini Noé eta acane, váhivare májapanuvacahíni ema Viya táichavenehi eta namasupajiravahi. Macamiricapa eta ichape tíquiva náicuñahi. Téricanahi namutu ena nani achaneana, taicha náepuruhi eta máichuiravacahi ema Noé, táurivayarehíni eta náítaresirana. Nacarichuhi tíuchuchuhanahi ema Noé, esu mayena, énapa ena sáisiqueneana machichanaveana.

⁶ Nuvaraha némechahevare nayehé ena ticavasanainíhi te avasare Sodoma, étapa te Gomorra, váhivare májapanuvacahíni ema Viya. Macamiricahi eta yucu, náicuñahi éna. Táijahúchavacapa tacamítiequenehavaca namutu. Titavanapa, amairihanecha tsimapa eta náítavirahi. Ema Viya máimerecachi eta juca, nayehé ena najurureanapa te juca apaquehe puiti, mavarairahi mámechavaca ena achaneana váinarajipanereruanahi te napicayarepuca.

⁷⁻⁸ Téhesera te nataracu, matiarihi ema víyarahaini ticaijare Lot. Éma, tamutuhi sácheana ticatísumarevahí taicha máimairavacahí ena achaneana náichirahi eta tauriqueneana, masamirahivare eta náechajisíhairahi eta titsirihacareanahi. Téñamavahivare éma eta máimairavacahi ena achaneana, natuhusivavacahi eta náítaresiranahi. Tacahe, macuchuhahi ema Viya, taicha éma Lot, tétavicavahi eta máurivahi, tisuapajirahihi mayehé ema Viya.

⁹ Eta tacahe, ema Viya tétavicavahi eta macatiuchirahavi puiti, ticuchucuhahavi viti véhicanahi éma, tayehe eta víatácájjivana. Énerichuvare yátupíhi matsecaripa eta náicuñayare nácani achaneana masupajirairahanahi.

¹⁰ Ema Viya, yátupíhi máicuñacavayarehi namutu ena tivayuchanahi eta náechipejísirahi eta náqueheana taicha tétavicavahi eta tavayuasiravacahi eta natuhusivana, énapa

ena tépuruanahi ema Viáquenu eta émairahi téchavacahi. Ena nani, máeyajanahi. Mapicaurairahana, nájina návamirahuquenéna eta náumeharaiwa. Nasapiha nacaecahivare ena ángeleana tiámana eta majaraivahi ema Viya.

¹¹ Apanasica ena ángeleana tiávianahi te mamirahu ema Viáquenu, vahi nájaracavahini nacajacharecahini ena váinarajiana, tétavicavahinéni eta natumeva.

¹² Énaserá ena nani tépiyacavanahi pastoreana, nacaecahihisera eta téhicacareana namaiturerequeneruanahi. Éna, nacutíhi eta táitaresira eta sárare, tájina nacaicutiaraquenéna. Najurupairuchucha te apaquehe. Éna, táuriavasahi eta justicia, máejehahi náerataca táimicapacavaneyare. Tépenayarehi nacuti eta táepenira eta sárare.

¹³ Éna, náimicatajivachahi nácani apamuriana achaneana. Páureanasamisera éna, tiápajucavanayare eta nacatajivairayare.

Ena nani, tétupicavanahi eta náimairavahi, tiúrisamurereácavanahi eta nacavahairahi tamutu sácheana. Táitaurévaquenehi tétavicavahi eta natsirihacarevayarehi eta namaetupicushivanahi, eta nacasiriquirahéhi te jácani énisiracacana ena echamuriana. Ticamapuravanahi ticurisamurechavana, navarairahi náituruca jácani najamurachaqueneana.

¹⁴ Namutuchucha najamuracha nácani esenana. Tájina náipuina eta náesenamarévana. Náechemaha eta náiturusraya súcani esena máejerarehi. Náimitucavare ena ajairana tájina náituréqueneha, nacutiya éna eta náesenamarevanahi. Tájina tivechuquihaimahi eta napeacaturairahi. Ecuñaraquisera eta náicuchihí éna.

¹⁵ Témunasiricavanahi éna, taicha namaimatirahi eta achene nacaijuheya eta táuriquenehi. Nacutipahi eta mayeherepini ema maca achane Balaám, machichaini ema Beor. Éna, tétavicavahi eta majamurachirahi eta plata, mavachayare eta máchirayare eta tauriqueneana.

¹⁶ Ema Viya máimahahi eta taurivahi eta mapanereruhi ema Balaam. Eta tacahe, eta burro macaperaquenehi ema Balaam téchajicapa, tacajachahi ema Balaam. Éna, macaicutiarahi eta táechajiriruvana eta mapera. Enevanepa témitiacahi eta mapanereruhi tauriquenénihi.

¹⁷ Ena nánitátaji achaneana nacutíhi eta tiájicu equ. Nacutivare eta úcaji támarairiruhi eta tétaticava. Éna, jararíhipa eta náicuchi náicuñayare tayehe eta táetaviure eta tamapicuva.

¹⁸ Ena téchajisiavanapa ticunachavanapa eta náichaqueneana napecaturanahi náiturureanahi. Náiminajicapaipa nácani náiturevanapahi eta táurivainiripahi eta náehisirahi eta táuriqueneana, tichavanapaipa tayehe eta tamaeperajivanahi eta náitaresira.

¹⁹ Éna, ánipa tacahe eta náechajiriruvahi: “Víti, nájina vísapaimahi tipamicahavi. Tacutirichuhi te vicha eta tauriqueneana étapuca eta táuriqueneana. Vítijiva véchinavahi eta vítaresiraya” nacahehi. Éna, tímijachavanahi líbreana. Énaserá tiápajucavanahi ticaeratanahi taicha eta tavayuchiravahi eta napecaturana étapa eta namaeperajivana. Nácani tavayuaruanahi eta napecaturana, vaipa énaínahini náechinavahini.

²⁰ Tacutiquene nácani tínajicavanahi eta náehisirahi ema Viáquenu Jesucristo, tichavanapa tayehe eta tamaeperajivahi eta náitaresirana te juca apaquehe, éna, tiápajupavanapa eta nacaicuñairayare, taicha eta naviurevahi.

²¹ Tiúripánaichuhipucaini vahi nacumatihini eta táurinaquene véhiruhi, váchupa náimati-ripahi eta tiúrina achene, tásiha tínajicavanarichahavare tayehe eta táurinaquene vanairipi najacapaquenénihi.

²² Jucarihi eta náechajiriruva náchucarapi, ani tacahehi: “Te tiáhica eta tamucu, táimichavayarehi tanica eta táhiruha. Étapa eta cuchi, tamapuruji vícachahini éta, taicha técarajicavayarehi te tiúrají”. Ene nacahehi ena tínajicavanahi tayehe eta véhiruhi, tichavanapa tayehe eta tamaeperajiqueneanahi.

3

Vaipa táyeremahi eta machavirayare ema Viáquenu Jesucristo

¹ Némuraruqueneana nuparapenaveana, apihepa puiti nímiamaréca eta juca nucartane. Eta táechajiriruvahi eta apinaquene nucartane, nuvarahahi nuconsejachahe, apaesa tacuíja tahapapicahé eta éhisirahi ema Viáquenu.

² Nuvarahavare yátupina eta esuapiraina eta Sagrada Escritura nájureanahi eta acane ena víyarahananí santo profetana, étapa eta máimiturapiana ema Viáquenu Macatiurahiquene. Étarichuhivare vímiturapíhi puiti eta eyehe víti apóstoleana.

³ Tínapucayare nuvaraha némechaheyare eta juca. Te jena sache tánehipa eta táitavirayare, tímerecavainapa ena achaneana ticacahirahiana tayehe eta juca yátupiqueneana vicuchapaqueneanahi víti. Eta náitaresirahi éna, apanachucha eta tihapapiricavacahi eta náichirahi eta tauriqueneana najamurachaqueneanahi.

⁴ Áninapa nacaheyarecacha: “Táicharacava eta juca ecuchapaquenehi. Vuíchacaru méchavahini ema Cristo, ímjachaquenehi tichavavaneyarehi. Vaipa tasuapacare eta machaviraya. Taicha puiti tacutirichuhi eta náitaresirainihi ena viáchucanaveánaini. Tanasirichuhi eta táepaniravahi acane eta apaquehe. Vahi táitsivachavahini” nacahepa.

⁵⁻⁶ Ena nani, vahi návarahahini napanerequeneha eta táitsivachiravahi maicha ema Viya. Jéhesare éma, eta acane, máechajiriruchucha eta máepiyasirahi tamutu eta anuma étapa eta apaquehe. Máechajiriruchuchavare eta táimeresiravahi máicha, eta táijipahi tétupiecahi te une. Énerichuvare, te táequenepe, únehi eta náicuñahi máicha, macamirisirahi eta ichapequene tíquiva. Téricanahi namutu ena masuapajirairahanahi.

⁷ Numetacahe puiti: Ema Viya tiápechavayare máicuñacayare eta juca apaquehe. Yúcuyarehisera eta tacamitiequenehayare tamutu eta anuma étapa eta juca apaquehe. Taicha éma, manacaripahi eta máechajiriruva, máicutichahi eta tayerevaya étapa eta távapahianahi. Jéhesare, te jena sáchezare, títaipaicavacayare namutu ena achaneana masuapajirairahanahi náinarajianahi.

⁸ Váhivare ecuemitisica, nuparapenaveana, eta matuparaquihi ema Viya, vahi tácuti eta vituparesira viti achaneana. Éma, étana sache matuparacahi, vítisami mil áñoripa eta vitupachirahi tayerevaipa.

⁹ Éma, manacahi eta juca tayerevahi, mavarairahi macuchapayare ena achaneana eta náeneuchiravayare mayehe. Vahi tácahequenénahini eta juca táitaresirahi maicha eta apaquehe. Ichapemuri eta macayeherahi paciencia eta viyeha, mamavarairahi vámutuhichaini vémitiequenehíni. Nararihisera ena achaneana téjecapavanahi te napanereruana. Eta náimairahi eta mayerevahi ema Viya eta máicuñasiravacayarehi, náimijachahi vaipa maratahaimahi máicuñaca eta juca apaquehe.

¹⁰ Esamanuchaha. Te táitecapapa eta sáchezare táitavirayare tamutu maicha ema Viya, vahi vinecapauchavaimahi, taicha tacutiyare eta mayumurusirava eta máitesira mácani tímerahi. Eta anuma, étapa tamutu eta távapahianahi, tamutuyare témitiaca. Ticaemayare muraca, tacutiyare eta tacaemaira eta ichapequene yucu te ichape curiche. Étapa eta táivihanahi te apaquehe, tamutuyarehi títava, énapa ena távapahianahi. Tamutuyare táijuchayare eta yucu.

¹¹⁻¹² Tásiha éti, écharipahi eta juca táitavirayarehi eta anuma étapa eta apaquehe, táijuirayare tamutu te yucu. Púitipa tacamunuipahí ámutuhini ésenicahini ema Viya, étaviuchahini eta iúrivahi eta itaresirahi. Puiti, yátupí ávarahahini táitecapavanehíni eta jena sáchezare. Eyaseaca ema Viya táitecapavane.

¹³ Taicha viti machaneranaahi ema Viya, vicuchapainapa eta arairuyare anuma étapa eta arairuyare apaquehe, vícuchihi mayehe ema Viya. Tájinainapa eta pecatuana, vaipa tihapapicahavimahi. Tétavicavayarehi eta táuriva.

¹⁴ Eta tacahe, némunaruqueneana nuparapenaveana, puiti eta ecuchapirayare eta juca tacaitsivairaya tamutu, étumechavayarechucha eta ecasiñairahi ema Viáquenu Jesucristo, apaesa tauri eta machimapiraheyare, tacuíja etapiravainahi.

¹⁵ Échava yátupina eta macayeherahi paciencia eta viyeha ema Viáquenu taicha mavarahahi ticuchucuhahaviya. Étarichuhívare tacahehi eta máimiturapihi ema apana viparape vémunaruquenehi Pablo, táichavenehi eta máitupajijiasiravahi máijararui ema Viya.

¹⁶ Tamutu eta macartaneana máimiamareranahi eta eyehe, étarichuhi táechajisihahi eta júcana. Jararihisera ticajerahi eta ecaicutiarairainahini. Nararihisera ena ticaravahuana apaesachicha, vuíchahavare túmevacaimahi eta náehisirahi. Náequepicasamichucha eta táimiturapi eta macartane. Nahapapicavare eta táimiturapihi eta apana Escritura. Táimicuñacavacayaresera eta nahapapisirahi.

¹⁷ Eta tacahe, némunaruqueneana nuparapenaveana, vahi tacumapuruji eta ímatiequenehairahi eta juca, machu nahapapicaha eta epanereruana ena tivayuarahianatataji. Máchuvare náiminajicaha eta éhisirahi ema Viáquenu.

¹⁸ Puiti, nuvaraha tajurucaparichuchaini eta ímatiraina ema Viáquenu Jesucristo. Tajurucaparichuchavaréni eta evapinairavahi eta máemunasirahehi ema Ticatiuchahavihi. ¡Tétavicavahini eta vijirachira, vicunachahini éma, te vinarasirana, te véjamisirana! ¡Te visiapainapa eta mávasa, vímijanavayare! ¡Amén!

Eta macartane ema Apóstole Juan, ticaijare 1 JUAN

Eta viúrujasira ema Jesucristo

¹ Nuti Juan númiamareca eta juca nájure eta eyehe. Nuvaraha numetacahe éti, eta véchaquenehi mayehe ema Jesucristo, ema tjaracahavi eta echájjirucava ticaitarecarahi. Éma, matiarihíhi acane te tépanavapa tamutu. Tacahe, tiúcupaicali, tímerecavahi eta viyehe. Visamapa eta máechajiriruva. Camuri eta sácheana eta vímararasirahi éma te viúquiha. Vémamahaca te vivahu.

²⁻³ Éma, matiarihíhi acane, manasiqueneripahi mayehe ema Maiya. Tiúcupaicasera eta viyehe. Víti vímatipa eta achánequénérahi éma. Tásiha, puiti vimetacahe eta juca vímahaquenehi étapa eta visamaquenehi. Vimetacahe taicha vivaraha iúrujicavahíni eta viyehe. Taicha víti viúrujicavahi mayehe ema Tata Vicaiaquene émapa ema Machicha Jesucristo. Tásiha, éti apana iúrujicavahíni nayehe.

⁴ Tásiha, nucajurehe eta juca taicha nuvaraha yátupina eta iúrisamurevaina.

Eta majaraivahi ema Viya

⁵ Vimetacahe eta máimitusirahavi ema Jesucristo. Eta juca eta macayemaquenehi: “Jararihi eta tjarahi mayehe ema Tata Vicaiaquene. Tájina timapicuina mayehe, taicha mavayure eta máuriva”.

⁶ Tiúri, te vinasirichupuca víti te timapicu, tásiha te vicahehipuca: “Viúrujicava mayehe ema Viya”, tásiha víti vépiyahirahiripa. Vahi viúrujicavahíni mayehe, váhivare visuapahíni eta mavanairipiana.

⁷ Téhesera yátupina eta visuapira eta mavanairipiana, vinasirichuhi eta te majaraivahi ema Viya, tacutihí eta manasaririchuhi éma eta te majaraivahi. Tásiha, eta vinasiririchuhi eta te majaraivahi, viúritarecayarehi eta viúrujiusiracaca nayehe ena vichamuriana. Énerichuvare máepachinachayare tamutu eta vicapecaturairana, taicha te tépenapa ema Jesucristo Machicha ema Viya, máepusaicali eta máitine eta máepachinachirahaviyarehi.

⁸ Te vicahehipuca: “Tájina eta nupecaturaina”, tacahe, vahi vátupiemahíni eta vípanererihi. Vitijiva vivayuaracavahi víti.

⁹ Téhesera vitupiruvahi eta vimetauresiravahi eta vicapecaturairana mayehe ema Viya, jarahiripa eta maperdonachirahavihi. Taicha tjaracavahi éma eta maperdonachirahaviyare, vahi táéñamavacarehíni. Énerichuvare májahaya tépachinachahaviyare tamutu eta tammauriqueneana viyehe.

¹⁰ Téhesera vicahehipuca: “Tájina nupecaturaina”, vépiyaequenehahi ema Viya. Vímicutijiricapa ema máepiyahirahíni. Vahi tátupiruvahíni eta víjachapirainahíni eta máechajiriruva.

2

Ema Jesucristo, ema ticatajirahi

¹ Nuchichanaveana, nucajurehehi eta júcana taicha nuvaraha vahi ecucapecaturaini. Téhesera íchapuca eta pecatu, mararihi ema ticatajirahi viyehe te mamirahu ema Tata Vicaiaquene. Ticaijare Jesucristo ema ticatajicahavirahi. Éma, matapiravare; tétavicava eta máuriva.

² Éma, tímicapacavahi táichavenehi eta macaepahairayarehi eta vipecaturana apaesa viúri mayehe ema Viya. Váhisera tácarichu eta vipecaturana víti. Táimicapacahi éma eta macaepahairayarehi eta napecaturana namutu ena achaneana te juca apaquehe.

³ Tiúri puiti, vicasiñavahi eta vímatirahi ema Viya, taicha visuapahi eta mavanairipiana.

⁴ Te nararihipuca ena nácani achaneana nacahehi: “Núti nímati ema Viya”, téhesera vahi nasuapahíni eta mavanairipiana, tacahe náepiyevahi éna. Vahi tásuapacarehíni eta náechajiriruva.

⁵ Étasera eta visuapirahi víti eta mavanairipiana tímechahavihi eta víavahásirahi ema Viya. Yátupíhi eta vémunasirahi ema Viya.

⁶ Víti vicahehi: “Viávaháca ema Viya”, tásiha, tacamunuhi eta táurihíni eta vítaresirainahíni tácutihíni eta táurivahi eta máitaresirahi ema Jesucristo.

Eta mavanairipi ema Viya eta vémunasiracacaina

⁷ Nuparapenaveana, nuvaraha némechahe te juca carta eta macavanairipirahavi ema Jesucristo eta vémunasiracacaya. Te tépanavainapa eta ecaijuhherahi ema Jesucristo, vímitucaheripa eta juca mavanairipi. Taicha tamutu eta juca vímiturapiana táuchurehi tayehe eta juca mavanairipi ema Jesucristo.

⁸ Puítirichu nuvaraha tápajucava eta ecaicutiarairaya eta máemunasirahavihi éma. Manasirichuhi éma te majaraiva ema Maiya. Tásiha éti, te esupa eta juca mavanairipi, te émunacaca, epauchainapaipa eta majaraiva ema Viya. Térajicavainapa eyehe eta timapicu.

⁹ Te nararihipuca ena nácani achaneana nacahehi: “Núti návihahi eta te majaraiva ema Viya”, téhesera nacaticahipuca ena nachamuriana, návirarichuhi te timapicu. Vahi napauchaimahi eta majaraiva ema Viya.

¹⁰ Nácanisera náemunacahi ena nachamuriana, nanasirichuhi te majaraiva ema Viya. Tásiha, tiúrihi eta napaisirahi, apaesa vahi náejecapavahini.

¹¹ Énaserá ena nácani nacaticahahi ena nachamuriana, nanasirichuhi éna te timapicu. Vahi náechahíni eta napaisirayare eta náitaresira, taicha eta timapicu vahi táisapahíni náimairicahíni.

¹²⁻¹⁴ Eti nuchichanaveana, nucajurehe taicha néchahi eta maperdonachiraheripahi ema Viya eta epecaturana émavenehi ema Jesucristo, táichavenehivare eta ímatirapa ema Tata Vicaiyaquene.

Eti ávinaveana, nucajurehe taicha éti ímatihi ema Jesucristo, ema matiarihiquenehi acane te tépanavapa tamutu.

Eti átinaveana, énerichuvare nímiájurecahehi taicha tanasirichu iúnacahi te esamureana eta máechajiriruva ema Viya. Tásiha éta, tétumechahehi eta ecapaquechiraipahi ema Váinaraji.

¹⁵ Emutu eti, vahi ecujamuracha eta tamauriqueneana te juca apaquehe. Váhivare ecujamuracha eta tatiarihiqueneana tayehe eta juca apaquehe. Te nararihipuca ena najamuracha eta tamauriqueneana te juca apaquehe, vaipa émainahini náemunaca ema Tata Vicaiyaquene.

¹⁶ Taicha tamutu eta napanereruana ena achaneana te juca apaquehe, tájina táurivaina. Napanerechahi naicha eta tamauriqueneana. Najamurachaipa eta apayehe. Navarahaipa nacayehe náimijachaipapuca tiúrihi eta náimairahi. Te ticaimahaqueneanapa, tisiñavanapa táicha. Eta juca napanereruana, vahi máijararuinahini ema Tata Vicaiyaquene.

¹⁷ Numetacahe puiti: Títavainapaipa tamutu eta apaquehe. Énerichuvare títavainapaipa tamutu eta najamurachaqueneana ena achaneana. Vítisera, te visuapa eta mavarahaquene ema Viya, máichecuarquirénapa eta vítaresira.

Ena ticatianacana ema Cristo

¹⁸ Nuchichanaveana, puiti tiánehinapa eta táichecuiraya, títavainapa tamutu. Vimetacheripa eta máitesirayare ema maca achane ticaijare Anticristo, ema ticatianacayare ema Viáquenu. Puítiripa nararihipa ena ticatianacanahi ema Cristo, navarahaipa máitecavane ema Anticristo. Tásiha, véchainapa eta tiánehinapa eta táichecuiraya tamutu.

¹⁹ Ena ticatianacana ema Cristo náuchurehi eta viyehe. Váhiserá viúmurivainahini éna. Taicha te viúmurivainahini, nanasirichuhini eta viyehe. Náerajiruvapahiserá eta viyehe. Tásiha, vímatipa eta vahi viúmurivainahini.

²⁰ Ema Viáquenu Jesucristo tjaracaheripa éti ema Espiritu Santo. Tásiha, emuturipahi ímati eta yátupiqueneana.

²¹ Nucajurehehi táichavenehi eta ímatirahi. Nuvaraha ácaicutiaraquénahini eta yátupiqueneana. Te esupa eta yátupiqueneana, vahi ácutimahi ena tépiyahirahiana.

²² Numetacahe eta juca taicha nararihipa puiti ena tépiyahirahiana, ena nácani nacahehi: “Ema Jesús váhira émaina Cristo Machicha ema Viya” nacahehi. Ena nácani achaneana, ticatianacanahi ema Cristo. Tacuti eta nácahehini: “Váhira émaina yátupiquene Tata Vicaiyaquene, váhivare émaina Maiya ema Jesús” nacahepainsi.

²³ Numetacahe eta apana: Nájina tiávahácanaimahi ema Tata Vicaiyaquene ena vahi nasuapahini ema Jesús eta machichairahi ema Tata Vicaiyaquene. Viávaháchiserá víti ema Tata Vicaiyaquene vimutu viti visuapanahi ema Jesucristo eta machichairahi ema Viya.

Eta viávahásirahi ema Jesucristo

²⁴ Tásiha, ecapanereruyaréchucha éti eta máechajiriruva, tamutu eta esamaqueneanaripahi eta te tépanavainapa eta ecasiñairahi ema Jesucristo. Eta ecapanereruira eta júcana, iávahácayare ema Tata Vicaiyaquene émapa ema Machicha.

²⁵ Taicha tjaracavahi ema Jesucristo tjaracahaviya eta vítaresira máichecuarquirénapa.

²⁶ Puiti nararihi ena navarahayare tivayuaracaheana. Tásiha, nucajurehe apaesa ecuneuchava éti nayehe ena témejecapavarahiána.

²⁷ Éti, mávaháruheripa ema Espíritu Santo mavaneruhi ema Jesucristo. Tásiha, nájina apanaina ácamunuhini máimitucahehíni, taicha tímitucahehi tamutu ema Espíritu Santo. Éma, yátupiquenehi eta máechajiriruva. Éma, vahi tépiyahirahi. Timetacahehi éma: “Ánasirichu iávahácahi ema Jesucristo”.

²⁸ Puítisera, nuchichanaveana, ímiyanava eta iávahásiraina éti ema Jesucristo apaesa túmesamurehéina éti, vahi ecutsiríha mayehe eta te machava.

²⁹ Éti échahi eta máetaviuchira eta máurivahi ema Jesucristo. Tásiha, ímatiyare ena apamuriana machichanaveana ema Viya, táichavene eta náichirahi eta táuriqueneana.

3

Viti machichanaveana ema Viya

¹ Nuchichanaveana, tétavicava táramicareva eta máemunasirahavi ema Tata Vicaiyaquene. Yátupíhi tímijarechahavíhi “machichanaveana”. Puítiripa yátupiquenehi machichahaviripahi. Énasera ena apamuriana achaneana vuíchaha nácaicutiarahíni eta macachichairahavíhi ema Viya, taicha vuíchaha náimatihíni eta máemunaraivahi éma.

² Némunacasareana, vécharipa eta macachichairahavipa ema Viya. Vuíchahasera tímechahaví éma eta viúrivayare. Vécharipavare eta vicitirayare ema Jesucristo eta te machava. Taicha vímahayare eta máimahiquene éma.

³ Tásiha, vimutu víti vicunevayare eta vicitiraya ema Jesucristo, puiti vácuticaca viúrihíni tácutihíni eta máurivahi éma.

⁴ Nuvaraha némechahe: Namutu ena tisipecaturana, nacaticha eta mavanairipiana ema Viya, étara eta juca napecaturahi.

⁵ Ema Jesucristo, tájina matapiravaina éma. Vímatiripasera eta tímitecahi éma te juca apaquehe eta macaepahairayare eta vipeaturana.

⁶ Víti, te viávahácahi ema Jesucristo, tituparacahavi vaipa vicuimisiapava tayehe eta pecatuana. Énasera ena ticapecaturahiana vahi náimatihíni ema Cristo.

⁷ Nuchichanaveana, vahi ecuisapava navayuacahe. Víti, te vímisiapavahi tayehe eta táuriqueneana, vímerecoya eta viúriava. Vicutinapa ema Jesucristo eta máetaviuchirahi eta máuriva.

⁸ Te náimisipava ena apamuriana tayehe eta tauriqueneana, éta tímereuchavacahi eta machichairavacahi ema Váinaraji. Taicha ema Váinaraji, ema tinacuchahi táquenuhi eta pecatu. Numetacahe eta apana: Ema Machicha ema Viya tímitecahi eta macaepahairayare eta majararuanahi ema Váinaraji.

⁹ Víti machichahaviripa ema Viya. Váipa vímisiapavaimahi tayehe eta vicapecaturairana taicha vicitinapa éma eta tamajinairahi matapiravaina. Éma, tájina mapecaturaina. Eta macachichairahavíhi ema Viya, vahi vicapecaturaimahi.

¹⁰ Nácani vahi tíchanahi eta táuriqueneana, váhivare námunacahíni ena nachamuriana, námerecahi eta vahi machichavacainahi ema Viya. Tímerecavanahivare eta machichairavacahi ema Váinaraji. Vítisera, eta víchirahi eta táuriqueneana, étapa eta vémunasiracacahi, vímerecoyahi eta macachichairahavíhi ema Viya.

Eta vémunasiracaca

¹¹ Te tépanavainapa eta ecasiñairahi ema Viya, vimetacahehi eta mavarairahi eta vémunasiracacayare.

¹² Tásiha, vahi ecucuti éti ema Caín, mávaháruhi ema Váinaraji. Ema maca Caín macapacahi ema maparapéni Abel, táichavenehi eta máetaviuchirahi eta mavainarajivahi. Ema maca Abel, táimicapacahi eta masupajiraivahi, máichirahi eta táuriqueneana.

¹³ Nuparapenaveana, énerichuvare puiti nararihiya ena achaneana ticatichaheanayare éti apana. Váhisera ecuarami eta juca.

¹⁴ Nuparapenaveana, véchahi víti eta viápechiravaya vítareca te táequenéraya eta vépeniraya. Vicaijuhenapa eta vítaresiraya máichecuaraquireya. Véchahi eta juca, táichavenehi eta vémunasirahi ena vichamuriana. Énasera ena vahi námunacahíni ena nachamuriana, nanasirichu. Vahi tíuchuchuanaimahi tayehe eta náepenira.

¹⁵ Namutu ena ticatichanahi ena vichamuriana, nacutíhi ena ticapahiana. Eta náicharacavayare ena ticapahiana, véchahi eta namauchucuirayare.

¹⁶ Ema Jesucristo tímechahavíhi eta máemunasirahavíhi, taicha tíjaracavahi tépena vítivenehi. Tásiha víti, te jácani táicharacava, tituparacahavi víjaracavayare vépena énavene ena vichamuriana, vímechiraya eta vémunasiracacahi.

¹⁷ Te mararihi ema mácani achane ticaímahaquenehi, te vahi achánesamurénahi mayehe ema machamuri eta macaijuherahi, ema maca váhivare máemunacahini ema Viya.

¹⁸ Nuchichanaveana, vémunacacachucha vicajicaca eta vicayehequeneana. Vahi vicúya-cujiriríha. Váhivare vicuepiyahirahi eta vémunasiracacairahi. Vahi tacucarichu eta véchajiriruva.

Vicasíñavaya te mamirahu ema Viya

¹⁹⁻²⁰ Tásiha, eta te vémunacaca, véchahi eta yátupirahi machichahavi ema Viya. Téheserapuca tipicacararacavahi eta visamure, vicaesamiricayare eta visamure, taicha ema Viya tímahahavihi eta vicasíñairahi eta majapanuirahavihi. Taicha majapanurahi quenehi éma. Téchahi tamutu.

²¹ Tiúripána, némunacasareana, te tájina eta tapicacararasiravaina eta visamure. Tásiha, vahi vipicaimahi eta viyasearapianaya mayehe ema Viya.

²² Vicasíñavainapa eta májjarasirahaviyare tamutu eta viyasearuanahi, taicha visuapahi eta mavanairipiana, vicurisamurechahi ema Viya.

²³ Eta juca mavanairipianahi: “Ecasíña ema Nuchicha Jesucristo, énerichuvare émunacaca”. Tacahehi eta mavanairipi viyehe.

²⁴ Te visuapa eta mavanairipiana, viávahácahi éma, énerichuvare éma tiávahácahaviya. Véchahi eta matiarahirahi ema Viya eta viyehe, máicha ema Espíritu Santo mavaneruhi éma.

4

Éna mávaháruana ema Espíritu Santo énapa éna mávaháruana ema Váinaraji

¹ Némunacasareana, ecuneuchava nayehe éna tépiyacavana ticametairuana. Taicha puiti nararihi éna. Vahi mavaneruanaina ema Viya, váhivare mávaháruanaina ema Espíritu Santo. Tásiha, te náitecapauchahepuca éna návaraha tímítucaheana, éti eyaseresinavaya te yátupipuca vanairucana me Viya. Esamayare te étarichupuca eta vímiturapianahi víti.

² Eta juca eta ímatirayare éna mávaháruana ema Espíritu Santo te nacahehipuca: “Ema Jesucristo yátupiquenehi achane eta máuchusirahi”.

³ Énasera éna apamuriana, te náñauchahípuca eta yátupirahi achane ema Jesucristo, vahi mavaneruanaina ema Viya. Éna, ticatianacanáhi ema Cristo. Vimetacaheripa eta náitesirayare éna ticatianacana ema Cristo. Tiuri, puítirichu nararihipa ani viyehe.

⁴ Nuchichanaveana, éti machichahe ema Viya. Néchahi nútí eta emaisapiravahi tivayucaheana taicha mávaháruhehi ema Espíritu Santo. Éma, túmepanáhi mayehe éma Váinaraji, náehiruhi éna nani tivayuarahiana.

⁵ Éna nani, tahapapiricavacáhi eta tájiparacana tayeheana eta apaquehe tamauriqueneana. Tásiha, éna achaneana máhecarahanahi ema Viáquenu náuricaipa náitecapauchavaca.

⁶ Vítisera machichahavihi ema Viya. Tisamararacahaviana éna tímátiana ema Viya. Énasera éna apamuriana máimatirahana ema Viya, vahi tiúrimahi eta nasamirahavi. Tásiha, tímaticareanaya éna mávaháruana ema Espíritu Santo. Énerichuvare tímaticareanaya éna mávaháruana ema Váinaraji.

Témunarahiquene ema Viya

⁷ Némunacasareana, tacamunu eta vémunacaca vámutu. Taicha ema Viya tímítucahavihi eta vémunasiracacaya. Vímutu víti vémunacacanáhi, éta pa tímereuchahavihi eta macachichairahavihi ema Viya, yátupíhi eta vímatirahi éma.

⁸ Énasera éna nani vahi tímúnacacana, vahi náimatihini ema Viya. Taicha ema Viya, yátupiquenehi eta máemunaraíva.

⁹ Éma, tíméchahaviripa eta máemunasirahavihi, eta mavanésirahi ema macarichuquene Machicha. Mavanecáhi títeca te juca apaquehe, tíjaracahaviyare eta vítaresirayare máichecuaraqurénapa.

¹⁰ ¡Tétavícava eta máemunasirahavihi! Vítisera vahi vítvainahíni vémunaca ema Viya. Mativahi ema témunacahavihi. Éta máemunasirahavi ema Viya, májjararecháhi ema Machicha. Mavanecáhi tépenayare te crusu étavene eta macaepahairayare eta vipecaturana.

¹¹ Némunacasareana, máetaviucha eta máemunasirahavi ema Viya; tásiha, vítipa tacamunu eta vémunasiracacáina.

¹² Nuvaraha ácaicutiara eta juca: Nájina tímahaina ema Tata Vicaiyaquene. Téhesera víti, te vémunacacapuca, tiávahácahaviya éma. Tásiha, vícutíhi ema Viya eta máemunaraivahi éma.

¹³ Puiti, víti viávahácahi ema Viya, énerichuvare tiávahácahavihi éma. Véchahi eta mávahásirahavihi ema Viya, máichavenehi ema Espíritu Santo mavaneruhi eta viyehe.

¹⁴ Tásiha, viti vicachaneanaripa ema Jesús, vimetacavacapahi namutu ena vímanarua-napahi eta máucupaisiraipa te anuma, taicha vivaraha náimatiyare namutu eta mavane-sirahi ema Viya máiteca ema Machicha ticatiuchahaviyare vimutu viti achaneana te juca apaquehe.

¹⁵ Tacahe, te nararihipuca ena nacahehi: “Ema Jesús machichara ema Viya”; tásiha, tímaticareanahi éna, mávaháruanahi ema Viya, étapa eta návahásirahi éma.

¹⁶ Viti véchahi eta yátupirahi máemunasirahavihi ema Viya. Eta tacahe, vicasiñavahi eta mayehe. Témunarahiquene éma. Tásiha, viti apana, te vémunarahipuca, viávahácaya ema Viya; éma apana, tiávahácaviya.

¹⁷ Vétaviuchaya eta vémunasiraya ena vichamuriana taicha eta viávahásirahi ema Viya. Tásiha, vahi vipicaimahi eta jena sácheyare te viyanapa te mamirahu ema Viya. Vahi vipicaimahi taicha machichahavihi ema Viya, vicutihi ema Jesús eta macachichairahi ema Maiya, tayanapanepuca vítarecarichaha te juca apaquehe.

¹⁸ Ena apamuriana achaneana tipicaracavanahi taicha téchavanahi eta nacaicuñairaya. Vítisera vahi vipicaimahi taicha vicasiñavahi eta máemunasirahavihi ema Viya. Te yátupihipuca vicasiñahi, macaesamiricaya eta visamure eta vipisira. Tásiha, nácani tipicanahi, napicahi taicha vahi nácesiñavahini eta máemunasiravacahi ema Viya.

¹⁹ Viti vémunacahi ema Viya taicha ema mativahi témunacahavi.

²⁰ Te nararihipuca ena nacahehi: “Viti vémunaca ema Viya”; téheserapuca nacati-chaichucha ena nachamuriana, éna tépiyahirahianahi. Taicha náimahanénipuca ena nachamuriana, váhisera náemunacahini, ene tacahehi eta namaemunasirahi ema Viya máimahasiquenehi.

²¹ Eta juca eta mavanairipihí viyehe ema Viya: “Émunacanu nuti yátupiquenehi Viya; émunacavare ena echamuriana”.

5

Virataha vínajica eta tamauriqueneana

¹⁻² Yátupihí eta macachichairahavipa ema Viya vimutu viti visuapanahi ema Jesús eta émairahi ema Cristo. Tásiha, vémunacarine ema ticachichahavihi. Tásiha, te vémunaca ema Viya, téhepa visuapa eta mavanairipiana, tituparacahavi tacutiyareichu eta vémunasiraya namutu ena vichamuriana, taicha machichanaveanahivare éna, viparapenaveanahi te mavahuana ema Viya.

³ Étavene eta vémunasirahi ema Viya, visuapaya eta mavanairipiana. Taicha vahi táyacujicarehini eta visuapiraya eta mavanairipiana.

⁴ Tásiha, viti máchichanaveana ema Viya viratahaya vínajica eta tamauriqueneana eta vítaresiraya. Taicha tímicatachaviripa ema Jesús táichavenehi eta vicasiñairahi eta mayehe.

⁵ Viti visuapahi eta yátupirahi Machicha ema Viya ema Jesús. Tásiha, viti véhicanahi éma, vicarichuhí viti virataha vínajica eta tamauriqueneanahi eta vítaresira.

Ema Jesucristo, Manerejiruhi ema Maiya

⁶⁻⁸ Te títécapa ema Jesucristo, tímerecavapa te juca apaquehe, une eta macaicachasiyahi. Énerichuvare eta máitine máepusairuhi eta máepenirahi te crusu. Tásiha, te vímatiequeneha eta macaicachasirahi te une, étapa eta máepusaisirahi eta máitine, témechahaviripa eta manerejiruichuhi ema Maiya. Eta une étapa eta máitine témechahavipa ema Jesús eta émairaquenehi Cristo. Ema Espíritu Santo, émapa títametacahavi. Taicha ema Espíritu Santo yátupihí eta mametarapiana. Eta une, eta máitine, émapa ema Espíritu Santo, eta juca mapanaquene témechahaviripa. Ticuticacahi eta tacayemaqueneana.

⁹ Tacutihi eta masuapacareva ema mácani achane tiuri. Tiápajucavasea tasuapacarevapaná eta mametarapiana ema Viya mayehe ema Machicha. Ánipa macahe: “Émara nuchicha, némunaruquene ema maca”.

¹⁰ Tásiha, te vicasiña ema Machicha ema Viya, visuapava vicasiñava te visamure eta yátupirahi eta mametasirahi ema Viya. Ena apamuriana vahi nasuapahini ema Viya, náimicutíchapa máepiyahirahihini ema Viya, taicha vahi nasuapahini eta mametarapianahi mayehe ema Machicha.

¹¹ Étarichuvare eta juca eta mametasirahi ema Viya, eta máijarasirahaviripa eta vítaresirayare máichecuarquirénapa. Ema Machicha ema Viya, éma téchahi eta vítaresira.

¹² Ena ticasiñanayare éma, títarecanayare. Énasera nácani vahi ticasiñanahi ema Machicha ema Viya, vahi títarecanaimahi.

Eta vítaresirayare máichecuarquireyare

¹³ Tiuri, némunacasareana, nuvaraha échayare eta ítaresirayare máichecuarquirénapa, taicha ecasiñahi ema Machicha ema Viya. Eta tacahehi eta nujajureirahehi.

¹⁴ Tásiha, tájina táeñamavacarehini eta viyasearuanahi ema Viya, taicha véchahi víti eta masamirahavihi, taicha eta viyasearapiana tásihaqueneanahi eta vímatiequenehairahi eta mavarahaquenehi ema Viya.

¹⁵ Tásiha, véchahi eta májjarasirahaviya tamutu eta viyasearuaana, taicha véchahi eta tasamacarevahi eta viyasearapianahi eta mayehe.

¹⁶⁻¹⁷ Tamutu eta tauriqueneana náichahi ena achaneana, ema Viya máimijarechahi “pecatuana”. Jararihi eta pecatuana tíñehipana mayuchaticavaneya ema Viya eta vítaresira táicha. Jararihivare eta apana pecatuana váhirichu tíñehicha. Te mararhipuca ema mácani vichamuri ticapecaturarahi, eta váhirichu tíñehicha eta máepeniraina; te ímahapuca eta macapecaturairahi, éti eyaseuchaya éma, mayehe ema Viya. Tásiha, ema Viya májjaracayare eta máítaresirayarechaha ema ticapecaturarahi. Téhesera mararhipuca ema mácani ticapecaturarahi eta tíñehipana mayuchaticavaneya ema Viya eta máítaresira, vahi nuvanecahe eta eyaseuchahini ema maca achane ticapecaturarahi.

¹⁸ Vecha eta vahi vímisiapavaimahi tayehe eta vicepecaturairana viti machichanaveanahi ema Viya. Taicha ema Machicha ema Viya tijaneacahavihi vimutu víti. Vahi máratahaimahi ticaetmahavi ema Váinaraji.

¹⁹ Taicha véchahi eta macachichairahavihi ema Viya. Váhisera vámutu. Nararihivi ena apamuriana achaneana machaneranahi ema Váinaraji.

²⁰ Vítisera véchahi eta máítesirahi eta te juca apaquehe ema Machicha ema Viya. Éma tímitupanahavihi. Émavenihi témesenicahavihi mayehe ema Maiya ema yátupiquenehi Viya. Máichavene ema Machicha Jesucristo, viávahácaripa víti ema yátupiquenehi Viya. Émara ema macarichuquenehi yátupiquenehi Viya. Éma, tíjaracahaviya eta vítaresiraya máichecuaraquirénapa.

²¹ Nuchichanaveana, vahi ecucasiñaraji; vahi ecucuti ena achaneana ticasiñarajiana eta achanemirana.

Tamutupa eta juca néchajiriruvanahi eyehe.

Eta macartane ema Apóstole Juan, ticajare 2 JUAN

Eta vémunaraivaya

¹ Nuti Juan, víyarahánupa, nucajurevi eta juca nucartane piti ati. Néchajicavi piti manerejiruhi ema Viya. Énerichuvare némechajirisihavaca ena pichichanaveana. Eti némunaruhequenehi núti, tacuti eta náemunasiravaca namutu ena apamuriana títucana tisuapana eta yátupiquene máechajiriruva ema Viya.

² Viti vémunacahe taicha viciticacahi eta visuapira eta yátupiquene máechajiriruva ema Viya. Máichecuarquirénapa eta visuapiraya.

³ Nuvaraha macatajicahehíni ichape ema Tata Vicaiyaquene, émapa ema Jesucristo, Machicha ema Viya. Nájapanuhehíni, nájaracahehíni eta táurivaina eta epanereruana, taicha yátupiquenehi eta náemunasirahehi.

⁴ Núrisamureinehi eta néchirahi eta nanerejisiravahi ena pichichanaveana, tíurihi eta náehisirahi eta yátupiqueneanahi, tímiyanavanavare eta nasuapirahi eta mavanairipiana eta viyehe ema Tata Vicaiyaquene, taicha ene vicaheyarehi.

⁵⁻⁶ Tiuri puiti, ati, nucajurevi, taicha nuvaraha némechavi eta juca mavanairipi ema Viya, étarichu eta vémunasiracacayare vimutu. Te vémunaca ema Viya, visuapaya tamutu eta mavanairipiana eta viyehe. Te tépanavainapa eta vicasíñairahi ema Viya, tivanecahaviripahi eta vémunasiracacayare. Tásiha puiti, eta ecaheyare eta émunasiracacairayare eta itaresirayare.

Ena tivayuarahiana

⁷ Nuvaraha némechavi eta juca, taicha nararihi te juca apaquehe te viávihahi ena navarahahi ticaetemaheanaya. Ena nani, vahi návarahahíni náimicaeheráchahíni eta máuchusirahi yátupiquenerahi achane ema Jesucristo. Ena nani, tivayuarahianahi, ticatianacanhavare ema Cristo. Vahi návarahahíni véhica éma.

⁸ Tásiha, ecaunevayare tayehe eta navayuarapiana. Échapavachucha éti, machu nacamitisahe tayehe eta ícuchihi ématanevachahi. Nuvaraha ejacapayare tamutu.

⁹ Viti visuapahi eta máimiturapiana ema Cristo, viti viávahácahi ema Tata Vicaiyaquene émapa ema Machicha. Váhiserá návahácaimahi ema Viya nácani vahi návarahahíni nasuapa eta máimiturapiana ema Cristo. Tasapihapa, náimitucahi eta nayehéchiravarichu eta napanereruana.

¹⁰ Tacahe, te náitecapachahepuca te iúrujisiavahi ena nácani, téhesera vahi nacuechajisiha eta máimiturapiana ema Cristo, tasiha, vahi ecujachapa te epenana. Váhivare ecuichuha: “Yare, ani, ítecapauchanu” vahi ecuquicha éna.

¹¹ Taicha te íchapuca eta juca, ticutinapapuca eta étirichuhi nachamuriana ena tivayuarahiana. Váhira ecuimisiapava nayehe, máchura étaina etapiravaina eta juca náichirahi éna eta tamauriqueneana.

Eta táichecuarqui eta macartane ema Juan

¹² Tiuri, júcaríhi apamuri eta numetaruheanaya. Vuíchahasera numetacahemahi puiti te juca carta. Taicha nucunevahi eta nítesiraya eyehe apaesa véchajiricavainapa eta vímanajirisiracacayare. Tásiha, víúrisamurénapa vímutu.

¹³ Téchajicaviana ena suchichanaveana esu péchavi, ésurichuvare manerejiruhi ema Viya. Tamutupa eta juca néchajiriruvahi eyehe.

Eta macartane ema Apóstole Juan mayehe ema Gayo, ticajare 3 JUAN

Ema Juan macunacha ema Gayo

¹ Nuti Juan, víyarahánupa, nucajurevi piti némunaruquenehi Gayo. Núti yátupihí eta némunasirávihi.

² Némunaruquene, nuyaseuchavihi me Viya táurivaina eta pémataneana. Énerichuvare nuyaseuchavivare táurivaina eta pítaresira, tácutini eta táurivaipa eta piáchaneva.

³ Tétavicavahi eta núrismurevahi, te títecapanapa ena vichamuriana, taicha timetacananapa eta pisuapirahi, péhisirahi eta yátupiqueneana echájirirucávana mayehe ema Cristo.

⁴ Tájinarínehi tácuti eta núrismurevahi taicha eta nusamairirisiraparacahi eta éhisirahi eti nuchichanaveana eta yátupiquene echájirirucava mayehe ema Cristo.

⁵ Némunaruquene, tájina táichavahi eta pijacapirahi péchapajirisirahi ena vichamuriana, váhinéni pímatiquenevacáinahini éna.

⁶ Te títecapanapa ani te víurujisíavahi, timetacahavianainapa. Tájina táichava eta piúriava, pímicatasiravacahi eta nayanira ena vichamuriana. Eta picaheyare pímiyanavaini eta piúriava nayehe, taicha eta juca víchirahi tacurismurechayare ema Viya.

⁷ Taicha éna, táimipaicahi eta nacametarairuirahi eta tiuri echájirirucava mayehe ema Jesucristo. Eta napaisirahi, tájina nayaseserecapahini éna nayehe ena achaneana masuápa-jiráirahanaríchaha.

⁸ Tásiha, tavarahaichu eta véchapajirívacava ena nani, apaesa eta vímicatasihaya éna eta nacametarairuiraya eta yátupiquene tiuri echájirirucava.

Eta mamuraivahi ema Diótrefes

⁹ Nucajureripa ena pichamuriana te piávihi. Mararihsera ema Diótrefes. Éma máurica ticainapupuiricava te namirahu ena achaneana. Éma, vahi masuapa eta vituparahana.

¹⁰ Tásiha, te nutiarihinapa eta ara eyehe, núti nitametacaheyare tamutu eta máichaqueneana. Éma, téchajicahi eta veyehe. Cátichacarehi eta máechajiriruvana, váhisera másuapacarehini. Váhivare tácarichu eta juca máichahi. Éma, vahi majacapaimahi ena vichamuriana tipacana. Te natiarihi ena navaraha najacapa, ema maca macavanairipi nacuija nacujacapa. Énerichuvare mavaraha macaerajica te emuri ena tivarahana najacapa.

¹¹ Némunaruquene, vahi picuicutipa ena tíchanahi eta tamauriqueneana. Picutiyaresera ena tíchanahi eta táuriqueneana. Taicha viti víchana eta táuriqueneana, viti machichanaveana ema Viya. Énaserá ena tíchanahi eta tamauriqueneana, éna, vahi náimatihíni ema Viya.

Ema Juan macunacha ema Demetrio

¹² Nutuparacavi pijacapayare ema Demetrio. Namutu nacunacha éma, taicha yátupiquenehi táuriva eta mayeherepi. Núti apanavare énerichuvare nucunacha eta máuriva. Píti pímatinuhi, eta tatupiruvahi tamutu eta néchajiriruvana.

Eta táichecuaraqui eta macartane ema Juan

¹³ Tiuri, jucarihi apamuri eta numetaruvianayare. Vuíchahasera numetacavimahi puiti te juca carta.

¹⁴ Nútijapainapasera eta ara piyehe apaesa nímahavi. Tásiha, véchajiricavainapa eta vímanasirácacayare.

¹⁵ Puiti, nuvaraha májaracavini ema Viya eta piúrivaina tayehe tamutu eta pipanereruana. Téchajicaviana ena piájiriareana. Tásiha, péchajisinanu émanapachuina ena nájiriareana núti.

Tamutupa eta juca néchajiriruvahi piyehe.

Eta macartane ema San Judas, ticajare JUDAS

¹ Nuti Judas néchajicahevaca emutu eti nuparapenaveana nuchamurianahi. Núti mavanerunuhi ema Viáquenu Jesucristo. Éti ímatihí ema nuparape Santiago. Núti nucajurehevaca eta juca nucartane taicha eti apanavare machanerahepa ema Tata Vicaiyaquene, taicha esuapahi eta máichuarapihi. Tétavicavahi eta majaneasirahehi táichavene eta iúrujiasirahi ema Machicha Jesucristo.

² Puiti, nuvaraha tajurucaini eti evapinairavavacahi eta máemunasirahehi ema Viya, étapa eta majapanuirahahi; tájinavare tahapapiricahini eta táuriva eta epanereruana.

Yátupiyare eta náicuñayare eta tivarahanahehi náemejecapavacha ena vichamuriana

³⁻⁴ Tétavicavahi eta nuvarairahi nucajurehe emutu éti, nétumechaheyaere eta éhisiraina ema Viáquenu Jesús. Puítisera nusamairiricapa eta náimisipiravahi eta eyehe ena nácani tépiyahirahiana tímijachavanahi vichamurianahi. Tásiha, nuvaraha ecuneuchavaya nayehe. Étumehacaca, vahi ecusuapavaca ena nánitátajiana, machu náemejecapavachaha. Táimiyana va tauri eta éhisiraina eta véhiruhi. Taicha ena víyarahana apóstoleana tímítuchavíanahi eta máimiturapiana ema Viáquenu Jesucristo. Tásiha, vahi táuricahini vihapapiricahini. Énasera ena nani tépiyahirahiana, tétavicavahi eta namapicauravahi eta me Viya. Éna tímijachavanapa eta vahi máicuñacavacáimahi eta náichira tamutu eta tájiparácana taicha tétavicavahi eta máemunasiravaca. Tavetijipa tíñemahipanapa jararihiva eta náimiturapi, ániapa nacahe: “Vahi típicachacare ema Jesús, váhivare táuricahini vácahehi émara Viáquenu. Te échajisihapuca éma, tatupiruvachucha ‘Jesús’ íchayare, taicha vahi émaina téchahavi víti” tacahehi eta navarahaquene éna. Máimahainepasera ema Viya eta náicuñayare éna, taicha acanevacaipa eta mametarapi ema Viya: “Muracaqueneya eta náicuñayare namutu ena ticaecahinuanahi eta némunasiravacahi”.

⁵ Németeaca éti écharipa eta náichararacavahi ena víachucanaveanaini israelítana eta náuchusirapa te avasare Egipto. Nuvarahasera némechahe émahí ema Viáquenu ticuchucuhavacahi namutu éna. Téhesera te táequenepa, tétavicavahi eta namasuapajiravahi ena namutuyaréni. Tásiha, máitapaimuríhapa ena masuapajirairahanahi.

⁶ Énerichuvare némechahe eta náichararacavahi ena ángeleana masuapajirairahanahi. Ena nani aguenucarahanaini te anuma, sántuanainihí. Tímisiapavanapasera tayehe eta tauriqueneanahi. Tásiha, ema Viya macavanairipipa eta náiyaracuha ena ángeleanaini téjecipavanahi eta te timapicu infierno, nacaerataiyahi. Puíticha váhiquene títurucavanaimahi tíuchucana. Te jena sácheyaere mayaseseresihaya ema Viya, muracayare eta náicuñayare namutu éna.

⁷ Échahivare eta náichararacavahi ena achaneana ticavasanahi te apinaquene avasare Sodoma étapa eta Gomorra, étapa eta avasarechichana te tachacayanahi. Éna, tétavicavahi eta tavayuchiravacahi eta náesenamarevana. Navetijipa ena tivehacacana ajairacacana. Tacutiya eta tájjahúchiravahi eta máemecharesiravacahi ema Viya ena ángeleanaini, macamiricahi eta yucu, tájjuchavacapa namutu ena nani achaneana váinarajiqueneana. Eta juca tavaraha yátupina vicaicutirahi tayehe eta nacaicuñairavacayare eta te yucu infierno namutu ena tíchanahi eta tauriqueneanahi. Máitavacacainapa eta nacatajivairaya.

⁸ Táitusiava, vahi náechavahini ena nani tímisiapavanahi eyehe. Navayucharichucha eta náechipejisirahi eta náquehe taicha tétavicavahi eta tavayuasiravacahi eta natuhusivana. Ena nani tépuruanahi ema Viáquenu eta émairahi téchavacahi. Nacaecahihivare ena ángeleana tíamana eta majaravahi ema Viya.

⁹ Vahi táurihini eta juca. Nuvaraha némechahe eta jena sache máepenirahi ema víyarahaini Moisés, ema Váinaraji mavaraha mámayarehini eta máquehe. Ema Váinaraji macanarapa ema Arcángele Miguel, mavaraha máimiyusemaca. Váhisera masemahini ema Miguel. Váhivare macajacharecahini. Ániapa máicha: “Páurevisami píti. Pímahaya eta pícharacavayare maicha ema Náquenu” máichapa.

¹⁰ Énasera ena nánitátajiana achaneana, vahi napicaurahihini. Tíjaracavana nacaecahi jácani tájjahánapuca váhinéni náimatiequeneha. Éna nacutihi eta sárareana. Tinicanahi, téranahi, esenamareanahi. Nájina tatsiriháquenénahe. Étapa tímicuñacavacaya.

¹¹ ¡Páureanasami ena nani! Muracayare eta náicuñayare te yucu, taicha nacutihi ema Caín eta mamasuapajiravahi me Viya. Nacutivare ema Balaam ema témejecapavacachavacahi

ena achaneana eta mavarairahi eta plata. Nacutivare ema Coré ema tépuruhi ema mavaneruhi ema Viya. Éta pa tiviuchahi eta macapasirahi ema Viya.

¹² Tétavicavahi eta natsirihacarevahi eta náimisiapiravahi eyehe te iúrujisiravana eta énisirana ena echamuriana. Taicha éna, tájina napícauchaquenénahíni eta náurisamurevahi te nanisirana, náerirana. Éna, navarahahi epicauchavacayare éti, navarairahi ticaetemajiricaheana. Ena nánitátajiana nacutihi eta úcájiana te ichape sácherehi. Ticutimahi tiquivayarehi. Tétaticavachuchasera eta támaphi. Tájina taquivahini. Nacutivare eta yucuquiana máhiriquireana te ticahipaipa eta apamuriana yucuquiana tachamuriana. Tamapuruji eta vicuchapirahi eta náichirahi eta táuriqueneana taicha nacutivare eta yucuquiana tájiqueruana vinereruana, tépurihapa. Váipaque ne tímarucaimahi.

¹³ Éna, nacutivare eta táepacuruha eta une te tétaticavapa muraca eta ichape une, camurihi eta tarisasama. Tétavicavahi eta tatsirihacarevahi eta náichaquenehi eta tamauriqueneana. Nacutivare eta jarariquiana tiyejerecavana. Jararihisera eta nacaicuñaiyayare eta ichapequene timapicu. Máitavacayare eta nanasirayare.

¹⁴⁻¹⁶ Ena nánitátajiana, tétavicavahi eta nacaecahirahi tamutu. Étachucha natanucahi eta najamuraraivana. Ticasínavavaicana eta náechajirisiravana. Nacunachahi ena ticaimahaqueneanahi, navarairahi nacaetemajiricavaca éna. Ticaicuñayaresera, taicha ema víyarahaini profeta Enoc acane máimaha te mavapure eta náicuñayare éna. Ánipa macahe: “Nímahahi te nuvapure eta máitecapirayare ema Viáquenu te juca apaquehe. Mámavarepahi namutu ena mayeheana ángeleana. Tétavicavahi eta nasimutuvahi. Nacuru-jicavayare namutu ena ticapecaturarahiana. Náimerecayareva tamutu eta naviurevana ena achaneana váinarajiqueneana, taicha tétavicavahi eta náichirahi eta tamauriqueneana. Navetijnapa ena ticaecahirahiana me Viya, ichapepanainapa eta naviureva” macahepa. Tétavicavahi eta masuapacarevahi ema víyarahaini Enoc, taicha mámariequenehi ema Adán, sántoquenehivare éma.

Éma Judas matuparacavaca ena machamuriana

¹⁷ Nuvarahavare némechahe, eti nuchamuriana némunarqueneana, eta nametarapi ena víyarahana apóstoleana mayeaneanahi ema Viáquenu Jesucristo.

¹⁸ Ánipa nacahe: “Vahi táyerémahi eta náuchujisirayare ena ticaecahirahiana tayehe eta táuriqueneana máimiturapiana ema Viáquenu. Váhivare návarahahíni náinajica eta tamauriqueneana” nacahepa.

¹⁹ Puiti numetacahe: Natarihipa puiti ena ticaecahirahiana. Tímaticareana éna, taicha navaraha náiputsicavaca ena vichamuriana. Étachucha natanucahi eta najamuraraivana. Éna, vahi návarahahíni émainahíni máechavacahini ema Espíritu Santo.

²⁰ Étisera némunarqueneana, étumechacacaya eta éhisirahi ema Viáquenu, taicha tétavicavahi eta tasantuvahi eta véhiruhi. Ísapavayareva tímutucahe ema Espíritu Santo eta eyujarauchirana.

²¹ Tauri eta itaresira, vahi ecuemitiscavahini eta táetaviuchiravahi eta máemunasirahehi ema Viya. Váhivare ecuyacujihini eta ecuchapirahi eta jena sácheyare táepaniravaya eta vítaresira. Máitavacayare eta vítaresiraya taicha eta majapanuirahavihi ema Viáquenu Jesucristo.

²² Étumechayare ena echamuriana nácani tipanerechanaripa náehica ena tivayuarahiana.

²³ Ena apamuriana, ena téhicanaripa eta náepiyahiravana, epamicayare éna apaesa tachava eta náehisiraina yátupina ema Viáquenu. Ecuchucuhavacayare eta náejecapiravana, tacuti te vicuchucuhahi eta víyereruvana te tñahúchavapuca tiju eta vipena. EJapanuyare nácani muracaripahi eta náejecapiravanahi. Ecuneuchavasera, machu napareacahe eta náejecapiravana, taicha tétavicavahi eta tamauriva. Epicayare éta.

Tétavicava eta vicunachirahi ema Viya

²⁴⁻²⁵ Éma Viya, tétavicava eta máitupajjiasiravahi. Macarichuhi éma marataha ticatiuchahavi tayehe eta vícuchinihi vícuñayarehini, taicha mavanecahi máepeninahaviya ema Machicha, ema Viáquenu Jesucristo. Puiticha tétavicavahivare eta majaneasirahehi éti apaesa vahi ecuquipaicavahini tayehe eta pecatu. Taicha mavarahahi máepachinachayare eta íachanevana, tacujahivaréni eviurevaina eta mámiraheyare te mamírahu te jena sácheyare. Tétavicavainapa eta iúrisamurevaya te ímahapa eta majarivaquenehi. Acane nacunachanahi ena ángeleana. Énerichuvare víti, tétavicavayareva eta vicunachiraha éma vimutu víti, taicha tétavicavahi eta máramicarevahi taicha ichapequenehi eta máitupajjiasirava. Vépuymiraucha eta víjarasirava visuapayare. Máitavacayare eta vitsiusirayare éma. Amén.

Eta mametacasivanahi ema Apóstole Juan te mavapure, ticajare APOCALIPSIS

¹ Ema Tata Vicaiyaquene mavarahahi tímimatichahaviyare eta táijahúchiravaya táicharacavayare eta apaquehe, apaesa vecha viti mavanaranahi. Ema máimechahi eta juca, ema machicha Jesucristo. Tásiha, ema Jesús mavanecapa ema ángele timetacanuyarehi nuti Juan mavanarahi. Eta tacahe, nájuchahi puiti eta juca apaesa écha éti apanavare eta táichararacavayare.

² Tacuti eta yátupihí eta nucametarairuirahi nútí eta máechajiriruvana ema Viya, étarichuhi eta máimiturapiana ema Jesucristo, puiti nutupiruva numetacahe eta juca numetacasivanahi eta máimerunuanahi ema ángele.

³ Tétavicava eta náuricacarevaya ena téchajicuhanaya eta juca máechajiriruvanaahi ema Viya, eta máimitatirunuhi. Énerichuvare tétavicava eta náuricacarevaya namutu ena tisamanaya tisuapanaya eta juca. Taicha tiánehinapa eta táitavirayare tamutu.

Ema Juan macajure ena siétemuriqueneana machamuriana

⁴ Nuti Juan nucajurehe eti siétemuriana nuchamurianahi ejanereruanahi tayehe eta tinapaica te Asia. Nuvaraha macatajicahehíni ichape ema Tata Vicaiyaquene, émapa ema Jesucristo. Táurihivaréni eta epanereruana. Ema Tata Vicaiyaquene matiarhiquenehi te tépanavainapa, puiti manasirichuhi eta viyehé, émarichuva manasiquenezare te táitavapa tamutu. Te tamirahu eta máejasihahi trono, natirihi ena siétequeneana mayeheana arcángleana. Navarahavire eta iúricacarevainaini.

⁵ Ema Viáquenu Jesucristo, ema yátupiquenehi tiámaparauchahavihi eta juca vímitucasivanahi. Énerichuhivare ema máinapuiruhi téchepuca te máecari, apanapa eta máquehe. Éma, yátupiquenehi Rey. Namutuhi macachuriacavacaya ena réyeana te juca apaquehe. Éma, yátupihí eta máemunasirahavihi, masipasinahavihi eta viáchanavana tayehe eta vipecaturana te máitine máepusairuhi.

⁶ Énerichuvare, tinacahavihi te namuri ena manerejiruanahi tuparairucahaviyarehi eta mayehe, mavarairahi viyujaracaráhiyare mayehe ema Viya. ¡Támutihini sácheana vicunacha eta máitupajijiasiravahi! ¡Viáramiparahini eta aquenucairahi! ¡Amén!

⁷ Ímaha, márajapainapa ema Cristo. Támayarepahi eta úcaji. Namutuyare nanecapa ena achaneana te juca apaquehe. Náimahainapa, tásiha, tipicanainapa. Tíyahacavanainapa eta náimairayare, énaripa ena námariqueneana ena tijarachanahi, taicha téchavanahi éna eta nájeapiravahi ena náchucanaveanaini. ¡Ene tacaheyare! ¡Máitecapavanepaini!

⁸ “Nútira nunacuchahi eta táepaniravahi eta apaquehe. Nútirichuvare nécha eta táimiyairavaya tiuri. Néchayareva eta táitavirayare tamutu” macahehi ema Viya, tétavicava eta máitupajijiasirava, máituruequenehahi tamutu. Éma, matiarhiquenehi te tépanavainapa, puiti manasirichuhi eta viyehé, émarichuva manasiyare te táitavapa tamutu.

Eta máimeresirava ema Jesucristo mayehe ema Juan

⁹ Nuti Juan, nútirichu echamurinuhi. Nútirichuvare ecutiquenenuhi tayehe eta vicatajivairahi, vicamichahisera tamutu taicha tétumechahavihi ema Jesús. Taicha vicunevaipahi eta visiapirayare te mávasa, aquenuchaviya.

Núti, táquijicanuanahi tayehe eta tíurupuhi ticajare Patmos te etupiereca mar, táichavenehi eta nucametarairuirahi eta máechajiriruva ema Viya, néchajisihairahivare eta májare ema Jesucristo.

¹⁰ Te jena sáchequenehi lumincuquenehi, ema Espíritu Santo tímimahanuhi eta mavarahaqueneana tímechanu ema Jesucristo. Tacahehi eta táepaniravahi eta máimimahaqueneenuhi. Tatívapa nusamahi eta mahu ema émana te nuquecu. Muraca eta máechajisiranuhi. Tirrehucha eta nusamirahi.

¹¹ Ánipa macahehi:

—Piájuchaya tamutu eta juca pímahaqueneanaya. Pímiamarecapa eta piájure nayehe ena siétemuriqueneana pichamuriana: ena tiávihanahi te Efeso, ena tiávihanahi te Esmirna, ena tiávihanahi te Pérgamo, ena tiávihanahi te Tiatira, ena tiávihanahi te Sardis, ena tiávihanahi te Filadelfia, énapa ena tiávihanahi te Laodicea* —macahepa.

* 1:11 Tamutu eta jucana avasareana tiávihanahi te provincia Asia. Puíticha eta juca provincia ticajare Turquía.

¹² Tacahe, néviurucavapa. Nuvarahapa nímahayarehi ema téchajicanuhi. Tásiha, nímahapa eta siete candelero tiúquiána, amairiha oro.

¹³ Te enumuhumuri eta siétequene candelero, matiaríhi ema achane vivasimahi. Tiúmaji eta mamuiríha. Títecapa te máivapeana. Ichapeme eta máitíjuhé, títecapa te matupa. Amairíhava ore. Eta máitíjuhéhi táicutiaríhi eta aqenucairíhi éma.

¹⁴ Eta machutímaca amairíha títapu, tirapepejicaquenehi. Eta máuquihana, tétavíjavahi eta tavayuhauquiráivahi.

¹⁵ Eta máivapeana títanunupevachava, tacuti eta bronce eta títanunúsira. Eta mahu, tétavíjavahi eta tamuracavahi eta marurehuchiráhi.

¹⁶ Te mavahu vaure, macaratacahi eta siete jarairíquiána. Te majaca tiúchucahi tavasi-mahiyaréni eta espada. Táetavíuchahi eta tacasíriva, títunapehíva. Eta mamíra, tétavíjavahi eta táeramemesiráhi tacuti eta sache.

¹⁷ Nupicarínehi eta nímairíhi. Náquipaíjavapa te máivapeana. Tíánehi népenáini eta nupísiráhi. Émasera manacapa eta mavahu vaure te nápusi. Máichanupa:

—Vahi picupícanu. Nútíchucha nuti nunacuchahi eta táepaníravahi. Nútíríchuvare nécháhi eta táitavíravare tamutu.

¹⁸ Núti yátupíquenénu nucaítarecaráhi, taícha nuchavahi nítareca te táequenepa eta nacapasíranuhi. Puiti máíchequarquírenapa eta nítaresíra. Nútíríchuvare nechá ena tépenána. Nucaechepucayare eta náqueheána ena náepenaqueneána nácani níchuhaqueneána-yare.

¹⁹ Pítí Juan, píájuchayare eta júca pímahaqueneánahi puiti, étapa eta písamaqueneánahi nutuparáruvíanahi nayehe ena píchamuríána, étapa eta táíchararacavayare nímechaquenevéiyare.

²⁰ Numetacavíya eta tacayemaquenehi eta siétequene jarairíqui nucaratáruhi te vaure, étapa eta siétequeneána candeleroána óroquiána. Éta júca siete jarairíqui, éna ena tícametaríruráhiána nayehe ena sítemuríqueneána píchamuríána. Eta siete candeleroána, éna ena sítemuríqueneána nuchanéra.

2

Eta mametarapi ema Jesús nayehe ena machaneránahi ticavasanahi te Efeso

¹ “Pícajúreyare eta júca numetarapíánahi ema tícametaríruráhi nayehe ena píchamuríána ticavasanahi te avasare Efeso: Núti íáquenunúhi taícha núti nucaratacáhi eta siétequene jarairíquiána te nuvahu vaure. Núti návíhíhi te tamurí eta siétequeneána candeleroána óroquiána, táicutiaríhi eta néchiráhehi emutu éti.

² Núti nímati tamutu eta íchaqueneánahi, étarípa eta tamuracavahi eta ecaemataneasíranuhi, ecamíchiráhi tamutu. Váhíva íúrícháini ecaquíquíhíni ena achaneána váínarájána. Váhíva ejaçapáhíni ena tépiyacavanapáhí apóstoleána, ímatíacavanehi éti ena tépiyahírahíanapáhí.

³ Nímátíhe eta ecamíchiráhi tamutu eta íátájívanahi táíchavenehi eta ecaemataneasíranuhi núti. Vahi eyacujíhíni.

⁴ Jucaráhísera eta júca evírevahí nuyehe. Puiti ecamítícarípa eta émunaráívána. Vaípa tácutíhíni eta émunaráívanahi te épanaváinapa.

⁵ Puiti nuvaráha étupíríçayare eta júca, tachava eta émunaráívahí. Éneuchavaya tatívána apaesa íchavare eta táuríqueneána tacuti eta acane. Te vahi ecuetupíríçava, nútíçaravayare níteca, nítsívachayare eta candelero ícutiaríhi eyehe.

⁶ Éti, ecunachacaréhi eta ecatíchiráhi eta tamaetupísíravahí eta nayeherepíána ena aparuríána téhícanahi ema Nicolás. Ene nucahehi núti, nucatíçahíva eta nayeherepíána.

⁷ “Ema Espírítu Santo tímítucaheyare eta júca numetarapíána eti nuchanéranahi. Etupírúvayarehi esuapa. Emutu eti ecamíçanahi, ímíyanaváhíva eta éhísíranuhi, nucasípaheyare núti tayehe eta paraíso ícumunahi me Tata. Nénaçheyareva eta tahi eta yucuquí tíama eta táuríçarevayare eta ítaresíra.

Eta mametarapi ema Jesús nayehe ena machaneránahi ticavasanahi te Esmirna

⁸ “Pícajúreyare eta júca numetarapíánahi ema tícametaríruráhi nayehe ena píchamuríána ticavasanahi te avasare Esmirna: Núti nunacuchahi eta táepaníravahí. Nútíríchuvare nécháhi eta táitavíravare tamutu. Nuti nacaparúhi, nuchaváhísera nítareca.

⁹ Núti nímati tamutu eta íchaqueneánahi, eta ecatajívairáhi, étapa eta epaureravanahi. Tétavíçavahísera eta íúríçarevahí, tímícutíçíçaváipáhí ríçohénáhíni. Nímátíva vahi esemáhíni taícha eta épíyaqueneánahi nayehe ena tímíçavánahi machanéra ena Víya. Mávaháruánahi ema Váínarají, machanéranahíva.

¹⁰ Vahi ecupica eta ecatajivairaya. Numetacahe: Ema Váinaraji tímisiapaheya te cárcel eta máitsameresiraheya te tímijnajicaheyarepuca. Ecamichachusera, taicha diésquenerichu sache eta ecatajivairayare. Nutuparacahecha: Ejicapaicayare tayanapanepuca nacapacaha. Núti njaracaheyare eta táitsivayare. Tiúriyare eta ítaresiraya.

¹¹ “Ema Espíritu Santo tímítucaheyare eta juca numetarapiana eti nuchaneranahi. Etupiruvayarehi esuapa. Emutu eti ecamichanahi, ímijanavahivare eta éhisiranuhi, nucuchucuaheyare. Vahi ecatajivaimahi tayehe eta nacatajivairayare te yucu ena masuapajirairahanahi.

Eta mametarapi ema Jesús nayehe ena machaneranahi ticvasanahi te Pérgamo

¹² “Picajureyare eta juca numetarapianahi ema ticametairurahi nayehe ena pichamuriana ticvasanahi te avasare Pérgamo: Núti nítuca némecharecavaca nácani téjcapavana taicha nucayehe eta espada, táetaviurequenehi eta tacasiriva.

¹³ Núti nímati tamutu eta íchaqueneanahi. Nímativare eta éñamiravahi taicha namutuyaréni ena échacayapenána téhicanahi eta máimiturapi ema Váinaraji Satanás. Váhisera ínjacavahini, étumehavaichucha eta éhisiranuhi núti. Étaripa te ímahapa eta nacapasirahi ema nuchaneranahi Antipas, yátupiquenehi eta masuapiranuhi éma. Ena machaneranahi ema Váinaraji nacapacahi éma te jena iávihihi éti.

¹⁴ Jucarihisera eta juca eviurevahi nuyehe. Taicha ísapavaichucha natiarihihi ena nanerejiruvana ena echamuriana vahi návarahahini náinjica nanica eta tinicacare nayujaravarehi te tamirahu eta nasiñarajiana. Tacutiquene esenamareanahi éna. Eta acane, ema máratátaji Balaam tímítucahi ema Balac eta máimiauipaisiravacahi ena israelítana tayehe eta juca tauriqueneanahi.

¹⁵ Énerichuvare nararihi ánaqui te emuri ena apamuriana váhivare navaraha náemitisica eta máimiturapiana ema Nicolás. Tétavicavahi eta nucatichirahi núti eta máimiturapiana ema Nicolás taicha tétavicavahi eta tamaetupisiravahi.

¹⁶ Eta tacahe, éneuchavayare eti éjcapavanahi. Te vahi ecueneuchava, nútijapayare némecharepanaheyare tayehe eta tacasiriquene espada táuchurequenehi te nujaca.

¹⁷ “Ema Espíritu Santo tímítucaheyare eta juca numetarapiana eti nuchaneranahi. Etupiruvayarehi esuapa. Emutu eti ecamichanahi, ímijanavahivare eta éhisiranuhi, nénicahayare eta ícuchihi me Viya eta ticajare maná, tayumururevaquenerichaha. Énerichuvare njaracahevacyare eta tijapu mari. Eta te mari tatiarihiyare eta ajureca arapiru. Nájinasera tímatiequenehaimahi. Macarichu ema ticayeheyare, éma tímatiyare eta máijare arapiru.

Eta mametarapi ema Jesús nayehe ena machaneranahi ticvasanahi te Tiatira

¹⁸ “Picajureyare eta juca numetarapianahi ema ticametairurahi nayehe ena pichamuriana ticvasanahi te avasare Tiatira: Núti Machichanuhi ema Tata Vicaiyaquene. Núti nímatihí tamutu, taicha tijarahivaca eta núquihana, tétavicavahi eta tavayuhauquiravahi. Eta nívapeana tijanunucavacava tacuti eta bronce eta tajanunusirahi.

¹⁹ Núti nímati eta íchaqueneana. Nímativare eta émunasiranuhi, eta esuapiranuhi yátupi, eta échapajirisirahi ena achaneana, étapa eta ecamichirahi. Nímativare muracapanaipahi eta ecaemataneasiranuhi. Tiápajucavaipahi puiti tayehe te épanavainapa.

²⁰ Jucarihisera eta juca eviurevahi nuyehe. Ísapahi tisiapamurihahe esu esenátátaji. Ésu, vahi táetupicavahini eta suyeherepiana, sucutihi esu Jesabélnitátaji eta acane. Tímijachavahi mavanara ema Tata, suémejecapavachahisera ena nuchanerana. Suímitucavacahi naicha eta piesta, tásiha nanicavare eta tinicacareana nayujaravareanahi te tamirahu eta nasiñarajiana. Suímitucavacavare eta natuhusivayare.

²¹ Núti íchapemurihi eta nucuchapirahi ésu, eta suéneuchavahini, apaesa suínajicahini eta sutuhusiva. Váhiquenesera suvaraha suínajica eta suyeherepi.

²² Puiti njaracayare eta suícuñayare. Ticajumayare apaesa suíveca te sucamane. Ichape eta sucatajivairaya. Énerichuvare ena suítrevanahi, nícuñacavacayareva muraca, te vahi nacúnajica eta suíchaqueneanahi ésu.

²³ Énerichuvare ena suchichanaveana njaracayare eta najumayare, nímicapasiravacayare. Tásiha, échainapa eti nuchaneranahi eta nímatirahi tamutu eta epanereruana, eta te esamureana éti. Nímahainepasera núti eta nícharacavacayare ena téjcapavanahi, étapa tiámayare eta náichaqueneana.

²⁴⁻²⁵ Tájina apainahini eta eviurevahi nuyehe. Núrisamurehi eyehe eti matapiravareanahi, eti vahi éhicahini eta suímiturapiana esu esenátátaji. Váhivare ávarahahini íjaracava éhica eta suhiapemarevanahi, susiñavavairisirahi eta máimitusirahi ema Satanás. Tásiha puiti, nutuparacahe eti nuchanerana iávihanahi eta te avasare Tiatira: Ecaratacava muraca tayehe eta juca éhiruhi. Ecunenuyare eta nuchaviraya.

²⁶ “Emutu eti ecamichanahi, ímiyanavahivare eta éhisiranuhi, váhivare ínajicahini eta ecaemataneasiranuhi, núti níjaracahénapa eta tuparairucairahénapa tayehe eta avasareana.

²⁷ Ecutinuyare núti eta májjarasiranuhi ema Tata Ticachichanu eta tamuracavahi aquenucairanuhi. Ene ecaheyare éti. Muracayare eta aquenucairahéyare. Ecaratacayare eta etsucurupayare fiérroqui. Esuapacareyare muraca.

²⁸ Tétavicavayare eta ejaravayare nicha núti, taicha nujupahaheyarehi éti.

²⁹ Ema Espíritu Santo tímítucaheyare eta juca numetarapiana. Emutu eti nuchaneranahi, etupiruvayarehi esupa.

3

Eta mametarapi ema Jesús nayehe ena machaneranahi ticavasanahi te Sardis

¹ “Picajureyare eta juca numetarapianahi ema ticametairurahi nayehe ena pichamuriana ticavasanahi te avasare Sardis: Núti néchavacahi ena siétequeneana arcángelleana, étipa eti ecametarairurahiana taicha núti távamiraurehi eta siétequeneana jarairiquiana. Núti nímati tamutu eta íchaqueneana. Ena achaneana tímijachanahi tíurihi eta ecaemataneasiranuhi. Nútisera nímararacahi eta esamureana. Nímatithe tíánehí eta ínajisirainapa eta éhisiranuhi.

² Ecaunechavayare apaesa vahi ecuemitiaca eta éhisiranuhi. Taicha nímararacahi núti vahi tátupiruvahini te esamureana eta ecaemataneasirahi ema Tata.

³ Puítisera, éneuchavayare apaesa tacuujapa ecuichiravaina. Échavayare éti tamutu eta ímitucasivanahi. Yátupina eta éhisiraya. Te vahi ecuetupiricava eta epanereruana, nútijapayare tñjahúchavayare eta nítecapirayare némecharepanaheya.

⁴ Váhinéni ámutuhini éjecipavahini éti ecavasanahi te Sardis. Natarihihi ena matapiravareanahi, váhivare náechipejicavahini. Ena nani, níjaracavacainapa eta namuirihayare tijapu. Ticachanenuanayareva taicha tatuparacahi eta návihairayare eta nuyehe.

⁵ “Emutu eti ecamichanahi, ímiyanavahivare eta éhisiranuhi, níjaracaheyare ecamuirihayare eta tijapu. Váhivare nucaepahaimahi eta íjareana tayehe eta libro tiama eta nalista ena náitareruanayare. Nímimatchaheyareva eta me Tata, énapa ena ángeleana.

⁶ Ema Espíritu Santo tímítucaheyare eta juca numetarapiana. Emutu eti nuchaneranahi, etupiruvayare esupa.

Eta mametarapi ema Jesús nayehe ena machaneranahi ticavasanahi te Filadelfia

⁷ “Picajureyare eta juca numetarapianahi ema ticametairurahi nayehe ena pichamuriana ticavasanahi te avasare Filadelfia: Núti yátupiquenénuhi Viya, yátupiquenehivare eta nusantuva. Nucarichu núti néchahi eta tapajacura eta arairuyare avasare Jerusalén, tacuti eta máechapajirisirahi ema náchucaini rey David eta táinapuiruínihí Jerusalén.

⁸ Núti nímati eta íchaqueneanahi eta ecaemataneasiranuhi. Nímahahivare eta vahi camurihénahini. Nímahivare eta ecatajivairahi, váhisera ecaínajiruvahini eta éhisiranuhi. Ímiyanavahivare esupahi eta nímiturapiana. Tásiha, puiti níjaracavayare eta apana ématanerépiya. Nájina nísapaimahi tihapapiricaheánaimahi eta ítauchiraya éta.

⁹ Núti nítahacavacayare ena israelítana tépiyacavanahi machanerana ema Tata, machaneranahisera ema Váinaraji. Nucaepuyucavacayare te emirahu, apaesa náimati eta némunasirahéhi.

¹⁰ “Éti, ítauchahi eta nuvanairipi eta ecamichiraya tamutu. Eta tacahe, nujaneacaheya núti apaesa vahi tacuimivehahe te táitecapapa eta nucaetemajirisiravacayare namutu ena achaneana távapahianahi te juca apaquehe.

¹¹ ¡Tíánehípa eta nuchaviraya! Étumechavaya eta éhisirahi, machu émepurureca ejacapi-rayare eta ícuchianayare.

¹² “Emutu eti ecamichanahi, ímiyanavahivare eta éhisiranuhi; nítisrijicavayare eyehe. Máichecuaraquireyare eta ecachaneraya ema Tata te mávasa. Iámayare eta májare, étapa eta níjare arairu. Iámayarevare eta tájjare eta arairu Jerusalén, taicha tachichahevacaya.

¹³ Ema Espíritu Santo tímítucaheyare eta juca numetarapiana. Emutu eti nuchaneranahi, etupiruvayarehi esupa.

Eta mametarapi ema Jesús nayehe ena machaneranahi ticavasanahi te Laodicea

¹⁴ “Picajureyare eta juca numetarapianahi ema ticametairurahi nayehe ena pichamuriana ticavasanahi te avasare Laodicea: Núti náichasa ‘Ema títaurahi’. Námaphi eta yátupiqueneana táuriqueneana echajirirucava. Núti tájnaquenéhi néjequiha. Núti nítachahi tamutu eta mapanereruanahi ema Tata, te népiyacapa eta anuma étapa eta apaquehe.

¹⁵⁻¹⁶ Eta juca numetarapi eyehe éti: Nímati eta íchaqueneanahi. Éti apáesasajíruichucha eta éhisiranuhi. Éti, vuíchaha ímereuchavahini eta ecatianasiranu; váhisera yátupinahini tatupiruvahini eta éhisiranuhi. Tacamunúinehi átupiruvahini, yátupinahini ímerecava eta éhisiranuhi. Machu étaina taviuchahe eta nucaerajisirahéna nuyehe.

¹⁷ Taicha éti ímijachavahi rícohe, tájina íchiravainahini, tájinavare ácamunuhini. Vahi esamauchavahini íchapemurihi eta éjapanuravahi. Váhinene rícohenahini. Etiinéni ecáijare páureana, púchuquiána, mamuiriareana.

¹⁸ Nuvaraha nuconsejachahe: Te evarahapa yátupina eta erricovayare, íteca eta nuyehe. Jéhevare núti núrichaheyare, ecutiyare ena ticayeheana eta yátupiquene oro. Jéhevare núti níjaracaheyare eta emuirihayare tíjapu apaesa vahi ecutsiríha te numirahu. Nétsarachaheyareva eta ípuruji apaesa ímairirica.

¹⁹ Núti nétupiricaya eta napanereruana namutu ena némunarua te nájecapava. Te vahi nacusuapanu, némecharecayarehi. Tásiha éti, títiparacahehi étupiricavane eta epanereruana, étumechavavare tayehe eta éhisira. Éneuchavare apaesa tacuíja ecuichiravaina.

²⁰ Núti nujapanurahi. Nuvaraha tachava eta vicachaneracacahi. Vaipa ecuvéuisiha eta nuyehe. Íchuhánvare. Víápechava vivapínava eta véchajirisiravaparacaya*.

²¹ “Emutu eti ecamichanahi, ímíyanavahivare eta éhisiranuhi, núti nucaejacahevacayare tayehe eta néjasihayare, tacutiyare eta néjasirahi te mavaure ema Tata, taicha eta nétumechiravahi nucamichirahi tamutu.

²² Ema Espírítu Santo tímítucaheyare eta juca numetarapiana. Emutu eti nuchaneranahi, etupiruvayare esuapa” tacahehi tamutu eta máechajiriruvana ema Víáquenu eta eyehe.

4

Ema Juan máimaha eta natsiuresira te anuma

¹ Te táequenepa eta juca, nímahavarepa eta téjiacahi eta anuma. Nusamavarepa eta mahu ema émarichuhi ema tínapucahi téchajicanuhi. Tirurehucha eta mahu. Tíchuhánupa, ánipa macahe:

–Yare, piápana. Nuvaraha nímechaviyare eta táicharacavayare puiti juca vicáijuheyare –macahepa.

² Tacahe, eta nusamirahi eta íchuarapi, ema Espírítu Santo tíjaracanupa eta nucaicutiarairayare tamutu eta nímahaqueneanayarehi. Tíjahúchavapa nímaha ema Víya, téjacahi te trono te anuma.

³ Tíáramicarehi eta máimahi. Tétavicavahi eta máurinavahi. Eta máimahi tacuti eta tajanunusira eta márijahi jaspe étapa eta cornalína. Te tachachacuana távihahi eta trono, tétavicava eta tajaravahi tacutiyaréni eta táimahi eta ahe eta táurinava. Véresera eta táimahi.

⁴ Távihahi eta íchape trono, tatiarihivare te tachachacuana te véinticuatro trono. Natiarihivare ena véinticuatroanavare téjacanahi tayehe, víyarahana tuparairucana. Tíjapu amairiha eta namuirihana. Namutu ticayeheana corona te nachutiana, amairiha oro.

⁵ Tásiha, nímahahi eta térameca tásihaquenehi tayehe eta trono. Nusamavare tírrehuchanahi. Ticaemapa. Tásiha, tatiarihíhi te tamirahu eta trono eta siete tíjarahivaca tacutiyaréni tanene eta yucu. Énahi ena sítequeneana arcángeleana mayeheana ema Víya.

⁶ Tíjararacavare te tamirahu eta trono tacutipa eta tajarahivahi eta íchapequene une.

Natiarihivare ena cuátroqueneana tíjanearecanahi te machacaya ema Víya. Éna, ecutiarrareana eta máitupajjiasirava. Tacutimahi tícauquihavacahi te namirahu téhepa nachepa. Amairiha eta náuquihana.

⁷ Eta tínapuca tavasimahiyaréni eta sárare táíñehiquene*. Eta apana tavasimahiyaréni eta torillo. Eta apana tacutimahiyaréni achanemira. Eta apana tacutimahiyaréni eta íchape mátili tíararairicahi.

⁸⁻⁹ Tacahe, ena nani cuátroqueneana ecutiarrareana tíávihanahi tayehe eta trono, sáisivaca eta napavana. Tícauquihavacavare amairiha eta napavana. Ena nani, vahi táechuquihahini eta nacunachirahi ema Víya, ema acanevacaquene eta máitaresirahi. Tíjiranahi tamutu sácheana, yátiana. Ánipa nacahe:

“Tétavicavahi eta pisantuva, píti Tata.

Tétavicavahivare eta pítipajjiasiravahi,

* **3:20** Te juca, ema Víáquenu tímícutijiricava eta máehahamesira te jácáni tapajacura, mavarairahi masiapa, manica macachane ena ticavasanahi te tajuhe. Étasera eta máechajisíhaqueneana, vahi étainahini eta tapajacura eta vipena. Te juca, ema Víáquenu máechajisíhahi eta májapanuirahavi étapa eta mavaraira víchavaya vípaucha éma, tachavahini vivapínava mayehe, víuiryaveva te machacaya. * **4:7** Te jena avasare Asia (puiticha tícaijare Turquía), tatiarihíhi eta tíñehiquenehi sárare náimijarechahi “león”. Te táyahapa, eta tahu tacuti eta íchapequene toro, étapapuca eta íchi ajaira.

píturuequeneha tamutu.
 Piti pitirihiquenehi te tépanavainapa eta apaquehe.
 Puiti pinasirichuvare eta viyehe.
 Pítrichuvare pinasiyare te táitavapa tamutu.
 Puiti vihasulupayachavihi eta pichanerahavihi”
 nacahepa ena ángeleana.

¹⁰ Énavarepa ena vénticuatroqueneana víyahana tuparairucana tépuyucanahi te mami-
 rahu ema Víya, mávihahi te mayehe trono. Nacamavahupa eta nayeheana corona. Titsiure-
 canavare. Ánipa nacahe:

¹¹ “¡Tata Víyaquene, piti Viáquenuvihil!

¡Tétavicavahi eta piúrivahi!

Picarichuhi piti vicasiñaquenévi.

Ichapequenehi eta vicunachiravihi.

Tamutuhi pirataha píti.

Taicha píti pépiyacahi acane tamutu eta juca

vímahaqueneanahi puiti.

Pítrichuvare péchahi puiti tamutu eta

pépiyruanahi”.

5

Éma Cordero macaratata eta ajureca tiama eta siete sello

¹ Tacahe, te mavahu vaure ema máejaruhi tayehe eta trono, nímahapa macaratatachi eta ichapeme ajureca ticayuruquihí, ticanaracacahi eta letra te tajuhe étapa te táqucumé. Ticaipistahi tayehe eta siete sello, táipistaruvanahi.

² Nímahapa ema ángele tipiaracahi muraca. Tétavicava eta tamuracava eta mahu. Ánipa macahehi:

—¡Puiti táuricapa máimerecava mácani tatupararuhi tivepistacayare eta tayeheana sello eta juca ajureca, maveruruasirayare! ¡Tatuparacapa máiteca puiti! —macahepa.

³ Nájinasera náijaracavahini navejiapanahini eta ajureca: énaripa ena tiávihanahi te anuma, énavanerecainahipucaini ena tiávihanahi te apaquehe, énaripa ena tiávihanahi te amahe apaquehe. Nájinvare tipatsicavaina náimmaracahini eta ajureca.

⁴ Níyahahacavapa núti eta nímairahi namajinairahi náijaracavahini naveruruacahini eta ajureca, náechajicuhahipucaini, étavanerecainahipucaini náimmaracahini.

⁵ Tacahe, téchajicanupa ema émana víyara tuparairucahi. Máichanupa:

—Vahi picuiyaha. Taicha matiaruhi ema Cristo, ema yátupiquenehi manerejiruhi ema Víya ema téchaya tamutu eta juca apaquehe. Éma, tíjaracavahi eta máepenirahi víchavenehi víti. Tichavaripahisera títareca. Tásiha, macarichu ema tatuparacahi maveruruacayare eta ajureca, mavepistahayareva eta siétequene tayeheanahi sello táipistaruvanahi — máichanupa ema víyarahá.

⁶ Tacahe, nímahavarepa ema Jesús, ticajarehivare Cordero. Titupihahi éma te tamirahu eta trono, nachayacahi ena cuátroqueneana ecutiarareana énapa ena víyahana tuparairucana. Nímahahi eta majara, taicha táimicapacahi éma eta macaepahairahi eta vípecaturana víti achaneana. Siete eta majihuana. Eta juca táicutiarahi eta aguenucairahi. Siétevere eta máuquihana. Eta juca táicutiarahi eta tamutuirahi máimatiqueneha, taicha navanahihí ena siéteana arcángeleana mayehe ema Víya, eta náimmarasiraya tamutu eta apaquehe.

⁷ Éma maca Cordero tiyanapa, majacapahi eta ajureca te mavahu vaure mayehe ema máejaruhi te trono.

⁸ Te macaratataca eta ajureca, ena nani cuátroquene ecutiarareana, énerichuvare ena vénticuatroqueneana víyahana tuparairucana tépuyucanapa te mamirahu ema Cordero. Éna nani vénticuatroqueneana, namutuyehéhi te navahuana eta guitarra étapa eta escudilla, amairhasera oro. Tiama eta incienso, táicutiarahi eta táurivahi eta nayujarasiranahi ena machaneranahi ema Víya.

⁹ Tijiranahi eta juca jírasare arapiru. Ánipa nacahe:

“Picarichu píti tituparacavahi eta picaratasirayare eta ajureca, pivepistasirayare eta tayeheana sello.

Tituparacavahi taicha píjaracavahi píti tímicapacavahi eta pivacharesirahaviyarehi tayehe eta pítime vimutu víti apaimamajiquenehavihi te juca apaquehe.

Taicha pivarahahi machanerahaviyarehi ema Tata Vicaiyaquene.

¹⁰ Píjaracahavivare víyujaracarahiyare mayehe ema Víya.

Piti píjaracavahi eta aguenucairahaviya tayehe eta avasareana” nacahepa.

¹¹ Tásiha, nusamavarepa eta nahu ena camuriqueneana ángeleana nachayacahi eta trono, eta návihihi ena cuátroqueneana ecutiarareana, énapa ena tuparairucana. Tétavicava eta nasimutuvahi éna.

¹² Énerichuvare tijirana muraca. Ánipa nacahe: “Piti Cordero, piti nacaparuhi, picarichu tatuparacahi pijacapayare puiti eta piávacure mayehe ema Viya.

Tétavicava eta piúricacarevahi táicha.

Tétavicava eta pímatiequenehairahi tamutu.

Tétavicava eta pitumevahi.

Tétavicava eta pípicachacarevahi.

Tétavicava eta píacunachacarevahi.

Tijarahi visama te vijirauchavi” nacahepa.

¹³ Nusamavare eta tahu tamutu eta máepiyaruanahi ema Viya, eta tiávihanahi te anuma, étapa eta tiávihanahi te apaquehe, énerichuvare eta tiávihanahi te amahe eta apaquehe, étapa eta tiávihanahi te une. Ánipa tacahehi:

“Tétavicava eta pítipajijiasiravahi, piti Vicaiyaquene, pítipa piti Cordero.

Éti, tétavicava eta epicauchacarevahi.

Éti, tétavicava eta ecunachacarevahi.

Tijarahi visama eta vijirauchirahe.

Máitavacacayare eta vitsiusiraheyare” nacahepa.

¹⁴ Énapa ena cuátroqueneana ecutiarareana najicapapaipa:

—Amén, ene vicaheparacayare —nacahepa.

Tásiha, ena vénticuatroqueneana víyarahana tépuyumurihanapa, natsiucapa ena apinana.

6

Eta táepistasira eta sélloana

¹ Tacahe, nímahapa ema Cordero te mavepistacapa eta tínupuca sello. Tásiha, nusamapa ema émana ecutiararehi. Eta mahu tacutichucha tirurehucha. Ánipa macahe:

—Yare, piúchuca —macahepa.

² Tacahe, nímahapa eta cavayu tijapu. Ema ticaperahi, tatiarihi eta mataquiriqui. Tásihapa, ticaijaracasipa eta corona éma. Eta juca táicutiarahi eta máquipairisiraparacaya ena mánarana, taicha guerrerohi éma.

³ Nímahavarepa ema Cordero mavepistacavarepa eta tápinane sello. Nusamavarepa ema apana ecutiararehi:

—Yare, piúchuca —macahevare.

⁴ Tacahe, tiúchujicapa eta apana cavayu. Titsi eta táimahi. Ema ticaperahi mámahí eta ichapequenehi espada. Ticavanahipa eta manacasamurechirayare ena achaneana eta náehacacairayare. Téhepucaínapa eta guerra. Ticapajiricacainapa ena achaneana camuriqueneana.

⁵ Nímahavarepa ema Cordero mavepistacavarepa eta tamapanane sello. Nusamavarepa ema apana ecutiararehi, máichapa:

—Yare, piúchuca —macahevare.

Nímahapa eta cavayu tiquisa. Ema ticaperahi macaratacachi eta balanza te mavahu.

⁶ Nusamavarepa eta mahu ema apana te namuri ena cuátroqueneana ecutiarareana. Ani macahehi eta máechajiruvahi:

—Ticatajivanayare ena ticaematanerachiana. Vaipa tisivachaimahi eta mavacha mácani achane. Diez páneana eta mavachayare te étana sache. Étaripa eta arusu* mapanarine kilo eta navachayare te étana sache. Étasera eta aceite comer, vahi téjiacavaimahi, étaripa eta tachi eta uva —macahepa.

⁷ Te mavepistacavarepa ema Cordero eta tacuatrone sello, nusamapa ema apana cuátroquene ecutiararehi, máichapa:

—Yare, piúchuca —macahepavare.

⁸ Nímahapa eta apana cavayu tiyacaca. Ema ticaperahi, éma ticaijarehi “Ticaparerecaya ena achaneana”. Matiarihivare ema téhicapahi, ema táquenu eta náchanevana ena náepenaqueneana. Tacahe, eta cuarta parte eta nasimutuva ena achaneana tépenanaya naicha ena apinana. Taicha ticapajiricacainapa ena achaneana tayehe eta guerra. Ena apamuriana técuhanainapa. Apanapanenapa eta najumanayare. Énerichuvare tancainapa eta sárareana táifehiqueneana.

* 6:6 Ema ecutiarare máechajisihahi eta taqui ticaijare cebada. Eta juca tacuti eta arusu.

⁹ Te mavepistacavarepa ema Cordero eta tacincone sello, nímahapa eta mesa tiámahi eta mayucuneasa ema Viya. Te tápecu, nímahavarepa eta náchanevana ena nápenaqueneana táimicaparuanahi eta náehisirahi ema Viya. Vahi náinajichahini eta náehisirahi te náimahapa eta nacatajivairayare. Váhivare timatinanaimahi eta nametasirahi eta máechajiruruva ema Viya.

¹⁰ Puiti éna, tipiaracanaahi. Ani nacahe eta napiarasirahi:

—Tátachicha, sántoquenevihi píti. Yátupiquenevihi eta picasiñacareva. Píti pirataha tamutu. ¡Puiti vivaraha pítauchayare eta pitsirijiequenehairayare ena ticapacahavianahi te apaquehe! ¡Vivarahapa nacáemecharahipaini! —nacahepa.

¹¹ Tásiha, ticaijaracasianapa eta namuirihanayarehi eta tijapu. Ticametacasianapa nanarahasiranumayare apaesainahi. Tiámainucavayarehi te tiyuriticavapa eta natupayare ena nachamuriana nacaparuanayarechahavare ena téhicanahi ema Cristo.

¹² Te mavepistacavarepa ema Cordero eta tasaisine sello, nímahapa eta tamuracavahi tayamurisirahi eta apaquehe. Eta sache témahavarepa, tétavicavahi eta taquisava. Énerichuva eta caje amairihapa ítime.

¹³ Eta jarairiquiana tiávihanahi te anuma, témiririjicapa te juca apaquehe, tacuti eta tahi eta mitu te muracaicha técativava.

¹⁴ Eta anuma témtiacavarepa tacutipa te téchuquimeca eta ajumeruca. Tásiha, eta ichapequeneana cerro tiyamuricavacapa tiyjecavavacapa. Étaripa eta tiúrupuhiana te mar énerichuvare tiyjecavavacapa.

¹⁵ Tacahe, tijunanapa ena réyeana te avasareana, énapa ena presidenteana, énapa ena comandanteana, énapa ena aqenucarahana, énapa ena rícoqueneana, énaripa ena músuana, énapa ena líbreana. Ticayumurúquianapa te tajuhe eta ichapequeneana máriana cerro.

¹⁶ Ánipa nacahe:

—Vicavi eta ichapequeneana mari, apaesa vahi macuimahahavi ema Viya, apaesa viúchucuha tayehe eta táinehiquene máicuñaraqui ema Cordero.

¹⁷ Tátécapaurehavipa puiti eta ichapequene juicio. ¡Páurehavisami! ¡Nájina tacaemachaquenemahi! —nacahepa.

7

Ena dócemuriqueneana israelítana nacamarcaqueneanayare

¹ Tacahe, nímahapa ena cuátroqueneana ángeleana. Titupihanahi te táinahu eta juca apaquehe, náichejimirausirahi tamutu eta técativavana. Éna, náichejicahi eta técativava apaesa tacuíja eta técativava te apaquehe étaripa te une, étavanerecainahipucaini tacaecherahini te yucuquiana. Ticatuparahanaserá éna nacamiriuchayarehi eta táicuñayare te apaquehe étape te une mar.

² Énerichuvare nímahavarepa ema apana ángele tiásihahi te táuchusinehi eta sache. Macaratacahi eta mamarca ema yátupiquene Viya Vicaiyaquene. Ema maca ángele máechajicavacapa muraca ena cuátroqueneana ángeleana.

³ Tacahe, ema ángele máichavacapa:

—Vuíchaha ecucamirica eta táicuñayare eta apaquehe eta une te mar étape eta yucuquiana. Tapainumavaya te vimarcachavacapa te nanahuana ena mavanarana ema Viya —máichavacapa.

⁴ Tásiha, te tamutupa eta nacamarcairavacahi, nusamapa eta natupa ena nacamarcaqueneanaripa. 144,000 eta nasimutuva. Násihaqueneanahi nayehe ena dócemuriqueneana israelítana.

⁵ Doce mil ena ticamarcanahi machichanavéqueneana ema Judá. Doce mílvare ena ticamarcanahi machichanavéqueneana ema Rubén. Doce mílvare ena ticamarcanahi machichanavéqueneana ema Gad.

⁶ Doce mílvare ena ticamarcanahi machichanavéqueneana ema Aser. Doce mílvare ena ticamarcanahi machichanavéqueneana ema Neftalí. Doce mílvare ena ticamarcanahi machichanavéqueneana ema Manasés.

⁷ Doce mílvare ena ticamarcanahi machichanavéqueneana ema Simeón. Doce mílvare ena ticamarcanahi machichanavéqueneana ema Leví. Doce mílvare ena ticamarcanahi machichanavéqueneana ema Isacar.

⁸ Doce mílvare ena ticamarcanahi machichanavéqueneana ema Zabulón. Doce mílvare ena ticamarcanahi machichanavéqueneana ema José. Doce mílvare ena ticamarcanahi machichanavéqueneana ema Benjamín.

Camurianavare ena apavasajuecuana tijapumuirihavacahi

⁹ Tacahe, nímahavarepa ena camuriqueneana achaneana tiásihana te tamutu avasareana, apaechajiriruvaqueneana. Vaipa titupachacareana eta nasimutuvahi. Titupihanahi éna te tamirahu eta trono, mávihahi ema Cordero. Tijapumuirihavaca eta namuirihana. Tásiha eta náurisamurevahi nacaratacahi te navahuana eta cáchipaca.

¹⁰ Namutu tipiaracanahi, ániapa nacahe:

—Vihasalupayachavi, piti Tata Vicaiyaquene, pítipa piti Cordero, taicha éti ecuchucu-havihi —nacahepa.

¹¹ Tacahe, namutu ena ángeleana titupihanahi te tachacayahi eta trono, nachayacahivare ena cuátroqueneana ecutiarareanahi, énapa ena víyarahana tuparairucana. Tásiha, tépuyucanapa te tamirahu eta trono. Tétipaimurihanapa. Natsiucapa ema Viya.

¹² Ániapa nacahe:

“¡Eta vicaheyare!

Máitavacacayare eta vitsiusiraviyare.

Taicha tétavicavapa eta picunachacarevahi.

Tétavicavare eta pímatiequenehairahi tamutu, éropa eta pipicauchacarevahi, éropa eta pitumeva.

Picarichu piti péchahavihi.

Ichape eta vihasulupayachiravihi.

Tijarahi te visamure te vijirauchavi. Amén”.

¹³ Tacahe, ema émana víyaraha máichanupa:

—Te pivaraha pímati, nímimatichaviyare ena nani ticamuirihanahi eta tijapu, távihavarepuca násiha —máichanupa.

¹⁴ Tacahe, níchapa nútí:

—Picatajicanu, pimetacanu, tata.

Tásiha, máichanupa:

—Ena nani émara ena nacatajivaqueneanahi ichape taicha eta náehisirahi ema Jesús, tiúchucuharipasera. Ticasipaipa puiti eta náchanevana tayehe eta máitine ema Cordero. Puiti ticamuirihanapa tijapu, taicutiarahi eta tájinairaripa navirevainahini.

¹⁵ Eta tacahe, titupihanahi puiti te tamirahu eta trono mávihahi ema Viya. Najirauchahi, natsiucahi éma tamutu sácheana yátiana te mayehehi templo. Éma majaneacavacahi.

¹⁶ Ena nani tájinapa nácamunuimahi, vaipa técuhana, váipavare timauneana. Váipavare ticatajivanaimahi taicha eta tájireva eta sache.

¹⁷ Taicha ema Cordero, ema tiávihihi te tamirahu eta trono, tétavicava eta majapanuraivahi, majaneacavacayarehi. Máesichayareva eta tiúriama une ticaitarerahi. Énerichuvare ema Viya macamitiasinayare eta náiyaira —máichanupa ema víyaraha.

8

Éma Cordero mavepistacapa eta téqueneha sello

¹ Tacahe, mavepistacapa ema Cordero eta téqueneha sello tayehe eta ajureca. Tamuturine timatina. Média-horapuca eta tamatinaira.

² Tásiha, nímahapa ena siéteana ángeleana, titupihanahi te mamirahu ema Viya. Ticaijaracasianapa eta siete chujareana nachujanayarehi.

³ Tásiha, títecapavarepa ema émana ángele. Mámapahi eta censario, amairiha oro. Tatiarihi te mamirahu ema Viya eta mesa tiámahi eta mayucuneasa. Amairihavare oro. Ema ángele titupihapa te tamirahu eta mesa. Nájaracapa eta incienso tisimuri. Tacahe, macaratacapa eta censario te tápusi. Macapusiicapa ema Viya, tacachaneapaipa eta nayujarasirana namutu ena machanerana ema Viya.

⁴ Tásiha, eta taquijarera éropa eta mayujarasirana tiápanapa mayehe ema Viya, tásihaquenehi te mavahuana ema ángele.

⁵ Tásiha, ema ángele mavehavarepa eta apamuri emaníqui eta te mayucuneasa. Máinicachapa eta censario. Tásiha, máepuraicapa te apaquehe. Tijahúchavapa térameca, ticaema, tirecapa. Tiyayacarepa eta apaquehe.

Eta nacachujairayare ena siétequeneana ángeleana

⁶ Tacahe, nímahavarepa ena siétequeneana ángeleana titsecavanaripa eta nacachujairayare.

⁷ Te ticachujapa ema tinapuca ángele, témiricapa te apaquehe eta uverequi éropa eta tiquiva ítiam. Témiricavare eta yucu. Táijuchapa eta tercera parte te apaquehe. Tamairiacapa eta yucuquiana, eta muiji, éropa eta sucurecana.

⁸ Te ticachujapa ema apana ángele, témiricavarepa eta ichape mari. Timurupahi eta táemirisira tayehe eta mar. Eta une, ítiamaipa táicha. Tercera pártéhivare eta ítiamaahi.

⁹ Tãmairiaca tapapajicavaca eta sárareana tiávihana te une. Éta pa eta pacureana tachimararuanahi, técharicavanapa. Térirjicanapa tamutu.

¹⁰⁻¹¹ Te ticachujapa ema apana ángele, témiricapa eta ichape jarairiqui. Tétiraraicaparine eta táemirisirahi. Tajararecapa eta une tayehe eta tercera parte eta cajacureana éta pa eta cáquiureana. Venenoamapa taicha eta jarairiqui. Ichapemurianavare ena achaneana tépenaracana hi taicha eta náerirahi eta une tisucareama. Eta tacahe, ena tacaitiruanahi tímijarechanahi eta ecuñaraqui: Eta Súcareama Venenoama.

¹² Te ticachujapa ema apana ángele, tiúchujicapa eta tépacuchahi eta sache, eta caje éta pa eta jarairiquiana. Óchorine hora eta táetaviuchirahi eta tamapicuva. Tacahe, óchovare hora eta tacacherairahi eta sache. Ocho hórvare eta tacacherairahi eta caje éta pa eta jarairiquiana.

¹³ Tacahe, nésenicapa te anuquehe. Nímahavarepa ema émana ángele tiáraraicahi. Nusamapa tipiaracapanahi muraca, ánipa macahe:

—Páureanasami ena tiávihanahi te apaquehe. Tétavicavaya eta nacatajivairayare, puiti te táitachavapa eta nacachujairaya ena mapanaqueneana ángeleana, téquenehanaya ticachujana —macahepa.

9

¹ Te ticachujapa ema apana ángele, nímahapa ema ángeléní mavasíhi eta jarairiqui. Máquipairuvahi te apaquehe. Máisapa ema Viya eta mavejasirayare eta pozo táupenaquene ticajare Abismo.

² Tacahe, mavejiacapa eta táupenaquenehi pozo. Tiúchucapa eta ichape quijare tacutipa eta taquijarera te tiju eta evitarahi. Eta sache, timapicupa taicha eta quijare.

³ Témunahiricavapa tiúchuca eta tavasiqueneana eta tsacarana, tayehe eta quijare. Amairipahipa tamutu eta apaquehe. Tajarachapanahi eta tayucaraivahi tacutipa eta tayucaraiva eta sáserahi.

⁴ Ticatuparacasipa vahi tacunica eta tamuijira eta apaquehe éta pa eta tapacajiana eta sucurecana éta pa eta yucuquiana. Eta tatuparahahi eta tayucavacayarehi namutu ena achaneana. Nacarichu tacaitica ena ticamarcanahi te nanahuana tayehe eta mamarca ema Viya.

⁵ Cíncoyarehi caje eta tayereva eta tayucareresirayarehi. Váhisera tépenanáimahi ena achaneana tayucaqueneanayarehi. Tétavicavasera tacativayarehi nasama. Eta tayucaraqui tacutiyarehi eta sáserahi eta tacativayarehi nasama.

⁶ Te jena sácheanayare ena achaneana navarahayare ticapacavana. Váhisera tépenanáimahi, tayanapane navarahayare tépenana.

⁷ Eta juca tavasiqueneana tsacarana, nímicutíchapa eta cavayuana te titsecavanahi tayehe eta guerra. Tásiha, te tachuti tacutimahiyaréni ticayehé corona oro. Eta tamira achanemirayaréni.

⁸ Tiuji eta tachutimaca, tacutiyaréni eta suchutimaca esu esena. Tíñehivaca eta táheana.

⁹ Eta taparuma tacutiyaréni eta fierro muracaquenehi. Vahi táechucaimahi eta isavipe. Eta tárairahi, ¡tétavicavahi eta tamuracavahi!

¹⁰ Ticaijiquivaca tacutiyaréni eta sáserahi. Eta juca tiyucarahi, cinco cájeyarehi eta tacaite-majirisiravacayare ena achaneana.

¹¹ Mararihivare ema táquenu ema téchahi éta, ema ángeléní tivejiacahi eta táupenaquene pozo. Ema maca ángeléní, eta máijare te náechajiriruva ena hebreoana “Apolión”. Te véchajiriruvana víti, ticajare “Tijararerahi”.

¹² Títachavapa eta tinapuca ecuñaraqui nímahaquenehi. Jucarihichahavaresera apinachaha eta ecuñaraquiyare.

¹³ Te ticachujapa ema apana ángele, nusamapa eta mahu ema apana te tápusi eta cuátroquene esquina tayehe eta mesa oro eta tiámahi eta mayucuneasa ema Viya, tiávihani te mamirahu éma.

¹⁴ Ticavanairipipa ema ángele ema ticachujahi, ánipa macahe:

—Picaiticapa ena cuátroqueneana ángeleanaini váinarajiana, tiávihanahi te tachacaya eta cajacure Eufrates —macahepa.

¹⁵ Taicha acane ema Viya manerejicaripa eta juca hora eta macaitisirainapa ena cuátroqueneana ángeleanaini, máisapainapa eta nacapasirayarehi camuriqueneana achaneana, ena mapamuriqueneana eta náichapemuriva. Tacahe, téjapucanapa éna.

¹⁶ Tacahe, tiúchujicanapa ena suntaruana ticaperana. Nusamapa eta natupa. Dosciento millone eta náichapemuriva.

¹⁷ Tacahe, eta nímairahi ena ticaperana, tatiarihi eta náicutiara te natupana. Eta táimahiana titsi, azul, tiyacaca. Táñehiquenehi eta tachuti eta naperana. Tiúchucapaipa eta yucu, eta quijare te tajaca. Azufrepuha eta táepuha.

¹⁸ Camurianahi ena achaneana, ena tacaparuanapahi eta juca mapanaquene ecuñaraqui eta tacuchusirapahi te tajaca: eta yucu, eta quijare, etapa eta azufrepuha.

¹⁹ Énerichuvare tatiarihi eta táijiqui ticutipainehi eta quichare. Tétavicavahi eta táíñehi-vapahi eta tacaparaqui táuchurepahi te tajaca etapa te táijiqui.

²⁰⁻²¹ Énaser a ena apamuriana achaneana tacaitruanahi eta ecuñaraqui, váhiquene navarahaimahi náinajica eta náichira eta tauriqueneana. Váhiquene téneuchavanáimahi. Váhivare náinajichihini eta nacapahivana, eta nahiapemarevana, etapa eta náesenamarevana, etapa eta námeraivana. Váhivare náinajicaimahi eta najirauchira ena éreanana, eta natsiusirahi eta nasiñarajiana náepiyaruanahi oro, plata, bronce, márijahi, yucuqui. Tamutu eta juca mayamuricacahivare, váhivare tapaicahini, váhivare tasamarahihini, váhivare táimairicahini.

10

Éma ángele macaratacahi eta ajurecachicha

¹ Tacahe, nímahapa ema apनावare ángele tiúcupaicahi te anuma. Tétavicava eta máíñehiva. Tamuichapahi eta úcaji. Te mápusi, tatiarihípa eta ahe. Eta mamira, tétavicava eta tajarasirahi tacuti eta táimahi eta sache. Eta mapaiqueana tijarahivaca ticutipahi timuruquiape.

² Téjiacahi eta ajurecachicha eta macaratasirahi te mavahu. Tásiha, eta mapaique vaure mácatayaecahi eta une te mar. Eta étaquiape sapa tacatayacahi te táijipahi.

³ Tásiha, típiaracapa muraca, tacuti eta tahu eta tíñehiquenehi sárare. Te títapiricapa, nusama eta nahu ena apamuriana tacutiyaréni eta tirurehuchahi. Siétequenehi eta najicapirahi.

⁴ Te timatinapa, nuvarahapa nájuequenehayarehini. Nusamapasera ema téchajicanuhi te anuma. Máichanupa:

–Vahi picuajucha eta juca pisamaquenehi. Piáñauchayare eta juca. Váhivare picumeta-jirica –máichanupa.

⁵ Tásiha, ema maca ángele nímahaquenehi eta mácatayasirahi eta une etapa eta tiájipahi, masuvechapa te anuma eta mavahu vaure.

⁶ Ánipa macahe:

–Tivanecanuhi ema Viya, ema acanevacaquenehi eta máitaresira, ema yátupiquenehi tépiyacahi eta anuma, eta apaquehe, eta mar, etapa tamutu eta táivíhaqueneanahi tayehe. Éma, tivanecanuhi numetaca eta juca máechajiriruvahi: “Tájinapa vaipa tayeremahi eta táitaviraya”.

⁷ Ánaquiaparipahi eta nacametacasihahi ena profetana eta mapanereruana ema Viya. Puítisera te macachujapa ema téqueneha ángele, títavainapa tamutu eta mapanereruanahi –tacahepa eta mametarapihi ema ángele.

⁸ Tacahe, nusamavarepa eta mahu ema téchajicanuhi tásihaquenehi te anuma. Tivanecanuvarepa nupaucha ema ángele titupihahi tayehe eta une etapa te tiájipahi. Ánipa macahe: –Piyana piyaseaca eta ajureca macarataruhi ema ángele –macahepa.

⁹ Tacahe, nuyanapa mayehe ema ángele. Nuyaseacapa eta ajureca. Tásiha, éma máichanupa:

–Júcahi eta ajureca. Piveha, pinica. Títiveyare eta pisamira te pijaca tacutiyare eta mápama. Étasera te piami, tisucareyare pisama –macahepa.

¹⁰ Tacahe, nuvehapa eta ajurecachicha te mavahu ema ángele. Nunicapa. Jéhesaréinehi títvéinehi eta nusamira te nujaca tacutirinehi eta mápama. Téhesera nujiricapa, tisucarepa nusama te nami.

¹¹ Tásiha, nucametacasihavarepa:

–Píti piápechavaya picametarapiya eta náichararacavayare namutu ena aguenucana te juca apaquehe, énapa ena achaneana ticavasanahi te tamutu avasareana.

11

Éma Viya mavanecainapa ena apinana mavanaranayarehi profetanaya

¹ Tacahe, te nuvapure, tíjaracuanapapa eta ecutiriqui. Tásiha, máichanupa ema Viya:

–Piyanyare tayehe eta Templo te Jerusalén. Picutichaya tamutu eta peti etapa eta canchón. Picutichavare eta náijuchirarehi eta sárareana námavahuqueneana. Tásiha, pitupachayareva áyananahipuca ena achaneana téneuchavarahanahi eta te canchón.

² Váhisera picuicuticha te aneca tamirahuhi eta Templo. Taicha ena apajuecuruhana, nisapaqueneanapa eta návihairaya éna. Nísapainavarepa eta náitahasiraya eta tayereruvainani eta avasare tacapichahuquenehi Jerusalén. Ichape eta namapachichijisiryare. Cuarenta y dos caje eta náichirayare.

³ Nútisera nuvanecavacainapa ena apinana nuvaneruana profetana. Éna, tiquisamuirihanayarepahi eta namuirihana. Eta juca táicutiarayarehi eta náichuarésiruyare náeneuchava ena achaneana. Mil doscientos sesenta sache eta nayerevayare —macahepa.

⁴⁻⁵ Tásiha, nímahapa te anuma te mamirahu ema Viya eta apina yucuqui olivo étapa eta apina candeleroana te mamirahu ema Viya, ema téchahi tamutu eta juca apaquehe. Eta juca táicutiara eta majaneasiravaca ena apinana mavanarana, taicha manerejiruanahi éna, nacametarairuyare eta náeneuchiravayare ena achaneana. Te natiarihinapuca nácani tivarahanayare titupiacana, éna ticatiuchavanayare. Tiúchucayare eta yucu te najaca. Táijuchayare muraca, tacapacayareva ena nánaranayarehi.

⁶ Énerichuvare ena nani, naratahayarevare náichejica eta tiquiva te jena sácheana nacametarairuyare. Étaripa eta une, náepiyacayare ítiamayare náicha. Nacuchucayareva eta táíñepahiyare nayehe ena achaneana, apanapanenejijarehi náicha, te jácani navarahaquenevare éna.

⁷ Téhesera te táitauchavapa eta nacametarairuirayare, macanaravacainapa ema Tíñehi Achane Váinarajiquene ticaijare Útsutsure. Émaripa ema majupaha ema Satanás. Tásiha, masapihainapa ticaparecayare macapacavacainapa ena apinana mavanarana ema Viya.

⁸⁻⁹ Tásiha, ema Tíñehi Achane Útsutsure vahi máisapaimahi náecara eta náqueheana. Tanasiyarehi te aneca. Tacahe, náimahayare namutu ena achaneana te juca apaquehe. Mapana sache y medio eta nacaheyare te calle eta te avasare. Eta juca avasare, étarichuhi eta macaetatainehi ema Viáquenu. Eta juca avasare, tétavicavahi eta tamauriva tacuti eta avasare Sodoma, étapa eta Egipto.

¹⁰ Ena achaneana, natiarihiyare te tamutu avasareana ena tiúrisamureanaya eta náimairaya ena tépananahi. Ticapiestaranainapa. Tíjaracasichacacainapa eta námavahuana. Taicha titavanaripa ena nani profetanaini, énaripa ena tihapapiricanahi eta náichira eta tamauriqueneana.

¹¹ Tásihasera, te táequenénapa eta mapanaquene sache y medio, macaechepucavacainapa ema Viya. Tichavanainapa títarecanayare. Namutu ena achaneana náimahaya. Ichape eta napisirayare.

¹² Tacahe, ena nani apinana profetana nasamainapa eta mahu ema tíchuhavacahi te anuma. Muraca eta mahu eta máichuiravacahi:

—Yare, íteca, iápana —máichapa.

Tacahe, járajapapa eta úcaji táepanavacapa éna, támapa te anuma. Ena ticanaranahi náimararacaripa eta nayanirahi.

¹³ Enevanepa tiyayacarepa eta apaquehe. Muraca eta tayamurisirahi. Camuri eta pétiana tiáquipaicavavacahi. Siete mil eta náichapemuriva ena náepenaqueneanahi. Ena achaneana táemachanahi, tétavicavainehi eta napisirahi. Náimatinumainehi ema Viya. Napiaracapa, nacunachapa eta máitupajjiasiravahi ema Viya tiávihahi te anuma.

¹⁴ Táitauchavapa eta juca apinaquene ecuñaraqui. ¡Váhisera tayerequenehaimahi eta mapanaquene ecuñaraqui!

Ticachujapa ema téqueneha ángele

¹⁵ Tacahe, ticachujapa ema téqueneha ángele. Tásiha, ticaemapa muraca te anuma. Ánipa tacahehi eta nahu eta nusamirahi:

—Títauchavapa puiti eta émairayarepa ema Viya técha, ticavanairipiyare namutu ena achaneana te juca apaquehe. Macaejacapa ema Machicha Cristo, máijaracainapa eta mávacureyare. Acanevacainapa eta émairayare techa tamutu —tacahepa eta nahu.

¹⁶ Tacahe, tépuyucanapa ena véinticuatroqueneana víyarahana, ena téjacanahi tayehe eta trono te mamirahu ema Viya. Tiitsiucapairicanapa, nacunachapa ema Viya.

¹⁷ Tijiranapa, ánipa nacahe:

“Vihasulupayachavi, Tata.

Tétavicavahi eta pítipajjiasiravahi, píturequeneha tamutu.

Piti pitirihiquenehi te tépanavainapa eta apaquehe.

Pinasirichuhivare puiti eta viyehe.

Puiti péjacapa tayehe eta piávacure ichapequene, pítirayarepa pecha tamutu.

¹⁸ Tétavicavahi eta nasemanevahi ena achaneana eta piyehe.

Muracapanainapasera eta pícuñasiravaca éna.

Puiti ticayaseserehianainapa te pímirahu ena náepenaqueneana.

Jéhesare, picamitiequenehainapa namutu ena ticamitiequenerahianaini te juca apaquehe.

Puiti pítsirijicavainapa eta nacaemataneasiravahi ena pivanarana ticametarairurahiana eta péchajiriruva.

Puiti píjaracainapa eta náicuchihí ena yátupiqueneanahi

pichichanaveanahi tíamanahi eta píjare:

nácani ichavicana, araitanana, énapa ena amaperuana” nacahepa.

¹⁹ Tacahe, téjiacapa eta tapajacura eta Templo tíávihahi te anuma, mapena ema Viya. Ticaeherapa eta sagrario tacaunaiyahi eta echajirucavana matratuneanahi ema Viya nayehe ena israelítana. Tásiha, enevanepa téramecahi, ticaemapa, tirurecapa. Témiricapa eta uverequi tímítutupahi. Tiyamuricavarepa eta apaquehe.

12

Máimahavare ema Juan esu esena tñnacayarehi étapa eta táíñehiquene sárare ticajare Serpiente

¹ Nímahavarepa eta apana ecutiarare te anuma. Tiáramicarehi éta. Sutiarihi esu esena. Eta sumuirihá tacutiyaréni eta tajaraira eta sache. Te tápecu eta suívapeana tacutiyaréni eta caje. Eta te suyehe corona te suchuti, jararihi tacutiyaréni eta dócequeneana jararíqui.

² Esu suca esena ticajarihi. Tipiararecahi eta suínasirayarehi. Ichape eta sucatajivairahi.

³ Tásiha, témunahiricavarepa tíuchujica eta táíñehiquene sárare. Ichapequenehivare. Ticajare Serpiente. Máchaneva ema Satanás. Tísi eta táimahi. Siete eta tachuti. Diez eta tajihuana. Ticayehéhi eta corona eta te tachutiana.

⁴ Eta te táijiqui, táestacapa eta mapamuriana eta táichapemuriva eta jarairiquiana, tacamiricapa te juca apaquehe. Tásiha, titupihapa eta sárare te sumirahu esu esena esu tñnacayarehi. Títsecavaipa eta tanisirayarehi eta suchicha.

⁵ Tacahe, ajaira eta suchichahi esu esena. Námavanepasera mayehe ema Viya, te mávihahi te trono. Ema suchicha, aquenucayarehi tayehe tamutu eta avasareana. Macaratacayare eta matsucurupa fíerroqui. Váhiqueneyarehi tñapanucareanaimahi nácani náchahi eta tammauriqueneana. Muracayarehi eta náicuñanayare ena téjcapavana.

⁶ Tásiha, esu esena tijunavanepe te mávapahi apaquehe eta suávihayarehi maicha ema Viya. Natiarihiyarehisera ena ténicanayarehi ésu. Mil doscientos sesenta sácheana eta náitátirayarehi esu esena.

⁷ Tacahe, tíuchujicapa ema Arcángele Miguel énapa ena ángeleana machamuriana. Téhacacanapa nacanarapa eta Serpiente. Énerichuvare natiarihivare ena tayeheanahi ángeleanaini váinarajianahi.

⁸ Apaquehererupasera eta ichapequenehi Serpiente, énapa ena tachamuriana. Tásiha, vaipa máisapa ema Viya nanasihini te anuma.

⁹ Tacahe, ticaquijianapa te juca apaquehe namutu ena ángeleanaini, émapa ema náquenu-muríhi Serpiente, ena ticaetemahi acane esu Eva. Émarichuhi ema Váinaraji ticajarehivare Satanás. Puíticha ticaetemajiricavacahi ena achaneana te juca apaquehe.

¹⁰ Nusamavarepa te anuma eta mahu muraca, ánipa macahe:

—Títauchavapa puiti eta náuchucuirapa ena téhicanahi ema Cristo. Máimererupa ema Viya eta tamutuirahi marataha. Májaracapa ema machicha Cristo eta émarapa techa tamutu. Taicha ticaquijipa ema Satanás, ena timetauchaparacaini me Viya eta náichavaquenevanahi ena vichamuriana, tamutu sácheana, yátiana.

¹¹ Ena vichamuriana naratahaipa ticatiuchavana mayehe ema Satanás. Vaipa macapaquechavacaimahi éna, taicha yátupi ticasíñavanahi tayehe eta máepenirahi ema Cordero. Énerichuvare náimimatichahi ena apamuriana achaneana eta máechajiriruvana ema Viya. Éna, vahi napicacavavacahini tayehe eta náitaresira. Tíjaracavanahi te náepenirayarehi, vahi návarahahini náinajica eta náehisirahi ema Cordero.

¹² Tétavicavaya eta iúrisamurevaya puiti, emutu eti iávihanahi tayehe eta juca anuma. Páureanasamisera ena ticavasanahi te apaquehe étapa eta tíávihanahi te une te mar, taicha ema Váinaraji máucupauchavacaipa. Tétavicava eta masemanavapahi taicha máechahi eta ánipirinehi macaheyare —macahepa ema maca.

¹³ Tacahe, eta Serpiente, eta táimairahi eta tacaquijirahi te anuma, táucupaisiraipa te juca apaquehe, tacamesapa táehicarairica esu esena suínaruhi.

¹⁴ Ésusera ticajaracasipa eta apina ichapequeneana supavanayarehi tacuti eta tapava eta ichape mátihi. Sumaitasiavayarehi tiara tayehe eta mávapahi apaquehe suávihayarehi. Ánaqui natiarihiyareva ena téchapajiricanayarehi. Mapana año y medio eta náenisirayarehi. Eta Serpiente vahi táitecapauchaimahi ésu.

¹⁵ Tásiha, eta Serpiente táhicapa eta une te tajaca, tavarairahi tñahúchava tatiarihi eta cajacure apaesa suéricahini esu esena.

¹⁶ Étasera eta apaquehe tacatiuchapa esu esena. Téjiacapa eta apaquehe, táerapaicavanepa eta une táhiruamahi eta Serpiente.

¹⁷⁻¹⁸ Tacahe, eta táimairavahi eta Serpiente vahi táratahahini, tavetijipaicha eta tasemirahi suyehe esu esena. Tíyanapa nayehe ena suchamuriana, énapa apavequeneanahi.

Tavarahapa tacapacayarehi ena sucutiqueneanahi tisuapanahi ema Viya, téhicanahivare eta máimiturapiñanahi ema Jesucristo.

13

Máimahavare ema Juan eta útsutsure étapa eta sárare tíñehiquene

¹⁻² Te táequenepa eta juca, te nuvapure, nutupihahi tayehe eta playa eta mar. Nímahapa eta útsutsure tiúcupaicapahi tásihahi te une. Siete eta tachuti. Dies eta tajihuana. Te tápusi eta tajihuana tatiarihi eta tayehe corona. Eta juca sárare tavasimahiyaréni eta ichini. Táíñehiquenehi eta tajaca. Eta táivapeana tacutiyaréni eta táivape eta aticure. Tásiha, te tachutiana tatiarihi eta ajureca tímijachavahi Viyainahíni. Macunahisera ema achane majupaha ema Satanás. Eta tacahe, eta Serpiente táijaracapa eta máitupajijiasiravayarehi ema Útsutsure eta macaetemaraivayarehi maratahairayarehi tamutu. Aquenucayare te tamutu avasareana maicha eta Serpiente.

³ Te étana machuti ema Útsutsure, tatiarihi eta majara eta ticapacahi. Tásihasera, tichavahi títareca, tinaracavarepa. Tacahe, eta náimairahi ena achaneana te tamutu avasareana, ichaperinehi eta nárami. Tásiha, náhicapa nasuapapa ema Útsutsure.

⁴ Natsiucavarepa eta Serpiente, taicha eta náimairahi eta táijarasirahi eta máitupajijiasiravahivare ema Útsutsure. Tásiha, nacahepa mayehe:

—Tétavicavahi eta máitupajijiasiravahi ema maca. Nájinavare tiratahaimahi nacanara náiquipaica éma —nacahepa.

⁵⁻⁷ Tacahe, ema Viya máisapahi ema Útsutsure téjacahi te mávacure, ichape aquenuca, ticavanairipipa tayehe tamutu avasareana te juca apaquehe. Ema Viya vahi máicuñacavanehini eta masiñavavaisirahi, tímijachavahi Viyainahini. Tíñemahipivaca eta máechajisira, macaechirahi ema Viya étapa eta mapena. Macaechivare ena tiáviñanahi te anuma. Énerichuvare mapanajiricavaca ena machanerana ema Viya. Máimicaratacavacapa, mavarairahi máimicapacavacaya. Cuarenta y dos caje eta macamichirahi ema Viya eta máimiyusemasirahi ema Útsutsure.

⁸ Eta acane te tépanavainapa eta apaquehe, tatiarihi eta libro tiama eta nalista ena títarecanaya te apana vítaresira. Macarataruhi ema nacaparuhi Cordero. Natarihisera ena apamuriana tájinahi eta nalista tayehe eta libro. Ena nani ena titsiucanahi ema Útsutsure.

⁹ Te evarahapuca ecaicutiara eta juca, tavaraha epanerechaya ichape.

¹⁰ Mácani témeratacayare ema apana, énerichuvare éma te tacaicutiaravapa ticaeratayareva éma apanavare. Mácani ticaparecachi, nacapacayareva éma. Eta tacahe, nácani machanerana ema Viya, tatuparaca nacamichayare tamutu, náimereca yátupina eta náehisirahi ema Viya.

¹¹ Tásiha, nímahavarepa eta apana sárare, táíñehiquenevare. Tiúchujica te amache apaquehe. Eta juca sárare, macunahi ema achane ticaijare Falso Profeta*. Eta juca, tatiarihihi eta apina eta tajihuana, tacuti eta tajihu eta uvesa. Étasera eta táechajisira tacutiahu eta tahu eta Serpiente Satanás.

¹²⁻¹⁴ Énerichuvare ema Falso Profeta majupahahi ema Útsutsure. Muraca eta tasuapacareva eta mavanairipiana ema Útsutsure maicha ema Falso Profeta. Éma, maratahahi tímereca eta tíramicareana. Maratahivare macamirica eta yucu tiásihaya te anuma. Námahahi namutu ena achaneana te juca apaquehe. Ichape eta náramirahi. Étavenehi eta juca táimeresirahi eta tíramicareana, étainapa tivayuacaya ena achaneana, tisuapacarenapa titsiucacarenavarepa ema Útsutsure. Taicha námahahi eta manarasirahi eta majara te tumare; tíápechava títarecachi. Tacahe, ema maca Falso Profeta macavanairipipa náepiyacaya eta máimahi ema Útsutsure, nasiñarajiya.

¹⁵ Ema Viya macamichahi tamutu eta máichaqueneanahi ema Falso Profeta. Vahi máicuñacavanehini eta máchanechirahi eta náepiyarui máimahi ema Útsutsure. Téchajicayare máicha. Eta juca nasiñaraji títipajijiacavainapa tivanereca, ánipa tacahe:

—Namutu tatuparacahi natsiucanu núti. Nácani vahi návarahahini titsiucanuhini, ecapacavacayarehi —tacahepa.

¹⁶⁻¹⁷ Tacahe, ema Falso Profeta macavanairipinapa nacamarca te navahu te vaure, te nanahupuca ena achaneana: ena amaperuana, énapa ena ichanaruana, énapa ena ichavicana. Tayanapane rícoanahipuca, páureanahipuca, líbreanahipuca, mósoanahipuca.

* **13:11** Te pivarahapuca pecha eta apana, pitanuca eta capítulo 16.13.

Námayarehi eta máijare ema Útsutsure étapa eta mayehe número. Énerichuvare macavanairipipa vahi nacuisapa nacujachapa eta navacharapiana ena mamarcareana. Ticatajivainainapa eta náiturusirayare eta nacamunuqueneana taicha vahi nacamarcahini.

¹⁸ Tacamunuhi yátupina vipáneréquenehayare maicha ema Viya, apaesa vácaicutiara eta tacayemaquenehi tayumurevahi eta tuparaqui máijare ema Útsutsure eta 666. Éta, tacunahi eta máijare ema maca achane.

14

Eta najirasa ena 144,000 ena téhicanahi ema Cordero

¹⁻³ Tacahe, nímahavarepa eta plaza ticaijarehi “Sántoquenehi Sión”, te mamirahu ema Viya, máejasirahi eta te trono, te návihahi ena cuátroana ecutiareana énapa ena vénticuatroqueneana víyarahana tuparairucana. Nímahavarepa ema Cordero. Te machacaya natirihini ena 144,000queneana téhicanahi éma. Éna, ticamarcavacahi te nanahuana eta máijare ema Cordero émapa ema Maiya. Nusamavarepa eta muraca ticaemahi te anuma tacutiyaréni eta muraca tírureca. Tásiha, títsivachavavarepa. Nusamapa ticapununeanahi eta camuriqueneana guitarrana. Tacahe, ena 144,000queneana tijiranahi te mamirahu ema Viya. Arapiruhi eta najirasahi. Nájina apanaina títucaina eta najirasahi. Nacarichu títucañahi ena 144,000queneana. Ena nani náuchucureanahi te namuri ena ticavasanahi eta juca apaquehe.

⁴ Matapiravareanahi éna te mamirahu ema Cordero. Tájnavare váhiquene náechipejicavahíni, navirainahini esu esena túhusi. Náehicahi ema Cordero te jácani mapaisirana. Ena nani, ena náinapuraneanahi masantuchaqueneanahi ema Viya émapa ema Cordero.

⁵ Tájina náimatyahini eta náepiyahirahihini. Tájinaquene natapiravainahini te mamirahu ema Viya.

Eta nametarapi ena mapanana ángeleana

⁶⁻⁷ Nímahavarepa ema émana ángele tíararairicahi. Ticametarapihi eta téqueneha mametarapi eta máichuaresirahi eta náeneuchiravaina ena achaneana tiávianahi te tamutu avasareana, apaechajiriruvaqueneana. Máitavacacainapa eta náitaresiraya nácani ena tisuapanahi. Muraca eta máichuaresirahi, ánipa macahe:

—Éneuchava eta epecaturana. Epicauchayare ema Viya, taicha éma tépiyacahi eta anuma, eta apaquehe, eta mar, étapa eta cáquiureana. Émaina ejiraucha, ecunachaya. Émaina etsiuca. Taicha járajapainapa puiti eta máicuñasiraya ena achaneana máeneuchavarahana —macahepa.

⁸ Tacahe, tíuchujicavarepa ema apana ángele. Émapavavare téchajica. Tiáramicare eta macayemaquene. Ánipa macahe:

—Tájinapa táipuina tacamitiaruinapa eta ichapequenehi avasare Babilonia, taicha tétavicavahi eta tamutuirahi taicha eta tauriqueneana. Tavayucacahi tamutu eta apana avasareana táichiraya eta tauriqueneana, tacutihi súcani esena suétaviurequenehi eta sutuhusivahi, namutupahi suvayuaca —máichapa.

⁹ Te títipiricapa, émapavavarepa téchajica ema émana ángele, ema namápananehi. Muracavare eta máechajisirahi. Ánivare macahe:

—Tájnavarepa táipuina eta náicuñanayare ena tijirauchanahi ema Útsutsure étapa eta máimahi náepiyaruihí nasiñarajihí, énaripa ena tíamanahi eta mamarca te nanahuana étapa te navahuana.

¹⁰ Muraca eta nacatajivairaya taicha ichape eta náimiyusemasirahi ema Viya. Ticaepujuquichacasianainapa eta te muracaquene yucu, táetiraráisina eta tamuruira. Muracaquenehi eta nasamira. Táitusiava, natsirihainapa eta máimararasira ema Cordero, énapa ena ángeleana.

¹¹ Máichecuarquireyare eta nacaicuñairayare. Tájina ticaemahaimahi eta yucu. Támutu sácheana, yátiana nacaheyare te yucu ena tijirauchanahi tísiucanahi ema Útsutsure, tímanahivare eta mamarca, tacuna eta máijarehi ema nasiñaraji.

¹² Eta tacahe, ena machaneranahi ema Viya, ena tisuapanahi eta mavanairipiana, túmesamureanayare eta náehisirahi ema Jesús, puiti nacamichayarehi tamutu —máichapa ema ángele.

¹³ Tacahe, nusamavarepa ema téchajicanuhi te anuma. Ánipa macahe:

—Piájuchayare eta juca numetaruvianayare: ¡Tétavicava eta náuricacarevaya ena táimicparuanayare puiti juca vicaijuheyare eta náehisirahi ema Viáquenu! —máichanupa.

Énerichuvare ema Espíritu Santo máichanupa:

—Jéhevare, najacapainapa eta náicuchihi taicha eta nacaemataneasirahi ema Viáquenu. Tájinapa nácamunuimahi, tinaracanainapa —macahepa.

Eta nacurujisiraya ena ángeleana eta achaneana

¹⁴⁻¹⁶ Te nésenicapa, nímahapa eta tíjapu úcaji. Matiaríhihi ema támaquenepahi. Téjacahi éma te úcaji. Achanehi eta máimahi. Te machuti tatiarihihi eta mayehe corona oro. Németeaca títeceavaipa eta macurujisirayare eta trigo. Tásiha, tiúchucapa ema émana ángele te tajuhe eta Templo. Mapiaracapa muraca ema téjacahi tayehe eta úcaji. Máichapa:

—Puití piyana. Picurujica namutu ena achaneana manerejiruanahi ema Viya, taicha tiyuriticavapa eta natuparaha. Piputuvahu* —máichapa.

Tacahe, ema téjacahi te úcaji, tíjahúchavapa macurujicapa ena náequenereruanahi manerejiruanahi ema Viya. Macuchucavacapa eta te juca apaquehe.

¹⁷ Tásiha, tiúchucavarepa ema apana ángele te tajuhe eta Templo te anuma. Németeaca matsecaripavare eta macurujisirayare, étapa eta uva†.

¹⁸ Énerichuvare tiúchucavarepa ema apana ángele eta te mesa tíamahi eta mayucuneasa ema Viya. Éma, téchahi eta yucu. Tacahe, mapiaracapa muraca ema matsecaripa eta macurujisirayare. Máichapa:

—Puiti piyana. Piputuvahu picurujica ena apamuriana achaneana te juca apaquehe. Ticuñacareanapa íchape, taicha tétavicavahi eta náichirahi eta tauriqueneana. Vaipa ticuchapacarehini eta náeneuchiravaina‡ —máichapa ema ángele.

¹⁹ Tacahe, tiyanapa ema ángele. Macurujimuriahapa ena achaneana tíchanahi eta tauriqueneana. Tíñehiquenehi eta náepenirahi taicha títecapapa eta táíñehiquene ecuñaraqui tíásihahi me Viya taicha eta náimiyusemasirahi éma. Tacajapapahecavacahi éna.

²⁰ Te tachachacu eta viávasa eta tacajapapahesihahi. Tiúchucapa eta náitine, tacuti eta cajacure. Étana metro eta táupenava. Tresciento kilómetro eta táunavayare.

15

Eta siétequeneana ángeleana najacapapa eta siétequene ecuñaraquiana

¹ Tacahe, te nésenicapa te anuma, nímahavarepa eta apana ecutiarare. Tétavicavapa eta táramicarevahi. Natiaríhivare ena siétequeneana ángeleana. Ticatuparacasianapa éna eta nacamirisirayarehi eta siétequene ecuñaraquiana te apaquehe. Te táitavapa eta juca ecuñaraquiana, títavainavarepa eta masemanevahi ema Viya.

² Nímaha tativa eta ticutiyaréni táimahi eta une te ichapequene cáquiure. Tétavicavasera eta tajanunusira tacutihi eta espejo. Tásiha, tacutiyaréni eta yucu eta táimahi. Natiaríhivare ena máisapavaranahi najirauchahini natsiucahipucaini ema Útsutsure étapa eta máimahi náepiyaruihi, váhivare náisapavahini nacamarcahini eta mamarca. Te tachacaya eta une titupihanahi. Nacaratacachi eta nayeheana guitarrana máijjaruana ema Viya.

³ Tijiranahi eta jirasare majirasaini ema víyarahaini Moisés, mavanaraini ema Viya. Najirauchahi ema Cordero. Aní tacahehi eta jirasare:

“Píti ichapequenevahi aguenuca, Tétavicava eta pítipajijiasirava.

Tamutuquenehi píturequeneha.

Tétavicavapa eta táramicarevahi eta pépiyaruanahi.

Tiúricarehivare eta pinaquipairuanahi.

Vahi apanapanenejinahini eta péchajiriruvana.

Yátupihí eta piúriya.

Píti aguenucavíhi, péchaya tamutu avasareana.

⁴ Namutuhi tipicaviana, piti Tata.

Namutuvare ticunachaviana taicha piti yátupiquenévihi eta pisantuva, nájina nácutivihini.

Títecanayare nácani achaneana te tamutu avasareana.

Títsiucavianayare taicha náimahahi tatupiruvahi tamutu eta píchaqueneanahi”.

⁵⁻⁶ Tásiha, nímahavarepa te anuma téjiacahi tamutu eta Templo. Nímahapa tiúchucanahi ena siétequeneana ángeleana te téqueneha cuarto te tajuhe, énaquenehi ena ticatuparahanahi eta siétequene ecuñaraquiana táequenereruyare tiúchujica. Eta namuirihana, amairiha eta lino tíjapu tirapepeacavaca. Eta náitijuheana ichapemevaca, títecapavaca te natupana.

* **14:14-16** Te pivarhapuca pecha eta apana, pitanuca Mateo 13.24-39, étapa te 24.30,31. † **14:17** Te juca, ema Juan máechajishihahi eta nacurujisirahi eta uva, tahi eta épire. Te jena avasare, eta nayeherepi ena achaneana, nácatayajica eta uva te raveta, navarairahi nacuchuca eta tachi. ‡ **14:18** Ema ángele máimicutijiricahi eta tíñehiquene ecuñaraqui ticapacayare ena camuriqueneana achaneana étapa eta sárareana. Vuichahasera étaina eta táequeneha ecuñaraqui.

⁷ Tásiha, nímahapa ema émana ecutiarareana nacuatronehi. Májaracavacapa étasivaca eta escudilla oro ena siétequeneana ángeleana. Te tajuhe eta escudilla támapahi eta táíñehiquene ecuñaraqui táicutiarahi eta masemaneva ema Viya. Éma, acanevacaqueñehi eta máítaresira. Máímahapa tamutu eta tauriqueneanahi náíchaqueneanahi ena achaneana.

⁸ Tacahe, nímahapa tjàhúchavapa eta tajurusirahi eta majaraivahi ema Viya, ema acanevaca eta máítaresirahi. Tétavicavahi eta mapicauchacarevahi taicha eta matumeva, maratahairahi tamutu. Tásiha, nájina tiratahaina tisiapana te Templo, váhivare tímahacarehini eta tapajacura táichavenehi eta tavayuchiravahi eta majaraivahi. Tiámainucava te táítauchavapa eta siétequene ecuñaraqui táequenereruyarehi námaqunepahi ena siétequeneana ángeleana.

16

Títauchavapa eta ecuñaraquiana nacamiriruhi ena siétequeneana ángeleana

¹ Nusamapa muraca eta mahu ema Viya tásihaquenehi eta téqueneha cuarto náachusinehi ena siétequeneana ángeleana. Ticavanahianapa éna. Ánípa tacahe eta navanahi:

—Eyanapa escamirica te apaquehe eta juca siétequene ecuñaraqui táíñehiqueneana tiávihanahi te escudilla taicha eta nusemanevahi —máichapa ema Viya.

² Tacahe, tianapa ema tínapuca ángele. Máepusaicapa te apaquehe eta ecuñaraqui tiávihahi te escudilla macarataruhi. Tacahe, ena achaneana tiámanahi eta mamarca ema Útsutsure, táichavenehi eta natsiusirahi eta máimahi nasiñarajihí, témunahiricavapa táuchuacavaca éna eta caracha ticajachacarepa tijehevare, tacutiyañehi eta espuntiu.

³ Ema apana ángele máepusaicavarepa eta macarataruhi tayehe eta mar. Tacahe, eta una tjàhúchavapa ítiama, tijecheamapa. Tépenaracanapa tamutu eta sárarechichana ticavasanahi te mar.

⁴ Ema apana ángele máepusaicavarepa eta macarataruhi tayehe eta cajacureana, te cáquiureana, étapa te tatavarapiana. Énerichuvare ítiamavarepa.

⁵ Nusamavarepa ema máepusaicahi eta juca ecuñaraqui tayehe eta cajacureana. Macahepa éma:

—Tétavicavapa eta piúriya, piti Tata Vicaiyaquene, eta pícuñasiravacaipa puiti ena ticaviurevanahi. Yátupiquenevivi eta pisantuva. Piti pitiarihiquenehi te tépanavainapa, puítiripa pinasirichuhi eta viyehé.

⁶ Ticutihavanainapa puiti eta navarahaquenehi térana eta íti ena tépusaicanahi eta náitine ena pichanerana táimicaparuaña eta náehisiravivi píti, étapa eta nacametarairuirahi eta péchajiriruva. Puiti píjaracaipa eta náerirayare eta ítiama taicha naviurevanahi éna.

⁷ Nusamavarepa eta mahu ema apana tayehe eta mesa tiámahi eta mayucuneasa ema Viya. Ánípa macahe:

—¡Tata Vicaiyaquene, tétavicavapa eta vicunachiravi! Píti, tétavicava eta pítipajijiasirava, píturequeneha tamutu. Pitupiruvahi eta pícuñasiravacahi ena ticaviurevanahi. Vahi pémetavicahíni —máichapa.

⁸ Ema apana ángele máepusaicavarepa eta macarataruhi tayehe eta sache. Tacahe, eta sache tépanavainapa eta tavayuchiravayare tjure, táijuchirapa eta apaquehe éna ena achaneana.

⁹ Jéhesaréinehi, táetaviuchapa eta táijurevahi. Táijuchavacapa ena achaneana. Váhiquenesera náeneuchavahini, váhivare návarahahini náesenicahini ema Viya. Navayuchaichucha eta nasemanevahi. Nacajachapa ema Viya, ema ticavanairipia eta ecuñaraquiana.

¹⁰ Ema apana ángele máepusaicavarepa eta macarataruhi te táinahu eta mávasa capital ema Útsutsure, eta máejasihahi. Tacahe, ticutipa timapicupa te návihahi ena majupahana. Vaipa náimatiequenehahíni tjàhapuca eta náícharacávaya namutu ena machanerana. Ticapitiquiahechavanapa ena achaneana taicha eta tacativa nasama.

¹¹ Tacahe, tisemasamureanapa nacajachapa ema Viya taicha eta tacativahi nasama eta najarana nacarachana. Váhiquenesera téneuchavanáimahi mayehé ema Viya. Váhivare náinajicaimahi eta náíchira eta tauriqueneana.

¹² Ema apana ángele máepusaicavarepa eta macarataruhi tayehe eta ichapequene cajacure ticaijare Eufrates. Tacahe, eta cajacure tiájicupa, apaesa máejerare eta nánucuiraya ena aguenucana tásihanahi te tínapaica eta táuchusine sache, éna ena suntaruana.

¹³ Tásiha, nímahavacapa ena mapanaqueneana ticaetemarahanahi: ema Serpiente, ema Útsutsure, émapa ema Falso Profeta. Tiájajacanahi éna. Te najaca, tiúchuchi eta tavásiyaréni eta varutete. Éreananahi eta júcana, náchanevanahi ena mapanaqueneana.

¹⁴ Éna, títipajijiacavanahi tíchanahi eta tiáramicareana tavayuarauianahi nayehe ena aguenucana te tamutu avasareana. Navaraha nacurujicavacayare, éna ena nayeheana

ejército nasuntaruana apaesa namutu ticanaranaya ema Viya. Tíjahúchavasera muraca eta máquipapaisiravacainapa éma, taicha tétavicava eta máitupajjiasirava, máituruequeneha tamutu.

¹⁵ (Nutí, tíjahúchavaya eta nítecapauchiraheyare éti. Váhiserá tánecapacaremahi eta nítesira. Eta tacahe, tétavicava eta iúricacarevaya te ecunevahi, machu ímacariana eta nuchimapiiraheyare, etsiriocaréipa.)

¹⁶ Tacahe, ena mapanaqueneana éreanana nacurujicapa ena aquenucana énapa ena nasuntarurana tayehe eta vámahí ticaijare Armagedón te náechajiriruva ena israelítana.

¹⁷ Ema téqueneha ángele nasietenehi máepusaicapa eta mayehe escudilla te anuquehe. Tásiha, nusamapa muraca eta mahu ema Viya tíásihahi te trono tayehe eta Templo. Ánipa macahe:

—¡Títauchavapa puiti tamutu! —macahepa.

¹⁸ Tacahe, tíuchucapa eta térameca. Ticaemapa. Tirurecapa. Tiyamuricapa eta apaquehe, muraca eta tayamurisira. Tájina tácuti eta tamuracava nasamasarehini eta acane eta táepaniravahi eta apaquehe.

¹⁹ Te tamutu eta avasareana te juca apaquehe, tíáquipaicavanapa eta pétiana. Tavetijipa eta ichapequene avasare Babilonia. Tíáquipaicavapa tamutu eta pétiana. Mapana eta tájepahi eta apaquehe te tajuhe eta avasare. Taicha ema Viya máechavapa eta naviurevanahi ena tachíchanaveana. Máimerecapa éma eta masmanevehí. ¡Tétavicavahi eta tamuracava eta táicuñal!

²⁰ Énerichuvare, tamutu eta tíurupuhiana téricapa. Eta céroana témitiequenevarepa.

²¹ Témiricavarepa eta ichapequene uverequiana. Tájinvare tácuti eta táichapeva. Cuatro arroba eta tajitacarevavaca. Tásiha, ena achaneana tise manaichucha, nacajachaichucha ema Viya, taicha tétavicava eta tamuracava eta ecuñaraqú, eta táemirisirahi eta ichape uverequí.

17

Esu esena túhusi téjacahi te tamáiquehe eta apanavare sárare tíñehi

¹ Tásiha, típauchanupa ema émana ángele nasietenehi ena ticaratacanahi eta escudillana. Máíchanupa:

—Yare, nímechaviyare eta suícuñayare esu esena túhusi, tavayurevahi eta supecaturana. Ésu, tacunahi eta ichapequene avasare te tachaui eta mar.

² Ena aquenucana te juca apaquehe namutuhi suíturucavaca sucachanevaca éna. Suíchuhavare ena suvarahaqueneanahi suíturucavaca tayehe tamutu eta tájiparacana tammauriqueneana —máíchanupa.

³ Tacahe, ema Espíritu Santo tímimahanuhi eta mavarahaqueneana tímechanuya ema ángele. Ema ángele tíamanupa tayehe eta mávapahi apaquehe. Ánaqui nímahapa esu esena téjacahi te táinahu eta táíñehiquene sárare, máchanevahi ema Útsutsure. Títsi eta táimahi. Te táquehe, amairiha eta ajureca táimijarechavahi, tímijachavahi Váyainahini. Siete eta tachutiana. Díez eta tajihuana*.

⁴ Esu suca esena, eta táimahi eta sumuiriha mularume étapa eta títsi. Tétavicavahi táurina-vavacahi eta suyereruvana, amairiha oro étapa eta táurinaqueneana márijahichichana, étapa eta tíurinana perla. Tásiha, te suvahu sucaratacahi eta ichape suéresesi oro. Tíámahi eta tájiparacana pecatuana táíñemahiqueneana suíchaqueneanahi eta suítaresirahi sutuhuvahi.

⁵ Te suchuti, tatiaríhihi eta ajureca eta suíjaruhi, tayumururevachuchasera eta tacayemaquenehi: “Eta ichapequene avasare Babilonia, tacachichapa ena túhusiana. Táquenuyare eta tájiparacana táíñemahiqueneana”.

⁶ Nucaicutiarapasera eta suícharacavahi esu esena ticavahahi ésu. Táecavahachahi taicha eta suérirahi eta náitineamaini ena machanerana ema Viya, ena suímicaparuanahi taicha eta náechajisihairahi ema Jesús. Eta nímairahi eta juca, ichaperinehi eta náramesirahi.

⁷ Tacahe, máíchanupa ema ángele:

—¿Tájaha tacayema pírameca? Numetacaviyare puiti eta tacayemaquene eta juca pímahaquenehi suyehe esu suca esena, étapa eta sárare superahi, eta síétequenehi tachuti, eta díésquenehi tajihuana.

⁸ Eta juca sárare pímahaquenehi, tanasiqueneripahineni acane, tájinaipahisera puiti. Tíúchujicayarevaresera tásihaya tayehe eta táupenaquene pusu. Ichape eta náramesirayare

* **17:3** Te pivarahapuca pecha eta apana, pitanuca eta capítulo 13.1-8.

eta náimairayare ena achaneana, namutu ena tájinahi eta nalistainahini acane te tépanavainapa eta apaquehe, tayehe eta libro tiama eta nalistana ena náitareruanayare. Tatupiruvayaresera eta sárare tépenayare títaequenénapa.

⁹ “Pisamanuchaha. Puiti numetacaviyare eta tacayemaquenehi eta pímahaquenehi, te pivarahapuca picaicutiaraya. Esu esena tacunahi eta ichapequene avasare. Eta juca siétequene tachuti eta sárare tacunahi eta siétequene cerro távihahi eta avasare.

¹⁰ Tacutiquene eta juca siétequene tachuti eta sárare náicutiaranahi ena siétequeneana aquenucana. Cíncoanapasera ena nájinaripa puiti. Matiarihisera ena émana aquenucaichaha puiti. Ema apana vuíchaha títecapahi. Téhesera te máitecapapa ena téquenehayare, vaipa tiyeremahi.

¹¹ Étarichuvare eta sárare táitareruinhi acane, tájinaripahisera puiti. Éta, macunahi ena nahóchone ena siétequeneana aquenucana. Te máuchujicapa, majacapa eta návacureana ena siétequeneana aquenucana. Tíjuhúchavasera eta máitaviraya.

¹² “Eta pímahaquenehi diésquene tajihuana nacunahi ena apamuriana diésqueneana aquenucanayare. Vuíchahasera ticatuparacasiana. Najacapayaresera eta natuparahanaya ena aquenucanaya eta te návasana. Ánipirichusera nacaheyare eta nacachanerayare eta sárare.

¹³ Ena nani diésqueneana aquenucana tñunana eta napanereru. Náimicatacaya eta sárare eta aquenucairanahi te návasana.

¹⁴ Tacahe, ena nani nacanarainapa ena Cordero. Váhisera náatahaimahi. Máitahacavacayarehi ena Cordero. Taicha éma, yátupiquenehi Rey, Aquenucahivare. Mavanecahi ena réyeana énapa ena aquenucana. Natiarihiyareva ena macachanequeneanayare éma. Nacanerejiquenehi eta máichuirahi ena Viya. Tásiha, yátupihi eta náehisirahi éma.”

¹⁵⁻¹⁸ Tásiha, máichanuvarepa ena ángele:

—Esu esena túhusi pímahaquenehi, tacunahi eta ichapequene avasare. Sucaetemaqueneanahi suítahacavacahi ena aquenucana te tamutu avasareana. Eta jena mar pímahaquenehi te tachausi eta suéjasihahi esu túhusiquenehi, tacunahi eta náichapemuriva ena achaneana te tamutu avasareana. Eta diésquenehi tajihuana eta sárare pímahaquenehi tacunahi ena diésqueneana aquenucana. Éna, nacatichayare esu túhusi. Téhesera te táequeneapa eta juca, náitaracainapa ésu eta sucayehequeneanaini. Náepachiacainapa. Náquipaicayare tamutu eta supenana. Tásiha, eta náemachayare náijuchainapa te yucu. Eta nacuticacairaya, navaraha náimicataca ena Útsutsure, étpa eta nacamitiequenehaya esu túhusi, vahi tásihahini eta napanereruana éna. Émarichuhi ena Viya tjaracavacahi eta napanereruanayarehi, náichirayare eta mavarahaquenehi éma —macahepa ena ángele.

18

Eta táquipaisiravahi eta avasare Babilonia

¹ Nímahavarepa ena apana ángele tíucupaicapahi másihahi te anuma. Muraca eta matuparahahi. Mamicauchaparinehi eta apaquehe eta majaravapahi.

² Téchajicapa muraca, ánipa macahe:

—Tájinapa táipuina táquipairuvainapa eta ichapequene avasare Babilonia. Nájinapa nánasihini nacapenahini ánaqui. Énanecha ticapenanahi ena váinarajiana, étpa eta cáyureana tacajachacarequeneana.

³ Muracaqueneya eta táicuña taicha namutu ena achaneana te avasareana, tétavicavahi eta tavayuasiravacahi eta túhusicare, éthanecha nacasamurehi. Énaripa ena aquenucana, énerichuvare nacahehi éna táemesiavahi. Énerichuvare, ena tjararecarahiana eta téracare, tétavicavaipahi eta náurisirahi tarricochavacaipahi eta tímithacavacayare ena apamuriana —macahepa.

⁴ Nusamavarepa te anuma eta mahu ena apana ángele. Ánipa máichanu:

—Eti machaneranahi ena Viya, vahi ecuehica eta napecaturana ena achaneana te juca avasare. Íuchucavanesera, machu tavehahe eta táíñehiquene táicuñayare taicha eta napecaturana.

⁵ Taicha tétavicavapa eta táuruquechiravahi eta napecaturana. ¡Ániquehepa! ¡Ema Viya máimararacahi tamutu eta tamaeperajivanahi!

⁶ ¡Puiti eti nuchamuriana ángeleana, ícuñacayare! ¡Íjaracayare muraca eta táitsivayare taicha tavayuaca náichahi eta tamauriqueneana ena tachichanaveana eta juca avasare! Cape juca náimicatajivachavacahi ena páureana. Puiti, ichapepanayareva eta íjarasiraya eta nátajivaya.

7 ¡Émecharecayare muraca! Ichapena eta nacatajivaira taicha tétavicava eta náijarasi-ravahi eta nacaetemaravahi eta napanereruhi: “Tájina níchiravainihini eta návihahi. Núti néchahi. Tájina námamunimahi. Vahi nucatajivahini” tacahehi eta napanereruanahi.

8 Eta juca napanereruhi naviurevana eta tájjahúchirainapa eta náicuñayare. Técuhanainapa ena tachichanaveanahi eta juca avasare. Ticatisamurevanainapa. Tíjuyare eta napanana, táimijuchavacainapa éna. Tépenaracanainapa namutu. Májjahúchahi máicuñacavaca ema Viya, máemereuchirahi eta tamutuirahi marataha —máichanupa ema ángele.

9 Natarihivare ena aquenucana te avasareana, ena tavayuaruanahi eta túhusicare, táimiaquijiaruana eta tavayuasiravacahi. Éna, te náimahapa tipusisicapa eta yucu, tíyahainainapa ticatiequenehavanainapa.

10 Nayererequinainapa eta náimarasirayare táichavenénahi eta napisirayare eta yucu táicuñayare eta avasare. Tásiha, nacahepa:

—Páurevisami, piti ichapequene avasare Babilonia. Tíchechupa puiti eta tájjahúchiravapa eta pícuña —nacahepa.

11 Énaripa ena comerciánteana tíjararecarahiana eta tájiparacana te avasareana, tíyahainayareva ticatisamurevanaya eta náimairayarehi eta táitavirapa eta avasare. Taicha nájjinainapa tiviyechaimahi eta námaqueneasana:

12 oro, plata, táurinaqueneana májjahichichana, perla, yerérucava táurinaqueneana, seda, apaimamajiqueneana mularumeana, títsimeana; énerichuvare eta náepiyaruana tíjapu íape ticaijare marfil, yucuqui táurinaquene, bronce, fierro, étapa eta mari ticaijare mármol.

13 Étaripa eta canela, eta apana tájjijiqueneana táhiana yucuqui nasucureana, eta tátyucuqui inciensosare, tíjijiqueneana brillantina, perfumeana. Étaripa eta téracareana, eta acíteana, eta harina te trigo. Étaripa eta sárareana ticavanaracarevaca, eta vuíye, cavayu, burro, énerichuvare eta tinicacareana uvesa, vaca. Étaripa eta carro. Énaripa ena achaneana ticamusuracareana nájarareruanayarehi.

14 Tíápechavavarepa téchajica ema ángele, ánipa maicha eta avasare:

—¡jéhesare pítitátaji! Títavapa puiti eta picayeheraini eta táurinisiqueneana tinicacareana, tétavicavainehi eta tavayuasiravihi. Énerichuvare títavavarepa eta picayehevaini eta tímahacareana táurinaqueneana pipincanillavainihi —máichapa.

15 Énerichuvare ena nani tíjararecarahianaini eta juca tájiparacana ichapemuriqueneana tarricuhaqueneanahi eta avasare, nayererequinairipa eta náimarasirahi eta tacaicuñairayarehi eta avasare. Ticatisamurevanaripahi. Tíyahanaripahi.

16 Tásiha, nacahepa:

—Páurevisami piti ichapequene avasare. Tétavicavainihi eta piúrinavainihi. Picutiníhi esu ena eta táurinava eta sumuiríha lino, mularume, títsi eta tayehejaca eta sumuiríha. Eta piyereruva amairíha oro, táurinaqueneana májjahiana, perla.

17 ¡Puiti, tétavicavapa eta tájjahúchiravaipa témitica tamutu eta pímaqueneanainisamihi! —nacahepa.

Énerichuvare, namutu ena comandanteana táquenuanahi eta lancha, énapa ena pasajeroana, énapa ena marineroana, énapa ena ticaemataneanahi tayehe eta lánchana te mar, nanasípa namutu te tíyerehi.

18-19 Eta náimairahi eta taquijarera eta yucu tájjuirahi eta avasare, típiararecanapa eta nacatiequenehairahi. Tíyahanapa. Nanacahivare eta máteji te nachuti. Tásiha, nacahepa:

—¡Páurevichapucaini! ¡Tamapurúji eta juca ichapequeneeni avasare! ¡Tájina apanaina avasarena tácutihini eta juca ichapequenénihi avasare! ¡Títavapa tamutu eta tarricovainehi virrichochiravainihi vimutu víti tímisiapanahi eta táimahaqueneana víyererueasanahi te lánchana tayehe eta juca mar! ¡Puiti tétavicavapa eta tájjahúchiravahi eta táemitiequenerahi tamutu! —nacahepa.

20 Tíápechava téchajicapa ema ángele, ánipa macahe:

—¡júrisamurecarepa puiti eyehe eti íávihanahi te anuma, étipa eti apóstoleana, étipa eti profetana, emutu eti machaneranahi ema Viya! Taicha máítsiríjiqueneharípa puiti ema Viya tamutu eta táemecatájivasirahehi —macahepa.

21 Tacahe, tíuchujicapa ema émana ángele, máetaviure eta mamuracava. Manaracuhapa eta ichapequene mari tícheyarame. Máquijicapa te une. Tásiha, macahepa:

—Tacaheyare eta tamuracavaya eta náquipaisiraya eta ichapequene avasare Babilonia. Tájínapa tímiapecháimahi náimahahini.

22-23 Tamutu timatina eta te távinenihí. Tájínapa tímiapecháimahi tacasamahuhini eta irimaraquiana te cálleana eta nacapununeraini eta guitarrana, sívivire, nacajane, étapa eta nachujana. Nájjinavarepa ena ticachujarahianaini. Váipavare ticasamahumahi eta piéstana ena araimarahiana. Nájjinainavarepa ena ticaemataneanaini eta tinicacareana.

Títavainapa tamutu eta ematanecanaini. Étaripa eta tamicahuana, tamutupa témitiequenehana. Tamapurujipa eta náiturequenehainihi ichape ena comerciánteana, nájarareca eta tasimutuqueneana. Tamapurujivarepa eta tavayuasiravaca eta apamuriana avasareana téhicanahi éta, taicha puiti nájina ticatajicaimahi eta ichapeni avasare.

²⁴ Eta júcatataji avasare, ticaviurevahi eta nacapasiravacahi namutu ena machaneraini ema Viya te juca apaquehe, énaripa ena profetanaini —macahepa.

19

¹ Te táequenepa eta juca, nusamavarepa eta nahu ena camuriqueneana achaneana tayehe eta anuma. Muraca eta najiraira. Ánipa nacahe:

“¡Aleluyapa puiti!

¡Tétavicavahi eta vicunachiravihi piti Tata!

Eta picatiuchirahavihi, pímerecahieta nacapasiravacahi nam eta pitupajijiasiravahi.

² Taicha títauchavapa eta náicuñahi ena ticaviurevana, vahi pémetaviacavacahini eta náemecharahiana ena túhusiqueneana tachichanaveanainihi eta avasare.

Ichape eta navayuareresirainihi ena achaneana te apanana avasareana eta túhusicare.

Puiti pítipa pítsirijiequenehahi eta nacapasirahavihi viti machaneraini”.

³ Tíápechavanavarepa tijirana:

“¡Aleluyapa puiti, taicha acanevacainapa eta tacaicuñairahi eta juca avasaretataji!” nacahepa.

⁴ Tásiha, ena véinticuatroqueneana víyarahana tuparairucana énapa ena cuátroqueneana ecutiarareana tépuyumurihanapa te mamirahu ema Viya, ema téjacahi te trono. Natsiucapa eta nacunachirahi. Ánipa nacahe:

—¡Amén! ¡Aleluya!

⁵ Tásiha, nusamavarepa eta mahu ema téchajicahi tayehe eta trono. Macahepa:

—Puiti etsiucayarepa ema Viya, emutu eti machanerana, étipa eti amaperuana epicaurahiana mayehe —máichapa.

Eta táurinaquene mapiestara ema Cordero

⁶ Nusamavarepa eta nahu ena camuriqueneana achaneana. Tijajacanahi. Tétavicavahi eta tamuracavahi eta najirairahi. Ánipa nacahehi:

“¡Aleluyapa puiti!

Taicha téjacaipe te mávacure ema Víáquenu, tinacuchavapa eta émairapa técha tamutu éma.

Taicha tétavicava eta máitupajijiasirava, tamutuquenehi máituruequeneha.

⁷ ¡Vámutu vicunacha éma!

¡Tétavicava eta viúrisamurevapa puiti!

Taicha títauchavapa puiti eta macurujisirahavipa ema Cordero, túmicutijiricavahi te araimamuhu.

⁸ Viti véhicanahi ema Cordero, tétavicavahi eta vipachinavaipahi máicha, tacutihi súcani araimayare ticaetupirihipi, sucamuirihahivare eta táurinaquene múiriare lino, tijapu tirapepemeca” nacahepa.

(Eta juca lino, táicutiarahi eta táurivahi eta víchaqueneana viti véhicanahi ema Viya.)

⁹ Tacahe, máichanupa ema ángele:

—Píájuchayare eta juca: Tétavicavapa eta náuricacareva nácani nacaichuhasiqueneanahi tayehe eta táurinaquene mapiestara ema Cordero.

Tásiha, máichanuvarepa:

—Eta juca nímechaquenéviana, yátupiqueneanahi máechajiririvanahi ema Viya —máichapa.

¹⁰ Tacahe, népuyucapa te máivapechacaya ema ángele. Nuvarahapa nutsiucayarehini.

Émasera máichanupa:

—Pécheputachucha. Vahi picutsiucanu. Taicha nútirichuhi picutiquenehuhi mavanaranuhi ema Viya, énapa ena pichamurianahi títauchanahi eta mavanairipiana ema Jesús. Ema Viya, éma tatuparacavihi pitsiucayare. Taicha étirichuhi vicutiqueneana eta vicame-tarairuira eta máechajiriruva ema Jesús —máichanupa.

Ema Jesús, macaperahi eta tijapu cavayu

¹¹⁻¹³ Tacahe, nímahavarepa eta anuma téjiacahi. Tiúchucapa eta cavayu tijapu. Eta máijare “Tímimitirahi me Viya”* ema ticaperapahi éta. Éma, yátupiquene títaurahi; taicha éma, tatupiruva eta mahaquenucavahi. Éma, macatiuchavacahi ena náuriqueneanahi. Énasera

* **19:11-13** Te pivarahapuca pecha eta apana, pitanuca eta Juan 1.1-8.

ena tíchanahi eta tamauriqueneana, muraca eta máicuñasiravacahi. Étapa eta macanariravacahi ena mánarana, vahi macapacavacaimahi ena tájina naviurevaina. Énaserana naviurevanahi, máitaequenehavacayare. Eta tacahe, eta mamuirihana ticaepamehi te iti. Eta máuquihana timuruhevaca tacutiyaereni eta yucu. Te machuti ticayehehi eta camuriquene coronana. Tatiarivare eta ajureca tiámahi eta apana máijare. Macarichusera ema téchahi eta tacayemaquenehi eta ajureca.

¹⁴ Náhicapahi ena mayeheana ejército, tiásihanahi te anuma. Namutu ticaperavaca eta cavayu tijapu. Eta namuirihana, amairiha eta táurinaquene lino tijapu.

¹⁵ Te majaca ema tinapucapahi, tiúchucapa tavasimahiyaréni eta tacasiriquene espada eta macapasihayare ena mánarana. Macaratacahi eta matsucurupa fierroqui eta macurujisiravacaya. Mácatayayajicavacayare ena mánarana tacutiyaere eta nácatayayajisirahi eta uva eta nacuchusirahi eta tachi táitivequenehi. Éta tímereuchayarehi eta tamuracavayare eta náicuñaya, taicha tétavacavahi eta náimiyusemasirahi ema Viya ema máitupajijihauenehi, máituruequenehavare tamutu.

¹⁶ Tatiarivare eta ajureca te tacheyarapi eta mayehe capote tépacuchahi eta mapaheana. Eta táechajiriruva eta ajureca, ani tacahehi: “Éma yátupiquenehi Rey, Aquenucahivare. Mavanecahi ena réyeana énapa ena aquenucana”.

¹⁷ Nímahavarepa ema ángele titupihahi te tamirahu eta sache. Mapiaracavacapa eta cáyureana tiárrairicaráhiana te anuquehe. Ánipa macahe:

—¡Yare, emutu eti cáyureana, iúrujicava! Enicayare eta táurinisiquene tinicacare máeniruheare ema Viya.

¹⁸ Enicayare eta náecheanaini ena aquenucanaini comandanteanaini, ena ajairanaini tímijachavana túmeana, énapa ena nayeheanaini ejército nasuntaruranainipahi, etapa eta táecha eta cavayu naperanaini. ¡Vénicaheyare namutu éna! —macahepa.

¹⁹⁻²⁰ Tacahe, nímahavarepa ema Útsutsure, énapa ena apamuriana majupahana aquenucana te avasareana, énapa ena nayeheana ejércitoana. Matiarivarehi ema Falso Profeta, ema tímerecaparacainihi eta tiáramicareana, mavayuarauianahi nayehe ena achaneana eta náisapiravayarehi ticamarcana, natsiusirayarehiva eta máimahi ema Útsutsure. Tacahe, namutu ena náurujiruvanahi ticanaranahi ema ticaperahi eta cavayu tijapu énapa ena téhicanahi mayeheanapahi ejército. Tacahe, ena ángeleana nacaratacapa ema Útsutsure, émapa ema Falso Profeta. Tásiha, ena apinana náitareruichaha náepujuquichapa tayehe eta táijurequene yucu táetiraraisina eta tamuruira. Éta nacacuñaiyahi.

²¹ Tásiha, ema ticaperahi eta cavayu tijapu, máijahúchapa macapapajicavaca ena suntaruna mánaranahi. Eta macaparaqui eta tacasiriquene espada táuchurehi te majaca. Tásiha, járajapapa eta camuriquene cáyureana, tanicapa eta náecheanaini. Tisatuhevacapa.

20

Eta táichavaquenevaya eta mil año

¹ Nímahavarepa ema émana ángele másihapahi eta te anuma. Mámapahi eta ichapepi cadena, etapa eta llave, tacaerataiyayare eta táupenaquene pusu.

² Tacahe, ema ángele macaratacapa eta táifnehiquene Serpiente, eta ticaetemarerechahi acane, émarichuhi ema Váinaraji Satanás. Tacahe, ticaitihapa ema Satanás tayehe eta ichapepi cadena. Mil áñoayare eta macaitihairayare.

³ Tacahe, ema ángele máiyaracuhapa éma eta te mávacu pusu táupenaquenehi. Manacapa eta llave, máerataequenehapa. Manacavarepa eta ajureca, ánipa tacahe: “Machu évejaca eta juca tapaja”. Tayerevayare eta mil año, vahi ticaetemarecainahi nayehe ena achaneana. Te táequenepasera eta mil año, tiúchujicainavarepa eta ticaetemarecainavarepa, ánipinesera.

⁴⁻⁵ Tacahe, nímahapa ena achaneana náechepureanahi nacaparanainihi. Éna, táimicapananahi eta náehisirahi ema Jesús, étaripa eta nacametarairuirahi eta máechajiriruva ema Viya. Ena nani, vahi náepuyumirauchahini ema Útsutsure, váhivare natsiucachini eta máimahi nasiñarajihini ena apamuriana achaneana, váhivare návarahahini nacamarcachini eta te nanahu etapa te navahu. Ena nani, ena náinapurehi téchepucana te tamirahuichaha eta mil año. Nímahapa eta náejasiraipa te trono, catuparahanapa éna, juéseanaripa. Mil año eta nacatuparahairayare. Énaserana apamuriana náepenaqueneanapa masuapajirairahanainihi, vuíchaha téchepucanaimahi. Tiámainucava te táequenénapa eta mil año, napaenumavainapa téchepucanayare.

⁶ ¡Tiúricacareanayare ena nani tiápechavanayare títarecana puiti juca! Masantuchainapa ema Viya. Vaipa tiápechavanaimahi tépenana. Vaipa ticaicuñanaimahi eta te táijurequene

yucu. Tiyujaracarahianaya mayehe ema Viya, étapa me Cristo. Aquenucarahanayare, taicha ema Cristo májaracainapa eta natuparahanyare. Mil año eta nacatuparahanyare.

⁷ Tásiha, te táequenénapa eta mil año, tiúchucainavarepa ema Satanás tayehe eta macaera-taiyahi.

⁸ Tépanavainavarepa ticaetemarerecayare nayehe ena achaneana te tamutu avasareana. Étaripa eta apinaquene avasare ticaigare Gog étapa eta Magog, macaetemareshayare. Mayurucavacainapa eta nacatianasiraya ema Viya. Tásiha, ticurujicacanainapa ena nayeheana ejércitoana. Tétavicavainapa eta nasimutuvayare. Vaipa titupachacareana eta nasimutuvahi.

⁹ Tacahe, tiyananapa. Ichapecuequeanapaine eta nayanine, taicha eta nasimutuvahi. Nacapayacayarehi eta nachayasirayare eta avasare máemunaruinihi ema Viya, návihahi ena machanerana. Émasera ema Viya, enevanepa máitaequenehavacahi. Tiúcupaicapa eta yucu tiásiha te anuma, tájuchavacapa namutu. Nájina tacaemachaquenéna.

¹⁰ Tásiha, ema Satanás ema tivayuaercainihi, nacaratapaca náepujuquichapa tayehe eta tájirequene yucu, táetiraraisina eta tamuruira. Étaripa eta mávihahi ema Útsutsure, émapa ema Falso Profeta. Tájina nanarasiraimahi. Tamutu sácheana, yátiana eta nacatajivairaya, máichecuarquireya.

Étapa tiámahaviyare eta víchaqueneanahi vicaevatainapa tayehe eta viávihayare

¹¹ Nímahavarepa eta ichapequene trono tijapu. Téjacahi ema Viya tayehe. Tétavicavahi eta máramicarevahi. Eta nímararasirahi éma, némitiacapa. Vaipa necha távihapuca návihahi téhepuca anuma, téhepuca apaquehe.

¹²⁻¹³ Nímahavarepa namutu ena náepenaqueneanaini: ena amaperuana, énapa ena ichanaruana, énapa ena ichavicana. Taicha tichavanahi eta náchanevana namutu, téchepupujicanahi éna tayehe jácani náepenineanainipahi. Namutu titupihanahi te mamirahu ema Viya téjacahi te trono. Tásiha, tatiarihi eta libro tiana eta nalistana ena náitareruanaya. Tatiarihivare eta apamuriana libro tacajuiyahi eta náichavaquenevanahi ena achaneana. Ena ángeleana náechajicuhapahi. Nácani náichahi eta tamauriqueneana, étapa tiviuchahi eta nacayasereserhirayarehi, nacaicuñairayare. Te tivayuchapuca eta napecaturana, muraca eta náicuñayare.

¹⁴⁻¹⁵ Eta nacaicuñaiyahi eta tájirequene yucu, táetiraraisina eta tamuruira. Namutu ena tájinahi eta náijarénahíni tayehe eta libro tiana eta nalista ena náitareruanayare, náepujuquichapa tayehe eta tájirequene yucu, tamutu eta náqueheana étapa eta náchanevana. Máitavacacainapa eta nacatajivairayare. Máitujianainapa tayehe.

21

Ticasipainapa eta anuma étapa eta apaquehe

¹ Nímahavarepa eta tacasipairaripahi, tamuturipahi arairu eta anuma étapa eta apaquehe. Tájina eta ichapequene une mar.

² Tásiha, nímahavarepa nútí tiúcupaica eta tiúrina avasare. Ticaigarehi Arairu Jerusalén. Tétavicavahi eta tasantuva, taicha tásihapahi te anuma te mávihahi ema Viya. Tiúrinapahi eta tacaetupirihirahi, tacutihi te ticaetupirihí esu araimayare.

³ Nusamavarepa muraca eta mahu ema ángele, tiásihahi te anuma. Ánipa macahe:

—Puiti, ema Viya macucupaicapa eta mapena te juca apaquehe. Áninapa macavasaya. Távaháchahénapa eti achaneana. Yátupiquenénapa Ecaiyaqueneya éma.

⁴ Tacahe, ema Viya macamitiasinaheyare eta íyairana. Váipavare épenaimahi. Váipavare ecatisamurevaimahi. Tájina ticaiyacahémahi. Váipavare ecatajivaimahi taicha tájinapa tiviuchahémahi —macahepa ema ángele.

⁵ Tacahe, nusamavarepa eta mahu ema Viya ánipa macahe:

—Puiti tépanavapa arairu, tamutupa ticaitsiva nicha nútí —macahepa.

Tásiha, máichanuvarepa ema ángele:

—Piájuchayare puiti eta juca, taicha yátupiqueneya eta táichararacavaya. Tamutuyare títauchava. Jéhevare eta tisuapacareana —máichanupa.

⁶ Ánivarepa macahe ema Viya:

—Títauchavapa puiti tamutu eta nupanereruana. Nútira néchahi tamutu eta táepaniravahi eta apaquehe. Nútirichuvare néchahi eta táimiyaniiravahi tiuri. Puiti nútí nítauchapa tamutu. Eti emaunehi, nútí njaracaheyare eta máitavacaca une ticaitarecarahi. Tájina vahi evacharecainahi.

⁷ Tacutiquene, eti ecamichanahi, ímianavahi eta éhisiranuhi, njaracaheyare tamutu eta júcana ícuchianayarehi. Nútí ecaiyaqueneya, taicha nuchichaheyare éti. Nútí néchaheya éti.

⁸ Ticaicuñanayaresera namutu ena tipiturijiana, ena masuapajirairahana, ena máeperajiana, ena ticapahiana, ena túhusiana, ena íápemareana, ena ticasíñarajiana ena achanemirana, éñapa ena tépiyahirahiana. Ticaquijianayare namutu éña tayehe ena náicuchi tájjurequene yucu máitavacaca ena tamuruira, táetiraraisina ena tamuruira. Váhiquene tíuchucanaimahi tayehe —macahepa.

Eta arairu avasare Jerusalén

⁹ Tacahe, tipauchanupa emá émana ángele nasietenehi ena ticaratacanahi ena siétequene escudilla tíamapahi ena siétequene ecuñaraqüiana táíñehiqueneana. Tásiha, máichanupa:

—Yare. Nímechaviyare ena avasare, návihahi ena machanerana emá Cordero. Tímicutijiricavahi esu araima sucaetupirihiquenehi ena suítauchiravayare —máichanupa.

¹⁰ Tásiha, emá Espíritu Santo tímimahanuhi ena mavarahaquene tímechanuya emá ángele. Emá ángele tíamanupa ena te tápusi ena ichapequene cerro anuquehequene. Tímechanupa ena táucupaisirahi ena avasare Arairu Jerusalén. Tétavicavahi ena tasantuva taicha tásihahi te anuma te mamirahu emá Viya.

¹¹ Eta juca avasare, tétavicavahi ena tajaraivapahi taicha tíamahi ena majaraivahi emá Viya. Eta táimahi ena tajaraivahi tacutiyaereni ena tajanunusira ena márijahi tijararacahi.

¹² Te tachachacuana ena avasare, tatiarihi ena tacuti yúchama tímítutuche. Anuquehe ena táichapeva. Tatiarihi ena dócequene tapajacurana, távihahi ena ajureca náijare ena dócequeneanaini náchucanaini ena israelítana. Natarihivare ena ángeleana tayehe eta tapajacurana.

¹³ Tatiarihi mapana tapajacura te tinapaica ena táuchusine ena sache. Mapanavare tapajacura te tinapaica ena cajaha. Mapanavare tapajacura te tinapaica ena vana. Tásiha, ena mapanaquenevare te tinapaica ena tasiapine ena sache.

¹⁴ Te apaquehe eta yúchama, tatiarihi ena doce máriméana táejahameruanahi ena yúchama. Táimahi eta dócequene náijareana ena apóstoleana mayeaneanahi emá Cordero.

¹⁵ Emá ángele emá téchajicanuhi macaratacachi ena máicitiriqui úruqui, máicutichihayare ena tapajacurana éta ena yúchamana.

¹⁶ Eta avasare falaru eta táimahi. Eta táunava ticuticacachi ena tajuhe. Dos mil doscientos kilómetro ena táichapeva ena avasare. Ticuticacachi ena táunava, ena tánuqueva, éta ena tajuhe.

¹⁷ Máicutichavare eta yúchama. Sesenta y cuatro metro ena tánuqueva.

¹⁸ Eta yúchama amairiha mari jaspe tímájumeana. Eta avasare amairiha ena yátupiquene oro. Tijanunucachi tacuti ena cristale eta tajarahivahi.

¹⁹ Eta máriméana tachunusipévanahi ena yúchama, tatiarihihi ena táurinaqueneana mari. Eta tnapuca tacayehehi ena mari ticaijare jaspe. Eta apana tacayehehi ena ticaijare zafiro. Eta apana tacayehehi ena ticaijare ágata. Eta apana tacayehehi ena ticaijare esmeralda.

²⁰ Eta apana tacayehehi ena ticaijare ónice. Eta apana tacayehehi ena ticaijare cornalina. Eta apana tacayehehi ena ticaijare crisólito. Eta apana tacayehehi ena ticaijare berilo. Eta apana tacayehehi ena ticaijare topacio. Eta apana tacayehehi ena ticaijare crisoprasa. Eta apana tacayehehi ena ticaijare jacinto. Eta téqueneha tacayehehi ena ticaijare amatista.

²¹ Eta dócequene tapajana tacayehehi ena doce perla. Tayehapachuhi ena tapaja ena étana perla. Eta tnapuca calle, tacayehe ena yátupiquene oro, tijanunucachi tacuti ena cristale eta tajarahivahi.

²² Te jena avasare, tájina nímahahini ena Templo nayujarasirénahini. Tájina tácamunuhini ena nayujarasirareyare taicha matiarihini emá Viya máitupajijihaguene máituruequenehavare tamutu, émapa emá Cordero. Návaháruhi namutu.

²³ Tacutiquene, vahi tácamunuhini ena sache étaripa ena caje eta tamicauchirainahini ena avasare. Taicha tamicauchahi ena majaraiva emá Viya, émapa emá Cordero.

²⁴⁻²⁶ Tájina táimatiyaimahi ticaerata ena tapajana, taicha tájina tímipicuina tayehe, tájinavare yátina. Tásiha, namutu ena achaneana te apanana avasareana macuchucureanahi emá Viya, ichape eta napicauchirayare ena Arairu Jerusalén, ichapevare ena nacunachirayare. Tisuapajirahianayarehi tayehe ena vanairipiana tásihaqueneanahi ena juca mávasa emá Viya. Enechivare ena aquenucana te avasareana, ichape ena námavahuanayare me Viya te jena avasare mávihahi éma.

²⁷ Tájina náimatiyaimahi tisiapanana ena nachipejiqueneana énaripa ena tícharahiana ena tamaeperajivaqueneana énaripa ena ticaetemarrahiana. Nacarichu tatuparaca tisiapanayare ena tatiarihi ena náijareana tayehe ena libro macarataru emá Cordero, tiama ena nalista ena náitareruanayare.

22

¹ Tásiha, emá ángele tímechanuvarepa ena tapachinaquene cajacure. Tétavicavahi ena tacaitarecaravahi ena tahunera. Tacutiyaereni ena cristale ena tajararaesira. Eta táuchusihahi ena mayehe trono emá Viya, émapa emá Cordero.

² Tacahe, tatiarihihi eta yucuquiana, ticaitarecarahi eta tahi. Eta távihahi te enumuhui-yapahi eta tínapuca calle, te tachausipahivare eta cajacure. Tásiha, dócehe ticahi te étana año. Cájepachu eta tacahira. Ipurujivare eta tapacaji, tacanaraca ena achaneana te avasareana.

³ Tájínapa tímiapchaimahi tiviuichaimahi ena achaneana ticavasana tayehe eta juca avasare, máejasihahi ema Viya, émapa ema Cordero. Vimutu viti mavanaranahi, máitavacacayarehi eta vijirauchirayarehi, vitsiusirayare.

⁴ Vímararacayare eta mamira tamutu sácheana. Vicamaracayare eta máijare te vinahu.

⁵ Aquenucahaviyare. Máichecuaraquireya eta vicatuparahairayare. Ánaqui tájinapa yátina, tájinainapa eta timapicu. Vaipa vicamunuimahi eta tajaraiwa eta sache. Váhivare vicamunuimahi eta vimícahu. Taicha tamicauchayare eta majaraivahi ema Viya.

Tiánehipa eta máitesirayare ema Jesucristo

⁶ Máichanuvarepa ema ángele:

—Eta juca númerovivi, yátupiqueneya eta táicharacavaya. Tamutuyare títauchava. Jéhevere eta tisuapacareana. Taicha émarichuhi ema Viya tivanecanuhi eta nímitusíravi píti. Acane ema Viáquenu máimitucavacahi ena profetana eta mapanereruana. Puiti mavaraha nímechayare eti mavaneranahi eta táequenereruhana mapanereruana, tayehe eta táijahúchirainapa eta táichavaquenevaya.

⁷ Énerichuvare ema Viáquenu máichahehi: “Níjahúchavanénapa nútijapa”.

¡Tétavicava eta náuricacarevaya ena tisuapanahi, napanerequenehairahi eta nímechaviqueneanahi, étaripa eta piájurequeneanahi te juca libro! —macahepa ema ángele.

⁸ Tétavicava eta náramirahi nútí eta nímairahi tamutu eta júcana, nusamirahi nuti Juan. Tásiha, te tamutupa, népuyucapa te máivapeana ema ángele ema tímechanuhi eta juca. Nuvaraha nutsiuacayarehini.

⁹ Émasera máichanupa:

—Péchepecachucha. Vahi picutsiucanu. Taicha nútirichuhi picutiquenenuhi mavanaranuhi ema Viya, énapa ena pichamurianahi ena ticametarairuana eta máechajiriruvana ema Viya, énaripa ena tisuapanahi tamutu eta tacajuqueneanahi te juca libro. Éma tatuparacahi pitsiuacayare ema Viya —máichanupa.

¹⁰ Énerichuvare máichanuvarepa:

—Vahi picuañaucha. Pimetajírca eta juca pimetacasivanahi eta máechajiriruva ema Viya piájuchaqueneana eta te juca libro, taicha tiánehipa eta táitauchiravayare tamutu eta táicharacavayarehi.

¹¹ Énamera, nácani váinarajianahi, vahi picucamesavaca. Námiyanavachaha naicha eta navainarajiva. Nácani tíchanahi eta tamauriqueneana, námiyanavachaha naicha eta tamauriqueneanahi. Nácanisera tíchanahi eta táuriqueneana, tatuparacahi námiyanavachucha naicha eta táuriqueneana. Nácani matapiravareanahi te mamirahu ema Viya, námiyanavavare náuri eta mayehe —máichanupa.

¹² Ánivare macahe ema Viáquenu:

—Nútijapavanénapa. Námayarepahi eta nájaracasianayrajiva. Nácani tíchanahi eta tamauriqueneana, náare ena ticaemataneacanuanahi eta náitaresirahi te juca apaquehe. Énerichuvare námayarepahivare eta nayeheanayare ena masuapajirairahana.

¹³ Nútira néchahi tamutu te tépanavainapa eta apaquehe. Nútirichuvare néchahi eta táimiyániravahi tíuri. Puiti nútí nítauchayare tamutu —macahepa.

¹⁴ Tétavicava eta náuricacarevayare nácani tépachinachana eta náchanevana, tacuti te ticasi-pajihana eta namuirihana. Éna tatuparacahi nanicayarehi eta tahi eta yucuqui ticaitarecarahi. Tatuparacahivare nasiapayare eta Arairu Jerusalén.

¹⁵ Énamera ena masuapajirairahanahi vahi títujicavanaimahi tisiapana. Nanasiyare te aneca, énapa ena íápemareana, ena túhusiana, ena ticapahiana, ena ticasífarajiana eta achanemirana, énerichuvare ena tíúricanahi tépiyahírahiana ticaetemarrahiana.

¹⁶ Macahevere ema Viáquenu:

—Nutí Jesús, nuvanecahi ema nuyehe ángele máimicaecherachayarehi tamutu eta juca numetarapiana puiti eyehe eti nuchanerana te avasareana. Nútí, yátupínuhi Reyhi ecucha-paquenehi, mavanerunuhivare ema Tata. Tétavicavahi eta nujaraivahi taicha eta aquenucairanuhi ichape —macahepa.

¹⁷ Ema Espíritu Santo énapa ena téhicanahi ema Cordero, tíchuarecana éna:

—Yare, epauchahavi —náichapa.

Énapa nácani tisananaya eta juca ichuárapi, énerichuvare éna náichuarecavare:

—Yare, epauchahavi —náichapa.

Énapa nácani timaaneanayare, náiteca apaesa náera eta une ticaitarerahi. Tájina vahi navacharecaimahi.

¹⁸ Emutu eti esamayare eta juca mametarapiana ema Viya tacajuqueneanahi te juca libro, nuvaraha numetacahe núti: Nácani navayuyupicayare eta táechajisihaqueneanahi eta juca libro, énerichuvare ema Viya mavayuchinayare eta nacatajivairayare tayehe eta juca ecuñaraquianayare táechajisihaqueneanahi.

¹⁹ Énerichuvare ecaunchava eta iáñauchira eta táechajisihaqueneanahi te juca libro, machu máñauchahe ema Viya eta esiapira eta juca mávasa sántoquenehi, machu vahi macuenicahe eta tahi eta yucuquiana ticaitarecarahiana, étaripa nímahaqueneanahi nájurequeneana te juca libro.

²⁰ Émarichu ema Viáquenu titametacahi tamutu eta júcana. Énerichuvare máichahehi:

—Yátupi nútijapavaneyare —macahehi.

¡Jéheyavapuca, Tata Jesús! ¡Pítecavanepaini! Amén.

²¹ Ani táichecuiya eta juca nájurehi. Nuyaseuchaheparaca emutu éti me Viáquenu Jesu-cristo, táetaviuchahini eta iúricacarevaya máicha.